







*Henry Seymour Esq<sup>r</sup>*



Keep with DC 37.1166 1572x  
Folio

LUCIEN GOLDSCHMIDT, INC.

1117 Madison Avenue, New York 10028 TRafalgar 9-0070 Cables: Printsmith

Rare & Fine Books  
French Books  
Prints & Drawings

MONSTRELET (Enguerran de).  
Volume Premier (-Troisième) des Chroniques...  
contenant les cruelles guerres civiles entre  
les maisons d'Orléans et de Bourgogne, etc.  
Paris, L'Huillier, 1572, 4to, 3 tomes in 2  
volumes, early nineteenth century dark blue  
straight-grain morocco, blind-pressed borders  
on the sides, gilt and blind-pressed backs,  
gilt edges.

(XII), 324, (VI); (VIII), 201, (1 blank), (IV);  
(IX), 1 blank, 255, 1 blank, (XI) leaves.  
Brunet III, 1832 "Cette édition est la plus  
belle que nous ayons de ces chroniques". It  
is the enlarged and revised text given by  
Denis SAUVAGE, which carries the narration  
to the time of King Francis I (1516).

Splendid imprint in Roman letters (lettres  
rondes), with woodcut initials and woodcut  
printer's device.  
A few minor imperfections.  
Very clean and well preserved copy. Ex-libris  
of Henry Seymour.



Moutchelet 1572

3w 2 vels



























VOLUME PREMIER DES  
CHRONIQUES  
D'ENGVERAN  
DE MONSTRELET  
GENTIL-HOMME IADIS DEMEVANT  
A CAMBRAY EN CAMBRESIS.

Contenans les cruelles guerres ciuilles entre les maisons d'Orleans & de Bourgogne, l'occupation de Paris & Normandie par les Anglois, l'expulsion d'iceux, & autres choses memorables aduenues de son temps en ce Royaume, & paÿs estranges.

*Histoire de bel exemple & de grand fruit aux Francois, commenceant en l'an M. CCCC. où finist celle de Iean Froissart, & finissant en l'an M. CCCC. LXVII. peu outre le commencement de celle de Meß. Philippes de Commines.*

Reueüe & corrigée sur l'exemplaire de la Librairie du Roy, & enrichie d'abbregez pour l'introduction d'icelle, & de tables fort copieuses.



A PARIS,

Chez Guillaume Chaudiere, rue saint Iaques, à l'enseigne du Temps  
& de l'Homme Sauvage.

M. D. LXXII.

Avec Priuilege du Roy.









## AV ROY.



**S**IRE, l'autheur de ceste histoire estoit un gentilhomme demeurant à Cambray, d'où, comme d'un lieu costier & hors de la meslée, il consideroit les guerres qui se mesmeurent de son temps entre vostre tresillustre maison d'Orleans, & celle de Bourgonne, & les descriuoit avec une merueilleuse diligence, iusques à inserer tout du long en ses escrits les mandemens, edits, lettres de Roys, & Princes, les mesmes parolles qu'ils auoient proferées, articles de paix & trefues, capitulations de redditiōs de villes, deffiz, & sommatiōs, & tout ce qui peult donner foy, & apparence de verité à une histoire: lesquelles particularites estans omises ou legerement touchées, par ceux qui ont voulu plus poliment escrire, comme si l'elegance de leur stile y resistoit, sont neantmoins curieusement recherchées par les hommes studieux de cognoistre les coustumes, loix, meurs, & manieres de faire de noz deuan-ciers. Et toutesfois ceste tant fructueuse histoire gisoit en la pouldre, ne se trouuant imprimée qu'en vieilles lettres Gottiques, encores si raremēt qu'elle demouroit incogneüe au commun des gens d'esprit de ce Royaume, mesmes en un temps qu'ils en pouuoient tirer plus d'instruction & prudence à recognoistre les calamités dont n'agueres estoit affligée leur patrie, & y pouruoir en leur endroit par l'exemple du temps passé. Car à la verité ceste histoire traite d'un siecle, auquel la France estoit malade presque de mesme maladie que nous l'auons veüe, sinon que, la cause en estant aucunement differente, vous y auez (Sire) par vostre singuliere vertu & prudence sceu donner la guerison d'une autre sorte, & de meilleure heure. C'est l'occasion (Sire) qui nous a fait estimer que V. M. prendroit plaisir à veoir cest æuure renaistre par tel artifice d'impression & formes de caracteres qu'il en fust de tous poincts embelly réparé & moins ennuyeux à y passer les heures que V. M. employe à la lecture des bonnes histoires. Esperans tant de sa bonté & liberalité qu'elle nous aydera à supporter les grans fraiz, que nous y auons soustenuz l'espace de quinze mois: nous augmentā le courage & moyen d'entreprendre semblables labours: & nous donnera à iamais occasion de prier Dieu pour la longue durée, heureux entretien, & accroissement d'icelle.

De Paris ce premier iour de Novembre 1571.

Voz treshumbles seruiteurs & subiects  
l'Huillier & Chaudiere Libraires de  
l'Vniuersité de Paris.



ABBREGE' DES CHRONIQUES D'ENGVERRAN  
DE MONSTRELET.



ESTANT aucunement appaisée la contention qui festoit meüe entre les Ducs Loïs d'Orleans & Philippes de Bourgogne, à leur retour des voyages qu'ils auoient faits, le Duc d'Orleans en Luxembourg pour en prendre possession suivant l'acquisition qu'ils en auoit faicte du Roy de Boëme, & le Duc de Bourgogne en Bretagne pour mettre la personne & biens du ieune Duc de celle terre (de qui le pere n'agueres estoit decedé) en la garde & tutelle du Roy de France: eux & les autres Princes qui tenoit son conseil pendant qui languissoit de sa maladie accoustumée, decernent guerre contre Henry de Lenclastre: par ce qu'il auoit comme tyran, freschement vsuré le Royaume d'Angleterre sur le Roy Richard gendre du Roy de France: & que sans luy chaloir de la peine que l'Empereur de Constantinople (qui pour lors estoit en ce pais implorât l'ayde des Princes Chrestiens contre les Turcs) auoit prise à mettre d'accord deux si puissans Royaumes, ne se feust voulu ranger à aucune raison, ne mesme faire deliurance à la fille de France vesue du Roy Richard du doüaire qui luy estoit contuenancé: aussi que l'ayant le Duc d'Orleans prouoqué à faire armes par honneur & plaisir, ne l'auoit voulu accepter pour ne l'estimer de dignité egalle: sur quoy festoient entrescript plusieurs cartels iniurieux. Et pour ne perdre l'opportunité de luy faire la guerre en son pais, on enuoye au secours des Gallois (qui auoient peu auparauant perdu la bataille contre luy) vne armée sous la conduicte du Comte de la Marche, qui ne peult prendre terre pour les vens contraires. Depuis on y en depesche vne autre sous la charge des Marechal & Maistre des Arbalestriers de France, laquelle ioincte avec les Gallois entre bien auant en Angleterre, & luy presente la bataille: mais en temporizant il ancantist l'entreprise. Ce pendant le Comte de Clermont aîné de Bourbon prend sur luy plusieurs villes & chasteaux en Guyenne. D'autre part, le Comte Valeran de S. Pol, luy faisant la guerre en son priué nom, & les Bretons en leur endroit, courent la coste d'Angleterre, & s'accagent quelques isles voisines. Or par ce que le schisme de l'Eglise desplaisoit infiniment au peuple & clergé de France, le Duc d'Orleans pour y pourueoir fait vn voyage en Auignon vers le Pape de la Lune, dont il ne raporte que de bonnes parolles. Sur ces entrefaictes est allé de vie à trespas le Duc Philippes de Bourgogne, Jean son fils luy succede, tant en ses estats qu'en la haine qu'il portoit au Duc d'Orleans: laquelle s'enflamme de là en auant d'autant plus, qu'elle entre en vn esprit iuuenil & bouillant, prenant pour lors occasion de la renoueller, de ce qu'il luy sembloit, que le Duc d'Orleans vouloit rompre les accords de mariage d'entre le Daulphin & la fille d'iceluy Duc de Bourgogne, son fils Comte de Charolois, & Michelle fille du Roy: & que luy qui se disoit deux fois Pair & Doyen des Pairs, & qui esperoit estre à l'aduenir beaupere du Roy de France, & se sentoit plus riche que les autres Princes, se persuadoit auoir plus de part & d'interest au gouuernement des affaires du Royaume que le Duc d'Orleans: n'ayant que craindre qu'il vint à la couronne (bien qu'il feust frere du Roy) par ce que le Daulphin son gendre auoit deux autres freres, l'un Duc de Touraine, qui espousa l'heritiere du Comte de Hainault & de Holande frere de la femme du Duc de Bourgogne, l'autre Comte de Pontieu, qui depuis se maria en la maison d'Anjou: car quāt à l'occasion qu'aucuns auteurs ont diuulgée du portraict d'icelle Duchesse de Bourgogne, cestuy n'en fait mention. La couleur que prend pour ceste heure le Duc de Bourgogne de se mouoir appertement contre le Duc d'Orleans est, qu'on l'auoit refusé au priué conseil (ou iceluy Duc d'Orleans presidoit) d'argent & de gens pour deffendre la frontiere de Flandres, d'Arthois & de Boulenois qui estoit souuēt rauagée par les Anglois. Parquoy s'achemine à Paris a grosses troupes en armes couuertes, fait retourner le Daulphin du chemin de Melun, où la Roïne & le Duc d'Orleans festoient retirez, propose deuant le Roy vne requeste tendant à la reformation du Royaume, & esmeut le peuple & vniuersité de Paris d'en faire autant. Le Duc d'Orleans pour empescher ses desseins dresse vne grande & forte armée, avec laquelle il s'approche de Paris: sur ce les Ducs d'Anjou, & de Berry moyennent la paix entre eux, par laquelle ils demeurent en apparence contens & recôciliez. On prouoit par apres au schisme des Papes de Rome & d'Auignon, se soubstrayāt de l'obeissance de l'un & de l'autre & promouuāt vn Concile à Pise, où tel Pape fut eleu qu'à luy seul de là en auant fut par tout obey en la spiritualité. Pendant ce, le Duc d'Orleans va avec armée contre les Anglois en Guienne, où il ne fait aucun exploit memorable. Le Duc de Bourgogne de son costé pour assieger Calais, met sus vne grande armée, qu'il cassa incontinent, par l'ordonnance & mandement expres du priué conseil du Roy: dont estimant que le Duc d'Orleans feust cause, il vient à Paris, & dissimulant le mal qu'il luy en vouloit, aposte quelques assassins (lequels ayans esté par auant destituez par le Duc d'Orleans des estats ausquels le feu Duc Philippes les auoit auancez, luy en portoient haine particuliere) & par eux, le fait cruellement massacrer vn soir bientard à Paris, pres la porte Barbette en la vieille rue du Temple. Depuis voyant que l'indignité du fait irritoit toutes gens contre luy, mesmes les Princes à aucuns desquels il s'en estoit decouuert l'euede de Paris, & se retire en Arthois: où ayant assemblé plusieurs de ses amis & vassaulx, est conseillé d'aduoir le fait, si qu'estant par apres retourné en Paris, sur l'assurance que luy auoient donnée les Ducs d'Anjou & de Berry (qui furent expres iusques à Amiens pour l'adoucir de peur que plus grād trouble ne s'en ensuiuiſt) fait par vn Theologien, proposer deuant le Roy que le meurtre auoit esté bien & iustement commis, chargeant la

memoire



memoire du deffunct de plusieurs blâmes & reproches : & surce ayant obtenu du Roy lettres d'abolition s'en retourne en ses Païs. La vefue & enfans d'Orleans viennent parapres en court & presentent contre luy au Roy vn ample libelle d'accusation , lequel estant diuulgué anime merueilleusement les Princes & seigneurs de France, à poursuiure ceste vengeance : mais la victoire qu'il obtient ce pendant sur les Liegeois (qui s'estoient reuoltez contre leur Euesque son beau frere) le rend si redouté, qu'on aduise pour plus expedient de vuyder le different à l'amiable : & surce est bastie la paix de Chartres, comptée la seconde entre icelles maisons d'Orleans & de Bourgongne . Par ceste paix la puissance du Duc de Bourgongne tant accroist que toutes choses en court se passent à sa volenté. Puis sous couleur de pouruoir à la recherche de ceux qui auoient manié les affaires & finances du Royaume, il court sus aux seruiteurs & amis de la maison d'Orleans, dont il feit entre autres mourir Montagu seigneur de Marcouffis grand maistre de France : de ce fâché le Duc de Berry se retire de court , & joignant ses forces avec celles des enfans d'Orleans , & du Duc de Bourbon se campe deuant Paris, pres son chasteau de Vincennes : où se fait la troisieme paix , en laquelle fut accordé que les Princes partiaux s'abstiendroient de venir en Court, & qu'en leur lieu seroit deputé nombre de notables cheualiers pour assister au Roy & expedier les affaires selon leur aduis : mais en l'election d'iceux, le Duc de Bourgongne se porte si caultement , que la plus part sont de sa faction : occasion que les Orleannois sentans leurs affaires desaduantagees se mettent aux champs contre luy, courent son païs d'Arthois, & viennent poser leur camp deuant Paris du costé de S. Denis. Le Duc de Bourgongne suruient au secours, & leurs ayant leué avec grand meurtre de leurs gens la ville de S. Clou, qu'ils auoient fortifiée , les contraint de deloger . L'année ensuiuant il mene contre eux le Roy, & le Daulphin avec puissante armée, & assiege dedans Bourges, les Ducs de Berry & de Bourbon : les chargeant d'auoir prins alliance avec les Anglois, comme la verité est : car ils font ce pendant vne descente en Normandie pour venir au secours de Bourges, ce qui contraint le Duc de Bourgongne, ioinct le commandement expres du Daulphin, à qui ceste guerre ennuye merueilleusement, d'accorder la quatrieme paix, nommée d'Auxerre, parce qu'elle y est iurée. Depuis croissant le Daulphin d'age & de iugement, les manieres de faire du Duc de Bourgongne bien qu'il fut son beau-pere luy desplaisent tant qu'il commence appertement à luy contredire, & à tendre indifferamment la main à ceux du party d'Orleans, comme celui de Bourgongne. A quoy le Duc ne sachant donner autre remede, incite le peuple de Paris à se mutiner, & luy fait faire vne infinité d'insolences & d'indignitez, sans respecter les personnes du Roy ne du Daulphin : ce qui est cause, que la part Orleannoise s'arme de rechef, & que sur ce differend se conclud vne cinquiesme paix à Ponthoise : au moyen de laquelle, le Daulphin demeurant en sa liberté, r'assure tellement ses forces, que le Duc de Bourgongne se sentant le plus foible, dans Paris s'ecoule secrettement en son païs bas. Parquoy ceux d'Orleans se font les maistres de la ville de Paris, y affligent en toutes sortes la faction Bourguignonne, & (ce que le Daulphin n'eust jamais crainct) font passer plusieurs choses contre son gré, mesmes luy ostent de sa maison quelques gentils-hommes ses fauorits, soubçonnez tenir du party contraire. Par despit de quoy, il appelle à son secours par lettres escrites de sa main le Duc de Bourgongne : lequel les ayant publiées de toutes parts, assemble force gens de guerre, vient deuant Paris pensant y entrer par intelligence qu'il y auoit : mais les Orleannois y donnent si bon ordre ( ioinct que le Daulphin le contremanda ) qu'il est contrainct rebourser chemin, laissant en Compiengne, Soissons, & autres villes garnisons qu'il ne veult oster pour commandement qu'on luy face : de quoy ne pouuant estre excusé par ceux mesmes qui desirent la paix, on mene aussi contre luy le Roy avec toutes ses forces, & apres auoir prins d'assault Compiengne & Soissons, avec grand tuerie des siens, & Bapaume par composition, on vient deuant Arras, où le Daulphin ne voulant mettre son beau-pere au desespoir (car il estoit presque abandonné de tous ses partizans s'estant le Comte de Neuers son frere retiré de sa ligue, le Comte de S. Pol dissimulant le suiure, mesmes les Flamans ses subiects differans de vouloir soustenir la guerre contre le Roy) accorde la paix comptée pour la sixiesme, assez desaduantageuse pour le Duc : sur tout, par ce qu'il est contrainct de passer article qu'on pourroit bannir iusques à cinq cens personnes de sa faction hors du Royaume de France. Pendant que l'execution de ceste paix se met en delay, tant pour les soupçons des parties, que pour la rigueur des conditions d'icelle, le Roy d'Angleterre, fait vne descente à la bouche de Seine, & prend Harfleur par composition, apres vn long siege, delà retournant par le païs de Pontieu à Calais deffaict à Agnicourt vne armée Françoisse que conduisoit messire Charles d'Albret Comte de Dreux & Connestable de France, qui y mourut, avec le Duc de Brabant, le Comte de Neuers freres du Duc de Bourgongne, & le Comte d'Alençon : y restans le Duc de Orleans, le Comte d'Angoulesme son frere, & le Comte d'Eu prisonniers des Anglois : lesquels par apres se retirent en leur isle. Le Duc de Bourgongne pensant par ceste deffaicte n'auoir plus de contraires en court, y veult venir accompagné de ses troupes ordinaires, affin de pourueoir comme il disoit aux affaires du Royaume, le Comte d'Armagnac Gascon son ennemy juré qui n'aguere estoit fait Connestable, & qui auoit cest honneur d'estre gendre du Duc de Berry oncle du Roy, l'en empesche : tellement qu'apres qu'il eust seiourné quelque temps à Laigny est contrainct de s'en retourner en son Païs d'Arthois : là dessus, se renflamme la guerre entre les deux parties, y faisant la troisieme les Anglois : lesquels descendent en la basse Normandie, & prennent plusieurs villes, ne laissant pour cela les Bourgongnons & Orleannois qu'on nommoit Armagnacs de faire vne infinité de courses & de surprises les vns sur les autres. Entre-temps suruient la mort du Daulphin gendre du Duc de Bourgongne, sans laisser enfans : ce qui diminue bienfort l'esperance qu'auoit le Duc de recouurer sa premiere puissance. Toutesfois pour ne perdre du tout courage se r'alie du Comte de Hainault son beau frere, & pere (côme dit est) de la femme de Jean Duc de Tou-



raïne deuenü Daulphin par le decez de l'autre : & avec luy commençoit à brasser de grandes entreprinſes contre les Armagnacs, quand la mort ſurprant auſſi ceſt autre Daulphin par vn apoſtume qui luy vient en l'oreille. L'ainefſe de France deuoluë par ce moyen à Charles, auparauant nommé Comte de Pontieu & troiſieſme fils du Roy, il eſt perſuadé de prendre les treſors de la Royne ſa mere, & la l'enuoyer viure à Tours comme perſonne priuée: parce qu'il ſembloit à ſon conſeil qu'elle n'auoit eſté aſſez conſtante contre la faction du Duc de Bourgongne: lequel tant ſur l'occaſion de ce, que de la mort des deux Daulphins qu'il diſoit auoir eſté empoizonnez par ſes aduerſaires, enſemble pour les ſupplices frequens de ceux de ſon party en Paris, ſolicité auſſi par les banniz pour ſa cauſe, aſſemble toutes ſes forces, & vient deuant Paris. Le Daulphin pour ſe fortifier contre luy eſt conſeillé de retirer ſes garniſons de Normandie, & pluſtoſt la laiſſer en proye aux Anglois, comme il aduint, que permettre le Duc renenir en la puiſſance qu'il auoit eü: de maniere qu'apres qu'il euſt failly à tous moyens eſſayez d'entrer dedans Paris, il aſſiege Corbeil, dont il ſe leue ſoudainement pour aller pardeuers la Royne, laquelle ſe meit avec la ville de Tours au pouuoir d'iceluy: ce qui dōne deſormais telle faueur & luſtre à ſa cauſe, parce que la Royne auoit eſté pour la maladie du Roy crée irreuocablement Regente de France, que ceux de ſon party oſerent mettre dedans Paris le ſeigneur de l'Isle-Adam l'un de ſes Capitaines en ſi forte compagnie, qu'il luy fut aiſé, joinct l'ayde du peuple, de ſe faire maiſtre de la ville, & de la perſonne du Roy, emprisonner grand nombre des partizans d'Orleans, meſmes le Comte d'Armagnac: ſi qu'à peine en euade le Daulphin, demeurant la Baſtille en ſa puiſſance: par le moyen de laquelle ſ'eſtans ſes gens mis en peine de recouurer la ville, ils en ſont avec grand perte des leur rechassez par la force du peuple: lequel de ce eſſarouché & irrité, maſſacre ce grand nombre de gens qui auoit n'aguereſ eſté mis en priſon, meſme le Comte d'Armagnac. Sur ces entrefaiſtes les Anglois prennent Roüen, & ſ'auancent iuſques à Mante, ce qui contraint le Duc de Bourgongne, lequel ne peult de ſes forces ſeules leur faire teſte, offrir au Roy d'Angleterre pluſieurs conditions deſaduantageuſes, avec le mariage de Catherine fille du Roy. Pour rompre ce traiſté, le Daulphin preſente au Duc de Bourgongne la paix, laquelle ſe conclud avec grans ſermens, en vn lieu nommé Poilly-le-fort pres Melun, eſtant en nombre la ſeptieſme. Toutesſois parce qu'en icelle non plus qu'aux autres n'apparoïſſoit aucune ſeureté pour le Daulphin, & ceux de ſa ſuite, eſtant la ville de Paris pleine de gens affectionnez au Duc, & ſes garniſons aſſiſes en pluſieurs lieux, qu'il ne vouloit oſter ſuiuant les conditions de ceſte derniere paix, on l'attire à vn parlement ſur le pont de Montreau-fault-Yonne, où il eſt tué avec Nouailles ſon intime amy fils du Comte de Foix, mettant premier la main ſur le Duc, Taneguy du Chaſtel gentil-homme Breton Preuoſt de Paris, le ſecondant Louuet Preſident de Prouence, & autres couraſ leur fait, de ce que, eſtant de genoux deuant le Daulphin, il meit la main à l'eſpée. Ceſte mort ainſi aduenue vlcere merueilleuſement le cuer du peuple de France, ſingulierement de celui de Paris: car ce Duc auoit eſté fort populaire, ſemant par tout que ſes entreprinſes tendoient à releuer chacun d'oppreſſion, dreſſer & reformer les affaires du Royaume en meilleur eſtat: meſmes ſ'eſtoit autresſois oppoſé à quelques leuées de deniers qu'on vouloit faire ſur le peuple: qui fut cauſe, que Philippes ſon fils eut confort & ayde de toutes manieres de gens, pour en pourſuiuir la vengeance: de ſorte que venant en court qui lors eſtoit à Troye la trouue à ſa deuotion, tant que ſelon ſon veuil on conclud avec l'Anglois vn traiſté nommé la paix finale: par laquelle le Roy de France, inſtitue le Roy d'Angleterre ſon heritier, à la charge d'eſpouſer Catherine ſa fille: deſherite le Daulphin, demeurant les Royaumes de France & d'Angleterre perpetuellement alliez enſemble, ſans qu'ils peuſſent pretendre ſuperiorité l'un ſur l'autre, y changer loix ou couſtumes, & impoſer nouuelles charges. Ceſte paix eſtant ainſi faiſte, & iurée par les eſtats de France, fors que ceux qui obeïſſoient au Daulphin, les armées Angloiſe & Bourgnionne jointes prennent Sens, & Montreau-fault-Yonne (où le corps du Duc de Bourgongne veſtu comme il eſtoit quand il fut occis, eſt deterré embaumé & porté aux Chartreux de Dijon) gagnent Melun, qui tint quelque temps. Delà le Roy d'Angleterre entre avec le Roy de France & le nouveau Duc de Bourgongne dedans Paris, où le Daulphin eſt appellé, & pourſuiuy par deſſaux & contumaces à la table de marbre, & finalement déclaré indigne de ſucceder à la couronne de France. Peu de temps apres, le Roy d'Angleterre mene en ſon païs la Royne ſa femme, où elle accoucha d'un fils. Pendant qu'il y ſeiournoit le Duc de Clarence ſon frere voulant elargir iuſques en Anjou la Normandie dont il eſtoit gouuerneur, eſt occis, & ſon armée deſſaiſte à Baugé par les François & Eſcoſſois, que menotent le ſeigneur de la Fayette, & le Comte de Butcan. De ce excité le Roy d'Angleterre, repaſſe la mer, fait leuer le ſiege que le Daulphin auoit mis deuant Chartres, prend Meaux, & autres villes en grand nombre: puis ſe diſpoſant d'aller en vne bataille assignée entre le Daulphin & le Duc de Bourgongne à Cone, meurt au Bois de Vincennes, laiſſant ſon fils & ſes Royaumes en la tutelle de ſes freres. Decede bien toſt apres le Roy Charles vj. demeurant le Duc de Berthfort oncle du Roy d'Angleterre gouuerneur de Paris, & de tout ce que tenoient les Anglois deçà la mer.

*Abregé*



**F I N I E** la langoureuse vie du Roy Charles sixiesme qu'on surnomma le bien-aymé, peult-estre parce que chacun auoit eu pitié de luy, le Daulphin Charles son fils est salué Roy de France à Espailly pres le Puy en Auvergne, où luy fut noncée la mort du Roy son pere : & delà sacré à Poictiers luy estant la ville & le chemin de Reims empeschez. A l'occasion de quoy ses Capitaines euertuez plus qu'auparauant de faire preuue de leur constance en son seruice, du commencement prennent Mante ville située sur la Sene entre Paris & Roüen, d'où ils sont incontinent chassez : prennent aussi Compiengne, où pareille fortune leur aduient : & se voulans aduancer sur le Duc de Bourgongne perdent vne bataille à Crauant. Le Crotoy en mesme temps, Guyse & autres lieux qui leur restoient deça Loire, viennent en la puissance des Anglois ou Bourgongnons. A toutes ces aduersitez leur suruient la rouverte de Vernueil en Normandie où il perdirent grand nombre de bons hommes : & s'aignist ainsi la fortune de piz en piz contre eux, pendant que le Duc de Bourgongne entre en diuision avec les Anglois : par ce que le Duc de Glocestre oncle du Roy d'Angleterre sous couleur d'un mariage illegitime, qu'il auoit contracté avec laqueline de Bauiere (de laquelle le Duc de Bourgongne deuoit estre heritier) s'estoit emparé de Hainault & de Holande, dont elle estoit Comtesse : mais ce different est bientoist assopy par l'interuention du Duc de Bethford qui auoit espousé la seur du Duc de Bourgongne : & par sentence du Pape qui trouua le mariage de Glocestre tresmauuais. En aussi piteux estat se trouue le Royaume de Cypre estant gasté : & le Roy d'iceluy (qui estoit encores de la maison de Lusignan) prins par les gens du Soldan d'Egipte : duquel il rachepta le repos de son Royaume, & la liberté moyennant somme de deniers. Les Anglois au mesme temps voulans asseurer la nauigation de la riuiere de Loyn, comme ils auoient fait de toutes celles qui apportent viures en Paris se campent deuant Montargis dont ils sont delogez avec grand tuerie des leur par le Comte de Dunois Bastard d'Orleans. L'Angleterre reueillée de ceste perte, enuoye nouuelles gens en France sous la charge du Comte de Salsebery lequel assiege de toutes parts la ville d'Orleans : les François voulans rompre un aduitaillement de son camp sont eux mesmes rompuz à Rouuray en Beausse, s'estans les Anglois auantagez du charroy de leur monition. Ceste perte qui n'est que de quatre ou cinq cens hommes, ne de courage les François d'entreprendre la leuée du siege d'Orleans, leur estant venu un secours inespéré d'une capitainesse Amazone nommée Ieanne la pucelle, issue d'un tel lieu & de telle nourriture qu'on ne scauroit dire lesquels auoit moins d'occasio ou les François de l'admirer ou les Anglois de la craindre. Quoy que soit les François sont tel deuoir sous sa guide que les Anglois avec grand perte des leur equipolente à une grosse rouverte, sont contrains de decamper : & à peu de temps apres perdent une autre bataille à Batay en Beausse contre les François. De là vint telle conuersion de fortune que toutes les villes de Champaigne & de Brie se rendent au Roy Charles, mesmes celle de Reims en laquelle il se fait refacer avec plus grand solemnité qu'il n'auoit fait à Poictiers. Compiengne, Beauuais, Senlis luy ouurent pareillement les portes : & feust aussi facilement entré dedans Paris, si la faction Bourguignonne qui y estoit la plus forte se desiant de la clemence d'iceluy pour les grans maux qu'elle auoit fait à ceux de son party n'eust repoussé ses gens à quelques escalades qu'ils y donnerent. De ceste venue il se presente en la bataille rengée au Montépiloy pres Senlis, contre toutes les forces d'Angleterre & de Bourgongne que menoit le Duc de Bethford, lequel se tint en l'aduantage du lieu où il estoit campé. Par apres le Roy Henry d'Angleterre pour cōforter ceux de son obeissance vient à Paris, où il se fait sacrer Roy en l'Eglise de nostre Dame : neantmoins les François reprennent sur luy Chartres font leuer le siege de Compiengne aux Bourguignons, & le siege de Lagny sur Marne aux Anglois, en deffont grand nombre à Garmigny que menoit Kiriell, & à Gerberoy, où fut occis le Comte d'Arondel, l'un & l'autre capitaines renommez entre les Anglois : & rompent le Prince d'Orange avec toute la noblesse de la haulte Bourgongne à Colombiers en Lionois : osent defier le Duc Philippes en bataille assignée qu'il ne veult accepter, estant en termes de l'accorder avec le Roy Charles : aussi luy est le repos necessaire pour asseurer les seigneuries de Hainault, Brabant & Holande, qu'il auoit nouuellement annexées à celles d'Arthois, & de Flandres : joint que les Anglois luy sont desormais suspects, estant sa seur femme du Duc de Bethford decedée. Parquoy, se laissant aller aux admonitions du Pape, & du Concile de Basse, entend finablement à la paix sur les grans offres qui luy furent faictes pour reparation de la mort de son pere : puis se retire de l'alliance des Anglois, fait recepuoir les gens du Roy Charles dans Paris, apres l'abolition que le peuple eut de tout ce qui s'estoit passé : & pour plus grand preuue de sa reconciliation met sus une armée de Flamens, avec lesquels il essaye en vain de prendre Calais, & finalement moyenne la deliurance du Duc d'Orleas hors d'Angleterre qu'il marie à sa niepce fille du Duc de Cleues premier qu'il partist d'avec luy. Le Roy Charles estant ce pendant receu joyeusement en Paris, reprend Meaux sur les Anglois, & Ponthoise avec grand difficulté : & des l'heure plus auanceroit sur les Anglois, si les Princes de son sang estans assemblez à Neuers sur les plaintes qu'ils auoient à luy faire, ne le contraignoient de donner trefues aux Anglois.



A Y A N T la France quelque relafche de fes maux par la trefue dont eft fait mention en la fin du volume precedent , le Roy Charles feptiefme pour de tant decharger fon Royaume de gens accoustumez à viture de proye, en met hors deux armées: l'une en faueur du Roy René de Cecile fon beau frere, laquelle eft menée au fieg de Mets, qu'iceluy pretendoit eftre des appartenances de fon Duché de Lorraine: l'autre en faueur de l'Empereur Sigifmond cōtre les Suiffes. Du fieg de Mets bien qu'il feuft de grand appareil n'en reufcift autre chose finon que les habitans cheuiffent pour leur liberté à quelque fomme de deniers : & du voyage de Suillè, apres que le Daulphin Loïs qui estoit chef de l'entreprinfe eust perdu les guides que l'Empereur luy auoit données, & cogneu la force du pais trop plus grande que celle qu'il auoit, s'en retourne se contentant d'une deffaicte de mille ou douze cens Suiffes pres de Bafle. Ce pédant la trefue susdicte (qu'on pensoit n'agueres auoir rafseurée par le mariage de la fille du Roy de Cecile, avec le Roy Henry d'Angleterre) se rompt sur le Duc de Bretagne luy ayant François de Surienne capitaine Anglois furpris la ville de Fougeres: pour laquelle prinfe & autres contrauentions faictes aux articles de la trefue, le Roy de France apres plusieurs protestations que la rouverte ne venoit de fa part, assaut la Normandie qu'il reduisit à la diligence du Comte de Dunois Bastard d'Orleans ville à ville en son obeiffance en l'espace d'un an, ayant rompu par la conduicte du Comte de Clermont aîné de Bourbon une armée Angloise à Formigny en la basse Normandie. Delà il tourne ses forces sur la Guyenne dont il se fait seigneur en peu de temps à l'ayde des Comtes de Foix, d'Armagnac, & mesmes du seigneur d'Albret, apres que le fils aîné d'iceluy nommé Tartas eut deffaict grand nombre de Gascons & Anglois qui tenoient la campagne en Medoc. Mais par ce que le peuple du pais inueteré durant cent cinquante ans en l'obeiffance des Anglois, portoit impatiemment ceste nouvelle seigneurie, il luy fut aisé (s'en donnans peu de garde les François) d'y remettre les Anglois aussi facilement qu'ils en auoient esté deboutez. Toutesfois le Roy y pourueut par apres de sorte qu'ayant deffaict à Chastillon en Perigord, par la dexterité & vaillance des Marefchaulx de Loheac (qui estoit de la maison de Laual) & de la longnes (de celle de Culant) une armée Angloise que menoit Talebot renommé capitaine, il feit abandonner la Guienne aux Anglois, ne leur restant deça la mer que la ville de Calais & quelques Chasteaux à l'entour: en quoy est fort celebrée, la memoire de Jean & Gaspar Bureaux freres tresoriers de France, & avec ce maistres de l'artillerie pour le singulier seruice qu'ils feirent au Roy es susdictes conquestes, tant au maniment de ses finances qui jamais n'y manquerēt à temps & à propos que à la direction de la canonerie, en laquelle ils excogiterent tant de nouuelles & ingenieuses façons que les forteresses des Anglois ne pouuoient plus arrester deuant la furie d'icelle. Les Gantois ce pendant irritez des gabelles de fel que le Duc Philippes leur Comte auoit de nouuel impofées sur eux, entrent contre luy en guerre trescruelle, laquelle ayant longuemēt duré à leur defauantage ils font par la trahison de quelques capitaines Anglois qui estoient à leur solde induicts à mettre toutes leurs forces aux champs pour combattre leur Prince: lequel les rompt & affoiblist de sorte à la iournée de Gauure qu'ils font contraincts d'accepter de luy, avec plusieurs conditions honteuses, la paix qu'ils auoient auparauant fort obstinément refusée. Estant ainsi la guerre assopie de toutes parts en la France, il s'en esmeut une nouuelle en la propre maison du Roy, pour quelques mecontentemens qu'eurent de luy le Daulphin son fils & le Duc d'Alençon Prince de son sang. Le Daulphin s'estant retiré en Daulphiné & y seiournant contre le gré du Roy son pere à la grand foule & oppression du pais, est contrainct par une armée que le Roy y enuoye se retirer au Duc de Bourgongne. Le Duc d'Alençon bien qu'il eust le temps passé fait grād preuue de sa loyauté enuers la couronne, est condamné à mort par arrest des Pairs que le Roy conuertist en un confinement au chasteau d'Aigues-mortes en Languèdoc. Ceste diuision du Roy & du Daulphin dure l'espace de cinq ans: à la fin desquels le Roy Charles passe de ceste vie à meilleure. Le Daulphin assure sur les forces de la maison de Bourgongne se fait sacrer à Reims & recepuoir en Paris: mais à peu d'années de là sa façon de regner desplaist tant aux Princes qu'ils se bandent tous contre luy, estant chef de l'entreprinfe le Duc de Berry son frere qui estoit soustenu par la maison de Bourgongne: contre laquelle le Roy eut une sanglante bataille à Montlehery, & se voit assiegé dedans Paris par l'armée d'iceux Princes: lesquels pour l'heure il appaise par offres & promesses: dont il tiēt si peu qu'il en demeure tousiours depuis avec eux en guerre ou haine perpetuelle. Le Duc Philippes de Bourgongne plain d'ans, de biens & de seigneuries, qu'il auoit doublées en sa maison, apres auoir pour ses dernieres proësses vaincu & domté les Liegeois, & pardonné au Comte de Charolois son fils les entreprinfes qu'il faisoit sur son autorité, laisse ceste despouille mortelle en la ville de Bruges. La fin de sa vie est la fin de l'histoire d'Enguerran estant le surplus du volume une continuation faicte par auteurs incongneuz, laquelle n'est pour estre mesprisée de ceux qui sont studieux de la cognoissance des temps.





**S**E L O N ce que dit Saluste au cōmencement d'un sien liure nommé Cathelinaire, où il racompte aucuns merueilleux faits d'armes des Rommains & de leurs aduerses parties, tout homme doit fuyr oyfueté, & soy exercer à bonnes œuures: affin qu'il ne soit pareil aux bestes qui ne sont vrilles qu'à elles seullement, se à autres choses ne sont induictes. Comme doncques soit assez conuenable & digne occupation, que les trefnables & haults faits d'armes, inestimables aduantureux engins & subtiuetes de guerre, dont les vaillans hommes d'armes ont vsé, tant ceux qui de nobles maisons sont issus, comme autres du moyen & bas estat, & qui sont aduenues au treschrestien Royaume de France, & en plusieurs autres cōtrées de la Chrestienté, & des marches & pays d'autre part, & autre loy, feussent & soiēt mis & recitez par escript en maniere de chroniques ou histoires, à l'aduertissement & instruction de ceux qui à iuste cause se vouldroient en armes honnorablement exercer: aussi à la gloire & louenge de ceux, qui par force de courage & puissance de corps, vaillamment si sont portez, tant en rencontres & assaulx soudains, comme en journées entreprinſes & assignées corps contre corps, plusieurs contre vn, ou puissance contre autre, & en toutes les manieres que vaillant homme se peult auoir, lesquelles le lisant ou oyant doit ententiement comprendre, incorporer & considerer: est-il que pour r'amener principalement à memoire les dessusdits haults faits d'armes, & autres matieres dignes de recordation: & mesmement des proëſſes & vaillances aduenues au temps dont ceste presente hystoire fera mention: aussi des discords, guerres, & contemps esmeuz, & par long temps continuez entre les Princes & grans seigneurs dudit Royaume de France, des pays voisins & autres marches loingtains, à quelque occasion que lesdictes guerres ayent prins source ou naissance.

Le Enguerran de Monstrelet issu de noble generation, resident du temps de la compilatiō de ce present liure en la noble cité de Cambray ville seāt en l'Empire d'Allemaigne, me suis entremis & occupé d'en faire & composer vn liure ou hystoire en prose: jaçoit ce que la matiere requist bien plus hault & subtil engin que le mien: par ce que plusieurs choses recitées y sont à peser, sicōme les royales majestez, haultesses & puissances des Princes excellence, de noblesse en armes dont iceluy fera composé: mesmement aussi pour enquerir & sçauoir comment les besongnes ont esté faictes, & icelles comprendre par voix continuée, en ayant consideration à ce que par maintes fois ay apperceu, qu'aucuns d'un mesme party, ou de plusieurs faisoient d'icelles besongnes où ils auoient tous ensemble esté presens diuers rapports & difficilles. Et me suis par maintes fois, en moy merueillant, appensé comment ce se pouoit faire, & se de la diuersité de leursdits rapports y pouoit auoir autres causes ou raison que faueur aux parties: & peut estre que ouï, consideré que ceux qui sont aucunesfois à vn bout d'un assault, bataille, rencontre ou escarmouche ont assez à penser à eux vaillamment conduire & garder leurs corps & honneur, & ne peuuent bonnement lors veoir ce qu'aduiet d'une autre partie. Neantmoins pource que de ma ieunesse, & que me suis cogneu, ay esté enclin à veoir & ouyr telles ou semblables hystoires, ay prins tresvoulentiers peine & labeur en continuant à ce faire selon mon petit entendement, iusques au temps de mon plus meur aage, pour la verité d'icelles enquerir par maintes di-



P R O L O G V E .

ligences, & dont ie me suis informé, des les premiers points d'iceluy liure iusques aux derniers, tant aux nobles gens, qui pour honneur de gentillesse ne voudroient ou deuroient dire, pour ne contre verité, comme aussi aux plus veritables que i'ay sceu dignes & renommez de foy de tous les partiz, & par especial des guerres de France, & pareillement aux Roys d'Armes, Heraulx & poursuiuans de plusieurs seigneurs & païs, qui de leur droit & office doiuent de ce estre iustes & diligens enqueurs, biés instruits & vrays relateurs. Sur la relation & recitation desquels à diuerses fois recitées, en mettant arriere tous rapports que i'ay douté ou esperé estre incertains, non prouuez par continuation, pour vrayement atteindre les cas, apres que sur iceux ay eu plusieurs considerations & grans dilatiōs de moy informer, comme dessus, & prins mon arrest & imagination en declaration & rapport des plus veritables, que i'ay fait grossier au bout d'un an & non deuant. Ie me suis déterminé & conclud de poursuiuir ma dessusdicte matiere depuis le commencement de mon liure iusques en fin d'iceluy. Et ainsi l'ay fait, sans fauoriser à quelque partie: ainçois à mon pouoir ay voulu (comme raison donne) rendre à chacune partie vraye declaration de son fait selon ma cognoissance: car autrement faire seroit embler & detraire l'honneur & proesse, que les vaillans hommes & prudens auroient acquis, à la peine, traual & peril de leurs corps, dont la gloire & loüenge doit estre rendue & perpetuellement denoncée à l'exaltation de leurs nobles faits. Et pource que icelle besongne est de foy dangereuse, & ne se peult du tout mettre au plaisir de chacun party ou particuliere affectiō, ou autrement vouldroient par aduāture maintenir aucune chose y estre declairée non estre telle ou ainsi aduenue. Ie prie & requiers tresinstamment à toutes nobles personnes, & autres de quelque estat qu'ils soient qui ce present liure liront ou orront, qu'il leur plaise moy tenir pour excusé s'ils y trouuent aucune chose qui à leur entendement ne soit agreable, puis que deliberé me suis d'escrire verité selon la relatiō que faicte m'en a esté: car se faute y estoit trouuée ou autrement entendue, dont ie me suis à mon pouoir gardé, icelle doit estre, & retourner sur ceux qui du propos dont elle feroit mention m'en auroient fait les rapports & rendu certain: & s'ils y treuuent aussi aucune chose vertueuse digne de memoire & recordation en quoy on se puisse ou doyue delecter, & y prendre bon exemple ou introduction, la grace & merite en soy sur ceux dont ce procede à perpetuellement, & nompas à moy qui ne suis en ceste partie que simple expositeur. Si commencera ceste presente chronique, au iour de Pasques communians l'an de grace mille cccc. auquel an fine le dernier volume de ce que feist & composa en son tēps, ce prudent & tresrenommé hystorien maistre Iean Froissart natif de Vallenciennes en Hainault, duquel par ses notables œuures la renommée durera par lōg temps. Et finera cestuy premier liure au trespas du treschrestien Roy de France de tresnoble memoire Charles le bien aymé sixiesme de ce nom, lequel si expira sa vie en son hostel de S. Pol à Paris pres les Celestins le xxij. iour du mois d'Octobre l'an de grace mille cccc. & xxij. Et affin qu'on voye aucunement les causes pourquoy les diuisions, discords & guerres s'esmeurent entre la tresnoble, tresexcellente & tresrenommée seigneurie de France, dont à cause de ce tant de maulx & incōueniens sont venus au dommage & desolatiō dudit Royaume, que piteuse chose fera du recorder, ie toucheray vn petit au commencement de mon liure de l'estat & gouuernement, maintien & conduicte du dessusdit Roy Charles au temps de sa ieunesse.



TABLE DES CHAPITRES DV PREMIER  
VOLUME D'ENGVERRAN DE  
MONSIEUR.

Chapitre premier.



- C**OMMENT Charles le bien aymé regna en Frāce apres qu'il eut esté sacré à Reims l'an mille ccc. & quatre vingts fueillet 1.
- Comment un escuyer d'Arrāgon nommé Michel d'Oris enuoya en Angleterre pour faire armes & la responce qu'il eut d'un cheualier du païs, chap. ij. 2.
- Comment les grans pardons furent à Rome, chap. iij. f.6.
- Comment Iean de Montfort Duc de Bretaigne mourut, & du departemēt de l'Empereur de Paris, & le retour de la Royne d'Angleterre, chap. iiij. f.6.
- Comment le Duc Philippe de Bourgongne alla en Bretaigne de par le Roy de France & le Duc d'Orleans à Luxembourg, & du discord qu'ils eurent ensemble, chapitre v. f.7.
- Comment Clement Duc en Bauiere fut esleu par les Eleēteurs d'Allemaigne Empereur, & depuis fut mené à grand puissance à Francquesfort, chap. vi. f.7.
- Comment Henry de Lenclastre Roy d'Angleterre combattit ceux de Parsiaque & de Galles qui estoient entrez en son païs & les vainquit, chap. viij. f.7.
- Comment Iean de Verhin cheualier de grād renom, Seneschal de Hainault enuoya en diuers païs lettres par un sien herault pour faire armes, chap. viij. f.7.
- Comment Loīs Duc d'Orleans frere du Roy de Frāce enuoya ses lettres au Roy d'Angleterre pour faire armes, & la responce qu'il eut, chap. ix. f.8.
- Comment Vvalleran Comte de S. Pol enuoya ses lettres de deffiāce au Roy Henry d'Angleterre, chap. x. f.14.
- Comment meſſire Iaques de Bourbon Comte de la Marche & ses deux freres furēt enuoyez de par le Roy en l'ayde des Gallois, & autres matieres, chap. xi. f.14.
- Comment l'Amiral de Bretaigne & autres seigneurs combattirent les Anglois sur la mer, & de Gilbert de Frethun qui feit guerre audit Roy Henry, chap. xij. f.14.
- Comment l'Vniuersité de Paris eut grand discord contre meſſire Charles de Sauoizi, & pareillement contre le Preuost de Paris, chap. xij. f.15.
- Comment le Seneschal de Hainault luy quatriefme feit armes deuant le Roy d'Arragon, & du voyage que feit l'Admiral de Bretaigne en Angleterre, chap. xiiij. f.15.
- Comment le Mareſchal de France & le maistre des arbalestriers allerent par l'ordonnance du Roy en Angleterre en l'aide du Prince de Galles, ch. xv. f.16.
- Comment un puissant mescreant nommé Tamburlant entra à puissance en la terre du Roy Basaacq, lequel alla cōtre luy & le combattit, chap. xvi. f.17.
- Comment Charles Roy de Nauarre traicta avec le Roy de France & eut la Duché de Nemours, & du voyage du Duc Philippe à Bar le Duc & à Bruxelles. chap. xvij. f.17.
- Comment le deſſusdit Duc de Bourgongne mourut en la ville de Halst en Hainault & fut porté son corps à Dijon en Bourgongne aux Chartreux, ch. xvij. f.18.
- Comment Vvalleran le Comte de ſainct Pol alla en grande cōpaignie par mer en l'Isle de Vic pour faire la guerre d'Angleterre & ſen retourna sans peu beſongner, chap. xix. f.18.
- Comment le Duc Loīs d'Orleans alla à Marceilles deuers le Pape de par le Roy Charles de France, le Duc de Bourbon en Lāguedoc & le Conneſtable en Acquitai-



## TABLE DES CHAPITRES

- ne, chap.xx. f.19.
- Commēt le Duc Aubert Comte de Hainault trespāssa, & pareillement la Duchesse de Bourgongne Marguerite fille au Cōte Loīs de Flandres, chap.xxi. f.19.
- Comment le Duc Iean de Bourgongne apres la mort de la Duchesse fut receu es bonnes villes de la Comté de Flandres comme seigneur, chap.xxij. f.19.
- Commēt le Duc Guillaume Comte de Hainault tint cest an un champ mortel en sa ville du Quesnoy lequel fut outre par l'un des champions, chap.xxij. f.20.
- Commēt le Comte de S.Pol mena son armée deuant le chastel de Mercq, auquel lieu vindrēt les Angloīs de Calais & le desconfirent, chap.xxiiij. f.20.
- Comment le Duc Iean de Bourgongne alla à Paris & fait retourner le Daulphin que la Roïne & le Duc d'Orleans emmenoient, & d'autres matieres suiuanes, chap.xxv. f.22.
- Comment le Duc Iean de Bourgongne eut de par le Roy le gouuernement de Picardie, de l'ambassade d'Angleterre & de l'estat de mesire Clugnet de Brabāt cheualier, chap.xxvi. f.25.
- Commēt la guerre se resmeut entre les Ducs de Bar & de Lorraine, & des mariages faits à Compiengne, & aussi des alliances d'entre Orleans & Bourgongne, chapitre xxvij. f.25.
- Comment le Duc d'Orleans alla à puissance de gens d'armes de par le Roy en la Duché d'Acquitaine & asiegea Blaie & Bourg, chap.xxviij. f.26.
- Comment le Duc Iean de Bourgongne tant traicta avec le Roy & son grand conseil qu'il eut licence pour assembler gens pour asieger Calais, chap.xxix. f.27.
- Commēt les Prelats & gens d'Eglise de toutes les parties du royaume de France furent mandez à aller à Paris deuers le Roy pour l'union de sainte Eglise, chapitre xxx. f.28.
- Comment les Liegeois debouterent Iean de Bauiere leur Euesque pource qu'il ne vouloit estre promeu & consacré à l'estat de l'Eglise comme promis l'auoit, chap.xxxi. f.28.
- Comment Anthoine Duc de Luxembourg eut la possession de la Duché, & depuis de la ville de Treēt à la grand desplaisance des Liegeois, chap.xxxij. f.29.
- Comment les ambassadeurs du Pape Gregoire vindrent à Paris deuers le Roy & l'université à tout vnes bulles d'iceluy Pape qui sont declairées en ce liure, chapitre xxxij. f.29.
- Comment Loīs Duc d'Orleans eut par l'otroy du Roy son frere la Duché d'Acquitaine: Et lors furent faictes trefues entre le royaume de France & d'Angleterre, chap.xxxiiij. f.30.
- Comment le Princes de Galles fils aîné du Roy d'Angleterre accōpaigné de ses deux oncles & tresgrand cheualerie alla en Escoce pour faire guerre, ch.xxxv. f.30.
- Comment Loīs Duc d'Orleans seul frere du Roy de France Charles le bien aymé fut mis à mort piteusement dedans la ville de Paris d'aguet & à pensē, chapitre xxxvi. f.31.
- Comment la Duchesse d'Orleans & son fils maisné vindrent à Paris deuers le Roy pour faire plaincte de la piteuse mort de son feu seigneur & mary, chap.xxxviij. f.31.
- Comment le Duc Iean de Bourgongne fait grand assemblée à l'Isle en Flandres pour auoir conseil sur la mort du Duc d'Orleans & alla à Amiens & à Paris. chapitre xxxviij. f.31.
- Comment le Duc Iean de Bourgongne fait proposer deuant le Roy & son grand conseil ses excusatiōs sur la mort du defusdit Duc d'Orleans, chap.xxxix. f.31.
- Comment le Roy enuoya deuers le Pape ses ambassadeurs solēnels, la responce qu'ils eurent & comment depuis il excommunia le



- nia le Roy & ses adherans, chapitre xl.  
 fueillet 47.
- Comment l'université de Paris feit proposer  
 deuant le Roy contre le Pape de la Lune  
 & du partement du Roy Loïs, & du  
 Borgne de la Heuse, chap. xli. f. 49.
- Comment le Duc de Bourgongne se partit de  
 Paris pour le fait de Liege, du Roy d'Es-  
 paigne & du Roy de Hongrie qui escri-  
 uit à l'université de Paris, ch. xliij. f. 50.
- Comment tous les Prelats & gens d'Eglise  
 de toutes les parties de France furēt man-  
 dez à Paris, la venue de la Royne, &  
 de la Duchesse d'Orleans, ch. xliij. f. 51.
- Comment la Duchesse d'Orleans & son fils  
 feirent proposer à Paris à l'encontre du  
 Duc Iean de Bourgongne pour la mort  
 du Duc d'Orleans, chap. xliij. f. 52.
- S'ensuit comment les conclusions furent fai-  
 ctes cōtre ledit Duc de Bourgongne pour  
 icelle Duchesse & son fils, & de la res-  
 ponce qui leur fut faicte par le Chancel-  
 lier, chap. xlv. f. 68.
- Comment Guy de Roie Archeuesque de  
 Reims appella des constitutions faictes à  
 Paris par l'université dont ils furēt mal  
 contens, & feirent prisonnier son procu-  
 reur, chap. xlvi. f. 70.
- Comment le Duc Iean de Bourgongne feit  
 grand assemblée de gēs d'armes pour al-  
 ler secourir Iean de Bauiere cōtre les Lie-  
 geois & les combattit, ch. xlvij. f. 71.
- Comment le Roy de France feit grand as-  
 semblée à Paris pour auoir aduis com-  
 ment on procederoit contre le Duc de  
 Bourgongne pour ladicte mort du Duc  
 d'Orleans, chap. xlvij. f. 79.
- Comment le dessusdit Roy de France fut me-  
 né par les seigneurs de son sang à Tours  
 en Touraine, & de la paix qui se feit en  
 la ville de Chartres, & de la mort de la  
 veufue d'Orleans, chap. xlix. f. 79.
- Comment la Royne d'Espaigne mourut du-  
 rant le Concile de Pise qui lors se tenoit.  
 Et du mariage du Roy de Dannemar-
- che, chap. l. f. 82.
- Comment le Roy de France en ce temps fut  
 oppressé de maladie, & des nopces du  
 Côte de Neuers à la damoyelle de Cou-  
 chy. Et de laguerre d'Aymé de Viry Sa-  
 uoyen, chap. li. f. 82.
- Comment deux champs de bataille furent  
 promez lors à faire à Paris present le  
 Roy, de l'Archeuesque de Reims qui fut  
 mort, & du Concile de Pise, ch. liij. f. 83.
- Comment les ambassadeurs de l'université  
 de Paris enuoyerent leurs lettres à leurs  
 seigneurs & maistres de ce qui auoit esté  
 fait au dessusdit Concile, ch. liii. f. 87.
- Comment les contendans, c'est à scauoir de  
 la Lune & Benedic furent priuez de la  
 papalité, & des deffences faictes par le  
 Senne de non leur obeir en aucune ma-  
 niere. f. 87.
- Comment Pierre de Candie Cordelier fut es-  
 leu Euesque de Romme par les Cardi-  
 naulx. f. 88.
- Comment l'Euesque de Paris trespassa, des  
 mariages du Duc de Brabant de la fille  
 Montagu & du Roy de Chippre, Char-  
 lotte de Bourbon, chap. liiii. f. 88.
- Comment le Duc Iean de Bourgongne tint  
 grand parlement en la ville de l'Isle en  
 Flandres sur ses affaires, & de la mort  
 de la Duchesse d'Orleans, chap. lv. f. 89.
- Comment Boucicault Marechal de France  
 gouverneur de Gēnes fut debouté d'icel-  
 le ville entant qu'il estoit allé au mande-  
 ment du Duc de Millan, chap. lvi. f. 90.
- Comment les seigneurs du sang royal con-  
 clurent ensemble de faire reformer ceux  
 qui auoient gouverné les fināces du Roy,  
 & la mort de Montagu, ch. lvij. f. 90.
- Comment le Duc Loïs de Bauiere espousa la  
 fille du Roy de Nauarre, & des seigneurs  
 qui s'assemblerent à Paris en grāde mul-  
 titude par le mandement du Roy, chapi-  
 tre lvij. f. 92.
- Comment le Roy de France tint estat royal  
 en son palais où estoiet les seigneurs des-



## TABLE DES CHAPITRES

- susdits qui tindrent plusieurs grans conseils sur les affaires de son royaume, chapitre lix. f.93.*
- Comment grand dissention s'esmeut en cest an entre le Roy de Poulanne d'une part, & le grand maistre de Prusse & ses freres d'autre part, chap.lx. f.95.*
- Comment le Duc de Berry retourna à Paris au mandement du Roy, du mariage du fils au Roy Loïs, & de l'assemblée qui se feit à Meung le Chastel, chap.lxi. f.96.*
- Comment le Roy Loïs s'en alla en Prouence & à Boulongne contre le Roy Lancelot, & de la mort du Pape Alexandre & l'election du Pape Iean, ch.lxij. f.96.*
- Comment le grand maistre de Prusse alla à grand puissance de Chrestiens au Royaume de Lithuanie pour le destruire & depopuler de tous points, ch.lxij. f.97.*
- Comment le Duc de Berry s'en alla de Paris en son pais, & depuis à Angiers où il fallia avec le Duc d'Orleans & autres Princes de son party, chap.lxiiij. f.98.*
- Comment le Duc de Bourbon mourut, & du mandement du Roy & des lettres qu'enuoyerent le Duc d'Orleans & ses allies aux bonnes villes, ch.lxv. f.98.*
- Comment apres les assemblées faictes d'entre les Princes d'un costé & d'autre fut la paix faicte entre eux, laquelle se nomma la paix de Vincestre qui fut la secõde, chap.lxvi. f.102.*
- Comment le vingt-troisiesme iour de Nouembre fut faicte à S.Bernard à Paris une congregation par l'université où estoient plusieurs Prelats pour l'estat de l'universelle Eglise, chap.lxviij. f.103.*
- Comment le seigneur de Croi fut prins en allant deuers le Duc de Berry en ambassade de par le Duc de Bourgongne dont moult despleut audit Duc, chap.lxxviij. fueillet 105.*
- Comment le Duc d'Orleans enuoya ses ambassadeurs deuers le Roy, & depuis luy escriuit ses lettres lesquelles chargeoient fort le Duc de Bourgongne & ceux de sa partie, chap.lxix. f.106.*
- Comment le Duc de Bar trespassa de ce siecle: Et de l'ambassade que le Roy enuoya deuers le Duc de Bourgongne à tout certaines lettres, & autres matieres, chap.lxx. f.107.*
- Comment le Duc d'Orleans & ses freres enuoyerent lettres deuers le Roy & autres seigneurs: Et aussi à plusieurs bones villes contraires au Duc de Bourgongne, chap.lxxi. f.108.*
- Comment les dessusdits freres d'Orleans enuoyerent leurs lettres de deffiances pour la premiere fois au Duc de Bourgongne en sa ville de Doüay, chap.lxxii. f.114.*
- Comment le Duc de Bourgongne rescriuit aux enfans d'Orleans sur les deffiances qu'ils luy auoient enuoyées en faisant la responce sur icelles, chap.lxxiii. f.114.*
- Comment le Duc Iean de Bourgongne fut mal content de messire Mansart du Bos & des lettres qu'il enuoya au Duc de Bourbon pour auoir son aide, chapitre lxxiiii. f.115.*
- Comment apres la publication du mandement royal cõtenant que nul ne s'armaist contre les deux parties d'Orleans & de Bourgongne ledit Duc de Bourgongne escriuit au Baillif d'Amiens, chap.lxxv. fueillet 115.*
- Comment les Parisiens se meirent en armes contre ceux de la partie d'Orleans & se commença à esmouuoir la guerre en plusieurs parties du Royaume, chap.lxxvi. fueillet 116.*
- Comment messire Clugnet de Brabant cuida prendre Rethels, & depuis courut es pais du Duc de Bourgongne, & de plusieurs autres tribulations, chap.lxxvii. f.117.*
- Comment le Duc Iean de Bourgongne feit grand assemblée de gens d'armes pour mettre le siege deuant la ville de Hem & y mena les Flamens, chap.lxxviii. fueillet 118.*
- Comment*



DU PREMIER VOLUME.

- Comment le Duc de Bourgongne r'assembla grand compaignie pour aller à Paris, & des bes besongnes qui aduindrent durant le temps dessusdit, chap. lxxix. f.122.
- Comment le dessusdit Duc de Bourgongne alla de Ponthoïse par Melun à Paris à puissance & de l'estat & gouuernement du Duc d'Orleans, chap. lxxx. f.125.
- Comment iceluy Duc de Bourgongne mena grand puissance de gens d'armes ou estoient les Parisiens deuant la ville de S. Clou contre les Orleannois, chapitre lxxxi. feuillet 126.
- Comment le Comte V'aleran fut enuoyé en Vallois à Coudy de par le Roy, & autres capitaines en plusieurs lieux contre lesdits Orleannois, chap. lxxxii. f.128.
- Comment messire Philippes de Seruolles Bailif de Vitry assiegea Moyennes, & d'autres seigneuries qui furent mises en la main du Roy par les officiers, ch. lxxxiii. feuillet 129.
- Comment les Ducs d'Acquitaine & de Bourgongne allerent conquerre Estampes & Dourdam & de la mort messire Mansart du Bos & autres prisonniers, chap. lxxxiiii. f.130.
- Comment plusieurs capitaines furent enuoyez de par le Roy sur les frontieres en diuers païs contre les Orleannois, & de la destrouffe du Comte de la Marche, chap. lxxxv. f.131.
- Comment le Roy de France enuoya ses ambassadeurs en Angleterre & de la deliurance du seigneur de Croi & de ses enfans à la Duchesse de Bourbon, & du Comte V'alleran, chap. lxxxvi. f.132.
- Comment les Ducs de Berry & d'Orleans, & autres de leurs alliances enuoierent deuers le Roy Henry leurs ambassadeurs & ce que depuis en aduint, ch. lxxxvii. feuillet 133.
- Comment le Duc Loïs de Bauiere fut des Parisiens, debouté & depuis ses gens destrouffez du Cardinal de Cambray, & de la deffence du Roy d'Angleterre, chap. lxxxviii. f.134.
- Comment le Roy Loïs se partit de Paris du siege de Danfront, de la bataille S. Remy au plain, & du siege de Bellame. Et autres besongnes faictes en cest an, chapitre lxxxix. f.135.
- Comment Charles Roy de France à grand puissance se partit de Paris & autres princes pour aller à Bourges, & des lettres du Roy d'Angleterre, & autres matieres, chap. xc. f.137.
- Comment la ville de Veruins fut prinse de Clugnet de Brabant, & depuis reconquise : Et de la prinse du chastel de Gersies par messire Simon de Cleremont, chapitre xci. f.138.
- Comment le Roy de France ouit certaines nouuelles que ses aduersaires estoient aliez avec le Roy d'Angleterre & du Cōnestable qui alla à Boulenois, chap. xcii. feuillet 139.
- Comment le Roy meit le siege deuant Fontenay & apres à Bourges en Berry, & des besongnes qui aduindrent durant le temps qu'il y fut, chap. xciii. f.140.
- Comment le Roy dessusdit se deslogea & alla à l'autre costé de la ville à tout sa puissance, c'est à scauoir de Bourges où se firent les traictez d'entre les parties, chap. xciiii. f.142.
- Comment apres les besongnes conclues les seigneurs de la ville de Bourges allerent deuers le Roy & le Duc d'Acquitaine, & depuis à Auxerre, chap. xcvi. f.143.
- Comment le Roy enuoya les mandemens de la paix à ses officiers pour publier par tout son Royaume es lieux accoustumez, & d'autres matieres ensuiuans icelles, chap. xcvi. f.145.
- Comment la guerre s'esmeut en Boulenois du retour du Roy dedans Paris, & comment le Duc d'Orleans contenta les Anglois, & d'autres matieres, chap. xcvi. feuillet 147.



## TABLE DES CHAPITRES

- Comment le Duc de Berry fut fort oppressé de maladie & fut visité par la Duchesse de Bourbon sa fille & le Duc de Bourgongne, & autres matieres, chap. xcviij. fueillet. . . . . 147.
- Comment le Roy de France feit grād assemblée en la ville de Paris sur intètion d'auoir conseil pour reformer ses officiers, & autres besongnes, chap. xcix. f. 148.
- Comment le Duc d'Acquitaine se courrouca à son Chancellier, & des enuies qui se meirent entre les grās seigneurs & d'autres besongnes, chap. c. f. 154.
- Comment Henry de Lenclastre Roy d'Angleterre qui auoit esté tres vaillant cheualier trespassa en cest an, & de l'alliance d'entre luy & les Princes de France, chap. ci. f. 154.
- Comment les officiers estoient en grande doute de la prinse de messire Pierre des Essars & du Duc de Bar & de plusieurs autres besongnes faictes par les Parisiens, chap. cij. f. 156.
- Comment les dessusdits Parisiens feirent proposer en la presence du Duc d'Acquitaine & autres Princes ce que bon leur sembla & autres cruantez faictes par eux, chap. ciiij. f. 157.
- Comment le Comte de Vertus se partit de Paris & plusieurs autres nobles, & aussi d'aucunes constitutions & autres mandemens faits à la requeste desdits Parisiens, chap. ciij. f. 159.
- Comment le Roy Lancelot entra à puissance dedans Romme, & de la mort messire Iaques de la Riviere, & de la deposition du Chancellier avec plusieurs autres besongnes, chap. cv. f. 162.
- Comment les ambassadeurs du Roy & autres Princes retournerent à Paris, & alors y allerent d'autres qui traicterent de rechief à Ponthoise la quatriesme paix, chap. cvi. f. 163.
- Comment le Duc d'Acquitaine feit deliurer les prisonniers, du partement du Duc de Bourgongne & la venue de plusieurs Princes dedans Paris, & ce qu'ils feirent, ch. cvij. f. 169.
- Comment le Duc de Bretagne vint à Paris, & du conseil que le Duc de Bourgongne tint à l'Isle du fait du Comte Valeran & d'autres diuerses besongnes qui lors se feirent, ch. cvij. f. 172.
- Comment ledit Duc de Bourgongne feit plusieurs assemblées pour auoir aduis sur ses affaires doubtant que ses aduersaires ne tournassent le Roy cōtre luy ce qu'ils feirent, ch. cix. f. 173.
- Comment Loïs Duc de Bauiere se maria à Paris, & de ceux qui furent bānis pour le discord des Ducs d'Orleans & de Bretagne & d'autres plusieurs matieres ensuiuans, ch. cx. f. 174.
- Comment le Roy doubtant la rompure de la paix feit publier en son Royaume nouveaux mandemens, & pareillement pour le fait de la monnoye, f. 175.
- Comment le Roy Loïs enuoya la fille du Duc de Bourgongne. Et des lettres que ledit Duc enuoya deuers le Roy contenās plusieurs remonstrances & autres matieres, ch. cxij. f. 178.
- Comment le Duc de Bourgongne alla à Anuers, la prinse messire Ieā de Croi & autres plusieurs grās besongnes qui aduindrent en ce temps dessusdit, chap. cxiiij. fueillet. . . . . 182.
- Comment le dessusdit Duc de Bourgongne alla à puissance deuers Paris & se logea à S. Denys, & de tout ce qu'il aduint durant ce voyage à cause d'iceluy, chap. cxv. f. 184.
- Comment apres le partement dudit Duc de Bourgongne de S. Denys le Roy feit grās mandemens par tout son Royaume pour aller contre luy, ch. cxvi. f. 189.
- Comment les chaisnes de Paris furent ostées & les Parisiens tenus en grand subiection, & des mandemens royaux qui de rechief furent publiez, ch. cxvij. f. 194.
- Comment



- Comment le Duc de Bourgongne eut grand parlement avec les nobles de ses païs à Arras qui luy promeirent de le servir cōtre tous ses aduersaires, ch. cxviij. f.197.
- Comment le grand conseil du Roy se tint, & aussi commēt de rechief le Duc de Bourgongne eut grand parlement avec les nobles de ses païs d'Arras qui luy promeirent de luy aider contre tous ses aduersaires, chap. cxix. f.197.
- Comment le Duc d'Acquitaine partant de Paris alla à Senlis deuers le Roy, & de là allast mettre le siege deuāt la ville de Compiengne, ch. cxx. f.198.
- Comment le Roy & sa puissance alla de Cōpiengne à Soissons & la feit assieger & en fin prindrent de force & fut du tout pillée & robbée, ch. cxxi. f.199.
- Comment apres la prinse de Soissons le Roy alla à S. Quentin & puis à Peronne pour entrer au païs d'Arthois, ch. cxxij. f.200.
- Comment le Duc de Bourgongne asist ses garnisons en plusieurs lieux, & le Roy partant de Peronne avec son exercite alla assieger Bapames, ch. cxxij. f.201.
- Comment ceux de la ville d'Arras se fortifierent à grand puissance & ardirent & demollirent plusieurs notables ediffices autour de la ville, ch. cxxiiij. f.202.
- Comment Charles Roy de France apres qu'il eut mis Bapames en son obeissance alla mettre le siege tout à l'enuiron de la ville d'Arras & de la cité à tout sa puissance, chap. cxxv. f.202.
- Comment le Duc de Brabant & la Comtesse de Hainault vindrent deuers le Roy deuant Arras & traicterēt la paix de leur frere le Duc de Bourgongne & de ses païs, ch. cxxviij. f.203.
- Comment les traictez de la paix d'Arras furent leuz present le Duc d'Acquitaine & plusieurs autres Princes du sang du Roy & des sermens qui sen feirent, ch. cxxviij. f.205.
- Comment Sagismont de Behaigne fut en cest an esleu Roy d'Allemaigne & receut les sermens de la plus grand partie des seigneurs du païs, chap. cxxix. f.206.
- Comment le Roy Lancelot fina sa vie, & du Roy Loïs son aduersaire qui enuoya le Mareschal de France à Naples & autres besongnes, ch. cxxx. f.207.
- Commēt le Duc de Bourgongne apres le parlement du Roy de deuant Arras alla à puissance en Bourgongne & autres besongnes qui aduindrent en ce temps, cha. cxxxi. f.208.
- Comment le Comte Valeran de S. Pol alla à tout six cens combattans en la Duché de Luxembourg & du Duc d'Acquitaine qui alla à Melun, ch. cxxxij. f.208.
- Comment le Comte de Vvaruic & autres Anglois allerent au Concile de Constances & du seruice que feit le Roy pour son frere le Duc d'Orleans, ch. cxxxij. f.209.
- Comment le Roy & son grand conseil enuoièrent pour destrousser les gens au Duc de Bourgongne, & plusieurs autres besongnes qui aduindrent en ce temps, cha. cxxxiiij. f.210.
- Commēt les ambassadeurs d'icelle terre vindrent à Paris où le Roy tint grand feste & de la paix qui fut lors parconfermée du tout, ch. cxxxv. f.210.
- Comment les trois Portugalois feirēt armes present le Roy de France cōtre trois François, lesquels Portugalois furent vaincus par leur aduerse partie, chap. cxxxvi. f.213.
- Comment la paix d'Arras fut iurée solēnellement en la presence du Roy, & depuis fut pareillement en diuers autres lieux & païs, chap. cxxxviij. f.214.
- Comment ceux de la communauté de la ville d'Amiens furent assemblez pour iurer & entretenir la paix d'Arras, & pareillement les gens d'Eglise, chap. cxxxviij. f.214.
- Comment Vvaleran Comte de S. Pol trespas-  
sa à Yvuis en la Comté de Chiny, des



## TABLE DES CHAPITRES

- seigneurs du sang royal & du Duc de Bourgongne qui partit de Melun, chap. cxxxix. f.215.
- Cōment le Roy d'Angleterre assembla grand puissance pour venir en France & des ambassadeurs qui furent enuoyez vers luy, & la responce qu'ils eurent, chapitre cxi. f.215.
- Comment le Duc de Bourgongne enuoia deuers le Duc d'Aquitaine ses ambassadeurs, la responce qu'ils eurent, & du serment qu'il feit, ch. cxli. f.216.
- Comment Henry Roy d'Angleterre feit grās preparations en son royaume pour venir en France & des lettres qu'il enuoya à Paris deuers le Roy de France, ch. cxlii. feuillet 217.
- Comment Henry vint à Hantonne, de la conspiration faicte contre luy par ses gēs. Et du siege qui fut mis à Harfleur & de la reddition d'icelle ville, chap. cxliiii. feuillet 218.
- Comment les Chanoines de S. Gery à Cambray eurent grand discord aux habitans de la ville, & de la guerre que leur feit le Duc de Bourgongne à ceste cause, chapitre cxliiii. f.219.
- Comment le Roy de France feit grand assemblée de gēs d'armes par tout son royaume pour resister à l'encontre du Roy, Henry, & des mandemens qu'il enuoya pour ce faire, ch. cxlv. f.219.
- Comment le Roy d'Angleterre entra dedans Harfleur, des ordonnances qu'il y feit & du voyage qu'il entreprint à venir à Calais, & du gouuernement des Francois, chap. cxlvi. f.220.
- Comment le Roy de France & plusieurs de ses Princes estans avec luy à Roüen conclurent en conseil que le Roy d'Angleterre seroit combattu, ch. cxlvii. f.221.
- Comment les Francois s'assemblerent à bataille l'un contre l'autre aupres d'Azincourt, & obtindrent lesdits Anglois la iournée, chap. cxlviii. f.222.
- Comment plusieurs Princes & autres notables seigneurs de diuers païs furēt morts à ceste piteuse besongne, & aussi les aucuns faits prisonniers, ch. cxlix. f.224.
- Commēt apres le partement du Roy d'Angleterre plusieurs Francois vindrent sur le champ pour trouuer les amis du Comte de Charrolois qui les feit mettre en terre, & autres matieres, ch. cl. f.226.
- Comment le dessusdit Roy d'Angleterre alla par mer en Angleterre où il fut ioyeusement receu pour sa bonne fortune. Et du Comte de la Marche qui alla en Italie, chap. cli. f.227.
- Cōment le Roy de France & autres Princes eurent grand tristesse pour la perte de la iournée d'Azincourt, du Duc Iean de Bourgongne & autres besongnes, chap. clii. f.227.
- Comment les Parisiens & ceux de l'uniuersité allerent deuers le Duc d'Aquitaine & autres Princes proposer aucunes besongnes de la mort d'iceluy Duc & du Conneſtable, chap. cliii. f.228.
- Comment le Duc de Bretaigne vint à Paris: le partement du Duc de Bourgongne de Laigny sur Marne, la prinſe meſſire Martelet du Maisnil & Ferry de Mailly, chap. cliiii. f.228.
- Comment l'Eueſque d'Arras feit reuocquer la ſentēce autresfois donnée contre maistre Iean Petit, & la venue de l'Empereur d'Allemaigne en la ville de Paris, chap. clv. f.229.
- Comment une grand taille fut mise sus par les gouuerneurs du Roy dont les Parisiens furent mal contens & autres besongnes qui ſourdirēt à ceste cause, chapit. clvi. feuillet 230.
- Comment l'Empereur alla à Londres, le frere du Duc de Cyppre à Paris, la mort du Duc de Berry & plusieurs ambassades qui se feirent entre France & Angleterre, chap. clvii. f.230.
- Comment Iennet de Poix & autres allerent secrettement



- secrettement à saint Denys de par le Duc de Bourgongne & de plusieurs cheuauchées qui se feirent sur le Royaume de France, chap. clviii. f. 231.
- Comment Lihons en Santhois fut pillié de plusieurs capitaines qui se meirent sus la prinse du chastel de Beaumont, & l'assault & prinse de Neelle & autres matieres, chap. clx. f. 231.
- Comment le Duc de Bourgongne multiplia ses gens d'armes, le mariage du seigneur de la Trimouille & l'armée que feit le Duc de Clarence pour Harfleur, ch. clx. fueillet 234.
- Comment les Roys d'Allemagne & d'Angleterre vindrent à Calais le Duc Iean de Bourgongne vers eux, & des besongnes qui se feirent, ch. clxi. f. 234.
- Comment ledit Duc de Bourgongne alla à Valenciennes au mandement du Daulphin beau fils du Comte de Hainault & les sermens qu'ils feirent l'un à l'autre, chap. clxii. f. 235.
- Comment le Comte de Hainault mena son beau fils dessusdits à S. Quentin & de là à Compiengne où il mourut & les manieres qui furent tenues ce voyage, chap. clxiii. f. 235.
- Comment ceux de Neaples se rebellerent contre le Roy Iaques Comte de la Marche & luy feirent guerre & aussi prindrent la Roine, & ce qu'il en aduint, ch. clxiiii. f. 236.
- Comment le Côte d'Vrset capitaine de Harfleur feit vne cheuauchée au país de caulx & combattu des Francois & de l'Empereur qui feit le Comte de Sauoye Duc, chap. clxv. f. 236.
- Comment le Duc Guillaume Comte de Hainault mourut en son chastel de Boucham & de la guerre que feit Iean de Bauiere à sa niepce fille dudit Duc Guillaume, chap. clxvi. f. 237.
- Comment le Duc de Bourgongne enuoya ses lettres à plusieurs bonnes villes du Royaume de France contenant l'estat de ceux qui gouuernoient le Royaume de France, chap. clxvii. f. 237.
- Comment messire Lois Bourdon fut prins & executé, & de la Royne de France qui fut enuoyée à Blois & de là à Tours en Touraine pour demourer, ch. clxviii. fueillet 239.
- Comment messire Raoul de Gaucourt Bailif de Roüen fut mis à mort par aucuns de la communauté, le gouuernement d'iceux & de la venue du Daulphin audit lieu de Roüen, ch. clxix. f. 239.
- Comment le Roy trespassa: le gouuernement des gens de compagnies, la destrouffe de Raimonnet de la guerre & de la destruction de Dampmartin, ch. clxx. f. 240.
- Comment les gens du Roy qui estoient en garnison à Peronne faisoient forte guerre aux país du Duc de Bourgongne. Et pareillement le chastel de Menuyen & autres matieres, ch. clxxi. f. 241.
- Comment le Duc de Bourgongne enuoya ses ambassadeurs en plusieurs bonnes villes du Roy pour auoir alliance avec eux, et les sermens qui s'en feirent, chap. clxxii. fueillet 241.
- Comment le Roy Henry d'Angleterre retourna en France à grand puissance & print plusieurs villes et forteresses, du Concile de Constances où fut fait Pape Martin, chap. clxxiii. f. 242.
- Comment le seigneur de Canny fut enuoyé de par le Roy en ambassade deuers le Duc de Bourgongne qu'il trouua à Amiens, et la respöce qu'il eut dudit Duc, chapitre clxxiiii. f. 243.
- Comment le dessusdit seigneur de Canny retourna à Paris de son ambassade et fut accusé par le conseil royal, et la prouision qui fut mise cötre le Duc de Bourgongne, chap. clxxv. f. 247.
- Comment le Duc de Bourgongne passa outre à tout sa puissance vers Paris. Et se meirent en son obeissance plusieurs villes et



## TABLE DES CHAPITRES

- estoyent avec luy se conduirent apres la mort dudit Iean de Bourgongne & des lettres qu'il feit enuoyer à plusieurs bonnes villes, ch. ccxiii. f. 278.
- Comment le seigneur de Montagu escriuit à plusieurs bonnes villes du Roiaume, & des Parisiens qui refirent serment nouuel apres la mort dudit Duc de Bourgongne, chap. ccxiiii. f. 280.
- Comment le dessusdit Daulphin se partit de Monstreau, la deliurance de ceux qui auoient esté prins en la compaignie du Duc de Bourgongne & autres matieres suiuanes, ch. ccxv. f. 281.
- Comment Philippe Comte de Charrolois sceut la piteuse mort de son pere, le conseil qu'il tint sur ses affaires, & les trefues qu'il print aux Anglois & autres matieres, ch. ccxvi. f. 281.
- Comment le Duc Philippe de Bourgongne feit faire un seruice à S. Vaast d'Arras pour feu le Duc Iean son pere, & autres plusieurs matieres suiuanes, ch. ccxvii. f. 282.
- Comment messire Iean de Luxembourg feit grand assemblée de gēs d'armes qu'il mena deuant Roie & autres besongnes qui se feirent en ce temps, chapitre ccxviii. fueillet 283.
- Comment les Francois & Bourgongnons commencerent à repaier avec les Anglois, & le siege de Fontaines l'Auagam & autres plusieurs matieres suiuanes, chap. ccxix. f. 284.
- Comment le Duc Philippe de Bourgongne partit d'Arras & alla à grand puissance mettre le siege deuant Crespy en Laonois, & de la à Troyes en Champaigne deuers le Roy, ch. ccxx. f. 285.
- Comment ledit Duc se conduit apres en allant audit lieu de Troyes & depuis qu'il y fut venu, & aussi des ambassadeurs d'Angleterre qui allerent avec luy, chap. ccxxi. f. 285.
- Comment messire Iean de Luxembourg alla courre à tout sa puissance deuant Alibaudieres & ce qu'il en aduint, chapitre ccxxii. f. 286.
- Comment le Comte de Conuersan, messire Iean de Luxembourg son frere, le seigneur de Croi & autres capitaines meirent le siege deuant Alibaudieres & ce qu'il en aduint, ch. ccxxiii. f. 286.
- Comment grand partie des gens du Duc de Bourgongne retournerent en leurs pais & la cheuauchée que feirent le seigneur de l'Isle Adam Mareschal de France & le seigneur de Croi, chapitre ccxxiiii. fueillet 287.
- Comment Henry Roy d'Angleterre à tout sa puissance vint à Troyes en Champaigne pour luy marier et parconclurre la paix finale avec le Roy de France, ch. ccxxv. fueillet 288.
- Comment les Roys de France et d'Angleterre: les Roines leurs femmes & ledit Duc de Bourgongne partirent de Troyes & des sieges de Sens & de Monstreau, ch. ccxxvi. f. 291.
- Comment Ville-Neufue le Roy fut prinse d'eschelles, le siege du Pont saint Esprit, la croisée que feit faire nostre saint Pere le Pape & autres plusieurs matieres, ch. ccxxvii. f. 292.
- Comment le siege fut mis tout à l'environ de Melun, la prinse du Comte de Conuersan & le partement du ieune Roy de Cecile pour aller à Romme, ch. ccxxviii. fueillet 293.
- Comment plusieurs forteresses environ furent mises en la main du Roy Henry où il mist capitaines, & les mandemens roiaux qui furent enuoiez à sa requeste, ch. ccxxix. fueillet 294.
- Comment Philippe Comte de saint Pol alla à Bruxelles & feit prendre les gens de son frere le Duc de Brabant, & autres diuerses besongnes qui aduindrent en ce temps, ch. ccxxx. f. 295.
- Comment le seigneur de l'Isle Adam Mareschal de France fut enuoie à Ioinigny & la



- la redditiō des villes et chastel faictes par les assiegez, chap. ccxxxi. f. 296.*
- Comment apres les sieges de Melun les deux Rois, les Roines leurs femmes & plusieurs autres Princes & grans seigneurs allerent à Paris, ch. ccxxxii. f. 297.*
- Comment les Anglois furēt destrouffez vers Mont-Epiloy, du mariage du Marquis du Pont à la fille de Lorraine & ce faisoit messire Jaques de Harcourt, chap. ccxxxiii. f. 298.*
- Comment plusieurs ambassadeurs de par les trois estats du Roiaume de France vindrent à Paris, & des estats que tindrent les deux Rois & autres matieres, chap. ccxxxiiii. f. 298.*
- Comment Henry Roy d'Angleterre alla de Roien à Calais avec luy la Roine sa femme, et de là en Angleterre où il fut receu à grand ioye de tous ceux du pais, chap. ccxxxv. f. 299.*
- Comment il s'esmeut grand discord entre le Duc de Brabant & la Duchesse sa femme laquelle se partit de luy & s'en alla par Calais en Angleterre, chap. ccxxxvi. feuillet 300.*
- Comment le Duc de Bretagne fut prins prisonnier par le Comte de Ponthieure & detenu grand espace de temps, et la guerre qui s'esmeut à ceste cause, ch. ccxxxvii. feuillet 300.*
- Comment les Daulphinois prindrent de rechief Ville-Neufue-le-Roy, le seigneur de Chastillon Chasteau-Thierrī où estoit la Hire & autres besongnes, chapitre ccxxxviii. f. 301. 302.*
- Comment le Duc de Touraine Daulphin fut appelé à la table de marbre, la prinse du seigneur de l'Isle Adam dedās Paris par le Duc d'Excestre, ch. ccxxxix. f. 302.*
- Comment le Duc de Clarence fut desconfit empres Baugi par les Daulphinois & y furent morts grand nombre de nobles et gentils-hommes des deux parties, chap. ccxl. f. 303.*
- Comment lesdits Daulphinois allerent deuant Alencon où de rechief allerent les Anglois & du mariage du Duc d'Alencon & autres matieres, ch. ccxli. f. 303.*
- Comment messire Jaques de Harcourt comença à faire guerre aux gens & pais du Duc de Bourgongne, & des inconueniens qui sourdirent à ceste cause, chap. ccxlii. f. 303.*
- Comment Henry Roy d'Angleterre retourna en France à grand puissance pour aller contre le Daulphin qui auoit assiegé la ville de Chartres, ch. ccxliii. f. 304.*
- Comment le Roy d'Angleterre se tira de Calais par Abbeuille à Beauuais, & depuis à Māte où alla deuers luy le Duc de Bourgongne, ch. ccxliiii. f. 304.*
- Comment le seigneur d'Offemont entra dedans S. Riquier, l'aduenture du seigneur de Cohen capitaine d'Abbeuille, et autres besongnes faictes en ce temps, ch. ccxlv. feuillet 305.*
- Comment le Duc Philippe de Bourgongne alla deuant le Pont saint Remy & le conquist et les armes qui se feirēt deuant saint Riquier où estoit le seigneur d'Offemont, chap. ccxlvī. f. 306.*
- Comment ledit Duc assiegea la ville de S. Riquier, & comment les assiegez se defendoient vigoureuusement, & comme il leua son siege, ch. ccxlvii. f. 307.*
- Comment les deux parties, c'est à scauoir le Duc de Bourgongne & les Daulphinois s'assemblerent en bataille le dernier iour d'Aoust, et ce qu'il en aduint, ch. ccxlviii. feuillet 309.*
- Comment le dessusdit seigneur de Bourgongne estoit acompaigné de plusieurs nobles hommes qui demourerent avec luy, et pareillement estoient les Daulphinois chap. ccxlix. f. 309.*
- Comment les besongnes s'espandirent de ceste matiere en diuers lieux, la prinse de Dourier & le partement que feit le Duc de Bourgongne de la ville de Hesdin, chap.*



- ccl. f.309.  
Comment le Roy d'Angleterre conquist & poursuivit le Daulphin puis assiegea Meaux en Brie & autres diuerses matieres suiuanes, ch. ccli. f.310.  
Comment le Duc de Bourgongne fait traité avec ses prisonniers pour la rendition de S. Riquier à quoy entendit le seigneur d'Offemont capitaine d'icelle ville, chap. cclii. f.310.  
Comment le Duc de Bourgongne fait grand assemblée de gens d'armes pour aller en Bourgongne, & autres plusieurs matieres aduenues en ce temps, ch. ccliii. f.310.  
Comment messire Iaques de Harcourt fut rencontré des Anglois, la taille des marcs d'argent qui fut cueillie pour faire bonne monnoye es bonnes villes, chap. ccliiii. f.311.  
Comment le dessusdit Duc de Bourgongne se partit d'Arras le Comte de S. Pol en sa compagnie & alla deuers les Rois de France, d'Angleterre & autres matieres, chap. cclv. f.311.  
Comment messire Iean de Luxembourg alla deuers le Roy Henry pour la deliurance du Comte de Conuersan son frere et autres plusieurs matieres, ch. cclvi. f.312.  
Comment le seigneur d'Offemont alla pour entrer dedans Meaulx & fut prins par les Anglois & de la ville qui fut gaignée d'assault par les assiegeans, chap. cclvii. f.312.  
Comment messire Iean de Luxembourg conquist ceste saison les forteresses de Quenoy, de Lauroy, de Hericourt & autres diuerses matieres, ch. cclviii. f.312.  
Comment l'Empereur d'Allemagne fait en cest an un armée contre les Pragois, & de ceux qui furent trouuez empres Doüay & le siege d'Arrames, ch. cclix. f.313.  
Comment les Daulphinois s'assemblerent pour leuer le siege d'Arrames dessusdit & allerent les Bourgongnons & Anglois pour les rencontrer & combattre, chap. cclx. f.313.  
Comment Henry Roy d'Angleterre eut l'obeissance du Marché de Meaulx & des executions qui furent faites à ceux de dedans de par ledit Roy, ch. cclxi. f.314.  
Comment après la reddition dessusdictes plusieurs villes & forteresses se rendirent à iceluy Roy d'Angleterre auxquelles il comist de par luy capitaines, chap. cclxii. f.315.  
Comment le Roy d'Angleterre retourna en France grandement accompagné, & des estats qui furent tenus dedans Paris & autres matieres, ch. cclxiii. f.316.  
Comment les deux Rois allerent de Paris à Selis, du siege de saint Valery, de la reddition de Compiengne & l'ambassade faite à messire Iaques de Harcourt, chap. cclxiiii. f.316.  
Comment le Roy d'Angleterre alla de Senlis à Compiengne, la prinse de saint Digier et la rencôte des Daulphinois & Bourgongnons, ch. cclxv. f.317.  
Comment le Duc de Touraine Daulphin fait assieger Cone sur Loire, le voiage qui se fait à ceste cause de par le Duc de Bourgongne, & la mort du Roy d'Angleterre, chap. cclxvi. f.320.  
Comment la Duchesse de Bourgogne Michelle alla de vie à trespas en la ville de Gand: le Duc de Bethfort qui fut fait Regent de plusieurs forteresses abatues, ch. cclxvii. f.322.  
Comment le Roy de France alla de vie à trespas en son hostel de S. Pol à Paris & fut porté à S. Denys empres ses predecesseurs, chap. cclxviii. f.323.

Cy finist la table des Chapitres du premier Volume  
d'Enguerran de Monstrelet.





# LE PREMIER

VOLUME DES CHRONIQUES

D'ENGVERRAN DE

MONSTRELET.

*Comment Charles le bien-aymé regna en France apres qu'il eut esté sacré à Reims  
l'an mille trois cens & quatre vingts.*

## CHAPITRE PREMIER.



OVRCE qu'en mon prologue ay aucunement touché, que parleray au commencement de ce present liure de l'estat & gouuernement du Roy de France Charles le biē-aymé vj. de ce nom: & affin que plus plainement il soit sceu les causes & raisons pourquoy les seigneurs du sang royal furent durant son regne & depuis en diuision, en feray en ce present chapitre aucune mention: Verité est que le dessusdit Roy Charles le bien-aymé fils du Roy Charles le riche, commença à regner & fut sacré à Reims le dimenche deuant la feste de Toussaincts, l'an de grace mille trois cens & quatre vingts, comme plus à plain est declairé au liure de maistre Iean Froissart. Et n'auoit lors que quatorze ans d'aage: & depuis là en auāt par aucun temps gouuerna moult grandement son Royaume, & par tresnoble conseil fait en son commencement de beaux voyages, où il se porta & conduit (selon la ieunesse) assez prudemment & vaillamment, tant en Flandres, où il conquist la bataille de Rosebecque & reduit les Flamens en son obeissance, comme depuis en la vallée de Cassel & es mettes du pays de là enuiron, & aussi contre le Duc de Gueldres. Et depuis fut à l'Escluse pour passer en Angleterre: pour lesquelles entreprinſes fut fort redoubté par toutes les parties du monde où on auoit de luy cognoissance. Mais fortune (qui souuent tourne sa roüe aussi bien contre ceux du plus hault estat comme du moindre) luy monstra de ses tours: car l'an mille trois cens quatre vingts & douze le dessusdit Roy eut vouldé & conseil d'aller à puissance en la ville du Mans, & de là passer en Bretagne pour subiuguer & mettre en son obeissance le Duc de Bretagne, de ce qu'il auoit tenu & fauorisé messire Pierre de Craó,



qui auoit battu & iniurié dedans Paris à sa grand desplaisance messire Oliuier de Clisson son Connestable. Auquel voyage luy aduint vne trespiteuse aduenture, & dont son Royaume eut depuis moult à souffrir : laquelle sera cy aucunement declairée: ja fut il que ce ne fut pas du temps ne de la datte de ceste histoire. Or est il ainsi que le Roy dessusdit cheuauchant de ladicte ville du Mans à aller audit pays de Bretagne. Ses Princes & sa cheualerie estans assez près de luy, luy print assez soudainement vne maladie, de laquelle il deuint ainsi comme hors de sa bonne memoire. Et incontinent tollit à vn de ses gens vn espieu de guerre qu'il auoit, & en ferit le varlet au Bastard de Langres tellement qu'il l'occist. Et apres tua ledit Bastard de Langres & si ferit le Duc d'Orleans son frere: lequel nonobstant qu'il fut armé le naura au bras, & de rechief naura le seigneur de S. Py: & l'eut mis à mort, à ce qu'il disoit, se Dieu ne l'eut guaranty: mais en ce faisant se laissa cheoir à terre, & là fut par la diligence du seigneur de Conchy & autres ses feables seruiteurs prins, & luy osterent à grand peine ledit espieu. Et de là fut mené en ladicte ville du Mans en son hostel, où il fut visité des medecins: neantmoins en y esperoit plus la mort que la vie. Mais par la grace de Dieu il fut depuis en meilleur estat. Et reuint assez en sa bonne memoire, non telle que par auant il auoit eüe. Et depuis ce iour, toute sa vie durant eut par plusieurs fois de telles occupatiōs que la deuantdicte, pourquoy il failloit tousiours auoir regard sur luy & gardes. Et pour ceste douloureuse maladie perdit toute sa vie durant grand partie de sa bonne memoire, qui fut la principale racine & desolation de tout son Royaume: car depuis ce temps commencerent les enuies & tribulatiōs entre les seigneurs de son sang, par ce qu'un chacun d'eux contendoit d'auoir le plus grand gouuernement de son Royaume, voyans essez clerement, qu'il estoit assez content de faire & accorder ce que par iceux luy estoit requis: lesquels se trouuoient vers luy les vns apres les autres, & à cautelle en absence l'un de l'autre, l'inclinoient à faire leur singuliere volenté & plaisir, sans auoir regard tous ensemble par vne mesmes deliberation au bien publicque de son Royaume & domination. Toutesfois aucuns en y eut qui assez loyaument s'en acquiterent, dont grandement apres leur mort en furent recommandez. Lequel Roy en son temps eut plusieurs fils & filles: desquels c'est à sçauoir de ceux qui vesquirēt iusques à aage compétant les noms s'ensuiuent. Premier Loys Duc d'Acquitaine qui eut espousée la fille premiere née du Duc Jean de Bourgongne, qui mourut deuant le Roy son pere sans auoir generation. Le second Jean Duc de Tourraine, qui espousa la seule fille du Duc Guillaume de Bauiere Comte de Hainault, qui pareillement mourut sans generation deuant le Roy son pere: le tiers fut nommé Charles qui espousa la fille du Roy Loys, & en eut generation: de laquelle apres sera faicte declaration, & succeda au Royaume de France apres le trespas du Roy Charles son pere. La premiere fille eut nom Ysabel & fut mariée la premiere fois au Roy Richard d'Angleterre, & depuis au Duc Charles d'Orleans, duquel elle delaiissa vne fille. La seconde fut nommée Ieanne & fut mariée à Jean Duc de Bretagne, duquel elle delaiissa plusieurs enfans. La tierce eut nom Michelle, & eut à mary le Duc Philippe de Bourgongne de laquelle n'eut nuls enfans. La quarte fut nommée Marie, qui fut religieuse à Poissy. La quinte eut nom Katherine & eut espousé le Roy Henry d'Angleterre: duquel elle eut vn fils  
nommé



nommé Henry, qui apres le trespas de son pere fut Roy dudit Royaume d'Angleterre. Lequel Roy Charles eut tous les enfans dessusdits de la Royne Ylâbel son espouse fille au Duc de Bauiere nommé Estienne.

*Comment vn Escuyer d'Arragon nommé Michel d'Oris enuoya en Angleterre lettres pour faire armes, & la responce qu'il eut d'un cheualier du pais.* CHAP. II.



V commencement de cest an mille & quatre cens furent enuoyez au Royaume d'Angleterre vnes lettres par vn escuyer du Royaume d'Arragon, nommé Michel d'Oris: desquelles la teneur s'ensuit. Au nom de Dieu & de la benoïste vierge Marie, de sainct Michel & de sainct George. Je Michel d'Oris pour mon nom exaulcer, saichant certainement la renommée des proësses de cheualerie d'Angleterre, ay au iour de la datte de ces presentes prins vn tronçon de greue à porter à maijambe iusques à tant qu'un cheualier dudit Royaume d'Angleterre m'aura deliuré à faire les armes qui s'ensuiuent. Premièrement d'entrer en place à pied & d'estre armé chacun ainsi que bon luy semblera, & d'auoir chacun sa dague & son espée sur son corps en quelque lieu qui luy plaira, ayant chacun vne hache: dont ie bailleray la longueur de tous les bastons combattans ensuyuant: c'est à sçauoir de la hache dix coups sans reprendre. Et quand iceux dix coups seront parfaits & que le iuge dira hô, nous ferirons dix coups d'espée sans reprendre ne partir l'un de l'autre sans changer harnois. Et quand le iuge aura dit hô, nous viendrons aux dagues & en ferirons dix coups sur main. Et si aucun de nous perdoit ou laissoit cheoir vn de ses bastons, l'autre pourra faire son plaisir du baston qu'il tiendra, iusques à ce que le iuge ayt dit hô: Et les armes à pied accomplies nous monterons à cheual, & fera armé du corps chacun ainsi qui luy plaira, & aura deux chapeaux de fer pareils. Lesquels ie liureray & choisira mondit compaignon lequel qui luy plaira des deux chapeaux, & aura chacun telle gorgerette qu'il luy plaira: avec ce ie bailleray deux selles, dont mondit compaignon aura le choix. Et outre, plus aurons deux lances d'une longueur: desquelles lances nous ferons vingt cources sans reprendre à cheual sur main, & pourrons ferir par deuant & par derriere depuis le faulx du corps en amont. Et icelles armes de lances faictes & accomplies feront les armes qui s'ensuiuent. C'est à sçauoir fil aduenoit que l'un ou l'autre ne fut blessé, nous serons tenus apres en icelle iournée mesmes & au second iour apres tant de coups de lance à course de cheuaux à trois reings, que l'un ou l'autre chée par terre ou soit blessé, si qu'il n'en puisse plus faire, & que chacun s'arme à sa volenté le corps & la teste: & les targes soient de nerfs & de cornes, sans ce qu'ils soient de fer ne d'acier, ne qu'il y ait aucune maistrise: & courront lesdictes lances avec les selles que lesdits cheuaux auront, faisans lesdictes armes à cheual: & chacun liera & mettra ses estriers à sa volenté sans faire nulle maistrise. Et pour adiouster plus grand foy & fermeté: ie Michel d'Oris ay seellée ceste lettre du seal de mes armes. Laquelle lettre fut faicte & escripte à Paris le vendredy vingtiesme iour d'Aoust l'an mille quatre cens. Le poursuiuant nommé Aly, à tout ses lettres s'adressa en la ville de Calais;



& là furent icelles veües par vn cheualier d'Angleterre nommé messire Jean de Prendregrest, lequel accepta de faire lesdictes armes ou cas qu'il plairoit au Roy d'Angleterre son souuerain seigneur: & sur ce rescriuit ses lettres à l'escuyer d'Arragon dessus nommé, desquelles la teneur s'ensuit. A noble homme & honorable personne Michel d'Oris Jean de Prendregrest cheualier & familier de treshault & puissant seigneur monseigneur le Comte de Sommerfet, honneur & plaïssance. Plaïse vous sçauoir que i'ay ores personnellement veües vnes lettres par deça enuoyées par Aly le poursuiuant. Par lesquelles i'entens la vaillance & courageux desir d'armes qui sont en vous: & aussi que vous auez fait veu de porter vne certaine chose, laquelle comme vosdictes lettres contiennent vous fait grand mal à la iambe, & que vous le porterez iusques à certain temps: sinon que vous soyez deliuré d'aucun cheualier Anglois de certaines armes composées en vosdictes lettres, moy desirant honneur & plaïssance comme gentil-homme de tout mon pouoir ay ou nom de Dieu, de la benoïste vierge Marie, de monseigneur S. George & de S. Anthoine acceptée, & accepte vostre requeste telle & en la meilleure maniere que vosdictes lettres le cōtiennent, tant pour vous aisier de la peine & du mal que vous souffrez comme pource que i'ay longuement desiré d'auoir aucun accointance avec aucun noble & vaillant de la partie de France, affin d'apprendre aucune chose appartenante à honneur d'armes. Mais toutesuoyes qu'il plaïse à mon souuerain seigneur le Roy de sa grace espediale de moy donner congé de le faire, soit deuant luy & sa presence royale, en Angleterre ou autrement à Calais par deuant mondit seigneur le Comte de Sommerfet. Et en outre pource que vosdictes lettres font mention que vous porterez chapeaux: desquels vostre compaignon choisira lequel qu'il luy plaira, & aura chacun telle gorgerette qu'il luy plaira. Vous plaïse sçauoir que pource que ne voudroye que par aucune subtilité de ma partie d'une piece de harnois ne d'autre, le fait par vous entrepris peüst aucunement estre destourbé ou delayé: à mon semblant ie vueil, s'il vous plaïst, que vous apportiez deux gorgieres pareilles & deux chapeaux: ou autrement, se vous voulez, ie porteray deux chapeaux & deux gorgerettes d'une façon de quoy vous aurez semblablement le choix: & vous promets en bonne foy que loyaument ie mettray & feray diligence à mon pouoir deuers messeigneurs mes amis & de moymesmes d'impetrer ledit cōgé. A quoy i'ay espoir en Dieu que ie ne fauldray pas. Et de ce avec du iour & lieu, où lesdictes armes se feront s'il est le plaïsir du Roy nostre sire (comme dit est) i'escriray au capitaine de Boulongne dedans le iour de la Tiphaine prochain venant au plus tost que faire se pourra: affin que de mon entête & volenté ayez & puissiez hastiuement estre certiffié & de la volenté de mon cueur en ceste partie. Noble honorable & vaillant seigneur ie prie à celuy qui est fondeur de tous biens, qu'il vous octroye ioye, hōneur & plaïssance avec tous biens que vous voudriez à vostre dame. A laquelle ie vous prie que ces presentes me puissent recommander, sous mō seel. Escrypt, à Calais l'vnziesme iour de Iuing an dessusdit. Depuis lesquelles lettres dessusdictes enuoyées audit escuyer d'Arragon, pource qu'iceluy cheualier n'auoit pas assez briefue responce, & que la besongne fut par long temps delayée luy rescriuis autres lettres de rechief dont la teneur s'ensuit. A hōnorable hōme Michel d'Oris Jean de Prédregrest cheualier salut. Comme pour

vous



vous aïsier de la penance que vous auez soufferte & souffrez de porter le tronçon de grefue, ie vous ay ottroye à deliurer des armes que vous auez vouïées: desquelles la mention est faicte en voz lettres seellées du féel de voz armes: & sur ce ay tout fait qu'à ma poursuite auec l'ayde de mes amis & seigneur, que le Roy mon tressouuerain & lige seigneur le m'a ordonné, & sur ce ordonné excellent & puissant seigneur monseigneur de Sommerfet son frere capitaine de Calais à estre nostre iuge comme escrit vous ay par Aly le poursuiuant. Par mes lettres portans datte du premier iour de Ianuier dernier passé, & lesquelles vous pouez bien auoir veües en deu & souffisant temps. Sicomme il peut apparoir par les lettres de noble & puissant homme le seigneur de Gaucourt Chambellan du Roy de France, portans datte du xx. iour du mois de Ianuier: lesquelles contiennent qu'à vous mesmes il a lesdictes lettres enuoyées pour vous haster de venir par deça. Parquoy pouez bien entendre que le iour de l'accomplissement de nosdictes lettres sera au premier lundy du mois de May prochain venant: car ainsi fut il appoincté par le Roy nostre sire sur la poursuite de madiete inpetration. Et ainsi il me conuient tenir, sur quoy pource qu'il a pleu à iceluy seigneur le Roy pour autres plus hautes causes & matieres, touchans & regardans le fait de sa royalle excellence, auoir ordonné monseigneur son frere en autres parties audit iour: il luy a pleu auoir tant fait à l'humble supplication de moy & pour cōtemplation de mesdits seigneurs & amis de lignaige, pour tenir ladicte iournée & estre nostre iuge, il a commis & deputé son cousin & mon treshonnoré seigneur monseigneur Hue Lutrellier lieutenant de mondit seigneur de Sommerfet audit lieu de Calais: & pource suis venu prest pour accomplir lesdictes armes au plaisir de Dieu, de saint George & de S. Anthoine, esperant que de vostre partie & l'aïsement & l'allegeance de vostre dicte penance, vous y serez aussi present & à icelle entente: ie vous enuoye saufconduit pour quarante personnes & autant de cheuaux: autre chose pour present ne sçay que rescrire, car vous sçauiez assez qu'il appartient à vostre honneur. Si prie au Dieu d'Amours qu'ainsi comme vous desirez l'amour de ma dame la vostre, il ne vous l'ait de vostre dicte venue. Escrit audit lieu de Calais sous le féel de mes armes le secōd iour de Ianuier l'an mille quatre cens.

*S'ensuit la tierce lettre du cheualier Anglois enuoyée à l'escuyer d'Arragon.*



Honorabile homme Michel d'Oris: Iean de Prendregrest cheualier salut: Il vous plaise bien estre en remembrance que de par vous furent enuoyez par deça vnes lettres par Aly le poursuiuant generalles & vniuerselles adressans à tous cheualiers Anglois escrites à Paris le vendredy xxvij. iour de May l'an mille quatre cens, seellées du féel de voz armes. Et aussi ne deuez vous pas oublier la responce que ie feis ausdictes lettres, comme au cheualier du païs d'Angleterre à qui elles vindrent premierement à cognoissance: de laquelle responce & de ce que depuis s'en est ensuiuy, ie vous ay escrit la substance par mes lettres seellées de mes armes, portant datte du penultime iour d'Auril dernier passé. Et aussi vous enuoyay saufconduit bon & suffisant pour venir par deça, accomplir l'entente de vosdictes lettres vniuerselles: si comme esdictes miennes dernieres lettres est plainement cōtenu ce qui s'ensuit.



A honorable homme Michel d'Oris, &c. Surquoy vueillez sçauoir que i'ay grand merueille. Car entendu la teneur & substance d'icelles mesmes lettres ie n'ay eu de vous autres nouuelles, soit de venir au iour qui assigné estoit, ou autrement de deüe excusation pour esloine de vostre corps: neantmoins ie ne sçay se le Dieu d'Amours qui vous enhorta & meit en couraige de vosdictes lettres quand les enuoyez, ait en aucune chose esté si despleu: parquoy il ait changé ses conditions anciennes, qui souloient estre telles que pour esbaudir armes & à cognoistre cheualerie. Il tenoit les nobles de sa court en si royalle gouuernâce, que pour accroissement de leur honneur, apres ce qu'ils auoient emprins aucuns faits d'armes ils ne s'absentoient du païs, où ils auoient fait leurdicté emprins, iusques à tant que fin en fut faicte: ne aussi ne faisoient leurs compagnons frayer, trauailler, ne despendre leurs biens en vain. Non pourtant que n'y vouldroye pas qu'il trouuast celle deffaute en moy, si qu'il eut cause de moy bannir de sa court. Je vueil encores demourer par deça iusques au huictiesme iour de ce present mois de May prest à l'ayde de Dieu, de S. George & de S. Anthoine à vous deliurer, ainsi que ma dame & la vostre le puissent sçauoir que pour reuerence d'icelles i'ay volenté de vous aïder de vostre griefue: qui par long temps vous a desaisié, comme vosdictes lettres contiennent: pourquoy aussi vous auez cause de desirer vostre allegeance. Apres lequel temps se venir ne voulez, ie pense au plaisir de Dieu de m'en retourner en Angleterre par deuers noz dames: ausquelles i'ay espoir en Dieu que sera tesgmoigné par cheualiers & escuyers que ie n'ay en riens mesprins enuers ledit Dieu d'Amours: lequel vueille auoir lesdits ma dame & la vostre pour recommandées, sans auoir desplaisir enuers elles pour quelque cause qui soit aduenue. Escrit à Calais sous le seel de mes armes le second iour de Iuing l'an mille quatre cens & vn.

*S'ensuit la teneur des lettres que l'Escuyer d'Arragon escrit au cheualier d'Angleterre, sur lesdictes lettres prochaines precedentes.*

**A**Tresnoble personne messire Iean de Prendregrest cheualier. Je Michel d'Oris escuyer né du Royaume d'Arragon, fais à sçauoir que pour l'ardant desir & courageux vouloir que i'ay eu tousdy & auray tant, que Dieu me fera viure d'employer & vser mon temps en armes ainsi que à vn chacun gentl-homme appartient: sçachant qu'au Royaume d'Angleterre soient plusieurs cheualiers Anglois plains de grand cheualerie, lesquels longuement à mon aduis auoient demouré endormis. Pour les resueiller de leur hardement demonstrier, & pour auoir d'eux aucune compagnie & cognoissance l'an mille cccc. prins vn tronçon de greue à porter en ma iambe iusques à tant que ie seroye deliuré des armes cōtenues en mes lettres, dont la teneur s'ensuit. Ou nom de Dieu, &c. Escrit à Paris le xxvij. iour de May mille quatre cens. Lesquelles lettres furent portées par Aly le poursuiuant. Sicomme voz lettres données à Calais l'vnziesme iour de Decembre le tesmoignent: desquelles affin que ma respōce à icelle puisse mieux conuenir, la teneur s'ensuit. A noble homme, honorable personne Michel d'Oris, &c. Du contenu au commencement desdictes lettres, ie vous remercie de ma part tant que ie puis de ce que voulez me deliurer de la peine en quoy ie suis, ainsi qu'en voz gracieuses lettres monstrez semblant: pour-  
ce qu'en



ce qu'en icelles voz lettres vous maintenez que vous auez long temps desiré d'auoir aucune accointance avec aucun noble & vaillant de la partie de France. Comme se vous voulez ignorer dont ie suis, pource vous ay fait cy dessus assçauoir que ie suis né du Royaume d'Arragon, non pourtant que ie, & chacun plus grand que moy peut iustement dire, auoir bon tiltre quand il est né du Royaume de France: car il n'est nul qui peut dire sur François auoir trouuée villain reproche, ne chose qu'un chacū gentil-homme ne peut faire, qui la verité en voudroit dire: mais pourtant, car nul preud'homme ne doit denier son pays: & pour vous faire assçauoir que i'ay eu, & ay, & auray la volenté tant que soient accomplies les armes declairées en mes premieres lettres. Il est vray que ie demourant oudit Royaume d'Arragon emprins le vœu des armes dessusdictes. Mais voyant que i'estoye trop loing des parties d'Angleterre pour plustost la chose accōplir, party d'illec & m'en vins à Paris où ie demouray en attendant voz nouuelles long temps depuis ce que i'auoye enuoyé mesdictes premieres lettres. Et depuis pour certaines choses necessaires touchant mon souuerain seigneur le Roy d'Arragon me party de France, & m'en retournay en mō pays tres melencolieux & esmayé, de ce que ie trouuay delay en tant de nobles cheualiers, de si petit esbattement que i'auoye deuisé: dont n'auoye eu nulle responce, où demouray par l'espace de deux ans pour cause de guerre qui estoit entre mes amis. Puis prins congé à mōdit seigneur, & retournay à Paris pour sçauoir nouuelles pour moy acquiter dudit fait. Et lors ie trouuay à l'hostel de mōseigneur de Gaucourt à Paris, es mains de Iean d'Olmedo escuyer dudit seigneur vosdictes lettres, dont cy dessus est faicte mention: lesquelles y auoient esté apportées apres ce que ie m'en estoye allé oudit Royaume d'Arragon (pour quelle occasion elles furent apres mon departement enuoyées ie n'en dy plus: mais vn chacun y pourra penser selon la teneur du fait ce que bon luy semblera) de laquelle lettre ie suis moult esmerueillé, & aussi sont plusieurs autres cheualiers & escuyers qui la teneur en ont ouïe: considerant le bon rapport de vostre cheualerie que tant auez obserué les droits des armes, & or endroit les voulez chāger & sans nul autre traicte n'aduis de partie: par vous mesmes auez voulu eslire iuge & place à vostre plaisir & aduantage: Laquelle chose comme chacun peut sçauoir n'est pas conuenable. Et quant aux autres lettres qui ensemble furent trouuées avec les lettres dessus escrites en l'hostel de mondit seigneur de Gaucourt à Paris, pour y mieux respondre i'ay cy fait enfermer la teneur comme il s'en suit.

*S'ensuit la conclusion des secondes lettres de l'Escuyer d'Arragon.*



Q R quand au premier poinct contenu esdictes lettres, où auez voulu dire qu'autres lettres enuoyées m'auez, avec saufconduit pour accōplir les armes là & au iour où il vous auoit pleu à vostre aduantage & plaisir: sçachez certainement & sur ma foy qu'onques autres ne veis de vous forts cestes cy, qui me furent baillées (comme cy dessus est dit) le xij. iour de Mars, n'y celuy saufconduit onques ne veis: car sans doubte se i'eusse eües vosdictes lettres, vous eussiez eu assez tost apres nouuelles de moy & responce à icelles: car c'est la chose que plus desire estre accomplie que chose qui soit: & biē pouez sçauoir que le trefgrand desir & vouloir que i'ay à liurer m'a fait par deux



fois venir & allongier de mon païs par deux cens cinquante lieües à grans fraits & despens, comme chacun peut sçauoir. Et pource qu'autresfois & plus à plain esdictes lettres me feistes sçauoir, qu'auiez esleu place à Calais par deuant noble & puissant Prince le Comte de Sommerfet: Et apres pourtant qu'il estoit occupé autre part ainsi que vosdictes lettres veulent dire, messire Hue Lutrelier lieutenant à Calais dudit seigneur de Sommerfet pour tenir la place, fut commis par tres hault & puissant Prince le Roy d'Angleterre vostre souuerain seigneur à vostre voulenté & poursuite, sans mon vouloir sceu ne congé dont ie suis moult esmerueillé & à bon droit: que sans moy auez tant allé auant comme d'essire iuge & place & mesmement si à vostre souhait. Et me semble que de vostre païs ne voulez pour riens perdre la veüe: & toutesfois noz deuanciers les nobles cheualiers anciens, qui tant nous ont laissé de belles exéples n'acquirent oncques grans honneurs en leur propre païs, ne oncques ne furēt coustumiers de requerir choses desconuenables, car ce n'est que pour eslongner les bonnes emprinses. Si suis biē certain qu'en ce cas vous n'ignorez pas, que le deuis du iuge, du iour & de la place doit estre du commun assentement des parties eleu: & si i'eusse voz lettres à temps eües, ie le vous eusse fait sçauoir. De ce que vous dictes que ne sçauiez se le Dieu d'Amours m'a de foy banny, pource que ie suis eslongné du païs de France, où mes premiers lettres furent escriptes, ne fil m'a fait changer mon propos. Ie vous faits assçauoir tout à certes sans nulle faintise, qu'oncques puis que i'euz ceste chose encommencée ne changeay mon propos ne feray tant que Dieu me gard de meschief: ne en mon lignaige n'eut oncques homme qui n'ait tousiours fait ce que preud'homme & gentil doit faire. Et quand viendra à la iournée, laquelle fera à l'ayde de Dieu briefuemēt se par vous ne deffault: ie croy qu'il vous besongnera d'auoir meilleur cueur, que d'auoir affaire à homme de son propos retrait. Pourquoi ie vous prie que laissons telles parolles qui ne peuuent porter fruit, car ce n'est pas fait de cheualerie ne de gentillesse: mais pensez au fait ainsi que m'avez donné esperance: si vous faits assçauoir qu'on ma rapporté, que vous auez à Calais entré en place tout seullet contre moy qui estoye du fait tout non saichant (comme cy dessus est dit) & loing de vous pour lors par ccc. lieües. Et si i'eusse fait semblables armes contre vous, là où pour le temps de lors estoye (ce que Dieu ne vueille) ie croy que les haubergeons ne feussent froissez ne les lances brisées aussi pou comme les vostres furent. Si eustes lors de vous mesmes le pris sans contredit. Et en verité ie pèse que vostredicte entreprinse & iournée ne fut oncques à meure deliberation de voz amis conclue, ne par autres qui en ont ouï parler ne sera ja louïe: mais non pourtāt ie ne voudroye que par semblables fictions coulourées ce qui a esté dit & prononcé, & promis par vous, l'en dit que vous ayez calengé de parolles sans nul effect: ie vous prie tant cherement & si acertes comme ie puis, que vous me vueillez accomplir mesdictes armes ainsi cōme elles sont en mesdictes lettres deuifées, & que i'en ay grand desir & espoir. Et autrement ne vueillez point tenir le temps en parolles: car ie ne doubte pas que en Angleterre n'ait plusieurs cheualiers qui pieça m'eussent deliuré de ma peine, se par vous n'eust esté la chose entreprinse. Et sur ce ne vous excusez plus par voz lettres que vous dictes à moy auoir enuoyées, car i'en suis tout sans coulpe comme cy dessus est dit. Si suis prest (sachez de vray) de soubstenir & garder mon

honneur



honneur:& qu'il n'y a nulle chose cy dessus escrite de ma part contre verité, qui du contraire me voudroit charger. Et pource que ie ne voudroye pas estre si importun, que ie deusse choisir le lieu & la place sans le vous faire assentir: i'offre se vous voulez aller deuant treshault & trefexcellent Prince & mon souuerain le Roy d'Arragon, où deuant les Roys d'Espaigne, de Portugal ou de Nauarre. Et se nuls d'iceux Princes ne voulez eslire pour plus estre pres de vostre repaire, & pour non eslongner de voz marches & de ma dame & la vostre, à laquelle de mon pouoir ie voudroye complaire. Je suis prest d'aller à Boulongne & que vous venez à Calais:& là où le capitaine de Calais de vostre part, & le capitaine de Boulongne de ma part:& au iours que ces deux diront & voudront eslire: ie suis prest & appareillé d'y aller, & vous accomplir lesdictes armes, ainsi qu'elles sont en mesdictes lettres comprinses à l'ayde de Dieu & de nostre Dame, de monseigneur S. Michel & monseigneur S. George. Et non pourtant que ie suis si loingtain de mon pays i'attédrai vostre respõce iusques à la fin du mois d'Aoust prochain venant:& tandis pour l'honneur de vous ie ne porteray pas le tronçon de greue, combien que plusieurs m'ayent enhorté du cõtraire: lequel terme passé se ie n'ay eu de voz nouuelles, ie porteray le tronçon de greue: & feray aller pourfuir mesdictes premieres lettres par vostre Royaume par tout où bon me semblera tant que i'aye trouué qui me deliure de ma peine. Et affin que vous adioustez plus grand foy aux choses dessusdictes, i'ay mis à ces presentes lettres le féel de mes armes & icelles signées de mon feing manuel, & parties par a.b.c. lesquelles furēt faictes & escrites à Paris le iiii.iour de Septembre, l'an mille quatre cens & vn.

*S'ensuit la lettre de l'Escuyer d'Arragon.*

**A**V nom de la saincte Trinité, de la benoiste vierge Marie, de monseigneur S. Michel l'Ange, & de monseigneur S. George: ie Michel d'Oris escuyer né du Royaume d'Arragon, fais assçauoir à tous cheualiers Anglois qui pour exaulcer mon nom & mon honneur, & querant armes à faire: i'ay sceu & sçay certainement qu'il y a noble cheualerie és parties d'Angleterre & desirant d'auoir vostre accointance & d'apprendre de vous les tours & faits d'armes. Si vous requiers pour l'ordre de cheualerie & pour la chose que plus aymez, que vous me vueillez deliurer des armes qui cy apres s'ensuiuent. Premierement d'entrer en la place à pied, &c. tout ainsi qu'il est contenu en ces premieres lettres vniuerselles. Excepté qu'il auoit escrit en la fin ainsi. Et m'offre pour abreger mon fait pour mieux monstrier ma bõne volenté & souueraine diligence, d'estre par deuant vostre iuge à Calais dedãs deux mois apres ce que i'auray receuë vostre responce scellée du féel de voz armes se Dieu me gard d'ensoine. Et dedans iceux deux mois ie vous enuoyeray lesdits deux chappeaux & d'eux selles, & la mesure de tous les bastons dessusdits:& ie prie à celui qui par sa bonne bonté me voudra deliurer, que brief sa bonne & honorable respõce me face si comme i'ay espoir de l'auoir des nobles dessusdits: toutesfois enuoyez moy saufconduict & bon & seur pour toutes choses qui contre moy & ma compaignie pourroiet venir iusques au nombre de xxxv. cheuaux: & que i'aye vostre responce par Longueuille porteur de cestes:& pour y adiouster plus



grand foy & fermeté, j'ay signé ces lettres de mon seing manuel & scélé du scél de mes armes:lesquelles furent faictes à Paris le premier iour de Ianuier l'an mille cccc.& deux.

*S'ensuit la quarte lettre de l'Escuyer d'Arragon.*

**E**N l'honneur de Dieu Pere de toutes choses & de la benoiste vierge Marie sa mere, qui me soit en ayde & me vueille par sa grace adresser & conforter de venir à conclusion de ceste œuvre que j'ay emprins, à tous cheualiers Anglois: Je Michel d'Oris né du Royaume d'Arragon, fais à sçauoir comme n'agueres: c'est à sçauoir comme l'an mille quatre cens, comme celuy qui pour lors vouloye estre séparé & abstrait de toutes autres cures, ayant en remembrance les tressingulieres gloires que noz deuanciers au temps iadis receurent, par les trefexcellentes proësses qu'ils feirent & mōstre-  
rent en excercite d'armes: lesquels considerans de cueur acquerir aucune noble louēge & merite, & pour moy habilitier en aucune chose digne & vertueuse, disposay en mon cueur aucunes armes faire avec aucun cheualier Anglois qui deliurer m'en voudroit par sa proësse: lesquelles armes accepta noble & honorable personne messire Jean de Prendregrest cheualier d'Angleterre, ainsi qu'il peut apparoir par ces lettres cy apres declairées. Et affin que ie puisse venir à cōclusion au propos que ie tiens, j'ay fait incorporer mes lettres dernieres aux lettres dudit messire Jean de Prédregrest n'agueres enuoyées: lesquelles toutes les lettres sur ce faictes d'une part & d'autre sont comprinses, desquelles la teneur s'ensuit. A trefnoble personne, &c. Et puis toutes les lettres iusques à la tierce lettre de l'Escuyer: lesquelles lettres ie feis renvoyer à Calais par Berry Roy d'Armes pour bailler audit messire Jean de Prendregrest. Et pource que ledit herault en reuenant dudit lieu r'apporta luy auoir esté dit de par trespouissant Prince le Comte de Sommerfet capitaine de Calais, que dedans le mois d'Aoust il auoit enuoyé responce desdictes lettres à Boulongne, combien qu'il n'ait pas esté accompli: toutes fois pour l'honneur dudit seigneur & capitaine de Calais qui par son humilité s'estoit chargé de r'enuoyer la responce à Boulongne, ainsi qu'il fut dit & rapporté dudit Roy d'Armes par faulcon Roy d'Armes d'Angleterre, & aussi pour l'honneur de cheualerie. Et pource que par nulle occasion indeuē ne fut dit ou temps aduenir, que j'aye fait mes poursuites trop importunément, j'ay attendu passer ledit terme que la responce me deuoit estre enuoyée par l'espace d'un mois apres. Et en apres affin qu'il soit approuué & chose notoire à vn chacun ma grace & bonne voulēté & de mes lettres à vous enuoyées. Et aussi à qui la faute & coulpe de ceste matiere peut toucher, j'ay fait cy apres inserer mes dernieres lettres à vous enuoyées: desquelles la teneur s'ensuit. Ou nom de la sainte Trinité, &c. par icelle cōdition que si ne me deliurez de ceste fois ie n'attens plus à escrire sur ceste matiere quant à present en Angleterre: car ie vous sçay si mal courtois & si mal gracieux, quand tant de fois auez eu & ouï ma requeste & bonne voulēté tant par lettres que par Aly le poursuyuant à present appelé Heugueuille le herault, vous à présentées de par moy ou Royaume d'Angleterre en l'an mille cccc.& vn, comme de mes autres pareilles à vous présentées par Grauille le poursuyuant, faisans mētion de mes premieres lettres generalles



neralles faictes en l'hostel de monseigneur de Gaucourt au Plessis le xij. iour de Mars, l'an mille cccc. & ij. & comme par vnes autres lettres à vous enuoyées par moy par Berry Roy d'Armes : lesquelles a receües trespuissant seigneur monseigneur de Sommerfet capitaine de Calais, qui furēt escrites à Paris le xxij. iour de Iuillet l'an mille cccc. & ij. Si qu'il vous pourra apparoir par icelles, & aussi par mes autres lettres escriptes & furent autres lettres escriptes à Paris le xij. iour de Iuing, l'an mille quatre cens & trois, lesquelles sont cy dessus transcriptes, & furent icelles presentées par Heugueuille le herault à trespuissant Prince monseigneur de Sommerfet capitaine de Calais: de toutes lesquelles lettres ie n'ay trouué nul cheualier qui m'ait enuoyé son seellé selon le contenu d'icelles. Et pourtant quittemēt pourray bien dire que nulle amitié ne bonne compaignie ie n'ay trouué là, où y a tant de si noble cheualerie, comme il y a ou Royaume d'Angleterre, veu que ie suis venu de si loingtain païs, poursuiuant en ceste peine par deux ans ou enuiron, & m'en fauldra aller ou Royaume, dont ie suis sans auoir accointance de vous, dont i'ay eu & ay tresgrand desir comme il vous peut apparoir & appert par mesdictes lettres generalles : & ainsi me parts de vous sans nul effect, ie vous auray peu à mercier cōsideré la peine où ie suis & ay esté treslonguement : & veu vostre responce quinze iours apres la datte de ces presentes lettres, i'ay intētion au plaisir de Dieu, de nostre Dame, de mōseigneur S. Michel & de monseigneur S. George de m'en retourner à la court de mon tresredoubté souverain & lige seigneur le Roy d'Arragon: & si dedans iceux quinze iours me voulez aucune chose rescrire, vous me trouuerez en l'hostel de monseigneur le Preuost de Paris. Autre chose ne vous sçay que rescrire fors que ie vous prie qu'il vous souuienne de moy, & de la peine en quoy ie suis : & pour adiouster plus grand foy & fermeté à ces presentes lettres, ie les ay signées de mō seing & seellées du seel de mes armes. Si les ay fait escrire doubles & parties Par a.b.c. desquelles lettres i'ay retenu l'une par deuers moy. Escript à Paris le dixiesme iour de May, l'an mille cccc. & trois. Depuis lesquelles lettres Perrin de Loharent sergent d'armes du Roy d'Angleterre, soy disant estre procureur en ceste partie dudit cheualier Anglois, enuoya vnes lettres par maniere de respōce audit escuyer d'Arragon dont la teneur s'ensuit. A tresnoble Escuyer Michel d'Oris : Je vous signifie de par monseigneur Iean de Prendregrest, que se vous luy voulez prestement payer & restaurer en mains les coustanges qu'il feit, pour vous deliurer des armes contenues en vosdictes lettres : lesquelles il maintient que par vostre defaut sont encores non faictes, il vous en deliurera tresvoulentiers. Et autrement sçachez qu'il ne vous en deliurera en riens, ne aussi ne souffrira qu'aucun cheualier ne escuyer de par deça vous en deliure, ne à ce donne responce. Et pource se vous luy voulez enuoyer cinq cens mars destrelins pour lesdictes coustages : lesquelles il dit autant auoir cousté, ie tiens que n'attendrez pas longuement d'estre deliuré desdictes armes. Si vous conseille par voye de gentillesse, que ou cas que lesdictes coustanges vous ne voudriez prestement enuoyer par deça (comme dit est) Vous vous gardez d'aucune chose si legieremēt parler de la cheualerie d'Angleterre, comme en disant que vous n'y auez trouué cheualier qui vous ait enuoyé son seellé selon le cōtenu de vosdictes lettres comme vous touchez en vostre dernier escriture. Car pour certain fil conuient que plus auant en soit parlé,



ie vous fais bien à sçauoir de par mōseigneur Jean de Prédregrest cheualier, qu'il sera trouué prest à maintenir le contraire en deffence de son honneur que vous touchez en ce trop asprement: si qu'il semble à noz seigneurs qui de ce sçauent la verité, car il en a fait ce que preud'homme & gentil doit faire. Et de ces choses m'enuoyez la responce & voulenté par Chalon le herault porteur de ces presentes lettres: lesquelles pour adiouster plus grand foy; i'ay scellées & signées à Paris, l'an mille quatre cens & quatre: lesquelles lettres ainsi enuoyées d'une partie & d'autre, finablement quant au fait ne vint pas à nul effect.

*Comment les grans pardons furent à Romme.*

CHAP. III.

**E**N cest an furent les grans pardons à Romme, ausquels allerent pour acquerir le salut de leurs ames infinies personnes de toutes les parties de Chrestienté: durant lequel temps regna tresgrād mortalité vniuerselle, dont entre les autres moururent grand multitude de pelerins alans audit lieu de Romme.

*Pour l'an mille cccc. & vn.*

*Comment Jean de Monfort Duc de Bretagne mourut. Et du partement de l'Empereur de Paris. Et le retour de la Royne d'Angleterre.*

CHAP. IIII.

**A**V commencement de cest an mourut Jean de Monfort Duc de Bretagne, auquel succeda Jean son fils premier né, qui auoit espousé la fille du Roy de France, & auoit plusieurs freres & sœurs. Ouquel temps l'Empereur de Constantinoble qui auoit esté grand espace de temps en la ville de Paris aux despens du Roy de France, se partit à tout ses gens & s'en alla en Angleterre où il fut moult honnorablement receu du Roy Henry & de ses Princes: & de là s'en retourna en son pays. Et adonc plusieurs notables ambassadeurs par diuerses fois furent enuoyez de France en Angleterre, & d'Angleterre en France pour traicter principalement que le Roy d'Angleterre voulust renvoyer la Royne Ysabel fille du Roy de France, iadis femme du Roy Richard. Et avec ce la laissast iouyr & posseder du doüaire qui enconuenāce luy auoit esté faict au traicté du mariage: lesquels ambassadeurs apres plusieurs traictes en fin vindrēt en cōclusion, & fut icelle Royne ramenée en France par mesfire Thomas de Perfy Cōestable d'Angleterre, qui auoit en sa compaignie plusieurs cheualiers & escuyers dames & damoiselles, pour icelle compaigner. Et fut conduicte iusques à vn lieu nommé Lolinghehen entre Boulongne & Calais: & là fut deliurée & baillée à Vvaleran Comte de S. Pol & capitaine de Picardie: avec lequel estoient l'Euesque de Chartres, & le seigneur de Heugueuille pour la receuoir: & si y estoient la damoiselle de Montpensier sœur du Comte de la Marche, & la damoiselle de Luxembourg sœur dudit Comte de S. Pol, & autres dames & damoiselles enuoyez de par la Royne de France. Lesquels tous ensemble apres qu'ils eurent prins congé aux seigneurs & dames d'Angleterre, se partirent de là & amenerēt ladicte Royne aux Ducs de Bourgongne & de Bourbon, qui à grand cōpaignie l'attendoient sur vn mont assez pres de là: si fut d'eux receüe & bien venue treshonorablement: & ce fait la menerent à Boulongne & de là à Abbeuille, où ledit Duc de Bourgongne fait pour sa bien venue vn honorable



norable conuy, & apres print iceluy Duc congé d'elle & retourna en Artois. Et ledit Duc de Bourbon & les autres qui estoient à ce conuy l'amenerent à Paris deuers le Roy son pere & la Royne sa mere : desquels elle fut receüe & bien venue tresbenignement. Neantmoins jaçoit qu'elle fut honnorablement enuoyée (comme dit est) si ne luy fut assigné aucune rente ne reuenue pour son doüaire, dont plusieurs Princes de France n'en furent pas bien contens dudit Roy d'Angleterre, & desiroient fort que le Roy de France se disposast à luy faire guerre.

*Comment le Duc Philippe de Bourgongne alla en Bretagne de par le Roy, & le Duc d'Orleans à Luxembourg: & du discord qu'ils eurent ensemble.* CHAP. V.

**E**N ce mesme an s'en alla en Bretagne le Duc Philippe de Bourgongne prendre la possession de par le Roy de France pour icelle Duché pour le ieune Duc: lequel païs luy fait tantost obeïssance, & s'en alla veoir la Duchesse vefue à Nantes, qui estoit sœur au Roy de Nauarre: & auoit promis d'espouser brief ensuiuant le Roy Henry d'Angleterre. Et pourtant ledit Duc de Bourgongne qui estoit son oncle, traicta tant avec elle qu'elle quitta son doüaire à ses enfans par condition, qu'elle deust auoir chacun an en recompensation d'iceluy certaine somme d'argent. Apres lesquels traictes, & qu'iceluy Duc eut mis garnisons de par le Roy en aucunes des plus fortes places du païs, il s'en retourna à Paris menant avec luy le dessusdit ieune Duc & ses deux freres: lesquels du Roy & de la Royne furent receuz honnorablement. Et lors le Duc Loÿs d'Orleans alla prendre la possession du gouuernemēt de la Duché de Luxembourg par le consentemēt du Roy de Boëme à qui elle appartenoit, avec lequel il auoit eu especialles conuenances: si meit garnison de ses gēs en plusieurs villes & forteresses d'icelle Duché, & apres s'en retourna en France. Et peu de temps apres sourdit grand dissention entre iceluy Duc d'Orleans & son oncle le Duc de Bourgongne: & tant que chacun d'eux assembla grand nombre de gens d'armes autour de Paris: mais en fin par le moyen de la Royne & des Ducs de Berry & de Bourbon fut la paix faicte, & par ainsi se retrahirent toutes gens es lieux dont ils estoient venus,

*Comment Clement Duc en Bauiere fut eleu par les Electeurs d'Alemaigne Empereur: & depuis fut mené à grand puissance à Francquefort.* CHAP. VI.

**L'**AN dessusdit Clement Duc en Bauiere fut eleu par les Electeurs d'Alemaigne Empereur de Romme, apres ce que reprouué & deposé fut le Roy de Boëme iadis Empereur. Si fut mené par iceux à Francquefort. Et auoit adonc en sa compaignie bien quarante mille hommes de guerre: & meit le siege deuant icelle ville qui estoit à luy rebelle, là où il fut environ quarante iours: durant lequel temps se commença entre ses gens vne grand mortalité d'epidimie, dont il en mourut bien quinze mille de ses gens: en la fin desquels quarante iours traicté se fait, & se meit icelle ville de Francquefort en l'obeïssance dudit Empereur. Et pareillement se meirent Coulongne, Ais & plusieurs autres villes, & luy baillerent leurs lettres que son election auoit esté faicte bien & deüement. Et apres fut couronné en icelle par l'Euesque de Mayence: à laquelle coronation plusieurs Princes & seigneurs du païs feirent grand fe-



ste. Et y furent faictes nobles ioustes & autres esbattemens: laquelle feste passée, enuoya son cousin germain Duc de Bauiere pere de la Roynie du Royaume de France à Paris, pour cōfermer la paix entre ledit Empereur & le Roy de France: lequel Duc Estienne venu audit lieu de Paris, fut receu à grand ioye, tant de sa fille la Roynie que des Princes du sang royal, car le Roy estoit pour lors malade. Et apres qu'il eut fait sa requeste vn certain iour luy fut faicte responce par les dessusdits seigneurs que bonnement ne pouoient faire paix au preiudice de leur beau cousin le Roy de Boësmé, qui autresfois auoit esté esleu & couronné Roy d'Allemagne. Apres laquelle responce iceluy Duc s'en retourna par le pays de Hainault en Allemagne deuers ledit nouuel Empereur. Auquel il racompta & dit ce qu'il auoit trouué & besongné en France: si n'en fut pas bien content, mais autrement ne le peut auoir. En apres iceluy Empereur auoit proposé d'aller personnellement en Lombardie à puissance de gēs d'armes, pour conquerre les passages & en enuoya vne partie deuant: mais les gens du Duc de Millan vindrent à main armée contre iceux, & en occirent & prindrent plusieurs: entre lesquels fut prins messire Girard cheualier seigneur de Heraucourt Marechal du Duc d'Autriche & plusieurs autres, & par ainsi fut rompu le voyage dudit Empereur.

*Comment Henry de Lenclastre Roy d'Angleterre combatit ceux de Parsiaque & de Galles, qui estoient entrez en fort pais & les vainquit.* CHAP. VII.

**E**Nuiron le mois de Mars de cest an s'esmeut grand dissention entre le Roy Henry d'Angleterre, & ceux de Parsiaque & de Galles: avec lesquels estoient plusieurs Escoçois: si entrerent en grand puissance ou pays de Northombelant: & là les trouua le dessusdit Roy Henry, qui pour les combattre auoit fait grād assemblée, mais de premiere venue iceux desconfirent son auātgarde. Et pource, sa seconde bataille n'osa aller contre eux. Et adonc le Roy qui menoit l'arrieregarde espris de grād vaillance, voyant aussi les gens doubtablement assembler à leurs aduersaires, se meit & ferit vigoureusement dedans la bataille de ses ennemis: en laquelle il se conduit & porta si cheualereusement qu'il fut sceu & relaté par plusieurs nobles des deux parties que ce iour il occist & mist à mort de sa propre main plus de xxxvj. hommes d'armes. Iacoit-ce qu'il fut par trois fois à coup de lance abbattu du Comte de Glas, & eut esté prins ou occis d'iceluy Comte, si ses gens ne l'eussent deffendu & rescous. Là fut occis Thomas de Parsiaque & Henry son nepueu prins: lequel le Roy feit tantost mettre à mort deuant luy, & iceluy Comte de Glas y fut pareillemēt prins & plusieurs autres. Apres laquelle besongne iceluy Roy Henry se partit du champ ioyeux de sa victoire & enuoya en Galles plusieurs de ses gens d'armes pour assieger vne ville en laquelle estoient aucuns fauorables aux dessusdits de Parsiaque.

*Pour l'an mille cccc. & ij.*

*Comment Iean de Verehin cheualier de grand renom Seneschal de Hainault, enuoya en diuers pais lettres par vn sien herault pour faire armes.* CHAP. VIII.

Au





V commencement de cest an Iean Vverehin cheualier de grand renom, Seneschal de Hainault enuoya en diuers paÿs par vn sien hault plusieurs lettres aux Cheualiers & escuyers, affin d'estre fourny à faire aucunes armes qu'il auoit entrepris à faire : desquelles lettres la teneur s'ensuit. A tous cheualiers & escuyers gentils-hommes de nom & d'armes sans reproche: Je Iean de Vverehin cheualier Seneschal de Hainault, fais à sçauoir à tous qu'à l'ayde de Dieu, de nostre Dame, de monseigneur S. George & de ma dame, seray le premier dimenche d'Aoust prochain venant à Conchy, se ie n'ay loyal effoine, prest pour lendemain faire les armes qui cy apres sont escrites par deuant mon tresredoubté seigneur monseigneur le Duc d'Orleans, lequel m'a accordé la place. S'il est adonc gentil-homme tel que dessus est dit en ladicte ville, qui accomplir les me vueille : & premierement ferons & le gentil-homme que accomplir me vouldra mon entreprinse montez à cheual en selles de guerre sans nulle lieure. Et ferons armez par noz corps comme il nous plaira, & aurons targes sans couerture ne fourrure de fer ne d'acier, & aurons chacun vne lance de guerre où ne pourra auoir agrappe ne rondelle, & vne espée. Si assemblerons desdictes lances vne fois, & assiz d'icelles lances ou non assiz: chacun osterà sa targe à part luy & prendra son espée sans ayde : si en ferons vingt coups d'espée sans reprinse, & pourrons à s'entrer à noz corps fil nous plaist. Et ie pour l'honneur de compaignie & le plaisir que le gentil-homme m'aura fait d'accomplir mes armes & madicte entreprinse, le deliureray prestement à pied se ie n'ay effoine de mon corps, sans ce que nous prenons ne oston luy ne moy piece de harnois: mais aurons celuy que nous aurons porté pour les espées à cheual: Sinõ que chacun pourra prendre autre visiere & alonger ses plaques fil luy plaist de tel nombre de coups d'espée, & puis de dague qu'il m'aura voulu deuiser quand il m'aura fermé d'accomplir ma dessusdicte emprinse : pourtant que ledit nombre de coups se puist fournir en la iournée, à telle reprinse que ie luy deuiseray. Et pareillemēt de tant de coups de hache que deuiser me vouldra: mais pour les haches se pourra armer chacun comme il luy plaira. Et fil aduenoit ainsi ( qu'il ne puisse ja aduenir) qu'en faisant lesdictes armes l'un de nous deux fut blessé, tant que pour la iournée ne peussent estre parfaictes les armes qui adonc seront emprinsees par nous deux, l'autre ne seroit en riens tenu de l'attendre pour parfaire ainçois seroit d'icelles quicte. Et quand auray accompli ce que dessus est dit ou que le iour sera passé, ie (auec l'ayde de Dieu, de nostre Dame, de monseigneur S. George & de madame) me partiray de la dessusdicte ville, se ie n'ay effoine de mon corps, pour aller à monseigneur saint Iacques en Galice. Et tous les gentils hommes de condition dessusdicte, que ie trouueray moy allant audit voyage & retournant iusques en la dessus nommée ville de Conchy, qui me voudront faire tant d'honneur & de grace de me deliurer de pareilles armes cy dessus deuisees à cheual: & me bailler iuge raisonnable sans meslongner de mō droit chemin plus de vingt lieues, ne moy reculler du chemin, & m'affermir que le plaisir dudit iuge soit tel que lesdictes armes soient commencées dedans cinq iours que seray venu en la ville, où les armes se deurent faire. Je à l'ayde de Dieu & de ma dame, se ie n'ay loyal effoine de mon corps, quand ils m'auront accompli mon emprinse les deliureray prestement à pied par la maniere cy dessus deuisee de tel



nombre de coups d'espée, de dague & de hache qu'ils m'auroient voulu deuifer quand ils me commettront d'accomplir ma dessusdicté emprinse. Et s'il aduenoit qu'un gentil-homme & moy fussions accordez pour faire les dessusdictes armes & m'eust donné iuge, comme cy deuant est deuise, & en allant deuers le iuge en trouuasse un autre qui me voulsist deliurer pareillement & donner iuge plus pres de moy que le premier, j'auroye tousdits à aller premierement deliurer iceluy qui plus pres iuge me donroit. Et quand ie seroye quicte de luy, ie retourneroye à l'autre pour luy fournir & ce qui accordé auriens ensemble, se ie n'auoye esloigné de mon corps. Et ainsi pareillement faire tout le voyage durant : & seray quicte pour faire deuant chacun iuge une fois lesdictes armes : & ne pourra un gentil-homme faire qu'une fois avec moy armes le chemin durant, & aurons bastons pareils de longueur pour faire toutes les armes qui se feront : laquelle longueur bailleray quand en seray requis. Et seront tous les coups de toutes lesdictes armes qui se feront ferus depuis le bort des plaques dessous en amont. Et affin que tous gentils-hommes qui auront voulu de moy deliurer puissent sçauoir mon chemin : j'ay intention au plaisir de Dieu de passer par le Royaume de France, & de là à Bordeaux, & puis au pays du Comte de Foix, ou Royaume de Nauarre, ou Royaume de Castille, & puis à monseigneur S. Iaques, & au retour si plaist à Dieu repasseray par le Royaume de Portugal, & de là au Royaume de Valence, ou Royaume d'Arragon, en Catalogne, en Auignon & puis repasseray par le dessusdit Royaume de France : entendu se ie puis par les dessus nommez pays seurement passer sans auoir empeschement : & pour toute ceste presente entreprinse, excepté deux du Royaume de France & ceux de la Comté de Hainault. Et affin que ceste emprinse soit tenue véritable, j'ay mis le seel de mes armes à ceste presente lettre pour accomplir ce que dessus est escrit, & signé de ma main : qui fut faicte l'an de l'incarnation nostre Seigneur mille quatre cens & deux, le premier iour du mois de Iuing : lequel Seneschal dessus nommé pour fournir & accomplir son entreprinse, alla à Conchy selon le contenu de ces lettres par deuant escrites, & là fut du Duc d'Orleans tres-ioyeusement receu : mais audit iour ne comparut homme nul pour faire armes contre luy. Et pourtant aucun peu de iours ensuiuant se partit de là pour aller au voyage de S. Iaques ainsi que promis l'auoit : durant lequel voyage il fit armes en sept lieux & par sept iournées deuant son retour : auxquelles armes il se porta à toutes vaillamment, & si honnorablement que tous les Princes qui estoient iuges d'icelles armes, furent contents de sa personne.

*Comment Loys Duc d'Orleans frere du Roy de France enuoya lettres au Roy d'Angleterre pour faire armes : & la responce qu'il eut.*

CHAP. IX.

**E**N apres en cest an mille quatre cens & deux Loys Duc d'Orleans frere au Roy de France, enuoya vnes lettres pour faire armes au Roy d'Angleterre, dont la teneur s'ensuit. Treshault & puissant Prince Henry Roy d'Angleterre : Je Loys par la grace de Dieu fils & frere des Roys de France, Duc d'Orleans vous escriis & fais à sçauoir qu'à l'ayde de Dieu, de la benoiste trinité, pour le desir que j'ay de venir à honneur l'emprinse que ie pense que vous deuez auoir pour venir à proesse regardant l'oisiueté en quoy plusieurs



plusieurs seigneurs se sont perdus, extraicts de royal lignée quant en faits d'armes ne s'employent. Jeunesse qui mon cueur requiert employer en aucuns faits pour acquérir honneur & bonne renommée, me fait penser que de present à cōmencer à faire mestier d'armes plus honnorablement ne le pourroye acquérir tout regardé, que d'estre en lieu à vn iour aduisé tant de vous comme de moy: & en vne place où fussions nous deux accompaignez chacun de son costé de cent cheualiers & escuyers de nom & d'armes & sans aucun reproche: tous gentils-hommes à nous combattre iusques au rendre. Et à qui Dieu donra la grace d'auoir la victoire le iour chacun chiez soy, comme son prisonnier pourra mener son compaignon pour en faire sa volenté: & si ne porterons sur nous quelque chose qui tourne à fort n'inuocation quelconque, qui de l'Eglise soit deffendu: & n'aura traict en ladicte bataille fors que chacun s'aydera du corps que Dieu luy a presté, armé comme bon luy semblera tant à l'vn comme à l'autre pour sa seurte, ayans bastons accoustumez: c'est à sçauoir lance, hache, espée & dague & chacun de tel aduantage comme mestier & besoing luy fera pour sa seurte, & pour son ayder sans auoir alesnes ne crocs, broches, poinçons, fers barbelez, aiguilles, poinctes enuenimées ne rasoirs, comme pourra estre aduisé par gens en ce cognoissans, ordonnez tant d'une part comme d'autre avec toutes les seurtez qui en ce cas sont necessaires. Et pour venir à effect de ceste desirée iournée dessusdicte, ie vous fais à sçauoir qu'à l'ayde de Dieu, de nostre Dame & de monseigneur S. Michel, ie pense estre (sceu vostre volenté) accompaigné du nombre dessusdit en ma ville & cité d'Angoulesme pour accomplir à l'ayde de Dieu ce que dit est deuant. Or m'est aduis que se vostre couraige est tel que ie pense pour ce fait accomplir, que vous pourrez venir iusques à Bordeaux, & là es marches nous deux nous trouuerons pour outre nostre iournée comme pourra estre aduisé tant de voz gens comme des miens commis à ce, plaine puissance ayans de toutes parts comme si nous y estions en ce faisant en noz propres personnes. Et treshaut & puissant Prince mandez moy & faictes sçauoir en ce cas vostre volenté, pour accomplir les choses dessusdictes: & vueillez abreger le temps d'en mander vostre plaisir, car ie pense que vous pouez sçauoir qu'en tout fait d'armes bien aduisé le plus brief compte est le meilleur, principalement & generallement aux Roys de France, aux Princes & aux seigneurs. Et en aduisant tant par mandemens comme par escrits en ceste emprinsé, n'en pourroit venir entre vous & moy qu'empeschement de faits necessaires, qui sont ou peuuent estre en noz mains: & affin que vous sçachez & cognoissiez que ce que vous escrits & mande ie vueil accomplir à l'ayde de Dieu, ie me suis sous escrit de ma propre main, & si ay scellées du scel de mes armes ces presentes lettres. Escrites en mon chastel de Conchy le vij. iour d'Aoust mille quatre cens & deux.

*S'ensuit la lettre de responce du Roy Henry aux lettres du Duc d'Orleans.*

**H**enry par la grace de Dieu Roy d'Angleterre & de France, & seigneur d'Irlande, à hault & puissant Prince Loys de Vallois Duc d'Orleans: vous escriuons, mandons & faisons sçauoir qu'auons veües voz lettres de requestes d'armes dont la teneur s'ensuit. Treshaut & puissant Prince Henry, &c. Par la teneur desquelles nous pouuons bien apparcevoir à qui elles s'ad-



dressent: neantmoins il est à nous, comme estre pourront entendues, par ce que vous en auez mandé, nous en auons grans merueilles pour les causes qui s'ensuiuent. Premièrement pour les trefues iurées entre nostre treschier seigneur & cousin le Roy Richard nostre dernier predecesseur que Dieu absolve, & vostre seigneur & frere: lesquelles vous mesmes auez iurées à tenir, & qui sont affermees par vostre seigneur & frere & nous. Secondement pour l'alliance qui fut parlée entre nous & vous à Paris, & aussi par les sermens que vous baillastes en noz mains & es mains de noz treschiers cheualiers & escuyers messire Thomas de Spinguchen, messire Thomas Remparson & Iean Morbury de la bonne amitié & alliace que vous promistes à nous tenir: desquelles lettres de vostre alliance sceellées de vostre grand seel la teneur s'ensuit. Ludouicus, &c. Or puis qu'ainsi est que vous auez comencé deuers nous contre raison par les causes dessusdictes: come il nous semble si nous soit par vous enuoyé. Nous vous voulons respondre en la maniere qui s'ensuit: c'est à dire, que nous voulons que Dieu & tout le monde saichent qu'il n'a esté & n'est nostre intention d'aller contre chose que nous ayons promis en nostre deffault ne par nous commencé en vostre personne deuers nous. Nous vous prios, mandons & faisons sçauoir, que la pareille lettre d'alliance que vous auez receüe de nous (laquelle nous voudrions auoir tenue se vous eussiez tenu la vostre) nous cassons, adnullons & renonçons tant come est en nous & tenons pour nulle amitié, amour, n'alliance dorenavant en vostre deffault: car il nous semble que nul Prince, seigneur, cheualier né autre de quelconque estat qu'il soit, ne doit demander ne faire armes sous quelque nulle alliance ne amitié. Et vous respondons à vostre dicte lettre de requeste. Combien que considéré la dignité que Dieu nous a donné, & là où Dieu nous a mis de sa bonne grace, ne deurions respondre à nul tel fait, sinon de pareil estat & dignité que nous sommes: vous faisons sçauoir que là où il est contenu en vostre lettre que l'entreprinse que vous pensez que nous deuous auoir pour venir à proesse regardant l'oisiueté, &c. Il est vray que nous ne sommes pas tant employez en armes & en honneurs comme noz nobles progeniteurs ont esté: mais Dieu est trop puissant de nous mettre à pourfuyuir leurs faits quand luy plaira, lequel pour toute l'oisiueté que nous auons eu de sa bonne grace à tousdis sommes tenus garder nostre honneur. Et quant à ce que vous desirez d'estre en lieu & en iour, regardé tant de vous comme de nous en vne place, où nous feussions nous deux accompagnez chacun de son costé de cent cheualiers & escuyers de nom & d'armes, & sans auoir reproche & gentils-hommes à nous combattre iusques au rendre. Vous faisons sçauoir qu'il n'a esté veu deuant ceste heure que aucun de noz nobles progeniteurs Roys ayt esté ainsi calengé par aucune personne de moindre estat qu'il n'estoit luy mesmes, & qu'il n'auoit mis n'employé son corps en tel fait avec cent personnes ou autre nombre pour telle cause: car il nous semble que ce qu'un Prince Roy doit faire, il doit faire à l'honneur de Dieu & commun prouffit de toute Chrestienté ou de son Royaume, & non pas pour vaine gloire ne pour nulle conuoitise temporelle, & nous voulons par tout conseruer l'estat que Dieu nous a donné. Prins auons tel propos qu'à quelque heure qu'il nous plaira & semblera mieux expedient à l'honneur de Dieu, de nous & de nostre Royaume nous irons personnellement en nostre pays de par delà accompagner



compaignez de tant de gens qu'il nous plaira : lesquels nous reputons tous noz loyaux seruiteurs, subiects & amis pour y conseruer nostre droit : auquel temps se vous pensez qu'il soit à faire vous vous pourrez mettre auant avec tel nombre de gens comme mieux vous semblera pour vous acquerir honneur, en accomplissement de tous voz courageux desirs. Et se Dieu plaist & nostre Dame & monseigneur S. George, vous ne partirez sans estre tellement respondu à vostre requeste que vous en deuerez tenir pour respõdu, soit pour combattre entre noz deux personnes autant comme Dieu vueille souffrir : laquelle chose nous desirons plus qu'autrement pour escheuer effusion de sang Chrestien ou autre plus grand nombre : & Dieu sçait que voulons que tout le mōde saiche que ceste nostre responce ne procede pas d'orgueil ne de presumptueuseté de cueur mettre en reproche nul preud'homme qui a son honneur cher. Mais seulement pour faire abbatre la hautesse de cueur & surcuidance de celuy quel qu'il soit, ne qui sçait discerner qu'il est luy mesmes. Et se vous voulez que ceux de vostre partie soient tous sans reproche, gardez mieux voz lettres, voz promesses & vostre sēel que n'avez fait deuant ceste heure. Et pource que nous voulōs que vous saichez que ceste nostre responce, laquelle nous vous escriuons & mandons procede de nostre certaine science, & que nous l'accomplirons en nostre droit se Dieu plaist. Nous auons sēellé de noz armes ces presentes lettres. Donné en nostre court de Londres le cinquiesme iour du mois de Decembre, l'an de grace mille quatre cens & deux, & de nostre regne le quart.

*S'ensuit la lettre d'alliance translatée de Latin en Francois faicte entre le Duc d'Orleans & le Duc de Lenclastre.*

**L**Oys Duc d'Orleans Comte de Vallois, de Blais & de Beaumont. A tous ceux qui ces presentes lettres verront salut & dilection : sçauoir faisons par ces presentes, que jaçoit-ce que par ces presentes entre treshaut & puissant Prince nostre treschier cousin Henry Duc de Lenclastre & Herodie, Comte d'Herby, Lincelue, Leychestre & North en present nous soit donné dilection & affection. Neantmoins nous desirans auoir plus ferme amitié & alliance ensemble, attendu que nul chose en ce monde ne se peut à peine trouuer meilleur ne plus plaisant ne plus proffitable de ce. Ou nom de Dieu & de la tressaincte Trinité qui est tresbel exemplaire, & aussi ferme & estable fondement & parfaicte charité & amitié, ne sans le bras de sa grace riens ne se peut bien ne proffitablement mettre à fin. Nous en forme & maniere que ceste nostre amitié soit reputée honorable & honneste, sommes venus & venons à faire ensemble alliance & confederation en ceste maniere. Et premierement chacun de nous tient estre raison & approuue moult, qu'en soient exceptez tous ceux quisembleront à chacun de nous estre exceptez au regard & honnesteté. Et pource nous exceptons de nostre part ceux qui s'ensuiuent. Premierement nostre treshault & trespuissant Prince & mon tresredoubté seigneur Charles par la grace de Dieu Roy de France : monseigneur le Daulphin son aîné fils & tous les autres fils, & enfans de mondit seigneur : madame la Royne de France & noz treschiers oncles les Ducs de Berry & de Bourgogne, & de Bourbon : trēs nobles Princes noz treschiers cousins le Roy des



Romains & de Boesme : le Roy de Hongrie , son frere & leurs oncles & Precop Marquis de Morauie, & aussi tous noz cousins plus prochains , & tous autres de nostre sang presens & aduenir tant masles que femelles, & nostre trescher pere le Duc de Millan, la fille duquel nous auons à femme. Pour laquelle affinité nous appartient estre fauorable à son bien & honneur. Et tresnobles Princes noz treschiers cousins le Roy de Castille, le Roy d'Escoce & tous autres alliez à mōdit seigneur : ausquels il nous fault adherer, avec mondit seigneur & nostre trescher cousin le Duc de Lorraine, le Comte de Cleues, le seigneur de Clisson, & tous autres noz vassaux & obligez par foy & serment: lesquels nous tenons estre gardé de mal pource qu'ils se sont donnez à noz seruices & commandemens. Et finablement tous ceux qui sont noz alliez, ausquels il appartient garder & tenir les conuenances. Item entre le Duc de Lenclastre & nous sera tousiours sans intermission bonne affection de vraye amour & dilection, comme doit estre entre vrays & honestes amis. Item chacun de nous sera tousiours & en tous lieux amis, bien vueillans des amis & bien vueillans l'un de l'autre: & ennemy à ses ennemis, ainsi qu'il commande à honneur & loüenge de l'un & de l'autre. Item en tous temps & en tous lieux & en toutes choses besongnes, chacū de nous aymera, pourchassera, gardera & deffendra le salut, le bien, honneur & estat l'un de l'autre, tant en parolles comme en faits diligemment & songneusement, tant cōme faire se pourra honnorablement & honestement. Item en temps & en cas de discord, debat & de guerre nous ayderons & deffendrōs l'un l'autre de grand desir, pure vouldenté & parfaicte euure contre & enuers tous Princes, seigneurs & barons, & toute autre personne singuliere communauté, college & vniuersité de quelque seigneurie, dignité & estat, degré & condition qu'ils soient par toutes voyes, remedes, engins, conseulx, forces, aydes, gēs d'armes, osts & autres subides que nous pourrons & sçaurons : & chacun de nous se lieuera, resistera & combattra contre tous les aduersaires, guerroyeurs & ennemis de l'autre. Et sy efforcera de toute pensée, conseil & œuure licites & honestes, exceptez tousiour (comme dit est) les dessus nommez. Item les choses dessusdictes se feront, tiendront, garderont & dureront tant comme les trefues presentes faictes entre mondit seigneur & le Roy d'Angleterre dureront: & se meilleur paix se faict, dureront tant comme icelle paix durera entre eux sans enfreindre. En tesmoing & fermeté de ce nous auons fait faire & escrire ces presentes lettres & y mettre nostre seel pēdant. Donnē à Paris le xvij. iour de Iuing, l'an de grace mille trois cens quatre vingts & seize.

*S'ensuit la seconde lettre du Duc d'Orleans replicans aux premieres lettres du Roy de Angleterre.*

**H**Ault & puissant Prince Henry Roy d'Angleterre. Je Loys par la grace de Dieu fils & frere des Roys de France, Duc d'Orleans: ie vous escripts, mande & fais sçauoir que i'ay receu en bonne estraine premier iour de Ianuier par Enclastre Roy d'armes vostre herault, les lettres que escriptes m'auiez, faisans responce d'aucunes autres lettres que mandées & escriptes vous auoye par Champaigne Roy d'armes, & par Orleans mon Herault & ay entendu le contenu d'icelles. Quant à ce que vous ignorez ou voulez



lez ignorer, que vous ne sçauiez se mesdictes lettres s'adressent à vous vostre nom y est, que preintes sur fons, & que voz Pere & Mere vous appelloient eux estans en vie. Se la dignité que vōus detenez, ie ne escripts pas au long. Ie n'approuue pas & ne voudroye en ce approuuer la maniere comment vous y estes venus: mais sçachez de vray que mesdictes lettres s'adressent à vous. Quant à ce que vous m'avez escript, que vous auez merueilles de la requeste que ie vous ay faicte, considerez les trefues prinſes par mon trefredoubté seigneur monseigneur le Roy de France d'une part, & hault & puissant Prince le Roy Richard mon nepueu & vostre seigneur Lige derrain trespasſé (Dieu sçait par qui) d'autre part, & aussi vous dictes que par vosdictes lettres que pour aucune alliance faicte entre nous deux, laquelle vous m'avez enuoyée de mot à mot (ie la recite pour les voyans mieux informer) en vous remonſtrant regardé mon propos que lors auoye & auray se Dieu plaist toute ma vie. Et regardé l'alliance, se enuers vous n'eust eu aucun deffault. Premièrement, d'auoir entrepris à l'encontre de vostre Lige & ſouuerain seigneur le Roy Richard à qui Dieu pardoint, ce qu'avez fait, qui estoit allié de mondit seigneur monseigneur le Roy de France tant par mariage comme par escripts, ſcellé de leurs ſeaux en quoy nous iuralmes ceux de leur lignage d'un costé & d'autre, comme il appert par les lettres faictes pour le temps, où ils assemblerent deuers monseigneur & vostre seigneur dessusdit vous en la compagnie & plusieurs autres de son lignage. Et pouez cognoistre & apparceuoir que mesdictes lettres dont vous m'avez enuoyé la coppie: Se ceux qui estoient parauant alliez de mondit seigneur ne ſont point exceptez. Et si pouez sçauoir, se ce seroit bien hōneſte chose à moy d'auoir alliance à vous de present. Car ou temps que ie feis ladicte alliance ie n'eusse cuydé ne pensé que vous eussiez fait contre vostre Roy, ce qu'est cogneu & que chacun ſçait que vous auez fait. Et pource que vous dictes que nul seigneur cheualier de quelque estat qu'il ſoit, ne doit demander à faire armes ſans rendre leur alliance auant que l'en ſoit telle entreprinſe, ie ne ſçay se à vostre seigneur le Roy Richard vous rendistes le ſerment de feauté, que vous auiez à luy auant que vous procediſſez contre ſa perſonne en la maniere qu'auéz fait. Et quant à la quiétance que vous me faictes, auant que vous me reſpondez à la promeſſe que faicte m'auiez, comme il appert par les lettres ſur ce faictes que ie ne puis auoir. Sçachez que depuis que ie ſceuz le fait que vous feistes à vostre seigneur lige, ie n'euz eſperance que vous deussiez tenir à moy ne à autrui quelque conuenance, que deussiez auoir & deuez penſer & aſſez cognoistre que ie n'ay vouloir d'auoir alliance à vostre perſonne. Quant à la conſideration que pouuez auoir à la dignité en quoy vous estes, ie ne pensé que la vertu diuine vous y ait mis, Dieu le peut bien auoir diſſimulé, comme il fait plusieurs Princes regner & à la fin à leur conſuſion. Et à me comparer à vostre perſonne point n'en eſt beſoing regardant mon honneur. A ce que vous me reſcriuez que pour l'oīſiueté que vous auez eu vostre hōneur à touſiours eſté bien gardé: Aſſez eſt ſceu par toutes contrées. Quant à la venue que vous penſez à faire par deça ſans le moy mander, quand ne où ce ſera reſcriuez le moy, ou le me mandez: & ie vous aſſeure que vous orrez nouuelles ſans guerres attendre de tout mon vouloir pour faire & parfaire à l'ayde de Dieu, ſe i'ay ſanté, ce que i'ay eſcrit par mes autres lettres, ſe à vous ne tiēt. A ce que vous



me rescriuez que voz progeniteurs n'ont point accoustumé d'estre ainsi calengiez de moindres personnes qu'ils n'estoient eux mesmes: qui ont esté & qui sont les miens, n'est ja besoing qu'en soye mon herault il est cogneu par tout pays. Et quant à moy ie me sens sans reproche, la mercy Dieu: & ay tousiours fait ce que loyal preud'homme doit faire tant enuers Dieu comme enuers mon seigneur & son Royaume: qui fait où à fait autrement & eut tout le monde en sa main, si n'a il riens & n'est pas à priser. Quant à ce que vous rescriuez que ce qu'un Prince Roy doit faire, il doit faire à l'honneur de Dieu au commun profit de toute Chrestienté, & de son Royaume & non pas par vaine gloire ne pour nulle conuoitise temporelle: ie vous respons que c'est bien dit, mais si l'eussiez faict en vostre pays le temps passé, plusieurs choses par vous faictes n'eussent pas executées où pays où vous demourez. Qu'auoit à comparoir ma tres-redoutée dame ma dame la Royne d'Angleterre, laquelle par vostre rigueur & vostre cruauté est venue en ce pays desolée de son seigneur qu'elle a perdu, desnée de son doüaire que detenez, despouillée de son auoir, qu'elle emporta par delà, & qu'elle auoit perdu son seigneur. Où est celuy qui quiert auoir honneur qui ne se monstre pour soubstenir son fait, où sont tous nobles qui doiuent garder en tous estats les droits des dames vesues & des pucelles de si belle vie, comme sçauent qu'estoit ma dessusdicte dame & niepce. Et pource que ie luy appartiens de si pres, comme chacun sçait, m'acquittant enuers Dieu & enuers elle comme son parent: vous respons aux poincts que vous que pour escheuer l'effusion de sang humain vous estant à l'encontre de vous me respondrez plus volentiers de corps à corps, ou de plus grand nombre que de present ne m'escriuez, qu'à l'ayde de Dieu, de la benoïste vierge Marie & de monseigneur saint Michel, sceu de vous la responce de ces lettres soit corps à corps, nombre à nombre: soit pouuoir à pouuoir, vous trouuerez en faisant mon deuoir & gardant mon honneur telle responce par effect, comme en telle cas appartient. Et vous mercie pour ceux de mon costé que de leur santé auez plus grand pitié que n'auez eu de vostre lige & souuerain seigneur. Quant à ce que vous m'auez escrit qu'iceluy qui ne sçait discerner en quel estat il est soy mesmes, veut eslire gens sans reproche. Sçachez que ie sçay que ie suis & ceux de ma compagnie & le vous mande, & vous le trouuerez que nous sommes tous preud'hommes & loyaux, & pour tels nous tenons, nous reputons. Et nous auons bien & sçaurons se Dieu plaist garder de faire autre chose que loyaux preud'hommes & gentils ne doiuent faire, ne par escrit ne par dit ne par fait. Mais vous & voz gens regardez à vous & me rescriuez sur toutes ces choses vostre intention, laquelle chose ie desire moult de sçauoir brief. Et pource que vous sçachez & cognoissez que ce que ie vous escriis, & que ie vous mande ie vueil accomplir à l'ayde de Dieu, j'ay icy fait mettre le seel de mes armes. Et m'y suis sous escript de ma propre main le lendemain de la nostre Dame xxvj. iour de Mars mille quatre cens & deux.

*S'ensuit la seconde lettre du Roy Henry dupplican à la seconde lettre du Duc d'Orleans.*

Henry





Henry Roy d'Angleterre seigneur d'Irlande : Loys de Vallois, Duc d'Orleans : vous rescriuons, mandons & faisons à sçauoir que nous auons vnes lettres de vostre part, le derrain iour de ce present mois de Avril, que nous auez enuoyez par Champaigne Roy d'Armes & Orleans vostre herault, en cuidant auoir donné responce à noz lettres par vous receües le premier iour de Ianuier dernier passé par Lenclastre Roy d'armes nostredit herault : laquelle vostredicte lettre datte porte du xxvj. iour du mois de Mars l'an de grace mille quatre cens & deux, & auons bien entendu le contenu d'icelles. Et jaçoit-ce que toutes choses cōsiderées & par especial l'estat où Dieu nous a mis, nous ne deussions respondre à vostre requeste que faicte nous auez, ne aux replications adioustées à icelles: toutesfois puis que vous touchez nostre honneur. Si vous voulons respondre voyans & considerans qu'en vostre premiere requeste d'armes auons faicte, à laquelle nous vous donnâmes responce : vous pretendistes icelle auoir procedée d'entier desir & ieunesse de cuer pour vous acquerir honneur & bon renom à commencer à venir & sçauoir le mestier d'armes. Si vous semble par vostre present escrit qu'iceluy vostredit desir, auez tourné grandement en friuolles & en parolles de tençon & despit, en diffamant nostre personne, cuidant par aduenture que ce tourneroit à confusion de nous, ce que Dieu peut bien tourner à la vostre & à bon droit: si sommes pourtant esmeuz, & non pas sans cause raisonnable, de vous dōner responce aux principaux poincts comprins en vosdictes lettres, par maniere comme cy apres vous pourra plus plainement apparoir: pensant bien & considerans que n'appartient pas à nostre estat ne que ne pourrions nostre honneur garder par tenser. Auecques sur les autres poincts friuolles plains de malice & de tençon, ne vous donner responce aucunement. Se non que tout ce qui touche reproche est faulx. Premièrement quant à la dignité nous tenir, laquelle vous n'escruez au long ne n'approuuez pas ne ne voudriez en ce approuuer la maniere comment nous y sommes venus: certes nous en merueillons grandement, car nous vous l'auons bien dit & declairé auant nostre partement & par delà, auquel temps vous approuuastes icelle nostre venue & promistes ayde encontre nostre trescher seigneur & cousin le Roy Richard que Dieu absolve. Se nous le voulons auoir eu: neantmoins de la preuue ou de la despreuue de vous, en ce nous tenons de vous bien peu de compte: car puis que Dieu de sa bonne grace en nostre droit nous a approuué & tous ceux de nostre Royaume, aussi il nous suffit pour tous ceux qui en ce nous voudroient contredire qu'ils auroient le tort: confians de la benigne grace de Dieu qui nous a gouuerné deffence, & bien a commencé à nous: car en continuant sa grand misericorde nous meine à bonne fin & telle conclusion que vous cognoistrez la dignité qu'il nous a dōnée & le droit nous y auons. Quant à ce qu'en vosdictes lettres est fait mention du trespassement de nostre treschier seigneur & cousin que Dieu pardoint. Et en disant (Dieu sçait par qui) nous ne sçauons à quelle cause ou intention que vous le dictes: mais se vous voulez ou osez dire que par nous ou nostre vouloir ou consent il ait esté, il est faulx & sera toutes les fois que vous le direz. Et à ce nous sommes & seront prests à l'ayde de Dieu de nous deffendre corps pour corps, se vous voulez ou l'osez prouuer. Et là où vous m'escruez en monstrant de garder vostre propos, que vous auez de



garder l'alliance faicte par nous deux, s'enuers nous n'eust eu aucun deffault d'auoir entrepris à l'encontre de nostre treschier seigneur & cousin, & dictes nous auoir fait qui estoit allié de vostre seigneur & frere tât par mariage comme par escrits scellez de leurs seaux. Et aussi du temps que vous feistes celle alliance avec nous vous n'eussiez cuidé ne pensé, que nous eussions fait à l'encontre nostre treschier seigneur & cousin ce qui est cogneu, & que chacun sçait que nous auons fait: à ce que vous en dictes, nous respondons que nous n'auons riens fait enuers luy que nous n'osons bien auoir fait deuant Dieu & tout le monde. En ce que vous nous escriuez que nous pourrions cognoistre & apparcevoir par voz lettres de ladicte alliance se ceux qui estoient par auant exceptez. Et ce nostre treschiere & tresamée cousine dame Ysabel vostre treshonnorée dame & niepce n'y estoit pas comprinse. Nous ne sçauons se les auez exceptez en general. Mais adonc quand vous feistes alliance d'entre nous à vostre requeste vous ne l'exceptates pas en especial, comme vous feistes bel oncle de Bourgongne: & neantmoins vne des principales causes de vostre alliance qui se fait à vostre instance & requeste, estoit par la malueillâce que vous auez à vostredict oncle de Bourgongne, comme nous sçaurons bien declarer quand nous voudrons par où loyaux pourront apparcevoir si aucun deffault y est en vous. Et pource vne hypocrisie souffiroit deuers Dieu sans estre vsee deuers le monde. Quant à ce que vous maintenez que puis que vous auez sceu le fait que vous pretendez, nous auoir fait à nostre dessusdit seigneur & cousin vous n'eussiez esperance que nous d'eussions tenir à vous ne à autrui quelconque conuenant que nous deussions auoir. Si que nous deurions penser & assez cognoistre que vous n'auiez vouloir d'auoir alliance à nostre personne. Nous nous merueillôs que long temps apres, que nous estions en l'estat que par la grace de Dieu nous auons à present vous enuoyastes deuers nous vn de voz cheualiers, portât vostre liurée qui nous compta de par vous que vous voudriez toutesfois estre à nous entier amy à ce qu'il nous disoit. Et qu'apres vostredit seigneur & frere vous nous feriez autât de plaisir & amitié comme à nul Prince qui fut: par telles enseignes que vous luy chargeastes de nous dire que l'alliâce faicte entre vous & nous, estoit passée dessous noz grans seaux: laquelle chose ce qu'il nous disoit ne voudriez auoir descouvert à nul François. Et depuis par aucun de noz hommes liges vous nous feistes sçauoir vostre bon vouloir, touchant celle amour & entiere amitié par semblable maniere en effect, sicomme ils nous ont dit: mais puis que n'auiez vouloir d'auoir alliance à nostre personne, nostre estat bien considéré (sicomme escrit nous auez) certes nous ne sçauons pourquoy nous deussions desirer d'auoir aucune alliance à vous toutes choses bien considérées: car ce qu'enuoyé nous auez par auant n'accorde pas à ce qu'escrit nous auez à present. Et là où vous auez escrit, quant à la consideration que nous pourrons auoir en la dignité en quoy nous sommes, vous ne pësez que la vertu diuine nous y ait mis. En disant Dieu le peut auoir dissimulé, comme il a fait plusieurs Princes regner à la fin à leur confusion. Certes de bouche, de cueur plusieurs gens parlent: & pour tels comme ils sont eux mesmes ils iugent les autres, pourquoy Dieu est tout puissant de faire tourner leur sentence sur eux mesmes & non pas sans cause. A ce que touchez la verité & dignité en quoy nous sommes, vous ne croyez que la vertu diuine nous y ait



ait mis: certes nous vous respondons & faisons sçauoir que nostre seigneur Dieu à qui nous deuõs tousiours louenges & graces nous a mōstré de sa diuine grace plus, que nous ne sommes dignes de receuoir ou d'auoir se ce n'estoit seulement ce q̄ de sa misericorde ou benignité, luy a pleu nous dōner. Et certes ce que toutes les forceries ne diables ne sçauoient faire ne ne pourroient donner, ne tous ceux qui s'en entremettent. Et combien que vous doubtez nous ne doubtons pas, mais sçauons & affions bien en Dieu que nous y sommes entrez par luy & de sa benigne grace. Quant à ce que vous nous escriuez par vostre demande que vostredicte treshōnorée dame & niepce auoit à se plaindre de nostre rigueur & nostre cruauté par ce qu'elle estoit venue en son pays desolée de son seigneur qu'elle a perdu, desfevrée de son doüaire q̄ vous dictes q̄ nous detenõs, despouillée de son auoir qu'elle apporta par deça & qu'elle auoit de son seignr. Dieu sçait à qui nulle chose ne peut estre celée q̄ n'auons nulle cruauté enuers elle, mais luy auons mōstré amour & amitié. Qui voudroit dire le cōtraire il mentiroit faulcement. Et pleust à Dieu que n'eussiez ja fait rigueur, cruauté ne vilénie deuers nulle dame ne damoiselle ne autre personne non plus qu'auons fait deuers elle nous croyons que vous en vaudriez de mieux. Quant à ce que vous touchez la desolation de nostre treschiere & trefamée cousine vostre treschiere & treshonorée dame & niepce, de son seigneur: nous vous respōdons par mesme maniere cōme respondu vous auons par amour. Quant à ce que vous faictes si chier de son doüaire, comme vosdictes lettres plus plainement font mention. Nous sommes bien contens que ou cas que les lettres des conuenances faictes sur son mariage eussent esté bien veües & entēdues, vous ne peussiez (à dire verité) auoir surmis à nous telle reproche comme vous cuydez auoir fait. Quant à son auoir il est vray qu'à son departir hors de nostre Royaume, nous feismes si plainement à elle restituer ses biens & ioyaux (& plus que nous ne trouuāmes avec elle quand nous vinsmes à nostre Royaume) que nous tenons en estre quicte: sicomme par vne quictance appert soubs le scēl de son pere nostredit seigneur & frere, passé en son conseil vous y estant present comme à toutes gens pourra cleremēt apparoir, sans ce qu'onques l'ayons despouillée comme surmis nous auez faulcement. Et pource vous deueriez aduiser de ce que vous escriuez: car nul Prince ne doit escrire sinon loyaument & plainement, laquelle chose vous n'avez pas fait à present. Et pourtant nous vous respondons comme dessus. Et vous respondons en tous poincts en ce que nous deuerons faire, par telle maniere qu'à l'ayde de Dieu & de nostre Dame & de monseigneur S. George chacun preud'homme vous tiendra, pour respondu & nostre honneur en sera gardé. A ce que vous escriuez que vous sçauiez que ceux de vostre compaignie & vous estes tous preud'hommes & loyaux, & pour tels vous reputiez. Touchāt vostre cōpaignie nous ne leur reprouuons pas: car nous ne les cognoissons pas: mais quant à vostre personne nous ne vous reputons pas pour tel toutes choses considérées. Et là où vous nous merciez pour ceux de vostre costé, que de leur sang auons plus grand pitié que n'auõs eu de nostre Roy lige & souuerain seigneur: Nous vous respondons qu'en l'honneur de Dieu, de nostre Dame & de monseigneur S. George, qu'en ce que vous auez escrit que du sang de ceux de vostre costé, auons plus grand pitié que n'auons eu de nostredit seigneur, vous auez menty faulcement



& mauuaiselement: car vrayement nous auons son sang plus chier, que le sang de ceux de vostre costé, combien que vous pretendez le contraire faulcement. Et se vous voulez dire que nous n'ayons eu son sang en sa vie cher: Nous disons que vous mentez & mentirez faulcemēt toutes fois que vous le direz, Ce sçait le vray Dieu que nous appellons à tesmoing: En mettant en ce nostre corps contre le vostre en nostre deffence comme loyal Prince doit faire se vous le voulez ou osez prouuer. Et pleust à Dieu que vous n'eussiez oncques fait ne procuré contre la personne de vostredit seigneur & frere ne les siens plus que nous n'auons de nostredit seigneur: si croyons qu'ils en feussent à present plus ayfés. Et jaçoit ce que vous pensez que nous n'auons defferuy d'estre merciez, de ce que nous auons pitié de ceux de vostre costé: toutesfois il nous semble qu'enuers Dieu & tout le monde nous l'auōs bien defferuy, mais non pas en telle maniere que vous pretendez faulcemēt. Consideré qu'apres le sang de noz feaux liges amis & subiects: certes nous auons bonne cause comme il nous semble d'auoir bien le sang de ceux de France, en regardant le bon droit que Dieu nous y a donné, ainsi comme nous auons entier espoir en luy. Pour la saluation desquels voudrions plus volentiers mettre nostre corps contre le vostre, que souffrir l'effusion de leur sang comme bon pasteur doit faire en luy exposant pour ses brebis, là où parmy vostre vaine gloire & orgueil de cueur vous le mettriez à ce qu'ils periroient, quand vous ne voudriez mettre vostre corps ou exposer pour eux quand mestier seroit: mais nous ne nous merueillons pas, se vous faictes de vostre part comme le mercenaire, comme au curateur des brebis n'appartient point, que quand il voit le loup venāt, laisser les brebis en soy mettāt à la fuitte sans auoir de riens cher leur sang. Et nous ainsi cōfermant des femmes qui contendirent pour l'enfant deuant le noble Roy Salomon: c'est à sçauoir la bonne mere qui auoit pitié de son fils, là où l'autre qui n'estoit pas sa mere qui par cruelle instance vouloit l'auoir en ce faisant departy, & mis à mort, se le saige iuge & discret n'eust esté. De ce que vous nous rescriuez que sceu de nous la responce de vosdictes lettres dernieres, soit corps à corps soit nōbre à nōbre, soit pouuoir à pouuoir nous trouuerons en faisant vostre deuoir & en gardant l'honneur de vous par effect, comme en tel cas appartient. Nous merciōs se vous le voulez parfournir. Neantmoins sçauoir vous faisons que nous esperons à l'ayde de Dieu que vous verrez le iour que vous ne departirez sans auoir l'vne des trois voyes à nostre honneur. A ce que vous desirez d'estre acertenez de la venue que pensons à faire par delà: Nous faisons sçauoir par la maniere que vous auons escrit en noz autres lettres, qu'à quelque heure qu'il nous plaira & nous semblera mieux expedient à l'honneur de Dieu, de nous & de nostre Royaume, nous venrons personnellement en nostre païs de par delà, accompagné de tant de gens & tels comme nous plaira: lesquels nous reputons tous noz loyaux seruiteurs, subiects & amis pour y conseruer nostre droit: toutesfois en mettant (à l'ayde de Dieu) nostre corps cōtre le vostre en nostre deffence, cōme escrit vous auons par auāt pour obuier à la malicieuse & faulse fame, q̄ vous nous auez cuydé mettre sus, vous le voulez ou osez prouuer, lequel vous trouuerez assez tost se Dieu plaist à vostre cōfusion, & pour estre cogneu tel que vous estes. Dieu sçait & voulons que tout le monde sache que ceste nostre responce ne procede pas d'orgueil, ne de presumption de  
cueur



cueur:mais pource que vous auez commencé en vostre tort encontre nous confians tousdis en nostre seigneur Dieu, qui nous a mis en tel estat en qui nous deuons soustenir droit qu'il veut, que nous deffendons nostre droict à tout nostre pouuoir par bonne grace & ayde de luy deuant mise. Si vous respondons & respondrons comme dessus est dit. Et pource que nous voulons que vous saichez que ceste nostre responce, laquelle nous rescruons & mandons procede de nostre certaine science:si auons scellées de noz armes ces presentes lettres. Neantmoins jaçoit que les dessusdits Roy d'Angleterre & Duc d'Orleans eussent escrites & enuoyées les dessusdictes l'un enuers l'autre: toutesfois ne comparurēt aucunement personnellement l'un contre l'autre. Et par ainsi demourerent les besongnes touchant la matiere en cest estat.

*Comment Vvaleran Comte de saint Pol enuoye ses lettres de deffiance au Roy Henry d'Angleterre.* CHAP. X.



Tem en cest an pareillement Vvaleran Comte de S. Pol enuoya lettres de deffiances audit Roy d'Angleterre: desquelles la teneur s'enfuit. Treshault & puissant Prince Henry Duc de Lenclastre: moy Vvaleran de Luxembourg Comte de Ligney & de S. Pol, considerant l'affinité, amour & cōfederation que i'auoye par deuers treshaut & puissant Prince Richard Roy d'Angleterre, duquel i'ay eu la sœur en espouse. Et la destruction dudit Roy dont notoirement estes en coulpe & tresgrandement diffamé, auec ce la grand honte & dommage que moy & ma generation de luy descendans pouuons & pourrons auoir au temps aduenir, & aussi l'indignation de Dieu tout puissant, & de toutes raisonnables & honnorables personnes. Se ie ne m'expose auec toute ma puissance à venger la destruction dudit Roy, dont i'estoye allié. Pourtant par ces presentes vous faits à sçauoir qu'en toutes manieres que ie pourray, ie vous nuyray: & tous les dommages tant par moy comme par mes parens, tous mes hommes & subiects ie vous feray soit en terre ou en mer: toutesfois hors du Royaume de France pour la cause deuandicte, non pas aucunement pour les faits meuts ou à mouuoir entre mon tresfredoubté & souuerain seigneur le Roy de France & le Royaume d'Angleterre. Et ce ie vous certifie par l'impression de mon seel donné en mon chastel à Luxembourg le dixiesme iour de Feurier, l'an mille quatre cens & deux: Lesquelles lettres furent enuoyées au dessusdit Roy pour vn herault d'iceluy Comte Vvaleran. A quoy fut respondu par le dessusdit Roy Henry, que de ce ne faisoit compte. Et qu'il auoit bien intention que le dessusdit Comte Vvaleran auroit ses subiects & ses pays. Apres la deffiance ledit Comte se disposa & prepara par toutes manieres à faire guerre au dessusdit Roy d'Angleterre, & aux siés. Et qui plus est fait en ce mesme temps faire en son chastel de Bohain la figure & representatiō du Comte de Rostellāt, armoyé de ses armes & vn gibet assez portatif: lequel il feit mener & conduire secretement en aucunes de ses forteresses du pays de Boulenois. Et brief ensuiuant furent iceluy gibet & representation conduictes par Robinet de Robretanges, Aliaume de Biurtin & autres experts gens de guerre iusques assez pres des portes de Calais. Et fut là le dessusdit gibet de rechief, & ledit Comte de Rostellāt pendu à iceluy les pieds contremont. Et ce accompli s'en retournerent les



deffusdits en leur forteresse. Et quand se vint au matin que les Anglois de Calais ouurirent leurs portes, ils furent tous esmerueillez de veoir ceste aduanture. Si l'abbatirent sans delay & l'emporterent dedans la ville. Et depuis ce temps furent par longue espace plus enclins à faire dommage & desplaisir au Comte Vvalleran, à ses païs & subiects plus que par auant n'auoient esté.

*Comment messire Iaques de Bourbon Comte de la Marche, & de ses deux freres furent enuoyez de par le Roy en l'ayde des Gallois, & autres matieres. CHAP. XI.*



Messire Iaques de Bourbon Comte de la Marche en cest an accompaigné de ses deux freres : c'est à sçauoir Loÿs & Iean & douze cens cheualiers & escuyers, furent enuoyez de par le Roy de France au port de Brest en Bretaigne, pour aller en Gallois à l'ayde des Gallois contre les Anglois : & là monta au nauire qui appresté luy estoit tresbien garny de toutes besongnes necessaires. Si cuyda aller arriuer au port d'Armtue, mais le vent luy fut contraire, parquoy il n'y peut aller. Et adonc veit iceluy partir sept nefes qui estoient plaines de diuerse marchandise, & alloient au port de pleinemue. Si les suiuirent hastiuement & tant que les hommes qui estoient dedans les sept nefes deffusdictes, entrerent dedans leurs petis batteaux & se sauuerent au mieux qu'ils peurent. Et le Comte & ses gens prindrent & emmenerent icelles nefes & tous les biens : puis alla audit port de Pleinemue & l'exilla par feu & par espée. Et de là alla en vne petite Isle nommée Sallemue, laquelle pareillemēt fut destruicte : à laquelle Isle prendre, furent faits nouueaux cheualiers les deux freres du deffusdit Comte : c'est à sçauoir Loÿs Comte de Vendosme & Iean de Bourbon, qui estoit le puîsné avec plusieurs autres de leur compaignie. Et apres quand ledit Comte de la Marche & ses gens eurent là seiourné par trois iours, doubans que les Anglois qui pour les combattre s'assembloïēt ne veinssent à trop grand puissance sur eux, se partirent de là pour aller & retourner en France : mais quand ils furent entrez en mer, vne grand tempeste se leua, qui dura par trois iours : de laquelle furent peries douze de ses nefes & ceux qui estoïēt dedans. Et ledit Comte à tout le surplus s'en vint en grand peril pour ladicte tempeste au port de S. Mallo, & de là alla à Paris deuers le Roy de France. Ouquel an ledit Duc Philippe de Bourgongne feit la feste & solemniza trespautenticquement pour les nopces & mariage de son second fils Anthoine Comte de Reihel, qui depuis fut Duc de Brabant, & de la seule fille de Vvalleran Comte de saint Pol : laquelle il auoit eüe de la Comtesse de Mehault sa premiere femme sœur iadis du Roy Richard d'Angleterre : laquelle feste fut moult notable & y eut plusieurs Princes & Princesses avec trefnoble cheualerie : & soustint le deffusdit Duc de Bourgongne tous les frais & despens d'icelles.

*Pour l'an mille cccc. & iij.*

*Comment l'Admiral de Bretaigne & autres seigneurs combattirent les Anglois sur la mer & de Gillebert de Strethun, qui feit guerre au Roy Henry. CHAP. XII.*  
Au





V commencement de cest an l'Admiral de Bretagne, le seigneur de Penhors, le seigneur du Chastel, le seigneur du Boys & plusieurs autres cheualiers & escuyers de Bretagne iusques au nombre de douze cens hommes d'armes s'assemblerent à Morlens : puis entrerent en trente nefes à vn port appellé Chastel Pol contre les Anglois, qui estoient sur mer à grād multitude espians les marchans comme pirates & escumeurs de mer: si que le mercredy ensuiuant iceux Anglois nageans deuāt vn port appellé saint Matthieu, les Bretons leur allerent apres & les poursuiuirent iusques au lendemain soleil leuant, qu'ils s'arrestèrent ensemble en bataille qui dura trois heures. Et finablement obtindrent les Bretons victoire: & prindrent des Anglois deux mille combattans avec quarante nefes à voilles, & vne quarracque: dont la plus grand partie furent iectez à bord & noyez en la mer, & aucuns reschapperent depuis par finances. En outre en ce mesmes temps vn escuyer nommé Guillebert de Fretun natif de la Comté de Guinnes, deffia le Roy d'Angleterre pour ce qu'il ne vouloit à luy faire serment de fidelité: & pource iceluy Guillebert assembla plusieurs hommes de guerre & fit tant qu'il eut deux vaisseaux bien garnis. Si commença à mener forte guerre au Roy dessusdit, & luy fit grand dommage: & tant que les trefues qui estoient entre les deux Roys furent rompues par mer, dont plusieurs maux s'ensuyuirent.

*Comment l'vniuersité de Paris eut grand discord contre messire Charles de Sauois, & pareillement contre le Preuost de Paris.*

CHAP. XIII.



N ce temps l'Vniuersité de Paris faisans procession generale, en allant à S. Katherine du Val des Escoliers, se meut dissention entre aucuns de ladicte Vniuersité & les gēs de messire Charles de Sauois Chambellan du Roy de France, qui menoient leurs cheuaux boire à la riuie de Seine: & fut la cause de ladicte mutation pource que les dessusdits cheuauchèrent roidement parmy ladicte procession, & tāt qu'ils blessèrent aucuns dedit escolliers là estans: lesquels de ce non contens ruerent des pierres apres eux, & bouterent les aucuns assez rudement ius de leurs cheuaux. Apres laquelle enuahie se partirent de là retournās en l'hostel dudit de Sauois: auquel lieu ils s'armerent & prindrent arcs & sagettes, & avec aucuns de leurs autres gens qu'ils auoient assemblez audit hostel, allerent de rechief enuahir les dessusdits escolliers, & de fait tirerent sur eux & en blessèrent aucuns dudit trait & d'autres bastons, mesmement dedans ladicte Eglise. Si se commença entre eux vn grand hutin: mais finablement par la multitude d'iceux escolliers qui estoient si grand nombre, furent les dessusdits reboutez apres ce que les plusieurs eurent esté battus & naurez villainement. Et qui plus est apres la procession retraicte, allerent grand partie de ceux de l'vniuersité deuers le Roy faire plaincte de l'offence qui faicte leur auoit esté, requerans instammēt au Roy dessusdit par la bouche du Recteur qu'amendise leur en fut faicte selon le cas. Disant outre pour vray que sainsi ne faisoit, se partiroient tous de la ville de Paris, & iroient demourer ailleurs, où ils seroient tenus seurement. A laquelle requeste fut respōdu par la bouche du Roy, que si bonne prouision leur seroit faicte qu'ils deuroient estre contens. Finablement apres que par plusieurs iournées ils eurent tresdiligemment poursuiuy ce-



ste besongne tant enuers le Roy, les seigneurs de son sang comme son grād conseil. En la fin fut ordonné de par le Roy pour les appaiser, que les dessusdits messire Charles de Sauois pour l'amendise de ladicte offence faicte par ses gens (comme dit est)seroit banny & bouté hors de l'hostel du Roy, & aussi de tous ceux de son sang. Et avec ce qu'il seroit priué de toutes offices Royaux, & si fut sa maison demolie & abbatue de fons en comble. Et avec ce fut cōdamné à fonder deux chappelles de cent liures de rente, lesquelles furent à la donation de ladicte vniuersité. Apres laquelle sentence ainsi faicte & accomplie iceluy, messire Charles s'en alla demourer hors du Royaume de France en estrange païs assez desolé, & en grand desplaisance: mais depuis se conduisit & gouerna si doucement & honorablement, que certaine espace de temps apres par le moyen principalement de la Roïne de France & autres grans seigneurs, il r'eut sa paix & retourna en l'hostel du Roy & à la grace de ceux de la dessusdicte Vniuersité. En apres en autre temps messire Guillaume de Tigouuille Preuost de Paris feit executer deux des clerks de l'Vniuersité. Est à sçauoir vn nōmé Legier de Montthilhier qui estoit Normant, & l'autre nommé Oliuier Bourgeois qui estoit Breton: lesquels estoient chargez d'auoir commis plusieurs larcins en diuers cas. Et pour ceste cause nonobstant qu'ils feussent clerks, & qu'en les menant à la iustice criassent hault & clair clergie, affin d'estre rescoux. Neantmoins (comme dit est) furēt executez & mis au gibet: & depuis par le pourchats de l'Vniuersité, fut iceluy Preuost priué de toute office royal. Et avec ce fut condamné de faire vne croix de pierre de taille grande & esleuée, assez pres du gibet sur le chemin de Paris où estoient les images d'iceux deux clerks entaillez. Et outre les fait despendre d'iceluy gibet & mettre sur vne charrete couuerte de noir drap. Et ainsi accompaigné de ses sergens & autres gens portans torches de cire allumées, furent menez à S. Mathurin & là renduz par le Preuost au Recteur de l'Vniuersité, qui les feit enterrer honorablement au cloistre de ladicte Eglise: & là fut de rechief fait vn epitacle à leur semblant pour perpetuel memoire.

*Comment le Seneschal de Hainault luy quatriesme feit armes present le Roy d'Arragon.*

*Et du voyage que feit l'Admiral de Bretagne en Angleterre. CHAP. XIII.*

**E**N l'an dessusdit furent entreprinſes armes à faire par le gentil Seneschal de Hainault en la presence du Roy d'Arragon. C'est à sçauoir de quatre contre quatre: & estoient les armes telles qu'ils deuoient combattre de haches, d'espée & dagues iusques à outrance, sauue en tout la vouldenté du Iuge. Si estoient en la compagnie dudit Seneschal messire Iaques de Montenay Normant cheualier: le second messire Taneguy du Chastel cheualier de la Duché de Bretagne: & le tiers estoit vn notable escuyer nommé Iean Carmen, & leur aduerſe partie estoient du Royaume d'Arragon, & par especial le principal nommé Tollemaach de sainte Coulonne estoit de l'hostel du Roy d'Arragon, & de luy moult aymé: le second estoit nōmé messire Pierre de Monstarde, le tiers estoit nommé Proton de sainte Coulonne, & le quart se nommoit Bernard de Buef: & quād ce vint au iour assigné, le dessusdit Roy qui auoit fait preparer les lices en la ville de Vallence au pres de son Palais moult richement: vint en son eschauffaut accompaigné du Duc de Caudie, & des Comtes de Sardonne,



Sardonne, & d'Auiemie avec autre tresgrand noblesse: & tout à l'environ d'icelles lices estoient faits eschauffaulx, dessus lesquels estoient les nobles du pays avec les dames & damoiselles, & aussi les notables bourgeois & bourgeois: & furent commis de par le Roy dedans les lices pour garder les champs quarante hommes d'armes moult richement parez: & entre les barrieres desdictes estoit le Connestable d'Arragon à tout grand compaignie de gensdarmes, tresricement armé selon la coustume du pays. Et y auoit dedans le champ deux petites loges pour reposer & vmbre les champions dessusdits, qui moult estoient bien aornez & parez de blasons d'un chacun d'eux. Et adonc quand le Roy fut venu (comme dit est) fait sçauoir par aucun cheualier de son conseil au Seneschal & à ses compaignons, qu'ils veinssent premiers dedans le champ: & qu'ainsi estoit ordonné. La fut il que les Arragonnois estoient appellés: lesquelles nouvelles ouyes par iceluy Seneschal & ceux de sa partie, s'armerent incontinent & monterent chacun d'eux sur un bon courfier, lesquels estoient parez semblablement les uns comme les autres de drap de soye vermeille, qui leur battoit iusques aupres de la terre. Et sur les draps dessusdits estoient semez plusieurs escussions de leurs armes. Et ainsi en noble appareil issans de leur hostel, allerent iusques à la barriere des lices: si alloit deuant l'escuyer dessus nommé, & apres luy messire Taneguy, lequel suiuiot messire Iaques de Montenay: & tout derriere alloit le Seneschal, lequel conduisoit le Seneschal de Chut: & ainsi entrans dedans, allerent faire la reuerence tous à cheual au Roy Martin d'Arragon qui leur fait tresgrand honneur. Et puis se retrahirent dedans leurs tentes, où ils attendirent leurs aduersaires bien heure & demie: lesquels vindrēt ensemble tous à cheual comme les autres, & estoient tous leurs cheuaux couuers de blancs draps de soye, où il y auoit plusieurs escussions de leurs armes. Et apres qu'ils eurent fait la reuerence au Roy, allerent en leur tente qui estoit au dextre costé, & depuis leur venue furent bien cinq heures ainsi tous armez dedans lesdictes tentes: & la cause pourquoy y furent si longuement, fut pource que le Roy & son conseil les vouloit accorder & qu'ils ne se combattissent pas. Et pour ceste cause furent par le Roy dessusdit enuoyez plusieurs ambassadeurs deuers le Seneschal, affin qu'il voulüst estre content de plus auant proceder en ceste matiere: ausquels il respondit à toutesfois bien sagement, disant que l'entreprinse auoit esté faicte à la requeste de Tollemach: & qu'il estoit venu & ceux de sa partie de loingtain pays à grand traual & despens, pour luy accōplir son desir: Lequel luy & les siens vouloient entretenir. Finablement apres plusieurs parolles portées d'un costé & d'autre fut conclud qu'ils commenceroient ensemble la bataille. Et lors furent faits de par le Roy les cris accoustumez, & tost apres le Roy d'armes d'Arragon cria hault & clair, que les dessusdits champions feissent leur deuoir. Et adōc issirent de leurs tentes aussi tost les uns comme les autres chacun d'eux tenans leurs haches en leurs mains: & commencerēt à marcher les uns enuers les autres moult fierement. Si auoient les Arragonnois proposé ensemble d'assembler de premier venue eux deux sur le Seneschal pour le porter ius: & estoient toutes les deux parties de pied, & entendoient qu'il fut à un des bouts au dessus des autres, mais il estoit sur la moyenne. Et quand il vint à l'approcher le Seneschal s'auança deuant les autres de trois à quatre pas, & assembla premiers à Tollemach, qui ce iour auoit esté fait cheua-



lier par la main du Roy : & luy donna si grand coup de sa hache sur le costé de son bacinet, qu'il le feit desmarcher & tourner demy tour . Et les autres s'assemblerent chacun en droit soy tant d'une partie comme d'autre tres vaillamment . Toutesfois messire Jaques de Montenay iecta sa hache ius , & print messire Jaques de Monstade d'une main par le bort deffoubs des lames : & en l'autre auoit sa dague , dont il cuida ferir par deffoubs : mais ainsi que toutes icelles parties monstroient semblant de bien besongner , le Roy les feit prendre sus . Et pour vray selon l'apparence qu'on pouoit veoir , se la besongne se fut poursuiuie iusques à outrance, les Arragonnois estoient en grand peril d'auoir le pire : car ledit Seneschal & ceux qui estoient avec luy , estoient tous quatre moult puissans de corps & bié existez & esprouuez en armes, pour faire & accomplir tout ce qu'on leur eut sceu faire ou peu demander par quelconque maniere que ce eut esté . En apres les deffusdits champions reprins ( comme dit est ) le Roy aualla de son eschauffault dedans les lices, & requist au Seneschal & à Tollemach bien doucement, que le surplus des armes voulsissent mettre sur luy sur son conseil , & qu'il en feroit tant que tous deueroient estre contens . Et adonc le Seneschal en luy mettant à vn genouïl , pria humblement au Roy qu'il fut content que les armes se parfissent selon la requeste de Tollemach . A quoy le Roy replica en requerant de rechief que le surplus fut mis sur luy , ce que luy fut accordé : & print le Seneschal par la main & le meit au dessus de luy , Tollemach à l'autre costé . Et ainsi les mena luy mesmes hors des lices , & de là retournerent chacun en leurs hostels où ils se defarmerēt : & apres le Roy enuoya par ses principaux cheualiers querir le Seneschal & ses compaignons : ausquels par trois ou quatre iours il feit aussi grand honneur & reception en son hostel, comme il eut peu faire de ses propres freres . Et apres qu'il les eut accordez avec leur aduerse partie, leur donna de rechief dons : & puis se departirent de là & retournerent en France & ledit Seneschal en Hainault . Ouquel temps l'Admiral de Bretagne, le seigneur du Chastel & plusieurs autres cheualiers & escuyers tant dudit païs de Bretagne, comme de la Normandie iusques à douze cens ou plus, monterent en plusieurs nefes au port de S.Malo & se meirent en mer pour aller descendre au port d'Atemue : mais ledit Admiral & aucuns autres deslouerent à descendre illecques, neantmoins lesdits seigneurs du chastel & plusieurs autres descendirent & prindrent port, pensant que les autres les suiussent ce que pas ne feirent . Si s'allerent combattre aux Anglois , qui là en grand nombre s'estoient assemblez . Et tant dura la besongne, qu'en la fin les Bretons & Normans furent desconfits , & furent morts les deffusdits seigneurs du chastel & ses deux freres messire Iean Martiel cheualier Normant, & plusieurs autres . Et en y eut enuiron cent de prisonniers : desquels estoit le seigneur de Bacqueuille, qui depuis reschapperent par force de finance & l'Admiral deffusdit, avec ceux qui estoient demourez ou naturez se retrahirent en leurs païs tristes & dolens de leur perte .

*Comment le Marechal de France, & le maistre des arbalestriers allerent par l'ordonnance du Roy en Angleterre en l'ayde du Prince de Galles.*

CHAP. XV.

Enuiron



**E**Nuiron ce temps le Marechal de Frāce, & le maistre des arbalestriers par le commandement du Roy & à ses despens assemblerent douze mille combattans. Si vindrent à Brest en Bretagne pour aller secourir aux Gallois contre les Anglois. Si entrerēt en six vingts nefes à voiles, qu'ils y trouuerent : & pour le vent qui leur fut contraire demourerent par quinze iours: mais quand ils eurent vent propice, si appliquerent au port de Hareford en Angleterre : lequel ils prindrent tantost en occisānt les habitans, excepté ceux qui tournerent en fuite: si gasterent le paÿs d'entour, puis vindrent au chastel de Hareford, ouquel estoient le Comte d'Arondel & plusieurs autres hommes d'armes & gens de guerre. Et quād ils eurent ars la ville & faulxbourgs dudit chastel, ils se partirent de là destruisant tout le paÿs par feu & par espée. Puis allerent en vne ville nommée Tourby située à dixhuiēt lieües dudit Chastel, & là trouuerent le Prince de Galles à tout dix mille combattans qui là les attendoient : & de là allerent tous ensemble à Calmarcin à douze lieües pres de Tourby. Et de là entrant ou paÿs de Linorguie, allerent à la table ronde : c'est à sçauoir l'abbaye noble. Puis prindrēt le chemin à aller en Vicestre: si ardirent les faulxbourgs, & le paÿs à l'environ: & trois lieües outre encōtrèrent le Roy d'Angleterre, qui venoit contre eux à grand puissance: là resisterent l'un contre l'autre, & se meirent en bataille chacune desdictes parties sur vne montaigne, & y auoit vne grand vallée entre les deux osts. Si contendoient chacun d'eux que sa partie aduerse l'allast assaillir ce que ne fut fait. Et furēt par huiēt iournées en cest estat, que chacun iour au matin se mettoient en bataille l'un contre l'autre, & là se tenoient toute iour iusques au soir : durant lequel temps il y eut plusieurs escarmouches entre eux parties : & là furent morts enuiron deux cens hommes des deux parties & plusieurs naurez. Entre lesquels de la partie de France, furent morts trois cheualiers : C'est à sçauoir messire Patroullars de Tries frere dudit Marechal de Frāce: le seigneur de Martelōne & le seigneur de la Valle. En outre avec les François & Gallois pour le terme dessusdit, furēt fort trauaillez de famine & autre mesaise : car à grand peine pouoient ils recouurer des viures par ce que les Anglois gardoient de pres les passaiges. Finablement au huiētiesme iour qu'icelles deux puissances eurent esté ainsi (comme dit est) l'un deuant l'autre, le dit Roy d'Angleterre voyant que sesdits aduersaires ne l'asseuroient pas se retrahit au soir à Vicestre : mais il fut poursuiuy par aucuns François & Gallois, lesquels destrousserent dixhuiēt charrettes chargées de viures & autres bagues : si se retrahirent iceux François & Gallois ou paÿs de Galles. Et entre-temps que ce voyage se faisoit la nauire desdits François vauoit sur la mer, & y auoit dedans aucun nombre de gens d'armes pour la garder: lequel nauire se retrahit vers Galles à vn port qui leur auoit esté ordonné, & là les trouuerent les François. C'est à sçauoir l'Admiral de France & l'Admiral des arbalestriers : lesquels avecques leurs gens se meirent sur mer, & singlerent tant qu'ils arriuerent sans fortune à saint Pol des Lyons. Toutesfois quand ils furent descendus & qu'ils eurent visitez leurs gens, trouuerent qu'ils en auoient bien perdu soixante : desquels les trois cheualiers dessusdits estoient les principaux, & apres se partirent de là, & retournerent en France chacun en leurs propres lieux, reserué les deux officiers Royaux qui allerent à Paris deuers le Roy, & les autres Princes de



son sang:desquels ils furent receuz à grand lieffe.

*Comment vn puissant mescreant nommé Tamburlant entra à puissance en la terre du Roy Basacq:lequel alla contre luy & le combattit.*

CHAP. XVI.

**E**N cest an vn grand seigneur & puissant de la region de Tartre, nommé Tamburlant à tout deux cens mille combattans & xxvj. elephans entra en la terre de Turquie appartenant au Roy Basacq. Lequel Basacq estoit moult puissant, & vn des principaux de ceux qui auoient vaincu les Chrestiens à la bataille de Hongrie, où le Comte de Neuers fut prins, comme plus à plain est declaré és histoires de maistre Iean Froissart:lequel quād il vint à sa cognoissance, comment iceluy Tamburlant estoit ainsi en sa terre à puissance & la degastoit par feu & par espée, feit soubdainement vn tres grand mandement par tous ses païs, & tant que dedans les quinze iours ensuiuant assembla bien trois cens mille combattans de ses païs de Turquie, & tant seulement dix elephans:lesquels elephans tant d'une partie comme d'autre portoient en maniere de chasteaux sur eux, où il y auoit plusieurs hommes d'armes qui moult greuoient les aduersaires: à tout laquelle compagnie le dessusdit Basacq alla pour rencontrer Tamburlant, & le trouua aupres d'une Montaigne deuers Occident nommé Appady:& estoit logé sur vne haute montaigne,& auoit desia destruit & arrasé plusieurs bonnes villes & grand partie du païs. Et lors qu'ils eurent la veüe l'un de l'autre,ordonnerent leurs batailles. Et finalement assemblerent l'un avec l'autre, & dura ladicte bataille bien six heures: mais en la fin le Roy Basacq & ceux de sa partie furent tournez à desconfiture,& fut luy mesmes prisonnier: & avec ce furent morts bien xl. mille de ses Turcs, & dix mille de son aduersé partie. Apres laquelle besongne le dessusdit Tamburlant enuoya grand puissance de ses gens aux principales bones villes d'iceluy Basacq, lesquelles (ou au moins la plus grand partie) se rendirent à luy. Et par ainsi iceluy Tamburlant pour ceste saison conquist la plus grand partie de Turquie.

*Comment Charles Roy de Nauarre traicta avec le Roy France,& eut la Duché de Nemoux:& du voyage du Duc Philippe à Barleduc & à Bruxelles.*

CHAP. XVII.

**E**Tem en icelle mesme saison Charles Roy de Nauarre vint à Paris deuers le Roy de France. Et à tant traicta avec luy & ceux de son estroit conseil, que le chastel de Nemoux avec aucunes autres chastellenies luy furent données & en feit vne Duché. Si en feit hommage presentement au dessusdit Roy de France,& avec ce meit en sa main le chastel de Cherbourg, la Comté d'Eureux & toutes autres seigneuries, qu'il pouuoit auoir ou Royaume de France:& y renōça au proffit du Roy & de ses successeurs:moyennant qu'avec ladicte Duché de Nemoux se luy fut promis à payer de par le Roy de France deux cens mille escus d'or de coing du Roy nostre sire. En apres le Duc Philippe de Bourgogne partant de Paris, alla à Barleduc faire obseques de la Duchesse de Bar sa sœur, qui estoit trespassee. Et de là apres ledit seruice fait, retourna en sa ville d'Arras où estoit sa femme la Duchesse: & celebra la feste de Pasques,& puis s'en alla à Bruxelles en Brabant deuers la Duchesse taye de sa femme, qui l'auoit mandé pour luy bailler le gouuernement du païs, auquel



auquel luy print vne grand maladie, & se fait apporter à Hal comme cy apres est declaré.

*Pour l'an mille cccc. & iiij.*

*Comment le dessusdit Duc de Bourgongne mourut en la ville de Hal en Hainault, & fut porté son corps à Dijon en Bourgongne aux Chartreux.*

**A**V commencement de cest an le bon Duc de Bourgongne Philippe, fils iadis du Roy Iean & frere au Roy de France Charles le riche, se fait apporter sur vne lictiere de la ville de Bruxelles en Brabant à Hal en Hainault, & affin que les cheuaux qui le portoient allassent plus seurement & à son aise y auoit plusieurs laboureurs & manouuriers, qui alloient deuant ladicte lictiere à tout louchez & autres instrumens pour reffaire & ahonier les chemins. Auquel lieu de Hal il fut mis & deschargé, & mis assez pres de l'eglise nostre Dame en vn hostel où estoit l'enseigne du cerf: auquel lieu luy sentans assez fort aggraué de sa maladie, manda deuant luy ses trois fils: c'est à sçauoir Iean Comte de Neuers, Anthoine & Philippe: ausquels il pria tres acertes & commanda destroictement que toutes leurs vies durant ils fussent bons vrayz & loyaux obeissans enuers le Roy Charles de France, sa noble generatiō, sa couronne & tout son Royaume, & ce leur fait promettre sur tant qu'ils l'aimoient: lesquelles promesses par les trois Princes dessusdits furent treshumblement accordées à leurdit seigneur & pere: & là auec ce fut à chacun d'eux ordonné par iceluy Duc les seigneuries qu'ils tiendroient, & qu'il vouloit qu'ils teinssent apres son trespas & la maniere & intentiō qu'ils en auoient à vser: lesquelles choses & plusieurs autres accomplies & diuisées par luy moult sagement cōme à tel Prince appartient à faire ayant bonne memoire à son dernier, rendit l'esprit ou dessusdit hostel: & là fut son corps ouuert & les entrailles mises & enterrées dedans ladicte eglise nostre Dame de Hal, & son corps biē embasme fut mis en vn tumbau de plomb, & de là trāsporté en la ville de Doüay, & puis à Arras tousiours tresgrandement & honnorablement accompagné selon son estat. Auquel lieu d'Arras fut mis en sa chappelle, & on luy fait vn seruice solennel. Et là renonça la Duchesse Marguerite sa femme à ses biens meubles pour la doubte qu'elle ne trouuaft trop grans debtes: en mettant sur sa representation sa ceinture auec sa bourse, & les clefs comme il est de coustume: & de ce demanda instrument à vn notaire publicque, qui estoit là present. En apres le corps fut mené en Bourgongne & enterré à l'Eglise des Chartreux empres Dijon dedans l'eglise, qu'il auoit luy mesmes fait fonder & edifier à ses despens: & son cueur fut porté à l'eglise S. Denys en France & mis empres les royaux, desquels il estoit issu. Si auoit iceluy Duc auec ses trois fils dessusdits, trois filles. C'est à sçauoir la Comtesse de Hostesse, la Comtesse de Hollāde femme audit Guillaume Comte de Hainault, & la Duchesse de Sauoye. Apres la mort duquel il y eut grans pleurs & lamentations: principalement de tous ses enfans, & generallement de la plus grand partie des seigneurs & autres gens d'estat du Royaume de France, & de tous ses païs: car en son temps il auoit regné & gouuerné tres prudemment les besongnes du Royaume auecques son frere aîné Duc de Berry, dōt il auoit esté & fut encores plus apres recommandé quand il fut mort. En apres iceluy Duc



deffunct (comme dit est) & Jean Comte de Neuers son fils aîné faist & meit en sa main la Comté & Duché de Bourgogne, & Anthoine le secôd fils fut attendant & heritier de la Duché de Brabant apres sa grand tante la Duchesse, qui luy deliura presentement la Duché de Lembourg: & Philippe le iij. fut nommé Comte de Neuers & Baron de Draxi, à en iouyr apres le trespas de la Duchesse sa mere. Si commencerent iceux trois freres à gouuerner hautement leurs seigneuries: & eurent l'un avec l'autre plusieurs conseils avec leurs plus feables seruiteurs, affin de sçauoir comment ils se auroient à gouuerner vers le Roy leur souuerain seigneur.

*Comment Vvaleran Comte de S. Pol alla en grand compaignie par mer en l'Isle de Vvic, pour faire la guerre d'Angleterre & s'en retourna sans peu besongner.*

CHAP. XIX.

**E**N cest an Vvaleran Comte de S. Pol assembla à Abbeuille en Ponthieu enuiron seize cens combattans, desquels y auoit grand partie de nobles hommes qui auoient fait grand pourueance de chairs salées, de biscuit, de vins, de ceruoises, de beures, de farines & autres choses necessaires à mettre en mer: duquel lieu d'Abbeuille par ledit Comte furent menez au port de Harfleur où ils trouuerent des nefes & vaisseaux à leur volenté. Et là apres qu'ils eurent seiourné aucun peu de iours pour appoincter leurs besongnes, en eux recommandant à monseigneur saint Nicolas, monterent sur lesdit vaisseaux, & nagerent tant qu'ils vindrent en l'Isle de Vvic qui est pres du port de Hantonne: auquel lieu descendirent à terre en demonstrent face hardie de combattre leurs ennemis, desquels par iceux furent à icelle descendue assez peu veuz. Car tous ceux de ladicte Isle aumoins la plus grand partie estoient retraits és bois & és fortereffes. Et là y eut faicts plusieurs nouueaux cheualiers de la partie dudit Comte: c'est à sçauoir Philippe de Harcourt, Jean de Fosseux, le seigneur de Guincy & plusieurs autres: si allerēt fuster aucuns meschâs villaiges du païs, & bouterent le feu en aucuns lieux. Durant lequel temps vint deuers iceluy Comte vn prestre du païs d'assez bon entendement, lequel traicta avecques luy pour le rachapt & saluatiō d'icelle Isle, comme il donnoit à entendre, moyennant qu'il en seroit payé grand somme de pecune audit Comte & à ses capitaines, qui à ce finclina assez: mais à brief dire c'estoit vne deception que faisoit ledit prestre, affin de les delayer & attarger de parolles entre-temps que les Anglois s'assembloient pour les venir combattre: de laquelle besongne le desusdit Comte Vvalleran fut aduerty, & pource luy & les siens furent remontez en leur nauire, & s'en retournerent és parties de là où ils estoient venus sans autre chose faire: pourquoy plusieurs grâs seigneurs qui estoient avecques luy en prirent grand desplaisance, pourtant qu'il auoient mis grand argent à faire leurs pourueances. Et aussi les païs par où les gens d'armes passerent en furent moult trauaillez. Si en commença l'en en plusieurs parties à murmurer tresfort contre ledit Comte, mais on ne le peut auoir autre.

*Comment*



*Comment le Duc Loïs d'Orleans alla à Marceilles deuers le Pape de par le Roy, le Duc de Bourbon en Languedoc, le Connestable en Aquitaine.* CHAP. XX.

**E**N ce mesme temps Loys Duc d'Orleans fut enuoyé de par le Roy de France & son grand conseil deuers le Pape nommé Gregoire accompagné de six cens cheualiers ou enuiron, afin de luy remonstrer que l'vnion fut mise en nostre mere sainte Eglise. Et par Champagne & Bourgongne s'en alla à Lion sur le Rosne, & de là à Marceille, où estoit le dit Pape avec toute sa court. Lequel grandement & honnorablement receut le dit Duc: & apres qu'il eut ouye sa requeste, luy bailla ses lettres apostolicques sur aucunes certaines conditions. Apres lesquelles receuës, & qu'il eut prins congé d'iceluy Pape s'en retourna par plusieurs iournées à Paris deuers le Roy où estoient les Ducs de Berry, de Bourgongne, de Bretaigne & de Bourbon, & plusieurs autres grans seigneurs tant seculiers comme ecclesiastiques. En la presence desquels lesdictes lettres apostolicques il bailla, contenans entre les autres choses, que le Pape s'offroit à procurer l'vnion de toute l'vniuerselle Eglise: & pour l'auoir, s'il estoit de neceffité, s'offroit de resiner ladicte papauté, & faire tout ce qui estoit expedient touchant ceste matiere en obeissant à son Concille en tout droit & raison: de laquelle lettre apostolicque & du contenu en icelle le Roy, les dessusdits seigneurs & tout le Concille avec l'vniuersité se teindrēt pour lors assez contents. Et ouquel temps Iean Comte de Clermont fils & heritier du Duc de Bourbon, fut enuoyé de par le Roy & son conseil en Languedoc pour aller en Gascongne, & mener guerre aux Anglois qui adonc menoient forte guerre aux François sur les frontieres d'illec. Et fait assemblée à saint Flour en Auvergne, laquelle fut de cinq cens bacinets & cinq cēs archiers & arbalestriers. Desquels estoit le principal avec ledit Duc de Bourbon, le Vicomte de Chateaubon fils au Comte de Foix. Si commencerent à mener forte guerre & meirrent plusieurs forteresses en l'obeissance du Roy. Est à sçauoir le chastel S. Pierre, le chastel sainte Marie, le chastel neuf & plusieurs autres. Apres lesquelles besongnes & forteresses dessusdictes bien garnies, s'en retourna à Paris deuant le Roy dessusdit & les seigneurs, desquels il fut bien conuoyé & receu. Et tantost fut apres enuoyé messire Charles d'Albreth Connestable de France, & avec luy Harpedanne cheualier de grand renom grandement accompagné en la Duché d'Aquitaine: & assiegerent le chastel de Carlefin, qui moult trauailloit les païs du Roy & tenoit les garnisons des François en grand subiection: & si estoit la plus grand partie du païs apactis à eux, lequel siege dura enuiron six sepmaines. En la fin desquelles feirent traicté iceux assiegez avec ledit Connestable, par condition qu'ils s'en iroient sauf leurs corps & leurs biens. Et avec ce auroient certaine somme de monnoye qui se print & cueillit sur les habitans d'iceluy païs. Et apres qu'iceluy Connestable eut garny icelle forteresse de ses gens, il s'en retourna à Paris deuers le Roy Charles.

*Comment le Duc Aubert Comte de Hainault trespassa, & pareillement la Duchesse de Bourgongne Marguerite fille au Comte Loïs de Flandres.* CHAP. XXI.





LE Duc Aubert en cest an trespassa, lequel estoit Comte de Hainault, de Hollande & de Zellande, qui auoit esté fils de Loÿs de Bauiere iadis Empereur d'Allemaigne, duquel Duc demourerent deux fils & vne fille: c'est à sçauoir Guillaume qui estoit aîné, & Jean de son surnom nommé sans pitié, qui fut promu à estre Euesque du Liege: Nonobstant qu'il n'estoit point encores sacré, & la fille estoit mariée au Duc Jean de Bourgogne. Et fut ledit Duc Aubert enterré en l'église collegiale de la Haye en Hollande. Et pareillement mourut audit an le vendredy de deuant la my-karesme Marguerite Duchesse de Bourgogne, femme au Duc Philippe dernier trespasé, & pour doüairiere à son hostel à Arras, laquelle fut attaincte de maladie hastifue. Si fut de ses trois fils: c'est à sçauoir Jean Duc de Bourgogne, Anthoine Duc de Lembourg & Philippe maisné mené en grans pleurs & gemissemens en la ville de l'Isle, où elle fut enterrée en l'église collegiale de S. Pierre empres son pere le Comte Loÿs de Flādres. Apres la mort de laquelle succeda Jean de Bourgogne son premier fils en la Comté de Flandres & d'Arthois, & Philippe dessus nommé eut la Comté de Neuers comme en autre lieu est déclaré. Et brief ensuiuant furent promotez de la partie du Duc Jean de Bourgogne, & à sa requeste les mariages de Loÿs Duc d'Acquitaine Daulphin fils du Roy de France, & de la fille aînée dudit Duc de Bourgogne nommée Marguerite & aussi Philippe Comte de Charrolois seul fils & heritier d'iceluy Duc, & de Michelle fille au Roy: desquelles alliances en ensuiuant ce que toutesfois en auoit esté pourparlé du viuāt dudit Philippe deffunct: le Roy, la Royne & autres du sang royal estoient assez contens, excepté le Duc Loÿs d'Orleans seul frere du Roy: auquel ceste alliance n'estoit pas bien agreable. Et des lors & par auant y auoit eu entre iceux deux Princes: c'est à sçauoir d'Orleans & de Bourgogne aucunes rumeurs & enuyes, parquoy quelque semblant qu'ils montraissent l'un à l'autre, si n'y auoit il pas grand amour, en partie pour les rapports que faisoient leurs gens chacun à son maistre & seigneur l'un apres l'autre. Neantmoins les dessusdits mariages furent du tout accordez & confermez entre les parties dessusdictes. Et en furent faictes & baillées de partie à autre aucunes seurtez par lettres & instrumens royaux. Et adonc fut à Paris mise sus vne tresgrande taille sur tout le peuple du Royaume de France de par le Roy & son grand conseil. A laquelle mettre sus ne se voulut pas consentir ledit Duc de Bourgogne, dont il fut grandement aymé & recommandé de tout le peuple generallyment.

*Pour l'an mille cccc. & v.*

*Comment le Duc Jean de Bourgogne apres la mort de la Duchesse, fut receu des bonnes villes de la Comté de Flandres comme seigneur.* CHAP. XXII.



AV commencement de cest an le Duc de Bourgogne apres qu'il eut esté à Paris deuers le Roy, il s'en retourna en Flandres avec ses deux freres en grand compaignie des nobles hommes d'iceux paÿs. Si fut par tout receu treshonorablement & amiablement de tous ses subiects, & luy donnerent tresbeaux dōs: par especial ceux de Gand, de Bruges, d'Ippe & autres bonnes villes. Et avec ce luy feirent tous serment de fidelité, en luy promettant de luy seruir & obeÿr comme tenus y estoient. Et adonc deffendit à tous



tous subiects, que nul ne payast la taille dernièrement imposée à Paris par le conseil royal, dont dessus est faite mention. Pour laquelle deffence il acquist grand haine du Duc Loys d'Orleans: Au gré duquel la plus grand partie de toutes les besongnes se conduisoient pour ce temps. Et en tant que les traictez des mariages des enfans du Roy & du Duc de Bourgongne dessus nommez, furent aucunement empeschez. Et voulut le dessusdit Duc d'Orleans trouver maniere de marier le Duc d'Acquitaine son nepueu en autre lieu, dont moult despleut au Duc de Bourgongne, quand ce fut venu à sa cognoissance. Et pource'enuoya tantost ses ambassadeurs deuers le Roy, la Royne & le grand conseil: mais à brief dire ils n'eurent point responce bien agreable pour leur maistre & seigneur ledit Duc. Et pource au plustost qu'ils peurent, s'en retournerent en Flandres deuers luy: lequel (ouye leur responce) print cōseil avecques ses plus seables sur ceste matiere. Lesquels luy conseillèrent qu'il seroit bon qu'il se trahist au plus tost bonnement qu'il pourroit deuers le Roy & son grand conseil affin que luy estant present il peut mieux poursuiuir ses besongnes en sa personne que ne pouuoient faire ceux qu'il y auoit enuoyez auquel cōseil il s'accorda assez & fit les preparations pour y aller au plus brief qu'il pourroit. Et en ce mesme temps fut imposé vne disme sur le clergie du Pape Benoist xiiij. lequel tenoit sa residēce & sa court en la Comté de Prouence & fut causé iceluy dixiesme pour l'vnion de nostre mere sainte Eglise. Si se deuoit payer à deux termes, c'est à sçauoir à la Pasque & à la saint Remy.

*Comment le Duc Guillaume Comte de Hainault teint cest an vn champ mortel en sa ville du Quesnoy, lequel fut outré par vn des champions.* CHAP. XXIII.



R est verité qu'en cest an fut fait en la ville du Quesnoy en Hainault vn champ mortel en presence du Duc Guillaume Comte de Hainault, iuge en ceste partie: est à sçauoir d'un gentil-homme nommé Bournecte appellant, qui estoit dudit païs de Hainault, à l'encontre d'un autre gentil-homme nommé Sohier Bernaige de la Comté de Flandres. Et estoit la querelle telle, que ledit Bournecte tenoit & maintenoit qu'iceluy Sohier auoit tué & meurdry vn sien prochain parent: pour lequel cas iceluy Duc Guillaume liura lices & place à ses despens selon la coustume en tel cas accoustumée & induite. Et apres que par iceluy Duc ils eurent par plusieurs fois esté introduicts à faire paix l'un avec l'autre, voyant qu'à ce ne se vouloient consentir, leur fut ordonné à venir à certain iour & comparoir par deuant le dessusdit Duc: auquel iour ils vindrent & entra premier ledit appellant dedans & accompagné d'aucuns de ses amis prochains, & apres y entra le deffendeur: si fut lors crié par vn herault & deffendu, que nul ne leur baillast empeschement de par le Duc & sur peine capital. Et lors fut de rechief crié par lesdits champions, qu'ils feissent leur deuoir. Apres lequel cry partit premier iceluy appellant de son paillon, & commença à marcher auant, & d'autre partie vint le deffendeur à l'encontre. Et apres qu'ils eurent iecté chacun lances l'un contre l'autre sans ce qu'ils se feussent d'icelles donné empeschement, vindrent aux espées & combattirent aucune petite espace: mais en conclusion le dessusdit Bournecte vainquit allez brief son aduersaire, & luy feit iehir de sa bouche le cas, pour lequel il auoit ap-



pellé. Et apres ce iceluy vaincu, fut iugé presentement par le Duc Guillaume à estre decapité : lequel iugement fut sans delay accompli : & le dessusdit vainqueur fut honnorablement remené en son hostel : Et avec ce fut generallyment de tous ses seigneurs honoré & conuoyé. Si fut aucune renommée que le Duc Loys d'Orleans auoit esté à ceste iournée en habit descogneu.

*Comment le Comte de S. Pol mena son armée deuant le chastel de Mercq, auquel lieu vindrent les Anglois de Calais & les desconseirent.* CHAP. XXIII.

**E**Nuiron le mois de May le dessusdit Vvaleran de Luxembourg Comte de Ligney & de S. Pol, & capitaine de Picardie de par le Roy, assembla esdits païs de Picardie, de Boulenois de quatre à cinq cens bachinets, avecques cinq cens Geneuois arbalestriers, & environ mille Flamens à pied des marches vers Grauelines: lesquels de S. Omer il mena & conduist vers Tournen, & de là s'en alla mettre siege deuant vn chastel nommé Mercq à vne grand lieüe pres de Calais, lequel tenoiēt les Anglois: qui avecques les autres garnisons de leur party auoiēt couru & trauaillé de nouuel moult fort ledit païs de Boulenois, & autres terres voisines. Si feit iceluy Comte leuer deuant ledit chastel plusieurs engins, desquels il auoit grand abondance, dont iceluy chastel fut grandement oppressé. Si se deffendoient ceux de dedans tres courageusement. Et adonc ledit Comte voyāt qu'iceluy par force d'assault ne pouoit prédre sans trop grand peine & perte de ses gens, les feit loger dedans les maisons de la ville, qui estoit close de vieux fossez : lesquels il feit reparer pour estre plus seur à l'encontre de ses aduersaires tāt de Calais comme d'autres garnisons : & le lendemain feit assaillir la basse court d'iceluy chastel, laquelle fut prinse par force & y gaignerent les assaillans grand foison de cheuaux, vaches, brebis & iumens. Auquel assault fut messire Robert de Birengueuille cheualier nauré, dont il mourut brief ensuiuant. Et en ce mesme temps & iceluy iour issirent de Calais environ cent hommes d'armes, lesquels en cheuauchant vindrent assez pres des François, & les aduiserent tout à leur aise, & puis se retrahirent en icelle ville de Calais: & tantost apres par herault manderent audit Comte de S. Pol, que le lendemain viendroient disner avec luy si là les vouloient attendre. Auquel herault fut respondu que s'ils y venoient qu'ils seroiēt receuz, & qu'ils trouueroient tout prest le disner: & porta les responcez à ceux qui luy auoient enuoyé. Lesquels le lendemain tres matin issirent de la dessusdicte ville de Calais deux cens hommes d'armes, ayans bachinets, deux cens archiers & environ trois cens hommes à pied legierement armez. Et avecques eux menerent dix ou douze chars chargez de viures & artilleries, lesquels tous ensemble conduisoit vn cheualier Anglois, nommé Richard à son lieutenant à Calais du Comte de Sombreffet frere de Loys de Henry de Lenclastre pour ce tēps Roy d'Angleterre. Si cheminerent en bonne ordonnance iusques à assez pres de leurs ennemis, lesquels par leurs espies & cheuaucheurs furent de ce aduertiz : mais point ne se preparerent ne meirent en ordonnance dehors leurs logis pour les combattre ainsi que faire le deuoient : ainçois les attendirent dedans leurs clostures & fossez si lōguement, que les dessusdits Anglois commencerent terriblement à tirer sur eux & les tuer & naurer dudit traict, sans ce qu'iceux François leur peussent faire grand resistance. Et adonc



adonc en assez brief terme la plus grand partie des Flamens & gens de pied, se commencerent à desroyer & mettre en fuite pour la creueur du traict dessusdit: à l'exemple desquels se departirent aussi grand partie des gens d'armes. Et aussi les arbalestriers Genneuois estans en icelle place, qui auoient le iour deuant aloüé la plus grand partie de leur traict à l'assault deuantdit, n'auoient point remis n'apointé autres quarreaux au poinct de leurs arbalestres, des garnisons d'artilleries, qui estoient sur les chars: parquoy quād ce vint au besoing ils ne feirent pas grand deffence. Et par ainsi iceux Anglois sans ce que de leur partie eussent grand dommage desconfirent assez brief les François leurs ennemis, & demourerent victorieux sur la place: mais le dessusdit Comte de S. Pol avecques aucuns autres de sa compagnie se partit sans auoir nulle occupation de sa personne: & par dehors S. Omer s'en retourna à Theroüenne. Et tous ceux generalmente qui de sa partie demourerent, furent morts & prins: Desquels morts qui pouuoient estre en nombre iusques à soixante ou enuiron. Et furēt tous les principaux de la partie des François: c'est à sçauoir, le seigneur de Querecqs, messire Morlet de Saueuces, messire Courbet de Rempeupret, messire Martel de Vaulhuon, messire Guy d'Iuergny, le seigneur de Fayel. Et de ceux qui furēt prins furent le seigneur de Hangestez capitaine de Boulongne, le seigneur de Dampierre Seneschal de Ponthieu, le seigneur de Rambures, George la Personne, le seigneur de Ginenchy & plusieurs autres nobles cheualiers & escuyers iusques au nombre de soixante à quatre vingts ou enuiron. Apres lesquelles besongnes, & qu'iceux Anglois eurent prins & rendu tous les biens chars & artilleries, qu'auoient là menez leurs aduersaires & desnüé les morts, s'en retournerent en ladicte ville de Calais à tout leurs prisonniers ioyeux de leur victoire. Et pour le contraire le dessusdit Comte Vvaleran & ceux qui s'estoient sauuez de sa compagnie eurent au cuer tresgrand tristesse non pas sans cause. Et en apres le troisieme iour ensuiuant les dessusdits Anglois de Calais issirent de leur ville à tout foison de canons & autres instrumens de guerre, qu'ils auoient gaignez sur les François deuant Merc. Et pouuoient estre cinq cens combattans ou enuiron, qui vindrent de nuit couuertement enuiron le poinct du iour, commencerent tres asprement à assailir la ville d'Ardres laquelle ils cuiderent trouuer degarnie de gens d'armes. Et de fait dresserent eschelles contre les murs & trayrent le feu dedans en plusieurs lieux: Mais par l'ayde, confort & diligence de deux notables & vaillans cheualiers, qui estoient dedans: c'est à sçauoir messire Mansart du Boz & le seigneur de Lignes, furent lesdits Anglois tresfort reboutez. Et en y eut en faisant ledit assault & en eux retrayant morts de quarante à cinquante, dont la plus grand partie furent par leurs compagnons portez & mis dedans vne grand maison au dehors de la ville: dedans laquelle ils bouterent le feu pour les ardoir, affin que de leurs aduersaires ne fut leur perte apperceüe. Et apres tous confus & desplaisans de leur dommage, s'en retournerent en ladicte ville de Calais: auquel lieu pource qu'aucuns de leurs gens estoient morts de la naureure du traict des Genneuois estans à la besongne de Merc, voudroient aucuns d'iceux tuer disans que ledit traict estoit enuenimé. Et adonc le dessusdit Comte de S. Pol, qui estoit traict (comme dit est) à Theroüenne esperant aucunement recouurer son honneur, manda par toutes les marches de Picardie gens à venir deuers luy. Et y vindrent



le seigneur de Dampierre, messire Jean de Craon seigneur de Dompinart, messire Morlet de Querecqs, le seigneur de Fosseux, le seigneur Chin, le seigneur de Houcourt & plusieurs autres nobles hommes en tresgrand nombre. Avec lequel Comte ils eurent plusieurs conseils, esquels ils conclurent d'aller à puissance vers les marches de leurs aduersaires, pour iceux enuoyer & greuer de toute leur puissance. Mais en ces propres iours fut mandé de par le Roy audit Comte & autres seigneurs dessusdits, qu'ils ne procedassent plus auant de faire ladiète entreprinse: car le Roy y auoit pourueu d'autres gēs. Est à sçauoir y enuoya le Marquis du Pont fils au Duc de Bar, le Comte Dammartin & Harpaydanne cheualier de grand renom, à tout quatre cens bachinets & cinq cens autres hommes de guerre, qui se logerent à Boulongne & autres lieux de la frontiere de Boulenois: pour lequel mandement & venuë dessusdicte iceluy Comte de S. Pol ne fut point bien ioyeux, mais il luy conuint souffrir fut à bon gré ou autrement les parlers du monde. Car autrement il n'y eut sceu mettre remede, fors seullement ouïr parler le monde. Et d'autre partie le Duc Jean de Bourgongne qui estoit en son païs de Flandres, sçachant & cognoissant clerement la grand fortune & dommage qu'auoit eüe le dessusdit Comte de S. Pol, il en fut tresdeplaisant & marry & enuoya hastiuement messire Jean de la Vallée cheualier, & plusieurs hommes d'armes & arbalestriers à Grauelines & autres lieux de ladiète frontiere, pour garder que les Anglois ne leur feissent aucun dangier. Esquelles frontieres estoit aussi commis de par le Roy de France messire Lyonnet d'Arummes, lequel nuit & iour tres diligemment entendit aux besongnes. En outre le Roy Henry d'Angleterre qui auoit par ceux de Calais sceu & ouï la bonne fortune que ses gens auoient eu contre les François deuāt Mercqs, meit hastiuement vne grosse armée sus de quatre à cinq mille combattans. Lesquels par mer à grand nombre de nauires il enuoya nageant par deuant Dumquerque & Neuf-port descendre au port de l'Escluse. Et là eux venus se meirent hors dudit nauire bien trois mille, & par le grauier allerent tout à pied bien à vne lieuë assaillir le chastel de l'Escluse. Mais les gardes d'iceluy avec ceux de la ville & du païs d'environ, qui en brief fut mis en grand effroy, se deffendirent tres vaillamment. Et tant que par le trait, canons & autre deffence rebouterent leurs aduersaires & en tuerent bien soixante: entre lesquels le Comte de Preembroc, qui estoit vn de leurs capitaines y fut nauré à mort. Et pource que nouuelles vindrent ausdits Anglois, que le Duc Jean de Bourgongne à grand puissance venoit sur eux pour les combattre, retournerent incontinent en leurs nauires & de là en Angleterre. Et pourtant ne demoura pas longuemēt que ledit Duc de Bourgongne pour garder son païs contre iceux Anglois, ne fait tantost assembler grand nombre de gens d'armes par le seigneur de Croÿ & autres ses capitaines, lesquels il fait tirer sur les frontieres de Flandres, affin de resister à telles ou pareilles entreprinse qu'auoiēt faites les Anglois ses aduersaires, & iceux combattre se plus retournoient. Et qui plus est le dessusdit Duc de Bourgongne meit sus vne ambassade, qu'il enuoya à Paris deuers le Roy le Duc d'Orleans & autres du grād conseil, pour auoir ayde de gens & d'argent pour mettre le siege deuant Calais: car il estoit de ce moult desirant: mais ausdits ambassadeurs fut par ledit Duc & grand conseil baillé response negatiue. Et pourtant ledit Duc de Bourgongne par lesdits ambassadeurs

ouïe



cuyte la responce deuãtdicte, se disposa d'aller à Paris deuers le Roy en sa personne pour mieux expedier & cōduire ses besongnes. Et pour ce faire se tira à Arras où il eut sur ces affaires plusieurs grans conseils avec plusieurs grans seigneurs ses feables & seruiteurs.

*Comment le Duc Jean de Bourgongne alla à Paris, & feit retourner le Daulphin que la Royne & le Duc d'Orleans emmenoiẽt. Et d'autres matieres suyans.*

CHAP. XXV.

**E**N apres quand ledit Duc de Bourgongne eut conclud dedans Arras sur ces affaires, se partit à tout plusieurs hommes d'armes iusques à huiet cens combattans ou plus, armez couuertement la vigile de l'Assumption nostre Dame, pour aller à Paris. Et alla par aucuns iours iusques en la ville de Louures en Paris: Auquel lieu luy furent enuoyées vne lettres de Paris, contenans que le Roy de sa maladie estoit retourné en santé. Et aussi que la Royne & le Duc d'Orleans estoient partis de Paris pour aller à Meleun, & de là à Chartres. Et qu'ils auoient ordonné d'emmener apres eux le Duc d'Acquitaine Daulphin de Vienne: lesquelles lettres par luy visitées vn peu il dormit. Et puis au son de la trompette avec ses gens de ladicte ville tres matin, se partit & hastiuement s'en alla audit lieu de Paris, affin de trouuer ledit Duc d'Acquitaine: mais quand il fut venu dedans icelle, luy fut dit d'aucuns Parisiens qu'il estoit desia party pour aller apres la Royne sa mere, & qu'il estoit vray. Et pource iceluy Duc de Bourgongne sans descendre n'atargier cheuaux à tout ses gens, cheuaucha tresfort parmy ladicte ville de Paris, tāt que son cheual pouuoit trotter & suyuit ledit Daulphin: lequel des premiers il rancōsui entre la Ville-Iuue & Corbueil, & l'attendoient ladicte Royne & le Duc d'Orleans à disner. Et avec ledit Duc d'Acquitaine estoient son oncle de par sa mere: c'est à sçauoir Loys de Bauiere, le Marquis du Pont fils au Duc de Bar Comte Dammartin, Montagu grand maistre d'hostel du Roy, avec eux plusieurs autres seigneurs qui l'accompaignoient. Et estoit en vne lictiere avec luy sa sœur de Piaux femme de messire Iaques de Bourbon. Et lors ledit Duc de Bourgongne approchant ledit Duc d'Acquitaine Daulphin luy feit tresgrand honneur & reuerence, & luy supplia qu'il luy pleust retourner & demourer à Paris, disant que là il seroit mieux qu'en quelconques autres lieux du Royaume de France. Et avec ce luy dit qu'il auroit à parler à luy de certaines besongnes, qui bien luy touchoient. Apres lesquelles parolles dictes par ledit Duc, Loys de Bauiere voyant la vouldenté du Daulphin son nepueu incliner à la requeste qu'on luy faisoit. Si dit: Sirẽ Duc de Bourgongne, laissez aller monseigneur d'Acquitaine mon nepueu apres la Royne sa mere & monseigneur d'Orleans son oncle, là où le fait aller par le consentement du Roy son pere. Et apres deffendit iceluy Duc Loys à tous ceux qui là estoient, que nul ne meit la main en sa lictiere ne baillast empeschement qu'il n'allast sa voye, où ordonné luy estoit. Nonobstant lesquelles parolles attargeassiõs, & plusieurs autres parolles delaissées pour cause de briefueté, le Duc de Bourgongne de fait feit retourner ladicte lictiere & ledit Duc d'Acquitaine avec tous ses gens, & le remena à Paris: excepté le Marquis du Pont, le Comte de Dammartin & plusieurs autres de la famille dudit Duc d'Orleans. Lesquels sans delay cheuauche-



rent outre iusques à Corbueil . Et racomptèrent audit Duc & à la Royne , comme le dessusdit Duc de Bourgongne les auoit fait retourner outre leur gré dedans Paris . Pour lesquelles nouuelles eurent grand cremeur & furent fort esmerueillez , pource qu'ils ne sçauoient quelle chose iceluy Duc de Bourgongne tenoit à faire . Et tât que ledit d'Orleans delaisa son disner qui estoit appareillé : & s'en alla biē en haste à Meleun , & la Royne apres luy & tous ceux de leur famille . Et ledit Duc de Bourgongne , cōme dit est , avec tous ses gens s'en alla vers Paris conduisant ledit Duc d'Acquitaine . Au deuant & à l'encontre duquel issirent le Roy de Nauarre , le Duc de Berry , le Duc de Bourbon , le Comte de la Marche & plusieurs autres grans seigneurs , & les bourgeois de Paris en tresgrand multitude , & entra dedans Paris treshonorablement , tousiours le Duc de Bourgongne & ses deux freres qui estoient avec luy , durant ceste besongne au plus pres de ladicte liētiere , & aussi les autres seigneurs dessusdits . Si cheuaucherent tout le pas en cest estat tant qu'ils vindrent au chastel du Louure , dedans lequel fut mis ius le Daulphin de sa liētiere par Loys de Bauiere son oncle & là fut logé . Si se retrahirent tous les seigneurs chacū en son hostel reseruē le Duc de Bourgongne , qui là se logea . Et brief ensuyuant enuoya plusieurs messagiers garnis de ses lettres en tous ses païs , pour māder gens d'armes à venir deuers luy audit lieu de Paris . Si tenoit iceluy Duc son estat dedans le Louure en la chambre S. Loys , & es chambres dessous appartenans à icelle . Et le Duc d'Acquitaine avec toute sa famille fut logé es chambres de hault . Et le lendemain le Recteur & aussi la plus seine partie de l'Vniuersité de Paris vindrent deuers ledit Duc de Bourgongne faire la reuerence , & luy remercier en grand humilité publicquement de la bonne amour & d'affection qu'il auoit au Roy , à sa generatiō & à tout son Royaume : de laquelle ils estoient & se tenoient veritablement estre informez qu'il tendoit à bonne fin , & à la reinformation & reparation d'iceluy , luy requerant outre qu'en ce voulsist perseuerer & non cesser pour quelque chose qu'il aduenist : le dimenche ensuyuant ledit Duc de Bourgongne avec tous ses gens se deslogea du Louure , & s'en alla loger en son hostel d'Arthois : auquel lieu il fait faire par les rues tout à l'environ de grans fortifications de Palis & de barrieres , affin que de sa partie aduersē ne peust estre greué . Et avec ce fait tant deuers le Roy & ceux du grand conseil , que les chaines de Paris qui estoiet au Louure furent rendues aux Parisiens & remises par les rues , comme elles auoient autresfois esté . Pour laquelle chose ledit Duc de Bourgongne fut grandement en la grace de toute la communauté de Paris generally . Et iceluy chastel du Louure demoura en la garde de messire Regnault d'Angiennes , qui par auant y estoit commis de par le Roy . La bastille S. Anthoine fut mise en la garde de Montagu grād maistre d'hostel du Roy : mais iura & fait serment , qu'il ne mettroit homme dedans sinon seulement ceux du conseil du Roy là estans , & le Duc d'Acquitaine fut en gouuernement baillé au Duc de Berry de par le Roy & son grand conseil . En apres le Duc de Bourgongne & ses deux freres baillerent & presenterent au Roy & à son grand conseil vne supplication , de laquelle la teneur s'ensuit . Jean Duc de Bourgongne , Anthoine Duc de Lembourg & Philippe Comte de Neuers freres voz treshumbles subiects parens & obediens seruiteurs , vrayement & feablement cognoissans par iugement de raison chacun cheualier de vostre

Royaume



Royaume notoirement estoient tenuz & obligez apres Dieu, vous aymer, seruir, & obeir. Et ne sommes point tenuz seulement de vous point nuire, mais avec ce sommes tenus de vous notifier & à vostre personne faire sçauoir, ce qu'on procure ou veut procurer encontre vostre honneur & proffit. Et mesmement à ce sont tenus ceux qui par prochaineté de vostre sang tiennent de vous grandes seigneuries, par le moyen desquelles sont obligez à vous. Et pourtant nous nous sentons tenus comme il appert. Car à vous sommes subiects & au Royaume, & de par vostre dignité sommes voz cousins germains. Et moy Iean par la grace de Dieu & de vous suis Duc de Bourgongne Pair du Royaume de France & Doyen des Pairs, Comte de Flandres & Arthois. Et moy Anthoine Comte de RetHEL, & moy Philippe Comte de Nevers & Baron de Douffy. Et avec ce par le consentement de vous nostre tresredoubté seigneur, & de nostre tresredoubtée dame la Roïne & tout le sang royal, confirmé est le mariage entre le Duc d'Acquitaine Daulphin de Vienne vostre fils & la fille de moy Duc de Bourgongne. Et aussi entre la dame de Charrolois vostre fille & Philippe Comte de Charrolois mon fils: si sommes à vous tenuz par le commandement de feu nostre tresredoubté seigneur & pere, qui enuiron la fin de sa vie nous recommanda, & feit promettre que deuers vous & vostre Royaume toute feableté nous garderons: laquelle chose tousiours de nostre vie accomplir nous desirons & couuoitons. Et affin que les deuantdictes loix eux à aller au contraire par dissimulation ne soyons veuz: & aussi que nous n'encourons la diuine indignation, il nous semble qu'il est necessité que nous vous declarons ce que souuēt est traicté contre l'honneur & proffit de vous & vostre Royaume, principalement en quatre poincts selon nostre iugement. Le premier si est de vostre personne: car deuant que de ceste maladie, de laquelle non mie seulement estes greué, mais tous les cueurs de voz amis que vous ayez, se sentent & seuffrent tresgrand douleur en vostre conseil, souuentesfois sont faits traictés contre vostre honneur & proffit coulourés par fiction de bien: & moult de choses irraisonnables vous sont demandées, jaçoit que par voz responces les refusez. Toutesfois par aucuns de vostre conseil est donné, & tant qu'on obtient ce qu'on demande. En autre point n'avez vestemens, ioyaux ne vaisselle, comme il appartient à vostre estat royal: & se aucuns en auez à peu d'occasiō sont engagez, aussi voz seruiteurs n'ont nulle audience par deuers vous, ne point de proffit. Et avec ce q̄ des choses deuantdictes & plusieurs autres qui touchēt vostre hōneur, n'oseroient faire mention selon ce qu'ils desiroient. Le secōd poinct est de la iustice de ce Royaume, qui deuāt tous autres Royaumes souloit tenir la souueraine executiō de droicte iustice: laquelle chose est de vostre Royaume le principal fondemēt. Et du temps passé voz officiers s'estoient faits par vraye & meure deliberatiō & election, des plus notables qui voz droits grandement gardoient: & à tous grans & moyens egallement iustice se faisoit, maintenant il est le cōtraire: car voz officiers par dons & par prieres ils sont faits, pourquoy voz droits sont grandement diminuez & de iour en iour diminuent, parquoy le peuple est tresfort greué. Le tiers point est de vostre demaine qui tresmal est gouuerné: en tant que plusieurs maisons, chasteaux & edifices si vont à ruine: semblablement voz bois, voz moulins, voz riuieres, viuiers & les reuenues de voz francques festes, & generallyment toute vostre de-



maine pour la grande diminution se perit & va à neant . Le quart poinct est de l'eglise des nobles & du peuple. Premièrement quant à parler à la realle verité de ceux de l'eglise, ils sont moult opprimez, & tres grans dommages & tors ils seuffrent, tant de iuges comme d'hommes d'armes, & plusieurs autres qui leurs biens & leur viures si prennent & rauissent leurs maisons & leurs biens rançonnent: & pour ceste cause à peine ont ils dequoy viure ne faire le seruice diuin: les nobles souuentefois sont mandez dessoubs l'ombre de vostre guerre, dont nul dernier ils ne reçoient. Et pour acheter cheuaux & armeures, & ce qu'à guerre appartient souuent aduient qu'ils vendent leurs choses. Tant qu'est de vostre peuple il est tant clair, que tous ou à peu pres tendent à perdition pour les dōmages qu'ils reçoient de voz Baillifs, Preuosts & especiallement des fermiers ou autres officiers: & auec ce les gens de guerre, lesquels sans cause trop longuement ont esté tenuz & encores sont, pourquoy on doit doubter que Dieu encontre vous ne se courrouce si autrement par vous n'y est pourueu. Et c'est tout notoire, comment voz ennemis du temps de Philippe & Iean tous deux Roys de France voz nobles predecesseurs, les grans dommages qu'ils feirent en vostre Royaume: & comment Richard Roy d'Angleterre à vous allié, premierement son Royaume, & sa femme vostre fille à l'encontre de sa volenté longuement ils detindrent & la vostre pareillement. Et pour l'amour d'elle tant nobles comme marchans ils tuerent & noyerent dedans la mer, les trefues ils rompirent, & vostre Royaume en moult de lieux par feux & pilleries ils ont gasté: c'est à sçauoir en Picardie, en Flandres, en Normandie, en Bretagne, en Aquitaine, où dommaiges irreparables ils ont fait. Neantmoins tres noble sire, la guerre que vous auez entreprinse contre voz ennemis, ne disons point que la laissiez. Car fil estoit ainsi, tresgrande hôte pourroit estre imputée en vostre grād cōseil, pour la dissension laquelle est entre voz ennemis: & aussi semblablement la guerre qu'ils ont d'une part cōtre les Galois & d'autre part cōtre les Escoçois. Et s'ils estoient pacifiez, pl<sup>9</sup> grād dōmage pourroient faire en vostre Royaume q̄ deuant. En apres il semble, & c'est verité, grād chose auoir à faire pour maintenir vostre guerre tāt en vostre demaine cōme és aydes, qu'ils vous sont faictes de rechief deux grans tailles nouuellement sont taillez sur tiltre de la guerre en vostre Royaume. Nonobstant riens n'en est despēdu pour vosdictes guerres: pourquoy est à doubter qu'il n'en viēne tresgrās maux. Consideré la murmuratiō du clergié, des nobles, & du peuple: car se tous ensemble se mouuent (que ja n'aduēne) chose plus perilleuse seroit qu'oncques, mais ne fut iusques à l'heure present: & chacun de vostre Royaume qui feablement à vous est subiect, doit auoir grand douleur, quand il veoit en telle maniere tant d'argēt de vostre Royaume perir. Et pource trefnoble seigneur, que nous (comme deuant est dit) à vous tant sommes obligez: Et affin que n'encourions l'indignation de vous, de nostre dame la Roïne, & d'autres de vostre sang royal, & d'autres voz hommes feables de vostre Royaume, sans ce que nous querons quelsconques iniures n'auoir aucun gouuernement: mais seulement tant pour nous acquiter feablement enuers vous, treshumbles supplions que vous vueillez mettre remede aux conuentions dessusdits, & appelez les nommez suspects en ceste matiere, & qu'ils n'ayent point de doubtaçe à vous dire verité & qu'ils vous donnent bon conseil, & en brief ce soit mis en execution & effect. Et à ce faire

nous



nous offrons, corps, richesses & amis : & à tous ceux qui pour ce veritablement nous ne pourrions veoir ne souffrir tels inconueniens estre faits contre vous , & vostre majesté royale : & n'est point nostre intétion de cesser à ceste pétition iusques adóc que premier remede y sera mis. Ainsi fine la supplicatiõ dudit Iean de Bourgongne & de ses deux freres. Vn autre iour que le Roy estoit en assez bonne prosperité de santé , les deuantdits freres supplians avec le Duc de Berry leur oncle , & autres Princes & cheualiers de France : maistre Regnault de Corbie le premier President en Parlement, & grand nombre d'officiers royaux s'en allerent en l'hostel de S. Pol : auquel lieu ils trouuerent le Roy qui de sa chambre estoit descendu en vn iardin. Et apres que treshumblement l'eurent salüé , luy feirent les trois freres dessusdits hommages des seigneuries qu'ils tenoient de luy . Est à sçauoir le Duc Iean de sa Duché de Bourgongne & de ses Comtez de Flandres & d'Arthois : Anthoine Duc de Lembourg de sa Comté de Rethel & Philippe le maisné de sa Comté de Neuers . Si auoit pource vn tresgrand nombre de nobles hommes cheualiers & escuyers, qui feirent pareillement hommage au Roy de plusieurs seigneuries qu'ils tenoient en diuers pays de son Royaume. Et apres qu'iceux trois freres eurent requis au Roy lettres, & icelles obtenues des diligences qu'ils auoient faictes , prindrent congé de luy , & s'en retournerent en leurs hostels. Et adonc en ces mesmes iours vint à Paris és villages à l'enuiron au mandement dudit Duc de Bourgongne, & de ses deux freres bien six mille combatans . Entre lesquels estoient pour les conduire Iean sans Pitié Euesque de Liege & le Comte de Cleues , & fut faicte ceste assemblée pour resister à l'encontre du Duc Loys d'Orleans, l'aucunement vouloit faire entreprinse à l'encontre d'eux : car desia estoient bien informez , qu'il n'estoit point bien content de ce qu'on auoit ainsi fait retourner ledit Duc d'Acquitaine son nepueu , comme dessus est dit : & aussi de la proposition qu'auoient fait deuant le Roy les trois freres dessusdits : & que de ce estoit fort en son indignatiõ , & par especial le Duc de Bourgongne : & sentoit icelle proposition dessusdicte estre faicte plus à sa charge seulement , que de tous les autres Princes du Royaume . Et pource que ledit d'Orleans ne sçauoit à quelle fin icelles besongnes pourroient venir ne comment on se voudroit gouuerner enuers luy , manda gendarmes de toutes parts pour luy fortifier : entre lesquels luy vint Harpedane à tout ses gens , qui estoient és frontieres de Boullenois . Et d'autre part y vindrent le Duc de Lorraine & le Comte d'Alençon à tout tresgrand nombre de gens , estans logez autour de Melun & au pays à l'enuiron bien quatorze cens bachinets avec grand multitude de gens : & par ainsi furent les pays d'entour de Paris & de la Marche , de l'Isle de France & de Brie moult trauaillez & oppressez par les gens d'armes des deux parties. Et portoient les gens du Duc d'Orleans : en leurs pennonceaux au bout de leur lance en escript : ie l'enuye : lequel Duc manda tantost à venir deuers la Royne & deuers luy audit lieu de Melun le Roy Loys, lequel se dispoisoit à puissance de gens d'armes pour aller en son Royaume de Naples : si delaiissa tantost son entreprinse, & alla deuers la Royne & le Duc à Melun : avecques lesquels il eut aucun parlement, & puis se tira à Paris en intétion de traicter entre les deux parties. Et puis assembla par plusieurs iournées avec les Ducs de Berry & de Bourbon avec le grand conseil du Roy , pour traicter entre icelles deux parties d'Orleans & de



Bourgongne : durant lequel temps ledit Duc d'Orleans escriuit à plusieurs bonnes villes du Royaume ses lettres, en remonstrant comment on auoit proposé & semé parolles diffamatoires à Paris à l'encontre de luy & de son hōneur: lesquelles on ne deuoit pas croire ne tenir icelles pour veritables sans premier l'auoir ouï: & pareillement en escriuit à l'Vniuersité de Paris, & y enuoya ses ambassadeurs requerans que la matiere qui estoit entre luy & le Duc de Bourgongne fut par eux bien aduisée & disputée, ainçois qu'ils donnassent le tort ou faueur à l'une des parties. Apres lesquelles lettres receües, ladicte Vniuersité renuoya deuers ledit Duc à Melun leurs messagiers tres notables, qui luy toucherent sur trois poincts la cause pourquoy ils estoient venus deuers luy. Premierement le remercierent de l'honneur qu'il auoit fait à eux d'enuoyer ses ambassadeurs. Secondement que tresbien leur plairoit que la reformation du Royaume fut faite. Tiercement seroient tresdesirans & ioyeux qu'ils fussent pacifiez luy & le Duc de Bourgongne: lesquelles choses ouïes par le Duc d'Orleans dessusdit ambassadeur, fait responce de luy mesmes, qu'ils n'auoient pas fait sagement de compaigner n'assister ledit Duc de Bourgongne és besongnes dessusdictes: lesquelles auoient esté proferées en la plus grand partie contre luy, attendu qu'ils ne pouoient ignorer qu'il ne fut fils & frere du Roy: Auquel auoit esté baillé le regime du Royaume, comme à celuy qui de droit le deuoit auoir, considéré l'estat où le Roy estoit & la ieunesse de son nepueu Duc d'Acquitaine. Secondement disoit que ceux de l'Vniuersité qui estoient estrangers & de diuerses regions, ne se deuoient point entremettre du regime ne de la reformation du Royaume, mais s'en deuoient attēdre à luy & à ceux du sang Royal & du grand conseil. Tiercement qu'il ne failloit point, ne n'estoit de necessité qu'ils pacifiassent avec le Duc de Bourgongne, pource que nulle guerre ne nulle deffiance n'estoit entre eux. Apres lesquelles responces ouïes par lesdits ambassadeurs, s'en retournerent tous confus à Paris. Et le samedi ensuiuant ledit Duc de Bourgongne estant en son hostel d'Arthois, luy fut dit & c'estoit verité, que la Roïne avec le Duc d'Orleans & tous leurs gens d'armes si estoient partis de Melun, & s'en venoient à Paris. Apres lesquelles nouuelles ledit Duc de Bourgongne mōta à cheual & alla en l'hostel d'Angiers, où il trouua le Roy de Cecille, les Ducs de Berry & de Bourbon & plusieurs autres Princes & autres seigneurs du conseil du Roy: lesquels saichans la venue dudit Duc d'Orleans en estoient tous esmerueillez: Car c'estoit en allant contre leur intention, & ce qu'ils traictoient entre icelles parties. Si auoit ledit Duc de Bourgongne tresgrand nombre de gens d'armes tant dedans Paris comme dehors, lesquels si portoient és pennonneaux de leurs lances en Flaman, Hic houd, c'est à dire ie le tien: & estoit à l'encontre des Orleannois, qui comme dessus est dit, portoient, ie l'enuie: dont la plus grand partie des dessusdits gens d'armes du Duc de Bourgongne s'allerent mettre en bataille, contre la venuë dudit Duc d'Orleans au dessus de montfaulcon. Et entre-temps la communauté de Paris s'esmeut & se meit en armes en tresgrand multitude, pour resister à la venuë du Duc d'Orleans, doubans qu'il voulsist abandonner la ville à piller & eux occire. Et avecques ce feirent abbatre plusieurs appentis d'aucunes maisons, affin que par les ruës on peust plus à plain traire lance, & iecter pierres sans empeschement: Et aussi s'armerent outre les ponts plusieurs escoliers:



coliers : Et pour vray tous les Parisiens estoient plus fauorables à la partie de Bourgongne que d'Orleans. Et se dispoisoient en toute leur puissance de luy ayder à le deffendre se besoing eut esté. Lequel Duc de Bourgongne estoit tout recomforté de resister & combatre iceluy Duc d'Orleans, si fut venu iusques audit lieu de Paris : durant lequel temps le Chancelier du Roy, les Presidens de Parlement & autres sages en grand nombre voyans icelle grand mutation, pour concorder iceux Princes & euter le grand peril qui s'en pourroit ensuiuir, tantost s'en allerent au chastel d'Angiers deuers les Princes dessusdits. Et tantost apres enuoyerent deuers ledit Duc d'Orleans certains messagiers, pour luy signifier la mutation, qui estoit en luy dedans Paris. Lequel Duc avec la Roynes faichant icelle nouuelle, prindrent briefue conclusion avec aucuns de leurs plus feables conseillers : & se departirent l'un d'avecques l'autre, si alla ladicte Roynes au Bois de Vincenne, & ledit Duc avec ses gés d'armes s'en retourna à Corbueil, Et le lendemain vint à beauté, & tous ses gens se logerent au pont à Charenton & ou pays à l'environ : durant lequel temps les Princes par dessus nommez avec eux plusieurs notables seigneurs & grand nombre de gens de conseil, se meirent ensemble & traicterent par plusieurs iours sur la matiere dessusdicte. Et en fin par longue continuation apres qu'ils eurent fait sçauoir aux deux parties leurs intentions, finalement feirent tant qu'iceux deux iournées d'Orleans & de Bourgongne se submeirent de toute leur question deuantdicte sur les Roys de Cecille, & Nauarre : les Ducs de Berry, & de Bourbon. Et pour s'entretenir, baillerent chacun d'iceux sur foy corporellement : & apres donnerent congé chacun à leurs gens d'armes : & ledit Duc d'Orleans s'en vint loger en son hostel à saint Anthoine aupres de la bastille. Et briefs iours apres ensuiuant iceux Princes dessus nommez feirent & traicterent tellement qu'ils conuindrent l'un avec l'autre & se monstrerent par semblant à la veüe de tout le monde estre tresbons amis l'un avec l'autre : mais celuy qui cognoist les pensées des cueurs sçait du sur plus ce qu'il en estoit. En apres le Duc de Lorraine & le Duc d'Alençon s'en retournerent chacun en leurs pays à tout leurs gens, sans entrer dedans Paris : & ledit Duc de Bourgongne & ses freres avec tous ses gens s'en retourna assez brief ensuiuant en son pays d'Arthois : & de là en sa Comté de Flandres, où il eut aucun Parlement avec le Duc Guillaume son serourge l'Euesque de Liege, le Comte Vvaleran de S. Pol, le Comte de Namur & plusieurs autres, lequel finé retourna en sa ville d'Arras.

*Pour l'an mille cccc. & vj.*

*Comment le Duc Iean de Bourgongne eut de par le Roy le gouuernement de Picardie : de l'Ambassade d'Angleterre & de l'estat de Clugnet de Brabant Cheualier.*

CHAP. XXVI.



V commencement de cest an le Duc de Bourgongne par l'octroy du Roy, des Ducs d'Orleans & de Berry, & de tout le cōseil royal receut le gouuernement des pays de Picardie. Si enuoya de par luy sur les frontieres de Boulenois messire Guillaume de Vienne cheualier seigneur de saint George, à tout six cens Bachinets, & moult de Geneuois arbalestriers : lesquels furent mis en garnison sur lesdictes frontieres, & y feirent forte



guerre aux Anglois: mais pourtant ne demoura point que le païs ne fut souuent couru & degasté tant desdits Anglois, comme de ceux desdictes frontieres. Quel temps retournerent à Paris deuers le Roy & son grand conseil les ambassadeurs du Roy d'Angleterre: c'est à sçauoir le Comte de Pennebroch, l'Euesque de sainct Dauid & aucuns autres, qui feirent requeste bien acertes que trefues fussent baillées entre les deux Roys & leurs païs: & que marchandise peust estre faicte, & auoir son cours. Et aussi que le Roy de France voulsist donner & octroyer sa fille aînée Ysabel iadis femme au Roy Richard, au fils aîné dudit Roy Richard d'Angleterre en mariage, sous telle cōdition qu'iceluy Roy d'Angleterre prestement ledit mariage cōsommé mettroit ledit Royaume en la main de son fils & l'en reuestiroit. Lesquelles requestes ouïes & entendues par ledit conseil royal, furent par aucuns iours mises auant & debatues par diuerses opinions: mais en fin pour les fraudes que par auant on auoit veües en iceux Anglois, riens desdictes besongnes ne leur fut accordé: & aussi le Duc d'Orleans contendoit à auoir icelle fille de France en alliance pour Charles son premier fils, comme depuis il eut. Si s'en retournerēt lesdits ambassadeurs en Angleterre tant desplaisans de ce que riens n'auoient peu besongner. Et tantost apres fut la guerre moult enfelonnie entre les François & les Anglois. Et mesmement messire Clugnet de Brabant cheualier de l'hostel du Duc d'Orleans, qui nouuellement auoit receu l'office d'Admiral de France ou lieu & du consentement de messire Regnault de Trie, qui s'en estoit desmis moyennant vne grand somme d'argent qu'il en auoit receüe pour le pourchats & sollicitude dudit d'Orleans, s'en alla à Harfleu à tout six cens hommes d'armes aux despēs du Roy: auquel lieu il trouua douze gallées toutes prestes, pour entrer en mer & mener guerre ausdits Anglois, & avec ce pour prendre la possession de sondit office: mais quand il deut entrer dedans, luy fut deffendu de par le Roy qu'il n'allast plus auāt: si s'en retourna à Paris. Et brief ensuiuant par le moyen dudit Duc d'Orleans, espousa la Comtesse de Blois doiagiēre iadis delaissée de Guy Comte de Blois, laquelle estoit sœur au Comte de Namur auquel moult despleut dudit mariage. Et pourtant qu'un sien frere non legitime auoit cōsentu de traicter iceluy mariage, le feit depuis prendre par ses gens & le decoller, & par ainsi feit son sang satisfaction à sa volenté. Durāt lequel temps le Duc de Berry qui estoit capitaine de Paris, traicta tant avec le Roy & son conseil, que les Parisiens eurent congé d'eux garnir d'armeures & d'autres habillemēs de guerre pour eux garder & deffendre se befoing estoit: & qui plus est, leur furent rendues la plus grand partie desdictes armeures, qui estoient au Palais & au Louure dés le temps des maillets de Paris.

*Comment la guerre se resmeut entre les Ducs de Bar & de Lorraine, & des mariages faits à Compiengne: & aussi des alliances d'entre Orleans & Bourgongne.*

CHAP. XXVII.

**S**I se resmeut en cest an grande dissension entre le Duc de Bar d'une part, & le Duc de Lorraine de l'autre. Si fūt la cause pource que ledit Duc de Lorraine à tout grand puissance de gens de guerre des païs & alliez, alla assieger trespuissamment vn chastel qui estoit audit Duc de Bar, & estoit en partie audit Royaume de France. Et pource que par auant auoit par le Marquis



quis du Pont fils audit Duc de Bar esté mis en la main du Roy : nonobstant laquelle mise dessusdicte fut prins dudit Duc de Lorraine . Et pource que ce fut fait en la desplaisance du Roy, fut mise tantost sus vne grand armée és parties de France . Laquelle de par le Roy conduisoit messire Clugnet de Brabant Admiral, pour mener audit païs de Lorraine à l'encontre dudit Duc: mais en fin aucun traité se trouua entre icelles parties, parquoy la dessusdite armée se desrompit, & fut mise à neant. Et lors en ces propres iours vint la Roine de France & aucuns de ses enfans en la ville de compiegne : c'est à sçauoir Iean Duc de Tournay, & Ysabel iadis Roine d'Angleterre : & aussi y vindrent les Ducs d'Orleans & de Bourgongne, la Duchesse de Hollande femme au Duc Guillaume Conte de Hainault, & sa fille nommée Iaqueline de Bauiere, le Conte Charles d'Angoulesme fils premier né du Duc d'Orleans & plusieurs autres grans seigneurs, desquels les dessusdits estoient accompagnez en moult noble appareil: & si y estoit vn Legat du sainct siege de Romme, avec luy plusieurs Euesques, Docteurs & gens d'Eglise. Auquel lieu furent faits & traitez les mariages premiers du Duc de Touraine second fils du Roy, & de la dessusdite Iaqueline de Bauiere fille au Duc Guillaume Conte de Hainault : & aussi de Ysabel Roine d'Angleterre dessusdite & de Charles d'Orleans : laquelle Ysabel estoit cousine germaine d'iceluy Charles, & si l'auoit leuée & tenuë sur les fons : mais ce nonobstant par dispensation apostolique fut le dessusdit mariage paraccomply, & pareillement l'autre par deuant declairé : esquels iours furent faits audit lieu de Compiengne grans festes & esbatemens, tant en boires, mangiers, comme en dances, ioustes & autres ioyeusetez. Et brefs iours ensuyuans icelles besongnes accomplies, ladite Duchesse de Hollande avec luy son beau frere Iean de Bauiere print sa fille, & Iean Duc de Touraine son mary & par le consentement de la Roine, des Ducs dessus nommez, & de tout le conseil royal l'emmena au païs de Haynault au Quesnoy le Conte, où lors tenoit son hostel ledit Duc Guillaume, qui les receut & festoya tres-joyeusement : & d'autre partie apres que grandes confederations furent faites entre les Ducs d'Orleans & de Bourgongne, & qu'ils eurent promis l'un à l'autre d'entretenir bonne fraternité & amour toute leur vie, se departit ledit Duc d'Orleans & emmena la dessusdite Ysabel fille du Roy avec son fils à Chasteau-Tierry, lequel le Roy à sa requeste luy auoit donné. Et la Roine avec le conseil royal & tout son estat s'en retourna à Paris deuers le Roy, qui nouuellement estoit leué de sa maladie : & ledit Duc de Bourgongne s'en retourna en son païs d'Arthois, & de Flandres avec les siens. Si feist venir des païs de Bourgongne enuiron six cens combatans, pour aller és frontieres de Boulenois, & mener guerre aux Anglois, lesquels degasterent fort le païs d'entour Bethune, pource que le Côte de Namur n'auoit pas voulu souffrir que ses suiets payassent au Duc de Bourgongne vne taille, que le Roy de Nouuel luy auoit accordée à leuer sur les païs d'Arthois pour payer les soudoyers desdites frōtieres. Lesquels suiets dudit de Namur voyans que par le non payer auroient plus grand dommage, l'accorderent, & la payerent sans delay. Et pource se tirerent iceux gens d'armes hors dudit païs. Et adonc vindrent à Paris deuers le Roy & les seigneurs de son sang le Conte de Northombellant, & le seigneur de Perciacque Anglois : lesquels audit Roy & à son cōseil prièrent piteusement, qu'ils peussent auoir ay-



de de gens d'armes pour mener guerre à Henry Roy d'Angleterre: en requerant lesquelles aydes, vouloient promettre au Roy & de ce luy bailler en hostage aucuns de leurs amis, pour le seruir à tousiours cōtre ledit Roy d'Angleterre loyaument & feablement, mais à brief dire ils eurent respōce negatiue: & par ainsi s'en retournerent sans auoir quelque ayde du Roy ne des François. Durant lequel temps de rechief y eut guerre recōmencée entre les Ducs de Bar & de Lorraine, pourquoy y fut renuoyé messire Clugnet de Brabant Admiral de France à tout grand armée: lesquels par Champaigne allerent en Lorraine deuant le Neuf-Chastel appartenant audit Duc de Lorraine: laquelle ville de Neuf-Chastel se rendit tantost en l'obeissance du Roy par le conseil & voulenté de Ferry de Lorraine Comte de Vaudemont frere audit Duc. Et auec ce enuoya tātost iceluy Duc de Lorraine ses ambassadeurs à Paris deuers ledit Roy de France pour l'excuser des besongnes dessusdictes: lesquels en fin feirent tant, qu'iceluy Roy fut content & remanda ses gens d'armes, lesquels en allant & en retournant feirent grans dommages es païs où ils passerent. Et alors le Duc Iean de Bourgongne & ses deux freres auec plusieurs notables seigneurs, se tira en sa ville d'Arras, où estoit la Duchesse sa femme & ses filles: auquel lieu vint briefs iours ensuiuant le Comte de Cleues, qui espousa sa fille nōmée Marie. Et le lendemain le Côte de Ponthieure en espousa vne, laquelle estoit nommée Aubine. Ausquelles nopces on feit dedans ladicte ville d'Arras tresgrand feste & solennité. Et aucuns iour ensuiuant le Duc de Lembourg & les deux Comtes nouueaux mariez dessusdits, apres qu'ils eurent en grand liesse print congé à iceluy Duc de Bourgongne & à la Duchesse sa femme, se departirent de là & s'en retournerent chacun en son païs. Et assez briefs apres le Duc Guillaume Comte de Hainault alla à Paris treshonorablement accompagné de ses Hanuyers: auquel lieu il fut receu à grād liesse du Roy, de la Roïne, & generalmente de tous les Princes là estans: durant lequel tēps fut prononcé & deffendu en plain Parlemēt & par toute la ville de Paris, que nul de quelque estat qu'il fut Ecclesiasticque ou seculier ne payast quelque subsīde au Pape Benedic, ne à ceux à luy fauorables: & pareillement fut deffendu par toutes les Prouinces du Royaume de France. Si estoient alors plusieurs notables clerics en iceluy Royaume en grand perplexité pour la diuision de l'Eglise.

*Comment le Duc d'Orleans alla à puissance de gens d'armes de par le Roy en la Duché d'Acquitaine, & assiegea Blaye & Bourg.* CHAP. XXVIII.

**L**Tem en cest an Loys Duc d'Orleans par l'ordonance du Roy son frere se departit de Paris pour aller en la Duché d'Acquitaine, faire guerre aux Anglois: & emmena tresgrand nombre de gens d'armes & d'archiers auec luy iusques à six mille combattans: & si se meirent auecques luy messire Charles d'Albreth Connestable de France, le Marquis du Pont fils au Duc de Bar, le Comte de Clermont, Montagu grand maistre d'hostel, & plusieurs autres grans seigneurs qui tous ensemble s'en allerent mettre siege deuant la ville de Blaye, & tresfort la trauaillerent de leurs engins. Et tant qu'en assez brief temps la dame d'icelle ville feit traicter auec iceluy Duc par si qu'elle luy rendroit, ou cas que la ville de Bourg laquelle ledit Duc auoit conclud d'assieger, se submettroit à luy: & si promet aussi que durant le siege de Bourg, elle feroit



feroit deliurer par ses subiects viures aux François pour iuste pris : lequel traicté conclud, iceluy Duc d'Orleans s'en alla assieger ladicte ville de Bourg qui estoit tresfort garnie de grand nombre de gens d'armes, Anglois & Gascons. Si furent dressez plusieurs engins contre les portes & murailles par les François, qui fort les dommagerent : mais ce nonobstant lesdits assiegez se deffendirent vigoureusement. Durant lequel siege ledit messire Clugnet de Brabant Admiral de France se meit sur la mer à tout vingt & deux nefz plaines de gens d'armes à resister contre les nauires du Roy d'Angleterre, qu'à grand puissance pareillement estoient sur la mer : & se rencontrèrent l'un contre l'autre tresdurement, tant qu'il y eut de chacune partie plusieurs morts & naurez : mais sans qu'il y eust nulles desdictes parties outrées, se departirent l'un de l'autre : mais les François y perdirent vne de leurs nefz, en laquelle estoit Lionnet de Braquemont Agieux de S. Martin & plusieurs autres, qui estoient audit Duc d'Orleans : lesquels furent menez par les Anglois à Bordeaux. Et lesdits François c'est à sçauoir messire Clugnet Admiral, messire Guillaume de Villannes capitaine de la Rochelle, messire Charles de Sauoison, & les autres retournerent vers Bourg & racompterent à iceluy Duc l'adventure qu'ils auoient eüe sur mer : lequel Duc apres qu'il eust esté enuiron trois mois audit siege, voyans la force d'icelle ville : & aussi le message & mortalité qui estoit en son ost, print conclusion avec ses capitaines & s'en retourna à Paris en conuoyant ses gens d'armes. Pour lequel retour le peuple de France & aussi aucuns nobles murmurèrent fort contre luy, pourtant qu'à l'instance d'icelle armée on auoit par tout le royaume leué vne grand taille.

*Comment le Duc Jean de Bourgongne traicta tant avec le Roy & son grand conseil que il eut licence pour assembler gens pour assieger Calais.* CHAP. XXIX.



Tem durant le temps que le Duc d'Orleans fait le voyage dessusdit en la Duché d'Acquitaine, alla le Duc Jean de Bourgongne & traicta tāt deuers le Roy & son grand conseil, qu'il eut congé & licence d'assembler gens par tous ses païs à intention de mettre siege autour de la ville de Calais. Et luy fut promis de par ledit Roy, qu'il auroit ayde de gens de guerre & de finances la plus grande qu'on pourroit finer par tout le royaume. Apres laquelle conclusion il s'en retourna en sa Comté de Flandres, & manda par tout gés d'armes à venir deuers luy autour de S. Omer, avec ce fait faire plusieurs habillemeñs de guerre : & par especial en la Forest de Beaulot fait edifier deux grandes bastilles prestes pour mener & conduire deuant icelle ville. Et aussi en autres lieux furent faits plusieurs Fondeffles, Brigolles & Eschelles. Et d'autre partie le Roy fait assembler de tous ses païs grande multitude de combattans, lesquels, comme les autres trauers de Picardie, se tirèrent tous deuers S. Omer en faisant sur iceluy païs plusieurs maux. Et entre les autres y auoit de quatre à cinq cens Geneuois dont la plus grand partie estoient arbalestriers allans de pied. Et quand ils furent tous venus au païs de S. Omer) comme dit est) il fut trouué qu'ils pouoient bien estre six mille bachinets, trois mille archiers & xv. cens arbalestriers tous gens d'eslite sans ceux de pied des marches vers Flandres, Cassel & autres lieux, dont il y auoit grand nombre. Et y auoit aussi tresgrand quantité de charrois menans bombardes, canons, artilleries, viures & autres besongnes necessai-



res à guerre. Mais nonobstant que par l'attraiect d'iceluy Duc de Bourgongne toutes les preparations dessusdictes feussent faictes & apprestées par la licence du Roy & de son grand conseil, comme dit est dessus. Et que les monstres se deuoient faire pour partir assez brief ensuiuant, vindrent deuers ledit Duc de Bourgongne & les capitaines certains messagiers, qui apportèrent les nouuelles & lettres de par le noble Roy de France, par lesquelles il leur mandoit & deffendoit qu'ils n'allassent plus auant en icelle exercice ou armée. Lesquelles lettres receuës dudit Duc, il assembla son conseil, auquel il remonstra de cuer tresdolent & marry la deffence & commandement que luy faisoit le Roy, disant que ce luy estoit grand honte & confusion de rompre & departir vne si notable compagnie, qu'il auoit là assemblée. Neantmoins les seigneurs là estans consideras qu'il failloit accomplir le commandement & ordonnance du Roy & de son conseil, delibererent & cōclurent de rompre iceluy voyage & retourner à tout les gens d'armes chacun en son païs: car le Roy auoit pareillement escript au Comte Vvaleran de saint Pol, au maistre des arbalestriers & à plusieurs autres grans seigneurs, qu'ils se gardassent bien sur tant qu'ils doubtoient à encourir son indignation qu'ils n'allassent plus auant en iceluy voyage: & fut icelle armée despartie droit la nuit saint Martin d'hier. Toutesfois ledit Duc de Bourgongne iura grand serment present plusieurs de ses gens, qu'en dedans le mois de Mars ensuiuant il retourneroit à saint Omer à tout grand puissance de gens: & delà iroit sur les Anglois des frontieres de Boulenois les mettre en obeïssance, où il mourroit en la peine. Apres lesquelles besongnes iceluy Duc se departit de ladicte ville de saint Omer, & tous ses gens d'armes s'en retournerent chacun en son païs. Pour lequel departement ceux des frontieres de Boulenois & des marches de Picardie feirent grande murmuration contre le conseil du Roy, & aussi contre ceux qui auoient esmeu ceste armée, & non sans cause: car pour la grand multitude d'icelle assemblée auoient esté les païs moult trauallez. Et lors messire Guillaume de Vienne seigneur de saint George, qui estoit capitaine de toutes les marches de Picardie, rendit ladicte office en la main dudit Jean de Bourgongne, lequel y commist & establit le seigneur de Croÿ. Et adoncques furent mis tresgrand nombre des artilleries du Roy en la garde au chastel de Remy, sur l'esperance de les reprendre en la saison ensuiuant. Et apres ledit Duc de Bourgongne dudit lieu de saint Omer par Hesdin où estoit la Duchesse sa femme, s'en alla à Doüay, & là ouyt nouuelles certaines que la Duchesse de Brabant estoit allée de vie à trespas depuis vn peu de temps en çà. Si estoit tresdeplaisant & grandement courroussé du departement, qu'il luy auoit conuenu faire de son entreprinse de Calais. Et pour ceste cause auoit en grand hayne & suspicion plusieurs des principaux conseillers du Roy, & par especial le Duc d'Orleans, pource qu'on l'auoit informé que par son moyen ceste rompure auoit esté faicte. Si eut audit lieu de Doüay grand conseil avecques plusieurs des nobles de ses païs sur ceste matiere. Auquel conseil fut appoincté & conclud de tous les assistens, qu'il s'en iroit à Paris deuers le Roy pour impetrer de parfournir son intention au Mars ensuiuant: lequel voyage de Paris il fit assez hastiuement, & y alla tresgrandement accompagné. Toutesfois il fit au Roy, au Duc de Berry son oncle & plusieurs autres du grand conseil tresgrand plainte des besongnes dessusdictes, en remon-

strant



strant qu'on luy auoit fait tresgrand honte & tresgrand dommage de luy auoir ordonné de faire vne si puissante & grande bataille & assemblée, pour ne riens faire. Neantmoins il fut pour ceste fois appaisé assez doucement tant du Roy de France comme des autres seigneurs, lesquels estoient là presens : & luy fut remonstré plusieurs points, parquoy il estoit grandement de necessité & fort conuenable & profitable d'ainsi auoir fait. Et tant qu'en la fin tellement quellement il monstra semblant deuant tous d'estre assez content, car on luy donna esperance qu'au plus brief que le Roy pourroit bonnement la besongne se parfourniroit.

*Comment les Prelats & gens d'Eglise de toutes les parties du Royaume de France furent mandez à aller à Paris deuers le Roy, pour l'union de sainte Eglise.*

## CHAP. XXX.

**E**N ce temps furent mandez à Paris de par le Roy à venir tous Archeuesques, Euesques, & tous autres notables & saiges ecclesiastiques de toutes les parties du Royaume de France & du Daulphiné, afin d'auoir aduis ensemble avecques le grand conseil du Roy pour l'union de toute l'vniuerselle Eglise : lesquels venus ou au moins la plus grand partie, pource que le Roy n'estoit pas en bonne santé : fut faicte vne procession generale & dicte vne Messe solemnelle du saint esprit en la chapelle royale du Palais, & fut celebrée par l'Archeuesque de Reims. Et le lendemain assembla le conseil au Palais, auquel lieu estoit pour représenter la personne du Roy le Duc de Aquitaine Daulphin de Vienne, & avec luy les Ducs de Berry, de Bourgongne & de Bourbon, accompagnez de plusieurs autres nobles hommes. Et pour la matiere commencer vn Cordelier tressage Docteur en Theologie, pour l'vniuersité de Paris, leur proposa les faits pourquoy ceste assemblée estoit faicte. En remonstrant bien autentiquement & notablement, comme l'Eglise vniuerselle auoit esté par treslong temps, & encores estoit en tresgrande peruersité par le discord de deux Papes contendans à la Papalité: disant outre qu'il estoit necessité d'y mettre briefue prouision, ou autrement se ainsi ne se faisoit en pourroit ladicte Eglise estre mise en grand destruction. En apres le lendemain du iour saint Eloy le Roy qui auoit recouuert santé, fut en personne audit conseil & les Princes par dessus nommez avecques luy, & fut au siege royal. Auquel lieu il promet faire & entretenir tout ce qui seroit deliberé & conclud par la court de Parlement. Et depuis par aucuns iours ensuiuant fut prononcé & publié par toutes les parties du royaume de France & en Daulphiné, que tous les benefices ecclesiastiques tant dignitez comme autres, ne fussent donnez par les deux contédans dessusdits. Et avec ce que les finances qui estoient accoustumez de porter en la chambre apostolicque, ne fussent plus payées: ains seroient iceux benefices donnez & conferez par les esleuz souuerains & par les Patrons ordinaires, ainsi comme jadis auoient esté fait par auant les reseruations & constitutions faictes par le Pape Clement vj. de ce nom.

*Comment les Liegeois debouterent Iean de Bauiere leur Euesque, pour la cause qu'il ne vouloit estre promu & consacré à l'estat de l'Eglise, comme promis l'auoit.*

## CHAP. XXXI.



**E**N ceste mesme saison Ieā de Bauiere, autresfois dit sans pitié, Euesque du Liege frere germain du Duc Guillaume Comte de Henon, pource que nullement à ordres sacrées ne vouloit estre promeu, jaçoit que ou temps passé eust promis & iuré aux Liegeois de l'estre: pour ceste cause fut debouté par eux de ladicte Euesché:& en lieu de luy ils prindrent à seigneur & à Euesque vn autre, ce fut le fils lequel auoit xviiij. ans ou enuiron, & estoit chanoine de S. Lambert de Liege. Et avec ce feirent iceux Liegeois dudit seigneur de Pieruels pere du nouuel Euesque, leur principal Maimbourg & gouverneur de tout le païs de Liege. Et par auant iceluy Iean de Bauiere auoit promis mettre & resigner sondit Euesché en la main du fils dudit Pieruels. Et de ce sçauoient parler & auoient esté ausdictes promesses Anthoine Duc de Brabant, Vvaleran Comte de S. Pol & plusieurs autres notables personnes: lesquelles promesses il ne voulut point entretenir. Et pource en partie par la seduction d'iceluy seigneur de Pieruels s'esleuerent & esmeurent du tout contre ledit Iean de Bauiere, en prenāt nouveau seigneur: lequel de Bauiere voyant la rebellion d'iceux en fut tresmal content & le print en grand indignation: & de fait meit en la ville de Buillon & autres forteresses à luy appartenantes tresgrande garnison de gens de guerre, par lesquels il chargea dommager iceluy païs de Liege. Et puis s'en alla ou païs de Hainault vers son frere le Duc Guillaume, pour auoir secours de gens d'armes. Et entre-temps les communes du païs de Liege, feirent grand assemblée & s'en allerent deuant ladicte ville de Buillon: laquelle avec le chastel ils prindrent d'assault, & meirent à mort ceux qui estoient dedans. Et pareillement Iean de Bauiere à tout quatre cens combattans entra ou païs vers Thum, & ardit plusieurs villes & maisons: & remena tresgrans proyes ou païs de Hainault. Mais tantost apres lesdits Liegeois entrerent à grand puissance oudit païs de Hainault, & ruerent ius la tour de Morialines & si ardirent la ville. Et de là s'en allerent en la ville de Brabençon & en plusieurs autres lieux des cheualiers & escuyers, qui auoient esté en leur païs: lesquels ils pillerent tout & bouterent les feux en aucunes places, & degasterent tout par feu & par espée. Durant lequel temps les Hainuyers s'assemblerent pour les rebouter, mais ils estoient si puissans qu'ils s'en retournerent en leur païs sans faire perte, qui soit à racompter n'escrire. Et par ainsi fut la guerre d'entre icelles parties du tout esmeüe & se fortifierent l'un contre l'autre chacū en droit soy au plus diligement que faire le peurēt. Et mesmement lesdits Liegeois enuoyerēt deuers le Pape leurs ambassadeurs, remonstrer l'estat dudit Iean de Bauiere. Et comment nullement ne vouloit point descendre à estre consacré ainsi que promis l'auoit: en requerant qu'il fut démis par l'auctorité Apostolique: & en son lieu vouldist confermer le fils dudit seigneur de Pieruels, qui estoit nouuel esleu. Lequel Pape ne leur peut accorder leur requeste, pource qu'il estoit suffisamment informé qu'iceux Liegeois autrefois par meure deliberation auoient donné iour audit Iean de Bauiere: en dedans lequel il deuoit estre sacré, lequel iour n'estoit mie encores passé: Et pourtāt sans riens besongner iceux ambassadeurs s'en retournerent oudit païs de Liege deuers ceux qui les auoient enuoyez. Lesquels furent moult indignez contre ledit Pape Gregoire, pource qu'il ne leur auoit pas accordé leur requeste. Si conclurent de rechief d'enuoyer à son aduersaire le Pape Benedic: & de fait y enuoyèrent



rent leurs ambassadeurs, lesquels furent benignement receuz d'iceluy Benedic : & leur accorda & conferma toutes leurs requestes, en baillant à eux ses bulles de ladicte confirmation. Si s'en retournerent ioyeusement à tout icelles & leur sembla qu'ils auoient tresbien besongué.

*Comment Anthoine Duc de Lembourg eut la possession de la Duché, & depuis de la ville de Trecht à la grand desplaisance des Liegeois.* CHAP. XXXII.

**A**Nthoine Duc de Lembourg frere germain dudit Iean de Bourgongne, apres la mort de la Duchesse de Brabant par deuant declairée, succeda en ladicte Duché & les appartenāces. Tous les Brabançons tant gens d'Eglise comme nobles excepté ceux de Trecht si luy feirent hommage, en luy promettant comme à leur droicturier seigneur foy & loyauté. Et apres qu'il eut prins la possession d'icelle Duché, octroya sa Comté de Rethel à Philippe Comte de Neuers son maisné frere, & du consentement de son frere aîné le Duc de Bourgongne : & aussi en accomplissant le testament & derniere voulenté de leur feu pere & mere. Laquelle Comté ledit Philippe receut agreablement. En outre la moitié de ladicte ville de Trecht estoit de la Duché de Brabant, & d'autre partie à l'Euesché du Liege. Et ne deuoient faire serment qu'à l'un d'iceux tant seullement comme ils disoient, c'est à sçauoir au premier entrant. Et pource qu'autresfois auoient fait ledit serment à Iean de Bauiere, furent refusans de le faire au Duc de Brabant : duquel refus iceluy Duc ne fut pas bien content, & conclud avec ceux de son conseil de les contraindre par force de guerre. Et manda gens d'armes à venir vers luy de plusieurs pays. Entre lesquels y vindrent son frere le Comte de Neuers, les Comtes de S. Pol & de Namur, les seigneurs de S. George & de Croÿ de par le Duc de Bourgongne, avec plusieurs autres en tresgrand nombre qu'y enuoyerent pareillement le Roy Loÿs & le Duc de Berry. Finablement apres qu'il eut assemblé tresgrand compaignie de ses gens d'armes de plusieurs pays, il se departit de Brabant avec les nobles du pays, & grand foison comme charrois & habillemés de guerre : & print son chemin en tirant vers ladicte ville de Trecht. Mais en passant parmy la terre de Liege & es frontieres d'environ, il y eut plusieurs Liegeois qui s'assemblerent en tresgrand nombre, & feirent plusieurs empeschemens en son host, en rompant tous les passages en partie pour l'amour qu'ils sçauoient iceluy de Brabant estre d'affinité à Iean de Bauiere leur aduersaire. Et tant continuerent en icelles assemblées, qu'ils se trouuerent bien vingt mille hommes armez avec leur nouuel Euesque en ladicte ville de Trecht, vueillans que ledit Euesque avec ledit Duc entrast me vray Euesque & qu'il y fut receu comme vray seigneur. Toutesfois celle assemblée se departit sans effusion de sang d'une partie & d'autre. Et entre-temps ledit de Brabant feit traicter secretement avec ceux de la ville de Trecht, tellement qu'ils furent contens de le receuoir à seigneur & en fin le receurent & luy promeirent à entretenir foy & loyauté. Et apres de là s'en retourna & departit & donna congé à tous ses gens d'armes : & quand il fut venu à la cognoissance des Liegeois, requirent hastiuement à ceux de Trecht qu'ainsi qu'ils auoient iuré audit Duc de Brabant, ils iurassent à leur nouuel Euesque qui estoit leur droicturier seigneur : laquelle requeste ne leur fut point accordée, mais leur fut respon-



du qu'ils auoient autresfois fait fermēt à Jean de Bauiere, & le receu comme seigneur & qu'autre serment ne feroient: pour laquelle responce lesdits Liegeois avec leur Maimbourg & nouuel Euesque, furent tres indignez à l'encontre d'eux, & se disposerent à toute puissance pour leur mener guerre, & aussi pour les assieger comme cy apres plus à plain sera declairé.

*Comment les ambassadeurs du Pape Gregoire vindrent à Paris deuers le Roy & l'Vniuersité à tout vnes bulles d'iceluy Pape, qui sont declairées en ce liure.*

## CHAP. XXXIII.

**E**N apres les ambassadeurs du Pape Gregoire Romain avec bulles qu'ils apportèrent du Pape, vindrent en ces iours à Paris vers le Roy & l'Vniuersité, en disant à eux, comme en la bulle estoit cōtenu ledit Pape estre prest & appareillé d'ayder pour l'vnion de ladicte Eglise vniuerselle, & faire tout ce qu'il semblera au Roy & à ladicte Vniuersité expedient pour mieux & plustost paruenir à ladicte vnion de l'Eglise: moyennant que Benedict son aduersaire vouldroit ceder pareillement. Lesdits ambassadeurs avec leurs bulles du Roy & de leur conseil tous ioyeusement furent receuz. Et estoit la teneur de ladicte bulle telle qui s'ensuit. Gregoire Euesque serf des serfs de Dieu: à mes fils de l'Vniuersité de Paris salut & apostolicque benediction. Nous nous sommes plus preparez mes amcz fils à vostre vniuersité escrire: pource qu'à scisme vous auez condescension piteuse donnée. Et pourtant par ceste mesme raison par la misericorde de Dieu le tout puissant, nous voirriez tres affects. Car Innocent Pape vij. nostre predecesseur de recordation enuieuse de ce siecle, si fut osté par vn samedy vj. iour de Nouëbre. Noz venerables freres de la saincte Eglise Romaine Cardinaulx (de quel nombre adonc nous estions) la grace du sainct Esprit appelée au palais Apostolique à S. Pierre, pour la collection du Pape Romain aduenir en conclaue feussent entrez, moult de choses diuerfes par plusieurs iours si furent traictez, tant qu'en la parfin nous qui estions Prestre Cardinal du tiltre S. Marc d'une volenté leurs yeux à nous adresserent: & d'une concorde tous ensemble Euesque de Romme, nous esleurent. Lequel fait à prendre pour l'imbecillité de nous tresgrandement nous cremismes. Toutesfois l'esperance mise en iceluy qui fait choses merueilleuses ce faiz dessus noz espauls. Si mismes non mie de nostre vertu, mais de la vertu de Dieu: duquel la chose est faicte nous sommes confiez. Nous dont l'office pastoral rechupte non mie pour nostre proffit. Mais pour l'honneur de Dieu & l'vtilité publicque, à ce deuant toutes choses tournons nostre courage: affin que ceste briseure venimeuse, laquelle par si long temps le peuple Chrestien à failly à viure à reintegration nous la ramenons. Sur laquelle chose si grande grace à nous de hault nous esperons estre donnée, que ce q̄ nous desirons & couuoitōs dedans brief temps à effect sera demené. Et pource toute contēplation ostée, à nostre aduersaire, ja auōs escrit affin qu'à paix & vnion il nous ensuiue, en nous offrant estre appareillez à cession de droit, & à la renonciation de la Papalité du tout par nous mesmes estre faicte, moyennant que nostre aduersaire ou son successeur quelconques il soit, pareillement ainsi face. C'est à sçauoir qu'il renonce totalement à la Papalité. Et aussi que ceux qui à nostredit aduersaire pour estre Cardinal se sont ingerez, vueillent



vueillent concorder & conuenir avecques nostre college, affin que de ce que d'un Pape Rommain seul vne election canonicque s'enfuiue. Et en outre nous offrons toute autre voye raisonnable, par laquelle schisme soit osté & que l'union s'enfuiue: laquelle offre affin qu'elle fut & soit faicte plus seure, nous auons iuré, promis & voüé deuant nostre election par ce mesme moyen, estre de fait accomplie avecques tous noz venerables freres Cardinaulx de ceste mesme Eglise. Ou cas qu'aucun de nous à Pape seroit esleu & prins apres ceste assumption & à luy à Constance plus ferme, auons iuré, voüé, promis & ratifié noz orateurs aussi hastiuement deuons enuoyer, qui de lieu & ydoine & secret avecques eux doiuent disposer pour ceste vnion faire. Vous doncques tresaymé fils à ce de toute vostre force vous vueillez exposer & nous ayder à ceste heure parfournir, affin que l'Eglise de ceste maladie loingtaine plus ne soit trauaillée. Et faisons par affectiō ayde solitude: donné à Romme à saint Pierre l'vnziesme iour de Decembre l'an mille quatre cens & six. En outre apres que lesdits ambassadeurs du Pape Gregoire eurent bien & appoint remonstré tout l'estat de leur ambassade, & offert que ledit Pape estoit prest de ceder (comme dit est dessus) & qu'ils eurent à Paris esté receuz honnorablement. Et aussi qu'on leur eust promis d'enuoyer deuers le Pape Benedic, ils se partirent & retournerent deuers leur maistre & seigneur. Et enuiron la Chandeleur ensuiuant le Roy de France, l'Vniuersité de Paris par la deliberation des Prelats, du clergié & du conseil, enuoyerent certains ambassadeurs deuers le Pape Benedic: c'est à sçauoir le Patriarche d'Alexandrie, qui lors estoit à Paris, les Euesques de Cambray & de Beauuais, l'abbé de saint Denys, l'abbé du mont saint Michel, le seigneur de Courrouille, maistre Iean Toussain Secretaire du Roy & autres Docteurs de l'Vniuersité, avecques plusieurs autres notables personnes, lesquels tous ensemble prindrent leur chemin à aller à Marceilles où se tenoit lors le dessusdit Benedic avec aucuns Cardinaulx, qui estoient ses fauorables. Et auoient iceux ambassadeurs charge de luy remonstrer amiablemēt, comment son aduersaire s'offroit de ceder pour l'union de l'Eglise. Et mesmement ou cas qu'il n'y voudroit entendre de luy fommer & inthimer, que sainsi ne se faisoit tout le Royaume de France generalmente, le Daulphiné & plusieurs autres pays des Chrestiens feroient subtraction à l'encontre, & que plus ils n'obeïroient à ses bulles ne autres edits Apostolicques: & pareillement le feroient à sondit aduersaire, ou cas qu'il ne voudroit entretenir ce que par ses ambassadeurs auoit fait sçauoir au Roy de France, à l'vniuersité de Paris: lesquels ambassadeurs deuantdits venuz iusques audit lieu de Marceilles, furent assez deuotement receuz d'iceluy Benedic & desdits Cardinaulx. Neantmoins quand ils eurent exposé l'estat de leurdicte ambassade & remonstré tout au long ce pourquoy ils estoient venuz, le Pape leur dit de sa bouche qu'ils auroient responce dedans briefs iours ensuiuant: & entre-temps ne meit pas en oubly qu'on le menaçoit de faire subtraction à l'encontre de luy. Et pour y pourueoir, sans que nuls des Cardinaulx feit vne constitution sur grande peine durant à perpetuité à l'encontre de tous ceux qui se soustrairoient à son obediēce, & aussi mesmement de ses successeurs: laquelle constitution il enuoya à Paris par deuers le Roy & l'vniuersité par vn messagier, dont on fut moult esmerueillé. Et apres qu'il eut fait responce à iceux am-



bassadeurs deuantdits non mie telle qu'ils desiroient:mais assez contraire, ils s'en retournerent par plusieurs iournées en la ville de Paris tres indignez & mal contents d'iceluy Pape. Et là racompterent ce qu'ils auoient trouué. Mais ledit Patriarche demoura audit lieu de Marceilles sur intention d'incliner ledit Benedic à ceder, & venir à vne seule vnion de l'vniuersel Eglise.

*Pour l'an mille cccc. & vij.*

*Comment le Duc d'Orleans eut par l'octroy du Roy son frere la Duché d'Aquitaine, & lors furent faictes trefues entre le Royaume de France & d'Angleterre.*

CHAP. XXXIII.

**A**V commencement de cest an le Duc Loys d'Orleans estant à Paris par certains moyens, que long temps par auant ils auoit quis, fait tāt que le Roy de France son seigneur & frere luy dōna la Duché d'Aquitaine:laquelle par tres long temps par auāt il auoit desiré & contendu d'auoir. En ce mesme temps furent faictes trefues entre les Roys de France & d'Angleterre par temps seullement, & furent publiées és lieux accoustumez iusques à vn an ensuiuant. Pour lesquelles ceux de la Comté de Flandres furent fort resiouys, pource que par le moyen d'icelles leur sembloit que leur marchandise s'en conduiroit plus seurement. Et à lors vindrent à Paris les ambassadeurs du Roy Héry d'Angleterre. Entre lesquels estoit le principal messire Thomas Erpinion avec luy vn Archediacre & plusieurs autres nobles hommes: lesquels conduisoit Tassin de Seruillers, & requirēt au Roy d'auoir en mariage vne sienne fille, qui estoit religieuse à Poissy pour le Prince de Galles premier fils du Roy d'Angleterre. Mais pource qu'ils faisoient trop excessiues demandes avec icelle fille, s'en retournerent sans riens besongner. Si les conduit iusques à Boulongne sur la mer le seigneur de Hangast, qui de par le Roy fut brief ensuiuant constitué pour ses merites maistre des arbalestriers de France.

*Comment le Prince de Galles fils aisné du Roy d'Angleterre accōpaigné de ses deux oncles & tresgrand cheualerie alla en Escoce, pour faire guerre.* CHAP. XXXV.

**Q**R est verité qu'en ceste saison enuiron la Touffaints le Prince de Galles premier fils de Henry Roy d'Angleterre. Si assembla iusques à mille hommes d'armes & six mille archiers: entre lesquels estoient avec luy pour les conduire ses deux oncles, c'est à sçauoir le Duc d'Iorth & le Comte d'Urfet, les seigneurs de Mortaigne, de Beaumont, de Rols & de Cornaille avec plusieurs autres nobles hommes, qui tous ensemble se tirerent vers le païs d'Escoce: pour ce principalement que les Escoçois auoient nagueres rōpu les trefues d'entre les deux Royaumes, & faits grans dommages par feu & par espée en la Duché de Lenclastre, & és païs d'entour de Rosebourg: & tant cheminerent qu'ils entrerent à puissance dedans lesdits païs, & y feirent tresgrand dommage: car lesdits Escoçois ne furēt pas aduertis de leur venue, iusques à tant qu'ils furent aupres dudit païs. Et quand les nouuelles furēt venues à la cognoissance du Roy d'Escoce, qui estoit en sa ville de saint Iangon ou meillieu de son Royaume, il manda hastiuement tous ses Princes, & assembla en assez briefs iours tresgrand puissance de gens de guerre: lesquels il enuoya soubz la conduite  
des



des Comtes Donglas & de Boucans avecques son Connestable vers la Marche, où estoient lesdits Anglois pour iceux rencôtrer & combattre s'ils veioient leur aduventure : mais quand ils furent à six lieües pres, ils furent aduertiz que iceux Anglois estoient trop puissans pour eux, & pourtant fut par eux aduisé autre moyen. C'est à sçauoir enuoyerent certains messagiers ambassadeurs deuers le Prince de Galles, & son conseil : lesquels en conclusion traicterent tellement que les trefues furent reconfermées entre icelles parties pour vn an ensuiuant. Et par ainsi le dessusdit Prince de Galles apres qu'il eut fait plusieurs dommages audit païs d'Escoce, il s'en retourna en Angleterre & pareillement les Escoçois rompirent leur armée.

*Comment Loïs Duc d'Orleans seul frere du Roy de France Charles le bien aymé fut meis à mort piteusement dedans la ville de Paris d'aguet à pensé.*

CHAPITRE. XXXVI.



N ces propres iours aduint en la ville de Paris la plus douloureuse & piteuse aduventure, qu'en treslong temps par auant fut aduennue au Chrestien Royaume de France pour la mort d'un seul homme. A l'occasion de laquelle le Roy, tous les Princes de son sang, & generallyment tout son Royaume eurent moult à souffrir, & furent en tresgrand diuision l'un contre l'autre par treslongue espace. Et tant qu'iceluy Royaume en fut moult desolé & appauury, comme cy apres pourra plus plainement estre veu par la declaration, qui mise en sera en ce present liure. C'est à sçauoir pour la mort du Duc d'Orleans seul frere germain du Roy de France Charles le bien aymé fixiesme de ce nom. Lequel Duc estant en la dessusdicte ville de Paris, fut par vn mercredy iour saint Clement Pape meurdry & mis à mort piteusement, enuiron sept heures apres disner. Et fut cest homicide fait & perpetré par enuiron dixhuiët hommes, lesquels estoient logez en vn hostel où estoit lors pour enseigner l'image nostre Dame aupres la porte Barbette. Et là comme depuis il fut sceu veritablement, auoient esté par plusieurs iours sur intention d'accomplir ce qu'ils auoient entrepris. Et quand ce veint en ce mesmes mercredy (comme dit est) enuoyerent vn nommé Scas de Courteheuze qui estoit varlet de chambre du Roy & leur complice, deuers ledit Duc d'Orleans, qui estoit allé veoir la Roïne de France en vn hostel qu'elle auoit n'agueres achepté à Montagu grand maistre d'hostel du Roy : & sied iceluy au pied de ladicte porte Barbette, & là gisoit d'un enfant qui estoit trespasé ieune, & n'auoit point encores accompli les iours de sa purification. Lequel Scas venu deuers iceluy Duc, luy dit de par le Roy pour le deceuoir : monseigneur, le Roy vous man-



de que sans delay venez deuers luy & qu'il a à parler à vous hastiuement, & pour chose qui grandement touche à luy & à vous. Lequel Duc ouï le commandement du Roy, iceluy vueillant accomplir, combien que le Roy riens n'en sçauoit: Tantost & incontinent monta dessus sa mulle, & en sa cōpaignie deux escuyers sur vn cheual & quatre ou cinq varlets de pied deuant & derriere portans torches, & ses gens qui le deuoient suiur point ne se hastoient. Et aussi y estoit allé à priuée mesgnie, nonobstant que pour ce iour auoit dedans la ville de Paris de sa retenue & à ses despens bien six cens cheualiers & escuiers. Et quand il vint assez pres d'icelle porte Barbette, les dixhuict hommes dessusdits qui estoient armez à couuert l'attendoient, & festoient meis couuertement aupres d'vne maison. Si faisoit assez brun pour ceste nuict. Et lors incontinent meuz de hardie & outrageuse volenté faillirent tous ensemble à l'encontre de luy, & en y eut vn qui l'escria à la mort, & le ferit d'vne hache tellement qu'il luy couppa vn poing tout ius. Et adoncques ledit Duc voyant celle cruelle entreprinse ainsi estre faicte contre luy, l'escria assez hault en disant. Je suis le Duc d'Orleans, & aucuns d'iceux en frappant sur luy respondirent, c'est ce que nous demandons. Entre lesquelles parolles la plus grand partie recouurerent & presentement par force & abondance de coups fut abbatu ius de sa mulle, & sa teste toute escartellée par telle maniere que la ceruelle issit dessus la chaussée. En outre là le retournerent & renuerferent & si tres terriblement le maschaclerent, qu'il fut presentement mort trespiteusement, & avec luy fut tué vn ieune escuyer qui autresfois auoit esté son page: & quand il veit son maistre abatu, il se coucha sur luy pour le garder, mais riens n'y feit: & le cheual qui deuant le Duc alloit à tout les deux escuyers, quand il sentit iceux facteurs armez d'empres luy, il commença à ronfler: & quand il les eut passez se meit à courre, & fut grand espace que ceux qui estoient sus ne le peurent retenir. Et quand il fut arresté ils veirent ladicte mulle de leur seigneur, qui toute seule courroit apres eux. Si cuiderent qu'il fut cheut ius, & pource la reprindrent par le frain pour la remener audit Duc: Mais quand ils vindrent pres de ceux qui l'auoient tué, furent menacez, disant fils ne s'en alloient qu'en tel point seroient meis comme leur maistre: pourquoy iceux voyans leur seigneur estre ainsi meis à mort hastiuement s'en allerent en l'hostel de la Royne en criant le meurdre. Et ceux qui auoient occis ledit Duc, à haute voix commencerent à crier le feu: & auoient leur fait par telle maniere ordonné en leur hostel, que l'vn d'eux entant que les autres faisoient l'homicide dessusdit bouta le feu dedans iceluy. Et puis les vns à cheual, les autres à pied hastiuement s'en allerent où ils peurent le mieux, en iectant apres eux chaucestrappes de fer, affin qu'on ne les peut suiur, n'aller apres eux. Et comme la fame & renommée fut, aucuns d'iceux allerēt en l'hostel d'Arthois par derriere à leur maistre le Duc Iean de Bourgogne qui ceste euure leur auoit fait faire & commandée, comme depuis publicquement il confessa & ce qu'ils auoient fait luy racompterent. Et apres treshastiuement meirent leurs corps en sauueté. Et fut le principal de cest cruel homicide cōducteur vn nommé Rollet d'Auconuille de nation Normand: auquel par auant ledit Duc d'Orleans auoit osté l'office des Generaux, duquel le Roy l'auoit pourueu à la requeste & priere du Duc Philippe de Bourgogne defunct.



funct. Et pour ce desplaisir auisa ledit Rollet maniere comment il se pourroit venger d'iceluy Duc d'Orleans. Ses autres complices furent Guillaume Courteheuse & Scas Courteheuse deuant nommez nez de la Comté de Ghines, Jean de la Motte & plusieurs autres iusques au nombre dessusdit. En apres enuiron demie heure ceux de la famille dudit Duc d'Orleans, quand ils ouyrent nouuelles de la mort & occision de leur seigneur tant piteuse tresfort ploroient, & griefuement au cueur courroucez tant les nobles comme non nobles accoururent à luy, & là le trouuerent mort sur les quarreaux. Auquel lieu y eut grans lamentations & regrets des cheualiers & escuyers de son hostel, & generallyment de tous ses seruiteurs quand ils veirent son corps si tres terriblement deplayé. Et lors (comme dit est) en tres grans tristesses & gemissemens le leuerent & en l'hostel du seigneur de Rieux Marechal de France qui pres de là estoit, le porterent : & brief ensuiuant iceluy corps couuert de blanc linseul, fut porté en l'Eglise des Guillemins assez honorablement. Et estoit icelle Eglise la plus prochaine du lieu où il auoit esté mort, & tantost apres le Roy de Secille lors estant à Paris & plusieurs autres Princes, cheualiers & escuyers oyans la nouuelle de si cruelle mort que du seul frere germain du Roy de France en telle maniere perpetrée à Paris, en grans pleurs en ladicte Eglise si le vindrent veoir : & le corps mis en vn fercueil de plomb, toute nuict les religieux de ladicte Eglise si veillerent toute nuict en disant vigilles & psaultiers : avecques lesquels demourerent ceux de sa famille. Et le lendemain tres matin fut trouuée par ses gens la main, laquelle luy auoit esté couppée sur les quarreaux & vne grand partie de sa ceruelle, laquelle fut recueillié & mise au fercueil avecques le corps. Et tost apres tous les Princes estans audit lieu de Paris reserué le Roy & ses enfans : c'est à sçauoir le Roy Loys, le Duc de Berry, le Duc de Bourgongne, le Duc de Bourbon, le Marquis du Pont, le Comte de Neuers, le Comte de Cleremont, le Comte de Vandomme, le Comte de saint Pol, le Comte de Dampmartin, le Connestable avecques plusieurs autres : lesquels estoient là assemblez tant gens d'Eglise comme nobles, avecques tresgrād multitude du peuple de Paris, si vindrent tous ensemble à ladicte Eglise des Guillemins. Et là les principaux de la famille dudit Duc d'Orleans prindrent son corps avecques le fercueil, & le meirent hors de ladicte Eglise & avecques grād nombre de torches allumées, lesquelles portoient les escuyers dudit deffunct : & à chacun lez du corps estoient par ordre faisant pleurs & grans gemissemens. C'est à sçauoir le Roy Loys, le Duc de Berry, le Duc de Bourgongne & le Duc de Bourbon, chacun d'eux tenans la main au drap qui estoit sus le fercueil. Et apres eux estoient par ordonnance chacun selon son estat les Princes, le clergié, les barons tous recommandans son ame à Dieu nostre createur, & le porterent en icelle maniere iusques à l'Eglise des Celestins. Et là apres son seruice fait tressolennellement fut enterré treshonorablement en vn chappelle trefexcellente, laquelle il auoit fait faire & fonder. Et apres iceluy seruice fait & accompli les Princes dessusdits & tous les autres se retrahirent chacun en leurs hostels. Si estoient en grād sospçon de sçauoir la verité du dessusdit homicide, ainsi fait sur ledit Duc d'Orleans. Et de prime face fut aucunement soupçonné, que messire



Aubert de Canny ne fut coupable pour la grand hayne qu'il auoit audit Duc, à cause de ce qu'audit messire Aubert auoit sa femme soubstraicte & emmenée avec luy. Et tant auoit tenue icelle dame en sa compaignie qu'il en auoit vn fils, duquel & de son gouuernement sera faicte mention cy apres. Mais en assez brief terme ensuiuant on sceut la verité dudit homicide, & que ledit seigneur de Canny n'en estoit en riens coupable. Et en ce mesme iour Ysabel Roynne de France quand elle sceut les nouuelles dudit meurdre & homicide fait si pres de son hostel, receut si grand fureur & hideur, que nonobstant qu'elle ne fut encores purifiée: Neantmoins se fait mettre sur vne litiere par son frere Loys de Bauiere & autres de ses gens, & à son hostel de saint Pol se fait porter en la chambre prochaine de la chambre du Roy, où pour plus grande seurte se logea. Et mesme-ment la nuit que le meurdre fut perpetré y eut plusieurs nobles qui s'armerent, comme le Comte de saint Pol & aucuns autres, lesquels se retrahirent en l'hostel du Roy leur souuerain seigneur, non saichans quelle chose d'icelle besongne s'en pourroit ensuiuir. En apres le corps dudit Duc d'Orleans mis en terre (comme dit est) s'assemblerent tous les Princes en l'hostel du Roy Loys avecques le conseil royal: & là fut mandé le Preuost de Paris & autres ges de iustice, ausquels fut commandé par lesdits seigneurs qu'ils feissent bonne diligence d'enquerir se par nulle voye on pourroit apperceuoir, qui auoit esté l'acteur ne les complices de faire ceste besongne. Et avecques ce fut ordonné que toutes les portes de Paris reserué deux feussent fermées, & qu'icelles deux fussent bié gardées pour sçauoir qui en ystroit. Apres lesquelles ordonnances & aucunes autres lesdits seigneurs & le conseil royal se retrahirent tous confus, & en grand tristesse en leurs hostels. Et le lendemain qui fut le vendredy se rassembla ledit conseil à l'hostel du Roy de France à saint Pol. Avecques luy estoient le Roy Loys, le Duc de Berry, de Bourgongne & de Bourbon & moult d'autres grans seigneurs avec ledit conseil royal. Et tantost apres vint le Preuost de Paris, auquel le Duc de Berry demanda quelle diligence il auoit faicte dessus l'occision faicte dessus si grand seigneur, comme le seul frere du Roy: lequel Preuost respondit qu'il en auoit faicte la plus grand diligence qu'il auoit peu: mais encores n'en pouuoit sçauoir la verité: disant au Roy & à tous les seigneurs, que se l'on le laissoit entrer dedans tous les hostels des seruiteurs du Roy & aussi des autres Princes par aduerture (comme il creoit) trouueroit il la verité des acteurs ou des complices. Et le Roy Loys, le Duc de Berry & le Duc de Bourbon luy dōnerent congé & licence d'entrer par tout où bon luy sembleroit. Et adonc le Duc Iean de Bourgongne oyant la licence qui fut octroyée par iceux seigneurs au Preuost de Paris, eut doub-  
tance & cremeur. Et pource attrait à part le Roy Loys & le Duc de Berry son oncle, & en brief leur confessa: & dit que par l'introduction de l'ennemy si auoit fait faire cest homicide par Rollet d'Autonuille & ses complices: lesquels seigneurs oyans ceste confession eurent si grāde admiration & tristesse en cueur, qu'à peine luy peurent ils donner responce: & ce qu'ils luy en dōnerent ce fut en luy tresgrandement reprouuant la condition & maniere de trescruel homicide, ainsi par luy perpetré en la personne de son propre cousin germain. Et apres que ils eurent ouy la cognoissance dudit Duc de Bourgongne, retournerent deuers  
le conseil



le conseil & ne declairerent pas presentement ce qu'il leur auoit dit. Et brief ensuiuant ledit conseil finé chacun en son hostel s'en retournerent. Le lendemain qui fut le samedi enuiron dix heures deuant nonne, furent les seigneurs dessusdits assemblez en l'hostel de Neelle, où estoit logé le Duc de Berry pour tenir le conseil Royal, auquel lieu pour estre à iceluy conseil vint ledit Duc de Bourgogne ainsi qu'il auoit accoustumé, le Comte Vvalleran de saint Pol en sa compaignie: mais quand il vint pour entrer dedans, son oncle le Duc de Berry luy dist: Beau nepueu n'entrez pas au conseil pour ceste fois, il ne plaist mie bien à aucuns qu'y soyez. Et sur ce le Duc de Berry s'entra dedans, & feit tenir les huys fermez ainsi qu'il auoit esté ordonné par le grand conseil. Et alors le Duc Iean de Bourgogne tout confus & en grand doubte, demanda au Comte Vvalleran de saint Pol: Beaux cousins qu'auons nous à faire sur ce que voyez? Et le Comte luy respondit, monseigneur vous auez à vous retraire en vostre hostel, puis qu'il ne plaist à noz seigneurs que vous soyez au conseil avec eux. Et ledit Duc luy dit en telle maniere: Beaux cousins retournez avecques nous pour nous accompagner. Et le Comte Vvalleran luy feit respõce à la maniere qui s'ensuit: Mon seigneur pardonnez moy, ie iray vers noz seigneurs au conseil lesquels m'ont mandé. Et apres ces parolles ledit Duc de Bourgogne en grand doubte s'en retourna en son hostel d'Arthois: & affin qu'il ne fut arresté ne prins, sans delay monta à cheual six de ses hommes tant seullement en sa compaignie. Et par la porte de saint Denys se partit & treshastiuement, & cheuaucha en prenant aucuns cheuaux nouveaux sans arrester en nulle place iusques à son chastel de Bapaumes: & quand il y eut vn petit dormy, s'en alla sans delay à l'Isle en Flandres, & ses gens qu'il auoit laissez audit lieu de Paris au plustost qu'ils peurent ayant tresgrand honte d'estre arrestez & prins le suiurent. Et pareillement Rollet d'Autonuille & ses complices leurs vestemens changez & desguisez, se departirent de Paris par diuers lieux. Et tous ensemble s'en allerent loger dedans le chastel de Lens en Arthois par l'ordonance du Duc Iean de Bourgogne leur maistre & seigneur. Ainsi & par telle maniere se departit iceluy Duc apres la mort dudit Duc d'Orleans de la ville de Paris à petite cõpaignie. Et laissa en icelle ville la seigneurie de Frâce en grand tristesse & desplaisance. Toutesfois ceux de l'hostel dudit Duc d'Orleans mort, quãd ils ouyrēt le secret partemēt dudit Duc de Bourgogne, s'armerent iusques au nōbre de six vingts hommes d'armes: desquels estoit l'vn des principaux messire Clugnet de Brabant, & eux mōtez à cheual issirent de Paris pour suiur ledit Duc de Bourgogne à intention de le mettre à mort s'ils l'eussent peu attaindre, mais à ce faire leur fut par le Roy Loys deffendu. Et pour icelle cause s'en retournerent grandement courrouceez à leurs hostels. Si fut alors par toute la ville de Paris denoncé & tout commun que ledit Duc de Bourgogne auoit fait faire cest homicide. Et adoncques le peuple de la ville de Paris, lequel n'estoit pas bien content dudit Duc d'Orleans pource qu'ils entendoient que par ses moyens les tailles & tous autres subsides s'entretenoient, commencerent à dire l'vn à l'autre en secret le baston nentilleux est plané. Ceste douloureuse mort fut l'année du grand hyuer en l'an mille quatre cens & sept, & dura la gelée lxxvj. iours en vn tenant très tẽrible. Et tant qu'au desge-



ler le neuf pont de Paris si fut abbattu en Seine, & moult feirent icelles eaües & gelées de grans dōmages en plusieurs & diuerses contrées au Royaume de France. Et quand est à parler des discords & haynes ou enuies qu'auoient l'un contre l'autre les Ducs d'Orleans & de Bourgongne par auant la mort d'iceluy Duc d'Orleans, ne des manieres qui auoient esté tenues par iceux, n'est ja besoing d'en faire en ce present chapitre recitation, pource qu'il sera tout au lōg & plus à plain declairé ens es propositions qui pour ce furent faictes dedans brief tēps apres ensuiuant. C'est à sçauoir par iustification que fait proposer le Duc de Bourgongne haut & publicquement, presens plusieurs Princes & autres notables personnes tant d'Eglise comme seculiers: & les accusations pourquoy il disoit & aduoüoit d'auoir fait mettre à mort ledit Duc d'Orleans. Et pareillement par les responce que depuis en fait faire & proposer la Duchesse d'Orleāz doiüagiere & ses enfans pour les excusations de son feu mary: desquelles propositions les copies seront mises & escrites en ce present liure tout ainsi & par la maniere qu'elles furēt proposées, presens tout le conseil royal & autres gens de plusieurs estats en tresgrād multitude.

*Comment la Duchesse d'Orleans & son fils maisné vindrent à Paris deuers le Roy, pour faire plainte de la piteuse mort de son feu seigneur & mary. CHAP. XXXVII.*

**L**Oÿs Duc d'Orleans deffunct auoit espousée la fille de Galliace Duc de Millan, qui estoit sa propre cousine germaine, de laquelle il delaissa trois fils. C'est à sçauoir Charles le premier né, lequel fut nommé Duc d'Orleans apres la mort de son pere. Le second si fut nōmé Philippe, & fut Comte de Vertus. Et le tiers auoit nom Iean, & fut Comte d'Angoulesme, & si auoit vne fille qui depuis fut mariée à Richard de Bretagne: desquels Princes sera cy apres declairé vne partie de leur gouuernement, & quelle fortunes ils eurent en leurs temps. Or est verité que le dixiesme iour de Decembre prochain ensuiuant, vint à la Duchesse d'Orleans veufue dudit Duc à Paris Iean son fils maisné avec la Roïne d'Angleterre femme de son fils premier né, fille du Roy de France en sa compaignie: encontre laquelle allerent hors de Paris à l'encōtre d'elle le Roy Loÿs, le Duc de Berry, le Duc de Bourbon, le Comte de Clermont, le Comte de Vandomme, messire Charles d'Albreth Cōestable de France. Avec lesquels & plusieurs autres seigneurs elle entra dedans Paris honnorablement, & en grande quantité de gens & de cheuaux. A l'hostel de S. Pol s'en alla où le Roy estoit, & là eut audience & presentement deuant le Roy se meit à genoulx faisant trespiteuse cōplaincte de la tresinhumaine mort de son seigneur & mary. Laquelle finée le Roy qui estoit assez sentieux pour lors, & estoit releué nouuellement de sa maladie la baissa, & en plorant la leua & luy dit que de sa requeste il en feroit selon l'opiniō de son conseil. Et elle ouÿ ceste responce, s'en retourna en son hostel accompagnée des seigneurs dessusdits. Et le lundy ensuiuant le Roy de France par le conseil de Parlement retraict à sa table la Comté de Dreuvves, le Chastel Thierry, le Mont d'Arcuelles & toutes lesdictes terres que le Roy autresfois luy auoit données sa vie durant tant seullement. Et le mercredy ensuiuant iour sainct Thomas la Duchesse d'Orleans, son fils maisné dessusdit, la

Roïne



Royne d'Angleterre sa fille, son Chancelier d'Orleans & autres de son conseil avec plusieurs cheualiers & escuyers iadis de l'hostel de son mary, tous vestus de noir vindrēt à l'hostel de S. Pol, pour parler au Roy & là trouuerēt le Roy Loys, le Duc de Berry & le Duc de Bourbon, le Chancelier de France & plusieurs autres qui pour elle demanderent audience au Roy de parler à luy, & presentemēt l'obtindrent. Elle donc amenée du Comte d'Alençon & autres par le commandement, & en la presence des autres Princes tantost tresfort plorant audit Roy, supplia de rechief qu'il luy pleust à elle faire iustice de ceux qui traistreusement auoiēt meurdry son seigneur & mary Loys iadis Duc d'Orleans: & toute la maniere fait l'a declairer à la personne du Roy par vn sien aduocat de Parlement, & là estoit ledit Chancelier d'Orleans empres ladicte Duchesse, lequel disoit audit aduocat mot apres autre ce qu'elle vouloit qui fut diuulgué. Et fait exposer tout au long ledit homicide commēt il fut espié, à quelle heure & la place où il estoit quand il fut trahy & enuoyé querre d'aguet à pens, luy donnant à entendre que son seigneur & frere le Roy le mandoit: lequel meurdre deuantdit touchoit audit Roy plus qu'à nulle autre personne. Et conclud ledit Aduocat de par ladicte Duchesse, que le Roy estoit tenu sur toutes choses de venger la mort de son frere: & à icelle Duchesse ses enfans, qui sont ses nepueux faire bonne & briefue iustice tant pour la prochaineté du sang, comme pour la souueraineté de sa majesté royale. Auquel propos le Chancelier de France qui seoit aux pieds du Roy par le conseil des Ducs & seigneurs royaux là estans, respōdit & dit, que le Roy pour l'homicide & mort de son frere à luy ainsi exposée & plustost qu'il pourroit en feroit bonne & briefue iustice. Apres laquelle responce faicte par ledit Chancelier, le Roy dit de sa bouche: à tous soit notoire que le fait à nous exposé cy en present nous touche comme de nostre seul frere, & le reputons à nous estre fait. Et adonc ladicte Duchesse, Iean son fils & la Royne d'Angleterre sa belle fille tous ensemble se iecterent aux pieds du Roy à genoulx & en grans pleurs luy requirent, qu'il eut souuenāce de faire bonne iustice de la mort de son seul frere, lequel Roy les leua & en les baissant de rechief promet d'en faire bonne iustice & leur assigna iour dedans lequel il le feroit. Et apres ces parolles prindrent congé & retournerent en l'hostel d'Orleans: le second iour ensuiuant le Roy de France demourant en son palais, vint en la chambre de Parlement qui estoit noblement preparée, & feist de sa personné en siege royal. Auquel lieu en la presence de ses Ducs & Princes royaux avec plusieurs nobles, le clergié & le peuple par bō conseil fait vn edict & ordonna, que sil aduenoit qu'il mourut deuant que le Duc d'Acquitaine fut en aage legitime: nonobstant ce il vouloit que le Royaume il gouuernast & eut le regime, moyennant qu'en son nom & pour luy de cy adonc qu'il auroit son aage les trois estats dudit royaume gouuerneront. Et sil aduenoit que sondit premier fils mourut deuant son aage, il vouloit que son second fils le Duc de Touraine en ce droit succedast. Et pareillement se le Duc de Touraine mouroit, veut q son tiers fils gouuerne ledit royaume, par si cōme dit est: & que tant que l'un d'iceux fils venront en aage les trois estats gouuerneront en son nom se le cas aduenoit. Lesquelles ordonnances les deuantdits Princes royaux avec tout le conseil confermerent, & l'eurent pour agreable, & le iij. iour de Ianuier la dessusdicte Duchesse d'Orleans releua pour elle & pour ses enfans la Cō-



té de Vertus, & toutes les autres seigneuries que iadis tenoit son feu mary. Et en fait serment & fidelité à la personne du Roy. Et apres qu'elle eut prins congé dedans aucuns brieves iours ensuiuans, se departit de Paris avec tout son estat & s'en retourna à Blois.

*Comment le Duc Jean de Bourgongne fait grand assemblée à l'Isle en Flandres pour auoir conseil sur la mort du Duc d'Orleans, & alla à Amiens & à Paris.*

## CHAP. XXXVIII.

**Q**R est ainsi que le Duc Jean de Bourgongne lors estant à l'Isle en Flandres, fait euocquer à venir deuers luy tous les nobles, les clerks & autres de son conseil pour auoir aduis sur la mort du dessusdit Duc d'Orleans, dont dessus est faicte mention: desquels hommes de conseil fut tresgrandement reconforté: & de là s'en alla à Gand où estoit la Duchesse sa femme, & manda les trois estats du pays de Flandres, auxquels il fait remontrer par maistre Jean de la Sance son conseil publicquement, comment à Paris il auoit fait occire Loys Duc d'Orleans, & la cause pourquoy il l'auoit fait tout par article au peuple le fait diuulguer: & la copie à tous ceux qui le vouloient auoir par escrit le commanda à bailler: pour lequel faict il pria qu'on luy voulust faire ayde à tous besoings qui luy pourroient suruenir, à quoy luy fut respondu des Flamens que tres volentiers ayde luy feroient. Et pareillement ceux de l'Isle, de Doüay: & les Artisiens oyans la cause de ceste mort & la requeste qu'il faisoit premierement de luy faire ayde contre tous ceux à qui il pourroit auoir à faire, excepté la personne du Roy & ses enfans: & estoient lesdits articles qu'il fait proposer contre ledit Duc d'Orleans tels ou assez pareils que maistre Jean Petit proposa à Paris par l'ordonnance & commandement dudit Duc present le conseil royal: de laquelle proposition il sera plus à plain faicte mention. En ouquel temps le Roy Loys & le Duc de Berry enuoyerent leurs messagiers portans leurs lettres en la ville de l'Isle deuers le Duc de Bourgongne, qui là estoit retourné: par lesquelles luy requeroient bien acertes, qu'il voulust estre à l'encôtre d'eux en la ville d'Amiens à certain iour: lesquels luy firent assçauoir pour là eux assembler parler, & auoir cōseil sur le fait de la mort dudit d'Orleans. Ausquels messagiers fut respōdu & promis par ledit Duc de Bourgongne d'y aller. Et pour ceste cause à ceux de Flandres & d'Arthois il pria qu'en ayde on luy prestast certaine somme d'argent, laquelle luy fut accordée: Et apres fait grand assemblée & preparation. Et le iour du parlement approchant ses deux freres en sa compagnie: Est à sçauoir le Duc de Brabant & le Comte de Namur & plusieurs autres iusques à trois mille tresbien armez avec plusieurs hommes de conseil, d'Arras alla à Corbie, & de là au iour qui luy estoit assigné, se tira en la ville d'Amiēs & se logea en l'hostel d'un bourgeois nommé Iacques de Hanghart: auquel hostel ledit Duc fait peindre dessus l'huis par dehors deux lances, dont l'une si auoit fer de guerre, & l'autre si auoit fer de rochet. Pourquoy fut dit de plusieurs nobles estans à icelle assemblée que ledit Duc les y auoit fait mettre en signifiante que qui voudroit auoir à luy paix ou guerre, si le prenist: Si faisoit adoncques tres diuers temps & duroient encores les grans neiges, pourquoy le Roy Loys, & le Duc de Berry partans de Paris enuiron à tout deux cens cheuaux auoient plusieurs



plusieurs paÿsans qui descouuroient les chemins de ladicte neige à tout instrumens tous propices à ce faire. Et vindrent audit lieu d'Amiens au iour qui estoit assigné, à l'encontre desquels issit ledit Duc de Bourgogne & ses deux freres grandement accompaignez pour eux honorer, si feirent l'un à l'autre grand reuerence. Et apres se logea ledit Roy Loÿs à l'hostel de l'Euesque & le Duc de Berry lez Iumeaux. Et entre-temps le Duc de Bourbon avecques luy son fils Iean Comte de Cleremont de la mort de son nepueu & du Duc Loÿs d'Orleans triste & dolent de Paris se departit, & s'en retourna en sa Duché de Bourbon. Et ainsi comme les deuantdits seigneurs estoient venuz à Amiens (comme dit est) avecques le grand conseil du Roy pour tendre affin qu'ils peussent trouuer vn appoinctement raisonnable de paix pour le bien des deux parties : à sçauoir d'Orleans & de Bourgogne, & principalement pour le bien du Roy & de son Royaume, ne le peurent trouuer : car alors le Duc Iean de Bourgogne estoit par telle maniere en son propos obstiné, que nullement pardon au Roy de ce ne vouloit demander ne remission querre. Ainçois luy sembloit que ledit Roy & son conseil le deuoient grandement auoir pour recommandé pour icelle besongne auoir faicte. Et pour soubstenir ceste matiere auoit avecques luy trois maistres en Theologie de grand fame & renommée de l'vniuersité de Paris, est à sçauoir maistre Iean Petit, qui depuis proposa pour luy à Paris & deux autres, lesquels dirent publicquement deuant les Princes & conseil royal estans audit lieu d'Amiens, que chose licite si auoit esté au Duc de Bourgogne de faire ce qu'il auoit fait audit Duc d'Orleans, disant outre, que s'il ne l'eut fait, tresgrandement il eut peché, & en ce soubstenir contre tous disans le contraire, estoient prests & appareillez. Toutesfois apres ce que les parties eurent debattu par plusieurs iours lesdictes matieres, & qu'ils ne peurent venir à conclusion telle que ceux qui estoient venuz de par le Roy le desiroient, est à sçauoir de paix, & que le conseil fut finé, se departirent apres ce qu'ils eurent signifié audit Duc de Bourgogne de par le Roy de France que point n'allast deuers luy à Paris s'il n'y estoit mandé, & s'en retournerent audit lieu de Paris. Neantmoins le dessusdit Duc de Bourgogne ne leur voulut pas accorder de non pas y aller, mais leur dit plainement que son intention estoit de au plus brief qu'il pourroit, aller faire ses accusations audit lieu de Paris deuers le Roy. Et le lendemain du partement des seigneurs deuantdits, ledit Duc de Bourgogne avecques ses deux freres & ceux qui l'auoient amené, s'en retourna en sa ville d'Arras, reserué le Comte Vvaleran de saint Pol, qui apres son partement demoura bien six iours audit lieu d'Amiens. Et quand le Roy Loÿs, le Duc de Berry & les autres seigneurs du conseil du Roy furent retournez (comme dit est) à Paris & qu'ils eurent faicte leur relation en la presence du Roy, & de plusieurs seigneurs Princes & du grand conseil : & remonstré bien au long les responce qu'auoit fait ledit Duc de Bourgogne, & comment il luy sembloit que le Roy estoit grandement tenu de le remunerer en plusieurs manieres pour la mort & homicide qu'il auoit fait faire en la personne du Duc d'Orleans, ne le prindrent pas bien en gré, & leur sembla estre grans merueilles & grand presumption faicte par ledit Duc de Bourgogne. Si en fut parlé en diuerses manieres. Et par especial ceux qui tenoient la partie d'Orleans : & leur



sembloit que hastiuement le Roy deuoit assembler toute sa puissance pour le subiuguer, & en faire iustice selon le cas. Les autres tenans la partie du Duc de Bourgongne estoient de contraire opinion, & leur sembloit qu'en ce il auoit fait grand seruice au Roy & à sa generatiō, & par especial la plus grand & la plus forte partie des Parisiens estoient pour le Duc de Bourgongne en l'aymant tresfort. Et la cause pourquoy ils estoient ainsi affectez à luy, c'estoit pource qu'ils esperoient que par son moyen & pourchas, les tailles & autres subsides qui couroient au Royaume de France seroient mises ius, & que ledit Duc d'Orleans tout son viuant auoit esté cause de les entretenir pource qu'il en auoit grand proffit en sa part. Et apres iceluy Duc de Bourgogne s'en alla en son pays de Flandres & manda tresgrand nombre de grans seigneurs & de ses subiets & gēs d'armes pour aller avec luy à Paris deuers le Roy de France, jaçoit-ce que le Roy Loys & le Duc de Berry luy auoient dit & deffendu de par le Roy qu'il n'y retournast point iusques à tant qu'il luy seroit mandé, mais pourtāt ne s'en voulut deporter. Ainçois par plusieurs iournées se tira en la ville de saint Denys en France. Auquel lieu le vindrent visiter le Roy Loys, le Duc de Berry, le Duc de Bretagne & plusieurs autres du grand conseil qui de rechief luy dirent de par le Roy que puis qu'il ne se pouoit tenir d'aller à Paris en personne, au moins il n'y entraist qu'à tout deux cens hommes. Et pource ledit Duc de Bourgongne se departit de S. Denys, le Comte de Neuers son frere le Comte de Cleues, son beau fils en sa compagnie, & s'y estoit le Duc de Lorraine qui l'accompaignoit, & tous ensemble tresbien armez à grand quantité de gens, entra ledit Duc dedans Paris sur intention de iustifier son fait & sa querelle tant enuers le Roy & enuers tous autres qu'on ne luy sçauoit que demander. A l'entrée duquel fut demené tresgrande ioye par les Parisiens, & mesmemēt les petis enfans en plusieurs carrefours à haulte voix crioient Noël, dont il despleut grandement à la Roine de France & à plusieurs autres Princes estans audit lieu de Paris & s'en alla descendre en son hostel d'Arthois. Et pour vray, comme dit est dessus, il estoit tresfort aymé du commun peuple de Paris & auoient grand esperance qu'iceluy Duc eust tresgrand affection au Royaume & à la chose publique. Et pourtant sur tous les autres Princes du sang Royal estoit aymé & loué & auoient souuenance des grans tailles qui auoient esté mises sus depuis la mort du Duc Philippe de Bourgongne pere d'iceluy iusques à l'heure presente lesquelles ils entendoient que feust par le moyen dudit Duc d'Orleans. Et pource estoit grandement encouru en l'indignation d'iceluy peuple & leur sembloit que Dieu de sa grace les auoit tresgrandement pour recommandez quand il auoit souffert qu'ils fussent hors de sa subiection & gouuernement & qu'ils en estoient deliurez, mais ils n'auoient pas bien regard & consideration à ce que depuis leur en aduint & à tout le Royaume de France generally. En outre apres que ledit Duc de Bourgongne eut par aucuns iours esté en la ville de Paris & qu'il sceut par ceux qui estoient à luy fauorables comment il se auroit à conduire & gouuerner il trouua moyen d'auoir audience enuers le Roy & tous les Princes là estans, le clergé & le peuple & print iour de faire proposer & declairer sa iustification pour la mort & homicide qu'il auoit fait faire sur la personne du Duc Loys d'Orleās defunct. Auquel lieu il alla tresbiē armé en personne, & les Princes & autres seignrs qu'il



qu'il auoit menez avec luy en grand nombre de Parisiens qui l'accôpagnerent, & entre-temps qu'il fut audit lieu de Paris estoient tousiours tres-bien armez dôt les autres Princes & tout le conseil Royal estoient moult esmerueillez, & n'osoient bonnement faire ne dire chose qui luy fust desagrecable: pource principalement que ledit peuple estoit ainsi affecté sur luy, & qu'il se tenoit fort garny de gés de guerre, & estoit tousiours fort accompagné en son hostel: car il feist loger aupres d'iceluy tous ceux qu'il auoit amenez ou aumoins la plus grand partie. Et mesmement feist faire en ces propres iours à puissance d'ouuriers vne forte chambre de pierre bien taillée en maniere d'une tour, dedans laquelle il se couchoit par nuit. Et estoit ladite chambre fort aduantageuse pour luy garder: de laquelle iustification dudit Duc de Bourgongne la teneur s'ensuit cy apres, & sera declaré mot apres l'autre iour & qui la proposée.

*Comment le Duc Iean de Bourgongne feist proposer deuant le Roy & son grand conseil ses excusations sur la mort du dessusdit Duc d'Orleans. CHAP. XXXIX.*

**L**E viij. iour de Mars l'an mil cccc. & sept le Duc Iean de Bourgongne feist proposer à Paris en l'hostel de saint Pol par la bouche de maistre Iean Petit docteur en Theologie la iustification d'iceluy Duc Iean sur la mort n'agueres faite du Duc Loys d'Orleans: Et estoit present en estat Royal le Duc de Guyenne Daulphin de Viennois aîné fils & heritier du Roy de France, le Roy de Cecille, le Cardinal de Bar, les Ducs de Berry, de Bretagne & de Lorraine avec plusieurs Comtes, Barons, Cheualiers & Escuyers de diuers païs, le Recteur de l'Vniuersité accompagné de grand nombre de docteurs & autres clerics & tresgrand multitude de bourgeois & peuple de tous estats, de laquelle proposition la teneur s'ensuit. Premier dist ledit Iean Petit comment par deuers la tresnoble & tres-haulte maiesté Royale venoit comme tres-vray obeissant à son Roy & souuerain seigneur ledit Duc de Bourgongne Comte de Flandres, d'Artois & de Bourgogne deux fois Pair de France & Doyen des Pairs en grand humilité pour luy faire reuerence & toute obeissance comme il estoit tenu & obligé de faire par quatre obligations que mettent communement les Docteurs en Theologie, de droit Canon, & Ciuil. Desquelles obligations la premiere est. *Proximi ad proximum qua quisque tenetur proximum non offendere. Secunda est cognatorum ad illos quorum de genere geniti vel procreati sunt. qua tenetur parentes suos non solum non offendere sed etiam deffendere verbo & facto. Tertia est vassalorum ad dominum qua tenentur non solum non offendere dominum suum sed deffendere verbo & facto. Quarta est non solum non offendere dominum suum sed etiam principis iniurias vindicare.* Or est mondit seigneur de Bourgongne bon catholique & loyal preudhomme seigneur de bonne vie & en la foy de la chrestienté, & est proëme du Roy pourquoy est tenu de l'aymer comme soy mesmes & soy garder de luy faire aucune offence. Item il est son parent yssu de sa lignée si prochain comme son cousin germain, parquoy est obligé non pas tant seulement à soy garder de luy faire offence, mais à tout le moins le doibt deffendre par parole contre tous ceux qui luy feroient iniure. Tiercement il est son vassal, & pource par la tierce obligation il n'est pas tant seulement tenu de le garder par parole, mais avec ce de faict & de toute sa puissance. Quartement il est son subiect par-



quoy par la quarte obligation qui ensuit les trois obligations deuantdites il n'est pas tant seulement tenu de le garder de sa parolle & de fait contre ses ennemis. Mais est tenu avec ce de le venger de ceux qui luy font iniures, ou qui luy ont fait faire, ou voudroient machiner & ont machiné à faire ou cas qu'il viendrait en sa cognoissance. Et encores outre il est obligé à sa tresnoble & tres-haute maiesté royale par plusieurs autres obligatiōs que par les quatre dessusdites. Pour ce qu'il a receu & reçoit de iour en iour tant de biens & d'honneurs de ladicte maiesté & magnificence: non pas seulement comme son proësme, parent, vassal & subiect comme dit est, mais comme son tres-humble cheualier, Duc, Comte & Pair de France. Et non pas Pair de France deux fois, mais Doyen des Pairs qui est la premiere prerogative de seigneurie, noblesse & dignité qui soit en ce royaume apres la couronne. Et qui plus est le Roy luy a fait si grand honneur & montré si grand signe d'amour & d'amitié qu'il l'a faict pere en loy de mariage de tres-noble & tres-puissant seigneur monseigneur le Duc de Guyenne Daulphin de Viennois son aîné fils & heritier d'une part & l'aînée fille de môdit seigneur d'autre part. Et aussi madame Michelle de France & du seul fils de mondit seigneur de Bourgongne. Et comme dit monseigneur saint Gregoire. *Cum crescant dona & rationes donorum.* Il est obligé entre les autres mortels à le garder, deffendre, venger de toutes iniures à son pouoir. Et fil a bien recogneu, reconnoist & reconnoistra (se Dieu plaist) & aura en son cueur memoire des obligations dessusdites qui sont douze en nombre. C'est à sçavoir proësme, parent, vassal, subiect & Baron, Comte, Duc, Pair, Comte, Pair Duc & Doyen des Pairs, & les deux mariages. Ce sont douze obligations par lesquelles il est obligé l'aymer, servir, obeir & porter reuerence, honneur & obeissance, le deffendre de tous ses ennemis & non pas seulement deffendre, mais le venger & en prendre vengeance. Et avec ce, Prince de tresnoble memoire feu monseigneur de Bourgongne son pere luy commanda au liêt de la mort que sur toutes choses apres le salut de son ame il mist tout son cueur, volenté, courage, corps & puissance en exposant tāt qu'il viuerait à garder loyaument la personne du Roy, ses enfans & sa couronne: Car il se doubtoit tresgrandement que ses aduersaires machinoiēt à luy tollir sa couronne, & auoit tresgrande paour qu'ils ne fussent plus forts apres son trespas que luy vivant. Et pource voulut obliger au liêt de sa mort par commandement paternel ses enfans à resister à lencontre. Et n'est pas à oublier la tresgrand loyauté de mon tresredoubté seigneur monseigneur le Duc de Berry & du vaillant seigneur trespasé qui si loyaument, tant doucement, tant seurement & si sagement garderent, nourrirent & gouvernerent, que oncques vne seule imagination de souspeçon mauuaise ne fut pensée ne dite contre leurs personnes. Pourquoy ces choses dessusdites considerées mondit seigneur de Bourgongne ne pourroit auoir en ce monde greigneur douleur en son cueur ne greigneur ne plus grand desplaisir que de faire chose où le Roy peult prendre desplaisance enuers luy du faict adueni en la personne du feu le Duc d'Orleans derrain trespasé. Lequel faict a esté perpetré pour le tresgrand bien de la personne du Roy, de ses enfans & de tout le royaume comme il sera cy apres montré & déclaré tant & si auant qu'il en deura bien suffire. Il supplie tres-humblement au Roy d'oster de luy toute sa desplaisance de son tresnoble courage se aucune aduient à lencontre de sa  
personne



personne par l'introduction dessusdite ou autrement, & que le Roy luy vueille  
 monstrer doulceur & benignité & le tenir en amour comme son loyal vassal &  
 subiect & cousin prochain comme il est, attendu plusieurs causes iustes & veri-  
 tables, que ie diray apres pour la iustification de mondit seigneur de Bourgon-  
 gne de laquelle il m'a chargé par commandement si expres que ie ne l'ay oïe au-  
 cunement esconduire pour deux causes cy apres declarées. La premiere est que  
 ie suis obligé à le seruir par serment à luy faict il y a trois ans passez : la seconde  
 que luy regardant que i'estoye trespetitement beneficié m'a donné chascun an  
 bonne & grande pension pour moy aider à tenir aux escolles. De laquelle pen-  
 sion i'ay trouué vne grand partie de mes despens & trouueray encores s'il luy  
 plaist de sa grace. Mais quand ie considere la tresgrande matiere dont i'ay à par-  
 ler & la grandeur des personnes dont il me conuiendra & fauldra toucher en si  
 trefnoble & solennelle compagnie comme il y a icy. Et d'autre part que ie me re-  
 garde & me treuve de petit sens, poure de memoire & foible d'engin & trefmal  
 aourné de langage vne tresgrand paour me fiert au cueur voire si grand que mō  
 engin & ma memoire s'en fuit & peu de sens que ie cuidoye auoir m'a ja du tout  
 laissé. Si ne voy autre remede fors de moy recommander à Dieu mon createur  
 & redempteur, à sa tresglorieuse mere, à monseigneur saint Iean l'Euangeliste le  
 maistre & prince des Theologiens qu'ils me vueillent enseigner, conduire, &  
 garder de mal faire & de mal dire, en ensuyuant le conseil de monseigneur saint  
 Augustin qui dit. *Libro quarto de doctrina Christiana circa finem, Siue apud populū, vel  
 apud quoslibet iam iamque dicturus, siue quod apud populum dicendum vel ab eis qui vo-  
 luerint aut potuerint legendum est dictaturus, oret ut Deus sermonem bonum det in os eius.  
 Si enim regina Hester orauit pro sua gentis salute temporali locutura apud regem ut in os  
 eius Deus congruum sermonem daret, quantomagis orare debet: ut tale munus accipiat qui  
 pro aeterna hominum salute in verbo & doctrina laborat, &c.* C'est à dire que pource  
 que ceste matiere est tref-haulte & perilleuse & qu'il n'appartient pas à homme  
 de si petit estat comme ie suis d'en parler voire de mouuoir les leures pour parler  
 en si trefnoble & solennelle compagnie qu'il y a icy. Je vous supplie tref-hum-  
 blement mes trefredoubtez seigneurs & à toute la compagnie si ie dy aucune  
 chose qui ne soit bien dicte qu'il me soit pardonné & attribué à ma simplese &  
 ignorance & non point à malice. Car l'Apostolle dit : *Ignorans feci: ideoque miseri-  
 cordiam consecutus sum.* Car ie n'oseroye parler de ceste matiere ne dire les choses  
 qui me sont enchargées se ce n'estoit par le commandement de mondit seigneur  
 de Bourgongne. Apres ce ie proteste que ie n'entens à iniurier quelque personne  
 que ce soit ou puiſt estre, soit vif ou trespasſé. Et s'il aduient que ie die aucunes pa-  
 rolles sentans iniures pour & ou nom de mondit seigneur de Bourgongne & par  
 son commandement ie prie qu'on m'ait pour excusé entant qu'elles sont à sa iu-  
 stification & non autrement. Mais on me pourroit faire vne question disant qu'il  
 n'appartient pas à vn Theologien de faire ladite iustification & qu'il appartient à  
 vn iuriste. Je respons que nullement n'appartient à moy qui ne suis ne iuriste ne  
 Theologien : mais pour satisfaire aux parlans, ie respons à la question se i'estoye  
 Theologien il me pourroit bien appartenir, attendu vne consideration que i'ay  
 en ceste matiere, c'est à ſcauoir que tout docteur en theologie est tenu de labou-  
 rer à excuser & iustifier son maistre & son seigneur luy garder & deffendre son



honneur & bonne renommée entant comme la verité se peult estendre, mesme-  
ment quand sondit seigneur est bon & loyal & n'a de riens mesprins. Je preuue  
ceste consideration estre vraye, car c'est l'office des maistres Docteurs en Theo-  
logie de prescher & dire verité en temps & en lieu. Et pourtant ils sont appelez.  
*Legis diuinae professores quia inter omnes alios doctores ipsi magis tenentur profiteri veri-  
tatem.* Et sil aduient qu'ils meurent pour dire verité, ils sont adonc vrais martyrs:  
ce n'est donc pas merueilles se à mondit seigneur qui m'a nourry en l'estude &  
nourrira se Dieu plaist, i'ay à luy presté ma poure langue à pronocer & dire icel-  
le iustification. Car se oncques il fust lieu & temps de prescher & dire la iustifica-  
tion de loyauté de mondit seigneur de Bourgongne il en est temps & lieu &  
ceux qui m'en sçauoient mauuai: gré feroient grand peché ce me semble, mais  
de ce me deueroit tout homme de raison tenir pour excusé. Et en esperance que  
nul ne m'en sçaura mauuais gré de ladicte iustification prononcer & dire, pour  
ce diray ceste auctorité de monseigneur saint Pol.

### De Couuoitise.

*Radix omnium malorum cupiditas, quam quidem appetentes errauerūt à fide. i. Tim. 6.*  
Laquelle parolle peult estre en françois ainsi mise. Dame couuoitise est de tous  
maux la racine puis qu'on est en ses lacs & on tient sa doctrine: apostats elle a fait  
aucuns tant l'ont aymée les autres desloyaux, bien est chose damnée. Ceste pa-  
rolle, proposée tient en soy trois choses. La premiere est que couuoitise est de  
tous maux la racine à ceux qu'elle tient en ses lacs. La secōde qu'elle a fait aucuns  
apostats, c'est à sçauoir renier la foy catholique & ydolatrer. La tierce est qu'elle a  
fait les autres traistres & desloyaux à leurs Rois, Princes, & souuerains seigneurs  
& pource que ie pense à declarer ces trois choses dessusdictes qui me seront vne  
maior, & apres ladite maior ioindre à vne minor pour parfaire ladicte iustifica-  
tion de mondit seigneur de Bourgongne. Je puis faire deux parties en mon pro-  
pos. La premiere partie sera de madicte maior. Et la seconde partie de madicte  
minor. La premiere partie contiendra quatre autres. La premiere partie declare-  
ra la premiere chose touchée en mon theme. La seconde la seconde, la tierce la  
tierce. Et l'autre quart article ie pense à y mettre aucunes veritez pour mieux fon-  
der ladicte iustification de mondit seigneur de Bourgongne. Pour le premier ar-  
ticle declarer c'est à sçauoir que couuoitise est de tous maux la racine. Je respons  
à vne instance qu'on y peult faire au contraire de ladicte parolle. La sainte escri-  
ture dit ainsi. *Initium omnis peccati superbia. Ecclesiastici x. Ergo non est cupiditas radix  
omnium malorum.* Puis que sainte Eglise dit qu'orgueil est commencement de  
tout peché, couuoitise n'est pas la racine de tous maux & pechez, & ainsi sem-  
ble que ladicte parolle de saint Pol n'est pas vraye. A ce ie respons par auctorité  
de monseigneur saint Iean l'Euangeliste qui dit ainsi. *Nolite diligere mundum nec  
ea quæ in eo sunt. Si quis diligit mundum, non est charitas patris in eo: quoniam omne quod  
est in mundo aut est concupiscentia carnis, aut oculorum, aut superbia vitæ, quæ non est ex  
patre sed mundo: & mundus transibit & concupiscentia carnis. Sed qui facit voluntatem  
Dei uiuet in æternum.* C'est à dire, ne vueillez point aymer le monde, ne mettre vo-  
stre plaisir, amour ne felicité és choses mondaines: car en ce monde n'a autre cho-  
se fors concupiscence & couuoitise de delectation charnelle, couuoitise de ri-  
chesse



cheste mondaine & couuoitise d'honneur vaine qui ne sont point données de par Dieu le pere. Mais sont choses mondaines & transitoires. Et toutesfois le monde fine & sa couuoitise avec luy, mais celuy qui fait le vouloir de Dieu, il viura tousiours en gloire pardurablement avec luy. Ainsi appert clairement par cest article de saint Iean qu'il est trois manieres de couuoitise qui enclouent en eux tous pechez: C'est à sçauoir couuoitise d'honneur vaine, couuoitise de richesse mondaine & couuoitise de delectation charnelle, & ainsi prenoit l'Apostre couuoitise en la parolle proferée quand il disoit. *Radix omnium malorum cupiditas.* A entendre couuoitise aux trois manieres dessusdites & touchées par saint Iean l'Euangeliste, dont la premiere est couuoitise d'honneur vaine qui n'est autre chose que mauuaise concupiscence & volenté desordonnée de tollir à autrui son honneur & seigneurie. Et ceste couuoitise est appelée en l'auctorité saint Iean dessusdicte, *Superbia vita*, & enclost en soy tous ces vices: C'est à sçauoir orgueil, toute vaine gloire, toute ire: haine & enuie: car quand celuy qui est espris & embrasé de couuoitise ne peult accomplir sa volenté desordonnée, il se courrousse contre Dieu & contre ceux qui l'empeschent & commet le peché d'ire. Et tantost conçoit enuers celuy qui tient ladicte seigneurie si grand haine & enuie qu'il se met à machiner sa mort. La seconde couuoitise est appelée couuoitise de richesse mondaine, qui n'est autre chose que concupiscence & volenté desordonnée de tollir à autrui ses biens meubles & immeubles. Et ceste couuoitise est appelée par ledict Euangeliste *Cōcupiscentia oculorum*, & enclost en soy toute vsure, auarice & rapine. La tierce couuoitise qui est appelée *Concupiscentia carnis*, N'est autre chose que concupiscence & desirs desordonnez de delectation charnelle qui aucunesfois est paresse: comme d'un moine ou autre religieux qui ne s'endure à leuer pour aller à matines pource qu'il est plus aise en son liét. Aucunes fois en gloutonnie comme celuy qui prend trop de viandes & de vins pource qu'ils luy semblent doux à la langue, & à sauouer delectables. Aucunesfois en luxure & plusieurs manieres qui ne fault ja declarer. Ainsi appert clairement estre vray mon premier article ou ie disoye que couuoitise est cause & racine de tous maux en le prenant ainsi comme le prenoit l'Apostre quand il disoit: *Radix omnium malorum cupiditas: & hoc de primo articulo huius primæ partis.* Pour entrer en la matiere du second article de madiete maior ie mets vne supposition & suppose pour verité que c'est vn des grans pechez qui soit ou puisse estre que crime de leze maiesté royalle la cause si est. Car c'est la plus noble chose & la plus digne qui puist estre que maiesté royalle. Pource on ne peult faire plusgrand peché, ne plusgrand crime que d'iniurier maiesté royalle. Et selon ce que le crime est plus grand, l'iniure est plus grande & faict plus à punir. Pourquoy il est à sçauoir qu'il est deux manieres de maiestez royaux: L'une est diuine & perpetuelle, & l'autre est humaine & temporelle. Et à proportionnablement parler ie trouue deux manieres de crime de leze maiesté. La premiere est crime de leze maiesté diuine, & la seconde est crime de leze maiesté humaine. Item est à sçauoir que crime de leze maiesté diuine se part en deux degrez. Le premier est quand on faict directement iniure au souuerain Roy qui est nostre souuerain Dieu & createur, comme font ceux qui font crime de heresie ou d'idolatrie. La seconde est quand on faict iniures directement contre l'espouse de nostre souuerain Roy & seigneur Iesus



Christ : c'est à sçauoir saincte Eglise . Et est quand on cōmet peché de scisme ou diuision à ladicte Eglise . Ainsi veux-ie dire que les hereticques & les idolatres commettent crime de leze majesté diuine en premier degré & scismatique en second degré . Item il est à sçauoir que crime de leze majesté humaine se part en quatre degrez . Le premier est quand l'iniure est directemēt faicte contre la personne du Prince . Le second est quand l'iniure ou offence est directement faicte cōtre la personne de son espouse . Le tiers degré est quand elle est faicte directemēt contre la personne de ses enfans . Le quart est quād elle est directemēt faicte cōtre le bien de la chose publique . Et outre-plus il est à sçauoir que pource que ces deux manieres de crime de leze majesté diuine & humaine sont les plus horribles crimes & pechez qui puissent estre . Les droits y ont ordonné certaines peines & plus grandes qu'aux autres crimes . C'est à sçauoir qu'au cas d'heresie & de crime de leze majesté humaine vn homme en peult estre accusé apres sa mort , & si peult faire proces contre luy . Et si l'aduient qu'il soit conuaincu & atteint d'heresie , il en doit estre desenterré & ses os mis en vn sac & apportez à la iustice & ars en vn feu . Et semblablement si l'aduient que aucun soit atteint & conuaincu de crime de leze majesté humaine apres sa mort il doit estre desenterré & ses os mis en vn sac , & tous ses biens meubles & immeubles confisquez & acquis au Prince , & ses enfans declairez inhabiles à toute succession . Ceste distinction de crime de leze majesté en ce presuppōsee ie vueil prouuer le secōd article de madicte maior par exemples & auctoritez . C'est à sçauoir que Dame Couuoitise à fait plusieurs estre apostats & regnier la foy catholique , ydolatrer & les ydoles adorer . Iacoit que i'en treuve plusieurs exemples , mais pource que ie serois trop long à racompter ie me refraindray aux trois premieres . Et sera la premiere de la premiere , la seconde de la seconde , la tierce de la tierce .

*De Iulian l'Apostat.*

Le premier exemple de Iulian l'Apostat lequel fut premierement Chrestien & homme d'Eglise , mais pour estre Empereur de Romme & pour venir à l'Empire il regnia la foy catholicque & son baptesme & adora les ydoles , & disoit aux Chrestiens en coulourant sa couuoitise . *Christus verè dicit in Euangelio suo . Nisi quis renunciauerit omnibus que possidet non potest meus esse discipulus .* En disant Vous qui voulez estre Chrestiens vous ne deuez riens auoir . Et sçachez qu'iceluy Iulian fut homme d'Eglise tresgrand Clerc & de grand lignée . Et dit on qu'il eust esté Pape si l'eust voulu labourer , mais il ne luy chalut pource que ce n'estoit alors que poureté de la Papalité . Mais c'estoit la plus noble & riche chose qui fut au monde que d'estre Empereur pour lors , ainsi le desira merueilleusement . Et pource qu'il considera que les Sarrazins estoient encores si forts qu'ils n'eussent pas souffert qu'un Chrestien eust esté Empereur il regnia son baptesme , la Chrestienté & la foy catholicque . Et se rendit à la loy des Sarrazins à adorer les ydoles , persecuter les Chrestiens & diffamer le nom de Iesus Christ , considerant que par ce moyen il seroit Empereur . Si aduint que l'Empereur qui lors estoit viuant alla de vie à trespas . Et les Sarrazins & payens considerans qu'iceluy Iulian l'Apostat estoit de grand lignage , grand clerc & plain de grād malice , & que c'estoit le greigneur persecuteur des Chrestiens qui fut au monde & qui plus di-

soit



& de sa mere & de la foy Catholique le feirent Empereur . Si vous diray comment il mourut de mort villaine. Il aduint que luy estant Empereur ceux de Perse se rebellerent encontre luy . Et lors il assemblea vne tresgrand armée pour les rebelles encontre luy mettre à subiection. Et au partir iura & voïa à ses damnez Dieux que fil pouoit retourner victorien qu'il destruiroit toute Chrestienté . Et en allant à tout son armée passa par vne cité nommée Cesarée au pays de Capadoce & là trouua vn tresgrand Docteur en Theologie qui estoit Euesque solennel de ladicte cité appelé Basilius qui est maintenant S. Basile: Lequel lors estoit tres-bon homme , & par le moyen de la bonne doctrine de luy ceux du pays estoient bons Chrestiens . Iceluy S. Basile vint par deuers iceluy Iulian l'Apostat & luy fait la reuerence & luy presenta trois pains d'orge . Lequel present il print en tresgrand indignation & dit-il : M'a il enuoyé viande de iument, & ie luy enuoyeray viande de cheual , c'est à sçauoir trois boisseaux d'auoines . Le vaillant homme s'excusa en disant que c'estoit tel pain que luy & ceux du pays mangeoient. Puis iceluy iura qu'à son retour il destruiroit ladicte cité & la mettroit en tel estat qu'il feroit courir les charrues par tout & en feroit vn beau champ & par tout feroit semer du froment *Itaque iurauit quòd faceret eam farriferam & non austeram.* Et s'en alla outre en ses batailles . Sainct Basile & les Chrestiens de ladicte cité eurent conseil & aduis ensemble pour sauuer ladicte cité, & aduiserent que c'estoit le meilleur de prendre rous les ioyaux & tresors pour luy presenter & appaiser. Et outre qu'ils iroiēt en procession à vne Eglise de nostre Dame qui estoit sur vne montaigne pres de ladicte cité & demourroient là par trois iournees, impetrant à Dieu le sauement d'eux & de ladicte cité. La tierce nuit aduint vne vision audit S. Basile , c'est à sçauoir qu'il veoit vne grand compaignie d'Anges & de Saincts assemblez deuant vne dame , laquelle dame disoit à vn de ses saincts appelé le cheualier Mercure . Tu as tousiours esté loyal seruiteur à mon fils & à moy. Et pource ie te commande que tu voïses tuer & occire Iulian l'Empereur le faulx Apostat qui si fort persecute les Chrestiens & dit tant de villennie de mon fils & de moy & prestement resuscite ledit Mercure. Et luy comme bon cheualier print son escu & sa lance qui estoit pendue à la paroy de l'Eglise où il estoit enterré en ladicte cité & s'en alla . Et deuant tous les gens d'iceluy Iulian, le vint occire & tuer de horions de lance tāt qu'il luy passa outre parmy le corps, & retira sa lance & la rapporta à son col , & ne sceurent les gens dudit Empereur qui c'estoit. Et S. Basile si tost que la vision luy fut aduenue : si s'en vint hastiuement en ladicte Eglise où estoit le tombel d'iceluy cheualier , & si trouua que le corps n'y estoit pas, ladicte lance ne l'escu , & lors appella les gardes de l'eglise & leur demanda qu'estoient deuenuz lesdits escuz & lance. Ils respondirent que la nuit precedente auoient esté ostez & ne sçauoient de qui ne comment . Si retourna iceluy S. Basile à la montaigne hastiuement au clergé & au peuple & leur dit la vision comment le corps, l'escu & la lance dudit Mercure n'estoient pas en l'Eglise , & que c'estoit signe de l'approbation de son aduision. Assez tost apres vindrent en ladicte Eglise, & trouuerent lesdits escu & lance penduz à la paroy , remis & rapportez au lieu où ils estoient par auant, & estoit la lance toute ensanglantée & au tombel ledit corps . Et fut aduisé qu'à ce faire ne meit qu'un iour & deux nuits , la seconde nuit mettre sondit corps au



tombel & ses armeures comme ils estoient par auant . Et comme dit est la lance estoit toute ensanglantée du sang dudit Iulian l'Apostat ainsi occis comme dit est . Et outre dit la Chronique qu'il receuoit son sang en sa main en disant . *Vicisti me Galilae*. C'est à dire, tu m'as vaincu Galiléen en parlant à Iesus Christ & iectant son sang en hault . Item ladicte Chronique dit que l'un des conseillers & sophistes d'iceluy Iulian eut semblable vision dudit miracle de ladicte mort . Et pource s'en vint à saint Basile pour soy baptizer comme bon Chrestien lequel disoit qu'il auoit esté à ladicte occision & qu'il l'auoit veu recevoir son sang en ses paulmes & le iecter en hault comme dit est . Et ainsi fina miserablement sa vie Iulian l'Apostat . Et apres ce auons la première exemple de Sergius le Moyne , lequel estoit Chrestien homme d'Eglise & de religion qui par couuoitise se meit en la compagnie de Mahomet & son Apostre se fait . Pourquoy il est à sçauoir que celuy Moyne aduifa qu'iceluy Mahom estoit vn grand capitaine des routtes du pays de Surie & d'outre mer , & que les seigneurs du pays estoient presque tous trespassez par vne mortalité , & n'estoit demouré que les enfans , & dist à Mahomet . Se vous me voulez croire ie vous feray le greigneur seigneur & plus honoré du monde brieffuement . Ils furent d'accord de ce faire , & que Mahomet feroit tant par force d'armes qu'il conquerroit le pays & seroit seigneur . Et iceluy moyne ouureroit de subtillesse & renonceroit à la loy des Chrestiens , composeroit vne loy toute nouvelle au nom dudit Mahom . Il fut ainsi fait & furent conuertis tous les pays d'Arrabie , & de Surie , d'Affricque & de Fez & Maroc & Grenade , de Perse & Egypte & de plusieurs autres pays qui pour lors estoient Chrestiens pour la greigneur partie sans comparaison . Et fut ceste apostasie faicte de la loy Mahom six cens ans apres l'incarnation nostre seigneur iceluy Mahom donna audit Moyne grand abondance de richesses mondaines & les receut par couuoitise qui luy fait faire l'apostasie à la damnation perpetuelle de son ame . Le tiers exemple est du Prince & Duc de Symeon qui estoit vne des douze lignées des enfans d'Israël lequel Prince estoit moult puissant homme & grand seigneur & auoit nom Zambry . Lequel fut si espris de couuoitise & de delectation charnelle de l'amour d'une dame Payenne que pource qu'elle ne se vouloit accorder à faire sa volenté fil n'adoroit les idoles . Il adora les idoles & les fait adorer par plusieurs de ses gens & subiects . Desquels la sainte escriture dit ainsi . *At illi comederunt & adorauerunt deos earum*. *Initiatúsque est Israel Beelphegor*. *Et iratus dominus ait ad Moysen: tolle cunctos principes populi & suspende illos contra solem in patibulis & cetera*. *& paulopost*. *Et ecce vnus de filiis Israel intrauit coram fratribus suis ad scortum madianitem, & cetera*. *Quod cum vidiasset surrexit de medio multitudinis Phinees, & arrepto pugione ingressus est post virum Israelitem in lupanar, & perfodit ambos simul in locis genitalibus*. *Et occisi sunt viginti quatuor millia hominum*. *Et sic Phinees placauit Deum*. *Et ideo Innocentius inde miseria conditionis humana ait*. *Extrema libidinis turpitudine: qua non solum mentem effæminat sed etiam corpus aggrauat*. *Omne namque peccatum quodcunque fecerit homo extra corpus est: qui autem fornicatur in corpus suum peccat*. C'est à dire qu'iceluy Duc & vne grand partie du peuple feirent fornication de leurs corps auecques les Payennes femmes & Sarrazines du pays de Moab , lesquelles femmes les induirent à adorer les idoles . Dieu s'en courroussa tres-grandement



demēt & dit à Moÿse qui estoit le souuerain seigneur & Duc de tous les autres du peuple. Prends tous les Princes du peuple & les fais pendre au gibet contre le soleil. Et pourquoy disoitil tous les Princes. Pource qu'une partie estoit consentante en iceluy crime & les autres jacoit-ce qu'ils n'en fussent pas consentans ils estoient negligens d'en faire vengeance de si grād iniure à Dieu leur createur faire. Tantoist Moÿse alla en assembler tous les Princes & tout le peuple d'Israël & leur va dire ce que Dieu luy auoit dit & commandé. Le peuple se print à pleurer pource queles malfaicteurs estoient si puissans que les iuges n'oseroient faire iustice & encores plus iceluy Duc Zambry estoit à tout xxiiij. mille hommes de son alliance. Item il se partit de la place voyant tout le peuple & s'en va entrer au logis de ladiète Sarrazine qui estoit son amie par amours, & qui estoit la plus belle & la plus gentil femme du paÿs, vn vaillant homme nommé Phinées print courage en luy & dit en son cueur. Je voüe à Dieu que presentement le vengeray de ceste iniure, il se departit sans mot dire sans quelconque commandement de Moÿse ne d'autre à ce ayant pouuoir & s'en vint au logis, & trouue iceluy Duc avecques icelle dame l'un sur l'autre faisant l'euure de delice, & d'un coustel qu'il auoit par maniere de dague les trespërça d'outre en outre & les occist tous deux ensemble, & les vingt & quatre mille qui estoient adherans avec iceluy Duc appellé Zambry se voulurent combattre pour sa mort: mais par la grace de Dieu ils furent les plus foibles & furent tous tuez & occis. Item notez cest exemple que le vaillant homme Phinées estoit si esprins en l'amour de Dieu & fut si dolent quand il veit faire telle iniure à Dieu son Roy & souuerain seigneur qu'il ne doubta pas à soy exposer à la mort & n'attendit ne congé ne licence de Moÿse de ce faire ne d'autre quelconque pource que les iuges ne faisoient point leur deuoir, les vns par negligence, & les autres pour doubte d'iceluy Duc Zambry. Et plus encores est à noter la grand remuneration & louënge qu'il en acquist. Car il est escrit. *Dixit dominus ad Moysen Phinees filius Helezari filij Aaron sacerdotis auertit iram meam à filiis Israel quia zelo meo commotus est contra eos ut non ipse delearem filios Israel in zelo meo idcirco loquere ad eum. Ecce do ei pacem fœderis mei & erit tam ipsi quàm semini eius pactum sacerdotij sempiternum: quia zelatus est pro Deo suo & expiauit scelus filiorum Israel.* C'est à dire qu'il eut tant le fait agreable & le remunera tellement qu'il & sa lignée auroient le tiltre de prestise. Ainsi que nul de l'ancien Testament ne seroit Prestre, n'Euesque, fors de la lignée d'iceluy Phinées. *Placuit & cessauit seditio & reputatum est ei ad iustitiam usque in sempiternum. Scribitur in psalmo.* C'est à dire qu'iceluy fait fut attribué à iustice, gloire & louënge à celuy Phinées & à toute sa lignée à tousioursmais. Ainsi appert clerement que concupiscence & couuoitise mauuaise tint tellement en ses lacs le Duc Zambry dessusdit qu'elle le feit idolatrer & adorer les idolles, & cy fine le tiers exemple du second article. Quant au troiesme article de madiète maior ie doy monstrier par exemple & par auctoritez de la bible laquelle nul n'oseroit contredire. C'est à sçauoir que dame couuoitise à fait plusieurs estre traistres & desloyaux enuers leurs souuerains seigneurs, jacoit-ce que ie pourroye mener à ce propos les exemples & auctoritez tant de la sainte escriture comme d'ailleurs ie me reffraindray à trois.



## De Lucifer.

La premiere est du cas de Lucifer lequel fut la creature la plus parfaite & en essence que Dieu fait oncques, duquel dit Ysaye le Prophete. *Quomodo cecidisti de celo Lucifer qui manè oriebaris: qui dicebas in corde tuo, conscēdam supra astra Dei, exaltabo solium meum, ascendam super altitudinem nubium & similis ero altissimo. Veruntamen ad infernum detraheris in profundum laci. Scribitur Ysaye 14.* Pourquoy il est à sçauoir qu'iceluy Lucifer soy regardant & considerant sa noble creature tāt belle & tant parfaite dit en sa pensée en luy mesmes. Je feray tāt que ie mettray ma chaire & mon throsne au dessus de tous les autres anges & seray semblable à Dieu. C'est à sçauoir qu'on luy feroit obeissance comme à Dieu, & pour ce faire il deçeut vne grand partie des anges & les attrahit à son opinion, c'est à sçauoir qu'ils luy feroient obeissance, honneur & reuerence par maniere d'hommage comme à leur souuerain seigneur, & ne seroient de riens subiects à Dieu, mais à iceluy Lucifer lequel tiendrait sa maiesté pareillemēt comme Dieu la sienne, exempte de toute la seigneurie de Dieu & de toute sa subiection. Et ainsi vouloit tollir à Dieu son createur & souuerain seigneur la grād partie de sa seigneurie & les attribuer à soy, & ce luy faisoit faire couuoitise qui festoit boutée en son courage. Si tost que S. Michel apperceut cela il s'en vint à luy & luy dit que c'estoit trop mal fait & que iamais ne voulsist faire telle chose & que de tāt que Dieu l'auoit fait plus bel & plus parfait de tous les autres de tant deuoit il monstrier greigneur signe de reuerence, subiection & obeissance à celuy qui l'auoit fait plus bel qui estoit son Roy & souuerain seigneur. Lucifer dit qu'il n'en feroit riens. Sainct Michel dit que luy & les autres ne souffreroient point telle iniure faire à leur createur & souuerain seigneur, briefuement la bataille se meut entre celuy sainct Michel & Lucifer. Et vne grand partie des anges furent à l'accord & ayde d'iceluy Lucifer, & l'autre partie & la plus grand partie fut du costé d'iceluy sainct Michel. Sainct Michel occist iceluy Lucifer de mort perdurable ainsi qu'iceluy Lucifer & les autres de son costé furent chassez hors de Paradis par force, & trespuchez en enfer dequoy dit sainct Michel la sentēce. Apocalipsis 12. *Michael & angeli eius preliabantur cum dracone & draco pugnabat & angeli eius cum eo: & paululum post, & proiectus est in terram draco ille & angeli eius missi sunt cum eo. Et audiui vocem magnam in calo dicentem. Nunc facta est salus & virtus & regnum Deo nostro.* C'est à dire que monseigneur sainct Iean veit en vision la maniere de la bataille dessusdicte & comme Lucifer fut iecté hors & trespuché en enfer & ses anges avecques luy. Et apres la bataille gagnée il ouyt vne voix qui crioit par cieux. Maintenant est faicte vne grand paix à Dieu nostre seigneur, à tous saincts de Paradis. Ainsi auez ledit premier exemple du troiesme article. De Absalon le second article est du bel Absalon fils du Roy David Roy de Hierusalem, lequel Absalon considerant que son pere estoit vieux homme & qu'il auoit perdu vne partie de son sens & force ce luy sembloit & alla enuiron la vallée ou son pere auoit esté oingt & couronné Roy, & là fait vne coniuration contre son dit pere & se fait enoindre Roy. Et fait qu'il eut dix mille homes qu'il attrait à son accord & s'en vint en Hierusalem avecques les dix mille hommes dessusdits pour occire son dit pere & prendre la possession de ladicte ville. Son dit pere ouyt les nouuelles de ceste chose, si se partit de la ville tost & hastiuement



& aüecques luy ses loyaux amis & se retrahit en vne ville forte outre le fleuve Iordain où il manda ses loyaux amis par tout où il peut, & Absalon tous les siens au contraire, briefuement iournée de bataille fut prinse & fut la bataille en la Lendeue-Forest là où vint Absalon en personne garny de tresgrand compaignie de gens d'armes & fait Prince de sa compaignie, c'est à sçauoir son Connestable. Et les autres cheualiers luy conseillèrent qu'il demourast en la forest pour ce qu'il estoit vieil & ancien. Si demoura, mais pource qu'il estoit tresexpert en fait de bataille & tant bon cheualier que c'estoit vn des preux du monde luy mesmes ordonna trois batailles. Desquelles Ioab son Connestable fut capitaine de la premiere bataille, & Bisay le frere de Ioab de la deuxiesme: & de la troisieme fut capitaine Eschey fils de Ieth. Et puis l'estour fut grand & la bataille cruelle. La partie du desloyal Absalon fut la plus foible, les vns furent occis & les autres s'en fuyrent. Il aduint qu'iceluy Absalon en fuyant sur son mulet apres la desconfiture passa par dessoubs vn chesne espais de branches se pendit par ses cheueulx & son mulet passa outre, car ledit Absalon auoit osté son heaume pour le chault & pour mieux courre & auoit des cheueux plus que dix autres si longs qu'ils venoient iusques à sa ceinture. Si se leuerent en hault au courre & s'entortillerent autour desdictes branches, & pource demoura il là pendu par maniere de miracle pour la grand trahison & desloyauté qu'il auoit perpetré à l'encontre de son pere son Roy & son souverain seigneur. Et en outre si aduint qu'un des gens d'armes d'iceluy Ioab Connestable du Roy David le trouua là pendu & tantost le courut dire à Ioab lequel Ioab luy dist. Se tu l'as veu pourquoy ne l'as tu occis ie t'eusse donné dix besans d'or & vne bonne ceinture. Lequel respondit à Ioab. Se tu me donnoyes mille besans d'or si n'oseroye toucher à luy ne luy faire quelque mal. Car i'estoye present quand le Roy te commanda & à tous les gens d'armes. Gardez moy mon enfant Absalon & gardez qu'il ne soit occis. Et Ioab replicqua le commandement que le Roy auoit fait estre contre son bien & son honneur. Car tant comme ledit Absalon aura vie ou corps, Le Roy sera tousiours en peril & si n'aurons paix ou Royaume, meine moy ou est ledit Absalon. Il luy mena presentement. Si trouua Absalon pendant par les cheueux & luy ficha trois lances dedans le corps endroit le cuer, & puis le fait iecter en vn fossé & lapider & couvrir de pierres. Car selon la loy de Dieu pource qu'il estoit trahistre tyrant & desloyal à son pere son Roy & souverain seigneur il deuoit estre lapidé & couuert tout de pierres. Quand David sceut la nouuelle que son fils estoit occis il monta en vne haute chambre & se print à plorer moult tendrement & dit ces parolles.

*Fili mi Absalon fili mi quis michi tribuat ut ego moriar pro te Absalon fili mi.* Il fut annoncé à Ioab & aux autres gens d'armes que le Roy faisoit si grand courroux pour l'amour de son fils, si en furent tresindignez, lors Ioab vint au Roy David & luy dit ces parolles.

*Confudisti hodie vultus omnium seruorum tuorum qui saluam fecerunt animam tuam. Diligis odientes te, & odio habes diligentes te, & ostendisti hodie quia non curas de ducibus tuis & de seruis tuis & verè cognoui modò quòd si Absalon viueret & nos omnes occubuissimus tunc placeret tibi, Nunc igitur surge & precede & allo-*



*quens satsfiac seruis tuis. Iuro enim tibi per dominum quòd si non exieris ne vnus quidem remansurus sit tecum nocte hac & peius hoc erit tibi quàm omnia mala quæ venerunt super te ab adolescentia tua vsque in presens. Scribitur. 2. Reg. xix.* C'est à dire que le bon cheualier Ioab s'en vint au Roy & luy dit verité sans flater. C'est à sçauoir tu haiz ceux qui t'ayment & ayme ceux qui te hayent. Tu eusses bien voulu que nous eussions esté tous occis & que Absalon ton fils vesquist, qui auons mis noz corps en tresgrand peril de mort à combattre entour luy pour toy sauuer. Et pour ce les gens d'armes & le peuple en sont si indignez à l'encontre de toy que se tu ne viens seoir à la porte pour les mercier à lye chere comme ils entreront dedans, ils feront vn autre Roy & te osteront ton Royaume, & oncques si dolente iournée ne te aduint se tu ne fais ce que ie dis. Le Roy considerât ce que il disoit voir s'en vint à la porte se seoir pour mercier les gens d'armes comme ils entroyent dedans & leur fait bonne chere & ioyeuse. Et cest present exemple fait moult à noter que le bon cheualier Ioab occist le fils du Roy contre le commandement du Roy & n'obeist point à son commandement pource qu'il estoit au prejudice de Dieu, du Roy & de son peuple. Item nonobstant qu'iceluy Ioab l'occist, ils auoyent tousiours esté amis ensemble, & tant que ledit Ioab audit Absalon auoit fait sa paix par deuers le Roy Dauid son pere d'un meurdre qu'il auoit fait en la personne de son frere aîné fils du Roy Dauid qu'il auoit occis & en auoit iceluy Absalon esté fuitif hors du Royaume par quatre ans. Mais aucuns pourroient arguer contre les choses dessusdictes par ce que quand le Roy Dauid fut au liçt de la mort il enchargea à son fils Salomon qui deuoit estre Roy apres luy qu'il fait iustice dudit Ioab, de ce ie respons que ce ne fut pas pour le cas dessusdit, car nonobstant que Ioab fut bon cheualier & loyal au temps qu'il occist ledit Absalon neantmoins enuers la fin de ses iours il fit deux grans fautes. La premiere, car il occist vn tresbon cheualier & homme d'armes nommé Amason. La seconde qu'il occist vn tresbon cheualier nommé Abner par grand trahison. C'est à sçauoir en le saluant & baisant luy bouta vn cousteau au corps. Et pource que le Roy Dauid n'auoit point puny ledit Ioab des deux homicides dessusdits qu'il auoit perpetrez si delloyaument il en fit conscience au liçt mortel & chargea le Roy Salomon qu'il en fait iustice apres son trespasement & qu'il le punist en ceste mortelle vie à eiter la damnation perpetuelle dudit Ioab & luy dit ainsi.

*Tu scis quæ fecerit mihi Ioab filius Saruia quæ fecerit duobus principibus exercitus Israel Abner filio Ner & Amasa filio Iether quos occidit & effudit sanguinem belli in pace. Facias ergo iuxta sapientiam tuam & non deduces caniciem eius pacificè ad inferos. Scribitur. 2. Reg. ij.* C'est à dire que les deux cheualiers Princes de la cheualerie de Israel auoient esté tuez desloyalement & en paix de Dieu & de son Roy. Et ie fais conscience de ce que ie luy ay esté trop fauorable. Et pource se tu ne le punis tu feras cause de la damnation de son ame. Je fais cy vn nota. Et il n'est nul si bon cheualier au monde qu'il ne puisse bien faire vne faute voire si grande que tous les biens qu'il aura faits deuant seront adnichillez. Et pource on ne crye aux ioustes ne aux batailles aux Preux: mais on crye bien aux fils des Preux apres la mort de leur pere, car nul cheualier ne peult estre iugé preux se ce n'est apres le trespasement. Ainsi auez le deuxiesme exemple du tiers article. De la Royne Athalie. Le tiers exemple sera d'une Royne qui auoit nom Athalie Royne du Royaume



me de Hierusalem. De laquelle dit la sainte escripture. *Athalia verò mater regis Ochosiæ, videns filium suum mortuum surrexit & interfecit omne semen regium. Tollens autem Iosaba filia regis Ioran & soror Ochosiæ Ioas filium Ochosiæ furata est eum de medio filiorum Regis qui interficiebantur & nutricem eius de triclinio & abscondit eum à facie Athaliæ ut non interficeretur. &c. 4. Reg. xi.* C'est à dire qu'icelle mauuaise Athalie regardant que le Roy Ochosias son fils estoit trespaslé & qu'il n'auoit laissé que petits enfans pour à soy attribuer la seigneurie par couuoitise & mauuaise concupiscence & tyrannie occist les enfans dudit Roy son fils & furent tous occis excepté que par la grace de Dieu & d'une vaillante Dame qui estoit ante desdits enfans seur à leur pere embla vn nommé Ioas ou berceau de sa nourrice & l'enuoya secrettement à l'Euesque qui le nourrit iusques à sept ans. Ce pendant la mauuaise Roïne dessusdicte regna lesdits sept ans par tyrannie & desloyauté, & au vij. an le vaillant Euesque la feit occire par aguets & espiemens. Et puis feit couronner le petit enfant. Nonobstant qu'il fut ieune & qu'il n'eust que sept ans gouerna tresbien ledit Royaume par le conseil du vaillant homme Euesque & autres tresbons Euesques & preud'hommes, car la sainte escripture dit ainsi.

*Ioas regnauit xl. annis in Hierusalem fecitque rectum coram domino cunctis diebus quibus docuit eum Ioiada sacerdos.* Ainsi auez le iij. exemple. Qui est comment couuoitise d'honneur vaine qui n'est autre chose que concupiscence & voulenté desordonnée à tollir à autrui sa noble dominatiō & seigneurie feit ladicte Roïne estre meurdriere, fauce & desloyalle à obtenir par force & tyrannie la couronne & seigneurie du Royaume de Hierusalem. Et si auez ouï commēt par aguets & espiemens elle fut occise, car c'est droit, raison & equité que tout tirant soit occis vaillamment ou par aguets & espiement. Et est la propre mort dont doiuent mourir tirans desloyaux. Ainsi ie fais fin dudit article. iij. de madiete maior.

Après ie viens au quart exemple de madiete maior, auquel ie pense noter & proposer. viij. veritez principales par maniere de conclusion & fondement d'iceluy & conferer huit autres conclusions par maniere de corolaires pour mieux fonder la iustification de mondit seigneur de Bourgogne. La premiere que tout subiect vassal qui par couuoitise, barat, sortilege & mal engin machine contre le salut corporel de son Roy & souuerain seigneur pour luy tollir & soubstraire sa tresnoble & treshaute seigneurie il peche si griefuement & commet si horrible crime comme crime de lese maiesté royal ou premier degré, & par consequent il est digne de double mort, c'est à sçauoir premier & ij. Ie prouue madiete proposition, car tout subiect & vassal qui est ennemy & desloyal à son souuerain seigneur peche mortellement. Adonc ma conclusion est vraye. Et qu'il soit tirant ie le prouue par monseigneur saint Gregoire qui dit ainsi.

*Tyrannus est propriè qui non dominus reputatur.*

*Non iuste principatur: aut non principatu decoratur.*

*Nam sicut regnum rectus principatus dicitur.*

*Sic dominium peruersum tyrannis nuncupatur.*

Qui commet crime de lese maiesté il appert clerement par la description dessusdicte des degrez de lese maiesté, car il fait si grand offence que plus ne peult à la maiesté royale en la propre personne du Prince, qu'il soit digne de double mort premiere & seconde ie le prouue, car par la premiere mort i'entens mort



corporelle qui est separation du corps & de l'ame, qui n'est autre chose que damnation pardurable, laquelle parolle monseigneur saint Jean l'Evangéliste dit.

*Qui uiuit non morietur nec lædetur à morte secunda.*

C'est à dire que toute creature humaine qui aura victoire finalement sur couuoitise & ses trois filles il n'aura garde de la mort seconde : c'est à sçauoir de pardurable damnation. La seconde verité est jaçoit ce que ou cas dessusdit soit tout subiect vassal digne de double mort, & qu'il commette si horrible mal qu'on ne le pourroit trop punir : toutesfois est plus à punir qu'un simple subiect, en ce cas un Baron qu'un simple cheualier, un Comte qu'un Baron, & un Duc qu'un Comte, le cousin du Roy qu'un estrange, le frere du Roy qu'un cousin, le fils du Roy que le frere, voila quant à la premiere partie de la seconde verité. Et quant à la seconde partie ie le prouue. Car en moult de degrez l'obligation est greigneur à vouloir garder le salut du Roy & de la chose du bien publicque. Dont par ce ceux qui font le contraire sont plus à punir en montant de degré en degré, que ma consequence est tresbonne ie la prouue. C'est à sçauoir que le fils est plus obligé que le frere, & le frere que le cousin, un Duc qu'un Comte, un Comte que un Baron, un Baron qu'un cheualier, &c. à garder le bien, honneur du Roy & de la chose publicque du Royaume, car à chacune desdictes prerogatiues, dignitez & seigneuries correspond certain degré d'obligation. Et ainsi qu'ils sont greigneurs & plus nobles greigneurs & plus forte est l'obligatiō. Et par tant que plus en a & de plus nobles de plus est obligé: comme dit est en l'auctorité de saint Gregoire dessus alleguée.

*Cum crescunt dona & rationes donorum.*

Item par le deuxiesme argument prens ie madiete verité : car tant que la personne est plus prochaine du Roy & plus noble s'il fait les choses dessusdictes de tāt est-ce plus greigneur escādale que ce n'est d'une poure personne qui est loingtaine du Roy. C'est trop greigneur escandalle qu'un grand Duc & puissant seigneur parent prochain du Roy machine sa mort pour luy tollir sa seigneurie que ce ne seroit d'un poure subiect qui n'est pas son parent de tant que le machineur seroit plus prochain du Roy & de greigneur puissance de tant seroit la chose plus inique & de tant seroit de plus grand escandalle & par consequent seroit plus à punir. Tiercement ie prouue ma verité dessusdicte, car où il ya plus grād peril, adonc il doit auoir greigneur remede de punition, & alencontre qu'il y ait plus grand peril ie le prouue. Car la machination des prochains parens du Roy & qui sont de grād auctorité & puissance est trop plus perilleuse que n'est la machination des pources gens. Et pourtant qu'elle est plus perilleuse ils en doiuent auoir plus grand punition pour obuier aux perils qui en peuuent aduenir pour les refraindre des tentations de l'ennemy & de couuoitise, car quand ils se voyent si prochains à la couronne aduient que couuoitise se boute en leur cueur. Pourquoy ils se bouteront à machiner de toute leur puissance & a mespoigner ladicte couronne, ainsi n'est pas d'un poure subiect qui n'est pas prochain parēt du Roy, car il n'y auroit iamais imagination ou esperance de toucher à ladicte couronne du Royaume autrement. Des occisions. La tierce verité ou cas dessusdit en ladicte premiere verité. Il est licite à chacun subiect sans quelque mandement selon les loix morale, naturelle & diuine d'occire ou faire occire iceluy trahistre desloyal



desloyal & tirant & non pas tant seulement licite : mais honorable & meritoire. Mesmement quand il est de si grand puissance que iustice ne peult bonnement estre faicte par le souuerain. Le prouue ceste verité par douze raisons en l'honneur des douze apostres. Desquelles raisons les trois premieres sont de trois auctoritez de trois philosophes moraux. Les autres trois sont de trois doctrines de sainte Theologie & du Docteur Sainct qui dit en la derniere partie du second liure des sentences. *Quando aliquis dominium sibi per violentiam surripit nolentibus subditis, vel etiam ad consensum coactis : & non est recursus ad superiorem per quem de tali iudicium posset fieri. Talis enim qui ad liberationem patriæ talem tyrannum occidit : laudem & præmium accipit. Hic primum laudatur. Item debet laudari per quæ facit opus dignum laudæ. Idem licitum præmium & honorabile accipit & idem debet accipere. Ille facit opus meritorium quia nullum opus est dignum, primò nisi fieret meritorium.* A parler briefuement & proprement le Docteur dessusdit veut dire que ce subiect qui occist le tirant dessusdit fait œuvre de louenge & remuneration.

*La. ij. auctorité si est.*

*Scalcerbere, Sacrae Theologiae eximij doctoris in libro suo Policratum. Li. ij. cap. xv. Sic dicit amico adulari non licet, sed aurem tyranni mulcere licitum est, ei nanque scilicet tyranno licet adulari quem licet occidere.* C'est à dire il n'est licite à nully de flater son amy, mais est licite de addomter & endormir par belles parolles les oreilles du tirant, car puis qu'il est licite d'occire ledit tirant il est licite de luy blandir par belles parolles & signes. La. iij. auctorité est de plusieurs docteurs que ie mets tous ensemble affin que ie n'y excède le nombre de trois. C'est à sçauoir. *Ricardi de media villa, Alexandri de Hallis & Astensis in summa qui conclusionem præfatam ponunt in. iij. efforum.* Et y adioinct pour l'auctorité greigneur confirmation de S. Pierre l'Apostre qui dit ainsi. *Subditi estote Regi quasi præcellenti siue ducibus tanquàm ab eo missis ad vindictam malefactorum, laudem verò bonorum, quia sic est voluntas Dei. Scribitur primæ Pet. ij.* C'est à dire que la vouldenté de Dieu est que tous obeissent au Roy comme excellēt & souuerain seigneur sur tous les autres de son Royaume. Et puis au Duc comme commis & enuoyé de par iceluy à la vengeance & punition des malfaiçteurs & à la remuneration des bons. A la vengeance des iniures faictes ou machinées au Roy à faire par ses ennemis & malfaiçteurs dont il s'en suit que les Ducs sont obligez à venger le Roy de toutes iniures qui seront ou machinées à faire ou au moins à faire leur pouoir. Et d'exposer à ce toute leur puissance toutes & quantesfois qu'il viēdra à leur cognoissance. Apres ie viens à la iij. auctorité des trois Philosophes moraulx dont la premiere est. *Ante forum principis pluribus locis cuilibet subditorum licitum est occidere tyrannum & non solum licitum immò laudabile.* C'est à dire qu'il est licite à vn chacun des subiects d'occire le tyran, & non pas seulement licite : Mais est chose honorable & digne de loüenge. *Tullij in libro de officiis. Laudatis illos qui illum Cæsarem interfecerunt quamuis esset sibi familiarium amicus eo quòd iura imperij quasi tyrannus usurpauerat.* C'est à dire que le noble moral nommé Tulle dit & escrit en son liure que ceux qui occirent Iulius Cesar sont à loüer & sont dignes de loüenge, pource qu'iceluy Iulius Cesar auoit vsurpé la seigneurie de l'Empire de Romme par tyrannie & comme tyran. La iij. auctorité est de Bocace qui dit en son liure. *De casibus virorum illustrium. f. lib. 2. cap. 15. contra filios tyrannorum.* En parlant du ty-



rant dit ainsi. Le diray-ie Roy, le diray-ie Prince, luy garderay-ie foy comme à seigneur, nenny. Il est ennemy de la chose publique. Contre celuy puis faire armes coniuuration mettre espies employer force cest fait de courageux. C'est tres-saincte chose & tresnecessaire. Car ce n'est plus agreable sacrifice que le sang du tirant, c'est vne chose insupportable de receuoir villennies pour bien faire. Apres ie viens à la iij. auctorité des loix ciuilles. Et pource que ie ne suis pas legiste il me fuffist de dire la sentence des loix sans les alleguer, car en toute ma vie ie ne fus estant estudiant en droit canon & ciuil que deux ans il ya plus de vingt ans passez, pourquoy ie n'en puis gueres sçauoir, & ce que alors i'en peuz apprendre si l'ay ie oublié pour la longueur du temps. La premiere auctorité des loix ciuilles est que les deserteurs de cheualerie chacun peut occire licitemēt. Et qui est plus deserteur que celuy qui desert la personne du Roy qui est la clef de cheualerie & sans lequel ne peut la cheualerie longuement durer. La ij. auctorité est qu'il est licite à vn chacun d'occire & faire occire les larrons qui guettent les chemins en bois & en forests. Et pource est licite qu'ils sont nommément & formellement ennemis de la chose publique & machinent contre & continuellement mettent peine à occire les passans. Adonc il est licite d'occire le tirant qui continuellement machine contre son Roy & souuerain seigneur & le bien public. La iij. auctorité si est qu'il est licite à vn chacun d'occire vn larron fil le trouue de nuict en sa maison par la loy ciuille & Imperialle. Adonc par plus forte raison il est licite d'occire vn tirant qui par nuict & par iour machine la mort de son souuerain seigneur. Ceste consequence appert à tout homme de sain entendement fil y veult considerer, & l'antecedent est texte de la loy escripte. Ains que ie entre en la matiere des trois exemples de la sainte escripture. Ie vueil respondre à aucunes obiections qu'on pourroit faire à l'encontre de ce que dit est en arguant ainsi. Tout homicide par toutes loix est deffendu, c'est à sçauoir diuine, naturelle, morale & ciuille. Tout ce que dit est n'est pas tout vray dit qu'il soit deffendu par loy diuine. Ie le prouue, car la sainte escripture dit ainsi. *Non occides. Ioh. xx.* Et est vn des commandemens de la loy diuine, par lequel commandement est deffendu tout homicide. Qu'il soit deffendu en la loy de nature ie le prouue. *Natura enim inter homines quandam cognationem constituit qua hominem homini insidiari ne- phas est.* Qu'il soit deffendu aussi par la loy morale ie le prouue. *Quia per id: hoc non facias aliis quod tibi non vis fieri: alterum non ledere: ius suum unicuique tribue- re: hoc est morale: insuper & de naturali iure.* Qu'il soit aussi deffendu par la loy ciuille & imperiale ie le prouue par les loix ciuiles & imperiales qui disent ainsi: *Qui hominem occidit capite puniatur, non habita differentia sexus vel conditionis. Item omne bellum omnis usus armorum vitiosus præcipuè prohibitus est: Nam qui vitio præcipuè bel- lum gerit lese maiestatis reus est. Item regis proprium, furta cohibere, adulteria punire, ipsos de terra perdere: qui enim talia sibi appropriat aut usurpat, principem iniuriatur & ledit: quoniam ut dicit lex iudiciorum vigor: iuris & publica tutela in medio constituta est, ne quis de aliquo quantumcunque sceleribus implicito assumere valeat ultionem.* Pour respondre aux raisons dessusdites, c'est à sçauoir que les Theologiens & Iuristes parlent en diuerses manieres de ce mot *homicidium*, mais nonobstant qu'ils different en parlers, ils conuiennent en vne mesme sentence. Car les Theologiens diēt que tuer vn hōme licitement n'est pas homicide, car ce mot *homicidium*, emporte en foy



en soy *quod sit iustum propter hoc dicunt quod Moyses, Phinees & Mathathias non commiserunt homicidia quæ iustè occiderunt*. Mais les Iuristes dient que toute occision de homme soit iuste ou iniuste est homicide, mais les autres dient qu'il y a deux manieres de homicide iuste & iniuste, & pour homicide iuste nul ne doit estre puny. Je respondray donc selon les Theologiens, que l'occision dudit tirant n'est pas homicide. Pource qu'elle fut iuste & licite. Selon loy Iuriste ie confesse que fut homicide, mais s'elle fut iuste & licite, ne s'en ensuit point de purgation, mais remuneration. Quant à l'argument qui dit, *quod hominem homini insidiari nefas est, & quæ magis insidiatur homini, &c.* Il ne s'entend du tyrant qui continuellement machine la mort de son Roy & souuerain seigneur. *Et homo est nefas & perditio & iniquitas*. Et pource celuy qui occit par bonne cautelle & espiemens pour sauuer la vie de son Roy & souuerain Seigneur, & l'oster de tel peril il ne faict pas *nefas*, mais il s'acquite enuers son Roy & souuerain seigneur. *Et homo est nefas & perditio & iniquitas*. Et pource celuy qui l'occist par bonne cautelle & espie-mét c'est pour sauuer la vie de son Roy & son seigneur. Quât à l'argumét qui dit *Non facias aliis, &c. Alterũ non ladere, &c.* Je respons que c'est fait contre le tyrant & pour celuy qui l'occist. Car il fait cõtre son Roy & souuerain seigneur ce qu'il ne voudroit pas qu'on luy feist. *Et ipsum regem iniuriatur & lædit*. Pour laquelle chose le subiect qui l'occist de mort telle qu'il a desseruy ne fait en riens contre lesdites loix, mais garde l'entente d'icelles: c'est à sçauoir bonne equité & loyauté enuers son Roy & souuerain seigneur. Aux autres loix qui dient *Hominem occidere, capitale esse omnis usus armorum, &c.* Je responds à toutes les loix ensemble qu'il n'est loy tant soit generale, ne reigle tant soit commune qu'en aucun cas especial n'y ait exception aucune. Je vous dy outre que le cas d'occire vn tyrant est exempté, & par especial quand il est tyrant de telle tyrannie comme dessus est dit: Cõment pourroit on trouuer plus digne cas d'exception que les cas dessusdits, c'est à sçauoir qu'il est faict par si grand necessité comme pour deffendre son Roy & le garder de peril de mort. Et mesmement quand lesdites machinations & sortileges ont si auant ouuré en sa personne qu'il ne peult entendre à faire iustice & que ledit tyrant à desseruy si grand punition que iustice n'en peult bonnement estre faite par sondit Roy & souuerain seigneur qui en est affoibly, blessé & endommagé en entendement & en puissance corporelle, & pour ainsi expliquer la loy & interpreter en tel cas n'est pas contre la loy à parler proprement: parce qu'il est à sçauoir qu'en toutes loix a deux choses. La premiere le principe ou la sentence textuale. L'autre si est pourquoy on l'a faict faire, à laquelle fin les aucteurs d'icelle loy entendoient principalement. Et quand on sçait que la sentence est contraire à la fin de la loy, c'est à sçauoir à la fin pourquoy ladicte loy fut faicte: on doit expliquer ladicte loy à l'entente de la fin, & non pas à sens literal ou sentence textuale, ainsi met le Philosophe l'exemple des citoyens qui feirent vne loy pour garder leur cité, C'est à sçauoir que nul estrangier en leur cité ne montast sur les murs sur peine capitale, & la cause qui les meust à ce faire fut que ladicte ville estoit assiegée des ennemis. Ils se doutoient se estrangers montoient sur les murs avec les citoyens ou autrement ils pourroient auoir trop grand peril. Et quand ils verroient leur point, ils ne se tournassent avec leurs ennemis cõtre ladicte ville où qu'ils ne leur donnassent aucun signe ou entendement de la maniere de pren-



dre ladite ville. Or aduint que ladite ville fut assaillie en plusieurs lieux, les estrangers & pelerins qui estoient en ladite ville regarderent qu'à vn des lieux les ennemis les assailloient trop fort & estoient ceux de la ville trop foibles en iceluy endroit, prestement lesdits estrangers s'armerent & monterent sur les murs pour secourir ceux de la ville qui estoient les plus foibles, repousserent lesdits ennemis & sauuerent ladite ville. Le Philosophe demande. Puis que lesdits pelerins sont montez sur les murs, il sembloit qu'ils auoient fait contre la loy, & deuoient estre punis. Je respons que non, iacoit ce qu'ils ayent fait contre le sens litteral ou textual de ladite loy pour laquelle loy fut faite afin de garder ladite ville: Car s'ils n'y eussent pas monté, ladite ville n'eust pas esté gardée, mais eust esté prinse. Au propos les loix dessusdites qui dient que nul ne doit prendre auctorité de iustice fors que le Roy, & ne faire point d'armes sans licence de Prince. Je dis que celles loix furent faites pour garder l'honneur du Roy, de sa personne & de la chose publique. Mais en ce cas doncques j'approuueray qu'un tyran de grand puissance & subtilité qui machine de toute sa puissance la mort du Roy continuellement par barats & malefices pour luy tollir sa seigneurie, & sera mondit seigneur tant indisposé par luy en entendement & en force corporelle qu'il ne sçauroit ou pourroit y mettre remede & en faire iustice. Et en outre qu'iceluy continue de iour en iour en sa mauuaistié. Je regarde les loix dessusdites qui me deffendent port d'armes sans licence de mondit Roy generallyment & qui me deffendent que ie ne prengne l'auctorité d'occire aucun. Que dois-je faire pour garder le sens litteral d'icelles loix, dois-je laisser mondit Roy en si grand peril de mort, nenny, ains dois deffendre mondit Roy & occire le tyran. Et ce faisant iacoit ce que ie face contre le sens litteral desdites loix, Je ne feray point contre la fin pourquoy elles furent ordonnées & faites. Mais accompliray le commandement final d'icelles loix. C'est à sçauoir pour l'honneur, bien & conseruation du Prince laquelle chose garderay mieux ainsi faisant que de laisser viure iceluy tyran au grand danger & peril de mondit Roy. Et pource ie ne dois pas estre puny, mais guerdonné: Car ie fais euure meritoire & ne tends qu'à bonne fin, c'est à sçauoir à la fin pourquoy icelles loix furent faites. Et pource dit monseigneur saint Paul.

*Littera occidit, charitas autem edificat.*

C'est à dire que tenir le sens litteral en la sainte escriture est occire son ame: Mais tenir le sens de vraye charité: C'est à sçauoir tendre à la fin pourquoy la loy diuine fut faite. C'est chose qui bien edifie spirituelle edification.

ITEM les loix diuine, naturelle & humaine me donnent auctorité de le faire, & en ce faisant ie suis ministre de la loy diuine, ainsi appert que lesdites obiections ne sont rien contre ce que dit est. Je viens aux trois exemples de la sainte escriture pour parfaire la probation de madite tierce verité. La premiere verité est de Moÿse qui sans commandement ne auctorité quelsconques occist l'Egyptien qui tyrannisoit les fils d'Israël. Et pour lors iceluy Moÿse n'auoit auctorité de iuger laquelle luy fut donnée sur le peuple d'Israël pres quarante ans apres qu'il leut perpetré ce fait, de ce toutesfois est loué iceluy Moÿse.

*Vt patet auctoritate Exodi ij. quia tanquam minister legis hoc facit. Ita in proposito in hoc faciendo ego ero minister legis.*



Le deuxiesme exemple est de Phinees, qui sans commandement quelconques occist le Duc Zambry comme il est cy deuant racompté. Lequel Phinees ne fut pas puny. Mais en fut loüé & remuneré tresgrandemēt en trois choses en amour, honneur & richesses. En amour, que Dieu luy monstra greigneur signe d'amour que deuant. En honneur. *Quia reputatum est ei ad iusticiam. &c.* En richesse.

*Quia per hoc acquisiuit actum sacerdotij sempiternum non tantum pro se, sed pro tota tribu sua.* Le tiers exemple est de sainct Michel l'Archange qui sans commandement de Dieu ne d'autre, mais tant seulement d'amour naturelle occist le ty-rant & desloyal à Dieu son Roy & souuerain seigneur pource que ledit Lucifer machinoit à vsurper vne partie de l'honneur & seigneurie de Dieu. Iceluy sainct Michel en fut fauorablement remuneré es trois choses dessusdictes. C'est à sça-uoir en honneur, amour & richesses. En amour autant que Dieu l'ayma plus que nul autre & le conferma en son amour & grace. En honneur.

*Quia fecit eum militia celestis principem in æternum.*

C'est à dire qu'il le feit Prince de la cheualerie des anges à iamais. En richesses. Car il luy donna richesses en sa gloire tant comme il en voulut auoir. &c.

*Tantum quantum erat capax, De quibus loquitur. O altitudo diuitiarum sapietia & scien-tia Dei, quam incomprehensibilia sunt iudicia eius & inuestigabiles via eius. Ad Rom. xi.*

Ainsi appert ma tierce verité prouuée par douze raisons. La quarte verité ou cas dessusdit. Il est plus meritoire, honorable & licite qu'iceluy Tyrant soit oc-cis par vn des parens du Roy que par vn estranger qui ne seroit point du sang du Roy. Et par vn Duc que par vn Comte, & par vn Baron que par vn simple che-ualier, & par vn simple cheualier que par vn simple homme. Je preue ceste proposition. Car celuy qui est parent du Roy a à desirer & garder l'honneur du Roy, le deffendre à son pouoir & venger de toutes iniures & y est obligé plus qu'un estrange, vn Duc qu'un Comte, vn Comte plus qu'un Baron. &c. Et fait plus à punir & est greigneur villennie & diffame fil est negligent de ce faire & fil en fait bien son deuoir, bonne loyauté & diligence ce luy est greigneur hon-neur & merite. *Item in hoc magis relucent amor & obedientia occisoris, vel occidere præcipientis ad principem & dominum suum quia est magis honorabile si fuerit præpo-tens Dux vel Comes. Item in hoc magis relucet potentia Regis quod est honorabile & quanto occisor vel dictæ occisionis præceptor non fuerit vilior & potentior tanto magis. &c.* La quinte verité ou cas d'alliances, sermens & promesses & de confedera-tions faictes de cheualier à autre en quelque maniere que ce soit ou peut estre. S'il aduient qu'icelles garder & tenir tourne ou preiudice de son Prince & de ses enfans & de la chose publique n'est tenu nuls de les garder. Ains les tenir & garder en tel cas seroit fait contre les loix morale, naturelle & diuine: ie preue ceste verité. *Arguendo sic. Bonam æquitatem (dictamen rectæ rationis) & legem diui-nam boni principes in persona publica seruare & utilitatem reipublicæ debent præferre & præsupponere in omnibus talibus promissionibus, iuramentis & confederationibus: im-mò excipiuntur implicitè secundum dictamen rectæ rationis: bonam æquitatem & chari-tatis ordinem quia aliàs esset licitum non obedire principi immò rebellare contra principes, quod est expresse contra sacram scripturam quæ sic dicit. Obedite principibus vestris, licet etiam discolis & alibi. Subiecti estote Regi præcellenti, siue iudicibus tanquam ab eo mis-sis ad vindictam malefactorum, laudem vero bonorum. 1. Pe. iij. ut sup. allegatum est. Ex*



illo arguitur sic. Quandocunque occurrunt duæ obligationes ad inuicem contrariæ maior tenenda est & minor dissoluenda quantum ad hoc, sed in casu nostro concurrunt duæ obligationes. Et cum obligatio ad principem sit maior & alia minor obligatio ad principem tenenda est & alia non in tali casu. Item arguendo eandem questionem, quandocunque aliquis facit quod est melius quamuis iurauit se id non facturum non est periurium, sed periurio contrarium; ut expresse ponit magister sententiarum ultima dicti tertij: sed in casu nostro melius est tyrannum in præfato casu occidere quamuis iurauit se non occisurum quam præsentem viuere ut tactum est superius: ergo occidere tyrannum in præfato casu quamuis iurauit se non occisurum, non periurium facit, sed periurio contrarium. Et consequenter Isidorus in libro de summo bono sic dicit, id non est obseruandum sacramentum & iuramentum quo malum incautè remittitur, sed in casu nostro malè & incautè promittitur. Sed non tenent promissiones iurata vel confæderationes contra principem. Vxorem principis, liberos, vel reipublicæ utilitatem. La septiesme verité ou cas dessusdit est que si l'aduiant que lesdictes alliances ou confederations tournent au preiudice de l'un des promettans ou concedans de son espouse ou de ses enfans il n'est en riens tenu de le garder. Patet hîc veritas per rationes tactas prius & cum hoc probatur sic, quia obseruare in illo casu confæderationes contra legem charitatis quæ quis magis sibiipsi, uxori propriæ vel liberis quam posset obligari cuicunque alteri virtutis talis promissionis & omnia præcepta & consimilia in ordine ad charitatem patent per Apostolum sic dicentem. Finis præcepti est charitas, quia in omnibus casibus & promissionibus intelligitur hoc, si in fide obseruauerit iuxta illud Frangenti fidem. &c. Item subintelligitur si domino placuerit sed certum est quod non placeret Deo cum foret contra legem charitatis ideo. &c. La septiesme verité ou cas dessusdit est que il est licite à un chacun subiect honorable & meritable occire le tyran trahistre dessus nommé & desloyal à son Roy & souuerain seigneur par aguet, cautelles & espiemens, & si est licite de dissimuler & traire sa voullenté d'ainsi faire. Je le preuue premierement par l'auctorité du philosophe moral appellé Bocace dessus allegué ou second liure. De casibus virorum illustrium, qui dit ainsi en parlant du tyran, le honoreray-ie comme Prince, luy garderay-ie foy comme à Seigneur, nenny, il est ennemy & contre luy puis prendre armes & mettre espies. C'est fait de courageux, c'est tres sainte chose & du tout necessaire: car à Dieu n'est fait plus agreable sacrifice que du sang du tyran. Item ie le preuue par l'exemple de sainte escripture du Roy Iehu. Occident te sacerdotes & cultores Baal, ut habetur primo Reg. ex. ubi sic dicitur, Iehu Acab parum coluit Baal, ego autem colam eum amplius. Et paululum post, porro Iehu licet insidiosè ut disperdat cultores Baal dicit, sanctificate diem solennem Baal. &c. Et laudatur de hoc. Item de Athalia Regina vidente filium suum mortuum surrexit & interfecit omne semen regium ut regnaret & Ioyadas summus sacerdos insidiosè fecit eam occidi. Et de hoc laudatur ut superius tactum est ad longum. Item Iudich occidit Holofernem per insidias. Et etiam de hoc laudatur pater familias quod ad zizaniæ eradicationem non voluit expectare tempus messis ne triticum simul cum zizaniis eradicaretur. &c. Quod intelligitur in occisione tyrannorum per insidias sed & bonam cautelam & debet expectari loci & temporis oportunitas & expleri, ne boni eradicentur. &c. C'est la plus propre mort de quoy tyrans doiuent mourir que de les occire villainement par bonne cautelle, aguet & espiemens. Mais pour ce ie fais vne question. Pourquoi c'est qu'on est tenu en plusieurs cas de  
garder



garder foy & conuenance à son ennemy capital, & non pas au tyrants. La cause de la responce mettent communement les docteurs & pource qu'elle est commune & qu'elle seroit longue à racompter. Je m'en passeray à tant.

De sortileges. La huictiesme verité est que tout subiect & vassal qui pensément machinent contre la santé de leur Roy & souuerain seigneur de le faire mourir en langueur par couuoitise d'auoir la couronne & seigneurie fait consacrer ou a plus proprement parler fait exercer espées dagues badelaires ou couteaulx, verges d'or où anneaulx, & dedier ou nom des dyables par nicromance faisans inuocations de karacteres, forceries, charmes, superstitions & malefices & apres les bouter & ficher parmy le corps d'un homme mort & despendu du gibet. Et apres mettre en la bouche dudit mort & laisser par l'espace de plusieurs iours en grand abomination & horreur pour parfaire lesdits malefices. Et avec ce porter sur soy vn drappel lyé ou cousu du poil deshonneste, & plain de la pouldre d'aucuns des os d'iceluy mort despendu. Celuy ou ceux qui le font ne commettent point seulement crime de leze maiesté humaine ou premier degré. Mais sont trahistres & desloyaux à Dieu leur createur & à leur Roy. Et comme Idolatres & corrompeurs, faulxaires de la foy catholicque sont dignes de double mort, c'est à sçauoir premiere & seconde: mesmement quant lesdictes forceries, superstitions & malefices sortissent leur effect en la personne du Roy par le moyen & malle foy desdits machinans. *Quia dicit dominus Bonauentura. li. ij. d. vi. Diabolus nunquam satisfacit voluntati talium, nisi antequam infidelitas idolatriæ immisceatur, sicut enim ad diuina miracula plurimum facit fides &c. Et ideo experientia de effectu prædictarum superstitionum secuta in personam præfati Regis probat clarè ibi fuisse Idolatriam & fidem peruersam. Item diabolus nihil faceret ad voluntatem talium in tali casu nisi exhiberetur ei dominiū quod multū affectat nec se exhibet ad tales inuocationes ipsis inuocantibus eum, nisi ipsum adorent & sacrificia & oblationes offerant aut pacta cum ipsis dæmonibus faciant. Item doctor sanctus secunda secunda in. xi articulo secundo dicit quod tales inuocationes nunquam sortiuntur effectum nisi fuerit falsa corruptio fidei idolatria & pactio cum dæmonibus. Eiusdem opinionis videtur esse Alexander de Hallis Richardus de Media-villa & Astensis in summa. Et communiter omnes Doctores qui de hac materia locuti sunt & sicut falsarij moneta & pecuniarum Regis. &c.* Ainsi ie voy que les Docteurs en Theologie dient tous d'un commun accord que telles sortileges, charmes & malefices ne sortissent point leur effect, se ce n'est par œuvre de dyable & par son faulx moyen. Et les charmes & autres superstitions que font lesdits inuocateurs n'ont point de vertu de nuyre ou ayder à quelque personne que ce soit: mais ce sont les dyables qui ont puissance de nuyre tant comme Dieu leur en permet. Lesquels ne feroient riens à la requeste desdits inuocateurs s'ils ne leur faisoient trois choses. C'est à sçauoir exhiber honneur diuine, lequel ne doit point estre exhibé fors à Dieu par action & conuenance par maniere d'hommage promesse & obligation, soy monstrier à eux faulxaires, & corrompeurs de la foy catholicque. Lesquelles choses ioinctes ensemble sont erreurs de foy & Idolatrie. Et par tant commettent le crime de leze maiesté. *Primum corrolarium.* S'il aduient que pour le cas dessusdits iceux inuocateurs de dyables idolatres & trahistres du Roy soient mis en prison & que pendant le proces contre eux ou auant iceluy iuger aucun leur facteur ou partici-



pans en leur crime les deliure ou face deliurer de sa puissance il doit estre puny comme les dessusdits idolatres comme trahistres du Roy & son souuerain seigneur & crimineux de leze maiesté ou premier & quart degré.

*Secundum corrolarium.* Tout subiect qui donne & promet à autrui grand somme d'argent pour empoisonner son Roy & souuerain seigneur de marché fait & les poisons ordonnez posé que les poisons ne fortissent point leur effect pour aucun empeschement suruenant par la grace de Dieu ou autrement tous les deux machinans commettent crime de leze maiesté en premier degré sont faux trahistres & desloyaux à leur Roy & souuerain seigneur & sont dignes de double mort premiere & seconde. *Tertium corrolarium.* Tout subiect qui sous dissimulation & faintise de gens & esbatemens à pensément & de malice à procuré faire vestemens pour vestir son Roy, & qui plus est le faire vestir avec plusieurs autres & y bouter le feu à escient pour le cuyder ardoir & luy tollir & distraire sa tresnoble seigneurie, il commet crime de leze maiesté ou premier degré, & est tyran, trahistre & desloyal à son Roy & pource est digne de double mort, c'est à sçauoir de premiere & seconde & mesmement quant par le feu sont ars & morts plusieurs nobles hommes villainement à grand douleurs.

*Quartum corrolarium est,* Tout subiect & vassal du Roy qui fait alliances avec aucuns qui sont ennemis mortels du Roy & du royaume ne se peut excuser de trahison, par especial quant il mande aux gens d'armes de la partie d'iceux ennemis qu'ils obtiennent les forteresses dudit royaume qu'ils se tiennent bien en icelles forteresses sans eux rendre: car quant viendra au fort il s'employera & leur fera faire secours & bon remede. Avecques ce empeschera les voyages & armées qui se feront contre lesdits ennemis en les reconfortant tousiours par voyes subtiles & secretes, est trahistre à son Roy & souuerain seigneur, de la chose publique du royaume, & commet crime de leze maiesté ou premier & quart degré & est digne de double mort, c'est à sçauoir de la premiere & seconde.

*Quintum corrolarium est,* Que tout subiect & vassal qui par fraude, barat & faux donner à entendre met dissention entre le Roy & la Roynie en faisant entendre à ladicte Roynie que le Roy la hayoit tant qu'il estoit deliberé de la faire mourir elle & ses enfans, & qu'il n'y auoit point de remede s'elle ne s'enfuyoit hors du royaume à tout ses enfans, en luy conseillant & requerant que ainsi le fait, luy offrant la mener hors du royaume en aucunes de ses villes ou forteresses & en adioustant vne cautelle ou subtilité, c'est à sçauoir qu'il est nécessaire que ladicte Roynie le tienne secret affin qu'elle ne soit empeschée ou arrestée a ce faire. Pour laquelle chose faire il voulut qu'elle faindist aller en plusieurs pellerinages de l'un à l'autre iusques à ce qu'elle seroit en lieu seur. Tendant par cela la mettre en ses prisons & ses deux enfans, & puis faire semblablement au Roy pour paruenir par ce moyen à la couronne & seigneurie du royaume. Il est tout subiect au crime de leze maiesté, en second, en tiers, & quart degré. Ceste verité s'en suit des precedentes & si appert tout cler à tout homme de bon entendement, & tant que se ie la vouloye prouuer, *effset adiuuare cælum facibus.*

*Sextum corrolarium est,* Que tout subiect & vassal qui par couuoitise d'auoir la couronne & seigneurie du royaume se trait deuers le Pape en imposant faulxement & contre verité à son Roy & souuerain seigneur crimes & vices redondans



dans à sa noble lignée & generation. Et par ce concluans que le Roy n'est pas digne de tenir la couronne d'un Royaume, ne ses enfans de l'auoir apres luy comme par succession, requerant audit Pape par tresgrand instance qu'il vueille faire declaration sur le fait de la priuation d'iceluy Roy & desdits enfans. Et declairer iceluy royaume deuoir appartenir à iceluy & a sa lignée & luy requerant donner absolution & à tous les vassaulx dudit royaume d'adherer à luy voudroient par dispensation du serment de feaulté & d'obligation, par lesquelles sont tenus & obligez tous subiects & vassaulx à leur Roy & souuerain Seigneur, & tous tels vassaulx & subiects sont trahistres subiects, tyrans & desloyaux audit Roy & au royaume. Et commettent crime de leze maiesté, ou premier & ou second degré.

*Septimum corrolarium est*, Que si l'aduiant qu'iceluy desloyal & tyran ( & animo deliberato ) empesche l'vnion de l'Eglise & les conclusions du Roy & des clerks dudit royaume, deliberez & concluz pour le bien & vtilité de sainte Eglise, il empesche l'executiō de l'Eglise se par force & puissance indeüement & contre raison tendant que le Pape soit plus enclin à luy octroyer sa faulse, mauuaise & inique requeste, iceluy tyran est desloyal à Dieu, à sainte Eglise, à son Roy & souuerain seigneur, & doit estre reputé scismaticque, & si est pertinax hereticque. Et si est digne de villaine mort, tant que la terre s'en doit ouurir soubs luy & l'engloutir en corps & en ame comme elle fait les trois scismaticques Dathan, Chores & Abiron, desquels nous lisons en la Bible. *Aperta est terra sub pedibus eorum, & aperiens os suum deuorauit eos cum tabernaculis suis descenderuntque viri eorum in infernū operti humo. Nume. xvi. Psal. Aperta est terra & deglutituit Dathan. &c.*

*Octauum corrolarium est*, Que tout vassal & subiect doit estre comme crimineux de lese maiesté, qui par couuoitise de venir à la couronne & seigneurie du royaume machine à faire mourir par priuez empoisonnemens & viandes enuenimées ou autrement iceluy Roy & ses enfans, il & tout tel vassal & subiect doit estre comme crimineux de leze maiesté en premier & tiers degré.

*Nonum & ultimum corrolarium est*, que tout subiect & vassal qui tient gens d'armes sur le païs qui ne font autre chose que menger & exiler le peuple, piller, robber, prendre, tuer gens & efforcer femmes & avec ce mettre capitaines és chasteaux, forteresses, ponts & passages dudit Royaume. Et avec ce fait mettre sus tailles & emprunts innumerables, faingnant que c'est pour mener la guerre contre les ennemis du royaume. Et apres quant lesdictes tailles sont leuées & mises au tresor du Roy, les emble, prent & rauist par force & puissance & en donnant desdictes pecunes fait alliances aux ennemis aduersaires & mal-vueillans desdits Roy & Royaume en se rendant fort & puissant pour obtenir sa damnable & mauuaise intention. C'est à dire d'obtenir la couronne & seigneurie dudit royaume. Il & tout tel subiect qui ainsi fait, doit estre puny comme tyran, faux & desloyal audit Roy & Royaume & comme criminel de leze maiesté ou premier & quart degré, & est digne de double mort, premiere & seconde. Et ainsi faiz fin de la premiere iustification,

*Sequitur minor.*

*La seconde partie de ladicte iustification ou proposition s'ensuit.*

H ij





R viens-ie à declairer & affermer madiète minor en laquelle j'ay à monſtrer que feu Loys nagueres Duc d'Orleans fut tant ambraſé & eſprins de couuoitiſe & honneurs vaines & richesses mondaines. C'eſt à ſçauoir d'obtenir pour ſoy & ſa generation, & de tollir & ſouſtraire à luy la treshaute & tres noble ſeigneurie de la couronne de France au Roy noſtre Sire qu'il machina & eſtudia par couuoitiſe, barat, ſortileges, & malengins à deſtruire la perſonne du Roy noſtre Sire, de ſes enfans & generation. En tant qu'il fut ſi eſprins de couuoitiſe, tyrannie, & tentation de l'ennemy d'enfer que comme tyrant à ſon Roy & ſouuerain ſeigneur, il commiſt crime de leze maieſté diuine & humaine en toutes les manieres & degrez declairez en madiète maior, c'eſt à ſçauoir de maieſté diuine & maieſté humaine en premier, ſecond, tiers & quart degrez. Et quant eſt de crime de leze maieſté diuine il appartient au ſouuerain iuge de la ſus, pourquoy ie n'en penſe point à faire eſpecial article. Mais és articles de leze maieſté diuine & humaine ie penſeray à en toucher par maniere d'incident. Ainſi donc me faut declairer par article comment il a commis crime de leze maieſté humaine en chacun des quatre degrez deſſus nommez. Pour laquelle choſe ie penſe à deuifer madiète minor en quatre articles. Ou premiere article ie penſe à declairer comment en pluſieurs & diuerſes manieres il a commis crime de leze maieſté humaine au premier degré & ſecôd degré, le tiers en tiers, le quart en quart degré. Quant au premier article qui ſera du premier degré lequel eſt quand l'iniure ou offenſe eſt directement contre la perſonne du Roy, c'eſt à ſçauoir que telle iniure peut eſtre faiète en deux manieres. La premiere maniere en machinant la mort & deſtruction de ſon Prince & ſouuerain ſeigneur. La premiere maniere ſe peut diuifer en pluſieurs manieres, mais quant à preſent ie ne la deuiferay qu'en trois manieres. La premiere maniere eſt en machinât de ſondit Prince la mort par ſortileges malleſices & ſuperſtitions. La ij. maniere par poiſons, venins & intoxication. La iij. maniere eſt pour occire ou faire occire par armes & eaüe, feu & autres violantes iniections. Qu'il ait eſté criminel la premiere eſpece ie le preuue. Car pour faire mourir la perſonne du Roy noſtre Sire en lāgueur & par maniere ſi ſubtile que ne fut nulle apparence, il feit par force d'argêt & diligence tāt qu'il fina de quatre perſonnes, dont l'vne eſtoit moyne apoſtot, l'autre cheualier, l'autre eſcuyer, & l'autre varlet, auquel il bailla ſa propre eſpée, ſa dague & vn anel pour dedier & conſacrer, ou pour plus propremēt parler, exercer ou nom des diables. Et pource que telle maniere de maleſice ne pouoit bonnement faire ſe ce n'eſtoit en lieux ſolitaires, & qui ſont loing de toutes gens, ils porterent leſdictes choſes en la tour de Mont-iaſ vers Laigny ſur Marne, & là ſe logerent & feirent reſidence par l'eſpace de pluſieurs iours. Et ledit Moyne Apoſtat comme deſſus qui eſtoit maître d'icelle euure diabolicque feit pluſieurs inuocations de diables, & par pluſieurs fois & iournées, dont ie vous diray d'eux enſemble qui furent entre Paſques & l'Ascenſion à vn dimenche tresbien matin deuant ſoleil leuant en vne montaigne pres de la tour de Mont-iaſ. Ledit Moyne feit pluſieurs choſes ſuperſtitieuſes requiſes à faire en telles inuocations de diables empres vn buiſſon. En faiſant leſdictes inuocations de diables ſe deſpouilla en pur ſa chemiſe & ſe meit à genoulx, & ficha leſdictes eſpée & dague par les poinctes en terre & le-

dit



dit anel meit aussi empres & là dit plusieurs oraisons inuocāt les diables, & tantost vindrent à luy deux diables en forme de deux hommes vestuz ainsi que de brun vert ce sembloit, dont l'un auoit nom Hernias, & l'autre Estramain. Et lors leur fait honneur & tresgrand reuerence, & si grand comme on pourroit faire à Dieu nostre sauueur. Et à ce fait se tira derriere iceluy buissō. Et iceluy diable qui estoit venu pour ledit anel, le print & l'emporta & s'esuanouÿst. Et iceluy qui estoit venu pour ladicte espée & dague demoura. Et puis print icelle espée & dague, & puis apres s'esuanouÿst comment auoit fait l'autre. Et tantost apres iceluy Moyne retourna & vint où lesdits diables auoient esté, & trouua iceux dague & espée couchez de plat & que ladicte espée auoit la teste rompue: & trouua ladicte poincte en la pouldre où iceluy diable l'auoit mise. Et apres attendit par l'espace de demie heure, l'autre diable qui auoit emporté l'anel, lequel retourna & luy bailla ledit anel qui estoit apparēt rouge ainsi qu'escarlatte comme il sembloit pour l'heure, & luy dit cest fait, mais tu les mettras en la bouche d'un homme mort, ainsi & en la maniere que tu scais, & lors s'esuanouÿst, & ledit Moyne refait la poincte d'eux cuydant ardoir le Roy nostre Sire, mais à l'ayde de Dieu & à l'ayde des tresexcellentes dames de Berry & de Bourgongne & des autres dames & damoiselles qui là estoient, il eschappa.

A P R E s ie vueil declairer que ledit criminel Duc d'Orleans à commis crime de leze majesté en la seconde maniere dudit premier degré, c'est à sçauoir qu'il a fait alliances du Roy & du Royaume. Et pour declairer comment, la verité est telle qu'apres ce que le Roy nostre Sire & le Roy Richard d'Angleterre furent ensemble en amitié confermez par le traicté du mariage dudit Roy Richard & l'aisnée fille de France, le Roy Richard voulut commēt que ce fut parler au Roy nostre Sire pour sa grād santé, & si assemblerent ensemble & lors luy dit que les enfermetez de son corps & grans maladies qu'il auoit, luy estoient venues par le moyen & pourchas desdits Ducs d'Orleans & de Millan, & que pour Dieu il s'en voulsist prendre garde. Et pour ceste cause le Roy print si grande indignation contre ledit Duc de Millan & non sans cause, que son herault, qui portoit ses armes, ne s'osoit plus veoir deuant le Roy. Et si tost que les choses dessusdictes vindrent à la cognoissance dudit Duc d'Orleans il conceut haine mortelle contre ledit Roy Richard, & s'enquist qui estoit le greigneur aduerfaire qu'il eut en tout le monde, & trouua que c'estoit Henry de Lenclastre & fait tant qu'il eut alliāce avecques luy, l'une pour destruire le Roy & l'autre pour renforcer & rendre puissance à paruenir à sa damnable intention, & furent d'accord les dessusdits de labourer & machiner de toute leur puissance par toutes les voyes & manieres possibles à eux la mort & destructiō des deux Roys pour obtenir les deux couronnes de France & d'Angleterre. Celle de France pour Loÿs d'Orleans. Et celle d'Angleterre pour Henry de Lenclastre: Henry en est venu à son entente, mais Loÿs, non Dieu mercy, & qu'il soit vray desdictes alliāces, iceluy Duc d'Orleans à tousiours fauorisé, aydé & conforté ledit Henry de Lenclastre & les autres Anglois de la bende dudit Henry de tout son pouoir, & expressement manda à iceux Anglois ennemis du Roy & du Royaume qui estoient au chastel de Bordes, qu'ils se tinssent bien & qu'ils ne rendissent pas leur chastel aux François & qu'il empescheroit le siege, ou qu'il leur fineroit de bon secours ou remede



toutesfois qu'il en feroit neceffité & outre empescha plusieurs voyages entrepris contre ledit Henry. Et ainfi fut tyrant & desloyal à son Prince & fouuerain seigneur & à la chose publicque de ce Royaume & commist crime de leze majesté en la deuxiesme maniere dudit premier degré. A la confirmation de ce fait me meut vne chose que ie vous diray. Il est vray que ou temps qu'on detenoit le Roy Richard, que ledit Henry tendoit à faire mourir aucuns plusieurs des seigneurs d'Angleterre luy disoient qu'il y auoit tresgrand peril pour la doubte des François. Aufquels il respondit que de ce ne conuenoit faire aucune doubte, car il auoit vn puissant amy en France auquel il estoit allié: c'est à sçauoir le Duc d'Orleans frere au Roy de France lequel ne souffriroit point par quelque chose qu'on attentast contre ledit Roy Richard & qu'aucun assault en fut par les François à l'encôtre des Anglois. Et pour les faire plus certains fait lire les lettres desdictes alliances. Ainfi appert que ledit criminel Duc d'Orleans à commis crime de leze majesté en plusieurs manieres & especes du premier degré. Ainfi fine le premier article de madiète minor: Nonobstât qu'il y ayt plusieurs autres crimes treshorribles en plusieurs manieres & diuerfes especes de crime de leze majesté en ce premier degré commis & perpetrez par iceluy criminel Duc d'Orleans, lesquels mondit seigneur de Bourgongne a reserué à dire en temps & lieu toutesfois que mestier en fera.

A P R E S ie viens au second article de madiète minor, auquel ie vueil monstrier comme ledit criminel Duc d'Orleans à commis crime de leze majesté. Nō pas seulement au premier degré, mais au second: lequel degré est de faire offence à l'encontre du Roy en la personne de sa femme espouse: car il est vray que quatre ans ou enuiron que le Roy estoit encheu en sa maladie ledit criminel Duc d'Orleans lequel ne cessoit de machiner par quelle maniere il peust venir à sa dānable & mauuaise intention, pensant que s'il pouoit tenir la Royne & ses enfans hors du Royaume il viendroît de leger à son intétion dit & fait sçauoir à la Royne faulcement & contre verité que le Roy estoit merueilleusement meü & indigné à l'encontre d'elle. Et pource il se conseilloit que si chierement comme elle l'aymoit qu'elle & ses enfans se meüssent hors de la voye du Roy & en tel lieu qu'ils feüssent hors de sa puissance tendant à la mener elle & sesdits enfans en la Duché de Luxembourg affin quād il les eut tenuz en la Duché de Luxembourg d'en faire à sa volenté & promettoit à ladicte Royne qu'il la tiendroît en ladicte Duché bien & seurement & sesdits enfans aussi. En disant outre qu'apres la santé du Roy s'il veoit & apperceuoit que le Roy ne fut plus meü contre elle & qu'elle peüst seurement retourner par deuers le Roy à quoy il promettoit à son pouoir à induire le Roy, l'iroit querir elle & ses enfans & la rameneroit au Roy. Et au cas que le Roy demourroit en propos & imagination contre elle, il la tiendroît ou païs de Luxembourg selon son estat quiconques le voulsist veoir, fut le Roy ou autre. Et affin de coulourer sadicte mauuaistié & intention faisoit entendant à ladicte Royne qu'il conuenoit que la chose fut faicte caultement & subtilement & tellement qu'ou chemin elle ou sesdits enfans ne peüssent auoir empeschement aucun. Et pour ce faire & executer auoir aduisé que la Royne faindroit qu'elle & sesdits enfans allassent à S. Fiacre en pelerinage & d'illec à nostre Dame de Lieffe. Et que de là il la conduiroit iusques audit lieu de Luxembourg



bourg & que là luy bailleroit ou feroit bailler l'estat d'elle & de ses enfans honnorablement comme appartient, en attendant que la voulenté du Roy fut muée enuets elle & lesdits enfans. Et de fait pressa fort ladicte Royne & par plusieurs fois en recitant en effect les parolles telles comme i'ay touché. Tédant affin d'auoir la Royne & sesdits enfans pour en faire sa voulenté dont ils furent en grand peril, & eussent esté encores plus se n'eussent esté aucuns bienueillans de ladicte Royne & de sesdits enfans auxquels ladicte Royne se conseilla, lesquels luy dirent que c'estoit faulce deception & tresgrand peril. Et pour laquelle chose ladicte Royne bien aduisée mua son propos apperceuant la faulce & damnée intention dudit criminel feu Duc d'Orleans. Si se determina à demourer par deça & non aller audit voyage. Ainsi appert le deuxiesme article de madicte minor, c'est à sçauoir que ledit criminel Duc d'Orleans à commis crime de leze majesté ou tiers degré. Et combien que ce appert assez par l'article deuant declairé, toutesuoyes ie monstre qu'il a commis crime de leze majesté en trois autres manieres de ce tiers degré. La premiere est par venins, poisons & intoxications. La seconde par fallaces & deceptions. Quant à la premiere maniere que ledit criminel Duc d'Orleans machina à faire manger à monseigneur le Daulphin dernier trespasé vne pomme empoisonnée & venimeuse, laquelle fut baillée à vn enfant & luy fut chargé qui la portast & baillast audit monseigneur le Daulphin & non à autre comme qu'il fut. Si aduint qu'en la portât il passoit parmy les iardins de S. Pol & là rencontra la nourrice d'un des enfans du Duc d'Orleans, laquelle tenoit iceluy fils entre ses bras. Et pource que ladicte pomme sembloit à ladicte nourrice belle & bonne. Elle dit à l'enfant qui la portoit qu'il luy baillast pour donner à son fils, lequel luy respondit que non feroit & qu'il ne la bailleroit fors qu'à monseigneur le Daulphin. Et pour ce qu'il ne luy voulut pas bailler de son gré elle luy osta par force & la bailla à manger à son fils dont il cheut en maladie & mourut assez tost apres. Si fais cy vne question. Cest innocent est mort de la pomme empoisonnée. En doit estre pugny l'enfant qui la portoit ou la nourrice qui luy bailla. Je respons que nenny, car l'un ne l'autre n'y eut coulpe: mais la coulpe & la trahison en doit estre attribuée à ceux qui l'empoisonnerent ou la feirent porter. La deuxiesme maniere est par fallace & deceptiō, c'est à sçauoir par donner faulx à entendre. Et combien que ceste maniere apperra par les cas dessusdits & declarez de la Royne & de ses enfans qu'il voulut mener en la ville de Luxebourg. Toutesfois la vueil encores declairer par vn autre cas. C'est à sçauoir que ledit criminel Duc d'Orleans perseuerāt tousiours en sa mauuaise & damnable intētion a esté & enuoyé par plusieurs fois par deuers le Pape, tendant affin de priuer & debouter le Roy de sa personne du Royaume & de la dignité royale. Et pour paruenir à sa damnable intention en trouua faulcement & controuua malicieusement & contre verité plusieurs cas & crimes contre la personne du Roy & redondans à sa noble generation & lignée, lesquels il donna à entendre au Pape, en le requerant qu'il vouldist declairer le Roy sa posterité inhabille à tenir telle dignité comme le Royaume de France & qu'il vouldist absouldre ledit criminel & les autres feaulx du Royaume qui à luy se voudroient adherer du serment de fidelité en quoy ils estoient astrains deuers le Roy & qu'il vouldist declairer le plus prochain de sa posterité de veoir venir & succeder à la



couronne & seigneurie dudit Royaume de France. Et pour mieux conduire son fait & plus tost encliner le Pape à condescendre à sa faulſe iniuſtice & inique requeſte, à tousiours fauoriſé le fait dudit Pape & ſouſtenu en pluſieurs & diuerſes manieres, comme il appert par la voye de ceſſion de la ſubſtration & reſtitution ſur le fait des pecunes & de l'eſpitre de Thoulouze. Ainſi appert le tiers article de madiſte maior declairé, nonobſtant qu'il ſeit pluſieurs autres crimes innombrables, tresgrans & treshorribles de leze majeſté au tiers degré, lesquelz mondit ſeigneur de Bourgongne à reſeruez preſt a declarer en temps & en lieu toutefois que meſtier ſera. Apres ie viens à declairer le quart & dernier article de madiſte minor, c'eſt à ſçauoir que ledit criminel feu Duc d'Orleans a commis crime de leze majeſté au quart degré, lequel degré eſt que quand ladiſte offence eſt directement contre le bien de la choſe publique du Royaume, Et combien que ce appert aſſez par les cas deſſus declairez des alliâces qu'il auoit fait avec les ennemis de ce Royaume, & qu'ils ſoient expreſſement ennemis de la choſe publique, ie le vueil declairer luy auoir commis crime en autres manieres. La premiere, en ce qu'il a tenu les gens d'armes ſur les champs en ce Royaume par l'eſpace de quatorze ou quinze ans, qu'ils ne faiſoient autre choſe que manger & exiler le pauvre peuple, piller, rober, rançonner, occire, tuer & prendre femmes à force & mettoit capitaines és fortereffes, pons & paſſages de ce Royaume, pour paruenir à ſa faulſe & damnable intention: c'eſt à ſçauoir uſurper la ſeigneurie du Royaume. La ſeconde maniere eſt qu'en ce qu'il a fait mettre tailles & empruns intollerables ſur le peuple en faignant que c'eſtoit pour ſouſtenir la guerre contre les ennemis du Royaume. Et en donnant d'icelles pecunes aux ennemis aduerſaires & mal vueillans du Roy & du Royaume & en a fait ſes allies en intention d'affoiblir le Roy & ſe rendre plusfort & plus puiſſant pour obtenir ſa damnable entreprinſe de paruenir à la couronne & ſeigneurie dudit Royaume. Ainſi appert que i'ay declairé & remonſtré comment ledit criminel Duc d'Orleans a commis crime de leze majeſté au quart degré & en pluſieurs manieres, pluſieurs autres crimes de leze majeſté tresgrans & horribles, non pas tant ſeulement du quart degré, mais au tiers, ſecond & premier en pluſieurs cas & diuerſes manieres d'eſpeces pour paruenir à ſa damnable & mauuaife intention: à ſçauoir à la trefnoble couronne & ſeigneurie de France & à l'oſter & ſouſtraire au Roy noſtre Sire & à ſa generation, lesquelz autres crimes mondit ſeigneur de Bourgongne à reſerué à declarer en temps & en lieu quant meſtier en ſera. Et en outre appert madiſte minor declairée, laquelle ioinct à ma deſſuſdiſte maior. S'enſuit clerement & en bonne conſequence que mondit ſeigneur de Bourgongne ne doit en riens eſtre blaſmé ne repris dudit cas adueni en la perſonne dudit criminel le Duc d'Orleans, & que le Roy noſtre Sire n'en doit point eſtre mal content ſeulement: mais doit auoir mōdit ſeigneur de Bourgongne & ſon fait pour agreable & l'auctorifer en tant que meſtier ſeroit. Et avec ce le doit guerdonner & remunerer en trois choſes, c'eſt à ſçauoir en amour, hōneur & richesses. A l'exemple des remunerations qui furent faiſtes à monſeigneur S. Michel l'Archange & au vaillant homme Phinée, deſquelles remuneratiōs i'ay fait mention en madiſte maior en la probation de ma tierce verité. Et l'entens ainſi en mon gros & rude entendement que le noſtre Sire doit plus que deuant ſa loyauté & bonne renommée



renommée faire prononcer par tout le Royaume & dehors le Royaume publier par lettres patentes par manieres d'epistre ou autrement. Iceluy Dieu vueille que ainsi soit il fait. *Qui est benedictus in secula seculorum. Amen.*

A P R E S laquelle proposition finée iceluy maistre Iean Petit requist audit Duc de Bourgogne qu'il le voulsist aduoüer, lequel Duc luy accorda & l'aduoüa en la présence du Daulphin, qui là representoit la personne du Roy de Cecille avecques tous les autres par dessus nommez, & apres dit iceluy proposant qu'iceluy Duc de Bourgogne retenoit & declairoit encores aucunes autres choses plus grans à dire au Roy quand lieu & temps seroit. Et brief ensuiuant se retrahirent tous les Princes chacun en son hostel & ledit Duc de Bourgogne accompagné de plusieurs hommes d'armes & gens de traict s'en retourna en son hostel d'Arthois. Si fut adonques fait grand murmure dedans la ville de Paris tant des Princes, Barons & nobles hommes comme du clergé de la communauté, pource qu'il fut assez commun en icelle de la iustification, & aussi les accusations qu'auoit fait faire & proposer ledit Duc de Bourgogne contre ledit Duc d'Orleans deffunct, & y eut plusieurs & diuerses opinions. Car ceux qui tenoient le party du Duc d'Orleans disoient icelles accusations estre faulses & deceuables. Et ceux tenans la partie de ceux de Bourgogne disoient le contraire. En apres brief ensuiuant Ysabel Roine de France pleine de grād admiratiō & cremeur, le Duc d'Acquitaine son fils & ses autres enfans se partirēt de Paris accompagnez de Loÿs Duc de Bauiere frere à la Roine, & s'en allerent faire leur residence ou chastel de Melun. Et tost apres le Roy Charles qui grand espace auoit esté malade retourna en santé, deuers lequel iceluy Duc se retrahit & trouua la maniere qu'il fut r'accordé & reconcilié avecques luy, & impetra & aussi. Et obtint lettres seellées du scel du Roy & signées de sa main. Par lesquelles luy estoit pardonné le cas n'a guerēs aduenü en la personne du Duc d'Orleans, dont moult de grans seigneurs & aussi autres saiges furent moult esmerueillez: mais de present ne le pouoient auoir autre.

*Comment le Roy enuoya deuers le Pape ses ambassadeurs solennels. La responce qu'ils eurent. Et comment depuis il excommunia le Roy & ses adherens.*

CHAP. XL.

**E**N ce temps vint deuers le Roy à Paris & deuers les seigneurs qui estoient avec luy certains messagiers qui rapporterent que le Pape & son aduerfaire ne vouloient point eux deporter ne delaisser la Papauté comme ils auoient promis & conuenü en la cité de Saxonne & autres lieux. Mais prolongerent la besongne de l'vniuerselle Eglise par dilations de nulle valeur tresfrauduleusement. Pour lesquelles nouuelles le Roy escriuit & fait sçauoir au Pape par Iean de Chasteau-Morant & Iean de Coursen cheualiers ses ambassadeurs qu'ou cas qu'vnion ne seroit trouuée en l'Eglise vniuerselle dedans le iour de l'Ascension prochain venant, luy, le clergé, les nobles & le peuple de son Royaume & de la Daulphiné, plus n'obeyroient à luy ne à son aduerfaire. Et que plus ne fera ne par ses subiects ne souffrira estre à luy faicte aucune obeïssance. Pour laquelle ambassade & pour le contenu és lettres enuoyées de par le Roy iceluy Pape nommé Benoist ne fut pas bien content. Iasoit ce qu'il n'en



monstra point semblant à iceux ambassadeurs, ainçois leur feit responce absolute, que brief ensuiuant par ses messagiers il enuoyeroit responce à leur Roy sur le contenu des lettres qu'ils auoient apportées. Apres laquelle responce prindrent congé & s'en retournerent deuers le Roy & luy racomptèrent & à son conseil la responce qu'ils auoient eüe du Pape. Et en assez brief temps ensuiuant vint en la ville de Paris vn messagier du Pape dessusdit lequel en vn certain iour vint en l'hostel de S. Pol ou estoit le Roy lequel estant en son oratoire sur le commencement de la messe entra iceluy messagier dedans & luy presenta vnes lettres Apostolicques, & puis tantost se departit. Et apres ladicte messe le Roy feit ouurir icelles lettres & les lire toute au long. Apres la lecture desquelles veu qu'ils contenoient excommunication contre le Roy & tous ses subiects. On feit querir par tout Paris iceluy qui les auoit apportées : mais point ne fut trouué, car il s'estoit departy & en allé le plus couuertement qu'il auoit peu. Et adoncques le Roy & ceux de son conseil voyans la forme & maniere de ladicte excommunication tant par l'enhort & instigation de l'vniuersité de Paris comme de la plus grand partie de ceux de son conseil, & avec ce tous les Princes là estant furent forment esmeuz contre luy. Et pourtant se separa & retrahit de l'affection & obeissance d'iceluy Pape.

*S'ensuit la teneur desdictes lettres Apostoliques receües par le Roy.*

**B**Enoist Euesque serf des serfs de Dieu, à treschier fils en Iesus-Christ Charles Roy de France salut & benediction Apostolicque. Pleut à Dieu treschier fils que tu eusses plaine cognoissance de l'amour & affection que nous auons à ta noble & puissante personne, & que tu entendisses la pureté de nostre courage, en verité tu cognoistroyes comment nous auons grand ließe de ta bonne prosperité & profit comme doit auoir le pere de son enfant & grand tristesse & douleur de tes tribulations & dommages. Se de ce eusses cognoissance tu ne vouldroyes pas ouïr les mal parlans nous detrayans & faulcement nostre proces & affaires nous reprouchans affin que par lesdits mesdisans tu ne fusses pas corrompu. Mais nous aymeroyes comme le fils doit aimer son pere, & cesseroient en ton Royaume les tourbillons de tes persecutions faictes contre nostre mere sainte Eglise. Tu sçais bien glorieux Prince & par publique renommée est venu à ta cognoissance qu'en grand sollicitude & instance nous auons souffert moult grans labeurs affin que par nous la paix de l'Eglise peut estre trouuée, & auons procuré en diligéce vers iceux qui ont nourry par plusieurs ans le scisme & diuision moult perilleux, en occupant le siege Apostolicque follement par entreprinſes de fait, & mesmemēt vers l'Ange Corarian qui s'appelle Gregoire (lequel pour le present en ceste partie est aduersaire de l'Eglise) & que riens n'a voulu mener à effect de ce qu'il auoit promis à laisser la papalité & conuenir & assembler en la ville de Saxonne & autres lieux de son obeissance: mais a prolégé & demené la besongne de Dieu par dilations de nulle valleur. Et jaçoit qu'il soit tout notoire tant qu'il ne peut estre celé qu'il n'a point tenu ne tient à nous que vraye vnion ne soit briefuement en sainte Eglise de Dieu & tout scisme rebouté & mis à neant: toutesfois ils sont aucuns comme nous auôs ouï dire qui par deuers toy par malice & sans cause, de nous murmurent



murent, eux enforçans par laidenges faulſes & mauldictes de deſchirer & diminuer ou admoindrir la pureté de noſtre renommée. Aucuns ſont mettant leur eſtude troubler la deuotion de toy & des autres Princes de ton ſang, en blaſmant noz faits iniuſtement, & affermant ce qui n'eſt pas verité, c'eſt à ſçauoir que nous ne mettons point diligence que vraye vnion ſoit en ſaincte Eglise. Vrayement à telles perſonnes doit on pour nous verité reſpondre, & deſtruire les fictions des faulſetez d'iceux & ſi croyōs qu'il a eſté fait par l'enhortement d'iceux, que nous n'auons point les droits de noſtre chambre ja par l'eſpace de deux ans: car iceluy edict a eſté fait en ta court, par lequel noz droits nous ſont ſouſtraits, & à nous n'eſt pas obeÿ en ton Royaume, & toutesfois nous eſperiōs à auoir conſolation & repos par toy, duquel les predeceſſeurs grãdement au temps paſſé ont labouré pour deſtruire ſciſme & erreur en ſaincte Eglise, & auoir paix & vnion. De rechief ceux de ton Royaume ſont rebellion contre l'Eglise Rommaine, en appellant de nous contre les conſtitutions de canon, & leur eſt ſouffert ſemer diuerſes erreurs cōtre la pureté de la loy. Mais encores avec ce que deſſus eſt dit que grãdement nous deſplaiſt à racompter. En ceſte ville en noſtre preſence noſtre chier fils Iean de Chasteau Morant & Iean Courchey nobles hōmes tes ambassadeurs ſont venuz qui de par toy nous ont preſenté vnes lettres ſeellées de ton ſeél, par leſquelles tu nous fais à ſçauoir que ſe dedās la feſte de l'Ascenſion prochain venant, vnion n'eſt faiçte & trouuée, & vn vray & ſeul Pape & paſteur de l'Eglise vniuerſelle n'eſt eu ou eſleu, toy, le clergé, & autres gens de ton Royaume, & auſſi de la Duché de Guyenne ferez neutralité, & ne feras, preſteras ou demonſtreras, ne ſouffriras par aucuns de tes ſubieçts de adonc n'en apres enſuiuant à nous ou à aucuns qui tiēnent noſtre eſtat eſtre faiçte, ou demonſtrée aucune obediēce. Pour leſquelles choſes treſchier fils, tu dois grandement conſiderer ſe nous auons cauſe d'auoir grand douleur au cuer. Ce ne ſont mie ſignes d'amour de chier fils demonſtrées à ſon pere, des choſes deſſusdictes enſuiuent moult d'autres inconueniens: car iceux qui à toy & aux autres Princes de ton ſang baillent telles parolles enuenimées, toy & les autres pourroient faire cheoir en perdicion avec eux. En ce la renommée de ta noble meſgnie eſt grandement bleſſée, & par grand peché en ce eſt faiçte detractiō à la diuine puiffance, en voulant mettre terme & fin à la miſericorde de Dieu. L'vnion que tu pēſes eſt droictemēt vn peché & perſeueratiō du ſciſme: car noſtre aduerſaire & ſes enſuiuās pour les choſes deſſusdictes eſleuez en orgueil ne pourrōt point eſtre ployez & induits à con corde. Mais ſeront plus obſtinez ayans eſpoir que prochainement à nous & noſtre partie ſera faiçte ſubſtraction d'obediēce. Et par ainſi eux qui eſtoient ja tous mattez & deſconfits par noz oppreſſions ſeront renforcez & corroborez. Vrayemēt treſchier fils, nous à qui Dieu a baillé la garde de ſon peuple ne pouōs plus ſouffrir par raiſon telles choſes qui redondent en l'offence de la diuine maieſté & peril des ames & turbation de ladiçte vnion, mon election & renommée de toy & de ta meſgnie, nous grandement doulans de ta deception par telles ſubieſtions & mauuais enhort. Te prions & enhortons en noſtre ſeigneur noſtre vray ſauueur que ne vueillez ouÿr iceux mauuais qui par aduerture quierent à trouuer leur prouffit ou dommage de nous & de l'Eglise, & à la perturbation de toy & des tiens. Quant eſt de noſtre proces tu as aſſez co-



gnoissance pleinement, par ce que nous à toy auons escrit. Vueilles estudier & considerer en repos d'esprit en ton faige conseil, les causes, ordonnances & pure intention de nous. Vueilles en outre reuocquer, rappeler & adnuller les griefues emprinses & dommaiges faits à nous & à l'Eglise, en tous Royaumes & en tes terres, & ramener ou faire ramener par vray iugement à l'estat deu & premier. En apres te mandons que ne vueilles nouuellement proceder à ce que tu nous as escrit: car il n'affiert pas à l'honneur de ta excellente personne. S'ain-si est que tu vueilles obeir aux mandemens & exhortations de ton pere avecques la loüenge humaine, tu auras moult grand merite perdurablement deuers Dieu, en enclinant à toy la faueur du siege Apostolicque & la nostre. Trefamé fils garde qu'aucun ne te deçoieue par vaine erreur. Si voulons que tu saches, & par ces presentes te faisons sçauoir qu'outre les peines & sentences prononcées en droit: Nous auons fait autres constitutionis nagueres, que nous à toy enuoyons sur nostre bulle avecques ces presentes, par lesquelles toy & autres tellement delinquans & desobeissans (que Dieu ne vueille) seront pugniz. Et ce nous auons fait pour toy & les autres Princes preseruer & retraire de si grief offence de leze majesté tant qu'en nous est pour l'amour paternel qu'auons à toy & aux autres Princes, & affin qu'au dernier iour du iugement nous ne soyons pas coupables, en dissimulent des ames qui par ce pourroient perir. Donné au Port-de-Venerre ou Diocese de Gênes le xxiiij.iour du mois de Mars le quatorziesme an de nostre Papalité.

*S'ensuit la teneur des bulles dudit Pape de la Lune par lesquelles il excommunie le Roy & les autres.*

**B**Enoist Euesque serf des serfs de Dieu à perpetuelle memoire par ce que les malices des hommes croissent. Nous voyans le monde aller de mal en pis, & les pensées des hommes tellemēt accoustumées à mal que tousiours adioustent mal sur mal. Et affin que tous bons meslez avec les mauuais ne soiēt pas corrompuz par malice ou erreur, & que la hardiesse des mauuais presumptueux soit restraincte des vices, aux moins par la cremeur de la peine. Il est venu à nostre cognoissance par publicque & commune renommée, qu'aucuns plains de perdition tāt d'Eglise comme seculiers vueillans monter plus hault qu'ils ne doiuent, dont ils ont à trespucher perilleusement, abusez & deceuz par les fallaces de cil qui se transfigure en forme d'ange de lumiere, affin qu'il deçoieue les autres, ont preparé grand escandalle aux simples & aux frailles, & grand matiere de trauail à ceux qui sont plus fermes & plus estables, eux à leur pouuoir efforcans de destruire & diuiser l'Eglise Catholique par scisme, & empescher la tressaincte vnion d'icelle: car jaçoit qu'apres que nous feusmes prins pour estre Euesque souuerain & Apostolicque. Et aussi deux ans par auant que nous estions en meur estat & eusmes mis grand diligence de destruire le scisme horrible qui ja a duré en l'Eglise de Dieu par trente ans ou à peu pres, dont c'est grand douleur, & encores dure pour le peché des hommes, & que nous eussions déclaré à l'Ange Corrarian (qui s'est bouté deffait ou siege Apostolicque & s'est fait par ceux à luy obeissans nommer Gregoire)



Gregoire) la voye de renonciation par nous estre à faire purement & franchement comme il est és lettres Apostolicques données à Marceille le second iour de Feurier l'an dessusdit de nostre Papalité, plus pleinement contenu. Et de rechief auions promis de conuenir en certains lieux auecques l'Ange Corrarian & de comparoir en nostre personne pour demener deüement les choses dessusdictes à execution comme il appert par les instrumens de ce faits. Toutesfois les dessusdits fils d'iniquité s'efforcent de tout leur pouuoir, & par manieres non licites, par fraudes & couleurs fainctes d'empescher nous & noz freres les Cardinaulx en ceste saluable execution, despitans les liens de sainte Eglise & faingnans eux auoir grand amour & desir à l'vnion de sainte Eglise, en eux soustrayans follement de l'obeissance de nous & de nostre Eglise, & à la deffence de leur erreur appellans de nous: toutesfois il n'appartient point de ce faire de droit. Et jacoit que patiemment nous ayons souffert aucunement les choses dessusdictes par dissimulation en reuocquant iceux & promouuant à penitence & retourner au sein de leur debonnaire mere sainte Eglise. Neantmoins ils perseuerent en plus grand presumption & hardiesse. Pource, apres meure deliberation eüe sur les choses dessusdictes, par ceste constitution perdurablement à durer, nous prononçons sentence d'excommunication contre ceux qui empescheront scientement l'vnion de l'Eglise susdicte, ou nostre personne ou les personnes de noz venerables freres les Cardinaulx de sainte Eglise de Romme, serôt en l'execution des choses dessusdictes par nous offertes & accordées auecques l'Ange Corrarian & ses messagiers: ou qui appelleront de nous ou de noz successeurs les Euesques Rommains entrans à la Papalité droicturierement: ou qui bailleront faueur ausdictes appellations, substractions, ou perturbations par eux ou par autrui par quelque occasion ou couleur. Et tous ceux qui obstinément affermeront iceux non estre liez ou excommuniez par nostre sentence de quelque degré qu'ils soient en dignité de Cardinal, de Patriarche, d'Archeuesque, d'Euesque, d'auctorité, de majesté Royal ou Imperial, ou de quelque estat tant d'Eglise cōme seculiere. De laquelle sentence nuls ne peuuent estre absous fors par le Pape, excepté tant seullement en l'article de la mort. Et sil aduenoit que par aduerture aucuns ainsi feussent absous audit article, nous voulons & declairons que tantost qu'il sera guarý se presentera au siege Apostolicque pour receuoir absolution, en faisant satisfaction comme il appartiendra de iustice. Laquelle sentence ainsi iectée par nous sil l'a soustenu par courage dur & obstiné par l'espace de vingt iours, sil est lay de quelque estat degré condition ou dignité & dessus nommez, Princes ou autre seculiers personne quel qu'il soit, nous le submettons à interdit de l'Eglise, auecques toutes ses terres, villes, citez, chasteaux, & generallyment tous autres lieux qu'il tient ou tiendra. Si ce ont esté vniuersitez semblablement elles seront subiectes à l'interdit de sainte Eglise. Et pource qu'à bon droit aucunesfois par ingratitude les benefices sont reuocquez, tous ceux & vn chacun d'iceux tant d'Eglise comme seculiers, & ceux qui és choses dessusdictes leur donnent faueur conseil & ayde comme dit est, & auront soustenuës lesdictes sentences par l'espace de vingts iours prochains apres ensuiuans, seront priuez de toutes indulgences, priuileges, graces, libertez & franchises à eux données & accordées par le siege Apostolicque conioincte-



ment ou diuifement fous quelque forme ou expreffion de parolles. Lesdits clerks feront priuez de tous leurs benefices d'Eglife, dignitez, perfonnats ou offices à tout cure, & fans cure. Et auffi jaçoit qu'ils foient de la dignité d'Euefque, d'Archeuefque, Patriarche, Cardinal ou quelconque autre dignité des maintenant par auctorité Apoftolicque, & par pleine puiffance, de fait & de certaine fcience, nous le declaronz efre priué, Et les vaffaulx & hommes obligez & tenuz à eux par ferment de loyauté ou par quelconque autre obligation, nous les declairons efre quictes & abfouz. Et les fiefs, honneurs, droits, offices & autres biens non meubles tenuz des Eglifes retourneront aux gouuerneurs d'icelles, pour en difpofer à leur vouldé. Ne nulle audience de caufe ne fera donnée à tels pecheurs & transgreffeurs, leurs sentences, proces faits par iceux, qui font tabellions ne feront de nulle valeur. En apres tous ceux qui auroient fait compaignie & alliance durant ladicte contumace & rebellion, ou qui leur auront aydé ou donné confeil, faueur ou ayde, publicquement ou fecrettement: fi ce font fingulieres perfonnes, citez, chasteaux ou lieux, ils feront pugniz, interdits & excommuniez ainfi comme lefdits pecheurs & transgreffeurs, & par la maniere que deffus eft declairée, & auecques voulons & eft nostre intention que les peines ordonnées de droit par noz predeceffeurs contre tels pecheurs, font & demourent en leur valeur & effect. Nonobftant quelsconques constitutions, ordonnons ces libertez, graces & indulgences Apoftolicques, octroyées & données de nous ou de noz predeceffeurs Euefques Rommains, par quelconque forme & maniere qu'elles foient données de certaine fcience, & par ces prefentes nous les reuocquons, en tant qu'elles aucunement pourroient efre contraires ou bailler empeschement aux chofes deffusdits. A nul homme doncques ne foit licite d'enfreindre ou aller à l'encontre par hardieffe folle ou prefumptueufe de ces prefentes nostre declaration, fupposition, iuration, confiscation, adnullation, caffation, irritation, murmuration, queftion, vouldé. Se aucuns font fi hardis d'aller à l'encontre ils faichent eux encourir l'indignation de Dieu tout puiffant, de S. Pierre & de S. Paul fes benoifts Apoftres, Donné à S. Victor de Marfeille la vingt & troiefme kalende de Mars, & de nostre Papalité l'an treziefme.

*Pour l'an mille cccc. & viij.*

*Comment l'Vniuerfité de Paris fait propofer deuant le Roy contre le Pape de la Lune, & du partement du Roy Loïs. Et du Borgne de la Heufe.* CHAP. XLI.



Au commencement de cest an l'vniuerfité de Paris fait propofer par maistre Iean Courteheufe natif de Normandie contre le Pape Benedic en la maniere cy apres declairée, où estoient presens le Roy de France, de Cecille, les Ducs de Berry & de Bourgongne, de Bar & de Brabant, les Comtes de Mortaigne, de Neuers, de S. Pol, de Tancarville, le Recteur de l'Vniuerfité, les supposts & deputez de par icelle, & plusieurs autres grans seigneurs auec grād multitude de clergé, de peuple de Paris. Le Comte de Vvaruich Anglois, les ambassadeurs d'Escoçe & de Galles qui lors estoient tous à Paris, & fut celle proposition faicte en la grand salle du Palais. Si print iceluy

maistre



maistre Iean son theume au septiesme Psalme. *Conuertetur dolor in caput eius, & in verticem ipsius iniquitas eius descendet*, C'est à dire la douleur sera conuertie en son chief, & la iniquité de luy descendra sur luy. Et fait six conclusions, La premiere, que Pierre de la Lune estoit scismaticque obstinément, voire hereticque, troubleur de la paix & vnion de l'Eglise. La secōde que ledit Pierre ne doit point estre renōmé Benoist Pape Cardinal ne par aucun nom de dignité, ne à luy comme pasteur de l'Eglise on ne doit point obeÿr. Sur les peines faictes contre ceux qui baillent faueur à scismaticques. La troisieme cōclusion que les fais, les dits, les collations, prouisions, sentences, & proces du temps de la dacte de la lettre, faicte en maniere de bulle, ne quelsconques peines temporelles ou espirituellen, cleres ou obscures contenues sont de nulle valleur. La quarte conclusion que ladicte lettre d'elle mesmes est mauuaise, seditieuse pleine de fraude troublant la paix & offensant la majesté Royale. La cinquiesme conclusion est qu'audit Pierre de la Lune ne à ses lettres ou mandemens nul ne doit obeÿr sur peine de bailler faueur à scismaticques. La sixiesme conclusion qu'il est à proceder contre ledit Pierre ceux à luy fauorables & reuenans ses lettres. Apres lesquelles six conclusions declairées furent faictes certaines requestes au Roy de France par les dessusdits proposans & pour l'vniuersité. La premiere requeste, que bōne information soit faicte diligemment d'icelle lettre, & soient prins tous les substanteurs & receleurs pour les pugnir & corriger selon le cas desquels moult y a en ce Royaume, & seront denommez par l'vniuersité en temps & en lieu. La seconde requeste que le Roy dorefnauant ne nuls de son Royaume de quelque estat qu'il soit ne reçoie lettres dudit Pierre de la Lune. La tierce requeste qu'il soit cōmandé de par le Roy à ladicte vniuersité sa fille, que par icelle la verité soit preschée par tout le Royaume. La quarte requeste, que l'Euesque de saint Flor qui a esté enuoyé deuers ledit Pierre en ambassade, soit prins & detenu, & maistre Pierre de Courselles, Sansien le Leu, le Doyen de saint Germain d'Auxerre, & iceux pugniz selon leurs demerites. En outre que la lettre faicte en maniere de bulle soit deschirée comme iniurieuse & offensive à la majesté Royale. Avec protestations de proceder à plus grans choses touchans la foy, & d'expliquer & demonstrier les choses dessusdictes deuant ceux qu'il appartiendra en temps & en lieu, lesquelles requestes prestement furent octroyées du Roy à ladicte Vniuersité. Et adoncques deuant tous ceux qui là estoient, ladicte lettre fut deschirée & rōpue par le Recteur de l'Vniuersité. Le Doyen de saint Germain d'Auxerre fut là prins en present & mis en chartre. Et tantost apres fut prins l'abbé de saint Denys en France, & maistre Iean de Sains iadis Secretaire du Roy, & plusieurs autres hommes de nom, & tenuz prisonniers au Louure. Et ouquel temps aussi par la diligence des gens du Roy le messagier qui auoit apporté les bulles deuantdictes fut tellement poursuiuy qu'il fut prins vers Lyon sur le Rhosne, & ramené prisonnier à Paris avec le dessusdit Sansien le Leu qui auoit esté prins en l'Eglise de Cleruault. Si estoient alors le Roy, tous les Princes & le clergie moult fort ennuyez & courroucez contre ledit Pape de la Lune. Lequel Pape apres qu'en assez brief temps il fut venu à sa cognoissance comment il auoit esmeu le Roy de France, ses Princes & l'Vniuersité de Paris contre luy, & de ce en moult grād doubte & cremeur, se partist du port de Venere seullemēt avec quatre Car-



dinaulx par mer. Et de là s'en alla en Arragon. Et puis en Parpignan. Auquel temps aussi le Roy Loÿs print congé au Roy de France pour partir de Paris & aller en Prouence contre aucuns fauorables au Roy Lancelot son aduersaire, Si estoit lors la Royne de France à Melun. Auquel lieu alla le Roy & si tint par aucun peu de iours puis retourna à Paris où estoient encores les ambassadeurs du Roy d'Escoce. Lesquels apres qu'ils eurent receu grand somme de pecune du Roy pour mener guerre aux Anglois prindrent à luy congé & s'en retournerent en leur paÿs. Et d'autre partie le Roy octroya à ceux de Galles vn an durant a ses despens trois cens hommes d'armes & deux cens arbalestriers desquels fut conducteur le Borgne de la Heuse cheualier de grand renom natif de Normandie, & luy fait le Roy deliurer nauire & argent pour aller en Galles.

*Comment le Duc de Bourgongne se partit de Paris pour le fait du Liege, du Roy d'Espagne & du Roy de Hongrie qui escript à l'uniuersité de Paris.*

## CHAP. XLII.

**L**Tem le cinquiesme iour de Iuillet an dessusdit le Duc de Bourgongne avec luy ses deux freres se partit de Paris en grand indignation de plusieurs Princes gouuerneurs du Royaume & s'en alla à Arras faire la feste de l'Euesque de ladicte cité nommé Martin pouure de l'ordre des prescheurs lequel estoit son confesseur & de là s'en alla à Gand veoir la Duchesse sa femme. Si fait grans preparations pour aller secourir Iean de Bauiere son beau frere Euesque du Liege, lequel pour lors estoit debouté par les Liegeois hors de son paÿs & l'auoient assiegé dedans la ville du Trecht où il s'estoit mis à crefuse avec plusieurs gentils-hommes qui tenoient son party & y estoit le seigneur de Pieruels leur chef & conducteur avecques luy son fils qu'ils auoient esleu leur Euesque ou lieu dudit Iean de Bauiere. Et d'autre partie le Duc Guillaume Comte de Hainault, auquel iceluy Iean de Bauiere estoit frere, le Comte de Conuersent seigneur d'Anghien avec luy & plusieurs grans seigneurs de ses paÿs fait assemblée de tresgrand nombre de gens d'armes. Lesquels avec les seigneurs de Croÿ & Heilly que luy enuoya le Duc de Bourgongne bien accompagnez de grand foison de gens de guerre. Se tira vers le paÿs du Liege pour y faire guerre à la cause dessusdicte. Et premierement ardirent vne maison & cense d'une Eglise de l'ordre de Citeaulx & puis cheuaucherent deuers Fosses & Florines fut tout le paÿs de la riuere de Sambre, auquel ils feirent moult grand dommage par feu & espée. Et de fait prindrent aucunes petites forteresses d'assault dedans lesquelles furent mis à mort cruelle tous ceux qui estoient dedans. Et n'estoit lors en iceluy paÿs espargnée quelque creature de quelque estat qu'il fut que tout ne fut mis à l'espée. Si furent en ce voyage faiz nouueaux cheualiers Pierre de Luxembourg Comte de Conuersent. Engilbert d'Anghien & plusieurs autres. Et apres qu'iceluy Duc eut moult degasté le paÿs doubtant que lesdits Liegeois ne vinssent pour le combattre lesquels estoient trop plus puissans contre luy & en trop grand nombre s'en retourna hors du paÿs embrasant iceluy & bouillant les feux par tout à tout ses gens qui estoient grandement remplis de leurs biens qu'ils auoient trouué. Et reuint en son paÿs pour illec de rechef assembler plusgrand puissance avec celle dudit Duc de Bourgongne sur intention de retourner



tourner audit païs de Liege & combattre les dessusdits Liegeois. Ouquel temps auoit forte guerre entre les Espaignols & Sarrazins du Royaume de Grenade: car le Roy d'Espaigne grandement accompagné de ses Espaignols & de messire Robinet de Bracquemont cheualier natif de Normandie si entra en xxij. Galées lesquelles estoient bien fournies de gens d'armes & alla combattre sur la mer lesdits Sarrazins qui auoient xxij. galées bien armées qui du tout furent destruites & ceux de dedans mis à mort. Esquels iours le Roy de Hongrie escriuit lettres à l'vniuersité de Paris desquelles la teneur s'ensuit. Premièrement la subscription estoit. A venerables, sages & prudens hommes le Recteur & vniuersité de l'estude de Paris, noz deuots & amez: La narration si estoit. Nobles hommes & tresrenommez en science par tout le monde, nous auons receu tres agreable-ment vostre epistre plaine de subtiueté de sentence & aornée d'eloquence de parolles reputant vostre cure & estude estre piteuse & deuote & tresagreable à nostre seigneur & au saint Esprit & tres prouffitabile à tous Chrestiens, car telle abomination est pour le present esleuée & releuée en l'Eglise de Dieu que nous considerons que tous Chrestiens de cuer, de pensée & d'œuvre deuroient à Dieu faire prieres affin que par sa grace voulust y pourueoir de remede conuenable, parquoy ladicte abomination, c'est à sçauoir scisme & diuision qui ja à duré par l'espace de trente ans fut destruit par vraye vnion. Car se briefuement à ce n'est remedié il est a doubter que par ceste double diuision ne s'ensuiuent trois diuisions & pour ceste cause & aucunes autres nous auons enuoyé nostre Orateur à treschrestien Prince nostre seigneur le Roy de France affin que nostre legation enuoyée deuers luy & son conseil ne fut point empeschée tant par les mescreans comme par les autres, par laquelle à luy requerons seablement qu'il nous enuoye aucuns de sa noble haulte puissante lignée pour nous ayder & conseiller en noz affaires comme nous auons espoir qu'il fera, sçachans que se ce il nous octroye nous serons tousiours prests à luy seruir & faire plaisir comme autresfois auons esté, donné à Romme l'vnziesme iour de Iuing. Et de nostre regne le vingt & deuxiesme,

*Comment tous les Prelats & gens d'Eglise de toutes les parties de France furent mandez à Paris à la venue de la Roynie & de la Duchesse d'Orleans.*

CHAP. XLIII.

**E**N ces mesmes iours furent mandez la plusgrand partie du Royaume de France & Daulphiné, les Prelats & gens d'Eglise ou leurs procureurs, à venir à Paris deuers le Roy & son conseil pour auoir aduis & deliberation principalement sur l'vnion de l'Eglise, & aussi sur autres besongnes touchant le bien & honneur de la personne du Roy & de son Royaume, lesquels ils vindrent en tresgrand nombre & s'assemblerent la nuit S. Laurens en la grand salle du Palais enuiron huit heures du matin où estoit le President au lieu du Roy qui estoit malade, le Chancelier de France, si celebra la Messe solemnellement du saint Esprit l'Archeuesque de Thoulouse. Apres laquelle vn maistre en Theologie tres renommé de l'ordre des freres prescheurs proposa notablement en la presence du Duc d'Orleans, du Duc de Berry & de plusieurs grans seigneurs avec le Recteur de l'vniuersité & grand multitude de



clergé. Si print son theume. *Quæ pacis sunt sectemur & quæ ædificationis sunt inuicē custodiamus ad Rom. 4.c.* C'est à dire monseigneur S. Pol dit aux Romains au 4. cha. Nous deuõs ensuiuir les choses de paix, & garder ensemble les choses qui baillēt edification. Lequel proposant dit moult de choses de la paix concorde & vnion estre mise en l'Eglise, & le demena par maniere de proces & tres eloquētemēt en disant cōmēt Pierre de la Lune du premier iusques au derrain s'estoit porté à procurer la paix & vnion de l'Eglise demōstrant iceluy estre schismatique, heretique obstiné en mal & moult parla de ladicte obstination en declairant icelle par. vi. manieres pour laquelle chose le Roy de France auoit autresfois fait neutralité contre luy, en luy soubstrayant de son obediēce, apres ce qu'iceluy proposant nota par poix les choses contenues esdictes lettres faictes en maniere de bulle, en demonstrent comment elle estoit plaine de fraude & de decepte offensue à la maiesté royale. Et que pour ce tous ceux là estans auoient esté mandez de par le Roy. Affin que les choses dessusdictes leur feussent notifiées & que sur ce ils baillassent conseil aide & faueur au Roy pour auoir paix & vnion en ladicte Eglise comme ils y estoient tenuz. Et entre-temps que ces choses estoient dictes & faictes maistre Saussien, & le Messagier de Pierre de la Lune qui auoit apporté les lettres dessusdictes au Roy tous deux Arragonnois mitrez & vestus d'habillemens où estoient figurées les armes d'iceluy Pierre de la Lune reuersées furent amenez moult honteusement & deshonnêtement sur vn bannel du Louure en la court du Palais. Et prestement empres le marbre au pied des degrez fut vn eschauffaudis leué. Sur lequel tous deux furent mis & monstrez moult longuemēt à tous ceux qui veoir les vouloient. Et auoit escript esdictes mitres. Ceux sont desloyaux à l'Eglise & au Roy. Et apres furent ramenez au Louure sur ledit Bannel comme dessus & le lendemain r'assembla ledit conseil au Palais où estoit present ou lieu du Roy le Chancelier de France. Auquel lieu maistre Vrsin Taluan de natif de Normandie Docteur en Theologie tresrenommé proposa pour l'vniuersité de Paris & print son theume du centiesme psalme. *Fiat pax in virtute tua.* Et dressant ses parolles à la personne du Roy & à les seigneurs de son sang là estans presens de par ladicte vniuersité. En eux enhortant qu'ils voulsissent entendre par toutes manieres qui seroient possibles de faire cesser ce perilleux scisme & à leur pouoir procurer la paix & vnion de sainte Eglise vniuerselle, demonstrent de rechef la mauuaistié dudit Pierre de la Lune par trois cleres raisons disant comment il estoit schismatique heretique obstinément & qu'il ne deuoit point estre nommé Benoist Pape ne Cardinal ne par aucun non dignité. Et que nuls ne deuoient à luy obeir sur peine deüe aux fauorables à heresie & à scisme. Et racompta moult de fois aucuns cas de Papes de Romme conuenables à son propos & la conclusion du derrain concile, laquelle fut que se ledit Pierre de la Lune & son aduersaire ne faisoient paix en l'Eglise dedans l'Ascension comme ils auoient promis tout le Royaume de France generallyment & ceux de la Daulphiné se subtrairoient de leur obeïssance, car ainsi l'auoient conclud lesdits Prelats qui audit Concile auoient esté comme il apparoit par lettres seellées de leurs seaulx qui auoient deuers eux ceux de ladicte Vniuersité. Et pource ladicte obediēce est substraicte de par le Roy iusques ad ce que vray, seul non douteux Pape & pasteur de l'Eglise vniuerselle soit eu & declairé. Et si fut pareillement proposé



proposé par ledit proposant comment on se deuoit auoir en dispensations pour les consciences & es collations des benefices & autres choses, tant audit royaume comme en la Daulphiné durant ladicte neutralité & aussi qu'elles choses on deuoit conclure sur les besongnes dessusdictes. Est à sçauoir finablement que nul sur les peines dessusdictes de quelque estat qu'il fut ne fait obeissance aux deux Papes dessusdits apres le iour qui estoit declairé & sur peine d'encourir l'indignation dudit Roy. En apres fut requis par iceluy que les lettres dont par deuant estoit faicte mention fussent deschirées publiquement. Et pareillement vnes autres qui autresfois auoient esté apportées à Thoulouse, si en fut ainsi fait & avec ce fut ordonné à tous les Prelats & autres gens d'Eglise que chacun endroit soy es mettes de ses benefices feissent publier hault & cler & par plusieurs iours en ladicte vniuersité, ladicte neutralité & avec ce leur fut baillé par escript de par icelle vniuersité tous les poincts & articles touchans ceste matiere comment ils sçauoient à gouverner. Apres lesquelles besongnes traictées & remonstrances faictes comme dit est chacun se departit. Et le lendemain les deux Arragonnois dessus nommez tous deux furent de rechef menez & eschauffaudez parmy Paris comme autresfois auoient esté, esquels iours la Royne qui par certains iours auoit esté à Melun vint à Paris & amena son fils le Daulphin lequel estoit monté sur vn cheual blanc lequel conduisoient quatre hommes de pied & alloit apres le charriot de ladicte Royne. Et derriere ledit Daulphin suiuoient ledit de Berry, de Bretagne & de Bourbon, le Comte de Mortaigne, le Comte de Clermont, le Comte de Vendosme & grand nombre de grans seigneurs tant gens d'Eglise comme seculiers & escuyers. A laquelle venue fut faicte grand lyesse des Parisiens & fut crié Noël en plusieurs lieux. Et ainsi s'en alla loger icelle Royne, le Daulphin son fils & Loys de Bauiere son frere au chastel du Louure. Et le lendemain vint audit lieu de Paris la Duchesse d'Orleans douïagiere & sa belle fille Ysabel aînée fille du Roy de France accompagnée de plusieurs gens notables cheualiers & autres tous vestus de dueil, à l'encontre desquelles issirent tous les Princes dessusdits qui les conduirent & menerent deuers la Royne & le Duc d'Acquitaine pour eux faire requeste qu'ils peussent auoir iustice & raison de la piteuse mort du Duc d'Orleans deffunct. Et aussi faire respondre & proposer à l'encontre de ce que le Duc Iean de Bourgongne auoit fait proposer, proclamer & diuulguer contre ledit Duc publicquemēt n'agueres comme dessus est declairé contre son seigneur & mary. Laquelle requeste finablement elle obtint.

*Comment la Duchesse d'Orleans & son fils firent proposer à Paris à l'encontre du Duc Iean de Bourgongne pour la mort du Duc d'Orleans.* CHAP. XLIIII.

**E**Nsuivant huit iours apres le Duc d'Orleans accompagné de trois cens hommes d'armes ou enuiron vint à Paris à l'encontre duquel allerent le Duc de Berry & les autres grans seigneurs de son lignage entrans par la porte saint Anthoine alla au Louure deuers la Royne & son fils le Duc d'Acquitaine son cousin germain, ausquels il recommanda sa besongne & sa personne moult honnorablement comme il appartenoit, & puis prestement de là luy partant s'en alla veoir la Duchesse sa mere & sa femme. Et apres les choses dessusdictes ledit Duc d'Orleans, ladicte Duchesse sa mere & sa



femme point ne cesserent de faire requeste au Roy & à son conseil affin qu'il leur feit iustice du Duc Iean de Bourgongne & ses complices laquelle par ledit Roy leur fut accordée de faire & eurent audience de faire proposer tout ce qui leur plairoit à l'encontre dudit Duc de Bourgongne & ses complices. Et adonc le Duc d'Acquitaine representant la personne du Roy avec sa mere par le commandement du Roy estât en habit Royal en la grand salle du chastel du Louure present les Ducs de Berry, de Bretagne & de Bourbon, les Comtes d'Alençon, de Clermont, de Mortaigne & de Vendosme & plusieurs autres grans seigneurs dudit conseil, & aussi plusieurs autres cheualiers, le Recteur & vniuersité de Paris & tresgrand multitude d'autres gens ladiète Duchesse douïagiere accompagnée de son fils le Duc d'Orleans, de maistre Pierre l'Orfeure son Chancelier, de maistre Pierre Cousinet aduocat en Parlement & plusieurs autres gens & familiers fait lyre par l'Abbé de saint Fiacre de l'ordre saint Benoit les choses contenues en vn Liure escript en François à luy baillé en sa main deuant tous qui là estoient confermées par les dits des prophetes des saints de l'un & l'autre testament, de Philosophes & Histoires publicquement hault & entendement mot apres autre, duquel liure la teneur s'ensuit.

R O Y treschrestien, Prince tresnoble, souuerain seigneur & chef de iustice. A toy sont mes parolles adressées, car à toy compete de monstrier iustice à tous les subiects du royaume de France, auquel non mie tant seulement les païs & regions voisines, mais aussi les estranges nations ou gens prennent exemple & tiennent la droicte sentence de ta iustice à laquelle partie de toy & ton renommé conseil comme à la fontaine de raison & verité. Je vueil adresser mes parolles en la personne de ma treshonnorée & tresnoble dame madame la Duchesse d'Orleans & de messeigneurs ses enfans qui tous desconfortez presentent leur plainte en lamentations & larmes, veans eux apres Dieu nul recours auoir fors en ta pitié & compassion & affin que mieux soient conceutes les choses que j'ay à dire, & verité qui ne quiert nulles fallaces puisse plus clerement apparoir. Ce present propos sera diuisé en trois parties & en trois membres principaux ou premier selon mon pouoir ie declaireray que les Roys comme souuerains sont tenus de faire iustice à tous subiects à luy à la conseruation de paix sous sa tresnoble & trespuissante seigneurie. Ou second membre comment partie aduerse, c'est à sçauoir Iean Duc de Bourgongne, ceux à luy fauorisables & donnans aide & conseil en ce cas iniustement & honteusement ont occis ou fait occire monseigneur le Duc d'Orleans duquel l'ame soit avec Dieu. Ou tiers membre comment mondit seigneur mauuaisement & iniustement à esté accusé de plusieurs cas & singulierement de crime de leze maiesté, auquel il n'auoit nulle coulpe & comme il apperra cy apres. En oultre est à sçauoir que mon intention est de diuiser en six points chacune desdictes trois. Et ainsi consequamment tout ce present propos est contenu en dixhuit points. Tant qu'est à la premiere partie il me semble que le Roy est obligé singulierement à faire iustice de ce cas, & especiallement pour six raisons desquelles la premiere est la puissance & dignité royalle à ce non mie tant seulement obligée par volenté, mais aussi par obligation d'office; car les Roys sont appelez Roys pour la cause de faire iustice & non pour autre chose. La seconde est fondée en l'amour fraternelle, car comme dit le commun



mun prouerbe, nature ne peut mentir, le Roy donc comme seigneur & frere selon iustice & raison doit maintenir son droit. La tierce raison est la pitié des supplians, car madicte dame d'Orleans vefue & desconfortée est accompagnée de ses ieunes enfans & de plusieurs cheualiers menans grand dueil avec elle pour la cruelle mort de son mary & seigneur. La quarte raison est l'enormité du cas qu'à peine pourroit on trouuer pareil, car à tous ceux qui ont ouï parler dudit escandalle voire estranges & autres ledit cas est abhominable, & s'il aduenoit que le Roy ne pourueust de remede, il conuenroit dire qu'il n'est pas seigneur de son pays, & qu'il conuient luy humilier & adoucir au regard de la puissance des subiects. La quinte raison est que se sur ce n'est faicte execution de iustice, maulx sans nombre s'en pourront ensuiuir, c'est à sçauoir les pays & citez desollées, voyes de fait, proces rigoureux, dure rebellion de subiects. La sixiesme raison est mauuaisistié de partie aduerse laquelle par sa force & puissance quiert à soustenir son peché en vueillant sans cause plaider l'espée traicte. Et en ces six raisons gisent toute la forme du proces. Tant qu'à la seconde partie ie demonstreray comment partie aduerse par six raisons a si grandement peché qu'il est fort & a peine impossible d'estre réparé. La premiere raison est, car partie aduerse nulle auctorité n'auoit sur le deffunct pourquoy il fait occire si grand & tresnoble seigneur comme il sera dit cy apres. La seconde raison est, car partie aduerse nullement ne tint forme de iustice ou proces en l'execution de la mort de mondit seigneur le Duc d'Orleans. Et supposé qu'il eust eu auctorité sur luy ce que pas n'estoit, neantmoins il estoit licite & raisonnable chose la partie estre ouïe & conuaincue ou condamnée à mort deuant ce qu'on le fait mourir, car veu qu'il n'auoit nulle puissance sur luy ne auctorité de tant moins deuoit la forme de son proces coulorer son peché. La tierce est fondée és alliances qu'ils auoient ensemble, non mie seullement pour cause du lignage, mais avec ce auoient faictes especialles alliances pour euitier les inconueniens qui se pourroient ensuiuir pour la cause de leur diuision par lesquelles & selon lesquelles ils ne pouoient ne deuoient selon raison nuyre ne greuer l'un à l'autre sans defiances precedentes. Et pour plus grande confirmation plusieurs fois auoient iuré sur les parolles du Canon & sur la Croix nostre Seigneur en baillant avec ce certaines lettres seellées de leurs seaulx. La quarte raison est fondée, en ce que la mort de mondit seigneur d'Orleans fut si soubdaine que nuls vrais Chrestiens ne pourroient soustenir que elle ne fut damnable au regard du malfacteur & de celui par quel commandement elle a esté executée. La cinquiesme raison est demonstrée & fondée en ce que euidamment ie demonstreray comment partie aduerse a fait occire monseigneur d'Orleans, non mie pour bonne fin ne pour le bien commun, mais pour ambition, couuoitise & desir à dominer, & affin qu'il fait les siens riches. Et par grand hayne que long temps auoit tenue en son cueur. La sixiesme raison est fondée en ce qu'il ne souffist pas à partie aduerse la mort de monseigneur d'Orleans, mais avec ce s'est efforcé d'escandalir & destruyre sa renommée en proposant libelle diffamatoire. Et soustenant les ministres & trahistres homicides. Et ce touche la seconde partie de mon proces. Tant qu'à la tierce partie selon six poincts qu'elle contient ie mettray six faulses accusations par lesquelles partie aduerse accuse mondit seigneur d'Orleans. Et de rechef ie



mettray responces par lesquelles apperra l'innocence dudit deffunct & ce cest tant qu'à la tierce partie. Et en ce appert que mon present propos est diuisé en trois parties. La premiere regarde iustice, la seconde la malice de partie aduerse, la tierce excuse ledit deffunct, mais deuant ce que ie procede plus auant en ceste matiere, ie proteste que mon intention est de dire tant seulement verité, & n'auancer non plus qu'il m'est enioinct de madiete dame d'Orleans & de messeigneurs ses enfans, & est vray que le proposant pour partie aduerse comme mal aduisé appelloit mondit seigneur d'Orleans crimineulx jaçoit que par nulle manière il ait ce approuué ne verifié, nonobstant ie ne vueil mie ainsi nommer partie aduerse jaçoit ce qu'il soit tel, car ie repute iceluy cruel homicide & par consequent crimineulx, non mie par suspicion tant seulement, mais par la confession de sa propre bouche. Et pource que sapience vainct malice selon la sainte escripture, il me souffist de nommer partie aduerse, la partie de Bourgogne, car il vault mieulx premierement demonstrier les vices & apres demonstrier le Duc de Bourgogne criminel, que faire ainsi qu'il fait, c'est à sçauoir premierement l'appeller crimineulx sans aucune approbation ou verification. Maintenant doncques ie laisseray le propos du proces principal, lequel est tel, comme dessus est deuisé en trois parties. Et tant qu'à la premiere partie qui traicte de la iustice du Roy ie prens la parole du Prophete qui dit.

*Iustitia & iudicium preparatio sedis tue.* Car ces parolles sont escriptes au lxxviij. psalme & est autant à dire au Roy que iustice & iugement sont la preparation de son siege. Tant qu'à la seconde partie regardans la malice de partie aduerse prenons la parole du proposant pour son party, c'est à sçauoir, *radix omnium malorum cupiditas, quam quidem appetentes errauerunt à fide.* Ceste auctorité est escripte en la premiere Epistolle de monseigneur saint Pol à Thimotée au dernier chapitre, & est à dire couuoitise est la Racine de tous maulx laquelle aucuns appetans esuanouyrent de la foy. Tant qu'à la tierce partie regardant l'innocence du deffunct monseigneur d'Orleans, ie prens la parole du Propheete disant au septiesme psalme. *Iudica me secundum iustitiam tuam & secundum innocentiam meam super me.* C'est à dire fais de moy iustice selon ta iustice, & selon mon innocence sur moy. Apres ces choses proposées ie viens à la premiere partie & prens la parole du Prophete qui dit. *Iustitia & iudicium preparatio sedis tue.* Icelles parolles ie puis adresser à la personne du Roy nostre sire, en disant iustice & iugement sont preparation de ton siege Royal, car Royaume sans iustice ne dessert point estre appellé Royaume, mais doiuent estre appelez larrecin selon ledit saint Augustin ou dixiesme chapitre du neufiesme liure de la cité de Dieu. *Regna, inquit, remota à iustitia, quid sunt nisi magna latrocinia.* Les Royaumes, dit-il, loings de iustice qu'elles choses sont ils fors grans larrecins. Il appert doncques comment le Roy est tenu faire iustice à tous ses subiects & garder à vn chacun son droit. Et ce pour six raisons touchées au commencement. Tant qu'à la premiere raison qui est fondée en l'estat de dignité royale est à noter que dignité royale principalement est instituée à faire iustice, le Roy vrayement au regard de ses subiects, est aussi comme le pasteur au regard de ses ouailles, comme dit est, en Aristote au huitiesme chapitre des Ethicques, c'est à dire des moralitez & ou cinquiesme des Politiques, c'est à dire



dire des gouuernemens des citez, où est declairé comment le Roy est tenu de conferuer iustice, & ou liure du gouuernement des Princes.

*Iustitia inquit regnantis utilior est subditis quàm fertilitas ipsius.* C'est à dire que la iustice du regnant est plus prouffitable aux subiects que n'est la fertilité ou richesse. Et le Prophete dit en ceste maniere. *Honor inquit Regis iudicium diligit.* L'honneur du Roy dit-il ayme iustice & iugement. Ceste iustice dequoy est faicte mention, ce n'est autre chose que garder à vn chacun son droit de laquelle parolle Iustinian l'Empereur ou premier liure des constitutions dit.

*Iustitia est constans voluntas unicuique ius suum tribuens.* C'est à dire iustice est ferme & stable baillant à vn chacun son droit, & est à considerer que iustice ne doit point estre recueillie selon le plaisir, mais ainsi par les loix escriptes. Considerez doncques comment il ordonne faire iustice & comment à ce vous estes obligez. A vous doncques la dame d'Orleans & ses enfans adressent leurs parolles requerans iustice, laquelle vous deuez aymer & garder comme vostre propre domination & Royaume. Considerez les exemples & les faits des anciens qui tant aymerent iustice, comme il appert par iceluy, lequel voyant que son fils auoit desseruy de perdre les deux yeulx selon les loix du temps, adoncques voulut que son fils perdit vn œil, & luy propre en perdit l'autre, afin que les loix qui estoient adoncques ne fussent point violées ne corrompues. Ainsi le récite Valerian ou sixiesme liure lequel parlant en autre endroit du Roy nommé Cambises qui commanda à escorcher vn faulx Iuge & fait mettre sa peau sur la chaire du Iuge, & puis apres il establit & constitua le fils dudit faulx Iuge en la chaire asseoir sur la pel de son pere comme Iuge en luy disant. Quand tu iugeras aucune chose, ce que j'ay fait à ton pere te soit en exemple, & sa peau tenant à ton siege te soit en memoire. O Roy de France, il te souuienne de la parolle que dit Dauid quand le Roy Saul le persecutoit iniustement.

*Dominus inquit retribuet unicuique secundum iustitiam suam.* C'est à sçauoir nostre Seigneur Dieu retribuera à vn chacun selon sa iustice. Ces parolles sont escriptes ou premier liure des Roys ou sixiesme chapitre. Tu doncques comme vray ensuiueur de nostre Seigneur, dois ce faire semblablement selon ton pouoir & subuenir & ayder à la personne qui est blecée & iniustement persecutée. Item tu dois auoir memoire comme Audonice cruel homicide fut condamné à mort au lieu où il auoit occis le Prebstre de la Loy, comme il est escript ou liure de Machabeus. O Roy de France, prens exemple au Roy Daire qui bailla aux Lyons à deuorer ceux qui mauuaisement auoient accusé Daniel le Prophete. Considere la iustice executée sur deux vieillars qui par leur faulse accusation auoient condamné & auoient accusé Susanne. Ces choses icy apparoiſsent & sont escriptes ou liure de Daniel le Prophete ou sixiesme & quatorziesme chapitres. Ces exemples te doiuent esmouuoir à iustice comme Roy & souuerain, car ainsi que tes subiects à toy doiuent obeir. En telle maniere tu es tenu à eux faire iustice. Et ainsi que le subiect peut forfaire en desobeissant. Aucuns pourroient doubter & proposer que le subiect se pourroit exempter auecques tous ses biens de son souuerain pour le reffus de iustice & equité. Sire, il te plaise à considerer ceste parolle, car pour iustice tu ne dois riens doubter comme ie declaireray cy apres. Et pour la conclusion de ceste



premiere raison dit la parolle qui est escripte ou liure de Iob ou troisieme chapitre. *Cum iustitia indutus sum, & vestiui me vestimento & diademate in coronatione mea.* C'est à dire ie suis vestu de Iustice & m'en ay vestu comme de vestement & de diademe à ma Coronation. Consequamment tresnoble Prince ie dis qu'amour fraternelle tresgrandement te doit esmouuoir à iustice, car comme ie croy plusgrand amour ne pourroient auoir freres ensemble que vous auiez. Soyés donc vray amy à ton frere en iugement & en iustice, car ce sera tresgrand honte & reproche à toy & à la Couronne de France, par tout le monde, se iustice & reparation n'est faicte de la mort de ton frere si cruelle & infame. Maintenant il est temps que tu doiues demonstrier l'amour fraternelle. Ne soyés point d'iceux amis dequoy parle le saige au huitiesme chapitre du liure de l'Ecclesiastique disant en telle maniere.

*Est amicus socius mensæ & non permanebit in die necessitatis.* C'est à dire il est aucuns amis compains à table & à prosperité : mais ils ne seront point amis en iour de necessité. Maintenant comme necessité le requiert & desire demonstre toy tel vray amy que tu ne soyés appellé de tout le monde fainct amy, duquel parle Aristote ou neufiesme chapitre des moralitez.

*Qui, inquit, fingit se esse amicum & non est : peior est eo qui facit falsam monetam.* Celuy ce dit Aristote qui fainct estre amy, & il ne l'est pas il est pire que celuy qui fait faulse monnoye. Se aucuns te dient que partie aduerse soit de ton sang & de ta parenté, neantmoins tu dois haïr son peché. Tu dois garder iustice entre deux amis selon le dit d'Aristote ou second liure des moralitez.

*Duobus, inquit, existentibus amicis sanctum est prahonorare veritatem.* C'est à dire c'est ferme chose & honorable prehonnorer verité entre deux amis. Il te souuienne de l'aspre amour qui estoit entre toy & ton frere, non mie que par ce vueille te attirer à faueur, mais tant seullement ie te enhörte à verité & iustice. Helas ce seroit peu de bien ou heureuseté estre fils & frere du Roy, si ceste mort si cruelle estoit mise en oubly sans reparation, attendu que celuy qui le fait occire, le deuoit aymer comme son frere, car en la sainte escripture les nepueux & cousins germains sont appelez freres comme il appert ou liure Genes de Abraham qui dit à Loth son nepueu.

*Non sit iurgium inter te & me, fratres enim sumus.* C'est à dire tenson ne soit point entre toy & moy, en verité nous sommes tous freres. Et saint Iacques est appellé frere de nostre Seigneur, & toutesfois ce n'estoit tant seullement que ses cousins germains. Dont tu peux dire à partie aduerse la parolle que dit nostre Seigneur à Cayn apres qu'il eut occis son frere.

*Vox sanguinis fratris tui clamat ad me de terra.* C'est à dire la voix du sang de ton frere crye à moy de la terre, & certainement la terre crye & le sang se complaint. Et iceluy n'est pas homme naturel ne de bon sang qui n'a compassion de telle mort si cruelle. Et n'est pas merueilleuse chose se ie dis partie aduerse sembler à Cayn, car en luy ie voys moult des similitudes de Cayn : car ainsi que Cayn meu par enuie occist son frere, pource que nostre Seigneur auoit receu ses dons & sacrifices & il n'auoit point les siens regardez, & pourtant il machina en son cueur comment il pourroit occire son frere. En telle maniere partie aduerse, c'est à sçauoir le Duc de Bourgongne meu par enuie de



ce que mondit seigneur d'Orleans estoit agreable au Roy il machina en son cueur la mort. Et finalement le fait cruellement & trahistreusement occire, comme il sera demonsté en la seconde partie. Apres ainsi que Caïn meü par couuoitise commist celuy inconuenient, ainsi partie aduerse en telle maniere meüe par couuoitise fait ce qu'elle fait comme il appert en la maniere qu'elle maintint deuant & apres la mort de monseigneur d'Orleans.

En oultre ie treuve que Caïn est interpreté acquis ou acquisition, par tel nom peult estre partie aduerse appelée, car vengeance est acquise au Roy en corps & en biens, mais que iustice ayt regne, & ainsi il sera fait au plaisir de Dieu par sa prouision. Et aussi par les choses dessusdictes appert comment partie aduerse est raisonnablement a estre comparée à Caïn. Sire doncques il te souuienne de la parolle dessusdicté adressée à Caïn c'est à sçauoir.

*Vox sanguinis.* La voix du sang de ton frere. C'est la voix de la dame d'Orleans & de ses fils cryans & requerans à toy iustice. Helas! sire Roy, pour qui vouldrois tu faire iustice se tu ne le faisois pour l'amour de ton propre frere. Se tu n'as esté amy à ton sang à qui seras tu amy doncques attendu qu'on ne te demande fors iustice. O treñoble Prince considere que ton frere German à toy est osté doreñauant. Tu n'auras point de frere ne verras, car partie aduerse à occis ton seul frere cruellement & osté de toy. Ayes consideration qu'il estoit ton frere & tu trouueras que grandement il doit estre plainct. Et mesmement de toy qu'il aymoît tresparfaitement la Roïne de France ta femme & tes enfans, de rechief par le grand sens qui en luy estoit il honnoroit toute sa lignée royale de France. Car à peine pourroit on trouuer plus facond ne mieux proposant ne respondant deuant nobles clerks & laiz. Nostre Seigneur luy auoit octroyé & donné ce que le Roy Salomon auoit demandé, c'est à sçauoir prudence & sapience, vn chacun sçait bien qu'il estoit aorné d'excellence & d'entendement, dont de luy on pouoit dire ce qui fut dit de Dauid ou septiesme chapitre du liure des faits des Apostres. *Sapiebat sicut Angelus Domini.*

Il auoit sapience comme l'Ange de Dieu. Et qui vouldroit parler de sa beauté naturelle, riens autre chose l'en ne pourroit dire fors qu'il estoit image & ta semblance avec ce de propre condition, il estoit homme tresdebonnaire, car oncques ne fait homme mourir ne battre, n'oncques ne procura la mort d'autrui. Et toutesfois il auoit assez puissance & auctorité de ce faire, & mesmement à ses ennemis qui disoient mal de luy notoirement luy imposant les maux que oncques ne pensa & en especial partie aduerse, eust il fait plusieurs fois mourir s'il luy eust pleu, car grand puissance n'est pas requise à occire vn homme trahistreusement. Mais en verité oncques ne fut de tel sang, car la condition du sang Royal doit estre de si grand pitié & loyauté qu'à peine pourroit elle souffrir cruauté, homicide ou trahison quelconques. Et audit sang Royal estoit moult prochain monseigneur d'Orleans, car il estoit fils de Roy & de Roïne. O Roy Charles se tu vesquisses maintenant que dirois-tu, qu'elles l'armes t'apaiseroient. Qui t'empescheroit que tu ne feisses iustice de si cruelle mort. Helas! tu as tant aymé l'arbre & si diligemment esleué en honneur, lequel apporta le fruit qui a fait mourir ton trescher fils. Helas! Roy Charles tu pourroyes dire droitement avec Iacob. *Fera pessima deuorauit filium meum.* La beste



tresmauuaise à deuoré mon fils . Partie aduerse mauuaisement recongnoist les grans biens que toy Charles faisois à son pere , c'est la recongnoissance du voyage de Flandres , ouquel toy & ton Royaume as mis en peril pour l'amour de son pere , en verité les dons & biensfaits donnez par toy à son pere , par luy sont ja mis en oubly , sire regarde doncques & oys madiete dame d'Orleans disant en requerant avec le Prophete. *Domine deduc me in iustitia tua propter inimicos meos* . C'est à dire . Sire vueilles moy mener en ta iustice pour mes ennemis . Et ces choses dessusdictes sont de la premiere raison . La tierce raison est fondée en pitié, veüe la condition desdits supplians . C'est à sçauoir de madame d'Orleans veufue & desconfortée avecques ses enfans innocens , tes neveux qui sont orphelins & desconfortez non ayans pere fors toy . Tu dois doncques plustost estre enclin & contendre plus diligemment à faire iustice à iceulx supplians comme ils n'ayent nul reffuge fors à toy qui es leur sire souverain & ils sont tes parens bien prochains , comme tu as bien congnoissance . Vrayement à celle pitié t'esmeut saint Iaques l'Apostre en disant .

*Religio munda & immaculata est visitare pupillos & viduas in tribulatione eorum* . C'est à dire visiter les orphelins & les veufues en leur tribulation est religion pure & nette sans souilleure . C'est grand pitié vne telle & si grand Dame estre en telle peine sans desserte , laquelle peult estre comparée à la veufue de qui parle Valerian ou sixiesme liure . Icelle veufue auoit vn fils lequel iniustement auoit esté occis . Celle veufue vint à Octauian Empereur requerant iustice & disant . Sire à moy soit faicte iustice & raison de la mort de mon fils iniuste & mauuaise . Adonc l'Empereur qui ja estoit monté à cheual pour faire vn voyage luy respondit . Fille attendez tant que ie seray retourné . Et adonc ie te feray iustice & la femme incontinent luy dit . Helas ! sire tu ne sçais se jamais retourneras , ne vueilles pas mettre iustice en dilation . A laquelle respondit l'Empereur . Se ie ne retourne mon successeur à toy fera iustice . Auquel respondit la veufue . Sire tu ne sçais se ton successeur voudra à moy faire iustice il pourra estre qu'il aura empeschement comme tu as . Et posé qu'il face à moy iustice qu'el honneur sera à toy & qu'el merite auras tu de ce par deuers Dieu . Tu es tenu de moy faire iustice , pourquoy doncques quiers tu autrui ton faix . Adoncques l'Empereur voyant la grand constance de la femme & ses parolles estre raisonnables descendit du cheual & incontinent sans dilation a elle fait raison & iustice . Et ce fut la merite pourquoy cinq ans apres que ledit Empereur mourut dessoubs la Loy Payenne , par les prieres de saint Gregoire Pape fut resuscité & Baptisé selon ce que racomptent les histoires . O Roy de France , iceluy Roy & Empereur dois tu ensuiuir en enclinant à Madame d'Orleans , veufue desconfortée à toy suppliant , laquelle autresfois à toy a requis & encores requiert iustice de la cruelle & iniuste mort de son Seigneur lequel estoit ton frere . En ce ne vault riens dilation ou attente à tes successeurs Roys de France , car toy comme Roy present à ce singulierement es obligé considéré l'estat des supplians , c'est à sçauoir de la Dame d'Orleans & de ses fils . Icelle Dame est pareille à la veufue de laquelle parle saint Hierosime , ou second liure contre Iouinian ouquel il racompte que la fille de Cathon , apres la mort de son mary souuent estoit



en grans souspirs & gemissemens sans consolation : pourquoy les parens d'elle & voisins luy demanderent combien celle douleur luy duroit , ausquels elle respondit que sa vie & celle tristesse fineroient tout ensemble . En tel & pareil estat sans doubte est Madame dessusdicte car elle ne peut auoir remede fors par voye de iustice , laquelle elle requiert . En verité elle ne requiert pas par voye de fait ou de vengeance jaçoit ce qu'elle & ses fils soient plus puissans à l'ayde de leurs parens amis & alliez à prendre vengeance de la mort d'Orleans que n'est le Duc de Bourgogne . Icele voye de iustice tu ne peulx refuser & partie aduerse iustement ne le peut fuyr ne decliner . Attendue doncques la condition des supplians . Sire Roy fais que de toy puisse estre dicte la parolle du Prophete disant à nostre Seigneur .

*Iustus Dominus & iustitias dilexit equitatem vidit vultus eius.* C'est à dire nostre Seigneur est iustice & a aymé iustice , son regard a veu equité . Et ce est dit tant qu'à ladicte raison tierce . La quarte raison est en la partie du cas , car icelle mort si cruelle , si vile & abhominable ne semble point à veoir pareille ne il n'est homme naturel que sur icelle ne doye auoir compassion . Icele doncques bien considerée , tu dois estre plus enclin à iustice par la coustume des Roys anciens , qui par grand compassion & mesmement de la mort de leur ennemy ploroient : par plusforte raison tu dois condoler sur la mort de ton frere & iceluy recouurer par couraige diligent . Se ce n'est ainsi fait trefgrand reproche sera à toy & à plusieurs autres . Nous lisons comme Cesar voyant la teste de son ennemy Pompée commença à plorer & dire que tel cheualier ne deuoit point ainsi mourir . Iceluy mesmes fut moult triste de la mort de Cathon son ennemy & aduerfaire en donnant grand ayde & consolation à ses enfans en tant qu'il luy fut possible . O Roy de France tresdebonnaire à l'exemple d'iceux tu dois auoir consolation de la mort de ton frere . Treschier & loyal amy considere la maniere de la mort de luy laquelle est moult lamentable & piteuse à remembrer . Helas ! Sire se l'esprit de ton frere parlaist . O quelle chose il diroit . Certainement il diroit les parolles qui s'ensuiuent ou pareilles . O monseigneur mon frere regarde comment par toy i'ay receu mort , c'est pour la grand amour qui estoit entre nous deux regarde mes playes desquelles cinq especiallement furent cruelles & mortelles . Regarde mon corps abbattu foible & enucloppé en la boüe . Regarde mes bras coupez & ma ceruelle espandue hors de mon chef . Regarde fil est douleur pareille à ma douleur . Helas ! il ne suffist mie à partie aduerse estaindre ma vie si cruellement & sans cause , mais si soubdainement & trahistreusement me surprint ainsi que i'alloye de la maison madame la Royne par deuers toy . Pourquoy me meit en peril de damnation ? En apres partie aduerse fest efforcé de diffamer moy & ma lignée par son libelle mauuaise & diffamatoire . Sire Roy considere ces parolles de ce feroient les parolles de ton frere fil pouoit parler . Soyés doncques plus enclin à faire iustice . Ces choses par dessus ouyes & attendu la requeste presente de madame d'Orleans fais que de toy puisse estre dit & verifié , ce qui est escript ou second chapitre du premier liure des Roys .

*Dominus retribuet unicuique secundum iustitiam suam.* C'est à dire nostre Seigneur rendra à vn chacun selon sa iustice & ce est tant que la quarte raison .



La quinte raison est fondée és maulx & inconueniens qui pourroient aduenir se de ce cas n'est faicte iustice, par ce que chacun vouldroit vsfer de voye, de fait, & estre partie & iuge. Et auecque ce s'en ensuiuroient trahisons & diuisions par lesquelles pourroient estre destruites les terriennes dominations comme cy apres sera declairé: car selon ce q̄ dient les Docteurs, tresgrād moyen de garder paix en nostre Royaume, est que iustice & iugemēt soit fait à vn chacū. Et ce tesmoigne S. Cyprian en son liure des douze abusios, disant ainsi. *Iustitia, inquit, regis pax populorū, tutamen pueris, munimentū gentis, terræ fecunditas, solatium pauperum, hereditas filiorū: & sibimet spes futura beatitudinis.* C'est à dire, q̄ la iustice du Roy, est la paix du peuple, la deffentiō des enfans, la garnison & munimens des gens, abondance & fertilité de la terre, le soulas des pauures, heritages des fils, & à luy mesmes esperance de beatitude aduenir. C'est la gloire perdurable. Et à ce propos dit le Prophete. *Iustitia & pax osculatae sunt.* C'est à dire iustice & paix ont baisé l'un l'autre, & sont alliées ensemble & conioinctes. Et s'aucuns veulent que par ceste execution plusieurs maulx se pourroient ensuyuir pires que deuant, pour la cause de la puissance qu'à le Duc de Bourgongne, sicomme on dit. A ceste imagination qui est de grand apparence & de petit fait, on peut respondre que dudit Duc de Bourgongne ce n'est riens au regard de sa puissance Royale. Quelle puissance a il fors autant que tu luy as donné & que tu souffres qu'il en ait. Iustice & verité, certainement combien qu'elles soient attargées tousiours en la fin par la grace de Dieu elles sont & demourent maistresses, ne il n'est si bonne seurte comme est labourer pour verité & iustice. Qui sont les escuyers & cheualiers qui à luy osferoient seruir à l'encōtre de toy ou qui seroiēt les estrangiers qui se mettroient en peril de mort pour si mauuaise & faulse querelle, certainement nuls. O vous cheualiers de Bourgongne & de Flandres, clerks & laiz, & aussi tous ceux des pays de partie aduerse. Enuoyez hommes loyaux, sans faueur ou haine, affin qu'ils oyent ceste cause plaider, verité soit ouye, & qui a droit si le monstre. O Roy treschrestien, Ducs, Comtes auec les autres Princes, vueillez porter & donner ayde tant que iustice soit gardée, pour laquelle garder principalement vous estes constituez & ordonnez. O sire Roy, regarde comme les Roys de France qui petite puissance auoient au regard de toy ont fait iustice de plus grans seigneurs que ne sont partie aduerse, comme il peut apparoir à celuy qui vouldra lire les histoires du temps passé. En outre, qui sont ceux qui osferoient eux exposer contre leur seigneur souuerain, faisant iustice selon la voye de verité & de loyauté, sans faueur de partie comme il appartient à bon iuge & iustice, ce tesmoignant Tulle ou second liure des offices ainsi disant. *Iudicis, inquit, est semper verum sequi.* C'est à dire il appartient au iuge ensuiuir tousiours verité. Iceluy mesme dit en vne oraison qu'il feit ainçois qu'il allast en exil. *Nemo, inquit, tam facinorosus inuentus est vita, ut non tamen iudicium prius sententiis conuinceretur, quam suppliciiis applicaretur.* C'est à dire. Nuls dit-il n'est trouué de si mauuaise vie que son delict ne soit conuaincu par sentences, ainçois qu'il soit mis à torment. Et pource, Sire Roy trespuissant, tu es tenu sans doubte faire iustice. Car si par ceste iustice s'ensuyuoient aucū inconueniens, iceux finablement redōderoient contre partie aduerse pour la raison de sa coulpe comme il sera veu cy apres. Certainement la sentēce de nostre seigneur Iesus Christ ne peut faillir ainsi disant. *Qui*  
de



*de gladio percutit gladio peribit.* C'est à dire qui fiert de glaiue il perira par glaiue. Et Ouide de l'art d'amours dit. *Nec enim lex æquior ulla, Quàm necis artifices, arte perire sua.* C'est à dire nulle loy n'est plus iuste que les faiseurs de mort & occisions perissent par leur art & par leur euure. Et pource, sire Roy, Ouure les portes de iustice & exaulce les prieres de madiète dame d'Orleans, qui sont moult iustes & raisonnables : affin qu'en toy puisse estre verifié le dit du Prophete ainsi disant. *Dilexisti iustitiam & odisti iniquitatem propterea unxit te Deus tuus oleo leticie præ consortibus tuis.* C'est à dire, tu as aymé iustice & tu as haï iniquité, pource ton Dieu ta oingt d'huile de lieffe dessus tous tes compagnons, & c'est tant qu'à la quinte raison. La sixiesme raison & derniere tant qu'à present est fondée en cinq mauuais maintiens de partie aduerse qu'il tint tousiours en continuant apres ce cruel & abhominable fait. Aucune chose n'est en ce monde que Roy doie tant doubter & escheuer, que l'elevation d'Orgueil en ses subiects au regard de sa domination : car tu Sire en ta domination dois ensuiure le Roy des Roys, duquel dit l'escriture sainte. *Deus superbis resistit, humilibus autem dat gratiam.* C'est à dire, Dieu resiste aux orgueilleux, & aux humbles il donne sa grace. Dōcques tu es tenu d'humilier l'orgueil de partie aduerse, qui semble si cruel & si esleué que sa puissance pour sa mauuaise cause puisse souffler contre ta puissance & y resister. Et pource Roy de France & vous tous mes seigneurs, considerez la rebellion & inobedience de partie aduerse, nō mie tant seulement contre les commandemens du Roy : mais contre le conseil de vous tous du sang Royal. Il est certain que le Roy de Cecille, monseigneur de Berry & plusieurs autres, dernièrement es grās froidures furent à Amiens, affin qu'ils peussent trouver appoinctement raisonnable & paisible pour le bien des parties. Et mesme-ment pour le bien du Roy & de tout son Royaume. En verité iceux dessusdits seigneurs ne peurent faire la paix par eux désirée enuers la partie aduerse en luy notifiant la voulenté & commandement du Roy : Lequel contenoit que pas ne venist deuers le Roy iusques à tant qu'il seroit par luy mandé. Et quand lesdits seigneurs luy donnerent conseil qu'il obeist au commandement du Roy, à grand peine peurent ils obtenir qu'il ne venist au Roy avecques grād puissance de gens d'armes & trefardens, & ne se deporta de luy attarger encores quinze iours d'y venir. Veez mes seigneurs qu'elle obeissance & quels maulx se peuuent ensuyuir de ce, apres ledit conseil finé à Amyens il fait vne congregation d'hommes d'armes & à moult grand puissance vint à Paris, ainsi comme s'il voulsist conquerre le Royaume. Et est vray que le Roy & les seigneurs de son sang sentans la venue s'assemblerent ensemble pour sur ce pourueoir de remede. Et apres le Roy luy manda par certains messagiers qu'il ne venist point deuers luy accompagné de plus de deux cens hommes d'armes. Toutesfois ce nonobstant ladicte partie aduerse vint accompagné de six cens hommes d'armes & plus en allant au contraire de la voulenté & commandement du Roy. Et apres ce qu'il fut venu à Paris pour sa puissance il luy sembloit qu'on deuoit toutes choses faire à sa voulenté, dont pour certain le Roy, la Royne & les autres Princes ne luy deuoient aucune chose reffuser : mais parloient à luy agreablement en l'appaisant de son malfait. O domination de France se tu veux ainsi ce souffrir en brief temps tu decherras de ta ioye. Apres ladicte partie aduerse fait destruire les deffences &



munitions faictes autour de la maison du Roy pour cause d'escheuer la voye de fait qui ja auoit esté commencée par ladicte partie aduerse. Certainement ceste maistrise & autres plusieurs choses qu'il a faictes, sont signes de subiects, tendans à la malle fin contre le Roy: Car il deust estre venu pour luy humilier, & il vint l'espée tirée avec grand nombre d'hommes d'armes, desquels plusieurs estoient estrangiers. De rechief plusieurs fois il a esmeu les simples à Paris, en proposant & semant par tout le Royaume libelle diffamatoire, en promettant faulces promesses. Et iceux croyans qu'il deust faire merueilles & estre gouuerneur de tout le Royaume, ont par luy esté deceuz, en demonstrent à luy grand honneur & à ses escrits: & mesmement par cris & acclamations de voix. Pour lesquelles choses & autres semblables il est esleué en hōneur, orgueil, & cruauté à soustenir son iniquité. Helas, Sire Roy, n'est-ce mie grand presumption apres ce malefice cheuaucher par la cité de Paris ses armeures descouuertes, & estre venu à ton conseil paisible, avecques haches & glaiues, ne tu ne deuois pas souffrir venir aucun plus fort de toy à ton conseil: affin que par aduanture le diable qui meit en son cueur qu'il feist ce mal, n'esmeut iceluy en continuant sa mauuaise: pource que les Princes du conseil n'approuuent pas son peché tresmauuais, ne tu ne deueroyes point souffrir homme coupable & indigne, allant par voye de fait estre avec toy plus fort: Car il n'est possible iceluy attraire avec luy ceux du peuple par les moyens dessusdits, à la destruction de ta damnation & de tout ce Royaume, il te plaist doncques humilier partie aduerse, & toy demonstrier iuge droicturier, sans paour, affin que de toy il puis estre dit ce qui est escrit au tiers liure des Roys au huietieme chapitre. *Iudicabit seruos suos, iustificans quod iustum est, attribuens eis secundum iustitiam.* C'est à dire, il iugera ses seruiteurs, iustificiant ce qui est iuste, en baillant à iceux selon sa iustice. Et c'est tant qu'à ladicte raison tierce, par laquelle & autres precedentes, clerement il appert comment tu es tenu de faire iustice à madicte dame d'Orleans. En laquelle seconde, comme j'ay dit, sera declairé le crime & delit de partie aduerse, & comment il perpetra mal irreparable & inexcusable, & adiousteray six raisons loyaument approuuans la feauté & seruice de monseigneur d'Orleans prenant pour le theume, la parolle du proposant pour partie aduerse. C'est à sçauoir. *Radix omnium malorum cupiditas.* C'est à dire, couuoitise est la racine de tous maulx. Il me semble que couuoitise a esté cause de cest homicide, non mie tāt seullement couuoitise de richesses: mais avec ce couuoitise d'honneurs & couuoitise d'ambition, couuoitise dōcques a esté cause de ce mauuais peché, comme il appert plus à plain en la sixiesme raison de ceste presente partie. Neantmoins ie viendray à demonstrier la grandeur & abomination du peché de partie aduerse, lequel j'ay à demonstrier & à declairer par six raisons tant seullement. La premiere est fondée en ce que partie aduerse n'auoit nulle auctorité ou puissance de iuge sur ledit deffunct. La seconde raison est fondée en ce que j'auoit que partie aduerse eut auctorité sur ledit deffunct. Neantmoins il proceda par voye de fait contraire à toute iustice & à toute voye de droit. La tierce raison est fondée es alliances qui estoient entre monseigneur d'Orleans & partie aduerse. La quarte raison est fondée en ce qu'iceluy homicide est damnable n'oncques ne peut estre bien traicté. La cinquiesme raison est fondée en ce que partie aduerse feist occire monseigneur d'Orleans à mauuaise

fin



fin & intention. La sixiesme raison est fondée en ce qu'il ne souffrist à partie aduerse priuer de vie monseigneur d'Orleans: mais auecques ce s'est efforcé de deshonorer sa renommée par son libelle diffamatoire en occisant iceluy par seconde mort. Tant qu'est à la premiere, il appert clerement que la malice de partie aduerse est incorrigible & irreparable, attendu qu'il n'auoit nulle auctorité sur ledit deffunct: car selon les loix & decretz, selon raison, & le tesmoigne la saincte escriture, nul ne doit autrui occire sans auctorité de iuge ou iudiciale. Autrement chacun pourroit autrui occire selon son plaisir, & adonc regneroit confusion & maniere de viure sans gouuernement raisonnable & sans chief, & vn chacun tumultuairement seroit fait Roy. Et tres-veritable chose est que partie aduerse n'auoit nulle auctorité sur monseigneur d'Orleans: ainçois estoit tenu de luy faire honneur & reuerence comme à fils de Roy, & le deuoit nommer & appeller son seigneur & l'honorer en tout siege & parole, car les prerogatiues & priuileges des fils des Roys ce requierent. Appert doncques vsurpation d'auctorité de partie aduerse, & son malefice estre perpetré iniustement & mauuaisement. Que l'auctorité soit necessaire pour faire autrui occire, appert clerement, en plusieurs escritures, & de fait S. Augustin exposant le dit de nostre seigneur ou vj. chap. de l'Euangille monseigneur S. Mattheu. *Omnis qui gladium acceperit, gladio peribit.* C'est à dire, tout homme qui aura prins glaiue, perira par glaiue. Là dit ledit saint Augustin. Cil prent le glaiue qui sans superiorité & legitime poteste apparente est armé & hardy d'autrui faire mourir. En apres il ne loist pas occire malfaieteur sans auctorité, tesmoing ledit S. Augustin en la cité de Dieu. *Qui, inquit, sine publica administratione maleficum interfecerit, velut homicida iudicabitur.* C'est à dire, qui malfaieteur aura occis sans publicque administration de iustice, il sera iugé comme homicide. Dont dit la loy des iugemens. *Vigor, inquit, publicus tutela in medio constituta est, ne quis de aliquo, etiam sceleribus implicato sumere valeat ultionem.* C'est à dire, la vigueur publique est ainsi comme deffence constituée & ordonnée ou meillieu affin que nul ne prenne vengeance, jaçoit-ce qu'il soit enueloppé en grans & abhominables pechez. Et est vray que le proposant pour partie aduerse respōd aux loix, disant que les loix ne doiuent secourir à ceux qui contredient aux loix. Et de fait dit que le tyran va droitement contre les loix vniuerselles, pourquoy il afferme que cestuy homicide par nulle maniere n'est contre les loix. Helas! dont cognoist le proposant de partie aduerse, que monseigneur d'Orleans estoit tyran. Qui est le iuge qui le declare tyran. Certainement il conuiēt icelle fallace estre examinée, laquelle est deception de commencement, presupposant monseigneur auoir esté tyran. Et pource que le proposant de partie aduerse, fonde la plus grand partie de son fait en ce, que monseigneur d'Orleans estoit tyran selon raison, & que pource estoit licite à iceluy occire & mettre à mort, voyans dont les conditions de tyrannie & lesquels deuoient estre appelez tyrans. Le Philosophe dit au quatriesme chap. des Moralitez. *Tirannus est, inquit, cum aliquis princeps, vi & violentia potestatis, sine titulo terram vsurpat alienam, & de facto aliquā occupat ciuitatem vel patriam & qui incorrigibilis est & nulli obediens.* C'est à dire, tyrannie est quand aucun Prince par force & violence de puissance vsurpe sans tiltre, & iniustement apprehende estrange terre & de fait occupe aucune cité ou païs, & qu'il est incorrigible & à nully



obeïssant. Maintenant doncques considerons si monseigneur d'Orleans à eües telles conditions. Certainement nenny: car oncques il n'occupa la terre d'aucun, qui a sceu le contraire si le die. Partie aduerse ne deuroit point appeller monseigneur d'Orleans tyran, car oncques ne tint dominations fors icelles qui luy furent données du Roy heritablement, & les terres que iustement il a acquis. Mais le Duc de Bourgongne sans iuste tiltre, tient & occupe trois chasteaux & chaste-lenies qui sont de l'heritaige & du demaine du Roy, c'est à sçauoir l'Isle, Doüay, & Orchies. Nonobstāt les sermens faits sur le corps nostre seigneur, par lesquels il a iuré au Roy rendre & restituer lesdits chasteaux par cas & condition qui est aduenue. Apres monseigneur d'Orleans ne fut oncques incorrigible: car certainement ie croy qu'oncques si grand Prince comme il estoit, n'honora mieux iustice que luy. Le proposant de partie aduerse, die quelles rebellions & inobe-diences monseigneur d'Orleans a fait contre iustice. En son temps plusieurs no-tables personnes lesquelles viuent encores sçauēt bien que nul seigneur du mon-de ne soubstint & conforta autāt la iustice du Roy capitale, comme il a fait tout le temps de sa vie. Considerons aussi les conditions de tyrans selon les Philoso-phes. Le tyran met toute son estudie à occire & destruire les preud'hommes & saiges de la terre, il quiert la ruine & destruction des Eglises & estudes, & met toute son estudie & pensement à les confondre, & pour les malefices est touf-iours douteux, en estudiant, de garder & munir son corps & sa personne par tresforte garde. Ces conditions de tyrannie n'eut pas mōdit seigneur: mais il eut tout au contraire & à l'opposite. Premièrement il ne fait onc saiges ne fols occi-re: ains souuerainement il aimoit sages, & tres volentiers veoit quelque chose de nouueau, tāt qu'est d'Eglises il ne les destruisit pas: mais les a soubstenues, def-fendues & reparées, dōnant à icelles plusieurs biens, & qui plus est plusieurs nou-uelles Eglises il fonda, ausquelles il a donné plusieurs grans rentes & reuenuës comme il appert clerement, tant qu'est à la garde de luy mesmes pource qu'il se sentoit pur & innocēt enuers tous, il ne cuidoit point qu'aucun luy vouldist mal-faire, & ne se doubtoit de nully n'il ne gardoit pas son corps comme il a esté veu. Et en verité s'il se fut doubté d'aucun, il n'eut pas esté ainsi traistreusement occis. Moult doncques il est à esmerueiller comment partie aduerse a osé appeller ice-luy tyran en excusant son horrible fait sur tel fondement, attendu que mon-dit seigneur d'Orleans a eu vertus opposites du tout en tout aux conditions de tyrans. Et ce respond assez au fondement de la damnable proposition de partie aduerse: Consequemment le proposant de partie aduerse dit que jaçoit-ce que son maistre ait fait contre les loix, tant qu'à la lettre, toutesfois il n'a pas fait contre l'intention du faiseur de la loy ne contre la fin des loix, mais pour l'amour de Dieu. Qui est celuy qui luy a reuelé l'intention du faiseur de la loy, & la fin des loix à faire mourir hommes sans auctorité & sans declaration de malefices d'ice-luy qui est occis par celle maniere: il pourra faire mourir les autres Princes & dire qu'ils sont tyrans, chacun pourra semblablement interpreter & exposer les loix, laquelle chose est inconuenient moult grand selon ce qui est escrit. *Cuius est leges condere eius est interpretari.* C'est à dire, à celuy qui a fait les loix, appartient à exposer & interpreter icelles, il est tout cler que partie ne pouuoit establir loix obligeans mōdit seigneur d'Orleans comme il ne fut à luy aucunement subiect,

ne



ne à luy consequemment ne competoit l'interpretation des loix, au regard de monseigneur d'Orleans. Et jaçoit que le proposant de partie aduerse die son seigneur estre le Doyen des Pairs, pource ne s'ensuit il pas qu'il eut auctorité sur le dit deffunct: car s'ainsi estoit il s'ensuiuroit qu'il auroit auctorité sur tout le Royaume, & qu'il seroit pareil au Roy. Qui n'est pas à dire pource s'il est Pair il n'a pas auctorité fors seulement en ses terres. Et en tant qu'il attribue à luy la puissance d'autrui sur le Royaume, il entreprend & approprie à luy la domination du Roy. Verité est, que le proposant de partie aduerse allegua douze raisons, à approuuer que son seigneur pouoit licitement faire mourir monseigneur d'Orleans sans commandement de nulles personnes quelconques, desquelles les trois premieres sont fondées en trois Docteurs de la sainte escriture de Theologie, les autres trois en trois Philosophes moraulx, c'est à dire traictans de meurs, les autres trois, en trois loix ciuiles, & les trois derraines en trois exemples de la sainte escriture. Tāt qu'est à la premiere raison, elle est alleguée en la derniere distinction du dernier liure des Sentences, disant. *Quando, inquit, aliquis aliquod dominium sibi per violentiam suscipit nolentibus subditis, vel sine consensu communitatis & non est recursus ad superiorem per quem de tali inuasore iudicium possit fieri, tunc qui ad liberationem patriæ talem tyrannum occidit laudatur & premium accipit.* C'est à dire. Quand dit saint Thomas d'Acquin, aucun reçoit par violence pour luy aucune domination sans la voulenté des subiects ou par consentement de communauté, & on ne peut auoir retour ou secours à souuerain par lequel puist estre fait iugement de tel inuasor, adonc celuy qui occit tel tyrans pour la deliurance du païs est à louer, & prent, & reçoit grand guerdon. A ce ie respons que ce ne fait riens au propos: car monseigneur d'Orleans n'enuahit oncques aucune domination par violence qu'il ait voulu enuahir n'vsurper la domination ne seigneurie du Roy, ie dis qu'oncques ce ne pensa, ainsi comme il apperra plus amplement cy apres en la tierce partie. Je dis consequemment que saint Thomas parle d'iceluy qui peut estre trouué tyrant. Et mōseigneur d'Orleans ne l'estoit point, comme assez il est declairé. A ce propos S. Augustin demande & fait question ou liure de franche voulenté, s'il loist au pelerin d'occire le larron faisant aguets en la voye, dont finalement il n'appert point par les parolles dudit Augustin qu'aucun puisse licitement occire autrui sans auctorité comme demonstre Henry de Grand. En outre ie dy que ja soit que monseigneur d'Orleans fut tel que partie aduerse le veut dire, icelle partie aduerse auoit refuge souffisant au Roy, quand il estoit sains & haictié à la Royne & aux autres seigneurs du sang Royal, comme il n'estoit nuls d'iceux qui n'eut exposé corps & biens à pugnir mōseigneur d'Orleans ou cas qu'il leur eut esté declairé iceluy vouloir vsurper & auoir la domination du Roy & aucunement l'empescher. Et certainement mondit seigneur estoit assez saige pour cōsiderer qu'il ne pouoit paruenir à la domination Royale. Attendu que tous eussent esté à luy contredisans, & que le Roy a fioux à luy successeurs. La secōde raison dudit proposant est fondée en l'auctorité de saint Pierre, disant ainsi. *Subditi, inquit, estote regi quasi præcellenti siue ducibus tanquàm ab eo missis ad vindictam malefactorum, laudem verò bonorum quia hæc est volūtas Dei.* Soyez dist monseigneur S. Pierre subiects au Roy comme le souuerain & excellent. Et aux Ducs comme enuoyez de par luy à la vengeance des malfaiçteurs &



à la grand loüenge des bons: car c'est la voulenté de Dieu. Ces parolles dessusdictes sont escrites en la premiere exemple de S. Pierre & ou second chapitre, ceste auctorité ne fait riens au propos. Par ce, ne semble il pas que ledit Apostole vueille, ne soit son intention qu'un Duc ait aucune domination ou seigneurie sur tout un Royaume: mais tant seulement sur le sien pays. Autrement il s'ensuiuroit qu'en Bretagne, en Berry & es autres Duchez du Royaume deuroient obeir au Duc de Bourgogne. Ainsi donc appert comment ledit proposant abuse la sainte escriture, en tant qu'il s'efforce par maniere d'argumēt icelle amener son propos. La troisieme raison est fondée en ce que dit Sabellic en son tiers liure ou xv. chapitre. *Tyranno, inquit, licet adulari quem licet occidere.* C'est à dire, il loyst flatter au tyran par deception, lequel occire est licite chose, ce ie dis que Sabellic parle des tyrans manifestes, apparens & approuuez. La quarte raison est fondée au dit d'Aristotele en ses Politiques, c'est à dire en son liure parlant du gouvernement de cité en plusieurs, disant qu'il est licite & chose digne de loüenge occire un tyran. A ce ie dis qu'Aristotele parle de tyran publique, & tel n'estoit pas monseigneur d'Orleans comme il est veu par auant. La quinte raison est fondée en ce que Tulle en son liure des Offices loüe ceux qui occirent Cesar. A ce ie respons, que jaçoit-ce que Tulle fut homme de grand souffisance, toutesfois il parloit comme malueillant à Cesar: Car tousiours il soubstint les causes & fais de Pompée aduersaire de Iulius Cesar. Et aussi ledit Cesar perpetra moult de choses qu'onques ne pensa monseigneur d'Orleans. La sixieme raison est fondée & prinse ou second liure des cas des nobles hommes ou vj. chapitre. *Res est valdè meritoria occidere tyrannum.* C'est à dire, que chose est moult meritoire occire le tyran. A ce ie respons, comme dessus, car ou cas qu'il eut esté tel trouué & remede n'y eut peu estre trouué. Encore le maintiē de partie aduersē fut mauvais & illicite. La vij. raison avec deux autres ensuiuant est fondée es loix ciuiles qui diēt estre trois manieres d'hommes lesq̃ls occire est chose licite. C'est à sçauoir ceux qui delaissent cheuallerie, les aguetās de chemins, & les larrōs de nuit trouuez es maisons. A ce ie dy q̃ monseignr d'Orleans ne fut onques de telles cōditions. Tousiours auoit avec luy grād cheualerie & si aymoît outre mesure cheualerie. Tāt qu'est aux deux cōditions ie dis q̃ les loix ne cōmandent pas tels occire fors tant seulement en cas de peril ineuitable. Icelles choses sont moult lōgues de noz termes, cōme monseignr d'Orleans ne fut pas agueteur des chemins (la mercy Dieu) ne larron de nuit. Et n'est loy au monde par laq̃lle partie aduersē peut estre excusée. La x. raison est fondée en l'exemple de Moÿse qui sans auctorité occit l'Egyptien. A ce ie dis que selon l'opinion de saint Augustin & de plusieurs autres Docteurs, Moÿse pecha en occiant l'Egyptien. Et comme on dit de Moÿse & de S. Pierre l'un & l'autre trespassa les reigles de iustice, ces deux cas ne sont point semblables: car Moÿse qui estoit Hebrieu voyant l'homme qui estoit incredule esmouuant contre son frere occit iceluy affin qu'il ne tuaist son dit frere. L'vnziesme raison est fondée en l'exemple de Phinees, qui sans cōmandement occit le Duc Zambre. Et toutesfois de ce demourant impugny, eut grand remuneration. A ce respond monseigneur saint Thomas disant, que Phinees fait ce cōme maistre de la loy; car il estoit fils du souuerain Prestre, & pource auoit il puissance & auctorité publique. Et aussi ce present cas n'est pas pareil à iceluy



iceluy comme il appert en regardant l'histoire. La douziesme raison est fondée en ce que saint Michel l'Archange occist Lucifer sans commandement diuin. Et pour ceste cause fut il remuneré de plusieurs richesses, & honoré comme dit le proposant de partie aduersé. A ce ie respons, que saint Michel n'occist Lucifer, ainçois ce dire est grand derision: car l'occision de Lucifer n'est autre chose que priuation de diuine grace, & de la souueraine gloire de Paradis, de laquelle il fut deiecté de Dieu pour la cause de son orgueil. O messeigneurs, en quel liure à trouué iceluy proposant icelle theologie escrite? Certainement ie suis esbahy ou il a trouué, car il n'est liure au monde ou il soit comme il a proposé: mais qui plus est, nous auons en l'epistre saint Iude que saint Michel n'osa pas faire iniure à Lucifer: jaçoit-ce qu'il eut puissance sur luy ne à luy commāder aucune chose: mais tant seullement dit nostre seigneur te commande, & ainsi appert que les raisons dudit proposant lesquelles il a alleguées ne sont riens à l'approbation de son faulx & desloyal propos. Je dy de rechief que telles occisions alleguées par partie aduersé, ne sont pas à prendre exemple ou consequence: car en l'ancien testament moult de choses estoient souffertes que maintenant sont deffendues cōme il appert en la secōde cause & premiere question, Daniel comme il fut homme d'Eglise il feit mourir le Roy Amalech. Maintenant il ne loist pas à homme d'Eglise luy entremettre des fais de crime. En outre à Moÿse fut donné le libelle de repudiation ou refus de mariage lequel maintenant est deffendu. Adoncques la doctrine est tres mauuaise par laquelle les occisions ensuiuent, sont prinſes & amenées en exemples pour la cause de soubstenir icelle cruelle mort commise si iniustement sans auctorité. Par ce vrayement seroient les Princes en peril de mort, & tantost que renommée seroit d'aucun mal contre aucun Prince chacun prendroit hardiesse à prendre de ce punition, se ceste mort sans auctorité perpetrée n'estoit reprouuée. O vous Princes considerez que se telles doctrines estoient soubstenues chacun pourra dire, aussi bien puis occire comme feit tel, il vous plaist donc condamner ceste faulſe & desloyalle doctrine comme perilleuse, sedicieuse & abominable. Et puis dira partie aduersé & tous portans à luy faueur en ceste partie le dire Hieremie ou xx. chapitre. *Confundantur vehementer qui non intellexerunt opprobrium sempiternum quod nunquā delebitur.* C'est à dire, ceux seront confondus grādement qui n'ont point entendu l'opprobre perdurable qui iamais ne sera osté ne pardonné. Et c'est tant qu'à ma premiere raison de ma seconde partie. La seconde raison est fondée en ce que l'occisiō cruelle de monseigneur d'Orleans ne fut pas executée par voye de iustice, & posé que partie aduersé eut eu auctorité de ce faire, neātmoins estoit il tenu de traicter ladicte mort par voye de iustice, & par informations precedentes, par bons tesmoings non reprochables approuués suffisamment. Icelle voye nullement il ne tint: car premierement il feit occire monseigneur d'Orleans & apres il enquist les voyes par lesquelles il peut estre excusé. O Dieu quel proces & quel iuge? O iustice fais ce que tu dois, deffens ta propre cause à l'encōtre d'iceluy qui s'efforce de toy ramener à neant. En verité tous les droits enseignēt cognoistre premierement les causes & apres prouuer les sentences, & en la fin icelles mettre à executiō. A ce propos Iulius Cesar, comme racompte & recite Saluste en son Catilinaire, que quād les iuges auront commencé occire hommes sans ce qu'ils soient condamnez en



iugement moult de maux s'en peuuent ensuiuir, n'aucun ne pourroit seurement viure. Et met l'exemple des Lacedemoniens qui pour leur victoire encōtre ceux d'Athenes constituerent trēte hommes à gouuerner la chose publicque, lesquels trente hommes feirent mourir plusieurs & sans proces precedent, dont moult grans maux s'en ensuiuirent & aduindrent. Semblablement moult de maux & sans nombre nous aduiendrōt se telles choses sont souffertes. A ce propos, est ce que ledit Saluste escrit de Cathelin & ses fauorables qui cōme ils voulsissent ardoir la citē de Romme, & occire les Senateurs & Cōsuls de Romme. Tulles qui adonc estoit Consul, jaçoit-ce qu'il sceut toutes ces choses : toutesfois il ne feit nulle execution contre ces malfaiçteurs iusques à ce qu'il peust prouuer leur vie, dont messeigneurs, attendu que ce malefice a esté commis & perpetré obstinément contre tout droit & iustice il ne demoura pas impugny selon la parole de nostre seigneur parlant par Ysaie au xlvij. chapitre dudit Ysaie *Videbitur opprobrium tuum, ultionē capiam & non resistet michi homo.* C'est à dire, ton opprobre sera veüe, ie prendray vengeance & homme ne resistera pas à moy, & c'est tant qu'à la seconde raison. La tierce raison est fondée en ce que partie aduerse auoit fait alliance avec monseigneur d'Orleans la plus forte & la plus certaine que pouoit estre faicte presens plusieurs seruiteurs d'une partie & d'autre : dont aussi par l'espace d'un an deuant l'occision de mondit seigneur d'Orleans, auoient esté faictes & traictées alliances & certaines promesses entre lesdits seigneurs d'Orleans & de Bourgogne presens aucuns prelatz, nobles, clerics, & conseilliers d'une partie & d'autre. En apres iurerent sur le canon & l'image du crucifix en atouchant les sainctes Euāgiles, & promeirēt par le salut de leurs ames, & la foy de leurs corps, que dorenavant ils seroient loyaux freres, & compaignons d'armes, de rechief promeirent que se l'un sentoit aucun mal ou dommage aduenir à l'autre, il luy reueleroit ou manderoit. En apres feirent accord qu'ils porteroient l'ordre l'un & l'autre comme ils feirent. En apres de rechief lesdictes alliances furent confirmées en la derraine feste, qui fut à Compiēgne, & à plus grand confirmation des choses dessusdictes, monseigneur d'Orleans & partie aduerse feirent iurer plusieurs cheualiers & seruiteurs d'une partie & d'autre, que bien & loyaument ils ayderoient à maintenir & nourrir les promesses dessusdictes pour l'amour des deux parties dessusdictes. Et feroient sçauoir l'un à l'autre si aucū mal luy deuoit aduenir cōme dit est. En outre monseigneur d'Orleans & partie aduerse, feirent entre eux alliances & considerations particulieres, en promettant & iurant sur la vraye croix eux garder l'honneur & proffit l'un de l'autre, & qu'ils resisteroient à l'encontre de tous vueillās aucune chose faire contre l'hōneur & proffit d'un chacun d'eux. Ces choses dessusdictes assez appairent par les alliāces sur ce escrites & signées de leurs mains scellées de leurs propres seaulx. O tu partie que peux tu dire à ces choses? où est la foy qui se peut fier en toy cōme tu ne puisses nier ces alliances que tu as fait deuāt tesmoings encores viuās: tu as esté veu de tous porter l'ordre de monseigneur d'Orleans. Quelle chose feit il apres, certainement il ne feit riens contre luy: car de ce temps ensuiuant entre luy & partie aduerse ne furent aucunes parolles laidengeuses: sur lesquelles on peut fonder aucun mal. Appert donc que mauuaisemēt & traistreusement il feit occire iceluy qui se confioit en luy. O partie aduerse que peux tu cy respondre? Se tu dis que tu as iceluy fait

occire



occire pour raison des malices qui par ton command sont proposées contre luy. Dy donc pourquoy tu as fait & promis alliâces avec luy que tu tenoyes si mauuais, si faulx & si traistre cōme tu as fait proposer. Tu as cognoissance que loyaux hommes iamais ne feront alliance avec celuy qu'il sçauroiēt estre traistre. Tu dis que monseigneur d'Orleans estoit traistre au Roy donc tu te faisoies traistre en fait, en promettant lesdictes alliances. Tu as accusé mōdit seigneur d'Orleans des alliances qu'as dit luy auoir eu avec Henry de Lenclastre, que diras tu donc des alliances & conuenances qu'apres as eu avec monseigneur d'Orleans? Se icelles choses par lesquelles tu as accusé monseigneur fussent aduenues apres les alliances que tu as fait avec luy, tu eusses aucunemēt eu couleur de rompre & enfraindre lesdictes alliances, jaçoit-ce que celle couleur ne souffiroit pas, tu toutesfois sçais bien q̄ par ton libelle diffamatoire tu n'allegue riens estre fait apres lesdictes alliances. O trahison abhominable, qui te pourra excuser? O tu cheualier qui as loyauté pour ton fondement ja Dieu ne seuffre que tu ayes voulu approuuer icelle trahison. O partie aduerse tu as visité plusieurs fois monseigneur d'Orleans quand il viuoit. Item tu as mangé & beu avec luy. Item as prins avec luy ensemble espice en vn mesmes plat en signe d'amitié. Et en la parfin le mardy dont il fut occis le lendemain te pria amoureusement que tu dinasses avec luy le dimanche prochain ensuiuant, laquelle chose tu luy promis, en la presence de monseigneur de Berry qui est cy present. Certainement pourroit dire mōseigneur d'Orleans la parolle de Iesus Christ, laquelle il dit de Iudas le traistre. *Qui mittit manum mecum in paropside hic me tradet.* C'est à dire, celuy qui met la main au plat me trahira. O messeigneurs considerez ceste trahison & y mettez remede. Considerer de rechief que cheualerie soit gardée, foy & loyauté, dont dit Vegecie de la chose de cheualerie. *Milites, inquit, iurata sua omnia custodiant.* C'est à dire, que tous les cheualiers gardent leur serment. Et à ce de seure tous les autres sont contrains & obligez tous les Princes. Celuy qui rompt & enfraint sa loyauté & serment n'est pas digne d'estre appellé cheualier. Et c'est tant qu'à la tierce raison. La quarte raison est fondée en ce que la maniere de la mort monseigneur d'Orleans fut damnable & desloyalle. Et celuy qui soustiendrait & voudrait dire le contraire ne seroit pas bon Chrestien. Veons doncques que la iustice seculiere donne aux malfaiçteurs espace de penitence, & tu partie aduerse, tu iceluy feis mourir si soubdainement qu'en toy ne demoura pas qu'il ne trespasast sans penitence. Pourquoy il semble que tu as mis & exposé toutes tes forces de procurer la damnation de l'ame perdurable avec l'occision du corps, certainement à grand peine pourras tu faire satisfaction à Dieu, car en tant que tu le cuidois plus grand pecheur, de tant luy estoit besoing de plus grande penitence & longue comme tu deuois supposer. S'ensuit doncques puis que tu l'as priué de temps & d'espace de penitence selon ton pouuoir, que ton peché en est plus grief & plus inexcusable, attendu que mondit seigneur n'auoit nulle doubte de sa mort, & que luy comme non remēbrable de la mort, fut occis soudainement & cruellement, nostre seigneur luy octroye par pitié qu'il soit trespasé en l'estat de grace comme ie croy qu'ainsi fut, car en petit de temps deuant il tresdeuotement s'estoit confessé. Je dis en outre qu'euure de mauuais Chrestien est d'ainsi occire homme. Et qui voudroit soutenir la maniere de ceste mort & voudroit dire que ce seroit chose



meritoire. Je dis qu'il parle mauuaifement, & croy que ce feroit erreur selon les Theologiens. Oyez messeigneurs, & cōsiderez la maniere que tint partie aduerse apres la mort de monseigneur d'Orleans, & comment luy vestu de noirs habits, accompaigna le corps depuis l'Eglise des Guillemins iusques aux Celestins, demonstrant signe de pleurs & douleur, & ce fait le ieudy ensuiuant la mort defusdicte. Considérez messeigneurs quelle trahison & quelle faulse simulation. O fire Dieu quels pleurs & gemissemens. O terre commēt peulx souffrir ce peché! Euure ta bouche à transgloutir tous ceux qui semblables choses font. Considere comment le vendredy ensuiuant en la maison & hostel de monseigneur de Berry, & en la presence du Roy de Cecille & dudit Duc de Berry, & aussi de partie aduerse vindrent & approcherent les gens de monseigneur d'Orleans, supplians affin qu'ils enquerussent qui estoit faiseur de ceste homicide, & qu'ils eussent mardicte dame d'Orleans & ses enfans pour recommandez, adoncques eux trois ensemble parlans, respondirent par la bouche de monseigneur de Berry que ceste supplication estoit raisonnable & que ce ils feroient le mieux qu'ils pourroient. O partie aduerse tu promis à faire le mieux que tu pourroyes & tu feis le pis que tu peuz, & ne te suffit pas ladicte occision: Mais auec ce t'es efforcé de destruire la renommée dudit deffunct. Tu as promis de faire & adiouster diligence de sçauoir qui estoit le malfacteur cōme tu mesmes le fusses & estoyes. En outre considerez messeigneurs, apres que ladicte supplication fut octroyée, partie aduerse: c'est à sçauoir, le Duc de Bourgongne cogneut son peché, disant que luy mesmes estoit celuy qui a fait occire monseigneur d'Orleans. Et en disant & estant à genoulx requist au Roy & à monseigneur de Berry conseil & ayde, affermant qu'il auoit ce fait par l'enhortement du diable, & certainement il disoit vray: Car ce tant seullement il fait pour esmouuement d'enuie & de couuoitise. O messeigneurs considerez quelle fut ceste confession. Et comment partie aduerse contredit à luy mesmes, car en la premiere confession il dit tant seullement luy auoir ce fait par mouuement du diable, & apres il fait dire qu'il luy auoir fait à bon droit. Aumoins fil n'a point de honte de son malefice, à tout le moins il doit auoir honte de ce qu'il est contraire à luy. Considérez de rechief comment partie aduerse voulut celer son peché: Et Dieu sçait que se son fait eut esté tellemēt meritoire & vaillable comme il a fait proposer il ne fut mie celé, mais de ce s'en fut glorriifié. Entendez les voyes pourquoy il recogneut son peché, certainement pour la cause qu'il ne le pouoit plus celer, & ce bien apparut. Et quand il veit son malefice descouuert, il s'en foüit isnellement de la cité de Paris comme desesperé. Adonc il pouoit dire comme Iudas le traistre. *Peccauit tradens sanguinem iustum.* C'est à dire, j'ay peché trahissant le sang iuste. O Philippe Duc de Bourgongne se tu viuois maintenant tu n'approuuerois pas partie aduerse, & dirois que ton propre fils à forligné, car tu estois appelé & nommé hardy, & fut celuy paoureux, douteux, & si fut traistre. Tu vrayement luy pourrois dire ce qui est escrit au cinquiesme chapitre des faits des Apostres. *Cur temptauit Sathanas cor tuum mentiri te spiritui sancto? non es mentitus hominibus sed Deo.* C'est à dire, pourquoy à Sathan tēpté ton cueur & menty au S. Esprit? tu n'as pas menty aux hommes, mais à Dieu. Laquelle raison est fondée en ce que la verité du cas est que partie aduerse ne fait pas mourir monseigneur d'Orleans à bonne fin ou intention,



tiō, mais pour les occasions lesquelles il a fait publier, c'est à sçauoir pour la couuoitise de dominer & d'auoir puissance & auctorité plus grande que deuant, & affin qu'il ait plus largement des pecunes de ce Royaume. Affin que plus legierement il peult exaulcer ses seruiteurs. Et appert euidemment és maintiens que tint partie aduerse deuant & apres la mort de monseigneur d'Orleans. Et est verité qu'un peu apres la mort, monseigneur le Duc de Bourgogne son pere, il sefforça de toutes ses forces, affin qu'il eut en ce Royaume semblable auctorité, telle pension, & pareil estat comme auoit eu sondit pere en son temps. Et pour ce qu'on ne luy accorda point pour ce que son pere estoit oncle du Roy, & fils du Roy, & homme de grand prudence, lesquelles choses n'ont pas leur lieu en partie aduerse. Adonc commença à machiner comment il pourroit venir à son intention. Et pour ce deuant la mort de monseigneur d'Orleans fait il semer par le Royaume qu'il auoit grande affection au bien commun, cuidant que par ce il fut à gouverner tout le Royaume. Quand doncques il veit que nonobstant ses fictions monseigneur d'Orleans auoit tousiours l'auctorité, laquelle raison enseignoit & requeroit pour ce qu'il estoit fils de Roy, & seul frere du Roy. Et avec ce estoit il plus sage d'auoir auctorité de gouverner que ledit Duc de Bourgogne. Pour ce partie aduerse voyant de toutes parts ses intentions estre frustrées & de mal fait conspira contre mondit seigneur d'Orleans comment il le pourroit faire occire, cuidant & esperant qu'apres ce nul n'osast à luy cōtredire qu'il n'eut le gouvernement de tout le Royaume. Et c'est la principale cause de ladicte cōspiration & de la mort de monseigneur d'Orleans, nonobstant les choses que pour luy sont proposées à excuser son malefice lequel estoit venu à cognoissance de tous. Et qu'il soit ainsi: Est à sçauoir qu'il fait mourir monseigneur d'Orleans pour les causes dessusdictes, & appert euidemment par le maintien qu'il fait apres son cruel fait: car tantost qu'il fut retourné à Paris. Premièrement apres la mort de mondit seigneur d'Orleans, il commença à promouuoir & exaulcer ceux qui tenoient de luy, & de faire deposer & oster plusieurs bons & vaillans officiers du Roy sans cause tant de ceux qui auoient eu leurs offices par le moyen de monseigneur d'Orleans cōme d'autres, & donner leursdictes offices à ceux qui luy plairoit affin que par iceux il eut plus grand auctorité & puissance. En outre par sa grand puissance s'est efforcé de tenir en subiectiō tous ses officiers & par especial ceux qui ont le gouvernement sur les tresors, affin que nul ne luy osast riens reffuser. Et encores dit en outre qu'il sefforça de tout son pouoir, qu'il eut tous les tresors du Roy, est à sçauoir la somme de deux cens mille francs. Et de fait il en eut grand part tant en assignatiōs comme autrement. Et avec ce il donna à ses hommes d'avecques luy plusieurs pecunes du Roy, comme bien sçauēt ceux qui ont le gouvernement du Roy & d'iceux tresors, & c'est la fin principale à laquelle il entendoit de venir par la mort & occision de mondit seigneur d'Orleans. Est à sçauoir concupiscence de donner & enrichir les siens des propres deniers du Roy. Appert doncques que la racine & fondement de son fait est en orgueil & couuoitise: mais au plaisir de Dieu ce ne luy prouffite pas. Et de fait sera verifié le dit de Iob ou septiesme chapitre. *Cum habuerit quod cupierit, possidere non poterit.* C'est à dire, quand il aura eu ce qu'il a couuoité il n'en pourra posseder. Et c'est tout quand à la cinquiesme raison. La sixiesme est final & est fondée en ce qu'il



ne souffrist pas à partie aduerse priuer de vie corporelle & espirituelle selon son pouoir, mais avec ce il voulut iceluy & les siens priuer de tout honneur & renommée en proposant libelle diffamatoire plain de mensonges & de faulsetez & en alleguant mauuaises allegations sans probations, & en imposant audit defunct crime de leze maiesté diuine & humaine, de laquelle il estoit innocent comme il aperra en la tierce partie de ceste proposition. Et peut estre dit que la iustification de cest homicide est plus grand peché que ledit homicide, car c'est perseuerance en peché par obstination maintenāt peché & est chose humaine, mais perseuerer est chose diabolicque. En celle maniere iustifier c'est homicide est defendre son propre peché, il recite à Dieu ce que Dieu hait. Et il ne fait pas ce que dit le Prophete Dauid. *Non declines cor meum in verba malicie ad excusandas excusationes in peccatis.* C'est à dire sire tu ne declines pas mon cueur en parolles de malices. Acheuée partie principale de c'est propos ie viens à la tierce partie en laquelle ie suis à répondre aux accusations en la libelle diffamatoire qui fut proposée contre l'honneur de monseigneur d'Orleans. Et est ceste partie diuisée en six points selon six faulses accusations proposées par partie aduerse. A la reproche desquelles ie prens la parolle du Prophete laquelle peut raisonnablement proposer & dire la partie de monseigneur d'Orleans. Est à sçauoir. *Iudica me domine secundum iustitiam meam & secundum innocentiam meam super me.* C'est à dire, sire iuge moy selon ma iustice & selon mon innocence sur moy. Icelle requête fait le Prophete à Dieu. Et icelle mesmes fait à toy sire Roy madame d'Orleans laquelle riens ne quiert fors iugement & iustice. Il te plaise à ouyr les responses de madame d'Orleans. Par lesquelles tu pourras veoir que monseigneur d'Orleans est iustement accusé de partie aduerse qui proposa contre luy six actiōs.

La premiere accusation est que le profant pour le party dudit Duc de Bourgogne dit, est à sçauoir, que monseigneur d'Orleans encore viuant commist crime de leze maiesté diuine au premier degré en commençant & faisant forceries & idolatries qui sont contre la foy Chrestienne & contre l'honneur de Dieu. Et est vray que tant à ceste accusation ledit proposant moult pausé arresta disant, que le iugement de ceste accusation appartient à Dieu qui est Roy souuerain, ainsi comme fil vouldist dire que ce n'appartient point au iuge humain. A laquelle accusation parla d'un Religieux appostat & de plusieurs autres forciers auxquels monseigneur d'Orleans donna & adiousta foy & consentement comme allegue ledit proposant, mais pource ad-ce ie respons en la tierce occupation en laquelle ie ne allegue riens, mais le renuoye au iugement de Dieu. Il me suffist premier que monseigneur d'Orleans ayt esté bon & loyal Chrestien & qu'il ne commist ne fait oncques forceries ne idolatries ne oncques ne se departit de la foy de Iesus Christ. Ad-ce fait grand approbation la foy qu'il eut à Dieu des sa ieunesse. Car nonobstant les ieux & esbatemens toutesfois son secours & retour estoit tousiours en Dieu & en se confessant tressouuent. Car le samedi prochain deuant sa mort tresdeuotement il estoit confessé & demonstra à plusieurs grans signes de contrition, & dit qu'il lairroit ieux & œuures de ieunesse & que du tout il s'occuperoit au seruice de Dieu tous les iours incessamment & continuellement au bien du Royaume. Et affin qu'on ne cuidast que ce soit trouué, encores vivent les religieux qui le tesmoigneroient & aussi mesmement plusieurs autres  
aufquels



ausquels il dit plusieurs semblables parolles. Et sur ce sans opinion d'aucun autre soit ouy le Duc de Bourbon son oncle qui sçait les promesses qu'il fait à Dieu & à luy, car vn peu deuant son trespas il luy promet à faire tant que Dieu & les hommes seroient contens de luy. Et que tous ceux de ce royaume seroient tenus de prier Dieu pour luy: ie ne sçay se partie aduerse auoit ouy les nouuelles de ce trefbon propos, & se de ce il se doubtoit, car c'estoit contre la fin où il contendoit, c'est à sçauoir au gouuernement de ce royaume. Et bien sçait partie aduerse que se monseigneur d'Orleans se fut gouuerné comme il dispoit il eust eu petite auctorité en ce Royaume. Il est doncques à presupposer que pour ceste cause il procura si hastiuement la mort d'iceluy. O sire Dieu tu sçais la bonne volenté qu'il a eüe à toy quand il fut occis, & en ce i'ay confidence de son salut, car comme dit l'escripture. *Iustus si morte præoccupatus fuerit in refrigerio erit.* C'est à dire se le iuste aura esté auancé de la mort il sera en refroidement & repos. Toutesfois partie aduerse fait ce qu'elle peut affin qu'il donnast l'ame de luy comme cy apres sera dit. Et apres il est notoire à tous que diligemment & deuotement il oyoit Messe. En mettant toutes choses arriere & disoit tous les iours ses heures canonialx sans delaisser. O partie aduerse pourquoy as tu proposé que ces choses n'estoient autre chose que ypocrisie & fiction? Qui a à toy reuellé les secrets des cueurs qui te fait iuger des pensées. Tu ensuis les Pharisiens appellants Iesus Christ deceueur & demoniacle. Tu sçais que les Anges ne sçauent pas les secrets de noz cueurs & d'iceux tu veux iuger. O que dit le Prophete. *Tu solus es scrutans renes & corda.* C'est à dire, ô toy Dieu tu es és cieulx & nuls autres ne cognoissent les intentions & les cueurs. Il est tout notoire comment il fonda Messes & Chappelles religieuses, & fait moult de bien aux Eglises. Soit veu son deuot testament, & par ce & autres choses bien considerées chacun pourra iuger iceluy auoir esté de bonne intention & non idolatre ou forcier. Et est vray que le proposant pour partie aduerse renuoye le iugement de ce à Dieu en tant qu'il touche le crime de leze maiesté diuine disant que de ce present cas il ne veult faire especial article à l'encontre de monseigneur d'Orleans. Maintenant doncques ie demãde pourquoy ledit proposant à ce fait. La cause si est pour ce que sa principale intention est tresmal fondée & pleine de mensongnes, en plusieurs lieux certainement les iuges humains peuuent punir les forciers & idolatres selon leur pouoir. Et est vray que plusieurs pour telle cause de fait ont esté condamnez à mort & à charité pource que tels sont mauuais Chrestiens. Et par telle continuation s'ensuiuent heresie & erreurs de la foy. Il est escript au quart liure des Roys au treziesme chapitre que Iosias extirpa & occist tous les deuins & forciers & est escript au dixiesme chapitre de Zacharie. *Diuini viderunt mendacium & sompniores locuti sunt frustra.* C'est à dire les deuins n'ont veu fors mensonges & les songeurs ont parlé pour neant. Et pource il est escript au dixneuuesme chapitre Leuitici. *Ne declinetis ad magos nec ab ariolis aliquid sciscitemini.* Ne declinez pas aux enchanteurs & n'enquerez pas aucunes choses aux deuins. La cause pourquoy passa si briefuement ceste accusation est: car il ne sçauoit riens de monseigneur d'Orleans qu'il ne fut bon vray Chrestien & ferme en la foy sans erreur. O sire Roy, madame d'Orleans te supplie que la parolle escripte au vingt & deuxiesme chapitre du liure de Iob soit verifiée. *Saluabitur innocens in munditia*



*manuum suarum.* C'est à dire que l'innocent sera sauué en la pureté de ses œuvres. Et ce est tant qu'à la premiere partie de la premiere accusation. La seconde accusation est de partie aduerse comme dit le proposant d'icelle partie aduerse, que monseigneur d'Orleans estoit fauorable à Schisme, & par consequent iceluy auoit commis crime de leze maiesté au second degré en demonstrent & faisant faueur & ayde à Pierre de la Lune iadis appelé Pape Benedic. Tant qu'à ceste accusation ie dis que monseigneur d'Orleans oncques ne dóna faueur à iceluy fors à bonne fin, & à conclurre la paix de l'Eglise plus à l'honneur d'icelle, & especiallement de la partie tenant iceluy pour vray Pape. Et est tout notoire que plus grand honneur eust esté à nostre obediencia, que Pierre de la Lune eust fait son deuoir par voye de cession pour l'vnion de l'Eglise que par voye de substractiō. Et ce considéré se monseigneur d'Orleans dit. Il seroit meilleur vn peu attendre affin que ledit Pierre voullist faire cession de sa volenté qu'en trop hastant empirer sa cause, & en ce on ne pouoit nul mal entendre & est vray que sur toutes choses il desiroit l'vnion de l'Eglise & croyoit fermement que Pierre de la Lune fut appareillé de faire cession toutes les fois que l'autre Romain voudroit & seroit prest. Et de fait plusieurs sont encores viuans qu'iceluy Duc ouyrent iurer, que s'il sçauoit que Pierre de la Lune ne voullist faire cession ou cas que l'autre Pape se consentiroit à ce, qu'il luy seroit plus contraire qu'aucun du monde. Et ce plusieurs approuueroient s'il estoit besoing. Item considerons quelle chose luy pouoit prouffiter la diuision de l'Eglise. Il estoit assez sage à considerer que tous les maux qui sont viennent de ce, ne il n'estoit pas si ignorant de mettre son esperance en homme si ancien comme est Pierre de la Lune. De rechef il sçauoit bien que par l'avnion de l'Eglise plusieurs biens tant spirituels comme temporels pouoient à luy & aux siens venir & aux autres plus sans comparaison que par la diuision d'icelle. Et affin que ie monstre euidamment l'affection de monseigneur d'Orleans auoir esté sur toutes choses à l'vnion de l'Eglise, ie vueil raconter vne chose par luy offerte à l'vniuersité de Paris trois semaines deuant son trespas. C'est à sçauoir comment monseigneur d'Orleans voyant qu'iceluy Romain ne vouloit pas venir à Gennes ne à Sauoye, & ne vouloit pas receuoir pour hostaige ceux que luy auoit presentez le Marechal Bouciquault & qu'autre chose n'empeschoit l'vnion de l'Eglise comme Pierre de la Lune fut prest d'aller esdits lieux. Adonc dit les parolles ensuiuans. O Recteur & vous tous mes bons amis, voyez que bien briefuement par la grace de Dieu nous aurons l'vnion de l'Eglise, mais que nous puissions asseurer iceluy Romain affin qu'il vienne au territoire de Gennes. J'ay proposé à luy faire offrir vn de mes fils pour hostaige lequel qu'il vouldra eslire, & suis prest de l'enuoyer à mes despens à Venise où ailleurs. Sur ce faictes telles lettres qu'il vous plaira & ie les signeray. Dictes ce à l'vniuersité en r'apportant à moy leur opinion. Adoncques les seigneurs de l'vniuersité le regracierent de ce tant qu'ils peurent. En disant que plus ne pouoit offrir & en ce il demonstroit sa bonne affection. Et viuent encores ceux qu'il auoit ordonnez à ceste besongne à aller personnellement demonstrier aux Romains & aux Veniciés icelle presentatiō. O vous messeigneurs pouoit il plus faire que mettre pour hostaige sa chair & son sang. Et ce eux prests à tesmoigner ne sont pas saints ou morts ne ne sont pas tesmoins ignorables : mais docteurs & maistres.

O partie



O partie aduerse cy peux tu veoir & cognoistre euidamment comment ta parolle est contraire à verité, de ce tu te dois bien taire comme toy mesmes as acquis ta faueur vers Pierre de la Lune tant ou plus qu'aucuns autres : car en celuy tēps que Pierre de la Lune estoit le plus accusé tu escriuis & enuoyas à luy afin que tu eusses Eueschez & autres benefices pour tes seruiteurs auquel tu n'enuoyas pas ton varlet ne ton paige, mais la garde de ton ame, c'est à sçauoir ton confesseur, qui parloit plus seurement. Disoit on aussi que mondit seigneur d'Orleans se auoit consenty à la peruerse excommunication enuoyée par Pierre de la Lune pour induire le Roy à son obeissance. Maintenant il est tout cler qu'icelle mauuaise excommunication ne porte nul effect contre Pierre de la Lune, fors ou cas que le Roy cesseroit luy obeir & qu'il eust baillé consentement à ladicte excommunication, laquelle selon ce que dit est, n'auoit nul effect fors en cas de subtraction ou de inobedience. Et est tout certain que Pierre de la Lune est d'une volenté assez obstinée à ce faire & que pas ne se conseilloit fors à luy mesmes, & appert bien que monseigneur d'Orleans ne fut pas fauorable à ladicte excommunication : car elle ne fut pas menée à effect iusques à tant que monseigneur d'Orleans fut mort. Considérez doncques messeigneurs la deffaulte de partie aduerse & l'innocence de monseigneur d'Orleans lequel peult dire la parolle du Propheete. *Os peccatoris & os dolosi super me apertum est : locuti sunt aduersum me lingua dolosa, & sermonibus odij circundederunt me.* C'est à dire la bouche du pecheur pleine de fraude est ouuerte sur moy & ont parlé contre moy par leurs faulses langues & par parolles de hayne m'ont enuironné, & ce suffist quand à la seconde accusation. La tierce accusation de partie aduerse est que monseigneur d'Orleans s'efforça par moult de manieres à machiner la mort de son Prince & seigneur le Roy de France, & ce comment dit le dessusdit proposant par trois manieres. Premierement comme il dit par forceries, malefices & superstitions. Secondement par poisons & venins. Tiercement par occision vueillant occire ou faire occire nostre seigneur le Roy & ce par feu, par eaüe ou autres violentes injections, & par ce veult conclurre que mondit seigneur d'Orleans a commis crime de leze maiesté humaine en la personne du Roy nostre sire. Tant qu'à la premiere maniere où il parle des forceries faictes par vn moyne en vne espée, en vn bouclier, en vn anel & en vne verge, & pour ce faire mondit seigneur d'Orleans fait venir ledit moyne vn cheualier, vn escuyer & vn varlet, ausquels il donna grans pecunes, comme dit partie aduerse c'est faulse chose & contre verité. Car mondit seigneur d'Orleans oncques ne cōsentit aux forceries ou autres arts defendus. Et se ainsi eust esté que ledit moyne eust commis forceries, toutesfois ce ne fut pas à l'exhortation de Monseigneur, ne ce ne peut pas estre sceu de legier. Car contre ledit moyne & ses complices fut moult grand procès en la presence des conseilliers du Roy ausquels on peut sçauoir la verité. De rechef fut trouué par la propre confession dudit moyne disant que monseigneur luy auoit deffendu que là il n'ouurast pas des arts magiques & que riens il ne fait qui peust tourner au preiudice du Roy. Et comme Dieu sçait se de ce eust esté aucune verité il n'eust pas esté celé iusques à maintenant. Pource appert euidamment la faulseté de celle accusation & jaçoit ce que monseigneur d'Orleans eust eu aucunesfois parolles avec ledit moyne on considere que mondit Seigneur estoit ieune & en-



uiron de l'aage de xviii. ans & que tels ieunes Princes sont souuēt deceuz par tels bourdeurs pour la cause d'auoir pecunes d'iceux. Quand est de l'os baillé à mondit seigneur d'Orleans enueloppé en vn petit drappel lequel il porta long temps entre sa chair & sa chemise comme dit partie aduerse iusques à tant que par vn cheualier, luy fut osté & pource il eut en grand hayne ledit cheualier & tant qu'il le destruit de ses biens & procura son bannissement hors du Royaume, certes ces choses ne sont pas veritables, mais celuy cheualier fut banny du Royaume, pour cause assez notoire par proces & arrest de Parlement, & oncques de ceste laide chose ne fut mention fors par iceluy cheualier qui ce publia & iceluy cheualier selon le dit de partie aduerse estoit soupçonné de hayne & par conséquent personne inhabille à faire tesmoignage contre ledit deffunct. Considérez messeigneurs comment les dits de partie aduerse ne contiennent que faulsetez & mensonges, & ceux lisans son libelle pourroient cheoir en erreur dont sur ce deueroient mettre remede les reuerends maistres de la faculté de theologie le plus tost que faire se pourra : car comme ils sçauent bien telles choses ne doiuent pas estre escriptes ne diuulguées, mais plus merueilleuse chose est que par la bouche de theologien il à esté proferé que lesdits malefices ont fortly leur effect en la personne du Roy. Nous sommes maintenant en telles comparaisons lesquelles fait saint Augustin du medecin & de l'Astrologien rendant la cause des deux enfans nez d'un mesme vêtre que nous disons iumeaux, l'un estoit moult maigre & l'autre gras, l'Astrologien auoit recours aux diuers ascendens : le medecin à ce que le gras eut premier l'ame au corps & pource qu'il estoit plus fort il succoit à peu pres toute la nourriture des deux auquel il est plus à croire, certainement au medecin comme respond saint Augustin. Semblablement nous pouons dire que plus grand foy est estre adioustée à la faculté de medecine en ceste matiere, qu'au dit du maistre en Theologie prononcé sotement. O tresdoux Dieu mets remede en ce, car tu vois les Theologiens affermer que sorciers ne sortissent de leur effect. Certainement c'est erreur cōtre la sainte escripture dire que sorciers sont fors mensonges qui ne sortissent nul effect dont le sage Salomon auquel telles choses furent imposées dit au xxxiiiij. chapitre de l'Ecclesiastique. *Quod diuinitio erroris, & arguta mendacia & somnia maleficiorum vanitas est.* C'est à dire que deuinement d'erreur, & sorceries, mensonges & les songes de malefices n'est que vanité. Et ceste auctorité allegue saint Thomas d'Acquin à prouuer que telles sorceries ne sortissent nul effect. O toy vniuersité de Paris, plaïse à toy ce corriger, car telles sciences abusans ne sont pas tant seulement deffendues pource qu'elles sont contre l'honneur de Dieu : mais avec ce elles ne contiennent riens de verité ou d'effect. Et ce est confirmé par les acteurs qui ont ouuré d'art magique. Ouide dit au liure de la remede d'amours.

*Fallitur Hermione si quis mala pabula terra :*

*Et magicas artes posse iuuare putat.*

C'est à dire celuy est deceu qui cuide que les mauuaises herbes & les arts magique puissent aider. Et aussi maistre Jean de Bar moult expert en ce maudit art lequel fut arts avec tous ses liures dit à sa derniere confession, que le diable n'apparut oncques à luy & que ses inuocations & sorceries ne sortirent oncques effect, jaçoit ce qu'à plusieurs il dit le contraire, & especiallement aux grans seigneurs,

pour



pour auoir leur argent & pour certain c'est moult merueilleuse chose de vouloir donner charge à monseigneur d'Orleans de telles sorceries si vaines & si faulces comme oncques homme ne les haït tant qu'il faisoit & persécutoit ceux qui v-soient desdits arts. Et scait bien chacun que mondit seigneur fut la cause principale du procez & execution faicte contre maistre Iean de Bar & de deux Augustins qui par leurs demerites furent executez par les hommes du conseil du Roy, les gens d'Eglise ad ce appelez. Tant qu'est de ce dont le proposant pour partie aduerse à fait mention disant que monseigneur de Millan deffunct donna sa fille à monseigneur d'Orleans sur espoir qu'elle fut Royne de France pource que quand elle print congé à luy il luy dit. A Dieu fille iamais ie ne quiers à toy veoir iusques à tant que seras Royne de France. Ce pour certain est faulce chose que la chose fut ainsi faicte, car monseigneur de Millan auoit traicté avecques le Duc de Gueldres frere du Roy des Romains, qu'il prendroit à femme madiete dame d'Orleans sa fille & encores estoient les messagiers faisant leur chemin à parfaire ledit mariage: quand Bertrand Gaad pour lors gouuerneur du Comte de Vertus fut enuoyé du Roy, des Ducs de Berry & de Bourgongne dont Dieu ayt l'ame à monseigneur de Millan, à traicter le mariage de sa fille & de monseigneur d'Orleans. Lequel seigneur de Milan pour l'honneur du Roy & des seigneurs de la mesnie du Roy de France, il consentit à donner sa fille à monseigneur d'Orleans; & cessa à traicter avec ledit Duc de Gueldres reuocquant les messagiers par luy enuoyez à iceluy Duc. Quand est des parolles qu'il dit à sa fille comme on dit c'est faulce chose; car monseigneur de Millan estoit issu de Papie sans parler à sadiete fille & ce fait il pource qu'il n'eust pas peu parler ne prendre congé d'elle sans plourer. Tant qu'est de la parolle que deuoit auoir dicte monseigneur de Millan à vn cheualier de France par maniere de grand admiration. Tu dis que le Roy de France est en bon estat comment peut ce estre, certainement c'est faulce chose, car monseigneur de Millan est assez secret pour luy taire de telles choses mesmement deuât les François pour la relation. Plusieurs sont qui bien scauent que monseigneur de Millan aymoït le Roy de France sur tous les Princes du monde & l'honneur de tout son sang & de toute la mesnie de France: dont tous les ambassadeurs du Roy & des autres nobles de France trespasans par son pays il honnoroit par grans largesses & de dons & ce pour l'honneur & amour du Roy tant seullement & de tout son sang & de la mesnie de France. Quant est de l'histoire de l'homme de grand proesse sire Philippe de Marrieres lequel à honteusement diffamé ledit proposant. Il est vray que quand ledit Philippe vint en Cypre le Roy Charles à qui Dieu pardoint le retint & fit son Chamberlan, lequel apres le trespas dudit Roy print humble habit en l'Eglise des Celestins auquel lieu il perseuera deuotement iusques à la fin. Et pource que monseigneur de Bourgongne trespasé aymoït monseigneur de Millan voyant ledit Philippe estre homme de grand science & proesse & ayant propos d'aller en l'ayde de la sainte terre, iceluy enuoya à monseigneur de Millan qui le receut honorablement & tresuolentiers le veoit & oyoit parler. Et est vray que deuant ce temps ledit Philippe oncques n'auoit demouré avec monseigneur de Millan ne avec Barnabé son oncle. Item long temps deuant ledit Philippe s'estoit party de monseigneur de Millan deuant ce qu'il fut mention du mariage de monsei-



gneur d'Orleans & de sa femme & ainsi appert que ledit proposant pour partie aduerse n'est pas veritable. En oultre tant qu'est à ceste accusation regardant la personne du Roy que monseigneur d'Orleans voyant luy non obtenir la mort du Roy par forceries: applicqua autres manieres de faire mourir le Roy pour paruenir à la couronne de France: & pource promist à vn homme quatre mille francs & à vn autre cinq mille à confire & bailler lesdictes poisons, mais aucuns loyaux luy refuserent & aucuns luy accorderent. Certainement c'est mensonge, car s'ils eussent esté si loyaux aucuns qu'ils eussent refusé si grand pecunes, en verité par eux eust esté reuelé ledit peché pour y mettre remede, & pource qu'ils ne feirent riens s'ensuit que c'est faulse chose. En apres partie aduerse allegue que à l'hostel de la Royne que monseigneur d'Orleans ietta pouldre enuenimée sur le plat du Roy, que ce soit faulse chose peult estre prouué, car au disner nulle mention de ce fait ne fut oncques faicte. Aussi c'est clere chose que se ladicte Royne eust ce apperceu en sa maison elle eust ce reuelé aux parens & seruiteurs du Roy autrement elle n'eust pas esté loyalle. Tant qu'est de l'aumosnier de ladicte Royne qui selon partie aduerse cheut à terre comme mort perdant ses ongles & cheueux & de fait mourir laquelle est faulse, car il vesquit puis cinq ou six ans dont vrayement ie puis dire dudit proposant de partie aduerse ce qui est escript ou vij. chapitre de Ieremie. *Ecce vos confiditis in sermonibus mendacij sed non proderunt vobis.* C'est à dire vous vous fiez és parolles de mensonges, mais elles ne vous prouffiteront pas, de rechef ledit proposant dit & proposa que monseigneur voyant que pas ne pouoit paruenir à la mort par forceries ne par poisons il trouua vne autre maniere de destruire le Roy par embrasement ou autrement. Et feit donques monseigneur d'Orleans comme dit partie aduerse certains ieux, esbatemens & personages d'hommes sauuaiges vestus de toilles emplies & destouppes & poix & d'autres choses toutes embrasées du nombre desquels estoit le Roy. Et dit oultre que monseigneur d'Orleans fainct que son habit estoit trop estroit. Affin qu'il s'excusast dudit esbatement. Et dit qu'un seruiteur aduifa le Roy estre en peril par ledit ieu. Et pource monseigneur d'Orleans luy dit moult de parolles iniurieuses & laydengeuses comme dit partie aduerse. Et finablement que monseigneur d'Orleans met le feu en la cotte de l'un d'iceux dont le Roy fut en peril de mort se Dieu & certaines Dames n'y eussent remedié. Tant que ad ce il est tresueritable chose que monseigneur d'Orleans ne trouua pas lesdits habits, car il estoit trop ieune pour lors & n'eust pas sceu trouuer telles choses ainsi perilleuses. Aussi monseigneur de Berry & monseigneur de Bourgonne trespassé ont bien sceu qui trouuerent lesdits ieux & que ce ne fut monseigneur d'Orleans. Car s'il eust ce fait faire attendu la commotion faicte, adonc il n'eust pas eschappé de mort ou de grand escandalle, car pour lors il auoit petite puissance: & comme partie aduerse dit monseigneur d'Orleans n'auoir esté vestu desdits habits faingnant son habit estre trop estroit. Ce n'a aucune apparence de verité comme monseigneur d'Orleans fut adoncques le plus gresse que aucuns de la compaignie. Et est vray que monseigneur d'Orleans & sire Philippe de Bar deuant le commencement dudit ieu issirent à veoir la dame de Clermont, laquelle n'auoit pas esté à saint Pol aux espousailles pour lesquels lesdits ieux auoient esté trouuez, lesquels quand ils furent retournez ils trouuerent



uerent tous les habits vestus. Et ce fut la propre cause pourquoy monseigneur d'Orleans ne se vestit pas desdictes vestures. A ce qu'on dit que le Duc d'Orleans voulut embrazer le Roy nostre sire, c'est mensonge, car mondit seigneur d'Orleans & sire Philippe, cuidans vestir lesdits habits & à nul mal pensans dirent à Pierre de Nauarre ensemble qu'on boutast le feu sur ceux vestus desdits habits, affin qu'iceux embrasez courussent entre les Dames pour icelles espouuer. Et encores vit Pierre de Nauarre qui diroit bien verité au Roy de ce. Toutesfois supposé qu'en ce fait de ieunesse monseigneur d'Orleans eust mis le feu sur vn des habits d'iceux, attendu qu'il auoit ordonné que le feu fut mis aussi bien sur l'un que sur l'autre, il n'est pas à croire que ce il fait par malice & par mauuaise intention. Appert doncques le dit de partie aduerse estre mensonge, mais en ce ie me conforte à ce que dit le Prophete.

*Perdes omnes qui loquuntur mendacium.* C'est à dire tu perdras tous ceux qui parlent mensonge. Et au vingtiesme chapitre des Prouerbes. *Qui profert mendacia peribit.* C'est à dire qui profere mensonges il perira. Quand à ce que partie aduerse veult dire, que monseigneur d'Orleans ayt fait alliances avecques Henry de Lenclastre maintenant soy disant Roy d'Angleterre ou preiudice du Roy & de tout le Royaume, & qu'il coulouroit son dit à ce que Richard jadis Roy d'Angleterre dit au Roy de France, que les dessusdits seigneurs de Millan, & pareillement c'eux d'Orleans estoient la cause de son enfermeté, ledit proposant dit mauuaiselement & contre verité: car quand Henry de Lenclastre vint en France, il fut receu moult honnorablement & de nosdits seigneurs comme leur parent, & frequentoit avecques monseigneur d'Orleans, & les autres du sang Royal moult familièrement, auquel temps comme amis du Roy il fait alliances avecques monseigneur d'Orleans, laquelle conuenance ou alliance fut leuée & publiée en la presence du Roy & de plusieurs du sang Royal & de son conseil, & sembla la chose estre bonne, licite & honneste pour le bien du Roy & de son Royaume. Pourquoy assez appert que monseigneur d'Orleans ne fait aucunes alliances contre le Roy Richard, mais qui plus est au traicté du mariage de la fille du Roy maintenant femme du Duc d'Orleans & du Roy Richard feirent semblables alliances, monseigneur d'Orleans & le Roy Richard, entré eux deux comme auoient fait ledit Roy Richard & le Roy de France. En apres monseigneur d'Orleans fut à Calais au Roy Richard, duquel il fut receu agreablement comme son trescher frere. De rechef apres la mort dudit Roy Richard monseigneur d'Orleans eut & demonstra moult grand dueil & tristesse de sa mort. Et pource se rendit ennemy du Roy Henry de Lenclastre par lettres de deffiances: par lesquelles il arguoit iceluy de crime de leze maiesté perpetrée contre son seigneur le Roy Richard, en soy offrant luy combattre contre ledit Henry ou certain nombre tant contre tant, ou puissance contre puissance pour venger la mort dudit Roy Richard. Et ces choses & moult d'autres assez apparentes demonstrerent assez que monseigneur d'Orleans moult aymoist le Roy Richard, pour ce qu'il estoit allié au Roy de France, par le dessusdit mariage, & que nulle amour il n'auoit avecques ledit Duc de Lenclastre pource qu'il auoit estendu sa main contre ledit Roy Richard. Tant qu'est que le proposant pour partie aduerse dit que monseigneur d'Orleans estant avecques Pierre



de la Lune s'efforça d'obtenir bulles ou preiudice du Roy & de sa lignée, & que pource fut tousiours fauorable, ce n'est pas verité : car adoncques monseigneur d'Orleans procura & obtint certaines alliances entre ledit Pierre adonc nommé Benedic & le Roy de France moult especialles & notables, par lesquelles iceluy Benedic promettoit au Roy de luy donner ayde & garder l'estat de luy & de sa lignée comme il appert par les bulles sur ce faictes. Il est donc moult à esmerveiller comment vn faige homme osa proposer ce que tant euidemment est contraire à verité. Quand à ce que la partie aduerse dit qu'il soustint ledit Pierre de la Lune, à ce i'ay respondu par dessus. Et avec ce mondit seigneur d'Orleans trouua luy mesmes que se lesdits contendans à la Papalité ne vouloient conuenir prestement par procureurs, seroit faicte subtraction. Et ce despleut plus à Pierre de la Lune que chose oncques faicte en ce royaume pour l'estat de l'Eglise, laquelle chose ne fut pas signe que monseigneur d'Orleans voulsist empescher ou retarder l'vnion de l'Eglise en la faueur dudit Pierre de la Lune. Appert donc euidamment que monseigneur d'Orleans est innocent au regard des faits proposez contre luy. O sire Roy il te plaise d'ocques conseruer par iustice son innocence selon ce qui est escript au xiiij. chapitre de Iob. *Iustitia custodit innocentis viam.* C'est à dire iustice garde la voye de l'innocent. Et c'est tāt quant à la tierce accusation. La quarte accusation de partie aduerse est que par l'espace de trois ans entiers monseigneur d'Orleans par aucunes inductions fraudulentes, & par espantemens qu'il feit à la Royne d'aucunes choses, il cuida icelle & ses enfans mener hors de ce royaume à Luxembourg affin qu'il peust en ce royaume mieux gouuerner à sa volenté, & plaissance. Tant qu'à ceste accusation faulse & peruerse, monseigneur d'Orleans seruit & honnora la Royne en toutes choses, donnant ayde à garder & soustenir l'estat du Roy & aussi de la Royne, & de ce ne conuient il pas plus parler pour ceste heure : car par la grace de Dieu elle estant presente scait bien la verité, laquelle quand luy plaira la pourra dire plus pleinement : toutesfois ie ne scay se de ce elle s'est complaincte à partie aduerse ou aucuns autres. Je croy que le contraire du propos de partie aduerse sera trouué veritable, & que telles choses sont trouuées pour la diffamation dudit deffunct. La quinte accusation dudit proposant de partie aduerse est, que monseigneur d'Orleans commist crime de leze de maiesté ou tiers degré, c'est à sçauoir en la personne de monseigneur le Daulphin que Dieu absolue, & dist, que monseigneur d'Orleans machina qu'il mangeast la pomme enuenimée, laquelle enuoya par vn enfant à qui le tollit la nourrisse d'vn des enfans de monseigneur d'Orleans & la donna au fils dudit seigneur d'Orleans qui la mangea, & de ce mourut selon ledit du proposant, laquelle chose est faulse trouuée, mais est verité que l'vn des fils de monseigneur d'Orleans mourut ja pieça du cours de ventre de quoy plusieurs mouroient en ce temps. Et sur ce soient ouys Physiciens, c'est à sçauoir maistre Guillaume le Boucher & maistre Iean de Beaumont qui visiterent iceluy fils & ils en diront la verité : c'est à sçauoir, que point ne mourut par infection. Et considerez messeigneurs que ce n'est pas creable chose : car oncques aucune nourrisse de fils de monseigneur d'Orleans n'eust osé donner à l'enfant pomme ou poire sans commandement de madame de Orleans, & aussi quand ladicte nourrisse alloit par les iardins à tout l'enfant elle



le n'estoit pas seule, mais accompagnée de trois ou quatre notables femmes, lesquelles n'eussent pas souffert icelle donner à l'enfant pomme ou autre chose semblable. O tresnoble & tresamé Duc d'Acquitaine tandis que tu es ieune, apprens à aymer iustice comme feit Salomon. Aduise les maulx qui peuuent aduenir se iustice n'est gardée: car se tu ne le fais par ce n'auras aymé tes freres. Ils seront en peril de mort se ainsi estoit fait comme partie aduerse a commencé, soit considéré le dict du Prophete disant. *Iustitie Domini recte latificantes corda.*

C'est à dire les iustices de nostre Seigneur sont droicturieres esleessans les cueurs.

La sixiesme accusation & final est comme dit le proposant de partie aduerse, que monseigneur d'Orleans commist crime de leze maiesté ou quart degre en destruisant le Roy de ses pecunes & le peuple en tenant hommes d'armes sur le pays en faisant tailles intolerables. Messieurs c'est bien merueilles comment partie aduerse a ce imposé à monseigneur d'Orleans: car il est notoire à chacun que pour aucunes choses aduenues en ce royaume aucunes tailles furent faictes: mais ce ne fut pas au prouffit de monseigneur d'Orleans, comme elles ayent esté exposées par grand deliberation du Roy & de tous les Seigneurs de son sang, & conseil royal, ains pour le fait de partie aduerse au voyage de Hongrie & pour sa rançon furent faictes grans tailles par tout le royaume & grand somme d'argent cueillie & transportée en Turquie & autres lieux hors dudit royaume, laquelle chose fut dommage irreparable. Et quant est ad ce que partie aduerse veult dire que monseigneur d'Orleans, print en la Court du Palais quatre mille francs, & au Chastel de Melun cent mille. Tant qu'aux quatre mille francs, ie dis que c'est faulse chose: car se aucunes pecunes estoient en la tour du Palais, elles furent exposées & distribuées selon l'ordonnance du Roy, & ce peult estre sceu par la garde d'icelles & par les comptes des recepueurs ad ce ordonnez. Tant qu'est aux cent mille francs, du chasteau de Melun, il est notoire comment la Royne & monseigneur d'Orleans allerent à Melun pour cause de eux esbanoier, & ce pendant partie aduerse vint à Paris irraisonnablement à tout grand compaignie des hommes d'armes, & par sa puissance fait retourner à Paris monseigneur d'Acquitaine allant apres la Royne sa mere. Consequentement il se fortiffia des hommes d'armes sous l'intention d'aller à Melun contre la Royne & monseigneur d'Orleans. Adoncques il fut necessaire à la Royne de demander gens d'armes pour la seureté & garde d'elle pour le bien du Roy & de tout le royaume. Et fut aduise qu'il seroit bon prendre iceluy tresor pour lesdits gens d'armes. Ne monseigneur d'Orleans n'en eust onc aucune chose pour luy mesmes, & quand le Roy eut de ce cognoissance il fut bien content. Et ainsi appert que lesdictes pecunes furent despendues, tant seulement à l'occasion du fait damnable de partie aduerse, & non d'autrui. Tant qu'aux hommes d'armes qu'on dit monseigneur d'Orleans auoir tenu sur le pays. Il est verité qu'aucuns hommes d'armes estans sur le pays, disoient eux estre sur le pays pour monseigneur d'Orleans, affin que aucuns ne leur osassent mal faire qui n'auoient lettres ne mandement de par luy: mais luy desplaisoit des maulx qu'ils faisoient aucunesfois. Donc de ce quand il en fut parlé au conseil du Roy luy mesmes procura lettres du Roy, enuoyees à tous Baillifs & officiers du royaume qu'ils appellassent les nobles & gens du pays pour contraindre lesdits mal-



faicteurs de iſſir du royaume, en iceux puniſſans de leurs mauuaifes œuures. Et par ce, appert que ſans cauſe, on à donné charge à monſeigneur d'Orleans deſdits hommes d'armes. O toy partie aduerſe conſidere les dommages treſgrans & irreparables qui ont eſté en pluſieurs lieux en ce royaume par les hommes d'armes leſquels tu as tenu & fait venir, entre leſquels eſtoient eſtrangers ſans eſtre payez gaſtans & deſtruifans tous les paÿs où ils paſſoient, & chacun doit auoir compaſſion des cas aduenuz, ſi piteux que nul ne pourroit aſſez plorer. O toy Roy de France, Prince treſexcellant plore doncques ton ſeul frere germain que tu as perdu l'vne des plus precieufes pierres de ta Couronne, duquel la iuſtice tu deueroies toy meſmes procurer ſe nul ne le procuroit. O toy treſnoble Royne pleure le Prince qui tant te honnoroit, lequel tu veis mourir ſi honteufement. O toy mon treſredoubté ſeigneur monſeigneur d'Acquitaine plore qui as perdu le plus beau membre de ton ſang, conſeil & ſeigneurie. Pourquoi tu es cheu de paix en treſgrand tribulation? O toy Duc de Berry plore qui as veu le frere du Roy ton nepueu finir ſa vie par griefue martyre pource qu'il eſtoit fils de Roy & non pour autre choſe. O toy Duc de Bretagne qui as perdu l'oncle de ton eſpouſe qui grandement t'aymoit. O toy Duc de Bourbon plore, car ton amour eſt enfouye en terre, & vous autres Princes & nobles plorez : car le chemin eſt commencé à vous faire mourir trahiſtreuſement & ſans aduertance. Plorez hommes & femmes ieunes & vieulx, poures & riches, car la douleur de paix & de tranquillité vous eſt oſtée. En tant que le chemin vous eſt monſtré d'occire & mettre glaue entre les Princes par laquelle vous eſtes en guerre, en miſere & en voye de toute deſtruction. O tous hommes d'Egliſe & ſaiges plorez le Prince qui treſgrandement vous honnoroit & aymoit, & pour l'amour de Dieu vous clerks & nobles hommes de tous diuers eſtats conſidererez comment en ces choſes doreſnauant vous ferez : car jaçoit ce que partie aduerſe vous ayt deceu par ſes faulſes inductions & pource auez à luy eſtez fauorables, neantmoins puis que vous cognoiſſez c'eſt homicide lequel a perpetré partie aduerſe les faulſetez & menſonges propoſées en ſon libelle diffamatoire, & conſequamment l'innocence de monſeigneur d'Orleans. Se doreſnauant vous luy baillez faueur par quelque maniere ſçachez ce eſtre contre le Roy. Et par ce vous encherrez en peril de perdre corps & biens comme autresfois on à veu en cas ſemblable. Entendez doncques Princes & hommes de quelconques eſtats à ſouſtenir iuſtice contre ledit de Bourgogne, qui par l'homicide par luy commis a vſurpé la domination & auctorité du Roy & de ſes fils, & à ſouſtrait grand ayde & conſolation : car il a mis le bien commun en griefue tribulation. En confondant les bons & eſtats ſans vergongne en ſouſtenant ſon peché contre nobleſſe, parenté, ſerment, alliances & aſſeurances contre Dieu & la Court de tous ſes Saincts, ceſt inconuenient ne peult eſtre réparé ou appaiſé fors par le bien de iuſtice. Et c'eſt la cauſe pourquoi madame d'Orleans & les fils vindrent à toy ſire Roy, & à vous tous du ſang & conſeil Royal. En vous ſuppliant que vous vueillez conſiderer l'iniure faicte à iceux & icelle reparer par la maniere que tantost vous ſera requiſe par ſon conſeil & par toutes autres manieres qu'il pourra eſtre fait, afin que par tout le monde ſoit diuulgué que monſeigneur d'Orleans ſon mary fut occis cruellement, & iniuſtement en eſtant



estant accusé & diffamé faulxement. Et en ce faisant vous ferez vostre deuoir comme y estes tenuz dont vous pourrez acquerir la vie eternelle selon ce qu'il est escript ou vingt & vniesme chapitre des Prouerbes. *Qui sequitur iustitiam inueniet vitam & gloriam.* C'est à dire qui ensuiura iustice il trouua vie & gloire, laquelle nous octroye celuy Dieu qui vit & regne sans fin par tous les siecles. Amen.

*S'ensuit comment les conclusions contre ledit Duc de Bourgongne pour icelle Duchesse & son fils. Et de la responce qui leur fut faicte par le Chancelier.*

CHAP. XLV.

**E**n suit les conclusions de ladicte proposition, laquelle prestement feirent faire par ledit maistre Guillaume Cousinot dessusdit leur aduocat & conseilier, auquel enioingnit le Chancelier de France de par le Roy qu'il feist telles conclusions qu'il plairoit à madame d'Orleans & au seigneur d'Orleans son fils: lequel Aduocat apres plusieurs excusations ains qu'il veinist ausdictes conclusions & monstrant le cas estre piteux & fauorable print le theume qui s'ensuit. *Hæc vidua erat quam cum vidisset Dominus misericordia motus est super eam.* Ces parolles sont escriptes en l'Euangile du Dimenche ensuiuant ou septiesme chapitre de monseigneur saint Luc. Et est à dire qu'il estoit vne veufue, & quand nostre Seigneur la veit il fut meu de misericorde sur icelle. Tresnoble Prince quand nostre Seigneur entra en vne cité nommée Naum, voyant le corps d'un ieune homme porter en la sepulture, & quand il eut regardé la mere dudit ieune homme estre veufue, il fut meu de pitié sur icelle, pource qu'elle estoit veufue & luy restitua son fils. Tresveritablement ie puis dire de madame d'Orleans les parolles dessusdictes. C'est à sçauoir icelle estre veufue laquelle plaint & gemit la mort de son Seigneur & mary de laquelle & de son fait doit ensuiuir, & nostre Seigneur fust meu sur icelle. C'est le Roy qui est nostre Seigneur tant qu'à la domination terrienne, & non mie tant seulement iceluy, mais aussi toy sire d'Acquitaine & autres Princes & Seigneurs terriens de tout le monde, & gens quelconques, voyans madiete Dame d'Orleans ainsi desconfortée doiuent estre meuz à compassion en luy donnant ayde & faisant bonne iustice de la cruelle mort de son mary. Et jacoit ce chose qu'en tous cas & en tous temps iustice soit à estre obseruer à vn chacun, en tant que c'est bonne œuvre & meritoire selon ce qui est escript au cent & cinquiesme pseaulme. *Beati qui custodiunt iudicium & faciunt iustitiam in omni tempore.* C'est à dire: bien heureux sont ceux qui gardent iugement & font iustice en tous temps: toutesfois au regard des veufues qui ont perdu leur mary & des orphelins qui sont priuez de leur pere. Iustice doit veiller plus diligemment & plus abondamment que es autres cas, car selon tous les droits diuins, canonicques & ciuils aux veufues & aux orphelins sur tous autres doit secourir iustice. Nous auons ce premierement en la sainte escripture ou vingt & deuxiesme chapitre de Ieremie. *Facite iudicium & iustitiam & liberate vi oppressum de manu calumniatoris, pupillum & viduam. & cat.* C'est à dire faictes iugement & iustice & deliurez iceluy opprimé par force de la



main de l'impofant faulſement à autrui peché & deliurez l'orphelin & la veſue. Tant qu'au droit Canon les Decrets dient que c'eſt propre choſe aux Roys faire iugement & iuſtice, & deliurer de la main des oppreſſans les orphelins & les veſues, qui plus legierement ſont opprimez des puiſſans. Tant qu'eſt au droit Ciuil, Il eſt tout clair que l'orphelin & la veſue ſont eſpeciallement priuilegiez en pluſieurs cas, comme il eſt eſcrit en pluſieurs lieux. Maintenant ma dame d'Orleans a perdu ſon mary, ſes fils ont perdu leur pere, certainement vn des plus beaux & des plus ſages Princes du monde. Mais voyans comment ils l'ont perdu, certainement ſ'il fut treſpaſſé de mort naturelle, le cas ne fut pas ſi piteux: mais il leur eſt oſté violement en la fleur de ſa ieuneſſe. Et en verité ce preſent cas eſt ſi piteux, que toutes loix, vſaiges, & ſtilles doiuent eſtre interpretées & expoſées en la faueur d'iceux contre partie aduerſe, & premierement tant qu'eſt au Roy noſtre ſouuerain ſeigneur, il eſt tenu & obligé eſpeciallement du commandement de Dieu, auquel il ne peut ou doit eſtre inobedient, ſur peine de pecher & mettre ſa domination en voye de perdition, comme il eſt eſcrit en Hieremie ou chapitre deſſusdit. *In memetiſſo iurauī, dicit dominus, quia in ſolitudine erit domus veſtra.* C'eſt à dire, j'ay iuré par moy meſmes dit noſtre ſeigneur que ſe vous ne faiſtes iuſtice voſtre maiſon ſera en deſert. Et ce aſſez ſe concorde à la reſponce que feit S. Remy au Roy Clouis quand il le baptiza. Ledit Roy demanda à S. Remy combien longuement dureroit le Royaume de France. Et S. Remy luy reſpōdit, auſſi longuement il durera, que iuſtice en iceluy regnera, dōcques au ſens contraire, quād iuſtice ceſſera, la domination finera. Donc du Roy peut eſtre dit ce qui eſt eſcrit ou droit Canon. *Quod iuſtitia eſt illud quod ſuū ſirmit imperium.* C'eſt à dire, que iuſtice eſt la choſe qui conferme tout Empire ou Royaume. Et toy Duc d'Acquitaine tu es celuy qui es tenu apres le Roy faire bonne iuſtice ſelon ce qui eſt eſcrit au Pſeume. *Deus iudicium tuum regida & iuſtitiam tuam filio regis.* C'eſt à dire, O tu Dieu donne au Roy tō iugement, & aux fils de Roy ta iuſtice. Tu es laifné fils du Roy, auquel par la grace de Dieu tu es à ſucceder, & es à eſtre noſtre Roy & ſeigneur, entens à ce pour l'amour de Dieu: car à toy appartient eſpeciallement, Se tu n'y mets la main, quand tu venras à ta domination par aduenture tu trouueras icelle deſtruiſte & moult deſolée: car chacū prendra ſa part, chacun en ſon tour voudra eſtre maifre, ſe ce cas par deſſaute demouroit impuny. Vous auſſi ſeigneurs, Ducs & Comtes de ceſte maiſgnée de France, parens du Duc, & les autres nobles qui aymez l'hōneur & ſeigneurie du Roy, que deuez vous faire? Certainement ſe le Roy en ce ne ſe vouloit pas entremettre, vous deuez pourſuiuir ceſte querelle: car vous eſtes obligez au Roy garder ſon hōneur contre tous. Ainſi par la grace de Dieu que vous auez fait au temps paſſé, dont ce Royaume eſt loüé & exaulcé ſur tous les Royaumes des Chreſtiens. En tant que les Anglois, Allemans & autres eſtrangiers ſont venus iadis acquerir iuſtice en ce preſent Royaume. Meſſeigneurs pour l'amour de Dieu monſtrez voz loyautez & ſermens enuers ma dame d'Orleans ſelon ſa parfaicte cōfidence. Car apres Dieu & le Roy, vous eſtes ſon ſingulier refuge. Ne on ne doit pas doubter à faire iuſtice pour la paour de ſcandalle ou de perſecution: car cōme il eſt eſcrit en la rieuſle de droit. *Vtilius eſt ſcandalum naſci ac permitti, quā vt veritas relinquatur.* C'eſt à dire, il eſt plus prouffitabile choſe, qu'on l'aiſſe venir eſcandalle, que verité ſoit laifſée



laissée : & jaoit chose qu'il fut certain que par ceste execution de iustice, grans maulx & griefues persecutions deussent ensuiuir. Pource icelle iustice ne doit pas estre delaissee : mais ainçois seroit vice reprochable se pour la cremeur du pechant on n'oseroit dire iustice, car en nulle aduersité de temps iustice ne doit pas estre delaissee: pource messeigneurs faictes ce que dit le Prophete.

*Viriliter agite & confortetur cor vestrum & sustinere dominum.* C'est à dire, faictes vigoureusement & soit vostre cueur cōforté, & soubstenez nostre seigneur, car en verité ie dy hardiement que contre vn inconuenient qui pourra aduenir par execution de iustice; cent en aduiendront se on procede par autre voye, par deffaut de iustice. Et pource messeigneurs ne doubtez pas à faire iustice à ma dame d'Orleans & à ses fils pour cremeur des incōueniens: mais faictes ce que mande nostre seigneur à tous ayans administration de iustice. *Iudicare pupillo & humili ut non apponat magnificare se homo super terram.* C'est à dire, on doit iuger à l'orphelin & à l'humble, affin que l'homme n'ose plus soy enorgueillir sur terre. C'est que la punition de ce cas soit si grande & si notable, que dorefnauant nul n'ose commettre sur terre si grand & si horrible peché, & que ce soit memoire perdurablement: c'est la fin à laquelle tendent ma dame d'Orleans & ses fils. C'est à sçauoir que ce malefice soit tellement réparé comme estre peut en ce monde. Pour laquelle reparation estre faicte, madiete dame & ses enfans prendroient volentiers conclusion crimineuse tendās à la punition du corps fil pouoit estre fait par bonne maniere: mais pource que lesdictes conclusions appartiennent au procureur du Roy seullement selon la coustume de France, par la maniere qui s'ensuit. C'est à sçauoir par le iugement du Roy & de vous il soit ordonné qu'en certain iour quand il plaira au Roy & à vous ladiete partie aduerse, c'est à sçauoir le Duc de Bourgongne soit amené ou chastel du Louure ou ailleurs où il plairoit au Roy & à vous ladiete partie ordonner, en la presence du Roy, ou de mōseigneur le Duc d'Acquitaine, & de tous ceux du sang de la mesgnie de France & du conseil du Roy present le peuple ledit Duc de Bourgongne sans corroye & sans chapperon, estant à genoulx deuant ma dame & ses enfans, accompagné d'autant de tels personnes qu'il leur plaira, die & confesse publiquement à haute voix, que malicieusement & par aguēt il à fait occire monseigneur d'Orleans par haine, enuie & couuoitise, & non pour autre cause. Nonobstant les choses que par luy ont esté proposées & diuulguées au contraire apres ledit cas aduenir, & qu'à iustifier & couurir son peché il ait fait proposer contre verité les choses contenues en sa proposition. Et die que de toutes ces offences & de chacunes d'icelles il se repent & luy desplait. Et demande pardon à ma dame d'Orleans & à monseigneur d'Orleans son fils, en luy suppliant humblement à iceux qu'à luy vueillent pardonner ses offences. En proposant en outre luy riēs sçauoir contre le bien & honneur de monseigneur d'Orleans deffunct, & qu'il rappelle routes choses qu'il a dictes, lesquelles ainsi parfaictes en l'estat dessusdit soit mené en la court du Palais & apres à S. Pol en l'hostel du Roy, ausquels lieux sur haults estaiges pour ce appoinctez il die publiquement les parolles dessusdictes en la presence de ceux qui à ce voudront commettre & ordonner ma dame d'Orleans & son fils, & semblablement soit au lieu où le cas fut commis. Auquel lieu estant à genoulx iusques à tant que certains prestres qui à ce seront ordon-



nez auront dit les sept Pseaumes & la letanie, avec toutes les choses appartenans pour l'ame dudit deffunct, & qu'apres ce il baïse la terre en demandant pardon à Dieu & à ma dame d'Orleans & à ses fils, des offences contre eux commises. Et que de la forme des parolles proferées là & autres lieux sus nommez, & aussi de la maniere de l'amendise, soient faictes lettres royales, tāt & en tel nombre comme il sera competant, qui soient enuoyées par toutes les bōnes villes de ce Royaume. En enioignant au iuge qu'elles soient publiées au son de la trompette. Affin que de ce soit faicte mention par tout le Royaume & dehors. En outre pour les reparations desdictes offences, & affin que de ce soit memoire perdurable les maisons appartenans audit Duc de Bourgongne dedans Paris soient destruictes, & demeurent en perdurable ruine sans reparation ou edification en temps aduenir. Et qu'es lieux de chacune maison soit faicte vne haute croix & notable de pierres grauées. Et en chacune d'icelles soit fait vn gros & fort tablet, ouquel soit escrite la destruction & la cause d'icelle. Et qu'ou lieu où monseigneur d'Orleans fut occis, soit faite vne croix semblable aux autres dessusdites, en laquelle soit vn tablet & escrit comme dit est. Et que la maison dont issirent les homicides en laquelle ils furent absconsez, par certain temps soit destruicte. Lequel lieu & maisons voisines, ledit Duc de Bourgongne soit contrainct à achepter & à ses despens, & y edifier vn notable college de six Chanoines, six Vicaires & six Chappellains, duquel la collation appartienne à ma dame d'Orleans & à ses successeurs. Ouquel college soient dictes chacun iour six messes pour l'ame du deffunct. Et la plus grande messe sera du temps, avec toutes heures canoniaux. Lequel college soit fondé de mille liures parisis de rente amortie. De rechief soit garny de vestemens, liures, calices, ornemens & autres choses necessaires, & tout aux despens dudit de Bourgongne, & soit escrit sur l'entrée dudit college en grosses lettre, la cause de la fondation d'iceluy. En outre ledit Duc de Bourgongne pour le salut de l'ame dudit deffunct, soit condamné à fonder vn college de xij. Chanoines, & de xij. Vicaires, & de xij. Clercs de la ville d'Orleans, de laquelle prendroit son nom ledit deffunct, duquel college & benefices appartienne la collation à madiete dame d'Orleans & à ses successeurs les Ducs d'Orleans. Lequel college soit notablement ediffié, & soit assigné en tel lieu où il appartiendra, & où il semblera bon, de deux mille liures parisis de rente, & soit garny de liures, vestemens, calices, croix, ornemens & autres choses necessaires à tel college. Sur la porte duquel soit escrite la cause de la fondatiō d'iceluy. Et affin que de ce il soit memoire aux estrangers de nation, ledit de Bourgongne soit condamné à faire edifier deux chapelles l'une en Hierusalem au saint Sepulchre, & l'autre à Romme, & assigner chacune d'icelles, de rente ou valleur de cent liures selon la monnoye du pays, & des choses necessaires & affreans à telles chappelles. En chacune d'icelles soit dit perpetuellement chacun iour vne messe pour l'ame du deffunct, & à l'entrée d'icelles soit escrite la cause de la fondation, comme es colleges dessusdits. En apres ledit Duc de Bourgongne de fait soit cōtrainct de payer la somme d'un million d'or non mie au prouffit de madiete dame d'Orleans ne de ses fils: mais à fonder hospitaulx, colleges de religieux, chappelles, aumosnes & autres euures de pitié pour le salut & remede de l'ame dudit deffunct. Et que pour accomplir les choses dessusdictes, toutes les terres & seigneuries qu'a le Duc de Bourgongne



gne en ce Royaume, de fait soient mises en la main du Roy, affin qu'elles soient vendues pour l'accomplissement des choses dessusdictes & declairées. Apres ce ledit de Bourgongne soit condamné à tenir prison fermée tout par tout, & en quelsconques lieux qu'il plaira au Roy iusques à ce que toutes les choses dessusdictes seront suffisamment remplies. Et apres toutes ces choses accomplies, ledit Duc de Bourgongne soit enuoyé outre mer en exil perdurable, où au moins il demoura l'espace de vingt ans à plorer & gemir son peché, ou iusques à tant que semblera bon estre fait. Et apres ce qu'il sera retourné, luy soit enioinct sur les peines qui peuuent estre faictes qu'il n'approche iamais la Roynie & les fils monseigneur d'Orleans trespassé à cent lieue qu'ils soient, ou il soit cōdamné faire telles reparations & si grandes amendises honorables, fondatiōs & voyages pour les cas par luy commis selon la quantité & enormité dudit cas, & tellement que de ce soit memoire perdurable. Et aussi soit cōdamné es dommaiges & despens qu'ont porté, portent, & porteront ma dame d'Orleans & ses fils, pour l'occasion des choses dessusdictes. Et dient que selon raison, ainsi maintenant il leur doibt estre fait & adiugé sans procez ou dilation, attendu que le cas est si notoire tant de fait comme de droit. Car il est certain que le cas aduint, & que ledit Duc de Bourgongne a confessé iceluy publicquement tant en iugement que dehors iugement. Premièrement il confessa purement & nettement iceluy cas en la presence du Roy de Cecille, & monseigneur de Berry, assignant nulle cause fors ce qu'il l'auoit fait par l'enhort du diable. Ce mesme fait a cōfessé en plusieurs lieux deuant plusieurs notables personnes. Et ainsi par icelle confession appert que selon raison doibt valloir en son preiudice, & doibt estre tenu pour cōuaincu dudit cas, & sans procez doibt estre condamné, ne il ne doibt point estre receu selon raison, à dire l'opposite ne à coulourer, ou couvrir aucunement sadicte confession. Il ne doibt point estre ouï autremēt qu'il a fait. Premièrement veu qu'en icelle confession il s'est arresté & icelle plusieurs fois a racomptée. Ce approuue Innocent ou chapitre d'Electiō, & Guillermus de Montleon au chapitre des Constitutions. Et de ce auons en la xxxj. Cause & seconde Question ouquel lieu le Pape Nicolas tint ce Roy Lotaire pour conuaincu de son preiudice d'un certain cas duquel il auoit escrit audit Pape comme il appert oudit chapitre. Et toutesfois icelle confession auoit esté faicte tant seulement pour vne lettre enuoyée dehors iugement. Donc par plus forte raison ledit Duc de Bourgongne doibt estre conuaincu dudit cas par la confession de sa propre bouche faicte & recitée à plusieurs, sans necessité d'autre inquisition ou procez. Toutesfois il conuient parler de la confession faicte en iugement. Il est vray qu'il a confessé le cas dessusdit en iugement: Car en la presence de toy sire d'Acquitaine, quand tu seroyes en iugement representant la personne du Roy, & deuāt les seigneurs du sang royal & deuāt tous ceux du conseil du Roy, & grād multitude de peuple assemblé à la requeste dudit Duc de Bourgongne, il a confessé ledit cas. Et ainsi ne peut il pas dire qu'il n'ait confessé iceluy cas en iugement & deuant iuges compettans. S'enfuit doncques qu'il ne conuient faire autre procez ou examination de cause, ne prononciation de sentence selon aucuns. Car la confession en droit doibt estre pardiugée selon les loix en plusieurs lieux. Et especiallement en la premiere loy. La raison pourquoy n'est pas requise prononciation de sentence cōtre celuy qui



a confessé son peché en iugement est telle. Car iceluy qui la cōfesse aucunement est condamné par sa sentence selō la dessusdictē loy. Item dit la loy. *In confitentē, nulla sunt partes indicantis*. C'est à dire, nulles parties sont du iugeāt, contre le confessant. Et supposé que selon aucuns la sentēce soit requise: au moins il est certain selon tous, que nulle cognoissance de cause ou examinatiō est requise. Attendu que ce present cas est moult notoire, ainsi autresfois a esté déterminé par sentēce & iugement des Roys du temps passé contre aucuns grans seigneurs du tēps d'adonc, c'est à sçauoir puis q̄ les faits estoient notoires: autres procez n'inquisitiō n'estoit pas requise. Et ainsi sera fait par la grace de Dieu de ce present cas: car raison le requiert. Toutesfois s'il est trouué qu'en ceste presente matiere il cōuenist faire inquisition ou procez, ce qu'il ne conuient pas comme il est dit par dessus. En ce cas madiēte dame d'Orleans est appareillée de prouuer toutes les choses par eux proposées s'il estoit besoing. Et tellement que selon raison il pourra souffrir. Et pource, comme dit est, que madiēte dame ne peut en ceste matiere faire fors tant seulement conclusiōs ciuiles, & que les conclusions crimineuses lesquelles volontiers feroit s'elle pouuoit appartiennent au procureur du Roy tant seulement selon la coustume de France. Pource madiēte dame supplie & requiert tres instamment que le procureur du Roy se vueille adioindre avec elle, & qu'elle face conclusions criminelles selon ce que le cas requiert. Ainsi comme elle dit, il luy doibt estre fait selon raison. Iusques à cy a esté transcrit des conclusions de madiēte dame d'Orleans & de ses fils. Apres lesquelles conclusions par le conseil des seigneurs du sang Royal & d'autres du conseil du Roy là estans presens, le Duc d'Acquitaine fait respōdre par le Chancelier à ladiēte dame d'Orleans, que luy comme lieutenant du Roy en ceste partie, & representant sa personne & les seigneurs du sang & conseil du Roy, estoient bien contens d'elle pour le fait de son seigneur & mary, iadis Duc d'Orleans, &c. Et qu'iceluy tenoient pour bien excusé & deschargé, & que des choses dessusdictes par luy requises, on luy feroit bonne & briefue expedition de iustice, &c. tant que de ce par raison elle deuroit estre contēte. Et bien peu apres celuy mesmes ieune Duc d'Orleans, Charles fait hommage de ladiēte Duché d'Orleans & de ses Comtez autres terres, à Charles Roy de France son oncle. Puis prenant congé à la Royne, au Daulphin son fils & aux Princes du sang royal estans adonc à Paris, se partit avec ses gens d'armes & retourna à Blois dont il estoit venu, & la Duchesse douāgiere mere dudit Duc d'Orleans & sa femme pour lors demourerent en la ville de Paris,

*Comment Guy de Roye Archeuesque de Reims, appella des constitutions faictes à Paris par l'Vniuersite, dont ils furent mal contens, & firent prisonnier son procureur.*

CHAP. XLVI.

**E**N ce temps mesmes, Guy de Roye Archeuesque de Reims qui auoit esté mandé à Paris deuers le Roy tres-especialēmēt pour estre au conseil des Prelats qui là tenoit pour l'vnion de l'vniuerselle Eglise, n'y alla n'y enuoya. Et avec ce ne voulut pas bailler son consentement audit conseil: mais par vn sien chappellain & procureur par luy enuoyé avec ses lettres seellées de son seal, signées de son seing manuel, & corroborées d'iceluy cōseil & de



de toutes les ordōnances estatuts d'iceluy faits & à faire, tāt pour luy & son diocese comme pour la prouince & subiets. De laquelle appellation le Roy & generallement tout le conseil & clergé furent tresmal contens. Et pourtant presentement à l'instance & requeste de l'vniuersité de Paris, ledit Procureur fut prins & mis prisonnier en vne cruelle chartre, où il fut longuement. Ens ouquel temps le Cardinal de Bordeaux natif d'Angleterre vint à Paris, en partie pour ladicte vnion de l'Eglise: Et adonc retournerent audit lieu de Paris maistre Pierre Paoul, & le Patriarche d'Alexandrie nommé maistre Symon Cramant, lesquels deux auoient esté enuoyez en Italie comme ambassadeurs du Roy de France & de l'vniuersité de Paris, aux deux contendans à la Papalité. Desquels grandement desiroient la venue, les Prelats assemblez au conseil dessusdit, affin qu'ils fussent plus sages par iceux d'aucunes besongnes qu'ils auoient à faire, lequel maistre Pierre Paoul Docteur en Theologie, cheuauchoit tressouuent en habit de Docteur auecques ledit Cardinal parmy Paris, tout d'un costé comme cheuauchent les nobles femmes, deuant lequel Cardinal & Docteur dessusdit, l'Abbé de Caudebecq de l'ordre de Citeaux, Docteur en Theologie, proposa de par l'vniuersité pour l'vnion de l'Eglise. Et aussi feit l'Abbé de saint Denys & un autre Docteur en Theologie proposant de par l'vniuersité pour l'vnion de l'Eglise vniuerselle, & apres iceluy Cardinal, luy partant de Paris par Boulongne sur la mer, s'en alla à Calais, & lors l'Abbé de S. Denys & un autre Docteur en Theologie qui estoient en prison au Louure par le commandement du Roy, furent mis dehors à la requeste du Cardinal de Bar, & furent du tout deliurez contre la volenté de l'vniuersité de Paris. Et pareillemēt maistre Pierre d'Ailly excellent docteur en Theologie, Euesque de Cambray. Lequel estoit arresté à l'instance de ladicte Vniuersité. Pourtant qu'il n'estoit pas à elle fauorable, fut aussi deliuré par le pourchats du Comte Vvaleran de saint Pol & du grand conseil du Roy. Si estoient lors par toutes les parties de Chrestienté grans diuisions entre les gens d'Eglise par le moyen des deux contendans, lesquels on ne pouuoit concorder ne faire renoncer à l'Eglise vniuerselle.

*Comment le Duc Iean de Bourgongne feit grand assemblée de gens d'armes pour aller secourir Iean de Bauiere contre les Liegeois & les combattit.*

CHAP. XLVII.



Il est ainsi qu'en ce temps le Duc Iean de Bourgongne dessus nommé si estoit moult entencieux & curieux d'assembler gens de guerre, pour secourir & ayder son beau frere l'Euesque de Liege. Lequel comme dit est ailleurs, les Liegeois auoient debouté de son païs, & iceluy assiégué en la ville de Trecht. Et pourtant à luy faire ledit secours manda de tous ses païs le plus de gens qu'il peut finer & aussi en autres lieux voisins ses amis & allies, c'est à sçauoir ceux de la Duché de Bourgongne, & Côté de Flandres, d'Arthois & des marches de Picardie, lesquels y vindrent en tresgrand nombre & noble appareil vindrent aussi plusieurs Sauoisien. Et avec ce manda le Comte de Mareuse Escoçois, lequel estoit à Bruges à tout enuiron quatre vingts combattans prest pour retourner en Escoce. Lequel y vint & s'assemblerent tous enuers le Tournesis. Auquel lieu ledit Duc vint deuers eux & eut aucū Parlement avec



ses plus feables capitaines en la ville de Tournay . Et de là l'vnziesme iour du mois de Septembre se tira à tout ses gens d'armes & grand nombre de charroy chargez de viures & artilleries vers Enghien , auquel lieu il fut receu par le seigneur dudit lieu tresioyeusement , & le lendemain alla à Muelle en Brabât à vne lieue pres de Pier-vves par dessus nommé gouuerneur du païs du Liege. Et de là se tira en la ville de Flourines, auquel lieu vindrent deuers luy, enuoyez de par le Roy de France comme ambassadeurs, c'est à sçauoir messire Richard Daulphin & messire Guillaume de Tignouuille nagueres Preuost de Paris, avec lesquels estoit maistre Guillaume Bouratier secretaire du Roy, lesquels apres qu'ils eurent audience de parler audit Duc, luy remōstrerent comment ils estoient là enuoyez de par le Roy & son grand conseil pour deux choses: c'est à sçauoir, la premiere affin que les Liegeois dessusdits & leur Euesque se voulsissent soubmettre du discord qu'ils auoient l'un contre l'autre sur le Roy & son grand conseil. Secondement le Roy signifioit audit Duc de Bourgongne par ses lettres royaux la poursuite que faisoit contre luy la Duchesse d'Orleans doüagiere, & ses enfans pour la mort du Duc d'Orleans deffunct son frere, & les responces que faisoient iceux ses aduersaires contre les accusations qu'autresfois il auoit fait à l'encontre d'iceluy Duc d'Orleans, & comment elle requeroit tresinstamment iustice, & ses conclusions luy estre adiugées contre ledit de Bourgongne, disant que de droit luy deuoit ainsi estre faicte, & par nulles raisons le Roy ne pouuoit ou deuoit excuser qu'il ne fait iustice. A quoy fut respondu en brief par ledit Duc de Bourgongne, quand à la premiere requeste qu'il vouloit, pourtant qu'il luy touchoit obeir au Roy & à ses commandemens : mais son beau frere Iean de Bauiere duquel il auoit espousé la sœur, luy auoit requis à grand instance qu'il luy fait & donnast secours à l'encontre des communes, & ses subiects du païs de Liege, qui contre luy festoient rebellez, & de fait l'auoient assiegé. On auoit eu pareillemēt requeste du Duc Guillaume Comte de Hainault son beau frere, & aussi frere audit Iean de Bauiere, pourquoy, quand à ce ne pouoit dissimuler ne rompre son armée par ce qu'entre-temps que ambassadeurs iroient d'un costé & d'autre, icelles communes pourroient mettre ledit Iean de Bauiere leur Euesque ou seigneur en trop grand dangier ou necessité, qui pourroit en conclusion estre exemple à tels manieres de gens qui sont communaultez, commencement de rebellion vniuerselle. Et qu'avecques ce le Roy & messeigneurs de son grand conseil se pourroient bien deporter legierement & sans preiudice de telles ou pareilles requestes, attendu que nulles des parties dessusdictes n'estoient subiects au Royaume de France. Et quand au second poinct, iceluy Iean de Bourgongne fait responce, que luy retourné de ce voyage & entreprinse il iroit deuers le Roy, & feroit enuers luy & tous autres, tout ce que bon subiect & si prouchain parent comme il estoit du Roy appartiendrait. Apres lesquelles responces iceux ambassadeurs non voyans qu'ils peussent auoir pour lors autre prouision sur le contenu de leurdicte ambassade furent assez contens. Et en fin se cōclurent les deux cheualiers dessusdits, d'estre à la iournée qu'attendoit ledit Duc de Bourgongne d'auoir à l'encontre d'iceux Liegeois, durant lequel temps vint deuers ledit Duc de Bourgongne du païs de Hainault, le Duc Guillaume son serourge accompagné des Comtes de Conuersan, de Namur & de Salines en Ardenne, avecques



ques plusieurs notables seigneurs tant cheualiers comme escuyers de ses païs de Hainault, Hollande, Zelande, Ostrenans & autres lieux iusques au nombre de douze cens baccinets ou enuiron, & deux mille pietons bien habillez, avec luy de cinq à six cens chars que charrettes chargées de viures & habillemens de guerre. Et apres qu'audit de Flourines & en la marche d'enuiron ils eurent eu plusieurs conseils l'un avec l'autre pour sçauoir commēt ils s'auoient à gouverner & conduire en icelle exercite. Si conclurent en fin qu'ils se tireroient chacun à tout sa puissance par deux diuers chemins en approchant leurs ennemis, & que certain iour se trouueroient tous ensemble pour iceux combattre s'ils les vouloient attendre. Et fut ordonné que ledit Duc Guillaume iroit par deuers luy en degastant le païs par feu & par espée. Et le Duc de Bourgongne & avecques luy le Comte de Marouse & toute sa puissance, cheuaucherent par aucuns iours tout le chemin de Chaussie Bremichault, laquelle maine tout droit à Tongre & à Trecht: auquel lieu de Trecht, le seigneur de Pier-vves & les Liegeois si auoient comme dit est assiégué leur Euesque & seigneur Iean de Bauiere. Et ainsi les deux Ducs dessusdits cheminant par diuers chemins en degastans païs, le mardy, mercredy, ieudy, & vindrēt le samedi au vespre loger en la ville de Mōtenay assise sur ladicte Chaussie. Et en icelle à l'enuiron se logerent tous ensemble faisant vn seul & singulier host, pour laquelle conduire & loger estoient ordonnez deux Mareschaulx. C'est à sçauoir de par le Duc de Bourgongne, le seigneur de Vergy, & de par le Duc Guillaume, le seigneur de Ieumont, en laquelle compagnie estoient bien cinq mille baccinets, sept cens arbalestriers, & quinze cens archiers, toutes gens de bonne estoffe, avec bien seize cens chars que charrettes d'armures & artilleries, viures & plusieurs autres choses necessaires à guerre comme dessus est dit. En ouquel iour de samedi, le dessusdit seigneur de Pier-vves & son fils, qui estoit nouuel Euesque par l'accord de ceux du païs tenans leur siege deuant ladicte ville de Trecht, ouïrent certaines nouuelles par leurs espies & autres gens qu'ils auoient à ce commis, que les Ducs dessusdits trespuissamment accompaignez, si les approchoient en destruisant leur païs. Et pource tantost & hastiue-ment se departirent de leurdit siege, & s'en retournerent bien quarante mille combattans en la cité de Liege, & là se logerent: laquelle cité est à cinq lieues ou enuiron d'icelle ville de Trecht. Et eux là venuz tindrent moult grand parlement avec les autres Liegeois qui pas n'auoient esté audit siege. Apres lequel il fut crié audit siege publicquement par toute ville en plusieurs lieux de par ledit seigneur de Pier-vves leur Maimbourg & gouverneur, & de par son fils leur Euesque, que tout homme qui pourroit armes porter, le lendemain biē matin au son de la cloche fussent prests & appareillez pour issir d'icelle ville avec les dessusdits, & aller où ils les voudroient mener & conduire, laquelle chose fut ainsi faicte: car le lendemain xxiiij. iour de Septembre mille cccc. & viij. issirent hors de la cité comme on pouoit estimer à la veuē du mode bien cinquante mille ou enuiron. Entre lesquels estoient de cinq à six cēs hommes de cheual bien armez selon la coustume des François, & si auoit de cent à six vingts archiers d'Angleterre qui estoient venuz les seruir à leur souldées. Et avec ce tresgrand multitude de chars & charrettes, Ribauedquins chargées & trouffées de plusieurs & diuers habillemens à eux nuisables & necessaires. Et ainsi comme il leur auoit mandé au son de la cloche



des le point du iour s'en issirent tous ensemble en belle ordonnance, ayant grand desir d'assembler à bataille avec leurs aduersaires, & ensuiuant leur Maimbourg & Euesque dessusdit, lequel leur remonstra que leur auoit iceluy de Pier-vves en plusieurs de leurs conseils remonstre moult de fois, que d'assembler la bataille avecques leurs aduersaires leur pouuoit estre grand peril, par ce qu'ils estoient en la plus grand partie tous nobles hommes, vltiez & esprouuez en fait de guerre, & d'une mesme & seule volenté cōcordée sans diuerses opinions l'un avec l'autre, ce que point n'estoient lesdits Liegeois comme il leur disoit, & leur vouloit & eut mieux valu à demourer en leur villes & forteresses en gardāt icelles, & traualier leursdits aduersaires par diuerses manieres, en les rencontrant à leur auantage, & iceux par longue cōtinuation debouter de leurs pays. Lesquelles remonstrances ne furent pas agreables aux dessusdictes communes, & sembloit que veu le grand nombre qu'ils estoient leurs ennemis ne pourroient resister contre eux, & ne prendroient pas en gré icelles remōstrances. Et pourtant iceluy Maimbourg voyant iceux Liegeois par signes & par parolles ardamment desirer ladicte bataille, les mena aux plains champs & les mit en bonne ordonnance, eux enhortant & admonnestant moult souuent & amiablement qu'ils voulussent à ce iour estre d'une mesme volenté à eux entretenir tous ensemble pour mourir en deffendant leurs vies & leurs pays contre leursdits aduersaires qui les venoiēt assaillir. Et en ce faisant & remonstrant furent conduits & menez iusques à assez pres de Tongres, à cinq lieües de ladicte cité de Liege: aupres de laquelle ville de Tongres estoient arriuez & venuz le samedi au soir les deux Ducs dessus nommez avecques toute leur puissance qui desia estoient aduertis que lesdits Liegeois auoient leué leur siege pour les venir rencontrer & combattre. Et pource, apres qu'ils eurent eu plusieurs conseils avecques leurs capitaines & autres des plus experts de leur compagnie, enuoyerent le dimanche tres matin enuiron cc. cheualcheurs que conduisoient Robert le Roux & autres nobles de la marche enuiron, pour enquerre la verité d'iceux leurs aduersaires. Lesquels assez tost apres retournans, rapportant pour vray iceux Ducs qu'ils auoient veu lesdits Liegeois en tresgrand nombre venans en ordonnances de bataille. Lesquels oyans icelles nouvelles feirent diligemment & hastiuement preparer toutes leurs gens & les mettre en belle ordonnance pour aller contre iceux & les rencontrer. Et quand ils eurent cheuauché comme demie lieüe ils les commencerent à veoir tout à plain. Et aussi les pouuoient veoir lesdits Liegeois estans assez pres de Tongres. Et adoncques s'approcherent assez pres les vns des autres, & se meirent les Ducs à tout leurs gens à pied en vne place assez aduantageuse, pensans que lesdits Liegeois venroient vers eux pour les enuahir, & ne feirent qu'une seule bataille afin de soustenir mieux le faix de leurs aduersaires, laissant derriere eux leurs cheuaux, chars & charrettes. Et meirent par maniere d'elles grand partie d'archiers & d'arbalestriers. Lesquels archiers conduisit en ce mesme iour tressagement de par le Duc de Bourgogne le seigneur de Miraumont. Lequel Duc de Bourgogne estoit à dextre de la bataille, & le Duc Guillaume à senestre, chacun d'iceux Ducs accompagné de ses gens. Et là apres qu'ils eurent fait leurs ordonnances & mis leurs gens en conduicte selon l'opinion des plus experts de la compagnie, furent faits de ceste partie tresgrand quantité de cheualiers nouueaux.



ueaux. Et assez tost apres les dessusdits Liegeois enflez & remplis d'orgueil, reputans lesdits Ducs & leurs gens pour peu de chose s'approcherent d'iceux assez pres, & eux trayans vers le droit lez sur vne haulte place nommée communement le champ de comble de Hasebam, là s'arrestèrent en moult belle ordonnance, ayant avecques eux l'estandart saint Lambert, & plusieurs bannieres de leurs mestiers, & la cause pourquoy là ils s'arrestèrent, si fut, pource que les plus anciens de leurs gens, disoient qu'en ce mesme lieu autresfois leurs deuan- ciers auoient eu victoire. Et pourtant presentement de rechief creoient l'auoir. Et de là incontinent commencerent à eux mettre en tresbelle ordonnance de bataille, & iecterent plusieurs canons contre leurs aduersaires, desquels grandement les trauaillerent. Est à sçauoir qu'entre iceux deux batailles estoit vne petite vallée, & au fons & au meillieu d'icelle auoit vn petit fossé par lequel cou- roient les eauës en temps de pluyes. Et quand lesdits Ducs & leurs gens eurent vn petit attendu, veans que dudit lieu & place lesdits Liegeois ne se partoient pour approcher, prindrent brief conseil, avecques aucuns de leurs cheualiers ex- pers, & sachans armes, pensans que plus hardis sont ensuiuans la bataille, que les attendans. Si conclurent & delibererent tous d'un commun accord, que preste- ment ils iroient assaillir lesdits Liegeois tous ensemble en bonne ordonnance par pausées & repousemens, pour le fais de leurs armeures & iceux combatteroient en leurdicte place, deuant ce qu'ils se fortifiassent n'accrussent plus par nombre de combattans. Toutesfois en ceste mesme heure ordonnerent pour rompre l'ost desdits Liegeois, & iceux enuahir par derriere cinq cens hommes d'armes à che- ual ou enuiron, avec mille autres combattans, desquels furent conducteurs & capitaines de par le Duc de Bourgogne, les seigneurs de Croÿ, de Helly, de Noeuille & de Raiffe cheualiers, avec eux Enguerrât de Bournouille escuyer. Et de par le Duc Guillaume furent commis & ordonnez avecques les dessusdis les seigneurs de Hamette & de Ligne cheualiers : avecques eux Robert le Roux escuyer qui tous ensemble se tirerēt aux plains champs ainsi comme il leur auoit esté ordonné, & adonc iceux Liegeois voyans la compagnie dessusdicte depar- tir de l'ost des deux Ducs & aller au loing, comme dit est, cuiderent pour vray qu'ils s'en fuissent, pour doubte de ce qu'ils les veoient en si grand nombre. Si commencerent de toutes pars à crier de haute voix en leur langaige, fuyo, fuyo, en repetant par plusieurs fois ladicte parolle. Mais continuellement le seigneur de Pier-vves leur chief & conducteur comme saige à enseigner en fait de guerre les retrahit benignement & doucement de leur cry, noise & violence. Disant à iceux, mes treschiers amis icelle compagnie à cheual que veez deuant vous ne s'en fuit pas comme vous cuidez : mais quand icelle autre compagnie à pied moult plus grande, comme vous pouuez veoir, sera ententue à vous enuahir & combattre, iceux que vous veez à cheual prestement suruindrent de trauers par bataille instruite & ordonnée, & s'enforcerōt de vous separer & diuiser par der- riere, entre-temps que les autres vous assailliront par deuant. Et pourtant tres- chiers amis nous auons la bataille par deuant noz yeux que ie vous auoye touf- iours desenhorté, & descōseillé : laquelle de tout vostre cueur vous desirez auoir comme se desia fussiez seurs de la victoire, neantmoins cōme autresfois vous ay dit, pource que n'estes pas si bien vsitez en armes ne ainsi armez que sont voz ad-



uersaires, lesquels font à peu pres tous faits & apprins de la guerre, vous auoye conseillé que tarder la bataille vous estoit profitable, & qu'eussiez gardé vostre pays, villes & forteresses, & iceux voz ennemis enuahis & diminuez petit à petit, peut estre se fussent tanez retraits en leurs pays, villes & forteresses, & iceux voz ennemis enuahis, ou du moins on eut peu trouuer aucun bõ appoinctemēt, toutesfois le iour est venu que vous avez tant désiré, si vueillez d'une mesme volonté mettre toute vostre esperance en Dieu & enuahir hardiement & courageusement vosdits aduersaires pour vostre pays deffendre. Apres lesquelles parolles par luy dictes & remonstrées il voulut mettre vne compaignie à cheual de ses meilleurs gens pour aller contre les autres par dessus nommez: mais à verité dire lesdictes communes ne le voulurent pas souffrir monter à cheual: ainçois luy dirent moult de laidenges & de reproches iceluy reputant pour traistre. Lequel souffrant patiemment leur sotte & rigoureuse rudesse, il ordonna briefuement son ost en quarrure, & par deuant estoit en triangle: c'est à sçauoir en trois costez, apres ordonna au dos à dextre & à fenestre costé dudit ost, ses chars & charrettes tresbien establis par belle ordonnance, & estoient leurs cheuaux sur le derriere par vn des costez, & par dedans estoient leurs archiers & arbalestriers desquels le traict estoit de petite valeur, exceptez les archiers Anglois qui furent mis es lieux plus conuenables & necessaires. Et ledit seigneur de Pier-vves accompagné de son fils l'Euesque, & d'aucuns les plus excellens de sa compaignie en armes, en maniere de bon meneur se meit au front, deuant contre ses aduersaires. Durant lequel temps, en ce mesme dimenche enuiron vne heure apres midy, les deux Ducs dessus nommez semblablement en marchant auant pour aller à l'encontre de leursdits aduersaires, enhortant leurs gens chacū endroit soy moult amiablement, disant qu'ils enuahissent vigoureusement & hardiement iceux & qu'ils combattissent par courages fermes & estables ceste sotte gent, qui estoient rebelles à leur seigneur, & moult rude, eux confians en leur grand nombre & multitude. Disant que se ainsi le faisoient ils auroient victoire, & emporteroient sans faillir honneur perdurable. Apres lesquelles choses & autres semblables dictes & remonstrées par lesdits Ducs chacun à sa gent, ils se retrahirent chacun en leurs lieux ordonnez aupres de leurs banieres, & tantost par reposées comme dit est approcherent moult fort de leurs ennemis, lesquels commencerent tresfort à iecter de canons. Si portoit la baniere du Duc de Bourgogne vn tres vaillant cheualier nommé messire Iaques de Courtiambe, lequel à l'approcher cheut à genoux, dont aucuns eurent grand desplaisance, doubans que ce ne fut signe d'aucuns maulx aduenir: mais il fut tantost releué à l'ayde de ceux qui estoient aupres de luy pour la garde, & se porta & maintint ce iour tresprudentement, & estoit iceluy cheualier natif des pays du Duc de Bourgogne, & la baniere du Duc Guillaume fut portée en ceste besongne par vn gentil cheualier, nommé messire Hoste de Scaussines qui bien se maintint. En apres les deux ost, ioignāt l'un contre l'autre y eut tresaprement horrible & espouētable bataille, commencée d'une partie & d'autre, laquelle dura par l'espace d'une heure ou enuiron, en frappant coups merueilleusement, & souuent les vns sur les autres. Et entre-temps la compaignie à cheual desdits Ducs cōme il leur auoit esté commadé & enioinct prestement que les dessusdictes batailles furent assemblées vindrēt & enuahirent au dos



dos lesdits Liegeois, lesquels par empeschement de chars & charrettes à tresgrād peine, entrèrent en eux : mais en la fin par force & vaillance feirent tant qu'ils eurent entrée, & par moult grand entente commencerent à separer, diuiser, abbatre & occire, & ainsi qu'ils estoient à ce faire tresentencieux les aucuns d'iceux esleuans leurs yeux vindrent bien six mille Liegeois partāt de leur ost & bataille, lesquels à tout leurs engins & banieres de leurs mestiers s'en alloient moult legierement, fuyant vers vne ville champestre estant à demie lieüe pres ou enuiron de la bataille. Apres lesquels ladicte compaignie de cheual voyans iceux ainsi fouyr delaisserent ce qu'ils auoient encommencé, & tantost apres iceux allerent & les enuahirent tres asprement, non mie tāt seullement vne fois, mais plusieurs iceux abbatās & occisans tres terriblement sans en auoir mercy, & adonc furent faictes si grās douleurs & gemissemens d'iceux ainsi abbatus que ce seroit longue chose à racompter. Et finablement furent mis en si grand desroy & desconfiture que pour la cremeur de mort, aucuns fuyrent au bois, & les autres es autres lieux ou ils se pouoient mussier & sauuer. Ainsi donc icelle compaignie du tout desconfite, occis, naurez, prins & deuestus par ceux de cheual, comme dit est, retournerēt de rechief en la grosse bataille pour secourir leurs gens qui cōbattoient par merueilleuse vertu & puissance cōtre leurs ennemis qui se deffendoient, & les assailloient trespuissammēt. Et pour verité ceste bataille fut moult douteuse: car par l'espace de demie heure on ne pouoit pas cognoistre n'appercevoir, laquelle compaignie estoit la plus puissante en combattant. Si estoit lors grand cruauté d'ouyr le grand bruit que faisoient les deux parties l'un contre l'autre. Et crioient à hault cry les Bourgongnons & Hainuyers chacun sous sa banniere, Nostre dame Bourgongne, nostre dame Hainault, & lesdits Liegeois crioient S. Lambert Pier-vves. Et peult estre qu'iceux Liegeois eussent eu la victoire ficelle compaignie de cheual retournée de l'occision des dessusdits fuyans ne fut de rechief suruenue au doz desdits Liegeois. Laquelle compaignie se porta si vaillamment en ceste besongne que leurs aduersaires furent incontinent par eux trespercez, jaçoit-ce chose qu'à leur pouoir ils resistassent contre eux, & adoncques en assez brief terme fut faicte d'iceux grande occision sans prendre nulluy à finance. Et là pour vray par la forte diligence & vigueur des dessusdits de cheual commencerent à cheoir gens sans nombre l'un sur l'autre: car avecques ce le faix & la puissance de la bataille de pied tourna sur eux. Pourquoi ils furent en assez brief terme tournez à desconfiture & cheurent par milliers morts & naurez en grand confusion & desolation l'un sur l'autre, en telle maniere que les mons & multitude des morts & naurez estoient en plusieurs lieux plus grans que ne sont les chaumes des moissons au mois d'Aoust. Et de ce on ne doibt point auoir trop grans merueilles, car assemblées de communes petitement armées & plains de leurs voluptez irraisonnables, nonobstant qu'ils soient grand nombre, à peine peuuent ils resister contre multitude de nobles hōmes accoustumez & esprouuez en armes, mesmement quand Dieu le seuffre ainsi estre fait. Et en icelle heure assez pres de la banniere du Duc de Bourgongne où estoit le plus grād faix de ladicte bataille cheurēt le seignr de Pier-vves & ses deux fils: c'est à sçauoir celuy qui estoit esleu Euesque & vn autre, lesquels presentement furent mis à mort. Le Damoisel de Salines qui portoit l'estandart S. Lābert, c'est à sçauoir fils aîné du Comte de Sa-



lines dessusdit, qui combattoit avecques les deux Ducs, sire Jean Collet & plusieurs autres cheualiers & escuyers iusques au nombre de cinq cens & plus: avecques tous les archiers Anglois & bien vingt & huit mille desdictes communes ou au dessus furent tous morts en icelle place, & plus par traict que par autre maniere. Messire Bauldin de Montgardin cheualier pour sauuer sa vie se rendit au Duc de Bourgogne & fut mené & conduit hors de la bataille & depuis donné par ledit Duc à messire Vvicart de Bours. Tant qu'est à parler de constance, hardiesse & vaillance d'iceluy Duc de Bourgogne: & comment en ladicte bataille au commencement d'icelle en decourant de lieu en autre sur vn petit cheual enhortant & baillant à ses gens grand couraige, & comment il se maintint iusques en la fin, n'est besoing d'en faire grande declaration, car pour vray il feit là si grandement qu'il en fut loué & prisé de tous ses cheualiers & autres de ses gés, & oncques de son corps sang ne fut traict pour iceluy iour combien qu'il fut plusieurs fois trauaillé & atteint de traict & d'autre dars. Toutesfois quand il fut demandé apres la desconfiture se on cesseroit de plus occire iceux Liegeois, il feit responce qu'ils mourroient tous ensemble & que pas ne vouloit qu'on les prest ne meit à finances. Pareillement le Duc Guillaume & tous les autres Princes avecques generally toute la cheualerie & noblesse d'icelles deux parties se porterent tresvaillamment, & furent morts de leurs gens à ceste iournée environ de cinq à six cens hommes entre lesquels furent morts Jean de la chappelle cheualier dudit Duc, messire Flourimont de Brimeu, Jean de la Trimouille qui en ce iour auoit esté fait cheualier, Hugotin de Nambon, Jean de Theune, Vicomte de Brimequet natif de Hainault, Rollant de la Mote & aucuns autres iusques au nombre de cent à six vingts gentils-hommes & le surplus varlets. Et adonc ainsi que les deux Ducs dessusdits estoient demourez victorieux issirent de la ville de Tongre environ deux mille pour cuider aider à leurs gens, mais quand ils les virent de loing ainsi desconfits se commencerent à retraire vers leur ville & furent poursuiuis de la compagnie de cheual & dont dessus est faicte mention, & de rechef en tuerent grand quantité. Et apres retournerent les deux Ducs lesquels apres qu'ils virent tout à plain qu'ils estoient du tout demourez victorieux sur la place & que leurs ennemis estoient du tout desconfits s'assemblerent ensemble. Et là en regrant leur createur de leur glorieuse fortune feirent grand liesse les vns avecques les autres. Et tantost se logerent en leurs tentes apres dudit lieu où ladicte bataille auoit esté, & là demourerent trois iours & trois nuicts. Duquel lieu les ambassadeurs du Roy dessus nommez apres qu'ils eurent prins congé se partirent, & par Tournay & autres lieux retournerent à Paris deuers le Roy & son grand conseil. Mais parauant leur venue ledit Duc de Bourgogne auoit ja enuoyé vn sien cheuaucheur portant ses lettres & nouvelles de sa victoire deuers le dessusdit Roy & autres ses bons amis, pour lesquelles nouvelles plusieurs grâs seigneurs, & autres aduersaires qui estoient audit lieu de Paris à intention de faire poursuite enuers le Roy cōtre iceluy Duc pour la mort de deffunct Loys Duc d'Orleans, ne furent pas de ce grandement resiouys, mais eurent au cuer grand tristesse. Et pour le contraire ceux tenans son party en eurent grand liesse. Or est ainsi, que le lundy lendemain de ladicte bataille, ainsi qu'à douze heures, Jean de Bauiere Euesque de Liege & avec luy le Damoiseau de Hinfébecq & plusieurs autres



autres nobles & non nobles iusques au nombre de six cens bacinets ou enuiron vindrent de la ville de Trecht, où ils auoient esté assiegez, à l'ost des deux Ducs dessusdits, lesquels ils remercia treshumblemēt du secours qu'ils luy auoient fait, & fut d'iceux & de leur cheualerie receu à tresgrand liesse, si luy fut à sa venue fait present de la teste dudit sire de Pier-vves, lequel auoit esté trouué mort avec les autres avec ses deux fils dessusdits, & fut mise au bout d'une lance pour icelle monstrier à tous ceux qui la vouloient veoir. Et le mardy ensuiuant iour de saint Fremin martyr, de la cité du Liege, Huy, Dinant, & Tongre, avec toutes les autres bonnes villes de la terre de l'Euesché de Liege (excepté le chastel de Bouillon) voyans & oyans la grand destruction de leurs gens, & la puissance de leurs ennemis, attains de paour, non voyans esperance de quelque secours, se rendirent en l'obeissance desdits Ducs de Bourgongne & de Hollande, par le rapport de leurs ambassadeurs, lesquels à ce faire, ils enuoyerent par deuers iceux en suppliant aussi treshumblement audit Iean de Bauiere leur Seigneur & Euesque qu'il les voulsist receuoir à mercy & misericorde requerant humblement sa grace. Laquelle chose ledit Euesque octroya par le moyen d'iceux Ducs, pourueu toutefois que tous les coupables de la mutation, mauuais & peruers, desquels plusieurs estoient encores en vie qu'on leur denommeroit ils rendroient & deliureroient en la main desdits Ducs pour en faire ce que par eux en seroit appoincté par iustice, & pource chacune d'icelles bones villes bailla bons hostages & bonne seureté telle qu'ils voulurent auoir selon leur bon plaisir. Et le ieudy ensuiuant les deux Ducs avec eux l'Euesque & tout leur ost partant dudit lieu allerent vers Liege : & se logea le Duc de Bourgongne en vne ville nommée Flauye sur la riuere de Meuse à vne lieüe pres de ladicte cité de Liege : & le Duc Guillaume & son frere l'Euesque, se logerent assez pres és montaignes. Le Dimenche ensuiuant se meirent iceux Ducs & l'Euesque avec eux tous les conseilliers d'icelles parties ensemble. Et y eut plusieurs conseils mis auant sur les besongnes dessusdictes, iusques au mardy ensuiuant auquel iour l'Euesque dessus nommé alla en la cité de Liege, & fut receu du remain des habitans en grand humilité : & desia estoient prins en icelle & en toutes les autres villes, & mis en prison les plus coupables, de ladicte conspiration. Si alla premierement à l'Eglise cathedrale de S. Lambert faire son oraison & icelle reconciller, & apres ce alla à son Palais, où il fut treshumblement requis de tout son peuple generalmente qu'il eust d'eux misericorde, laquelle requeste il accorda. Et brief ensuiuant retourna aux champs deuers les Ducs. Lendemain enuiron deux heures apres midy s'assemblerent iceux Ducs & Euesques en vn lieu assez hault qui estoit aupres de leur ost, avec eux plusieurs nobles hommes de leur compagnie. Et là par messire Iean de Ieumont Marechal du Duc Guillaume comme dessus est dit, & selon le commandement & ordonnances desdits Ducs, & l'Euesque fait amener de ladicte cité le Damoiseau de Rochefort, noble homme & riche, Iean de Saramie cheualier, & autres quinze Bourgeois, lesquels par le bourel les vns apres les autres eurent les testes couppees, & pareillement plusieurs hommes d'Eglise, & aussi aucunes femmes pour la cause de ceste mesme conspiration furent morts & noyez en la riuere de Meuse. Et le lendemain lesdits Ducs & Euesque avec tout leur ost ensemble retournerent vers luy & se logerent à trois lieües pres vne ville nommée Beauclo-



quet auquel lieu ils eurent plusieurs Parlemens ensemble sur les affaires du païs. Et là vint le Comte de Neuers qui venoit à l'ayde de son frere le Duc de Bourgongne à tout quatre cens combattans. Auquel lieu pareillement furent amenez par ledit seigneur de Ieumont xix. bourgeois de ladicte ville de Huy, qui furent comme les autres & pour pareil cas decappitez. Et comme deuant furent de rechef noyez plusieurs gens d'Eglise & aucunes femmes. Vint audit lieu dessusdit encores deuers iceluy Duc de Bourgogne pour le seruir Amé de Viry Sauoylié, noble homme & tresexpert en guerre accompagné de trois cens bacinets des païs de Sauoye. En apres les Ducs, l'Euesque & tous leurs conseilliers eurent plusieurs Parlemens & par plusieurs iournées sur les affaires du païs de Liege. Et en fin conclurent tous ensemble avec Iean de Bauiere, lequel fut alors nommé Iean sans pitié qu'ils s'assembleroient tous ensemble en la cité de Tournay, le iour S. Luc ensuiuant pour là conclure & deliberer sur toutes les besongnes qu'ils auoient à faire touchant ceste matiere. Et apres qu'ils eurent fait faire ou païs plusieurs iustices de tresgrand nombre des conspirations dessusdictes: & aussi fait abatre & demolir les fortifications de la ville de Huy, Dinant & d'aucunes autres places, se departirent iceux Ducs du païs pour retourner en leursdits lieux & emmenerent avecques eux tresgrand nombre de Liegeois lesquels estoient baillez en hostages de par bonnes villes: affin d'entretenir entierement les traictez qui leur seroient appoinctez à faire: desquels hostages aucune partie furent enuoyez en Hainault, à Mons & en Valenciennes de par le Duc Guillaume, & l'autre partie furent menez à l'Isle, à Arras & autres places du Duc de Bourgongne, lequel Duc s'en alla en son païs de Flandres, & le Duc Guillaume en Hainault, apres qu'ils eurent donné congé à leurs gens d'armes. Et la plus grand partie retournerent des lieux dont ils estoient partis rempliz & enrichiz tresabondamment des biens d'iceux Liegeois, lesquels Liegeois generalmente demourerēt en leur païs tresdolens & amatiz de la douleur qui leur estoit aduenue. Si furent en ceste exercite avecques ledit de Bourgongne plusieurs grans seigneurs de ses païs. C'est à sçauoir des païs de Bourgongne, messire Iean de Challon, messire Gaultier de Ruples, le seigneur de Vergy Mareschal de Bourgongne, le seigneur de S. George, messire Iean de la Balme, messire Guillaume de Champ-diuers, messire Iacques de Courtiamble, le seigneur de Montagu & plusieurs autres. Et des marches de Picardie, les seigneurs de Croÿ, de Heilly, de Fosseur, de Vvaurin, messire Bort Quiert & ses freres, le seigneur d'Inchy, le seigneur de Raiffe, le seigneur de Brimeu, messire Regnault de Crequy seigneur de Comtes, Enguerran de Bournouuille, le seigneur de Ront, messire Raoul de Flādres, le seigneur de Poix, messire Vvincart de Bours, le seigneur d'Auxy, le seigneur de Mailly, le seigneur de Thiennes, le seigneur d'Azincourt. Et des païs de Flandres, messire Iean & messire Loÿs de Guystelle, le seigneur de Hames, messire Ieā de Bailleul, messire Collart de Fosseux, & en general toute la plus grād partie de tous les nobles des dessusdictes marches de Picardie. Et pareillement y auoit iceluy Duc Guillaume assemblé tous les nobles & grans seigneurs de ses païs avec plusieurs autres ses alliez, y fut aussi messire Iean de Bethune frere au Vicomte de Meaulx. A laquelle assemblée ne se voulurent pas trouuer comme il fut commune renommée, est à sçauoir Anthoine Duc de Brabant frere au Duc Iean de Bourgongne ne Vvaleran



leran de Luxembourg Comte de saint Pol: pource qu'ils sçauoient aucunement les parolles & conuenances qui auoient esté entre ledit Iean de Bauiere d'une part, & le seigneur de Pier-vves & son fils d'autre part, pour la resignation dudit Euesché comme en autres lieux est plus à plain declairé, jaçoit ce qu'ils y mesfissent aucunes autres excusations. En apres les dessusdits Ducs & tous leurs gens partis & retournez hors du païs de Liege, enuiron le iour que y deuoient eux assembler en la ville de Tournay avec eux Iean de Bauiere Euesque pour rendre leur sentence à l'encontre des communaultez, bonnes villes & païs de Liege, leur furent enuoyez ambassadeurs notables & solempnels d'icelle ville de Tournay, lesquels leur requirent instamment qu'il leur pleust à eux assembler & conuenir en aucune autre bonne ville disans en eux excusans, que si grande & telle assemblée leur pourroit porter grand preiudice pour la petite prouision des viures & autres choses necessaires qu'ils auoient de present: laquelle requeste leur fut accordée desdits seigneurs assez benignement. Et au lieu d'icelle s'assemblerent en la ville de l'Isle, au iour qui estoit prins par eux comme dessus est dit. Et là furent amenez en leur presence, c'est à sçauoir desdits Ducs, Euesque & leurs consaulx tous les Liegeois, ou au moins la plus grãd partie qui auoient esté baillez en ostage, & aussi plusieurs autres, lesquels estoient commis à y estre pour ouyr ladicte sentence que deuoient faire les dessusdits, laquelle fut telle que cy sera declairée.

S'ensuit la sentence dicte & prononcée par escript aux dessusdits hostagiers, & commis du païs de Liege. Selon l'ordonnance des Ducs de Bourgogne & de Hollande, laquelle ils veullent que selon la declaratiõ d'icelle elle soit du tout fermée & accomplie sans quelque faute ou interdit, quand à present & le surplus retiennent en eux à declairer & faire determination entiere toutes & quantes fois qu'il leur plaira. Premièrement ils mettent en leurs franchises coustumes & priuileges que auoient & ont les habitans de la cité de Liege & des villes & païs de l'Euesché, situées en iceluy païs de Liege, de la Comté de Los, du païs de Halsebam, de Saintron, la terre de Bouillon & des appartenances ayans priuileges, Loix franchises & coustumes. Et ordonnent que de present les bourgeois de ladicte cité de Liege, & les autres dessus nommez apportent en la ville de Mons en Hainault, le lendemain de saint Martin prochain venant au monastere des Escolliers de ladicte ville, toutes leurs lettres des priuileges, des loix, libertez & franchises qu'ils ont. Et icelles bailleront es mains d'aucunes personnes qui ausdits lieu & iour seront commis de par lesdits seigneurs à icelles receuoir. Et ceux qui apporteront lesdictes lettres seront tenus de iurer sur leurs ames, & sur les ames d'iceux qui les enuoyeront qu'ils n'ont point laissé aucunes lettres de leursdits priuileges, loix, libertez & franchises frauduleusement. Item veullent & ordonnent lesdits seigneurs qu'aucunes desdictes lettres de priuileges, loix, franchises & libertez audit iour estoient delaissez à apporter deuant les dessusdits commis par lesdits seigneurs des adoncques, & eussent ceux desdictes citez, terres, villes & païs de Liege & des appartenances delaisé à les enuoyer en seront priez pardurablement. Item ordonnent & establisent lesdits seigneurs que es mains de leursdits commis au iour & lieu dessusdit toutes les alliances & conuenances pour eux touchans icelles villes, citez & païs seront appoinctées & baillées ausdits commis sur peine & sermens semblables comme dessus est dit en deux arti-



cles touchans iceux priuileges & alliances. Item veullent qu'après la uisitation desdictes lettres de priuileges & de là ensuiuant celles dont sera appoincté & ordonné ne puissent dōner nouuel priuilege à iceux les Euesques de Liege son chapitre aux habitans desdictes citez, villes & païs ne à aucune d'icelles que ce ne soit par le consentement d'iceux Ducs nommez ou de leurs successeurs. Item ordonnent que dorefnauant en la cité, villes & païs dessusdits ne seront faits aucuns officiaux, nommez Maistres, Iurez, Gouverneurs, & docteurs des arts & mestiers ou autres offices quelconques créés & constitués par la communauté. Mais dorefnauant seront telles offices adnullées & les exercites d'icelles. Item ordonnent & establisent qu'en ladicte cité & autres villes des païs dessusdits les Baillifs, Preuosts, Maieurs & autres noms d'offices seront créés instituez par leur seigneur l'Euesque & Comte de Los & des appartenances. Et aussi Escheuins seront renouvellez chacun an en chacune ville, où il ya de coustume à auoir Escheuinaige iusques à certain nombre selon l'exigence & grandeur des villes. Quel Escheuinaige estans en la ville notable & fermée ne seront pas mis ensemble le pere & le fils deux freres, deux serourges, deux cousins germains, le oncle & le nepueu, ne celuy qui a espousé la mere de l'un d'iceux, afin d'escheuer les faueurs des ordonnances qui y pourroient estre: & seront tenuz les officiers & chacun d'iceux de iurer à leur creation & constitution solennellement à maintenir & accomplir chacun selon luy tous les articles & points contenus es ordonnances faictes par iceux deuant declairez. Item veullent & ordonnent que ledit Euesque ou Seigneur de Liege, chacun an en la fin de chacun escheuinaige pourra créer & establiir tels Escheuins qu'il luy plaira, ou ceux qui ont esté Escheuins en l'an precedent ou autres selon son bon plaisir, pourueu qu'ils ne soient de lignage ou affinité, comme dit est deuant. Par lesquels Escheuins seront iugées les causes, & déterminées, appartenantes audit escheuinaige, & les biens commis appartenans aux villes où ils seront instituez. Et que les Escheuins de ladicte cité seront tenuz rendre compte en la fin de chacun an de leur administration deuant leur Seigneur & Euesque de Liege ou ses commis & deputez, & deuant vn commis & député par chapitre & vn de par les autres Eglises. Et les autres villes seront tenues de rendre compte deuant leur seigneur de Liege tant seullement ou deuant ses commis ou deputez à ce. Item ordonnent & establisent que toutes les confraries des maistres en la cité & ville dessusdicte estans, dorefnauant cesseront, icelles ramenant au neant. Et si ordonnent que les banieres d'icelles confraries & maistres, c'est à sçauoir de celles de la cité ou Palais du seigneur du Liege, seront baillez à ses commis à tel iour qu'ils leur feront sçauoir. Et les bannieres des maistres des autres villes seront apportées par les habitans d'icelles à certain iour & lieu que ordonneront les commis, pour à ce ordonner desdictes banieres par iceux, comme il leur semblera bon & expedient. Item ordonnent que de ladicte cité & aucunes autres villes de ce mesmes païs de Liege, & des appartenances aucun ne sera reputé bourgeois fil n'a demouré sans fraude en ladicte cité, ou es villes desquelles il vouldra auoir la bourgeoisie. Et se aucū a bourgeoisie pour le present en ladicte ville & cité, ou es autres dictes villes ils annullent icelles. Et toutesfois posé qu'ils fussent bourgeois des villes où ils seront demourans, ils ne se pourront pas ayder par ladicte bourgeoisie des cas mouuans pour raison  
de



d'heritages d'eux ou d'autres personnes, tât és actions personnelles que des heritages, que la cognoissance n'appartienne aux seigneurs sous lesquels icelles personnes seront demourans & lesdits heritages situez. Item ordonnent que maintenant & en ce temps aduenir lesdictes citez & villes de Huy & Dinant & autres villes du païs de Liege, de la Comté de Los du païs de Halsebam & autres appartenans à la seigneurie du Liege ne soient ou facent assemblées, conseils ensemble n'aucunes ville avec l'autre ne face aucunes congregations ou assemblées & aussi les habitans de ladicte cité, les aucuns avec les autres, & pareillement de chacune des autres villes, qui ne soit de l'auctorité & consentement de leurdit esleu ou Euesque de Liege ou du chapitre de Liege, quand le siege sera vacquant. Item ordonnerent & establirent que ledit Euesque de Liege, ou autre du païs de Liege, de la Comté de Los du païs de Halsebam, ayans administration dudit Euesché, ceux du chapitre saint Lambert de Liege, ceux de ladicte cité ou autres d'iceux païs des maintenant & à tousioursmais ensuiuant, ne seront, ne se porteront en armes contre le Roy, ou Roys de France, contre iceux ou l'un d'iceux, contre leurs successeurs ou aucuns d'iceux contre les Ducs, ou contre des Duchez ou Comtez dessus nommez, ne aussi contre le Comte de Namur qui pour lors est, ne contre ses successeurs Comtes de Namur, ne contre leurs païs, fors pour l'Empereur en sa compagnie, & qu'iceluy mesmes Empereur y fut en propre personne: si n'estoit que le Roy de France ou iceux dessus nommez ou l'un d'iceux enuahissent comme ennemis les païs de Liege dessusdits. Item ordonnerent & establirent pardurablement pour memoire de ladicte victoire pardurable en signe de conqueste desdits païs faicte par iceux seigneurs, que quand iceux Ducs ou seigneurs ou l'un d'iceux ou de leurs successeurs voudront passer le fleuve de Meuse par aucune partie desdits païs de Liege, de la Comté de Los, l'allée ou retour leur sera ouuert: soit par quelsconques villes fermées ou autres lieux & passages tels qu'il leur plaira ou à l'un d'iceux, soit qu'ils viennent à passer à tout gens d'armes ou d'autres gens ou autrement. Pourueu toutesfois qu'ils ne souffriront aux gens desdictes villes & passages par leurs gens faire aucun grief, & que viures leur soient administrez pour leur argent, sans ce qu'on leur vende plus cher qu'on n'a accoustumé pour la cause de ce. Item ordonnent & etablissent que ledit Euesque de Liege ou autres du païs de Liege, de la Comté de Los du païs de Halsebam, ayans administration dudit Euesché ceux du chap saint Lambert de Liege, ceux de ladicte cité ou autres d'iceux païs des maintenant & à tousioursmais ensuiuant ne seront ne se porteront en armes contre le Roy ou Roys de France contre iceux ou l'un d'iceux. Item ordonnent & etablissent que leurs monnoyes & de l'un d'iceux ou de leurs successeurs Ducs ou Comtes desdictes Duchez ou Comtez desdits païs, & seigneuries auront leurs cours & seront alouez comme en leurs païs ou de leurs successeurs ou de l'un d'eux. Item ordonnent & etablissent, où ils obtindrent victoire, soit fondée vne Eglise & edifiée: en laquelle seront quatre Chapellains & deux Clercs. Et sera garnie de chasubles, calices & autres ornemens à dire & celebrer audit lieu Messes & autres tels seruices diuin qu'il sera aduisé pardurablement pour le salut des ames de ceux qui moururent en ladicte bataille: desquels chapellains la collation appartiendra à eux successiuellement par ordonnance & ainsi qu'il sera adui-



fé. Et feront faire à leurs despens l'edification de ladicte Eglise, & icelle pourueoir tant seullement pour vne fois de chasuble, calices & autres ornemens à ce appartenans. Et l'Euesque de Liege ordonne sur les consistations à luy reuenans deux cens escus d'or de rente annuelle pour lesdits chappellains & clerics. Est à sçauoir pour chacun chappellain xl. escus & pour chacun clerc dix escus, & pour entretenir ladicte Eglise vint escus. Item feront nosdits seigneurs que le vintgt-troiesme iour du mois de Septembre auquel iour fut faicte ladicte bataille que à tel iour perdurablement vne Messe de la benoiste vierge Marie sera solemnellement celebrée ou chantée par le Preuost ou Doyen de l'Eglise saint Lambert de Liege au cueur & au plus grand autel pour les ames des trespassez en ladicte bataille & de tous autres. Et requerront de ce faire aux autres Eglises collegialles & monasteres de ladicte ville & cité & à tous autres collieges & abbayes tant d'hommes comme de femmes dudit païs de ladicte Comté de Los & des appartenances. Item requierent nosdits seigneurs à l'Euesque de Liege, & à son chapitre dessus nommé que sur eux & sur toutes autres Eglises ils enioingnent par estatu, commandement & ordonnance, lesdits seruices estre celebrez en chacune desdictes Eglises collegialles & monasteres (comme dessus est dit) pour pardurable memoire. Et que pour icelle memoire de victoire toutes personnes d'Eglise des païs dessusdits furent & sont remis en leurs lieux paisiblement. Item ordonnent & establisent nosdits seigneurs que dorefnauant l'Euesque de Liege qui maintenant est, & ses successeurs Euesques de Liege ou ayans l'administration dudit Euesché, quand le siege sera vaccant, ceux du chapitre saint Lambert de Liege, institueront & mettront tel chastellain ou capitaine de telle nation qu'il leur plaira au chastel de Huy. Ouquel aussi mettront telle garnison de gens d'armes & de prouision de viures comme il leur semblera bon & expedient, & comme Seigneur franc doit & peult faire. Et auront franchement entrée & issue vers la ville de Huy ne ceux dudit païs ne pourront ne deurent mettre aucun empeschement qu'ils n'ayent ladicte entrée & issue vers les champs. Pareillement, & semblablement ordonnent estre fait du chastel d'Escoquehen & de Buillon, tant qu'à la constitution desdits chastellains & garnison. Item ordonnent nosdits seigneurs que ou cas que aucuns (quelsconques qu'ils soient) s'efforceroient ou voudroient par voye de fait ou de molestation ou trauail defraisonnable aucunement, contre les dons d'Eglise ou autres dons d'offices qui ont accoustumé estre donnez à vie par ledit Euesque de Liege & ses predecesseurs, ceux de chapitre de ladicte cité & des païs de Liege seront tenuz à restituer & deffendre de tout leur pouoir sans fraude aucune. Item & pource que encores sont viuans des mauuais & peruers conspirateurs & fuitifs hors desdits païs de Liege & des Comtez de Los, & se sont retraits & receuz és païs voisins ils ordonneront & commettront certaines personnes à ce habilles & idoines, par lesquelles diligement il sera enqueru pour sçauoir où telles personnes seront pour sçauoir les noms d'iceux. Et sous quels seigneurs ils se sont transportez, & quand ce sera sceu les seigneurs des lieux dessous qui tels conspirateurs seront retraits, requis seront affin qu'ils les prennent ou facent prendre pour bailler à la iustice dudit Euesque de Liege: affin qu'ils soient punis ainsi qu'il appartiendra par raison, ou aumoins qu'iceux seigneurs & lesdits fuitifs chassent hors de leur païs ou facent chasser



chasser & contraignent à issir tels conspirateurs. Et si on ne pouoit obtenir vers iceux seigneurs que desdits conspirateurs ils voulsissent faire iustice, tant vaudroit mieux, ad ce que tous tels conspirateurs comme contraires & rebelles à leur seigneur & esmouueurs & commouueurs de peuple soient bannis hors du païs de Liege, Comté de Los & des appartenances. Et en outre sera crié par tous les païs de Liege & de la Comté de Los & des appartenances, que aucuns ne reçoient lesdits conspirateurs ou aucuns d'iceux. Mais s'aucun est qui sçache qu'ils soient esdits païs il sera tenu d'iceux prendre & amener à la plus prochaine iustice, en requerant ayde de par le seigneur s'il est besoing. Et ou cas qu'il ne pourroit iceux prendre il sera tenu de le denoncer à la iustice du seigneur le plus tost qu'il pourra sur peine d'estre puny de semblable punition en corps & en biens, comme seroient & deuroient estre tels conspirateurs puniz. Et ou cas que en faisant leur deuoir ou vueillans faire, dont mort s'en pourroit ensuiuir, pour ceste cause riens ne leur en sera demandé du tout en tout. Item ordonnent que les murs du chastel de Thum les portes & les tours seront abbatues, & destruiétes tant en la ville comme en la montaigne & les fossez remplis. Et ne sera icelle ville plus réparée ne restaurée en temps aduenir de murs, de tours ne de fossez. Item pareillement sera fait de la ville Fossereuse de la ville & chastel de Commun tous les murs & portes seront abbatues & destruiétes, tant en la ville comme en la montaigne & les fossez remplis. Et ne sera icelle ville plus réparée. Et aussi tous les murs des autres garnisons & deffences estans sur la riuere de Sambre: tous les fossez seront remplis & plus ne seront villes ne chasteaux ne autres deffences ou retraict aux habitans desdictes villes, ne autres quelconques par quelque maniere n'en temps aduenir ne seront plus forteresses ne les fossez plus reffaiz. Item que les portes de Dinant, les murs & toutes les tours soient destruiétes & abbatues tant outre le fleuve de Meuse que dedans ladicte ville, & que par les habitans de ladicte ville ou par auant quelsconques ne pourront pardurablement estre reediffiez par quelque maniere. Item que ceux desdictes villes de Thum de Fosseux, Commun & Dinant ne autres quelconques des autres villes, citez & païs des maintenant pardurablement, ne pourront estre reediffiez par eux ne par autre faire refaire & reedifier les villes fermées ou deffences & garnisons en montant de Namur en Hainault entre les deux fleuves de Meuse & de Sambre. Item sera abbatue & destruiéte vne des portes de la ville de Tongres. C'est à sçauoir celle qui regarde vers la ville de Trecht avec quarante pieds de mur de chacun costé de ladicte porte, sans ce que iamais ce peust estre reediffié. Et avec ce ceux de ladicte ville de Tongres seront tenuz de remplir ou faire remplir à leurs despens leurs fossez par eux faits deuant ladicte ville, en laquelle ils assiegerent leursdits seigneurs. Item pource que à moult grans despens, cousts, & mises ils ont subiugué & mis en leur obeïssance le païs du Liege dessusdit. Et avec ce ont eu en leur païs grans pertes pour la cause de faire ladicte subiection comme il est assez notoire, ils veulent que sur les habitans de ladicte cité des villes & païs dessus nommez, il sera imposé, cueilly & leué vne ayde de la somme de deux cens & vingt mille escus d'or, à leuer icelle le plus tost que faire se pourra, eüe premierement consideration sur la faculté & richesse d'un chacun desdits habitans. Item pource que plusieurs ho-




staiges sont baillez en leurs mains à tenir leurs ordonnances faictes & à faire ils ordonnent que se aucuns desdits hostaiges trespassoient deuant ce que les choses dessusdictes soient accomplies & ordonnées : en ce cas ceux de la ville ou villes de laquelle où desquelles estoient les dessusdits hostaiges morts, ils seront tenuz de renuoyer & remettre personnes en tel nombre & en telle souffisance que celuy ou ceux qui sont morts auoient esté. Item ordonnent que quand les lettres seront faictes contenans les promesses & obligations à tenir toutes choses que par ceux seront ordonnées, l'Euesque de Liege son chapitre & tous les habitans qui sont soubsmis venront consentir & promettre & octroyer pour eux & pour les autres desdits pays, que ou cas que les choses ordonnées pour le temps aduenir ou aucunes d'icelles ne seront pas gardées, ains violées & trespasées, que les dessusdits Euesques de Liege ses successeurs Euesques ou esleuz de Liege, chapitre dessus nommé ou ceux desdictes villes, citez & pays autant de fois encherront & pour chacune fois que ce feront, en la peine de deux cens mille escus d'or du coing & forge du Roy de France, ou d'autres florins d'or de France à la valleur des dessusdits escus. C'est à sçauoir cinquante mille escus à l'Empereur, ou au Roy Rommain qui sera pour le temps. Au Roy de France cinquante mille, & chacun desdits Ducs ou à leurs successeurs Ducs & Comtes dessus nommez cinquante mille : à prendre & leuer lesdictes sommes sur iceux Liegeois, par l'apprehension de leurs biens & de leurs corps en quelques lieux qu'ils pourroient estre trouuez. Et auec ce consentiront, voudront & octroyeront ceux des pays du Liege dessusdits que fil aduenoit qu'on allast au contraire desdictes ordonnances ou d'aucunes d'icelles (comme dessus est dit) que des maintenant & adoncques l'Euesque ou esleu du Liege, l'Archeuesque de Coulongne qui sont pour le present ou seront pour le temps & chacun d'iceux puissent mettre entre dit generallyment esdictes citez, villes, & pays du Liege & des appartenances. En outre aussi tost que sera en la sainte Eglise de Dieu vn seul, vray, non douteux Pape, que semblablement par iceluy puissent estre mis en interdit, lequel ne deura estre osté ne réparé, que ainçois ne soit réparé ce qui aura esté fait au contraire desdictes ordonnances, & que lesdictes peines pecuniaires ne soient ainçois payées (comme dit est dessus) & fil aduenoit, qu'aucune partie des dessus nommez aucunes villes, ou aucuns particuliers d'iceux pays feissent au contraire desdictes ordonnances ou d'aucunes d'icelles, & apres que par iceux Ducs ou par l'un d'iceux ou par leurs successeurs, l'Euesque de Liege dessus nommé ou son successeur ou Euesque de Liege, ou Esleu ou son Vicair en son lieu, ceux de chapitre & les bourgeois de ladicte cité pour eux & pour tous les autres habitans desdits pays, auront esté requis & sommez de faire contraindre lesdits empescheurs & allans au contraire desdictes ordonnances, où d'aucunes d'icelles à reparer ce qu'ils auront forfait dedans vn mois prochain ensuiuant. Et que se iceux ne se desistoient ou reparoient le forfait dedans ledit mois ainsi passé apres ladicte sommation les dessus nommez encourroient es peines des amendes & des entredits par dessus declarez. Et neantmoins seront reparez & remis au premier estat & de ce qu'ils auront fait au contraire apres l'intention de nosdits seigneurs. Et ainsi ils ordonnent & establisent que dorenavant leurs sentences & ordonnances seront faictes entierement & mises en escript.



escript. Et en feront lettres faictes & seellées de leurs seaulx & baillées au seigneur Euesque du Liege, ou à son chapitre, vnes à la cité de Liege vnes & pareillement à chacune desdictes villes vnes : lesquels dessusdits Seigneurs & son chapitre, ceux desdictes citez & villes bailleront lettres chacune d'icelles ainsi qu'il appartient ausdits Ducs, c'est à sçauoir ledit Euesque & chapitre sous leurs grans seaulx, d'auoir eu & receu agreablement lesdictes ordonnances par lesquelles ils approuuent & promettent à tenir lesdictes ordonnances. Et ceux desdictes citez & villes pareillement bailleront leurs lettres seellées des grans seaulx de ladicte cité & de chacune desdictes villes, en eux obligeant à iceux Ducs es sommes contenues esdictes ordonnances. Item pource que plusieurs tant ecclesiastiques comme seculiers personnes nobles & non nobles ont baillé plusieurs requestes & supplications, contenans que pour l'occasion desdictes rebellions, lesquelles sont aduenues oudit pays ils ont eu plusieurs dommages declairez en leursdictes supplications, & pource que nosdits Seigneurs n'ont point encores peu y entendre pour le present, ils aduiseront ou feront aduiser sur les choses contenues en leursdictes supplications le plus tost qu'ils pourront. Toutes les choses dessus declairées & mises par escript furent prononcées par le commandement desdits Ducs & en leurs presences à l'Ille en la grand salle le vingtquatriesme iour du mois d'Octobre, l'an de grace mille quatre cens & huit.

*Comment le Roy de France fait grand assemblée à Paris pour auoir aduis comment on procederoit contre le Duc de Bourgongne pour la mort du Duc d'Orleans.*

CHAP. XLVIII.

 R est ainsi que durant le voyage que fait le Duc de Bourgongne ou pays de Liege (comme dessus est dit) s'assemblerent à Paris au mandement du Roy tresgrand nombre de Seigneurs. C'est à sçauoir Loys de Cecille, Charles Roy de Nauarre, le Duc de Bretagne, & le Duc de Bourbon avec plusieurs autres lesquels en la plus grand partie estoient aydans & fauorables avecques la Duchesse d'Orleans douairiere & ses enfans pour la mort de feu Loys Duc d'Orleans: & furent tenuz plusieurs conseils sur ceste matiere pour sçauoir comment le Roy se auroit à gouverner à l'encontre du Duc Iean de Bourgongne qui estoit principal fauteur de c'est homicide, comme en autres lieux est plus à plain declairé. Esquels conseils finalement fut conclud qu'on procederoit contre luy en toute rigueur selon les termes de iustice: & que fil ne vouloit obeir le Roy & tous ses vasaux & subiects se mettroient sus à tout la plus grand puissance qu'ils pourroient finer & aller contre luy pour le subiuguer & faire obeir & tous ses aydans: Et mesmement en ces propres iours au pourchats de ladicte Duchesse d'Orleans & de ses enfans. En la presence de la Roynie, du Duc d'Acquitaine & de tous les Princes là estans avec le conseil Royal, le Roy renonça & adnulla du tout les lettres de pardon qu'il auoit autresfois données & octroyées à iceluy Duc de Bourgongne pour la mort dessusdicté, & iugea icelles estre de nulle valeur: de laquelle renonciation la dessusdicté Duchesse pour elle & sesdits enfans demanda lettres lesquelles elle obtint. Et brief ensuiuant se partit de Paris avec luy sa fille femme au ieune Duc



d'Orleans & retourna à Blois . Et brief ensuiuant vindrent certaines nouuelles deuers le Roy & tous les seigneurs estans à Paris, comment le Duc de Bourgogne, auoit victorieusement desconfit les Liegeois & retournerent deuers le dessusdit Roy de France les ambassadeurs qu'il auoit enuoyez deuers luy, est à sçauoir messire Guichard Dauphin, & messire Guillaume de Tignouuille dont dessus est fait mention, lesquels auoient esté (comme dit est) à ceste besongne, & racompterent de point en point toute la maniere & conduicte qui auoit esté faite. Par lesquelles nouuelles plusieurs qui auoient esté par auant icelles fort enclins & voulentifs d'eux monstrier estre ennemis au dessusdit Duc de Bourgogne, commencerent à baisser les testes & à estre d'opinion contraire que parauant n'auoient esté doubans la constance, hardiesse & puissance qu'auoit lors iceluy Duc: lequel comme on leur disoit estoit reconforté à tous perils, fortunes & aduantures qui luy pouoient aduenir de resister contre tous ceux generallement qui se voudroient trouuer ses aduersaires. Et à verité dire brief ensuiuant toutes les conclusions qui parauant auoient esté prinſes contre luy furent mises à neant & derompues sans icelles poursuiure ne mettre à effect. Et fut ordonné que toutes gens de guerre se retrahiroient és pays dont ils estoient venus. Et adonc les ambassadeurs du Roy d'Angleterre qui estoient venuz à Paris deuers le Roy de France, pour impetrer trefues entre les deux Royaumes vn an entier lesquelles ils obtindrent, s'en retournerent dudit lieu de Paris par Amiens à Boulogne sur la mer & à Calais, ouquel chemin ouyrent de rechef nouuelles de la victoire qu'auoit eu ledit Duc de Bourgogne en Liege (comme dessus est dit) dont ils se donnerent grans merueilles & le nommerent Iean sans paour. Lequel Duc de Bourgogne pour ce temps estoit moult entencieux & curieux d'attirer de son party plusieurs nobles hommes & gens de guerre de tous ses pays affin de luy fortifier contre ses aduersaires, desquels il entendoit à auoir plusieurs. Et avec ce tint plusieurs conseils avec ses deux freres & ses deux serourges, c'est à sçauoir le Duc Guillaume & Iean de Bauiere & plusieurs autres ses feables & conseilliers, pour auoir aduis & deliberation comment il se auroit à conduire & gouverner sur les grans affaires qu'il auoit touchant ceste matiere. Esquels conseils conclud finablement de resister à toute puissance contre tous ceux qui nuyre luy voudroient reserué le Roy en sa personne, & le Duc d'Acquitaine. Et aussi luy promeirent ses deux freres & ses deux serourges dessusdits de luy faire toute l'ayde & assistance qu'ils pourroient tant de leurs subiects en reseruant seulement le Roy & ses enfans.

*Comment le dessusdit Roy de France, fut mené par les seigneurs de son sang à Tours en Touraine: & de la paix qui se feit en la ville de Chartres, & de la mort de la vesue d'Orleans.*

CHAP. XLIX.



L est verité qu'en ce temps Charles Roy de France, partant de Paris accompagné des Roys de Cecille, de Nauarre, de la Royne sa femme, du Duc d'Acquitaine, des Ducs de Berry & de Bourbon ses oncles & de plusieurs autres seigneurs du sang Royal avec grand nombre de gens d'armes, fut conduit & mené en la ville de Tours en Touraine, pour y là faire sa residence & demeure, laquelle departie moult despleut aux Bourgeois



geois & habitans de Paris, & en furent fort troublez & esmeuz, & tant qu'ils tendirent les chaines. Et avec ce enuoyerent hastiuement deuers le Duc de Bourgogne qui lors se tenoit à l'Isle, luy noncer comment le Roy dessusdit festoit departy & qu'ils entendoient que la plus grand partie des seigneurs qui l'emmenoient ne l'eussent pas bien pour agreable, lesquelles nouuelles ouyes d'iceluy Duc ne luy furent pas plaisantes doubtant que on n'esslongnast le Roy de la ville de Paris, pour luy faire contraire: pource que les seigneurs qui le gouernoient sentoient assez que les Parisiens aymoient tresfort iceluy Duc de Bourgogne & ne desiroient qu'autre eust le gouuernement du royaume ne du Roy sinon luy, par ce qu'ils entendoient & leur auoit on donné à entendre que ou cas qu'il auroit ledit gouuernement il mettroit ius par tout le royaume toutes gabelles, impositions, quatriesmes & autres subsides qui couroient ou preiudice du peuple. Lequel Duc eut premier conseil avec les Ducs de Brabant & Hollande & autres ses fealles remanda ses gens d'armes de Bourgogne qui ja estoient en la voye pour retourner en leur pays, & avecques plusieurs autres qu'il auoit fait assembler de tous ses pays. Si tira à Roye en Vermendois où il feit passer ses monstres. Et apres à tous ceux cheuauchant deuers Paris se logea le vingttroiesime iour de Nouembre en la ville de saint Denis en France, & ses gens ou plat pays & là enuiron. Et le lendemain cheuauchant vers ladicte ville de Paris, tous ses gens d'armes en tresbelle ordonnance de la bataille, issirent d'icelle & vindrent au deuant de luy bien deux mille combattans ou enuiron, lesquels le conduirent & accompagnerent treshonorablement iusques en son hostel d'Artois en Paris. Si crierent plusieurs Parisiens en sa venue en plusieurs quarrefours à haulte voix Noël, toutesfois en aucuns lieux il leur fut deffendu qu'ils ne criaissent plus ainsi pour la cause de l'enuie des seigneurs du sang royal. Et furent aucuns seruiteurs du Roy qui dirent à aucuns d'iceux criant Noël, vous luy pouez demonstrier & faire bonne chiere & lye, mais pour luy ne à sa venue vous ne deuez point ainsi crier: mais ce nonobstant luy fut de tous notables hommes & gens d'auctorité fait aussi grand honneur & reception comme ils eussent deu ou peu faire au Roy leur souuerain seigneur, & aucuns brieves iours ensuiuant le Duc Guillaume Comte de Hainault qui estoit venu audit lieu de Paris bien accompagné de gens sans armeures à la requeste & instance du Duc de Bourgogne alla audit lieu de Tours, accompagné des seigneurs de saint George, de Croÿ, de la Vieuille & d'Olhaz avec aucuns autres du conseil du Duc de Bourgogne sur intention de traicter sa paix enuers le Roy & les seigneurs là estans, lequel Comte de Hainault venu audit lieu de Tours fut par le Roy, la Royne & autres grans seigneurs treshonorablement receu & festoyé, car desia le mariage estoit fait de Jean Duc de Touraine second fils du Roy & de la fille dudit Duc. Et aussi il estoit prochain parét de ladicte Royne, apres laquelle reception en assez brieves iours ensuiuant iceluy Comte de Hainault. Et avec luy ceux qu'il y auoit menez ouurirēt les matieres en plain conseil, pour lesquelles ils estoient venus, c'est à sçauoir pour faire la paix du Duc de Bourgogne, cōme dit est dessus. Et apres q̄ plusieurs offres & traictez eurent esté mis auant deuant le grand conseil du Roy, finalement fut ordōné q̄ le Roy enuoyeroit certains ambassadeurs à Paris, instituez de sa volētē pour parler à iceluy Duc de Bourgogne. Et luy dire la fin par laquelle il pouoit re-



tourner en la grace du Roy, & furent à ce cōmis le Duc Loÿs de Bauiere frere de la Roïne, Montagu grand maistre d'hostel du Roy, & aucuns autres experts conseillers, lesquels avec le Duc Guillaume Comte de Hainault & les autres qui estoient venus avec luy retournez audit lieu de Paris, furēt iceux traictez, mōstrez & declarez au Duc de Bourgōgne. Et pource que du tout ne luy estoiet pas agreables & qu'il en auoit en souspeçon ledit Montagu, ne fut pas content de les passer & accorder par la maniere qu'ils luy auoient esté enuoyez. Et mesmement dit de sa personne plusieurs iniures & reproches audit Montagu, lequel les receut assez patiemment en luy excusant. Et depuis fut iceluy traicté aucunement corrigé & reporté audit lieu de Tours deuers le Roy. Et en fin fut accordé par la maniere que cy apres sera déclaré. Car durant le temps que lesdits traictez se pourparloient & deuāt qu'ils fussent par-accordez la Duchesse d'Orleans doüaigiere femme du Duc Loÿs d'Orleans deffunct, & fille à Galiasche Duc de Milan, trespassa en la ville de Blois, comme on dit, de courroux & de desplaisance de ce qu'elle ne pouoit auoir iustice de la mort de son feu bon seigneur & mary, enuers le Roy frere dudit deffunct ne son conseil contre le Duc Jean de Bourgongne. De laquelle mort iceluy Duc fut assez ioyeux, pourtant qu'icelle Duchesse continuoit moult asprement & diligemment la poursuite à l'encontre de luy. Et fut enterré son cueur à Paris avec le Duc d'Orleās son mary, & son corps à Blois en l'Eglise des chanoynes. Apres la mort de laq̃lle Charles son premier fils demoura franchement Duc d'Orleans & de Valois, Comte de Blois & de Beaumont seigneur de Chanchy & d'Ach avecques plusieurs autres seigneuries, & Philippe le second fils fut Comte de Vertus & Jean qui estoit maininé fut nommé Comte d'Angoulesme. Lesquels trois freres dessusdits avecques vne sœur qu'ils auoient demourerēt moult ieune orphelins de pere & de mere, toutesfois ils auoient esté iusques à ce temps moult notablement conduits & endoctrinez. Mais à verité dire tant pour la mort du dessusdit Duc d'Orleans leur pere & de la Duchesse leur mere, ils affoiblirent grandement de conseil & d'ayde. Et par especial furent plusieurs seigneurs tant du sang Royal comme du grand conseil du Roy, lesquels ne furent pas si obstinez n'enclins à poursuiuir contre le Duc de Bourgongne qu'ils estoient parauant. Et ce apparut assez clerement en assez brief temps ensuiuant tant par les traictez qui se feirent entre iceux enfans d'Orleans & ledit Duc, comme autrement : car nonobstant qu'iceux traictez ne fussent pas du tout à la plaissance du Duc de Bourgongne comme dit est deuāt, neantmoins ils furent corrigez par telle maniere, qu'icelles parties vindrent à conclusion selon la teneur & les poincts cy apres declarez. Premier fut ordonné par le Roy & son grand conseil que ledit Duc de Bourgongne se partiroit de Paris à tout ses gens d'armes, & retourneroit en son paÿs iusques à certain iour, c'est à sçauoir le premier mercredy de Feurier qu'il retourneroit deuers le Roy en la ville de Chartres accompagné tant seulement de cent gentils-hommes d'armes, & les enfans d'Orleans en ameneroient cinquante. Auquel iour fut ordonné que le Duc Guillaume Comte de Hainault auroit quatre cens hommes d'armes de par le Roy pour la seurté. En outre fut ordonné qu'iceluy Duc de Bourgongne quand il viendra deuant le Roy aura vn homme de son conseil qui dira les parolles que deuroit dire ledit Duc, & pour icelles confermer iceluy Duc respondra. Nous le  
voulons



voulons ainsi & accordons, & apres selon la teneur dudit traicté le Roy dira audit Duc de Bourgongne. Nous voulons que le Comte de Vertus nostre nepueu ait l'une de voz filles à mariage. Et par ce traicté le Duc de Bourgongne luy doit assigner trois mille liures parisis de rente, & pour vñe fois doit payer cent & cinquante mille francs d'or. Apres ce traicté accordé, le Duc Guillaume se partit de Paris & alla en Hainault & bien peu apres le Duc de Bourgongne donna congé à ses gens d'armes, & se partit de Paris pour aller en la ville de l'Isle, auquel lieu il manda le Duc de Brabant son frere, le Duc Guillaume & l'Euesque de Liege ses ferourges avec plusieurs autres grans seigneurs. Et estoit lors grand discord entre ledit Duc de Brabant & le Duc Guillaume: pourtant que le pere d'iceluy Duc Guillaume auoit emprunté ou temps passé à la Duchesse de Brabant deffuncte cent cinquante mille Florins, pour mener guerre à aucuns qui luy auoient esté rebelles ou païs de Hollande, Laquelle somme ledit Duc de Brabant disoit à luy appartenir. Et pour ceste cause par l'enhort de ses Brabançons auoit prins vn chastel nommé Henzedaig, seant entre Brabant & Hollande: Lequel discord ledit Duc de Bourgongne appaisa entre les Princes dessusdits & meit grand peine à ce faire, affin que d'eux il se peut mieulx ayder és affaires qu'il auoit moult grans. Apres lesquels traictez finez & qu'ils furent departis l'un d'avec l'autre, ledit Duc Guillaume assembla en Hainault selon l'ordonnance du Roy cccc. bacinets & autant d'archiers, entre lesquels estoient principaux les Comtes de Namur, de Conuersan & de Saline. Le Duc de Bourgongne, pareillement, le Comte de Ponthieure son beau fils en sa compaignie le lendemain du iour des cendres vindrent au giste à Bapaumes. Et de là alla à Paris ensemble le Duc Guillaume & autres dessus nommez le Comte de S. Pol, le Comte de Vvaudemont & plusieurs autres grans seigneurs. Apres ce, le samedi second iour de Mars vindrent tous ensemble en la ville de Gallardon seant à quatre lieues pres de Chartres. Le mercredi ensuiuant Guillaume Duc de Hollande alla à tout ses quatre cens bacinets par deuers le Roy qui pour lors estoit en ladicte ville de Chartres. Le samedi ensuiuant ledit Duc de Bourgongne se partit de Gallardon pour aller deuers le Roy accompagné de six cens hommes d'armes. Et quand il vint assez pres de Chartres il enuoya tous ses gens d'armes en ladicte ville, excepté cent cheuaucheurs qu'il retint en sa compaignie selon le traicté fait par auant, & entra en Chartres environ dix heures deuant midy cheuauchât vers l'Eglise iusques au cloistre des chanoines, auquel il se logea. Or est ainsi que ledit Duc d'Orleans & le Comte de Vertus son frere accompagnez tant seulement de cinquante cheuaucheurs selon le contenu du traicté dessusdit entrerent en l'Eglise nostre Dame de Chartres, avec le Roy leur oncle, la Royne, le Duc d'Acquitaine leur fils, & plusieurs autres Princes. En laquelle eglise pour icelles besongnes accōplir fut fait vn sollier daïsseellées. Et là estoit le Roy assis empres le Crucifix: Et entour luy estoient assistés la Royne, le Dauphin, & sa femme fille au Duc de Bourgongne, les Roys de Cecille, de Nauarre, les Ducs de Berry, de Bourbon, le Cardinal de Bar, le Marquis du Pont son frere, l'Archeuesque de Sens, l'Euesque dudit lieu de Chartres, & aucuns autres Comtes & Prelats estoient derriere le Roy avec lesdits d'Orleans. Et à l'entrée de l'Eglise estoient ordonnez de par le Roy plusieurs hommes d'armes estans comme en bataille. Et fut fait ledit sollier pourtāt que le peu-



ple là venant ne trauaillast point lefdits seigneurs, & aussi, affin qu'on ne peut veoir appertement ce qu'on deuoit là besongner, tâtost apres ledit Duc de Bourgongne venant deuers le Roy, prestement tous se leuerent à l'encontre de luy les seigneurs deuantdits reserué le Roy, la Roynie & le Daulphin, incontinent ledit Duc & le seigneur d'Ollehaing son aduocat approchât le Roy s'agenouillerent. Et là par ledit d'Ollehaing furent dictes au Roy les parolles qui s'ensuiuent. Sire voicy monseigneur le Duc de Bourgongne vostre seruiteur & cousin venu par deuers vous, pource qu'on luy a dit que vous estiez indigné sur luy pour le fait qu'il a commis & fait faire en la personne de monseigneur d'Orleans vostre frere pour le bien de vostre Royaume & de vostre personne, cōme il est prest de vous dire & faire veritablement sçauoir quand il vous plaira. Et pourtant mondit seigneur vous prie tant & si humblement comme il peult, qu'il vous plaise à oster vostre ire & indignation de vostre cueur, & le tenir en vostre bonne grace. Apres ces choses dictes par ledit seigneur de d'Ollehaing iceluy Duc de Bourgongne dit de sa bouche au Roy. Sire de ce ie vous prie. Et prestement apres ces parolles le Duc de Berry dit au Duc de Bourgongne, ainçois que le Roy luy respondit oncques mot qu'il se partit vn peu arriere. Et ainsi il feit, de rechief ledit Duc de Berry s'agenouilla deuant la Roynie & luy dit en brief d'aucunes parolles en bas. Et prestement iceluy son fils le Daulphin & les autres deux Roys de Cecille & de Nauarre & le Duc de Berry s'agenouillerent deuant le Roy en disant. Sire nous vous priōs qu'il vous plaise à passer la priere & requeste de vostre cousin le Duc de Bourgongne, ausquels le Roy respondit. Nous le voulons & accordons pour l'amour de vous. Adoncques ledit Duc de Bourgongne approcha le Roy lequel luy dit. Beau cousin nous vous accordons vostre requeste & vous pardonnons tout. Apres ledit Duc de Bourgongne & ledit d'Ollehaing vindrent deuers les deux enfans d'Orleans dessus nommez estât derriere le Roy moult fort plorans, ausquels dit le seigneur de d'Ollehaing. Messeigneurs voicy le Duc de Bourgongne qui vous prie qu'il vous plaise à oster de voz cueurs, se vous auez aucune vengeance ou hayne cōtre luy pour le fait, qui fut faict & perpetré en la personne de monseigneur d'Orleans vostre pere, & que doresnauant vous demourez & foyez bons amis ensemble. Apres lesquelles parolles dictes ledit Duc de Bourgongne parla de sa bouche, disant. Et de ce ie vous en prie. Iceux riens ne respondirent. Adonc leur commanda le Roy leur oncle qu'ils accordassent la requeste de son beau cousin de Bourgongne, & ils respondirent. Sire puis qu'il vous plaist à commander, nous luy accorderons sa requeste & luy pardōnons toute la malveillance qu'auions contre luy, car en riens ne voulons desobeir à chose qui soit à vostre plaisir. Et là tantost par le commandement du Roy le Cardinal de Bar apporta vn messel ouuert, sur lequel iurerent les deux parties, c'est à sçauoir les deux enfans d'Orleans d'une part, & le Duc de Bourgongne d'autre part, sur les sainctes Euangiles, & icelles attouchât promeirent tenir perdurablement & garder ferme paix & entiere l'une enuers l'autre, sans en riens aller au cōtraire en appert n'en couuert. Et là fut dit par la bouche du Roy à icelles parties. Nous voulons que desormais en auant vous demourez & foyez bons amis ensemble. Et vous deffendons destroitement par nostre auctōrité royalle que vous ne faciez ne pourchassiez dommage ne grief l'un à l'autre, ne aussi autres quelcōques personnes



sonnes qui à vous deux ont esté fauorables, porté & donné conseil ou ayde. Et ne les hayez ne monstrez aucune hayne sur tant que vous pourriez mesprendre & forfaire enuers nous. Exceptez les faisant l'homicide deuãtdit, qui à tousiours sont & seront bannis de nostre Royaume. Apres les parolles du Roy dictes en la forme que vous oyez, iceux princes promeirent & iurerent feablement & veritablement entretenir ledit traicté. Et lors le Duc de Bourgongne alla baïser sa fille femme du Duc d'Acquitaine Daulphin. Et enuiron vne heure apres que lesdictes besongnes furent traictées ainsi que dit est, iceluy Duc de Bourgongne print congé au Roy & à la Royne & à tous les seigneurs là estās presens. Et puis se partit de ladicte ville de Chartres, & s'en alla disner à Gallardon: & furent plusieurs là estans trefioyeux & de la chose ainsi faicte: & les aucuns en furent desplaisans & murmurèrent, disant que doresnauant on auoit bon marché de meürdrir & tuer les seigneurs du sang Royal, puis qu'on estoit quitte ainsi sans en faire autre reparation. En outre les deux enfans dessus nommez & tous leurs gens, apres qu'ils eürēt prins congé au Roy, à la Royne, au Daulphin & aux autres seigneurs s'en retournerent à Blois dõt ils estoient venus, & n'estoient pas bien contents ne aussi ceux de leur conseil d'icelle paix. Le Marquis du Pont fils au Duc de Bar cousin au Duc de Bourgongne qui par deuant ce iour de luy n'estoit point aymé pour la cause du Duc d'Orleans trespasé, vint apres luy audit lieu de Gallardon, & là disnerent en grand concorde & vnion ensemble comme on pouoit veoir. Enuiron deux heures apres midy le Duc Guillaume, le Comte de S. Pol & aucuns autres grans seigneurs vindrent deuers ledit Duc de Bourgongne à son logis de Gallardon. Et puis tous ensemble retournerent deuers Paris. En apres le Roy, la Royne & leur fils le Daulphin, les Roys Princes & Cardinaulx dessus nommez vindrent audit lieu de Paris le iour de my-karesme. A l'encontre desquels vindrēt au dehors d'icelle ville, les Ducs de Bourgongne & de Hollande, le Cardinal de Bordeaux qui pour ce tēps estoit à Paris pour aller au cōcille à Pise. Et pareillement ceux de Paris iusques au nōbre de deux cens mille tant hommes comme femmes vindrent à l'encontre de leur Roy, crians en l'entrée de la porte Noël & menant trefgrand ioye pour le retour du Roy en Paris, & avecques ce pour la paix faicte, comme dit est, sur la mort de monseigneur le Duc d'Orleans: Et leur sembloit que Dieu y auoit grandement estendu sa grace & sa misericorde, d'auoir consenty qu'une si grande besongne & apparence de guerre estoit si tost estaincte & appaisée: mais ils n'auoient pas regard ne cōsideration à ce que depuis il en aduint. Toutesfois la plus grand partie des Parisiens estoient obtinez & du tout affectez avecques ledit Duc de Bourgongne & esperoient que par ses moyens toutes tailles & autres subfides seroient mises ius. Mais ils ne veoient pas clerement tous les meschiefs & aduersitez qui depuis en aduindrent audit Royaume & à eux mesmes pour les besongnes dessusdictes, car en assez brief terme ensuiuant la guerre s'esmeut contre icelles parties trefcruelle comme cy apres sera declairé.

*Comment la Royne d'Espsaigne mourut durant le Concille de Pise qui lors se tenoit, & du mariage du Roy de Dannemarch, de Noruege & de Suede.*



**E**N cest an mourut la Royne d'Espaigne, sœur à Henry Roy d'Angleterre mere du ieune Roy d'Espaigne, & de la Royne de Portugal. Apres la mort de laquelle les Espaignols congierent tous les Anglois hommes & femmes seruiteurs de ladicte Royne, & retournerent ou païs d'Angleterre tristes & ennuyez de cueur. En autre partie en ceste mesme saison tresgrand nombre de Prelats, Archeuesques, Euesques & Abbez se partirent de plusieurs & diuers lieux de Chrestienté pour aller au Concile de Pise, sur intention de mettre paix & vnion vniuerselle en l'Eglise, laquelle par tres long temps si auoit esté en grand peruersité & diuision, dont les Princes de plusieurs Royaumes, & aussi les Prelats & autres gens d'auctorité estoient desplaisans. En apres en ce mesme temps Henry Roy de Dannemarche de Noruege & de Suede, print à femme la fille de Henry d'Angleterre, lesquels Royaumes auoient esté mis en la main du dessusdit Roy de Dannemarche par la Royne d'iceux païs, laquelle se desmeit de sa propre volenté du tout de l'honneur & proffit d'iceux Royaumes, en reuestant icelux Roy Henry.

*Pour l'an mille cccc. & ix.*

*Comment le Roy de France en ce temps fut fort oppressé de maladie, & des nopces du Comte de Neuers à la damoiselle de Conchy, & de la guerre d'Amé de Viry Sauoyen.*

CHAP. LI.

**A**V commencement de cest an Charles Roy de France fut fort oppressé de sa maladie accoustumée. Et pource les Roys de Cecille & de Nauarre & le Duc de Berry, apres ce qu'ils eurent pourueu & avec eux le Duc de Bourgogne à l'estat & garde du Roy, ils se departirent de Paris & s'en allerent chacun en son païs pour iceux visiter. Et pareillement se partit iceluy Duc de Bourgogne, & s'en alla aux nopces de Philippe Comte de Neuers son frere, lequel print à femme la damoiselle de Conchy fille de messire Enguerran de Conchy, iadis seigneur & Comte de Soissons & niepce de par la mere du Duc de Lorraine, & du Comte de Vvaudemont, lesquelles nopces se feirent en la ville de Soissons. Et y estoient la Duchesse de Lorraine, la Comtesse de Vvaudemont venues de leur païs, pour accompagner & honorer la dame de Conchy & sa fille. Si furent ces mariages faits, & la feste solennisée moult solennellement par vn iour S. George, & dura trois iours ensuiuant. Et apres iceux iours passez, ledit Duc de Bourgogne se partit & s'en alla en son païs de Bourgogne, le Comte de Ponthieure, son beau fils en sa compagnie. Et brief ensuiuant ledit Comte de Neuers avecques ladicte Duchesse & Comtesse de Vvaudemont emmena sa femme en sa Comté de Rethel, où elle fut receüe tres ioyeusement. Durant lequel temps le Duc de Bourbon fut deffié d'Amé de Viry Sauoyen lequel estoit pauvre saquement au regard dudit Duc: mais nonobstant celuy feit plusieurs dommages par feu & par espée ou païs de Bresse & de Beaujollois, pour lesquels dōmages iceluy Duc le print en tresgrād indignation & assembla tresgrand nōbre de gens d'armes & de gēs de traict pour le punir & subiuguer. Si enuoya deuāt le Côte de Cleremont son fils, & assez tost apres le suiuit. En sa compagnie estoient les Comtes de la Marche & de Vendosme, le seigneur d'Albret



d'Albret Connestable de France, Loÿs de Bauiere frere de la Royne, Montagu grand maistre de l'hostel du Roy, le seigneur de la Heuse & plusieurs autres grâs seigneurs qui tous ensemble tirerent ou paÿs de Beaujollois à tout tresgrâd puissance: mais deuant la venue dudit Duc de Bourbon, iceluy Amé de Viry son aduersaire fut aduerty de ladicte puissance qui venoit contre luy, & n'osa attendre la venue: car il n'eut pas fiance de pouuoir tenir les forteresses qu'il auoit princes. Et pourtant se departit & s'en alla en vne ville nommée le Bourg en Bresse appartenant au Comte de Sauoye son seigneur. Lequel Côte de Sauoye ne le voulut pas garantir contre ledit Duc de Bourbon son grâd oncle: ainçois en fait present à iceluy Duc par telle condition que ledit Amé luy amenderoit à son pouuoir, ce qu'il luy auoit meffaiât, & se rendroit en ses prisons tant qu'il seroit content de tous les frais & dommages qu'il auoit euz à l'occasion deuantdicte sauf qu'il ne luy feroit desplaisir en corps n'en membres: & ainsi grandement ledit Duc de Bourbon le receut, & remercia sondit nepueu, & pour ceste cause vne dissensiõ qui estoit esmeüe entre eux partie fut appaisée: car ledit Duc de Sauoye disoit que son grand oncle luy deuoit faire hommage à la cause de sa terre de Beaujollois, lequel il ne vouloit pas faire: mais la question fut mise par eux deux ensemble en la volenté & ordonnance du Duc de Berry. Apres lesquelles besongnes conclues ledit Duc de Bourbon s'en retourna en France, & donna congé à tous ses gens d'armes. Et depuis par certain moyen que ledit Viry eut avec ledit Duc il fut deliuré. A laquelle assemblée & pour y aller Vvalleran Comte de S. Pol, meit sus tresgrosse armée: mais en passant parmy Paris luy fut ordonné de par le Roy qu'il n'allast non plus auant, mais s'en retournaît es frontieres de Boulenois où il estoit especiallement commis de par le Roy.

*Comment deux champs de bataille furent promez lors à faire à Paris, present le Roy.  
De l'Archeuesque de Reims qui fut mort, & du Concile de Pise.*

## CHAP. LII.

**L**Tem enuiron l'Ascension, Charles Roy de France qui auoit esté longue espace malade, reuint en santé. Et tantost apres les deux Ducs de Berry, de Bourgongne & de Bourbon retournerent à Paris, & plusieurs autres grans seigneurs. Ens ouquel temps furēt faits deux chāps de bataille, en la place derriere S. Martin des Chāmps, present le Roy & les seigneurs dessusdits, est à sçauoir le premier d'un gentil-homme cheualier Breton, nommé messire Guillaume Batailler, contre un Anglois nommé messire Jean Carmien: & fut pour cause de foy mentie l'un à l'autre. Et apres qu'ils furent mis ensemble, & que Monioye Roy d'Armes eût fait & publié les cris & deffences accoustumées. Et aussi qu'il eut declairé qu'ils feissent leur deuoir, ledit messire Guillaume qui estoit appellant, issit premier de son pauillon, & commēça à marcher moult fierement contre son aduersaire, lequel pareillement vint contre luy. Et quand ils eurent iecté leurs lāces l'un contre l'autre sans eux ataindre, ils commencerent de leurs espées. Et en ce faisant fut ledit Anglois un petit nauré par deffoubs ses lames, & tantost le Roy les fait cesser, & depuis furent remenez à leur hostels treshonorablement, & issirent du champ aussi tost l'un comme l'autre. L'autre champ si fut du Seneschal de Hainault à l'encontre de messire Jean



de Cornouaille Anglois cheualier de grand renom, lequel auoit lors espouſé la ſœur du Roy d'Angleterre, & eſtoient lors icelles armes entreprinſes à faire par iceux deux cheualiers deuant le Duc de Bourgogne à l'Isle, tant ſeulement à monſtrer leur proeſſe à courre certains coups de lance l'un contre l'autre. Et auſſi à faire aucuns coups de haches & d'eſpées: mais quand ledit Duc de Bourgogne eut fait preparer le champ où ce ſe deuoit accomplir, les deux champions deſſuſdits furent mandez à aller à Paris deuers le Roy pour parfaire leur entreprinſe. Et là apres les ordonnances faiçtes & le iour venu ledit Cornouaille entra premier au champ moult pompeuſement cheuauchât ſon deſtrier, iuſques à tant qu'il vint deuant le Roy, lequel il enclina & ſalua treſhumblement & eſtoient apres luy ſix petits paiges ſur autres ſix deſtriers, deſquels les deux plus prochains de luy eſtoient couuers d'hermines, & les autres quatre enſuiuant auoient couuertes de drap d'or. Et apres ce qu'il fut entré és lices, les paiges deſſuſdits ſe partirent du champ. Et brief enſuiuant vint ledit Senefchal accompaigné du Duc Anthoine de Brabant & de Philippe Comte de Neuers freres eſtans à pied & tenans le frain de ſon cheual, l'un à dextre & l'autre à ſeſtre. Et le Comte de Clermont portoit ſa hache & le Comte de Ponthieure portoit ſa lance. Et apres ce qu'il fut entré ou champ, & qu'il eut fait la reuerence au Roy comme auoit fait ledit Cornouaille, ils ſe preparerent tous deux pour aller iouſter de fer de lance l'un contre l'autre: mais deuant qu'ils ſ'eſmeuſſent à courre, fut crié de par le Roy Charles, qu'ils ceſſaſſent & n'allaaſſent plus auant en faiſant icelles armes: pour lequel cry ils furent tous deux treſdeplaiſans, ſi retournerēt tous deux en leurs hoſtels. Et de rechief fut crié & deſſendu de par le Roy qu'ils ceſſaſſent & n'allaaſſent plus auant en faiſant icelles armes, & que nuls ſur peine capital doresnauant en tout ſon Royaume n'appellaſt autrui en champ ſans cauſe raiſonnable. Et depuis quād le Roy eut grādemēt feſtoyé & hōnoré à ſa court les deux cheualiers deſſuſdits, ils ſe departirent & ſ'en allerent eux deux cōme on diſoit en Angleterre, ſur intētion de poursuiuir & accōplir leurs armes. Durāt lequel tēps, le Cardinal de Bar ſils au Duc de Bar & Guy de Roye Archeueſque de Reims, avec eux maĩſtre Pierre d'Ailly Eueſque de Cambray, & pluſieurs autres Prelats & notables gens d'Egliſe allans au Concille general qui lors ſe tenoit à Piſe, furent logez en vne ville ſur la mer nōmée Voutre, ſeant à quatre lieuës de Gennes ou enuiron, en laquelle ville, le Mareſchal dudit Archeueſque qui eut noiſe & contens contre vn autre Mareſchal de ladiçte ville, pour le ſalaire d'un cheual ferrer, & tant multiplia le diſcord que le Mareſchal de l'Archeueſque tua iceluy de la ville, & preſtement il ſ'en fuit à ſauueté en l'hoſtel de ſon maĩſtre. Auquel lieu ceux de ladiçte ville en grand nōbre ſoubdainement tous eſmeuz vindrent pour venger ledit Mareſchal occis. Et quand ledit Archeueſque ouyt la noiſe, luy eſtant en grand ennuy pour ladiçte beſongne deſcendit de ſa chambre en parlant à eux doucement & promettant que preſtement il feroit amender ladiçte offence à leur voutenté. Et pour iceux mieuz appaiſer meit ſondit Mareſchal en la main du iuge de ladiçte ville, lequel eſtoit lieutenant de Bouciquault Mareſchal de France, adonques gouuerneur de Gennes: mais ce riens n'y valut. Car ainſi qu'iceluy Archeueſque parloit à eux hors de l'huyſ de ſon hoſtel, l'un d'iceux luy lança vn iaelot parmy le corps droit au cueur, ſi douloureuſement qu'il cheut là  
preſentement



presentement tout mort sans parler depuis aucune parole : dont ce fut pitieuse chose : car il estoit tresnoble Prelat bien conditionné & de noble lignée. Et apres que ce fut fait ne leur souffrist pas à tant : Ainçois incontinent meirent à mort le iuge dessusdit de leur ville & ledit Marechal. Et avec ce vouloient enforcer l'hostel dudit Cardinal de Bar où la plus grand partie des autres festoient retraits pour tout mettre à mort. Toutesfois ils furent rappaisez aucunement par aucuns des plus notables d'icelle, & tant fut traicté qu'en fin ledit Cardinal leur bailla pardon de tout ce qu'ils auoient fait à l'encontre de luy, & fut à ce conseillé par ses gens pour doubte qu'ils ne fussent là tous destruits, & aussi on ne luy dit point la mort de l'Archeuesque iusques à tant qu'il fut bien deux lieues arriere d'icelle ville, pour laquelle mort quand il fut venu à sa cognoissance, en fut tant desplaisant & enuyé au cueur qu'à grand peine se pouuoit tenir sur sa mulle. Neantmoins ses gens le feirent hastier le plus qu'ils peurent : car ils estoient en grand doubte de leurs vies pour l'exemple qu'ils auoient veu, & aussi qu'ils venoient de plusieurs lieux descendre gens, & par les signes qu'ils ont ou pays accoustumé de faire quand il y a effroy en ville, tant par clochettes qu'ils sonnent qu'autrement. Lequel signe estoit ja tout publicque auant le pays, voyans de plusieurs lieux descendre payfans des montaignes pour courre apres eux. Mais quand ils vindrent à vne lieue de Gennes le Marechal Bouciquault vint au deuant dudit Cardinal à tresbelle compaignie, lequel Cardinal feit à luy tresgrand plainte de l'outraige qui auoit esté fait contre ses gens par ceux de la ville de Voutre, en luy requerant que par iustice il y voulsist pourueoir, lequel Bouciquault feit response qu'il en feroit si bonne iustice que tous autres y deuroient prendre exemple. Et apres emmena iceluy Cardinal dedans la ville de Gennes ou il fut grâdement receu tant des gens d'Eglise comme des bourgeois, & en ce mesme iour fut porté le corps dudit Archeuesque de Reims oudit lieu de Gennes, & là fut enterré honnorablement, & son seruice fait dedans la maistresse Eglise de la dessusdicte ville. Et brief ensuiuant fut prinse tresgrand punition par le Marechal Bouciquault de tous ceux qu'on peut prendre & apprehender. Et aussi de leurs complices qui auoient fait ceste cruauté, & furent mis à mort & iusticiez par diuerses manieres, & avecques ce furent leurs maisons desmolliées & abbatues de fons en comble : affin de donner exemple aux autres que iamais ne feissent si cruel & horrible meurdre. Et adoncques le Cardinal de Bar à tout ses gens se partit de Gennes & alla par plusieurs iournées iusques en la ville de Pise. Auquel lieu estoient assemblez tresgrand multitude de Cardinaulx de l'obedience des deux Papes, des maistres en Theologie, de graduez tant en Decret comme en autres sciences les ambassadeurs de diuers Royaumes & pays, & tresgrand nombre de Prelats de toutes les parties de Chrestienté. Lesquels apres que plusieurs conseils eurent esté tenuz sur la diuision de l'Eglise vniuerselle vindrent en fin en vne conclusion. Et tous ensemble & d'une mesme volenté condamnerent les deux contendans à la Papauté comme hereticques scismatiques obstinez en mal : troubleurs de la paix nostre mere sainte Eglise. Ceste condamnation cy fut faicte presens vingt & quatre Cardinaulx es portes de la cité de Pise en la presence de tout le peuple, & le quinzième iour de Iuing l'an dessusdit, les Cardinaulx dessus nommez inuocans & appellans la grace du saint



Esprit entrèrent en conclaue & là furent demourans iusques au seiziesme iour dudit mois qu'ils vindrent à conclusion. Et esleurent Pierre de Caudie natif de Grece, de l'ordre des freres Mineurs, docteur en Theologie fait à Paris, Archeuesque de Millan, & Cardinal, en vray & souuerain Euesque Catholique de nostre mere sainte Eglise, lequel en consacrant appellerent Pape Alexandre cinquiesme de ce nom. O Dieu tout puissant comme grand ioye & liesse fut adoncques pour la tresgrand prouision de ta grace. Car à peine pourroit on racompter la grand voix & esbaudissement que faisoient ceux qui venbient, & estoient entour ladicte cité par l'espace d'une lieüe ou enuiron. Mais que pourrons nous dire de la cité de Paris? Certainement quand ils ouÿrent les nouuelles de ce, le huitiesme iour de Iuillet ils furent remplis de si grand ioye qu'ils ne cessoient de crier nuit & iour parmy les places & par les rues à haulte voix, vieue Alexandre cinquiesme nostre Pape, beuans & mangeans ensemble par maniere de grand solennité. Et apres les solennitez, procez & ordonnances dudit Concille peuuent apparoir par plusieurs lettres cy apres escrites. Et premierement par les lettres de l'Abbé de S. Maxence enuoyées à l'Euesque de Poictiers desquelles la teneur s'ensuit.

REVEREND pere & mon redoubté seigneur humble recommandation premise, moy saichant que vostre reuerente paternité desire aucunemēt estre informée du proces & ordonnance de ce saint Concile general, qui pour le present est tenu en la cité de Pise & des nouvelles là estans. Pourquoy i'ay deliberé de notifier par lettres à vostre dicte paternité les choses qui s'ensuiuent. Et premieremēt le vingtcinquiesme iour de Mars, tous les seigneurs Cardinaulx de l'un & l'autre college: & tous les Prelats qui pour lors estoient à Pise, assemblerent en l'Eglise saint Martin qui est outre la riuierē vers les parties de Florence & de ladicte Eglise tous vestus d'aubes & de chappes & aornez de mittres, feirent procession grāde & notable iusques à l'Eglise cathedrale, lesquelles Eglises sont autant loing l'une de l'autre qu'il y a de l'Eglise nostre Dame de Paris iusques à l'Eglise saint Martin des champs. En laquelle eglise cathedrale est celebré continuellement ledit Concile general. Et au iour dessusdit fut la messe celebrée moult solennellement. Et feit le sermon monseigneur le Cardinal de Millan de l'ordre des freres Mineurs, qui est un grand Theologien. Et apres la solennité faicte, la journée fut continuée, le lendemain pour commencer ledit Concile. Quel iour furent appelez les deux contendans de la Papalité aux portes de ladicte Eglise par deux Cardinaulx: mais nul ne comparut ne aucuns pour eux.

Item en ce iour fut faicte continuation iusques au penultime de Mars. Et en ce iour furent euocquez lesdits contendans comme dessus & nul ne comparut. Et pource ledit Concile general, lesdits contendans legitiment requis, appelez, & prouocquez en cause de schisme & de la foy, non venans, ne comparans par eux ne par autres oudit Concile general ne faisans satisfaction dedans, le terme ordonné & estably, jaçoit-ce chose qu'ils fussent attenduz apres le terme par deux sieges, reputa, iugea & declaira en ladicte cause de schisme & de foy cōtumax, & les mit en contumasse & default. Et ordonna ledit Concile à proceder en outre contre iceux à l'autre siege ordonné le lundy apres la Quasi modō quinziesme iour d'Auril, lequel temps pendāt messeigneurs celebrerent ensemble



ble l'office de la sainte sepmaine peneuse . Et le iour du saint Vendredy monseigneur le Cardinal des Vrsins celebra l'office diuin en l'Eglise saint Martin. Et là prescha vn maistre en Theologie seculier de Boulongne la Grasse, moult notablement. . Item le iour de Pasques fus present à la solennité de messeigneurs les Cardinaulx. Item en la sepmaine ensuiuant s'assemblerent lesdits Cardinaulx en Concile, aucunesfois tous seuls, aucunesfois appellans les Prelats qui là estoient presens, pour deliberer des choses à faire, & moult agreablement & honnestement se maintenoient entre eux & entre tous autres Prelats. Item en celle sepmaine arriuerent à Pise les ambassadeurs de Ruppert Roy des Rômaines.

Item le dimenche de Quasimodo vn Euesque d'Italie celebra messe deuant les Cardinaulx. Là feit le sermon vn Cordelier de Languedoc maistre en Theologie & prescha moult solennellement à la louenge des seigneurs Cardinaulx du Roy de France, & des Prelats querans la paix de l'Eglise, & tres durement contre les deux contendans: en reputât iceux schismaticques & hereticques, traistres ennemis de Dieu & de l'Eglise, faisans plusieurs conclusions, & receut son theume, *Iesus dixit pax vobis*, lequel il demena moult bien. Item le lundy ensuiuant, lesdits Cardinaulx, tous les prelats, ambassadeurs, & procureurs là estans presens, iurerent & promeirent tenir ledit Concile general, qui est moult solennellement, continuellement celebré. Car premierement la messe chantée, & là sont faictes plusieurs oraisons, & la grande letanie chantée. Auquel tousdis sont presens lesdits Cardinaulx & tous les Prelats vestus d'aubbes, de chappes, & de mittres, tant comme dure la celebration dudit Concile, laquelle est deuote & honneste à regarder. Item en ce mesme iour oudit Concile fut donnée audience ausdits ambassadeurs dudit Ruppert Roy des Rommains, & l'Euesque de Verdenne de la prouince de Mayence, de par le Roy Ruppert fauorable à la partie d'iceluy Gregoire, en tant qu'il pouuoit commença son theume. *Pax vobis*. Et proposa moult de mauuaises choses pour rompre & troubler ledit Concile general pour l'intention de son maistre & d'iceluy faulx Pape Gregoire. Et estoient avec iceluy Euesque, vn Archeuesque d'esträge ordre, tant qu'à nous, vn autre Euesque, & plusieurs autres hommes côme il apparoit. Apres les choses proposées par ledit Euesque, lesdits ambassadeurs furent requis qu'ils baillassent en escrit ce qu'ils auoient proposé, & enseignassent la procuracion de leur maistre. Et iour leur seroit assigné à ouïr responce par le saint Concile sur ce qu'ils auoient proposé, laquelle chose ainsi ils feirent. Mais deuant ce que le iour fut venu auquel deuoient auoir responce, lesdits ambassadeurs se partirēt sans prendre congé de leur hoste. En celle sepmaine de la Quasimodo vindrent à Pise le seigneur de Malle-teste en tresgrand estat, qui a baillé à iceluy Gregoire vn sien chastel nommé Remule. Et feit certaine requeste aux Cardinaulx ensemble, tant de par ledit Gregoire côme de par luy. C'est à sçauoir qu'il pleut à eux tous, que ledit Concile fut prolongié & le lieu mué, & s'ils vouloient ainsi faire ledit Gregoire viendroit audit Concile, toutesfois, mais que le lieu fut seur, & eut seurté d'aller & de venir, apres lesquelles requestes lesdits Cardinaulx maderent les Prelats, & à iceux notifierent lesdictes requestes. Les Prelats tous ensemble responderent que nullement ne se consentiroient que le temps fut prolongié, ne que le lieu fut mué: laquelle responce moult fut plaisante ausdits Cardinaulx. Et en tel-



le maniere ledit seigneur de Malle-teste se partit sans riens besongner. Toutesfois il fut assez bien appaisé par aucuns Cardinaulx ses amis & de sa cognoissance.

Item depuis le xv. iour d'Auril dessusdit fut continué l'autre siege iusques au xxiiij. iour dudit mois d'Auril, ouquel siege apres la solennité de la messe & de letanie, il fut requis par l'Aduocat fiscal que le saint Senne ou saint Concile general voulsist discerner & declairer l'vnion & coniunction faicte des deux colleges des Cardinaulx de sainte eglise Rommaine, auoir esté, & estre legitime & canonicque en temps conuenable & idoine. Item qu'il voulsist declairer que ce saint Senne est deüement canonicque, par les Cardinaulx de l'un & de l'autre college assemblez pour si grand bien. Item que ledit Senne est assemble & conuocqué par les Cardinaulx de l'un & de l'autre college assemblez pour si grand bien. Item que ledit Senne est assemble & conuocqué en temps conuenable & idoine. Item voulsist declairer qu'à ce saint Senne representât l'eglise de Dieu vniuerselle, affiert & appartient à auoir cognoissance de la cause des deux contendans de la Papalite. Item en ce mesme iour fut leuë toute la narratiõ du proces, du commencement & introduction du schisme apres la mort de Gregoire dixiesme de ce nom, iusques à conuention du saint Concile general. Ouquel proces furent racomptez tous les maulx, cautelles, reffus, deception qu'ont fait ensemble & particulierement les dessusdits contendans à la Papalite. Apres la lecture dudit proces l'Aduocat fiscal fait plusieurs conclusions contre lesdits contendans en plusieurs requestes. Et finalement qu'ils fussent deboutez & punis corporellement, &c. Et qu'on procedast à l'election d'un vray & seul Pape.

Item l'autre siege fut continué iusques au samedi vingtseptiesme iour dudit mois. Ouquel pour les ambassadeurs du Roy d'Angleterre entrerent tous ensemble en saint Concile general en tresgrand estat & honnesteté. Et là proposa l'Euesque de Salseberich de la prouince de Cantorbie bien notablement, en esmouuant tous à la paix & vnion de l'Eglise. Et apres sa proposition, l'Aduocat fiscal fait sa requeste de par le procureur du saint Concile general en tresgrand estat & honnesteté qu'il pleut audit saint Concile ordõner certains hommes prudents, honnestes & experts en science, pour examiner tesmoings sur les pechez notoires proposez contre les deux dessusdits cõtendans, laquelle petition fut exaulcée. Item le deuxiesme dimenche apres Pasques fut celebrée la messe solennellement deuant les Cardinaulx, & fait le sermon l'Euesque de Digne de la prouince d'Embreun, de l'ordre des freres Mineurs, grand docteur en Theologie, qui tousdis auoit esté des principaux amis de Pierre de la Lune, & qui moult sçauoit des cauillations & deceptions de l'un & de l'autre, iceluy Euesque prescha moult notablement. Son theume fut. *Mercenarius fugit*, en declairant plusieurs deceptions desdits contendans, en la prosecution de sondit theume. Item cedit dimenche xxvij. iour, de ce l'autre siege fut prolõgié iusques au secõd iour de May. Et le dimenche estant en temps fut la messe celebrée deuant les Cardinaulx & solennellement, & fait le sermon le Cardinal Prenestin qu'on appelloit communement le Cardinal de Poictiers. Et prescha moult notablement, & fut son theume. *Libera Deus Israel ex omnibus tribulationibus suis*. C'est à dire. O tu Dieu deliure Israël ton peuple chrestien de toutes tribulations, & en la distinction de sondit sermon fait vnze conclusions, cõcluantes contre les deux dits contendans de la



la Papalité, & refusans donner paix à l'Eglise. Et pource attendue leur cōtumace & obstination, le Concile general deuoit proceder cōtre eux, & pourueoir à l'Eglise d'un pasteur. Item le second iour du mois de May fut le siege du conseil general. Ouquel apres les solēnitez accoustumées, vn tres-renommé docteur de Boulongne feit respōce à icelle mauuaise proposition qu'auoit fait l'Euesque de Bertune de par le dessusdit Ruppert Roy des Rommains. Et le condamna iceluy excellant docteur de Boulongne, moult notablement oudit Concile, par allegations de droit diuin, canonicque & ciuil tout ce que par ledit Euesque auoit esté proposé. En respondant moult euidemmēt & clerement à toutes choses par raison de droit, dont ledit Concile fut moult reconforté. Item le dimenche ensuiuant fut celebrée la messe deuant les Cardinaulx, & feit le sermon vn frere General des Augustins, grand docteur en Theologie natif d'Italie, & fut son theume.

*Cum venerit ille arguet mundum de peccato, & de iusticia & de iudicio.* C'est à dire, quand Dieu saint Esprit viendra, il arguera le monde de peché, iustice, & de iugement. Moult bien demena ledit theume en tendant à bonne fin. Item du second iour de May prolongié fut l'autre siege iusques au dixiesme iour dudit mois, & ce temps pendant fut la messe celebrée deuant les Cardinaulx par le Patriarche d'Alexandrie le iour de la reuelation saint Michel huiëtiesme iour de May, & feit iceluy mesme Patriarche le sermon, & fut son theume. *Congregata est ecclesia ex filiis Israel & omnes qui fugebant à malis additi sunt, & facti sunt illis ad firmamentum.* Cestes parolles sont escrites ou premier liure de Macchabeus ou second & cinquiesme chapitre. Et est autant à dire, que l'Eglise est assemblée des fils d'Israel, & tous ceux qui faisoient mal vindrent avecques eux pour les conforter & ayder, & en demenant ledit theume feit six conclusions contre lesdits contendans à la Papalité. Item le vendredy dixiesme iour de May fut le siege audit Concile ouquel apres les solennitez accoustumées certaines requestes furent faictes par l'Aduocat fiscal. C'est à sçauoir que le saint Senne voulüst prononcer, discerner, declairer, & approuuer, & confermer les requestes par eux autresfois faictes oudit saint Senne. C'est à sçauoir l'vñion & conionction faictes de deux colleges des Cardinaulx, a esté & est legitime & autres requestes par dessus declairées ausquelles requestes ledit saint Senne obtempera, & prononça & discerna estre fait par la maniere qu'ils le requeroient. Item en ce mesme siege à la requeste du procureur fiscal, furent donnez huiët iours d'induces pour prouuer & produire tesmoings. Et fut ledit siege prolōgié iusques au vendredy xvj. iour de May. Item le dimenche estant oudit temps fut celebrée la messe deuant les Cardinaulx par vn Euesque nōmé de Fassinquant. Et feit le sermon l'Euesque de Fistarisce natif d'Arragon tresgrād docteur en Theologie, qui tousdis auoit esté pour le party Pierre de la Lune, commença son theume. *Expurgate vetus fermentum ut sitis noua conspersio.* Ces parolles sont escrites en l'epistre de monseigneur S. Pol, leute en S. Eglise le iour de Pasques, accōmunians, & vaut autant à dire en mortalité. Expurgez la vieille corruption. C'est le vieil & horrible peché, affin que vous ayez nouuelle cōsperison. C'est à dire renouuellez vous par bōnes euures & vertus, lequel theume il demena si profond que tous les Prelats & Docteurs grandement s'en esmerueillerent, mettāt certaines conclusions. Et dit que les deux contendans estoient aussi bien Papes comme les vieux soliers



appellans iceux & nommans pires que Annas & Cayfas, & les appella & compara aux diables d'enfer. Ce sont les choses en brief racomptées qui furent faictes en ce present Concile general du commencement iusques au xxiiij. iour de ce present mois de May. Auquel iour deuoient applicquer & venir à pise les ambassadeurs du Roy d'Espaigne. Tant qu'est du nombre des Prelats là estans ne peut pas estre iustement estimé, car tous les iours viennent nouueaux Prelats de diuerſes parties du monde : mais par espoir, ou derrain ſiege dudit Concile, tant de Cardinaulx qu'Eueſques, Archeueſques & Abbez furent cent & quarante Prelats aornez de chappes & de mittres ſans les autres Abbez qui n'estoient point mittrez. Là estoient auſſi les ambassadeurs des Roys de France, d'Angleterre, de Ieruſalem, de Cecille, Cipre & Polenne: les ambassadeurs des Ducs de Brabant, de Oſtrice, de Eſtienne de Bauiere, de Guillaume de Bauiere, les ambassadeurs des Comtes de Cleues, de Brandac, du Marquis Brandebourg & de Moraſte, les ambassadeurs des Archeueſques de Coulongne, de Majence, Salſeburg, & de l'Eueſque de Treſt. Les ambassadeurs du maiſtre de l'ordre de Pruſſe, du Patriarche d'Acquilee & de pluſieurs ſeigneurs d'Italie. Là estoit grand nombre de maiſtres en theologie, de docteurs en droit de canon & ciuil tant de France que d'Italie grand nombre de procureurs de diuerſes parties du monde qui par la grace de Dieu ont eu & ont bonne & charitable conuerſation enſemble du commencement iusques à maintenant. En laquelle cité eſt grand abondance de viures, leſquels ſont venduz par pris aſſez raiſonnable. Et encores ſeroient à meilleur marché ſe n'estoient les gabelles & tribuz qui ſont eſdictes parties. Et ſelon ma conſideration ladicte cité de Piſe eſt vne des notables citez qui ſoit en ce monde, en laquelle eſt vn fleuve courant & deſcendant en la mer eſtant à vne lieüe pres de ladicte cité, par lequel fleuve viennent en ladicte ville grans nauires amenans pluſieurs biens. Et entour de ladicte ville ſont vins blancs & grand abondance de prez. Nous ſommes bien honneſtement logez, jaçoit ce choſe qu'en ladicte ville ſont grand multitude des gens d'armes pour la conſeruacion de ladicte ville, laquelle ont conqueſté les Florentins par force d'armes contre ceux de Piſe: car les deſſuſdits Florentins ont fait partir grand nombre de ceux de Piſe hors de ladicte ville afin qu'ils ne feiſſent aucune trahiſon, & ſont allez à Florence iusques au nombre de deux mille & ſe doiuent monſtrer deux fois le iour aux gouuerneurs de ladicte ville de Florence ſur peine de la teſte en certain lieu nommé. Item de quatre à v. mille de ceux de Piſe ſont allez par deuers le Roy Lancelot pour auoir ſecours de luy & ayde. Lequel Roy à tout le nombre de xxiiij. mille de combattans tant de pied comme de cheual eſt ja venu à cinq lieües pres de ceſtedicte ville de Piſe, mais les Florentins par la grace de Dieu peurent bien reſiſter contre luy & toute ſa puiffance en nous conſervant. Et eſt verité que celuy Roy Lancelot doubta à perdre ſon royaume par l'vnion de ſaincte Eglise: car par tirannie il occupa & empescha en moult grand quantité du patrimoine de ladicte ſaincte Eglise. Et avec ce on diſoit que certains ambassadeurs de Pierre de la Lune venoient audit concile, non mie pour le bien de l'vnion, mais pour y bailler empeschement à leur pouoir. S'enſuit le nombre des Cardinaulx estans pour le present à Piſe, tant d'une part comme d'autre. Leſquels estoient xix. & eſt à ſçauoir que les ſeruiteurs du Cardinal de Challan ſont ja venus audit concile & ledit



& ledit Cardinal venra briefuemēt avec les ambassadeurs du Comte de Sauoye. Messeigneurs les Cardinaulx sont mal-contens des Euesques, Abbez & chapitres des Eglises cathedrales qui n'ont point enuoyé leur procureur audit Concile general. Autre chose ne vous sçay qu'escrire pour le present. Escript à Pise le xv.iour du mois de May, vostre humble religieux & subiect l'Abbé de saint Maxence. La superscription estoit. A reuerend pere en Iesus Christ & seigneur par la grace de Dieu Euesque de Poictiers & Chancelier de monseigneur le Duc de Berry.

*Comment les ambassadeurs de l'vniuersité de Paris enuoyerent leurs lettres à leurs seigneurs & maistres de ce qui auoit esté fait au dessusdit Concile de Pise.*

CHAP. LX.

**S'**Ensuit la teneur des lettres des ambassadeurs de l'vniuersité de Paris, cōcordables aux lettres dessusdit enuoyées par iceux de ladicte vniuersité. Reuerends peres seigneurs & maistres honorables humble recommandation premise, plaie vous sçauoir que nous escriuons par deuers vous les faits & coppies des traictez faits au Concile general assis par xiiij. fois. Ouquel en effect ont esté faictes les choses qui s'ensuiuent. Les deux contendans à la Papalité attendus par plusieurs iours furent declairez cōtumax & en fait de schisme & de la foy. En leur contumace furent données plusieurs articles contre eux contenant grans escriptures, & le libelle de la contumace. Si furent donnez commissaires à examiner les tesmoings contre lesdits contendans. Item par ledit Concile general fut approuué l'vnion des colleges des Cardinaulx, la citation desdits contendans & commotion dudit Concile par les Cardinaulx, comme en temps & en lieu conuenable seurs, & affermans. Et que ledit Concile estoit iuge souverain en terre à cognoistre sur lesdits articles proposez sur lesdits contendans. Il fut ainsi prononcé par le saint Senne qu'à ce auoit esté chose licite de se departir de l'obeissance d'iceux, depuis le temps qu'ils auoient promis d'eux desmettre de la Papalité. Et que les proces, constitutions & sentences faictes par lesdits contendans contre ceux qui se sont soubstraits de leur obeissance sont de nulle valleur. Apres furent les attestations publiées & sa sentence interlocutoire fut louée par le saint Concile sur les notoires pechez desdits contédans. Et au iourd'huy maistre Pierre Paoul en plain Concile dit tressolemnellement vostre opinion & print son Theume. *Congregabuntur filij Iudæ & filij Israel & facient sibimet caput vnum.* C'est à dire que les enfans de Iudée & les enfans d'Israel s'assembleront & feront à eux mesmes vn chef. Ce sont ceux proprement assemblez venus, & aussi ceux à venir à ce saint Concile qui feront vn seul & vray Pape. Et par deuant auoit aussi parlé tressolemnellement, maistre Dominic le Petit en la presence de tous les Cardinaulx. Et fut son Theume. *Principes populorum congregati sunt cum Deo Abraham,* c'est à dire les Princes des peuples sont assemblez avec le Dieu d'Abraham. Les Cardinaux & Prelats de sainte Eglise sont appelez les Princes des peuples. Au iourd'huy pareillement les Theologiens ont dit leur opinion qui sont en nombre six vingts & trois, desquels les quatre vingts sont voz suppoz & soubmis. Item au iourd'huy a esté ordonné que les deux contendans soient citez aux portes des Eglises au mercredy v.iour de Iuillet à ouïr sentence diffinitive,



Errons a enuoyé vne bulle aux Anglois en leur priant qu'ils vueillent estre de leur party avec Ruppert Roy des Romains second esleu pour muer le lieu du Concile. Et qu'il leur plaise à estre à son Concile, mais il labeure en vain, car les Anglois, Allemans, Bohemens, ceux de Poulemie, de France, de Cypre, de Rodde, d'Italie sont si tressolennellement concordables, excepté Ruppert, duquel les ambassadeurs sont partis. Pou de Prelats sont venus de la seigneurie & domination de Laudislây, Roy de Hongrie lequel a escript qu'il a intention d'estre audit Concile, mais il à eu grand occupation pour maintenir sa guerre contre les mescreans. Pierre Mastin dit de la Lune a enuoyé vne bulle moult terrible: par laquelle il admonnest les Cardinaulx qu'ils retournassent par deuers luy, & fils ne veulent retourner il leur deffend à traicter d'election, & ou cas qu'ils n'obeïront il les excommunie & prononce moult d'autres choses contre lesdits Cardinaulx & leurs consentans. Reuerends Peres seigneurs & maistres redoutez, autres choses pour le present ne vous escriuons, fors q̃ toutes nations pendent à la reformation de l'Eglise, à laquelle sera obligé & tenu de reformer le nouuel Pape qui au plaisir de Dieu sera esleu, fil vous plaist aucune chose mader prests & appareil lez sommes d'obeïr selon nostre pouoir comme tenuz y sommes. En vous suppliant hūblement que toutes noz besongnes, il vous plaise nous auoir pour recommandées. Le tressouuerain vous ayt en sa garde. Escript à Pise le xxix. iour de May l'infracription, Dominic le Petit, Pierre Paoul de Quesnoy, Iean Pere Ponce, Vincent, Eustace de Fauquemberge, Arnoul Vibrant, Iean Bourlet dit François. Maistre Pierre de Poingny, & maistre Guillaume le Charpentier ne sont point cy deffoubs escripts pource qu'ils sont absens.

*Comment les contendans, c'est à scauoir de la Lune & Benedic furent priuez de la Papauté, & des deffences faictes par le Sainct Senne de non leur obeïr en aucune maniere.*



Ensuit la condemnation desdits contendans. Ce present sainct Senne general assemblé ou nom de Iesus Christ se soustraict, & depart de l'obedience de Pierre de la Lune appelé Benoist xiiij. de ce nom, & d'Angel Corratio nommé Gregoire douziesme de ce nom. Et prononce & decerne ledit sainct Concile que ainsi doiuent faire tous loyaux catholicques. Item ledit sainct Senne representant l'Eglise vniuerselle pour iuge en ceste Eglise de Pise, apres meure deliberation & examination de tesmoings sur les horribles pechez desdits contendans prononce & decerne par sentence diffinitive iceux estre priuez & indignes de tout honneur & dignité, & mesmement de dignité de Pape. De rechef prononcent iceux estre separez de sainte Eglise, de fait par les saincts canons, par icelle sentence diffinitive en ces escripts. En deffendant à iceux & à chacun d'eux que iamais ne soient si hardis d'eux tenir pour Pape. En declairant apres: ledit sainct Senne declare que nuls Chrestiens n'obeïssent à iceux ou à l'un d'eux donnent faueur & entendement aucunement: nonobstant quelque serment de loyauté autresfois promis à iceux sur peine d'excommunication. Et quiconques ne voudra obeïr à ceste presente ordonnance & sentence il sera condamné & réputé & baillé es mains de laye iustice comme fauorable aux heretiques, à punir selon les commandemens diuins & disposition des saincts canons.

En



En apres ledit sainct Senne prononce & declaire que toutes les promotions desdits Cardinaulx faictes par lesdits contendans de Papalite, par ledit Angelcorrario depuis le tiers iour de May: & par ledit Pierre de la Lune depuis le xv. iour de Iuing en l'an dernier passé mille cccc. & viij. auoir esté, & estre de nulle valleur & du tout en sont adnullées par ceste sentence diffinitive. Et toutes les sentences & ordonnances faictes par lesdits contendans ou preiudice de l'vnion de sainte Eglise contre les seigneurs, Princes, Roys & Patriarches, Euesques, Archeuesques & autres Prelats des Eglises & personnes singulieres, estre de nulle valleur, & de nul effect, & ledit sainct Senne a ordonné à proceder en outre au bien de l'Eglise vniuerselle lundy prochain venant qui sera le dixiesme iour de Iuing. Ces choses dessusdictes ont esté faictes au Cōcile general à Pise l'an mille quatre cens & neuf le cinquiesme iour de Iuing.

*Comment Pierre de Caudie Cordelier fut esleu Euesque de Romme par les Cardinaulx.*



E xxvj. iour de Iuing l'an mille quatre cens & neuf Pierre de Caudie cordelier natif de Grece docteur en theologie, appellé communément le Cardinal de Millan fut esleu à Pise à bonne concorde Pape par les Cardinaulx du consentement & approbation du Concile general, & l'appellerent Alexandre cinquiesme duquel s'ensuit la teneur des bulles.

ALEXANDRE Euesque le seruiteur des seruiteurs de Dieu à l'Euesque de Paris salut, & benediction apostolicque. Louenge & gloire soit à Dieu ou ciel, qui a donné aux hommes de bonne volenté paix en terre, & qui par sa benigne grace & misericorde à mis vraye vnion en son peuple Chrestié iusques à ce trouble par perilleuse diuision. Qui fera celuy hommes qui ne deura auoir grād ioye au cuer, quand il considerera les grans dommages & perils des ames, qui tousiours s'ensuiuoient par le detestable & perilleux schisme & diuisions & cauillations d'iceux qui par la hardiesse sacrilege vouloiēt nourrir & maintenir par leur malice ladicte tribulation & diuision: & maintenant peuuent considerer ceste reconciliation du peuple Chrestien confermée par si grand concorde en vne mesme volenté? Nostre benoist Dieu ayant pitié de son peuple qui si long tēps par ceste diuision auoit esté en grand angoisse, a ouuert & enluminé les courages & volentez de ceux du sainct Cōcile general, qui iustement selon les saints canons ont condamné lesdits contendans de la Papalite, comme ennemis de Dieu & de sainte eglise par leurs enormes & horribles pechez notoires. Et apres ce que noz venerables freres les Cardinaulx de sainte Eglise Romaine, du nombre desquels adonc nous estions desirans de trouuer pasteur idoine à sainte Eglise: apres les solemnitez & iournées à ce requises & accoustumées du consentement & approbation du Concile general, entrerent en conclaue, & en la fin apres longs & diuers tiltres regarderent de commun accord nostre humble personne pour lors estant Prestre Cardinal de l'Eglise des douze apostres & nous esleurent Euesque Romain. Et jaçoit ce chose que nous feussions indignes à si grand charge considerant nostre fragilité: toutesfois nous confians de l'ay de de Dieu auons receu ladicte charge. Venerable frere icelles choses nous notifions comme amant & desirant la paix de sainte eglise sicomme nous auons bien apperceu: en toy enhortant & les tiens que tu vueilles à Dieu tout puissant



rendre graces & louenges pour si grand don par luy enuoyé ça, jus en terre. De rechef nous qui auons grand affection à ta digne personne te mandons que nous sommes prests & appareillez à toy & aux tiens faire plaisir selon le pouoir que Dieu nous a donné. A ces presentes lettres auons commis & baillé pour à toy enuoyer à nostre aymé fils notable homme Paulin d'Arée maistre de la salle escuyer d'honneur & nostre loyal familier. Donné à Pise le huiëtiefme iour de Iuliet & au premier an de nostre Papalité.

*S'ensuit aucunes constitutions pour la probation du saint Concile.*

**E**L plaist à nostre tressainct seigneur Alexandre par la diuine prouidence Pape cinquiesme que toutes les promotions, translations, confirmations, collations & quelsconques prouisions faictes à quelsconques personnes consentans à ce present Concile des Prelacies, dignitez, benefices & offices d'eglise, cures ou non cures, les consecrations des Euesques & ordinaires des clerics par iceux contendans de la Papalité ou par leur autorité és temps & és lieux à eux obeissans, soient & demeurent bien faictes: mais que ce ayt esté fait deuant sa sentence diffinitive & que les choses ayent esté faictes selon les reigles de droit canon. Item il plaist audit Concile que nostredit seigneur ordonné ce sur l'Archeuesché de Gennes. Item par l'approbation du saint Concile les benefices de sainte Eglise donnez par les iuges ordinaires demeureront paisiblement à ceux à qui ils ont esté donnez. Item par l'approbation du saint Concile nous ordonnons & discernons à proceder contre les obeissans obstinéement ou baillans faueur à Pierre de la Lune ou de l'Angele Corario, nagueres contendans de la Papalité, & de ce saint concile condamnez par sentence diffinitive de schisme & heresie notoires par la maniere que les saints canons ont ordonné contre iceux est à proceder. Item nous ordonnons que se le Cardinal de Flisque veult venir dedans deux mois ou nous en propre personne & obeir qu'il soit receu benignement, & iouyra des benefices & honneurs entierement qu'il obtenoit le quinziésme iour mille cccc. & viij. Item toutes les dispensations faictes par les Euesques des dioceses és parties non obeissans ausdits contendans sur le deffault d'age pour la cause d'obtenir dignitez, benefices ou prelacies, item toutes absolutions & stabilisations en fait de penitence faits par lesdits contendans comme lesdits ordinaires pendant ledit schisme sur les reseruez au siege apostolicque de nostre certaine science par l'approbation du S. Concile, nous le certiffions & approuuons.

*Comment l'Euesque de Paris trespassa, des mariages du Duc de Brabant, de sa fille Montagu & du Roy de Chippre & Charlotte de Bourbon.*

CHAP. LXIIII.

**E**N ces iours messire Iean d'Orgemont Euesque de Paris trespassa en la maison Episcopalle en la fin du mois de Iuing, en laquelle Euesché succeda messire Simon de Montagu Euesque de Poictiers & Chancelier du Duc de Berry frere du grand maistre d'hostel du Roy & de l'Archeuesque de Sens, & fut receu apres honorablement en l'Eglise cathedrale de nostre Dame de Paris le xxij. iour de Septembre ensuiuant. Et estoient presens Charles



Charles Roy de France, les Ducs de Berry, de Bourgongne & de Bourbon, le Roy de Nauarre & plusieurs autres Princes, prelatz & autres gens sans nombre: & feit la feste à l'ayde dudit maistre d'hostel son frere si abondamment & pompeusement, qu'il n'estoit memoire parauant que les festes & mangiers faits en temps feussent pareils à cestuy tant en vaisselle d'or & d'argent, en diuersitez & quantitez de mets de viandes & de boire que chacun en estoit esmerueillé. Pour lequel estat grand partie de Princes là estans noterent grandement ledit maistre d'hostel qui à son plaisir gouernoit les besongnes du Roy & l'esleuerent pour ce en souppeçon de mal. Et le xvj. iour de Iuillet ensuiuant la mort du dessusdit d'Orgemont Euesque de Paris, le Duc Anthoine de Brabant espousa à Bruxelles en Brabant la niepce du Roy de Boesme à laquelle appartenoit la Duché de Luxembourg par la succession de son pere, lequel traicté dudit mariage fut fait par le pourchats de l'Euesque de Chaallons & de messire Regnier Pot. Et estoient venus avec icelle Dame aucuns cheualiers & escuyers, dames & damoiselles de noble estat qui luy auoient esté baillez de par ledit Roy de Boesme son oncle. Si furent à la solemnité desdictes nopces faire les deux freres dudit Duc de Brabant, c'est à sçauoir le Duc de Bourgongne & le Comte de Neuers & leur seur femme au Duc Guillaume Comte de Hainault, le Comte de Charrolois & la Comtesse de Cleues enfans dudit Duc de Bourgongne: le Marquis du Pont, Jean son frere, & leur seur Comtesse de S. Pol tous trois enfans dudit Duc de Bar, les Comtes de Namur & de Conuersan & leurs femmes avec plusieurs autres dames & grâs seigneurs. Et mesmement y fut le Comte de Clermont fils au Duc de Bourbon, lequel iousta & fut seruy du Duc de Bourgongne & du Comte de Neuers. Le Duc porta l'escu, & le Comte la lance, dont plusieurs là estans s'esmerueillèrent pour la hayne que nagueres auoit entre eux. Pour la mort du Duc d'Orleans trespassé: neantmoins ils furent là tous ensemble en grand concorde & amour l'un avec l'autre, & fut ceste feste tresplanteuse & abondamment seruye de tous biens. Apres laquelle finée les seigneurs dessusdits se retrahirent en diuers lieux. Et le penultime iour dudit mois de Iuillet furent faictes tressolemnellement les nopces de la fille du seigneur d'Albret Connestable de France, & de l'aîné fils de Montagu grand-maistre d'hostel du Roy: ausquelles nopces furent presens la Royne de France & plusieurs autres grans seigneurs, & furent tous les despens soustenuz & payez de par le Roy: dont en continuant, ledit Montagu encourut en grand indignation & enuie de plusieurs Princes du sang royal. Et en ces mesmes iours furent rompues les trefues d'entre les Roys de France & d'Angleterre par mer tant seullement, & si s'esmeut tresforte guerre dont plusieurs marchâs desdits royaumes sousteindrent plusieurs dommages. Et le second iour d'Aoust ensuiuant Jean de Lisynen Roy de Chippe espousa par procuration Charlotte de Bourbon seur germaine du Comte de la Marche. Ausquelles nopces qui furent faictes dedans le chastel de Melun estoit la dessusdicte Royne de France, le Duc d'Acquitaine & autres ses enfans, le Roy de Nauarre, les Ducs de Berry & de Bourbon, les Comtes de la Marche & de Clermont, Loys de Bauiere frere de ladicte Royne avecques plusieurs autres dames & damoiselles qui tous ensemble furent l'un avecques l'autre de tresioyeux esbatemens tant en ioustes, dances comme en solempnels esbatemens boires mǎgiers & autres consolations. Si estoit



ladiète Charlotte Royne de Chippre vne tresbelle dame bien aornée & conditionnée de toutes nobles & gratieuses meurs, laquelle apres qu'icelle feste fut finée s'en alla honorablement accompagnée d'aucuns grans seigneurs & notables dames que luy bailla son frere du païs de France, avec aucuns que luy auoit baillez & enuoyez ledit Roy de Chippre, pour la cōduire & mener iusques audit royaume de Chippre, & arriua premier au port de Chermes, & la vint querir le Roy son mary qui de sa venue fut moult resiouy, & la mena avec la plus grād noblesse de son royaume en la cité de Nichosie, où de rechef il feit faire vne tresnoble feste selon la coustume du païs. Et puis se conduirent & gouvernerent l'un avecques l'autre par grande espace de tēps treshonorablement. Et islit deux generation dont & desquels il sera cy apres faicte plus à plain declaration.

*Comment le Duc Iean de Bourgongne tint grand Parlement en la ville de l'Isle en Flandres sur les affaires. Et de la mort de la Duchesse d'Orleans.*

## CHAP. LV.

**L**E cinquiesme iour d'Aoust & huit iours ensuiuans le Duc Iean de Bourgongne tint grand Parlement en sa ville de l'Isle en Flandres sur plusieurs de ses affaires & entre les autres pour accorder ses deux seourges, c'est à sçauoir le Duc de Brabant & le Duc Guillaume pour la cause dont en autre lieu par cy deuant est faicte mention. Avecques lesquels Ducs furent presens leur seur femme dudit Guillaume, l'Euesque de Liege, & le Comte de Namur. Et en la fin ledit Duc de Bourgongne parconferma la paix, entre icelles parties: par si, qu'iceluy Duc Guillaume deust faire payement pour toutes debtes, audit Duc de Brabant de la somme de lxx. mille florins d'or du coing de France à payer à certains termes ensuiuans. Et apres ce parlement finé, ledit Duc de Bourgongne entour là My-Aoust alla à Paris au mandement du Roy & du conseil royal & mena plusieurs gens de guerre lesquels il feit loger és villages vers Paris. Et là cause pourquoy il les y auoit menez, si estoit pource que le Duc de Bretagne auoit nagueres amené d'Angleterre grand nombre d'Anglois: par lesquels avec ses Bretons il faisoit mener forte guerre, à la vieille Comtesse de Ponthieure & à ses païs, dont la Royne de France, & le grand conseil du Roy n'estoient pas bien contens, pource que c'estoit ou preiudice du royaume: & aussi le Duc de Bretagne auoit batu & iniurié sa femme, fille du Roy de France, à ceste occasion, pourcequ'elle luy auoit blasmez les cas dessusdits. Si auoit en intention qu'iceluy Duc de Bourgongne à tout grand puissance & avec luy autres Princes & capitaines iroient ou païs de Bretagne pour subiuguer ledit Duc, & mettre en obeissance du Roy, & auoit ledit Duc de Bourgongne grand desir d'y aller pour secourir la dessusdicte Comtesse & son beau fils, le Comte de Ponthieure. Mais entre-temps que les preparations se feirent pource faire par le conseil royal, iceluy Duc de Bretagne sçachant par aucuns de ses seables qu'il estoit en l'indignation de la Royne de France sa belle mere & de ceux qui gouernoiet le Roy. Enuoya par le conseil de ses Barons certains ambassadeurs à Paris deuers iceux, lesquels offrirent de par luy que du discord qu'il auoit contre ladiète Duchesse de Ponthieure il se vouloit soubmettre sur le Roy & son conseil, à quoy il fut receu en fin par le moyen du Roy de Nauarre. Et fut mandée à venir à Paris icelle



icelle Comtesse de Ponthieure & son fils, & depuis y vint ledit Duc de Bretagne. Si fut la besongne pourparlée entre les deux parties laquelle fut conclue & demourerent l'un avec l'autre. Et en ce mesmes mois Ysabel ainsnée fille, iadis Royne d'Angleterre & maintenant femme du Duc Charles d'Orleans gisant de vne fille trespassa dedans les iours de sa purification. Pour la mort de laquelle ledit Duc eut au cueur tresgrand douleur. Et depuis print consolation pour l'amour de sadiète fille qui demoura en vie. Ouquel temps ledit Patriarche d'Alexandrie Euesque de Carcasonne succeda apres Guy de Roye (dont dessus est faite mention) en l'Archeuesque de Reims, & l'Archeuesque de Bourges succeda en ladiète Patriarche. Et maistre Guillaume Bourratier secretaire du Roy fut fait Archeuesque de Bourges. En ces propres iours mourut maistre Pierre Paoul Archeuesque de Senlis: au lieu duquel fut mis maistre Gilles des Champs Aumosnier du Roy. Et Loÿs de Harcourt frere du Comte de Harcourt fut constitué Archeuesque de Rouen.

*Comment Bouciquault Mareschal de France gouverneur de Gennes fût debouté d'icelle ville en tant qu'il estoit allé au mandement du Duc de Millan.*

## CHAP. LVI.

**E**N c'est an Bouciquault Mareschal de France qui estoit gouverneur de Gennes & se tenoit là de par luy, fut euoqué de par ledit Duc de Millan & le Comte de Papie son frere pour ayder & appaiser vne question qui estoit meüe entre eux és parties de leurs dominations: à laquelle euocation il alla, cuidāt faire agreables seruices au Duc de Millan, non luy doutant d'aucun mal engin. Mais durant son voyage ceux de ladiète ville de Gennes se meirent du tout en rebellion contre leurdit gouverneur, & manderent à estre à eux aucuns estrangers leurs alliez & complices. Et de fait occirent cruellement le cheualier de Collettrie nommé Chollette natif d'Auuergne, lequel estoit le lieutenant dudit Mareschal. Apres laquelle mort les autres François qui estoient parmy la ville pour la doubte de la mort s'en fuyrent és chasteaux d'icelle. Esquels par ceux de Gennes ils furent presentement assiegez, & manderent en leur ayde lescits Geneuois, le Marquis de Mont-Ferrant avec grād puissance de gens d'armes, lequel y vint hastiuement, à tout quatre mille combattans, par ce qu'ils luy promeirent à payer chacun an pour ses gages dix mille florins, & le feirent sans delay Duc de Gennes. Avec lescels furent faiz & constituez douze cheualiers selon la coustume du paÿs pour gouverner la chose publique. Et briefs iours apres Fassincault capitaine tresrenomme en Italie moult cordial amy audit Marquis, sans delay avec tous ses gens vint audit lieu de Gennes sur intention d'estre en ayde d'iceluy Marquis, mais lescits Geneuois ne voulurent point le receuoir & fut par eux reffusé. Et en s'en retournant ses gens qui estoient huit mille prindrent vne ville nommée Noefuille, où il y auoit chastel qui se tint par les François, & fut assiegé hastiuement, mais ledit Bouciquault, accompagné de ses gens & des gens desdits freres. C'est à sçauoir du Duc de Millan & Comte de Papie apres ce qu'ils eurent ouÿ la nouuelle de la rebellion desdits Geneuois vint hastiuement au chastel de Gaing assis & situé entre Gennes & ladiète ville de Noefuille, & combatit contre ledit Fassincault & ses gens,



en laquelle bataille furent occis bien huiet cens hommes dont la plus grand partie estoient à iceluy Fassincault, & en la fin pour la nuit qui survint l'une partie & l'autre laisserent la bataille. Et Bouciquault par le conseil de d'Enguerran de Bourneville qui estoit avec luy & de Gaiffier de la Salle tous deux hommes d'armes de grand proesse, retourna en celle mesme nuit audit chastel de Gaing, lequel il gaignit & pourueut grandement de viures & autres choses necessaires à guerre. Et le dessusdit Fassincault demoura dedans la ville: mais dedans briefs iours ensuiuant voyant qu'il ne pouoit auoir ledit chastel se departit à tout ses gens & retourna en ses forteresses. Et le Mareschal Bouciquault commença à mener forte guerre aux Geneuois & eux à luy. Et avec ce enuoya ses messagiers deuers le Roy de France pour luy signifier les besongnes dessusdictes, en luy requerant qu'il luy voulust enuoyer incontinent ayde de gens d'armes. Lequel Roy & son grand conseil quand il sceut les nouvelles considerant la muableté & desloyauté desdits Geneuois disposa à proceder meurement contre iceux. Et depuis enuoya à ses despens les seigneurs de Torsi, de Rambures, & de Vieville à tout certain nombre de gens d'armes iusques à la cité d'Ast appartenant au Duc d'Orleans prochaine au territoire de Genes, sur esperance de bailler secours à iceluy Bouciquault. Mais quand ils furent venus iusques là ils sceurent veritablement que tout le pays estoit tourné en rebellion, reserué aucunes forteresses que tenoient encores lesdits François au dehors de ladicte ville de Genes, lesquelles ne pouoient pas faire grand dommage par ce qu'ils ne pouoient tenir grand nombre de gens pour les viures qu'ils auoient à danger, & par ainsi lesdits chevaliers eurent consideration l'un avec l'autre qu'ils ne pouoient faire avec l'autre chose qui fut de grand valeur & s'en retournerent en France. Et adonc furent quis dedans Paris & ailleurs tous les marchans & autres gens dudit pays de Genes & ce qui en fut trouué furent mis prisonniers & leurs biens arrestez & detenus sous la main du Roy, si auoient esté iceux Geneuois par treslong temps en l'obeissance du Roy de France & l'auoient seruy en plusieurs guerres assez diligemment.

*Comment les Seigneurs du sang royal conclurent ensemble de faire reformer ceux qui auoient gouverné les finances du Roy, & de la mort de Montagu.*

CHAP. LVII.

**E**N ces propres iours les seigneurs du sang royal estans à Paris. C'est à sçauoir le Roy Loys, le Roy de Nauarre, les Ducs de Berry, de Bourgogne, & de Bourbon avec plusieurs autres grans seigneurs sçachans & eux bien informez que Charles Roy de France estoit du tout apoury de ses finances par ses officiers & gouuerneurs, & mesmement que sa vaisselle & la plus grand partie de ses ioyaux estoient tous en gaige, exposerent vn iour à la personne du Roy l'estat & pouure gouvernement qui estoit en son hostel, & entre lesdits officiers, presens la Royne, le Duc d'Acquitaine & autres du grand conseil en requerant qu'il fut content que aucun d'eux peust auoir la puissance de reformer tous ceux generallyment qui depuis le commencement de son regne, auoient eu le gouvernement desdictes finances, & de ses offices, sans nuls en excepter, & qu'ils peussent iceux desestabli, corriger, punir ou condamner, selon les cas qui seroient trouuez sur eux: laquelle requeste fut par le Roy accordée.

Et



Et pour y mieux besongner & entédre grād partie des seigneurs dessusdits, laisserent leurs hostels, & s'en allerēt logger à l'hostel du Roy à S. Pol, dedans lequel, par le cōseil d'aucuns des seigneurs de Parlement & de l'université y cōtinuerent par plusieurs iours à ladicte reformation. Et feirēt tāt qu'à brief dire ils apperceurent clerement que ceux qui auoient gouuerné lesdictes finances du royaume depuis xvj. ou xx. ans par auant, festoiēt tresmal acquitez: & auoient acquis pour eux, & pour leurs amis ou prochains innumerables fināces au preiudice de la seigneurie. Et par especial Mōtagu qui auoit esté vn des p̄icipaux gouuerneurs fut fort mis en feste, & tellemēt qu'il fut ordonné qu'on le print & menist en prison en Chastellet avec aucuns autres. Et pour parfaire ceste execution fut commis meslire Pierre des Essars Preuost de Paris, & avec luy plusieurs de ses sergens. Et pour l'accompagner luy furent baillez de par ledit Duc de Bourgongne les seigneurs de Heylly, de Robais, & meslire Rolant de Vequerque, lesquels tous ensemble, se retrouuerent vn certain iour, & trouuerent ledit Montagu, & avecques luy, le maistre Martangonge Euesque de Chartres, tous deux allans au monstier de sainct Victor pour ouyr la Messe. Lequel Preuost accompagné des dessusdits quand il les rencontra meit la main à luy, & audit Euesque en disant à iceux. Ie mets là main à vous de par l'auctorité royalle, à moy commise en ceste partie. Et adonc iceluy Montagu, oyant les parolles dudit Preuost fut fort esmerueillé & eut tresgrand cremeur. Mais tantost que le cueur luy fut reuenue il respondit audit Preuost. Et tu Ribault comment és tu si hardy de moy ainsi attoucher? Lequel Preuost de Paris dict. Il n'yra pas ainsi que vous cuidez, mais comparerez les grans maulx que vous auez faits & perpetrez. Lequel non pouant resister audit Preuost fut mené lyé tresdurement & destroïctement en petit Chastellet. Et avec luy ledit Euesque de Chartres qui estoit President en la chambre des Generaulx, ouquel lieu ledit Montagu fut mis par plusieurs fois à gehaine. Et tant, que luy doutant à approcher sa fin demanda à vn sien confesseur quelle chose il auoit à faire. Et iceluy luy respondit. Ie n'y voy autre remede fors que vous appelez du Preuost de Paris: & ainsi il en feit. Pourquoy ledit Preuost alla deuers les seigneurs lesquels luy auoient ordonné de le prendre, & leur compta l'estat de ladicte appellation. Et tantost sur ce conuocquerent parlement, pour executer & examiner ceste matiere. Et en la fin fut declairé par les seigneurs dudit Parlement que ladicte appellation estoit de nulle valeur. Et pourtant les dessusdits seigneurs voyans ledit fait estre examiné & iugé dirent audit Preuost: Va & sans demeure toy accōpaigné du peuple de Paris bien armé, prens ton prisonnier, & expedie la besongne selon iustice en luy faisant couper la teste d'vne doloüaire & mettre és halles sur vne lance. Apres lesquelles parolles prestement en accomplissant leur commandement le dixseptiesme iour du mois d'Octobre disposa & ordonna ledit peuple bien armé en la place Maubert & en plusieurs autres lieux. Et apres ce en vn hault estage, és halles fait deuestir ledit Montagu iusques à sa chemise, & là luy fait couper la teste & la mettre (comme dit est) sur le bout d'vne lance, & le corps fut pendu par les aisselles au gibet de Mont-faulcon droit au plus hault estage, ceste execution fut faiete principalement comme il fut commune renommée, à l'instance, & poursuite du Duc de Bourgongne, lequel pour le veoir faire manda tresgrand nombre de nobles hommes de ses pays de



Bourgongne, de Flandres & d'Arthois. Et vn petit deuant ce, que ce aduenist le Duc de Bourbon & le Comte de Clermont son fils, se partirent de Paris tref-indigne & courrouce pour la prinse du dessusdit Montagu. Et en poursuivant de mal en pis le Duc d'Orleans ses freres & tous ceux, tenans ceste bende furent tresdeplaisans de sa mort, mais à present ils ne le pouoient autre: car ils n'estoient point ouïs pource temps au conseil du Roy. Et le lendemain d'icelle execution faicte ainsi (comme dit est) le Duc Guillaume Comte de Hainault qui par auant auoit esté mandé par le Duc de Bourgongne vint à Paris, à l'encontre duquel allerent plusieurs grans seigneurs, & fut receu treshonorablement par le Roy, le Duc d'Acquitaine & plusieurs autres Princes. Et à sa venue luy fut donné & octroyé l'hostel dudit Montagu qu'il auoit dedans Paris comme confisqué, avec tous les biens meubles estans dedans iceluy. Et d'autre part fut mise la forteresse de Marcoussi en la main du Roy seante à sept lieües de Paris, sur le chemin de Chartres, lequel ledit Montagu auoit fait fonder & edifier en son temps, & se logea prestement iceluy le Duc Guillaume dedans ledit hostel. Et toutes ses autres terres & biens quelsconques furent aussi mis en la main du Roy ou preiudice de ses enfans. Ledit Montagu estoit né de la ville de Paris, & auoit esté par auant secretaire du Roy & fils de maistre Girard de Montagu iadis secretaire du Roy Charles le Riche dernier trespasé. Si estoit gentil-hôme de par sa mere, & auoit marié trois filles legitimes qu'il auoit, l'une à sire Hue Comte de Boefsi, la seconde à Iean de Craon seigneur de Monbason, & la tierce estoit en conuenance à Iean de Meleun fils du seigneur d'Antoing. Mais le mariage ne se fait pas: & son fils (comme dit est) estoit marié à la fille du seigneur d'Albreth Connestable de France & cousin du Roy. En apres ces besongnes passées par le dessusdit Preuost de Paris furent prins plusieurs gens du Roy: & especiallement ceux qui estoient ordonnez sur les tributs & reuenues, & tous les generaulx. C'est à sçauoir les seigneurs de la chambre des generaulx: Et les presidens, & les seigneurs de la Chambre des comptes, Perin Pillot marchand & autres emprisonnez au Louure & ailleurs. Quand le Borgne de Foucal escuyer du Roy & garde de sa finance nommée communement l'Espargne, ouÿt dire que le grand maistre-d'hostel estoit prins & mis en prison, il fut grandement esmerueillé, troublé & esmeu, pourquoy en habit mué se partit de Paris sans delay secrettement sur vn moult leger cheual, dont il fut en moult grand souppeçon deuers les seigneurs. En ce temps l'Archeuesque de Sens frere audit maistre d'hostel, Guichart Daulphin, & Guillaume de Tignouuille cheualiers, & maistre Gontier Col secretaire du Roy, par le commandement dudit Roy furent enuoyez à Amiens à l'encontre des Legaux du Roy d'Angleterre. Lequel Archeuesque assez tost ayant cognoissance de la prinse & emprisonnement de sondit frere print congé à ses compagnons & se partit d'Amiens. Et ainsi qu'il alloit legerement vers Paris il fut rencontré d'un huissier du Roy venant de Paris à Clermont qui prestement le fait prisonnier du Roy: car il auoit lettres & puissance de par ledit Roy de prendre & enchartrer iceluy à Amiens ou sur le chemin se par aucune aduanture il le rencontroit, mais celuy Archeuesque moult prudent luy respondit promptement, par fiction qu'il estoit prest & appareillé d'aller avec luy en Chartre ou en mort. Et en allant ensemble ils vindrent au fleuve d'Oize empres la prioré de  
sainct



sainct Leu de Cherens auquel fleuve, il deceut ledit huissier, subtilement : car quand il fut issu de la nef avec aucuns de ses gens il monta sur les plus legers chevaux, & s'en fuyt entandis que ledit Huissier attendoit le retour de ladicte nef qui estoit à l'autre lez du fleuve, dont luy grandement confus & troublé retourna à Paris sans son prisonnier. Le seigneur de Tignouville estant du nombre des seigneurs de la chambre des Comptes, fut arresté audit lieu d'Amiens, par le Baillif d'icelle ville du commandement des Princes dessusdits & emprisonné en l'hostel d'iceluy Baillif. Mais apres ce temps luy & le dessusdit Euesque de Chartres & tous autres prisonniers à Paris, suspens & ostez de l'exécution de leurs offices furent cautionnez, & eurent grace d'aller parmy Paris & ailleurs. Et pource que lesdits Princes & seigneurs ne pouoient entendre au fait de la reformation des choses dessusdictes, pour plus grans besongnes & affaires qu'ils auoient, ils substituerent trois Comtes, c'est à sçauoir de la Marche de Vandosme, & de saint Pol, & aucuns de la chambre de Parlement pour ladicte reformation. Les gens de guerre qui auoient esté euocquez à venir autour de Paris tant par le Duc de Bourgogne comme par les autres seigneurs, furent licentiez & retournerent chacun és lieux dont ils estoient venus en mangeant le pource peuple selon la coustume d'adonc, messire Guichart Daulphin dessus nommé fut par les Princes dessusdits constitué & ordonné souuerain maistre d'hostel du Roy ou lieu dudit deffunct Montagu, lequel Roy estoit malade de sa maladie accoustumée. Adonc l'Euesque de Paris requist ausdits seigneurs qu'on luy laissast par misericorde oster le corps de son frere du Gibet, en suppliant & en plorant piteusement qu'il le peust enseuelir & enterrer. Mais ceste priere & supplication ne luy fut pas accordée par lesdits Princes, lequel Euesque oyant lesdictes responces remply de grand vergongne pour la honteuse mort de sondit frere, & pour la fuitte de son autre frere Archeuesque de Sens. Assez tost apres se partit de son siege Episcopal menant avec luy sa belle sœur femme d'iceluy Montagu & aucuns de ses enfans, car le Duc de Berry auoit ja pourueu vn autre Chancelier en l'office de sa chancellerie, & alla en la terre de ladicte belle sœur assise en Sauoye. Icelle femme estoit fille de sire Estienne de la Grange iadis president en Parlement & frere au Cardinal d'Amiens. Apres pource que le Borgne de Fouquade, appelé aux droits du Roy, ne vint ne comparut, il fut banny par les quarrefourgs de Paris du royaume de France au son de la trompette. Et pareillement furent bannis l'Archeuesque de Sens qui s'estoit rendu fugitif, & plusieurs autres. En outre le Roy de Nauarre, les Ducs de Berry, de Bourgogne, & de Hollande, les Comtes de la Marche & de Vendosme freres, & plusieurs autres grans seigneurs allerent par deuers la Royne de France, & le Duc d'Acquitaine son fils, & luy remonstrerent la cause pourquoy Montagu auoit esté executé, & aussi quelle chose il estoit à faire des inquisitions, des arrests & de la condānation des pechās & declinans, & avec ce, de toute la reformation du royaume, laquelle Royne en fin fut assez contente qu'ils poursuiussent ce qu'ils auoient encōmencé. Nonobstant qu'elle n'estoit pas bié du tout contente de son beau cousin le Duc de Bourgogne lequel auoit si grand gouuernement & puissance ou royaume de France & le doutoit plus que tous les autres, jaçoit ce qu'elle luy mōstrast assez semblant par parolles. Et de rechef fut là traicté le mariage de Loys de Bauiere frere de



ladiète Royne & de la fille du Roy de Nauarre, & luy fut donnée la possession du chasteau de Marcoussi avec toutes les appartenances nouvellement confisquées au Roy par la mort du dessusdit Montagu, laquelle besongne icelle Royne eut grandement pour agreable. Et apres ce qu'iceux seigneurs eurent besongné par aucuns iours audit lieu de Melun, ils retournerent à Paris tous ensemble, & prindrent avec eux maistre Pierre Bochet president en Parlement, & aucuns autres de la chambre des Comptes, eux assemblans diligemment chacun iour & enquerans soigneusement sçauoir comment & desquelles personnes en temps passé les finances du Roy auoient esté receües & despendues. Durant lequel temps le Roy qui auoit esté tresfort malade retourna en santé, & tât que le second iour de Decembre alla de son hostel de S. Pol à cheual vn haubert vestu dessous sa robe iusques à l'Eglise cathedrale de nostre Dame, où il feit son oraison, & portoit derriere luy vn de ses paiges, vne moult belle sallade d'acier & vn azeguaye. Et quand il eut faicte ladiète oraison retourna en sondit hostel de S. Pol. Et le lendemain en personne tint conseil royal, où estoient presens ledit Roy de Nauarre, les Ducs de Berry, & de Bourgongne, & le Duc de Bourbon qui estoit retourné nouvellement. Auquel conseil, fut conclud que le dessusdit Roy manderoit à venir deuers luy à la feste de Noël prochain ensuiuant tous en personne, les Ducs d'Orleans, de Bretagne, de Brabant, de Bar & de Lorraine, les Comtes de Sauoye, d'Aléçon, de Ponthieure & de Namur, de Harecourt & d'Armignac, & generally tous les grans seigneurs de son Royaume & de la Dauphiné, avec plusieurs Prelats & autres nobles hommes. Et alors apres ledit mandement du Roy ledit Duc de Bourgongne manda tresgrand nombre de gens d'armes & de gens de traict en ses pays de Flandres, d'Arthois & de Bourgongne pour la seurté de sa personne. Ouquel temps le Duc Guillaume Comte de Hainault alla deuers la Royne de France à qui il estoit prochain parét, laquelle se tenoit à Melun. Et tant traicta vers elle, qu'elle fut assez contente dudit Duc de Bourgongne lequel elle n'auoit pas bien à grace, & auoit fort soustenu par auant sa partie aduerse, c'est à sçauoir la partie de monseigneur le Duc d'Orleans.

*Comment le Duc Loïs de Bauiere espousa la fille du Roy de Nauarre. Et des seigneurs qui s'assemblerent à Paris en grand multitude par le mandement du Roy.*

## CHAP. LVIII.



Oÿs de Bauiere frere de ladiète Royne, espousa en ces iours audit lieu de Melun la fille du Roy de Nauarre, dont dessus est faicte mention, laquelle par auant auoit eu espousé le Roy de Trinacle, aîné fils du Roy d'Arragon, lequel auoit nagueres esté mort en bataille faicte entre luy d'une part & le Vicomte de Narbonne, & les Sardaniens d'autre part, & fut icelle bataille faicte en Sardanie. Aufquelles nopces fut faicte tresgrand feste de plusieurs seigneurs dames & damoiselles. Et environ le Noël ensuiuant, grand partie des seigneurs que le Roy auoit mandez vindrent à Paris: toutesfois le Duc d'Orleans ne ses freres n'y furent pas. Et la veille dudit iour de Noël, le Roy alla tenir son estat au palais, & demoura là iusques au iour saint Thomas ensuiuant, où il celebra moult solennellement la feste de la natiuité nostre seigneur. Et est à sçauoir que ledit iour seioient à la table du Roy au disner: Premieremēt, au droit  
lé



le maistre Guillaume Bourattier Archeuesque de Bourges qui auoit celebré la messe. Apres luy seioit le Cardinal de Bar, & estoit le dessusdit Roy assis au meilleur lieu de la table moult notablement aorné & vestu d'habillemens royaux, au fenestre se seioient les Ducs de Berry & de Bourgongne. Et seruoient plusieurs Princes à table pour ce iour. Et là furēt apportez tresgrand nombre de vaisseaux d'or & d'argent en quoy autresfois on auoit accoustumé de seruir le Roy aux haultes festes, lesquels vaisseaux long temps par auant n'auoient esté veuz, pourtant qu'ils auoient esté engagez enuers Montagu, & les auoit on retrouuez apres sa mort en son chastel de Marcouffy, & ailleurs où il les auoit fait mettre. Et par l'ordonnance des Princes du sang royal, auoient esté rapportez & remis en l'hostel du Roy, comme dit est, dont plusieurs tant nobles comme populaire de la ville de Paris auoient ce pour fort agreable, & en estoient bien ioyeux de les là veoir, principalement pour l'amour du Roy & de sa tresnoble seigneurie. Si estoient pour ce iour venus deuers le Roy à son mandement grand quantité de Princes: c'est à sçauoir, le Roy de Nauarre, les Ducs de Berry, de Bourgongne, de Bourbon, & de Brabant, le Duc Guillaume Comte de Hainault, le Duc de Lorraine, Loys Duc de Bauiere frere de la Roïne, & bien dixneuf Comtes: C'est à sçauoir, le Comte de Mortaigne frere du Roy de Nauarre, le Comte de Neuers, le Comte de Cleremont, le Marquis du Pont fils au Duc de Bar, le Comte de Vaudemont, le Comte d'Alençon, le Comte de Vendosme, le Comte de Ponthieure, le Comte de S. Pol, le Comte de Cleues, le Comte de Tancarville, le Comte d'Angy, le Comte de Namur, & plusieurs autres iusques au nombre dessusdit. Et si grand cheualerie y auoit avec lesdits Princes que par la relation des heraulx furent trouuez iusques au nombre de dixhuiet cens cheualiers ou plus sans les escuyers. Neantmoins en ceste noble compaignie ne furent pas le Duc d'Orleans ne ses freres ne le Duc de Bretagne, le seigneur d'Allebreth, Connestable de France, les Comtes de Fuses, d'Armignac & plusieurs autres grans seigneurs, jaçoit-ce que de par le Roy y eussent esté mandez comme les autres. Et le iour saint Thomas ensuiuant apres que le Roy eut tenu estat royal au palais, comme dit est, & festoyé honnorablement tous les seigneurs dessusdits, la Roïne mandée par luy, vint en ce propre iour du Bois de Vincenne en la ville de Paris. A l'encontre de laquelle & de son fils le Duc d'Acquitaine, allerent tous les Princes & Prelats accompagnez de tresgrand cheualerie & grand nombre des bourgeois de Paris, qui tous ensemble les conduirent & compaignerent iusques au palais, & là rendit ladicte Roïne au Roy son seigneur en la presence desdits Princes, son fils dessusdit, lequel par auant auoit esté en son gouuernement, afin qu'il appreint, & fut instruiet en armes & autres besongnes necessaires, pour mieux sçauoir en temps aduenir gouuerner sa seigneurie quand besoing seroit.

*Comment le Roy tint estat royal en son palais où estoient les seigneurs dessusdits qui tindrent plusieurs grans conseils sur les affaires de son Royaume.*

CHAP. LIX.

Q iij





Ensuivant les besongnes dessusdictes, le Roy avec la Roynne, en sa compaignie le Duc d'Acquitaine leur fils. Apres qu'il eut tenu plusieurs cōseils sur les affaires & regime de son Royaume fait vn certain iour ordonner en la salle de Parlement dudit palais, vn siege royal de grand magnificence, & là par luy mandez & appelez plusieurs grans seigneurs, Prelats, clergié & autre populaire qui là fut assemblé le Roy en habit Royal seant audit siege, & au plus pres de luy estoient le Roy de Nauarre, le Cardinal de Bar, & à l'autre costé estoient son fils le Duc d'Acquitaine & le Duc de Berry avec les autres Ducs & Comtes seans tous par ordonnance és autres sieges, & pareillement les Prelats, le clergié & la cheualerie, avec grand multitude d'autres gens qui estoient chacun selon son estat. Auquel lieu, fut là dit & remonstré par la bouche du Comte de Tancarville, hōme de belle & notable faconde par le commandement du Roy à haulte & claire voix. Comment Richard nagueres Roy d'Angleterre, gendre du Roy, par Henry de l'Enclastre soy disant Roy d'Angleterre; & aussi par les siens & fauorisans sa partie, en temps de trefues par ledit Henry adonc Comte d'Herby, comme par autres Anglois de ligne royalle dudit Roy Richard suffisamment approuuées, par iceluy frauduleusement & mauuaisement fut occis. Item aussi cōment le ieune Roy d'Escoçe qui lors venoit en France, & lequel estoit allié au Roy, fut prins par les Anglois en tēps de trefues à luy baillées par iceluy Henry où il fut long temps prisonnier. Et aussi furent plusieurs Escoçois en la compaignie du Prince de Galles: c'est a sçauoir Yuain Graindos, accompagnez de plusieurs ses Gallois aussi alliez au Roy, nonobstant lesdictes trefues, plusieurs fois furent trauaillez par guerre des Anglois. Et tant que l'aîné Prince fils dudit Prince, semblablement fut prins & mené en Angleterre deuers & en la garde dudit Henry où il fut detenu prisonnier long temps. Ces choses ainsi faictes, ledit proposant ainsi concluant dit, qu'il sembloit au Roy & luy apparroit, tout ce veu & considéré qu'audit Henry il pouuoit iustement & loyaument porter guerre & contraire audit Henry & à ses Anglois sans à luy plus donner ne prendre aucun respit ne differer. Nonobstant ce dit le proposant que le Roy quelque chose qu'il fait, si vouloit il faire pour l'vtilité de la chose publique de son Royaume, & selon ce qui luy plairoit à faire. Pourquoy chacun là estant mandez de par le Roy de quelque estat qu'il soit, pense & aduise en luy mesmes ce qu'en sera bon de faire, si le reuelle au Roy, ou à son conseil, ou à l'vn d'eux. Et toute la meilleure voye & plus honorable & prouffitable qui se pourra trouuer, le Roy l'aura pour agreable, & adonc l'oncle dudit Roy le plus aîné des Ducs: c'est à sçauoir, le Duc de Berry se leua tout droict, & s'approcha vn peu du Roy deuât son siege, & là à genoulx ployez, dit pour luy & pour tous ceux du sang royal, que toutes les aydes qu'eux & chacun d'eux, chacun en ses terres auoient & leuoient annuellement, semblablement il les quittoient. Ces choses par ledit Duc ainsi dictes & proferées pareillement dit. Aussi pour ceste cause tous les gaiges & prouffits qu'eux & chacun d'eux pour les affaires du Roy & pour estre à son conseil ils prenoient & leuoient annuellement, semblablement ils le quittoient. Apres ces choses ainsi dictes & proferées par iceluy Duc de Berry & par le Roy receües agreablement ledit Duc, du commandement du Roy se r'assist. Apres lesquelles choses ainsi faictes & dictes, ledit Tancarville re-

print



print son propos, disant que le Roy qui là estoit present reuocquoit & rappelloit tous gaiges royaux baillez ou donnez à tous, à quelque personne & de quelque estat qu'il soit, & de fait les annulloit. Et quant à la reformation & gouuernemēt des finances de ce Royaume, le Roy declairoit son intention estre telle, que les reformations données de par luy, & par l'aduis du Comte de la Marche ( qui estoit veufue de sa femme fille du Roy de Nauarre ) & de son frere le Comte de Vendosme, le Comte de S. Pol avec aucuns des seigneurs de Parlement adioincts avec eux, qui reformerent tous ceux qui s'estoient meslez des finances de ce royaume feussent executées sans en excepter personne, tāt de la chambre des Comptes, des Generaulx sur le fait des fināces de cedit Royaume & de l'hostel dudit Roy, & tous receueurs tant du domaine comme des aydes, grenetiers, conterolleurs & generalmente tous ceux qui se mesloient ou estoient entremis des finances de ce Royaume, de quelque estat, degré ou condition qu'ils soient, soient Euesques, Archeuesques ou de quelque dignité. En outre dit ledit proposant que le Roy vouloit & ordonnoit qu'en son absence & ou lieu de luy, que la Royne sa compaignie appelle avec elle aucuns du sang royal, gouuernerait & disposeroit de la chose publique de ce royaume, selon ce qu'il luy feroit & verroit estre bon à faire. Item dit en apres qu'en l'absence de ladicte Royne, le Roy vouloit & ordonnoit que le Duc d'Acquitaine son fils là present, auroit le gouuernemēt en leur absence, par telle condition qu'il feroit & vsferoit par le conseil des Ducs de Berry & de Bourgogne. Apres lesquelles choses par ledit proposant plus plainement ainsi dictes & finées chacun se departit, & le Roy descendit de son siege royal, & à peu de compaignie entra en sa chambre pour disner. Et tous les autres seigneurs, Princes, cheualiers, clergé & populaire s'en allerent à leurs hostels. Et le disner finé, la Royne se partit & laissa son dit fils avec le Roy & s'en alla cedit iour veille de la Circoncision au Bois de Vincenne elle & ses gens. Et le lendemain qui fut le iour de ladicte Circoncision du matin ( le Duc de Bourgogne qui tout seul auoit plus de Princes, de cheualiers & d'autres gentils-hommes que tous les autres Princes ensemble ) donna cedit iour largement & plus de ioyaux au regard des autres Princes estās à Paris qu'ils ne feirent: lesquels ioyaux on a accoustumé de donner cedit iour: & les donna à tous ces cheualiers & nobles de son hostel, qui selon l'estimation & commune voix, se montoient bien quatorze mille florins d'or en certaine signification: c'est à sçauoir faits à semblance de ligne, qu'on appelle muel de masson tant d'or comme d'argent doré, & à chacun bout de chacun muel pendoit vne petite chainette dorée à la semblance d'un plommet d'or en signification, c'est à sçauoir: que ce qui estoit mis par aspre & indirecte voye seroit mis à plain & en son rieuille, & le feroit mettre, où mettroit à equité & droicte ligne de raison, sicomme on pouuoit croire & penser. Item & le iour des Roys ensuiuant, Loys Roy de Cecille aussi mandé de par le Roy, entra à Paris: lequel venoit de la cité de Pise deuers le Pape Alexandre quint, & fait son entrée à grand compaignie de Princes & de clergé qui estoient allez au deuant, & à l'encontre de luy. Et vn peu apres entra à Paris le Cardinal de Thurry, enuoyé de par nostre saint Pere deuers le Roy, lequel fut receu à grand honneur, & aussi fut Phillebert de Lignac grād maistre de Rhoddes, chief de la religion de S. Jean de Ierusalem, lequel venoit d'Angleterre. Et est vray que



ce temps pendant le Roy donna congé à ceux qu'il auoit mandé, & pareillement le Duc de Bourgogne à ses gens, excepté qu'il retint de sa cheualerie & compaignie de cent à six vingts gentils-hommes d'armes avecques ceux de son hostel, pour la seurté de luy & garde de son corps, & les autres renuoya à leurs maisons. Le Duc aussi & aucuns autres grans seigneurs avecques leurs gens issirent hors de Paris, & s'en retournerent en leurs pays. Mais ainçois qu'ils se partissent, il fut vray que du vouloir & consentement du Roy & de la Royne sa compaignie, le Duc d'Acquitaine leur fils fut gardé & baillé en garde & doctrine pour le garder de peril au Duc de Bourgogne: lequel ne desiroit autre chose, & à ce auoit moult labouré & faict labourer par aucuns du sang & lignaige du Roy, & mesmement par son oncle le Duc de Berry, lequel f'estoit plusieurs fois & par moult de manieres excusé d'auoir le gouuernement enuers la Royne, & auoit tant fait enuers elle, que le sire de Dolhaing cheualier son principal escuyer, conseillier & aduocat du propre consentemēt de la Royne fut fait Chancellier du Duc d'Acquitaine, & le seigneur de S. George premier chambellan, & les chasteaux du Crotoy & de Biauram sur Chance luy furent baillez en garde à sa vie, moyennant vne pension aux Chastellains predecesseurs accoustumée de payer, ou lieu desquels Chastellains il meit & constitua deux de ses cheualiers. C'est à sçauoir le seigneur de Croÿ au Crotoy, & le seigneur de Humbercourt à Biauram, & messire Regnier Pot fut fait à sa priere gouuerneur pour monseigneur le Duc d'Acquitaine au pays du Daulphiné. Et apres ces besongnes ainsi faictes, le Roy rencheut malade de sa maladie accoustumée & fut mis en bonne garde, & d'autre part ceux qui estoient commis à la reformation, besoignoient soigneusement chacun iour. Et tant y continuerent, qu'à plusieurs de ceux qui auoient gouuerné les finances furent recourez grans deniers, & adonc les Princes & le conseil royal alloient souuent de Paris au Bois de Vincenne deuers la Royne où elle se tenoit, & sans laquelle nulles grans besongnes ne se passoiēt: durant lequel temps le Duc de Berry & de Bourbon se tindrent aucunement mal contents de ce qu'ils n'estoient point si souuent appelez au conseil royal qu'ils auoient accoustumé, & avec ce qu'ils n'auoient pas si grand auctorité, & pource eux voyans ainsi cōme exillez, prindrent congé au Roy, à la Royne, & aux autres Princes, & s'en alerent chacun en son pays. Et alors le Cardinal de Thurry vint à Paris, & feit requeste audit conseil & à l'vniuersité, qu'on vouldist faire à nostre saint Pere le Pape Alexandre de deux dix sur l'Eglise Françoisie, pour les grans affaires qu'il auoit, laquelle requeste ne luy fut pas accordée: pource que ceux de l'vniuersité s'opposerent à l'encontre pour toute ladicte Eglise. Et pour y obeïr plus amplement, requirerent & obtindrent vn mandement royal, par lequel il estoit commandé à tous officiers royaux, que toutes gens venans és mectes de leurs offices faisans telles & pareilles requestes fussent expulsez & deboutez hors du Royaume, les mendiens pareillement auoient impetré vne bulle, laquelle ils apporterent à Paris contenant moult de nouuelletez, desquelles ils n'auoient pas accoustumé d'vser. Et estoit la conclusion telle, finalement que les dix & autres choses comme les oblations des Eglises leur deuoient mieux appartenir qu'aux curez, & que proprement ils sont curez: par ce que ceux qui se confessent à eux ne sont tenuz d'eux confesser à leursdits curez: & ce prescherent publiquement  
parmy



parmy Paris . Et les autres de ladicte vniuersité preschoient le contraire & par ainsi fut audit lieu de Paris en temps de karesme grand discord & dissension entre icelle Vniuersité & lesdits Mandiens, & tant qu'ils furent deboutez & priuez de l'vniuersité. Mais assez brief apres, les Iacobins comme les plus sages des autres, renoncerent à ladicte bulle . Et iurerent & promeirent que iamais n'en vseroient ne aussi des autres priuileges à eux concedez . Et par ainsi furent reconseillez avec ladicte vniuersité. Et adonc le Pape tenoit sa court à grand puissance en la ville de Boulongne la Grasse .

*Comment grand dissension se fement en cest an entre le Roy de Poullanne d'une part, & le grand maistre de Prusse & ses freres d'autre part.* CHAP. LX.

**E**N cest an fut meüe vne grād discorde entre le Roy de Poullanne d'une part, & le grand maistre de Prusse: & assembla ledit Roy tresgrand ost de diuerses nations, lesquels il mena audit pays de Prusse pour iceluy destruire: mais prestement le dessusdit maistre & ses freres allerent contre luy à grand puissance en monstrant semblant de vouloir à iceluy. liurer bataille. Et quand ils furent l'un deuāt l'autre par la vouldenté de Dieu le Roy de Poullanne avec tout son ost se partit: ouquel estoient vingt mille Tartarins & plus, sans les Poullanniens & autres Chrestiens à luy alliez, dont il auoit grand nombre, retourna en son pays, & depuis par l'exhortation du Roy de Poullanne, le Roy de Lituaire & autres Sarrazins sans nombre entrerent en Prusse en la partie deuers la mer, laquelle à peu pres fut toute destruicte . Et furent prins par ceux de Prusse bien mille Sarrazins & plusieurs occis. Ce Roy de Poullanne dessus nommé, iadis Sarrazin fut fils du Roy de Lituaire, qui par grand couuoitise & ambitio de regner occist son dit pere, & pour ceste cause fut dechassé du pays & se retrahit à refuge deuers le Roy de Poullanne qui pour lors regnoit, lequel le receut honnorablement & fut grandement priué & familier avec luy, & aussi acquist l'amour des Princes & du Royaume. Pourquoy apres la mort dudit Roy de Poullanne, les Poullanniens de commun accord esleurent iceluy homicide en Roy, & le feirent baptiser & estre Chrestien, & puis espousa & print à femme la veufue Royne du Roy nagueres trespasé, & depuis ce temps obtint iceluy Royaume assez heureusement . Ouquel temps Sagimont Germain du Roy de Boëme Roy de Hongrie print à femme la sœur de la Royne de Poullanne dessus nommée, lesquelles estoient filles d'un Comte d'Allemagne nommé le Comte de Cely & de la lignée royale du royaume de Hongrie. Auquel royaume ledit Roy de Poullanne contendoit à cause de ladicte femme, & pource, print occasion de trauailler ceux de Hongrie & de Prusse, en madant secrettemēt par ses lettres au Roy de Lituaire son cousin germain à luy allié qu'il entrast en Prusse vers la mer, & luy avec ses Poullanniens & autres viendroit à l'encontre de luy par autres parties en destruisant tout le pays: mais son intention fut descouuerte par ce que lesdictes lettres & son messagier furent trouuez du Roy de Hongrie: lequel quand il fut aduertý des besongnes dessusdictes mit si bonne prouision avec le maistre de Prusse chacun en son pays, que les dessusdits ne leur porterent guerre ne dommage.



*Comment le Duc de Berry retourna à Paris au mandement du Roy, du mariage du fils au Roy Loïs, & de l'assemblée qui se fait à Meun le chastel.* CHAP. LXI.

**A**V commencement de cest an fut le Duc de Berry remandé de par le Roy à venir à Paris, lequel y reuint, & fut enuoyé avec le Roy de Nauarre à Giens sur Loire, pour appaiser le discord d'entre le Duc de Bretagne d'une part, & le Comte de Ponthieure & sa belle mere d'autre part. Lesquelles deux parties jaçoit-ce qu'ils eussent promis d'y comparoir en personne n'y furent pas : mais y enuoyerent leurs procureurs pour eux. Lesquels de Nauarre & de Berry, meirent & rendirent grand peine par moult & diuerfes manieres à iceux mettre d'accord : mais pource qu'ils ne pouuoient besongner meirent la deffence en la main du Roy par le consentement desdictes parties, de lors iusques à la feste de Toussaints ensuiuant, & apres s'en retournerent à Paris. Ens ouquel temps fut fait & cōclud le mariage de laisné fils du Roy Loïs, & de Katherine fille au Duc Iean de Bourgongne, laquelle par messire Iean de Chaallon seigneur de Darlay, le seigneur de sainct George, messire Guillaume de Saufdiuers, & messire Iaques de Courtiamble fut conduicte & menée iusques à Angiers, & là deliurée à la Roïne femme dudit Roy Loïs : laquelle la receut moult aggreablement & fait grand chiere & grand honneur aux cheualiers dessusdits. Et à tous ceux qu'ils auoient amenez avec eux. Et apres aucun peu de iours s'en retournerent à Paris deuers leur seigneur ledit Duc de Bourgongne. Et en ce mesmes temps s'assemblerent en la ville de Meun le chastel, les Ducs d'Orleans & de Bourbon, les Comtes de Cleremont, d'Alençon & d'Armignac, messire Charles d'Allebreth Connestable, avecques plusieurs autres seigneurs de grand puissance & auctorité : lesquels eurent par plusieurs iournées de grans cōseils l'un avec l'autre sur leurs affaires, & par especial sur la mort du Duc d'Orleans deffunct, pour sçauoir principalement comment ne par quelle maniere on pourroit proceder contre luy pour auoir vengeance de sa personne, & comment on s'y auroit à conduire. Si furent mises auant plusieurs & diuerfes opiniōs. Et estoit l'un d'aduis que le Duc d'Orleans luy fait guerre mortelle à l'ayde de ses seigneurs, parés, amis, alliez & bien vueillās par toutes les manieres que faire se pourroit. Les autres disoient qu'il valloit mieux à tenir autres termes, c'est à sçauoir de remonstrer au Roy leur souuerain seigneur, qu'il fait iustice & raison dudit Duc de Bourgongne, & qu'à luy appartenoit à le faire : car il touchoit cōme pour la mort de son propre frere germain. Et en fin pource qu'ils ne peurent estre tous confermez à vne seule opinion, prindrent iour estre ensemble à autre iournée. Mais deuant qu'ils se departissent fut traicté le mariage de Charles Duc d'Orleans, & la fille audit Comte d'Armignac, laquelle estoit niepce au Duc de Berry de par sa mere. Et aussi sœur au Côte de Sauoye. Et ce fait, les seigneurs dessusdits se departirent & retournerent chacun en sa seigneurie. Et alors le Duc de Bourgongne estant à Paris gouernoit plus que tous les autres Princes du royaume, & se conduisoient les besongnes & affaires par luy & ses fauorisans, dont il n'est point à doubter qu'il auoit plusieurs enuieux.

*Comment*



*Comment le Roy Loïs s'en alla en Prouence & à Boulongne contre le Roy Lancelot.  
Et de la mort du Pape Alexandre. Et l'election du Pape Iean. CHAP. LXII.*

**E**N ce temps le Roy Loïs se partit de Paris à tout grand nombre de gens d'armes, & s'en alla en Prouence & de là à Boulongne la Grasse, pour aller à l'encontre du Roy Lancelot son aduersaire, deffendre & garder son païs de Naples, où le Roy continuellement faisoit de grans maux & inuasions. Pourquoy, comme dit est, fut faicte par ledit Roy Loïs tresgrande assemblée de nauires & de gens d'armes pour y resister, & avec ce auoient esperance que le Pape Alexandre leur feroit ayde & assistance en tout ce qu'il leur seroit possible, tant d'argent comme d'armes: mais la besongne en briefs termes tourna tout autrement qu'il ne pensoit: car lendemain de l'inuention sainte croix, ledit Pape Alexandre fut empoisonné en la ville de Boulongne la Grasse, comme il fut commune renommée, & mourut tres-piteusement. Et furent ses entrailles enterrées & ses obseques faits en l'Eglise des Cordeliers. Et celebra la messe le Cardinal de Vimiers, les diacres & soubdiacres furent les Cardinaulx d'Espaigne & Thurry, & estoient tous ceux de la court vestus de noir, faisans tresgrand dueil.

E N apres le sixiesme iour de May, le corps dudit Pape qui estoit embaulmé de fines espices fut mis en la salle où il tenoit son audience, & vestu de vestures sacerdotales, la face descouuerte & vns gāds en ses mains & nuds pieds descouuers: & quiconques le vouloit baiser faire le pouuoit, & furent faits neuf seruiCES des morts là mesmes. Et y auoit vingt Cardinaulx, deux Patriarches, quatre Archeuesques, vingt & quatre Euesques, avecques plusieurs Abbez, Docteurs & autres plusieurs gens d'Eglise. Ses armes estoient mises aux quatre bouts du cercueil. Et furent dictes par neuf iours messes & seruiCES tout ainsi & par telle maniere que le lendemain qu'il fut trespasé. Les messes furent celebrées l'une apres l'autre par les Cardinaulx, & le neufiesme iour dudit mois, fut le corps porté ausdits Cordeliers pour l'enterrer, & le porterent, c'est à sçauoir, au deuāt les Cardinaulx de Vimiers & de Challant: Et par derriere le Cardinal d'Espaigne, le Cardinal de Thurry: le Cardinal Milles alloit deuant qui portoit vne croix deuant le corps, les coristes furent les Cardinaulx de Bar non pas celui qui estoit fils au Duc de Bar, mais de Bar en Puille, & l'autre fut le Cardinal des Vrsins. Le Cardinal de Vimiers feit ce seruiCE comme il auoit fait à l'enterrement des entrailles. Et ce fait, les Cardinaulx retournerent chacun en son hostel tous vestus de noir. Et apres disner se rassemblèrent au palais où ils furent en conclaue depuis le mercredi iusques au samedi ensuiuant. Et là, en Balthazar Cardinal de Boulongne plusieurs desdits Cardinaulx eurent regard ensemble, & l'esleuerēt en souuerain Pasteur de toute l'vniuerselle Eglise. Les autres qui n'estoient pas bien d'accord de ladicte election, quand ils veirent qu'ils estoient en trop petit nombre se consentirent avec les autres, & puis le prindrent & le menerent en l'Eglise cathedralle de S. Pierre. Et là en le mittrant prindrent le serment de luy. Et apres le menerēt en l'hostel de son predecesseur, c'est à sçauoir au palais. Et tātost toute sa maison fut fustée, & emporté tout ce qu'on y trouua, & mesmement n'y demoura huys ne fenestre que tout ne fut osté. Et le lendemain l'appellerent Iean premier



de ce nom, Pape xxiiij. Et là, furent faictes cedit iour tât de noblesses & de ioyeufetez qu'il seroit fort à l'estimer. Et furent à la procession xxiiij. Cardinaulx, deux Patriarches, trois Archeuesques, xxvij. Abbez tant mitrez comme non mitrez, sans les autres gens d'Eglise qui estoient en tresgrād nombre. Et porta ledit Pape pour ce iour vne mitre vermeille bordée de blanc. Et le samedi ensuiuant xxiiij. iour de May iceluy Pape receut en la chappelle de son predecesseur les sainctes ordres de prestre. Et celebra la messe le Cardinal de Vimers, & fut diacre le Cardinal de Challant. Auquel seruice furent tous les Prelats dessus nommez. Et le lendemain qu'il fut dimêche ledit Pape celebra la messe en ladicte Eglise de S. Pierre, & auoit ledit Cardinal de Vimers aupres de luy qui luy monstroie le seruice, & là estoient le Marquis de Ferrare, & le seigneur de Maleste qui tenoient le bacin où le Pape lauoit ses mains. Lequel de Ferrare auoit amené en sa compagnie liiiij. cheualiers tous vestus de vermeil & d'azur, & auoit cinq trôpettes & quatre paires de menestriers tous ioüans chacū de son instrumēt. En outre la dessusdicte messe celebrée par ledit Pape Iean, il fut porté hors de ladicte Eglise, & là sur vn eschauffault bien & noblement ordonné ou paruis d'icelle Eglise fut assis & posé, & là fut couronné presens ceux qui là estoient, dont il y auoit xxvj. Cardinaulx, ij. Patriarches, v. Archeuesques, xxvj. Euesques, xxviiij. Abbez mitrez, & xxij. non mitrez, avec grand multitude de Docteurs & autres gens d'Eglise. Et luy estant en ladicte chaire qui estoit toute couuerte de drap d'or, estoient autour & à l'environ de luy, les Cardinaulx de Vimers, de Challant, de Millet & d'Espaigne, de Thurry & de Bar dessus nommé à tout des estoupes & du feu: lesquels en mettant le feu esdictes estoupes disoient au Pape. Pere saint, ainsi se passe la gloire du monde. Et feirent & dirent ainsi par trois fois, & à chacune fois estaindoient le feu & ralumoient. En apres le Cardinal de Vimers dit sur luy & sur sa couronne aucunes oraisons, lesquelles finées ils meirent ladicte couronne sur son chief, & estoit icelle couronne double de trois couronnes, c'est à sçauoir la premiere d'or, qui enuironnoit le front par dedans la mitre. La seconde d'argent & d'or, & n'estoit qu'au meillieu d'icelle mitre. Et la tierce, estoit d'or tres precieux & pur, & surmontoit ladicte mitre: & apres, luy couronné & descendu dudit eschauffault, fut mis sur vn cheual qui estoit tout couuert de vermeil. Et les cheuaux des Cardinaulx, Patriarches, Euesques, Archeuesques estoient tous couuers de blanc: Et cheuaucha en cest estat de rue en rue par toute la cité faisant le signe de la croix iusques en la rue où demouroient les Iuifs, lesquels offrirent par escrit leur loy, laquelle de sa propre main il print & receut, & puis la regarda, & tantost la iecta derriere luy en disant. Vostre loy est bone, mais d'icelle la nostre est meilleure. Et luy party de là les Iuifs le suiuiroient le cuidant ataindre, & fut toute la couuerture de son cheual deschirée, & le Pape iectoit par toute les rues où il passoit monoye: c'est à sçauoir deniers qu'on appelle quatrins & mailles de Florence & autres monnoyes, & y auoit deuant luy & derriere luy deux cens hommes, d'armes, & auoit chacun en sa main vne masse de cuyr, dōt ils frapportoient les Iuifs tellement que c'estoit grād ioye à veoir. Et puis s'en retourna en son palais le lendemain avec les xxviiij. Cardinaulx vestus de rouge, trois Patriarches vestus ainsi, dix Archeuesques, xxx. Euesques, aussi semblablement vestus & mitrez de blanches mitres, xl. Abbez tant mitrez comme non mitrez, Le Marquis de Ferrare, le seigneur



seigneur de Maleste, le sire de Gaucourt, & des autres xliij. tant Ducs, Comtes comme cheualiers de la terre d'Italie vestus de parement de leurs liurées. Et en chacune rue deux & deux menans le Pape par le frain de son cheual, l'un à dextre & l'autre à fenestre. Et là estoient trente six busines ou trompettes & dix paires de menestriers sonnans d'instrumens musicaux, & en chacune couple auoient trois menestriers, & si y auoit chantres par especial les chantres de la chappelle de son predecesseur, aussi les chantres des Cardinaux & plusieurs d'Italie qui tous cheuauchioient deuant le Pape, qui chantoient motets, virlays, & chantoient moult hault. Et quand il fut venu en son palais, il donna sa paix à tous les Cardinaux. Lesquels par ordre & degré en degré le baiferent ou pied, en la main & en la bouche. Et commença le Cardinal de Vimers, & en apres les Patriarches, Archeuesques, Euesques & Abbez, & cōsequēment les autres gens d'Eglise. Et par les quatre clemens donna sa beneïsson à tous estans en estat de grace, & à ceux qui n'y estoient pas, il les dispensa iusques à quatre mois apres ensuiuant affin que pendant le temps ils s'y meissent, en priant que pour son predecesseurs Pape Alexandre chacun dit trois fois Pater noster, &c. Et de là s'en alla au dîner & estoit enuiron l'heure de douze heures, & quand ledit mystere fut commencé il estoit entre cinq & six heures du matin, pour ladicte solēnité de luy, chascū feït feste par l'espace de huit iours par toute la cité de Boulongne, & en chacun college de l'Eglise cathedrale de saint Pierre feïrent processio entour ladicte Eglise, & estoit tout le college vestu de chappes vermeilles : & pareillement feïrent les Chartreux du mont saint Michel qui est dehors les murs de Boulongne. Et le lendemain, c'est à sçauoir le xxv. iour dudit mois de May ledit Pape Iean xxiiij. conferma sa court, & aux Cardinaux, Patriarches, Archeuesques, & Euesques, au Marquis de Ferrare & aux Heraulx d'Italie donna plusieurs dons & diuers. Et furent faïctes grans festes & dances en sonnāt plusieurs & diuers instrumens musicaux. Et le vingt sixiesme iour ensuiuant reuocqua tout ce que le Pape Alexandre auoit fait, excepté ce qu'il auoit confirmé, & ce qu'il estoit accepté ou prins possession corporelle ou espirituelle. Item le vendredy apres le couronnement dudit Pape, le Roy Loys vint à Boulongne, à l'encontre duquel allerent en belle ordonnance hors la ville vingt deux Cardinaux, deux Patriarches, six Archeuesques, vingt Euesques & dix huit Abbez. Et luy entrant en la cité alla tout droit deuers le Pape, & estoit vestu de vermeil & son cheual estoit couuert & paré de clochettes dorées, & auoit enuiron à sa compaignie cinquante cheualiers vestus de ses parures, & le derrain iour de May que le Roy arriua, fut tresnoblement receu dudit Pape. Et le lendemain les Florentins vindrent deuers luy, & luy feïrent reuerence papalle, & estoient trois cens cheualx, entre lesquels auoit xvij. cheualiers vestus de vermeil à beaux plumats pailletez d'or. Et auoit six trompettes, deux heraulx & dix hommes iouans d'instrumēs de musique. Et apres ce qu'ils eurent faïcte ladicte reuerence au Pape retournerent en leurs hostels, & le lendemain à court. Et pource qu'ils estoient alliez au Roy Loys, supplierēt au Pape qu'il voulsist au Roy bailler confort & ayde cōtre son aduersaire le Roy Lancelot, disans qu'ils luy bailleroient & feroient toute l'ayde & assistēce qu'ils pourroient tāt d'argent cōme d'hommes d'armes, & estoient iceux Florētins moult courroucez & troublez du dommage que les Geneuois auoient nagueres fait au Roy Loys



sur la mer deuant le port de Gennes: car il est vray qu'iceluy Roy passant par deuant la ville de Gennes venant de Marseilles à tout cinq gallées leſdits Geneuois qui estoient au Roy Lancelot furēt desplaisans de ce qu'il passoit ainsi sans auoir desplaisir, & pource en la faueur de son aduerſaire meirēt ſus bien en haſte quinze gallées ou enuiron, leſquelles ils fournirent d'arbaleſtriers & de gens d'armes leſquels ils enuoyerent à l'encontre de son autre nauire qui le ſuiuoit: leſquels il rencontrerent, & ruerent ius en amenant iceux priſonniers avecques toutes leurs bagues audit lieu de Gennes, excepté vne naüie laquelle par force de voilles reculla tant qu'elle eſchappa toute ſeulle, & retourna à Marſeilles dont elle estoit partie. Neantmoins ledit Pape ouye la requeſte des Florentins print aucunes dilations pour eux reſpondre. Et pource que bōnement ne pouoient faire ce dont ils le requeroient, par ce que par auant les Genneuois estoient alliez avec luy, & auſſi qu'il auoit fait aucunes promeſſes à iceluy Roy Lancelot, fut la beſongne prolongée. Et ce nonobſtant fut, comme dit eſt, le deſſuſdit Roy Loys treſhonorablement & agreablement feſtoyé du Pape & de ſes Cardinaulx: & apres ſe partit aſſez content de toute la court, & retourna en Prouuēce. Et le premier iour de Iuing enſuiuant, la court dudit Pape fut ouuerte, & ſigna pluſieurs ſupplications & benefices & de graces expectatiues. Et tout ce qu'on luy requeroit honorablement, ſi qu'il fut raſſonnable il le ſignoit: & dés lors commēça à tenir audience publique: & feit tout ce qu'à ſon office de Papalité appartenoit.

*Comment le grand maiſtre de Pruſſe alla à grand puiſſance de Chreſtiens au Royaume de Liëtuaire pour le deſtruire & depopuler de tous points. CHAP. LXIII.*



LE xvj. iour de Iuing de ceſt an mille cccc. & x. le grād maiſtre de Pruſſe accompaigné de pluſieurs ſes cheualiers freres, & autres de diuerſes nations, iuſques au nombre de ccc. mille Chreſtiens, entrerent au Royaume de Liëtuaire pour le deſtruire & depopuler: au deuant deſquels vint tātōſt à l'encontre le Roy d'iceluy Royaume, & avec ce le Roy de Samart: & estoient bien cccc. mille Sarrazins, & ſ'assemblerent l'un contre l'autre en bataille. Et eux assemblez les Chreſtiens eurēt victoire, & y demoura bien xxxvj. mille morts deſdits Sarrazins: entre leſquels furent les principaulx l'Admiral de Liëtuaire, & le Conneſtable de Samart: & les autres avec le remanant ſ'en fuirēt. Et quand aux Chreſtiens en demoura morts ſur la place enuiron deux cens: mais il y en eut moult de naurez. Et aſſez toſt apres le Roy de Poullanne, qui estoit grand ennemy dudit grand Maiſtre de Pruſſe (& lequel fainctement n'auoit pas guere ſ'eſtoit fait Chreſtien, afin de paruenir audit Royaume de Poullanne) vint avec ſes Poullannois en l'ayde des deſſuſdits Sarrazins, leſquels il enhorta moult de recommēcer la guerre contre les Pruſſiens: & tāt que huiēt iours apres ladiète deſconfiture ſ'assemblerent l'un cōtre l'autre: c'eſt à ſçauoir ledit Roy de Poullanne, & les deux Roys deſſus nōmez d'une part, qui auoient bien ſix cens mille cōbattans, contre ledit maiſtre de Pruſſe, & pluſieurs autres grans ſeigneurs Chreſtiens. Leſquels par iceux Sarrazins furent deſconfits & morts ſur la place bien lx. mille ou plus. Entre leſquels fut mort ledit Maiſtre de Pruſſe & vn gentil-hōme cheualier de Normandie nōmé meſſire Ieā de Ferriere & ſils du ſeigneur de Freuille: & de Picardie le ſils du ſeigneur du Bos d'Ancquin. Et comme il fut cōmu-

ne



ne renommée, la besongne fut perdue par la coulpe du Conneſtable du Roy de Hongrie, lequel eſtoit en la ſeconde eſchelle des Chreſtiens, & ſe departit luy & tous les Hongrois. Neantmoins leſdits Sarrazins n'emporterēt pas la gloire ne la victoire ſans perte: car ſans les Poullanniens dont il y en mourut bien dix mille, moururēt auſſi bien outre le nombre de ſix vingts mille Sarrazins: cōme tout ce fut rapporté par les heraulx, & auſſi par le baſtard d'Eſcoçe qui ſe nōmoit Comte de Hembe. Y eſtoient auſſi le ſeignr de Kyeuraing, & Iean de Grez Hānuyers, & auec eux bien xxiiij. gentils-hōmes de leur paÿs de Hainault qui eſchapperent de ladicte bataille, & le plus toſt qu'ils peurent retournerēt en leur paÿs. Laquelle bataille ainſi finée leſdits Sarrazins entrerent en Pruſſe, & le deſtruirent en moult de lieux, & tant que xij. villes fermées prindrēt en peu de temps, & les degaſterēt. Et encores euſſent perſeueré de mal en pis, ſe n'eut eſté vn vaillāt cheualier nōmé Charles de Mouroufle de l'ordre de Pruſſe, leſq̃l rasſembla de rechef grād nōbre de Chreſtiens, à l'ayde deſquels par la force, vigueur & bon gouuernemēt recouura pluſieurs deſdictes bōnes villes, & en fin debouta dudit paÿs iceux Sarrazins.


*Comment le Duc de Berry ſ'en alla de Paris en ſon païs, & depuis à Angiers où il ſallia avec le Duc d'Orleans & autres Princes de ſon party.* CHAP. LXIIII.

**L**Tem eſt verité qu'en ces propres iours le Duc de Berry, pource qu'il n'auoit point ſi grand audience & gouuernemēt autour du Roy & du Duc d'Acquitaine qu'il auoit accouſtumé, il en print treſgrād deſplaiſance & retourna en ſon paÿs non content de ceux qui auoient le gouuernemēt, & par eſpecial de ſon neveu & filleul le Duc de Bourgongne. Et brief enſuiuant alla à Angiers où furent assemblez les Ducs d'Orleans, & de Bourbon, & tous les grans ſeignrs de ceſte alliāce. Leſquels tous enſemble en l'Egliſe cathedrale iurerent & promeirēt par leurs ſermés moult ſolennellemēt de garder dorſnauant l'honneur & proffit l'un à l'autre, en promettāt que tous ceux qui voudroient porter contraire ou dōmage contre aucuns d'eux, excepté le Roy, ils feroient ſçauoir & ſ'entretiēdroient tous enſemble en bōne vnion & fraternité ſans iamais aller au contraire par quelque maniere que ce fut. Deſquelles alliāces pluſieurs grās ſeigneurs de France feirent peu de ioye. Et brief enſuiuant vindrēt les nouuelles d'icelles à Paris deuers le Roy & ſon grād conſeil, qui en fut moult eſmerueillé, & non point content. Et pource pour l'enhort du Duc Iean de Bourgongne & d'aucūs autres iſſirent de Paris accōpaignez du Duc de Brabant & du Comte de Montagu avec grand cheualerie, & ſ'en alla à Senlis, & de là en la ville de Creil, pour reprendre & remettre en ſa main le chaſtel dudit lieu, q̃ tenoit de par luy le Duc de Bourbon qui pour la garde y auoit cōmis de ſes gens, leſquels au plus longuement qu'ils peurēt le rendirent, tāt que par leur attargeatiō, le Roy ne ceux qui eſtoient avec luy ne le prindrēt pas bien en gré, & pource que de prime face n'auoient voulu obeïr, furent prins priſonniers & menez tres deſtroictemēt liez ou chaſtellet à Paris. Et depuis à la reſq̃ſte de la Cōteſſe de Cleremōt couſine germaine du Roy furent deliurez, & le lendemain le Roy cōmeit autres gardes, & puis ſ'en retourna à Paris. Pour lequel voyage les Orleānois furent treſmal contens, & continuerent chacun iour d'assembler gens à treſgrand puiffance, laquelle aſſemblée ne fut pas plaiſante au Duc de Bourgongne, doubtant que le Duc d'Orleans & ſes freres n'euffent voulēté d'enfraindre la paix nagueres faiçte



par le Roy en la cité de Chartres, ou que luy & ses alliez ne venissent à main armée, en la ville de Paris pour auoir le gouuernemēt du Roy, & du Duc d'Acquaine. Et pour à ce obuier, tātost & hastiuement fait faire & publier en plusieurs parties du royaume certains mandemens royaux, affin d'assembler gēs d'armes à venir à Paris ou és villages d'entour pour resister contre ceux qui mal luy voudroient. Et ce conclud & conferma avec ses freres le Roy de Nauarre & aucuns autres ses fauorisans, qu'il se deffendroient contre tous ceux de sa partie aduerse, & avec ce fut publié de par le Roy en plusieurs & diuers lieux que nul n'allast en armes en la compagnie desdits Duc de Berry ne d'Orleans ne leurs alliez sur confiscation de corps & de biens. Lesquels seigneurs, nonobstant lesdictes deffences continuerent de faire leurs assemblées en tresgrand nombre, & mesmement contraignirent leurs subiects, à les seruir & accompagner, c'est à sçauoir ceux qui estoient delayans d'y aller. Si fut pource temps faicte tresgrand assemblée ou royaume de France tant d'une partie comme d'autre ou preiudice du poure peuple. Et se tindrent tous les seigneurs, qui vindrent pour seruir le Roy à Paris : & leurs gens se logerent sur le plat pays en l'Isle de France, & l'autre partie fait son assemblée en la cité de Chartres & ou pays à l'environ, & pouoient estre comme il fut estimé par gens à ce cognoissans bien six mille harnois de iambes quatre mille arbalestriers, & seize cens archers, sans les gros varlets, dont il y en auoit tresgrand nombre. Et quand à la compagnie qui estoit venue au mandement du Roy & du Duc de Bourgongne on l'estimoit outre le nōbre de seize mille combattans, tous gens de bonne estoſſe. Durant lequel temps, à la requeste du Duc de Bourgongne, le Roy de Nauarre, & le Comte de Mortaigne son frere, traicterent la paix du Duc de Bretagne leur nepueu & du Comte de Ponthieure gendre dudit Duc. Et ce fut fait sur l'esperance que ledit Duc de Bretagne viendrait seruir le Roy avec ses Bretons & delaitroit les Orleannois ausquels il auoit promis de les seruir, & pour luy auolenter. Apres que ladicte paix fut accordée entre les parties dessusdictes luy furent enuoyez vingt mille escus d'or pour payer ses gens d'armes. Et aussi furent baillées grans nombres de finances au seigneur d'Albreth Connestable de France affin qu'il assemblast gens d'armes pour amener à Paris au seruice du Roy, de laquelle chose faire il n'auoit pas grād volenté, mais estoit du tout affecté & allié au Duc d'Orleans & à sa partie comme en assez brief terme ensuiuant ce fut assez notoire. &c.

*Comment le Duc de Bourbon mourut, & du mandement du Roy, & des lettres que enuoyerent le Duc d'Orleans & ses alliez aux bonnes villes. CHAP. LXVI.*



N apres durant ces tribulations Loys Duc de Bourbon oncle du Roy de France de par sa mere, lequel auoit bien soixante ans d'aage, pour ce qu'il se sentit aggraué d'aage & de maladie, se fait mener à Moulins en Bourbonnois en son hostel, auquel lieu il trespassa, & fut enterré en l'Eglise des chanoines, laquelle il auoit fondée en son temps. Auquel Duc succeda son seul fils le Comte de Clermont : lequel apres qu'il eut par aucuns peu de iours esté en grans lamentations, fait faire le seruice de son feu pere, & ordonné ses besongnes s'en retourna deuers le Duc d'Orleans & les autres seigneurs à Chartres, & là du tout se r'allia avec iceux, en ensuiuant la promesse & la trace dudit



dudit Duc de Bourbon son pere. Lequel Duc auoit tres long temps tenu , & tenoit encores à sa mort de par le Roy l'office de grand Chambellan de France. Lequel office à la priere du Roy de Nauarre & du Duc de Bourgongne fut donné par ledit Roy au Comte de Neuers à en vser selon la forme & maniere accoustumée, ouquel temps aussi la Duchesse de Bretagne fille du Roy, accoucha d'un fils, pour lequel leuer elle enuoya prier son frere le Duc d'Acquitaine: mais pour ce faire en son lieu y fut enuoyé messire Dauid de Brimeu cheualier seigneur de Humbercourt à tout certains nobles ioyaulx, que luy fait donner & presenter ledit Duc d'Acquitaine, & entre-temps, le Roy, & son grand conseil renuoyèrent encores vne fois aucuns mandemens par tous les bailliages & seneschauccées du royaume, contenant que sans delay tous ceux qui auoient accoustumé d'armer tant fieufez comme arriere fieufez, venissent à Paris deuers luy pour le seruir contre les Ducs d'Orleans, de Berry, & de Bourbon, les Comtes d'Alençon & d'Armignac, & autres ses alliez, lesquels outre ses deffences & commandemens festoient efforcez & efforçoient chacun iour de faire assemblée de gens d'armes, en degastant son royaume & ses subiects. Et pareillement les dessusdits Ducs & Comtes escriuirent deuers le Roy & l'vniuersité de Paris & plusieurs autres bonnes villes & citez, lettres contenans leur intention, & la cause pourquoy ils faisoient ces assemblées, entre lesquelles ils en enuoyerent vnes à la cité d'Amiens, desquelles la teneur s'ensuit, & estoient signées de leurs seings manuels.

Les Ducs de Berry, d'Orleans, de Bourbon, & Comtes d'Armignac & d'Alençon. A noz treschers & bien amez citoyens, bourgeois & habitans de la ville d'Amiës salut & dilection. Nous escriuons à nostre trefredoubté & souuerain seigneur monseigneur le Roy de France en telle maniere qui s'ensuit. Nous Ducs de Berry, d'Orleans, & de Bourbon, Comtes d'Alençon & d'Armignac, voz humbles oncle, parens, & subiects pour nous, & tous autres noz adherans, & bienueillans à nous. Comme il soit ainsi, que les droits de vostre domination, couronne & maiesté royale soient si notablement instituez, vous en iceux, & iceux en vous fondez à iustice puissance & vraye obeïssance de voz subiects, qu'en tous les royaumes du monde & seigneuries vostre domination, estat & auctorité resplendent, & tant estes dignement consacré & oingt, que du sainct siege Romain & aussi de toutes autres nations des royaumes des Chrestiens estes tenu & appelé Roy souuerain & singulier administrateur de iustice, exerçant puissamment icelle sans personne espargner tant au poure comme au riche, & comme Empereur en vostre royaume, sans auoir autre cognoissance d'aucun seigneur que de Dieu & de diuine maiesté, par laquelle ce vous est singulierement donné & octroyé. Soit aussi le corps de ceux de vostre sang par vraye obedience & verité franche a vnie par l'auctorité de vostre domination & maiesté royale à vous seruir, soutenir, garder & deffendre comme membre & subiects de vous. Et à proprement parler & bien dire comme membre & partie de vostre propre corps en exemple de tous les autres subiects, tant pource qu'ils sont plus tenus & obligez à la monstrence de vostre reuerence, & vraye obeïssance, que nuls autres de voz subiects. Et en outre obseruez & gardez ou faictes obseruer & garder l'estat & auctorité de vostre domination tellement que sur tous autres à vous subiects vous ayez telle puissance & domination, & telle liberté, auctorité, faculté & exercite,



que comme au Roy & Empereur appartient enuers ses subiects. Par laquelle puissance de vostre royale maiesté, vous acceptez & reuerrez les bons, & au contraire vous corrigez & punissez les mauuais en rendant, & maintenant chacun ce qui est à luy. Et aussi affin qu'à vn chacun vous rendez & administrez iustice iudiciaire par telle maniere, que par icelle vous tenez vostre royaume en paix, premier à la louenge de Dieu, & en apres à l'honneur de vous & à l'exemple de voz bons amis & subiects en ensuiuant les voyes, & sentiers de voz predecesseurs Roys de France qui par ceste maniere ce noble royaume ont tousiours tenu & gouverné en paix & tranquillité : & tellement que toutes les nations Chrestiennes voisines & loingtaines, voire aussi les mescreans, en leurs affaires, & contens, à vous & à vostre conseil comme fontaine de iustice & toute loyauté moult de fois ont eu recours. Et il soit ainsi tressouuerain seigneur que vostre honneur, iustice & l'estat de vostre domination à present soit deboutée & blecée, & que à vous & sur vostre royaume n'est point permis ne souffert le gouvernement, ne aussi de la chose publicque, aumoins en telle liberté que raison donne, comme il appert assez à tous ceux de bon & sain entendement. Pourquoy trefredouté & souuerain seigneur, nous les dessus nommez, sommes assemblez ensemble tous, pour aller deuers vous, à vous humblement informer, & selon verité, vous demonstrier l'estat de vostre personne, & aussi de monseigneur d'Acquitaine vostre aîné fils. Et comment vous estes detenuz & traictez de vostre domination, & gouvernement, que iustice regne, & de la chose publicque d'iceluy, comme vous oyrez à plain en ceste matiere, & s'aucuns sont, qui vueillent dire le contraire, faites que par le conseil, deliberation & aduis de ceux de vostre lignée & sang loyaux & preud'hommes, & autres de vostre conseil, lesquels qu'il vous plaira mander, & hucher en tel & si grand nombre comme bon semblera. Et que de fait & reaument vous pouruoyez à la seureté & franchise de vostre personne & de monseigneur d'Acquitaine vostre aîné fils. Aussi de vostre estat, domination & iustice & du bon regime & gouvernement de vostre royaume & de la chose publicque & de la domination de ce royaume, l'auctorité, exercite & puissance de regner, librement soient & demeurent en vous comme raison est, & non à autre quelsconque, & à ces fins & conclusions obtenir & exercer reaument & de fait imposer & exaucer. Nous les dessus nommez nous voulons exposer en vostre seruice, nous noz biens, noz amis, noz subiects, & tout quanque Dieu nous à donné & presté en ce monde : pour resister aussi & debeller tous ceux qui vouldroient le contraire s'il en est aucun. En outre trefredouté & souuerain seigneur nous n'entendons point à nous desioindre, iusques adonc, que vous nous ayez ouyz mis & pourueu aux inconueniens deuantdits, & que nous l'ayons veu, & qu'il nous appaire clerement vous estre repparé & remis en l'honneur & l'obeissance de vostre royale maiesté, & en l'auctorité & pleine puissance de vostre domination. Et à ce trefredouté & souuerain seigneur sommes contraints, tenuz & obligez, tant pour les choses dessusdictes, comme pour la creneur, honneur & reuerence de nostre createur, duquel premier vient & procede la naissance de vostre domination, & aussi à satisfaire à iustice, & apres à vous qui estes souuerain Roy en terre & nostre seul seigneur. Auquel à ceste cause, & aussi pour la prochaine consanguinité sommes tant tenuz & obligez que plus ne pouons. Et en verité trefredouté



douté & souuerain seigneur, il n'est riens en ce monde, que tant doutons auoir offensé Dieu & courroucé & vous conséquemment & nostre honneur auoir blecé que si longuement les deuantdits inconueniens auoir laissé passer sous dissimulation, & que toutes ces choses soient notoires & manifestes à vn chacun. Semblablement que nous vous signifions les choses dessusdictes, nous les signifions en effect aux Prelats, seigneurs, vniuersitez, citez & bonnes villes & à tous les biens vueillans de vostre royaume. Tresredouté seigneur outre nous vous supplions tant humblement que nous pouons qu'il vous plaise à nous ouyr, & considerer & aduertir à nostre intention & propos, & aux fins où nous contendons, qui précisément (comme dit est) touchent l'honneur & reparation de vous, & de vostre estat, & que vous vueillez, de tout vostre pouoir tellement disposer que reaument & de fait pouruoyez à la reparation, conseruation, liberté & franchise de vous, vostre domination du bon gouvernement de vostre peuple, de vostre iustice de tout vostre royaume, & de toute la chose publicque, aussi à l'honneur & louenge de Dieu premier, & en apres de vous, & à l'exemple de tous voz bons subiects qui desirent vostre bien. Et ce escriuons nous à vous, affin que vous cognoissiez nostre intention, & propos, qui sont tant seulement à l'estat & reparation de monseigneur le Roy, à la conseruation de la franchise de sa personne & seigneurie, au bon gouvernement du peuple & de son royaume, & de la chose publicque, & avec ce, auons intention avec aucuns preud'hommes par les meilleures manieres & voyes que Dieu nous enseignera d'aduiser & pourueoir au bon gouvernement de tout le peuple. Et auôs aussi emprins de tant faire enuers monseigneur le Roy, que Dieu & le monde en seront contens. Et pource, tres acertes vous prions qu'à ceste œuvre & aux fins dessusdictes en vous adherant avec nous, vueillez aduiser, jaçoit qu'à proprement parler, non mie à nous, mais à vostre Roy vostre seigneur & le nostre souuerain, comme par foy estes & sommes tenuz, sçachant qu'en ce faisant vous ferez recommandez de preud'homme & de loyauté. Donnée à Chartres le second iour de Decembre mille quatre cens & dix. Lesquelles lettres receües par ceux de ladicte cité d'Amiens, furent vues & visitées en la chambre du conseil, mais pour le contenu en icelles peu ou neant se muerent de volenté & estoient tous, ou en plus grand partie fauorables au Duc de Bourgogne. D'autre part, icelles lettres, ou les pareilles veües & visitées par le Roy & son conseil furent petitement mises à effect. Et ne fut ce aucunement conclud, que iceux seigneurs venissent par deuers le Roy, mais leur manda que tantost & sans delay ils donnassent congé à tous leurs gens d'armes sur peine d'encourir son indignation. A quoy ne voulurent pas obeïr, mais dirent au messager plainement qu'ils ne cesseroient pas, iusques à tant qu'ils auroient eu audience deuers le Roy & qu'ils les auroit ouys. Adonc en ces propres iours les Ducs d'Acquitaine & de Bourgogne allerent visiter la Royne de France au chastel de Melun où elle estoit & y laisserent garnison de gens : & amenerent ladicte Royne, ses enfans & famille demourrer au Bois-de-Vincenne. Auquel temps se partit le Duc de Brabant de Paris pour aller en son païs assembler ses Brabançons pour venir seruir le Roy. Et alors furent envoyez plusieurs notables ambassadeurs de par le Roy deuers lesdits seigneurs, entre lesquels estoit le grād-maistre de Rhoddes en la cité de Chartres pour eux signifier comme par dessus rompiessent leur armée, & veinssent deuers luy, s'il leur



plaisoit à leur simple estat. Laquelle chose ils ne voulurent pas faire, & desobeïrent : & pourtant fait mettre le Roy en sa main les Comtez de Boulongne, d'Estampes, Vallois, Beaumont, Clermont, & autres terres desdits Ducs & Comtes & de tous leurs seruiteurs de quelque estat qu'ils fussent : & ses officiers & sergens fait mettre en garnison és maisons & forteresses des dessusdits, lesquels il ordonna à gouverner aux despens des dessusdictes seigneuries. Et est vray, que adonc vint si grand nombre de gens d'armes autour de Paris au mandement du Roy & du Duc de Bourgongne qu'il n'estoit memoire que treslong temps par auant eust esté veüe si grande armée. Et entre les autres y estoit le Duc de Brabant à tresgrosse compagnie, lequel fut logé dedans saint Denis en France, & là se gouvernoient la plus grand partie aux despens des habitans comme fils eussent esté logez és villages du plat païs, y auoit aussi grand nombre de Bretons avec le Comte de Ponthieure beau fils audit Duc de Bourgongne. Et d'autre partie les gens du Comte Vvalleran de saint Pol qui estoit bien deux mille combattans furent logez au Maisnil au Bois & villages à l'environ. Et pource que ledit Comte se tenoit de sa personne en la ville de Paris fait vn certain iour assembler toutes ses gens dessusdits sous la conduite & gouvernement du seigneur de Chin, lequel les mena audit lieu de Paris pour faire leurs monstres & passer aux gaiges : mais il aduint qu'en ce faisant leur chemin par empres saint Denis s'esmeut aucun discord entre les Brabançons & icelle compagnie à l'occasion d'aucune entreprinse que lesdits Brabançons auoient fait contre le seigneur de Carlian cheualier natif de Boulenois, & tant que les deux parties se meirent en armes & en bataille pour combattre l'un contre l'autre. Durant lequel temps en fut aduerty le Duc de Brabant qui estoit à Paris, & pour ceste cause vint deuers ses gens hastiuement & aussi deuers l'autre partie, & fait tant que la besongne fut mise ius, si fut tresmal content de ceux qui auoient esmeu ceste rigueur : car il auoit espousé la fille & heritiere dudit Comte Vvalleran. Et apres, iceux passans parmy ladicte ville de saint Denis, allerent à Paris deuers leur seigneur & Comte, lequel apres ce qu'il les eut veuz, & aussi qu'il eut fait tresgrand reuerence à ses capitaines, les enuoya au giste és villes dont ils estoient partis. Et adonc pour payer les gaiges & souldées d'iceux gens d'armes qui estoient venus au mandement du Roy & du Duc de Bourgongne ( comme dit est ) & lesquels furent trouuez en nombre par les papiers des monstres quinze mille bacinets, & dixsept mille arbalestriers & archiers furent leuez par tout le royaume tresgrans pecunes tant par emprunts, tailles que autrement, & par especial sur la ville de Paris : & quant à parler des maux qui se faisoient par iceux gens de guerre tant d'une partie comme d'autre, ils ne se pourroient escrire au long, mais pour vray, les Eglises & les personnes avec le pource peuple furent pour ce temps fort oppressez. En apres lesdits Orleannois vindrēt à tout leur puissance, en degastant fort le païs dudit lieu de Chartres iusques à Montlehery, & à sept lieues de Paris & là & és villes à l'environ se logerent. Si portoient tous les Princes des alliances, & aussi toutes leurs gens de quelque estat qu'ils fussent tant d'Eglise comme seculiers pour l'enseigne, bendes estroictes, qui estoient de linge, sur leurs espaules, pendans au fenestre bras de trauers ainsi que le porte vn diacre en faisant le seruice de l'Eglise. Et quand le Roy & son conseil, ouïrent nouuelles qu'ils estoient si approchez tantost hastiuement furent



furent enuoyez deuers eux le Comte de la Marche, l'Archeuesque de Reims l'Euesque de Beauuois, le grand maistre de Rhoddes, & plusieurs autres pour traicter avecques eux: c'est à sçauoir qu'ils dissipassent, & enuoyassent leur exercite & armée, & qu'ils venissent deuers luy à son mandement à Paris & sans armes comme vassaulx doiuent & sont tenuz de faire & venir deuers leur souuerain seigneur: & qu'il leur feroit raison & iustice sans doutance, & que se ce ne faisoient il leur feroit guerre briefuement. Lesquels darent & respondirent qu'ils n'en feroient autre chose que ce qui luy en auoient nagueres par leurs lettres patentes inthymé & signifié & par ainsi lesdits ambassadeurs, comme neant faisant & vuids de responce comme autresfois sont retournez à Paris deuers le Roy. Pareillement l'vniuersité de Paris enuoya deuers eux ses ambassadeurs & gens de grand solemnité & moult sages & enseignez, à sçauoir Noéetz l'Abbé de Pouegny docteur en theologie, qui solennellement, & moult notablement de par ladicte vniuersité proposa deuant. Et furent tresgrandement & honnorablement d'iceux seigneurs receuz par especial du Duc de Berry duquel entre les autres leur fut dit qu'il luy desplaisoit moult que le Roy son nepueu estoit tellement & ainsi gouverné de tels villains comme le Preuost de Paris, & plusieurs autres qui ont tout le gouvernement de son royaume qui est villement gouverné dõt c'est pitié à veoir ainsi que nous le dirons, & monstrerons d'article en article quand nous ferons deuers luy. Et autre responce ne r'apporterent sinon qu'au plaisir de Dieu ils accompliroient selon leur pouoir le contenu esdictes lettres patentes nagueres enuoyées par eux à ladicte vniuersité. Apres le Roy & son conseil de rechef mis ensemble enuoya la Roïne, le Cardinal de Bar & le Comte de saint Pol avec elle & plusieurs autres enuers les dessusdits pour la cause deuantdicte. Et est vray que ledit Comte de S. Pol auoit accepté l'office du grand bouteillier de France & du consentement du Roy lequel occupoit le Preuost de Paris qui l'auoit tenue & eüe du Comte de Tancarville par le don du Roy, & jaçoit ce que la Roïne par les deuantdits Ducs & Comtes fut honnorablement receüe toutefois elle ne demoura pas en leur exercite, & assemblée, mais s'en alla au chastel de Marcouffy qui n'est gueres loing dudit Montlehery, avec ses gens où elle fut par moult de iours à traicter avec eux, & venoient chacun iour les dessusdits Princes ou aucuns d'eux deuers elle. Et jaçoit il que diligement elle feit son deuoir pour les mettre à conclusion, neantmoins elle ne peut venir à son intention: car iceux seigneurs estoient du tout fermes & deliberez d'aller deuers le Roy à puissance pour luy requerir & remonstrer qu'il feit iustice & prenüst autre gouvernement qu'il n'auoit. Et pource voyant qu'elle perdoit son tēps s'en retourna à Paris avec elle ceux qui estoient allez en sa compagnie, & racompta ce qu'elle auoit trouué dont le Roy fut tres courroucé & troublé: & le lendemain xxiiij. iour du mois de Septembre feit euoquer & assembler tous les gens d'armes qui estoient venus pour le seruir & fait charger charrois & charrettes sur l'intention d'issir hors de Paris avec luy & en sa compagnie ses Princes pour combattre iceux seigneurs. Et apres que tout fut prest, ainsi qu'il ouýt la Messe pour apres icelle monter à cheual, vint deuers luy le Recteur de l'vniuersité grandement accompagné avec luy des maistres & supposts d'icelle, lequel luy dit & remonstra comment sa fille l'vniuersité de Paris estoit disposée de luy departir de Paris pour la grand deffaute



de viures, lesquels à l'occasion des gens d'armes tant d'une partie comme d'autre ne pouoient venir en la ville de Paris qu'ils ne fussent tous robbez & destrouffez. Et avec ce, que tous les biens estoient dissippez & degastez sur le plat pays pour la grand multitude d'iceux gens d'armes. Pourquoy treshumblement requeroient & supplioient que sur ce luy pleust à pourueoir de remede & respondre ce que bon luy sembleroit. Et tantost le Chancelier c'est à sçauoir maistre Arnault de Corbye print les parolles, & dit : le Roy appellera son cōseil & apres disner vous fera responce. Et ce dit incontinent le Roy de Nauarre estant present supplia au Roy qu'il leur assignast heure & que apres disner les voulsist ouyr. Et le Roy inclinant à sa requeste bailla autre heure audit Recteur à venir deuers luy. Et apres disner le Roy & ses Princes c'est à sçauoir les Ducs d'Acquitaine, de Bourgongne & de Brabant, le Marquis du Pont, le Duc de Lorraine, les Comtes de Mortaigne, de Neuers & de Vaudemont, avecques plusieurs autres grans seigneurs tant d'Eglise comme seculiers, vindrent à Paris en la chambre verde : & le Roy de Nauarre feit en François quatre supplications. La premiere que les seigneurs du sang Royal tant d'un costé comme de l'autre s'en retournassent chacun en leurs seigneuries & que plus ne s'entremissent du gouuernement du Roy. Et aussi que desormais en auant ne receussent nuls prouffits ne pensions tant des subsides que ils ont accoustumé de prendre sur leurs terres comme d'autres exactions : mais vivent de leur propre iusques à tant que le Roy & son royaume soient en meilleur estat qu'ils ne sont à present. Toutesfois se le Roy veult à aucuns d'eux donner quelque chose ou les appeler vers luy ils sont tousiours prests de le seruir. La seconde supplication feit que aucune diminution fut mise sur les subsides qui couroient sur le peuple. La tierce qu'à aucuns bourgeois de Paris soit faicte assignation de plusieurs grosses sommes de deniers lesquels ils ont presté au Roy, & lesquelles on leur a promis à rendre. La quarte que les besongnes & affaires du Roy & de son royaume fussent gouuernées & disposées par preud'hommes de trois estatz de sondit royaume. Apres lesquelles requestes & remonstrances, le Roy de sa propre bouche respondit au Roy de Nauarre que sur icelles il auroit conseil. Et apres ce tellement responderoit, que luy & tous les autres deueroient estre contens. En apres ces choses faites, le Roy eust conseil comme parauant ces choses faites auoit esté proposé d'yssir de Paris le matin à l'encōtre des seigneurs & de leurs alliez, dont dessus est faite mention. Mais de rechef fust conclud que enuoyroit la Royne sa compaignie & ses autres ambassadeurs deuers iceux pour traicter de paix. Et quand elle fut là venue, s'employa, comme l'on dit, tresbien & loyaument, iacoit ce qu'il estoit commune renommée qu'elle estoit fort affecté audict party d'Orleans. Durant laquelle ambassade Amé Comte de Sauoye mandé de par le Roy, vint à Paris à tout cinq cens bacinets. A l'encontre duquel allerent iusques à la porte Sainct Anthoine les trois freres, c'est assauoir les Ducs de Bourgongne, de Brabant, & le Comte de Neuers, ses serourges, avec moult d'autres seigneurs, & de là le menerent au Palais deuers le Roy, lequel le receut tref-honorablement. Et aucuns iours ladite Royne non pouuans riens besongner de ladite ambassade où elle estoit allée, retourna deuers le Roy son seigneur. Et apporta comment iceux de leurs propos elle ne les pouuoit respondre : car en iceluy estoient tous obstinez, & puis s'en alla au boys de Vincenne le plus tost



toft qu'elle peut. Et le lendemain au matin, les deuant-dits seigneurs se partirent de Montlehery & vindrent ledit Duc de Berry en son hostel de Vincestre qu'il auoit aucunement rediffié & là se logea, le Duc d'Orleans à l'hostel de l'Euesque à Gentilly, le Comte d'Armignac à Vitry & les autres en autres lieux au plus pres qu'ils peurent, & au vespre vindrent loger à saint Marcel & iusques à la porte de Bordelles. Pour lequel logis le Roy, le Duc de Bourgongne & tous les autres Princes eurent grans merueilles. Et incontinent les Parisiens à leurs propres despens, meirent sus mille bacinez ceste nuit, pour faire le guet. Et feirent par toute la ville de Paris tresgrans feux. Et affin qu'ils ne passassent la riuere de Seine par vn lieu assez pres de Charenton y enuoyerent deux cens hommes d'armes pour garder ledit passage. Et le troisieme iour ensuiuant Artus Comte de Richemont frere au Duc de Bretagne vint en la compagnie des Ducs de Berry & d'Orleans à tout six mille cheuaux, dont moult despleut au Roy & par especial au Duc de Bourgongne: pource que le Duc de Bretagne qui nagueres auoit esté mandé de par le Roy auec ses Bretons pour luy auoit receu du Roy finances. Pour ceste cause ledit Duc pource qu'il estoit occupé pour aucunes autres besongnes auoit enuoyé son frere en son lieu pour seruir le Roy & non autre. Ens ouquel exercice le sire d'Albreth Connestable de France, lesdictes finances qu'il auoit receües du Roy comme on disoit il auoit ja exposées & despendues en son seruice, c'est à sçauoir du Duc de Berry. En apres allerent plusieurs de ladicte assemblée, à S. Clou & autres villes à l'enuiron. Lesquelles ils pillerent, & prindrent tout ce que bon leur estoit & despouillerent de tous biens à eux & à leur ost necessaires. Et auec ce aucuns mauuais garnemens violerent & rauirent plusieurs femmes: lesquelles vindrent à Paris deuers eux en eux complaignans & faisans grans clameurs desdits raiisseurs en requérant au Roy vengeance d'iceux & aussi estre restituez de leurs biens se faire se pouoit. Le Roy par importunité & aussi meu de pitié, lesdits Princes & tous ceux qui estoient en leur compagnie & ayde, nonobstant quelque ayde ne chose, les declaira par son decret & sentence estre executez & leurs biens confisquezz. Et entre-temps que les lettres s'escriuoient le Duc de Berry oncle du Roy enuoya ses ambassadeurs dedans Paris deuers le Roy moult en haste. Affin que la sentence ne sortit son effect pour ceste fois, lesquels ambassadeurs requierent instamment de par leur seigneur, que la besongne fut atargée, & qu'au plaisir de Dieu aucun bon moyen si trouueroit. A la requeste desquels fut ceste besongne prolongée & commença l'on à traicter entre les parties, & nonobstant toutes les aduenues dessusdictes estoit le Roy moult desplaisant de ce qu'il veoit que ceux de son sang estoient ainsi en dissention l'un contre l'autre, & qu'il conuenoit qu'il procedast contre eux à grand rigueur. Et affin que sans effusion de sang la chose passast, requist à son Chancelier & à aucuns autres de son priué conseil qu'ils se voulsissent employer diligemmēt que ledit traicté se feist: & pareillement en parla biē acertes au Duc de Bourgogne, au Comte de S. Pol & à aucuns autres Princes lesquels promeirent chacun en droit soy d'eux y employer. Durāt lequel tēps est à sçauoir que le seigneur de Dampierre, l'Euesque de Noyon, le seigneur de Tignouuille, maistre Götier Col & aucuns autres ambassadeurs du Roy, furent enuoyez de Paris à Boulongne à l'encontre de l'ambassade du Roy d'Angleterre, c'est à sçauoir le seigneur de Beaumont, l'Euesque de saint David & au-



cuns autres qui estoient venus à Calais pour traicter les trefues avec eux, lesquelles furent ralongnées du iour de la Toussains qu'elles deuoient faillir iusques au iour de Pasques ensuiuant.

*Comment apres les assemblées faictes d'entre les Princes d'un costé & d'autre fut la paix faicte entre eux, laquelle se nomma la paix de Vincestre qui fut la seconde.*

## CHAP. LXVI.

**I**Tem apres que les ambassadeurs des deux parties, c'est à sçauoir ceux du Roy & du Duc de Bourgongne d'une part, & ceux des Ducs de Berry, d'Orleans & de Bourbon d'autre eurent par plusieurs & diuerses iournées communiqué l'un avec l'autre sur les traictez d'entre icelles parties. Finablement le ij. iour de Nouembre vindrent à conclusion & fut le traicté fait, promis & confirmé par la maniere qui s'ensuit. C'est à sçauoir que les seigneurs du sang Royal d'un costé & d'autre excepté le Comte de Mortaigne retourneroient en leurs terres & seigneuries chacun en son lieu & remeneroient leurs gens d'armes en faisant le moins de dommage qu'ils pourroient sur le plat pays sans fraude ou deception. Et pourra ledit Duc de Berry fil luy plaist aller demourer à Gyen sur Loire, & le Côte d'Armignac avec luy l'espace de xv. iours, le Roy de Nauarre pourra aller en sa Duché de Nemours, le Duc de Brabant fil veult pourra aller en Bourgongne veoir sa sœur la Duchesse. Item lesdits seigneurs d'un costé & d'autre ne passeront pas ne n'yront ne leurs gens par les terres l'un de l'autre ne souffriront aller affin que par ce aucuns inconueniens ou dommages n'en viennent, dont aucun mal peust souldre ou venir. Item en toutes garnisons où il ya plus de gens d'armes que le nombre qui y souloit estre n'y demourront pas sinon ceux qui y seront necessaires à garder & en la seureté desdits lieux sans fraude ou deception aucune. Et affin que ces choses demeurent plus fermes les deuant-dits seigneurs iureront & bailleront lettres de sermens & promesses à aucuns Princes commis de par le Roy. Semblablement iureront les capitaines qui seront esleuz de chacune partie. Item fil est mestier & qu'il plaist au Roy il commettra aucuns de ses cheualiers qui voient avec les dessusdits capitaines à les conduire & mener. Affin que eux & leurs gens d'armes ne fassent lōgue demeure. Et qu'ils facent le moins de dommage que faire se pourra. Item lesdits seigneurs n'aucuns d'eux ne retourneront point deuers le Roy, sinon qu'il les mande par lettres patentes scellées de son grand seel, confirmées par son cōseil & pour la cause necessaire. Et aussi ne pour chasseroient pas lesdits seigneurs n'aucuns d'eux de retourner deuers le Roy. Et de ce iureront aussi & prometteront en la main de celui spécialement ad ce commis. Et de ce baillera le Roy ses lettres comment ils auront iuré & promis & que ainsi l'aura ordonné. Et fil aduenoit que le Roy mandast le Duc de Berry, semblablement il manderoit le Duc de Bourgongne, & semblablement fil mandoit le Duc de Bourgongne il manderait le Duc de Berry. Et ainsi les manderoit affin qu'ils soient tous deux ensemble au iour assigné iusques au iour de Pasques prochain venant qui sera l'an mille quatre cens & vnze, & de cedit iour iusques à Pasques l'an mille quatre cēs & douze nuls d'eux n'aucun d'eux ne procederont de voye de fait, ne rigueur soit en parolles ne autrement l'un contre l'autre. Et de ce seront lettres faictes de par le Roy contenans lesdits sermens & promesses



& promesses par l'ordonnance de son conseil royal contenans aussi certaines peines si les enfraignoient. Item le Roy eslira certains notables & idoines non suspects & non pensionnaires d'aucun d'eux, mais seulement ayant serment au Roy, affin qu'ils soient au conseil du Roy, desquels ainsi esleuz les noms seront monstrez aux seigneurs d'un costé & d'autre. Item les Ducs de Berry & de Bourgogne ayans le gouuernement du Duc d'Acquitaine commettront d'un commun consentement qui en leurs absence auront le gouuernement du Duc d'Acquitaine ou lieu d'eux: & pource seront faictes lettres & escriptes au Duc de Berry qui ne les à pas encores. Item le Preuost de Paris sera osté de toutes offices royaux & le Roy y pouruoyra d'un autre selon qui semblera estre expedient. Item que nuls cheualiers ne autres de quelsconques condition qu'ils soient eux ne leurs hoirs ou leurs biens n'ayent aucun empeschement maintenant n'en temps aduenir, pour ladicte cause & raison, s'ils venoient ou non venoient au mandement de l'une partie ne de l'autre, & si aucun empeschement leur fut fait d'aucunes desdictes parties, la main du Roy feroit ostée & leuée d'eux ou de leurs biens ou hoirs. Et de cela seront baillées lettres à tous ceux qui les voudront auoir du Roy ou desdits seigneurs, lesquels traictez furent faits le dimenche iour des ames. Et le lundy ensuiuant furent confermées & en quatre iours de tous poins quelconques paraccomplies. Et est vray que messire Jean de Neelle Chancelier du Duc d'Acquitaine de par le Roy fut commis à receuoir les sermens & promesses de seigneurs tant d'un costé comme d'autre, à ceux qui les vouloient auoir. Le Roy deposa son Preuost de Paris, c'est à sçauoir messire Pierre des Essars cheualier de toutes offices royaux: & en son lieu il establit en ladicte preuosté messire Brunellet de saint Cler cheualier & un de ses maistres d'hostels. Et enuoya au Duc de Berry lettres du gouuernement de son fils le Duc d'Acquitaine seellées & garnies de son grand seal. Et consequammēt xij. cheualiers, quatre Euesques, & quatre des seigneurs de Parlement, au gouuernement du Roy & de la Royne & de tout le royaume furent prins & ordonnez lesquels furent ceux: c'est à sçauoir l'Archeuesque de Reims, l'Euesque de Noyon, l'Euesque de saint Flour & maistre Jean de Torfy nagueres maistre de Parlement, fait Euesque de Tournay. Le grand maistre d'hostel du Roy, c'est à sçauoir messire Guichart Daulphin. Grand maistre de Rhoddes, les seigneurs de Montenay, de Tourfy, de Rambures & d'Offemont, de Louuroy, de Rumacourt, Saquet de Tourfy, le Vidame d'Amiens, messire Jean de Tourfy cheualier du Duc de Berry & grand maistre de son hostel, le seigneur de saint George & le seigneur de Tourfy, lesdits seigneurs de Berry & de Bourgongne & chacun d'eux. Et ou nom d'eux commeirent au gouuernement du Duc d'Acquitaine, lesquels deux parties se partirent de Paris & des chasteaux & forteresses d'autour. Le samedi apres ensuiuant, entre neuf & dix heures, le Roy fut griefuement malade de sa maladie accoustumée & en son hostel de saint Pol enfermé, la Royne de sa compaignie estant au Bois-de-Vincenne s'en vint demourer audit hostel de saint Pol avec son seigneur, & son fils le Duc d'Acquitaine, & le Duc de Bourgongne s'en alla à Meaulx, auquel lieu, le Roy de Nauarre vint. Et de là s'en alla le Duc de Bourgongne à Arras & en Flandres, & avec luy messire Pierre des Essars cheualier nagueres Preuost de Paris son especial cōseiller. Et toudis ainsi q̄ deuant, le nommoit Preuost de Paris. Apres lequel



traicté toutes gens de guerre tant d'un costé comme d'autre se retrahirent chacun es lieux dont ils estoient venus en mangeant le poure peuple. En outre estoient venus au mandement du Duc d'Orleans en ceste armée grand quantité de Lombars & Gascons, lesquels auoient leurs cheuaux terribles, & accoustumez de virer en courant, que ce point n'auoient accoustumé les François, Picards, Flamés & Brabançons de veoir, & pource leur sembloit estre grans merueilles. Et d'autre part pourtant que le Côte d'Armignac estoit venu à grand compagnie & qu'on nommoit ses gens Armignacs, furent tous ceux tenans le party du Duc d'Orleães de là en auant nōmez en commun langage Armignacs. Et combien que depuis iceux fussent en la compagnie du Roy & du Duc d'Acquitaine, & aussi de plusieurs autres grans seigneurs du sang royal sans comparaison plus grans que n'estoit ledit Comte d'Armignac, nonobstant que les seigneurs dessusdits en estoient tresmal contens, si ne les nommoit on autrement. Et dura ce nom par tresgrād espace de temps à tous ceux tenans ce party. Et pource que le traicté par dessus declairé fut en partie fait & cōmuniqué en l'hostel de Vincestre où se iouoient adonc le Duc de Berry, le Duc d'Orleans & les autres Princes fut icelle paix nommée la paix de Vincestre. Ainsi & par ceste maniere se departirēt les grosses assemblées qui pour ce estoient venues autour de Paris, & demourerent aucune espace les seigneurs qui estoient commis au gouuernement, dont dessus est faicte mention deuers le Roy & le Duc d'Acquitaine. Si entendoit que le poure peuple par ce moyen dorénauant demourast paisible, mais tout le contraire aduint en assez brieves termes ensuiuant comme cy apres sera declairé.

*Comment le xxij. iour de Novembre fut faicte à S. Bernard à Paris vne cōgregation par l'uniuersité où estoient plusieurs Prelats pour l'estat de l'uniuerselle Eglise. CHA. LXVII.*



Pres toutes les choses dessusdictes le xxij. iour de Novembre fust à S. Bernard à Paris faicte vne congregation generale de par l'uniuersité, à laquelle furent euocquez & appelez l'Archeuesque du Puy en Auvergne & plusieurs autres Prelats, & generalmente tous les maistres bacheliers & licenciés tant en droit canon comme ciuil, jaçoit ce que autresfois n'estoit point accoustumé d'appeller les licenciés ne les bacheliers, mais tant seulement les maistres. Et fut faicte ladicte congregation sur les demandes & requestes par l'Archeuesque de Pise & autres legaulx de nostre saint Pere qui furent pareillement sur le dixiesme & vaccant, sur les procurations & despouilles des trespassez, mais premier en ladicte congregation fut leué vne ordonnāce solennelle, autresfois faicte du temps Pierre de la Lune par le conseil de l'Eglise Francoise sur les libertez & franchises de ladicte Eglise de par le Roy, son grād conseil & par Parlement roborée & confermée l'an quatre cens & six, laquelle contient en effect estre telle, c'est à sçauoir que ladicte Eglise soit maintenue & confermée en son ancienne franchise. Et par ainsi quitte de tous dixiesmes, procurations & autres actions & subsides quelsconques. Et par ce que lesdits legaulx en demandant viennent contre lesdictes constitutions & arrests, fut conclud que ladicte ordonnance seroit gardée sans enfreindre. Et pour meilleure obseruāce l'uniuersité meit & ordonna solennellement hommes deuers le Roy son conseil & deuers Parlement, ausquels appartient ledit Arrest, à deffendre & escheuer les inconueniens



conueniens qui s'en pourront ensuiuir par l'infraction desdictes ordonnances & constitutions. Itē fut conclud que si le Pape ou les Legaulx veulent aucun compeller ou contraindre par censure ecclesiastique ou autrement à payer lesdits tribus qu'on appelle d'eux au Concile general & ladicte Eglise. Item s'il ya aucuns collecteurs, ou soubz collecteurs vueillans auoir ou exigier lesdits subsidez qu'ils soient punis par prinse de leur temporalité s'ils en ont point, & sinon qu'ils soient mis en prison. En outre fut conclud, qu'à poursuivre ledit fait, soit requis en ayde le procureur du Roy & des autres seigneurs, qu'ils se vueillent adioindre avec ladicte vniuersité, finalement, fut conclud qu'en cas que le Pape alleguerait necessité euidente en l'Eglise, que le conseil de l'Eglise soit euocqué & la seroit aduisée vne maniere d'ayde par maniere de subside de charitable. Et seroient leuées & recueillies lesdictes pecunes par certains bons preud'hommes esleuz par ledit conseil, qui les distribueront à ceux qui seront ordonnez par ledit conseil. Item le lundy ensuiuant fut fait vn conseil royal où fut present le Duc d'Acquitaine l'Archeuesque de Pise & autres Legats du Pape, aussi le Recteur de l'vniuersité, & plusieurs autres de ladicte vniuersité. Et audit conseil proposa ledit Archeuesque que ce qu'il demandoit estoit deu à la chambre apostolicque tant en droit diuin canon ciuil comme naturel. Et que c'estoit saint & iustice, & quiconques denyeroit à le payer il n'estoit mie Chrestien. Desquelles parolles l'vniuersité mal contente dit que lesdictes parolles estoient proferées en la deshonneur & opprobre du Roy & de l'vniuersité & par consequent de tout le royaume. Pour lesquelles choses fut de rechef le Dimenche ensuiuant xxx. iour du mois de Nouembre faicte vne congregation generale où elle auoit esté faicte le Dimenche deuant, où il fut conclud que l'vniuersité enuoyeroit deuers le Roy certains Legaux pour luy exposer les parolles par les Legaux du Pape dictes & proferées, en luy requerant que publicquement soient reuocquez par eux & rappellées. Et en cas qui ne les voudront reuocquer & r'appeller les facultez de Theologie & decret escriira contre eux sur les articles de la foy & seront punis selon l'exigence des cas. Item fut conclud que ladicte vniuersité de Paris escriroit à toutes autres vniuersitez, Prelats, & Chappellains qui s'adioingnent à l'vniuersité de Paris en la poursuite dudit fait. Moults d'autres choses furent touchées audit assemblement, lesquelles pour cause de briefueté sont delaissées à cy escrire. Toutesfois la conclusion fut telle pour bailler responce que le Pape n'aura point de subside ce n'est par la forme dessusdicte. Item fut conclud que l'vniuersité de Paris requerra l'Archeuesque de Reims & les autres du grand conseil du Roy qui ont fait serment à l'vniuersité qu'ils s'adioingnent en la poursuite deuant-dicte ou autrement ils seront priuez. Et est à sçauoir que apres toutes ces choses, lesdits Legaulx doubans s'en allerent & partirent de Paris sans dire à Dieu, comme on disoit communement à Paris. Nostre saint Pere le Pape enuoya ses ambassadeurs deuers le Roy pour le payement du dixiesme impose sur l'Eglise Francoise. Et en contant de leur legation fut dit au conseil du Roy present le Duc d'Acquitaine que non mye l'Eglise Francoise seulement fut obligée ou tenue à ladicte solution, dudit subside, mais toutes Eglises quelsconques, ils fussent à la vouldenté du Pape, premier par le droit diuin par le Leuitic, où il dit en la sentence, que les Diacques payeroient au souuerain prestre le dixiesme



dixime. Secondement de droit naturel & positif. Et quand ces choses se faisoient l'vniuersité vint à eux. Et le lendemain fut faicte vne congregation ou collieges des Bernardins. Et là fut deliberé que la maniere de demander ce subside estoit à reprouuer comme inique & contraire à loy ou decret par le Roy & son conseil, fait l'an quatre cens & six, & de la conseruation de liberté & franchise. Et voulut l'vniuersité que ceste loy soit conseruée & gardée sans estre corrompue. Et fut dit outre, qu'ou le Pape ou ses Legaulx voudront ce demander, & contraindre aucun à le payer par censure d'Eglise, que ladicte vniuersité appellera au conseil general de l'Eglise: & là où les nouueaux gouuerneurs du Roy & du Royaume voudroient ou poursuuieroient attempter aucunement contre ladicte loy, icelle vniuersité appelle au Roy & seigneurs de son conseil. Et où il y auroit aucuns de l'vniuersité qui laboureroient pour la solution dudit dixime, ils seront priuez. Et fil en aduenoit d'aucuns labourans, à ce qui eussent temporel, l'vniuersité requeroit au Roy que leur temporel fut mis en la main du Roy. Et ou cas qu'ils n'en auroient point, fussent emprisonnez. Et se par maniere de voye caritatiue nostre saint Pere le Pape eslieue subside il pleut à l'vniuersité & au Roy que les Prelats soient huchez par le Royaume pour deux choses. Premier pour aduiser quels choses seront traictées au conseil general de l'vniuerselle Eglise prochainement à tenir. Secondement à deliberer de ce, sur le contenu és requestes desdits ambassadeurs sur ledit dixime. Et fil estoit deliberé que nostre saint pere le Pape ait ledit subside, l'vniuersité veut que soit deputé aucū preud'homme de ce Royaume qui receueroit l'argent pour la paix & vnion des Grecs & Latins, & du Royaume d'Angleterre pour la queste de sainte Terre, & predication de l'Euangile à toute creature: car ce sont les fins pour lesquelles nostre saint pere le Pape eslieue cedit subside, comme dient ses Legaux. L'vniuersité sur ce requist à messeigneurs de Parlement qu'ils s'adioignissent avec eux: car cela est leur arrest, & aussi le fait des procureurs du Roy à la prosecution desquels ladicte loy fut faicte.

Item fut deputé maistre Vrsin à proposer deuant les seigneurs & à respondre aux raisons desdits ambassadeurs. Et en fin ledit Archeuesque de Pise, considerant qu'autrement ne pouoit venir à son intention, s'humilia deuers ladicte vniuersité, & parla particulierement à aucuns des principaulx, affin qu'ils tenissent la main à sa besongne. Neantmoins le xxviij. iour de Ianuier ensuiuant, fut par eux conclud, que de leur cōsentement ne seroit baillé au Pape nul subside sans auoir premier l'accord, le conseil & octroy de l'Eglise François: & sur ce furent prises nouuelles iournées au dixiesme iour de Feurier, à laquelle furent euocquez plusieurs Prelats pour auoir leur aduis sur ceste matiere. Mais finablement par la diligence & sollicitude de l'vniuersité ils ne peurent venir à conclusion que nulles pecunes fussent données n'octroyées au Pape par quelque maniere que ce fut: nonobstant que la plus grand partie des seigneurs, & par especial les Princes en estoient assez contens. Et en tant que les choses dessusdictes se traictoient le Pape enuoya ses lettres deuers le Roy de France, & l'vniuersité contenans que les Florentins ne vouloient plus estre de sa partie, pour la doubte qu'ils auoient du Roy Lancelot: lequel Roy Lancelot assembloit de iour en iour grand puissance de gens d'armes, comme l'escriuoit ledit Pape pour enuoyer & prendre la ville de Romme & toutes les regions d'entour: affin d'auoir la domination & obeissance



sance de la chaire saint Pierre & du siege Apostolicque, & y mettre vn Pape qui fut du tout à sa poste, laquelle s'ainsi aduenoit, pourroit estre plus grand erreur que deuant, & pource de rechief requeroit au Roy, ses Princes & à ladicte vniuersité, que pour obuier à tels inconueniens il eut ayde & confort d'eux. Laquelle ayde par la diligence & longue poursuite dudit Archeuesque de Pise luy fut depuis accordée ainsi, & par la maniere que cy apres sera declairé.

*Comment le seigneur de Croÿ fut prins en allant deuers le Duc de Berry en ambassade de par le Duc de Bourgogne, dont moult despleut audit Duc.*

CHAP. LXVIII.

**A** Pres toutes ces besongnes le Duc de Bourgogne enuoya trois de ses conseilliers ambassadeurs, c'est à sçauoir les seigneurs de Croÿ & de Dours cheualiers, & maistre Raoulle Maire Chanoine de Tournay & d'Amiens, licencié en loix à Paris deuers le Roy, & le Duc de Berry son oncle & Parrin à Bourges. Mais quand ils furēt entre Orleans & la ville de Bourges, ledit seigneur de Croÿ fut prins & detenu des gens dudit Duc d'Orleans tout seul le vendredy penultime iour de Ianuier, & ne fut baillé nul empeschemēt à nuls des autres ne à leurs seruiteurs. Et de là fut mené en vn chastel à trois lieües pres de Blois. Et lendemain fut interrogué & examiné tres rigoureusement sur la mort du Duc d'Orleans deffunct, & de fait fut gehainé pour sçauoir s'il en auoit esté complice ou consentant. Mais pour chose qu'on luy feit ne cogneut riens qui fut à son preiudice. Et le dimenche ensuiuant fut mené à Blois & mis en vne prison moult destroictement, les autres ambassadeurs deuant nommez s'en allerent deuers le Duc de Berry, & luy dirent & exposerent leur legation, & qu'ils auoient en charge de par le Duc de Bourgogne. Et apres luy prierent moult humblement qu'il luy pleut à tant faire enuers ledit Duc d'Orleans qu'iceluy seigneur de Croÿ fut deliuré de ses mains. Et luy racompterent premier la maniere de sa prinse, lequel Duc de Berry tãtost remply de grand fureur & courroux enuoya ses lettres signées de sa main deuers le Duc d'Orleans, contenant que tantost & sans delay il renuoyast ledit prisonnier, lequel en allant deuers luy auoit esté prins desraisonnablement. Et s'ainsi ne faisoit il le tenoit pour son ennemy. Ausquelles lettres le dessusdit Duc d'Orleans apres ce qu'il les eut veües bien au long rescriuit à son oncle assez courtoisement en luy excusant de ladicte prinse, & aussi en prolongeant la besongne. Et aucun peu de iours ensuiuant le Roy & le Duc d'Acquitaine, auxquels la prinse desdits estoit desia apparue, pareillement escriuirent & manderent au Duc d'Orleans qu'incontinent deliurast ledit Croÿ sur tant qu'il doubtoit à le courroucer. Neantmoins pour quelques lettres ou mandemens qui luy fussent enuoyées ne le voulut deliurer: mais qui plus est fut detenu prisonnier deroictement & en grand rigueur comme dit est, & par plusieurs & diuerses fois examiné & questionné, & entre-temps les autres ambassadeurs enuoyerent leurs messagiers deuers le Duc de Bourgogne & luy notifierent la prinse dessusdicte & les diligēces qu'ils auoient fait pour sa deliurance, lequel Duc ne print pas biē en grē: mais en fut moult fort troublé, car moult aimoit ledit seigneur de Croÿ. Et pource considerant ceste entreprinse, & aucunes autres qui s'estoient faictes sur ses gens & autres ses fauorables, &



affin d'y resister & pourueoir se besoing luy estoit, se disposa d'assembler finances de tout son pouuoir, & tant qu'aux Gantois vendit ses confiscatiōs, & à aucūns autres Flamens rendit leurs libertez pour argēt, & mena son fils Comte de Charrolois en plusieurs villes de Flandres pour eux monstrier leur seigneur aduenir, à ceste occasion en receut plusieurs dons. Et apres vint vn grand conseil en la ville de Tournay sur ses affaires avecques ses deux serourges, c'est à sçauoir, le Duc Guillaume & l'Euesque de Liege, & si y estoit le Comte de Namur & plusieurs autres grans seigneurs des marches de l'Empire. Ausquels il requist leur seruice & ayde se besoing luy estoit contre tous ses aduersaires, & par especial contre le Duc d'Orleans, ses freres & leurs alliez: Lequel seruice ils luy promeirent à faire liberallement en tout ce qu'il leur seroit possible. Et de là apres lesdictes promesses vint à l'Isle, auquel lieu vint deuers luy le Marechal Bouciquault nagueres gouuerneur de Gennes, lequel il receut tres agreablement & le mena avecques luy en sa ville d'Arras, & là conuocqua tous les seigneurs & autres nobles de ses pays d'Arthois & de ses appendances, lesquels en la salle de son hostel assemblez tant par sa bouche, comme par la bouche de maistre Guillaume Bouuier, cheualier licencié en loix, exposa & feit exposer comment ses aduersaires tous les iours s'efforçoient de prendre & emprisonner ses gens, & de fait auoient prins & emprisonné ledit seigneur de Croÿ. Pourquoy à tous ceux qui estoient venus, & presens là à son mandement il prioit qu'ils luy feussent loyaux, & que sil luy estoit besoing, que pour leurs souldées auoir ils le voulsissent seruir, & qu'ils sceussent certainement que c'estoit pour la seurté de luy, & aussi du Roy, & de son fils le Duc d'Acquitaine, & du sceptre royal, & en la conseruation de la couronne de ce Royaume qu'il auoit fait occire ledit Duc d'Orleans pere au Duc present. De laquelle mort la paix fut faicte nagueres par le Roy en la cité de Chartres, & escriptes en lettres royaux. Et sil y a aucunes cōditions cōtenues esdictes lettres qui reseruent encores à accomplir de par moy, ie suis tout prest & appareillé par fait & euure, à les accomplir par fait, si auant, & outre ce que raison donnera, iusques à pleine satisfaction. Ces choses ainsi dictes & entendues tous les cheualiers & nobles respondirent tous à vne voix que de tout leur pouuoir ils le seruiroient. Et de là chacun s'en retourna en ses pays & hostel. Ledit Marechal Bouciquault vint à Paris, & là en plein cōseil royal, où le Duc d'Acquitaine ou lieu de son pere estoit present, accusa les Genneuois en moult de manieres, & s'excusa moult fort deuers ledit Duc d'Acquitaine & le grand conseil, en priant moult humblement que pour les combattre & subiuguer, finances & gens d'armes luy feussent baillées. A laquelle requeste on différa de luy respondre, & luy fut iour assigné, pendāt lequel iour, s'en alla vers les autres seigneurs du sang royal: lesquels il pria moult d'estre ses moyens enuers le Roy & son conseil, affin qu'il fut expedié. Et adonc, ledit conseil & les trois estats, ordonnerent que dedans ledit iour de Pasques lesdits Genneuois seroient euocquez & appelez à comparoir par deuant eux à Paris où lors deuoient estre plusieurs nobles gens pour autres affaires: c'est à sçauoir pour auoir leur consentement que ledit Duc d'Acquitaine soit constitué & ordonné Regent du Royaume de France: car ceux de Paris le veullent & desirer sur toutes autres choses. Laquelle besongne venue à la cognoissance du Duc de Berry, n'en fut point content. Et pour y obuier escriuit notablement audit



dit Duc d'Acquitaine, à la Royne sa mere, & au grand conseil royal, en remon-  
strant plusieurs causes raisonnables pourquoy ce ne deuoit ou pouuoit faire, at-  
tendu la ieunesse d'iceluy, disant & affermant outre, que de tout son pouuoir &  
selon ce que pieça avec son frere de bonne memoire Philippe Duc de Bourgon-  
gne il auoit promis & iuré sur le sainct precieux corps de nostre seigneur, que son  
seigneur & nepueu le Roy il garderoit & deffendrait enuers & contre tous, ius-  
ques à la mort. Et entre-temps que ces besongnes se traictoient le Roy qui estoit  
malade retourna en santé, & par ainsi le Duc d'Acquitaine ne fut pas Regent,  
dont le Duc de Berry fut moult ioyeux, & eut son cuer appaisé. En apres pour  
le grand contens qui estoit apparét d'estre entre les Ducs d'Orleans & de Bour-  
gongne, fut deffendu de par le Roy par ses lettres royaux seellées de son grand  
seel par les bailliages, seneschaulcées, vicomtez & preuostez de tout son Royau-  
me, & publié par tous lesdits lieux, que nuls nobles, de quelque noblesse qu'ils  
soient, ou de quelque préeminence ne autres, voise au mandement de l'une partie  
ne de l'autre, ne qu'à l'un ne à l'autre nul ne presume de le seruir en armes, sur la  
confiscation de tous ses biens. Et tantost, en celle sepmaine peneuse, le mercredy  
le Duc de Bourbon, & le Comte de Vertus frere au Duc d'Orleans, à tout cinq  
cens bacinets vindrent à Cleremont en Beauuoisin, & descendirent en Norman-  
die. Mais le Comte de Vertus ne demoura mie longuement là: ains print vne par-  
tie desdits gés d'armes, & se partit dudit Duc & s'en alla es parties de Soissonois  
& de Vallois, & en la terre de Conchy, qui estoit à son frere le Duc d'Orleans, &  
là meit gens d'armes & garnisons. Et est vray que quand le Duc de Bourgongne  
qui estoit adonc à Arras, ouyt ces nouuelles il fut moult troublé. Et le plus brief  
qu'il peut manda de toutes parts gens d'armes, & qu'ils fussent tous au chastel en  
Cambresis le penultime iour d'Auril. Mais quand cela vint à la cognoissance du  
Roy & de son conseil, tantost il enuoya deuers lesdits Ducs notables & solen-  
nels ambassadeurs & leur manda & fait faire deffence sur peine de confiscation  
de tous leurs tenemens, & avecques ce d'estre tenuz & reputez ennemis à luy &  
à tout son Royaume, qu'ils gardassent qu'ils ne feissent nulles entreprin-  
ses l'un contre l'autre: mais feissent retraire leurs gens d'armes, auquel mandement ils o-  
beïrent pour ceste fois tous deux assez humblement, & se delayerent certaine es-  
pace de temps.

*Pour l'an mille cccc. & xj.*

*Comment le Duc d'Orleans enuoya ses ambassadeurs deuers le Roy, & depuis luy escri-  
uit ces lettres, lesquelles chargeoient le Duc de Bourgongne & ceux de sa partie.*

CHAP. LXIX.



V commencement de cest an, le Duc d'Orleans non cōtent de ce que  
les gouuerneurs du Roy, est à sçauoir, ceux qui estoient de par le Duc  
de Bourgongne, auoient plus grand audience que les autres. Et avec  
ce que chacun iour on deboutoit & eslongnoit dudit gouuernement  
& de leurs offices, ceux qui auoient esté à leur feu pere & qui estoient à luy, en-  
uoya deuers le Roy ses ambassadeurs, & luy fait remonstrer les besongnes des-  
susdictes, & aussi requerre que les homicides qui auoient meurdry son dit pere  
fussent punis selon les traictez par auant passez, lesquels homicides se tenoient



chacun iour au Royaume. Aufquels ambassadeurs fut promis de par le Roy & son conseil qu'on pouruoiroit ainsi qu'il appartiendrait. Et apres leur partement le Roy enuoya à Bourges deuers le Duc de Berry son oncle, & luy fait requerre bien acertes, que pour le bien de son Royaume il se voulsist entremettre d'entretenir en paix ses deux nepueux, est à sçauoir Orleans & Bourgongne, laquelle chose il promet faire. Et pour y besongner enuoya l'Archeuesque de Bourges, son Chancelier à Paris, instruit de par ledit Duc de ce qu'il auoit à remonstrer & qu'il estoit à faire touchant ceste matiere. Et depuis brief temps ensuiuant fut ledit Chancelier enuoyé avecques le Marechal Bouciquault & aucuns autres deuers le Duc de Bourgongne qui estoit à S. Omer, lequel ouys les poincts & articles de ladicte ambassade, fait responce qu'à luy ne tenoit pas, ne tiendrait, que tous les traictez par auant passez ne feussent entretenuz, & que du tout il vouloit obeir au Roy, & de ce feirent leur rapport. Et pource que selon la volonté du Duc d'Orleans & de son conseil, on ne procedoit point assez asprement contre les dessusdits homicides, & aussi pour plusieurs autres choses rescriuit ses lettres signées de sa main deuers le Roy, desquelles la teneur s'ensuit. Mon tresredoubté seigneur humble recommandation premise. Nagueres tresredoubté seigneur vindrent à moy deux de voz cōseilliers. C'est à sçauoir, messire Collart de Charleuille cheualier, & messire Symon de Nanterre president en vostre Parlement, lesquels il vous a pleu à moy enuoyer, pour moy exposer & signifier aucune chose de vostre voulenté & bon plaisir sicomme ils m'ont dit & affermé, & ce m'ont ils bien saigement & distinctement declairé les termes de leur legation sur trois poincts. Premièrement requirent & prierent à moy, de par vous, qui pouuez & deuez commander comme à vostre humble & loyal subiect & seruiteur, que ie me submette du contens qui est entre moy & le Duc de Bourgongne, pour la cause & raison de la crueuse & inhumaine mort de mon tresredoubté seigneur & pere vostre frere germain, duquel Dieu ait mercy, en ma dame la Roine, & en monseigneur mon oncle le Duc de Berry, lequel en est aussi prié de par vous, lesdits conseilliers & ambassadeurs, affin qu'il labourast diligemment sur ce, pour le bien de la paix & de vostre Royaume. Et que semblablement, vous auez prié le Duc de Bourgongne: & disoient que pour accomplir & mener en bōne fin i'en-uoyasse quatre de mes hommes, lesquels vous auez en propos d'enuoyer deuers mon deuantdit oncle sur ceste matiere, qui aussi semblablement y enuoyeroit quatre des siens. Le second point, que me priez que cessasse de mander & assembler gens d'armes. Le tiers estoit que ie receusse lettres que vous m'enuoyez sur la requeste par moy à vous autresfois faicte pour prendre les homicides, consentans, occiseurs & coupables de l'horrible mort de mondit seigneur & pere vostre frere. En apres tresredoubté seigneur attendu diligemment les points deuantdits, & eūe deliberation sur les choses deuandictes. Respondiz à eux que ie vous regracioye, & regracie à present à vous tant humblement comme ie puis, de ce qu'il vous a pleu enuoyer à moy, car plus grand ioye auoir ne puis, que quand i'ay souuent de voz nouuelles de vous & de vostre noble estat, & que i'estoye & suis celuy qui en vostre seruice & obediēce comme ie dois vueil exposer mon corps & tout quanque i'ay de ma puissance & de mes subiects. Mais pource que ce qui m'estoit exposé de par vous, m'estoient grans choses & nouuelles



uelles de vous, & de vostre noble estat, & que i'estoye & suis celuy qui vis en vostre seruice & obedience comme ie dois, quand est à moy ie ne leur peuz ores bailler responce: excepté que leur dis que ie vous enuoyerois responce le plus tost que ie pourrois. Laquelle responce i'ay differé iusques à present: car ie sçay qu'entour vous & vostre conseil, sont plusieurs de mes ennemis, lesquels vous deuez dès maintenant tenir voz ennemis, ausquels madiète responce, mes amers propos, intentions, & mes faits: ie ne vueil mie estre communiquez ne cogneuz, ne aussi raisonnablement ne deuroient pas estre, ne assister à quelconque chose touchant ne regardant moy ne mon fait, n'estre entour vous en conseil ne seruice. Et à vous informer & certifier plus pleinement sur ce trefredoubté seigneur, ie suis vostre humble fils & nepueu à vous obligé & appareillé à vous seruir & obeir, comme à mon souuerain & droit seigneur, desirant de tout mon cueur obseruer, honorer & exaulcer selon mon pouuoir vostre seigneurie & estat, de madame la Roynie, de monseigneur d'Acquitaine & de tous voz autres enfans & de tout vostre Royaume & à vous aduiser & conseiller vraiment & loyaument sans ce que ie me taise ou vueille celer verité, pour le bien & honneur de vous & de toute la chose publique. I'ay deliberé de vous nommer & declairer aucuns de mes ennemis, & des vostres qui vous assistent & sont en vostre cōseil & seruice, c'est à sçauoir l'Euesque de Tournay, le Vidame d'Amiens, Iean de Nelles, le sire de Heilly, Charles de Sauoisy, Anthoine des Essars, Iean de Courcelles, Pierre de Fontenay, & Maurice de Railly, tous par force & par violence, par faulx & mauuais moyens & prosecutions. Et tellement qu'ils ont debouté certains bons preud'hommes, & voz loyaux seruiteurs, & leur ont fait & font faire plusieurs griefs & irreparables dommaiges à l'encontre de tous termes de raison, & vous donnent à entendre faulses & iniques mensonges, pour esloigner & euitier de vostre grace & dilection, moy & plusieurs parés & loyaux seruiteurs & subiects de vous. Pourquoi par ces moyens & par autres voyes & diuerfes manieres iniques & desordonnées, lesquelles ils tiennent & ont ja longuement tenu les deuant nommez auecques leurs adherés & complices, ont empesché & troublé le commun bien & paix de tout ce Royaume, & n'est mie vray semblable que tant longuement qu'ils soient & demourent auec vous en vostre seruice, où qu'ils ayent aucune auctorité deuers vous, bonne paix & bon regime puisse estre en vostre Royaume: car tousiours empeschent, & empescheront, que vous ne faciez le bien de iustice, à moy ne autres ce que vous deuez faire à vn chacun indifferemment, tant au petit comme au grand. Et celà font & feront pource qu'ils sentent & sçauent estre chargez & coupables de plusieurs crimes & malefices, dont aucuns d'eux (c'est à sçauoir Iean de Nelle & le sire de Heilly, qui sont coupables de la cruelle & enorme mort de mōdit seigneur & pere vostre seul frere sont entierement) à la faueur du Duc de Bourgogne, qui principalement est coupable de ladiète mort, pource qu'ils sont tous seruiteurs iurez & pensionnaires, où alliez audit Duc: dont ils peuuent par raison estre tenus & reputez facteurs & complices dudit crime & desordonnée fureur: lesquels complices ils portent tous les iours enuers vous, trefredoubté seigneur, auquel regarde l'offence dudit crime premier, comme il fait à moy. Et afin que ie die tout, ie sçay que se ne fussent les empeschemens mis & faits par les deuantdits & leurs



complices ja fut la reparation faicte souffisamment de ladicte mort de monseigneur & pere iadis vostre frere, par vous & vostre bonne iustice & par l'ayde de voz gens & vrais subiects comme à ce ayez eu & auez bonne volonté & encline & bon propos, ainsi que ie sçay certainement. Pourquoy, ie vous regracie tant humblement comme ie puis, & vous requiert & supplie cordialement tât comme ie puis que pour le bien & honneur de vous, de ma dame la Royne, de monseigneur d'Acquitaine, & generally de tout vostre Royaume qu'ils soient prins, & que d'eux chacun d'eux soit faicte bonne iustice comme de voz ennemis & des miens, & vous aussi bouter hors & eslongner de vous les complices, facteurs & fauorisans dudit Duc de Bourgongne vostre ennemy & le mien : & conuocquer à vostre conseil & seruice les bons & loyaux seruiteurs & conseillers & autres bons preud'hommes, lesquels suffisans trouuerez en vostre Royaume. Lesquelles choses se vous les faictes, ie vous bailleray au plaisir de Dieu telle responce, & vous enuoyeray si clerement mes propos & intentions, que Dieu, vous & tout le mōde par raison en serez contens. Et pour l'amour de Dieu trefredoubté seigneur, en ce ne vueillez faillir : car autresfois comment cleremēt iapperçoy tousiours seroient empeschez mes requestes & supplications, que ie feroye dedans les termes de raison & de iustice, ne ne pourriez gouuerner en respondant aux choses qui m'ont esté dictes par voz ambassadeurs, ne aussi à ce qu'ils m'ont requis de par vous. Et pource mō trefredoubté seigneur ne me faillez pas : car ie ne vous requiers fors tant seullement que ce qui est iuste & raisonnable, comme il vous peut & à vn chacun apparoir. Mon trefredoubté seigneur plaise vous moy mander & commander voz bons plaisirs, & au plaisir de Dieu i'accompliray. Auecques lesquelles lettres enuoyées par le dessusdit Duc d'Orleans deuers le Roy, en escriuit aucunes autres assez pareilles au Chancellier de France, & à autres du grand conseil lesquels il sçauoit à luy estre fauorables, en eux requerant trefinstamment qu'ils se voulussent employer deuers le Roy, la Royne & le Duc d'Acquitaine, affin que ceux qui gouuernoient de par le Duc de Bourgongne, dont dessus est faicte mention, feussent deboutez & esloignez du conseil royal, & qu'il eut audience pour auoir iustice de la mort de son feu pere. Neantmoins quelque chose qu'il requist n'enuoyast, pour ce temps ne peut obtenir n'auoir quelque responce qui luy fut agreable, par les empeschemens qu'y mettoient les dessusdits.

*Comment le Duc de Bar trespassa de ce siecle. Et de l'ambassade que le Roy enuoya deuers le Duc de Bourgongne à tout certaines lettres & autres matieres.*

CHAP. LXX.

**E**N cest an Henry Duc de Bar, preux, hommes saiges & discret, trespassa de ce siecle : auquel son fils aîné : C'est à sçauoir le Marquis du Pont nommé Edouard succeda en la Duché de Bar & en la Chastellenie de Cassel, excepté aucune partie, laquelle il auoit donnée heritablement apres son decez, à Robert de Bar, fils de deffunct Henry de Bar son premier fils, & de la dame de Conchy : est à sçauoir Varuescon, Bourbourg, Dunquerque, & Rhoddes. Apres laquelle mort ledit Edouard fut nommé Duc de Bar, & commença à regner assez honnorablement. Ens ouquel temps aussi furent



rent enuoyez deuers le Duc de Bourgongne, de par le Roy certains ambassadeurs, lesquels avec autres choses qu'ils luy dirent de bouche, luy porterent la coppie des lettres qu'auoit enuoyées cōtre luy, & les siens deuers le Roy, le Duc d'Orleans desquelles & du contenu en icelles ne fut pas bien content. Et par iceux ambassadeurs fait sçauoir que ledit Duc d'Orleans ne disoit pas verité par l'esdictes lettres. Et apres qu'il eut receu iceux ambassadeurs bien reueramment print congé d'eux & s'en alla en son païs de Flandres, & ils s'en retournerent à Paris sans porter responce qui fut de nulle valeur. Et brief ensuiuant ledit Duc de Bourgongne fait grand mandement de gens d'armes, & les enuoya en Cambresis & vers saint Quentin. Mais assez brief apres, par l'ordonnance du Roy & de son conseil, les fait departir & retourner és lieux dont ils estoient venus. En outre le mercredi xv. iour de Iuillet maistre Jean Petit Docteur en Theologie, lequel le Duc d'Orleans auoit en propos de poursuiuir & faire accuser d'heresie par deuant l'vniuersité de Paris, mourut en la ville de Hesdin dedans l'hostel de l'hospital qui luy auoit esté donné par le Duc de Bourgongne avec autres grans pensions, & fut enterré en l'Eglise des freres Mineurs audit lieu de Hesdin. Et en ce mesmes temps fut mis sus le clergié dudit Royaume de France, & de la Daulphiné, vn subsidie caritatif à la valeur d'un demy dixiesme imposé pour le Pape par le consentemēt du Roy, des Princes, de l'vniuersité de Paris & de la plus grād partie des Prelats & citez, à payer à deux termes, c'est à sçauoir le premier à la Magdaleine, & le second à la Pentecouste ensuiuant, si se cueilla assez rigoreusement, & tāt que le pauvre commun clergié s'en plaignoit moult piteusement. Et en tant que ces besongnes se faisoient le Duc de Bourgongne estant en sa ville de Bruges le samedi x. iour, messire Amé de Sabbrusse, messire Clugnet de Brabāt, & aucuns autres capitaines de la partie du Duc d'Orleans vindrent à tout grand nombre de gens d'armes deuers Conchy, ou païs de Vermandois, & à Hem sur Somme. Si en furent tātost portées les nouuelles au dessusdit Duc de Bourgongne, lequel doubtant qu'ils ne voulsissent entrer en son païs, & luy faire guerre, pareillement fait mettre sus plusieurs de ses capitaines, c'est à sçauoir le seigneur de Heilly, Enguerran de Bournouille, le seigneur de Ront & aucuns autres, & à tout grand nombre de gens les fait tirer entre Bapaumes & ladicte ville de Hem affin de resister cōtre les dessusdits fils faisoient aucune enuahie. Durant laquelle tribulation, ledit Duc d'Orleans & ses freres en poursuiuant leur querelle, de rechief ils enuoyerent leurs lettres deuers le Roy & son grād conseil, & aussi à plusieurs Princes, citez & Prelats, affin que plus amplement fut veu & sceu la requeste qu'ils faisoient, desquelles lettres est à sçauoir de celles qu'ils enuoyerent au Roy, la teneur s'ensuit.

*Comment le Duc d'Orleans & ses freres enuoyerent lettres deuers le Roy & autres seigneurs, & aussi à plusieurs bonnes villes contraires au Duc de Bourgongne.*

CHAP. LXXI.

**N**ostre trefredoubté & souuerain seigneur. Nous Charles Duc d'Orleās, Philippe Comte de Vertus, & Jean Comte d'Angoulesme freres. Voz treshumbles fils & nepueux, en toute humble recommandation, subiection & obeissance, auons deliberé à vous exposer & signifier, cōioinctement &



chacun seul, & à par luy, ce qui s'enfuit. Iacoit-ce trefredoubté & fouuerain seigneur que le cas de la douloureuse, lametable, & inhumaine mort de nostre trefredoubté seigneur & pere, vostre seul frere germain quād il viuoit. Soit en vostre memoire infichée, & nous sōmes certains qu'aussi y est elle, & qu'elle n'en est mie rallée, mais en vostre cueur & en trespasfond memoire enracinée. Neātmoins nostre trefredouté & fouuerain seignr, l'office de pitié, les droits de sens, les deuoirs de nature, les droits diuins, canōs & ciuils, & verité nous cōtraignās; nous ramentoiuēt & enhortās de vous ramēteuoir, & ramener à memoire, mesmemēt les fins par nous cy deuāt esleuées & declairées. Il est vray trefredouté & fouuerain seigneur q̄ Iean qui se dit & afferme estre Duc de Bourgōgne iadis par vne tresgrande haine couuerte: laquelle lōguement il auoit gardée en son cueur, par vne faulx & mauuaise enuie de dominer, & affin qu'il eut l'office & auctorité de regenter & dominer en vostre Royaume, sicomme clerement il a monstre, & monstre de iour en iour notoirement en l'an quatre cens & sept, ou mois de Novembre le quatorziesme iour, vostredit frere, nostre trefredoubté seigneur & pere, fait traîtreusement occire en vostre bonne ville de Paris, de nuit, par longs aguets & de fait à pensée, & de couraige deliberé, par faulx, mauuais, & traistres à ce habilitiez & conuenables, sans ce que par auant on luy eut monstre aucun signe de male volenté: sicomme il est notoire à vous, & à tout le monde, & aussi verifié & confessé par ledit traistre murdrier qui est homicide douloureux, desloyal, traistre, cruel, & inhumain plus que dire ne penser ne pourrois. Et nous semble qu'on ne pourroit trouuer par escrit, qu'onques par quelque occasiō qu'il peut estre, tel ne si peruers fait fut fait ne pensé, par quelconques qui onques fut. Premiere cause par ce qu'ils estoient si prochains, conioincts ensemble par sang de lignaige, ainsi que cousins germains, enfans des deux freres. Et par ainsi n'a mie tant seullement commis crime d'homicide: mais avec ce à commis le plus horrible crime des crimes, c'est à sçauoir crime de parricide, auquel les droits ne peuvent mettre n'imposer trop grās peines pour la trespuelle & horrible cruauté & detestable d'iceluy fait. Et aussi, que tous deux estoient alliez, & auoient cōfederatiō ensemble par deux ou trois parties, de confederatiōs & alliances de leurs propres mains & seaulx signées & scellées, par lesquelles alliāces auoient iuré & promis l'un à l'autre sur les sainctes Euangilles, & saincts à ce corporellemēt par eux touchez en la presence d'aucuns Prelats & autres gens de grand estat du conseil d'une partie & d'autre, qu'ils seroient bōs vrayz & loyaux amis: & qu'ils ne pourchasseroient l'un à l'autre mal, dommage ne vitupere en appert n'en secret, ne ne souffreroient estre fait ou procuré par quelconque moyen selon son pouuoir: En outre plusieurs grandes & solennelles promesses en tel cas accoustumé & plus, car en signe de demonstrance de toute parfaicte amour d'une vraye vnitē, & que fils voulsissent auoir & peussent vn cueur, vn courage, vne pensée, iurerēt & solennellement promeirent vraye fraternité & compaignée d'armes & societē ensemble, par especialles conuenances sur ce faictes. Lesquelles choses d'elles mesmes doiuent emporter telle & si grande loyauté & amour mutuelle comme sçauent tous nobles. Et de rechief, pour plus grand confirmation de ladicte fraternité & societē d'armes, porterent les ordres & couleurs l'un de l'autre, ainsi comment ce est tout notoire. Secondement par les manieres dudit traistreur,

quand



quant au regard dudit homicide commis: car luy faignant auoir bonne & loyale amour avecques vostredit frere, par ce que dit est dessus, il conuersoit souuent avec luy, & par especial, en vne maladie qu'il eut vn peu deuant ledit homicide commis en sa personne, il l'alla veoir & visiter, tant en l'hostel de Beauté sur Marne comme à Paris, & luy monstroït tous les signes d'amour, que frere, cousin & amy pouuoient & deuoient monstrier. Iasoit que desia auoit traicté & ordonné sa mort, & ja auoit mandé les homicides, & estoit la maison louïée à eux esconcer & muffer, qui moult clerement appreuue & demonstre que c'est cruelle & mauuaïse traïson. Et qui plus est, le iour deuant l'accomplissement dudit homicide, vostredit frere & luy, apres le conseil par vous tenu à saint Pol, en vostre presence, & les seigneurs de vostre sang qui là estoient, & plusieurs autres, prendrent le vin, beurent & mangerent ensemble, & vostredit frere l'inuita & pria au dîner avecques luy le dimenche ensuiuant. Laquelle chose il luy octroya, jasoit ce qu'il luy gardast telle & si faulse pensée de le faire ainsi villainement & honteusement mourir. Laquelle chose, est trop abhominable & horrible à ouïr seulement reciter. Et le lendemain nonobstant toutes choses promises & deuantdictes il, comme obstiné en son desloyal propos, & en mettant à execution son cruel & corrompu vouloir, le fait tuer plus cruellement & plus inhumainement qu'onques ne fut veu homme de quelque estat qu'il fut de ses meurdriers conuenables & locatifs comme dit est dessus, & lesquels ja par long temps ils l'auoient espié & agaictié: car ils luy coupperent vne main, laquelle fut trouuée le lendemain en la boüe. Et apres, luy coupperent le bras du fenestre costé, tellement qu'il ne tenoit qu'à la pel. En outre, luy coupperent & crauerent la teste en diuers lieux, tellement que la ceruelle en cheut au broüet presque toute, ouquel broüet & boüe ils le trauaillerent & trainerent, iusques adonc qu'ils le veirent tout roide mort. Qui est & seroit vn grand pitié, douleur, & horreur à l'ouïr reciter d'un plus bas homme & de plus petit estat du mode. Et onques sang de vostre noble maison de France ne fut tant cruellemēt, ne tant honteusement respars: dont vous ne tous de vostre sang de voz subiects voz bien vueillans ne deuez telle condollense ne desplaissance, estre ne demourer sans punition ne reparation quelsconques, comme ce fait cy est, iusques à present, qui est la plus grand vergongne & chose plus honteuse qui onques aduint, ne puisse aduenir de si noble maison, & encores seroit plus, se la chose demouroit longuement en tel estat. Tiercement par faulses & damnables manieres, par ledit traïstreur tenues, & eües apres l'accomplissement de l'horrible & detestable homicide: car il vint au corps avecques les autres seigneurs de vostre sang, & de noir se vestit, & à son enterrement fut faignant de despouiller, & gemir, & d'auoir desplaissance de sa mort, pour se pensant couvrir & celer la mauuaïstie de son peché, & embler. Et en pitié & compassion de ce plusieurs d'autres fainctes & tresdamnables manieres tint, qui seroient à vous & aux autres de ce regne trop longues à reciter, & en faint propos demoura iusques adonc qu'il cogneut & apperceut que son peché venoit à clarté & lumiere, & ja par diligence de iustice estoit cogneu & descouuert. Et adonc au Roy de Secille & à son oncle le Duc de Berry, confessa en appert auoir commis & perpetré, ou au moins auoir fait cōmettre & perpetrer ledit homicide. Et dit que le diable l'auoit tenté & surprins qui ainsi



luy auoit fait faire sans autre cause ou raison quelcōques assigner, & aussi est verité. Lequel non content d'auoir vne fois iniquement & damnablement tué son germain cousin seul vostre frere, comme dit est, mais en perseuerant en son desloyal & peruers courage, de rechief le voulut occire & tuer. Est à sçauoir de vouloir tuer, damner, & tout entierement planer sa fame & renommée par faulces mensonges & accusations trouuées. Comme par la grace de Dieu il est à vous & à tout le monde notoiremēt sceu. A l'occasion duquel faulx & traistre homicide nostre trefredoubtée dame & mere, à laquelle Dieu soit misericors, tant desolée & desconfortée, fut que dame & creature quelconques, pouoit estre pour la miseration pitoyable de son seigneur & mary: & mesmemēt, car par maniere si damnable luy fut osté & plustost qu'elle n'eut voulu. Apres laquelle aduenue elle se trahist à vous: & ie Jean en sa cōpagnie comme à son Roy & seigneur souverain, & comme à son singulier recours & reffuge, suppliant le plus humblemēt qu'elle peut & sceut que de vostre benigne grace vous le voulussiez & nous aussi les enfans en compassion & miseration dudit homicide, regarder & luy faire administrer raison & iustice, telle, grande & si prompte comme ou cas appartient, considéré l'homicide de luy. Et comme vous estiez & estes obligé & contrainct, tant par ce que c'est le droit de quelconque Roy administrer iustice, & de cela est vray debteur à son subiect, laquelle de son office sans requeste de partie, il doit sans differer à vn chacun administrer, tant au pauvre comme au riche, & plustost & promptement se doit exerciter contre le riche & puissant que contre le pauvre & disetteux: car il estoit adonc necessité. Et aussi à proprement parler iustice exerce sa vraye operation, & lors se doit appeller vertus. Et à ce, pource principalement & directement furent les Roys ordonnez & establis, & fut force, puissance & seigneurie mise en leurs mains, à elle executer puissammēt & vertueusement, & mesmement quād les cas sy offrent & requierent ainsi que fait le cas à present, & aussi que la chose vous touche grādement, en vostre chief & nom, comme chacū sçait: car son mary & nostre trefredoubté seigneur & pere ainsi mauuaisemēt occis, estoit vostre frere germain seul, laquelle iustice vous luy auez deuement octroyée estre faicte & administrée. Et sur ce luy assignastes iour, dedans lequel vous luy deuiez faire: pour laquelle obtenir, continuellement elle eut les gens deuers vous, affin qu'ils le vous recordassent, ramēteussent & sollicitassent: laquelle iustice iusques au iour prefix, & encores lōguement apres, elle a attendu. Et pource, pour quelque diligence laquelle de ce elle a fait faire pour les empeschemēs qui y ont esté mis par ledit traistre, ses seruiteurs, officiers estās entour vous, cōme cy apres sera dit, elle n'en a riēs peu obtenir. Combien trefredoubté & souverain seigneur que ie sçay pour certain que vous auiez tousiours eu & encores auez grāde & bōne volenté d'icelle administrer. Nostredicte trefredoubtée dame & mere deuers vous en propre personne est retournée, & moy Charles en sa cōpagnie en poursuiuant la requeste, en vous requerant instāment que vous luy faciez administrer iustice, & deuāt nostre trefredoubté seignr mon seigneur d'Acquitaine vostre aîné fils, & quand à ce vostre lieutenant, par raison cōme pour certaine cōmission & puissance par vous sur ce donnée, ma dame la Roïne & luy, chacū d'eux à part luy, fait faire certaine propositiō cōtenāt au lōg, & diffusēmēt la maniere dudit homicide, & les causes pour lesquelles il fut cō-

mis



mis & perpetré, & aussi cōtenans les respōces & iustification par faulx, mauuais, & desloyal accusatiōs deuāt mises, par ledit traistreur & homicide, & les causes pour lesquelles il fut commis & perpetré. Et aussi contenans les respōces en certaine proposition faicte par luy torsionnairemēt vueillant couvrir son mauuais homicide. Et apres ladicte propositiō faicte par nostre trefredoubtée dame & mere, elle feit faire & prendre ses cōclusions contre le deuantdit traistreur, telle qu'elle les peut prendre & eslire selō l'vsage, coustume & stile de vostre regne, & requist que vostre procureur fut avec elle adioinct à faire ses conclusions criminelles, aux cas appartenās pour l'interest de iustice. Lesquelles choses ainsi faictes, apres ce, nostredit trefredoubté seigneur monseigneur d'Acquitaine par le conseil des seigneurs de vostre sang & autres de vostre conseil, estans avec luy en vostre chastel du Louure feit respondre à nostre dame, qu'il cōme vostre Lieutenant en celle partie, representāt vostre personne & les seigneurs de vostre sang & ceux de vostre conseil estoient contens, & auoient bien agreables ses iustifications proposées, par nostredicta dame & mere, pour vostre frere, duquel Dieu ait mercy nostre trefredoubté pere, & qu'ils se tenoiēt pour bien excusé & deschargé, & qu'en outre, si bonne respōce & prouision de iustice sur les choses requises dessusdictes par elle luy feroient faictes, qu'elle en deuroit estre bien contente. Et jaçoit-ce que nostredicta dame & mere eut poursuiuy & fait poursuivre trefdiligemment & instamment ladicte respōce, & de rechief eut fait faire vne supplicatiō & narration de toutes les choses dessusdictes, faisant, concluant & tēdant aux fins deuādictes, à ce qu'elle peut obtenir aucune prouision de iustice, laquelle vous fut baillée en vostre main, & qu'aussi elle feit en vostre matiere plusieurs grās & notables diligēces à vous & autres de vostre sang & gens de vostre conseil notoires & biē manifestes, lesquelles feroient trop lōgues à reciter. Neātmoins elle ne peut oncques quelque chose obtenir, nō mie seullemēt l'adiunctiō de vostre Procureur, laq̃lle chose est miserable à reciter. Car ledit traistreur, voyāt & saichāt vostre inclination, & vostre grande & bōne volenté que vous auiez à faire & administrer iustice, saichant aussi que son forfait par quelque maniere ne pouoit iustifier pour destourber & bailler tout par tout empeschement (outre les deffences par vous à luy faictes si sollēnellement & notablemēt que par voz lettres patentes, & par voz solēnels messages à luy & à ses fins enuoyez) vint à Paris à grand puissance de gens d'armes, desquels plusieurs estoient estrāgiers & bannis, qui en vostre Royaume moult de grans & irreparables dōmage y feirent, cōme ce est tout notoire. Et vous conuint deuāt qu'il y veint partir & nostre trefredoubtée dame ma dame la Roine, & aussi nostre trefredoubté seigneur mōseigneur le Duc d'Acquitaine, & autres seigneurs de vostre sang & de vostre conseil. Et il demoura tout seul avec sa puissance en vostre ville de Paris, où il tint mauuais & estrāges manieres à l'encontre de vous, de vostre dominatiō & de vostre peuple. Tant que pour euitier grans incōueniens & oppressions qui par luy & ses gēs d'armes estoiet faits en voz gens, il conuint q̃ vous, nostre trefredoubtée dame & nostredit trefredoubté seigneur monseignr d'Acquitaine & autres de vostre sang à son bō plaisir vinssent à Chartres à luy faire accorder, octroyer & passer ce qu'il vouloit, & auoit ainsi de faire, pour luy cuider descharger & expedier perpetuellemēt dudit faulx traistreur & mauuais homicide, & tout par sa force, violēce &



tyrannie & puissance par laquelle notoirement il a tenu & tient dessous ses pieds vostre iustice. Et ne veult souffrir aucunement que vous, ne voz officiers eussent n'ayent aucunement encores de present aucune cognoissance sur son peché ne sur son forfait. Et ne s'est daigné aucunement humilier deuers vous, lequel il a tant troublé & offensé qu'on n'en pourroit plus dire. Et qui selon droit & raison n'est mie capable de remission ne quelque grace. Et encores qui plus est n'est mie digne ne ne luy est pas licite de venir en vostre presence ne d'auoir aucuns actes d'y venir ne autres pour luy. Et faucunement il luy estoit de vostre benigne grace permis, il deuroit venir en toute humilité, en grande & singuliere cognoissance & contrition de son malefice: mais pource que dit est, a forméement fait de tout le contraire. Car en perseuerant en orgueil & obstination de son faulx courage, il a bien osé dire notoirement à vous, deuant tout le monde, & en lieu si notable, qu'il auoit fait mourir vostre-dit frere pour le bien de vous & de vostre royaume. Et veult maintenir qu'il luy fut dit de par vous, que de ce n'auiez eu aucune desplaissance. Qui est si tresgrād horreur, & douleur à tous leurs cueurs à l'ouyr reciter seulement, que plus grand ne pourroit estre, & fera encores plus grand à ceux qui viendront apres vous, & qui le liront en escript, & trouueront, que de la bouche du Roy de France (qui est le plus grand de tous les Chrestiens) soit issu que de la mort de son seul frere germain, tant cruelle, tant trahisteuse & tant inhumaine, il n'ayt prins aucune desplaissance. Lesquelles choses sont faictes, & redondent clerement en tant grand lesion & vitupere de vostre honneur, & vostre couronne de vostre royal maiesté (qui sont de ce blecez, & en grand villipendence) que c'est chose à peine reparable, & en ordre de droit & de iustice sont si grandement condamnez, & subuertis qu'oncques tant ne peurent ne pourroient plus estre: & mesmement du subiect au regard de son maistre, & de son souuerain seigneur: contre le bien commun, & contre la paix de cestuy royaume, qui iusques à maintenant à tousiours si grandement, & si notablement en iustice esté gouverné, que la gloire & louenge d'iceluy a esté singulierement renommée & famée sur tous les royaumes du monde. En apres, que ladicte requeste fut causée des faulces & notoires mensonges qu'il a fausement & trahistrement fait occire vostre seul frere germain par trahison lōgue main à pensée: par couuoitise de dominer & auoir le gouvernement de vostre royaume, comme dit est dessus. Lequel en la presence de plusieurs de ses seruiteurs & officiers, a dit que oncques en ce royaume ne fut fait si mauuais ne si trahistre homicide ne commis, ne perpetré. Et toutesfois dit en la requeste qu'il l'auoit fait pour le bien de vous & de vostre royaume. Pourquoi, la chose est moult clere, selon tous droits & raisons, escripts, que tout ce qui fut fait à Chartres ledit iour, est nul & de nulle valleur. Et qui plus est la chose est plus digne de plus grand peine & grand punition, au regard de luy: car oncques il ne daigna vous tant honorer ou reuerer, que de si grand grief & detestable forfait, dont il estoit & est tant notoirement chargé vous requist pardon, remission, grace ou misericorde quelconques. Et toutesfois veult il maintenir, que sans confession de son forfait, & sans demander grace, vous luy auez remis, qui est contre tout droit & raison escripte, vne chose delusoire, & illusoire, & à proprement parler vne vraye derrision de iustice, c'est à sçauoir de laisser à vn pecheur sans cognoissance de son forfait, sans contrition,



trition, sans penitence & sans de ce faire requeste ne quelconque supplication. Et qui pis est, en perseuerant notoirement, & mesmement en la presence de son seigneur, en l'obstination de son peché outre ce fait est, ledit iour, il tombe en manifeste & apperte contradiction : car il sedit auoir bien fait, & consequemment il requiert, en appert auoir merite, & remuneration. Et toutesfois veult il dire, que vous luy auez donné grace & remission : laquelle chose chet mie en bié fait, mais en peché, & non en merite. Et encores plus, car il ne fut oncques ordonné, aduisé ne parlé pour le salut de l'ame du deffunct pour quelconques satisfaction faire à la partie blecée, laquelle chose vous ne deuez ne pouez par quelque maniere pardonner, ne remettre. Et par ainsi, appert plus clerement par ce que dit est, que ce qui fut fait audit lieu de Chartres fut fait contre tous principes de droit, contre toute ordre & principe de raison, & de iustice, & en violant icelles, en toutes choses, & par tous deffaulx, si notoirement en toutes ses principes. Parquoy & par autres choses qui seroient trop longues à escrire, appert notoirement (comme dit est) que tout ce qui fut fait audit lieu de Chartres, ne vault riens, & n'est pas chose digne de recitation. Et l'aucun vouloit dire aucunement, qu'il voulsist & deust tenir, si est la chose moult clere, par ce que cy sera dit que le deuantdit trahistre, vient directement contre ledit traicté, & par plusieurs & diuerses manieres iceluy à enforcé & violé premier. Car quelconque chose que vous luy disiez premier, ou commandassiez, & que dorenavant il ne nous forfist ou procurast chose qui fut en nostre preiudice dommage ou deshonneur, & que ainsi l'eust promis & iuré : neantmoins à fait tout le contraire. Car pour cuyder, damner la bonne memoire de nostre tresredoubté seigneur & pere, & pour nous cuyder perpetuellement destruire & desheriter il à fait prendre vostre bon & loyal seruiteur le grād maistre d'hostel, auquel Dieu pardoint, & l'a fait emprisonner inhumainement questionner & tourmenter, & tellement que ses membres par force de question furent derompuz par force de violence, & de martyre qui luy fait souffrir, & s'efforça de luy faire confesser contre vostre dit frere nostre tresredoubté & souverain seigneur, & pere à qui Dieu pardoint à l'ame, aucunement de ses charges, lesquelles autresfois faulcement & mauuaisement il luy auoit imposé, pour vouloir couvrir son tresmauuais peché, & par ce vouloir de rechef estaindre, & planer & dāner la bonne memoire de vostre dit frere, & tendre à nostre destruction. Et ledit maistre d'hostel fait mener au lieu de sa mort. Lequel voyāt ses yeux deuant sa mort, afferma publicquement, & sur la damnation de son ame print, que oncques en sa vie ne sceut ne apperceut, que vostre dit tresredoubté seigneur & pere pensast mal ne trahison ne autre chose qui fut contre le bien de personne. Et aussi pareillement n'auoit il fait, mais vous auoit bien & loyaument seruy tous les iours de sa vie : & s'il auoit aucune chose dit au contraire, ou confessé, ce auoit esté par force tresinhumaine question ou tourmens qui luy auoient esté fais, dont il auoit tous ses membres, comme dit est derompuz. Et ainsi par le peril de son ame, & sur la mort que presentement il attendoit, il le prenoit. Et en celle affirmation perseuera iusques à la mort, presens cheualiers, & autres plusieurs notables & diuerses personnes. Et par ce appert trop clerement qu'il vient de fait directement contre ce qu'il a iuré & promis audit lieu de Chartres. En apres, car il à recepté, recelé & nourry, & de iour en iour nourrist les homicides & meur-



triers qui à son commandement tuerent vostre frere, & toutesfois ils furent exceptez & hors mis de ce qui fut fait audit lieu de Chartres & plus : car il, par toutes manieres, comme la chose est toute notoire, a vexé, troublé & empesché, & pourfuiuy les officiers & seruiteurs de vostre frere, & les nostres à fait destituer, & oster de leurs estats offices & seruices, qu'ils auoient entour vous, & entour vostre regne, sans occasion ou cause quelsconques, mais seulement en haine desdits seruiteurs de vostre frere & des nostres. Et aucuns d'eux à voulu destruire en corps, & en biens & efforcé d'eux faire mourir & aussi par plusieurs autres manieres, & moyens qui seroient trop longs à reciter, vient contre, cōme la chose est toute notoire. Apres toutes ces choses, ledit traistre, voyant & sçachant clerement l'horreur & cruauté de son malfait, & que par quelconque maniere couurir ne palier ne le pourroit : affin que vous & voz officiers n'eussiez aucune cognoissance sur son malfait, pour la mettre à execution (aussi la vraye cause pourquoy il fait occire vostre frere, c'estoit pour dominer & estre dominateur) de fait a vsurpé & enceres vsurpe l'auctorité de vostre regime, & domination: desquels, comme de sa propre chose il vse plainement, qui doit estre plus que lamentable à tous voz subiects & bien vueillans. Car il a detenu & detient vostre personne celle aussi de nostre trefredoubté seigneur monseigneur le Duc d'Acquitaine vostre aîné fils en telle & si grande subiection, qu'il n'est personne de quelque estat qu'il soit de vostre royaume ne autre qui puisse auoir acces à vous, pour quelque cause qu'il soit, sinon par la licence & congé de ceux qu'il a à ce commis & ordonnez deuers vous, à celle fin a debouté, & iecté hors de vous & de vostre famille les anciens & vaillans hommes, & seruiteurs qui longuement & loyaument vous ont seruy: & leurs lieux à remplis de ses propres familliers, & seruiteurs & d'autres tels qu'il luy à pleu, & en grand partie de gens estranges & a vous non cogneuz. Et semblablement fait de nostre trefredouté seigneur monseigneur le Duc d'Acquitaine. Aussi desappointa voz officiers, & par especial en tous les notables seruices & offices de vostre royaume. Et voz biens & finances de vostre royaume il a laissé ça & là où bon luy à semblé & à son plaisir & à son singulier prouffit les a employées & applicquées, non pas qu'il les ayt despensées aucunement au bien & au prouffit de vous en quelque maniere, n'en aucun relieuement de voz subiects : à laquelle chose auez eu grand dommage. Les autres sous aucunes fainctes & couleurs les a vexez & trauaillez de iustice & desrobbez, & à proprement parler les a despouillez de leurs finances, lesquelles en ses propres vsaiges & priuées vtilitez il a applicqué & cōuerty, comme ce est tout cler & tout notoire à Paris & ailleurs. Briefuement il a ouuert & introduit en ce royaume les voyes de faire & commettre tous crimes & malefices indifferamment, sans ce que punition ou correction quelconque de ce on attende aucunement estre faicte. Et tant que sous vmbre de deffaute & negligence d'auoir exercé & fait iustice dudit fait, trefenorme & detestable homicide, plusieurs autres homicides & malefices & crimes sont commis en plusieurs & diuerses parties de vostre Royaume depuis l'aduenue dudit cas. Disans lesdits malfaiçteurs que aussi bien passeront sans estre punis comme a fait celuy qui a occis le frere du Roy qui est ouuerture d'une grand playe. Et pource, trefredouté & souuerain seigneur monseigneur de Berry vostre oncle, le Duc de Bourbon, le Comte d'Alen-



çon & les Comtes de Clermont & d'Armignac, & moy Charles en leur compagnie en vueillant acquiter deuers vous noz foy & loyauté, par lesquelles, nous sommes obligez & contrains comme voz treshumbles parens & subiects: nous ensemble, auons mis l'an passé intention & propos de venir a vous, à vous demonstrer les choses deuantdictes le damnable regime de vostre regne & la prochaine & euidente desertion & destruction totale, se longuement la chose demeure en tel estat. Affin donc, que nous oyez & ceux aussi qui y seront qui vueillent riens dire au contraire, vous trefredouté & souuerain seigneur, par l'aduis, deliberation & cōseil de ceux de vostre sang, des gens de vostre cōseil, seigneurs, barons & preud'hommes de vostre Royaume tels & en tel nombre qu'il vous plaira, estre fait & que meilliez remede aux inconueniens qui aduiennent, & qui autrement necessairement estoient & sont en aduenture de brief aduenir. Pour tant pouruoyant premier à la franchise & seureté de vostre personne & de nostre seigneur monseigneur le Duc d'Aquitaine vostre aîné fils: en apres au bien de vous & au bon regime & gouuernement de vostre Royaume & de toute la chose publique d'iceluy, à vostre prouffit, & de tous autres voz subiects, ainsi que toutes les choses estoient plus à plain contenues en noz lettres patentes, lesquelles adonc nous vous enuoyasmes, nous veinsmes empres Paris ou vous estiez jaçoit ce que pour la seureté de noz personnes nous fussions accompagnez de noz parens & amis & vassaulx tous à vous subiects, & tous venissions en vostre seruice seullement, pour le bien de vous & de vostre Royaume comme dit est. Neantmoins nous fussions offers de venir à vous en compagnie modérée, toutesfois ne peusmes oncques auoir vn seul accès à vous, ne vne seule audience obstant les empeschemens, & perturbations, qui par ledit trahistre y furent mis, qui tousiours estoit decosté & pres de vous, empeschant si grand bien que nous auions en propos, & intention de faire tousiours en perseuerant, en l'obstination de son courage & en ambition & concupiscence qu'il a tousiours eu de dominer & d'auoir l'auctorité & le gouuernement de vous & de vostre Royaume. Nous par certain accord, par vous & vostre conseil prins, nous conuint retourner en nostre païs, & pour escheuer la destruction de vostre peuple faire r'allier voz gens. Lequel appoinctement, de nostre partie reallement & de fait nous accomplismes: mais tantost il vint en vn moment & le viola: car entre les autres choses fut appoincté que ceux, qui adonc entour vous & vostre conseil demourroient, feroient hommes non suspects, non fauorables, non seruiteurs, non pensionnaires d'une partie ne d'autre. Et il à laissé ses seruiteurs par luy creez, & sont les principaux, par lesquels moyens il à tousiours l'auctorité, le regime & gouuernement de vous & de vostre Royaume mieux & plus seurement que comme fil y estoit en propre personne. Et ainsi n'est aucunement pourueu ausdits inconueniens mais tousiours croissent & encores plus croystront & augmenteront se Dieu & vous en brief n'y mettez remede. Et apres, jaçoit ce que Pierre des Essars adonc Preuost de Paris vostre bonne ville, & gouuerneur de toutes voz finances, deust estre déposé de toutes offices royaulx & de tous les estats qu'il auoit entour vous par ledit appoinctement: neantmoins il luy fait auoir secretement voz lettres patentes seellées de vostre grand seel pour r'auoir ladicte Preuosté & office d'icelle sous vmbre desquelles ledit Pierre est retourné à Paris & s'est enforcé de



retourner & r'entrer en l'office de ladicte Preuosté. Et de fait vint en Chastellet à Paris & se feist au siege tribunal & print possession dudit office & tout par l'ordonnance, sceu & voulenté dudit Duc de Bourgongne, & ne demoura pas par luy que la chose ne sortist son effect. Pourquoy, appert clerement, ledit appoinctement estre par luy & de sa partie violé. Et que pis est faisant ledit appoinctement secrettement procuroit le contraire & en luy le rompoit & enforçoit, car en consentant le depost dudit des Essars il procuroit qu'il fut restitué, comme dit est. Pourquoy la chose est trop manifeste qu'il n'eust oncques en toute sa vie intention ne propos ledit appoinctement tenir. Et outre, combien que par ledit traicté & appoinctement, fut dit que tous ceux qui auoient esté deposez de leurs estats & offices soubs vmbre d'auoir esté en la compagnie de moy Charles & autres desdits seigneurs à Vicestre fussent remis & restituez en leurs offices, & que par l'ordonnance de vous & de vostre grand conseil, messire Iehan Charenciers en l'office de capitaine de vostre ville & chastel de Caen eust esté remis, & restitué : neantmoins en venant directement contre, ledit Duc de Bourgongne le feit depuis deposer dudit office & ledit office impetra pour luy mesmes, en la hayne & au contens dudit de Charenciers, & de fait ledit office occupa, tient & occupe. Pourquoy il appert clerement, que par plusieurs & diuerses manieres ledit traicté a rompu & violé. Et jaçoit ce trefredoubté sire & souuerain, que par nostre trefredoubtée dame & mere, à qui Dieu pardoint, fussent faictes les diligences deuantdictes, à ce que iustice fut administrée dudit mauuais & damnable homicide, & que ja pres de quatre ans sont passez que le cas aduint, toutesfois sans ce qu'elle, ne nous ayons peu obtenir vne seule prouision de iustice, ensuiuant les voyes par elle acceptées. Je Charles, suppliy à vous treshumblement nagueres, qu'il vous pleust à moy octroyer, voz lettres interinées de iustice, contre les consentans, & complices dudit homicide, c'est à sçauoir à tous voz iusticiers adressans, que ceux que par information deüe trouueroient chargez & coupables des choses dessusdictes prissent & emprisonnassent & feissent telle raison & iustice comme au cas appartiendroit. Et ce n'estoit fors à exciter & reueiller iustice, car de son office sans ma requeste ne d'autre quelconques elle doit ce faire & à ce faire elle est obligée. Et ne croy pas, qu'il soit homme en vostre Royaume de quelque estat ou condition qu'il soit pource ne de bas estat, auquel en vostre chancellerie luy fussent refusées en pareil n'en moindre cas, trop bien sçay, qu'on ne luy deuroit pas refuser. Et toutesfois pour quelconque diligence que j'aye peu ne sceu faire, lesdictes lettres de iustice n'ay peu obtenir. Et tient, pource qu'ils sont aucuns en vostre conseil qui des choses deuantdictes se sentent chargez, & pource ne conseillèrent pas l'exaucement ne l'accomplissement de madiete supplication & requeste. Pourquoy, trefredouté & souuerain seigneur, nagueres ie vous suppliy tant comme ie peuz, que pour le bien de vous, & de vostre Royaume, vous pleust repeller & mettre hors de vous & de voz offices, certaines personnes, lesquelles par mes lettres ie vous nommay & declairay qui notoiremēt empeschent le bien de iustice, le bon regime de vous, & la paix commune de vostre Royaume & empeschent tant qu'ils seront entour vous. Et ce fait, i'estoye prest pour l'amour & reuerence de vous & aussi pour le bien de vostre Royaume sur les choses par vous nagueres à moy dictes par voz ambassadeurs,



deurs, lesquels il vous à pleu moy enuoyer à vous donner, & faire telle responce & descouurir aussi tellement & si clerement mes intentions & propos que Dieu, vous & tout le monde deuriez estre contens, dequoy comme de la requeste precedente par semblable cause ie ne peulx quelque chose obtenir. Nous vous supplions trefredouté & souuerain seigneur, tant comme nous pouons humblemēt, que attendues les choses deuantdictes, & considerées : c'est à sçauoir l'enormité dudit homicide, lequel ne peult estre trop detesté, ne la cruauté d'iceluy estre difamée tant de droit comme de fait, & la confession de partie qui notoirement l'a confessé, tant en iugement deuant nostre trefredouté seigneur mōseigneur d'Acquitaine vostre aîné fils, & plusieurs seigneurs de vostre sang, ceux aussi de vostre conseil & grand planté de clergé & peuple à ce assemblez à sa requeste, à vostre hostel à sainct Pol, & nostre deuantdit trefredouté seigneur monseigneur d'Acquitaine là estant & seant en son siege tribunal, vostre personne representāt qui estes son Roy & son souuerain seigneur & le nostre : & par ainsi ne peult dire qu'il ne l'ayt confessé en iugement & deuant iuge competant, & hors iugement & aussi deuant tels & si notables tesmoins comme le Roy de Cecile, & monseigneur de Berry vostre oncle : par deuant lesquels il l'a confessé priueement, simplement & absoluēment sans cause ou raison quelconques dire ou enseigner, fors tant seulement qu'il l'auoit fait par la tentation de l'ennemy, & apres cela confessé, en plusieurs lieux tant par deuant vous comme par deuant plusieurs notables personnes. La cōfession ainsi faicte, selon toute raison escripte & selon droits coustumes & selon vsage & stille notoirement obseruez, vault & doit valloir en son preiudice, ne doreñauant ne doit estre receu à dire contre sa confession ne à la coulourer ou iustifier autrement, que premier a fait, par la quelle confession luy mesme s'est condamné & de sa propre bouche, & à iecté la sentence. Cela est moult cler, que apres ladicte confession ne conuenoit, ne conuient contrefaire autre solemnité, & ne gisoit la chose ne gist aussi en autre examé ne cognoissance de cause. Et par ainsi ne restoit ne reste encores fors tant seulement prompte & preste punition, & execution de iustice, & n'afferoit n'appartenoit dilation. Et toutesfois par ce que dit est, nostre trefredoutée dame & mere Obie de laquelle Dieu face mercy, & nous ensuiuant ceste matiere, feismes toutes les diligences possibles & par grand instances, soubstinsmes & attendismes treslonguement & par longues dilations. Car ja sont passez trois ans & demy & plus, que ceste prosecution est commencée, sans ce, comme deuant est dit, qu'onques peussions obtenir vne seule prouision de iustice, ne parcevoir par quelque maniere que iustice se voulsist aucunement de ce entremettre. Laquelle chose est & sera douloureuse & miserable seulement à l'ouyr reciter, attendu aussi & considéré les grans maux, dommages & inconueniens par ce venus en vostre Royaume, & qui necessairement aduiennent & aduiendront encores plus grans, si non que ce cas icy soit réparé : car ainsi que vous pouez veoir, & clerement, depuis la venue dudit cas & homicide, ce Royaume de inconuenient, de plus grand en plus grād tousiours est passé, & aussi est ce propre droit, que de faulte de iustice d'engendrer, nourrir & multiplier tous inconueniens. Pource plaise vous de vostre grace en faisant vostre loyal deuoir de vostre office, en obeissant à Dieu vostre createur, duquel l'estat de iustice despend & directement procede, & dont aussi vous



tenez icelle. Et aussi eu regard en pitié au bon maintienement de vostre seigneurie, & de vostre regne vueillez vous exciter & esveiller, & promptement, toutes grandes dilations derriere mises vous exposer à ladicte execution de iustice. Et de ce, en telle & si grande humilité que nous plus pouons, vous supplions & ressupplions, sommons & requerons tresinstamment. Et par nous par toutes les voyes voulons, procurer & poursuivre, tant de fait comme autrement, la reparation dudit homicide, de l'honneur de nostre trefredouté seigneur & pere duquel Dieu ayt mercy, duquel de fait sommes blecez : mais qui plus est, à ce nous sommes obligez & contrains : & par droit, sur trefgrosses & grans peines, nous est commandé, c'est à sçauoir sur peine d'encourir nom de diffame, de non estre reputez ses enfans ne à luy appartenir en aucune maniere, estre reputez aussi indignes de sa succession, de son nom, de ses armes & de sa seigneurie : lesquelles peines nous ne voulons ne deuons encourir, nous aurions plus cher à soubstenir & souffrir mort cōme deuroit faire tout cueur noble de quelque estat qu'il soit. Nous vous supplions tant humblement que nous pouons, qu'à ce & aussi à resister & rebouter sa maligne intention, laquelle il a contre nous par toutes voyes & à nostre destruction tendant, vous plaise de vostre benigne grace, nous auxquels Dieu à fait tant & si grand grace, qu'il nous fait naistre en ce monde voz parens & tant prochains que de vostre generation & comme vrayz nepueux enfans de vostre seul frere germain ayder, secourir & conforter de vostre puissance, & à proprement parler, vous plaise ayder, secourir & conforter vostre dit frere: auquel en ceste partie nous deduisons, & entendons à deduire la cause. Las, nostre trefredouté & souuerain seigneur, il n'est si poure noble homme ne de si bas estat en ce monde ne quelconque autre à qui tant cruellement ne tant trahistreusement pere ne frere fut occis, que luy ou ses parens ou amis ne se feissent partie iusques à la mort, & qu'ils ne poursuiussent iusques à la mort ledit homicide, & mesmemēt contre ledit malfacteur de plus en plus, en l'obstination de son cruel & faulx courage perseuerant: comme notoirement fait ledit traistreur qui nagueres vous est osé escrire & en plusieurs autres lieux notables dire qu'il a fait mourir vostre frere ( que Dieu absolue ) nostre trefredouté seigneur & pere bien & deuement. Esquels lieux, il moy Charles affermay auoir menty, auquel plus auant respondre ie me deportte pour le present. Car comme il est dit deuant, il appert clerement qu'il est menteur mauuais, faux, trahistre & desloyal : & moy par la grace de Dieu i'ay tousiours esté, suis & seray sans reproche & vray disant. Et pource, nostre trefredouté & souuerain seigneur que les choses dessusdictes sont & seront faictes au grand vitupere & preiudice de vostre personne, de tout vostre Royaume & de la chose publique, vous supplions tant & si humblement que plus pouons qu'il vous plaise à vous exposer ainsi que de raison faire le deuez, à la reparation de ceste besongne, & nous ayder, secourir & conforter par toutes manieres à vous possibles: affin que la reparation du cruel homicide, puisse estre puny ainsi que de raison faire se doit. Et en ce faisant vous vous acquiterez principalement enuers Dieu nostre createur, & executerez iustice, de laquelle vous estes chef & souuerain, & auquel apres Dieu nous deuons auoir recours. Et affin nostre trefredouté & souuerain seigneur, que vous sçachez que le contenu en ces presentes procede de nostre certaine science & vouldenté, nous Charles,

Philippe,



Philippe, & Iean voz treshumbles fils & nepucux, y auons chacun de nous, mis nostre seing manuel. Escript à Iargueau le dixiesme iour de Iuillet mille quatre cens & xj. Lesquelles lettres furent enuoyées par vn herault du Duc d'Orleans à Paris deuers le Roy. Auquel lieu elles furent visitées à plain conseil bien au long, & sur le contenu en icelles furent mises auant plusieurs & diuerses opinions. Et vouloient les aucuns que les freres dessusdits fussent ouys en leurs oraisons: & que le Duc de Bourgogne fut euocqué, & contraiçt de respondre à ce qu'ils voudroient dire & proposer, contre luy. Mais finalement la besongne fut prolongée & ne peurent les dessusdits auoir aucune responce qui leur fut agreable, par ce que la plus grand partie de ceux qui gouernoient le Roy & le Duc d'Acquitaine, estoient plus fauorables au Duc de Bourgogne, qu'à la partie d'Orleans: & mesmement luy fut brief ensuiuant enuoyé la coppie des lettres dessusdictes. Lesquelles par luy veües, apperceut assés qu'il estoit apparent qu'iceux freres d'Orleans luy feroient guerre dedans brief temps. Et pour y resister se pourueut de gens & d'habillemens le plus efforceement que faire le peut par tous ses pays. Et pareillement que les dessusdits d'Orleans auoient escript au Roy, & escriuirent à plusieurs Princes, citez & bonnes villes du Royaume de France, en eux complaignans & requerans ayde contre le Duc de Bourgogne. Et pource que selon leur intention le Roy leur oncle & son grand conseil, ne leur baillerent mie responce aux lettres qu'ils auoient enuoyées telles qu'ils desiroient: escriuirent de rechef autres assez semblables contenans ou en substance maniere de sommation: donnans à entendre que si prouision ne leur estoit baillée il conuenoit, & ne s'en pouoient deporter de le querir par autre maniere. Et là donc fut de par le Roy ordonné tant à la Roynes, au Duc de Berry, comme autres de grand auctorité du sang royal comme du conseil, à querir moyen entre ces deux parties: c'est à sçauoir d'Orleans & de Bourgogne. Et furent enuoyez plusieurs & diuers ambassadeurs d'un costé & d'autre: mais finalement on ne les peut accorder, par ce principalement que le Duc de Bourgogne ne vouloit pas descēdre à faire quelque reparatiō, sinon ainsi qu'il auoit esté traicté à la paix de Chartres, & se tenoit fier pource qu'il auoit le Roy & le Duc d'Acquitaine de sa partie. Les autres c'est à sçauoir les enfans d'Orleans n'estoient pas de ce contens, & sentirent qu'ils auoient plusieurs seigneurs de leur partie, & qui desia leur auoient promis à donner confort & ayde de toute leur puissance contre le dessusdit Duc de Bourgogne. Et par ainsi la Roynes dessusdictes, & ceux qui estoient ordonnez de par le Roy à poursuiuir les traictes dessusdits, voyans qu'ils ne pouoient venir à chef & qu'il leur estoit impossible selon les demandes & responces des deux parties de les accorder, delaisserent ceste matiere, & feirent vn certain iour leur relation au Roy des deuoirs, qu'ils en auoient faits, & des responces qu'ils auoient de chacune partie. Et brief apres, les dessusdits d'Orleans se conclurent de faire guerre mortelle audit Duc de Bourgogne & à tous ses aydans, & luy enuoyerent leurs lettres de deffiances par vn herault.

*Comment les dessusdits freres d'Orleans enuoyerent leurs lettres de deffiances pour la premiere fois au Duc de Bourgogne en sa ville de Doüay. CHAP. LXXII.*



**E**n suit la coppie des lettres premieres de deffiances, que enuoyerent les trois freres d'Orleans au Duc Jean de Bourgongne, apres la mort du Duc Loÿs d'Orleans leur pere: Charles Duc d'Orleans, & de Valois, Comte de Blois & de Beaumont, & seigneur de Conchy: Philippe Comte de Vertus & Jean Comte d'Angoulesme freres, à toy Jean qui te dis Duc de Bourgongne. Pour le treshorrible meurdre par toy fait en grand trahison d'aguets à pensée, par meurdriers affaictes en la personne de nostre trefredoubté seigneur & pere monseigneur Loÿs Duc d'Orleans, seul frere germain de monseigneur le Roy nostre souuerain seigneur, & le tien: nonobstant plusieurs sermens, alliances & compagnies d'armes que auoyes à luy, & pour les grans trahisons, desloyautez, deshonneurs & mauuaistiez que tu as perpetré cõtre nostredit souuerain seigneur, monseigneur le Roy & contre nous en plusieurs manieres, te faisons sçauoir que de ceste ensuiuant, nous te nuyrons de toute nostre puissance & par toutes les manieres que nous pourrons. Et contre toy, & de ta desloyauté & trahison appellons Dieu & raison en nostre ayde, & tous les preud'hommes de ce monde. En tesmoing de verité nous auons fait sceller ces presentes lettres du seal de moy Charles dessus nommé. Dõné à Iargueau le xviii. iour de Iuillet. Lesquelles lettres receües par ledit Duc de Bourgongne, & à luy présentées par vn Herault des dessusdits freres en sa ville de Douay. Presentemēt apres ce qu'il eut eu conseil sur icelles rescriuit aux dessusdits, en faisant responce telle que cy apres sera declairé: & les enuoya par vn sien officier d'armes deuers iceux freres.

*Comment le Duc de Bourgongne rescriuit, aux enfans d'Orleans, sur les deffiances que ils luy auoient enuoyé, en faisant la responce sur icelles. CHA. LXXIII.*

**J**ean Duc de Bourgongne Comte d'Arthois, de Flandres, & de Bourgongne Palatin, seigneur de Salines & de Malines. A toy Charles qui te dis Comte de Vertus, & à toy Jean qui te dis Comte d'Angoulesme qui nagueres nous auez escript voz lettres de deffiances: faisons sçauoir & voulons que chacun sçache que pour abbatre les treshorribles trahisons par tresgrans mauuaistiez & aguets apensez conspirées, machinées & faictes felonement à l'encontre de monseigneur le Roy nostre trefredouté & souuerain seigneur, & le vostre: & contre sa tresnoble generation par feu Loÿs vostre pere en plusieurs & diuerses manieres: ce pour garder vostre pere faulx & desloyal trahistre de paruenir à la finale executiõ detestable, à laquelle il à contēdu à l'encontre de nostre trefredouté & souuerain seigneur & le sien, & aussi cõtre ladicte generation, si faulce & notoirement, que nul preud'homme ne le deuoit laisser viure: & mesmement nous, qui sommes cousins germains de mondit seigneur, Doyen des peres & deux fois pere, & plus abstrains à luy & à ladicte generation, qu'à autres quelsconques de ladicte generation de leurs parens & subiects, ne deuons, vn si faux desloyal, cruel & felon trahistre, laisser sur terre, plus longuement que ce ne fut à nostre tresgrand charge. Auõs pour nous acquiter loyaument, & faire nostre deuoir enuers nostre tresgrand & souuerain seigneur & ladicte generation, fait mourir ainsi qu'il deuoit ledit faulx & desloyal trahistre. Et ainsi, auons fait plaisir à Dieu, seruice loyal à nostredit trefredoubté & souuerain seigneur, executé raison. Et pource que toy & tesdits freres ensuiuez la trace faulce, desloyalle



desloyalle & felonnie de vostredit feu pere, cuidans venir aux damnables & desloyaux faits à quoy il contendoit, auons trefgrand leesse au cuer desdictes defiances. Mais du surplus contenu en icelles, toy & tesdits freres auez menty, & mentez faulxement, mauuaisement, & desloyalement traistres que vous estes, & dont à l'ayde de nostre seigneur qui sçait & cognoist la tref-entiere & parfaicte loyauté, amour & vraye intention que tousiours auons, & aurons tant que viurons à nostredit seigneur, sadiete generation au bié de son peuple & de tout son Royaume: vous ferons venir à la fin, & punition, telle que tels faulx, mauuais & desloyaux traistres rebelles & desobeissans felons comme toy & tesdits freres estes, doyuent venir par raison. En tesmoings de ce, nous auons fait sceller ces lettres de nostre scel. Donné en nostre ville de Douay le xiiij. iour d'Aoust, l'an de grace mille cccc. & xj. Lesquelles lettres de defiances ledit Duc de Bourgongne enuoya (côme dit est dessus) par vn sien officiers d'armes deuers ledit Duc d'Orleans & ses freres, lequel fut trouué à Blois, & eut grand desdaing & desplaisance de la responce que luy faisoit ledit Duc de Bourgongne. Neantmoins il feit faire assez bonne chere à celuy qui les auoit portées: & apres que sur icelles il eut deliberation de conseil, il s'enforça par toutes les manieres qu'il peut d'assembler gens pour mener guerre au dessusdit Duc de Bourgongne.

*Comment le Duc Iean de Bourgongne fut mal cõtent de messire Mansart du Bos, & des lettres qu'il enuoya au Duc de Bourbon pour auoir son ayde. CHAP. LXXIIII.*

**A** Pres le Duc Iean de Bourgongne quãd il fut venu à sa cognoissance qu'il auroit la guerre au Duc d'Orleãs & à ses freres & autres ses allies & que les aucuns l'eurent deffié par lettres, & par parolles, il se prepara de toute sa puissance pour acquerre amis & allies, pour resister contre tous ceux qui luy voudroient courir sus. Et entre les autres qui deffierent & dõt il fut plus mal cõtent que de nuls autres, le deffia vn cheualier de Picardie nommé messire Mansart du Bos, duquel & de sa fin il sera cy apres declairé plus à plain quand temps sera. Si escriuit iceluy Duc au Duc de Bourbon vnes lettres lesquelles il enuoya par son Roy d'Armes de Flandres, desquelles & du contenu en icelles la copie s'en suit mot apres autre. Trescher & bien aymé cousin, Duc de Bourbon & Comte de Cleremõt, Iean Duc de Bourgongne Comte de Flandres, d'Arthois & de Bourgongne, tient bien estre en vostre memoire, comment en l'an mille quatre cens & cinq, vous & moy feismes & eusmes certains alliances ensemble, lesquelles furent & ont esté depuis trois ans en çà à vostre priere & requeste renouuellées & de rechef iurées & promises en la presence de plusieurs cheualiers & autres gës dignes de foy. Et deuez demourer mō bō vray & parfait amy & allié durant le cours de vostre vie & procurer à vostre loyal pouoir le bié & hōneur de moy, & escheuer mon mal & dōmage ainsi que bon parent loyal à moy allié est tenu de faire, & avec ce toutes & quãtesfois que j'auray à faire chose qui touche l'hōneur & estat de ma personne & de messeigneurs & amis, vous deuez & estes tenu moy ayder, conseiller & conforter loyallēmēt, se requis en estes, de corps, d'amis & de cheuance, enuers tous & contre tous, excepté tāt seullemēt la personne de mōseigneur le Roy, monseigneur de Guyenne, & celuy qui succedera au Royaume de France, & feu beau cousin le Duc de Bourbon vostre



pere. Et encores fil fut aduenü qu'entre moy, & aucuns autres, eust eu guerre ou debat, & ledit beau cousin vostre pere se fut mis contre moy, avec personne aduerfaire, vous en ce cas vous eussiez peu mettre avecques vostre dit feu pere, tout le cours de sa vie, tant seullement, sans par ceste condition ou exception estre prejudicié ou derogé aucunement ausdictes alliances. Et comme ie, aussi vous, estes recors que vous avez iuré, tenir, garder, faire & accomplir les choses dessusdictes & declairées, toutes & quantesfois que le cas sy offriroit, sur la damnation de vostre ame, par la foy & serment de vostre corps, sur les sainctes euangiles de Dieu & sur les sainctes reliques par vous attouchées. Or est vray, trescher & amé cousin, que Charles qui se dit Duc d'Orleans, Philippe & Iean ses freres m'ont nouvellement enuoyé lettres de defiances & ont intention & propos de moy greuer de toute leur puissance, à quoy ou plaisir de Dieu i'ay intention & propos de resister, par le bon conseil, confort & ayde de mes parens & amis, & alliez, & de mes subiects, & bien vueillans de garder mon honneur à lencôtre d'eux. Et pource trescher & amé cousin que vous estes à moy allié par la maniere q̄ dessus est deuillée & tenu de moy ayder, cōseiller & conforter loyaument, ie vous requiers, & sommes par vertu desdictes alliances, & les sermens qu'avez fait comme dit est, qu'en vostre personne accompagné le mieux que vous pourrez d'amis & de gens d'armes, me vueillez venir ayder, conseiller & conforter loyalement, contre les dessusdits nommez, Charles, Philippe & Iean: en acquitant vous, & vosdits honneur, & serment. Sçachant qu'en pareil cas ie voudroye garder entierement mon honneur & ma foy & serment, sans les aucunement frauder. Et ainsi i'espere que vous ferez. Si me vueillez briefuement par le porteur de ceste, rescrire & faire sçauoir sur ce vostre plaisir & volenté ainsi que le cas le requiert. Donné en ma ville de Douay sous mon grand seel placqué à ces presentes le xiiij. iour d'Aoust l'an mille cccc. & xj. Leuelles lettres presentées par le Roy d'armes dessusdit à iceluy Duc de Bourbon apres qu'il les eut veües & visitées bien au long fait response au dessusdit Roy d'armes que dedans briefs iours ils enuoyeroit deuers son maistre le Duc de Bourgongne, laquelle chose il fit: car assez tost apres, les deuantdictes lettres de confederation & d'alliances qu'il auoit du Duc de Bourgongne, luy r'enuoya en faisant les conuenances nulles, & fallia du tout avec ledit d'Orleans & ses freres, dont iceluy Duc de Bourgongne fut tresmal content de luy, jaçoit ce que lors ne le peut auoir autre.

*Comment apres la publication du mandement royal contenant que nul ne s'armast contre les deux parties d'Orleans & de Bourgongne. Ledit Duc de Bourgongne escriuit au Baillif d'Amiens.*

CHAP. LXXV.



Il est vray que le Duc Iean de Bourgongne doutant que ses amis, alliez & subiects ne delaissassent aucunement de le seruir en ses affaires par le moyen & crainte d'un mandement royal qui auoit esté publié par tous les bailliages du Royaume de France contenans comme il peut plus clerement apparoir, par la coppie d'iceluy cy deuant escripte que nuls dudit Royaume ne fut si hardy de se mettre sus en armes, pour seruir les Ducs d'Orleans ne de Bourgongne ne l'un d'iceux pour mener guerre l'un cōtre l'autre  
escriuit



escriuit lettres au Baillif d'Amiens ou à son lieutenant au maieur ou escheuins dudit lieu & à chacun d'eux, desquelles la coppie s'ensuit. Treschiers & bien ayez, nous auons entendu de plusieurs que par mandement de monseigneur le Roy vous auez deffendu generallyment à tous les subiects & autres que nuls s'arment en nostre fiance ne de noz aduersaires, lesquelles deffences sont faictes de par ledit monseigneur le Roy pource qu'il auoit intention, propos & voulenté de mettre paix & concorde entre nous & nostredit aduersaire. Pourquoy il a plusieurs fois enuoyé ses ambassadeurs & messages especiaux tant deuers nous comme deuers nosdits ennemis. Ausquels nous auons tousiours respondu comme feables, vrays & entiers subiects & dudit monseigneur le Roy seruiteurs, & tant que Dieu mercy toutes les responcez qui ont esté faictes ont esté tendans à bonne fin & paix & vnion & luy ont esté plaisans, & agreables, mais noz aduersaires en continuant leur mauuais, damnable & desloyal propos & voulenté, laquelle ils ont tousiours eüe & ont contre monseigneur le Roy & sa noble generation & bien de son Royaume. Et en ensuiuant les meurs & conditions de leur pere qui tout son temps desloyaument & trahistreusement contendit à la totale destruction de monseigneur le Roy & sa noble generation & le bien de son royaume, ont fait tout le contraire, & ont tousiours respõdu, en dissimulant, & alongé le temps sous fainctes faulces & mauuaises couleurs. Et pendant que ma tresredoutée dame la Royne, nostre trescher oncle & seigneur monseigneur de Berry & nostre trescher frere le Duc de Bretaigne qui se sont mis ensemble par l'ordonnance & bon plaisir du Roy à querir, & trouuer aucun bon moyen de paix entre nous & noz aduersaires, ces faux & desloyaulx trahistres rebelles & inobediens, Charles qui se dit Duc d'Orleans, & ses freres nous ont enuoyé leurs defiances & deuant icelles se sont plusieurs fois enforcez desloyaument & trahistreusement contre leur serment, nous diffamer, & dommager, tant de fait comme autrement. Laquelle chose au plaisir de Dieu n'est pas en sa puissance ne ne sera se Dieu plaist, qui scet & cognoist l'entiere & parfaicte voulenté & loyauté que nous auons & aurons tant que nous viurons à nostredit seigneur le Roy & à sa generation & bien de son Royaume, pour lequel, nous auons & voulons mettre tousiours cuer, corps, finances & puissance & generallyment tout ce que Dieu nous a donné. Et pour lequel nous seismes & commandasmes, estre fait tout ce generallyment que nous seismes, sans auoir autre regard à diffame, dommage en corps, en biens n'en honneur qui ne pourroit estre amoindry par si faux mauuais trahistres & desloyaux rebelles, & inobediens à nostredit seigneur le Roy, ainsi que sont les deuantdits Charles & ses freres, qui sont venuz de si faulx, mauuais & si desloyal trahistre, comme a esté leur pere, ainsi qu'il est tout notoire, & commun par tout le Royaume. Et vrayement nous tenons, qu'ouques l'intention de nostre sire le Roy ne fut de vouloir empescher que tous noz bons parens, amis, alliez & seruiteurs, subiects & bien vueillans loysiblement & raisonnablement ne peussent venir à nous, nous accompagner & seruir contre nosdits aduersaires, à garder nostre honneur & icelle maintenir & deffendre avec nosdits subiects. Et pource, nous vous prions & requerons tant & si affectueusement que nous pouons qu'il vous plaise noz bienvueillans & amis quelconques demourans en vostre bailliage & tous autres allans & passans parmy,



laisser franchement venir à nous & à nostre seruice, sans à eux donner ne souffrir estre donné par quelque maniere que ce soit aucun empeschement, en corps n'en biens, & vous pouez tenir seurs & acertenez, que tout ce que nous auons intention & propos de faire, est & sera pour le bien & seureté de monseigneur le Roy, de sa generation & de tout son Royaume, & à la confusion & destruction de ceux qui sont ou ont esté enuers luy faulx mauuais & desloyaulx, trahistres, rebelles & inobediens. Et sil est chose qui vous plaise que puissions, faire signifier le nous, & nous le ferons de tresbon cueur. Treschers & bons amis le saint Esprit vous ayt en sa garde. Escript en nostre ville de Douay le xiiij. iour d'Aoust. Aufquelles lettres Ferry de Hangiers qui lors estoit Baillif d'Amiens & tous autres qui auoient gouuernement de iustice furent trescontens de fauoriser & eux incliner à la requeste du Duc de Bourgongne.

*Comment les Parisiens se meirent en armes contre ceux de la partie d'Orleans. Et se commença à esmouuoir la guerre en plusieurs parties du Royaume.* CHAP. LXXVI.

**E**N ce temps le Roy de France qui auoit esté certaine espace assez sentieux recheut en sa maladie, pour laquelle cause, & pour les affaires & regime, discors & besongnes du Royaume, qu'on traictoit à Melun les bouchiers de Paris qui deuant les autres de quelque estat qu'ils soient sont plus priuilegiez & plus fors, doubtans, que par le grand labeur de la Royne & du Preuost des marchans nommé Charles Cudane les Ducs de Berry & de Bretagne ne fussent mis au gouuernement du Royaume, mais seroit baillé au Duc d'Acquitaine premier fils du Roy, nonobstant son enfance & ieunesse, en grand multitude vindrent deuers iceluy Duc d'Acquitaine auquel ils conseillèrent & enhorterent, que pour le bien du Roy son pere & de tout son Royaume, il print le gouuernement, & en tous ses affaires quelconques luy promirent faire confort & ayde loyaument iusques à la mort, lequel d'Acquitaine s'enclina tantost à leur requeste & leur octroya ce qu'ils voulurent. Et ce fait le Preuost des Marchans dessusdit & les autres de Paris en tresgrand nombre, lesquels ils souspeçonnoient estre fauorables aux Ducs de Berry, de Bourgongne, de Bretagne & autres de ceste ligue feirent sonner au son de la trompette par les carrefourgs de Paris qu'ils se partissent dedans certains iours ensuiuans d'icelle ville & sur peine capitale. Apres lequel cry & publication vuiderent hors de la dessusdicte ville sans les familiers des dessusdits seigneurs iusques au nombre de douze personnes tant hommes comme femmes. Et brief ensuiuant le Duc de Bretagne oyant les commotions dessusdictes print congé à la Royne qui estoit à Melun & s'en retourna en son pays de Bretagne. Et alors lesdits Bouchers, le quartier des Halles la plus grand partie des Parisiens estoient du tout affectez au Duc Iean de Bourgongne & ne desiroient que nul autre eust le gouuernement du Roy ne de son Royaume sinon luy, ou ceux qui se auouoient estre ses amis & fauorables. Et pour vray, ce temps estoit tresperilleux en icelle ville, pour nobles hommes de quelque partie qu'ils fussent: par ce que le peuple & commun dessusdit auoient grand partie du gouuernement de la domination dedans icelle. Et entre-temps le Duc d'Orleans & ses alliez & subiects s'enforçoient chacun iour de assembler le plus



le plus grand nombre de gens d'armes qu'ils pouoient auoir de tous leurs païs & mesmement le Duc de Bourbon, & le Comte d'Allençon vindrent en ces iours, en grand compaignie en la ville de Roye en Vermandois, laquelle ville est au Roy de France, & entrerent dedans à heure de midy plus par fraude & subtilité que par force d'armes, car les habitans d'icelle ne se doubtoient pour lors de nulle guerre. Et quand ils eurent là disné ils manderent les gouuerneurs de la ville, leur ordonnerent bel leur fut ou autrement, à receuoir garnison de gens d'armes de par eux, & puis cheuaucherent oultre & allerent à Nesle en Vermandois appartenant au Comte de Dampmartin où ils meirent pareillement garnison. Et de là enuoyerent messire Clugnet de Brabant qui estoit avec eux, messire Manechier Gueret, & aucuns autres capitaines tresbien accompagnez en la ville de Hem en Vermandois qui estoit au Duc d'Orleans, & depuis retournerent par Channy sur Oyse où ils laisserent aussi garnison, & en plusieurs autres lieux tant de leurs seigneuries comme de ceux tenans party meirent gens de guerre. Et qui plus est, ledit Duc de Bourbon retourné en sa ville de Clermont du voyage dessusdit, garnit sadiète ville de forteresses, & avec ce, toutes ses autres places de sadiète Comté de Clermont. Apres lesquelles garnisons ainsi assises, comme dit est, se commença la guerre tout acoup entre icelles parties: c'est à sçauoir entre le Duc d'Orleans, ses freres, subiects & bien vueillans d'une part & le Duc Iean de Bourgongne d'autre, lequel de Bourgongne attendant du tout la guerre, feit pareillement mettre garnisons en plusieurs de ses villes & forteresses, & de ses amis & alliez pour resister contre ses aduersaires, & de sa personne estoit en son païs de Flandres, où il se prepa-roit à toute puissance pour venir à ost & grand multitude assieger, combattre & rebouter seldits aduersaires. Lesquels tantost coururent en plusieurs & diuers lieux en son païs d'Arthois tant dessus ses subiects comme de ceux tenans son party, & y feirent plusieurs grans dommages, tant de prendre prisonniers avec tous leurs biens comme de ramener grans proyes en leurs garnisons. Et d'autre part les Bourgongnons ne se faignoient pas à faire le pareil sur ceux qu'ils sçauoient estre de leurs aduersaires & couroient tressouuent iusques en la Comté de Clermont & d'autres lieux. Et quand d'adventure ils rencontroient l'un l'autre, les vns crioient Orleans & les autres Bourgongne. Et par ainsi à cause de ceste mauldiète guerre plusieurs & diuers païs estoient pource temps en grans tribulations. Neantmoins le Duc de Bourgongne auoit le Roy de son party, car ceux qui gouernoient le dessusdit Roy qui pour lors se tenoit en ladiète ville de Paris en son hostel de saint Pol, estoient tous & la plus grand partie tenans le party du Duc de Bourgongne comme dit est dessus. Et pource temps, estoit capitaine de ladiète ville de Paris le Comte Valleran de saint Pol, & avec luy Iean de Luxembourg, son nepueu, qui estoit moult ieune, Enguerran de Bournouille & aucuns autres capitaines tresbien accōpaignez de grand nombre de gens d'armes & de chefs, lesquels failloient & resistoient tressouuent cōtre lesdits Orleannois qui aucunesfois venoient courre iusques aupres d'icelle ville de Paris. Et principallemēt y estoient ordonnez pour garder la personne du Roy affin que par aucuns moyens de ceux tenans ladiète partie d'Orleans ne fussent seduits & emmenez hors d'icelle ville de Paris.



*Comment messire Clugnet de Brabant, cuida prendre Rethel, & depuis courut es païs du Duc de Bourgongne, & de plusieurs autres tribulations.*

## CHAP. LXXVII.

**E**N apres messire Clugnet de Brabant soy disant tousiours Admiral de France, Certain iour assembla iusques à deux mille combattâs ou environ. Lesquels il conduisit le plus seurement qu'il peut des garnisons dont dessus est fait mention de cy, ou païs de Rethelois, & auoit plusieurs eschelles & autres habillemens de guerre, à tout lesquels il se tira iusques aupres des fossez de la ville de Rethiers, & environ l'heure de soleil leuer, soudainement assaillit trefroidement ladicte ville, icelle voulant prendre, & piller du tout: mais les habitans aucunement vn petit par auant auoient esté aduertis de la venue d'iceux, & pour eux deffendre festoient preparez le plus diligement qu'ils auoient peu. Neantmoins l'assault dura par tres longue espace, fort dur & merueilleux. Et tant que d'un party & d'autre y eut plusieurs hommes morts & naurez. Entre lesquels le fut ledit messire Clugnet, lequel voyât la deffence d'iceux, & qu'il luy sembloit mal possible d'entrer dedans attendu ladicte deffence, feit sonner la retraicte & se tira avec tous les siens aux champs, en rapportant ou traissant avec eux les morts ou naurez: & là departit de ses gens en deux cōpaignies, dont les vns s'en allerent parmy le païs de Laonnois, à Couchy & Channy, en amenant avec eux tout ce qu'ils pouuoient attaindre tant prisonniers comme autres gens. Et l'autre cōpaignie, s'en retourna par l'empire & par la Comté de Guise en passant parmy Cambresis, en menant deuant eux comme les autres tout ce qu'ils pouuoient trouuer, & par especial, emmenerent tresgrand multitude de bestial, à tout lequel ils retournerēt en la ville de Hem sur Somme & à leurs garnisons. Et apres, quād ils furent retournez & reposez biē huit iours, se meirent sus de rechief bien six mille cōbattans, qui prindrēt leur chemin pour entrer ou païs d'Arthois, & de fait allerēt iusques deuant la ville de Bapāmes appartenāt au Duc de Bourgongne: & de prime venue prindrent les barrieres, & allerent iusques aupres de la porte, où ils leuerent vne trefdure escarmouche, mais le seigneur de Helly, messire Hue de Bussē, le seigneur d'Ancuelles & autres vaillans hommes d'armes qui estoient dedans ladicte ville de par ledit Duc de Bourgongne saillirent à l'encontre d'eux, & les rebouterent hors desdictes barrieres, & y eut là fait grans appertises d'armes, & de morts, & de naurez de chacune partie: mais en la fin fallut que les Bourgongnons entrassent dedans, pource que les Orleannois estoient trop puissans & en tresgrand nombre. Apres laquelle besongne ils se retrahirent, & en accueillant grans proyes sur le païs à tout icelles s'en retournerēt en ladicte ville de Hem: durant lequel temps les ambassadeurs du Roy de France, c'est à sçauoir messire Iaques de Chastillon Admiral en chief, traicterent à Lollinghen ou païs de Boulenois les trefues avec les Legaux du Roy d'Angleterre durant vn an entre les deux Royaumes par mer & par terre. Et entre-temps que ces besongnes se faisoient le Duc de Berry vint vn certain iour de Mellun à Corbueil avec la Roïne de France, duquel lieu de Corbueil il enuoya Loys de Bauiere à Paris deuers le Duc d'Aquitaine, & ceux qui gouernoiet le Roy, & aussi aux bouchiers, eux prier qu'il leur pleut estre contens qu'il peut venir avec la

Roïne



Royne audit lieu de Paris, demourer en son hostel de Neelle empres le Roy son nepueu, attendu qu'il ne se vouloit entremettre de la guerre d'un costé ne d'autre d'entre les Duc d'Orléans ne de Bourgongne. Laquelle requeste ne luy fut pas accordée principalement par les bouchiers de Paris & autres de la communauté qui auoient grand audience, mais tout le contraire : afin qu'il ne pensast pas d'y venir, rompirent tous les huis & fenestres de sondit hostel de Neelle, & y firent plusieurs desfroys, & avec ce enuoyerēt deuers ladicte Royne son frere dessusdit qu'elle veint sans attarger demourer à Paris avec le Roy son seigneur, & qu'elle n'amenast pas avec elle ledit Duc de Berry. Et outre iceux Parisiens afin que le Roy & le Duc d'Acquitaine ne feussent emmenez hors de ladicte ville de Paris, les firent aller hors dudit hostel de saint Pol demourer au Louure, & là auoient continuellement iour & nuict plusieurs guets de doubte q̄ de la partie d'Orléans ne feussent soubstraiçts & emmenez. Et adonc la Royne oyāt par son frere le mādement que luy faisoient les dessusdits doubtant leurs commotions se partit de Corbueil & s'en retourna audit lieu de Mellun ledit Duc de Berry & son frere en sa compaignie. Et briefs iours ensuiuant, lesdits parisiens se meirent en armes à grand puissance, & allerent à Corbueil, & prindrēt la ville & y meirent garnison. Et apres rompirent tous les ponts qui estoient sur Seine depuis Charenton iusques à Mellun, pource que les Orleannois ne passassent la riuere à venir en l'Isle de France. Et lors ladicte Royne & ledit Duc de Berry estans audit lieu de Mellun, & avec eux le Comte Vvaleran de S. Pol qui y auoit enuoyé le Marechal Boucicault, le maistre des Arbalestriers & le grand maistre d'hostel vindrent deuers eux à priuée mesgnie, le Duc de Bourbon & le Comte d'Alençon qui venoient de Vermandois & de Beauuoisis, pour aller avec le Duc d'Orléans qui faisoit son assemblée en Gastinois, lesquels deux Comtes requirēt à ladicte Royne & audit de Berry, ayde contre ledit Duc de Bourgongne, qui adonc ne leur fut pas accordé pource que le Roy auoit de nouuel fait vn Edict à Paris à plain conseil, auquel presidoit le Duc d'Acquitaine avec luy plusieurs autres. C'est à sçauoir fut ordonné à enuoyer par tous les bailliages & seneschaucies du Royaume certains mandemens royaux, par lesquels fut signifié à tous nobles & autres de quelconque estat qu'ils feussent qui auoient accoustumé d'eux armer, qu'ils se meissent sus pour aller seruir le Roy en la compaignie du Duc Iean de Bourgongne, & luy ayder à bouter hors & combattre les ennemis & inobediens du Roy, commandans qu'à luy comme au Roy en tous ses affaires obeissent & aussi que toutes citez, bonnes villes, & passages luy soient ouuers & si facent ayde & confort de viures, d'habillemens & necessitez, pareillement que si le Roy y estoit en propre personne, apres lesquels mandemens publiez & proclamez comme dit est. Tresgrand nombre de gens s'apprestèrent en toute diligence pour aller seruir ledit Duc. Et d'autre partie ledit Duc d'Acquitaine luy escriuit ses lettres signées de sa main, par lesquelles il luy mandoit qu'à tout la plus grand partie de gens d'armes qu'il pourroit finer le venist seruir en propre personne contre son cousin germain le Duc d'Orléans & ses alliez, lesquels comme il luy escriuoit degastoient le Royaume en plusieurs & diuers lieux, & qu'il se tirast le plus brief qu'il pourroit deuers Senlis & en l'Isle de France, &c.



*Comment le Duc Iean de Bourgongne fait grand assemblée de gens d'armes pour mettre le siege deuant la ville de Hem, & y mena les Flamens.*

CHAP. LXXVIII.



Pres que le Duc Iean de Bourgongne fut veritablement acertené comment le Duc d'Orleans & ses alliez se mettoient sus en grand puissance pour luy venir courre sus en ses païs, & desia auoit assis ses garnisons en plusieurs villes & forteresses appartenans à luy & aux siens, & aussi qu'icelles garnisons auoient couru & fait grans dommages en ses païs, & de ceux qui tenoient son party, il ne fut pas de ce bien cōtent. Et pour à ce resister manda à tous ses païs tāt en Bourgongne, Flandres & Arthois comme ailleurs tous les nobles & autres qui auoient accoustumé d'armer à venir deuers luy le plus hastiuement que faire le pourroient, tresbien habillez & bien armez prests pour aller en sa compaignie au mandement du Roy, pour debouter ses ennemis & aduersaires. Et d'autre part fait requeste à ses bōnes villes du païs de Flandres qu'ils voulsissent seruir à puissance en icelle exercite, lesquelles bonnes villes luy accorderent assez bonnement & liberallement. Et se meirent bien sus iusques au nombre de quarante à cinquante mille combattans, tresbien armez & embastonnez selon la coustume & maniere du païs, & si auoient pour porter & mener leurs harnois, viures & habillemens de guerre, enuiron douze mille chars que charrettes & tresgrād nombre de ribaudequins, ausquels failloit pour les mener à chacun vn cheual, & estoiet iceux ribaudequins habillemez qui se portoient sur deux roēz. Et y auoit manteaux d'aissellez, & sur le derriere longues broches de fer pour clorre vne bataille se besoing leur estoit, & à chacū d'iceux estoit assis vn veuglaire ou deux. Et outre ledit Duc de Bourgongne manda à y venir pareillement à toute puissance le Duc Anthoine de Brabant son frere, lequel y vint à tresbelle compaignie, y vint aussi vn vaillant cheualier Anglois nommé messire Guillaume Baldoc Lieutenant de Calais à tout enuiron trois cēs combattans Anglois. Et se feirent toutes icelles assemblées enuiron les villes de Douai & d'Arras. En apres ledit Duc de Bourgongne partant de ladicte ville de Douai avec luy son frere le Duc de Brabant & tresgrand multitude de nobles hommes s'en vint loger en la ville de l'Excluse appartenant au Comte de la Marche, & le lēdemain qui estoit le premier iour de Septembre se deslogea assez matin, & alla loger en vne plaine aux champs empres Marquion, & là fait tendre ses tentes & pauillons, & attendit tout son ost par deux iours. Et par especial les communes de Flandres qui y vindrent en tresgrand appareil, & se logerent par tresbelle ordonnance. Si sembloit à veoir leurs tentes pour le grād nombre qu'il y auoit que ce feussent grandes bonnes villes, & pour vray quand tout fut assemblé en vn seul ost, il y auoit de là soixante mille combattans à compter lesdites communes sans les varlets, & autres bagaiges dont il y auoit sans nombre, & retentissoit tout le païs de bruit qu'ils faisoient. Et quand aux dessusdits Flamens il leur sembloit que nulles bonnes villes ne forteresses ne se tiendroient contre eux, & auoit faillu que ledit Duc de Bourgongne à leur partement leur eut abandonné tout ce qu'ils pourroient conquerre, & quand ils alloient de logis en autre, ils estoient communement tous armez de plains harnois de pied, tous en

ordre



ordre par compaignie selon les bonnes villes & vsages de leurs paÿs de Flandres: & mesmement jaçoit-ce qu'ils allassent de pied, comme dit est, toutesfois il en y auoit grand partie armez de harnois de iambes. Et quand est à leur gouuernement en passant paÿs, tout ce qu'ils pouoient attaindre estoit par eux prins & raiuy & mis sur leur charroy, puis que c'estoient choses portatiues, & avec ce pour la grand multitude de peuple qu'ils estoient, estoient si orgueilleux qu'ils ne faisoient compte de nuls nobles hommes de quelque estat qu'ils feussent. Et quand ce venoit au logier, ou à prendre viures, il aduenoit souuēt qu'ils chassoient hors les autres gens de guerre moult rudement, en especial qui n'estoient pas de leur paÿs. Et avec ce leur tolloient ce qu'ils auoient pourueu de viures & autres besongnes, pourquoy se mouuoit moult souuent de grans hutins, noïses & debats entre eux parties, & par especial contre les Picards, lesquels ne souffroient pas bien patiemment leurs rudesses, & auoit le Duc de Bourgongne & aucuns de ses capitaines assez à besongner pour les tenir paisiblement & patiemmet l'un avec l'autre. En outre quand ledit Duc de Bourgongne eut par aucuns iours attendu ses gens audit lieu de Marquion, comme dit est, & qu'ils feurent tous assemblez, il se partit en sa triomphe & appareil & alla loger sur la riuere de l'Escault apres d'une ville nommée Marquion, & le lendemain partant de là vint loger à Mouchy la Gache auquel lieu y eut vn Flamant pendu & estranglé pource qu'il auoit desrobé vn calice qui estoit dedans vne Eglise avec autres bien & richesses. Et de là se tira vers Hem sur Somme où estoient ses ennemis & aduersaires. Et en approchant la ville d'Achies appartenant au Comte Dammartin qui estoit à luy contraire, & furent ceux de dedans icelle ville si esbahiz & espouentez que tantost à tout les clefs de leur ville vindrent à l'encontre dudit Duc: auquel, eux, leur ville & les clefs luy presenterent, par conuenant qu'il les garderoit de dommage & inconuenient, lequel Duc pource qu'ils s'estoient de leur bõ gré & bonne volenté humiliez & rendu à luy, leur octroya liberallement leur requeste & tout ce qu'ils demandoient, & leur bailla prouision de ses gens pour les garder qu'on ne leur feit aucun dommage ou aucune violence. Si cheuaucha outre à tout son ost iusques assez pres de ladicte ville de Hem: deuant laquelle il enuoya plusieurs coureurs des plus experts de sa compaignie, pour veoir le gouuernemēt d'iceux, à l'encontre desquels faillirent les Orleannois, & y eut tresgrand escarmouche, tant d'un costé comme d'autre: mais en la fin par la grād multitude des Bourgongnons ils furent reboutez dedans, & le lendemain ledit Duc qui cheuauchoit en moult belle ordonnance, ayant auantgarde, bataille & arrieregarde, se logea deuāt ladicte ville. Et feit tendre ses tentes en vne plaine haulte au deuāt de la porte, enuiron au geēt d'un canon pres. Et pareillement se logerent ses Flamens & toutes autres manieres de gens, par où leur estoit ordonné par les Mareschaulx & conducteurs de l'ost, durāt lequel temps feirent ceux de dedans aucunes faillies: mais toutesfois furent reboutez par force, nonobstant qu'ils se maintindrent tresvaillamment, & en y eut de morts & de naurez d'un costé & d'autre. Et en apres le Duc de Bourgongne assiegea icelle ville d'un costé tant seullement, feit asseoir contre la porte & muraille plusieurs engins & habillemēs de guerre, pour icelle demollir & abbatre. Et d'autre partie les Flamens assierent grād partie de leurs ribauldequins, desquels iectoient iour & nuict dedans la



ville, dōt moult trauallerēt leurs aduersaires: & avec ce lesdits engins desrompirent en assez brief iours la porte & muraille contre qui ils iectoient iour & nuict dedans la ville, dont moult trauallerent leurs aduersaires. Mais ceux de dedans en grand diligence les rediffoient de bois, de fiens mieux que faire le pouuoient. Toutesfois vn certain iour les assiegeans en tresgrand nombre s'armerent & allerent assaillir vigoureusement à la porte sur intention d'entrer dedans, & dura le dit assaut bien trois heures tresapre & cruel: mais à verité dire, ceux de dedans se deffendirent trescheualereusement & naurerent plusieurs d'iceux assaillans, & avec ce en tuerent aucuns: pourquoy faillit qu'ils se trahissent arriere & fut par vn ieudy. Et le lendemain qui fut le vendredy le Duc de Bourgongne ne sçay à quelle cause il feit crier que nul de quelque estat qu'il fut n'assaillit ceux de dedās: mais feit labourer à faire pons & passaiges par sus la riuere de Somme, affin de passer outre pour atourner & assieger ladicte ville, & aussi pour les assieger de tous costez, mais il en aduint autrement & au plus loing de sa pensée. Car quand ce vint le lendemain au matin, qu'il auoit ordonné à liurer le dit assaut ainsi qu'à huiet heures au matin, fut sceu que ceux de la garnison, & la plus grād partie des notables bourgeois s'en estoient fuis & auoient emporté grand partie de leurs biens, & n'estoit demouré dedans icelle, sinon de pauures gens de commun & de village qui festoient là retraits, lesquels comme demy vaincus quand ils veirent partir ladicte garnison n'eurent point grād puissance ne volenté d'eux deffendre, & par ainsi sans grand peril entrerent dedans les gens du Duc de Bourgongne, & premier les Picards. Et adonc lesdits Flamens voyās la besongne desusdicte, y allerent à si grand nombre & puissance pour y entrer que les aucuns pour la grand presse furent morts & estaints. Et quand ils furent dedans commencerent à tout piller & rober tout ce qu'ils trouuerent en vsant du droit que leur auoit donné leur seigneur le Duc: car il auoit faillu à leur partement, comme dit est dessus, qu'il leur eut abandonné tout ce qu'ils pourroient conquerre sur leurs ennemis, & y eut vne partie qui se meirent à vn lez & à l'autre de la rue vers la porte par où les Picards deuoient retourner à leur ost. Lesquels Picards & tous ceux qui n'estoient pas de leur langue ils destrouffoient de tout ce qu'ils auoient gagné quand il les pouoient attaindre. Et n'espargnoient homme de quelque estat qu'il fut nobles, ne autres & en ceste tribulation en y eut plusieurs morts & naurez. Apres entrerent dedans l'Abbaye qui estoit dedans la ville, si prindrent & rauirent tout ce qu'ils y trouuerent. Et apres emmenerent plusieurs hommes & femmes & petits enfans, & les meirent en leurs tentes, & au derrain quand ils eurent osté & vuidé tout ce qu'ils pouoient porter ils bouterent les feux en plusieurs & diuers lieux dedans icelle ville, & finablement & pour briefue conclusion, toutes les eglises & edifices d'icelle furent consummées & arses à grand destruction, & mesmemēt plusieurs hommes & femmes petits enfans, avec foison bestial qu'on auoit retraict és boves & és celiers furent perils piteusement. Mais nonobstant les cruantez dessusdictes en eschapperent à l'ayde de d'aucuns nobles hommes six ou sept des religieux de ladicte abbaye, desquels l'vn, c'est à sçauoir le Prieur tenoit en ses mains moult reueramment vne croix, & furent cōduits iusques à la tente du Duc de Bourgongne, où ils furent là à sauueté. Si fut le cōmencement desdits Flamens, tel que vous oyez, & pource qu'en  
plusieurs



plusieurs villes outre la riuere de Somme appartenant au Duc d'Orleans & à ses allies, ouyrent nouuelles de ce qu'ils auoient fait en ladicte ville de Hem, ne faut point doubter qu'ils furent merueilleusement cremeuz, & estoit peu de gens qui voulsissent conclurre à les attendre de paour d'estre assiegez en quelque bonne ville ou forteresse que ce fut. Car desia messire Clugnet de Brabant, & messire Manessier Queret auoient abandonné, cōme dit est dessus, ladicte ville de Hem, qui estoit assez forte & biē garnie de plusieurs viures, & s'estoiēt retraits à Channy & à Couchy, & adonc ceux de la ville de Neelle qui est au Comte de Dammartin, quand ils veirent la fumée & le feu d'icelle ville de Hem furent en grand doute: car leur garnison se partit incontinent. Et pource les bonnes gens de la ville à l'exemple de ceux d'Athies vindrent deuers le Duc de Bourgongne, & tout en plorant luy presenterent les clefs de leur ville, en eux offrāt du tout à eux mettre en sa subiection & mercy. Lequel Duc les receut en grand reuerence ou nom du Roy & de luy, par tel conuenant qu'ils n'auoiēt plus de garnison, & iureroient que dorefnauāt ils seroient vrayz subiects & obeissans au Roy leur souuerain seigneur, lequel serment ils feirent tres volentiers. Et apres qu'ils eurent regracié & remercié ledit Duc ils s'en retournerent en leur ville, & par son ordonnance abbatirent & demolirent en plusieurs lieux leurs portes & murailles. Et de rechief feirent iurer tous les bourgeois & autres qui auoient gouuernement en icelle ville d'entretenir & maintenir ce qu'ils auoient traicté, & par ainsi demourerent paisibles pour ceste fois. Et pareillement ceux de la ville de Roye qui estoient nuement subiects au Roy, enuoyerent deuers ledit Duc à son logis deuant Hem, luy remonstrerent comment les Orleannois frauduleusement estoient entrez dedās leur ville, & leur auoient fait plusieurs violences, & depuis s'estoiēt partis quand ils auoient sceu sa venue, en luy requerant qu'il fut content d'eux & ils estoient prests de le receuoir & faire son plaisir. Ausquels ledit Duc fait responce que d'eux estoit assez content, moyennāt qu'ils promettroient & feroient serment sollennel de ne plus receuoir son aduerse partie, c'est à sçauoir les gens du Duc d'Orleans ne ses allies. Apres laquelle responce, remonstrance & requeste & que ledit Duc fut content d'eux, ils se departirent tresioyeux de sa responce & retournerent en leur ville. Et ce fait, ledit Duc de Bourgongne fait passer son ost par la riuere de Somme, tant par Hem comme par autres lieux, laquelle ville de Hem il laissa toute desolée, print son chemin pour aller à Channy sur Oyze appartenant au Duc d'Orleans. Mais ceux de la garnison saichans les nouuelles se departirent hastiuemēt. Et pource, les Bourgongnons attains de paour enuoyerent sans delay deuers le dessusdit Duc de Bourgongne luy presenter les clefs de la ville en luy humblement suppliant en larmes & en pleurs qu'il eut pitié d'eux, disant commēt les gens d'armes de leur seigneur s'en estoient fuiz de paour qu'ils auoient eu de luy & de sa venue. Lequel Duc, les receut à mercy & print leur serment, par ce qu'ils obeyroient du tout au Roy leur souuerain seigneur, & à luy, & receuroient garnison de ses gens pour garder eux & leur ville. Apres lequel traicté ainsi fait, ledit Duc print son chemin à Roye en Vermandois, & se logea dedans la ville & tout son ost au pays à l'enuiron: duquel lieu de Roye il enuoya messire Pierre des Essars cheualier son conseilier, nagueres Preuost de Paris deuers le Roy & le Duc d'Acquitaine son gēdre, & aussi les bourgeois & habitans



d'icelle ville de Paris . Et portoit la puissance & armée qu'auoit le Duc de Bourgogne. Lequel des Essars, venu audit lieu de Paris, fut dudit d'Acquaine & des Parisiens receu treshonorablement . Et en faueur dudit Duc de Bourgogne fut presentement restably & remis en l'office de ladicte Preuosté au lieu de messire Brunelet de saint Cler. Lequel messire Brunelet fut cōmis par l'auctorité royale Baillif de Senlis, en deboutant messire Gastelius du Bost dudit Bailliage, pour ce qu'il estoit mescreu de tenir la partie d'Orleāns, & apres qu'iceluy messire Pierre des Essars eut besongné à Paris ce pourquoy il auoit esté enuoyé, s'en partit incontīnēt se tira vers Rethiers pour nōcer & dire au Comte de Neuers qui desja auoit assemblé grand nombre de gens d'armes qu'il se tirast deuers son frere le Duc de Bourgogne vers la ville de Mondidier, & que là il orroit certaines nouuelles de luy, Lequel Comte de Neuers sachant les nouuelles de sondit frere le Duc, fait de rechief grand diligence d'assembler gens d'armes & se meit à chemin pour venir deuers sondit frere. Et entre-tēps le Duc d'Orleans, le Comte d'Armignac, le Connestable de France, & le maistre des Arbalestriers, avecques eux grand compaignie de gens d'armes & de combattās, vindrent en la ville de Melun où estoit la Royne de France & le Duc de Berry: avecques lesquels ils eurent aucun parlement, & de là allerent à la Ferté sur Oyze qui estoit à messire Robert de Bar à cause de sa femme Vicomtesse de Meaux, & passerent la riuere de Marne & vindrent à Arsy, en Mussyen, en la Comté de Vallois appartenans au Duc d'Orleans, & là vint deuers luy son frere le Comte de Vertus, Lequel auoit en sa compaignie grand quātité de combattans, c'est à sçauoir le Duc de Bourbō, Jean fils au Duc de Bar, messire Guillaume de Couchy, Amé de Sallebruse, messire Hue de Hufalize, & aucuns Ardannois Lorrains & Allemans, lesquels tous ensemble & mis en seul ost estoient six mille cheualiers, & escuyers sans les varlets armez & gens de traicts, & de ce iour en auant furent appelez par les populaires & ceux de Paris en commun langaige Arminacgs, comme dit est dessus . Lesquels tous & chacun d'eux portoient sur leur harnois & vestemens pour enseigner bendes comme autresfois auoient fait deuant Paris . Si se partit ledit Duc d'Orleans avecques tout son exercite de son païs de Vallois & s'en allerent passer par deuant Senlis, & puis print son chemin à Beaumont sa Comté . Mais enguerant de Bournouille qui estoit venu audit lieu de Senlis à tout foison de gens de guerre pour icelle garder ferit en ceux de derriere & en print & destroussa plusieurs avecques vn charriot chargé de bonnes bagues : mais en ce faisant il y perdit aucuns de ses gens qui y furent morts & prins, si s'en retourna audit lieu de Senlis, & ledit Duc d'Orleans se logea en son chastel de Beaumont, & ses gens avecques les autres Princes, tous assez pres de luy au païs à l'environ. Et entre-temps que ces besongnes se faisoient le Comte de Neuers dessusdit qui cuidoit venir deuers ses freres le Duc de Bourgogne fut en partie contraint par lesdits Orleannois qui estoient plus forts & plus puissans que luy, d'aller à Paris avecques toutes sa compaignie . Lequel Duc de Bourgogne estoit ja venu à tout son ost & mettre en ordonnance toutes manieres de gens affin de les recevoir & combattre ou cas qu'ils viendroient pour luy courre sus ou aussi pour aller enuahir le lieu où ils estoient, si bon luy sembloit : mais entretemps, ses communes de Flandres qui desia desiroiēt moult fort de retourner en leurs païs luy



luy demanderent congé d'eux en r'aller, disant qu'ils auoient seruy le terme & espace qu'il les auoit requis à leur parlement du paÿs de Flandres. De laquelle requeste ledit Duc fut fort esmerueillé & desplaisant, & ne leur voulut pas accorder ledit congé : mais leur requist bien instamment qu'ils le voulsissent seruir encores huiët iours tant seullement, disant à eux qu'il auoit ouÿ certaines nouuelles que ses ennemis estoient ensemble à grand puissance assez pres de luy, prests de le venir combattre, & que iamais à plus grand besoing ne le pouoient seruir. Et estoient à ceste heure venuz deuers luy là plus grand partie des capitaines & gouuerneurs d'icelles communes pour prendre congé, comme dit est. Lesquels quand ils ouÿrent la requeste que leur faisoit si doucement ledit Duc leur seigneur, & pour si peu d'espace furent contens de retourner deuers leurs gens, & promeirent de faire leur deuoir deuers eux & les instruire, affin qu'ils voulsissent accorder la requeste dessusdicte. Et quand ils furent retournez en la tente de Gand, où se tenoient leurs conseils feirent assembler tresgrand nombre de Conestables & dizeniers d'icelle commune, ausquels quand ils furent ensemble dirent la responce, & aussi remōstrerent la requeste que faisoit leur dessusdit Duc, c'est à sçauoir qu'ils voulsissent demourer huiët iours, comme dit est, pour estre avec luy & l'accompagner à combattre ses aduersaires qu'il sçauoit estre assez pres de luy en grand nombre prests pour ce faire. Et adonc quand ils eurent ouÿ ladicte requeste, furent par iceux mises auant plusieurs & diuerses opinions, & vouloient les vns demourer, & les autres n'en estoient pas contens, & disoient qu'ils auoient seruy le temps & espace que leur seigneur leur auoit fort requis, & avec ce, que le temps d'hyuer approchoit fort, pourquoy bonnement ne leur estoit pas possible de tenir les champs en si grand nombre qu'ils estoient que ce ne fut à grand dangier. Et pource qu'ils furent, comme dit est, de diuerses opinions, & vouloient les vns demourer & les autres non, ne se peurent accorder ne prendre conclusion, surquoy les chiefs & capitaines peussent rendre responce audit Duc de Bourgongne. Et fut iceluy conseil tenu le vingtiesme iour de Septembre apres disner, & quand ce vint apres iour failly, ils feirent en plusieurs & diuers lieux tresgrans feux par leurs logis, du bois des maisons des faulxbourgs de Mondidier qu'ils auoient deschiré & abbatu. Et commencerent à charger toutes leurs bagues sur leur charroy, & avecques ce s'armerent communement, & quand vint droit à minuit tous ensemble par leurs logis commencerent à crier à haute voix, vax, vax. Qui est à dire en François à l'arme, dont & pour lequel cry l'ost fut fort esmeu, & par especial le Duc de Bourgongne eut grans merueilles quelle chose ils vouloient faire, & enuoya aucuns seigneurs de leur langue deuers eux pour sçauoir aucune chose de leur intention : mais à tous ceux qui y alloient n'en vouloient riens descouurir, & leur respondoient tout au contraire de leur demande, & entre-temps la nuit se passa, & au plus tost qu'ils peurent apperceuoir le iour feirent atheler leur charroy & bouterēt le feu par tous leurs logis. Et en criant de rechief tous ensemble gau, gau, se departirent & prindrent leur chemin vers leurs paÿs. Lequel cry & clameur ouÿ par les gens du Duc de Bourgongne qui estoit en ses tentes luy allerent tantost noncer. Et adonc tout esmerueillé monta à cheual le Duc de Brabant son frere en sa compagnie & alla deuers eux. Et là le chapperon osté hors de la teste deuant eux, leur



pria à mains ioinctes treshumblement qu'ils voulsissent demourer avecques luy iusques à quatre iours, en eux disant & appellant freres compains & amis les feables qu'il eut au monde & en eux promettant grans droits, & par especial d'eux donner & quitter perpetuellement tout le colletaige de la Comté de Flandres fils luy vouloient accorder sa requeste. Ausquels aussi le Duc de Brabant pria moult humblement que pour leur seigneur qui les prioit si acertes pour si peu de chose ils y voulsissent entendre: mais ce riens ny valut, car tous ensemble faisant la sourde oreille passerent outre, & n'en voulurent riens faire, ainçois qui plus est les lettres & conuenances que ledit Duc leur auoit octroyées, lesquelles ils auoient apportées deuers eux, en les luy remonstrant luy dirent que le contenu en icelles qui estoient scellées de son scel il accomplist, & qu'il les conduit ou fait conduire outre la riuere de Somme & iusques en lieu seur: ou se ce non, son seul fils Comte de Charrolois, lequel auoient à Gand, ils luy rendroient taillé en pieces, & lors ledit Duc de Bourgogne voyant leur sotte & rude maniere, & que ce qu'il disoit riens ne luy prouffitoit par belles & doulces parolles les commença à rappaiser, & avec eux en faisant sonner les trompettes, commanda à desloger: mais ce ne fut pas sans ce qu'il y eut grand perte: car ledit Duc tendant à rōpre la volenté desdits Flamens n'auoit pas fait d'estandre ses tentes ne charger ses charrois. Pourquoy grand partie desdictes tentes furent arses avec d'autres bagues par les dessusdits feux qu'ils auoient bouté en leurs logis: lequel de logis en autre faillit iusques au propre lieu où ledit Duc estoit logé, lequel Duc estoit tant troublé triste & ennuyé en l'cueur que plus ne pouoit: car comme dit est, il scauoit ses ennemis en grand triomphe à vne iournée pres de luy & auoit grand desir de les aller combattre, si veoit que par le moyen du deslogis dessusdit, il ne pouoit venir à son intention. Et qui pis estoit, scauoit veritablement, que tantost ils en feroient aduertis, & diroient qu'ils s'en feroient refuis sans les oser attendre. Neantmoins il luy conuint souffrir & prendre en patience ou autrement les choses dessusdictes, par ce qu'il ne les pouoit auoir autre. Car quād maistre Flamens furent mis en voye, & qu'ils eurent retourné leur visage vers leurs païs il s'en alloient autant en vn iour qu'ils estoient venus en trois, & tout ce qu'ils pouoient prendre n'attaindre estoit par eux raui & mis sur leur charroy comme dit est dessus, & avec ce, eurent durant ce voyage plusieurs rigueurs & debats cōtre les Picards & Anglois, & aduenoit souuēt quād ils estoient trouuez à l'esquart qu'il en y auoit de morts & naurez. Et pareillement quand ils estoient les plus forts, ne faignoiēt pas de faire le pareil. Et n'est pas à oublier que ce voyage se fait ou mois de Septembre que les vendenges sont en point. Et se bautoient assez asprement parmy les vignes & prenoient tant dedans leur ventre, que plusieurs en furent trouuez morts & creuez dedans lesdictes vignes. Et d'autre part pour trop outrageusement donner des biens qu'ils trouuoient tres abondamment sur le païs, aux cheuaux & iumens qu'ils auoient amené, en mourut chacun iour grand planté. En outre quand ledit Duc de Bourgogne & ses gens d'armes furent retournez iusques à Peronne que lesdits Flamens estoient logez assez pres sur la riuere luy mesmes en personne alla deuers eulx, & remercia treshumblement de leur seruice, & puis par son frere le Duc de Brabant les fait conduire iusques en Flandres, & de là ils s'en retournerent chacun d'eux en leurs propres



propres lieux. Mais les gouuerneurs des bonnes villes dudit paÿs de Flandres, quand ils sceurent la maniere de leur retour n'en furent pas bien contens, jaçoit ce qu'ils n'en feissent à present pas grand semblant, pource qu'ils estoient en trop grand nombre en armes. Ainsi, & par ceste maniere se departirent lesdits Flamens outre la voulenté dudit Duc de Bourgongne de deuant Mondidier où il les auoit assemblez. Et le propre iour d'iceluy dellogis enuiron quatre heures apres, vint vn cheualier nommé messire Pierre de Quesnes seigneur de Gauues tenant le party du Duc d'Orleans à tout deux cens combattans frapper dedans ledit logis. Auquel il trouua encores grand nombre de gens, & par especial marchans & autres gens du paÿs desquels il print & tua grand nombre, & y gaigna luy & ses gens grand butin. Et puis s'en retourna deuers Cleremont en Beauuoisis où estoient assemblez alors les Orleannois qui estoient venus tous ensemble de poursuiuir le Comte de Neuers, comme dit est ailleurs. Et quand ils sceurent le second partement dudit Duc de Bourgongne, & des Flamens, furent au conseil pour scauoir s'il les poursuiuroient en son paÿs. Mais en fin fut conclud par l'opinion de plusieurs saiges qu'ils s'en retourneroient vers Paris à intention d'entrer dedans par certains moyens qu'ils entendoient d'y auoir, & affin principalement qu'ils peussent auoir le Roy de leur partie: car c'estoit tout leur desir. Si se meirent à chemin & allerent passer par vn pont neuf qu'ils feirent faire aupres de Verberies, & de là se tirerent vers Paris: mais ceux qui auoient le Roy en gouuernement, & les Parisiens ne furent pas contens de leur venue: ainçois leur feirent resïstence, par toutes les manieres que faire le peurent, en eux faisant guerre ouuerte tres cruelle, & pource iceux voyant que pour lors leur estoit impossible d'entrer en ladicte ville de Paris, feirent tant que par leur subtil engin que ceux de saint Denys furent cõtens de les receuoir. Et se logerent les Princes dedans icelle ville, & leurs gens és villages à l'enuiron. Et dès lors commencerent à faire forte guerre tant à la ville de Paris comme à tous autres tenans la partie du Roy & du Duc de Bourgongne. Et courroient continuellement chacun iour par plusieurs & diuers lieux iusques aupres des portes de Paris. A l'encontre desquels failloient tres souuent ceux de dedans: & par especial Enguerran de Bournouille, qui estoit vn des chiefs de la garnison soubz le Comte de Vvaleran de S. Pol, qui adonc estoit gouuerneur & capitaine de Paris. Et y auoit souuent de tres dures escarmouches & de tresgrans appertises d'armes faïctes tant d'un costé comme d'autre.

*Comment le Duc de Bourgongne r'assembla grād compaignie pour aller à Paris: & des besongnes qui aduindrent durant le temps dessusdit.* CHAP. LXXIX.



Q R conuient retourner au gouuernement du Duc de Bourgongne: lequel (comme dit est dessus) quand il eut congié ses Flamens & iceux fait reconduire par son frere le Duc de Brabant, s'en alla de Peronne à Arras: & là trouua le Côte de Pennebourg, le Côte d'Arondel & messire Guillaume Baldo, qui au voyage dessusdit auoit esté avec luy: ausquels Côtes qui nouuellemēt estoient venus, feit tresgrand receptiō pour l'honneur du Roy d'Angleterre, qui les y auoit enuoyez: & pouuoient auoir en leur cōpaignie bien xij. cēs cōbattans tāt de cheual cōme de pied, tous gens de bōne estoſſe. Si estoiet



à lors grans parolles entre le Roy d'Angleterre d'une part & ledit Duc de Bourgogne d'autre part, pour l'alliance de Henry premier fils d'iceluy Roy à l'une des filles dudit Duc. Et apres qu'il eust grandement festoyé lesdits capitaines Anglois en sa ville d'Arras, & donné à iceux plusieurs dons, leur ordonna tirer vers Peronne: & puis hastivement remada de tous costez ses gens d'armes à venir deuers luy, & en sa personne alla audit lieu de Peronne, & là feit tresgrand assemblée de nobles de tous ses païs. Toutesfois le Duc de Brabant ne retourna pas avec luy pour certains affaires, que adonc il auoit en sa Duché de Luxembourg à cause de sa femme. Et apres, ledit Duc de Bourgogne partant de Peronne, à tout six mille combattans s'en alla à Roie, & de là par Bretueil, à Beauuais, & dudit lieu de Beauuais par Gisors s'en alla à Ponthoïse: auquel lieu il seiourna grand espace de temps iusques au terme de trois semaines ou enuiron. Durant lequel temps vindrent à luy de plusieurs païs tresgrand nombre de gens pour le seruir. Et entre-temps que ces besongnes se faisoient, fut ordonné par le conseil royal, où estoit present le Duc d'Acquitaine, le Comte de Mortaigne, messire Gilles de Bretagne, Vvaleran Comte de saint Pol capitaine de Paris, le Chancelier de France, messire Charles Sauois & plusieurs grans seigneurs, qu'on enuoyroit par tous les bailliages & seneschauces dudit Royaume certains mandemens contenant: comment à l'occasion des congregations, & assemblées de gens d'armes que auoient fait de long temps, & faisoient chacun iour contre les ordonnances & deffences du Roy, le Duc d'Orléans & ses freres, le Duc de Bourbon, les Comtes d'Alençon & d'Armignac, & autres de leur partie à la tresgrand charge & desolation dudit Royaume, & aussi à la desplaisance du Roy & de sa seigneurie, n'auoient voulu ne vouloient cesser de faire icelles assemblées: ainçois s'estoient enforchez & s'enforçoient chacun iour de perseuerer en leur mauuais propos. Et pource contenoit ledit mandement, que nul de quelque estat qu'il fut, ne fut si hardy de seruir n'estre en la compagnie dudit Duc d'Orléans, ses freres & ses allies, sur peine d'estre tenus & reputez rebelles, & aduersaires du Roy, & de son Royaume: & que ceux qui estoient allies s'en departissent sans delay, & retournassent en leurs païs sans plus tenir les champs, ne viure sur le peuple. Et ceux qui ainsi le feroient, le Roy, & son conseil les tiendroient pour excusés. Et ne souffriroient pas, que pource, leur fut donné aucun empeschement: mais ceux qui perseuereroient, & feroient le contraire, on perseuereroit contre eux à rigueur, par toutes les manieres que faire se pourroit, sans à eux faire, ne donner de ce iour en auant, aucune grace ou remission. Lesquels mandemens publicz és lieux accoustumez, furent aucuns, qui se departirent secrettement de la compagnie des dessusdits seigneurs, non pas en grand nombre, & allerent deuers le Roy. Les autres qui de ce faire estoient desobeissans, quand ils estoient prins des officiers royaux, estoient en grand danger. Et y en eut ces iours aucuns executez: entre lesquels le fut en la ville de Paris vn cheualier nommé messire Binet d'Espineuse, qui estoit au Duc de Bourbon natif de sa Comté de Clermont. Et fut la cause de sa mort, pource qu'il auoit prins de force aucuns des cheuaux au Duc d'Acquitaine, que luy faisoit venir de son païs de Flandres le Duc de Bourgogne. Et apres qu'il fut decapité és halles de Paris, le corps fut pendu par les aisselles au gibet de Môt-faulcon. Et feit faire ceste execution messire Pierre des Essars qui nouuellement

(comme



(comme dit est) auoit esté remis en l'office de la Preuosté de Paris ou lieu de mesire Bonnet de saint Cler. Pour la mort duquel cheualier, & aussi de la publication des mandemens royaux dessusdits, le Duc d'Orleans & ses freres & avec tous les autres seigneurs, le prindrent mal en gré. Et par especial despleut moult au Duc de Bourbon pour la honteuse mort de son cheualier. Et par ainsi se continuerent les besongnes entre icelles parties de mal en pis: & se logea vn certain iour le Duc d'Orleans à l'hostel de saint Ouain qui est maison royale, à tresgrand puissance. Et couroient chacun iour, de ce party iusques à la porte de Paris. Et tellement se conduisoient, que les Parisiens furent en ces iours en tresgrand necessité de viures: car ils n'estoient pas encores accoustumez de guerre, ne pourueuz ainsi que besoing leur estoit: & si n'auoient pas dedans icelle puissance, en quoy si osassent fier pour issir aux chāps, & combattre leurs aduersaires. Et estoit avec la partie d'Orleans l'Archeuesque de Sens frere de feu Montagu, non pas en estat Pontifical, car en lieu de mettre il portoit vn bacinet: pour dalmatique portoit vn haulbergeon: pour chasuble, la piece d'acier: & en lieu de crosse, portoit vne hache. Et en ces mesmes iours, le Duc d'Orleans enuoya ses heraulx à tout certaines lettres deuers le Roy & le Duc d'Aquitaine, contenant comment ledit Duc de Bourgogne s'en estoit fuy avecques les Flamens de deuant Mondidier, & ne l'auoit osé attendre. Et pareillement rescriuit à aucuns de Paris, qu'il tenoit ses amis sur la fiance qu'il peust trouuer aucun moyen d'entrer dedans: mais finalement il perdit son tēps. Car ceux qui gouernoient de par ledit Duc de Bourgogne, estoient assez songneux pour l'entretienement de leur partie. Durant lequel temps, par certains moyens qui se feirēt entre les gens dudit Duc d'Orleans & vn nommé Collinet du Puisier qui estoit capitaine de par le Roy de la tour S. Clou, fut icelle liurée & mise és mains dudit Duc d'Orleans: lequel y mist tantost garnison de ses gens, dont ceux de Paris furent fort troublez, pource que lesdits Orleannois par le pont dudit saint Clou passoient souuent la riuierē à tout grand nombre, & couroient de l'autre costé de leur ville. Et par ainsi, estoient lors lesdits Parisiens fort oppressez desdits Orleannois de tous costez. Pourquoi, à la cause dessusdicte par le conseil royal fut encores ordonné, à enuoyer par tout son royaume és lieux accoustumez, publier autres mandemens de par le Roy, contenant les oppressions, cruaultez & dommages que faisoient chacun iour les deuantdits seigneurs, & leurs alliez en plusieurs parties de son royaume & à ses subiects: nonobstant que parauant leur eust de par le Roy plusieurs fois esté deffendu, à quoy n'auoient voulu obeir: mais qui plus est, auoient continué & continuoient à faire de iour en iour en plusieurs lieux du royaume grand assemblée de gens d'armes, & de tant de diuerses nations & païs, tant de ses subiects comme d'autres estrangers qui auoient desrobé & degasté, prenoient & roboient les bons & l'oyaulx subiects, prenoient leurs villes, chasteaux & forteresses & s'enforçoient de iour en iour de tuer gens, les mettoient à rançon, boutoient feux, violioient filles à marier, enforçoient femmes & desroboient Eglises & monastères, & faisoient toutes les inhumanitez que ennemis pouoient faire à luy & à son Royaume, & encores s'enforçoient de faire: dont grans clameurs & complaintes & moult de douleurs luy estoient souuent venus, & de iour en iour venoient incessamment, & encores pourroient plus faire se sur ce n'estoit pourueu de bon



& brief conuenable remede. Pourquoy faisoit ſçauoir à tous qu'il vouloit, & de tout ſon cueur deſiroit en toutes ces choſes ſon honneur & ſeigneurie & de tous ſes ſubieſts garder, & preſeruer de cy en auant de grans oppreſſions & dommages, & eux en paix & tranquillité garder & maintenir de tout ſon pouoir : & leſdits rebelles & inobediens chaſſer & deſtruire, attendu qu'autreſfois les auoit abandonnez. Et nonobſtant ce, ils n'auoient pas laiſſé à proceder en leur mauuaife volonté: mais ont perſeueré de tout leur pouoir & continué de mal en pis & encores font: & les autres cauſes & conſiderations luy mouuans à ce, eut ſur icelle beſongne grand & meure deliberation de conſeil avecques pluſieurs de ſon ſang & aucuns autres en grand nombre, a declairé & declaire par ſes lettres de ſa plaine uiſſance les deſſusdits Orleannois, & tous leurs alliez & complices, pour rebelles ennemis, & inobediens à luy & à la couronne de France, à ſeſdictes ordonnances, commandemens & deffences, & auoir forfait corps & biens. Et afin que de ce iour en auant nul n'aille avec eux ne ne leur tiène compagnie, le Roy à plainement abandonné & abandonne par ſes lettres deuâtdictes, leurs corps & leurs biens, & de tous les gens d'armes deſſusdits, qui ſe ſont renduz & demonſtrez de leur partie, & qui ont delinqué & delinquent, par la forme & maniere que dit eſt. En oultre a le Roy par ſa plaine uiſſance & par ſeſdictes lettres octroyé, & donné auctorité & uiſſance à tous ſes bons, & vrays ſubieſts, & vaſſaulx iuſticiers & officiers, & à chacun d'eux d'enuahir les deuantdits, & tous les autres de leur partie. Et par toutes les voyes & manieres qu'ils pourront eux prendre & dechaſſer de ſon Royaume : & auſſi de les emprisonner, & tous leurs biens prendre & apprehender, où qu'ils ſoient: ſans ce que pour les choſes deuantdictes ſeſdits ſubieſts ou aucuns d'eux ſoient enuers luy ne ſa iuſtice aucunement empeschez ne moleſtez. Donné à Paris le troiſieſme iour d'Octobre l'an mille quatre cens & xj. & de noſtre regne le xxij. Signées par le Roy à la relation de ſon grand conſeil tenu pour ceſte cauſe en l'hoſtel de ſainct Pol, où eſtoit preſent le Duc d'Acquitaine, le Comte de Mortaigne, le Comte de la Marche, Loÿs de Bauiere, meſſire Gille de Bretagne, le Comte de ſainct Pol, le Chancelier de France & tresgrand nombre d'autres nobles gens. A l'occaſion deſquels mandemens quand ils furēt publiez (comme dit eſt) y eut pluſieurs & autres nobles gens de guerre, qui ſe refroiderent & attargerent d'aller au ſeruice du Duc d'Orleans & des ſeigneurs qui eſtoient avec luy: & pour le contraire, redoubtant qu'ils n'eſcheuſſent en l'indignation du Roy, ſe trahirent deuers luy ou deuers ceux qui tenoient ſon party, & trouuerent leurs moyens d'eux excuſer au mieulx qu'ils peurent. Et entre-temps que ces beſongnes ſe faiſoient, le Duc de Bourgongne eſtant à Ponthoiſe (comme dit eſt) où il fut enuiron quinze iours, venoient à luy en tresgrand nombre de gens de diuerſes nations tant des paÿs du Roy comme de ſes vaſſaulx & ſubieſts. Auquel lieu de Ponthoiſe, vn certain iour vint deuers ledit Duc vn homme aſſez uiſſant de perſonage : lequel entra dedans ſa chambre ſur intention de meürdrir ledit Duc, & auoit en ſa manche vn couteau, dont il auoit en volonté d'accomplir ſon maleſice. Et de fait ſ'aduança pour parler à luy: mais le deſſusdit Duc non ayant cognoiſſance d'iceluy, & auſſi touſiours doubtant tels beſongnes, miſt vn banc entre luy & le deſſusdit. Et tantost aucuns de ſes priuez qui là eſtoient aperceurent la mauuaistié d'iceluy, pourquoy ſans delay fut prins : & apres qu'il eut



eut cogneu son fait, fut decapité en ladicte ville de Ponthoïse. Et de rechef pour plus vituperer & abaisser les entreprinſes du Duc d'Orleāns & de ſes alliez, le Roy par deliberation de conſeil, enuoya encores en pluſieurs parties de ſon royaume autres mandemens royaulx:leſquels furent publiez à la grand charge & deſhonneur d'iceux: deſquels mandemens, la teneur de celuy qui fut enuoyé à Amiens ſ'enſuit.

CHARLES par la grace de Dieu Roy de France, au Baillif d'Amiens ou à ſon lieutenant, ſalut. Pource qu'il eſt venu à noſtre cognoiſſance & dont nous ſommes deuïement informez & ſouffiſamment, tant par certaines lettres nague-res & en noz mains & és mains de noſtre conſeil offertes, & baillées. Leſquelles par nous veües, & bien regardé le fait & l'œuure, jaçoit ce que long temps à, que ſur ce euſt eſté grand ſuſpection, & que la choſe ayt eſté par long temps palliée, tapie & diſſimulée, que Iean noſtre oncle de Berry, Charles noſtre nepueu Duc d'Orleans & ſes freres Iean de Bourbon, Iean d'Alençon, Charles d'Albreth, noſtre couſin Bernard d'Armignac & leurs aydans, adherans & confortans alliez & complices, meuz & induicts de mauuais, iniques, peruers & damnables propos, ont voulu & ſe ſont enforcez & enforcent de nous depoſer, & deſtituer de noſtre eſtat & auctorité royal: & de tout leur pouoir nous & noſtre lignée deſtruire du tout(que Dieu ne vueille) & faire en France nouuel Roy, qui eſt choſe abhominable à ouyr, dire & reciter à tous cueurs de noz bons & loyaux vaſſaux & ſubiects. Nous, eüe ſur ce grande & meure deliberation de conſeil, avecques pluſieurs de noſtre ſang & lignée, & autres ſaiges preud'hommes de noſtre royaume, de noz officiers & autres, auions deliberé & ordonné: & par la teneur de ces preſentes deliberons, & ordonnons à faire publier par tout noſtre royaume, & notoirement & ſolemnellement diuulguer, tant en auditoires quarrefourgs, & autres lieux deuantdits leurdits treſperuers & damnable propos:& demander euocquer & faire venir deuers nous le plus que nous pourrons, tous hommes & vaſſaulx de nous tenans, tant en fiefs comme arriere fiefs: & auſſi des gens des bonnes villes de noſtre royaume, qui ont accouſtumé d'vſer d'armes, par forme & maniere d'arriere-ban pour nous ſeruir, ayder & conforter à maintenir, garder & deffendre noſtre dicte ſeigneurie & lignée contre les deuantdits, qui deſormais ſont trop pres de nous:& tant ont procedé qu'ils ſont entrez par force & violence en noſtre ville de ſainct Denys en France: en laquelle ſont pluſieurs relicques de pluſieurs ſaincts, pluſieurs corps Saincts, noſtre couronne, le ſigne royal que on nomme l'oliffande & pluſieurs autres precieux & chers ioyaux. Sont auſſi entrez dedans le pont de S. Clou, violement. Et parauant auoient ſur nous, & non pas ſur le Duc de Bourgogne, noſtre treſcher & amé couſin: lequel ils auoient deſſié, & en noz païs bouté les feux, prins & deſpouillé noz villes, robé Eglifeſ, mis à rançon & tué noz ſubiects, enforcé femmes mariées, violé filles à marier, & fait tous les mauix que ennemy capital pourroit faire: pourquoy, nous te mandons & eſtroictement enioignons ſur toutes les peines que tu peulx encourir enuers nous, que noſtre preſente ordonnance & deliberation incontinent ces lettres veües, tu faces publier, & proclamer, par tous les lieux accouſtumez tant en la ville d'Amiens comme ailleurs, és mettes de ton bailliage, tellement qu'aucun ne puiſſe prendre ignorance, en puniſſant en corps & en biens les de-



uantdits & tous autres de leur partie, que tu pourras prendre, qui leur ont donné & donneront conseil, confort & ayde : comme ayans contre nous & nostre seigneurie commis crime de leze maiesté, & en ce faisant que ce soit exemple à tous autres, en commandant sur les peines dessus declairées, à tous noz vassaulx : & generallyment à tous ceux qui ont accoustumé de porter armes qu'ils viennent deuers nous le plus tost qu'ils pourront. Et en oultre en mettant & faisant mettre entierement nosdictes ordonnances & deliberations à execution, & tant que n'ayons cause d'en estre indignez cōtre toy. Donnée à Paris le quatorziesme d'Octobre l'an mille quatre cens & xj. & de nostre regne xxxij. Ainsi signé par le Roy à la relation du grand conseil. Lequel mandement fut publié en la ville d'Amiès, & par tout ailleurs és lieux accoustumez selon la forme & contenu d'iceluy, dont moult de vassaulx & d'autres feables du Roy tant de bonnes villes comme d'ailleurs s'efforcerent d'aller seruir le Roy. Et d'autre partie en plusieurs & diuers lieux furent prins & arrestez tresgrand nombre de ceux qui tenoient le party d'Orleans, dont aucuns furent executez, & les autres mis en chartre & rançonnez, comme ennemis du Royaume. Si estoit à lors piteuse chose d'ouyr racompter les griefues persecutions que chacun iour faisoient entre icelles parties, & par especial autour de la ville de Paris & en l'Isle de France : & entre les autres choses qui ne sont pas à oublier, issirent vn certain iour de la ville de Paris bien trois mille combattans tant en la garnison comme des Parisiens, & s'en allerent à Vicesbre en vne moult belle maison à deux lieües de Paris, appartenant au Duc de Berry. Et icelle en la hayne & content dudit Duc pilierent, prindrent & roberent tous les biens, la destruirent & demolirent tresuillainement, excepté les murs : & apres, en faisant autres plusieurs maulx à tout ce qu'ils auoient prins, vindrent abatre & destruire encores vne autre maison sur la riuere de Seine, où iceluy Duc tenoit ses cheuaulx, & n'est pas loing de l'hostel de Neelle. Pour laquelle offence quand il fut venu, fut fort espris de courroux & dit hault & cler deuāt plusieurs gens, qu'une fois lesdits Parisiens & ceux qui les soustenoient en faisant ces maléfices amenderoient le dommage & desplaisir, qu'ils luy auoient fait. En oultre en poursuiuant de mal en pis, par vn autre iour, ledit Duc de Berry, ledit Duc d'Orleãs, & ses freres, le Duc de Bourbon, les Comtes d'Alençon & d'Armignac, le seigneur d'Albreth tous nōmez, par leurs propres noms, & autres leurs adherans alliez & complices de quelque estat qu'ils fussent, furēt par les quarrefourgs de Paris à son de trompettes de par le Roy bannis de son royaume à tousiours, iusques à son rappel. Et non pas tant seullement bannis : mais par vertu d'une bulle que d'heureuse & bone recordation Pape Urbain v. de ce nom, trouua ou tresor des registres de Chartres des priuileges du Roy estans en la saincte Chappelle à Paris, furent iceux dessusdits par toutes les Eglises d'icelle cité de Paris à clochettes sonnans & chandelles allumées excommuniez & publiquement anathematisez. Pourquoy, plusieurs tenans leur party avecques eux mesmes, quand ils sceurent ladicte sentence ainsi iectée sur eux furent grandemēt troublez & courrouce : mais pourtant ne laisserent pas à continuer de iour en iour en leur propos & feirent guerre mortelle plus aspre & diuerse que parauant n'auoient fait.



*Comment le dessusdit Duc de Bourgongne alla de la ville de Ponthoïse par Melun à Paris à puissance. Et de l'estat & gouvernement du Duc d'Orleans.*

## CHAP. LXXX.

**E**N apres le Duc Iean de Bourgongne estant à Ponthoïse ( comme dit est dessus) venoient deuers luy gens de guerre de diuerses nations. Et y vint le Comte de Ponthieure son gendre à noble cōpagnie. Et quand il eut là seiourné enuiron quinze iours, & enquis diligemment de l'estat de ses aduersaires, le vingt & deuxiesme iour d'Octobre se partit dudit lieu de Pōthoïse, avec tout son exercite, ainsi qu'à deux heures apres midy, & la voye royal qui d'icelle ville va à Paris, laquelle occupoient seldits aduersaires delaisla: & print son chemin à Morlent sur Seine, où il passa la riuiere à tout bien quinze mille cheuaulx & cheuaucha toute nuit. Et le lendemain, par la porte saint Iaqués dedans Paris, à l'encontre duquel vindrent & issirent d'icelle ville grand multitude de gens d'armes. Entre lesquels estoient en belle ordonnance & bien armez les Bouchiers de Paris: lesquels conduisoient le Preuost de Chastellet, & des marchans, sous le Comte de Neuers frere dudit Duc de Bourgongne: lequel estoit accompagné de plusieurs Princes, grans seigneurs & capitaines. Et aussi, ceux du grand conseil du Roy vindrent bien honnorablement, vne lieüe ou plus au deuant dudit Duc. Et par especial son frere, & tous les autres seigneurs luy feirent aussi grand honneur & reuerence, comme ils eussent d'eu ou peu faire, à la propre personne du Roy de France, fil fut venu d'aucun loingtain voyage. Et quand au peuple de Paris, ils faisoient tresgrand ioye, & crioient Noël pour sa venue à tous les quarrefourgs quand il y passoit. Et pource que son entrée se fait si tard que le iour estoit failly, furent allumées par toutes les rues, grand quantité de torches, fallots & lanternes. Et quand vint qu'iceluy Duc de Bourgongne approcha le Loure, le Duc d'Acquitaine qui auoit espousée sa fille issit au deuant de luy, & le receut en grand ioye & moult reuerement. Et tantost le mena dedans le chastel du Loure deuers le Roy & la Royne, qui luy feirent tresgrand ioye. Et apres qu'il les eut humblementaluez s'alla loger en l'hostel de Bourbon. Et le Comte d'Arondel, se logea avec son estat au prioré de saint Martin des champs, & ses Anglois empres luy aux maisons au dehors, & tous les autres se logerent dedans la ville de Paris, où ils peurent le mieux. Et le lendemain qui fut le Dimenche, Enguerran de Bournouille, avec luy plusieurs vaillans hommes d'armes & de trait tant Picards comme Anglois issirent de Paris, & alla iusques à la Chappelle laquelle les Orleannois auoient fortiffiée de lices & de barrieres, & estoient logez dedans. Mais quand ils veirent leurs aduersaires monterent à cheual & vindrent l'un contre l'autre à bonnes lances, dont ils s'entredonnerent de rudes coups, en reuersant les vns les autres à terre. Et entre les autres s'y porta moult vaillammēt ledit Enguerran. Aupres duquel estoit Iean de Luxembourg nepueu au Comte de saint Pol, qui estoit moult ieune. Et y eut plusieurs naurez & peu de morts: les Anglois aussi à tout leurs arcs & saiettes ne s'esparagnoient pas à la besongne. Et entre-temps que ladicte escarmouche duroit, les autres Orleannois qui estoient logez à saint Denys, Montmartre & autres villes monterent à cheual, pource qu'ils ouyrent le cry de ceste assemblée, & vin-



drent à grand puissance pour couper le chemin audit Enguerran, & à ses gens, affin qu'il ne peust entrer dedans Paris : mais luy, de ce aduerty, les r'assembla, & en bonne ordonnance les reconduist audit lieu de Paris : neantmoins iceux Orleannois qui estoient en grand nombre les ferrerent de si pres, qu'ils en prirent & tuerent aucuns. Et pource que le Duc d'Orleans & les Princes estans avecques luy furent aduertis de là venuë & puissance que auoit amené ledit Duc de Bourgogne, feirent tous leurs gens qui estoient aux villages loger ensemble audit lieu de saint Denys. Et pour auoir viures fut enuoyé messire Clugnet de Brabant à tout compagnie de gens d'armes és pays de Vallois & Soissonnois, où il en y auoit tresgrand nombre & abondance. Lequel messire Clugnet, en accomplissant le commandement qui fait luy auoit esté, en fait venir en ladicte ville de saint Denys treslargement : & aussi, pource temps, le pays de France estoit en tresbon estat. Parquoy lesdits Orleannois auoient largement ce qu'il leur besongnoit : car de ce costé estoient les plus forts, & couroient chacun iour, par diuerses compagnies iusques sur les riuieres d'Oyse & de Marne, & par toutes les parties de l'Isle de France. Et pareillement les gens du Roy, & Duc de Bourgogne couroient à l'autre costé de la riuere de Seine iusques à Montleherry, Meulen & Corbeil : & par ainsi estoit ce trefnoble pays de France de toutes parts tresdurement violé. Et quand aux gens d'armes des vns & des autres, il y auoit tressouuent de dures rencontres les vns contre les autres. Et par especial se tenoit chacun iour l'escarmouche entre Paris & saint Denys : esquelles aduenoit aucunesfois que l'une des parties auoit l'honneur par vn iour, & le lendemain le contraire se faisoit. Et entre les autres places où lesdictes besongnes se faisoient & continuoient y auoit vn fort mollin sur vne haulte motte assez aduantageuse : sur laquelle se logeoient aucunesfois deux ou trois cens desdits Orleannois. Et là par les François & Bourgongnons estoient fort enuahiz & combattus pour vn iour, iusques à tant que le vespre venoit que toutes parties se retrayoiert en leurs places. Et aucuns autres iours, ceux de Paris prenoient ladicte motte & mollin où ils se tenoient, en attendant les assaulx & enuahissemens d'iceux Orleannois : & alors auoit avec ledit Duc d'Orleans vn cheualier nommé le seigneur de Clifford, lequel ja pieça y estoit venu à tout cent hommes d'armes & deux cens archiers du pays de Bordelois : & quand il ouyt les nouuelles que le Roy d'Angleterre auoit enuoyé en la compagnie du Duc de Bourgogne, le Comte d'Arondel & autres grans seigneurs, tantost vint deuers ledit Duc d'Orleans & luy requist qu'il luy donnast congé de s'en retourner : car il doutoit que le Roy son souuerain seigneur ne fut mal content de luy se plus y demouroit. Lequel d'Orleans considéré & pensé à ce qu'il luy auoit esté dit, luy octroya ledit congé par telle condition que contre luy & les siens nullement il ne s'armeroit ceste guerre durant : laquelle chose ledit Cheualier, luy promist, & puis s'en retourna en Angleterre. En oultre, le sixiesme iour de Nouembre Troullart de Maucruel capitaine & Bailly de Senlis à tout six vingts combattans & enuiron de sa garnison, estoit allé courre en sa Comté de Valois, & en son chemin rencontra enuiron sept vingts Orleannois, lesquels vigoureusement assaillirent luy & les siens : mais apres qu'il y eut eu plusieurs appertises d'armes faictes tant d'un costé comme d'autre, le dessusdit Troullart demoura victorien sur le champ, &

furent



furent que morts que prins d'iceux Orleannois de soixante à quatre vingts : entre lesquels fut prisonnier messire Guillaume de Saueuse, lequel tenoit le party d'Orleans & ses deux freres : c'est à sçauoir Hector & Philippe estoient avec le Duc de Bourgongne en armes, & par ainsi en ceste douloureuse guerre estoient les freres germains l'un contre l'autre, & le fils contre le pere. Apres laquelle destrouffe Troullart de Maucruel & avec luy Pierre Quieret s'en retournerent à tout leur proye & prisonniers audit lieu de Senlis. Et depuis en la faueur du vieulx seigneur de Saueuse & des dessusdits Hector & Philippe, fut le dessusdit Guillaume mis à deliurance.

*Comment iceluy Duc de Bourgongne mena grand puissance de gens d'armes où estoient les Parisiens deuant la ville de saint Clou contre les Orleannois.*

CHA. LXXXI.



Tem apres que le Duc de Bourgongne eut avec tout son exercite seiourné grande espace dedans Paris, & tenu plusieurs conseils avec les Princes & capitaines là estans. Le ix. iour de Nouembre issit de Paris enuiron à heure de minuiet par la porte saint Iaques, & avec luy grand & notable compagnie tant de gens d'armes comme de Parisiens : entre lesquels estoient les Comtes de Neuers, de la Marche, de Vaudemont & de Ponthieure, de saint Pol & d'Arondel, Bouciquault Marechal de France, le seigneur de Vergy Marechal de Bourgongne, le seigneur de Heilly qui nagueres auoit esté fait Marechal d'Acquitaine, le seigneur de saint George, messire Iean de Croÿ, Enguerran de Bournouille, le seigneur de Fosseux, messire Riquier Pot gouuerneur de la Daulphiné, le Seneschal de Hainault, messire Iean de Guistelle, le seigneur de Brineu, le Comte de Caen Anglois & plusieurs autres nobles tant des paÿs de Bourgongne comme de Picardie & autres lieux & paÿs : & furent estimez par gens à ce cognoissans à six mille combattans tous gens de guerre, & de trois à quatre mille pietons de la ville de Paris. Et quand ils furent aux champs cheminerent par bonne ordonnance ayans plusieurs guides iusques à demye lieue de la ville de saint Clou, où estoient logez les Orleannois : & pouoit estre huiet heures de matin, quand ils y vindrent, & si faisoit moult diuers temps de froidure, & de gelée. Et là, eux ainsi venus & arrestez sans ce que leurs aduersaires fussent de ce aduertis : ledit Duc de Bourgongne enuoya le Marechal de Bourgongne, messire Gaultier de Ruppes, messire Guy de la Trimouille, & le veau de Bar à tout huiet cens hommes d'armes, & quatre cens archiers, tout oultre la riuiere de Seine deuant saint Denys, pour empescher leurs aduersaires qu'ils ne passassent par vn pont neuf, qu'ils auoient fait sur ladicte riuiere. Lesquels seigneurs dessusdits en firent grandement leur deuoir & rompirent vne partie du pont, & si bien le garderent que iceux aduersaires ne peurent passer. Et apres ledit Duc estant en la montaigne en bataille, où il ya quatre chemins, mist en l'un le Seneschal de Hainault, messire Iean de Guystelle, le seigneur de Brineu, Iean Philippe & Iean Potier capitaines Anglois : & auoient tous ensemble quatre cens cheualiers & escuyers & autant d'Archiers. En l'autre chemin furent mis les seigneurs de Heilly & de Ront, Enguerrant de Bournouille, & Aymé de Viry à tout autant de gens que ceux deuant nommez. Et en la



tierce partie furent ordonnez Ousieuille Comte de Caen avecques aucuns capitaines Picards . Et de Seure, la Vigne, furent ordonnez tous les Parisiens & autres pietons en tresgrand nombre . Lesquelles compagnies par dessus ordonnées & mises en conduicte par ledit Duc, ainsi qu'il leur auoit esté baillé en charge, vindrent tous à vn faix assaillir ladicte ville : laquelle iceux Orleannois auoient fortifié tant de tauldis, fossez que barrieres au mieux qu'ils auoient peu. Ausquelles barrieres & autres lieux deffensables, eux qui desia estoient aduertis de la venue de leurs ennemis, se meirent tresuaillement en deffence : par l'ordonnance de leurs capitaines, qui estoient avecques eux : est à sçauoir en chief messire Iaques de Plachiel gouuerneur d'Angoulesme, le seigneur de Cambour, Guillaume Batillier & messire Mansart du Bos, le Bourc Iacob cheualier, & trois autres cheualiers de Gasconne, & se deffendirent aucune espace : mais pour le grand nombre de leurs aduersaires qui de toutes parts vigoureusement les assailloient, faillut en assez brief terme qu'ils perdissent leurs premieres barrieres : & de rechef furent poursuiuis tresrudement . Et adoncques en combattant & deffendant, se retrahirent en la tour du Pont & dedans l'Eglise, qui estoit aucunement fortifiée. Neantmoins toute la puissance de ceux qui estoient commis à faire ledit assault vindrent deuant icelle Eglise, reserué aucuns qui gardoient l'entrée dudit Pont . Et là plus que parauant s'enforça ledit assault : & jaoit ce que ceux de dedans se deffendissent par tresgrand vigueur, toutesfois furent ils prins par force & y en eut plusieurs morts tant ausdictes barrieres & deffences, comme dedans l'Eglise : & aussi à r'entrer dedans ladicte tour pour la presse & grand haste qu'ils auoient, rompit le Pont dessous eux, pourquoy en y eut grand quantité de noyez. Et fut trouué par nombre rapporté par gens à ce cognoissans que lesdits Orleannois furent morts pource iour, à compter ceux qui furent noyez bien neuf cens ou plus & de quatre à cinq cens prisonniers : entre lesquels furent les principaux ledit seigneur de Cambour, Guillaume Batillier & messire Mansart du Bos . Et avecques ce furent trouuez prins & ravis dedans icelle ville de saint Clou de douze à seize cens cheuaux avec grand foison d'autres bagues . Et entre-temps que ces besongnes se faisoient, ledit Duc de Bourgongne estoit en bataille en vne plaine au dessus de la ville, & auoit là plus grand partie de ses Princes, & auoit ses espies & coureurs en diuers lieux, pour auoir regard que ses aduersaires ne veinssent par aucun lieu, pour enuahir & combattre luy & ses gens . Et tousiours se continuoit l'assault pour prendre la tour du Pont, mais pour vray c'estoit peine perdue : car ceux de dedans le deffendoient tresdiligemment . Et entre-temps aucuns issirent par l'autre costé, & allerent à saint Denys noncer là au Duc d'Orleans la malle aduenture de ses gens : lequel de ce tresdeplaisant monta incontinent à cheual le Duc de Bourbon, les Comtes d'Alençon & d'Armignac, le Connestable de France, le maistre des Arbalestriers & le petit Bouciquault en sa compagnie : & à tout enuiron deux mille combattans vindrent par l'autre costé de la riuiere de Seine eux mettre en bataille, droit à l'opposite où estoit le Duc de Bourgongne : & là descendirent à pied & se meirent en ordonnance, comme se presentement ils eussent d'eu ou peu aborder à leurs ennemis . Et semblablement descendit le Duc de Bourgongne & ses gens, & fait desployer sa baniere, qui



qui estoit moult riche & resplendissant. Toutesfois, nonobstant les manieres que iceux Princes monstraissent l'un contre l'autre, estoit la riuere de Seine entre deux : parquoy ne pouoient faire chacun à son aduerse partie grand dommage, si non tant seullement de tirer d'Arbalestres & d'arcs à main à la vollée les vns contre les autres. Et apres que lesdits Orleannois eurent là esté aucune espace, voyant que bonnement ne pouoient besongner aucune chose qui leur fut de grand valeur, remonterent à cheual & s'en retournerent audit lieu de saint Denys delaisans en ladicte tour certain nombre de gens pour la garder. Apres laquelle departie ledit Duc de Bourgongne eut cōseil des principaux de ceux qui estoient avec luy, de retourner dedans Paris avec toute son armée : & pour ce iour ne perdit de toutes ses gens morts que enuiron de seize à vingt hommes : mais il en y eut plusieurs de blecez & naurez : entre lesquels le furent Enguerrant de Bournouuille & aymé de Viry, & soustindrent merueilleusement de terribles coups & importables : & quand au seigneur de Heilly, il se porta tresuaillamment. Et pareillement le feirent le Comte d'Arondel & autres de ses gens, desquels l'un eust la foy de messire Mansart du Bos, & depuis pour certaine somme de pecune qu'il en receut, le deliura és mains des officiers du Roy. Lequel Duc de Bourgongne quand il retourna dedans Paris fut receu de toute la communauté generalement en grand honneur, pource principalement qu'ils estoient du tout aduertis de ce qu'il auoit besongné : & leur sembloit que par son moyen ils seroient en brief deliurez de leurs ennemis, lesquels leur faisoient moult d'oppressions. Et quand au Roy, au Duc d'Acquitaine & à plusieurs autres du grand conseil tant Prelats comme seculiers, il n'est pas à estimer la reception qu'ils feirent audit Duc, & aux Princes & capitaines estans avec luy. Et apres, iceluy Duc de Bourgongne & son armée retournez à Paris (comme dit est) en fut sans delay aduerty le Duc d'Orleans & les autres estans avec luy, & pource prindrent vn brief conseil l'un avec l'autre sur ce qu'ils auoient à faire : auquel en la fin fut deliberé, que veu la perte qu'ils auoient faicte de grand partie des plus experts de leurs gēs, & aussi cōsideré la despence & puissance du Roy & du Duc de Bourgongne qui estoit moult grande : & contre laquelle ils ne pouoient resister, sans delay se departissent de là, & s'en retournaissent en leurs païs, pour de rechef assembler plus grand puissance à resister cōtre tous ceux qui nuire leur voudroiēt. Et ainsi qu'ils auoient conclud le feirent, & tindrent : car presentement feirent trousser, & leuer toutes leurs bagues, & monterent à cheual & par le pont dont dessus est faicte mentiō qu'ils auoient fait faire sur Seine, lequel ils redresserent & leuerent : & aussi par le Pont de saint Clou passerent oultre, assez hastiuement, & s'en allerent toute nuit tirant vers Estampes, & de là à Orleans & autres villes & forteresses de leur obeissance. Ainsi donques ledit Duc d'Orleans querant venger la mort de son feu pere acquist grand honte & grand perte de ses gens : lesquels est à sçauoir ceux qui estoient morts à la iournée dessusdicte, pource qu'on les tenoit pour excommuniez furent laissez là plus grand partie aux champs, sans les enterrer, & là les mangeoient les chiens, oyseaux & autres bestes tresinhumainement. Et aucuns autres seigneurs de ce party : c'est à sçauoir messire Clugnet de Brabant, messire Aymé de Sallebrusse, le seigneur de Hufalize, & plusieurs autres se tirerent par la Comté de Valois en Châpagne & de là en leurs propres lieux. Apres lequel par-



tement le lendemain tresmatin, furent apportées les nouvelles à Paris deuers le Duc de Bourgongne & autres seigneurs & capitaines, desquels les aucuns à tout leurs gens monterent assez tost à cheual & allerent audit lieu de S. Denys: & ce que les Orleannois auoient laissé, fut par eux prins, robé & emporté: & mesmement prindrent & emmenerent l'Abbé de S. Denys prisonnier de par le Roy cōme receuteur de ses ennemis. Et aussi furent prins plusieurs des bourgeois d'icelle ville qui là furent mis à finance nonobstant leurs excusations. Et pareillement allerent aucuns autres, à la tour de S. Clou: laquelle ils trouuerent abandonnée, & entrèrent dedans: si couroient pource iour ceux de ce party par diuers lieux & plusieurs compagnies, pour sçauoir s'ils trouueroient aucuns desdits Orleannois: mais c'estoit peine perdue, car ils auoient cheuauché toute nuit, & estoient ja bien loing: & pource, s'en retournerent audit lieu de Paris. En oultre aucun peu de iours ensuiuant par le pourchas & sollicitude du Duc de Bourgongne, le Roy paya les rançons de grand partie des prisonniers qui auoient esté prins à S. Clou: entre lesquels estoit Colinet de plusieurs par dessus nommé, lequel auoit liuré le pont de S. Clou au Duc d'Orleans & à ses gens, & fut decapité & escartellé és halles de Paris le douziesme iour de Novembre: & si y eut avec luy cinq de ses complices, lesquels eurent les testes couppees, & apres furent penduz par les effelles au gibet de Montfaulcon. Et le treiziesme iour de Novembre fut presché au cimetiere deuant le paruis nostre Dame de Paris, par vn frere mineur, où estoit le Duc de Bourgongne present & plusieurs autres grans seigneurs avec grand multitude de peuple: disant comment les bulles données par Urbain Pape quint, estoient de grand valeur contre les rebelles inobediens & dissipateurs du Roy & de son Royaume, & là publicquement declara & denonça là partie aduerse: c'est à sçauoir le Duc d'Orleans & ses complices pour excōmuniez. Et aussi en plusieurs autres sermons & predications furent denoncez pareillement.

Le lendemain d'apres, le Roy fut à l'Eglise nostre Dame de Paris, & là Messe ouïe retourna au Louure, & là print son disner: auquel il receut & fait seoir à table moult honorablement le Comte d'Arondel aupres du Duc de Bourgongne: & là en icelle ville de Paris, par plusieurs iours furent tenues de grādes congregations pour le fait de la guerre, qui estoit encommēcée pour sçauoir, comment le Roy fauroit à cōduire & à gouverner: en la fin desquels fut aduisé pour le mieux, que le Roy ne ses Princes ne se mettroient pas sus pour la cause de l'hyuer à toute sa puissance, iusques à l'esté ensuiuant. Mais tant seullement seroient mis sur les frontieres des ennemis aucuns capitaines pour iceux poursuivre & enuahir: entre lesquels y furent commis Bouciquault Marechal de France, le seigneur de Heilly Marechal d'Acquitaine, Enguerran de Bournouille, Aymé de Viry, le seigneur de Miraumont & plusieurs autres, avec eux tresgrand nombre de combattans: lesquels ils conduirent & menerent à Estampes, à Bonneual & en la marche d'environ: avec lesquels estoit le seigneur de Ront: laquelle ville de Bonneual se rendit tantost en l'obeïssance du Roy à la requeste des dessusdits capitaines: lesquels ou la plus grād partie, se logerēt en icelle ville, & en vne forte Abbaye, qui est assez pres: mais ceux de la ville d'Estampes ne furent pas cōseillez d'obeïr presentemēt: car il y auoit garnison de par le Duc de Berry: lesquels commēcerent à resister & faire guerre cōtre les gens du Roy & du Duc de Bourgongne par l'exhortation



hortation & ordonnance de messire Loÿs de Bourbon, qui se tenoit à Dourdan & en estoit capitaine. Et en ces mesmes iours, par le consentement dudit Duc de Bourgongne, messire Jean de Croÿ fils premier né au seigneur de Croÿ, qui estoit encores prisonnier au Duc d'Orleans se partit de Paris à tout huiet cens combattans, & s'en alla au chastel de Monchas en la Comté d'Eu: dedans lequel estoient les enfans du Duc de Bourbon, & de la Duchesse sa femme: c'est à sçauoir vn fils de trois ans ou enuiron, & vne fille de son premier mary aagé de neuf ans avec leurs nourrices & autres leurs seruiteurs: & si y estoit le fils messire Mâsart du Bos, & le seigneur de Foulleuses chevalier, lesquels tous ensemble furent prins dedans ledit chastel par ledit messire Jean de Croÿ: lequel avec tous leurs biens les emmena au chastel de Renty, & là les tint prisonniers iusques adonc que le seigneur de Croÿ son pere luy fut rendu: laquelle prinse venue à la cognoissance dudit Duc de Bourbon & de sa femme la Duchesse, en eurent au cueur tresgrand tristesse: & par especial ladicte Duchesse en fut si troublée, qu'à peu pres qu'elle n'en mourut de dueil.

*Comment le Comte Vvalleran fut enuoyé à Valois, à Coucy de par le Roy & autres capitaines en plusieurs lieux contre lesdits Orleannois.* CHAP. LXXXII.

**E** Tem en ensuiuant les besongnes dessusdictes, Vvalleran Comte de saint Pol fut enuoyé de par le Roy par toute la terre de Valois, villes & forteresses, pour iceux subiuguer & reduire en l'obeissance du Roy: & pareillement à Coucy avec luy grand planté de gens d'armes, d'archiers & d'arbalestriers. Et en la Comté de Vertus fut enuoyé messire Philippe de Seruolles Bailly de Vitry en Partois à tout grand quantité de combattans, pour tout mettre en l'obeissance du Roy. Et en la Comté de Clermont fut enuoyé le Vidame d'Amiens: & en là Comté de Boulongne & d'Eu & Gamache fut enuoyé Ferry de Hangiers Baillif d'Amiens, pour pareille cause que les deuantdictes: mais ceux de Crespy en Valois, qui est la maistresse ville de tout le pays, tantost qu'ils sceurent la venue dudit Comte de saint Pol se sousmeirent du tout en l'obeissance du Roy, & il les receut humainement: & apres s'en alla au chastel de Pierrefons, qui estoit moult fort deffensable & bien garny & rempli de toutes choses appartenans à guerre: & luy là venu se print à parlementer avec le seigneur de Boquiaux qui en estoit capitaine: & en fin fut le traicté fait parmy ce que ledit Comte luy feit donner pour ses fraiz par le Roy deux mille escus d'or, & avec ce emporterent luy & ses gens tous leurs biens. Et la Dame de Gaucourt qui estoit dedans, s'en alla au chastel de Coucy là où elle fut honorablement receüe de messire Robert d'Esne qui en estoit capitaine. En apres dudit lieu de Pierrefons s'en alla iceluy Comte de saint Pol à la Ferté-Milon trefort chastel, & à Villiers Canderes appartenās audit Duc d'Orleans. Lesquels non pas tant seulement iceux, mais toutes les forteresses de ladicte terre ouÿe la nouvelle de la reddition de Pierrefons, tant fort chastel, sans faire aucune resistance se rendirent audit Comte au nom du Roy: lequel meist par tout garnison de ses gens: & puis s'en alla en Soissonnois vers Coucy, auquel lieu (comme dit estoit) dedans le chastel, messire Robert d'Esne, Rigault de Fontaines & plusieurs autres gentils-hommes tenans le party du Duc d'Orleans. Et dedans la ville dudit



lieu de Couffy estoit capitaine messire Enguerran de Fontaines, & avec luy estoient plusieurs autres nobles hommes : lesquels eu conseil l'un avec l'autre de prime face rendirent ladicte ville, & s'en allerent avec tous leurs biens : & ledit Comte se logea & ses gens d'armes dedans icelle ville, & en aucunes maisons au dehors : & fait sommer ledit messire Robert qu'il rendit la forteresse pour & au nom du Roy, ce que pas ne voulut faire : mais respondit que le Duc d'Orleans luy auoit baillée en garde, & fait faire serment de la non rendre sans son sceu ou expres commandement : & aussi elle estoit tres abondamment pourueüe de viures, habillemens de guerre & autres besongnes necessaires, pourquoy il ne doutoit aucunement estre prins de force : auoit esperance que tandis qu'il la tiendrait, aucuns moyens se trouueroient, par lesquels son seigneur & maistre seroit en la grace du Roy. Neantmoins sa responce ouïe, ledit Comte Vvalleran fait enuironner & loger ses gens assez pres de ladicte forteresse, & icelle tresfort combattre & trauailler de canons & autres habillemens de guerre. Et entre les autres choses fait employer mineurs à grand foison, pour miner la porte de la basse court nommée la porte maistre Odon, qui estoit pour autāt de chose vn aussi bel, fort & notable ediffice, qui fut à vingt lieües à la ronde d'icelle : & avec ce minerent au dessoubs d'autres grosses tours. Et tant continuerent en euure, que la besongne fut preste pour bouter le feu dedans : Et en fin apres que ledit messire Robert eut de rechief esté sommé de luy rendre, & que pas n'y voulut entendre, fut par ledit Côte ordonné à vn certain iour que toutes ses gens feussent mis en armes prests pour assaillir le besoing estoit. Apres laquelle ordonnance & que tout fut prest, fait bouter les feux dedans : lequel feu par le moyen des apprests qui subtilement estoient faits dedans icelle, tant continua que finablement la plus grand partie de ladicte porte fut confondue, & cheut tout à plat : mais tāt de bien y eut pour les assiegez, que le mur qui estoit vers eux demoura entier, & par ainsi n'eurent lesdits gens d'armes gueres d'auantage pour les enuahir. Si furent aucuns tant d'une partie que de l'autre morts & naurez à ceste besongne : & pareillemēt fut partie vne tour corniere qui estoit assez puissante & ne peut cheoir tout ius, pour le mur de la ville auquel elle s'appuya. Si demoura sur ladicte partie ainsi enclinée vn homme de guerre, qui estoit pour deffendre contre les assiegeans, lequel fut en tres grand peril de perdre sa vie : mais en fin par la diligence de ceux de dedans il fut mis à sauueté.

FINALEM ENT apres que le Comte de S. Pol eut esté enuiron trois mois deuant ledit chastel de Couffy, fut traicté fait entre ledit messire Robert & le Comte par telle condition, qu'il s'en iroit luy & ses gens avec tous leurs biens portatifs à sauueté où bon leur sembleroit soubs bon saufconduit : & avec ce auroit pour ses fraits douze cens escus ou enuiron : lequel traicté finy se partit enuiron cinquante combattans, desquels estoient les principaulx son fils le Baudrain de Fur cheualier, Rigault de Fontaines cheualier dessusdit, & Gaucher de Baifus, & si y estoit la dame de Gaucourt, dont dessus est faicte mention. Et s'en alla iceluy Robert & la plus grand partie de ses gens demourer à Creuecueur, & au chastel en Cambresis. Apres laquelle reddition ledit Côte y meit garnison de ses gens, & y commist cappitaines messire Gerard de Herbannes. Et estoit avec luy en ceste exercite Iean de Luxembourg son nepueu, le Vidame d'Amiens, le seigneur



gneur Houcourt & plusieurs autres nobles cheualiers & escuyers des paÿs de Picardie, & par especial de ses seigneurs : & ces besongnes accomplies s'en alla à Paris deuers le Roy. Et là tantost apres comme cheualier saige, discret & de grād prudence & digne de remuneration, fut par le Roy & son conseil esleu & commis Connestable de France: & là luy fut baillée l'espée en faisant par ledit Comte le serment de bien & loyaument exercer ledit office, duquel fut depose & iugé comme indigne messire Charles d'Albreth. Et pareillement le seigneur de Rambures cheualier, fut mis en office de maistre des Arbalestriers de France au lieu du seigneur de Hangiers: lequel en fut depose de par le Roy, & le seigneur de Longny de la natiō de Bretaigne fut fait Mareschal, & en fut demis le seigneur de Rieu, pource qu'il estoit trop ancien: & fut fait par son consentement.

*Comment messire Philippes de Seruolles Baillif de Vitry assiegea Moyennes. Et d'autres seigneuries qui furent mises en la main du Roy par ses officiers.*

CHAP. LXXXIII.

**E**N apres ceux de la Comté de Vertus: quand le Baillif de Vitry, c'est à sçauoir messire Philippes de Seruolles fut venu luy & ses gens deuāt la ville de Vertus, tantost se rendirent au nom du Roy: & pareillemēt toutes les autres garnisons d'icelle Comté donnerent obeissance excepté ceux du chastel de Moyennes: dedans lequel estoient messire Clugnet de Brabant, & son frere Iean de Brabāt, messire Thomas de Larfies & plusieurs autres: lesquels en riens ne vouloient obeyr aux mandemens du Roy: & pource ledit Baillif & ceux qui avecques luy estoient meirent le siege, & se preparerent pour assaillir: mais ce fut peine perdue: car iceluy chastel estoit moult fort & biē garny de tous viures & aussi d'artillerie, pourquoy lesdits assiegez doubtoiet moult peu ceux qui estoient deuāt, & leur faisoiet souuent des enuahies. Neantmoins la besongne se continua par l'espace de trois ou quatre mois, au bout duquel temps ledit messire Clugnet & avec luy messire Thomas, montez sur deux cheuaux forts & legiers à tout deux pages cheuauchans derriere eux, partirent dudit chastel & passerent tout parmy l'ost & le siege qui estoit deuant eux: & auoient chacun vne lance en leur poing & courroient tant que les cheuaux pouuoient aller, & tant feirent qu'ils eschapperent & s'en allerent pour auoir secours deuers messire Aymé de Salbrusse, & à Luxembourg: Mais ils ne reuindrēt pas à tout ledit secours: car tantost apres Iean de Brabant frere dudit messire Clugnet fut prins ainsi qu'il estoit issu dehors: lequel par l'ordonnance du Roy & de son grand conseil fut decapité en la ville de Vitry: & brief ensuiuant ceux qui estoiet dedans ledit chastel de Moyennes le rendirent audit Baillif au nom du Roy, & s'en allerent sauf leurs corps & leurs biens & il y meit garnison. Et par ainsi toute la marche de là enuiron fut mise en l'obeissance du Roy. Semblablement ceux de la Comté de Clermont se rendirent du tout sans faire aucune resistance au Vidame d'Amiens, qui y auoit esté enuoyé de par le Roy, comme dit est: & ceux des garnisons qui auoient fait moult de maulx sur le plat paÿs, s'en allerent sous saufconduit à tout leurs bagues au paÿs de Bourbonnois, & comme es autres lieux furent mis gens de par le Roy par toutes les forteresses. En outre le Baillif d'Amiens alla à Boulongne sur la mer, & luy feirent ceux de la ville & des forte-



resses de la Comté bonne obeissance reserué le chastel dudit lieu de Boulongne: lequel le Seneschal, c'est à sçauoir messire Loÿs de Corail natif d'Auuergne cheualier, ne voulut pas rendre sans le consentement du Duc de Berry son seigneur, qui luy auoit baillé en garde. Et pourtant ledit Baillif d'Amiens & les Boulenois avec luy, tantost le pont leuis dudit chastel deuers les champs demolirent l'issue, & estoupperent de grans fossez, tellement que par là ne pouuoit nul homme entrer n'issir. Et depuis fut tant pourparlé entre ledit Baillif d'Amiens & iceluy Seneschal qu'il eut iour d'enuoyer vers son seigneur de Berry, pour sçauoir fil le tiendrait pour deschargé dudit chastel & fil seroit content qu'il fut en la main du Roy: lequel Duc luy māda qu'il le deliurast, pour & au nom du Roy au desfusdit Baillif d'Amiens, & s'en retournaſt à Bourges deuers luy, & ainſi en fut fait. Et ſemblablement furent miſes en la main du Roy toutes les ſeigneuries & appartenances de la Comté d'Eu, & de la terre de Gamaches: & en furent demis & boutez hors tous ceux qui y eſtoient de par les ſeigneurs à qui icelles ſeigneuries appartenoint & en leurs lieux de par le Roy furent commis autres ſouldoyers: durant lequel temps furent auſſi cueillis grans ſommes de deniers en la ville de Paris & ailleurs pour payer les Anglois, qui eſtoient venus ſeruir le Duc de Bourgongne par la licence & auctorité du Roy d'Angleterre. Et apres qu'ils eurent receu leur payement, le Comte d'Arondel à tout ſes gens ſ'en alla par Calais en Angleterre: mais le Comte de Kam à toute ſa compagnie demoura à ſeruir ledit de Bourgongne. Et pour ce temps tous ceux tenans la partie d'Orleans eſtoient fort deboutez, & ne ſçauoient à grand peine où eux ſauuer: car tantost qu'on en ſçauoit aucuns feusſent ſeculiers où eccleſiaſtiques, ils eſtoient tantost prins & emprisonnez, & les aucuns iuſticiiez, & autres mis à grans finances. Et meſmement en furent prins en ceſte ſaiſon deux Moynes: c'eſt à ſçauoir maiſtre Pierre Franel Eueſque de Noyō, lequel fut prins par meſſire Anthoine de Craon, & de Noyon mené au chaſtel du Crotoy. L'autre fut l'Abbé de Foreſmouſtier, & fut priſonnier au ſeigneur de Dampierre Admiral de France: mais depuis en payant grans finances furent deliurez & ſ'en allerent chacū en ſon benefice. Pendant auſſi lequel temps le ſeigneur de Hangiers ſoy diſant encores maiſtre des Arbaleſtriers de France, tenant le party d'Orleans & ſ'eſtoit retraict ſecrettement apres le partement de S. Denys (dont deſſus eſt faiſte mētion) au chaſtel de Soiſſon. Et pource qu'il auoit voulenté & intention de trouuer ſes moyens deuers le Roy, enuoya querir par vn pourſuiuant vn ſaufconduit à Senlis de Troullart Maucruel, qui en eſtoit capitaine & Baillif pour aller audit lieu de Senlis & là ſejourner. Lequel ſaufconduit luy fut enuoyé, & ſur ce ſ'en alla en icelle ville de Senlis: mais pourtant qu'aux deſſusdits ſaufconduit n'eſtoit pas fait mention du retour dudit Hangiers, le fait ledit Troullart priſonnier du Roy luy ſeiziefme de gentils-hommes. Et fut brief enſuiuant luy & ſes gens mené à Paris, & mis en chaſtelet dont grandement luy deſpleut: mais il ne le pouuoit auoir autre. En outre le Comte de Rouſſy pareillemēt qui ſ'eſtoit retraict en ſon chaſtel de Pont à Arſy ſur Aine, apres ſon retour de S. Denys fut incontinent enuironné & aſſié-gé des payſans de Laonnois & de la marche enuiron. Et ſemblablement ſ'aſſemblerent bien mille & cinq cens ou plus autour de ladiſte fortereſſe, & l'aſſaillirēt terriblement pluſieurs journées. Et tant continuerent que nonobſtant qu'elle fut moult



moult forte d'eau & de muraille, qu'ils la dommagerent moult. Et s'appelloient lesdits païsans les enfans du Roy. Si vint en leur ayde & pour les conduire le Baillif de Vermandois, c'est à sçauoir le Brun de Bairins cheualier & le Preuost de Laon. Et lors ledit Comte voyant la force & violence d'iceux doubtant estre prins de force par lesdits païsans, se rendit luy & son chastel & ceux qui estoient avec luy sauue la vie audit Baillif de Vermandois, lequel le receut. Et apres qu'il eut mis garnison dedans ledit chastel de par le Roy, emmena ledit Comte & ses gens prisonniers en la ville de Laon, où ils furent par treslongue espace: & depuis en payant grans finances furent deliurez. Et pareillement fut prins l'Archediacre de Brie dedans la tour d'Andely par les enfans dessusdits: lequel Archediacre estoit fils naturel du Roy d'Armenie. Messire Guillaume de Coussy qui tenoit ledit party d'Orleans se retrahit en Lorraine deuers son frere qui estoit Euesque de Mets.

*Comment le Duc d'Acquitaine & de Bourgongne allerent conquerre Estampes & Dourdan: & de la mort messire Mansart du Boz & autres prisonniers.*

CHAP. LXXXIIII.

**Q**R est verité que durant les tribulations dessusdictes le Roy & ses Princes estans à Paris, eurent plusieurs complainctes des maulx & violences que faisoient sur le païs ceux de la garnison d'Estāpes & de Dourdan: & que pour ce nonobstant qu'il eut esté conclud par le conseil royal que le Roy ne le Duc d'Acquitaine ne se mettroiēt pas aux champs à puissance que l'hyuer ne fut passé: neantmoins pour resister aux entreprinſes des dessusdits, fut ce propos rompu. Et le xxij. iour de Novembre ledit Duc d'Acquitaine accōpaigné du Duc de Bourgongne, des Comtes de Neuers, de la Marche, de Ponthieure & de Vaudemont, du Mareschal Bouciquault & d'aucuns autres seruiteurs avec tresgrand nōbre de pietons tant de la commune de Paris comme d'ailleurs, se partit de ladicte ville de Paris sur intention de mettre en l'obeissance du Roy les dessusdictes places de Dourdan, & d'Estampes, & aucunes autres qui faisoient guerre de par le Duc d'Orleans & ses aydans: & s'en alla par Corbeil où il seiourna aucuns iours pour attendre ses gens: & de là à tout foison d'habillemens de guerre tant bombardes comme autres artilleries, se tira à tout son ost deuers Estampes: auquel lieu estoit messire Loys de Bourdon, qui tantost se retira dedans le chastel. Et ceux de ladicte ville se soubmeirēt incontinent, & rendirent en l'obeissance dudit Duc d'Acquitaine: lequel les receut assez benignement en la faueur du Duc de Berry son oncle. Mais ledit Bourdon ne voulut nullemēt obeyr, jaçoit-ce qu'il en fut sommé par plusieurs fois. Et pource fut sans delay ordonné que ledit chastel seroit de toutes parts enuironné. Et pour lors estoit dedans vn prisonnier: c'est à sçauoir le seigneur de Ront, lequel auoit vn petit deuant esté rencontré & prins par le dessusdit Bourdon. Et adoncques furent dressez & assis plusieurs engins contre ledit chastel, lesquels en plusieurs & diuers lieux le derompirent & dommagerent. Et avecques ce furent mis grand quantité d'ouuriers en euure à miner par dessous les terres d'icelle forteresse. Et tant y fut continué que les assiegez voyans qu'ils estoient en peril d'estre prins de force, commencerent à parlementer, & finablement par le moyen dudit seigneur de



Ront se rendirent en la voulenté dudit Duc d'Acquitaine : & par ainsi fut iceluy Loÿs Bourdon & aucuns autres gentils-hommes enuoyez à Paris dedans chastelet, & grand partie des biens d'iceluy Bourdon avec vn moult excellent coursier qu'il auoit, furent donnez audit seigneur de Ront pour ses fraiz qu'il auoit eu à estre prisonnier. Et apres que les dessusdits Ducs d'Acquitaine & de Bourgongne eurent garnies les dessusdictes forteresses de leurs gens, ils s'en retournerent avec toute leur exercite en la ville de Paris, pource que bonnement ils ne pouoient icelle conduire pour le temps d'hiuer. Et aucuns peu de iour ensuiuant furent menez dudit lieu de Paris de par le Duc de Bourgongne plusieurs seigneurs prisonniers au chastel de l'Isle: c'est à sçauoir le seigneur de Hangiers, messire Loÿs Bourdon dessusdit, le sire de Gerennes, messire de Fontaines, messire Jean d'Amboise & aucuns autres: lesquels auoient esté prins en diuers lieux en tenant le party du Duc d'Orleans, & là furent par longue espace: mais en fin furent deliurez en payant grand finance. Et en ces mesmes iours fut decapité és halles messire Mansart du Bos natif de picardie: & fut son corps pendu par les esselles au gibet de Montfaulcon, & la teste demoura sur vne lance esdictes halles de Paris: & fut faicte ceste execution à l'instance & pourchats dudit Duc de Bourgongne, pource qu'iceluy messire Mansart estoit son hōme lige: & ce nonobstant l'auoit deffié par lettres scellées de son scel au temps que les trois freres d'Orleans, dont dessus est faicte mention, deffierent ledit Duc: & ne peut estre sauué par priere de ses amis, jaçoit-ce que grand diligence en fut faicte: car plusieurs en y auoit de grād auctorité qui seruoient le dessusdit Duc de Bourgogne qui s'en meirent en grād peine: mais ce porta petit effect. Auquel temps auoit de dans le chastelet de Paris, & autres prisons de la ville grand nombre de prisonniers Orleannois, desquels moult grand partie tresmiserablement mouroient par force de froid, de mesaise, & de famine: & apres qu'ils estoient morts on les portoit dehors ladicte ville en aucuns fossez: & là les laissoit on manger aux chiens, oyseaux & autres bestes tres inhumainement. Et la cause pourquoy on tenoit telle maniere contre eux, si estoit, pource que par plusieurs & diuerses fois auoient esté denoncez & publiez par les eglises & carrefourgs de ladicte ville de Paris comme excommuniez. Neantmoins ce sembloit estre à plusieurs preud'hommes tant nobles comme gens d'eglise grand derision de traicter ainsi piteusement ceux qui estoient Chrestiens, & tenoient la foy de Iesus-Christ. En apres en perseuerant à toute rigueur en ceste matiere, fut decapité és dessusdictes halles de Paris, vn vaillant cheualier nommé messire Pierre de Famechon, lequel estoit de l'hostel & famille du Duc de Bourbon: & fut sa teste mise sur vne lance comme les autres. Pour la mort duquel ledit Duc de Bourbon fut tresfort troublé & courroucé, & par especial quand il sceut qu'il auoit esté executé & mis si honteusement à mort. Et adonc pour ceste saison tous ceux qui pouoient estre prins & apprehendez tenās le party du Duc d'Orleans & de ses alliez, estoient en tresgrand dangier de leurs vies: car peu y auoit qui pour eux osast parler ne faire requeste quelque prochain qu'on leur fut.

*Comment*



*Comment plusieurs capitaines furent enuoyez de par le Roy sur les frontieres en diuers pais contre les Orleannois, & de la destrouffe du Comte de la Marche.*

## CHAP. LXXXV.

**E**N ce mesme temps furent enuoyez plusieurs seigneurs & capitaines de par le Roy sur les marches & païs des seigneurs, qu'adonc il tenoit pour ses aduersaires : entre lesquels le Comte de la Marche fut commis, & avec luy le seigneur de Hambie à entrer en la Duché d'Orleans, & icelle mettre en l'obeïssance du Roy. Et contre le Duc de Bourbon qui auoit fort degasté le païs de Charrolois, furēt enuoyez Amé de Viry, Fierbourd & autres, lesquels tresfort degasterent le païs de Bourbonnois eux & leurs gens, dont ils auoient grand planté en leur compaignie, & aussi le païs de Beaujolois. Et de fait allerent courre à puissance à estandart desployé en tresbelle ordonnance deuant Ville France, où lors estoit le Duc de Bourbon, & avec luy son frere bastard qui y estoit : c'est à sçauoir messire Hector, qui estoit tresvaillant cheualier expert & renommé en fait de guerre, & avec ce fort puissant & bien formé de sa personne : si estoient avec eux pour ce iour grand nombre de cheualiers & escuyers des païs dudit Duc, lesquels quand ils veirent leurs ennemis deuant eux, se meirent en tresbelle ordonnance. Et à lors saillirent dehors de pied & de cheual à tout puissance, & mesmement le Duc se meit en bataille au dehors de la ville pour iceux combattre. Et adonc se commēça l'escarmouche tresdure entre icelles parties, & y fut fait de grans appertises d'armes tant d'un costé comme d'autre. Et par especial ledit Bastard de Bourbon, qui conduisoit les coureurs par maniere d'auantgarde, si se porta pour ce iour trescheualleureusement : & se ferit dedans ses aduersaires trescheualleureusement, & roidement, & si auant s'y bouta, que ledit Duc fut en grand doubte qu'il ne fut prins ou mort : & pour le rescourre s'escria hautement à ses gens en frappant son coursier des esperons. Sus à eux, mon frere est prins s'il n'est secouru. Et lors avecques luy grand partie de sadiète bataille allerent le grand cours iusques à leursdits aduersaires, & y eut de rechief tresgrand estour & hommes d'armes portez à terre, morts & naurez de chacune partie, & en fin ceux de la partie de Bourgongne qui menoient l'auantgarde, & lesquels conduisoit ledit Amé de Viry, se retrahirent iusques à leur bataille, qui estoit un petit plus loing : & le dessusdit Bastard qui auoit esté porté & mis ius de son cheual, fut remonté & retourna deuers le Duc son frere. Et par auant ce iour, n'estoit homme de quelque estat qu'il fut qui audit Duc l'eut ouï nommer frere. Si furent morts tant d'une partie comme d'autre environ quarante hommes, & plusieurs naurez. Apres laquelle escarmouche, pource qu'il estoit tard vers les vespres, les deux parties se retrahirent sans plus auant proceder l'un contre l'autre : c'est à sçauoir ledit Duc, & ses gens dedans Ville Franche : & l'autre partie se tira, en gastant païs deuers la Comté de Charrolois : d'autre partie furent enuoyez en Languedoc & ou païs d'Aquitaine & en Poictou contre le Duc de Berry, le Comte d'Armignac & le seigneur d'Albreth : c'est à sçauoir messire Guichard Doffin maistre d'hostel du Roy à l'un des lez, & à l'autre costé le seigneur de Helly Marechal d'Aquitaine, & Enguerran de Bournouille : Lesquels degasterēt moult le païs desdits seigneurs. Toutesfois un certain iour que



ledit seigneur de Helly estoit logé en vn gros village nommé Linieres, fut à vn poinct du iour assailly des gens du Duc de Berry & la plus grand partie de ses gens destrouffez: de ses cheuaux & autres bagues, & les aucuns en assez petit nombre morts & prins: & luy de sa personne avec la plus grād partie de ses gēs se sauua en deffendant dedās la forteresse d'icelle ville, laquelle tenoit le party du Roy, & par ainsi furent sauuez. Et quand au dessusdit Comte de la Marche, & au seigneur de Hambye qui estoit entré en ladicte Duché d'Orleans (comme dit est dessus) faut vn petit parler de leur gouuernement. Il est biē verité qu'ils pouoiēt bien auoir de cinq à six mille combattans: lesquels furent conduit par iceux seigneurs, en degastant païs iusques aupres de Yeu-ville le chastel: & se logea ledit Comte de la Marche en vn village nommé le Puchet à tout ses gens tant seulement, & le seigneur de Hambye fut logé en vn autre ville. Or est ainsi que ceux de la garnison dudit lieu de Yeu-ville feirent sçauoir les nouuelles de leur venue en la ville d'Orleans, où il y auoit trefgrand nombre de gens de guerre pour la garde du païs: si se meirent sus sous la conduicte de Barbasan de Gaucourt, de messire Galliet de Gaulles & vn cheualier Lombard enuiron six cens hommes d'armes, & trois cens archiers, & s'en vindrent le plus secrettement qu'ils peurent en vn certain lieu où ils trouuerent ceux de la garnison dessusdicte: c'est à sçauoir de Yeu-ville, lesquels quand ils furent tous ensemble pouoient estre mille combattans ou enuiron. Si se meirent à chemin & cheminerent toute nuit, pour aller où ledit Comte estoit logé, & auoient plusieurs guides qui les conduisoient. Toutesfois iceluy Comte en fut aucunement aduerty, & fait armer ses gens, & trahirent à son hostel la plus grand partie, & en autres lieux les fait tenir ensemble: & avec ce manda & enuoya deuers le seigneur de Hambie, luy noncer lesdictes nouuelles, & luy signifier qu'il fut prest pour le venir secourir se besoing en estoit. Et ainsi fut ledit Comte & ses gens la plus grand partie de la nuit en armes attendans leurs aduersaires: mais quand vint vers le iour, ce que faire ne deuoient par le conseil d'aucuns se retrahirent chacun en son hostel pour eux reposer. Et quand vint vn peu deuant soleil leuant, vint audit logis vn cheuaucheur de leurs aduersaires qui alla tout au long de la ville: & apres voyāt qu'il n'y auoit point de guet & qu'ils n'estoient pas ensemble, retourna tātost vers ses gens qu'il trouua assez pres de la ville: & incontinent en entrant dedans ledit logis, commencerent à crier viue le Roy: & apres en assillant iceux, crierent viue Orleans. Et en alla grand partie au logis dudit Comte, qui vouloit ouyr la messe: auquel lieu il y eut trefgrand hutin. Car iceluy Comte avec aucuns de ses gens se combattit tres vaillamment, neantmoins il fut vaincu, & prins prisonnier. Et tout le logis generalmente fut mis à desconfiture, & iceux prins & morts. Apres laquelle destrouffe, le dessusdit Comte, & les autres prisonniers furent emmenez hastiement deuers Orleans. Et entre-temps ledit seigneur de Hambie venant à leur secours, fut foruoyé par vn homme qu'il auoit prins à son logis pour le guider: & estoit ja tout departy quand il vint au logis dudit Comte, & fut moult dolent. Et pourtant poursuiuit sans delay s'edits ennemis par si grād vertu, qu'il les rattaingnit & se bouta en eux vigoureusement, tant qu'il en rua ius plusieurs. Et avec ce, rescouyt aucuns prisonniers: mais le Comte & enuiron quatre vingts de ses gens (comme dit est) furent emmenez deuant, tant comme cheuaux les pouoient



pouoient porter: & fut mis prisonnier en la ville d'Orleans. Si fut iceluy seigneur de Hambie moult troublé de ce qu'il ne le peut rescourre. Et furent morts à ces deux besongnes de trois à quatre cens hommes tant d'un party comme d'autre, dont la plus grand partie estoit des Orleannois: & entre les autres y fut nauré à mort de la partie du Comte de Vandosme, Guiot le Gois aîné fils de Thomas le Gois grand bourgeois de Paris, dont les Parisiens furent moult desplaisans. Et apres ceste besongne, le dessusdit seigneur de Hambie assembla grand nombre de gens de par le Roy, & fait plus que par auant forte guerre à la Duché d'Orleā, & eux à luy: pourquoy le païs de tous costez fut fort oppressé. Auquel temps vint en la ville de Paris du païs de Prouence le Roy Loys à tout trois cēs hommes d'armes bien habillez, & se logea en son hostel d'Anjou: si fut grandement receu & honoré du Roy, du Duc d'Acquitaine & des autres Princes, & grans seigneurs: si fallia du tout avec le Roy de France, les Ducs d'Acquitaine & de Bourgongne, & promet de tenir leur party contre les enfans d'Orleans, & leurs alliez. Et d'autre partie la Duchesse de Bourgongne & vne sienne fille vindrent par ce temps du païs de Bourgongne au Bois de Vincenne, où estoit la Royne de France & la Duchesse d'Acquitaine, qui treshonorablement les receurent: & là les alla visiter le Duc d'Acquitaine & le Duc de Bourgongne, & y furent faits tresgrans & solennels esbattemēs pour leur bien venue. Et depuis y demourerent avec ladiēte Royne grand espace de temps, aux despens du Roy. Et en ce mesmes temps, fut enuoyé de par le Roy le seigneur de Dampierre, Admiral de France, & aucuns autres à Boulongne sur la mer au deuant des ambassadeurs du Roy d'Angleterre qui estoient à Calais, & tous ensemble conuindrent à Loolinghen, & là traicterent trefues entre les deux Roys durant vn an entier: apres lequel traicté, iceluy Admiral & ceux qui estoient avec luy retournerent à Paris, deuers le Roy: auquel lieu estoient assemblez tresgrand nombre de Prelats, & autres gens d'Eglise, pour la reformation de l'Eglise vniuerselle. C'est à sçauoir, affin qu'on esleut aucuns saiges & experts d'iceux gēs d'Eglise pour aller deuers nostre saint Pere le Pape, luy faire requeste qu'un lieu fut prins & esleu à tenir vn Concille general de l'Eglise Chrestienne. Mais à verité dire assez peu y fut besongné, & ne peurent ceux de ceste assemblée venir à vne seule conclusion. Si fut esleu & prins autre iour pour estre ensemble & auoir plus grand nombre desdits Prelats & gens d'Eglise que là n'auoit eu. En outre en ces propres iours les Parisiens entendans loyaument & constāment auoir seruy le Roy & son fils le Duc d'Acquitaine en ses guerres, procurerent tant deuers luy par le moyen du Duc Iean de Bourgongne, que l'estat de l'escheuinage de ladiēte ville de Paris avec toutes les franchises d'iceluy qui par auant: c'est à sçauoir l'an mille trois cens quatre vingts & deux au mois de Ianuier leur auoit esté osté par l'auctorité royalle, leur fut rendu de par le Roy, plainement & liberallement: & sur ce lettres faictes, & à eux baillées dont tresgrandement furent resiouys. Et avec ce eurent ledit Duc de Bourgongne, en tous ses affaires en grand recommandation.

*Comment le Roy de France enuoya ses ambassadeurs en Angleterre: & de la deliurance du seigneur de Croi & des enfans du Duc de Bourbon. Et du Comte Valeran.*





L'entree du mois de Mars par la licence du Roy de France, le Duc de Bourgongne enuoya ses ambassadeurs deuers le Roy d'Angleterre: c'est à sçauoir l'Euesque d'Arras, le Preuost de sainct Donas de Bruges, & le Preuost de la Viefuille, pour traicter du mariage d'une des filles dudit Duc avec le Prince de Galles premier fils du Roy d'Angleterre, & pour lequel on auoit autresfois par auant d'iceluy pourparlé. Lesquels ambassadeurs trouuerent ledit Roy d'Angleterre à Roxestre: & furent de luy & de ses enfans treshonorablement receuz & festoyez, & aussi des autres Princes & seigneurs & par especial du Prince de Galles, auquel la besongne touchoit furent moult honnorez. Et apres qu'un certain iour, par la bouche dudit Euesque, ils eurent bien & à poinct remonstré en la presence dudit Roy, de ses enfans dessusdits, & de son conseil, tout l'estat de leurdicte ambassade: & que de ce ils eurent eu responce assez agreable: & aussi que plusieurs dons leur eurent esté faits par ledit Roy, retournerent à Douures & de là à Calais: & puis par aucuns iours alerent à Paris. Et là en la presence des Roys de France, de Cecille, des Ducs d'Acquitaine, de Bourgongne & de Bar, & plusieurs autres du conseil royal, raconterent tout au long ce qu'ils auoient besongné, & comment le Roy d'Angleterre, ses enfans, & ses Princes furent contens des besongnes dessusdictes: & adonc le Duc de Bourgongne manda son fils Comte de Charrolois qui estoit à Gand, qu'il vint à Paris pour y estre à la feste de Pasques prochain ensuiuant. Et en ces mesmes iours à la requeste & priere de la Duchesse de Bourbon fille au Duc de Berry fut par ledit Duc de Berry & d'Orleans, & autres grans seigneurs de ceste partie le seigneur de Croÿ mis à pleine deliurance de la prison, où il auoit esté assez longuement, & fut conuoyé par les gens des dessusdits, & conduit iusques aupres de Paris. Et à son partement promet sur sa foy, de tant faire deuers son maistre le Duc de Bourgongne que les enfans de Bourbon qui estoient prisonniers (comme dit est dessus) seroient deliurez. Et quand il fut venu iusques audit lieu de Paris, le Duc d'Acquitaine & par especial le Duc de Bourgongne le receurent en grand liesse: & aucuns iours ensuiuans fait la requeste qu'il auoit promis: c'est à sçauoir pour les enfans dessusdits: laquelle finablement luy fut accordée de par le Roy & les autres seigneurs. Si furent mandez au chastel de Renty où ils estoient, & avec aucuns de leurs seruiteurs furent amenez à Paris, & de là furent enuoyez franchement sans riens payer: & les conduisit messire Jean de Croÿ aux terres du Duc de Berry, & le fils messire Mansart du Bos, qui auoit esté prins avec eux demoura prisonnier au chastel de Renty. En outre ledit seigneur de Croÿ par l'ordonnance & cōsentement dudit Duc de Berry & de ladicte Duchesse, fut ordonné de par le Roy gouuerneur de la Comté de Boulongne, & chasteelain de Brioch sur Somme. Et avec ce luy fut donné de par le Roy à sa reueneue à la priere du Duc de Bourgongne l'office de grād bouteillier de Frāce, & à messire Pierre des Essars Preuost de Paris fut baillé l'office d'estre maistre des eaües & des forests, lequel par auant tenoit Vvaleran Comte de S. Pol, qui de ce fut cōtent: lequel Comte de S. Pol Connestable de France, fait en ces propres iours un grand mandement de gens de guerre pour estre à Vernon sur Seine: & assembla bien deux mille bacinets sur intētion de faire guerre, à ceux de Dreux, au Comte d'Alençon & à ses gens, qui souuentesfois couroient au paÿs de Normandie &

vers



vers Rouen, où ils prenoient & desroboient tout ce qu'ils tenoient & pouoient attaindre. Pour lequel mandement & gens d'armes payer, & aussi pour les autres souldoyers & capitaines du Roy qu'il auoit en diuers lieux, fut imposé & aussi mise sus vne grand taille par tout le Royaume de France à payer à deux termes: c'est à sçauoir le premier à la Quasimodo, & le second en la fin du mois de Iuing ensuiuant: pour laquelle le pauvre peuple fut moult trauaillé, car avec ceste taille fut accordé au Roy par nostre saint Pere le Pape vn plein x. à cueillir par tout le Royaume de France, & en la Daulphiné à prédre sur le Clergié à payer comme dessus à deux termes: c'est à sçauoir le premier au iour S. Iean Baptiste, & le second au iour de Toussaints ensuiuant, dont ledit clergié fut assez mal cōtent: mais pourtant ne laissa pas iceluy à estre leué rigoureusement, & y auoit certains cōnus à le receuoir par la dessusdicte Eglise. En outre le dessusdit Comte de S. Pol Connestable, se partit de Paris la sepmaine peneuse, & s'en alla audit lieu de Vernon pour assembler & entretenir les gens (comme dit est dessus) & aussi pour les mettre en frontieres contre les aduersaires du Roy.

*Pour l'an mille cccc. & xij.*

*Comment les Ducs de Berry & d'Orleans & autres de leurs alliances enuoyerent deuers le Roy Henry leurs ambassadeurs: & ce que depuis en aduint.*

CHAP. LXXXVII.

**A**V commencement de cest an les Ducs de Berry, d'Orleans & de Bourbon, les Comtes de Vertus, d'Angoulesme, d'Alençon & d'Armignac & le sire d'Albreth soy disant Connestable de France, avec eux aucuns grans seigneurs de leurs alliances enuoyerent leurs ambassadeurs deuers le Roy d'Angleterre garnis de leurs seellez & instructiōs, affin d'avec le dessusdit Roy besongner selon la charge qu'ils auoient d'iceux: & avec aussi ses enfans & autres Princes du Royaume d'Angleterre. Mais ainsi qu'ils passoient parmy le païs du Maine pour aller en Bretagne, & de là audit païs d'Angleterre furent poursuiuiuz par le Baillif de Caen en Normandie: lequel à l'ayde d'aucunes communes qu'il assembla les rua ius, & en print vne partie avec toutes lesdictes seellez & instructions & autres besongnes qu'ils portoient: & les autres se sauuerent le mieux qu'ils peurēt. Apres laquelle destrouffe furent toutes icelles besongnes par iceluy Baillif enuoyées à Paris deuers le Roy & son grand conseil, closes & seellées en vn sac de cuir. Et pour icelles veoir & visiter le premier mercredy apres le iour de Pasques de cest an, le Roy estant en personne en son hostel de S. Pol & tenant son conseil, ouquel estoit le Roy de Cecille, les Ducs d'Aquitaine & de Bourgogne, les Comtes de Charrolois, de Neuers & de Mortaigne, messire Gilles de Bretagne, le Chancelier de France: c'est à sçauoir maistre Henry de Marle, les Euesques de Tournay, d'Amiens, de Constances & d'Auxerre, le Recteur de l'Vniuersité, le Preuost de Paris & plusieurs autres tant du conseil du Roy cōme des bourgeois & clerics de ladicte Vniuersité, fut proposé par le Chancelier du Duc d'Aquitaine: c'est à sçauoir le seigneur de d'Olhaing nagueres Aduocat en Parlement, & licencié en loix, cōme nagueres luy auoit esté baillé en garde par l'ordonnance du conseil du Roy vn sac de cuir: auquel estoient plusieurs lettres & papiers, qui auoient esté trouuez & prins par le Baillif de Caen



en la compagnie d'un cheualier chambellan du Duc de Bretagne, de Faulcon d'Encre, de frere Iacques Petit de l'ordre S. Augustin & autres ambassadeurs des seigneurs dessus nommez, lequel sac auoit (cōme dit est) esté enuoyé par ledit Bailif. Et là recita ledit d'Acquittaine cōmēt en iceluy auoit trouué quatre blācs seellez de iiij. seaulx & signez de iiij. signes manuels: C'est à sçauoir Berry, Orleans, Bourbon, & Allengon. Et en chacun blanc scellé estoient leurs noms escripts dessus leurs seaulx en marge, & n'y auoit autre chose escrit: & aussi auoit trouué plusieurs lettres closes de par le Duc de Berry adressans au Roy d'Angleterre, à la Roïne, & à leurs quatre fils, & pareillemēt au Duc de Bretagne, au Côte de Richemont & autres grans seigneurs d'Angleterre. Et si auoit plusieurs autres lettres esquelles n'auoit point de subscription qui estoient toutes de credence pour ledit Faulcon & frere Iacques Petit, adressans au Roy & à la Roïne: lesquelles furent là leutes publicquement, & par icelles nommoit iceluy Duc de Berry, le Roy d'Angleterre mon trefredoubté seigneur & nepueu: & la Roïne ma trefredoubtée & honorée dame, niepce & fille, & estoient signées de la propre main dudit Duc de Berry: & en celles de la Roïne auoit escrit deux lignes de sa main portans credence sur les deuātdits. En outre, là furent presens le Roy & ses Princes & tout le conseil monstrez les blancs seellez dessusdits, & les tint le Roy en sa main: & si auoit vn petit codicille par maniere de libelle cōtenāt vne seule feuille de papier, ouquel estoit l'instruction desdits ambassadeurs, & fut leu publicquement: & y estoit contenu comment ils reciteroient les propositions faictes par la Duchesse d'Orleans & ses enfans cōtre le Duc de Bourgongne, pour la mort du Duc d'Orleans. Reciterent aussi comment pour icelle mort ils auoient plusieurs fois sommé & requis le Roy de France à faire & auoir iustice de ladicte mort: laquelle ils n'auoient peu obtenir, pourtant que ledit Duc de Bourgongne auoit tellement seduit & enhorté le Roy & son conseil: disant cōment ledit Duc d'Orleans auoit esté, & estoit faulx & traistre contre le Roy & sa majesté: ce qui estoit faulx, & en auoit ledit Duc de Bourgongne seduit le peuple, & par especial celui de Paris: & cōment les dessus nommez vouloiēt deposer le Roy de sa couronne & destruire sa generation, ce qui estoit aussi faulx & à quoy n'auoiēt oncques pensé. Et si estoit ainsi que le Duc de Bourgongne auoit mis en indignation deuers le Roy Iean Duc de Bretagne, pour la cause qu'il auoit rōpu le voyage de Calais & plusieurs autres choses, que ledit Duc vouloit faire cōtre le Roy d'Angleterre. Et cōment le Duc de Bourgongne auoit par telle maniere seduit le peuple de Paris contre le Roy & le Duc d'Acquittaine son fils, que tout entierement ils estoient gouuernez par leurs mains, & estoient deuers eux en telle subiection qu'à peine osoient ils dire mot. Et aussi cōment ceux de Paris, sous vmbre d'une bulle donnée par Urbain Pape v. de ce nom, pour les grans cōpagnies qui estoient venues en France, les dessus nommez & tous leurs alliez contre raison auoient fait excōmunier: & cōment ils auoient contrainct l'official de Paris par grād force de faire proces contre eux, affin qu'ils feussent denoncez excōmuniez, aggrauiez & reaggrauiez & renforcez: & apres ce que les dessusdits ambassadeurs se gardassent bien d'eux descouurir à hōme d'Angleterre fils ne sentoient qu'il fut de la bende des dessus nommez. Et quand ils auroient publicquemēt dit au Roy d'Angleterre ce qui est dit dessus: si luy deissent qu'ils auoiēt à luy parler à part. C'est à sçauoir,

que



que ceux de Berry, Orleans, Bourbon, & Alençon, vouloient du tout en tout son bien & son honneur & eux allier avecques luy, luy ayder & conforter contre le Duc de Bourgogne & ses alliez, & aussi contre ceux de Galles & d'Ybernie: & si luy deissent outre qu'ou cas qu'ils ne pourroient venir à leur conclusion contre les Escoçois ce que si: & ou cas encores qu'ils ne pourroient obtenir ne faire leur volenté, ils feroient tât que la paix seroit faicte entre luy & le Roy de France. Et outre luy deissent, qu'ou cas qu'ils ne pourroient obtenir, que s'il y auoit aucunes terres sur la mer où il voulsissent faire aucunes demâdes où ils pretédit aucun droit, qu'ils feroient tât qu'ils seroient cõtens. Et luy deissent encores outre, comment par deffaute de iustice ils venoient deuers luy pour auoir raison de la mort du Duc d'Orleans. Et comment à Roy pour le nom qu'il porte luy appartient à faire & ayder iustice: & que ce seroit à luy & aux siens vn tresgrand bié & honneur perpetuel à le faire & bailler ayde: mesmement de tant noble sang comme estoit le Duc d'Orleans: & si luy deissent comment les dessus nommez le seruiroient de tout leur pouuoir, luy & ses enfans, & aussi les siés en temps aduenir: laquelle chose pourroient ils bien faire contre tous les plus puissans & les plus nobles de ce Royaume de France. En outre pour auoir ayde contre ledit Duc de Bourgogne, requissent lesdits ambassadeurs audit Roy d'Angleterre d'auoir ccc. lances & trois mille archiers, lesquels on payeroit pour quatre mois. En apres fut monstré par ledit Chancelier d'Acquitaine vn petit aduifement, lequel ledit frere Jacques Petit auoit fait sur le gouuernemēt de ce Royaume, contenant plusieurs articles, & fut leu publicquement: entre lesquels estoit, q̄ sur chacun arpēt fut imposée vne ayde qui seroit nommée fons de terre: & pareillement qu'on a greniers de sel en ce Royaume, on ait aussi greniers de bleds, & d'auoines au profit du Roy: en outre que toutes les maisons ruineuses & terres inutilles fussent reparées & cultiuées ou autremēt fussent forfaictes & acquises. En apres tout hōme qui ne seroit noble fut cōtrainct à ouurer & labourer, ou qu'il soit bouté hors du Royaume, & aussi qu'en ce Royaume n'ait qu'vn poix & mesure. Item que les Duchez de Luxembourg & de Lorraine feussent conquestées, & aussi les villes de Prouence & de Sauoye. Item que l'Vniuersité de Paris soit mise hors de Paris, & qu'on en fait vne nouvelle & pleine de preud'homme.

Item y auoit plusieurs roolles, lesquels ne furent pas leuz pource qu'ils ne seruoient de guerres. Et apres ce que ledit Chancelier d'Acquitaine eut recité ce que dit est, le Preuost des Marchans de Paris & les Escheuins feirent faire deux requestes au Roy par vn religieux de l'ordre de saint Benoit Docteur en Theologie. L'vne si fut qu'il plaist au Roy donner & octroyer à ladicte ville de Paris la tierce partie des aydes cueillies & leuées en ladicte ville, en la forme & maniere qu'ils auoient du temps du Roy Charles, dont Dieu ait l'ame, à conuertir & mettre seullement aux reparations de ladicte ville & de la riuie: & recita ledit Preuost des Marchans qu'il en estoit grand necessité, & que c'estoit le bien du Roy & de sa bonne ville, & qu'il estoit tresgrand necessité d'icelle reparer & fortifier: & mesmement que les deuantdits de Berry, d'Orleans, de Bourbon & d'Alençon l'auoient en haine: & recita outre comment la ville de Tournay est la ville de tout ce Royaume la mieux réparée & en bone ordonnance mise, pource que ceux de la ville à la reparer & fortifier y prennent



revenue : & que ce tous les ennemis de ce Royaume estoient deuant, ils ne luy feroient ja nul mal. L'autre requeste fut qu'il fut commandé au Chancelier de France, qu'il sceillast les lettres d'une office donnée ou à donner vacquant par vn Orleannois, sans ce qu'on y meist opposition, lesquelles on ne vouloit sceiller. Ausquelles d'eux requestes fut dit que le ieudy ensuiuant ils auroient responce. En oultre requierent lesdits Preuost & Escheuins audit Chancelier de France, qu'il monstrast au Roy les lettres qui estoient venues à la cognoissance du Duc d'Acquitaine, faisant mention comment lesdits de Berry, d'Orleans, de Bourbon, & d'Alençon vouloient faire vn nouuel Roy, & despointer le Roy & le Duc d'Acquitaine : lequel respondit pour le present, qu'il n'auoit fait pour le present relation sinon des lettres qui estoient audit sac : & qu'il estoit vray, qu'il auoit les lettres, & plusieurs autres, faisans mention de ce, & certiffia ledit Duc d'Acquitaine qu'il les auoit veuës, & dit ledit Chancelier d'Acquitaine au Roy publiquement, que le grand maistre d'hostel : c'est à sçauoir Guichart d'Aulphin cheualier auoit escript audit Duc de Bourgongne, comme les dessusdits nommez de Berry, d'Orleans, de Bourbon, & d'Alençon avec leurs autres alliez estoient n'agueres tous ensemble à Bourges la cité, & là auoient renouuellé leurs sermens, en concluant de destruire le Roy & le Duc d'Acquitaine, le Royaume de France & la bonne ville de Paris, où ils seroient destruiçts en ce faisant. Et lors le Roy de son propre mouuement moult fort plorant, dit : nous voyons bien leur mauuaitié, pourquoy nous vous prions & requerôs à vous tous qui estes de nostre sang, que vous nous vueillez ayder & conseiller contre eux : car il nous touche & à vous aussi, & à tout nostre Royaume, & pareillement en pria & requist à tous les autres là estans. Et adonc ledit Loys se leua, & se meist à genoux deuant le Roy & luy dit. Sire pour l'honneur & bien de vous & de vostre Royaume, vous supplie qu'il vous plaise ceste besongne diligemment solliciter, car il en est grand necessité. Et pareillement s'agenouillerent les Ducs d'Acquitaine & de Bourgongne & tous les autres seigneurs, & s'offrirent à seruir le Roy de toute leur puissance. Et apres toutes ces besongues ainsi dictes & proferées, & que le conseil fut finé, toutes les manieres dessusdictes furent publiées & diuulguées parmy Paris & à plusieurs baillées par escript dont moult de gens furent moult esmerueillez.

*Comment le Duc Loys en Bauiere fut des Parisiens debouté, & depuis ses gens destrouffez : du Cardinal de Cambray & de la deffence du Roy d'Angleterre.*

CHAP. LXXXVIII.

**E**N ces mesmes iours Loys Duc en Bauiere frere de la Royne de France estant à Paris, fut soupçonné par les Parisiens d'auoir aucunement dit aucunes parolles en secret au Roy & au Duc d'Acquitaine, en la faueur des Ducs de Berry & d'Orleans : & pource, doutans que ce ne leur portast aucun preiudice ou contraire, sçachans qu'iceux les auoient en grād haine, s'assemblerent vn certain iour en grand nombre : & de fait dirent audit Duc de Bauiere qu'il estoit de la partie des dessusdits Ducs, & qu'ils n'estoient pas bien contens de luy : disant oultre, que puis qu'il vouloit estre de leur alliance, s'en allast avec eux. Ausquels fut respondu par iceluy Duc Loys, & en luy excusant qu'il n'auoit volenté de tenir autre party que celui du Roy, si demoura la besongne pour le present en cest estat, mais bien apperceut qu'ils n'estoient pas bien contens



contens de luy : pource, doutant qu'il n'eust aucun inconuenient ou desplaisir, s'en alla à priuée mesgnie ou chastel de Marcouilly: mais auant son partement, feit charger audit lieu de Paris, vn chariot de ses meilleurs bagues, avec sa vaisselle, & autres ioyaux : lesquels en la compagnie de trois gentils-hommes de son hostel, dont l'un estoit aagé de quinze à seize ans bien noble homme de son pays d'Allemagne & aucuns varlets, feit partir pour le mener en la ville de Valenciennes: auquel lieu il auoit intention d'aller brief ensuiuant: mais ainsi qu'iceux faisoient leur chemin pour aller où il leur auoit esté ordonné, aduint qu'aucuns tenans le party de Bourgongne meuz & plains, non seulement de couuoitise, mais avec ce de grand cruauté: c'est à sçauoir le Baillif de Foquesolle, Iacotin son frere, Iaqués de Bracquencourt, & aucuns autres en leur compagnie, dont la plus grand partie des marches de Picardie, sçachans le partemēt dudit chariot, & qu'il estoit ainsiourny de biens : & par la scdition de messire Morlet de Betencourt poursuivirent les dessusdits, & les rattaingnirēt entre la riuere d'Oyze & celle de Somme. Si les enuahirent soudainemēt & sans y trouuer aucune deffence, en meirent à mort la plus grand partie, & apres prindrent tous les biens dessusdits : & le ieune escuyer dont dessus est faicte mention, & s'en vindrent à tout loger en vne Abbaye de Nonnains nommée Premy aupres de la cité de Cambray. Auquel lieu, quand ils y eurent esté deux ou trois iours prindrēt iceluy ieune gentil-homme par nuict, & le menerent hors de ladicte Abbaye & tresinhumainement l'occirent, & le meirent en vn petit fossé plain d'eau. Et apres ce qu'il fut mort (comme dit est) luy percerent le corps d'un pieu de boys pour l'attacher au fons dudit fossé. Et en cest estat fut trouué aucuns briefs iours ensuiuant par les varlets & familiers d'icelle Abbaye. Et de là fut porté & mis en terre Sainte ou pourpris d'icelle Eglise: & depuis y fut fait vn tresnoble seruice pour le salut de son ame à la priere & despence d'aucuns de ses amis, qui en feirent moult grans clameurs & lamentations quand ils en furent aduertis. En outre, les dessusdits seruiteurs feirent fermer en chaines grād partie des biens dessusdits & les enuoyerent en l'hostel d'un bourgeois dudit Cambray, auquel ils auoient accointance, & se partirent du pays de Cambresis pour aller en autres lieux, où ils auoient affaire. Laquelle besongne venue à la cognoissance dudit Loys de Bauiere, fut tant dolent & desplaisant que plus ne pouoit, & par especial de la mort du dessusdit ieune fils & de ses autres gens, & aussi de la perte de ses biens : si en feit faire grand complainte enuers le Roy & le Duc d'Acquitaine, & par especial au Duc de Bourgongne, auquel les dessusdits se disoient. Lequel Duc de Bourgongne luy promist de luy faire restituer, & punir les dessusdits facteurs: & aucun peu de temps ensuiuant, se partit iceluy Duc de Marcouilly, & fut conduit par l'ordonnance du Duc de Bourgongne, du Vidame d'Amiens tresbien accompagné iusques en la ville de Valenciennes, où il demoura grand espace de temps: & apres environ six semaines fut aduerty comme seldits biens estoient en la cité de Cambray, si en escriuit deuers la Loy d'icelle ville, & aussi en feit escrire par le Duc Guillaume Comte de Hainault, auquel il estoit parent. Et tant y fut besongné que finalement iceux biens : c'est à sçauoir ceux qui furent trouuez dedans ladicte cité de Cambray luy furent renduz & restituez: de laquelle cité de Cambray estoit lors Euesque maistre Pierre d'Ailly excellent Docteur en Theologie, qui adoncques



fut fait Cardinal par le Pape Iean xxiiij. & se nommoit le Cardinal de Cambray. Ouquel Euesché succeda Iean fils du seigneur de Liquerque maistre aux ars, qui pource temps estoit en court de Romme. En outre, en ces propres iours, Henry Roy d'Angleterre feit crier à son de trompe en la ville de Calais & autres lieux es frontieres de Boulenois à luy subiects, que nul de quelque estat qu'il fut de son obeissance n'allast au Royaume de France au mandement d'une partie ne d'autre des deux discordans, pour les seruir en armes ne autrement sur confiscation de corps & de biens.

*Comment le Roy Loys se partit de Paris : du siege de Danfront : de la bataille saint Remy ou Plain, & du siege de Bellame, & autres besongnes faictes en cest an.*

CHAP. LXXXIX.

**L**E mardy vingtiesme iour d'Auril de cest an, se partit de Paris par l'ordonnance du Roy & de son grand conseil, le Roy de Cecille avec tous ses gens d'armes en moult bel arroy : & l'enuoya dehors la ville, le Duc de Bourgogne, & le Preuost de Paris, avecques eux plusieurs autres grans seigneurs. Si s'en alla à Angiers & au pays du Maine à luy appartenant, pour iceux deffendre à l'encontre des Comtes d'Alençon & de Richemont, qui moult les trauailloient & faisoient forte guerre. Et là luy venu manda tous ses subiects tant cheualiers que escuyers comme autres qui estoient accoustumez d'eux armer & les meit en garnison en ses villes & forteresses de sesdits pays sur les frontieres contre ses aduersaires. Et adonc messire Anthoine de Craon, le Borne de la Heuse cheualier, & aucuns autres capitaines furent enuoyez de par le Roy au pays d'Alençon, pour le remettre en l'obeissance du Roy. Si prindrent la ville de Danfront : mais le chastel moult fort & bien fourny de gens de guerre & d'autres garnisons ne le peurent auoir, mais se tindrent contre eux en faisant guerre en ce que possible leur estoit : & avec ce enuoyerent deuers ledit Comte d'Alençon leur seigneur, luy requerre bien instamment qu'il les vouldist secourir : lequel Comte de la prinse de ladicte ville fut fort troublé, & manda par vn sien hault à ceux de dedans qu'ils les iroient combattre en assez brief terme se là ils vouloient attendre. Apres lequel mandement iceux capitaines dessusdits enuoyerent tantost deuers le Roy de France luy signifier ces nouuelles, luy requerant qu'il leur enuoyast ayde : lequel Roy manda tantost au Connestable & au Marechal qui estoient à Vernon à tout grand compagnie de gens d'armes, qu'ils allassent à Danfront : lequel mandement ils feirent & y allerent, & pareillement y enuoyerent le Roy de Cecile à tresgrand compagnie de gens d'armes. Mais au iour qui auoit esté assigné de combattre, ledit Comte d'Alençon n'y alla n'enuoya. Et apres que ledit Connestable & les autres capitaines eurent entretenu ladicte iournée, voyans que leurs aduersaires pas ne venoient, feirent faire & edifier deuant le chastel vn fort boulleuert : dedans lequel ils laisserent grand garnison, pour tenir frontiere & resister contre iceluy, & de là se departirent : si s'en alla ledit Connestable mettre le siege deuant S. Remy au Plain, & enuoya ledit messire Anthoine de Craon bien accompagné à Vernon querir les bombardes, canons & autres engins de guerre, pour amener au lieu de saint Remy. Et estoient lors en la compagnie d'iceluy Connestable Iean de Luxembourg son nepueu, messire Philip-  
pes



pes de Harcourt, & son frere messire Iaques, le seigneur de Beaufault, le Vidame d'Amiens, le seigneur d'Offemont, le seigneur de Cauny, le Borgne de la Heuse, Roux de Neelle, Raulquin fils audit Vidame d'Amiens, le seigneur de Louroy, le Galois de Renty, messire Bort Queret, le seigneur de Herbainnes, le seigneur de Seins & autres plusieurs notables cheualiers, & escuyers iusques au nombre de douze cens bachinets & grand nombre d'archiers : lesquels tous ensemble se logerent en la ville de saint Remy, & à l'enuiron du chastel, qui estoit assez fort, & bien garny de bonnes gens d'armes : mais ils les sommerent d'eux rendre en l'obeissance du Roy, de laquelle chose ils furent reffusans : & pource furent dresséz à l'encontre dudit Chastel aucuns engins & de fait fut fort dommagé par iceux : durant lequel temps le sire de Gaucourt, messire Iean de Dreues, messire Genes de Guarenchieres, Guillaume Batillier, le seigneur d'Argiellieres, Iean de Falloise & autres capitaines tenans le party du Duc d'Orleans & du Comte d'Alençon se meirent ensemble avec tresgrand nombre de combattans sur intention de venir combattre ledit Conestable & le prendre secrettement en son logis au point du iour, deuant qu'il en fut aduerty. Et pour icelles entreprinse mener à fin se meirent à chemin le dixiesme iour de May & cheuaucherent toute la nuict, & vindrent en conclusion assez pres de leurs aduersaires, lesquels estoient aucunement de iour & de nuict sur leurs gardes & auoient leurs coureurs & espies sur le pays. Entre lesquels y estoient à ceste heure Morlet de Mons, Galien Bastard d'Auxi & aucuns autres, lesquels furent prins desdits Orleannois : mais les aucuns eschapperent, & vindrent tant que cheuaux les pouoient porter iusques à leur ost, criant à l'arme, disant à haulte voix, qu'ils auoient veu les Orleannois venans tous ordonnez, en bataille vers les logis, & que desia auoient prins ledit Morelet de Mons, le Bastard d'Auxi & aucuns autres. Lequel cry ouï par le Conestable & aucuns autres ses capitaines feirent sans delay armer leurs gens : & pour sçauoir la venue, furent enuoyez le seigneur de saint Legier, & le seigneur de Drucat cheualiers tresexpers en guerre pour aduiser & rapporter la verité de ceste besongne. Lesquels n'allèrent pas grandement loing quand ils veirent venir lesdits aduersaires, ainsi & par la maniere que par auant auoit esté rapporté. Si s'en retournerent tantost au logis, & dirent audit Conestable ce qu'ils auoient veu : lequel faisant desployer sa baniere & sonner ses trompettes issit hors de son logis, avecques vne partie de ses gens : & se meit en bataille pour receuoir ses ennemis & fait haster le surplus : & là estant monté sur vn cheual allant de lieu en autre meit ses gens en ordonnance, & les enhorta benignement à bien & hardiment combattre les ennemis du Roy & de la couronne de France. Et adonc par le conseil des plus saiges de sa compagnie, furent mis au derriere de sa bataille les chars & charrettes & les cheuaux & varlets qui les gardoient. Et à chacun costé d'icelle bataille furent mis empres les hommes d'armes les archiers & arbalestriers à maniere de deux aelles tant & si loing qu'ils se pouoient estandre. Apres laquelle ordonnance ainsi faicte & qu'ils veoient leurs ennemis venir vers eux, furent faits nouveaux cheualiers tant par ledit Conestable comme par aucuns autres là estans : est à sçauoir Iean de Luxembourg, Iean de Beaufault, Raullequin fils au Vidame d'Amiens, Allard de Herbainnes, le Brun de Sains, Raux de Neelle, Raillars de Fransseurs, Regnault d'Azincourt & plusieurs autres. Et adonc ledit Conesta-



ble se meit à pied au plus pres de sa banniere: & incontinent lesdits Orleannois, lesquels pource temps on nommoit Armignacs, vindrent vne partie courans à grand force tout à cheual dedans la ville, cuidant soudainement enuahir leursdits aduersaires, deuant qu'ils en fussent aduertis. Et quand ils apperceurent que ils estoient tous ensemble, se r'assemblerent ensemble & en faisant grand bruit & grand cry, se bouterent tous à cheual dedans les archiers & arbalestriers & en tuerent de premiere venue iusques à douze ou environ, & les autres se meirent outre vn fossé assez avantageux: & commencerent à tirer tant de leurs arcs comme arbalestres assez continuellement, & tellement se maintindrent qu'ils greuerent fort iceux Orleannois: & les meirent en desroy par force de leur traict, lequel les cheuaux ne pouoient souffrir & ruerent ius plusieurs de leurs maistres: & adonc le Connestable fait marcher sa bataille & aller auant pour assembler à eux & leur escria. Sa ribaudaille me vecy que vous querez, venez à moy. Lesquels non pouans resister principalement pour le desroy de leurs cheuaux qui estoient si fort blecez qu'ils ne les pouoient conduire, commencerent tantost à tourner le dos & eux mettre à fuitte. Et lors les gens d'iceluy Connestable tant hommes d'armes comme archiers en esleuant grans criz, commencerent de toutes pars à frapper en eux & les naurer & occire cruellement: & par especial les dessusdits archiers qui estoient legerement armez les poursuiurent vigoureusement, & en feirent mourir plusieurs à grand martyre. Et là aupres du lieu de ceste assemblée auoit vn viuier, dedans lequel plusieurs des cheuaux dessusdits cheurent à tout leurs maistres. Et lors de rechef il y eut vn vaillant homme d'armes Breton, qui se ferit dedans lesdits archiers cuidant & esperant que ses compagnons le suyussent: mais tantost il fut tiré ius de son cheual, & mis à mort trescruellement. Et adonc comme dit iceluy Connestable veant ses ennemis estre tournez à desconfiture, fait incontinent monter plusieurs de ses gens à cheual & les poursuiuir vigoureusement. En laquelle poursuite en furent morts & prins grand nombre & les autres se sauuerent à Allençon & autres lieux & forteresses de leurs obeissance. En outre iceux retournans de la chasse, remenerent bien quatre vingts prisonniers de leurs aduersaires deuers ledit Connestable. Lequel ils trouuerēt avec ses cheualiers, où ils faisoient grand ioye pour la victoire qu'ils auoient eue contre leurs ennemis. Entre lesquels prisonniers estoient le seigneur d'Anieres cheualier, messire Iaunet de Guarochieres fils du seigneur de Croisy, lequel estoit à ceste besongne avec ledit Connestable. Et quand il veit son fils qui estoit venu contre luy, fut esmeu de si grād ire que si on ne l'eust tenu il eust tué son fils dessusdit. Or est vray que ceux qui estoient venus à ladicte iournée contre ledit Connestable, auoient amené grand nombre de payfans sus intention qu'ils deussent ruer ius leurs aduersaires: mais le contraire leur aduint: car ils furent morts sur la place bien quatre cēs ou environ, & si en y eut de prins de six à huit vingts. Et brief apres se retrahit le Connestable à tout son ost dedans la ville de saint Remy ou Plain, dont il festoit deslogé le matin: duquel saint Remy ceste iournée & besongne porte le nom à tousiours. Et là fait preparer ses gens affin d'affaillir le chastel, mais ceux qui estoient dedans veans leur secours mis à desconfiture se rendirent incontinent au Connestable au nom du Roy, lequel ainsi les receut. Et les gens du Roy de Cecille qui estoient environ huit cens bacinets d'hommes d'armes




d'armes à l'esslite en la Comté d'Alençon, tantost qu'ils sceurent les nouuelles que lesdits Orleannois estoient ja assemblez pour courir sus au siege saint Remy, ils constituerent & ordonnerent quatre vingts bacinets & les enuoyerent deuers ledit Connestable audit lieu de saint Remy, pour luy faire secours & ayde, lesquels y furent dedans quatre heures apres. Et pour la grand desconfiture, & reddition dudit chastel dont ils ne scauoient riens, eurent moult grand ioye & grandement remercierent ledit Connestable, & rendirent graces à Dieu & de la fortune que Dieu luy auoit donnée : & puis se partirent tous dudit lieu delaisant garnison audit chastel & s'en retournerent lesdits de Cecille deuers leur Roy & seigneur. Et le Connestable s'en alla à Bellesme avec ses gens : c'est à scauoir le Marechal de France & messire Anthoine de Craon : lesquels là venus, tantost apres le Roy de Cecille & tous ses gens d'armes vindrent hastiuement audit lieu de Bellesme, & en sa compagnie plusieurs archiers & arbalestriers & autres instrumens & habillemens qui appartiennent à guerre. Lesquels ils assirent & ordonnerent leur siege, c'est à scauoir le Roy de Cecille & ses gens occuperent la moytié de leur chastel, le Connestable & Marechal occuperent l'autre partie. Et moult fort le commencerent à assaillir & moult fort enuahir incessamment, & tant y continuerent, que les assiegeans non pouant resister rendirent eux & ledit chastel au Roy par condition. Et puis meit garnison en la ville & chastel de par le Roy, le Connestable se partit & s'en alla luy & ses gens vers Paris, & le Marechal s'en retourna vers Dreux : & le Roy Loys avec ses gens s'en alla deuers le Mans, pour garder ses terres de son païs d'Anjou : lequel Connestable venu deuers le Roy le Duc d'Acquitaine & le Duc de Bourgongne audit lieu de Paris fut grandement par iceux festoyé & honoré, tant pour la victoire qu'il auoit eüe audit lieu de saint Remy, comme pour autres besongnes qu'il auoit acheuez honnorablement ou voyage dessusdit. Et luy fut presentement assignée grand somme de pecune pour payer ses gens d'armes, qui seruy l'auoient ou voyage dessusdit. Et avec ce luy furent donnez grans dons tant par le Roy comme par le Duc de Bourgongne. Durant lequel temps Amé de Viry & le Bastard de Sauoye menoient forte guerre au Duc de Bourbon ou païs de Beaujeulois : & enuiron la My-Auril eurent grand rencontre assez pres de Ville-Franche, & ruerent ius deux capitaines dudit Duc de Bourbon : c'est à scauoir Vignier de Reffort & Bernardon de Seres, avec eux huiet vingts hommes d'armes tant cheualiers comme escuyers : & peu en eschappa, qui ne fussent prins ou morts. Et d'autre partie le seigneur de Heilly & Enguerran de Bournouuille mettoient en grand subiection le païs de Poictou, & destrousserent en ces propres iours deux cens combattans des gens du Duc de Berry assez pres de la ville de Montfaucon. En outre le grād maistre d'hostel du Roy : c'est à scauoir messire Guichard Daulphin, le maistre des arbalestriers de France, messire Iean de Challon à tout dix mille cheuaux, alerent de par le Roy mettre siege deuāt la ville de saint Fourgeau en Niuernois, appartenans à Iean fils au Duc de Bar : & eux là estans attendoient de iour en iour à estre combattus par leurs aduersaires. Neantmoins apres qu'ils eurent là esté enuiron douze iours & perdu plusieurs de leurs gens morts & naurez, la ville se rendit en leur obeissance, & y fut mise garnison de par le Roy. Et pareillement le seigneur de saint George & autres nobles du païs de Bourgongne estoient



pour lors en Gascongne, & faisoient guerre au Comte d'Armignac & à ses subiects. Messire Elyon de Jacques-ville se tenoit vers Estampes, & conqueroit chacun iour sur les Orleannois, lesquels pource temps avec tous ceux qui tenoient leur party estoient moult infortunez : car de tous costez on leur faisoit guerre. Et pour y remedier & auoir alliance contre tous leurs aduersaires, enuoyerent les seigneurs dont dessus est faicte mention, leurs ambassadeurs solempnels deuers le Roy Henry d'Angleterre moyennant & ses enfans, affin d'auoir secours de gés de guerre. Lesquels ambassadeurs venus deuers le Roy d'Angleterre moyennant les scelez & lettres de credence qu'ils auoient porté des seigneurs de France qui là les auoient enuoyez, & traicterent tant avec iceluy Roy qu'il fut content d'enuoyer ausdits seigneurs huiet mille combattans, desquels seroit le chef son second fils c'est à sçauoir Thomas de Clarence. Et pour de ce auoir seureté, bailla aux dessusdits ambassadeurs ses lettres seellées de son grand seel: lesquelles ils apporterent en France deuers lesdits de Berry, d'Orleans, de Bourbon, & de Alençon & autres qu'ils trouuerent à leur retour à Bourges en Berry : & furent bien ioyeux quand ils veirent le seel dudit Roy d'Angleterre, car chacun iour ils attendoient d'en auoir affaire, par ce qu'ils estoient tous acertenez, que le Duc de Bourgongne amenoit le Roy de France avec toute sa puissance contre eux pour les conquerre & subiuguer.

*Comment Charles Roy de France à grand puissance se partit de Paris & autres Princes pour aller à Bourges : & des lettres du Roy d'Angleterre & autres matieres.*

CHAP. XC.

 R est verité qu'en ce temps Charles Roy de France pour mettre ses ennemis en obeissance par la determination de son grand conseil, manda par tout son Royaume gens d'armes & gens de traict, à venir deuers luy vers Paris à Melun : & avec ce fut mandé tresgrand nombre de Charroy & charrettes. Et pareillement les Ducs d'Acquitaine & de Bourgongne feirent tresgrand mandement : & quand tout fut prest, & que le Roy se deuoit partir pour aller en ce voyage, les Parisiens en tresgrand quantité, avec ceux de l'Vniuersité de Paris allerent deuers luy en son hostel de saint Pol. Et present son conseil luy requirent instamment qu'il ne fait nul traicté ne accord avecques ses aduersaires, sans ce qu'ils y feussent expressement comprins & denommez. Et remonstrerent comment sesdits aduersaires les auoient en grand haine, par ce que de tout temps ils auoient tenu son party & le seruy contre iceux. Laquelle requeste leur fut accordée par le Roy en son conseil : lequel Roy issit de Paris en noble arroy le iedy cinquiesme iour de May de cest an, & s'en alla au giste au Bois-de-Vincenne où estoit la Roynes sa compaignie : & de là icelle avec luy par Corbueil alla à Melun où il seiourna par aucuns iours en attendant ses gens. Et le dimenche ensuiuant partirent dudit lieu de Paris les Ducs d'Acquitaine & de Bourgongne, & s'en allerent à Melun deuers le Roy. Auquel lieu, à l'enuiron venoient gens en grand multitude de plusieurs parties du Royaume de France. Et le samedy ensuiuant xiiij. iour dudit mois de May se partit le Roy, de Melun, en sa compaignie les Ducs d'Acquitaine, de Bourgongne & de Bar : les Comtes de Mortaigne, & de Neuers avec plusieurs autres grans seigneurs cheualiers



ualiers & gentils-hommes : & auoit conclud avec son grand conseil , de iamais retourner de son entreprinse iusques à tant qu'il auroit mis en son obeissance les Ducs de Berry, d'Orleans & de Bourbon & tous leurs alliez . Et s'en allerent à Moret en Gastinois & de là à Monstriauc où fault-Yonne . Auquel lieu de Monstriauc le Roy fut blecé en la iambe de la reiecture d'un cheual, & de là alla à Sens en Bourgongne où il seiourna par six iours pour la cause de ladicte bleffeur : & tousiours estoient la Roynie & la Duchesse de Bourgongne en sa compagnie. Lesquelles receu le congé de leurs seigneurs, retournerent au Bois-de-Vincenne & le Comte de Charrolois seul fils du Duc de Bourgongne par l'ordonnance de son pere s'en alla demourer à Gand . Et brief ensuiuant, ladicte Roynie s'en alla à Melun & tint son estat. Durant lequel temps, les Anglois de la frontiere de Boulenois prindrent d'emblée la forteresse de Banelenghehen , située entre Ardre & Calais , laquelle appartenoit au seigneur de Dixcunde, en heritage, nonobstant que pour lors y auoit trefues scellées entre les deux Roys. Et fut commune renommée que le capitaine d'icelle nommé Iean d'Estienbecque le vendit , & en receut desdits Anglois certaine somme d'argent . Pour laquelle prinse quand le lendemain les nouvelles en furent esbandues par le païs , en fut le peuple tenant la partie des François fort troublé: mais ils ne le peurent auoir autre & leur conuint souffrir. Si demoura ledit capitaine & sa femme paisiblement avec iceux Anglois: & par ainsi fut assés auéré , que la prinse dessusdicte auoit esté par son consentement: car avec ce aucuns souldoyers qu'il auoit avec luy furent detenus prisonniers & mis à finance. En outre le Roy Henry d'Angleterre de l'affinité & alliance de mariage qu'il auoit voulu pour son aîné avec la fille du Duc de Bourgongne, fut pource temps du tout retourné par le moyen des alliances, dont dessus est faicte mention , qu'il auoit faictes avec ses aduersaires. Et aux Gantois , à ceux de Bruges, d'Ippre & du Franc enuoya lettres en Frâce par un sien Herault, desquelles la teneur s'ensuit . Henry par la grace de Dieu Roy d'Angleterre & de France seigneur d'Ybernie. A honnorez & saiges seigneurs bourgeois, Escheuins & aduouez des villes de Gand , Bruges, d'Ippre & du territoire du Franc. Noz treschiers & especiaux amis, Salut & dilection. Treschiers & honnorez seigneurs & amis il est venu à nostre cognoissance par relation creable, comment sous vmbre de nostre aduersaire de France le Duc de Bourgongne Comte de Flandres, prend & veult prendre en brief son chemin vers nostre païs d'Aquitaine pour iceluy destruire & gaster & noz subiects. Et par especial noz biés chers & amez cousins les Ducs de Berry, d'Orleans, de Bourbon, les Comtes d'Alençon, d'Armignac, le seigneur d'Albreth. Pourquoi se vostre seigneur veult perseverer en son enuieux & mauuais propos, vous vous vueillez par le porteur de cestes certifier par voz lettres le plus tost que vous pourrez , se ceux du païs de Flandres veullent pour leur partie tenir les trefues entre nous & eux dernièrement eües sans vous assister au mauuais propos de vostre seigneur contre nous. Entendans honnorez seigneurs & treschiers amis , qu'en ce cas que vous & les conuenues de Flandres les voudroient tenir & garder au prouffit du païs de Flâdres, veullent pour leur partie nous tenir les trefues . Nous entendons & auons proposé de faire pareillement pour nostre partie . Treschiers honnorez amis le saint Esprit vous ayt en sa garde : donné sous nostre priué scel en nostre Palais



de Vastemouftier, le seiziesme iour de May le treiziesme an de nostre regne. Sur lesquelles lettres lesdits Flamens respondirent & dirent au porteur, que les trefues desquelles s'esdictes lettres font mention ne les vueillent nullement enfreindre: & qu'au Roy de France leur souuerain seigneur, le Duc de Bourgongne Côte de Flandres seruiront & assisteront, comme autresfois ils ont fait selon leur pouoir: lesquelles lettres, tantost apres enuoyerent deuers le Roy & ledit Duc de Bourgongne, lesquels estoient encores en la ville de Sens en Bourgongne. Esquels iours le Duc de Berry par le cōseil du Comte d'Armignac feit forger monnoye du coing du Roy en escripture & en armes dont le Roy & son conseil furent moult desplaisans en la ville de Bourges pour payer les souldoyers: c'est à sçauoir blancs, doubles & escus d'or assez semblables à la monnoye du coing du Roy en escripture & en armes, dont le Roy & son conseil furent desplaisans.

*Comment la ville de Veruins fut prinse de Clugnet de Brabant, & depuis reconquise.  
Et de la prinse du Chastel de Gersies par messire Symon de Clermont.*

## CHAP. XCI.

**U**Tem en ces propres iours la ville de Veruins qui estoit moult riche & forte, fut prinse par deception de Clugnet de Brabant, de Thomas de Lersies le seigneur de Boquiaux cheualiers, & aucuns autres gentils-hommes iusques au nombre de six cens combattans ou enuiron, de diuerses nations qui estoient de la partie des Orleannois. Et dit on, que ce fut par vn boucher & à son instance qui auoit esté banny de ladicte ville par ses demerites, & s'estoit mis en la compagnie dudit Clugnet: duquel boucher sa femme auec plusieurs de ses enfans demouroit en ladicte ville, lesquels sur le quoy, & serain de la nuict s'estoient mucez empres vne porte: & quand le iour fut essargy enuiron soleil leuant les guectes & gardes de nuict sur les murs se partirent, & laisserent leurs gardes, & que la porte fut ouuerte par celuy qui auoit par nuict gardé les clefs & le pont auallé, ceux qui estoient mucez en certains lieux auant que les gardes des portes fussent venues entrèrent dedans, & commencerent à enuahir ceux de la ville qui riens n'y pensoient ne n'y sçauoient, & feirent sonner leurs trompettes en criant à haulte voix, viue le Duc d'Orleans: toutesfois il y eut peu de gens de la ville prins. Mais ils furent tous desrobez & puis trois iours passez, tout l'or & l'argent tant en vaisselle comme monnoye, tant de l'hostel du seigneur de Veruins cheualier qui pour lors estoit avec le Roy, où en la voye comme des maisons & hostels des bourgeois & habitans de ladicte ville, iusques à la valleur de moult de milliers de fleurins par ledit Clugnet du gré & consentement de ses compagnons fut tout porté en Ardenne, affin que ceux du païs & des villes de sa partie & qui estoient en son ayde fussent payez, & aussi ceux qu'il ameneroit là. Et tantost tous les voyfins d'autour furent moult esbahis de peur quand ils sceurent la voix & le fait. Pource vindrent les communes d'autour tant des bonnes villes comme du païs d'environ, & les assiegerent & se meirent en peine de reprendre la ville. La vint aussi le Baillif de Vermandois nommé le Brun de Bains cheualier, le seigneur de Chin & plusieurs autres cheualiers & escuyers bourgeois & autres avec luy iusques au nombre de quatre cens bacinets & six  
ou



ou huit mille à pied tous de gens armez puissamment. Ouquel siege le seigneur de la ville, qui estoit de grand noblesse & moult expert cheualier, tantost qu'il ouyt les nouuelles vint : & ainsi furent ceux de la ville, & toute la ciruite de dehors, qui par grand force & puissance les commencerent à guerroyer & les assiegez, ordonnerent leur deffence sur les murs d'arcs & de sagettes & d'autre traict, en eux monstrant, & faisant bonne guerre & bonne deffence. Et là en ladicte ville en cest estat, furent vingt & trois iours : & tant que le sixiesme iour du mois de Iuing, le sire de Boquiaux, Thomas de Lersies, le fils dudit seigneur de Selebes cheualiers, le Bastard d'Esne & ceux qui estoient avec eux, considerant qu'ils croissent de iour en iour, & aussi le rompement des murs, des tours & des maisons, doubans qu'ils ne fussent prins & tuez de leurs ennemis, ce iour eurent conseil ensemble, où ils se pourroient sauuer, & monstrerent grand apparence de resister & deffendre pour mieux celer leur intention : lesquels à l'heure que ceux de dehors estoient en leurs tentes & paillons, & qu'ils seioient au disner, & qu'ils auoient veu leur guette deuant vne porte, vindrent lesdits assiegez tous en armes ainsi qu'on auoit accoustumé, & monterent sur leurs cheuaux & feirent ouurir les portes. Et tous, excepté trois qui dorment ou qui furent trop negligens, saillirent hastiuement hors de la porte en frappant leurs cheuaux trespasement des esperons, & à course de cheuaux se bouterent au bois le plus tost qu'ils peurent : ceux qui tenoient le siege veans ce, furent tous esmerueillez, bouterent tantost arriere leurs tables, monterent à cheual & coururent apres eux & les suiuirent à grand effort, tant qu'ils en prindrent iusques à quarante ou enuiron : & les aucuns se sauuerent par force de fuyr, & les autres à tout leurs prisonniers retournerent, & puis entrerent en la ville où ils trouuerent les trois Orleannois dessusdits avec aucuns autres cheuifs : lesquels par le commandement du Baillif de Vermendois furent boutez en prison. Et apres ce qu'on eut ouye leur confession, furent par la sentence dudit Baillif decappitez : & de là apres se partit iceluy Baillif, & s'en alla à Laon, où il mena les autres prisonniers Orleannois bien liez pour les decoller là. Et le seigneur de Veruins demoura en sa ville & à son pouoir la fait reffaire, le seigneur de Chin & les autres s'en allerent chacun en son lieu. Et apres aucuns briefs iours ensuiuans fut prins le chastel de Gersies, qui estoit moult fort des gens dudit Clugnet de Brabant. Est à sçauoir de messire Symon de Clermont cheualier, vn capitaine nommé Millet d'Autre, & aucuns autres, & le prindrent d'emblée à vn matin. Mais tantost ledit Baillif de Vermendois, & avec luy les seigneurs dessusdits & grand nombre de commune, le retournerent par force d'assault. Si furent prins les dessusdits Symon Millet d'Autre & leurs gens, & menez à Laon où ils furent tous decapitez : & apres fut mise garnison dedans ledit chastel de par le Roy pour le garder.

*Comment le Roy de France ouyt certaines nouuelles que ses aduersaires estoient alliez avec le Roy d'Angleterre, & du Connestable qui alla en Boulenois.*

CHAP. XCII.

Aa





En ces mesmes iours Charles Roy de France estant encores avec ses Princes à Sens en Bourgogne, ouÿt certaines nouuelles, que ses aduersaires festoient alliez avec le Roy d'Angleterre: c'est à sçauoir, Berry, Orleans & Bourbon & leurs autres seigneurs de leur partie: & que ledit Roy d'Angleterre, si vouloit enuoyer aucuns de ses gens en France à tout vne grosse armée en leur ayde, pour degaster son royaume: & que desia estoient issus de son royaume de Calais & d'autres forteresses, qui sont es frontieres de Boulenois: & commencerent à courir à l'enuiron en amenant proyes & prisonniers, & par especial sur la mer, en la ville de Berq bouterent les feux, en enfraignant les trefues qui estoient entre luy & le Roy d'Angleterre. Et pour y obuier manda hastiuement au Comte Vvaleran de saint Pol son Connestable, que à tout ses gens & les nobles de Picardie allast sur lesdictes frontieres, & meit par tout garnison de gens d'armes, & de viures pour contrestre aux courses & entreprises d'iceux Anglois, & que de ce il fait bonne diligence. Car le Duc de Bourgogne auoit lors amené avecques luy tous les plus ieunes, & plus cheualereux qu'il auoit peu trouuer, ou peu s'en failloit. Par especial du paÿs de Boulenois, de Ternois, Ponthieu & d'Artois. Et auoit laissé les anciens foibles, & ceux qui plus ne se pouoient armer. Or est vray, que ledit Connestable, quand il ouÿt les nouuelles des maux que faisoient lesdits Anglois plus par son gré, que par contrainte & mandement du Roy. Toutes autres choses mises derriere, se partit & vint à Paris tantost, & bien hastiuement avecques luy le Borgne de la Heuse & aucuns autres Cheualiers: lesquels il lascia par la volenté de ceux de Paris. Affin d'aller mener guerre vers Dreux, & puis s'en alla en Picardie & à saint Pol veoir sa femme: & de là print son chemin à S. Omer, & puis à Boulongne fournissant & visitant toutes les frontieres: & tantost apres, fut toute la terre & frötieres desdits Anglois esmeute, & plaine de rumeur, & tant qu'ils se retrahirēt toutes leurs cornes abaissées: mais dedans brief temps recommencerent. Et quand le Connestable veit qu'ils ne s'abstenoient de faire guerre, il eut ce conseil avec aucuns anciens cheualiers de ses gens & autres: c'est à sçauoir le sire d'Auffemont, le sire de Cauny, le sire de Louroy, messire Philippe de Harcourt & plusieurs autres. Apres lequel conseil, assembla deuers luy moult de gens d'armes, iusques au nombre de mille cinq cens: lesquels sous la conduicte du sire de Louroy & vn nommé Alin, Quentin, vn certain iour sur le soir fait armer & deuers la ville de Guynes & le Chastel, les ordonna & disposa à aller: & quand ils commencerent à approcher la ville estās tous de pied, ledit Connestable auoit par vn autre lez enuoyé messire Iean de Renty à tout xl. bacinets, lequel sçauoit biē les aduenues de ladicte ville. Affin de monstrier aux deuantdits comment ils assaudroient icelle, laquelle estoit close de bons palis & bons fossez, & si estoit garnie de Hollandois & autres soudoyers qui y demouroient. Et le Connestable à tout six cens bacinets passa outre la ville pour garder vn passage, qui estoit entre Calais & Guines: affin que les Anglois dudit Calais fils oyoient l'assault ne venissent à grosse armée, pour ayder les Guinois, & ne peurent passer à aller à Calais. Ainsi au meillieu des deux batailles avecques ses gēs se meit le Connestable, & là fut tant & si longuemēt, que l'assault dura: lesquels pietōs dessusdits, & ceux qui les cōduisoient, vindrēt tous ensemble au point du iour de cy à la ville biē affectez d'assaillir. Et tant feirēt que par grans  
&



& cruels assaux bouterent le feu dedans:lequel tant qu'il trouua gouuernement, ne cessa d'ardre maisons,& en ardit plus de lx. Les habitans d'icelle fort se deffendoient contre leurs ennemis estans dedans le chastel, & iettoient des pierres, & trayoient d'arbalestres,& moult greuoient les assaillans.Finablement ceux dudit chastel ouurirent vne porte de leur chastel:par laquelle ceux de la ville entrerent dedans, & furent receuz, & par ainsi eschapperent d'estre morts. Et les assaillans par le conseil du Mareschal dudit de Renty & de leurs conduiseurs, se retrahirēt tous ensemble,& retournerent en leurs places:mais toutesfois en y eut moult de blecez & naurez,& pou en mourut. Et le Connestable à qui ceux feirent sçauoir leur retraicte à toute son armée, s'en retourna à Boulongne laissant garnison (cōme dit est) par toutes les frontieres contre iceux Anglois:lesquelles garnisons couroient chacun iour l'vne contre l'autre.

*Comment le Roy meit siege deuant Fontenay, & apres à Bourges en Berry: & des besongnes qui aduindrent durant le temps qu'il y fut.* CHAP. XCIII.

**T**em apres que le Roy de France eut seiourné par aucuns iours en la ville de Sens en Bourgongne: & qu'il eut eu plusieurs grans deliberations avec son conseil sur les affaires de son Royaume, se partit de là, & alla à Auxerre & de là à la Charité sur Loire, où il seiourna par cinq iours, & apres print son chemin deuers vn fort Chastel nommé Fontenay: lesquels Orleannois le tenoient, & tantost, voyans la grand puissance du Roy, rendirent ledit Chastel nommé Fontenay par condition qu'ils s'en iroient sauue leurs corps & leurs biens. Et entrerent plusieurs capitaines qui auoient tenu les frontieres contre lescits Orleannois, & venoient chacun iour de diuers païs à grand puissance deuers le Roy: Entre lesquels y vindrent le seigneur de Heilly, Enguerran de Bournouille, Amé de Viry & plusieurs autres. Et dudit lieu de Fontenay le Roy alla logger au païs de Berry deuant vne ville nommée Dun-le-Roy, & les feit assieger tout à l'enuiron & moult fort combattre de ses engins. Durant lequel siege Hector Bastard de Bourbon frere au Duc de Bourbon,vint à tout trois cēs hommes d'armes sur aucune compagnie des gens du Roy,qui alloient à l'estrade, si en print & tua plusieurs. Et apres hastiuement s'en retourna en la ville de Bourges,où estoient les Ducs de Berry & de Bourbon, ausquels il racompta son aduēture. Et apres ceux de Dun-le-Roy furēt tellement cōtraincts par la force des engins du Roy,que le ix.iour dudit siege sauf leurs corps & leurs biēs,& aussi que Loÿs de Cornailles cheualier nagueres Seneschal de Boulenois par le Duc de Berry,puist reuenir à toutes ses gens deuers ledit Duc de Berry,sainement,& sauvement se rendirent, & la ville deliurerent au Roy,dont apres l'espacement de trois iours le Roy & tout son ost se partit de là,& delaisa en ladicte ville messire Gautier de Rubes cheualier Bourgongnon capitaine & garde d'icelle.Et à trois lieües ou enuiron à vne ville pres d'un bosc, le vendredy dixiesme iour de Iuing,le Roy & son exercite se logea. Et le lendemain du matin,c'est à sçauoir du samedi xj. iour dudit mois,se partit, & vint deuant Bourges la cité,ville forte & peuplée & de prouisions surabōdante & réplie de biēs.Laquelle cité souloit estre royalle & chef de tout le païs& regne d'Acquitaine,située sur la riuere d'Ycure. Et est parmy vne partie de la ville vn petit fleuve qui viēt de Dun-le-Roy. En la-



quelle cité les bourgeois & habitans d'icelle monstroient & faisoient grand apparent de resistance, c'est à sçauoir les Ducs de Berry & de Bourbon, le seigneur d'Albreth, le Comte d'Auxerre, Iean frere du Duc de Bar & moult d'autres, qui festoient partis & fuiz hors du païs, l'Archeuesque de Sens, l'Archeuesque de Bourges, les Euesques de Paris & de Chartres, le seigneur de Gaucourt, Barbaſan, Aubrechecourt, le Borgne Foucault avec mille cinq cens bacinets ou environ, & quatre cens hommes de traict arbalestriers & archiers: lesquels voyans venir le Roy à tout son exercite, ouquel estoient selon l'estimation & commune renommée outre cent mille cheuaux, aucuns issirent de la ville armez en venant contre eux, & criant: viue le Roy, & les Ducs de Berry & d'Orleans en exillant terriblement les coureurs de deuant, & tant que d'une partie & d'autre y en eut moult de blesez, & tuez. Mais l'auantgarde du Roy qui les suiuit les fait tantost rentrer en leur ville. Et eux entrez dedans, laisserent leurs portes ouuertes, & bien & courageusement s'ordonnerent & meirent à deffence. Ceste auantgarde du Roy gouernoient & menoient le grand maistre d'hostel du Roy, c'est à sçauoir messire Guichart Daulphin, les seigneurs de Croÿ, de Heilly cheualiers, Amé de Viry & Enguerran de Bournouille escuyers: lesquels seigneurs de Croÿ, & de Heilly, deux Mareschaulx de Frāce: c'est à sçauoir de Bouciquault & le seigneur de Longny absens, & en autre besongne commis de par le Roy, furent les deuãdits de Croÿ & de Heilly deputez de par le Roy à exercer les offices de Mareschal de France. Et l'arrieregarde conduisoient les seigneurs d'Erlay: c'est à sçauoir messire Iean de Challon, le seigneur de Vergy le Mareschal de Bourgongne, le seigneur de Ront & le seigneur de Raiffe. Et en la bataille estoit le Roy de France: & avecques luy estoient les Ducs d'Acquitaine, de Bourgongne & de Bar, les Comtes de Mortaigne & de Neuers, messire Gilles de Mortaigne & grand planté de cheualerie. Lesquels là venus, en vne pleine assez pres d'un conuoy, face à face de la cité furent bien l'espace de trois ou quatre heures en ordonnance pour aduiser & ordonner les lieux de leurs logis: & pour diuiser & bailler à chacun sa place ainsi comment à chacun capitaine appartient. Et là assez pres d'un gibet de la cité, furent faits plus de cinq cens cheualiers: desquels & aussi de plusieurs autres qui n'auoient porté bannieres esleuées. Et puis commencerent à approcher la ville de plus pres entre les marés du petit fleue deuantdit, & les autres marés. Et lors commencerent à tendre leurs tentes & leurs paillōs, & feirent plusieurs logis es vignes & contre les mazures des maisons du Prioré S. Martin des chāps, de l'ordre de Clugny & d'un pan des faulxbourgs: lesquels auoient esté destruits & desolez de ceux de la ville deuant la venue des dessusdits, & contre les arbres & grans noyers qui là estoient. Et est vray qu'aucuns pour la grand soif qu'ils auoient tirerent de l'eau des puits, qui estoient esdits faulxbourgs. Mais quiconques en beuoit mouroit soudainement, iusques à tant que len apperceut de la mauuaitié & fraude. Et adonc on fait crier au son de la trompette & deffendre de par le Roy qu'il ne fut homme qui tirast ne beust eau des puits, & qu'elles estoient enuenimées: mais beussent & vlassent eaux de fontaines & de ruisseaux courans. Surquoy les aduersaires dirent depuis & affermerent pour vray, qu'esdits puits auoient iecté vne herbe qu'on appelloit selon les Grecs yfatis, & les Latins l'appellent gesdo: & cela auoient ils fait plus affin qu'il en mourussent, & aussi

pource



pource qu'ils ne pouoient bonnement passer és mares ne és guez desdits fleuves, pour la doubte des assiegez, lesquels y auoient franc aller & venir: & pareillement pouoient aller à tout charrois & charrettes pourueoir leurs viures & necessitez, & les mettre & mener en leur ville dont lesdits seigneurs & tout l'ost estoient moult courroucez. Neantmoins tâtost feirent ordonner en certains lieux leurs engins & tout ce qui estoit conuenable en tel cas, & la nuict prochaine firent leurs tentes & fournirent leurs places & y meirent grand quantité de gēs d'armes, & là commença vne forte guerre entre eux & ceux de la ville iectans continuellement les vns contre les autres de traict, de canons, de bringolles, & de bonnes arbalestres naurerent & occirēt plusieurs de leurs aduersaires. Et souuentefois les iniurioient de parolles en eux appellant faulx trahistres Bourgonngons, vous auez icy amené le Roy enclos en sa tente comme non bien sain de propos & de pensée: & le Duc de Bourgongne appelloient faulx homicide, disant: que fil n'eut là esté ils eussent ouuert leurs portes au Roy, & luy eussent fait obeissance. Et d'autre lez au contraire leurs aduersaires semblablement les appelloient faulx trahistre Armignacs rebelles contre le Roy leur souuerain seigneur, & moult d'autres iniures & opprobres, disoient les vns contre les autres. Mais le Duc de Bourgongne qui souuent les oyoit n'en disoit mot, ainçois pensoit tousiours de les greuer. Et le mercredy xiiij. iour de Iuing furent trefues données entre lesdictes parties à la requeste du Duc de Berry, durant lesquelles il aduint qu'aucuns des familiers du Roy esprins de trahison, manderent à ceux de la ville: issez dehors il est temps, saichans qu'ils deuoient faire. Lesquels incontinent entre vne & deux heures apres midy, le Roy estant en sa tente & aussi les Ducs d'Acquitaine & de Bourgongne qui reposoient. Et pareillement la plus grand partie de l'ost estans desarmez, comme ceux qui de riens ne se doubtoient, issirent de la ville par deux portes enuiron cinq cens hommes d'armes à l'esslite: lesquels prindrent leur chemin par les vignes le plus coyement & secrettement qu'ils peurent, non voulans estre apperceuz si qu'ils peussent venir sur ceux de l'ost soudainement, & eux courir sus, ayant volenté de prendre le Roy & son fils en leurs tentes, & tuer & occire le Duc de Bourgongne. Mais ce qu'ils doubtoient aduint: car deux pages du seigneur de Croÿ, qui lors menoiēt deux courriers refreschir, & en abreuuant iceux, apperceurent les dessusdits: lesquels soudainement tirerent sur frain, & s'en coururent le plus viftement qu'ils peurent deuers l'ost, criant à l'arme, voicy noz ennemis qui viennent, & saillirent hors de la ville & tant que leurs voix furent ouÿes. Et tantost chacun saillit hors de sa tente & de son logis, & incontinent s'armerent & accoururent ceux de l'aduangarde à l'encontre, & tant qu'ils vindrent l'un contre l'autre cōmençans à frapper de lances & glaiues: mais les assiegez furent tellemēt oppressez de leurs aduersaires, lesquels accouroient de toutes parts, à grand nombre que plus ne peurent tenir. Et presentement en y eut bien six vingts tuez & quarante prins ou enuiron. Et les autres commencerent à fuyr & reculler à grand honte, & en leur deshonneur rentrerent en la ville le seigneur de Gaucourt au front deuant. Et entre les morts estoit Guillaume Batillier, lequel auoit nagueres esté prins à S. Clou, & puis deliuré, & Guillaume de Challus cheualier: desquels les corps premiers despouilleez furent iectez en vn des puys qu'on disoit auoir esté enuenimez, & là eurent leur



sepulture & cymetiere. Et entre les autres qui furent prins estoit le grand maistre d'hostel du Duc de Berry, & avec luy vn escuyer du seigneur d'Albreth, & le Principal Queux dudit d'Albreth qui auoit à nom Gastard, lequel dit en la presence de plusieurs qu'il diroit & nommeroit les faulx trahistres, qui à celle heure leur auoient fait faire l'entreprinse. A laquelle occasiō le lendemain furent prins maistre Geoffroy de Buillon secretaire du Duc d'Acquitaine, & de la famille du seigneur de Boissay premier maistre d'hostel du Roy. Apres vn nommé Gilles de Toisy escuyer natif de Beauuais & son varlet, & Enguerran de Seure escuyer, qui estoit de sa nation Normand: lesquels pour ceste cause furent decollez deuant la tente du Roy & ledit seigneur de Boissay par souspeçon fut mis prisonnier, & fut present à decoller les dessusdits. Or est vray qu'aucuns des gens du Roy, & qui estoient en son ost pour faire & dōner l'ayde aux assiegez vn certain iour: c'est à sçauoir aucuns Anglois & François, lesquels estoient sous Aymé de Viry iusques au nombre de trois cens: dont les deux cens se partirent pour eux en aller, & entrèrent en la cité: mais ainçois qu'ils peussent entrer dedans la porte ils furent si roidement poursuiuiz de ceux de l'ost que plusieurs en furent morts de lances, d'espées & de traict. Et aussi la moitié de la garnison de Gien sur Loyre, qui estoient enuiron quatre cens bacinets le samedi qui estoit le xix. iour du mois de Iuing bien matin, semblablement entrèrent en la cité: mais auant qu'ils peussent estre trestous receuz aucuns de ceux de l'ost par lesquels ils furent aduisez terriblement les assaillirent & enuahirent, & tant qu'ils en occirent bien de cent à six vingts. Et en outre le Roy estant à son siege deuant Bourges (comme dit est) les varlets & fourragiers de son ost, lesquels de iour en iour queroient viures pour leurs cheuaux par les aguets de leurs ennemis, estoient souuent poursuiuiz, prins & emmenez, & aucuns laissez pour morts & leurs cheuaux perdus, pourtant qu'il leur failloit aller querir lesdits viures biē six ou huit lieues loing, pourquoy ils eurent moult de disette audit ost. Et pource aussi que les chariots & charrettes qui venoient de France & de Bourgogne, les souldoyers des assiegez & leurs complices: C'est à sçauoir ceux de saint Cefaire & d'autres places, qui n'estoient pas de l'obeissance du Roy, quand ils venoient ou pouoient rencontrer les dessusdits, les destrouffoient & prenoient leurs viures & prouisions, & les conuertissoient en leurs vsaiges, dont il fut fait soubdainement grand famine en l'ost du Roy: & tellement que plusieurs en soubstindrent grand pauureté & foiblesse de cuer pour la deffauté de pain, nonobstant que ce ne dura pas longuement: car au pourchats & ayde de messire Guichart Daulphin la ville & le chastel de S. Cefaire, qui plus leur nuisoit, vn certain iour lesdits souldoyers issus & portans viures à ceux de ladicte cité de Bourges furent rencōtrez & se rendirent au Roy. Et par ainsi de la disette qu'ils auoient eue furēt compettamment releuez & rassasiez par iceux dessusdits. Et en la fin du mois de Iuing apres soleil couchant issirent de ladicte cité de Bourges quatre cens hommes d'armes ou enuiron, lesquels auoient induits par les prisonniers qu'ils auoient, que le Preuost de l'Admiral de France & le Vidame d'Amiens venoiēt au siege deuers le Roy, & amenoient de Paris grand planté de finances pour payer les souldoyers. Pourquoy iceux cheuauchans se meirent és bois en certains passages par où iceux deuoient passer, affin que tellement ils les peussent enuahir & courir sus, & qu'ils les  
peussent



peussent destrouffer de ce qu'ils menoient : laquelle chose vint à la cognoissance du seigneur de Ront, par ses gens & guettes qui les auoient veu issir. Lequel tãtost appella avec luy le seigneur de Lorraine & le seigneur de Heilly à tout cinq cës hommes d'ames ou enuiron : & ainsi cõme fils allaissent en fourrage se partirẽt de l'ost, & par dessus vn vieil pont, leq̃l ils refeirent le mieux qu'ils peurẽt passerẽt l'eauẽ, & se logerent coyement en vne ville : & celle nuict enuoyerent leurs espies pour sçauoir le contenment de leurs ennemis. Et tant que finablement les trouuerent où ils attendoient lesdictes finances qu'ils cuidoient prendre & desrobber, mais eux mesmes furent prins : car tantost & incontinent que les deuantdits sceuerent où ils estoient les vindrent enuahir & courir sus, & là furent tantost vaincuz & morts, & si eut plusieurs prins & morts, & les autres qui s'en peurent eschapper se tournerent en fuite & se sauuerent, entre lesquels fut prins vn gentil-homme d'armes nommé Guistardon de Seure. Et ce fait ledit Duc de Lorraine & les seigneurs de Ront & Heilly à tout leurs prisonniers s'en retournerent en l'ost du Roy tresioyeux de leur victoire. Pour laquelle aduenture, & aussi pour plusieurs autres assez pareilles, le Duc de Berry & ceux qui estoient avecques luy dedans Bourges furent tresdolens & courroucez, tant pource, comme pour la desolation de sa cité & de son païs, que pour la destruction de ses cheualiers & escuyers qu'il voyoit estre morts & naurez chacun iour. Neantmoins de toute sa puissance meit son affection de soy deffendre contre tous ceux qui nuire luy vouloient, & aduenoit tres souuent que ses gens portoient grand dommage à ceux de l'ost. Et entretemps que ces besongnes se faisoient, messire Philibert de Lignac grand maistre de Rhoddes, qui estoit en la compagnie du Roy s'employa par plusieurs & diuerses fois, à inciter les deux parties aduerses à estre d'accord & faire paix l'vn avec l'autre. Et entre-temps audit siege le Marechal de Sauoye, & avec luy aucuns cheualiers & escuyers dudit païs furent là enuoyez de par leur seigneur le Comte de Sauoye deuers les deux parties, affin de traicter qu'ils feissent paix ensemble : lequel Marechal & ceux qui estoient venus avecques luy se ioignirent avecques ledit maistre de Rhoddes & feirent de grans diligences d'aller par la licence du Roy d'un costé & d'autre : & par especial deuers le Duc d'Acquitaine qui presidoit & estoit lieutenant du Roy, avec lesquels furent ordonnez le maistre des arbalestriers de France, le Seneschal de Hainault & aucuns autres. Et pour la partie aduersẽ l'Archeuesque de Bourges, le seigneur de Gaucourt, le seigneur de Tignonuille, le seigneur de Barbafan, le seigneur d'Aubregicourt, & autres avec eux : lesquels deux parties entendirent tresdiligemment à mener leurs traictez à fin & conclusion. Et pour y paruenir furent par plusieurs fois deuers les Princes d'un costé & d'autre : mais à brief dire, il ne fut pas en eux de les auoir concluz si hastiuement, car vne chacune des parties se disoit grandement estre interessée, & entre les autres choses estoit fort ramentu ce que les assiegez auoient leurs gens enuoyez sur l'ost du Roy à main armée pour eux courre sus durant les trefues, dont par auant est faicte mention : & par ainsi pour plusieurs raisons s'attargerent aucunement lesdits traictez.



*Comment le Roy de France se deslogea & alla à l'autre costé de la ville à tout sa puissance : c'est à scauoir de Bourges où se feirent les traictez d'entre les parties.*

## CHAP. XCIIII.

**E**N apres est verité que quand le Roy & tout son ost eurent seiz environ vn mois deuant la cité de Bourges par costé deuers la Charité sur Loire, voyant bonnement qu'il ne la pouuoit dommager: & aussi que ceux de ladicte ville estoient par l'autre costé chacun iour refreschis & pourueuz de viures & autres leurs necessitez, se deslogea d'illec & feit bouter les feux par tout le logis. Si s'en alla logger à la dextre partie de la cité à quatre lieues ou environ sur la riuere pres d'Y eure le chastel. Et pource ceux de la ville voyās leurs ennemis ainsi deslogez soubdainement cuiderent qu'ils s'en fuissent & rallassent en France pour la doubte des Anglois, lesquels leur auoient promis confort & ayde. Si en auoient grand ioye & y en eut plusieurs issans d'icelle ville à intention de gagner & prendre aucuns de l'ost du Roy. Et par especial en faillit hors moult des payfans, mais il aduint autrement qu'ils ne pensoient: Car Enguerran de Bournouille & autres capitaines demourerent derriere en embusche à tout trois cens hommes d'armes. Et quand ils veirent leur poinct frapperent en eux & en prindrent & tuerent plusieurs: & apres s'en retournerēt en l'ost du Roy. Et le lendemain le Roy & tout son ost passa la riuere, & print son chemin pour aller deuers Bourges, l'autre par deuers Orleans: affin cōme ils auoient fait à l'autre lez de gaster & destruire tous les viures du païs à l'environ. Et quād ceux de ladicte ville apperceurent qu'ils passoient l'eaüe, tantost & hastiuement bouterent les feux aux faulxbourgs de ladicte cité qui estoient grans, affin que leurs aduersaires ne s'y logeassent: & s'y furent arses aucunes Eglises qui là estoient dont ce fut pitié. En outre, le Roy là venu, & son ost tout entour ladicte ville, se logerent & s'y meirent leurs ordonnances, & si assirent leurs engins, canons & pierres es lieux plus conuenables, pour plus greuer & nuire ladicte cité. Et les assiegez pareillement aduisoient toutes les voyes & manieres comment ils pourroient greuer leurs ennemis par leur traict, canons & autres habillemēs de guerre. Les seigneurs qui dedans ladicte cité estoient assiegez, pour les innumerables dommages & demolitions de la ville & cité, estoient de cuer tristes & dolens & tous esmerueillez. Toutesfois le Duc d'Acquitaine fils & lieutenant du Roy par l'induction, ayant en sa memoire & consideration de la desolation de si noble cité, & qui estoit superlatiue de toute la region d'Auergne & de Berry: & de laquelle il deuoit estre hoir, & que celuy pourroit redonder en vn grand dommage, feit commander & deffendre aux canonniers & ceux qui se mesloient de iecter pierres, & de si faits engins gouuerner, n'en iettassent plus contre ladicte cité sur peine de la teste: dont le Duc de Bourgogne qui en toutes manieres s'efforçoit de greuer icelle & ceux de dedans, fut fort esmerueillé, & en eut grand soupson, que ledit Duc d'Acquitaine n'eut sa pensée remuée, & qu'il ne fut meu de pitié contre ses ennemis: & tant qu'entre les choses sur ceste matiere dites & proferées, entre eux deux, ledit d'Acquitaine son gendre luy dist absolument qu'il feroit finer la guerre. Adonc le Duc de Bourgogne luy pria moult fort, que s'il vouloit ce faire, au moins fait selon la cōclusion du conseil du Roy, qui



qui auoit esté faicte dernièrement à Paris . C'est à sçauoir fils venoient à sa volonté & en humilité eux soubsmettre & rendre, il les receuroit . Et neantmoins quelque chose qu'il requist, il ne luy vouloit requerir chose qui fut à son deshonneur . A quoy ledit Duc d'Acquitaine replicqua & dit, que voirement la guerre auoit trop duré & que c'estoit & auoit esté au preiudice du Royaume & du Roy son pere, & qu'à luy mesmes pourroit redonder : & aussi ceux contre qui la guerre se faisoit, estoient ses oncles, cousins germaines & prochains de son sang: desquels il pouuoit grandement estre seruy & accompagné en tous ses affaires : mais bien vouloit qu'ils veneissent en l'obeissance du Roy son seigneur & pere, ainsi qu'autresfois au parlement de Paris auoit esté pourparlé . Apres lesquelles parolles & plusieurs autres, ledit Duc de Bourgogne se commença fort à humilier enuers le Duc d'Acquitaine, & apperceut assez que par aucuns grans seigneurs auoit esté instruit aux besongnes dessusdictes : & entre les autres se doubta fort & eut grand soupçon sur le Duc de Bar, & depuis certains temps monstra assez clerement qu'il n'estoit pas content de luy . Toutesfois il dit là presentement au Duc d'Acquitaine, qu'il estoit bien content que les traictez se feissent & poursuiussent selon son bon plaisir à l'honneur du Roy & de luy . Et adonques fut ordonné à ceux qui autresfois s'en estoient entremis de poursuivre leur matiere, lesquels le firent volentiers . Et quand ils eurent mis par escrit les demandes & responce des deux parties, firent iceux traicteurs requeste aux Princes, que les Ducs de Berry & de Bourgogne peussent conuenir ensemble, & eux entremettre de traicter la paix : laquelle requeste fut accordée de par le Roy & son fils le Duc d'Acquitaine, & aussi de l'autre partie . Et par ainsi conuindrent ensemble, l'oncle & parrain, le nepueu & filleul, & fut la place esleuée en vn marc, qui estoit assez seur . Car chacū d'eux n'auoit pas grand fiance en sa partie . Et pource auoit esté le lieu ordonné & aduisé par les parties : auquel lieu estoient faictes barrieres toutes propices, sur lesquelles le Duc de Berry & de Bourgogne eux là venus s'apposerent l'vn contre l'autre sur lesdictes barrieres chacun son conseil derriere eux, ausquels ils auoient aucunesfois recours en leurs traictez & responce à leurs articles, & à cautelle auoit aussi chacun son assemblée de gens d'armes en certains lieux assez pres d'eux, sans ce qu'il peussent riens ouyr de leur conseil . Et estoient tous deux bien armez & tresbel : & auoit le Duc de Berry nonobstant qu'il fut aagé de plus de soixante & dix ans espée, dague & hache d'armes, cappelline d'acier en la teste, & vn fremaillet au frôt deuant moult riche : & dessus ses armeures vne iacquette de pourpre, & la bende au trauers toute semée de marguerites . Et environ deux heures apres qu'ils eurent là esté ensemble en ladicte place, se partirent d'icelle faisant & montrant bonne chiere l'vn à l'autre, sicomme il pouuoit sembler . Toutesfois le Duc de Berry dit au Duc de Bourgogne par maniere de rancune, beau nepueu & beau filleul, quād vostre pere mon beau frere viuoit, il ne failloit point de barriere entre nous deux, nous estiōs bien d'accord moy & luy . A quoy ledit Duc de Bourgogne respondit : monseigneur ce n'est pas par moy . Et lors monta le Duc de Berry sur son cheual, & s'en retourna en la cité avecques ses gens, & le Duc de Bourgogne pareillement retourna avecques les siens . Et disoient communement les cheualiers, & autres en la compagnie dudit Duc de Bourgogne, que



les gens du Duc de Berry en communes deuises disoient qu'ils n'auoient pas esté rebelles ne desobeïssans au Roy: & qu'il y auoit long temps qu'il n'auoit esté en santé, parquoy il leur deust rien commander, & que s'il eut esté bien disposé, il n'eust pas laissé la mort de son frere impunie. Et quand est aux amendes demandées pour auoir bouté les feux & prins forteresses, villes & chasteaux. Et les auoir despouillées & robées, comme S. Denys, Roye, & plusieurs autres au Royaume respondoient, qu'attendu que leurs seigneurs, sont du sang royal ils pouuoient aller liberallement & franchement par les bonnes villes dudit Royaume, & mener leurs gés d'armes pour le fait de leur guerre particuliere: laquelle ils faisoient à bonne & iuste cause contre le Duc de Bourgogne, disant qu'en ce faisant n'ont point forfait n'offencé enuers le Roy. Mais en tant qu'ils ont tenu la cité de Bourges close enuers luy tenoient auoir mespris, pour ce qu'il y estoit en personne: & de ce le traicté fait luy crioient mercy, & si luy rendoient les clefs. Et est vray que le mercredy ensuiuant, lesdits Ducs avec leurs traicteurs, conuindrent aux barrières deuant la porte de la cité: & tindrent leur parlement & conseil, lequel finy & conclud prindrent le vin ensemble, & puis se departirent l'un de l'autre tresioyeusement. Et le ieudy assemblerent tous les cheualiers & tous les nobles de l'ost du Roy deuant la tente du Duc d'Acquitaine, tenant l'estat & lieu du Roy: & estoient en sa compagnie les Ducs de Bar & Lorraine, & y estoient aussi plusieurs autres grans seigneurs, dequoy nous verrons les noms cy apres. Le Chancelier d'Acquitaine: c'est à sçauoir messire Jean de Neelle cheualier licencié en loix, qui auoit moult belle faconde: lequel tresnotablement dit & recita tous les excès & rebellions faits par Jean de Berry, Charles d'Orleans, Jean de Bourbon, Jean d'Allençon & Bernard d'Armignac, Charles d'Albreth & leurs complices: & aussi dit comme ils estoient alliez aux Anglois aduersaires du Roy: & comment ils auoient destruit ce Royaume, faisant de ce & plusieurs autres choses vn grand & long sermon: & tant qu'au dernier demanda de par le Roy & son fils d'Acquitaine, que chacun dit tâtost & promptement ce qu'il leur en sembloit à faire, ou la paix ou la guerre: dont plusieurs respondirent qu'il valloit mieux que paix fut entre les seigneurs, & qu'ils fussent remis & reduits en la grace du Roy, qu'autrement, ou cas qu'elle seroit ferme: & aucuns dirent autrement, & ainsi fina ledit conseil, dont il y eut grand murmure. Or est vray qu'il faisoit lors tresgrand chaleur, & moult estoient ceux de l'ost malades: & tant que plusieurs se partirent sans prendre cōgié, oyans que de iour en iour plusieurs de leurs compagnons mouroient. Et par especial, il mourut grand planté de cheuaux, dont l'ost estoit moult empuenté.

*Comment apres les besongnes conclues les seigneurs de la ville de Bourges allerent deuers le Roy & le Duc d'Acquitaine: & depuis à Auxerre. CHAP. XCV.*



Le vendredy xv. iour de Iuillet les besongnes conclues ou assez pres, les dessusdits seigneurs: c'est à sçauoir les Ducs de Berry & de Bourbon, le sire d'Albreth, le Comte d'Eu & messire Jean de Bar frere au Duc de Bar, accompagnez de plusieurs cheualiers & escuyers, portans leurs bendes issirent de la cité, & vindrent en l'ost du Roy, & en la tente du

Duc



Duc d'Acquitaine, en laquelle estoient plusieurs avecques luy : c'est à sçavoir les Ducs de Bourgogne & de Bar, & autres notables barons & gentils-hommes cheualiers & escuyers. Le Roy estant malade en la maniere accoustumée, & là apres le traicté accordé s'entrebaiserent : & quand le Duc de Berry baïsa son neveu le Duc d'Acquitaine les larmes luy cheoient des yeux : lequel traicté contenoit entre les autres choses, que le traicté qui auoit esté fait à Chartres par le Roy & son conseil entre Charles Duc d'Orleans & ses autres freres, pour la mort de feu Loys d'Orleans leur pere d'une part, & Jean Duc de Bourgogne pour la mort dessusdicté d'autre part, se tiendra perpetuellemēt : & si s'entretiendront les mariages autresfois deuïsez entre lesdits d'Orleans & la fille au Duc de Bourgogne. En outre le Duc de Berry avecques les autres seigneurs de son party, rēdra en l'obeïssance du Roy, toutes les villes & chasteaux par tout là où le Roy les voudra prendre : & si luy priera qu'il luy vueille remettre & pardonner s'il ne luy a si tost rendu l'obeïssance de sa cité de Bourges. Et en outre les deuantdits seigneurs renoncerent à toutes conuenances, & alliāces faïctes les vns avecques les autres : & aussi contre tous autres estrangers, contre le Duc de Bourgogne. Et pareillement renoncera ledit Duc de Bourgogne, à toutes alliances & confederations quelsconques faïctes par luy cōtre lesdits seigneurs. En apres le Roy restituera toutes leurs terres, villes, chasteaux & forteresses entieremēt & à plain, excepté ce qui a esté prins & demoly demourra fait & sans restitution. Et entre plusieurs autres choses à declairer cy dedans, les officiers desdits seigneurs & leurs seruiteurs seront restituez à leur biens, offices & benefices. Et apres qu'ils eurent disné le Duc de Berry presenta & rendit les clefs de la cité & garde d'icelle de par le Roy au Duc d'Acquitaine. Et puis s'en retourna dedans la ville avecques les siens : & le Duc d'Acquitaine comme lieutenant du Roy, feit crier de par le Roy par tout l'ost la paix entiere, entre le Roy & les dessusdits seigneurs & Princes. Et fut inhibé & deffendu de par le Roy, qu'il ne fut aucun désormais en auant d'une partie ne d'autre, qui nuise n'offence nullement sa partie aduersē en aucune maniere, n'en corps n'en biens ne nommer Armignac ne Bourgonnon, ou die autres quelsconques opprobres l'un à l'autre. Le samedi seiziesme iour dudit mois vint le Roy Loys de ses païs d'Anjou & du Maine, à tout trois mille & deux cens hommes d'armes ou enuiron tant cheualiers qu'escuyers & en sa compaignie le Comte de Ponthieure avec ses Bretons, lequel venoit au siege à l'ayde du Roy : lequel Roy Loys fut moult ioyeux & mena grand feste du traicté & accord fait entre lesdits seigneurs. Et le lendemain alla luy & le Duc de Bar accompagné de grand nombre de cheualiers dedans la cité : & là disnerent moult grandement avecques le Duc de Berry & la Duchesse sa femme : & les autres seigneurs disnerent au Palais du Duc, auquel il y auoit grand appareil & tresexcelllement & grandement furent fournis. Apres lequel disner s'en retournerent en l'ost : & le mercredy ensuiuant quarantiesme iour du siege le Roy se deslogea de deuant la ville, auquel il auoit soustenu grans & excessif despens : & à tout son exercite s'en retourna le chemin qu'il estoit venu iusques à la Charité sur Loire, & là se logea : auquel lieu vindrent deuers luy les Ducs de Berry & de Bourbon & le seigneur d'Albreth, avecques eux les procureurs du Duc d'Orleans & de ses freres : & en la tente du Duc d'Acquitaine luy present & les



autres seigneurs & Princes iurerent sur les saintes Euangilles la paix par eux accordée deuant Bourges tenir fermement, & loyalement garder & obseruer: & si promeirēt de iurer en la presence du Roy, & le faire iurer par le Duc d'Orleans & ses freres: lesquels d'Orleans estoient absens, & sy obligerent & se feirent fors par leurs sermens d'amener lesdits d'Orleans deuers le Roy à certain iour: lequel fut assigné presentement à estre à Auxoirre, & ce fait s'en retournerent en leurs places: laquelle paix & promesse de nouuel fut publiée de par le Roy, en deffendant destroictement, que nul de quelque qualité qu'il fut, sur peine capitale ne meffait l'un à l'autre en corps n'en biens, ne ne dit quelque diffame, en nulle maniere ne ne nommast Armignac. Et ce fait le Roy de Cecille, les Ducs d'Aquitaine, de Bourgongne & de Bar & tous les Comtes, Princes & Barons & cheualerie s'en allerent: & retint le Roy en sa compagnie grand nombre des capitaines de son ost, avecques vne partie de leurs gens d'armes, & à tous les autres donna congé d'eux en aller. Et de là s'en alla à Auxoirre: auquel lieu se logea en l'hostel de l'Euesque, & le Roy de Cecille, & le Duc d'Aquitaine se logerent en la ville, & leurs gens es villes d'autour: & là en venant audit lieu d'Auxoirre, mourut messire Gilles de Bretagne de flux de ventre. Et parcillement le Comte de Mortaigne frere du Roy de Nauarre quand il fut amené à Auxoirre ou à S. Cefaire, mourut de ladicte maladie, & fut mené à Paris où il fut enterré en l'Eglise des Chartreux. Amé de Viry, messire Iean de Guistelle, Iean d'Ichuennie & plusieurs autres moururent en eux en rallant, & tant qu'il en mourut bien de ceste mesme maladie de mille à douze cēs cheualiers & escuyers, sans les varlets, comme il fut rapporté aux seigneurs qui estoient à Auxoirre. Et adoncques le Marechal Bouciquault, le Comte de Foix, le seigneur de saint George qui menoient guerre au Comte d'Armignac, ouyrēt nouuelles, que la paix estoit faicte entre le Roy & ses aduerfaires: pourquoy ils desfrompirent leur armée, & donnerent à leurs gens congé. Durant lequel temps, & que le Roy estoit à Auxoirre, auquel lieu il auoit mandé à venir deuers luy la plus grand partie des grans seigneurs de son Royaume, avecques ses gens d'Eglise & ceux des bonnes villes, pour veoir faire les sermens de la paix dont dessus est faicte mention, luy vindrent autres nouuelles, & aux Princes estans avec luy, qui point ne leur furent plaisantes ne agreables: c'est à sçauoir, que les Anglois estoient arriuez à tout leur nauire à la Hogue de saint Vas, qui est ou païs de Constantin: & là estoient descendus à terre & eux esbandus au païs d'environ, en pillant, robant & prenāt prisonniers: & estoient huit mille combattans: entre lesquels auoit deux mille bacinets & le surplus archiers & varlets, desquels estoit conduiseur Thomas Duc de Clarence second fils du Roy d'Angleterre. Lesquels Anglois venoient au secours de Bourges pour ayder les Ducs de Berry & d'Orleans & tous leurs alliez. Et tantost allerēt deuers eux les Comtes d'Alençon & de Richemont, qui de cueur ioyeux les receurent, jaçoit-ce qu'ils venoient trop tard à leur ayde: mais ce non obstant, les ayderent de tout leur pouuoit, à pourueoir de viures & de cheuaux. Et depuis crurent bien lesdits de six cens bacinets Gascons, qui auoient esté soul-doyez à Bourges. Lesquels se bouterent avec eux & commencerent tous ensemble à degaster moult le païs. En outre les prisonniers qui estoient à l'Isle, dont en autre lieu est faicte mention: c'est à sçauoir le seigneur de Hangie nagueres mai-

stre



stre des arbalestriers de Frāce, messire Loÿs Bourdin, messire Charles de Gerammes, Enguerran de Fontaines & aucuns autres furent deliurez & renduz par le Comte de la Marche, moyennant que ledit Comte paya avec ce vne grand somme d'argent à ceux qui l'auoient prins. Et en cas pareil furēt rendus plusieurs prisonniers d'un costé & d'autre: les vns par eschange, & les autres pour finance. Et entre-temps enuiron la feste de l'Assumption nostre Dame, ceux qui auoient esté mandez de par le Roy, vindrent audit lieu d'Auxoirre: entre lesquels y vindrent en grand estat les Parisiens: y vindrent aussi les Ducs de Berry & de Bourbon, & le seigneur d'Albreth: lequel tantost apres sa venue voulut vser de son office de Conestable, mais le Comte Vvalleran de S. Pol ne luy voulut pas souffrir, & en vsa luy mesme. Et pource apres plusieurs parolles dictes de l'un à l'autre, ledit d'Albreth qui auoit ja fait le serment de la paix, se partit & s'en alla tout mal-talent & tout indigné. Et le lundy ensuiuāt, le Duc d'Orleans & le Comte de Vertus son frere vindrent audit lieu d'Auxoirre, à tout deux mille combattans. Et apres que tous les seigneurs d'un costé & d'autre furent venuz, ils assemblerent dehors les murs de la cité en vne plaine aupres d'une abbaye de Nonnains. Auquel lieu on auoit fait vn eschauffault moult notablemēt paré, sur lequel estoit le Duc d'Acquitaine ou lieu de son pere accompagné du Roy de Cecille, des Ducs de Bourgongne & de Bar & de plusieurs. Et là present tous ceux qui veoir & ouïr les vouloient, feirent lescdits seigneurs serment solemnel d'entretenir ledit traicté: c'est à sçauoir les Ducs de Berry, & d'Orleans & de Bourbon, le Comte de Vertus, Iean fils au Duc de Bar & plusieurs autres. Et pareillement le fait ledit Duc de Bourgongne & ceux de sa partie: & fut de rechief promis par iceux seigneurs d'Orleans & de Bourgongne, d'entretenir le mariage autresfois pourparlé à la paix de Chartres entre le Comte de Vertus & la fille dudit Duc, & sur les conditions ailleurs declairées: & en apres, tous les deuantdits seigneurs renonceront à toutes confederations, alliances & conuenances qu'ils auoient avec Henry Roy d'Angleterre aduersaire du Roy: & aussi de ses fils & autres Anglois & aucuns autres de ce Royaume, jaçoit-ce que le Duc de Bourgongne afferma par son serment, qu'il n'en auoit nulles: & doiuent escrire aux Anglois sur telle forme, que par le Roy & son conseil sera aduisé: & encores iurerent & promeirent de iurer deuant le Roy ledit traicté au plus tost qu'il sera retourné en sa santé: car il estoit lors malade, & de ce faire, telles lettres pour la seureté d'obtenir & obseruer ledit traicté & accord comme il plaira au Roy, & que iamais ne feroient l'un contre l'autre confederations n'alliances: & s'aucun d'eux venoit ou vouloit venir contre ledit traicté ou accord, que tous les autres seroient contre celuy ou ceux qui ce feroient, affin de les subiuguer & ramener à obeissance: auquel traicté veoir faire & accorder & veoir la forme des sermés: & iceux furent par mandement du Roy aucuns des chambres de Parlement & des Comptes, de l'Vniuersité de Paris, les Preuosts de Paris & des Marchans & des Escheuins, & aucuns des bourgeois: jaçoit-ce que ledit traicté & accord n'eussent pas bien pour agreable. Et aussi y furent presens & mandez de par le Roy ceux de Rouën, de Caen & d'Amiens, de Tournay, de Laon, de Reims, de Troyes, Langres, Tours & plusieurs autres bonnes & plus principales villes de ce Royaume en grand nombre & en grand multitude. Apres lequel serment fait, & toutes les solempni-



tez parfournies, les seigneurs dessusdits allerent disner ensemble en grand concorde au logis du Duc d'Acquitaine lieutenant du Roy son pere. Auquel lieu tous trois ensemble pour la dignité d'un chacun, le Duc de Bourbon proceda au seruir, & porta les mets avec luy les Comtes de Nevers & de S. Pol, avecques plusieurs autres grans barons & noble cheualerie, & fut iceluy disner tres abondant de tous biens. Et apres qu'ils eurent prins leur refection, allerent iouer à diuers ieux les vns avec les autres. Et apres tous ces esbattemens & que la nuit fut venue, chacun d'eux se retrahit en son logis. Et le lendemain, & aucuns iours ensuiuant, se rassemblerent par plusieurs fois en continuant de faire grand che-  
 re, & estre en grand concorde les vns avec les autres comme on pouuoit appercevoir par semblant qu'ils monstroient. Et mesmement le Duc d'Orleans & le Duc de Bourgogne cheuaucherent ensemble avec les autres seigneurs tous deux sur vn cheual, & monstroient apparence de toute fraternité & amour que freres & parens peuuent monstrier l'un avecques l'autre. Neantmoins aucuns enuieux & mauuaises langues ne s'en taisoient pas en derriere, mais en disoient leurs gorgées. Et quand au peuple dont il y auoit grand multitude & autres bonnes gens, il ne faut pas demander s'ils auoient grand ioye, car ils crioient souuent à hault criz. *Gloria in excelsis Deo.* Comme s'ils voulsissent dire louée soit la glorieuseté des cieux. Si leur sembloit estre proprement miracle de Dieu, attendu la diuision qui auoit esté si grande entre si grans seigneurs, laquelle estoit si tost rappaisée. Et apres toutes ces besongnes accomplies, & aussi pource que l'epidemie regnoit fort audit lieu d'Auxoirre, le Roy avec ses Princes se partit de là & par Sens alla à Melun: où de rechief avec la Royne, ses filles & autres dames fut faicte vne grand feste & grand liesse pour la reconciliation des Princes du sang royal tant en ioustes, dances, boires & mangiers comme autres esbattemens. Et est vray que le Roy estant audit lieu de Melun retourna en santé: & pource vn certain iour à la priere de la Royne & de sadicte fille, aussi des Ducs d'Acquitaine & de Bourgogne & du Roy de Cecille la paix deuantdicte par la maniere que faicte auoit esté approuua, & eut pour agreable. Et pource les rebellions & transgressions passées par eux faictes, par ses oncles, nepueux & leurs complices & alliez quelsconques, tant gens d'Eglise comme seculiers de quelque dignité ou auctorité qu'ils fussent il leur rendit tous leurs chasteaux, villes, terres, citez & possessions quelsconques. Et de ce leuoit sa main, & mettoit à pleine deliurance. Et ainsi lesdits seigneurs & alliez & complices, furent remis & receuz en leurs terres, villes, chasteaux, citez, & en leurs possessions, sans aucune restitution ou reparation des demollissemens d'iceux fais par auant: dont plusieurs auoient esté destruits, tant villes, chasteaux, forteresses, versées & ruées par terre, vignes, prez, bois & viuiers destruits & vuidez & autres moult d'insolences: affin que par tout ce Royaume fut icelle paix diuulguée, & que par nul elle ne fut violée ou enfraincte, mais demourast ferme & estable: & en perseuerance fut fait vn edict de par le Roy duquel la teneur s'ensuit.

*Comment le Roy enuoya les mandemens de la paix à ses officiers pour publier par tout son Royaume, es lieux accoustumez, & d'autres matieres suiuanes icelles.*





Charles par la grace de Dieu Roy de France . Au Baillif d'Amiens ou à son lieutenant, salut . Entre les curations des besongnes que nous auons, & deuons auoir pour le bien & vtilité & conseruation de nostre domination, le souuerain desir que nous auons : c'est de nourrir paix, amour & vnion entre noz subiects, & d'eux preseruer de tout nostre pouoir des griefs, oppressions & incōueniens: lesquels par dissensions & grans guerres sont aduenuz : affin que deffoubs nous ils puissent viure en bonne paix & tranquillité. Et pource que plusieurs discords & inconueniens ont esté en nostre Royaume, entre plusieurs de nostre sang & lignage, & autres leurs complices & adherens : dont plusieurs grans dommages se sont ensuiuius à nous & à noz subiects, & estoient encores en aduenture de venir plus grans se par nous n'estoit sur ce pourueu de remede conuenable . De laquelle chose nous auons eu au cuer desplaisance tant que plus ne pouions . Pourquoi te faisons sçauoir, que par la grace du souuerain Roy des Roys, qui est nostre createur & sauueur & creur, & donneur de toute paix, & par le moyen & bonne diligence de nostre trescher & trefamé premier fils Duc d'Acquitaine, Daulphin de Vienne, & de plusieurs autres qui en ce ont mis peine & labouré de tout leur pouuoir. Nous auons mis & ordonné bonne paix entre les deuantdits de nostre sang & lignage, par certaine forme & maniere cōtenue & declairée és traictez & accords sur ce faiz . Esquels est expressement contenu, que les deuantdits de nostre sang & lignage, ont porté & fait toute la rancune & maliuolence qu'ils pouuoient auoir contre tous ceux qui s'estoient entremis des debats tant d'un costé comme d'autre . Laquelle paix les deuantdits de nostre sang & lignage en la presence de nostredit fils & de plusieurs Prelats & autres notables personnes, ont iuré à tenir & garder fermement & estable, sans en aucune maniere l'enfreindre : & aussi de la maintenir & obseruer perpetuellement, comme autresfois ils ont iuré. Si comme ce peut apparoir par noz autres lettres sur ce faictes. Pourquoi nous te mandons, & expressement enioignons, que ladicte paix, de par nous sollēnellement à son de trompe en nostre ville d'Amiens par tout les carfours, & és autres villes & és lieux accoustumez à faire proclamations en tout le bailliage, tu faces crier & publier, en faisant commandement de par nous à tous noz subiects que ladicte paix ils tiēnent ferme, & gardent sans enfreindre sur toutes les choses qu'ils peuuent enuers nous meffaire. En eux deffendant de par nous, sur peine de perdre corps & biens, que nul de quelconque estat, dignité ou condition qu'il soit tant hardy n'ozé, ladicte paix enfreindre ne faire chose ou dire qui puist estre au contraire d'icelle. En outre par la teneur d'icelle te mandons, & cōme dessus enioignōs que tous ceux qui enfreindront ladicte paix soit de fait ou de parolle: & qui de ce seront trouuez coupables par information ou autrement deuēment chargez, tu les punisses & corriges ainsi comme violeurs & enfraigneurs de paix doiuent estre puniz publiquement, tellement que ce soit exemple à tous autres. Donnē à Melun le septiesme iour de Septembre, l'an de grace mille quatre cens & douze. Et de nostre regne trentedeux. Ainsi signé par le Roy, à la relation du conseil tenu par monseigneur le Duc d'Acquitaine, messeigneurs les Ducs de Berry, de Bourgongne, Orleans, Bourbon, & les Comtes de Vertus, & d'Allençon, & Iean de Bar & autres presens. Emau regard. Or est ainsi que les Anglois dessusdits, par toute la



marche de Constantin espars, vindrent là es païs du Maine & de Touraine, & de par tout le païs à l'environ tout gastant par feu & par espée. Pourquoy fut ordonné à Melun au conseil du Roy, auquel presidoit le Duc d'Acquitaine lieutenant du Roy son pere. Et si estoit le Roy de Cecille, les Ducs d'Orleans, de Berry, & de Bourgongne, & de Bourbon, le Comte de Vertus, les Chanceliers de France, d'Acquitaine & d'Orleans, les seigneurs de Torfy & d'Auffemont & aucuns autres, le Preuost des marchans, les Escheuins, le conseil de Paris que tous les nobles & non nobles à tout habillemens de guerre fussent mandez à Chartres : & que là fussent le viij. iour d'Octobre prochain ensuiuant. Auquel lieu, receurent leurs gages & souldées pour la deffence du Royaume, affin que les anciens ennemis du Roy fussent mis dehors, de laquelle ordonnance, furent faictes lettres royaux & signées par notaires & scellées du grand seal du Roy. Et apres, par tous les bailliages & seneschaucées du Royaume de France, furent enuoyées & publiées, & les deuantdits Princes & autres chacun à par luy audit huictiesme iour d'Octobre. Ceux de Paris qui plus estoient affectez que les autres, tantost & hastiuement feirent leur assemblée de hommes d'armes & de traict à Paris, les aucuns à Melun, & les autres ailleurs en leurs marches : & ainsi veües & receües les lettres patentes du Roy chacun feit son mandement de gens : mais par le Duc de Berry & les autres de son party, qui estoient tenus aux Anglois d'une grand somme d'argent pour leurs gages : c'est à sçauoir en la somme de deux cens mille escus. Lesquels se on leur eut payez, comme on leur auoit promeis, ils estoient tous prests d'eux retourner en Angleterre, fut par le païs d'Acquitaine ou de Bordeaux : mais iceux seigneurs qui auoient tout espuisé en leurs païs ne pouoient trouuer finances pour quelconques traictez ne moyens qu'ils peussent faire : & par ainsi fut tout rompu & eslongné : & ce pendant le Roy Loys s'en retourna en Anjou pour assembler gens & puissance à deffendre ses païs contre les Anglois, qui fort l'approchoient. Ens esquels iours aussi le Duc d'Acquitaine remist & restitua en l'office de son Chambrelan l'aisné fils de feu Montagu jadis grand maistre d'hostel du Roy, & à la priere du Duc d'Acquitaine luy furent rendus & restituez de par le Roy toutes ses terres & possessions, qu'il auoit de son patrimoine heritablement de son pere : & avec ce luy fut rendu le chef de sondit pere, nonobstant quelsconques confiscations : & ainsi receut l'heritance paternelle de son pere & mere. Vn certain iour du vespre, le Preuost de Paris & son bourrel accompagnez de douze hommes ou environ, tenans flambeaux allumez & portans l'eschelle avec vn prestre vestu d'une aube & paré de fanon & estolle, vindrent es halles : & tantost le bourrel par ladicte eschelle monta audit chef, lequel il osta de la lance où il estoit fiché, & là fut mis en vn moult bel suaire, que le prestre tenoit : lequel enuelopé dedans par ledit prestre, fut mis sur son espaulle, & de là porté en la compagnie dessusdicte, & lesdits flambeaux ardans en l'hostel dudit feu Montagu grand maistre d'hostel du Roy dessusdit. Et pareillement fut son corps osté du gibet de Montfaucon, ledit Preuost present & son bourrel, & fut rendu & apporté à Paris : lequel ioinct avec le chef & enclos en vn sercus, fut porté en la compagnie des enfans de luy, & de ses amis à grand compagnie & triumphe de prestres chantans & de luminaire à Marcouffy & en l'Eglise des Celestins : laquelle quand il viuoit auoit fait fonder amortie, & fait vn conuent de religieux



religieux où moult honnorablement fut enterré. Et entre les autres biens qu'il feit quand il viuoit, il donna à l'Eglise de nostre Dame de Paris celle grand cloche: laquelle il feit nommer Catherine, cōme il appert par ses armes & son tymbre qui sont entour icelle.

*Comment la guerre se esmeut en Boullenois : du retour du Roy dedans Paris : & comment le Duc d'Orleans contenta les Anglois & d'autres matieres.*

CHAP. XCVII.

**E**N ce mesmes temps vindrent d'Angleterre à Calais nageant par mer les Comtes de Vvaruich & de Kin, enuoyez de par le Roy Henry à tout deux mille combattans ou enuiron. Lesquels là venus avec les autres garnisons coururent les païs de Boullenois, & y feirent de grans dommages. Et finablement bouterent les feux & ardirent la ville de Sautmer au Bois, prindrent d'assault le fort de Ruissault, pillerent & roberent tout, & puis bouterent les feux dedans. Pour ausquels resister le Roy enuoya à S. Omer le Comte Vvaleran son Connestable, le seigneur de Rambures maistre des arballestriers, & le seigneur de Heilly à tout grand nombre de gens d'armes, qui furent mis en garnison sur les frontieres de Boullenois, & par ainsi de tous costez fut le païs fort oppressé. Et entre-temps le Roy de France retourna dedans Paris, & se logea en son hostel de saint Pol. Pour laquelle venue, les Parisiens feirent & menerent telle ioye que non pas sans plus, fut crié Noël par toute la ville: mais fait on feux par tous les quarrefourgs de Paris & grans allumeries, & crioit on toute la nuit: viue le Roy. Et outre ce fait on grand feste de boires & de mangiers, avec le Roy entrerēt dedans Paris, les Ducs d'Acquitaine, de Bourgongne & de Bourbon, & le Comte de Vertus. La Royne avec les Ducs de Berry & d'Orleans demourerent au Bois-de-Vincenne, & de là le dimanche ensuiuant ladicte Royne vint à Paris, & se logea à saint Pol avec le Roy. Avec laquelle festoit party le Duc d'Orleans: lequel quand il vint pres de Paris, se separa d'elle, & s'en alla son chemin par dehors pour aller à Beaumôt sa Comté. Et le Duc de Berry demoura au Bois-de-Vincennes: & jaçoit ce que la ville de Channy eust esté rendue au Roy sur intention qu'elle luy demourast perpetuellement: neantmoins le Roy la rendit au Duc d'Orleans, auquel avec ce il oëtroya cueillir vne taille de soixante mille florins d'or, à prendre & leuer sur ses terres & subiects pour ses affaires. Toutesfois de ses deux chasteaux c'est à sçauoir Couchy & Pierrefons ne peurent oncques finer de les r'auoir: & apres qu'il eut esté audit lieu de Beaumont par aucuns iours se partit de là, & s'en alla par deuers les Anglois: c'est à sçauoir le Duc de Clarence, qui estoit venu (comme dit est) à sa requeste, lequel il contenta de finances & aussi auant qu'il en peut finer. Et pource qu'il ne peut recouurer toute la somme qu'on leur pouoit deuoir de leurs gages, ledit Duc d'Orleãs bailla le Comte d'Angoulesme son maisné frere en pleige pour le residu, & avec luy plusieurs gentils-hommes: c'est à sçauoir messire Marcel le Borgne, Jean de Saueuses, Archambault de Villiers, Guillaume Boutillier, Jean Daudid & aucuns autres seruiteurs. Lesquels tous ensemble furent emmenez par ledit Duc de Clarence, qui à tout ses Anglois s'en alla ou païs de Guienne: & fut baillé iceluy Comte d'Angoulesme pour la somme de deux cens neuf mille francs monnoye



de France. Et par ainsi que ledit Duc d'Orleans eut ainsi fait il s'en retourna à Bloys. Si demourerent iceux hostages ou pays d'Angleterre par treslong temps, comme cy apres sera declairé. Et depuis ledit Duc d'Orleans r'enuoya deuers le Roy aucuns de ses cheualiers notables, pour pourchasser d'auoir ses fortresses de Coucy & Pierrefons, que tenoit le Connestable: mais nonobstant que le Roy bailla ses lettres & mandemens royaux pour les faire rendre: neantmoins iceluy Connestable n'y voulut obeÿr, mais fit responce que iusques à tant qu'il seroit restitué de certaine somme d'argent, qu'il auoit presté à ses gens d'armes pour les conquerre ne les rendroit. Disant outre que le Roy luy auoit promis & auoit commis audit Coucy capitaine messire Gerard de Herbainnes, & à Pierrefons messire Collard de Fiennes: lequel chastel de Pierrefons qui estoit moult bel & puissamment edifié fut ars en vne nuit dont moult despleut audit Duc d'Orléans, mais il ne le peut auoir autre, & luy conuint souffrir. En outre en ces propres iours le Duc de Bourgogne qui se tenoit à Paris empres le Roy, fit prendre messire Bourdin de Saligny & le mener prisonnier ou pays de Flandres, où il fut par treslong temps, & depuis fut deliuré: lequel messire Bourdin estoit moult priué & familier dudit Duc, & fut aucune renommée qu'il se vouloit tourner du party d'Orleans, & auoit descouuert aucuns des secrets d'iceluy Duc. Et durant ce temps y eut aucunes parolles entre le bastard de Bourbon, & vn boucher de Paris nommé Denisot de Chaumont assez rigoureuses: & dit ledit bastard à iceluy, paix, paix, on te trouuera vn autresfois: & tantost apres le dessusdit Denisot qui auoit grand audience avec les autres bouchers les esmeut: & fit tant que avec grand peuple de Paris ils se meirent en armes, & tendirét leurs chaines: mais en fin ils furent rappaisez par le Duc de Bourgogne. Et adonc Iean Duc de Bourbon fut enuoyé de par le Roy & son grand conseil ou pays de Languedoc avec le Comte d'Armignac & le seigneur d'Albreth, pour resister aux entreprises du Duc de Clarence, & des Anglois, qui adonc seiournoient ou pays d'Acquitaine, & trauailloient fort les frontieres d'environ tenans la partie des François.

*Comment le Duc de Berry fut fort oppressé de maladie, & fut visité par la Duchesse de Bourbon sa fille & le Duc de Bourgogne, & autres besongnes.*

## CHAP. XCVIII.


**E**N iceux iours le Duc de Berry, qui estoit venu à Paris deuers le Roy son nepueu, pour estre au conseil, qui ja se deuoit tenir, fut tresgrieusement oppressé, de maladie, en son hostel de Neelle: mais par sa fille la Duchesse de Bourbon qui pour ceste cause vint audit lieu de Paris, fut tresdiligemment visité & le seruit & administra doulcement iusques à tant qu'il fut en bonne santé: & pareillement fut songneusement visité de son nepueu le Duc Iean de Bourgogne. Et entre-temps ladicte Duchesse de Bourbon impetra deuers le Roy, les Ducs d'Acquitaine & de Bourgogne que le corps de Binet d'Espineuse jadis cheualier du Duc de Bourbon son seigneur & mary, fut osté de montfaucon, & le chef des halles où il auoit esté mis grand temps parauant par la iustice du Roy: si le fait porter accompagné de plusieurs de ses amis en la ville d'Espineuse en la Comté de Clermont, où il fut mis en terre dedans l'Eglise



l'Eglise assez honnorablement. Et adonc le Duc de Bourgongne dessus nommé estant à Paris, comme dit est, se conduisoient la plus grand partie des besongnes & affaires du Royaume par son conseil, & de ceux à luy fauorables. Et nonobstant que par la paix & traicté d'Auxerre eust esté promis de par le Roy & les seigneurs de son sang, qu'un chacun de quelque estat qu'il fut & quelque partie qu'il eust tenue, seroit remis en ses biens & heritages, & aussi en offices & benefices: neantmoins en y eut plusieurs qui ceste grace royale ne peurent obtenir quelque diligence qu'ils en feissent, & par especial grand partie de ceux qui auoient tenu la partie d'Orleans, furent mis d'icelle grace en delay. Et pource, & pour autres causes s'entretindrent tousiours les enuies secrettement, entre eux parties, & queroient tous en derriere l'un de l'autre moyens, les vns d'auoir le le Roy de leur partie, & les autres le Duc d'Acquitaine. Et par ainsi n'auoient pas vraye amour ne amitié l'un avec l'autre. Parquoy la guerre estoit de iour en iour en grand peril de recommencer plus diuerse & cruelle, que par deuant elle n'auoit esté, comme cy apres sera plus à plain declairé. Et en apres, les lettres d'alliances & confederation d'entre Henry Roy d'Angleterre ses enfans & autres Princes d'une part, & les Ducs de Berry, d'Orleans & de Bourbon, les Comtes d'Alençon, & d'Armignac, le seigneur d'Albreth & autres de leurs alliances: d'autre part seront declairez cy apres en la fin de cest an mille quatre cens & douze, selon les promesses qu'ils feirent l'un à l'autre.

*Comment le Roy de France feit grand assemblée en la ville de Paris, sur intention de auoir conseil pour reformer ses officiers & autres besongnes.*

CHAP. XCIX.



R est ainsi que le Roy de France par l'enhort & sollicitude du Duc de Bourgongne, manda lors à venir à Paris la plus grand partie des Princes de son royaume, avec les Prelats, vniuersité chapitres & plusieurs autres & ceux des bonnes villes, affin d'auoir conseil & deliberation sur plusieurs grans affaires, qui estoient en son Royaume. Et par especial, sur la reformation de tous ses officiers generallyment: desquels par treslong temps la plus grand partie s'estoient tresmal gouuernez enuers luy. Et pource, quand les seigneurs dessusdits & autres furent venus audit lieu de Paris, & qu'ils eurent eu plusieurs grans conseils l'un avec l'autre sur les matieres pourquoy on les auoit mandez, conclurent ensemble, que pour tous les autres, l'université respondroit, & aussi remonstreroit au Roy & à son conseil, ce qui leur estoit aduis de faire: & ainsi en fut fait à un certain iour qu'ils eurent audience en l'hostel de saint Pol par la forme & maniere qui s'ensuit. A nostre treshault & trefexcellent Prince, nostre souuerain seigneur & pere: s'ensuiuent les points & les articles, lesquels vostre treshumble & tresdeuote fille l'Universite de Paris, voz treshumbles & obeissans subiects le Preuost des marchans, les Escheuins & bourgeois de vostre bonne ville de Paris ont fait, à vous bailler aduis confort & ayde, comme vous les requerez, pour le proffit, honneur & bien de vous, & pour la chose publique de vostre Royaume. Premierement sur le premier point touchant l'entretenelement de la paix entre aucuns seigneurs de vostre sang: laquelle chose de vostre maiesté Royal à esté exposé, dient les deuantdits, que ceux des bonnes villes &



les autres qui en presence font venus à vostre mandement, ont ce benignement iuré & promis: & tousdits iusques à maintenant entretenu, & Dieu deuant entretenront. Mais il semble que vous doyez, autres seigneurs de vostre sang, & leurs principaux seruiteurs, mander pour semblablement en vostre main iurer & promettre l'entretènement de ladicte paix pour plusieurs causes. Premièrement pour ce qu'ils ne la promeirent oncques en vostre main. Secondement pour ce qu'il en ya aucuns qui ne l'entretiennent pas. Item & qu'il soit vray, il est notoire que les Anglois sont en vostre Royaume & plusieurs autres gens tant du Royaume comme d'autres pays: & sont ensemble, par maniere de compagnie, destruisant vostre pays, & voz subiects, dont plusieurs plaintes & clameurs sont venues, & de iour en iour viennent en plusieurs parties de vostre dit Royaume. Aufquelles choses, on met trop petit remede, & la cause declairée sera cy apres. Item & aussi le Comte d'Armignac qui est vostre subiect n'a eu cure de la paix, & ne l'a pas entretenu: mais a tousiours maintenu guerre en vostre Royaume. Item & affin que la paix soit mieux entretenue, il semble, que vous deuez voz lettres royaux ordonner: esquelles soit la cedulle de ladicte paix incorporée adressans à voz officiers & autres à qui bon vous semblera, à prouulguer les transgressans & les punir comme il appartiendra. Item & quand est au second point où vous nostre souuerain seigneur demandez aduis, confort & ayde, vostre treshumble fille & voz loyaux subiects de toute leur affection, considerans vostre bien, utilité & honneur de vostre Royaume: & aussi la continuation & conseruation de vostre seigneurie & domination, plusieurs fois ont esté sur ce assemblez & voyās qu'il est tresgrand necessité de vous exposer les deffaux, qui sont en vostre Royaume, commencent à parler de voz finances, dont vous deuez soustenir & maintenir vostre fait & vostre Royaume. Et premier sur le fait des finances de vostre demaine, qui se doiuent distribuer en quatre manieres. Premièrement en payer les aumosnes, & la despense de vous, de la Royne, & du Duc d'Acquitaine vostre aîné fils. Ens ou salaire de voz seruiteurs, es reparations des ponts, moulins, fours, chauffées, ports, passages, chasteaux, hosteux & autres edifices, & le remanant mis en l'espargne du Roy, comme on faisoit anciennement. Item il appert clerement comment lesdictes finances ne sont point employées es choses dessusdictes. Laquelle chose est à la charge de voz tresoriers: par lesquels voz finances dessusdictes sont distribuées, & voit on souuent les pources religieux & religieuses tant des Abbayes comme des hospitaux despendre le leur en poursuites, sans auoir deüe expedition, dont leurs Eglises chéent en ruine, & est delaisié le diuin seruice à estre fait, ou preiudice des ames de voz predecesseurs & en la charge de vostre conscience. Et premierement quand aux aumones, vray est que de ce peu ou neant est payé. Item & quand à la despence de vous, de la Royne & du Duc d'Acquitaine qui est gouuernée par messire Pierre de Fontenay, elle est payée par les maistres des chambres aux deniers appelez Raymond Raguier & Jean Pie: car il est trouué que par la despence de vous & du Duc d'Acquitaine, qu'on lieue tant sur le demaine comme sur les autres quatre cens cinquante mille frācs. Et pour icelle n'estoit leué ou temps passé que quatre vingts quatorze mille francs: & adonc voz predecesseurs menoient vn bel estat, & les marchans & les autres gens estoient payez de leurs denrées: mais maintenant (nonobstant ladicte



cte somme) les marchans dessusdits ne sont point payez de leurs denrées, & sou-  
 uent aduient que voz hostels, les hostels de la Roynie & du Duc d'Acquitaine  
 sont rompus: & ieudy dernier passé, l'hostel de la Roynie, dont il appert que ladi-  
 cte somme n'est pas toute employée en vostre despence, comme il sera monstre  
 en temps & en lieu: mais elle est au profit de voz gouuerneurs, ou de ceux que  
 bon leur semble. Et pareillement en l'hostel de la Roynie, pour la despence de la-  
 quelle on ne souloit leuer que trente six mille francs. Et maintenant on lieue sur  
 lesdictes aydes cent & quatre mille francs, nonobstant ses demaines, & les aydes:  
 & procede ceste despence de deffault des officiers, qui sont commis au gouuer-  
 nement de ladicte despence: desquelles finâces, de la Roynie Raymonet Raguier  
 est principal gouuerneur & tresorier, qui s'est oudit office tellement gouuerné,  
 que de l'argent de la Roynie il a grans acquests & edifices, comme il appert aux  
 champs & à la ville. Item & il fault sçauoir où est celle finance: car outre & sur  
 la somme on prend certaine quantité de finances par forme & mandement ex-  
 traordinaire. Item & pareillement ya vne grande deffaulte des offices de l'ar-  
 gentier, & de la chambre des deniers: car par les officiers qui tiennent lesdits of-  
 fices, plusieurs grans sommes d'argent sont leuées & mises en autre vsaige qu'en  
 vostre profit & moult de voz debtes: & de voz officiers, les salaires sont retar-  
 dez à estre payez: & plusieurs de qui on prend les vins & autres denrées pour  
 vous, ne sont pas payées: & est tresvray qu'ils applicquent à leur profit toutes les  
 choses dessusdictes, comme il appert par les grans estats qu'ils meinent, par les  
 cheuaux qu'ils ont, par les excez & inconuenables edifices qu'ils font de iour en  
 iour, & qu'ils ont fait par cy deuant, prouué par Raymond Raguier qui a edifié  
 chasteaux & grandes maisons: où il a despendu (comme on dit) outre trente mil-  
 le francs: & aussi Charbot Poupert argentier & maistre Guillaume Budé mai-  
 stre des garnisons, ont edifié grans rentes & possessions, & ont acquis grosses &  
 larges substances, & despens. Lesquelles choses ils ne pourroient faire des salai-  
 res de leurs offices, ne aussi de la richesse qu'ils auoient quand ils entrerent esdits  
 offices: & aussi ya il deffaulte en vostre escuyererie qui est office de tresgrand re-  
 cepte, & y sont faictes plusieurs grandes despences, qui peu tournent à vostre  
 honneur & profit. Item & quand est aux salaires des seruiteurs de vostre ho-  
 stel, ils sont tresmauuaisement contentez en la chambre des deniers. Ne les serui-  
 teurs en peuuent auoir nouuelles, pourquoy ils ont grans pouretez & souffre-  
 tez, & ne peuuent estre entour vous si honnestement qu'il appartient. Nonob-  
 stant qu'il en ya aucuns qui ont port, lesquels sont tresbien payez desdits salaires.  
 Quant à la reparation de vosdits fours & moulins & chasteaux, tout va à ruine  
 & perdition. Et quant à l'espargne dudit demaine, il n'y à pas vn denier pour le  
 present, jaçoit ce que ou temps passé il n'y eust pas grand somme, & especialle-  
 ment ou temps du Roy Philippe, du Roy Iean, & du Roy Charles: ouquel tēps  
 estoient gouuerné bien autrement, que maintenant. Item & quant au fait des  
 finances, il fault dire necessairement que le gouuernement a eu cours depuis  
 trente ans en ça: & parauant a esté demouré par plusieurs officiers qui n'ont  
 point eu regard au bien de vous & de vostre royaume: mais seulement à leur sin-  
 gulier profit. Et a declairer les officiers de vostre royaume esquels il ya deffaute,  
 vostre fille deuantdicte & vosdits subiects vous exposent les choses qui s'ensui-



uent. Premièrement vous auez tresgrand & excessif nombre de tresoriers, qui ont tousiours esté puis le temps dessusdit, & par la grand pratique qui est audit office, plusieurs hommes se sont enforcez pour y entrer. Et tant qu'il n'est à peu année, qu'ils ne soient muez, remuez & deposez par la requeste des autres qui ont eu la voix en vostre royaume. Et Dieu sçait, pourquoy ils y entrent, si veulentiers, sinon pour les loppins & larcins qu'ils font & trouuent esdits offices: car se vn tresorier n'amende de vous chacun an de quatre ou cinq mille francs, ce ne leur semble riens: & jaçoit ce qu'au temps passé n'en y eust que deux, toutesfois y en ya maintenant quatre ou cinq pour la pratique qu'ils y trouuent, & à esté telle fois qu'il en y auoit six ou sept. Et ainsi appert plus cler que le iour, que vous auez dommage chacun an audit office de seize ou vingt mille francs pour le particulier deffault desdits tresoriers. Et quant est aupres des finances dudit tresor, ils n'ont eu nul regard à payer les choses necessaires, ne de tenir les sermens qu'ils font à l'entrée desdictes offices. Mais ils ont entendu à payer les grans & excessifs dons à ceux qui les ont soubstenuz, par plusieurs voyes: lesquels sy lieuent tant sur le fait des coffres comme sur le fait sus nommé. Et quand est aux autres offices: c'est à sçauoir au gouvernement des finances & au cler. Il est à sçauoir que toutes lesdictes finances sont passées par leurs mains, tant qu'ils en ont acquis innumérables & haultes possessions, comme il appert: & sont les tresoriers pour le present Andrieu Guiffart, Burel Dampmartin, Regnier de Bouligny, Iean Glerin & le gouverneur Nicolle Bonnet, qui fut cler de Iean Chayf son predecesseur, & le cler maistre Guy Bouchier, qui sont inutiles & coupables du mal regime deuantdit, excepté Iean Guerin qui est nouuel, & ne s'est pas encores mesfait. Item & especiallement en est coupable Andrieu Guiffart: lequel jaçoit ce qu'il eust gasté tout ce que son pere luy auoit acquis, neantmoins par la procuration du Preuost de Paris, duquel il est cousin, à cause de sa femme, il a esté fait tresorier, où il a esté tellement remply de deniers, qu'il est maintenant plain de rubis, & de dyamans, de saphirs & d'autres pierres precieuses, de vestures de cheuaux: & tient vn excessif estat, remply de vaisselle, c'est à sçauoir de plats, d'escuelles, de pots, de tasses & de hanaps. Item & jaçoit ce qu'il ne soit point necessaire d'auoir tresorier sur le fait de la iustice dudit tresor: mais il soit de coutume d'y tenir vn cler conseiller, toutesfois il ya quatre conseillers qui emportent grans finances au preiudice. Quant pour le regime des aydes, il ya officiers ordonnez, qui s'appellent generaulx: par l'ordonnance desquelles passent toutes les finances des aydes, ordonnées pour la guerre qui monte à douze mille francs par les communs ans. Et ce est, que les deuantdits tresoriers se sont mauuaiselement gouuernez & font encores: encores se gouuernent, par lesdits generaulx: car ils sont premierement mis audit office, par force d'amis, à qui lesdits generaulx font excessifs dons en vostre preiudice. Item & le profit que lesdits generaulx prennent quand ils entrent esdictes offices, montans pour chacun d'eux par chacun an à deux ou à quatre mille francs: & se vn general est deux ans audit office, sans faulte il acquestera neuf ou dix mille frâcs ou autre grand somme par dons couuers: dont aucunesfois les dons sont leuez au nom des seigneurs, sans leur sceu: & les particularitez des faulx seront trouuez & extraits, qui furent faits par la reformation dernièrement faicte. Item & apres ledit office, est ve-



nue vne autre office qu'on appelle l'espargne mal nommé: laquelle tient Anthoine des Essars, à cause de laquelle on lieue desdictes aydes la somme de cent & vingt mille francs ou environ, jaçoit que ladicte finance fut gardée & mise en l'espargne sous deux clefs, dont vous devez porter l'une pour secourir à vostre nécessité & vostre royaume: neantmoins ceux qui l'ont en gouvernement, l'ont tellement disposé qu'il n'en y a croix, & ne sçait on qu'il en soit mieux à homme du monde, sinon à aucuns qui l'ont soustrait de vostre main, par le consentement de ceux qui ont trouué ledit office, dont ils meinent excessifs estats en vostre preiudice: & avec ce ledit Anthoine en a gardé voz liurées & voz ioyaux, & dit on, qu'en ce a trespoure gouvernement: & en ce qui est de iour en iour acheté pour vostre corps, est ce par la coulpe dudit Anthoine. Item & apres ceste office est venue autre office qui est nommée la garde des coffres, lequel tient Maurice de Rully, pour lequel il reçoit chacun iour pour l'ordinaire dix escus d'or en monnoye, qui se doit bailler en vostre main pour faire ce que bon vous semble. Mais il n'y a croix, car il l'a distribué à son plaisir: & sous vmbre de ceste office, sont dissipées plusieurs sommes de monnoye, desquelles on parlera en temps & en lieu. Item est à demonstrier comment vous, la Royne & le Duc de Aquitaine estes mangez & desrobbez: c'est à sçauoir que quand vous auez affaire de promptes finances pour la cause de vostre guerre, ou pour autres grandes voz besongnes: il fault aller à certaines personnes marchandes d'argent, qui par vsures & rapines illicites trouuent & font finance de monnoye, moyennant ce qu'ils ont en gaigne de vostre vaisselle, & de voz ioyaux d'or & d'argent à grandes & cleres pertes. Et tant, que ce qui ne vault que dix mille francs, vous couste quinze ou seize mille. Et tant fault que vous en perdez par an en telles vsures, qui se font par les changes fains. Et par ceste maniere peut on iuger clerement, qu'il en ya aucuns de voz seruiteurs & officiers, qui sont participans & compagnons des dessusdits fraits & vsures illicites: & par ainsi n'auiez vous croix. Et sont les seruiteurs de voz officiers, pources, obligez & tempéstez: & pareillement sont gouuernez les autres seigneurs de vostre lignée sans nuls excepter. Item il est à sçauoir comment subtillement & malicieusement les Generaulx officiers eux entremettans de voz receptes, vous gouuernent: car puis qu'un recepueur vous aura presté par dessus la recepte cinq ou six mille escus ou autre somme, ils sont demis de leurs offices. Afin qu'ils ne s'en peussent rembourser sur leur recepte, & en son lieu met on un autre Receueur qui recepura presque toute la recepte. Et quand il aura peu ou neant à recepuoir, adonc sera remis le premier Recepueur en son office, moyennant ce que ledit Recepueur s'obligera en vne grand somme d'argent, c'est à sçauoir aux dessusdits officiers. Et par ce ne peut le deuantdit recepueur estre payé ne payer ce qu'il doit, & ainsi font cheuaucher an sur autre: en quoy vostre finance est degastée, deuant que le terme soit venu: & par ainsi beuez voz vins en veriuft. Item & quand il ya un ambassade à faire, ou quand il fault enuoyer un simple chanoyne dehors, il fault emprunter l'argent aux vsures: & souuent en aduient que ledit ambassadeur ne peut estre expédié par defaute d'argent, dont aucunesfois aduient que voz ambassadeurs sont inutiles: & pource aduient aucunesfois, que vous en auez excessifs dommages. Item il est nécessaire que vous sçachez où est l'argent de vostre royaume de deux ou trois ans



en ça dessus , & outre le demaine & les aides : ouquel temps ont esté leuées plusieurs tailles, dixiesmes, demy dixiesmes, impositions, malletotes, reformatiōs & autres plusieurs manieres d'auoir finances : desquelles choses le Preuost de Paris s'est entremis, cōme il est notoire, & s'est fait appeller souuerain maistre des finances & gouuerneur general. Item n'est pas à oublier comment aucuns grans officiers, comme le Preuost de Paris & autres qui ensemble ont tenu grand nombre d'offices & védu & receu les deniers & mis iceux en leurs sacs en vostre preiudice & cōtre voz ordonnāces royaux: & aussi la chose publique, dont il s'en suit maintesfois que gens inutiles & non sçachans de ce mauuais gouuernement, sont mis esdits offices. Item & nagueres ledit Preuost de Paris qui depuis vn peu de temps tenoit l'office de general maistre & gouuerneur des eaües & des forests, a resigné ledit office en la main du seigneur d'Iury. Et à la cause d'icelle sont leuées charges de six mille francs. Et avec la Preuosté de Paris, il tient les capitaineries de la ville de Chierebourg, dont il a par an six mille francs, & de Nemours dont il a par an deux mille francs. Item & vostre dicte finance est gastée & perdue par vne autre maniere: car vn grand nōbre de recepueurs, grenetiers, quattrimiers & leurs clerks, & aussi autres certains poursuiuans generaulx: & avec ce leurs clerks & seruiteurs ont obtenu chacun an comme si ce fut leur rente & lettres, & grans dons outre les dons lesquels ont les autres officiers: & est trouué que par ce moyē dudit Preuost & des autres gouuerneurs desdictes finances, ils ont esté de ce tresbien payez au grand preiudice de voz besongnes & à la retardation du payemēt de plusieurs preud'hommes, tant cheualiers, conseilliers comme autres officiers: & voit on communement, que quand vn ieune homme vient au seruice d'un general receueur ou grenetier, jaçoit ce qu'il fut du petit estat & de peu de science, en peu de temps il est fait riche, & maine vn grand & excessif estat, & achete grans offices & heritages à voz despens: & par les tresoriers de voz guerres ont esté commises plusieurs grandes fraudes ou fait de voz finances. Et ont vne maniere de prendre de voz escuyers & cheualiers blancs seellez, desquels il ont tresmauuaistemēt vsé, sicomme sçauent lesdits cheualiers. Et de ce vous sçauront mieux informer que nous, & est grand pitié d'ouyr les complainctes desdits cheualiers & escuyers sur le fait de leurs payemens, qui ont esté tousiours petits, voire enuers la plus grand partie: car maintenant c'est vne reigle generale aux gens d'armes, qui vivent sur le païs sans estre payez, de dire qu'ils ne sont point payez de leurs gaiges, & qu'il fault qu'ils vivent en leur seruice. Item & pource que lesdits Generaulx & le souuerain maistre des finances, prestement qu'il vous plaira à les reprendre, ils diront pour euitier & passer le temps, qu'ils sont prests de monstrier leur estat, comme se ce fut responce profitant ou souffisable: & ja sont venus en requerant qu'on leur baille commissaires, qui visitent leur estat: mais (sous correction) quand ce vient au fait, telle responce est inutile: mais qui voudront sçauoir qui mangea le lard, il faudroit enquerre qu'elle substance ils pourroient auoir, quand ils entrèrent esdictes offices, & quels gaiges ils auoient en leurs offices, & combien ils peuuēt despēdre raisonnablement, & qu'elle substance ils ont de present, & les grandes rentes & possessions qu'ils ont acquises & les grans edifices qu'ils font faire. Item soit notoire au regime des Generaulx qui sont riches & larges: & quand ils entrèrent esdits offices, ils estoient poures: mais ils ont maintenant acheté mai-  
sons



sons de grand domination, sicomme maistre Iean Chastegnier, Guillaume Luce, Nicaise Boufes : & pour verité dire, chacun vostre loyal subiect se doit bien esmerveiller de tel gouuernement, bien leur doit douloir le cueur, quand vous (qui estes nostre souuerain seigneur & Prince) estes ainsi desrobé de vostre finance, & que toutes les finances chéent en vne bourse trouuée à vostre regard : & les deuantdits tant passez comme presens, sont riches, plains & garniz, & vous mettent & laissent en ceste necessité, & n'ont nulle pitié de vous ne du bien commun. Item & pource que icy dessus est faicte mention des estats, il semble à vostre fille, que generally en cedit Royaume au regard de toutes gens, les estats sont trop excessifs : & est fort à doubter que pour les inconueniens qui viennent chacun iour, Dieu ne se courrouce à son peuple. Item & quant à vn grand conseil on n'y tient pas telle ordonnance qu'il appartiendroit bien : car chacun y est à peu receu : & toutesfois n'y doiuent estre receuz que preud'hommes & saiges, tant clerks comme cheualiers, en nombre competant, prenans pension & gaiges de vous, & non de quelque autre seigneur, ayans l'œil à vostre proffit & à vostre honneur, & de vostre Royaume, & à la confirmation de vostre couronne, & seigneurie : & aduient maintesfois, que pour la grand multitude qui y est, les requestes qui vous sont faictes, & voz besongnes en sont delaisées. Et quand vne bonne conclusion y est prinse, comme il aduient aucunesfois, elle demoure à estre executée & sans estre mise à fin, combien que souuerainement vous touche, & aussi deuroient les ambassadeurs, tant estranges comme autres estre expediez : & quand vne conclusion est prinse, par meure deliberation, elle ne deuroit pas estre rompue par vn peu de gens, comme il aduient souuent. Item & est grand inconuenient d'ouïr les complaints pour longue expedition en voz besongnes, regardant la debilité de vostre Royaume. Et mesmement on voit le seigneur de Moubéron, le Vicomte de Murat & ceux de Rucelle eux complaignans sur ce que vostre conseil, ne leur fait pas bonne expedition : & ce qu'ils poursuiuent est pour le bien de vostre Royaume, & dient les aucuns que se autre prouision n'y est mise, faudra necessairement qu'ils facent paix auecques voz ennemis : & par ainsi estes vous en voye de perdre plusieurs de voz bons vassaulx. Item quand est au fait de la iustice de vostre Royaume. Et premierement au regard de vostre Court de Parlement, qui est souueraine Court de vostre Royaume, n'est pas ainsi gouuernée comme elle souloit : car on y souloit mettre haults & excellens Clerks & notables preud'hommes de meuraage, meurs & experts en droit & en iustice. Et pour le grand nom du droit qui estoit gardé en icelle Court, sans faueur d'aucune personne, non pas seulement les Chrestiens, mais les Sarrazins y sont venus receuoir iugement aucunesfois. Et depuis vn peu de temps pour la faueur d'amis, de parens & de priere, aucuns ieunes hommes ignorans le fait de iustice & indignes de si hault & si excellent office, y ont esté mis : dont le nom auctorité, & bonne renommée de ladicte Court est amoindry. Et aussi il y a autres inconueniens : c'est à sçauoir qu'en icelle Court sont plusieurs fils, freres germains, nepueux & affins ensemble : & tel y a qui ainsi est du lignages, comme le premier president : & par telle affinité se peuuent ensuiuir plusieurs perilleux inconueniens en ladicte Court. Item & en la Court sont plusieurs causes de pures gens comme mortes, & n'en font point



ceux de Parlement telle expedition comme ils deuroient par raison. Item quand est de la chambre des Comptes là sont trouuez tous mauuais accidens : car ils sont tous enseuelis . Et combien que depuis vn peu de temps y eussent esté mis aucuns nouveaulx , toutesfois ne s'apperçoit on point que aucune reparation y ayt esté faicte : entre lesquels nouveaulx y a esté mis Alexandre Boursier , qui par plusieurs fois à esté Receueur general des aydes , & n'a pas encores clos les compres comme on dit : & là pouez vous estre grandement fraudé , car celui qui deuroit estre reformé , est mis à reformer les autres. Item & à mieulx faire la besongne ledit Alexandre à tant practiqué , que Iean Vautier qui estoit son clerc , a esté mis oudit office de la recepte generale. Item & jaçoit ce que par les ordinations Royales , & par les sermens que font les receueurs, Vicomtes , treforiers & autres officiers du demaine : neantmoins par eux doiuent estre payées les aumosnes , mais par les dissimulations & tollerations desdictes offices des Comptes, ladicte ordination est souuent enfraincte, comme on dit. Item & quand est au fait de l'estat des Generaulx de Iustice, il semble & appert que telle multiplication d'officiers pour le fait des aydes est inutile en la grand dissipation de la substance de vostre Royaume : & finablement le grand nombre des Esleuz & des sergens , qui sont dessoubz lesdits officiers, qui receuent grans dons & grans gaiges , parquoy toute vostre substance est dissipée & amoindrie. Item & pareillement est des autres officiers qui sans nombre sont mis en plusieurs offices , par force d'amis . Et semblablement fault parler , des Generaulx de iustice : car ou temps du Roy Charles , n'en y auoit qu'un ou deux au plus , & maintenant il en y a sept , dont chacun à cent liures de gaiges sans les Greffiers. Item & qui voudroit parler des maistres des Requestes de l'hostel du Roy & des autres officiers , Dieu scet s'il y auroit à dire : car au temps passé on y mettoit anciens hommes & experts , cognoissans les coustumes de ce Royaume : & si auoient à respondre à toutes les supplications & requestes , & signer celles qui se faisoient à signer , parquoy elles estoient expediees à la chancellerie : & maintenant on n'y met que ieunes gens non sçachans & non experts , qui ne expedient riens si n'est par la voix du Chancelier : & à ceste cause aduient qu'on met plusieurs autres officiers extraordinaires pour supplier leurs deffaulx , lesquels ont grans gages en vostre preiudice. Item & quand est au fait de vostre Chancellerie , il est bien sceu que vostre Chancelier de France a soustenu maintes grans peines & est bien digne d'auoir grans prouffits , voire sans preiudice du bien commun : mais combien que pour ses gages il ne doie auoir que deux mille liures parisis , neantmoins depuis vingt ans en ça il en a prins outre lesdits deux mille liures parisis , & outre le don de deux mille francs sur les emolumens du féel. Item & outre ce il a prins le registre de & des remissions , qui monte sur chacune vingt sous parisis & peuuent monter par an en vne grand somme d'argent. Item & avec ce il a prins autres deux mille francs sur les aydes , ayans cours pour le fait de la guerre. Item & avec ce il prend chacun an deux cens francs pour ses vestemens. Item il a prins & prend chacun an sur le tresor pour la chancellerie de cinq à six cens liures parisis. Item & outre les choses dessusdictes il a eu sur les tailles & impositions plusieurs grans dons , qui se peuuent estimer à vne grand somme d'argent. Item il a legierement passé & scellé lettres



lettres de dons excessifs sans faire quelque resistance : & les particularitez seront trouuées par les comptes de Michel de Sabulon , d'Alexandre Boursier , & de plusieurs autres , qui ne se sont pas fains d'y faire leurs soupes. Item & à plus à plain declarer le precedent article on trouueroit plus de six mille francs de dons particuliers , qui vouldroit visiter les comptes des dessusdits & des autres receueurs Generaulx : desquels dons ledit Chancelier à seellé lettres , nonobstant qu'il sceust bien que ladicte finance estoit ordonnée pour le fait de la guerre. Item en ladicte Chancellerie est venu vn grand emolument d'argent , lequel emolument est à grand somme de deniers . Et sont gouuernées les finances dudit seel par maistre Henry Machalie , & par maistre Buder contrerolleur dudit seel de ladicte Chancellerie , & sur le droit du Roy prennent doubles gages : c'est à sçauoir du notaire & du secretaire sans leurs bourses : & en prennent aussi dons & pensions excessiues : & ainsi est la Chancellerie tellement gouuernée qu'il n'en vient pas grand prouffit à vous , jaçoit ce chose que l'emolument dudit seel soit bien grand : & quand est du droit des Notaires , jaçoit ce qu'ils prennent aucuns avecques eux tels que bon leur semble : comment ils se gouuernent , il sera plus à plain declairé au long quand besoing sera. Item & aussi , on treuve plusieurs officiers de vostre Royaume qui tiennent plusieurs offices incompatibles , lesquels ils font seruir par procureur , qui par diuerfes manieres extrayent les finances de voz subiects . Et n'est pas à oublier comme depuis vn peu de temps en ça vostre monnoye est grandement diminuée en poix & en valeur , entant qu'un escu est de mendre valeur qu'il ne fouldoit de deux soulds. Et les blancs de deux blancs chacun de deux oboles , laquelle chose est ou preiudice de vous & de vostre Royaume : & par ainsi est la bonne monnoye esparignée : car les changes & les Lombars cueillent tout le bon or , & font tous leurs payemens de nouvelle monnoye : & faut sçauoir , par laquelle procuration ceste monnoye est ainsi diminuée. Et est la commune renommée que c'est par le Preuost de Paris , par le Preuost des Marchans , & par Michel Laillier , qui ont attrait à eux la cognoissance des monnoyes. Item & supposé que les deuât-dits vous facét aucun proffit à l'occasion de ladicte diminution : toutesfois ce n'est pas comparaison à la perte que vous & la Royne y auez , comme ce sera plus à plain declairé par gens qui en ce se cognoissent. Item & jaçoit ce que vostre fille & vosdits subiects vous ayent en brief exposé les deffaulx & coupes des deuant-dits , toutesfois il ne souffist pas : car plusieurs iours ne souffiroient pas à vous exposer le mauuais regime des dessusdits , & de leurs semblables . Et pource que plusieurs autres personnes en sont coupables , desquelles personnes & de plusieurs autres choses vostre dicte fille & vosdits subiects s'en passe pour le present , en esperance de le vous declairer autresfois plus clerement pour le bien de vous & de vostre Royaume : & pour venir ( nostre tressouuerain seigneur ) aux dessusdits ayde , confort & conseil que vous auez requis de voz dessusdits nobles & bourgeois , que vous pour le present auez mandé , vostre fille , & voz subiects deuant-dits , vouldroient bien qu'il pleust à Dieu de eux donner grace de vous bien conseiller & conforter : car à ce faire sont prests de vous exposer leur corps & leur auoir de bon loyal cueur , ils y sont tenuz , & ainsi ont ils dernièrement conclud solemnellement en la derniere congregation :



car ils se reputent estre grandement obligez à vostre royalle majesté, tant de naturelle & legale obligation, comme pour les innumerables biens que vous leur avez fait. Premièrement pour vous aduiser, & affin qu'il vous plaise à remédier aux choses dessusdictes, il nous semble que pour auoir vne bonne & iuste fināce le plustost que faire se pourra, il est expedient que vous cloyez la main ausdits gouverneurs, sans nuls excepter, & qu'ils soient demis de leurs offices. Et avec ce tous leurs biens meubles & non meubles prins & mis en vostre main, & que soyez seur des personnes iusques à ce qu'ils vous ayent rendu compte de leur regime. Item & il est necessaire que vous anichillez tous dons assignez & pensions extraordinaires. Et incōtinent vous mandez tous voz receueurs & Vicomtes tant du domaine comme des aydes, & aussi des grenetiers: & que vous leur deffendez que dorefnauant sur peine de confiscation de corps & de biens, qu'ils vous apportent tout l'argent qu'ils pourront auoir, & que par quelconque assignation ils ne baillent à homme de quelque estat qu'il soit, fors à ceux tant seullement que vous ordonnerez de nouuel: & aussi qu'ils apportent leurs estats & toutes choses, dont ils se voudroient ayder: & quand ils seront venus, qu'ils ne parlent à nuls des gouverneurs dessusdits sur la peine dessusdictē. Item & pour auoir autre & prompte finance, il est expedient & necessaire veu que les aydes ont esté ordonnées pour le fait de la guerre & deffention de vostre Royaume & non pour autre vſage: Vous les retirerez par deuers vous dorefnauant, & mettrez en vostre main toutes aydes de vostre Royaume, que vous pouuez & deuez faire, attendu qu'elles sont vostre, & qu'elles ne doiuent tant seullement fors estre employées en voz deffentions quand le cas le requiert: & cōsideré que vous en auez grand necessité comme il appert, quelconque personne n'en deueroit estre mal content, & sur ce vueillez auoir en memoire le bon gouuernement de vostre pere le Roy Charles, à qui Dieu face mercy qui noblement employa lesdictes aydes: en tant qu'il chassa les Anglois ses aduersaires de son Royaume, & recouura les forteresses qui estoient hors de son gouuernement, & estoient ses officiers bien payez: & si luy demouroient grans finances, dont il a laissé plusieurs beaux ioyaux. Item & se ces choses deuantdictes ne souffissent à vous ayder: il nous semble que cōsideré que vous auez voz finances en plusieurs lieux, que vous pouuez prendre icelles finances, car elles viennent de vous: si comme sur plusieurs personnes qui vous seront denommées iusques au nombre de mille & six cens, qui sont riches & puissans & qui doiuent supporter les pauvres: desquels il en y a mille qui ne paye bien sans luy greuer l'un par l'autre cent francs: ausquelles restitutions sera faicte, par certaine maniere qui bien peut estre aduisée. Item qu'à receuoir voz finances tant du demaine que des aydes, fussent ordonnez notables personnes preud'hommes craignans Dieu sans auarice, qui ne se fussent oncquesmais entremis desdits offices qui eussent gaiges licites sans dons extraordinaires, par lesquels lesdictes finances fussent distribuées selon ce qui est necessaire, & l'autre mis en espargne. Item qu'ausdictes personnes ainsi esleustes, seront contrainsts lesdits receueurs & vicomtes de monſtrer leurs estats, comme dit est. Item il soit requis que toutes les cedulles de la despence ordinaire de vous, de la Roynes, & du Duc d'Acquitaine soient diligemment visitées. Et par ce pourra on ſçauoir combien montent lesdictes despences pour  
an,



an, qui ne montent pas à deux cens mille francs à tant que les gouuerneurs en lieu-  
uent tant sur la demaine comme sur les aydes. Item quand au regard de la  
court de Parlement, il est necessaire que ceux qui seront trouuez non souffisans  
soient deposez, & en leurs lieux mises certaines personnes notables, & qu'on y  
garde les conditions anciennes. Quand aux generaulx des finances, à la iustice,  
tresoriers, greffiers, leurs clerks y soit notablement pourueu & reduit selon le nō-  
bre & vsage ancien. Item en la chambre des comptes pareillement combien  
qu'en icelle soient aucuns bons preud'hommes anciens, qui vous deussent aduer-  
tir de cecy. Item quand aux esleuz de vostre Royaume & aussi aux receueurs  
des aydes, il nous semble que pour le bien de vous & de vostre peuple, & affin  
que vous ayez plus de finance: se les iuges eussent eu la charge desdictes finances,  
vous eussiez gaigné vne grand somme de deniers, lequel l'emportent les dessus-  
dits esleuz. Item il nous semble qu'on deuroit eslire par bonne & vraye ele-  
ction certains saiges hōmes, affin qu'ils soient seulz & pour le tout à vostre con-  
seil avec ceux de vostre lignage: Affin de vous loyaument conseiller & aduertir  
de voz besongnes & de vostre Royaume, non ayant l'œil à quelconque chose  
fors tant seullement au bien de vous & de vostre Royaume: & qu'en ce faisant  
feussent gardez & substentez de vous & de vostre iustice en telle maniere, que  
tout ce qu'ils aduiferoient pour le bien dessusdit fut mis à execution, sans con-  
tradictiō nulle: & qu'ils feissent à vous les sermens qui ont esté faits avecques en-  
cores autres sermens solempnels, comme il est dessus dit. Item & nous semble  
qu'on deuroit pourueoir aux frontieres de Picardie & d'Acquitaine & des au-  
tres pays, en donnant à chacune partie raisonnablement sommes d'argent pour  
la deffension desdictes frontieres, pour contrestier à la malicieuse occursion de  
ce Royaume, tellement & si conuenablement que nuls incōueniens ne s'en puis-  
sent ensuiuir. Item & à pourueoir aux inconueniens qui viennent chacun iour  
par les Preuosts, fermiers, & especiallement sur les pauures & simples gens: il est  
expedient d'aduiser bōnes & suffisans personnes, ayans gaiges raisonnables pour  
de vostre partie auoir regard sur les preuosts & fermiers, sans greuer les pauures  
gens en demandant amendes irraisonnables. Item & pource que lesdits in-  
conueniens sont moult grans, & qu'il y a plusieurs autres inconueniens & larre-  
cins qui ont ja grand temps duré: ausquels ne pourroit estre si tost pourueu, vo-  
stre fille & voz subiects deuantdits cōprennent & promettent d'eux y employer  
à leur pouuoir. Item vostre fille & voz subiects deuantdits vous supplient tant  
humblement que faire le peuuent, que vous vueillez remedier aux choses de-  
uandictes, & à sçauoir ceux qui ont eu excessiuelement voz tresors sans cause rai-  
sonnable. Et que vous vueillez ordonner aucunes personnes de vostre sang avec  
autres bonnes personnes, qui ne soient point de l'appartenance des deuantdits,  
qui puissent reformer tous ceux qui ont delinqué de quelcōque estat qu'ils soiēt.  
Item & qu'il vous plaise commander aux Prelats & bourgeois des Prouinces  
cy estans, qu'ils nomment tous ceux de leurs Prouinces, qui ont commis aucu-  
ne deffaute és choses deuandictes: lesquelles choses (nostre tressouuerain sei-  
gneur) vostre fille deuantdicte & vosdits subiects exposent treshumblement,  
comme ceux qui en trestoutes les choses du monde desirent vostre bien & hon-  
neur, à la conseruation de vostre couronne & domination: & ne l'a pas dit vo-



stredicte fille pour en amender temporellement, mais pour faire son deuoir : car chacun sçait bien qu'elle n'a pas accoustumé d'auoir les offices ne les proffits, ne de foy entremettre sinon de son estude, & de vous remonstrer ce qui est à vostre proffit & à vostre honneur quand les cas le requierent. Et jaçoit-ce qu'elle soit par plusieurs fois venue deuers vous, pour vous remōstrer plusieurs des dessusdictes choses: Toutesfois prouision n'y a pas esté mise, dont vostre Royaume est en si grand dāgier, que plus ne peut. Et faut ceste fois, que voz bons & loyaux subiects s'acquient deuers vous : & à demener ladicte besongne, vostre fille & subiets dessusdits requierent l'ayde de vostre fils aîné le Duc d'Acquitaine, & le Duc de Bourgongne qui pieça a encommencé ladicte besongne & prosecution, sans espargner cueur ne cheuance : avec lesquels s'est adioustée vostre dicte fille, considerans les choses estre raisonnables: mais par grans empeschemens qui par diuerses manieres y ont esté nagueres mis par aucuns des gouuerneurs dessusdits, doubtons estre reprins, ladicte prosecution a esté delaissee : car ils se sont enforcés de l'empescher de tout leur pouuoir, comme font ceux qui presentement sont. Requierent aussi les dessusdits à noz tresredoubtez seigneurs: c'est à sçauoir de Neuers, de Vertus, de Charrolois, de Bar & de Lorraine aux Conestable & Marechal de France, au grand maistre de Rhodes, à l'Admiral, au maistre des Arbalestriers, & generallyment à toute la cheualerie & escuyerie de vostre Royaume, qui est ordonnée pour la conseruation de vostre courōne: aussi à voz conseilliers, & à tous voz autres subiects que pareillement chacun selon son estat se vueille acquiter deuers vostre majesté. Et pource qu'aucuns des dessusdits ont dit publicquement, que ce que vostre fille dessusdicte vous expose, que c'est par haine & par relation de peu de gens: c'est à sçauoir de cinq ou de six. Plaise vous sçauoir qu'elle n'a pas accoustumé de foy informer par ceste maniere: Mais elle a esté informée par ce que la chose est toute claire & notoire : & cuyde qu'il n'y ait cy homme de si petit entendement, qui ne cognoisse bien la deffaute des dessusdits. Et aussi en a esté aduertie par plusieurs personnes aymās vostre bien: mais par telle n'ont ils pas gagné leur cause : car pour quelsconques de leur vouldenté elle ne se taira pas, sauue vostre volontaire audience. Et conclud vostre dicte fille que vous poursuiuez diligēment les choses deuādictes, sans quelque dilatio, & à ce poursuiuir se veut elle employer sans faire quelque faute enuers vous : car autrement vostre dicte fille ne s'acquitteroit pas enuers vostre dicte majesté royale. Apres laquelle conclusion faicte par l'Vniuersité de Paris, & qu'ils eurent requis aux Princes & seigneurs, & aussi aux Prelats là estans d'estre aduoüez de ce qu'ils auoient dit & proposé pour le bien du Roy, de son Royaume, & de la chose publique: & que les dessusdits les eurent aduoüez en eux disant, qu'ils estoient prests de les assister du tout, en mettant & faisant mettre toutes les besongnes dessusdictes à pleine execution : les gouuerneurs du Roy, c'est à sçauoir de ceux qui auoient eu la gouerne des fināces furent fort esmerueillez, & eurent grand doute qu'ils ne feussent arrestez personnellement. Et entre les autres maistre Henry de Marle Chancelier de France, veant qu'il estoit accusé comme les autres, par certains moyens qu'il trouua se trahit deuers le Roy, & fait tant par ses belles parolles qu'il fut bien cōtent de luy, par si qu'il luy promet à payer vne grosse somme d'argent en dedās briefs iours ensuiuant. Et le samedi ensuiuant second iour de



de Mars Andrieu Guiffart vn des tresoriers fut prins & mis en chastellet, & son compaignon Jean Guerin s'en fuit en vne Eglise, & là se teint messire Pierre des Essars Preuost de Paris, qui nagueres auoit eu grand gouuernement au voyage de Bourges: lequel le Duc de Bourgongne auoit tousiours soubstenu, mais l'amour estoit refroidée, par ce qu'il l'estoit depuis peu de temps monstre trop affecté à la partie d'Orleans: se partit de la ville de Paris, & enuoya à Charenton pour prendre le pont pour auoir passage, Thomelin de Brie & autres cinq hommes d'armes: lesquels furent prins par ceux de ladicte ville de Charenton, qui en estoient aduertis & emmenez prisonniers en la tour du Louure. Et ledit Preuost prenant autre chemin eschappa, & s'en alla à Chierrebours, dont il estoit capitaine, & là se teint aucune espace de temps. Et brief ensuiuant, le Baudrin de la Heuse fut constitué Preuost de Paris, & lors le Roy fut malade de sa maladie accoustumée. Et pourtant toutes les besongnes du Royaume estoient conduictes par le Duc d'Acquitaine: & adonc fut ordonné que plusieurs officiers Royaux, & par especial ceux qui auoient en main les finâces du Roy, seroient arrestez iusques à tant qu'ils auroient rendu compte de toutes leurs receptes.

*Comment le Duc d'Acquitaine se courrousa à son Chancelier: des enuies qui se meurent entre les grans seigneurs & d'autres besongnes.* CHAP. C.

**E**N ces iours en plain conseil royal où presidoit le Duc d'Acquitaine, se meurent aucunes parolles entre le Chancelier de France & maistre Jean de Neelle Chancelier d'Acquitaine: Et tât que par leurs parolles fut dit par ledit Chancelier de France qu'il ne disoit pas euangille: & iceluy respondit follement, qu'il mentoit par ses dents: & plusieurs fois luy repeta telles iniures & pareilles: & adonc le Chancelier de France luy dit vous m'iniuriez & l'avez autresfois fait, moy qui suis Chancelier du Roy: neantmoins ie l'ay tousiours porté & souffert pour l'honneur de monseigneur d'Acquitaine qui est cy present, & ay encores en pensée de le faire. Et lors ledit Duc d'Acquitaine oyant les parolles dessusdictes tout esmeu d'ire, print son Chancelier par les espaulles & le bouta hors de la chambre, en disant: vous estes vn mauvais ribault & orgueilleux, ne nous n'auons plus cure de vostre seruice, qui avez ainsi iniurié en nostre presence le Chancelier de monseigneur le Roy: laquelle chose ainsi faicte, ledit sire de Dolhaing rendit ses seaulx, & en son lieu fut fait Chancelier maistre Jean de Vailly aduocat en Parlement: nonobstant ladicte Royne cuida appaiser son fils & mesmement ledit Duc de Bourgongne, qui l'auoit mis oudit office: mais ils ne le peurent nullement fleschir, car desia il commençoit fort à dominer, & vouloit que toutes ses gens & ceux de son Royaume se conduisissent du tout à son plaisir: & disoit aucunesfois à ses feables, qu'à luy touchoit plus qu'à nuls autres: & avec ce auoit souuent qui luy remonstroient secrettement, que dorefnauant il auoit sens & aage cōpetant pour prendre le gouuernemēt dudit Royaume, & que faire le deuoit attendu la necessité où estoit le Roy son pere: & entre les autres le Duc de Bar, le Duc Loys en Bauiere, le Comte de Vertus & autres de ceste alliance, qui adonc se tenoit à Paris, & le visitoient tressouuent, & ne desiroient autre chose qu'il en prinst le gouuernement, & de tout ce estoit assez aduertiy le Duc de Bourgongne, & apperceuoit assez que de



routes les besongnes se paracheuoient, & machinoient à intention de le mettre hors dudit gouuernement du Royaume: si ne le prenoit pas bien en gré, & auoit plusieurs imaginacions, esquelles il luy souuenoit bien de ce que ledit Duc d'Acquitaine luy auoit dit deuant Bourges, qu'il feroit finer la guerre: & auoit cogneu que le traicté fut fait outre les promesses, qui auoient esté iurées & conclues à Paris present le concil Royal: Neantmoins il monstroient semblant que riens ne luy en fut. En outre en ces mesmes iours, fut donnée la Comté de Poitou à Iean de Tourraine son second fils: & ce à l'instance & pourchats du Duc Guillaume Comte de Haynum, duquel il auoit espousé la fille: Et nonobstant que ceux de la ville y resistassent à leur pouuoir, vueillās demourer soubs la seigneurie du Roy, si en fut la possession prinse par ledit Duc de Tourraine par les seigneurs d'Andregines & de Mouchas familiers de celuy Duc Guillaume: & porterent les lettres audit d'Aneuille, auquel elles furent publiées. Esquels iours est à sçauoir enuiron la my-Karesme aucuns bourgeois, & le commun de la ville de Soissons soudainement s'esmeurent, & vindrent au chastel de leur cité: si rompirent le mur dudit chastel, qui ioignoit aux murs de leur ville tant d'un costé comme d'autre. Et tout ce firent affin que par tout la circuité de leurdicté cité, peussent aller sur leur muraille sans dangier: & avec ce demolirent le pont venāt d'iceluy chastel sur la riuere, affin que nuls ne peussent estre mis ens sans nauire n'autrement, ce que par auant se pouuoit faire sans leur congé: lequel chastel appartenoit au Duc d'Orleās qui en fut tresdeplaisant, mais à present ne le pouuoit auoir autre. Nonobstant qu'il en fait plusieurs complainctes enuers le Roy & son conseil, pour en auoir reparation. Et adonc à l'instance du Duc d'Acquitaine, fut rendu à sa femme & à ses enfans le chief & corps de messire Mansart du Bos, lequel auoit esté decapité à Paris comme dit est deuant. Et à dix heures en la nuit son chief fut osté des halles, & son corps de Montfaulcon & mis ensemble en un fercus fut porté en la ville de Rainseual ou diocèse d'Amiens, & là fut enterré honorablement empres son pere & ses predecesseurs.

*Comment Henry de Lenclastre Roy d'Angleterre qui auoit esté tres vaillant cheualier trespassa en cest an: & de l'alliance d'entre luy & les Princes de France.*

## CHAP. CI.

**E**Nuiron la fin de cest an Henry de Lenclastre Roy d'Angleterre, qui en son temps auoit esté tres vaillant cheualier, esgre & subtil contre ses ennemis: & lequel comme en autres histoires est plus à plain declaré pour venir à l'honneur & possession de la couronne dudit Royaume d'Angleterre, auoit iadis par certains moyens assez estranges, & peu honorables debouté d'iceluy Royaume son propre cousin germain Richard Roy d'Angleterre, apres qu'il en auoit possédé paisiblement l'espace de vingt deux ans, moult aggraué & piteusement oppressé de la maladie de lepre termina sa vie, & fut mis en sepulture royellement & honorablement en l'Eglise de Vastemoustier empres ses predecesseurs: lequel Roy delaisa quatre fils: c'est à sçauoir le premier nommé Henry, qui estoit Prince de Galles, & succeda oudit Royaume: Le second estoit nommé Thomas Duc de Clarence: Le tiers Iean Duc de Bethfort: Le quart Honffroy Duc de Clocestre: & auoit vne fille qui fut mariée au  
rouge



rouge Duc de Bauiere: lesquels quatre freres dessusdits estoient tous beaux personnages, bien adressez en plusieurs sciences: & eurent chacun d'eux depuis assez grand gouuernement, dont il sera faicte aucune mention cy apres: toutesfois il faut parler aucunement d'aucunes parolles qu'iceluy Roy deffunct dit à son fils aîné à son derrain. Verité est que luy estât par plusieurs iours si estrainct de maladie, que plus ne pouuoit: & que ceux qui de luy auoient la garde vn certain iour, voyans que de son corps n'issoit plus d'alaine, cuidans pour vray qu'il fut transis, luy auoient couuert le visaige. Or est ainsi que comme il est accoustumé de faire ou païs, on auoit mis sa courōne royal sur vne couche assez pres de luy: laquelle deuoit prendre presentement apres son trespas son dessusdit premier fils & successeur, lequel fut de ce faire assez prest: & print ladicte couronne & emporta sur le donner à entendre desdictes gardes. Or aduint qu'assez tost apres le Roy iecta vn soupir, si fut descouuert, & retourna en assez bonne memoire: & tant qu'il regarda où auoit esté sa couronne mise: & quand il ne la veit, demanda où elle estoit, & ses gardes luy respondirent. Sire, monseigneur le Prince vostre fils l'a emporté: & il dit qu'on le fait venir deuers luy & il y vint. Et adonc le Roy luy demanda pourquoy il auoit emporté sa couronne, & le Prince dit: Monseigneur voicy en presence ceux qui m'auoient donné à entendre & affermé qu'estiez trespasé, & pource que suis vostre fils aîné, & qu'à moy appartiendra vostre couronne & Royaume, apres que serez allé de vie à trespas l'auoye prinse. Et adonc le Roy en soupirant luy dit: beau fils comment y auriez vous droit, car ie n'en y euz oncques point, & ce sçauiez vous bien. Monseigneur, respōdit le Prince: ainsi que vous l'avez tenu & gardé à l'espée, c'est mon intention de la garder & deffendre toute ma vie: & adonc dit le Roy, or en faictes comme bon vous semblera: ie m'en rapporte à Dieu du surplus, auquel ie prie qu'il ait mercy de moy. Et brief apres sans autre chose dire, alla de vie à trespas. Et apres qu'il fut mis en terre (comme dit est dessus) ledit Prince de Galles fut couronné treshonorablement par tous les Princes & Prelats du Royaume d'Angleterre: & ne fut homme de quelque estat qu'il fut, qui s'apparut pour luy contredire: & tantost apres le Duc de Clarēce & les autres Anglois qui estoient encores en la Duché d'Acquitaine, quand ils ouyrent les nouuelles de la mort de leur Roy, retournerent au plus brief que faire le peurent ou Royaume d'Angleterre, & jaçoit-ce qu'il y eut trefues entre les deux Royaumes: Nonobstant ce, apres sa mort lesdits Anglois des frontieres de Calais, commencerent à courir & à trauailler tres fort le païs de Boullenois: & tant qu'il faillut que le Connestable renforçast ses garnisons d'Ardre, Grauellines & autres lieux tenans le party des François.

S' E N S V I T la copie des lettres du traicté que fait Henry Roy d'Angleterre, & ses enfans d'une part, & les Ducs de Berry, d'Orleans & de Bourbon, les Comtes d'Alençon & d'Armignac, le seigneur d'Albreth & autres de leur alliances d'autre part en cest an mille quatre cens & douze, le huictiesme iour de May. Premierement fut accordé par lesdits seigneurs ou par leurs procureurs, que dorénavant exposeront leurs personnes, & toutes leurs finances & puissance à seruir leur Roy d'Angleterre, ses hoirs & successeurs toutes & quantesfois qu'ils en seront requis, en toutes ses iustes querelles: lesquelles iustes querelles recognois-



sont que ledit Roy d'Angleterre maintient iuste querelle en la Duché de Guienne, & en ses appartenances, & que ladicte Duché de Guienne luy appartient par droit heritage & succession naturelle: & declairent des maintenant, qu'ils ne blefferont aucunement leur loyauté en assistant en ce avec ledit Roy.

Item lesdits seigneurs & leurs procureurs souffisamment fondez, offrent leurs fils, filles, nepueux, niepces, parens, affins & tous leurs subiects pour contraindre mariages selon ladicte discretion dudit Roy d'Angleterre. Item offrent, villes, chasteaux, tresors, & generallyment tous leurs biens à l'ayde dudit Roy & secours, & de ses hoirs pour ses droits & querelles deffendre, sauue leur loyauté: laquelle ils declairent aucunement en autre appoinctement, dont lettres sont faictes & passées. Item offrent lesdits seigneurs audit Roy generallyment tous leurs amis, adherans, alliez & bien vueillans à seruir ledit Roy & ses querelles: & en la restitution de ladicte Duché de Guienne. Item toute fraude cessant lesdits seigneurs sont prests de recognoistre audit Roy ladicte Duché de Guienne estre sienne en autelle, & semblable franchise qu'oncques aucuns de ses predecesseurs la tint & posseda. Item recognoissent lesdit seigneurs & leurs procureurs, que toutes les villes, chasteaux & forteresses qu'ils tiennent en ladicte Duché de Guienne, ils les tiennent dudit Roy d'Angleterre comme de leur vray Duc de Guienne, en promettant tous seruices deuz pour hommages, par la meilleure maniere qu'ils se peuuent faire. Item promettent à bailler & deliurer audit Roy d'Angleterre en tant qu'à eux est toutes les villes, chasteaux qu'on dit estre appartenans à la Royauté d'Angleterre, qui sont en nombre vingt que villes que chasteaux declairez és lettres sur ce faictes. Et au regard des autres villes & forteresses qui ne sont point en leur puissance & seigneurie, ils les acquesteront & ayderont à acquester audit Roy d'Angleterre, à sesdits hoirs & deputez & à leurs despens, avecques leurs gens en nombre souffisant. Item cy apres est contenu & declairé esdictes lettres seellées: comment il plaist au Roy d'Angleterre que le Duc de Berry son loyal oncle subiect & vassal, le Duc d'Orleans subiect & vassal: Et pareillement le Comte d'Armignac tiennent de luy en foy & en hommage les terres & seigneuries qui s'ensuiuent. Le Duc de Berry tiendra la Comté de Poictou sa vie durant, le Duc d'Orleans tiendra la Comté d'Angoulesme sa vie durant, & la Comté de Pierregourt à tousiours: le Comte d'Armignac tiendra quatre chasteaux declairez esdictes lettres seellées, moyennant ce & parmy certaines seuretez & conditions declairées en icelles lettres. Item & parmy les promesses dessusdictes ledit Roy d'Angleterre & Duc de Guienne, doit deffendre les dessusdits seigneurs enuers tous & contre tous & eux ayder & bailler secours, comme leur vray seigneur: & avecques ce leur fera & aydera à faire bon accomplissement de iustice du Duc de Bourgogne. En outre ne fera ledit Roy d'Angleterre nuls traictez, confederations n'accord avecques le Duc de Bourgogne ne ses enfans, freres, cousins n'alliez sans le consentement desdits seigneurs. Item est accordé que ledit Roy d'Angleterre aydera lesdits seigneurs, comme ses vrais vassaulx en toutes leurs iustes querelles, & à la recompensation des dommages & offences à eux iniustement faictes par ledit Duc de Bourgogne & ses alliez. Item leur enuoyera presentement ledit Roy d'Angleterre huiet mille combattans, pour eux faire secours contre ledit Duc de Bourgogne, qui



qui s'enforce de mettre le Roy de France à tout sa puissance cōtre iceux: lesquelles lettres de confederation & alliance entre icelles parties furent passées & scellées des seaulx desdictes deux parties le huictiesme iour de May de cest an mille quatre cens & douze. Toutesfois les seigneurs dessusdits promeirent de payer les gens d'armes que le Roy d'Angleterre deuoit liurer & à ce s'obligerent souffisamment.

*Pour l'an mille quatre cens & treize.*

*Comment les officiers du Roy estoient en grād doubte de la prinse messire Pierre des Essars & du Duc de Bar: & de plusieurs autres besongnes faictes par les Parisiens.*

CHAP. CII.

**A**V commencement de cest an, les officiers du Roy de France: c'est à sçauoir ceux qui auoient le gouuernement des fināces depuis vingt ans par auant, estoient moult fort pressez & contraincts de rendre compte, & se faisoient plusieurs informations à l'encontre d'eux tāt publicquement comme secrettement, dont la plus grand partie d'iceux estoient en grand doubte & souspeçon (comme dit est ailleurs) comme ils pourroient eschapper: car desia en y auoit plusieurs arrestez personnellement, & les aucuns festoient renduz fugitifs: desquels on auoit mis tous leurs biens en la main du Roy. Si queroient diuers moyens enuers les Princes qui gouuernoient le Roy, entre lesquels messire Pierre des Essars qui s'en estoit fouy à Cherebourg par aucuns moyens, qu'il eut enuers le Duc d'Acquitaine fut remandé à venir dedans ledit lieu de Paris, & entra secrettement dedans la Bastille saint Anthoine, & avec luy Anthoine son frere. Mais toutesfois il fut aucunement sceu par aucuns des bourgeois de Paris qui pas ne l'aymoient, & le feirent sçauoir au Duc de Bourgongne & ses gens, qui pareillement de luy n'estoient pas contens: si fut assez brief faicte vne grād assemblée de communes de Paris: avec lesquels allerent messire Elion de Iacqueuille lors capitaine de Paris, & aucuns autres des gens du Duc de Bourgongne, & tous ensemble allerent deuāt ladicte bastille: & tant feirent qu'ils eurent en leurs mains le dessusdit messire Pierre des Essars & son frere Anthoine, & les menerent prisonniers au chastel du Louure, & depuis furent menez au palais: & apres ces besongnes accomplies les dessusdictes communes de rechief s'assemblerent iusques au nombre de six mille ou enuiron sous l'estandart dudit Iacqueuille, avec lesquels s'adioignirent messire Robinet de Mailly, messire Charles de Lens & plusieurs autres hommes d'armes de l'hostel du Duc de Bourgongne: & tous ensemble enuiron à dix heures de matin allerent eux mettre deuant l'hostel du Duc d'Acquitaine, & estoient les principaux esnouueurs d'icelles communes, Iannot Caboche escorcheur de vaches au Maisiel S. Iacques, maistre Iean de Troyes surgien à Paris & Denisot de Chaumont: lesquels entrerent dedans l'hostel, & allerent audit Duc d'Acquitaine disant en ceste maniere. Nostre tresredoubté seigneur, voyez cy les Parisiens non pas tous en armes, qui de par ceste bonne ville de Paris pour le bien de vostre pere & de vous, requierent qu'on leur liure aucuns trahistres qui sont en vostre hostel de present. A quoy ledit Duc respondit par grand fureur, que ce n'appartenoit pas à eux: & aussi qu'il n'y auoit nuls trahistres en son hostel. Auquel ils dirent, que



fil les vouloit bailler qu'il les baillast, ou si non en la presence de son visage, ils les prendroient & puniroient selon leurs demerites: & entre-temps le Duc de Bourgogne & le Duc de Lorraine fouruenans, y alla aucuns desdits Parisiens & entrerent dedans ledit hostel: & de fait prindrēt maistre Iean de Vailly Chancelier nouuel dudit Duc, Edouard Duc de Bar cousin germain du Roy, messire Jacques de la Riuere, les deux fils du seigneur de Boissay, Michel de Vitry & son frere, les deux fils messire Regnault de Guiennes, les deux freres du Maisnel, les deux de Geremmes & Pierre de Naiffon. Et adonc ledit Duc d'Acquitaine voyant en sa presence estre fait vn tel outrage iecta ses yeux deuers le Duc de Bourgogne, & par grand courroux luy dit: beau pere, ceste mutation m'est faicte par vostre conseil, & ne vous en pouuez excuser: car gēs de vostre hostel sont les principaux. Si scachez seurement qu'une fois vous en repentirez, & n'ira pas tousiours la besongne ainsi à vostre plaisir. A quoy ledit Duc de Bourgogne respondit, en soy excusant aucunement: monseigneur vous vous informerez, quand serez refroidy de vostre ire: & adonc nonobstant les parolles dessusdictes furent emmenez tous ceux qui auoient esté prins, & mis en diuerſes prisons. Et apres allerent querir maistre Raoul Bridoul secretaire du Roy: lequel ainsi qu'ils l'emmenoient, fut feru par l'un d'iceux qui le hayoit, d'une hache en la teste & l'autre le bouta en seine & fut mort: Et aussi occirent vn tappissier moult riche & bien emparlé nommé Martin d'Aue: & si tuerent vn canonnier qui auoit esté Orleannois tres excellent ouurier de ce faire: lequel ils laisserent tout nud deux iours deuant sainte Katherine, & apres contraignirent monseigneur d'Acquitaine à demourer à l'hostel de S. Pol avec le Roy son pere: & garderent curieusement les portes, affin qu'il ne s'en allast hors de ladicte ville de Paris: & disoient aucuns d'eux, qu'on le faisoit pour sa correction: car il estoit de ieune aage, & ne pouoit souffrir estre redargué de quelque personne: les autres assignoient plusieurs autres causes: entre lesquelles l'une estoit, pource qu'il vouloit aller le premier iour de May iouster au Bois de Vincenne, & qu'il auoit mandé à messire Pierre des Essars qu'il emmenast six cens bacinets, & les payast pour vn mois, lequel mandement estoit ja executé: & aussi que le Duc d'Orleans & les autres de sa partie faisoient grand assemblée de gens d'armes, pour estre avec ledit Duc d'Acquitaine au iour dessusdit, dont le Duc de Bourgogne & iceux Parisiens n'estoient pas bien contens. Et pour vray c'estoit piteuse chose de veoir lors le regne desdictes communes, & comment ils conduisoient dedans Paris tant enuers le Roy comme enuers les autres seigneurs. Et de rechief escrirent les autres Parisiens leurs lettres à plusieurs bonnes villes du Royaume: contenant que ce qu'ils auoient fait estoit pour le bien du Roy, requerās que se besoing leur estoit le voulsissent conseiller, ayder & cōforter en tous leurs affaires: & aussi que tous ensemble demourassent à la fidelité & seruice du Roy & de son aîné: en apres affin que quelque congregation n'assemblée de gens d'armes ne fut faicte par aucuns des seigneurs, fut fait vn edit de par le Roy à la requeste d'iceux Parisiens, adressans à tous les Baillifs & Seneschaux du Royaume duquel la teneur s'ensuit.

CHARLES par la grace de Dieu Roy de France au Baillif d'Amiens ou à son lieutenant salut: comme és diuisions & debats qui nagueres estoient en nostre Royaume, nous & nostre trescher premier fils Duc d'Acquitaine Dauphin de



de Viennois, ayons tant labouré, que Dieu donnant ayons ordonné bonne paix estre & demourer en nostre Royaume. Laquelle ceux de nostre lignée pour la plus grand partie ont fiance à tenir icelle. En outre ont promis de iurer & le iurerent entretenir à leur pouoir: & ne l'oist aucun faire quelque mandement n'assemblée de gens d'armes, sinon de nostre expres mandement. Nonobstant ce, auons nous entendu qu'aucuns de nostre sang, & aucuns autres se preparent d'assembler gens d'armes & autres gēs par maniere de compagnie en plusieurs parties de ce Royaume, sans de ce auoir licence de nostre partie: laquelle chose est & pourroit estre à nostre tresgrand charge, & s'en pourroient ensuiuir plusieurs inconueniens s'il n'y estoit breiefuement pourueu de remede. Pour laquelle chose nous vous mandons & expressement enioignons, que de vostre partie soit publié publicquement en tous les lieux publiques de vostre bailliage. En deffendant de par nous & sur peine de confisquer corps & biens, que quelconque personne de quelque estat qu'elle soit, soit baron, cheualier ou autre ne voise en armes au mandement de quelque seigneur, sinon au mandement de nous ou de nostre fils, ou de nostre bien-aymé cousin le Comte de saint Pol Connestable de France ou autre nostre commis. Et affin qu'il leur appere de ce, nous vous enuoyons noz lettres seellées de nostre grand seel en nostre conseil. Et leur soit enioinct que toutesfois & quantesfois qu'ils seront mādéz par nous ou par nostre dit fils, viennent. Et par tant que noz treschiers oncle & cousin: c'est à sçauoir les Ducs de Berry & de Lorraine, sont continuellement en nostre seruice, nostre intention n'est pas que leurs vassaulx & subiects ne puissent venir deuers eux toutes & quantesfois qu'ils seront mandez, & pour eux employer de nous seruir: & faucuns de ladicte baillie font le contraire: nous voulons, & par la teneur de ces presentes vous mandons que vous les contraignez par prinse de corps & de biēs, qu'ils soient (comme ils sont) tenus à leur souuerain seigneur. Donné à Paris le ix. iour de May, l'an de grace mille quatre cens & treize, & de nostre regne le vingt troisieme. Ainsi signées par le Roy, à la relatiō du conseil tenu par le Duc d'Acquitaine, où estoiet les Ducs de Berry, de Lorraine & plusieurs autres. I. millet: lequel mandement fut tantost enuoyé es lieux accoustumez & publié. Et alors tous les Parisiens auoient esté d'une liurée, laquelle ils portoient, de blancs chapperons: Affin qu'ils peussent mieux cognoistre ceux qui estoiet de leur party & alliance. Et mesmement les feirent porter à plusieurs Princes & autres notables seigneurs, & aussi à plusieurs gens d'Eglise: & qui plus est, depuis le porta le Roy en propre personne: laquelle besongne sembla estre à plusieurs preud'hommes grand derrision, attendu les detestables & cruelles manieres qu'auoient tenu & encores tenoient iceux Parisiens, lesquelles n'estoient pas à tolerer n'à souffrir: toutesfois ils estoient lors si puissans & obstinez en leur mauuaitié, que les Princes ne sçauoient pas bonnement y pourueoir. Toutesfois iceux auoient grand fiance & esperance qu'ils seroient soubstenuz & aydez du Duc de Bourgogne, & de ceux de son party se besoing leur estoit.

*Comment les dessusdits Parisiens feirent proposer en la presence du Duc d'Acquitaine & autres Princes, ce que bon leur sembla & autres cruantez faictes par eux.*





N apres l'vnziesme iour de May ensuiuant par vn ieudy: la bonne ville de Paris laquelle eut audience fait proposer deuant les Ducs d'Acquitaine, de Berry, de Bourgongne, de Lorraine, & deuant les Comtes de Neuers, Charrolois, & deuant plusieurs autres Prelats, cheualiers & autres gens portans blancs chapperons pour leur liurée, qui passoit le nombre de douze mille, aucunes choses: en la fin de la proposition feirent bailler audit Duc d'Acquitaine vn roolle, lequell voulut refuser: Mais ils le contraignirent à le prendre, & là le feirent lire en publicque: ens ouquel estoient nommez soixante trahistres, tant presens comme absens: les presens presentement prins & mis en chartre iusques au nōbre de vingt: Entre lesquels estoient le seigneur de Boissay, le maistre de l'hostel du Roy, Michel Laillier, & autres iusques au nombre dessusdit. Et les absens furent appelez par les carrefours de Paris au son de la trompette, aux droits du Roy, & dedās brief iours sur peine de confisquer corps & biens quelque part qu'ils fussent. Et est vray que le dixhuiictiesme iour de May le Roy fut sané de sadiète maladie: & de son hostel de saint Pol vint à la grand Eglise de nostre Dame portant blanc chapperon comme les autres Princes: & apres qu'il eut fait son oraison, il s'en retourna en sondit hostel accompagné de grand multitude de peuple tant procedant comme ensuiuant. Et apres le lundy vingtiesme iour de May lesdits Parisiens à grand multitude d'hommes d'armes environnerent leur ville: & enuoyerent leurs gouuerneurs: iceux, affin que nully ne s'en peust fuyr ne faillir hors de leurdiète ville, & les portes estoient closes & fermées auec les tappeculs & serrures, & y auoit garde d'hommes à grand multitude bien armez de toutes armeures: Et establirent certains hommes armez sur chacune rue de Paris par dizaines. Et ce fait le Preuost des Marchans, Escheuins, & tous les gouuerneurs de ladiète bonne ville vindrent à grand multitude tous armez en l'hostel de S. Pol: & ens en trois tours dudit hostel meirent & ordōnerent leurs gens d'armes, & leur dirent ce qu'ils deuoient faire: & puis allerent deuers le Roy, auecques luy la Royne & son fils qui de ce riens ne sçauoiēt. Et pour lors auoit à Paris vne grand assemblée de seigneurs: c'est à sçauoir les Ducs de Berry, de Bourgongne, de Lorraine & Loys Duc en Bauiere frere de la Royne, lequel deuoit le lendemain espouser audit lieu de saint Pol la sœur du Comte d'Alençon: laquelle auoit eu espousé le Comte de Mortaigne: c'est à sçauoir messire Pierre de Nauarre: & y estoient aussi les Comtes de Neuers, de Charrolois, de saint Pol Connestable de France, & autres plusieurs grans seigneurs Barons & Prelats en tresgrand nombre. Et là feirent faire vne proposition deuant le Roy par vn Carmeliste nommé frere Eustache, lequel print son theume tel, c'est à sçauoir. *Nisi dominus custodierit ciuitatem suam, frustra vigilat qui custodit eam.* Qui vault autant à dire. Se le seigneur ne garde sa cité, qui la veille labeure en vain: laquelle proposition exposée apres prescha moult bien, & là fait aucune mention des prisonniers & du mauuais gouuernement de ce Royaume, & des maulx qui se faisoient, parla aussi moult grandement. Et finée sa collatiō & predication, le Chancelier de France luy dit, qu'il se fait aduoüer: Lequel auoit au dos le deuantdit Preuost des Marchans & les Escheuins de la ville de Paris, lesquels incontinent l'aduouèrent. Mais pourtāt qu'il n'estoit là present qu'un petit de gens, & qu'ils ne parloient pas assez hault à la  
voulenté



voulenté du Chancelier: aucuns descendirent de la chambre, & appellerent de plus grans & notables personnes des bourgeois & de plus grand lignée de Paris, qui estoient avec les autres armez esdictes cours. Lesquels vindrent tous ensemble deuers le Roy les genoulx ployez, & là aduoüerent ledit frere Eustache, en luy exposant la bonne & deuote amour & voulenté qu'ils auoient à luy & à sa generation & famille: & cōment à sa maiesté royale vouloient seruir de cueur pur & nect, & que tout ce qu'ils auoient fait c'estoit pour le biē & vtilité de luy, de sa generation & pour le bien publicque de tout son Royaume, & aussi à la conseruation de sa domination & seigneurie: & entre-temps le Duc de Bourgongne voyant icelle armée & assemblée en l'hostel du Roy estans en trois, descendit deuers eux, & leur pria trefadcertes, qu'ils s'en allassent de là en eux demādant qu'ils vouloient, & à quoy ils estoient là venus ainsi armez. Car il n'estoit pas bon n'expedient que le Roy lequel n'auoit gueres qu'il estoit retourné de sa maladie vous voye ainsi assemblez & mis en armes: lesquels respondirent qu'ils n'estoient pas assemblez pour mal, mais pour le bien du Roy & dudit Royaume, en luy baillāt vn roolle & disant, qu'ils ne se partiroient de là pour quelque chose iusques adōc qu'on leur eut rēdu & baillé ceux qui estoient en escrit oudit roolle: c'est à sçauoir Loys de Bauiere frere de la Roine, & les cheualiers qui s'ensuiuent, Charles de Villers, Courard Bayer, Iean de Neel, le seigneur d'Olhaing, l'Archeuesque de Bourges: c'est à sçauoir maistre Guillaume Bouragier cōfesseur de la Roine, Ieā Vincēt, Coline de Pieul, Ieānet de Cousteuille, Mainffroy tresorier du Duc d'Acquitaine & vn cheuaucheur du Duc d'Orleans, qui estoit là adonc venu à celle heure, & auoit apporté lettres au Roy de par son maistre, dame Bonne d'Armignac, dame de Montauben, la dame du Quesnoy, la dame d'Aueluys, la dame de Noyon, la dame du Chastel & quatre damoiselles. Et quand ledit Duc de Bourgongne veit q̄ riens ne proffitoit chose qu'il dit, s'en retourna deuers la Roine & luy dit ce qu'ils demādoient, en luy monstrant ledit roolle: laq̄lle moult troublée appella son fils d'Acquitaine, & luy cōmanda & dit qu'il allast avec ledit Duc de Bourgongne deuers iceux: Et de par elle leur priaissent tous deux affectueusement, que iusques à huiēt iours tāt seullement se vueillent deporter de la prinse de son frere: & au viij. iour sans nulle faute elle leur baillera à faire leur voulenté, ou sinon au moins souffrent qu'elle puisse se faire mener apres eux là où ils le voudrōt auoir prisonnier, soit au Louure, au Palais ou ailleurs: laquelle chose ouye de sa mere, si retourna ledit d'Acquitaine vn petit arriere en vne chambre de secret, & là commença à plorer: lequel par l'enhortemēt du Duc de Bourgongne s'abstint de plorer, ce qu'il peut en torchant ses larmes. Puis issit & vint à eux: & là ledit Duc de Bourgogne leur exposa la requeste de la Roine en brief: lesquels du tout reffusans dirent & afferment qu'ils monteroient en la chambre de la Roine. Et voyant le Roy en sa presence le prédroient & les emmeneroient prisonniers, s'on ne les leur bailloit promptement. Et quand lesdits Ducs ouyrent celle responce, ils retournerent deuers la Roine: & present sondit frere, qui estoit venu deuers le Roy à elle, & parloient ensemble & ce qu'ils auoient trouué ils luy dirent: Adōc le frere de la Roine voyāt qu'il ne pouoit eschapper de leurs mains, il plain d'amer tume & de destresse descēdit à eux, & leur pria & dit qu'il fut tout seul mis en garde, & que fil estoit trouué coupable qu'il fut puny sans misericorde: & sinō, que



sans longue demeure il fut deliuré, & qu'il s'en peust retourner en Bauiere sans plus retourner en France. Et les autres apres, descendirent, & aussi feirent les dames & les damoiselles : mais ce ne fut pas sans grans pleurs, & à grand effusion de larmes. Lesquels tantost furent prins & mis sur cheuaux deux à deux, en telle maniere que derriere les deux auoit quatre homes d'armes & ainsi des autres. Et furent menez les vns au Loure & les autres au Palais. Et en ce faisant estoient ceux de Paris à grand compagnie de gens d'armes, qui deuant & derriere lesdits prisonniers alloient : & ce fait le Roy s'en alla seoir au disner, & la Roynie avec son fils s'en entra en sa chambre moult fort plorant : & vn peu d'espace apres le dit cheuaucheur fut deliuré, & aussi fut le sire de Dollehaing, lequel fut fait Chancelier d'Acquitaine, dont il auoit esté osté : & le Duc de Bourgongne qui auoit la garde du Duc de Bar son cousin germain & de Pierre des Essars, & aussi de Anthoine des Essars & d'autres plusieurs prisonniers, qui estoient au Loure, & lesquels il faisoit administrer par ses gens & s'en estoit fort pleigé : de laquelle pleige il se deporta du tout, & les restitua & rendit à ceux de Paris. Desquels furent plusieurs translatez du Loure au Palais par ceux de Paris, & de par le Roy. Et de par luy furent commis douze commissaires cheualiers, & six examineurs pour cognoistre & iuger selon l'exigence des crimes & des prisonniers. Et apres fut baillé par escript à ceux de Paris, qui auoient fait les besongnes dessusdictes de par le Duc de Berry, oncle du Duc de Bar, & aussi au pourchats de la Comtesse de saint Pol & de ses autres amis vn certain traicté, lequel ils enuoyerent deuers l'Vniuersité de Paris pour auoir leur aduis & consentement sur les choses dessusdictes : lesquels respondirent qu'en riens de ce ne se vouloient entremettre n'empescher. Dirent outre en plain conseil du Roy, que par eux ne de leur conseil n'auoient pas esté prins les dessusdits Duc de Bar & autres prisonniers, mais leur en desplaisoit : & adonc iceux Parisiens voyans ladicte Vniuersité estre desioincte d'eux, doubtons aucunement que des besongnes dessusdictes ne se feissent au temps aduenir demandes, impetrerent deuers le Roy & son grand conseil vn mandement Royal pour leur descharge & excusance, duquel la teneur s'ensuit.

CHARLES par la grace de Dieu Roy de France, à tous ceux qui ces presentes lettres verront salut: de la partie de noz treschers & bien amez les Preuost, Escheuins, bourgeois & habitans de ceste bone ville de Paris. Sçauoir faisons nous auoir esté exposé, que pour l'vrgent & euident proffit & vtilité de nous & de nostre trescher & tresamé premier fils Loys Duc d'Acquitaine d'Aulphin de Vienne. Pour le bien aussi de nostre domination, & bien publique de nostre Royaume: pour le salut & seureté de nostredicte ville de Paris, & pour obuier aux grans inconueniens qui par le fait de plusieurs noz officiers & autres tant par deffaute de bonne iustice, comme autrement qui aduiennent de iour en iour & estoient en aduenture & voye d'ensuiuir plus grans: à nous & à nostre domination & à la chose publique de nostre Royaume, & aussi à nostredicte ville de Paris, ont esté par lesdits exposans ou plusieurs d'eux cordialement n'agueres faictes certaines prinſes en nostredicte ville sur aucunes personnes hommes & femmes, tant de nostre sang, des hostels de nous & de nostre treschere & tresamée compaignie la Roynie, & de nostredit fils, & des tresamées & trescheres filles la Duchesse d'Acquitaine



quitaine, & la Comtesse de Charrolois, comme autres gens & officiers de nous & nostredicte compagnie & de nosdictes filles & fils: pour lesquelles prinſes faire, conſideré la grandeur & qualité des perſonnes de ceux ainſi prins, ou la plus grand partie grand congregation dē gens d'armes & autrement leur conuint faire: leſquelles perſonnes furent & ſont priſonniers en noſtre Chaſtel du Louure, & en noſtre Palais Royal à Paris, & ailleurs és priſons de nous en noſtre dicte ville de Paris: tant pour certains cas, machinations, conſpirations & autres crimes qui par leſdictes perſonnes ou aucunes d'icelles on dit auoir fait, & eſtre commis & perpetré contre nous & noſtre dit ſils & le bien publicque, de noſtre Royaume & de noſtre dicte ville de Paris, & deſdits expoſans ou de ce ſçachans & conſentans & participans, en fauoriſant & ſouſtenant leſdits cas, conſpirations, machinations, crimes & leurs faueurs & autrement en moult de manieres delinquans, comme pour certaines autres cauſes touchant le gouuernement de noſtre perſonne, de noſtre dit ſils & de la police de noſtre dicte fille de Paris & de tout noſtre Royaume: affin que par nous & noz gens & officiers de noſtre Royaume à ce commis & ordonnez de par nous, ſoit fait & ordonné ainſi qu'il appartenoit: & que auſſi par icelles perſonnes bonnes & neceſſaires, pour le bon gouuernement, tuition & deffence de noſtre dit Royaume du bien publicque & de noſtre dicte fille de Paris, qui eſt le chef & principale ville de tout noſtre Royaume, ne ſoient aucunement empeschez, comme ont eſté au temps paſſé par leur coulpe, aucuns d'eux & de leurs complices qui de ce doubans eſtre punis ſ'en ſont fuys de la ville de Paris. Et pour eux leſdits expoſans nous ont requis & ſupplié, que comme pour les cauſes & motifs deuantdictes la grand reuerence, auſſi & amour naturelle qu'ils ont à nous qui ſommes leur ſouuerain ſeigneur & naturel, & à noſtre dit premier ſils: affin que bonne prouiſion & ordonnance ſoit miſe au gouuernement, tuition & deffence de noſtre Royaume & de la choſe publicque d'iceluy, pour la ſaluation & ſeureté de nous, & de noſtre dicte ſeigneurie: & auſſi de noſtre dicte ville de Paris: & à oſter & faire ceſſer tous les empeschemens, qui pourroient venir pour le fait deſdictes perſonnes priſonniers & d'autres leurs complices leſdictes prinſes & emprisonnement, ſoient & comme c'eſt droit par eux, faiçtes par vraye & pure intétion, ayans le regard au bien, honneur & prouffit, de nous, & de noſtre Royaume & de la choſe publicque de noſtre dit Royaume. Nous voulons leſdictes prinſes & emprisonnemēs qui ont eſté faits pour l'honneur & vtilité & prouffit de nous, de noſtre ſeigneurie & de noſtre dit ſils, pour le bien & la police de la choſe publicque de noſtre Royaume, & pour la ſaluation & ſeureté de noſtre dicte ville de Paris (comme dit eſt) & pour pluſieurs autres cauſes & conſiderations iuſtes, qui à ce nous meuent, leſdictes prinſes & emprisonnemens: & auſſi leſdits expoſans & tout ce qui pour ce ſ'en eſt enſuiuy ainſi & par la maniere que par eux a eſté fait & les choſes par eux faiçtes: dont nous ſommes acertenez, eſtre faiçtes pour le bien, honneur, prouffit & vtilité de nous & de noſtre Royaume, comme dit eſt: tant au regard d'eux comme au regard de tous ceux, qui à faire leſdictes prinſes ont eſté en leurs compagnies & qui en ce leur ont baillé ayde, conſeil & confort par quelque maniere que ce ſoit ou puiſſe eſtre ſoient nobles ou autres. Et pour la deliberation & aduiſemēt de pluſieurs tant de noſtre ſang & lignage, comme de noſtre grand con-



seil les auons alouez, approuuez & aduouez. Et par la teneur d'icelles de nostre science & plaine & certaine les aduouons, louons & approuuons, & auons pour agreable : & ne voulons que eux ou aucuns d'eux pour ceste cause ou aucunes des dependences d'icelles, soient pour le present n'en temps aduenir puissent estre trauallez, molestez ou empeschez en corps ou en biens : ne aussi traicts ne conuenuz ne mis en cause n'en Court en iugement, par quelque maniere que ce soit, ne aussi pour quelconque couleur cause ou action que ce soit ou puisse estre : mais de ce soient tous & chacun d'eux tenus quittes & paisibles perpetuellemēt : si donnons en mandement à tous noz amez & seaulx conseilliers les gens tenans, & qui tiendront nostre Parlement presens & aduenir à Paris, aux maistres des requestes de nostre hostel, les gens tenans les requestes en nostre Palais Royal à Paris, aux gens de noz comptes & aux commissaires ordonnez sur le fait des finances de nostre demaine : aux commissaires nagueres par nous mis & ordonnez à cognoistre & enquerir & sçauoir des causes & cas desdits prisonniers en nostre Chastel du Louure & ailleurs en noz prisons en nostredicte ville de Paris, au Preuost de Paris & à tous noz Seneschaulx, Baillifs, Preuosts, Iuges & autres iusticiers & officiers de nous presens & aduenir ou à leurs lieutenans, & à chacun d'eux sicomme à luy appartiendra : que ces presentes, & le contenu d'icelles ils facent solennellement publier chacun es mettes de leurs iurisdiccions & puissances, es places & lieux esquels publications & proclamations ont accoustumée estre faictes & icelles tiennent, seruent & accomplissent : & avec ce facent tenir, garder & accomplir de point en point selon leur forme & teneur : en faisant, souffrant & promettant lesdits exposans & chacun d'eux & autres d'en iouyr & vser plainement & paisiblement. Et pource que lesdits exposans pourroient au temps aduenir auoir à faire de ces presentes lettres en plusieurs & diuers lieux : nous voulons, qu'à nosdictes lettres on adioust aux coppies, ou aux vidimus d'icelles faictes sous le seel du Chastellet ou autres seaulx Royaulx, ou autentiques plaine & vraye foy comme on feroit à l'original : & qu'elles soient de tel effect & valeur comme lesdictes lettres & originaux, ausquelles en tesmoing de ce nous auons fait mettre nostre seel : Donné à Paris le vingtquatriesme iour l'an de grace mille quatre cens & treize. Et de nostre regne le trentetroisiesme. Ainsi signé par le Roy en son grand conseil : auquel estoient les Ducs de Berry, de Bourgogne, le Connestable de France, l'Archeuesque de Bourges, l'Euesque d'Eureux, & l'Euesque de Tournay, le grand maistre d'hostel, le seigneur de la Trimouille gouverneur du Daulphin, messire Anthoine de Craon, Philippe de Poitiers, le Chancelier de Bourgogne, l'Abbé de saint Iean, maistre Eustace de la Chere, les seigneurs de Vieville, de Mont-Beron, & de la Roche-Foucault, le Preuost de Paris, messire Charles de Sauois, l'Hermite de Faye & Iean de Courcelles, le seigneur d'Allegrez, maistre Mille d'Orgemont, Raoul le saige, Mille d'Angeul, Iean de Longueux & plusieurs autres. P. Naucron.

*Comment le Comte de Vertus se partit de Paris & plusieurs autres nobles : & aussi de aucunes constitutions & autres mandemens faits à la requeste desdits Parisiens.*

CHAP. CIIII.

Item





Tem durant les tribulations dessusdictes, le Comte de Vertus considerant la prinse dudit Duc de Bar & des autres nobles sans le sceu & licence du Roy & du Duc de Bourgogne, se partit secrettement de la ville de Paris luy troisieme seullement, & s'en alla deuers le Duc d'Orleans son frere en la ville de Bloys: & là luy racompta les merueilles qui auoient esté faictes en la ville de Paris tant en l'hostel du Roy comme du Duc d'Acquitaine & ailleurs: dont moult despleut audit Duc d'Orleans. Pour lequel parlement ledit Duc de Bourgogne fut tresdeplaisant, car il tendoit, & auoit esperance que le mariage dudit Comte de Vertus & de sa fille se paraccompliroit assez brief ensuiuant ainsi que promis auoit esté parauant. Et pareillement se partirent plusieurs autres nobles personnes pour la cremeur des mutations dessusdictes: c'est à sçauoir messire Iaques de Chastillon fils aîné du seigneur de Dampierre, les seigneur de Croÿ & de Roubaix, Coppin de la Vieuille, maistre Raoul le maistre Preuost de saint Donas de Bruges, Pierre Genstiere nagueres Preuost des marchans & tresgrand nombre d'autres. Desquels les aucuns furent remandez especiallement du Duc de Bourgogne: neantmoins ils y retournerent en grand doubte, non pas sans cause: car de ceux qui auoient esté prins & qu'on prenoit chacun iour tant hommes comme femmes, furent les plusieurs noyez en Seine, & les autres mis à mort piteusement, sans tenir termes de iustice. Et le vendredy xxvj. iour de May le Roy alla en la chambre de Parlemēt, & là fait en estat Royal à l'instance du Duc de Bourgogne & des Parisiens, aucunes constitutiōs & ordonnances touchant le gouuernement de son Royaume: & par especial, fut ordonné à enuoyer vn mandement par tous les bailliages & autres lieux, où on a accoustumé de faire proclamations, & fut pource principalement que messire Clugnet de Brabant & autres capitaines se tenoient ensemble à grand puissance sur la riuere de Loire, pour venir deuers Paris duquel la teneur s'ensuit.

CHARLES par la grace de Dieu Roy de France, au Baillif d'Amiens ou à son lieutenant salut: il est venu à nostre cognoissance, que comme pour le releuement de nostre peuple & subiects, & pour obuier aux grans maulx, oppressions, perditions & dommages, & autres inconueniens irreparables, nostredit peuple & subiects en plusieurs parties de nostre Royaume, ont souffert & souffrent encores de iour en iour, pour la cause & occasion des grans assemblées de gens d'armes & autres gens de guerre que plusieurs seigneurs de nostre sang & lignage & leurs adherans, de leur volenté & auctorité depuis aucun temps en ça ont fait & assemblé, ont fait faire & assembler en diuers lieux, en nostre Royaume: lesquels soit par maniere de compagnies, comme autrement, au temps passé s'estoient assemblez. Nous eussions donné, & fait plusieurs fois publier & proclamer publicquement par tout nostre royaume, tant par messages comme par lettres closes & patentes: & autrement eussions fait deffence sur certaines grans peines, que nuls de quelque estat ou condition qu'ils soient, soient noz subiects ou autres estrangers, ne fussent de telle ou si grande presumption, ou hardiesse que d'assembler gens d'armes en nostredit royaume sans nostre expres commandement, licence ou mandement, & de venir à nostre mandement, & seruice & non d'autres pour quelque mandement, commandement ou eniunction qu'ils eussent d'eux ou d'aucuns d'eux sur peine ou autrement, jaçoit ce qu'ils fussent



de nostre sang ou autres : neantmoins plusieurs d'iceux de nostre sang & lignage en venant contre le traicté de paix n'agueres fait par nous à Auxerre entre aucuns d'iceux de nostre sang & lignage, sur les debats & dissensions qui estoient entre eux, & en venant contre ledit traicté par eux ou plusieurs d'eux accordé & sollemnellement iuré & contre nosdictes ordonnances & deffences, & ou content d'icelles sans nostre congé ou licence & contre nostre gré & voulenté ont fait, & se preparent, eux en brief terme faire & procurer en nostredit royaume, plusieurs grandes congregations & assemblées de gens d'armes & autres gens de guerre en tresgrand quantité tant d'Anglois & estrangers, comme autres subiects à nous pour mettre à effect de tout leur pouoir, leurs certaines entreprinſes damnable. Lesquelles ils ont fait, & ont intention de mettre à execution contre nous, & nostre domination comme nous auons esté & sommes suffisamment informez : & jaçoit ce qu'on les ayt fauorisez & soustenuz, & qu'on soustienne & fauorise chacun iour : & que ce ayt esté par long temps & demeuré sous dissimulation & mettre à effect leurs entreprinſes dessusdictes : lesquelles gens desrobent & gastent, ont robé & gasté & despouillé nostredit royaume & noz bons & loyaux subiects & ceux qui nous ont loyaument seruy, par especial ou temps que nous feusmes à Bourges, & qui ont soustenu nostre fait & nostre partie contre ceux que nous tenions adonc & reputions noz ennemis & inobediens : ont aussi desrobé & fait desrober plusieurs de noz subiects & boutant feux & tuer hommes & femmes & violer filles à marier & autres nicorées, despouillans Eglises & monasteres : ont fait aussi & commis & de iour en iour s'efforcent de faire & commettre plusieurs autres grans & enormes maulx & cruels excès & malefices : tant en telle maniere que ennemis peuuent faire les vns aux autres : lesquelles choses sont de tresmauuais exemple & non pas à souffrir veu qu'ils sont au tresgrand grief, preiudice & dommage de nous & de nostre royaume, domination & seigneurie, & en nostre charge & destruction de nostre peuple & de noz subiects & de nostredit royaume. Et de ce ont esté faits à nous plusieurs grans pleurs, lamentations, complainctes & clameurs, & sont faits de iour en iour tant par lettres de noz vassaulx subiects comme autrement : & pourroient encores plus estre faits, se par nous n'estoit pourueu de remede conuenable bon & brief. Pource est il, que nous vueillās remedier de tout nostre pouoir aux choses dessusdictes : lesquelles nous ont tant despleu & desplaisent qui plus ne peuuent ne pourroient, & nosdits subiects & nostredit peuple garder & maintenir en bonne paix & tranquillité, & obuier aux grans inconueniens & autres dommages irreparables, lesquels pour vray semblable sont en peril d'ensuiuir par le fait & entreprinſe dessusdit de nostre sang & autres leurs adherans alliez & complices, ainsi que par grand & meure deliberation de conseil, auons ordonné conclud & deliberé de faire : vous mandons, commandons & expressement enioingnons, en commettant par ces presentes, que vous faictes ou faictes faire de par nous, exprez commandement & deffence par proclamations & publications à son de trompe & autrement sollemnellement, à tous cheualiers & escuyers & autres non nobles, qui ont accoustumé de suiuir les armes & les guerres, & generallyment à tous autres quelsconques de voz bailliages de quelconque estat ou dignité qu'ils soient ou puissent estre : ausquels par noz presentes lettres destroictement comman-

dons



dons que par la foy & loyauté qu'ils nous doiuent, & sur tout quanques ils nous peuuent offendre, & sur peine d'encourre nostre ire & indignation perppetuelle & forfaire enuers nous corps & biens, eux ne aucun d'eux ne soient tant hardis ne aussi d'eux armer n'assembler en nostre Royaume : ne venir n'aller à quelconque mandement de quelque personne ou personnes de quelque estat preeminēce ou condition qu'ils soient, jaçoit ce qu'ils soient de nostre sang pour quelsconques mandemens, commandemens ou inionctions: soit de bouche ou par lettres qu'ils puissent auoir de ceux ne aucun d'eux, ne autrement eux armer ne assembler en quelconque maniere ne pour quelque cause ne occasion que ce soit ou puisse estre, sinon que par noz lettres nous les eussions mandez & fait assembler pour venir à nostre mandement & seruice, ou pour aller là où nous les voudrons employer en nostre seruice & non autrement ne ailleurs. Et tous ceux que vous trouuerez ou sçaurez autrement estre assemblez en vostredit bailliage ou és ressorts d'iceluy. Et qui iront au mandement de ceux de nostre sang ou autres leurs complices, leur commandez ou faictes commander de par nous sur lesdictes peines, que tantost & sans delay ils retournent & voient paisiblement en leurs hostels ou bon leur semblera, sans faire ou porter aucun dommage ou grief à nostre peuple ou subiects. Et en cas qu'ils soient en ce trouuez desobeïssans ou reffusans, differans ou allans au contraire, ou qu'ils voient encontre noz deffences ou mandement, n'en autre seruice que de nous, ou qu'ils ne se departent ou partent d'ensemble, comme dit est. Vous prendrez ou faictes prendre & mettez reallement & de fait en nostre main par bon & loyal inuentoire tous leurs biens meubles & heritaiges, villes, chasteaux, dominations & possessions d'iceux : & iceux en nostre main gouuernez ou faictes gouuerner, par personnes suffisans, & seures : qui de ce quand, & où il appartiendra, puissent & sçachent rendre par compte, & reliqua toutesfois qu'il en sera mestier. Et avec ce procédez ou faictes proceder contre iceux par voye de fait, sicomme contre inobediens & rebelles est accoustumé de faire : lesquels en ce cas nous vous auons abandonnez & abandonnons par ces presentes en eux prenant & mettant en prison, & iceux punir selon leurs demerites & selon que ou cas appartiendra se on les peult prendre. Et sinon soient chassez & reboutez par toutes forces & voyes de fait, soit par force d'armes ou autrement par toutes les meilleurs manieres que faire se pourra, en eux cloant & faisant clorre tous les ports & passages, & en eux denyant tous viures ou autrement, eux greuans en toutes manieres, & tellement que l'honneur & force soient à nous & à vous, & que ce soit exemple à tous autres. Toutesfois ce n'est nostre intention qu'iceux de nostre sang & lignage qui sont avec nous pour le present & en nostre seruice, ne puissent par ordonnance mander par deuers eux leurs subiects & vassaulx à eux employer en nostre seruice, quand ils leur notifieront, en eux requerant de ce faire, pourueu que de ce suffisamment apperra. Et que aussi en venant ils ne vivent sur le pays, & qu'ils ne facent aussi aucuns robemens ou dommages à noz populaires ou subiects. Et faucuns sont trouuez faisans le contraire, nous voulons & commandons que vous procédez contre eux comme contre les dessusdits. Et de ce, faictes telle punition que dit est, ou autre telle que raison donnera : nonobstant quelsconques lettres ou mandemens qu'ils ayent à ce contraires. Pour lesquels



les choses dessusdictes mieulx faire & accomplir : vous auons donné & donnons plaine puissance, auctorité & mandement especial de demander, euoquer, assembler & cueillir de noz vassaulx & subiects amis alliez & bien vueillans tels & en tel nombre que bon vous semblera, & qu'il sera expedient pour le bien des besongnes : & icelles mener & conduire ou faire mener & conduire & employer par tous les lieux & places de vostre bailliage ou ailleurs, où bon vous semblera & là où vous sçaurez aucuns desdictes gēs estre & frequenter : ausquels noz subiects vassaulx, amis, alliez & bien vueillans, mandons, commandons & expressement enioingnons sur la foy, loyauté & sur ce qu'ils nous doiuent & sur peine de confisquer corps & biens, que sans aucune contradiction ou reffus ils voient à vostre mandement en nous aydant à faire accomplir les choses deuantdictes & chacune d'icelles en procedant en icelles par voye de fait & à main armée, comme dit est. Et affin que nuls ne puissent ou vueillent pretendre quelque cause d'ignorance, faictes ces presentes publier solennellement par tous les lieux és villes notables de vostre dit bailliage és lieux où on à accoustumé de faire telles publications & ailleurs où bon vous semblera d'estre fait. En faisant icelles interiner, garder & accomplir de point en point selon la forme & teneur d'icelles : & contraindez à ce les reffusans & autres qui pour ce feront à cōtraindre par toutes les voyes & manieres, qu'en tel cas est accoustumé de faire pour nostre propre fait : & de ce faire vous donnons plain pouoir, auctorité & mandement especial, en commandant à tous noz autres iusticiers, officiers & subiects requerant tous autres : & priant à tous noz amis, alliez & bien vueillans à nous, qu'à vous & à voz commis & deputez és choses dessusdictes & és circonstances & dependences d'icelles obeissent & entendent diligemment comme à nous. Et vous prestent conseil, confort & ayde & faueur, & prison se mestier est & de ce soient requis : car ainsi l'auons octroyé & voulons estre fait de nostre plaine puissance. Nonobstāt oppositions ou appellations faictes ou à faire, & quelsconques lettres impetrées ou à impetrer à ce contraires. Donné à Paris le sixiesme iour de Iuing l'an de grace mille quatre cens & treize, & de nostre regne le xxxij. Ainsi signée par le Roy, à la relation de son grand conseil : auquel estoient messeigneurs les Ducs de Berry, de Bourgongne, le Connestable, le Chancelier de Bourgongne, Charles de Sauoisy, Anthoine de Craon, les seigneurs de Vieville, de Montberon, Cambriach & d'Allegre & plusieurs autres. P. Naucron : lequel mandement (comme dit est dessus) fut enuoyé par tous les bailliages & seneschaucées du Royaume de France, & là fut publié ainsi qu'il est accoustumé.

*Comment le Roy Lancelot entra à puissance dedans Romme : la mort meſſire Iaques de la Riviere, & de la deposition du Chancelier avec plusieurs autres besongnes.*

CHAP. CV.

**E**N cest an Lancelot Roy de Napples & de Cecille, lequel auoit esté mandé par aucuns faulx & desloyaux Rommains, vint à Romme à tout grand exercite de gens d'armes, & sans trouuer aucune resistance entra dedans, & meit tout à saquemant en pillant & robant generally tous les riches & plus puissans de la ville : & aussi en print plusieurs prisonniers, lesquels furent rançonnez à grand finance. Et adonc le Pape Iean & ses Cardinaulx



Cardinaulx qui lors residoient en icelle ville, oyās les nouvelles dessusdictes tous plains d'amertume & de paour, se sauuerent de chastel en chastel & en fin se departirent & allerent par diuers lieux iusques à Boulongne, où ledit Pape tint sa Court: toutesfois la plus grand partie de leurs biens furent prins & rauiz des gens dudit Lancelot, lequel par aucune espace de tēps domina de tout en ladicte ville de Romme, & en fait emporter plusieurs precieux ioyaux tant saintuaire cōme autres, & puis par certains moyens se partit de là. En apres messire Iaques de la Riuiere frere au Comte de Dampmartin: lequel auoit esté prins avec le Duc de Bar en l'hostel du Duc d'Acquitaine & mené prisonnier ou Palais, où en luy desesperant, cōme on luy meit sus, luy mesmes se frappa d'un pot d'estaing plusieurs coups en la teste tant qu'il fesceruella & en mourut. Et de la prison fut mis sur vne charrette & mené es halles de Paris, où il fut decapité: mais pour dire la verité il fut autrement: car messire Helion de Iacqueuille Cheualier au Duc de Bourgonne le visita en prison, & entre plusieurs parolles l'appella faulx trahistre: & comme sur ce il luy respondit qu'il auoit menty, & qu'il n'estoit point tel: adonc ledit Iacqueuille tout courroucé d'une petite hachette qu'il tenoit alors en sa main, le frappa sur la teste si fort que tantost & incontinent mourut: & luy issu de là serna & fait semer aual la ville de Paris, que luy mesme dudit pot s'estoit occis, & puis fut tenu de plusieurs pour verité. Et aussi ledit Petit Maisnel trencheur deuant le Duc d'Acquitaine, lequel estoit Normand fut tātost mené esdictes halles de Paris, & là fut decapité: desquels les testes furent fichées à deux bouts de deux lances, & les corps penduz par les esselles au gibet de Montfaucon. Le ieudy d'icelle sepmaine de Penthecouste semblablement Thomelin de Brie qui nagueres auoit esté paige du Roy, fut mis hors de Chastellet avec deux autres & mené es halles, & là furent decollez, & les testes mises sur trois lances, & les corps penduz par les esselles au gibet de Montfaucon: & se faisoient toutes ces besongnes à l'instance & pourchats des Parisiens. En outre pource que messire Regnault de Corbie, qui estoit moult ancien & prudent natif de la ville de Beauuais n'estoit pas bien du tout à eux agreable fut desmis de l'office de Chancelier de France: & en son lieu y fut mis & constitué messire Eustace de Lactre à la promotion du Duc de Bourgonne. Et le mardy xx. iour de Iuing Philippe Comte de Neuers espousa au chastel de Beaumont là seur germaine du Comte d'Eu, & y estoit la Duchesse de Bourbon leur Dame & mere & la damoyelle de Dreues, laquelle principalement auoit traicté ledit mariage: lesquelles nopces & solemnitez d'icelles passées, lesdits conioincts en la compagnie de ladicte Duchesse & d'icelle damoiselle de Dreues, furent menez & conduits à Masieres sur Meuse appartenāt audit Comte de Neuers: apres lequel mariage ledit Comte d'Eu qui auoit esté à tout faire, s'en retourna en sa Comté d'Eu, où il fait vne grand assemblée de gens d'armes iusques au nombre de deux mille combattans, faignant qu'il voulsist faire guerre au seigneur de Croÿ à l'occasion de l'entreprise autresfois contre luy faicte par son fils aîné: c'est à sçauoir messire Iean de Croÿ, dont en autre lieu est faicte mention: mais il fait tout le contraire & les mena passer Seine au Pont-de-l'Arche, & de là à Vernueil au Perche, où estoit le Roy Loÿs & avec luy les Ducs d'Orleans, de Bretagne & de Bourbon, les Comtes de Vertus & d'Allençon avec plusieurs autres grans seigneurs, Barons & Cheualiers qui là estoient assemblez: non pas tant



seulement pour l'emprisonnement du Duc de Bar ne du Duc Loÿs en Bauiere ne autres prisonniers: mais sur le fait de la deliurance du Duc d'Acquitaine, lequel leur auoit mandé par ses lettres & aussi par le Comte de Vertus, comment luy, le Roy son pere & la Roïne estoient contrains comme prisonniers sous le gouvernement, garde & puissance de ceux de Paris, non pas en leur franchise & liberté dont il luy desplaisoit tresgrandement, qu'ils estoient ainsi abaissés de leur hauteuse & majesté royale: surquoy lesdits seigneurs ainsi assemblez (côme dit est) apres qu'ils eurent tenu conseil ensemble par grand deliberation de conseil, escrirent deuers le Roy, son grand conseil & la bonne ville de Paris, qu'ils laissassent aller ledit Duc d'Acquitaine où bon leur sembleroit, & deliurassent lesdits Ducs de Bar & de Bauiere avec tous les autres prisonniers: ou se ce ne faisoient, ils feroient guerre à ladicte ville & destrueroient à leur pouoir tous ceux qui estoient dedans, reserué le Roy, & ceux du sang royal qui dedans estoient. Et tant qu'estoit de ceux qui estoient morts à present, ils n'en parloient plus, pource qu'on ne les pouoit r'auoir. Lesquelles lettres receues de par le Roy, furent mises en conseil: & sur icelles fut deliberé qu'on enuoyeroit certains ambassadeurs deuers lesdits seigneurs pour traicter de paix, lesquels d'iceux furent benignement receuz. Et le samedi premier iour de Iuillet, apres que son proces eut esté fait, fut decollé es halles de Paris messire Pierre des Essars nagueres Preuost de Paris jadis fils aîné de feu Philippe des Essars citoyen de ladicte ville: duquel la teste fut mise es halles, au bout d'une lance, & le corps à Montfaucon en la maniere accoustumée: & son frere messire Anthoine fut en grand peril d'estre executé, mais par aucune atargeation qui se fait par ses amis fut la besongne atargée & depuis fut mis à plaine deliurance: esquels iours le Roy de France qui estoit assez en bonne santé, alla à l'Eglise cathedrale de Paris faire son oraison & là ouyt Messe: & icelle ouye, & visité les saints & reliques issit hors, & s'en retourna en son hostel: & estoit avec luy le Duc de Bourgogne & le Connestable de France, & si y estoient grand planté de populaire qui là estoient venus pour le veoir.

Et le lendemain vij. iour de Iuillet fut ordonné par le conseil du Roy, auquel presidoit le Duc d'Acquitaine: & fut commandé à Jean de Moreul cheualier au Duc de Bourgogne, qu'il portast deux lettres & mandemens royaux en deux bailliages: c'est à sçauoir au bailliage d'Amiens & ou bailliage de Vermandois, & à toutes les preuostez d'iceux bailliages: & à chacune ville fait assembler tous les prelates, conseillers & gouverneurs desdictes bonnes villes d'icelles preuostez. Et eux assemblez en plaine audience, leur fait lire lesdictes lettres du Roy scellées de son grand seal. Données cedit iour vij. iour de Iuillet: Ainsi signées Jean Millet sous la congregation de ceux qui auoient esté audit conseil: c'est à sçauoir le Duc de Bourgogne, le Connestable de France, vous le Chancelier d'Acquitaine, le Chancelier de Bourgogne & plusieurs autres: lesquelles en substance contenoient qu'ils se tenissent constans & fermes en loyauté & obedience deuers le Roy: & qu'ils fussent prests toutesfoi là où on les manderoit à luy seruir: & aussi son trescher & tresaymé fils le Duc d'Acquitaine à l'encontre des ennemis de son royaume, & de la chose publique: & qu'ils adioustassent foy à sondit cheualier conseiller & chābellan Jean de Moreul, selon l'instruction qu'on luy auoit baillé sous le seal du secret du Roy: laquelle chose ils liront & feront lire, laquelle chose il fait.

Et



Et quand il eut esté en plusieurs citez & preuostez desdits bailliages, le lundy xvj. iour dudit mois de Iuillet vint à Dourlens, en la ville d'Amiès: & là en la présence des Prelats & nobles & ceux des bōnes villes de ladiète Preuosté, lesdictes lettres leües auec son instruction deuãdit, hault & cler, car il auoit belle faconde de parler. Exposâ comment estoit, & est moult affecté à la paix & vnion de son Royaume: & comment on auoit fait les proces de ceux qu'on auoit decollez à Paris, par plusieurs & notables personnes tant des seigneurs & aduocats de Parlement, cōme de bons cheualiers & preud'hommes & saiges à ce commis de par le Roy: & comment messire Iaques de la Riuiere soy desesperant, s'estoit occis d'un pot d'estaing, en quoy on luy auoit porté du vin, & la maniere comment il feit ce: & que chacune information de ceux qui auoient esté decolez contenoit lx. fueilles de papier, & que par vraye & bonne iustice sans faueur & sans haine, ils auoient esté condānez & mis à mort: & aussi que monseigneur le Duc d'Acquitaine ne l'auoit oncques mandé aux seigneurs de sa ligne sicōme ils disoient, & dit ledit Moreul à ceux qui là estoient. Sçachez vous qui cy estes presens que toutes les choses cy dessus declairées, sont vrayes & notoires. Et ce fait leur demanda s'ils estoient & seroiēt vrais & obeïssans au Roy, qu'ils luy dissent leur intētion: lesquels tous tant prelates, nobles que autres respondirent tantost, qu'ils auoient tousiours esté vrais & obediēs au Roy, & qu'ils estoient tous prests & appareillez de les seruir croyās qu'il leur disoit verité: & par ainsi au Preuost de ladiète Preuosté, pource qu'il auoit faite si bonne diligēce il mesmes demāda lettres, lesquelles il eut, & puis s'en retourna. Et pareillemēt de par le Roy furēt enuoyez autres seignrs à tout semblables lettres & instructiōs, à tous les autres bailliages & seneschaucées de celle mesme date: & aux preuostez desdictes Cōtez de tout le Royaume, lesquels chacun en ses termes deputez diligēment prindrent & rapporterent lettres. Et en tandis que ce se faisoit, les Anglois à grād multitude de nauires descendirent en la Cōté d'Eu, & prindrent port en la ville de Tresport. Lesquels apres qu'ils eurent prins tous les biens auec plusieurs des hōmes d'icelle, bouterēt le feu dedans: & pareillement ardirent l'Eglise & monastere dudit lieu de Tresport & aucunes villes assez pres d'illec. Et apres ce qu'ils eurent esté enuiron xxij. heures sur terre, rentrent en leurs vaisseaulx, & retournerent en Angleterre à tout leur proye.

*Comment les ambassadeurs du Roy & autres Princes retournerent à Paris: & adonc y r'allèrent d'autres qui traicterent de rechef à Ponthoise la iiij. paix. CHA. C VI.*

**L**E mercredy xij. iour de Iuillet retournerent à Paris les ambassadeurs du Roy, des Ducs d'Acquitaine, de Berry & de Bourgongne qu'ils auoient enuoyez deuers les seigneurs dessusdits du sang du Roy: c'est à sçauoir l'Euesque de Tournay, le grand maistre de Rhoddes, les seigneurs d'Auffemont & de la Viefuille, maistre Pierre de Marigny & aucuns autres & r'apporterent leur ambassade. Laquelle rapportée vn peu de temps apres par l'ordonnance du Roy & de son conseil, les Ducs de Berry & de Bourgongne, auec eux les ambassadeurs dessusdits furent enuoyez à Ponthoise: & le Roy de Cecille, les Ducs d'Orleans & de Bourgongne, les Comtes d'Allençon & d'Eu vindrent à Vernon, & de là enuoyerēt leurs ambassadeurs audit lieu de Ponthoise, pour exposer ausdits de Berry & de Bourgongne, & aux autres du conseil du

Ec



Roy & de la bonne ville de Paris estās avec eux les causes de leurs complainctes, & les perils & inconueniens de la guerre: lesquels à ceste cause estoient en aduerture d'auenir en brief, l'un de leurs ambassadeurs en beau François hault & cler & en beaux termes moult bien exposa le tout dont en substāce la teneur s'ensuit. A explicquer la credence à nous baillée de la partie de noz seigneurs: c'est à sçauoir du Roy de Cecille, du Duc d'Orleans, du Duc de Bourbon, le Comte d'Alençon & le Côte d'Eu. A vous mes trefredoutez seigneurs de Berry, & de Bourgogne & à messeigneurs du grand conseil du Roy, & de monseigneur d'Acquaine, qui estes en leur compaignie: puis qu'il conuient que ie die la parolle pour le bien de la paix, confiant en iceluy qui est acteur de paix & de la faueur & bonne voulenté des escoutans, ie prens vn mot du psaultier. *Oculi mei semper ad dominum.* Au trente troisieme pseume qui vault autant à dire. Mes yeux sont toujours deuers monseigneur. Par l'introduction du saige Platon, duquel i'ay prins mon theume entre les autres notables dits enuoyez à tous seigneurs & Princes ayans preeminence ou gouuernement, qui aux choses publiques sont preferez, ils doiuent garder les commandemens de leur seigneur, premier qu'en tout ce qu'ils feront ils ayent regard à la chose publique, en delaisant & mettant derriere leur bien particulier, & profit, & selon que la chose publique, dont ils ont le gouuernement, represente vn corps, dont ils sont les chefs, & les subiects sont les membres: en telle maniere que s'aucuns des membres sont blecez qu'il en descēde douleur au chef. Et pour venir à mon propos ie cōsidere ce royaume de France Chrestien estre vn corps, duquel nostre souuerain seigneur le Roy est le chef & les subiects sont les membres: mais en quel degré ie mettray messeigneurs du sang royal qui nous ont cy enuoyez, & vous aussi mes trefredoubtez seigneurs à qui nous parlōs, car nous n'auons point de chef sinon nostre Roy souuerain seigneur & Prince. Quand au chef, ie ne vous compare pas ne aussi aux membres deuātrains, pour vous garder vostre preeminence: mais il me semble que ie vous puis & dois comparer aux membres particuliers de cedit chef: & pourtant que entre les autres membres du chef les yeux sont les plus notables, & de plus grand singuliere & merueilleuse condition. Ie vous compare comme les yeux dudit chef, & pour trois choses trefexcellentes & tressingulieres, lesquelles trois choses il a entre les autres. Premier: car les yeux sont & doiuent estre de leur nature en corps bien disposé de mesure, formé & de veüe & sans quelque differēce. Sicomme que quand vn œil regarde droit & l'autre de trauers, ou que l'un fut clos & l'autre ouuert, tout le corps en est diffamé: & de ce prend il nouuel nom comme Borgne ou Loufche. Et ainsi me semble que noz seigneurs qui nous ont cy enuoyez à vous, & noz trefredoutez seigneurs à qui nous parlōs, supposé que vous soyez plusieurs en grād nombre: toutesfois estes vous le regard sur tout le corps, & deuez estre tous d'une voulenté, tendans à vne bonne fin: c'est à sçauoir l'œil d'entendement, par clere cognoissance & l'œil par effect par vraye amour & sans difference. *Oculi sapientis in capite eius.* Secondement les yeux sont à la plus haulte & euidente partie de tout le corps. Et pourtant regardent & font regard sur tout le corps entierement, comme dit le Prophete Ezechie au trentetroisieme chapitre. *Speculatorem dedi te domui Israel.* Tout pareillement sont noz seigneurs du sang royal: car pour la grand & singuliere affection, qu'ils ont à leur maistre



& seigneur & à toute sa domination & seigneurie, ils veillent continuellement sur la garde d'iceluy. Tiercement: car pour la grand noblesse de l'œil, qui est de la forme ronde, il a telle sensibilité de tous les membres de son corps, que tantost que aucun membre est blessé ou greué de douleur ou frappé, il en pleure comme dit le Prophete Ieremie au xix. chap. *Plorans plorabit, & educet oculus meus lacrimam quia captus est grex domini.* Et semblablement fait à ce propos ce que recite Valere le Grand en son viij. liure de Marcel le Tirant, lequel voyant la desolation de sa cité par son ennemy: laquelle il auoit prins par force ne se peut tenir de plover ce que deuoit faire vn vray œil. Certainement il doit plorer la douleur des membres, comme fait Codros Duc d'Athenes, lequel pour gaigner la bataille contre ses aduersaires, se fait tuer de sa voulenté cōme narre & dit Iustinus, Frontinus, & ce mesme dit Valere le grand au viij. liure. Et pource tous noz seigneurs doiuent estre & sont de pareille condition: & les ay equiparez à eux disant. *Oculi mei semper ad dominum.* De moy, en la personne des seigneurs qui nous ont cy enuoyez, voire en la personne de nous qui auons ceste charge receüe (non pas pourtant que aucuns de nous se equiparent à l'œil) cōme treshumbles seruiteurs de l'œil, nous estant assez d'estre du corps des deuantdits, comme l'ongle du petit doigt nommé le medecin de la dextre main, par vraye disposition de nature accoustumé de seruir & obeir: à l'exemple duquel, nous sommes contrains de parler de tant haulte matiere: laquelle chose nous est moult griefue, mais c'est pour le bié de la paix, & pour obeir à l'œil. *Oculi mei semper ad dominum.* Car en quelconque temps chacun doit auoir regard à nostre seigneur: mais encores plus en tēps d'aduersité, comme dit Tulles de l'amitié qui dit. Viens à ton amy quād tu es appelé luy estant en prosperité, & quād il est en aduersité n'attēs pas que tu soyes appelé. Mais i'entens ce, de tous seigneurs terriens, supposé qu'ils soient dissoluz & non faisans les faits & les œuures du Roy, ou du seigneur selon l'apostole mōseigneur S. Pierre qui dit au secōd chapitre. Soyez subiects à toute creature pour l'amour de Dieu, & au Roy comme au plus excellent. Et de rechef soyez obeïssans en la creneur de nostre seigneur non pas tant seullement aux bons & iustes, mais aussi aux non sçachans. Et par ainsi, se peut dire de chacun le mot que i'ay prins. *Oculi mei semper ad dominum.* Et pourtant mes seigneurs qui nous ont cy enuoyez ayans l'œil d'entendement par clere cognoissance, & affectez par vraye amour à leur seigneur cōme au chef, & à tout le corps de ce chrestien Royaume, doutans que d'eux on ne die ce qui est escript par Esaye au viij. chap. *Speculatores eius cæci omnes.* Les regardeurs ou veilleurs sont tous aueuglez. Et aussi qu'on ne die qu'ils soient semblables au porc, qui les fruits cheans de l'arbre deuore & iamaïs ne leuroit ses yeux à l'arbre, voyans & pensans aucunes manieres qui puis vn peu de temps les ont tenuz en la bonne ville de Paris, se deullent qu'ils ne voyent auoir & souffrir tout le corps deuantdit vne grande destruction: par laquelle puisse bien tost encourir à vne tresgrande maladie & tresperilleuse, & telle que par continuation puisse estre mortelle, que Dieu par sa sainte pitié ne vueille. Premier ils ont entendu la prinse des seruiteurs du Roy, de la Roynne & de monseigneur d'Acquitaine: desquels à iceux seigneurs tant seullement appartient la cognoissance & non à autre. Et apres ont entendu que pareillement a esté fait des Dames & Damoiselles, qui estoient en la compaignie



de la Royne & de ma dame d'Acquitaine: lesquelles choses tant pour l'honneur de leurdicte maistresse la Royne, comme pour l'amour du sexe femenin on deust auoir par raison differé, & aussi pour l'honneur de chasteté. Et le droit dit & commande sur grâdes peines, que honnestes femmes ne soient point traictées en publicque: & aussi pour l'honneur de noblesse & de la noble maison dont elles sont extraictes & issues, il semble qu'elles ne doiuent pas estre ainsi traictées, & outre elles se deullent: car nonobstant que la cognoissance de quelconque seigneur du sang royal aucunement n'appartient pas, fors seullemēt au Roy & aux seigneurs de son sang: monseigneur le Duc de Bar fut prins, & encores est qui est cousin germain au Roy nostre sire, dont moult se deullent les seigneurs deuantdits, & par especial le Roy & la Royne de Cecille qui est sa niepce: lesquels grandement & affectueusement prient & requierent pour sa deliurāce, & aussi pour monseigneur le Duc en Bauiere frere germain de la Royne. Et de rechief se deullēt plus de la forme & maniere qui fut tenue & eüe à la prinse: car ils ont entendu ainsi qu'on leur a rapporté, qu'ils furent prins par gens qui n'auoiēt quelque auctorité d'office royalle, & en maniere de peuple plain de rumeur & tout esmeu: lesquels par force rompirent les portes de l'hostel du Roy, & de monseigneur d'Acquitaine en disant parolles moult hautes & rudes audit d'Acquitaine: dont il a prins, sicomme on dit, vne grand desplaissance: & par especial qu'ils ne sçauent encores aucunes iustes causes ne couleurs, pour quoy ils font tels exploits ne se deussent faire. Et peut estre que s'ils sçauoient aucunes iustes causes, ils ne s'en esmerueroient pas tant comme ils font. Et encores outre: car en continuant comme on dit, monseigneur d'Acquitaine a esté & est priué de sa liberté actiue & passiue: car il ne peut aller hors de son hostel ou au moins hors de la ville de Paris: passiue, car nul de quelque condition ou de son sang ou d'autre n'ose parler ne conuerser avecques luy, fors ceux qui le gardent ainsi qu'il est accoustumé de faire à vn prisonnier honneste: laquelle chose est moult griefue à luy & ausdits seigneurs d'estre priuez de la vision & conuersation de leur souuerain seigneur en terre, comme ce f'estoit apres leur vie perdre la vision de Dieu. Item se deullent: car puis que les choses sont aduenues, vindrent lettres de par la ville de Paris enuoyées ausdits seigneurs & autres presque semblables, enuoyées aux bonnes ville de ce Royaume, contenans en effect les exploits dessusdits auoir esté fais sur le regime & gouvernement dudit seigneur d'Acquitaine. En les requerans que chacun fait ainsi, donc quant aux lettres enuoyées esdictes villes ils se deullent: car nuls fors ceux qui sont du sang royal, ne doit sçauoir quelque charge de leur gouvernement, ne qui donne charge à tels seigneurs: & aussi n'y auoit la cause faincte ne vraye, pourquoy les villes deussent faire tels exploits: car il n'estoit personne qui iamais se fut meslé du gouvernement dudit seigneur d'Acquitaine, & semble que ce n'estoit fors à induire & esmouuoir le peuple à aucuns mauuais appointement faire au preiudice du Roy, de monseigneur d'Acquitaine & de toute sa seigneurie, & aussi sur lesdits seigneurs. Et aussi se deullent: car par l'importunité d'aucuns continuans ladicte matiere, furent impetrez mandemens aux Barons, cheualiers, escuyers & vassaulx desdits seigneurs, contenans que pour quelconque mandemēt desdits seigneurs ou d'aucuns d'eux, ne venissent en leur compagnie: mais se tenissent en leurs maisons iusques adonc que monseigneur le Connestable



nestable, ou aucuns autres des seigneurs estans dedans Paris les māderoient, dont grandement se plaignent : car oncques ne feirent ne ont intention de faire chose pourquoy on leur doie oster leurs vassaulx, & quand le Roy à affaire d'eux, leursdits vassaulx le doiuent seruir en leur compaignie, &c. Item se plaignent de plusieurs autres parolles & mandemens, par lesquels plusieurs officiers qui de fait ont prins & encores prennent chasteaux & forteresses, & s'efforcent d'iceux leurs faire en mettant en iceux gens & officiers nouueaux, & en deboutant hors leurs capitaines & chastellains notables cheualiers, & escuyers, & preud'hommes sans reproche qui toute leur vie ont seruy bien & loyaument, & ont intention de seruir le Roy : lesquelles choses deuantdictes & chacunes d'icelles leur sont moult estranges, nouuelles & desplaisans, & donnent occasion à tous estats tant au chief comme és membres de mal exemple & inobedience : & par consequent de subuersion & de ruineuse domination : car ce tresnoble & treschrestien Royaume a esté gouuerné longuement en bōne prosperité, principalement par bonne police d'icelle, en bonne & vraye iustice, dont le fondement fut par trois choses : par lesquelles ce a excédé les autres : comme premier par science, par laquelle la foy chrestienne fut deffendue, & iustice de bonne police soubstenue en ce Royaume : & apres la tresnoble & plaine de preud'homme & cheualerie : par laquelle non pas seulement ce Royaume, mais toute la foy chrestienne en a esté doubtée & deffendue. Et tiercement le grand nōbre de peuple loyal & subiect, comme tres vray obeïssant à sa domination : lesquelles trois, par telles manieres & tels exploits viendroient, à totale peruersité & perdition ; & tellement que tout l'ordre est peruers & que l'un occupe l'office de l'autre : car les pieds qui souloient porter le chief, les bras & le corps vont dessus, & le chief en bas : dont le corps & tous ses membres perdroyent toute la reigle & bonne disposition de nature, & ainsi que dit la loy ciuille. *Rerum commixtione turbantur officia.* Pour laquelle chose noz seigneurs qui nous enuoyent à supplier au Roy, à la Royne & à monseigneur d'Acquitaine, & en priant & requerant à vous noz treschiers & tresredoubtez seigneurs : & aussi à vous noz seigneurs du grand conseil du Roy & de monseigneur d'Acquitaine, qui cy estes & à chacun de vous à par luy, & selō l'exigence du cas & possibilité, laquelle est pour auoir & emporter les remedes conuenables : & il leur semble qu'ensuiuant l'opinion des sages Physiciens, qu'abstinence est la preservation de maladie pour la santé du corps : & pource, pour la partie des seigneurs deuantdits, nous vous prions, & de la nostre vous supplions que de cy en auant tels exploits & manieres (ainsi que dit est dessus) & toutes commissiōs extraordinaires cessent du tout, par vraye exhibition de bonne iustice, par laquelle hōneur, preeminence & vraye liberté soit au Roy, & à monseigneur d'Acquitaine comme au chief soit honneur & prerogatiue accoustumée : & aux seigneurs, comme à l'œil dudit chief vraye iustice. En eux preseruāt de toute offence, à l'Eglise, noblesse & au peuple, comme le corps, les bras & les iambes, soit vraye bonne & seure paix : & comme dit le Psalmiste. *Quia iustitia & pax osculata sunt.* Auquel lieu dit S. Augustin que chacun demande paix en sa maison. Mais iustice qui est sa sœur se met en l'hostel d'autrui. Et pour ce qui veut auoir vraye paix il conuient auoir sa sœur iustice : & l'aucun veut dire abstinence estre perilleuse pour la cremeur de deux choses contraires, comme



font guerre & iustice rigoureuse . Nous respōdons de la partie desdits seigneurs, que ces deux là ils escheueront de tout leur pouuoir, & par effect: & s'employeroient de tresbon cueur à faire ladicte abstinance, & à expulser tous les gens d'armes portans dōmage en ce Royaume, par toutes les voyes & par tous les moyēs qu'ils pourront . Et quant au fait de iustice rigoureuse , leur intention est d'ensuyuir la maniere de tous Princes , considerans la sentence de Platon, que quand vn Prince est cruel à la chose publique, c'est quād le tuteur chastie cruellement son pupile du conseil qu'ils ont prins à le deffendre & garder : especiallement en ensuiuant la coustume de leurs predecesseurs de la trefnoble maison de France: lesquels ont tousiours accoustumé d'auoir en eux pitié & debonnaireté , & laisser derriere rancune & maliuolence cōtre ceux de la ville de Paris ou de l'autre partie, qui de ce pourroient estre coupables ou chargez . Et supplient au Roy , à la Royne & à monseigneur d'Aquitaine, pour auoir & obtenir tant d'un costé cōme d'autre leur abolition. Et desirent lesdits seigneurs, sur toutes les choses de ce monde, veoir le Roy, la Royne & monseigneur d'Aquitaine en leurs franchises & libertez en aucuns lieux comme à Roüen, à Chartres, à Melun, à Montargis ou en autre lieu plus conuenable hors de Paris pour le premier acces . Nompas par maliuolence qu'ils ayent contre ladicte ville, ne contre les habitans d'icelle: mais pour escheuer toute occasion de rumeur, laquelle seroit tantost, & pourroit estre entre les seruiteurs desdits seigneurs & plusieurs de ladicte ville . Et plaist ausdits seigneurs, qu'en toute seurte expedient & necessaire, soiēt voyes & manieres aduisées & mises auant à obuier à toutes souspeçons & incōueniens à ladicte congregation : ouquel lieu viendront lesdits seigneurs de tresbon cueur , pour aduiser & pourueoir au bon estat de ce Royaume, & au vray pacifiement d'iceluy. Et sur ce soient aduisées les manieres possibles de seurte: car noz seigneurs , & nous de leur partie seront prests d'entendre au bien, hōneur, proffit & à la vraye vnion du trefnoble chief du corps & de tous les membres dessusdits: & se i'ay dit pou, mes seigneurs & compaignons sont bien disposez pour amender , & se i'ay dit trop ou chose qui soit ou touche au deshonneur ou à la desplaissance d'aucuns, mes trefredoubtez seigneurs plaise vous le m'imputer à simpleesse ou à ignorance & loyauté trefaffectée , au bon estat du Roy & de l'appaisement de tout son Royaume, veu & consideré que i'ay esté & suis par nature obligé par serment & seruice à ceste chose faire: cuidant de tout mon pouuoir ensuiuir le singulier desir que i'ay au Roy de Cecille monseigneur, & mon maistre au bien de ceste matiere, & ne me soit pas, fil ne vous plaist, imputé de temerité ne autre mal tallent ou affection desordonnée, que i'aye, n'euz oncques n'entens à auoir iusques à ceste proposition des ambassadeur dessusdits. C'est à sçauoir du Roy de Cecille & des autres seigneurs . En apres furent dictes & proposées plusieurs parolles sur l'aduis de la paix d'une partie & d'autre : & affin que ce Royaume demourast en tranquillité, & que prouision fut mise aux inconueniens, furent faits plusieurs articles sur ce: lesquels sont contenuz en vne cedulle, de laquelle la teneur s'ensuit .

Premier entre les seigneurs du sang royal, sera bonne amour & vnion, & promettront & iureront estre bons & vrais parens & amis: & de ce feront lettres les vns aux autres, & sermens: & en plus grāde confirmation de ce, iureront, & promettront pareillement les seruiteurs plus principaux desdits seigneurs d'une part &



& d'autre. Item les seigneurs du sang royal qui ont enuoyé leurs messages & ambassadeurs, feront cesser la voye de fait, & de guerre: & ne feront quelque mandement de gens d'armes: mais s'aucuns en estoient fais, ils les adnulleront & feront cesser du tout. Item feront tout leur loyal pouuoir, de faire expeller & repeller & retourner le plus brief que faire pourrôt, les gens qui sont de la compagnie de Clugnet, & Loÿs Bourdon & autres leurs adherans par toutes voyes & manieres à eux possibles: & se lesdits gens de la compagnie ne vouloient ce faire, lesdits seigneurs s'employeroiēt au seruice du Roy pour iceux faire retourner & destruire, & tous les autres ennemis du Roy qui viendroient greuer son Royaume. Item promettront que des choses qui sont aduenues à Paris, ils ne porteront nulles rancunes, maltalens ne dōmage à la ville de Paris, n'à aucūs particuliers d'icelle, ne procurerōt à eux estre fait en aucune maniere soit sous vmbre de iustice ou en autre maniere comment que ce soit: & s'aucune seurté estoit aduisee pour le bien de la ville & le particulier d'icelle, ils seuffrent à le faire & procurer & ayder de tout leur pouuoir. Item que les seigneurs iurerōt & promettront par leurs sermens faits sur la saincte vraye Croix & dessus les sainctes Euangilles de Dieu en parolles de Prince: & sur son honneur faire & faire entretenir & accomplir loyaument toutes les choses dessusdictes sans aucune fraude ou calomnie de verité, & de ce bailleront leurs lettres au Roy seellées de leurs seaulx. Item en ce faisant les messagiers & ambassadeurs desdits seigneurs requierent au Roy, qu'il luy plaise adnuller & reuocquer tous les mandemens des gens d'armes & de traict, & facent cesser toute voye de fait & de guerre, excepté contre lesdits gens de compagnie. Item semblablement facent cesser & reduire, à mettre tous les mandemens nagueres donnez à mettre en sa main aucūs chasteaux & forteresses: & d'iceux oster les capitaines, & autres y commettre en lieu de ceux ou en lieu des seigneurs, ausquels lesdits chasteaux & forteresses appartiennent & facent remettre les dessusdits au premier estat, quand à ce que la commission par luy donnée: apres certain temps pour le fait desdits prisonniers & autres appelez ou à appeller à bannissement soient reuocquez. Et que par iustice ordinaire & accoustumée du Roy soient contraints, & conuenus sans ce qu'aucuns commissaires particuliers de ce s'entremettēt aucunement. Item que le Roy, la Royne & monseigneur d'Acquitaine ces choses ainsi faictes & accomplies soient vn certain iour en aucū lieu dehors Paris, ouquel soient les deuantdits seigneurs de chacune partie pour confermer bonne vnion entre eux, & aduiser aux besongnes du Roy & choses necessaires à luy & à son Royaume. Et s'aucuns faisoient doubte, que lesdits seigneurs ou aucūs d'eux vouloient induire le Roy, la Royne & monseigneur d'Acquitaine à aucune hayne ou vengeance contre la ville de Paris, à aucuns des habitans d'icelle, ou à prendre le gouuernement ou attraire le Roy avecques eux ou monseigneur d'Acquitaine, ou qu'à ladicte congregation ou assemblée feissent aucune doubte: lesdits seigneurs sont prests de bailler bonne seurté possible là où on pourra aduiser. Lesquelles besongnes ainsi mises par escrit & conclues par les seigneurs dessusdits d'vn costé & d'autre, se departirent vn chacun d'eux, & retournerent és lieux, dont ils estoient venus. Et apres que les Ducs de Berry & de Bourgongne & ceux qui estoient allez avecques eux furent retournez à Paris, remonstrent en la presence du Roy



les poinçts de leur ambassade, & le contenu de la cedulle qui auoit esté aduisée par entre eux parties pour le bien du Roy & de tout son Royaume. Et apres que sur tout eut esté aduisé par grand deliberaton de conseil, où estoit l'Vniuersité de Paris & ceux de la ville en grand nombre, fut accordé de par le Roy & le Duc d'Acquitaine avecques le grand conseil royal, que tout ce qu'ils auoient fait & rapporté s'entretiendroit: & sur ce fut ordonné à faire à certains mandemens royaux pour enuoyer par tous les bailliages & seneschaucées du Royaume, pour estre publiez par les officiers es lieux accoustumez: desquels mandemens la copie sera cy apres declairee. Durant laquelle tribulation Clugnet de Brabant, messire Loys Bourdon & autres capitaines de ceste partie vindrent à tout bien xvj. mille combattans, en degastant païs iusques en Gastinois. Et baillerent à entendre qu'ils venoient pour faire guerre aux Parisiens: lesquels de ce non contés, enuoyerent au deuant d'eux iusques à Monstiaux-faut-Yonne seize cens bacinets & grand nombre d'autre combattans: desquels estoit messire Lyon de Iacqueuille: neantmoins ils ne rencontrerent pas l'un l'autre, pourquoy ceste armée se desrompit sans combattre. Et adonc furent enuoyez le Connestable & l'Admiral de France, avecques eux l'Euesque de Tournay de par le Roy à Boulogne sur la mer contre la legation du nouuel Roy d'Angleterre: c'est à sçauoir le Comte de Valleric, l'Euesque de S. David & aucuns autres, qui estoient venus à Calais: si conuindrent ensemble à Lolinghen, & là traicterent ensemble trefues entre les deux Royaumes iusques aux Pasques ensuiuant: lesquelles furent publiées par tout les deux Royaumes dessusdits. S'ensuit la copie des mandemens royaux, dont dessus est faicte mention, &c.

CHARLES par la grace de Dieu Roy de Frâce au Baillif d'Amiens, & à chacū des habitans de ladicte ville salut. Nous vous faisons sçauoir qu'à l'occasion des Princes & emprisonnemés indeüemēt & sans cause faits des persōnes de noz trefchiers & trefamez cousin germain & frere en la loy les Ducs de Bar, & de Bauierre & plusieurs autres noz officiers de nostre trefchere & trefamée compaignie la Royne, de nostre trefcher & trefamé fils le Duc d'Acquitaine & aucunes autres dames & damoiselles de l'hostel de nostredit cōpaigne, de noz trefchiers & trefamez cousin & nepueu le Roy de Cecille, le Duc de Bourbon, les Cōtes d'Alençon & d'Eureux de ce cōplaignans: & de la maniere de la prinse, & des courroux & desplaisirs qu'en a prins nostredit fils, & de plusieurs autres choses par auāt aduenues en nostre bōne ville de Paris, sont venues nagueres en la ville de Verneuil: ouq̃l lieu nous auōs enuoyé noz ambassadeurs notables: & avec ce auōs enuoyé des gēs noz trefchiers & amez oncles & cousin les Ducs de Berry & de Bourgōgne. Et apres ce lesdits noz oncles & cousin de Berry & de Bourgōgne avec lesdits ambassadeurs furēt enuoyez de par nous, cōme dit est, au lieu de Verneuil. Et aucuns bourgeois & habitans de ladicte ville de Paris allerent par nostre ordonnance à Ponthoife, & nosdits cousin & nepueux le Roy de Cecille, les Ducs d'Orleans & de Bourbon, & les Comtes d'Alençon & d'Eu allerēt en la ville de Vernon: & de là enuoyerēt leurs messagiers & ambassadeurs audit lieu de Ponthoife, exposer & signifier à nosdits oncle & cousin de Berry & de Bourgogne & de nostredit conseil de nostre ville de Paris, estans en leur compaignie les causes de leurs complainçtes, & remonstrer les perils & inconueniens de la guerre &  
autrement



autrement : lesquels pource estoient en aduerture d'auenir en brief terme : & apres plusieurs parolles & conseils sur ce euz d'une partie & d'autre , furent entre eux euz & aduisez sur le fait de la paix & vnion de ce Royaume, affin d'escheuer lesdits inconueniens : & sur ce furent faits plusieurs articles contenues en vne cedulle, de laquelle la teneur s'ensuit. Premier entre les seigneurs du sang royal, sera bonne amour & vraye vnion : & promettront & iureront estre bons & vrais parens & amis, & de ce feront lettres les vns aux autres. Item comme dessus & ailleurs est declairé iusques là où il dit, chacun dira son opinion & deliberation, Et jaçoit-ce que le cōtenu en icelle cedulle bien veu & considéré, il semble qu'elle est iuste & raisonnable pour le bien de paix, vnion & concorde à ceux de l'vniuersité de Paris, de nostre court de Parlement, de noz gens des comptes & aussi des bons citoyens & habitans de nostre bonne ville de Paris, & qu'ils estoient prests de la visiter : & sur ce dire & rapporter ledit iour de ieudy, enuers nous leur deliberation, & opinion par la maniere deuantdicté : Neantmoins gens de petit estat & facultez, qui de leur auctorité & entreprinse ont eu vne partie du gouvernement de ladicte ville de Paris : & lesquels ou dit gouvernement estans pour continuer guerre & diuision, laquelle par long temps a esté en nostre Royaume, affin d'auoir tousiours la domination : ont voulu par leurs faulces machinations plusieurs seigneurs de nostre sang & lignage & autres induire à la guerre, doubans que les robberies, homicides & autres grans malefices & delits par eux en moult de manieres commis sous vmbre de l'entreprinse dudit gouvernement, ne fussent punis & d'eux prinse vengeance, ont tāt fait & procuré en perseuerant en leur mauuais propos & par leur faulx machinement qui leur a esté octroyé, que ledit iour de ieudy a esté continué iusques au samedi ensuiuant cinquième iour dudit mois : affin que durant & pendant iceluy iour ils peussent empescher la paix, par horribles voyes damnables, & dequoy au plaisir de Dieu on scaura en brief la verité : mais au plaisir de Dieu qui à ce pouruoir, ladicte Vniuersité assemblée avec nostre chambre de Parlement & nostre chambre des Comptes, les colleges des Eglises & les bons citoyens & habitans preud'hommes de nostre Royaume & de nostredict ville de Paris, par especial des plus notables & au plus grand nombre non contens de ce, & doubans les inconueniens & perils qui sont apparens : & qui à l'occasion de celle mauuaise & cruelle trahison se pourroient ensuyuir, desirans de tout leur cuer bonne paix & vnion entre ceux de nostre sang & lignage maintenir iustice, & regner à l'honneur & cōseruation de nous & de nostre Royaume : & vueillans obuier aux entreprinse damnables des empeschās ladicte paix, sont venus apres disner deuers nous en nostre hostel de S. Pol à Paris, & nous ont requis d'auoir audience pour le bien de paix, laquelle chose nous auōs octroyé. Et ce fait nous ont exposé les biēs de paix, les mauix & inconueniens de la guerre, & la necessité qui estoit à proceder sur l'execution de ladicte cedulle, en nous requerant le iour dudit samedi estre anticipé au iour du vendredy precedent avec aucunes autres prosecutions pour la seurte de nostredict ville de Paris. Lequel iour de vendredy desirans eux, & vueillans la paix semblablement en nostredict maison de la ville en Greue, cuidās trouuer là l'un l'autre pour venir deuers nous en nostredit hostel de S. Pol : mais ils trouuerent empeschement : car lesdits empescheurs de la paix, lesquels (comme dit est) sont



de petit estat & ennemis de paix, estoient ja venus en ladicte maison de nostredicte ville: & avec eux aucuns varlets tous armez sous vmbre d'auctorité de gouvernement, lequel ils auoient en nostredicte ville de Paris. Pour laquelle cause les preud'hommes dessusdits, vueillans paix s'assemblerēt en la place S. Germain de l'Auxerrois à Paris, & en plusieurs lieux en grād nombre & notable tous d'une volenté & d'un couraige quant à ce: mais pour rompre & empescher les assemblées des dessusdits notables hommes par toutes voyes & manieres qu'ils pourroient, lesdits empescheurs de la paix se meirent en peine, ausquels fut aucunement obtemperé: car ils partirent de saint Germain tout par ordre, ainsi qu'il auoit esté appointé: lesquels ainsi venus audit lieu de S. Pol, & là assemblez en nostre presence, en la presence de nostre fils, nostre oncle & nostre cousin les Ducs d'Acquitaine, de Berry & de Bourgogne, & de plusieurs autres de nostre conseil, fut par nous la paix accordée, & que ladicte cedulle seroit mise à execution, & que punition desdits empescheurs seroit faicte par raison & iustice, de quoy noz bons & loyaux subiects furent moult ioyeux. Et incōtinent apres nostredicte ordonnance & volenté proferée, monterent à cheual nostre fils, nostre oncle & nostre cousin deuantdits, & s'en allerent desprisonner noz cousin & frere. C'est à sçauoir les Ducs de Bar & de Bauiere, qui auoient esté longuement ou Loure, & autres plusieurs cheualiers, & noz officiers de nostre compaignie & de nostre fils, qui auoient aussi esté longuement prisonniers en nostre palais & en nostre chastellet par force, puissance & volenté desdits empescheurs de la paix: lesquels empescheurs voyans ce, & que bon gouvernement commençoit à regner & iustice, se mussèrent comme renards, & s'absenterent: & depuis, n'adōc on ne les peut prendre ne trouuer. Pourquoy il fait encores à doubter que par leurs inductions & faulses mensonges, par lesquels ils pourroient aucuns attirer à leurs entreprises & mauuaises volentez, ainsi qu'ils ont fait au temps passé, ne s'ensuiussent pires inconueniens que deuant: à laquelle chose est mestier d'obuiuer diligemment à l'ayde de Dieu, mesmement, que la paix qui tāt est bonne & profitable, & laquelle nosdits cousins & nepueux le Roy de Cecille, les Ducs d'Orleans & de Bourbon, les Comtes d'Alençon & d'Eu depuis tout ce que dit est ont enuoyé leurs ambassadeurs à Paris: Lesquels de iour en iour vacquent & entendent diligemment à l'execution de ladicte cedulle: lesquels ils ont eu aussi pour agreable & approuuée, & tout ce que par nous en a esté fait: laquelle chose pourroit estre rompue, qui seroit destruction de nous & de nostredit Royaume, & aussi de tous les bons & vray subiects de nous. Pource, nous vous mandons & expressement enioignons, que cōtre toutes les choses deuantdictes: lesquelles nous signifiōs estre vrayes, & telles que cy dessus sont spécifiées & declairées, vous ne croyez n'adioustez foy à quelconques malles & faulses relations, qui seroient au contraire faictes par lesdits empescheurs de la paix: & que vous ne recueillez, ne laissez ne souffrez estre ne demourer en nostre ville d'Amiens ne ou païs d'enuiron lesdits empescheurs de la paix, n'eux donner faueur par quelconque maniere: mais les faictes prendre & enchartrer & les nous enuoyez pour eux faire iustice & raison & eux punir, ou faire punir tellemēt qu'ou cas appartiendra. Et aussi vous Baillif faictes les choses deuantdictes publier, tenir & accomplir pareillement par toutes bonnes villes & autres lieux en vostre bailliage.



bailliage. Et avec ce, requerez de par nous par toutes les Eglises de vostre bailliage tant collegiaux comme autres, ausquelles il appartiendra, qu'elles facent & facent faire processions & deuotes oraisons, pour ladicte paix: affin que nostre seigneur par sa grace vueille ladicte paix entretenir perpetuellement. Et gardez bien que chacun de vous quant à luy est, qu'en ce n'y ayt point de deffault, car ainsi nous plaist & voulons estre fait. Donné à Paris le douziesme iour d'Aoust l'an de grace mille quatre cens treize: & de nostre regne le trentetroisiesme. Ainsi signé par le Roy & son conseil, où estoient les Ducs d'Acquitaine, de Berry & de Bourgogne, le Marechal Longny, Ferron. Item fut fait vn autre edict de par le Roy contre les gens d'armes & autres gens de guerre à preseruer & garder le peuple contre eux, & tenir en paix: lequel fut enuoyé par tous les bailliages & seneschauffées de ce Royaume, duquel la teneur de mot à mot sensuit, & est tel.

CHARLES par la grace de Dieu Roy de France, au Baillif d'Amiens ou à son lieutenant salut. Il est venu à nostre cognoissance, que puis vn peu de temps en ça plusieurs gens d'armes, archiers & arbalestriers gens de compaignie, routiers & autres gens de guerre, sans nostre congé & licence données, par noz lettres ou autres, deüiement se sont tenus & tiennent en plusieurs lieux & villes de nostre Royaume, pour eux traire vers nostre ville de Paris, & en pillant & robbant nostre pauvre peuple se viuent sur iceluy, en degastant leurs biens, & font plusieurs autres grans dommaiges, maulx & excez: dequoy nostredit peuple qui en moult d'autres manieres est moult oppressé tant par guerre comme par mortalité & epidimie, qui n'agueres a esté & seroient tous desers: & de ce pourroient venir grans & irreparables incōueniens à nous & à nostre Royaume se par nous n'y estoit pourueu: pourquoy nous vueillans pourueoir, preseruer & garder de tout nostre pouuoir nostredit peuple desdits robbemens, dommaiges & inconueniēs comme nous y sommes tenus. Et en outre, veu qu'il est à present appoincté que bon appoinctement & accord des debats & discords qui ont esté entre aucuns de nostre sang & lignage: lequel au plaisir de Dieu nous entendons à cōclurre & mettre à fin, nous vous mandons, commettons & estroictement enioignons, qu'incontinent ces lettres veües toutes excusations cessans & mises arriere & toutes autres choses quelsconques, vous tant proclamations, publications & à haute voix à son de trompe comme autrement, vous faciez faire en tous les lieux à faire proclamations & publications accoustumez és destroits & mettes de vostre bailliage & ressort d'iceluy que vous verrez estre à faire, & faictes commandement de par nous à tous capitaines, gardes, bourgeois & habitans desdictes villes, chasteaux, forteresses, pôts, ports passages, iurisdicțiōs par lesdits lieux: semblablement que vous faciez commādemēt ou faciez faire à iceux gens d'armes, archiers, arbalestriers, gens de compaignie, routiers & autres gens de guerre quelsconques, qu'ils viennent ou qu'ils fassemblient sans de nous sur ce auoir mandement ou licence: dont il appert par noz lettres patentes faictes & passées en nostre grand conseil, & de date subsequēt à ces presentes, & que sur peine de perdre ou forfaire corps & biens, & sur quanque ils peuuent meffaires enuers nous, ils de cecy en auant, s'en retournent tantost apres cedit commandement, sans là demourer ou retourner n'eux là assembler par quelconque maniere que



ce soit. Et si il est aucuns esdits gens qui ayent prins ou occupé aucunes villes, chasteaux, forteresses és termes de vostre bailliage & ressort d'iceluy, que vous leur faciez ou faciez faire commandement de par nous, comme dessus, que de là se partent & qu'à vous tantost en lieu de nous les rendent & baillent sans quelque delay, affin qu'ils soient gardez: en commettant par vous à la garde d'iceux telles personnes, que vous verrez estre expedient à faire, iusques à ce que par vous sur ce soit autrement pourueu. Et ou cas que les dessusdit seroient reffusans ou differens de ce faire, ou en demeure que vous les prenez ou faictes prendre & mettre prisonniers. En faisant par vous telle punition & iustice qu'oudit cas appartiendra. Et aussi en prenant reallement & de fait, lesdictes villes, chasteaux & forteresses: lesquelles ils occupent en faisant icelles garder de par nous, comme dit est, en procedant sur ce contre les deuantdits & chacun d'eux par puissance d'armes se mestier est: Et par toutes les meilleures voyes & manieres que faire se pourra en attendant & appellant pour ce deuers vous de noz subiects se mestier est, & des nobles de vostre bailliage & ressort de là enuiron. Et faictes tant que la force soit vostre, & qu'elle vous demeure. Ausquels noz subiects nous mandons par ces presentes qu'à faire ce que dit est, ils voient avecques vous toutesfois qu'ils en seront requis. Et que pource ils s'arment & assemblent de tout leur pouuoir, & à entretenir les choses dessusdictes vous baillant conseil & ayde. Et si il aduenoit qu'en ce faisant lesdits gens d'armes se mettoient à deffence, ou aucuns d'eux fussent rebelles parquoy il y cōuenist aller de voye de fait contre eux, ou aucuns d'eux fussent morts ou mutillez: nous ne voulons qu'il tourne au preiudice desdits nobles ne d'autres, qui seroient en vostre compagnie & en vostre ayde: mais voulons qu'ils en demeurent quictes perpetuellemēt desmaintenant, & pour au temps aduenir, & si il estoit mestier leur pardonnons & remettons. Et aussi voulons & ordōnons que si lesdits inobediens & rebelles auoient armeures, cheuaux & autres quelsconques biens, qu'ils soient employez & cōuertis és despens & payement de ceux qui les auroient subiuguez, prins & emprisonnez. Et qu'il soit ainsi, nous donnons & conferons licence, auctorité & mandement especial à tous lesdits subiects, qu'ils puissent recouurer & roster leurs biens de ces gens là si ils estoient contraints d'iceux, & qu'il leur voulsissent oster & emporter & garder qu'en ce n'ait deffaut aucun. Et de ce faire vous donnons auctorité & mandement especial, mandons & commandons à tous noz iusticiers, officiers & subiects qu'à vous & à voz cōmissaires & deputez en ce faisant soit obey: & vous prestent & baillent cōseil, confort & ayde & prisons se mestier est, & de par vous en sont requis. En vous mandant outre à vous noz chers & amez les gens tenans, & qui tiendront nostre Parlement à Paris, & maistres des Requestes de nostre hostel, & gens tenans les requestes de nostre Palais à Paris: à vous Baillifs & à tous autres iusticiers, officiers, commissaires & sergens, ou à voz lieutenans, & à chacun de vous sicomme à luy appartient, que toutes les causes, querelles, debtes, biens & possessions quelsconques desdits nobles, tenez & faictes tenir du iour qu'ils se partirōt pour aller oudit fait, avecques vous en estat iusques à quinze iours apres leur retour, sans eux faire ou faire faire ou attemper ce pendant quelque chose que ce soit ou puist estre au contraire desdits pleiges ou autres pour eux obliger. Lequel empeschement ou quelque chose felle estoit faicte, remettez



mettez ou faictes remettre à son premier estat, & deu & sans delay: car ainsi nous plaist il estre fait par la teneur de ces presentes: a la copie desquelles lettres ou vidimus d'icelles faictes sous seal royal, & sous l'original d'icelles. Pource que par aduenture ce present original ne pourroit estre porté, n'exhibé tout par tout où mestier seroit: nous voulons estre adioustée plaine foy pareillement comme à l'original desdictes lettres royaux. Donné à Paris le cinquiesme iour d'Aoust l'an de grace mille quatre cens & treize: Et de nostre regne le xxxij. Ainsi signées par le Roy & son grand conseil, où estoient les Ducs d'Acquitaine, de Berry & de Bourgogne, de Bar, & le Duc Loys en Bauiere vous & autres, Ferron: lesquels deux mandemens deuantdits furent portez à Amiens & publiez le xxij. iour dudit mois l'an dessusdit.

*Comment le Duc d'Acquitaine fait deliurer les prisonniers: du partement du Duc de Bourgogne, & de la venue de plusieurs Princes dedans Paris, & ce qu'ils firent.*

CHAP. CVII.

**E** Tem le iiij. iour du mois de Septembre, le Duc d'Acquitaine par le commandement du Roy fait deliurer tous les prisonniers du Palais: & tantost apres tous les biens de maistre Jean de Tropes adonc garde du Palais, lequel estoit allé dehors pour aucunes de ses besonges, furēt par le commandement du Duc d'Acquitaine tous vuidez dudit Palais par ceux de Paris: lesquels auoient accoustumé de l'accompagner. Et l'office de concierge qu'il tenoit luy fut aussi ostée: auquel fut remis & restitué celui qui par auant l'exerçoit: & pareillement aux autres parmy Paris furent restituez plusieurs officiers, comme Anthoine des Essars les deux Ducs: c'est à sçauoir de Bar & de Bauiere furent ordonnez capitaines celui de Bar du Louure, & celui de la Bastille le Duc Loys de Bauiere, comme par auāt ils auoient esté. Et apres ce, que les prisonniers furēt deliurez des prisons par le Duc d'Acquitaine, furent sonnées toutes les cloches de Paris toutes à vne heure: & si furent deux iours & deux nuicts faictes grans lieesses & grans festes par toute la ville pour l'amour de la paix, tellement que c'estoit grand ioye à le veoir. En outre furent prins en l'hostel au Duc de Bourgogne le seigneur de la Vieuille, & messire Charles de Lés frere au Chastelain de Lens: mais messire Robinet de Mailly pour la doubte qu'il ne fut prins & le seigneur de la Vieuille à la priere du Duc de Bourgogne & de sa fille Duchesse d'Acquitaine, fut deliuré de prison: & ledit messire Charles fut mis en chastelet, & l'autre qui s'en estoit fuy fut banny du Royaume. Le seigneur de Iacqueuille luy absent fut démis de la capitainerie de Paris: lequel avec plusieurs autres bouchers de Paris ses principaux facteurs, qui estoient avec luy à Montriau-faut-Yonne, par eux ouïes les nouvelles dessusdictes s'enfuirent en Bourgogne, & Jean Caboche, maistre Ieā de Troyes & ses enfans, & moult d'autres de Paris s'enfuirent en Flandres: maistre Eustace de Laëtre nouuel Chancelier de France s'enfuit de Paris comme les autres: & en son lieu fut remis maistre Ernault de Corbie autresfois Chancelier: lequel à l'instance de luy mesmes & par sa volenté pour tant qu'il estoit ancien, fut deporté dudit office de Chancelier, ou lieu duquel fut mis le premier President de Parlemēt. Et maistre Jean Iouemel qui estoit en Parlement aduocat du Roy, fut fait Chancelier de monseigneur d'Acquitaine: & de



Paris, aussi s'en fuirent tant cheualiers cōme les commissaires, qui auoient esté ordonnez à cognoistre des causes des prisonniers n'aguères tāt criminelles comme ciuilles. Et adonc ledit Duc de Bourgogne, voyant ce que faisoit le Duc d'Acquitaine son gendre, dedans Paris, doubtons qu'il ne fut pas bien content de luy: & qu'il n'eut souuenance des outrages qui luy auoient esté faits tāt en son hostel comme ailleurs où ses gens auoient esté (comme dit est en autre lieu) fut en grād sousspeçon qu'il ne fut arresté en personne: car avec ce il veoit chacū iour que les plus feables de ses gens se partoient couuertement sans prendre cōgé à luy: & les aucuns estoient desia detenus prisonniers, & si estoit aduertie qu'on auoit fait aucuns aguets de nuict autour de son hostel d'Arthois: & chacū iour venoient deuers ledit Duc d'Acquitaine en grand nombre, ceux qui auoient esté par auant ses aduersaires. Et pource affin d'obuier & resister aux perils qui s'en pouoient ensuiuir, trouua maniere que le Roy alla chasser en la forest de Ville-Neufuc, le seigneur de S. George alla avec luy: & quand il veit son poinct print congé du Roy en disant qu'il auoit eu nouuelles de son païs de Flandres, où il failloit qu'il retournaist, pour & à cause d'aucuns grans affaires qui y estoient suruenus: & de fait se partit, & alla passer en grand doubte parmy les bois de Bondis: & sans arrester cheuaucha iusques au pont S. Maxence à petite cōpaignie, & là geut ceste nuict: & le lēdemain tref-matin le vint querir le seigneur de Ront à tout deux cēs combattans, & de là chemina en assez briebs iours iusques à l'Isle en Flandres. Et lors que son partement fut sceu, cōmencerent les Parisiens & autres de la partie d'Orleans fort à murmurer cōtre luy, disant qu'il s'en estoit fuy pour doubte qu'il ne fut arresté, cōme dit est dessus. Et adonc ceux qui estoient demourez dedās Paris tenans son party, furent en moult grand sousspeçon: car chacū iour on prenoit les aucūs, dont on faisoit iustice assez hastiue. Et mesmement furent executez les deux nepueux Iean de Caboche, apres qu'ils eurent esté trainez parmy Paris grād espace. Et pareillement fut l'hoste de l'huis de fer nommé Iean de Troyes cousin germain de maistre Iean de Troyes Chirurgien dont dessus est faicte métion. Et quant à la Royne, les Ducs d'Acquitaine, de Berry, de Bar & de Bauiere ils furent assez contens & ioyeux du departement dudit Duc de Bourgogne, & aussi plusieurs autres seigneurs: & se tournerent en assez briebs iours du tout cōtre luy & les siens, tant de fait cōme de parolles. En apres le Roy, les Ducs d'Orleans & de Bourbon, les Cōtes d'Alençon, de Vertus, d'Eu, de Vaudemont & de Dampmartin, l'Archeuesque de Sens, frere Iaques le Grād, le Borgne Foucault tous ensemble vindrent à Paris à grand cōpaignie de gens d'armes en trefbelle ordōnance: à l'encontre desquels issirent les Ducs de Berry, de Bar & de Bauiere, l'Euesque de Paris & autres plusieurs Prelats & bourgeois si s'entreferent grand ioye les vns aux autres, & allerēt tous à cheual iusques au palais où estoient le Roy, la Royne & le Duc d'Acquitaine, qui le receurent bien notablement & soupperent là tous les seigneurs, & puis s'en allerēt logger en leurs hostels par la ville: & le lendemain vint audit lieu de Paris messire Charles d'Albreth, auquel presentement fut rendue son office de Connestable. Et le viij. iour de Septembre ensuiuant à l'instance & faueur desdits seigneurs, le Roy feist en la chambre de Parlemēt en son lieu accoustumé, & là fait & constitua par son grād conseil vn edict, lequel il ordonna estre prouulgué & publié par tout son Royaume duquel la teneur s'ensuit.

Charles



CHARLES par la grace de Dieu Roy de France. A tous ceux qui ces presentes lettres verront salut: Côme par l'occasion des diuisions & guerres & discords ja pieça meuz en nostre Royaume, entre aucuns de nostre sang & lignaige, plusieurs choses nous eussent esté damnables & mensongierement esté rapportées: sous vmbre desquelles, & pource qu'en nostre conseil & aussi en nostre ville de Paris n'estoit pas telle franchise, & que n'estions pas conseillez vrayement & loyaument à l'honneur de tous, & au bien de nostre Royaume côme il appartenoit: car plusieurs estoient partials & affectez desordonnéement. Et les autres auoient telle cremeur, qu'ils cheoient en la personne mesmement de grand vertu & de grand cōstance, parce qu'ils veoiēt que pour dire & tenir verité plusieurs perdre son estat. Et ainsi plusieurs veoient par especiaux notables Prelats, nobles, & autres aussi de nostre cōseil & de nostre ville de Paris estre torcionierement & violement prins & despouillez de leurs biens, mis à rançon: pourquoy plusieurs de noz bien-vueillans estoiet fugitifs & absens de nostre cōseil, & de nostredicte ville de Paris: & furent plusieurs lettres patentes damnablement procurées & indeüement obtenues en nostre nom, & seellées de nostre seal, & enuoyées à nostre trespuissant pere souuerain seigneur des chresties Roys au sainct college de Rōme, & à autres plusieurs grans Princes & seigneurs, contenans qu'il estoit venu à nostre cognoissance plainement & clerement. Et nous tinsmes pour bien & deüement informez tant par certaines lettres, qui n'agueres furent trouuées & apportées en noz mains & de nostre cōseil, côme par enuie que nous auions veu & veismes tous les iours, jaçoit-ce que de pieça nous en doubtiōs, & que la chose auoit grand tēps esté couuerte sous dissimulation, q̄ Jean de Berry nostre oncle, Charles d'Orleans & ses freres noz nepueux, Jean de Bourbon, Jean d'Aléçon, Charles d'Albreth noz cousins, Bernard d'Armignac, & leurs aydans & cōfortans, adherans alliez & complices meuz & induits de mauuais propos inique & damnable, auoient entrepris & festoient efforcez d'expeller, destituer & destruire, nous de nostre estat & auctorité royal & de tout leur pouuoir, nous & nostre genre que Dieu ne vueille. Et outre ce faire vn nouuel Roy en France: laquelle chose est abominable à ouïr, & à reciter à tous cueurs de noz bons & loyaux subiects. Et qu'en ce, & en autres choses qu'ils leur impoisoient iniquement & mauuaisement, ils auoient commis enuers nous & nostre royale majesté grans & enormes crimes & malefices, tant de leze majesté côme autrement. Et aussi plusieurs libelles diffamatoires ont esté faictes & baillées à plusieurs personnes, & attachées aux portaulx des Eglises, & publiées en plusieurs lieux au grand deshonneur, & en grand charge des plus grās de nostre sang & lignaige: comme de nostre trescher & trefaymé fils, noz treschers & bien aymez nepueux & cousins les Ducs d'Orleans, & de Bourbon, les Comtes de Vertus, d'Aléçon, d'Armignac & aussi d'Albreth Cōestable de France, de plusieurs barōs nobles & autres leurs bien-vueillans, & consequēment de nous & de nostre domination. Pour lesquelles choses nous par icelles lettres abandonnâmes tous nosdits oncles, fils, nepueux & cousins avec leurs adherans, seruiteurs & bien-vueillans à prendre & destruire avecques toutes leurs terres & seigneuries & biens quelsconques, en declairant iceux auoir forfait enuers nous corps & biens. Et encores à eux plus greuer & inurier & de nous eslongner, & esmouuoir le peuple contre eux, sous la couleur



d'vnes certaines bulles outre quarantē ans impetrées, & octroyées cōtre les gens de compagnie : lesquels sans tiltre & sans cause de leur auctorité leuoient & assembloient gens d'armes par maniere de compagnie contre nous & nostredit Royaume. Lesquelles bulles ne se pouoient ne deuoient, comme par clere inspection d'icelles peult apparoir clerement, applicquer contre noz deuantdits fils, oncle, nepueux, cousins & autres deuantdits, & tout par deffaute de bon & vray conseil, & sans ce que par nostredit & souuerain tressainct Pere le Pape, & sans deliberation de notables personnes, comme il appartenoit au cas & sans ordre de droit: de proces ou monition à ce requises n'obseruées, & sans precedentes deliberations quelsconques furent indeüement par force, faueur & voulenté desordonnée declairées aucunes sentences d'excommuniement contre les deuantdits de nostre sang & lignage, leurs officiers, subiects & adherans & complices : par lesquelles ils furent contre verité publiez comme excommuniez par tout nostre Royaume. En outre furēt de rechef proclamez à peine de ban comme trahistres & malfaiçteurs, & de fait bannis de nostre Royaume & despoinçtez de leurs benefices & offices. A l'occasion desquelles choses furent semées & publiées plusieurs erreurs & exercées plusieurs inhumanitez contre plusieurs. Lesquels à l'occasion des choses deuantdictes, furent prins & mis à mort, au regard de l'ame comme de celle mort naturelle & piteuse, comme gens hors de loy & sans confession, comme bestes brutes sans auoir administration de quelque sacrement de saincte Eglise, & enfouys aux champs & iettez aux bestes mues & aux oyseaux, comme se fussent chiens. Lesquelles choses sont moult dures & inhumaines, dānables, iniques & crueuses, & par especial entre Chrestiens & vrais catholicques: lesquelles choses deuantdictes ont esté faictes à l'instigation, impression, violence & importunité d'aucuns seditieux, troubleurs de paix, malvueillans de noz oncle, fils, nepueux & cousins, contre raison & verité par machination & damna-  
bles fictions: & pour venir à leurs faulses & mauuaises entreprinſes, comme nous auons esté depuis & sommes de present informez plainement. Et pource nous, qui voulons par raison (se pouons) tels choses & tels blasphemés non vrayes, & ainsi faictes & procurées, comme dit est, en la deshonneur & charge de ceux de nostre sang & lignage & d'autres deuantdits demourer ainsi, & qui desirōs tousiours & auons desiré la verité des choses dessusdictes estre congneües & réparées: laquelle par inaduertance ou autrement indeüement à par nous esté faicte au preiudice à la charge & deshonneur d'autrui: & mesmement de ceux de nostre sang & lignage, & des autres deuantdits comme nous sommes obligez. Sçauoir faisons nous estre plainemēt informez de nosdits oncle, fils, nepueux & cousins, prelatz, barons, nobles & autres leurs bienvueillans, auoir eu tousiours par deuers nous bonne & loyalle intention, & auoir esté noz bons & vrais parens obeïssans & subiects, & tels qu'ils doiuent estre enuers nous. Et que tout ce qui à esté fait mauuaisement, damnablement & subrepticement impetré contre verité & raison à l'instance, impression, instigation, importunité & violence d'aucuns seditieux, troubleurs de paix & malvueillans, comme dit est. Pour laquelle cause toutes les lettres & mandemens qui contre leur honneur & leurs charges ont esté faictes, touchant les choses dessusdictes ou leurs dependences. Nous icelles declairons, & par ces presentes auons declairez auoir esté torcionnairement & de  
nulle



nulle valleur faictes & passées, & subrepticemēt impetrées par entreprinſes ſoient aduenūes en noſtre bonne ville par hommes ſeditieux, troubleurs de paix, rebelles & coupables de crimes de leze maieſté, qu'ils pourroient notifier & publier par le monde en diuerſes parties & regions, autrement que iceux faits & entreprinſes n'ont eſté commis & perpetrez. Nous voulans des choſes deſſuſdictes eſtre ſceüe la verité, & eſtre ſceu à vn chacun, affin d'euitier toutes erreurs & folles credences: leſquelles par deſſaute de non eſtre ſceüe la verité, pourroient les cueurs humains induire à pluſieurs & diuerſes fins & intentions, dont moult de mauſx & incontinentiens ſ'en pourroient enſuiuir à nous & à noſtre Royaume, cōme il pourroit à tous autres Princes & ſeigneurs qui ont peuple à gouverner. Sçauoir faiſons & pour vray certiffions, que nous eſtans & faiſans noſtre reſidence en noſtre bonne ville de Paris: & avec nous noſtre treſchere & treſaymée compaignie la Roïne, noſtre treſcher & aymé fils Loys d'Acquitaine, & noſtre oncle Duc de Berry & pluſieurs autres de noſtre ſang & lignage, & de noz conſeilliers & ſeruiteurs ainſi que nous auons accouſtumé: aduint que le xxvij. iour du mois d'Auril dernièrement paſſé, meſſire Elion de Iacqueuille, Robinet de Mailly, Charles de Recourt dit de Lens cheualiers, Guillaume Barrau adonc ſecretaire, & vn ſurgien nommé maiſtre Iean de Troyes, & ſes enfans, Thomas le Goys & ſes enfans, Garnot de ſainct Yon Boucher, Symon de Coutelier eſcorcheur de vaches, Bau de Bordes, Andrieu Rouſſel, Deniſot de Chaumont, maiſtre Euſtace de Laſte, maiſtre Pierre Canthon, maiſtre Diuſque François, maiſtre Nicolle de ſainct Hylaire, maiſtre Iean Bon, maiſtre Nicolle du Queſnoy, Iean Guerin, Iean Pimorin, Iaques Laban, Guillaume Gente, Iean Parent, Iaques de ſainct Laurent, Iaques de Roüen, Martin de Neauuille, Martin de Coulonniers, maiſtre Touſſains Bangart, maiſtre Iean Rapiot, maiſtre Hugues de Verdun, maiſtre Laurens Calot, Iean de Roüen fils d'une tripiere du Puys-noſtre-Dame, Iean Maillart freprier, & pluſieurs autres leurs complices & adherans de diuers eſtats & conditions: leſquels parauant ledit iour auoient fait pluſieurs congregations & aſſemblées & conſpirations ſecrettes, & pluſieurs monopolles en diuers lieux de iour & de nuit, ſ'aſſemblerent en grand & exceſſif nombre tous armez, & à l'eſtandard deſployé vindrent par maniere d'hoſtillité & puissance deſordonnée par deuant noſtre hoſtel de ſainct Pol, ſans ce que de ce nous ſceuſſions quelque choſe, & allerent par deuant l'hoſtel de noſtre fils Duc d'Acquitaine: Auquel hoſtel voulurent entrer par force & par violence: & pource rompirent les portes contre la voulenté de noſtre dit fils & ſes gens & ſeruiteurs. Et de fait entrerent dedans, & allerent en ſa chambre contre ſa voulenté, nonobſtant quelsconques requeſtes & inhibitions que pource il leur feit. Et quand ils y furent entrez, ils prindrent de fait & par force & violence noſtre couſin germain le Duc de Bar, & le Chancellier qui eſtoit lors de noſtre fils, & pluſieurs autres notables hommes noz Chambellans & conſeilliers de noſtre dit fils, & les menerent de fait en priſon où bon leur ſembla, & les meirent en pluſieurs & diuers & priuées priſons: où ils les ont tenuz & fait tenir continuellement tant qu'ils ont peu: duquel excès noſtre dit fils print telle ire, qu'il fut en peril d'eſtre encouru en vne grand maladie. Et depuis en perſeuerant en leur faulx, mauuais & deſloyal propos, vindrent deuers nous en noſtre dit hoſtel de ſainct Pol, & là propoſerent où feirent propo-



fer en nostre presence ce que bon leur sembla : disans absolument qu'ils vou-  
loient auoir certaines personnes, lesquelles ils auoient par escript en vn rollet que  
ils portoient : lesquels estoient en nostre compagnie & en nostre presence : des-  
quels estoient Loÿs Duc de Bauiere frere à nostre compagne la Roïne, & plu-  
sieurs autres nobles hommes de noz cheualiers, conseilliers, le maistre de nostre  
hostel, & autres plusieurs de noz seruiteurs de plusieurs & diuers estats & en plu-  
sieurs offices : lesquels ils prindrent par force, violence & contre nostre vollen-  
té les meirent en prison là où bon leur sembla, comme ils auoient fait les autres.  
Et puis apres ce, s'en allerent en la chambre de la Roïne nostredicte compagne  
par la maniere deuantdicte : & en sa presence, contre son gré & vollenité en sadi-  
cte chambre prindrent plusieurs Dames & Damoiselles, desquelles plusieurs e-  
stoient de nostre lignage, & de celuy de la Roïne : & les menerent comme les au-  
tres en prison. Duquel excez nostredicte compagne print telle fureur, peur &  
abhominatiō, que de ce elle fut en peril de mort & de griefue maladie. Et depuis  
la prinse hommes & femmes, lesdits malfaicteurs ont procedé contre plusieurs  
par voye de fait & de vollenité, par tres dures voyes de torture & de tyrannie  
merueilleusement contre toute forme de droit & de iustice, & plusieurs autres  
hommes de noble lignée en grand estat ont tué és prisons. Et puis apres ont fait  
publier que eux mesmes s'estoient occis, & les ont fait mener au gibet, & aucuns  
autres ont fait enuoyer en Seine : les autres decoller & decappiter, où ils les a-  
uoient fait emprisonner. Et les Dames & Damoiselles lesquelles ils auoient ainsi  
prinſes (comme dit est dessus) les ont inhumainement traictées : & jaçoit ce qu'ils  
fussent tresinstamment requis, qu'ils voulussent souffrir que la voye de iustice fut  
ouuerte aux personnes par eux prinſes & detenues prisonniers, comme dit est : &  
que nostre Court de Parlement eust de cela cognoissance, comme il estoit de rai-  
son : neantmoins ils n'y voulurent obtemperer ne condescendre, mais feirent fai-  
re & escrire lettres patentes à leur vollenité : lesquelles ils feirent par force & par  
contraincte seeller de grand seel en nostre chancellerie. Et avec ce nous contrai-  
gnirent & nostre fils pareillement de les signer de noz seings manuels, & tous  
leurs faits & leurs œuures approuuer. Et pour mieux auoir le Chancellier à leur  
poste, & leurs lettres auoir, de là en auant luy feirent seeller par force & par me-  
naces : Et puis si feirent mettre hors de son office nostre bien aymé Regnault de  
Corbie, qui si long temps nous auoit seruy bien & loyaument : en lieu duquel ils  
feirent mettre maistre Eustace de Lactre. Par lesquelles lettres contre toute veri-  
té estoit dit ce que vouloient leurs faulx & mal vueillans accuseurs. Et en ce a-  
uons esté deceuz & non bien aduertis de la verité par deffault de bon conseil &  
liberté de dire verité, comme dit est : & toutes les lettres & mandemens, avec tou-  
tes les autres choses quelsconques, qui seroient à la charge & deshonneur de nos-  
dits oncle, fils, nepueux, cousins & autres deuant nommez, & generallyment tout  
ce qui s'en est ensuiuy. Nous estans en nostre Parlement & lié de iustice, tenans  
de plusieurs de nostre sang & lignage, de plusieurs Prelats gens d'Eglise, tant de  
nostre fille l'Vniuersité de Paris, de plusieurs Barons & autres notables personnes  
tant de nostre grand conseil & de nostre Parlement, comme de nostre ville de  
Paris accompagnez, reuocquons & adnullons : & par ces presentes auons reuoc-  
qué & adnullé, dampnons & adnichillons & du tout en tout mettons au neant.

Et



Et deffendons à tous noz subiects sur peine d'encourir nostre indignation & sur tout quanques ils peuuent meffaire enuers nous, que contre la teneur de noz affections, declarations, reuocations & ordonnances, ne facent, dient ou viennent, pour le present n'en temps aduenir par fait ne par parole ou autrement, par quelconque maniere que ce soit. Et que faucunes lettres ou mandemens aucuns estoient ou fussent exhibez, monstrez ou produits en iugement ou dehors, ne voulons à iceux aucune foy estre adioustée maintenant ne autresfois : mais voulons & commandons qu'ils soient dessirez, coupez par tout où ils pourront estre trouuez. Et pource donnons en mandement à noz amez & feaulx noz conseil- liers gens de nostre Parlement, au Preuost de Paris & à tous autres noz Baillifs, Preuosts, Seneschaulx & autres iusticiers, à leurs lieutenans & à chacun d'eux, si- comme à eux appartiendra, que noz presentes assertion, declaration, reuocation & ordonnances facent publier, affin que nuls ne puissent de ce auoir ignorance en leurs auditoires, & en tous les autres lieux à faire proclamations en tels cas & autres accoustumez en leurs iurisdic- tions & mettes à son de trompe ou autre- ment deuement : & tout ce voulons nous estre presché & estre remonstré par les Prelats & clerics, qui ont accoustumé de prescher au peuple, que es choses dessus exprimées auons esté deceu, seduict & mal informé au temps passé par les manie- res & cautelles dessusdictes. Et aussi, voulons & ordonnons que aux transcripts de ces presentes lettres faictes sous seal Royal, ou autre auctentique comme à l'original soit plaine foy adioustée. En tesmoing desquelles choses nous auons à ces presentes fait mettre nostre seal. Donné en nostre grand chambre de Parle- ment à Paris, où estoit le liêt de iustice le douziesme iour de Septembre l'an mil- le quatre cens & treize. Et de nostre regne le xxxij. Par le Roy tenant son liêt de iustice en sa Court de Parlement, Baye. Et depuis furent publiées à Amiens au mois de Decembre le xv. iour de l'an dessusdit.

*Comment le Duc de Bretagne vint à Paris: & du conseil que le Duc de Bourgogne tint à l'Isle: du fait du Comte de S. Pol, & d'autres diuerses besongnes qui lors se firent.*

CHAP. CVIII.

**E**N ce temps vint à Paris Iean Duc de Bretagne gendre du Roy, & son frere le Comte de Richemont: & si vindrent aussi le Duc d'Eureux & le Comte de Rostellant Anglois, pour traicter le mariage du Roy d'Angleterre & de Catherine fille du Roy de France, affin d'empes- cher l'alliance que vouloit faire le Duc de Bourgogne de sa fille & du Roy de Angleterre. Lesquels ambassadeurs, apres ce qu'ils eurent fait & monstre au Roy & à son conseil ce pourquoy ils estoient venus, s'en retournerent en Angleterre. Et entre-temps le Duc de Bourgogne tint grand conseil à l'Isle en Flandres, où estoient les Gantois, ceux de Bruges, d'Ippre & les quatre mestiers & moult de nobles. Entre lesquels estoit Vvaleran Comte de saint Pol Connestable de Frā- ce, lequel venoit de Boulongne & Lolingen de traicter avec les Anglois. C'est à sçauoir le Comte Vvaleric, l'Euesque de S. David & aucuns autres pour les tref- ues d'entre les deux Roys auoir : lesquelles furent octroyées iusques à la feste S. Iean Baptiste ensuiuant. Et là receut lettres ledit Connestable du Roy, par les- quelles luy mandoit qu'il allast à Paris rendre l'espée de la Connestable : lequel



voyant ce & qu'on le vouloit depousser dudit office, s'en conseilla audit Duc de Bourgongne, & eut conseil : c'est à sçauoir de non rendre ladicte espée, se partit de là, & s'en alla à S. Pol en Ternois en son chastel, où estoit sa femme, & de là s'en alla à Amiens, où il fut par l'espace de quatre iours: duquel lieu il enuoya ambassadeurs à Paris deuers le Roy, c'est à sçauoir son nepueu le Comte de Conuersan & le Vidame d'Amiens : avec lesquels alla maistre Robert le Ieune Aduocat à Amiens, pour proposer deuant le Roy la legation. Et pource, eux là venuz qu'en proposant par ledit maistre Robert le Ieune les parolles & charge de leurdicte legation, pour la partie dudit Connestable Comte de saint Pol en plain conseil: auquel estoit le Roy present, le Chancelier & autres conseilliers: dit, qu'oncques son seigneur & son maistre ne fut en ce Royaume partial, n'auoit tenu bande: ne aussi n'auoit aucunes, villes chasteaulx & forteresses contre le Roy assailly n'occupé, comme auoient fait plusieurs autres. Apres lesquelles choses ainsi dictes, luy fut requis, qu'il se fait aduouier sur les parolles comme auoient fait aucuns qui auoient proposé en cas pareil & autres, lequel ne fut point aduoué desdits ambassadeurs. Et pource fut tantost mené en Chastellet, où il fut deux iours, & à grand peine à la priere du Duc de Bar serourge dudit Comte de S. Pol fut deliuré. Et le samedi ensuiuant lendemain du iour monseigneur S. Mor, ledit Connestable de S. Pol se partit d'Amiens, & se retourna en sa Comté triste & pensif. Et apres de rechef furent enuoyez autres mandemens royaux par toutes les parties du Royaume de France à estre publiez és lieux accoustumez. Lesquels mandemens contenoient les desroys n'agueres faits en la ville à Paris par les Parisiens à la desplaisance de la Roynie, & du Duc d'Acquitaine: desquels mandemens ie me tais, car la substance & les fais enormes des dessusdits Parisiens ont esté par cy deuant suffisamment declaïrez. Apres lesquels mandemens enuoyez, le Duc d'Orleans selon les conuenances de la paix demanda au Roy, qu'il fait rendre ses deux chasteaulx: c'est à sçauoir le chasteau de Couchy & le Chasteau de Pierrefons, lesquels le Comte de saint Pol Connestable ne luy auoit voulu rendre. Si luy fut sa requeste accordée, & fut ordonné messire Gasselins du Bos Baillif de Sens, pour aller receuoir l'obeïssance de par le Roy: Et par ainsi furent restituëz audit Duc d'Orleans. En outre le samedi ensuiuant vint à Paris le Comte d'Armignac, & Clugnet de Brabant cheualier à tresgrand compagnie de gens d'armes. Lesquels Comte d'Armignac, & aussi pareillement Clugnet de Brabant & leurs gens furent moult honnorablement receuz de par le Roy & à grand ioye, & aussi de par tous les autres seigneurs & Barons. Et alors tous ceux ou au moins la plus grand partie de ceux qui auoient tenu la partie de Orleans, s'en vindrent audit lieu de Paris. Et si se conduisoient toutes les besongnes & affaires du Royaume par le moyen, & du tout à leur plaisir: car le Roy & aussi le Duc d'Acquitaine estoient pource temps conduits & gouuernez par eux. Et quand à ceux de la partie du Duc de Bourgongne, ils estoient tous boutez arriere & n'auoient quelque audience que ce fut. Tant & tellement qu'il failloit que les dessusdits, qui estoient demourez dedans la ville baïssassent les testes, & ouïssent plusieurs parolles qui pas ne leur estoient plaisantes ne agreables.



*Comment le Duc de Bourgogne fait plusieurs assemblées, pour auoir aduis sur ses affaires doubtant que ses aduersaires ne tournassent le Roy contre luy, ce qu'ils firent depuis.* CHAP. CIX.

**E**N ce temps le Duc de Bourgogne se tenoit en la ville de l'Isle-en-Flandres : auquel lieu il assembla plusieurs grans seigneurs, pour auoir aduis, & conseil sur ses affaires avec eux : car chacun iour, aumoins tressouuent, luy venoient nouuelles de la ville de Paris. Et aussi il sceut comment ceux qui auoient esté ses aduersaires gouuernoient le Roy & le Duc d'Acquitaine, & tendoient à eslongner luy & les siens de leur grace & bienveillance. Si auoit iceluy Duc de Bourgogne sur ce plusieurs imaginations : desquelles bien doubtoit, que la fin ne tendist à ce que depuis en aduint : c'est à sçauoir qu'ils ne tournassent le Roy & le Duc d'Acquitaine du tout contre luy pour en conclusion luy faire guerre. Neantmoins il estoit assez reconforté d'attendre toutes aduentures, qui aduenir luy pouoient : & adonc vindrent deuers luy de Angleterre le Comte de Valerich, l'Euesque de saint Dauid & aucuns autres, pour traicter le mariage du Roy d'Angleterre & de la fille d'iceluy Duc. Nonobstant qu'il y eust autre ambassade deuers le Roy de France pour pareille matiere, toutesfois ils ne peurent estre d'accord, & par ainsi s'en retournerent lesdits ambassadeurs : & apres ces besongnes le quatriesme iour d'Octobre les seigneurs d'offemont & de Moÿ vindrent à saint Pol en Ternois de par le Roy deuers le Comte de saint Pol, pour cause qu'il rendist ou enuoyast l'espée de Connestable de France. Mais il respondit que de son gré & sans le conseil de ses amis il ne la rendroit, mais eu conseil avec eux il respondroit dedans brief terme, tellement que le Roy seroit content de luy. Laquelle responce ouÿe par iceux seigneurs, apres qu'iceluy Connestable les eut treshonorablement festoyez retournerent à Paris, & racompterent au Roy en la presence de son conseil l'estat de leur ambassade, dont on ne fut pas bien content : & ce mesme iour fut fait vn edict Royal, contre ceux qui ne confioient pas bien en la paix, lesquels deuinent & sement parolles au contraire mal sonnans, & qu'ils ne se peuuent ou veulent abstenir de appeller & surnommer l'un l'autre par parolles & surnoms, sonnans diuision pour mettre & esmouuoir gens à commotion & à discorde & rumeur, pour engendrer nouveaulx debats : duquel edict pour diuulguer par tout le Royaume de France la teneur s'ensuit.

CHARLES par la grace de Dieu Roy de France : Au Baillif d'Amiens ou à son lieutenant salut. Il est venu à nostre cognoissance que jaoit ce que par grande & meure deliberation de conseil, & à la prosecution & diligence de ceux de nostre sang & autres preud'hommes de nostre Royaume. Nous par la grace de Dieu n'agueres eussions mis bonne paix & accord entre aucuns de nostre sang & autres subiects, sur aucuns discords & debats qui estoient & ont esté par tresslong temps entre aucuns d'iceux. Et sur ce, eussions premier fait veoir les traictez & poincts, & diligemment visiter & à grand & meure deliberation tant de ceux de nostre sang & grand conseil, sicomme Prelats, Barons, Cheualiers de noz cours de Parlement, des comptes & autres noz gens & officiers comme ceux de nostre Consiagerie, & de nostre tresamée fille l'vniuersité de Paris, &



des collèges, du clergié, des bourgeois, de nostre bonne ville de Paris qui tous d'une volenté ont eu lesdictes choses pour agreables & ont esté moult lyez & ioyeux : & nous ont supplié qu'icelle nous vueillons parfaire & mettre à bonne fin, comme Dieu mercy nous auons fait. Et que la plus grand seureté & perpétuité d'icelle, noz treschers & tresamez premier fils, nepueux, oncle & cousins: c'est à sçauoir Loys Duc d'Acquitaine Daulphin de Vienne, les Ducs de Berry, de Bourgongne, d'Orleans, de Bretagne, de Bourbon & de Bar, les Comtes d'Alençon, Vertus, Richemôt, d'Eu, Vendosme & plusieurs autres de nostredit sang, eussent promis & iuré en nostre presence en parolle de fils, de Roy & de Prince sur le fust de la vraye Croix, sur les sainctes Euangiles de Dieu pource corporellement par eux touchez, & sur tout quanque ils peuuent meffaire deuers nous & qu'ils aymoient leur honneur & estat, qu'ils sont & seront de cy en auant tousiours bons & vrais parens & amis ensemble : & qu'il est, & sera, qui a, & aura, en tant qu'à eux touche & pourra toucher sans aucune fraude ou mal engin, bonne paix, amour & vnion entre eux, dont ils ont promis à nous bailler leurs lettres patentes. Et semblablement ont promis & iuré ceux de nostre sang & conseil, Prelats, Barons & autres Princes & conseilliers, & plusieurs des gens & seruiteurs de nosdits fils, oncle, nepueux, cousins & aussi plusieurs tant de nostre Court de Parlement & chambre des comptes, comme de nostredicte ville & vniuersité, des colleges, du clergé & autres bourgeois & habitans de nostredicte ville de Paris, estans en nostre presence en grand nombre sur la foy, loyauté & seruice qu'ils nous doiuent & autrement (comme dessus) qu'ils entretiennent & garderont chacun endroit luy ladicte paix & vnion entre ceux de nostre sang, & chacun d'eux sans venir encontre en quelque maniere: & qu'ils empescheroient de tout leur loyal pouoir, que aucune chose ne sera faicte au contraire en quelque maniere, sicomme en noz autres lettres patentes sur ce faictes est plus plainement contenu. Neantmoins, plusieurs estans en vostre bailliage plains de mal courage, doubans que pour occasion des debats & diuisions deuantdicte, on ne procederoit contre eux à aucune punition ou à eux donner empeschement en corps ou en biens : ou autrement & non confians de ladicte paix deuinent & sement parolles plusieurs à icelles contraires sonnans & induysans à murmuration, & de leur mauuaise volenté ne veulent ne peuuent abstenir d'appeller & surnommer l'un l'autre par surnoms, denotans diuision deuantdicte, abolie par ladicte paix : de proferer ou de faire proferer aucunes choses à commouoir & promouoir gens à dissention, discord & rumeur, & pour engendrer nouveaulx debats dont il nous desplaist grandement & non pas sans cause. Et pource, nous qui ladicte paix voulons estre tenue ferme & telle est nostre volenté & intention, affin d'oster entierement de tout nostre pouoir faire cesser toute matiere de diuision & de voyes de fait & de guerres en nostre Royaume, & que chacun puist desormais viure en bonne paix & tranquillité: vous mandons, commandons & estroictement enioignons & se mestier est admettons par ces presentes, que tantost & sans delay vous publiez & proclamez solemnellement à son de trompe en vostre bailliage par sieges & auditoires, villes, lieu & où se seullent faire proclamations & publications notables & ailleurs où mestier sera és ressors & mettes d'iceluy. Nostre intention, propos & volenté estre telle & icelle tenir & faire tenir, & sans rompre & enfreindre:

mais



mais tenir perpetuellement ledit traicté & bonne paix, & icelle maintenir & garder, ainsi comme elle a esté iurée & affermée en nostre presence, comme dit est, en tous points & termes sans l'enfreindre en aucune maniere, ne souffrir estre enfreinte par quelque personne: en faisant expres commandement, & deffence de par nous sur peine de confiscation de corps & de biens, qu'il ne soit aucun de quelconque estat, auctorité ou condition qu'il soit, qui face proferer ou semer paroles autrement denotans diuisions & contraires à ladicte paix, ne qui puissent gens induire à venir cōtre icelle violer ou empescher. Et de tous ceux que vous trouuerez faisans, parlans, murmurans au contraire, de quoy nous voulons par vous ou voz commis estre faicte inquisition diligente, vous faciez ou faictes faire iuste punition toutes excusations cessans, par si & telle maniere que ce soit exemple à tous autres, & que par vous ou vostre negligence ou coulpe n'y ayt aucun defaut. Et les biens desdits coupables & murmurans meubles & non meubles quelsconques prenez ou faictes prédre, & mettre en nostre main aux despens de la chose par personnes ou personnes suffisantes & notables, qui de ce puissent & sçachent rendre bon compte & reliqua où & quand mestier sera. Et de ce faire vous donnons nous & aussi à voz commis & deputez en ceste partie plaine puissance. Nonobstant quelsconques lettres, mandemens, ordonnance, deffences, oppositions ou appellations à ce contraires. Donnée à Paris le sixiesme iour d'Octobre mille quatre cens & xiiij. Et de nostre regne le xxxiiij. Ainsi signées par le Roy & son grand conseil, où estoit le Roy de Cecille, messeigneurs les Ducs de Berry, Orleans, Bourbon, les Comtes de la Marche, d'Allençon, d'Eu, Vendosme, Armignac, le Connestable, vous le Comte de Tancarville, le grand maistre d'hostel & le maistre des Arbalestriers, l'Admiral, les Chanceliers d'Acquitaine & d'Orleāns, les seigneurs d'Oyrrôt, de Torcy, de Rayde, Boyssay, de Bauquille, l'Hermite de la Fayette & plusieurs autres. P. Naucron. Et puis furent publiées à Amiens & au bailliage le troisieme iour de Nouembre audit an.

*Comment Loys Duc de Bauiere se maria à Paris: & de ceux qui furent bannis pour le discord des Ducs d'Orleans, & de Bretagne. Et de plusieurs autres matieres ensuiuans.*

CHAP. CX.

**E**N ces propres iours Loys Duc de Bauiere frere de la Royne de France, espousa en l'hostel de saint Pol la vesue de messire Pierre de Nuarre jadis Comte de Mortaigne. Ausquelles nopces en ce mesmes iour le Roy en personne iousta & plusieurs autres de ses Princes, & y fut faicte tresgrand feste. Et le lendemain messire Robinet de Mailly, messire Elyon de Iacqueuille, les Goys: c'est à sçauoir le pere & le fils, maistre Jean de Troyes, Denisot de Chaumont, Caboche & plusieurs autres dont dessus est faicte mention par proces fait en Parlement contre eux, furent bannis à tousiours du Royaume de France. Et brief ensuiuant, en allerent les nouvelles au Duc de Bourgongne, qui estoit à saint Omer: & là auoit assemblé les nobles du Pay's d'Arthois pour auoir vne taille, qui accordée luy fut pareille à celle que le Roy leuoit annuellement, qui dudit bannissement ne fut pas bien contēt: car avec luy estoient la plus grād partie de ceux qui auoient esté bannis. Lesquels chacun iour l'excitoient de retourner à puissance dedans Paris: disant qu'ils estoient tous acer-



tenez, que s'il y vouloit aller les Parisiens feroient pour luy & chasseroient ses adversaires hors. Neantmoins le Duc n'auoit pas conseil de ses principaulx conseillers d'y aller par telle maniere. Auquel temps s'esmeut dissention entre les Ducs d'Orleans & de Bretagne, pour sçauoir lequel deuoit aller deuant en tous honneurs, tant que ce vint à la cognoissance du Roy, lequel iugea pour le Duc d'Orleans. Et pource se partit de Paris le Duc de Bretagne par maltalent, & deuant son partement eut parolles avec son serourge le Duc d'Alençon. Et luy dist ledit Comte qu'il auoit au cueur vn lyon aussi grand qu'un enfant d'un an, dont iceluy Duc fut tresmal content : & par ainsi demourerent en hayne l'un contre l'autre. Esquels iours, le Borgne de la Heuse fut de par le Roy demis de la preuosté de Paris, & en son lieu y fut constitué maistre Andrieu Marchant Aduocat en Parlement : & Pierre Genssien fut fait Preuost des Marchans, & adonc furent licenciés de l'hostel du Roy par le Duc d'Acquitaine, le grand maistre d'hostel : c'est à sçauoir messire Guichart Dauphin, le seigneur de Rambures maistre des arbalestriers de France, messire Anthoine de Craon : & leur fut dit qu'ils ne retournassent pas se le Roy ne les mandoit. Et pareillement furent chassés de Paris trois cens homes que femmes, pource qu'ils estoient fauorables au Duc de Bourgogne. Et le Côte de Vendosme fut fait grand maistre des arbalestriers, & plusieurs autres furent restituez en leurs offices. Auquel temps les Bourgongnons enuiron seize cens cheuaulx mandez par le Duc de Bourgogne, vindrent par Champaigne en Cambresis & de là en Arthois. Lequel Duc estoit à l'Isle, avec luy le Comte de saint Pol qui se conseilla audit Duc, à sçauoir s'il rendroit l'espée de Connestable ou non : mais il luy conseilla qu'il ne la rendist point, & que sur ce il luy ayderoit, & cela luy promist sans faillir. Si enuoya de rechef ledit Comte le Vidame d'Amiens pour ceste cause deuers le Roy & son conseil : lequel fait en ces iours vn nouuel edict affin que nul de quelque estat qu'il fut ne meit sus en armes, dont la teneur s'enfuit.

CHARLES par la grace de Dieu Roy de France au Baillif d'Amiens, ou à son lieutenant salut : comme par la grace diuine eussions fait paix entre aucuns de nostre sang & lignage, lesquels ont eu ensemble aucunes diuisions ou discords : par lesquels nous auons voulu que toutes les gens d'armes de traict, soient mis hors de nostre Royaume, & que plus ne fussent sur le pays à viure ne à faire dommage à noz pays & subiects, comme ils ont fait au temps passé, laquelle chose nous a moult despleu. Sçauoir faisons, que nous voulons nostredicte ordonnance & volenté tenir & garder, & obuier à ce qui pourroit estre au contraire & à l'oppression de nous & de noz subiects, sur ce qu'ils puissent viure sous nous en paix & tranquillité. Et pour autres plus grans causes & considerations qui à ce nous meuent : vous mandons & expressement commandons, que vous faciez proclamer & publier par tous les lieux de vostre bailliage là où on a accoustumé de faire publications & ailleurs où mestier sera à son de trompe, & ainsi qu'il appartiendra en tel cas estre fait, & accoustumé : affin que aucun cheualier, noble escuyer de quelque estat qu'il soit ; ne se mette en armes ou voise à quelque mandement de quelque seigneur qu'il soit, pour aller ne faire guerre ou autrement en quelque pays, ou s'efforce de mener sur peine de forfaire corps & biens sans nostre expres commandement. Et tous ceux que vous trouuerez faisans au contraire



contraire, punissez ou faictes punir tellement, que ce soit exemple aux autres: en mettant reallement & de fait, tous leurs biens meubles & heritages en nostre main, pour cause d'auoir commis inobedience & desloyaulté enuers nous, qui sommes leur souuerain seigneur, sans autre mandement auoir de nous: & gardez que par vous n'y ait aucun deffault. Donné au Bois-de-Vincenne le xxij. iour d'Octobre l'an de grace mille quatre cens & treize. Et de nostre regne le xxxiiij. Ainsi signées par le Roy en son grand conseil, où estoit le seigneur de Preaulx, le Comte de Tancarville, les seigneurs de Montenay & de Cambrillac, Pierre de l'Esclut & plusieurs autres: lequel edict fut publié à Amiès le xij. iour de Nouembre ensuiuant. Et le dimenche deuant la feste de la Toussaincts le Duc de Bourgogne tint grand feste à l'Isle, & le lundy & mardy iousterent cheualiers & escuyers: c'est à sçauoir ledit Duc son fils Comte de Charrolois, le Duc de Brabant & le Comte de Neuers ses freres. Apres laquelle feste, & eux departis en peu de temps apres la feste de la Toussaincts, vindrent à l'Isle les ambassadeurs du Roy: c'est à sçauoir le seigneur de Dampierre Admiral de France, l'Euesque d'Eureux & aucuns autres de par le Roy. Et luy commanderēt par vertu de lettres royaux, que sur peine de toute confiscation ne fait aucun pact ou conuenance au Roy de Angleterre sur le mariage de sa fille ne autrement en quelque maniere: & qu'il rendist au Roy trois chasteaulx, lesquels il tenoit ou faisoit tenir par ses gens: c'est à sçauoir Chierbourg, Caën & Crottoy, & qu'il tienne la paix laquelle il a autrefois sur sa foy promise & iurée loyaument au Duc d'Orleans & à ses freres, adherans, alliez seruiteurs & bienueillans: mais quand il eut ouï ledit mandement royal, tantost sans faire à eux quelque responce demanda ses hauseaulx & s'en alla à Audenarde. Et ainsi lesdits ambassadeurs retournerent par Rolaincourt le Chastel, qui estoit audit Admiral la preuigile de la saint Martin, & de là s'en vindrent à Paris.

*Comment le Roy doubtant la rompure de la paix fait publier en son Royaume nouueaulx mandemens, & pareillement pour le fait de la monnoye.*

CHAP. CXI.

**I**tem est vray que le Roy doubtant que la paix n'agueres faicte à Ponthoise ne fut enfrainte d'aucuns, qui semoient parolles mouuans à sedition pour venir contre icelle, fait faire vn edict en son Royaume, duquel la teneur s'ensuit.

CHARLES par la grace de Dieu Roy de France. A tous ceux qui ces presentes lettres verront salut. Pource que ceste office appartient à nostre royal majesté, & aussi à tous autres Princes qui ont peuple à gouverner & chose publique selon l'establissement & ordonnance de Dieu, & de droit diuin, canon & ciuil: soubz lesquels toute bonne pollice est & doit estre gouvernée & maintenue, & le peuple gouverné en bōne paix & amour & tranquillité, & euitier toutes guerres & diuisions: laquelle chose nous auōs tousiours desirée de tout nostre cueur, & voulons maintenir de tout nostre pouoir comme nous y sommes tenus, & il soit ainsi qu'aucuns de nostre sang & lignage ont esté en grand diuision & dissension par aucun tēps, dont ils sont venues plusieurs seditions particulieres en plusieurs villes & citez, & en plusieurs lieux de nostre païs entre plusieurs gēs ruraux



de nostre Royaume . Nous par grand aduis de conseil de plusieurs bons preud'hommes de nostre sang & lignage, de noz conseillers, & aussi de nostre fille l'université de Paris, & des bons bourgeois manans & habitans d'icelle: auons fait entre icelles parties bonne paix & amour: laquelle chacune partie à iuré solennellement en noz mains, sur les sainctes Euāgiles, & sur le fut de la sainte vraye Croix tenir sans icelle violer en aucune maniere . Et les delicts perpetrez en nostredicte bonne ville de Paris pour l'occasion desdits débats, eussions fait parauant ladicte paix abolir . Et sur ce données noz lettres en fil de soye & cire verte, lesquelles nous auons voulu garder en leurs termes: & icelle paix ainsi iurée, eussions fait publier par tout le Royaume & ailleurs où mestier estoit, affin que de ce, nuls ne peussent pretendre ignorance ou auoir occasion d'estre partialx ou affectez à quelque partie, ou murmurer & dire parolles ou faire chose: par laquelle ladicte paix soit ou puiſt estre violée aucunement, ou que aucune sedition ou cōmotion en puiſt venir par quelque maniere que ce soit . Neantmoins il est venu à nostre cognoissance, que plusieurs malueillans tant en nostredicte ville de Paris comme ailleurs de diuers estats & conditions murmurent à part, & dient & sement mauuaises parolles & font secretes conspirations & monopoles & congregations secretes, pour venir à conclusion de rompre la paix & violer icelle, en esmouuant le commun de nostredicte ville de Paris à damnables fins & intentiōs: & pour esnouuoir guerre mortelle en nostre trefeuident dommage & peril de nostre Royaume, & de nostre domination: & à mettre à destruction tout bon regime, & aussi tous les bons & loyaux qui veullent & desirent ladicte paix: laquelle requiert souuerain remede, & pour paruenir aux choses dessusdictes, & obuier aux inconueniens & dommages qui s'en pourroient ensuiuir . Sçauoir faisons, que sur ce eüe meure deliberation avec plusieurs de nostre sang & grand conseil, pour plus brief trouuer souuerain remede, & pour pourueoir aux choses deuantdictes: voulons ordonner & ordonnons par ces presentes, que quiconques sçaura ou pourra sçauoir ou auoir vraye cognoissance de ceux qui depuis la paix faicte à Ponthoise, ont murmuré & murmurent, & sement parolles à commouoir le peuple à sedition ou venir contre ladicte paix par nous ainsi faicte & iurée, comme dit est: ou qu'ils sçauront ou auront cognoissance des monopoles, conspirations ou congregations damnables. Et ceux qui les viendront denoncer à iustice: par lesquels elle ait de ce vraye cognoissance que de la condamnation de l'amende ou confiscation de biens, qui s'ensuit, ceux auront la tierce partie de ladicte confiscation ou amende: & voulons, que nostredicte ordonnance soit publiée par tout nostre Royaume, affin que chacun mette diligence de tels gens trouuer: c'est à sçauoir seditieux & troubleurs de paix, & que punition d'iceux soit faicte par noz iusticiers & autres, ausquels il appartiendra selon ce qui appartiendra par raison & de iustice cōme violeurs de paix, tellement que ce soit exemple aux autres: & avec ce voulons qu'aux transcripts de ces presentes soit plaine foy adioustée, comme on feroit au vray original . Pourquoi nous donnons en mandement au Baillif d'Amiens ou à son lieutenant, & à tous autres officiers & subiects de nostre Royaume & à chacun d'eux sicomme à luy appartiendra, que nostredicte presente ordonnance mettent à execution de tie bien & diligemmet, en telle maniere qu'ils ne puissent estre de ce trouuez en negligence: en tesmoing  
desquelles



desquelles choses nous fait cy mettre nostre seal. Donné à Paris le penultime iour d'Octobre l'an de grace mille quatre cens & treize. Et de nostre regne le trentetroisiesme. Ainsi signé par le Roy & son grand conseil, où estoient le Roy de Cécille, messeigneurs les Ducs de Berry, d'Orleans, les Comtes de Vertus, d'Eu, Richemont & Vendosme, le Connestable de France, l'Archeuesque de Sens & plusieurs autres. Gontier. Et furent publiez à Amiens le xv. iour de Décembre l'an dessusdit. Et adonc ce temps pendant le Roy voulut ordonner de ses monnoyes: & sur ce fait vn edict par tout son Royaume, lequel il ordonna estre prouulgué par tout son païs, duquel la teneur s'ensuit.

CHARLES par la grace de Dieu Roy de France au Baillif d'Amiens, ou à son lieutenant salut. Sçauoir faisons que pour estre pourueu au bien publicque de nostre Royaume, & pour obuier à la diuersité des monnoyes, qui au temps passé en nostre Royaume ont eu leur cours, n'agueres par meure deliberation de nostre conseil, auons ordonné & ordonnons par ces presentes, faire en toutes noz monnoyes vne forme de deniers nommez gros, qui auront leur cours pour vingt deniers tournois, & de cinq sols à cinq deniers & la quarte partie d'un denier de pois au marc de Paris, & demy gros & demy quart de gros vingt sols six deniers tournois pour chacun, & petis escus pour quinze sols tournois pour chacun, & iceux gros & demy gros & quart de gros, qui parauant ont esté faits, & blancs de dix deniers, & de cinq deniers pour chacun qui ont esté faits au tēps passé. Et auront cours ces deniers auecques les nouvelles monnoyes: lesquelles nous auons accoustumé de faire en noz monnoyes deuantdites. Pourquoi, nous vous mandons & commandons, & estroictement enioingnons, que nostre dicte presente monnoye par ordonnance, faictes tantost publier & proclamer en vostre dit bailliage si bien & si diligemment que nul ne le puisse ou doye ignorer, & par tous les lieux notables à faire proclamer & publier, & icelle tenir & garder de point en point selon leur forme accomplir sans faueur: en punissant tous ceux que vous pourrez sçauoir qui feroient ou feront au contraire: tellement que ce soit exemple aux autres. Donné à Paris le treiziesme iour de Novembre, l'an de grace mille quatre cens & treize. Et de nostre regne le trentetroisiesme. Ainsi signées par le Roy à la relation du conseil tenu en la chambre des comptes: ouquel vous l'Archeuesque de Bourges, l'Euesque de Noyon, les gens des Comptes, les gens du Tresor, les Generaux & les maistres des Monnoyes estiez. Le Begue. Item est vray, que le Roy doubtant outre mesure l'infraction de la paix: mais icelle vueillant & desirant du tout garder & maintenir, comme sur peine de quanques on peult meffaire: & deffend à tous ceux de son sang & lignage & à tous autres qu'ils ne facent aucun mandement de gens d'armes. Et de ce & d'autres choses à la seureté & entretenement de ladicte paix fait vn edict plus fort qu'il n'auoit oncques fait à tous Baillifs & Seneschaux de ce Royaume, duquel la teneur s'ensuit.

CHARLES par la grace de Dieu Roy de France au Baillif d'Amiens ou à son lieutenant salut. Comme il soit vray, que dernierement, que nous fumes à Auxerre: Nous par la prouision diuine, & par grand deliberation de conseil sur ce eu, eussions ordonné bonne paix entre les seigneurs de nostre sang & lignage, & entre noz subiects. Et depuis l'eusse confermée en nostre ville de Paris: laquelle



iceux seigneurs de nostre sang promeirent tenir sans aller ou faire aller, ou souffrir aller contre icelle en aucune maniere. Nous considerans que ladicte paix est tant bonne & profitable pour nous, nostre Royaume & subiects Et mesmemēt que grans innumerables & irreparables maux, dommages & inconueniens, qui seroient en aduenture d'aduenir à nous & à nostredit Royaume & subiects, se ladicte paix n'estoit bien gardée. Pource est il, que nous vueillans & considerans de tout nostre cueur icelle estre gardée, & eiter qu'elle ne soit aucunement enfraincte: & aussi pour certaines autres causes & cōsiderations qui à ce nous meuuent, vous mandons & destroictement enioignons, en commettant se mestier est, que par tous les lieux de vostre bailliage & ressorts d'iceluy à faire proclamations & publications accoustumées par proclamation solennellement à voix haute & à son de trompe, faictes faire commandement & deffence de par nous, qu'à quelconque mandement ou commandement, proclamations ou publications, f'aucuns en font ou ayent fait les deuantdits de nostre sang & lignaige, ou aucuns d'eux en nostre nom ou d'eux ou d'autres de quelque estat ou condition qu'il soit. Ou sous vmbre de nostre fait & seruice, ou du leur, ou sur autre de quelconque couleur ou occasion que ce soit ou puist estre, ne de quelconque leurs lettres particulieres ou generalles, f'aucunes en auoient sur ce enuoyées ou à enuoyer sous quelque forme que ce soit, ou aucuns nobles: ou autres de quelque estat qu'ils soient, supposé qu'ils feussent ou soient du lignaige d'iceux leurs hommes & vassaulx liges, sans moyen ou subiect n'obeissent à leursdits mandemens, commandemens, proclamations, publications & lettres, ne s'arment ne voient à tels mandemens sur peine de forfaire corps & biens enuers nous, & sur toutes autres peines qui competent contre tels inobediens. A nous & à nostredicte couronne & transgresseurs de noz cōmandemens, & que f'aucuns estoient ja deuers lesdits seigneurs, ou qu'ils feussent ou voudroient partir à venir, tantost & incontinent s'en retournassent en leurs lieux: se nous ne les auions mandez par lettres patentes seellées de nostre grand scel, & passées en nostre grand conseil subsēquentes de date de ces presentes. En faisant outre publier & proclamer que nous de nostre puissance & iurisdiction celle fois cy tant seullement, exemptons lesdits seigneurs, subiects & loyaux vassaulx d'iceux seigneurs & chacun d'eux. Et ne voulons que pour non obeïr à leursdits commandemens, ils leur puissent donner aucun empeschement en corps n'en biens: ne que pour ce, ils puissent aucunement estre poursuiuis par iustice ou autrement: mais les voulons estre obseruez & gardez de tous dommages ou oppressions par tous noz iusticiers & subiects, & tous leurs biens meubles & immeubles, se pour ceste cause estoient empeschez, voulons estre par nous mis à pleine deliurance & par main armée se mestier est. Et en outre, vous transportez par tous les lieux de vostre bailliage & de voz ressorts, où sçaurez estre gens d'armes & de traict ou autres assemblez en armes, pour aller audit mandement: faictes leur & à chacun d'eux pareil & semblable & pareil mādement & deffence, & sur les peines dessusdictes. Et se à vous ou aucuns des deuantdits ne vouloient obeïr. Ou f'aucuns d'iceux, auxquels lesdits commandemens & deffences seroient faits (comme dit est) estoient rebelles ou inobediēs, que vous iceux cōtraignez à obeïr par toutes les meilleures voyes que vous pourrez: tant en mettant en leurs maisons & sur leurs biens, mangeurs &



& degasteurs en descourant icelles maisons se mestier est, comme autrement par voye forte & rigoureuse & plus forte maniere que faire se pourra, & à main armée se mestier est, en appellant avecques vous à ce faire de noz bons & vrais subiects nobles & autres, & que la force en soit vostre & vous demoure: ausquels noz subiects nous mandons & commandons par ces presentes, qu'à faire tant que les choses dessusdictes soient enterinées & accomplies. Et en ce faisant aucuns des dessusdits rebelles & inobediens morts ou mutilez, nous ne voulons qu'à vous n'à iceux en fourde ou vienne aucū empeschement. Et aussi si y auoit cheuaux, bagaiges & aucuns biens: nous voulons qu'ils soient conuertis és despens de ceux qui vous ayderont aux choses dessusdictes. Et neātinmoins tous ceux que vous trouuerez par information où autrement deüement estre, ou auoir esté inobediens à noz commandemens ou autrement, se vous les pouuez trouuer en lieu competent hors lieu sainct, prenez les & les amenez, ou faictes prendre & amener sous seurté & sauuegarde és prisons de nostre chastelet à Paris. Et se vous ne les pouuez trouuer hors lieu sainct, si les adiournez à leurs domiciles s'aucuns en ont en voz pouuoir & iurisdicions: & se non à haute voix & son de trompe és lieux où ils ont accoustumé de conuerfer, & dont ils sont où soient partis, à estre à comparoir en personne à certain & competent iour ordinaire, ou extraordinaire de nostre present parlement. Nonobstāt qu'ils, & que les parties ne soiēt pas des iours dont on plaidera se bonnement se peut faire, ou sinon à nostredit Parlement prochain aduenir sur peine de confiscation de leurs biens, & de leurs fiefs & tenement: & d'auoir commis & estre poursuiuiz conuaincus de leze majesté enuers nous, pour respondre à nostre procureur general à telles conclusions qu'il vouldra eslire & proceder en outre comme raison donnera. Et les biens d'iceux adiournez meubles & non meubles, prenez & mettez en nostre main par bonne & loyalle inuentoire: en mettāt iceux en bonne & seure main, qui d'iceux puissent & faichent rendre bon compte quand mestier sera. Nonobstant toutes appellations ou oppositions faictes ou à faire à ce cōtraires: iusques à ce que par noz ayez & seaulx conseilliers tenans, & qui tiendront nostredit Parlement y fera pourueu, en certiffiant souffisamment nosdits conseilliers, de ce que vous aurez fait sur ce, & remontrant ladicte information loyaument close sous vostre seel. Ausquels nous mandons qu'aux parties icelles ouyes, vous faciez sans faueur bon & brief accomplissement de iustice: tellement que ce soit exemple à tous autres inobediens à nous & à nostredictē couronne, & des transgresseurs de noz commandemens & deffences: & de ce faictes si bonne diligence, que de ce vous ne soyez puny. Car de ce nous vous feriōs punir se deffaute y auoit si griefuement, que ce seroit exemple à tous autres. Et en outre pource qu'encores n'avez fait vostre deuoir des excusations de plusieurs autres lettres & mandemens, que nous vous auōs enuoyez sur ceste matiere depuis que la paix fut faicte à Auxerre: & aussi puis peu de temps en ça, comme il estoit à croire vrayement, par ce que sommes apperceuz, dont plusieurs maux & inconueniens s'en sont ensuyuis: esquels nous auons, & n'est pas sans cause prins grand desplaisir cōtre vous: vous mādons que vous nous certiffiez, avecques ce que tout fait aurez sur ce, & executé du contenu en icelles: & aussi des iours & des lieux esquels & où l'urez fait à vostre bailliage, & de la maniere: afin que nous soyons de ce adcertiffiez. Et



avecques ce, faictes nous sçauoir si aucuns des deuantdits de nostre sang ou autres, faisoient ou feroient aucun mandement n'en quel lieu. Et incontinent que ce viendra à nostre cognoissance sans aucun delay, vous donnerons & donnons de ce faire & à voz commis plaine puissance, auctorité & mandement especial, par ces presentes. Mandons & commandons par ces presentes tres expressement & enioignons à tous noz iusticiers & subiects que sur tout ce qu'ils se peuuent meffaire enuers nous, à vous & aussi à voz commis & deputez obeissent, & entendent en tant qu'ils peuuent diligemment. Et prestent à vous conseil ayde & confort, & prison se mestier en est, & de par vous en sont requis: car ainsi nous plaist il estre fait & l'auons ordonné, nonobstant quelsconques lettres subreptices impetrées, ou à impetrer à ce contraires. Donné à Paris l'vnziesme iour de Novembre: L'an de grace mille quatre cens & treize, & de nostre regne le xxxij. Ainsi signées par le Roy & son grand conseil: Ouquel le Roy de Cecille messeigneurs les Ducs de Berry & d'Orleans, les Comtes d'Alençon, de Vertus, le Duc de Bar, Loys en Bauiere, le Comte d'Eu, les Comtes de Vendosme & de Richmond, le Connestable, vous Chancellier d'Aquitaine & plusieurs autres estoient. Lesquelles furent publiées à Amiens le treziesme iour de Decembre l'an desusdit. Item s'ensuit vn autre edict du Roy contenant, que nuls cheualiers, escuyers ne autres n'allast au mandement de quelque seigneur, & sur certaine peine.

CHARLES par la grace de Dieu Roy de France. Au Baillifs d'Amiens ou à son lieutenant salut: Il est venu à nostre cognoissance, que jaçoit-ce que le releuement de nostre peuple à faire cesser tous debats & congregations de gens d'armes, & obuier aux inconueniens & dommages qui par lesdictes congregations souloient venir. Nous par plusieurs haines & autrement eussions deffendu, & fait proclamer solennellement tât en nostre ville de Paris comme ailleurs en nostre Royaume, que nul de quelconque estat qu'il fut n'obeit à faire aucune congregation de gens d'armes, jaçoit-ce qu'ils venissent au mandement & seruice d'aucuns de nostre sang & lignaige ou d'autres, ou que de leur propre volenté se feussent assemblez ou autrement en quelque maniere que ce fut, s'en allassent & departissent l'un de l'autre paisiblement chacun en son hostel sur tout ce qu'ils pouuoient meffaire enuers nous, & sur peine de perdre corps & biens. Et qu'aussi à l'ayde de Dieu, nous & par grand & meure deliberation de plusieurs de nostre sang & conseilliers, eussions mis bonne paix, amour & accord entre iceux de nostre sang, & autres qui auoient eu rancune & dissention entre eux: laquelle paix auoit esté par ceux de nostre sang & par plusieurs autres Prelats, Barons, cheualiers & escuyers & noz conseilliers iurée en nostre presence sur le fust de la sainte vraye Croix, & sur les saintes Euangiles pour ce corporellement touchées. Et par ce & autrement deust estre, & deuoit estre telle la volenté de tous noz vassaulx & subiects de nostre pays de Picardie & autres, sans se disposer de leur volenté, ou autrement sans nostre licence d'eux mettre en armes & s'efforcer d'eux assembler: comme de fait sont plusieurs qui desia se tiennent ensemble en aucunes des parties desdits pays, & ailleurs en nostre Royaume, si comme nous auons entendu ce qui est en perturbant & empeschât ladicte paix, & expressement en venant contre icelle & contre nosdictes ordonnances & defences



fences à la grand charge de nous, & de nostre Royaume & subiects, & ou grand preiudice de nostredit Royaume: & seroit encores plus se sur ce par nous n'estoit pourueu de remede conuenable: pource est il, que par l'aduis & deliberation de plusieurs des deuantdits, de nostre sang & conseil, pour ce faire assemblez en grand nombre: vous mandons estroictement, & expressement enioignons: en commettant par ces presentes, que de par nous vous faictes commandement & deffendez expressement à tous nobles, & autres quelscōques tant de vostre bailliage comme ailleurs, de quelque estat ou auctorité ou condition qu'ils soient, sur tout quanques ils nous peuuent meffaire & sur peine de perdre corps & biēs: ausquels par ces presentes nous deffendons qu'ils ne f'arment ne f'acent mandemens ne congregations n'assemblées de gens d'armes oudit nostre pays de Picardie, n'ailleurs en nostre Royaume pour quelconque cause n'occasion que ce soit, pour venir à nostre mandement & seruice, ne pour quelconque mandement qu'ils ayent sinon par nostre expres commandement & licence: & que ce soit pour venir à nostre mandement & seruice, dont il appaire par nosdictes lettres patentes passées par la deliberation du grand conseil, & qu'elles soient de dacte subsequnt de ces presentes: & s'ils estoient aucūs qui se fussent assemblez & mis en armes ou autrement, qu'incontinent ils se departent l'un de l'autre, & s'en retournent paisiblement en leurs hostels sans greuer personne, & sans faire aucuns dommages à nostredit peuple & subiects. Et en cas qu'eux ou aucuns d'eux seroient reffusans, en demeure ou contredisans de noz commandemens, & deffences, & desobeissans, prenez iceux reallement & de fait, & mettez en nostre main tous leurs biens meubles, chasteaux, maisons, fiefs, terres, possessions, censés, reuenues, obuentions & autres biens quelconques estans en vostre bailliage, en faisant inuentorier iceux biens bien & loyaument, & faire iceux garder & gouverner par personnes souffisantes & solubles, qui d'iceux puissent rendre bon compte & reliqua quand & ou mestier sera. Et en mettant aussi à la garde desdictes forteresses & maisons personnes à ce idoines, & competentes aux despens de la chose: sans faire à ce quelconque deliberation ou recreance, iusques à ce que par nous & nostre grand conseil soit autrement ordonné. Et avec ce, procédez outre à destrousser, prendre & emprisonner, & punir iceux selon leurs demerites, par tout ou vous les pourrez trouuer en vostre bailliage, & dehors, en eux enuahissant par voye defait & par puissance d'armes & autrement, par toutes les voyes & manieres plus expedientes que mieux faire se pourra, tant que l'honneur & la force soit vostre. Et pour ce mieux faire & accomplir, euocquez & faictes venir avec vous de noz vassaulx & subiects, nobles & non nobles, & habitans des villes, ruraux du pays tant de vostre bailliage comme dehors, de noz amis alliez & bien-vueillans se mestier est, & en tel nombre que vous verrez estre expedient & à ce necessaire: en eux menant & conduisant, ou faire conduire & employer és besongnes deuantdictes tout par tout, où vous verrez estre bon à faire & frequenter iceux. Ausquels noz vassaulx mādons & commandons & destroictement enioignons sur la foy, loyauté & seruice qu'ils nous doiuent, & sur peine de corps & de biens, prions nosdits amis, alliez & bien-vueillans que sans quelque condion, ils voisent avec vous & f'arment à vostre mandement: & toutes les choses dessusdictes & chacune d'icelles faictes, tellement & si dili-



gemment que par vostre coulpe & negligence n'y soit trouué aucun deffaut: car en ce cas nous vous ferions griefuement reprendre: desquelles choses & de chacune d'icelles faire ou faire faire, vous donnons plain pouuoir, auctorité & mandement especial: mandons & commãdons à tous noz iusticiers, officiers & subiects, prions tous autres noz amis & alliez & bien-vueillans, que vous & à voz commis & deputez obeïssent en celle partie: & entendent diligemment & vous prestent & facent prester conseil, confort & ayde si il est mestier & qu'ils en soiēt requis. Et mandons en outre à noz ayez & feaulx conseilliers gens de nostre parlement, maistres des requestes de nostre hostel, gens tenãs les requestes à nostre Palais à Paris, au Preuost de Paris, à vous Baillif dessusdit ou vostre lieutenant, & à tous autres iusticiers de nostre Royaume ou à leurs lieutenãs, & à chacun d'eux sicomme à luy appartiendra, que toutes les causes & querelles, debtes, possessions, & quelsconques de nosdits vassaulx & subiects, nobles & non nobles, qui pour le fait & les choses deuantdictes seront en vostre compagnie, ils les tiennent, & vous les tenez & faictes tenir en estat deu du iour qu'ils se partiront à aller avecques vous iusques à quinze iours apres leur retour dudit voyage, sans faire ou souffrir estre fait ou attempté aucune chose à l'encontre d'eux, leurs pleiges ou autres pour eux obligez, en remettant, ou faisant remettre tout ce que fait auroit esté au contraire au premier estat & deu: car ainsi nous plaist il estre fait par la teneur de ces presentes: au transcrit desquelles faictes sous le seel royal (pource que ce present original ne pourroit estre porté n'exhibé par tout où il seroit mestier) nous voulons estre adioustée plaine & pareille foy comme à ce present original. Donné à Paris le quatorziesme iour de Nouembre, l'an de grace mille cccc. & xiiij. & de nostre regne le xxxiiij. Ainsi signées par le Roy en son grand conseil: ouquel le Roy de Cecille, les Ducs de Berry, d'Orleans & de Bar, les Comtes d'Alençon, Vertus, d'Eu & Vendosme, le Connestable, vous le Comte de Tancarville, le Chancellier d'Acquitaine & plusieurs autres estoient. P. Naucron, & fut publié ce present mādement à Amiens le xiiij. iour de Decembre l'an dessusdit.

*Comment le Roy Loïs enuoya la fille du Duc de Bourgogne: & des lettres que ledit Duc enuoya deuers le Roy, contenant plusieurs remonstrances & autres matieres.*

CHAP. CXIII.

**L**Tem le vingtiesme iour du mois de Nouembre le Roy de Cecille feit ramener en la cité de Beauuais Katherine fille au Duc Iean de Bourgogne: laquelle deuoit estre espousée à Loïs fils aîné dudit Roy de Cecille, ainsi comme par auant du consentement des deux parties auoit esté traicté, & sur ce par ledit Duc luy auoit esté enuoyée en treshonorable estat. Mais (comme dit est apres) la renuoya accompagnée du seigneur de Longny Mareschal de France & aucuns autres iusques au nombre de six vingts cheuaucheurs, cheualiers & escuyers, dames & damoyelles dudit Duc de Bourgogne, pour ceste cause là enuoyée par luy: & d'iceux fut receüe & ramenée en grand tristesse iusques à Amiens, & de là à l'Isle deuers son pere le Duc, qui de ce grandement fut troublé, & conceut pour ceste cause grand hayne à l'encontre dudit Roy de Cecille, laquelle dura toutes leurs vies. Et depuis sans auoir esté mariée



mariée mourut en la ville de Gãd icelle dame Katherine de Bourgongne, laquelle estoit selon sa ieunesse vne tresgracieuse dame. Ouquel mois le dessüdit Duc de Bourgongne enuoya à Paris deuers le Roy vnes lettres missiues, contenant apres ses tresreuerentes salutations, les complainctes de luy, ses excusations & accusations qu'il faisoit contre ses aduersaires, desquelles la teneur s'ensuit. Iean Duc de Bourgongne, Comte de Flandres, d'Arthois & de Bourgongne: mō trescher & tresredoubté seigneur, ie me recommande à vous tant comme ie puis: & suis desirant continuellement, comme droit est, de sçauoir de vostre bon estat, que Dieu par son plaisir vueille tousiours cōtinuer & maintenir de biē en mieux selon vostre bon desir & vouloir. Pourquoy ie vous supplie treshumblement, mon trescher & tresredoubté seigneur, que plus souuent ie puisse estre de vous & par voz lettres & bien & deüement acertené: car Dieu sçait, mon trescher & tresredoubté seigneur, comment ie desire de vous veoir en bonne prosperité. Et ne puis auoir plus grand cōsolation ne plus parfaicte ioye en ce monde, qu'ouyr bōnes nouuelles de vous, que Dieu par sa sainte grace me doint tousiours ouyr, & sçauoir telles & si bonnes que vous voudriez, & que ie voudroye & desiroye pour moymesmes. Et trescher & tresredoubté seigneur se de vostre grace & humilité vous plaist sçauoir de mon estat, i'estoye au departement de cestes en tresbonne fanté de ma personne grace à Dieu, qui tousiours vous vueille semblablement octroyer. Trescher & tresredoubté sire, ie tiens bien estre en vostre bonne memoire, comment par vostre ordonnance du conseil de mon tresredoubté seigneur monseigneur d'Acquitaine vostre fils & le mien, de plusieurs seigneurs de vostre sang & de vostre grãd conseil, & à la grãd & hūble requeste de vostre fille l'vniuersité de Paris, & des gens d'Eglise d'icelle ville, du Preuost des Marchās & des Escheuins, & generallement des autres bonnes gens de vostre dicte ville certaines ordonnances, tant de vostre dit grand conseil comme de plusieurs autres grans seigneurs & conseilliers, lesdits seigneurs & du mien de ladicte vniuersité, de l'Eglise de ladicte ville de Paris, à auoir paix & vnion des seigneurs de vostre sang pour le bien qui en peust aduenir & à vous & à eux. Et generallemēt à tout vostre Royaume, & mesmement pour la reparation de la misere & miserable estat de vostre dit Royaume, qui estoit en estat de toute desolation se ne fut la grace de Dieu, qui vous inspira de ladicte ordonnance: moyennant laquelle, chacun vostre loyal parent & subiects de vostre Royaume peut auoir esperance de dormir, & reposer en paix: sicōme il fut dit & exposé notablement par deuant vous, où estoient plusieurs tant de vostre sang comme autres par vn notable cheualier conseiller de mon trescher seigneur & cousin le Roy de Cecille. Et neantmoins (mon tresredoubté seigneur) jaçoit-ce que i'eusse iuré en vostre presence de bonne foy & bonne intention & tant cordialement, comme plusieurs adonc assistans presens deuant vous pouuoient veoir: & pource que i'ay doubté que pour mon departement, plusieurs pussent prendre aucune estrange imagination sur la rompure & infraction de vostre dicte ordonnance: le plustost que i'ay peu apres mon departement, ie vous ay enuoyé mes lettres à vous certifier de la volenté & intention que i'auoye, & ay à l'entretienement de vostre ordonnance: & encores à plus grand confirmation, i'ay enuoyé deuers vous mes gens pour ceste cause principalement, comme tiens estre en vostre bōne memoire. Mais ce non-



obstant, mon trescher & trefredoubté seigneur, & que ie n'aye riens fait contre vostre dicte ordonnance, quelque charge qu'aucuns m'ont voulu donner contre verité (sauue l'honneur & reuerence tousiours de vous) moult de choses sont & ont esté semblablement contre la teneur de vostre ordonnance au contempt, preiudice & vitupere de moy & des miens, qui estoient dedans icelle ordonnance declairez. Et pource suis-ie moins tenu de proceder de vostre voulenté & de vostre fils mon trescher & trefredoubté seigneur, ou aucuns d'autres preud'hommes de vostre sang & lignaige, ou aussi de plusieurs autres de vostre grand conseil: mais ie suis tenu de proceder à l'instigation & pourchats & grandes importunités d'aucuns, qui ont longuement contenu & contendent à estranges voyes & matiere: lesquels Dieu par sa sainte grace vueille reduire & ramener à bien, ainsi qu'il sçait que mestier est, & que ie desire. Et pour la declaration des causes dessusdictes, il est vray, mon trefredoubté seigneur, qu'à l'instigation & procuracion d'aucuns assez tost apres le serment fait sur vostre dicte ordonnance, ont esté faictes plusieurs cheuauchées, armées & congregations par le moyen de vostre dicte ville de Paris, par especial empres mon hostel de mes logis & à l'environ: lesquels semblablement estoient faits au contempt & preiudice de moy: car depuis que ie party de Paris n'ont pas là esté faictes telles armées, cheuauchées & assemblées: & qui pis est, qui eut adonc creu aucuns, la main eut esté mise sur moy deuant mon departemēt, qui n'estoit pas signe d'auoir paix & vnion. Item est vray que deuant & apres plusieurs de voz bons & anciens seruiteurs & plusieurs des miens qui n'auoient riens forfait, furent prins & emprisonnez & les autres contrains par force & par voyes obliques, à eux departir hors de Paris. Item que tous ceux qu'on sçauoit qui auoiēt aucune amour & faueur à moy, furent destituez de leurs estats, honneurs & offices, par telle maniere qu'aucuns par election, & sans autrui preiudice les eussent euz, & sans ce que sur eux on sceut ou peut sçauoir aucun mal ne quelque autre cause, fors tāt qu'ils estoient trop Bourguignons, & encores tous les iours se fait ainsi: & se par aduēture deissent ou feissent dire ou voulsissent dire, que cela auoit esté fait & se faisoit, pource que moy estat deuers vous & en vostre seruice à Paris, i'auoye fait semblablement, à ce peut estre respondu bien & vrayement. Car supposé qu'ainsi fut: si peut on clerement apparcevoir & cognoistre, considerez les termes de vostre ordonnance, qui sont principallemēt fondez sur bone paix, amour & vnion, que ce n'est fors vengeance que d'auoir fait ce que dit est: laquelle chose est signe de diuisiō & nompas de paix, amour en vnion: & eut esté plus expedient pour la confirmation de vostre dicte ordonnance & bien de vostre Royaume, de pourueoir par bonne & vraye election à voz offices, non aux personnes, sans auoir regard à ladicte vengeance.

Item que par lesdictes procuracions & inductions, à peine estoit nul fut de voz seruiteurs, mon trescher & trefredoubté seigneur, de madiete dame la Roynie, de mon trefredoubté seigneur vostre fils, des gēs de vostre conseil de vostre sang, de ceux de l'vniuersité de la ville de Paris, qui osast parler & cōmuniquer avec aucuns, puis qu'on sentoit & sçauoit qu'ils voulsissent mon bien & honneur, qu'ils ne fussent griefuement punis & corrigez. Item qu'en plusieurs sermens, propositions ou assemblées, ont esté dictes parolles contre mon honneur & estat, contre verité (sauue l'honneur & reuerence de vous) en disant des parolles non pas si estranges



estranges, qu'on n'entendit bien notoirement, qu'on les disoit pour moy: en venant directement contre la paix ordonnée & par vous faicte tant à Chartres, cōme à Auxoirre, & contre les termes de ladicte cedulle dernieremēt iurée & promise: lesquelles choses sont de tresmauvais exemple & contre l'enseignement de Cathon, & promouuans à toutes tensions, débats & dissensions qui pourroient tourner, que Dieu ne vueille, en grād preiudice & detrimēt de vostre Royaume.

Item ont esté faictes plusieurs lettres en plusieurs lieux, tāt en vostre Royaume cōme dehors, grādement faisant mention qui bien les entend cōtre l'honneur de vous, de mon trefredoubté seigneur mōdit seigneur d'Acquitaine, & de plusieurs autres de vostre sang & lignaige, de vostre grād conseil, de vostre fille l'vniuersité de l'eglise de Paris, & aussi d'icelle vostre ville de Paris: & aucuns disoiēt ou vouloient dire que ce fut fait pour le recouurer de leur honneur, dont par les lettres ils auoiēt esté vituperez, à tout le moins deussent il auoir exprimé la verité és dernieres lettres, sans dōner charge à autrui, qui a bien voulu tenir les termes de vostre dicte ordonnāce. Item que plusieurs m'ont voulu donner charge cōtre verité (sauue l'honneur & reuerence de vous mon trefredoubté seigneur) que i'ay tenu contre vostre ordōnance & deffence gens d'armes, qui grandement ont opprimé & dōmagé vostre peuple: la verité est telle, cōme autresfois ie vous ay dit & fait dire, que par vostre commādemēt i'ay euz charge d'auoir mille hōmes d'armes avec monseigneur de Berry mon oncle, & autres aussi: ausquels vous auez dōné charge de gens d'armes à obuier à plusieurs dōmages, que faisoient plusieurs gens de compagnie & à plusieurs entreprinſes, qu'ils vouloient faire deuāt vostre dicte ville de Paris en grand deshonnoration & vitupere de vous: Et incōtinent apres vostre dicte ordonnance iurée, ie les contremanday qu'oncques puis ne manday pour gens d'armes, ne n'ay tenu aucuns sur le païs. Et aucuns se sont là tenus eux aduoians de moy, ce n'a pas esté par mō ordonnance ne de mon cōmandement: ne sçay se c'a esté leur volenté, pource qu'ils veoient lesdictes gens de cōpagnie, qui faisoient & encores font tant de maulx que chacun sçait. Item est vray mon trefredoubté seigneur, cōme il est assez notoire, qu'aucuns ont tenu longuemēt, & encores tiennent lesdictes gens de cōpagnie entre la riuere de Loire, les riuieres de Seine & Yonne, & ailleurs en venant cōtre vostre dicte ordōnance, qui est à la totale destruction de vostre peuple, où ils ont esté & sont, sans difference des personnes de quelconque estat qu'ils soiēt gens d'Eglise, nobles & autres, en moy donnāt charge que les tiennēt pour doubte de ce qu'on dit, que ie fais assemblée de gens par tous mes païs pour aller à Paris à grand puissance, & en ce & autrement faisant contre vostre dicte ordonnance: laquelle chose, sauue vostre hōneur & reuerence, mon trefredoubté seigneur, il n'est pas vray: car ie ne l'ay pas fait ne pensay oncques à ce n'à autre chose quelcōque, qui vous deust desplaire en quelque maniere, ne ie ne feis oncques ne ne vueil faire le cōtraire: mais seray tant cōme ie viuray vostre bon & loyal parent, & trefobeissant subiect. Item est vray, mon trefschier & trefredoubté seigneur, que plusieurs sicomme ie suis informé plainement, ont dit publicquement contre verité, sauue tousiours l'hōneur & reuerence de vous, que i'auoye à Paris meurdriers & tueurs conuenables pour eux tuer & meurdrir. Surquoy, mon trefredoubté seigneur, ie vous afferme en verité que ie ne feis oncques ce, mais qui plus est ne pensay: & ce ne sont point les pre-



mieres charges qu'ils m'ont voulu donner. Item que plusieurs ont esté bannis ou contéps de moy, dont aucuns dient qu'ils ne l'ont point deffery: & cela mostrent ils bien, sicôme ils dient, si pouoient estre seurs de leurs corps & auoir bone & vraye iustice: lesquelles choses ie ne dy pas n'entés à empescher la punition & correcton des mauuais, ou de ceux qui vous ont fait desplaisir n'à ma dame souveraine & à mondit trefredoubté seigneur d'Acquitaine: mais pour ceux qui ou contépt de moy ont esté ainsi deposez. Item que par aucuns ont esté es hostels de mes pauures seruiteurs que i'ay en vostre dicte ville de Paris entour & enuiron mon hostel d'Arthois, lesdits hostels chargez & retournez, pource qu'on disoit que lettres auoient esté portées esdits hostels de par moy pour bailler à plusieurs des quartiers des halles, pour faire vne comotion de vostre dicte ville de Paris, & par especial oudit quartier des halles: dont plusieurs des femmes de mesdits seruiteurs ont esté durement traictées, & en vostre chastellet examinées sur ce. Pourquoy, mon trefredoubté seigneur, plaist vous sçauoir qu'oncques ie n'escriuy ne feis escrire aucunes lettres en enfreignant vostre dicte ordonnance. Et font mal, & peché ceux qui me baillent telles charges, de quoy vous ne autre puissiez ou puissent auoir mauuaise imagination contre moy: & bien doiuent cognoistre ceux de Paris, tant ceux dudit quartier comme des autres, qui pour mourir ne feroient ne voudroient faire pour moy ne pour autre quelcōque quelque chose, qui deust tourner à vostre deshōneur & desplaisance: & tāt qu'est à moy, Dieu ne me preste ja tāt viure que ie face le cōtraire. Item, & qui pis est, on dit cōme i'ay entendu cōtre verité (sauue l'honneur & reuerēce de vous) que i'ay traicté vn mariage en Angleterre: auquel mariage i'ay promis les chasteaux de Chierbourg & Caen avec plusieurs autres choses, faictes oudit traicté ou grād preiudice de vous & de vostre dit Royaume, laquelle chose ie ne feis oncques ne pēsay: & pleut à Dieu que tous ceux de vostre Royaume vous eussent esté & fussent tousiours aussi loyaux à la conseruation de vostre personne & progenie & conseruation de vostre seigneurie & demaine de vostre dit Royaume, comme i'ay esté & seray toute ma vie. Item que contre vostre ordonnance ont esté faictes & poursuiuies plusieurs autres choses à declairer en temps & en lieu, qui sont contre l'estat & honneur de ma personne & des miens. Lesquelles choses deuant touchées & autres à declairer (comme dit est) ne sont tenir les plus principaux termes de vostre dicte ordonnance: mais faire plus dure guerre & plus mauuaise qu'homme à peine peut faire: c'est à sçauoir de controuuer toutes les voyes, qu'ils puissent trouuer par ce que dit est de moy faire eslongner de l'amour & grace de vous, & de mon trefredoubté seigneur monseigneur d'Acquitaine & aussi de ma trefredoubtée dame: desquels ensemble les biēs, l'hōneur & estats de vous & d'eux, i'ay desiré toute ma vie & desire sur toutes les choses qui sont en ce monde: toutesfois, mon trefredoubté seigneur, ie ne vous escrits pas ne fais sçauoir les choses deuādictes, affin que ie vueille aller contre vostre ordonnance n'icelle enfreindre de reintegration ou reparatiō de vostre estat ne de vostre Royaume, qui tant a à souffrir en tous estats & en tant de manieres, qu'il n'est hōme tāt peruers ne cruel auquel il ne doit prendre pitié. Item, si aucuns m'ont donné ou veulent donner charge de reculler & esloigner d'exaulcer vostre ordonnance, ie vous afferme que oncques n'y pensay, n'icelle n'ay voulu empescher: mais l'ay voulu autāt que gens de



de vostre Royaume, soit de vostre sang ou autre exaucer. Mais il est bié vray que ie quéroie prouisions à mettre bõne paix, ferme & estable en vostre Royaume, doubtant les choses dessusdictes aduenir. Pourquoy ie vous supplie, mon tresredoubté seigneur tant humblement & cordialement, que puis qu'il vous plaise à pourueoir aux incõueniens deuantdits, par telle maniere que ceux qui de ce s'ont blesez ou empeschez n'ayent cause d'eux plus douloir, & que vostre dicte ordonnance soit tellement entretenue, que ce soit au bien & hõneur de vous, & salut & restauration de vostre dit Royaume : & que chacũ puisse dormir ainsi qu'on cuidoit & reposer en paix. Et à ce faire & exposer tout mon corps, le mié, mes amis & tout ce que Dieu m'a presté en ce, & en toutes autres choses vostre bõ plaisir & cõmandement d'accõplir, ie suis prest & appareillé. Et mon trescher & redoubté seigneur, ie supplie au benoist fils de Dieu qu'il vous ait en sa saincte garde & vous doint bonne vie & longue. Escrit en nostre bonne ville de Gand le xvj. iour de Nouembre: lesquelles lettres furent présentées au Roy par le Roy d'armes de Flandres, lequel les receut assez agreablement: Nonobstãt que ceux qui le gouernoient alors n'en furent pas bien contens, & ne souffrirent pas que le Roy feit respõce ne autrement par escrit: mais fut dit à iceluy Roy d'armes par le Chancelier de France, que le Roy auoit bien veu ce que son maistre le Duc de Bourgogne auoit enuoyé, & auroit aduis sur ce, de luy faire responce en temps & en lieu: & apres le dessusdit Roy d'armes s'en retourna de Paris en Flandres deuers son maistre. Nonobstant les lettres qu'auoit enuoyées le dessusdit Duc de Bourgogne pour ses excusatiõs, ne demoura pas que ceux qui gouernoient le Roy, cõme dit est, ne procedassent contre luy en toute rigueur : & en dedans briebs iours ensuiuant fut faicte à Paris vne grãd assemblée de maistres en Theologie par l'Euesque de Paris, & l'inquisiteur de la foy : affin qu'ils determinassent sur aucune propositions proposées deuãt les seigneurs du sang du Roy & du Duc de Bourgogne, & pour luy autresfois proposées contre feu Loÿs d'Orleans, par maistre Iean Petit, sçauoir se lesdictes propositiõs sont hereticques & erronees. Pour laquelle assemblée furent aucũs moult troublez, doubtans que ledit Duc de Bourgogne pour ceste cause ne les eut en son indignatiõ, & qu'en tẽps aduenir autre chose n'en veinst. S'ensuit la copie des cedulles sur ceste matiere baillez à aucũs maistres en Theologie, desquelles la forme est telle. De la partie de l'Euesque de Paris & de l'Inquisiteur & conseil de la foy solennellemẽt assemblez: maistres reuerẽds on vous fait à sçauoir, & vous enuoye on la cedula contenãt aucunes assertions avec leurs reprobatiõs: pourquoy nous vous requerõs sur peine de droit que vous donnez vostre deliberation publicquement par escrit ou par parolles: se icelles affectiõs, desquelles est venu notoirement escandalle sicõme dit le conseil du Roy & de la foy, sont erronees & à condãner: affin, que nous puissions cõsequẽment proceder sicõme ordre de droit le requiert. Et ce dedãs mercredy xx. iour de ce mois de Decembre. La premiere assertion. Chacun tyrant doit & peut estre loyallement & par merite occis de quelconque son vassal ou subiect & par maniere: mesmement par aguets, par flateries ou par adulations: nonobstãt quelconque iurement ou confederatiõ faicte enuers luy, sans attendre la sentence ou mandement de iuge quelconque. Ceste assertion ainsi mise generally pour maxime & selon l'acception de ce mot tyrant est erreur en nostre foy, & en do-



ctrine de bōnes meurs:& est contre les cōmandemens de Dieu: *Non occides*(glose) *propria auctoritate*. Tu n'occiras pas(glose)de ton auctorité:& *Matth.26.Omnes qui gladium accipiunt* (glose) *propria auctoritate*. Item ceste assertion tourné à la subuersion de toute chose publique, & de chacun Roy ou Prince donne voye & licence à plusieurs autres maux, cōme à fraudes & violatiōs de foy & de sermens & de trahisons, mensonges & deceptions:& generalmente à toute inobedience de subiect à son seigneur à toute desloyauté & deffiance des vns aux autres,& conséquēment à perdurable damnation. Item celuy qui afferme obstineement telle erreur & les autres qui s'ensuyuent est hereticque:& cōme hereticque doit estre puny, & mesmement apres sa mort. *Notatur in decretis Quæstione quinta*. L'autre assertion: S.Michel sans mandement ou commandement quelconque de Dieu ne d'autre, Mais tant seullement meū d'amour naturelle, occist Lucifer de mort perdurable,& pource il eut des richesses espirituelles autant cōme il en peut receuoir.Ceste assertion contient plusieurs erreurs en la foy: car S. Michel n'occist pas Lucifer, mais Lucifer s'occist soy mesmes par son peché:& Dieu l'occist par la mort de la peine perdurable. Item, S.Michel eut mandemēt de Dieu de bouter Lucifer hors de Paradis. *Quia omnis potestas est à Deo: & hoc sciebat Michael, quia constitutus erat à Deo princeps, quem honorem nō sibi assumpsit. Nota quomodo Michael non est ausus inferre auditum blasphemie, sed dicit: imperet tibi dominus in epistola Iudæ*. Item Dieu eut peu bailler plus de richesses espirituelles, & il en eut peu plus receuoir. Et ainsi il ne defferuit pas telles richesses espirituelles par amour naturelle. L'autre assertion, Phinéas occist Zambry sans quelconque mandemēt de Dieu ou de Moÿse,& Zambry ne fait pas idolatrie.Ceste assertion est contre le libelle où est ceste hystoire selon l'entendement des choses & des saincts Docteurs & de raison. Notez: *Numeri 25. dicit Moyses ad iudices Israel: Occidat unus quisque proximos suos, qui initiati sunt Beelphegor & ecce unus, &c. glosa. Iosephus dixit, quod Zambry & principes in tribu Symeon duxerant filias, &c.* L'autre assertion: Moÿse sans cōmandement ou auctorité quelconque, occist l'Egyptien. Ceste assertion est contre le texte de la Bible, *Actuum.7.* Selon l'entendement des choses des saincts Docteurs & de raison. *Textus. Estimabant autem intelligere fratres, quoniam Deus per manum ipsius daret salutem Hierusalem, &c.* L'autre assertion: Iudic ne pécha point en flatant Olofernes ne Hiëu en mentant, qu'il vouloit honorer Baal. Ceste assertion est fauorisant à l'erreur de ceux qui ont dit, qu'en aucuns poincts on peut loyallyment mentir: contre lequel erreur S. Augustin escrit à S.Hierosme. *Si inquit admissa fuerint vel officiosa mēdacia tota scriptura diuine vacillabit auctoritas*. L'autre assertion Ioas occit Abner depuis la mort d'Absalon, &c. Ceste assertion est contre le texte exprins de saincte escriture, *2.Regum 3.cap.* où recite, que lōg temps auant la mort Absalon Ioas occit Abner. L'autre assertion: toutesfois qu'aucun fait aucune chose, jaçoit-ce qu'il ayt iuré le nō faire, ce n'est pas pariurement, mais au contraire est pariurement, & ceste assertion ainsi generalmente mise est faulce, & ne proffite riens à ceux qui iurent sciemment faulces alliances: car c'est fraude & deception & pariurement clair: & dire que ce faire soit choses licite, cest erreur en la foy: Lesquelles besongnes, apres qu'elles eurent esté diligemment visitées ( comme dit est ) furent lesdits articles condamnés comme hereticques contre la foy.



*Comment ledit Duc de Bourgongne alla en Anuers, la prinse messire Iean de Croÿ & autres plusieurs grans besongnes, qui aduindrent en ce temps dessusdit.*

## CHAP. CXIIII.

**E**N apres, en ce mesme tēps, le Duc de Bourgongne tint en la ville d'Amiens vn grand & destroit conseil pour plusieurs de ses affaires : ouquel estoient auec luy son frere de Brabant, & ses deux serourges: c'est à sçauoir le Duc Guillaume & Iean de Bauiere Euesque de Liege, les Comtes de S. Pol & de Cleues. Et les auoit assemblez principalement pour sçauoir quelle ayde il auroit d'eux se guerre luy fourdoit de rechief de la partie de France. Si luy promeirent tous de le seruir à l'encontre de tous ses aduersaires reserué la personne du Roy & ses enfans. Lequel conseil finy ledit Duc de Bourgongne retourna en son paÿs de Flandres, & les autres seigneurs és lieux dont ils estoient venus, & le iour de la Circoncision vint à sainct Pol en Ternois deuers le Comte Vvaleran vn sergent d'armes, lequel luy presenta lettres contenant, que le Roy luy mandoit & deffendoit sur grans peines, qu'il ne farmaist ne fait assemblée de gens d'armes nullement pour accompagner le Duc de Bourgongne, n'autres de son Royaume sans son expres commandement: & que de la reception desdictes lettres il baillast ses lettres de recepissé, comment il auoit receu ledit mandement royal, ce que fait ledit Comte. Durant lequel temps le Duc d'Aquitaine & tout son estat demoura au Loure, & la Duchesse sa compaignie demourant à sainct Pol, aduint que le mercredy douziesme iour de Ianuier ladicte Royne qui adóc estoit venue au Loure pour veoir son fils & ladicte Duchesse auecques luy: laquelle par auant conseillée au Roy de Cecille & aux Ducs de Berry, d'Orleans & autres Princes du sang & lignée du Roy fait prendre quatre des cheualiers & plusieurs autres seruiteurs de sondit fils d'Aquitaine, & hors du Loure les fait mener: Dont ledit Duc fut moult remply de courroux & grand fureur, & tant qu'il vult issir dehors pour esmouuoir le peuple de Paris en son ayde, pour deffendre lesdits prisonniers: mais iceux Princes ses parens ne le laisserent pas issir, & la Royne sa mere tant qu'elle peut le rappaisa & abbaissa son ire: & puis s'en alla à S. Pol où estoit le Roy, delaisant auec son fils les Princes dessusdits, qui par belles & doulces parolles le rappaiserent: & estoient les quatre cheualiers dessusdits, messire Iean de Croÿ, le seigneur de Moÿ, messire Daud de Brimeu, messire Bertrand de Montauban & aucuns autres, qui assez tost par condition qu'ils feirent sermēt de plus retourner deuers ledit Duc d'Aquitaine, furent deliurez excepté ledit messire Iean de Croÿ qui fut mené à Montlehery & là detenu prisonnier: toutesfois, nonobstant qu'iceluy Duc d'Aquitaine monstraist aucunement semblant d'estre rappaisé, neantmoins il manda secrettement par vn sien seruiteur le Duc de Bourgongne à ce qui hastiuement veinst à Paris à toute sa puissance: & puis luy escriuit plusieurs lettres de sa main sans le sceu de la Royne ne des Princes dessusdits. Et pourtant ledit Duc de Bourgongne oyāt ces nouuelles qui ne desiroit autre chose que d'auoir occasion d'aller à Paris par celle couleur, commença faire vn grand mandement de gens d'armes par tous les paÿs, & leur assigna iour à estre au deuant de luy à Espehy vers sainct Quentin en Vermandois. Et pour sa descharge affin qu'on



ſceust pourquoy il faisoit ledit mandement, escriuit ſes lettres à toutes bonnes villes de Picardie desquelles la coppie ſ'enſuit. Treschiers & bons amis, il eſt bien vray que vous auez bien en memoire cōment en l'an paſſé au mois d'Aouſt, monſeigneur le Roy apres ſ'en retourna de la cité de Bourges, & retourna en ſa ville d'Auxerre volut bonne paix eſtre & demourer touſiours entre les ſeigneurs de ſon ſang & lignage: & celle volut & ordonna qu'elle fut iurée ſolemnellemēt promiſe d'entretenir, tant par nous tous de ſon ſang & lignage, comme par tous Prelats, nobles vniuerſitez & bonnes villes de ſon regne. Et ainſi que vous ſçauiez tous preſens audit Auxerre, le promeirent & iurerent ſolemnellement tant pour eux en leurs noms comme pour ceux de laquelle partie ils eſtoient venus audit lieu d'Auxerre. Et puis apres monſeigneur le Roy r'enuoya ſur ce ſes lettres preſentes à pluſieurs bonnes villes de ſon Royaume, pour icelle paix iurer & entretenir. Et de rechef n'agueres & dernièrement le iuraſmes en propres perſonnes, du commandement de mondit ſeigneur le Roy, & auſſi des autres ſeigneurs de ſon ſang & lignage. Et iurerent ſelon la forme d'une cedulle faiçte à Auxerre: par laquelle entre les autres choſes il ordōna eſtre & demourer entre leſdits ſeigneurs bonne amour & vnion, & qu'ils fuſſent bons parens & amis les vns aux autres. Et jaçoit ce que ladiçte paix, laquelle nous auons touſiours deſirée, fut par nous bien & entierement gardée, ſans faire ou ſouffrir eſtre fait quelque choſe au contraire de noſtre coſté. Neantmoins nous eſt bien tout le contraire, par iniures deſteſtables que pluſieurs ſe ſont efforcez de faire à noſtre trefredoubtée Dame ma fille la Duchefſe d'Acquitaine, comme il eſt aſſez notoire en ce Royaume ſans plus outre declairer la choſe. Et auſſi les deſpits, iniures & excez qui nous ont eſté faits en prenant de noz gens, en dechaffant tous ceux qu'on ſçauoit ou pouoit imaginer eſtre fauorables à noſtre dit ſeigneur ou à nous. De nous auſſi auoir difſamé en predications & collations publiques en pluſieurs lieux, & en pluſieurs manieres, laquelle nous à eſté dure à porter: neantmoins nous l'auons porté patiemment & encores pour l'oſeruance de ladiçte paix, qui eſt ſouuerain bien de ce Royaume, & entre les plus grans maulx, inconueniens & dommages, qui autrement ſe pourroient enſuiuir l'euffions voulu porter, iuſques adonc que mon trefredoubté ſeigneur & fils, le Duc d'Acquitaine, nous à fait ſçauoir, que apres pluſieurs excez & deſpits à luy fait à ſon deſplaiſir, il eſtoit tenu au Loure comme priſonnier à Pont leué audit Chaſtel du Loure, qui eſt choſe abhominable, & qui bien doit deſplaire non pas tant ſeulement à nous, mais à tous autres ſubiects & bienueillans de mondit ſeigneur le Roy. Surquoy mon trefredoubté ſeigneur & fils, pluſieurs fois par ſes lettres & meſſagiers, nous à requis noſtre ayde & ſecours pour le deliurer du danger où il eſtoit tenu. Et pource que nous, en gardant noſtre loyauté enuers mondit ſeigneur, & mon trefredoubté ſeigneur & fils le Duc d'Acquitaine ſon premier fils: auſquels par lignage de confederation de mariage, foy, hommage & en tant d'autres manieres ſommes obligez, à eux ne pourrions nullement faillir en telle neceſſité. Nous ſommes deliberez d'aller incontinent deuers Paris à tout tant de gens d'armes que nous pourrons finer. Leſquels pour la ſeureté de noſtre perſonne, afin qu'au plaiſir de Dieu nous puiffions aller veoir en toute bonne proſperité mondit ſeigneur le Roy, madame la Royne, mon trefredoubté ſeigneur monſeigneur d'Acquitaine, & ma trefredou-  
tée



tée fille sa compaignie. Et pour eux à mon pouoir oster hors du danger auquel ils sont, & eux mettre à leur liberté & voulenté comme il est de raison, sans ce que nous ayons intention d'enfreindre ladicte paix. Si vous signifions treschers & bons amis, affin que vous nous facez & cognoissiez estre bienueillans & vrais obediens de mondit seigneur le Roy. Sçachez vraiment que nostre intention & voulenté est telle, comme dit est, & non autre. Et vous prions tant adcertes & de cueur, que plus pouons, qu'en ce fait cy, lequel est tant fauorable pour mesdits seigneurs, & pour paix & tranquillité & vtilité de ce Royaume, vous nous vueillez assister & venir à nostre ayde le plus tost que vous pourrez, consommer & accomplir ce fait cy à l'honneur de moy, & de monseigneur le Roy, & de mondit seigneur d'Acquitaine, & du bien commun de ce Royaume : & vous tellement porter, qu'on s'apperçoie de vostre bonne loyauté enuers monseigneur le Roy & mondit seigneur d'Acquitaine & du bien commun de ce Royaume. Sicomme nous qui ne desirons que paix : car nous auons parfaicte fiance en vous treschers & bons amis, nostre seigneur, vous ayt en sa garde. Escript en nostre ville de l'Isle le vingttroisiesme iour de Ianuier mille quatre cens & treize bien en haste sur mon departement. Et la subscription estoit telle: à mes treschers & bien aymez les bourgeois manans & habitans de la ville d'Amiens. Lesquelles lettres ainsi enuoyées par le Duc de Bourgogne, & aussi l'assemblée des gens d'armes qu'il faisoit, fut tantost sceu en la ville de Paris : & pourtant affin d'obuier à l'entreprinse d'iceluy Duc, fut tant traicté vers iceluy Duc d'Acquitaine par le conseil du Roy, qu'il escriuit lettres aux bonnes villes pour rompre le voyage dudit Duc de Bourgogne : dont la teneur s'ensuit.

L O Y S premier fils du Roy de France Duc d'Acquitaine & Daulphin de Vienne: au Baillif d'Amiens ou à son lieutenant salut & dilection. Sçauoir faisons que pource qu'il est venu de nouuel à nostre cognoissance, que nostre trescher & trefaymé pere le Duc de Bourgogne, n'agueres à fait & encores fait de iour en iour grand mandement, & grand assemblée de gens d'armes en intention, sicomme on dit, de venir deuers nous : laquelle pourroit estre preiudiciable à mondit seigneur, à son Royaume & à sa seigneurie & subiects. Et par especial à l'entretènement de ladicte paix par mondit seigneur dernièrement faicte à Auxerre entre aucuns grans seigneurs de son sang & lignage, & du nostre: Nous plainement escriuons à nostredit pere par lettres, desquelles la teneur s'ensuit.

L O Y S premier fils du Roy de France Duc d'Acquitaine & Daulphin de Vienne, à nostre trescher & aymé pere le Duc de Bourgogne salut & dilection. Vous sçauiez les commandemens & deffences qui plusieurs fois tant par lettres patentes comme par ambassadeurs notables, monseigneur, pour le cler & euidēt proffit & bien de son Royaume, vous à fait & fait faire, de non assembler ne faire assemblées ou mandemens de gens d'armes. Et aussi vous sçauiez les sermens que sur ce vous feistes tant à Auxerre comme apres à Paris. Et neantmoins il est venu à la cognoissance de nostredit seigneur, & à la nostre que contre lesdictes inhibitions & deffences & contre ladicte paix faicte par mondit seigneur & par vous tenir à Auxerre iurée: vous avez fait & faictes de iour en iour grans mandemens & assemblées de gens d'armes en intention, sicomme on dit, de venir à nous : & que pour auoir couleur de faire ledit mandement, vous feistes & faictes publier



de par nous par voz lettres que nous vous auons mandé, de venir à nous à tout grand puissance : laquelle chose nous n'auons pas fait ne pensé. Et pource que nous sçauons vrayement que vostre venue deuers nous feroit de present nuyssible & preiudiciable, & contraire de l'entretènement de ladicte paix & bien de sondit Royaume & seigneurie & de ses subiects, & que pour ces causes mondit seigneur de rechef vous enuoye vn huissier de Parlemēt sur ce faire deffence. Nous vous requérons & neantmoins vous cōmandons & deffendons de par mondit seigneur sur la foy, loyauté & obediēce que luy deuez, & aussi pour l'amour que vous auez à luy & à nous, & vous dictes tousiours auoir eüe au bon estat de ce Royaume, & sur quanques vous pouez encourir de maliuolence enuers mondit seigneur & nous : que nonobstant lesdits commandemens que par noz lettres vous dictes auoir eu de nous ou d'autres quelconques que de ce vous pouez auoir, ou sous quelque cause & occasion ou quelque couleur que ce soit ou il ait esté, vous, pour le present laissez deuenir à nous. Et que les mandemens & assemblées de gens d'armes que jà vous auez fait & assemblez contremandez iceux, & ceux qui ne sont encores venus à vous ou là où vous les auez mandez de venir. Et sil estoit aucune chose dequoy vous eussiez cause de vous douloir, ou qu'aucunement ce fut à l'infraction de ladicte paix, autrement faictes le sçauoir à mondit seigneur ou à nous. Et nous sçauons de vray que mondit seigneur vous y pouruoyera par telle maniere, que vous deurez estre contens. Donné à Paris le vingtquatriesme iour de Ianuier l'an mille quatre cens & treize : Si vous requérons & neantmoins mandons par mondit seigneur, que ces presentes vous faictes publier par tous les lieux à faire publications & proclamations accoustumées en vostre dit bailliage : en deffendant de par mondit seigneur à tous ses vassaulx & subiects comme autresfois par ces presentes leur à esté notiffié, qu'au mandemēt de nostredit pere de Bourgongne sous vmbre de la cause deuantdicte ou autres quelsconques, ils ne voissent aucunement, ne d'autres quelsconques sans auoir commandement de mondit seigneur : dont il leur appere par ses lettres patentes de date subsequant à ces presentes. Donné à Paris le quatriesme iour du mois de Ianuier, l'an de grace mille quatre cens & treize. Ainsi signé par le Duc d'Acquitaine. I. de la Cloye. Et pource que ledit Duc de Bourgongne ne veult desister de son entreprinse, nonobstant la deffence du Roy & de son fils le Duc d'Acquitaine, le Roy manda ses gens d'armes pour resister audit Duc de Bourgongne & à ceste cause fait vn edict duquel la teneur s'ensuit. &c.

**C H A R L E S** par la grace de Dieu Roy de France. Au Baillifs d'Amiens ou à son lieutenant salut & dilection : Il est venu à nostre cognoissance, que nostredit cousin de Bourgongne contre le traicté de la paix par nous faicte à Auxerre, & de par luy, & autres de nostre sang & lignage iurée & audit Auxerre promise, & depuis à Paris, & ailleurs, & que depuis luy ont esté faictes plusieurs inhibitions & deffences, tant de par noz autres lettres patentes comme par ambassadeurs notables & autrement, a fait & fait faire chacun iour grans congregations & assemblées de gens d'armes & de traict & d'autres gens de guerre : Et ja est party de son païs, & se tient sur les champs en intention, comme on dit, de venir à Paris dont ladicte paix pourroit estre rompue & enfraincte. Et par ce, pourroient venir & soudre grans & innumerables & irreparables maux & inconueniens



niens à nous & à nostre Royaume, domination, & subiects se par nous n'estoit sur ce pourueu de remede conuenable. Pourquoy, nous les choses dessusdictes considérées vueillans obuier, & pourueoir ausdits maulx, inconueniens, & entreprinſes dudit Duc de Bourgongne : nous sommes deliberez de resister de toute nostre puissance contre luy, & tous autres qui voudroient empescher ladicte paix aucunement, & de nous pource ayder de tous noz bons vrais vassaux & subiects. Pourquoy, nous vous mandons & expressement enioignons sur tout quanques que vous pouez tenir ne meffaire deuers nous, que solennellement à haulte voix & à son de trompe vous proclamez & publiez ces presentes par toutes villes, lieux & places à faire publications & proclamations accoustumées en vostre dit bailliage : & par la teneur d'iceluy, nous sur leur foy, loyauté, obediencce qu'ils nous doiuent, qu'ils soient au cinquiesme iour de Feurier prochain venant en nostre ville de Montdidier en armes, prests & appareillez pour en nostre ville de Paris ou ailleurs où nous voudrons ordonner & commander nous suyuir : en laquelle ville de Montdidier ils trouueront gens de par nous qui les receueront, ordonneront sur payement tellement que de ce deueront estre contents : & là leur feront sçauoir, où ils deueront aller : en faisant sçauoir à tous nosdits vassaulx & subiects : & nous mesmes leur deffendons sur les peines dessusdictes, & sur estre rebelles & inobediens enuers nous, & de forfaire corps & biens pour quelsconques mandemens, prieres & requestes qu'ils ayent ou puissent auoir dudit Duc de Bourgongne ou d'autres quelsconques, soient de nostre sang & lignage ou d'autrui, sous vmbre & couleur de nous de nostre fait, ou autrement ils ne s'arment ne voient avec eux n'obeissent en aucune maniere sans nostre licence ou congé : dont il leur appaire par noz lettres patentes de datte subſequent à icelles presentes lettres, s'ils estoient deuers ledit Duc de Bourgongne ou autres du party pour venir, qu'ils s'en retournent & viennent le plus tost qu'ils pourront en leurs maisons supposé qu'ils fussent du lignage, hommes liges ou vassaulx dudit Duc de Bourgongne, ou d'iceluy, ou ceux qui ainsi les auroient mandez ou que ils tenissent en fiefs d'iceux. Desquels de leurs pouoirs & iurisdiccions quant à ce cas & pour ceste fois, nous tant ſeulement nous les exemptons & promettons de garantir & deffendre de tous dommages & intereſts, qu'ils pourroient auoir à ceste cause. Et en ce cas que apres nosdictes deffences & outre nostre dit mandement, aucuns de noz vassaulx & de nostre bailliage se partiront pour aller ſeruir en armes ledit Duc de Bourgongne ou aucuns, qui ſont ja en ſon ſeruiſe ne ſ'en retournoient dedans le temps deu apres la publication de ces presentes en leur maison & hoſtel : mais demourassent enuers ledit Duc de Bourgongne ou autres, qui les auroient mandez. Nous vous mandons & commandons sur les peines dessusdictes que ſans delay excuſation ou autre diſſimulation, vous les mettez ou faictes mettre en nostre main reallement & de fait, par bon & loyal inuentoire tous leurs biens meubles, & auſſi toutes leurs terres, maisons, rentes, profits & heritages quelsconques : & iceux baillez à gouuerner de par nous à perſonnes qui de ce puissent & ſçachent rendre raiſon quand & où il appartiendra, en procedant outre aux peines contenues en ces presentes ainſi comme par raiſon il appartiendra & deuera. Et avec ce, que tous les ſeditieux leſquels vous trouuerez ou ſçauoir pourrez en vostre dit bailliage, qui par fauſſes relations ou menſonges



trouuées adeuiennent, de fait ou autrement s'efforcent, ou se veulent efforcer de mettre nouuelles diuisions en vostredit bailliage, ou qui continueront celles qui autresfois ont esté en nostre Royaume, ou qui autrement viendroient ou voudroient venir contre ladicte paix, vous les prenez ou faictes prendre & punir comme vous verrez estre à faire par raison. Et de ce faire, vous donnons pouoir, puissance, auctorité & mandement especial: mandons & commandons à tous noz iusticiers, officiers & subiects qu'en ce faisant obeissent & entendent diligemment: & aussi à tous noz autres Baillifs, capitaines & gardes de bonnes villes, chasteaulx, ponts, passages, destroits & iurisdiccions: mandons & commandons que ils facent & signifiēt & laissent nosdits subiects de vostredit bailliage à tous leurs cheuaulx, bagues & autres biens quelsconques, en venant deuers nous ou ailleurs où nous les ordonnerons à aller pour nostre seruice, venir, passer & repasser & par les lieux deuantdits en portant seullemēt vidimus soubs seel royal de vostredit bailliage & certification de vous, comment ils viennent deuers nous ou ailleurs pour nostredit seruice, sans à eux ou aucun d'eux faire ou donner aucun mal, encombrer ou empeschement. Nonobstant que par noz autres lettres, nous leur eussions mandé & deffendu, qu'ils ne laissent pas ou souffrent aucuns gens d'armes de quelque estat auctorité ou condition qu'ils soient de nostre sang ou autre, passer ne repasser par lesdits lieux sans nostre licence, dont il leur appere par noz lettres patentes de datte subsequant à ces presentes des deffences deuantdits. Donné à Paris le vingtsixiesme iour de Ianuier l'an mille quatre cens & treize. Et de nostre regne le trentetroisiesme. Ainsi signé par le Roy à la relation du grand conseil tenu par la Royne, monseigneur d'Acquitaine present. Et Mauregard: lequel mandement fut enuoyé, comme dit est, tant en la ville d'Amiens comme en plusieurs autres villes du Royaume de France: & avec ce furent enuoyées autres lettres missibles de par le Roy à plusieurs villes sur les passages, par lesquelles il deffendoit qu'au Duc de Bourgongne ne à ses gens on ne fait aucune ouuerture sur peine d'encourir son indignation.

*Comment le dessusdit Duc de Bourgongne alla à puissance deuers Paris, & se logea à saint Denys, & de tout ce qu'il aduint durant ce voyage à cause d'iceluy.*

CHAP. CXV.



Q R est verité que le Duc de Bourgongne pour parfournir son entreprise à aller à Paris partant d'Arras, se tyra vers Peronne pour le passage: mais ceux de la ville, qui desia auoient eu deffence de par le Roy de le non laisser passer, enuoyerent deuers luy le seigneur de Longueual, qui estoit leur capitaine pour eux excuser en denyant iceluy passage. Et jaçoit ce que ledit Duc ne le preinst pas bien en gré: neantmoins faignoit que de ce ne luy challoit, s'en alla par dehors, & passa la riuere de Somme à Esclusier, & s'en alla à Roye en Vermandois, & de là enuoya deuant à Compiengne le Comte de Neuers son frere qui desia festoit ioinct avec luy à tout belle compagnie: lequel de Neuers traicta tant avec eux (nonobstant qu'ils auoient deffence au contraire de par le Roy) qu'ils furent contens de liurer passage audit Duc de Bourgongne. Et la cause qui les plus enclina à ce faire fut ce qu'on leur monstra la copie & vidimus des lettres que auoit enuoyé le Duc d'Acquitaine au Duc de Bourgogne, contenans



contenans qu'il allast deuers luy: duquel vidimus & coppie la teneur s'ensuit mot apres autre soubz seal royal. A tous ceux qui ces presentes lettres verront, Jean Clabault escuyer garde de par le Roy du seal du bailliage de Vermadois estably à Roye salut: sçachent tous que le xxiiij. iour de Feurier de l'an present mille cccc. & treize de par treshault & puissant Prince mōseigneur le Duc de Bourgongne, nous auoient esté exhibées & monstrees trois paires de lettres closes, & signées de tresexcellent & puissant Prince monseigneur le Duc d'Acquitaine: lesquelles nous auons veües, tenues & leües de mot à mot, & desquelles la teneur s'ensuit.

Trescher & bien aymé pere: nous vous mandons que incontinent ces lettres veües, toutes excusations cessans vous viennent deuers nous bien accompagnez pour la seureté de vostre personne, & en ce sur tout que vous doubtez à nous courroucer ne nous deffaillez pas. Escript de nostre propre main à Paris le iiij. iour de Decembre signées de sa main Loys: & en la subscription, à nostre trescher & bien aymé pere le Duc de Bourgongne. Trescher & trefaymé pere, ie vous ay autresfois escript que vous venissiez deuers moy tresbien accompagné: pourquoy, ie vous prie & mande, que le plus tost que vous pourrez vous venez à moy tresbien accompagné & pour cause, & ne doubtez: car ie porteray vostre fait tout outre qui le vueille veoir: escript de ma propre main à Paris le treiziesme iour de Decembre signées de sa main Loys: & en la suscription, à nostre trescher & trefaymé pere le Duc de Bourgongne. Trescher & trefaymé pere ie vous ay mandé par deux fois que venissiez à moy, dont vous n'avez riens fait: toutesfois nous vous mandons encores de rechef que toutes choses arriere mises le plus tost que vous pourrez vous veniez à nous tresbien accompagnez pour vostre seureté: & en ce ne defaillez point pour quelsconques lettres que vous ayez, de nous au contraire sur toute l'amour que nous aymez & sur tout quantes vous nous doubtez à courroucer & pour certaines causes, que tant nous touchent que plus ne nous peuuent toucher. Escript de ma propre main le xxij. iour de Decembre, signées de sa propre main Loys: & la subscription d'icelles lettres, à nostre trescher & bien aymé pere le Duc de Bourgongne: en tesmoing desquelles lettres dessusdictes escriptes par nous veües, leuës & tenues, comme dit est: nous auons mis à cestes le seal dudit bailliage, sauue le droit du Roy nostre sire & l'autrui: & ce fait à l'original la collation faicte en la presence de Jean Billart escuyer garde de par le Roy de la Preuosté de Roye, & des terres exemptes, de Charmy & des ressors de Roye és presences de Pierre de la Beane Grenetier dudit lieu de Roye, de Nicolas d'Ardechanons de Roye, Jean Pellehaste, maistre Guillaume de la Garde, maistre Godeffroy Baudun, Brissart tabellion royal, l'an & le iour dessusdit, ainsi signé, Brissart: & au troiesme iour alla de Roye ledit Duc de Bourgongne à Compiengne. Et apres qu'il eut eu conuenance des plus notables de la ville de tenir son party, print son chemin pour aller à Senlis, où il auoit desia enuoyé le seigneur de Robaiz pour sçauoir s'ils le receuroient: mais ils le reffuserent à mettre en leur ville pour la deffence du Roy, que ils auoient eu: pourquoy ledit Duc de Bourgongne print son chemin par Barron à Dampmartin en la Gresse, où estoient ja venus au deuant de luy les seigneurs de Bourgongne à grosse compaignie. Et en tant que ledit Duc de Bourgongne, approchoit ainsi Paris, en allerent les nouuelles au Duc d'Acquitaine & autres



seigneurs du sang royal : lequel Duc d'Acquitaine disnoit à l'hostel d'un chanoine, ou cloistre de nostre Dame de Paris . Lesquelles nouvelles ouïes s'assemblerent ou cloistre le Roy Loÿs, le Duc d'Orleans, le Comte de Vertus, le Comte de Richemont, le Comte d'Eu, le Comte d'Armignac & plusieurs autres grans seigneurs à tout grand compagnie de gens d'armes, & là monta à cheual le Duc de Aquitaine. Lesquels feirent & ordonnerent trois batailles: c'est à sçauoir l'auantgarde, la grosse bataille & l'arrieregarde, & ce fait vindrent deuant le portail de nostre Dame, & de là deuant l'hostel de la ville & là l'arrestèrent : l'auantgarde conduisoient trois Comtes: c'est à sçauoir de Vertus, d'Eu & de Richemont, qui cheuauchent tous trois de front, & leurs gens les suyuoient au dos, & la grand bataille les suyuoient vn peu apres: de laquelle estoit deuant, le Roy Loÿs, le Duc d'Acquitaine & le Duc d'Orleans: lesquels ensuyuoient grand multitude de gens d'armes: & l'arrieregarde gouernoient le Comte d'Armignac, Loÿs Bourdon & le seigneur de Gaule, qui tous trois cheuauchent de front deuant leurs gens: lesquels on estimoit en tout, enuiron vnze mille cheualx, & eux estans deuant leursdits hostels, commença à sonner vne trompette, & tantost le Chancellier de Aquitaine vint, apres le Duc d'Acquitaine, qui dit au peuple de Paris qui suyuoient, affin qu'il veist que ce vouloit estre, que monseigneur le Duc d'Acquitaine premier fils du Roy de France les regracioit, du bon deuoir & de la bonne amour qu'ils auoient eu & auoient à luy, du seruice & de la loyauté & obedience, qu'à ceste fois ils luy monstroient, & qu'il auoit esperance, qu'encore feroient, & que tous s'appoinctassent de leur pouoir, & puissance de résister, à l'encontre du Duc de Bourgongne & à sa tresmauuaise entreprinse. Lequel contre la volenté du Roy, & en venant contre sa deffence, & en venant aussi contre ladicte paix, & en enfreingnant icelle: & aussi qu'il leur ratiffoit & affermoit, qu'il ne l'auoit pas mandé ne n'auoit escript qu'il venist à Paris, jaçoit ce qu'il deist auoir les lettres deuers luy: & puis demanda audit Duc d'Acquitaine s'il l'aduouoit: lequel, avec son adueu dist, qu'il disoit verité & ainsi l'affirma: lesquelles choses ainsi dictes, & plusieurs autres par ledit Chancellier d'Acquitaine: les deuantdits seigneurs se partirent par la maniere dessusdicte, & cheuaucherent tout droit à la Croix du Tiroüier, & là arrestèrent & là ledit Châcellier estant à cheual deuant le Duc d'Acquitaine, lequel deuant le peuple qui là estoit sans nombre assemblé, dist ce qu'il auoit dit, & recité en greue: & comme deuant de ce se fait aduouier du Duc d'Acquitaine: lequel aduoué, iceluy Duc entra au Louure, le Duc d'Orleans s'en alla au prioré saint Martin des Champs, le Roy Loÿs en la bastille saint Anthoine, les Comtes d'Armignac & Bourbon en l'hostel d'Arthois, & les autres ailleurs. Le Duc de Berry apres ce fait, vint de son hostel de Neelle au Louure visiter ledit Duc d'Acquitaine, & de là s'en alla au temple & là se logea avec ses gens: & les seigneurs, songneusement, & souuent alloient parmy la ville, affin que aucune rumeur ne s'esmeust en la ville: & feirent clorre toutes les portes excepté la porte de saint Anthoine & la porte saint Iaques. Si estoient en grand doubte nonobstant qu'ils eussent grand puissance de gens d'armes, qu'en la faueur du Duc de Bourgongne & à sa venue le peuple ne s'esmeust contre eux, & par especial ceux du quartier des halles. Le Duc de Bourgongne, de Dampmartin vint loger à tout sa puissance dedans la ville de saint Denys, qui luy fut ouuerte & abandonnée

par



par les habitans d'icelle, & se logea à l'hostel à l'espée. Si pouoit auoir en sa compagnie bien deux mille bacinets cheualiers & escuyers tant des païs d'Arthois, de Picardie comme de Flandres, Retellois & Bourgōgnons avec de deux à trois mille combattans tant archers comme arbalestriers & autres varlets armez: & estoit avec luy messire Jean de Luxembourg à tout les gens du Comte Vvaleran de saint Pol son oncle. Apres la venue duquel Duc de Bourgogne dedans S. Denys le iij. iour ensuyuant enuoya à Paris son Roy d'armes d'Arthois portans lettres au Roy, à la Roïne, au Duc d'Acquitaine & à ceux de la ville: par lesquelles il leur requeroit qu'ils voulussent estre contens, qu'il allast deuers eux pour dire la cause de sa venue: laquelle, comme il disoit, estoit toute tendant à bonne fin & qu'il n'estoit venu aucunement pour faire guerre, ne pour porter dommage à quelque personne. Mais seulement au mandement du Duc d'Acquitaine pour luy seruir & obeir ainsi que tenu y estoit. Lequel Roy d'armes venu audit lieu de Paris, fut mené en vn hostel: & tantost apres vint deuers luy vn homme qu'il ne cognoissoit, lequel luy dit qu'il s'en allast hastiement ou on luy feroit desplaisir de sa personne. Et brief ensuiuant ainsi qu'il deuoit monter à cheual pour s'en retourner, voyant qu'on ne le vouloit ouïr ne receuoir ses lettres, il vint de rechef à luy le Comte d'Armignac, qui luy dit que se luy ne autres de par le Duc de Bourgogne retournoit plus dedans Paris on leur couperoit les testes, & sur ce s'en retourna dedans saint Denys deuers son maistre le Duc de Bourgogne: auquel il racompta toutes les besongnes dessusdictes, & la rudesse qu'on luy auoit fait: & si en fut iceluy Duc mal content, & se conclud avec ceux de son conseil d'y aller en puissance & en personne avec toute sadicte puissance. Si se meit le lendemain tresmatin aux champs avec tous ses gens, qui estoient tous armez comme se presentement deussent entrer en la bataille, & en belle ordonnance se tira assez pres de la porte saint Eustace, laquelle estoit close: & là par grand espace se tint sur vn riez tout ordonné en bataille, que c'estoit belle chose à veoir: & luy ainsi estant là il enuoya de rechef son Roy d'armes à la porte saint Honoré, laquelle aussi estoit close en disant & requerant à ceux qui estoient sur ladicte porte, que quatre de ses plus feables cheualiers, lesquels il auoit enuoyez assez pres iceluy Roy d'armes, ils voulussent ouïr les causes dire de sa venue tendans à toute bonne paix: mais il fut respondu par iceux, que s'il ne s'en alloit bien tost on trahiroit apres luy de bons quarreaux d'arbalestres: disant outre qu'ils n'auoient cure d'ouïr ledit Duc ne ses cheualiers, & par ainsi s'en retournerent deuers leurs maistres. Et entre-temps Enguerran de Bournouille à tout environ quatre cens combattans estoit descendu à pied, & à tout l'estandart dudit Duc estoit allé assez pres de la porte saint Honoré pour veoir s'il pourroit riens faire, car leur esperance estoit que le peuple se mettroit sus à puissance pour les mettre dedans par aucune porte, ce que pas n'aduint. Si parla ledit Enguerran aucunes parolles à Bourdon qui estoit là, lequel ne respondit mot: & pourtant iceluy Enguerran voyant que riens ne pouoit besongner se retrahit: mais en retrayant on tira d'arbalestres apres luy, & fut l'un de ses gens nauré: & jaçoit ce que luy, ne nuls de ses gens n'eussent monstré semblant de faire aucune guerre par trait n'autrement à ceux de Paris pour la reuerence du Roy & du Duc d'Acquitaine, car il leur estoit deffendu dudit Duc, lequel quand il veit que riens ne proffitoit s'en retour-



na audit lieu de saint Denys : & fait escrire lettres , lesquelles il fait estacher par nuit par aucuns ses fauorisans aux portaulx de l'Eglise nostre Dame , du Palais & ailleurs à Paris : & lesquelles il enuoya à plusieurs bonnes villes, desquelles la coppie s'ensuit. Nous Iean Duc de Bourgongne Comte de Flandres, d'Arthois & de Bourgongne Palatin, seigneur de Salins & de Mallines. Certiffions à tous que par vertu de plusieurs lettres escriptes & signées de la main monseigneur d'Acquitaine nous venismes deuers Paris pour nous employer au bien du Roy & commandement de monseigneur d'Acquitaine: & avecques ce à l'ayder à mettre hors de dānger & seruitude, où il est pour le present : pour laquelle cause, nous voulons employer nous, nostre corps, nostre puissance & tout ce que Dieu nous a presté en ce monde, en signifiant à tous les bienvueillans du Roy, de monseigneur d'Acquitaine, qu'ils seront mis se nous pouons à leur plaine deliurance, franche volenté & seigneurie : & ceux qui les ont mis & tiennent en seruage, seront rostez d'avec eux & chacun en son païs : & affin que nuls n'entende que nous soyons venus pour quelque ambition, ou concupiscence d'auoir administration ou gouuernement de ce Royaume, ne que nous vueillons aucunement adommager la bonne ville de Paris : mais sommes prests & appareillez d'entretenir tout ce que par l'ordonnance du Roy auons iuré & promis : & semblablement de retourner en aucun de noz païs, pourueu qu'il soit ainsi fait des autres qui l'ont iurée, lesquels ont fait & font le contraire : & voulons bien, que Dieu & chacun sçache, que iusques adonc que nous sentirons monseigneur le Roy & monseigneur d'Acquitaine estre au deuantdit estat, & les autres pareillement avec leurs gens & qui tiennent leur partie estre dans Paris, & ne retourner en leur païs: & que mōdit seigneur le Roy soit pourueu de bons & notables cheualiers, conseilliers & seruiteurs, & pareillement mondit seigneur d'Acquitaine, nous ne nous departirons ne deporterons de nostre entreprinse : car nous aurons pluscher à mourir que veoir monseigneur le Roy & monseigneur d'Acquitaine ainsi estre demourez en seruage : & ne nous pouons assez esmerueiller cōment les bourgeois & loyaux subiects de mondit seigneur le Roy, ont tels cueurs enuers luy, & ils peuuent souffrir telle durescé, qu'on leur fait & tient : & avec ce nous qui sommes si prochains que chacun scet, nous sommes moult de ce esmerueillez, que nuls n'ont voulu ne receuoir noz cheualiers ne herault, ne autre qui ayt voulu souffrir de presenter noz lettres à monseigneur le Roy, à madame la Roïne, à monseigneur d'Acquitaine, ne à la bonne ville de Paris. Et jaçoit ce que sans inuasion de traict ou autrement faire, fussions deuant la bonne ville de Paris, par le commandement deuantdit, & pour exposer aucunes besongnes touchāt le bien de paix & de tout ce Royaume, ont esté traits & blesez de noz gens, sans ce que par beau parler on les ait voulu ouyr n'escouter: mais par le Comte d'Armignac fut dit à nostre Roy d'armes, que s'il y retournoit plus, la teste luy seroit ostée: laquelle chose nous est dure à porter & à souffrir. Et mesmement que nous, & nostre compaignie sommes venus en payant, par tout noz despens, comme prochain & proëme de mondit seigneur le Roy & de monseigneur d'Acquitaine, requerant à tous les bienvueillans & loyaux subiects qu'ils nous vueillent ayder & conforter, & nous seruir contre tous ceux qui ainsi ont mis en danger & seruitude mondit seigneur d'Acquitaine, en eux signifiant du

fait



fait contraire de en temps, & en lieu accusé du fait cōtraire de desloyauté enuers leur souuerain seigneur, & de ce n'ayent point doubte: car à l'ayde de Dieu & du bon droit, qu'auons en ceste querelle, nous le porterons, soustiendrons, & conforterons, & de ce sommes nous puissans, & bonne voulenté avecques plusieurs & notables bonnes villes du royaume, lesquelles nous auons trouué qui demourrōt avec nous. Donnée à S. Denys soubs nostre seel de secret en l'absence du grād conseil, le xj. iour de Feurier l'an mille cccc. & xiiij. Lesquelles lettres quand elles furent trouuées ainsi (cōme dit est) attachées en plusieurs lieux dedans Paris, furent ceux qui estoient contraires audit Duc de Bourgongne en plus grand souspeçon que deuant. Neantmoins ils pourueurent si bien à la garde de la ville, que nuls inconueniens ne leur en aduindrent. En apres durant le temps que le dessusdit Duc de Bourgongne estoit à S. Denys, comme dit est, le seigneur de Croÿ, qui estoit en sa compagnie, enuoya iusques à xx. hommes d'armes des plus experts & auentureux de sa charge, passer la riuere de Seine tresbien mōtez deuers Conflans, & cheuaucherent le plus secrettement qu'ils peurent chacun la lance au poing iusques en la ville de Mont-le-hery, & là se logerent en deux hostelleries assez pres l'un de l'autre, & faignoient qu'ils fussent au Duc d'Orleans. Or est ainsi que messire Jean de Croÿ fils dudit seigneur de Croÿ, qui estoit prisonnier au chastel (comme dit est ailleurs) estoit aucunement aduertty de leur venue par le moyen d'un chappellain qui leās le gouernoit: si trouua maniere d'aller ouÿr la Messe à l'Eglise qui estoit assez pres dudit chastel: & adonc iceux hommes d'armes qui estoient tous prests & sur leur garde, monterent à cheual & vindrent audit messire Jean de Croÿ, lequel ils feirent tantost monter sur un cheual, & incontirrent cheuaucherent partans de là tres roidemēt en tirant vers Ponthoise. Et depuis prindrēt leur chemin pour retourner au passage, par où ils auoient passé la riuere de Seine, & finalement feirent si bonne diligence, qu'ils ramenerent franchemēt iceluy à son pere audit lieu de S. Denys. Pour laquelle entreprinse ainsi par eux acheuée, ils furent grandement recommandez tant du Duc de Bourgongne comme dudit seigneur de Croÿ: & furent les principaux cōduisans ceste besongne, Lamont de Launoy, Villemot de Meneat, Ienninet de Molliens, Jean Roussel & autres iusques au nombre dessusdit: toutesfois ils furent poursuuiuz assez roidemēt de la garnison dudit chastel de Mont-le-hery: mais ils ne les peurent trouuer pour les diuers chemins qu'ils tindrent. En outre le Duc de Bourgongne enuoya encores le Roy d'armes de Flandres à Paris portans lettres au Roy de Cecille, aux Ducs d'Orleans, & de Berry, pour eux signifier les causes de sa venue, en eux requerant que luy souffrissent parler ou au moins ses gens au Roy ou au Duc d'Acquitaine, & qu'il estoit venu, pour tout bien: & que ce qu'il auoit iuré & promis, il vouloit entretenir, & qu'ainsi voulussent faire de leur partie: disant outre, qu'ils laissent le Roy & le Duc d'Acquitaine dominer & gouverner son royaume sans eux tenir en seruitude, & especiallement iceluy Duc d'Acquitaine, lequel ils detiennent à sa tresgrand desplaisance. Mais quand ledit Roy d'armes vint deuant la porte de S. Anthoine, il luy fut dit qu'il n'entreroit point dedans & ne receuroit on pas ses lettres, si il ne s'en alloit bien en haste, qu'on luy feroit desplaisir. Lequel oyant ce, se conseilla à luy mesmes: print lesdictes lettres, les bouta en un baston fendu, lequel il ficha en terre, & là les laissa, & le plustost qu'il peut s'en retourna à saint Denys deuers



son maistre le Duc, qui en perseuerant fut plus malcontent que deuant : neantmoins voyant que riens ne pouoit acheuer de son intention, delibera avec son conseil de retourner en son païs : & par aucuns peu de iours vint à Compiengne le chemin qu'il auoit tenu, dedans laquelle ville & en la cité de Soissons, il laissa garnison de gens d'armes & de Traict. Est à sçauoir audit lieu de Compiengne pour capitaine messire Hue de Launoy, les seigneurs de saint Ligier & de Forez, Hector & Philippe de Saueuse, Louuelet de Mazaghehen & plusieurs autres experts hommes de guerre, iusques à cinq cens combattans ou enuiron : & à Soissons fut mis Enguerran de Bournouuille, messire Collart de Phiennes, Lamon de Launoy, Guiot de Boutilliers Normant, messire Pierre de Menault & plusieurs autres gens de guerre. Et fut conclud par ledit Duc avec sa cheualerie & lesdictes bonnes villes, que iusques à tant que le Roy & le Duc d'Acquitaine seroient en plain regime & franchisé sans estre ainsi detenuz, & qu'ils se gouuerneroient par telles bonnes personnes qu'il leur plaira, & que lesdits seigneurs qui ainsi les detiennent & leurs gens de leur bende, seront chacun en son païs : sicomme luy de Bourgongne & ceux de son party s'offrent à eux en aller en leurs terres & païs, ils ne se departiront de celle opinion, & ne donront point d'obeissance au mandement du Roy, donnez par le conseil & aduis desdits seigneurs, ne de ceux de leur party, & cela ledit de Bourgongne nobles & bonnes villes signifieront, & vueillent signifier à toutes bonnes personnes de ce Royaume, & ce mesmes leur manda le Duc de Bourgongne de par le Roy & le Duc d'Acquitaine : & de sa partie il requiert qu'à celle fin ils le vueillent ayder à ceux adioindre avec luy. Et en ce faisant eux & chacun d'eux acquiteront leur loyauté, & en seront recommandez toute leur vie, & ledit Duc leur promist d'eux ayder & conforter de tout son pouoir, & de ce leur bailla ses lettres, & apres se partit de Compiengne, & retourna à Arras. Si enuoya ses Bourgongnons qui estoient enuiron sept cens lances viure en Cambresis, & en Terrasses au contempt du Roy Loÿs, qu'il n'aymoit pas, & aussi de messire Robert de Bar qui pas ne l'auoit voulu seruir en ce voyage, & si estoit son homme lige : auquel lieu d'Arras il manda à venir deuers luy, le deuxiesme iour de Mars les trois estats du païs d'Arthois, & par especial les nobles : avec lesquels il eut grand Parlement sur ses affaires, & leur feit monstrier par le seigneur de d'Ollehaing les trois lettres que luy auoit escriptes le Duc d'Acquitaine, apres qu'il les eust leües afferma sur sa foy present tous les seigneurs là estans & autres, qu'elles estoient escriptes & signées de la propre main du dessusdit Duc d'Acquitaine. Et apres que tous ceux là estans luy eurent promis de le seruir à l'encontre de tous ses aduersaires, excepté le Roy & ses enfans, & aussi qu'il eut ordonné par conseil à escrire lettres à plusieurs bonnes villes : desquelles la teneur s'ensuit. Lesquelles furēt enuoyées à Amiens. Il se departit & s'en alla en son païs de Flandres pour faire pareillement. Treschers & bons amis, pource que tousiours voulons & desirons, vous & autres, & tous autres bons & loyaux subiects de monseigneur le Roy & les bienueillans, aussi de mon tresredoubté seigneur le Duc d'Acquitaine Daulphin de Vienne estre aduertis de tout ce que peult toucher à son bon estat & honneur, & celuy de son royaume & du bien publicque d'iceluy : affin d'ayder à pourueoir à iceux iustement & loyaument ainsi qu'il appartient, vous signifions qu'à la tressinguliere requeste de mondit seigneur d'Acquitaine



quitaine deüement à nous faicte par trois paires de lettres closes, escriptes & signées de sa propre main, contenans en effect que sur tout le plaisir & seruice que jamais nous luy desirions à faire, nous venissions deuers luy le mieulx & le plus grandement accompagnez que nous pourrions. Nous obtemperant à son bon plaisir & volenté, comme faire le deuions: sçachans aussi le grand danger & seruage en quoy il estoit, & encores par aucuns est detenu ou chastel du Louure contre droit & raison à son tresgrand & amer desplaisir, nous meismes en armes à puissance non pas par ambition ou concupiscence d'auoir aucune nouuelle domination en ce Royaume, ne pour rompre ou enfreindre aucunement la paix iurée & promise par nous: laquelle nous voulons sur toutes choses garder, & entretenir: mais seulement pour obeir, ainsi que nous sommes tenus aux bons plaisirs & volentéz de monseigneur le Roy & de mondit seigneur d'Acquitaine, en intention de luy mettre de tout nostre pouoir hors du danger deuantdit sans faire guerre, despouiller ne desrober ne faire ou porter quelque dommage: mais sommes venus en courtoisement viuant & amiablement viuant en payant noz despens iusques en la ville de saint Denys en France: lequel lieu le plus tost que nous y feusmes entrez, nous enuoyasmes par nostre herault le Roy d'armes d'Arthois certaines lettres closes adressans à monseigneur le Roy, à madame la Roynne & à mondit seigneur d'Acquitaine, & aussi à la bonne ville de Paris: par lesquelles nous les notiffions sçauoir faisions nostre venue, & que aucunement nous ne venions pour faire guerre ne ladicte paix enfreindre: mais venions au mandement de mondit seigneur d'Acquitaine, & pour obeir à ses bons plaisirs (comme dit est) en requerant d'auoir actes de parler & d'estre ouï deuers monseigneur le Roy & monseigneur d'Acquitaine pour tousiours faire nostre deuoir, & aussi faire ses bons vouloirs, & plaisirs & de tout nostre pouoir accomplir comme raison est, & que nous sommes tenus. Mais ce nonobstant la presentation de nosdictes lettres, rigoureusement & sans cause raisonnable par le Comte d'Armignac & autres ses adherans, fut empesché en grand contempt & vitupere de nous & des nostres, en disant par ledit Comte à nostredit Herault, que s'il ne se partoît bien tost & sans demeure: & que s'il ou autre de noz gens reuenoit plus, on luy feroit couper la teste: & pource dudit lieu saint Denys notablement & grandement accompagnez de noz gens d'armes & de traict, le samedi ensuiuant dixiesme iour de ce present mois de Feurier, nous partismes & allasmes en propre personne deuant la ville de Paris sans faire aucun mal à personne, en l'intention de dire ou faire dire amiablement les causes de nostre aduenemēt. Ou au moins d'auoir plus gracieuse respōce que n'auoit eu nostredit Herault: mais depuis que fusmes là venus, & que eusmes enuoyé à S. Honoré, qui estoit plus pres de nous, nostredit herault, & apres luy quatre de noz notables cheualiers pour requerir, cōme dessus, estre ouïs: il leur fut dit, qu'ils se reculassent arriere, ou autrement ou trahiroit contre eux. Et sans plus dire ne eux vouloir ouïr ou autrement escouter, furent trahis d'arbalestres, dont il nous despleut & desplaist & non sans cause. Et jaçoit ce que toutes ses rigueurs desordonnées nous fussent faictes sans le sceu ne consentement du Roy, ne de monseigneur d'Acquitaine, & que nous auons tout ce voulu souffrir & porter en patience avec la prinse de plusieurs de noz officiers, pour tousiours entrete-



nir ladicte paix : & que bien doucement sans aucun commencement de guerre ou autrement souffrir estre malfait pour l'honneur de monseigneur le Roy , & dudit monseigneur d'Acquitaine, retournasmes audit lieu de S. Denys en delaissant paisiblement tous viures, marchandises, & autres choses parmy le lieu de S. Denys aller à Paris, comme ils faisoient deuant nostre aduenement . Toutesfois nous auons entendu que par aucunes hayneuses & desordonnées inductions faictes contre l'honneur de monseigneur le Roy , & de mondit seigneur d'Acquitaine, & de tout le bõ estat de la chose publique de ce Royaume: & sans ce qu'il vienne ou procede par quelque maniere de leur vouldenté ou intétion : moult de lettres si ont esté faictes iniustement, mauuaisement , & hayneusement données & octroyees contre toute bonne iustice: par lesquelles mōseigneur le Roy nous & tous autres, qui ont esté en nostre compaignie deuant la ville de Paris, comme dit est, sont bannis & abandonnez de son Royaume . Nonobstant que nous n'iceux maintenant n'autresfois ne l'auoyes pas desseruy , & que ne sommes pas de ceux qu'autresfois l'ont assis dedās la ville de Paris, & qui damnablement en plusieurs lieux de son Royaume ont bouté les feux, ont occis ses subiects , ont forcé les femmes, ont violé pucelles, despouillé & desrobbé Eglises, villes, chasteaux & autres lieux, & fait plusieurs autres grans maulx, inhumanitez & cruautez . Lesquels en perseuerant tousiours de mal en pis en leur mauuais & damnable propos, tiennent monseigneur le Roy & monseigneur d'Acquitaine en dangier, cōme dit est dessus. Et pource, mes treschiers & bõs amis, que toutes les choses deuantdictes sont faictes contre ladicte paix faicte à Auxerre , & contre la cedulle dernièrement faicte à Ponthoise pour le bon entretenement , & qui nous sont tant importables, que nullement nous ne le pouons porter ne souffrir , soubz dissimulation, & par especial pour la consideration de ce que, tant par monseigneur le Roy & mondit seigneur d'Acquitaine, comme par tous seigneurs de son sang & grand conseil, & depuis par plusieurs Prelats & notables de ce Royaume, ensemble deputez de plusieurs bonnes villes pour & en leurs noms : c'est à sçauoir de Paris, Reims, Roüen , Laon , Beauuais & autres de plusieurs Prouinces de ce Royaume sur ce noblement assemblez, fut promis & solennellement iuré de faire ayde, confort & assistance à tous ceux qui ladicte paix entretenroient, & de resister & demourer contre tous ceux qui aucunemēt l'enfrainderoient: nous vous signifions ces choses, vous affermant qu'elles sont vrayes: affin que sil vous estoit donné à entendre le contraire, que vous n'y adioustissiez aucune foy, mais vueillez tousiours estre & demourer enuers monseigneur le Roy & monseigneur d'Acquitaine, bons, vrays, & loyaux comme tousiours auez esté, & nous ayder & conforter, & nous assister à ceste partie: sicomme nous auõs en vous vraye & grand fiance, & que, comme dit est, a esté promis & iuré. Car pour vray, nous entendons (Dieu deuant) avec bonne ayde pour le bien & ayde de monseigneur le Roy & de monseigneur d'Acquitaine de leur franchise, liberté & domination ainsi comme ils doiuent estre, & que ceux qui ainsi les tiennent en seruage & dangier, & leurs soient hors de leur compaignie & en leurs paÿs, ainsi que nous sommes prests de faire pour l'obseruance de ladicte paix & le bien commun de ce Royaume: lesquelles choses nous desirons . Et sil est quelque chose que vous vueillez & nous puissions , sçachez certainement que nous le ferons de tresbon

cueur



cueur au plaisir de Dieu, qui vous ayt en sa sainte garde. Escrit en nostre ville d'Arras sous nostre seel de secret cy placqué le xxvij. iour de Feurier l'an mille quatre cens & treize, & dessus estoit escrit en la marge, le Duc de Bourgogne Comte de Flandres & d'Arthois. Et affin, treschiers amis, que vous soyez plus plainement informez & acertenez des lettres dudit monseigneur d'Aquitaine, & du contenu en icelle à nous enuoyez, comme dit est dessus. Nous vous enuoyons, cōme dit est dessus, avec ces presentes le vidimus d'icelles fait sous seel auctentique. Ainsi signé, Vignier. Et estoient lettres patentes en papier seellées, &c. Et en la superscription auoit: A noz treschiers & bien aymez noz bourgeois manans & habitans de la ville d'Amiens.

*Comment apres le departement dudit Duc de Bourgogne de saint Denys, le Roy  
feît grans mandemens par tout son Royaume pour aller contre luy.*

## CHAP. CXVI.

**L**Tem apres le departemēt dudit Duc de Bourgogne de la ville S. Denys, & qu'il fut venu à la cognoissance du Roy, du Duc d'Aquitaine & des autres Princes lors estant à Paris avec ceux de son grād conseil, comment le dessusdit Duc de Bourgogne auoit mis & laissé garnison de ses gēs d'armes es villes de Compiengne, Soissons & autres lieux, lesquelles estoient au Roy ou au moins sous la domination, furent de ce moult esmerueillez: & leur sembla qu'il n'auoit pas cause de ce faire. Et pourtant affin d'y obuier & resister, fut presentement enuoyé par tous les bailliages & seneschauccés du Royaume certains mandemens royaux contenu, que pour y resister vn chacun se meit sus pour seruir le Roy: desquels mandemens, est à sçauoir de celuy qui adressa au Baillif d'Amiens la teneur s'ensuit. Charles par la grace de Dieu Roy de France, au Baillifs d'Amiens ou à son lieutenant salut: Comme pour obuier aux grans & innumerables maulx, dommages & inconueniens qui sont aduenus, & qui sont aduenture d'auenir en nostre Royaume ou preiudice de nous & de la chose publique. Pour l'occasion des guerres, diuisions & debats adonques estans entre plusieurs de nostre sang & lignaige: Et affin que noz subiects puissent viure & demourer en bonne paix & tranquillité dessous nous en nostre seigneurie, & desormais estre gouuernez par bonne iustice, laquelle sinon en temps de paix ne peut estre deuement faicte n'administrée: nous auons ordonné par grand & meure deliberation, & auons accordé & mis bonne paix entre lesdits de nostre sang & lignaige, laquelle ont promis, & solemnellement iurée en nostre presence tenir & garder inuiolablement. Et jaçoit-ce qu'il ne soit pas licite, qu'aucuns de noz loyaux vassaulx & subiects soient de nostre sang & lignaige ou autres, & mesmement contre noz inhibitions & deffenses faire congregatiōs de gens d'armes en nostre Royaume: & que depuis qu'il est venu à nostre cognoissance ce que nostre cousin de Bourgogne se douloit d'aucunes choses, lesquelles il disoit luy auoir esté faictes en son preiudice cōtre la teneur desdits traité & accord: & pource aussi qu'il tenoit ou occupoit ou tenir & occuper faisoit plusieurs chasteaux, forteresses à nous appartenans contre nostre volenté: receptoit & tenoit deuers luy & en ses païs plusieurs malfaicteurs crimineux & coupables deuers nous de leze Majesté, eussions enuoyé à nostredit cousin de



Bourgongne plusieurs de noz notables ambassadeurs pour luy admōnester d'entretenir ledit traicté & accord, & luy offrir toute voye & iustice, & faire toute reparation deüe à faire de ce qui seroit fait contre ledit traicté & accord l'aucune chose en estoit faite au cōtraire, & luy enioindre & requerir qu'il rēdit & remeit lesdits chasteaux en nostre main, sicomme il estoit tenu de ce faire: & avec ce luy commander & enioindre de par nous, qu'il ne receptast aucunement lesdits malfaiçteurs: mais les nous enuoyast sans delay pour les punir de telle punition qu'il appartenoit de faire par raison. A quoy il ne fait point d'obeissance ou responce conuenable, & depuis par certaines noz lettres closes & patente, & dernièrement par vn des huissiers de Parlemēt, pource qu'il estoit venu à nostre cognoissance, que nostredit cousin de Bourgongne faisoit vne grād armée & congregation de gens d'armes, eussions deffendu & fait deffendre à nostredit cousin de Bourgōgne qu'il ne fait plus telles armées ne telles assemblées: mais succedast de tout. Neantmoins, nostredit cousin de Bourgongne en venāt contre ledit traicté & accord, les inhibitions & deffences deuantdictes par maniere d'hostilité & de guerre à fait & continué ladicte armée & congregation de gens d'armes & de traict: & est issu de son païs à tout grand puissance, & à prins son chemin par voyes deceptiues & fraudulentés, a prins & occupé & encores occupe & detient par force & contre nostre voulenté, noz villes de Compiengne & de Soissons. Et en icelles à mis garnison de gens d'armes, & s'est enforcé d'entrer en nostredicte ville de Senlis: & est reffusant à rendre à nous ou à faire rendre noz chasteaux & forteresses deuantdictes, & detient iceux & occupe, & fait tenir & occuper contre nostre gré & voulenté, a recepté deuers luy & en ses païs les malfaiçteurs & crimineux, sans les auoir renuoyez deuers nous, & retient aussi ledict huissier deuers luy, par voye de fait & indeüement avec les autres noz messagiers de nostre treschiere & tresamée compaignie la Royne, & de nostre treschier & tresamé fils le Duc d'Acquitaine portans lettres contenant deffences, & autres choses tendans à bonne fin, & paix, sans de ce faire à nous, n'à eux aucune responce: & vint nostredit cousin de Bourgongne à tout sa puissance, pres & entour nostre ville de Paris: & ou contempt de nous & de noz deffences, inhibitions & commandemens amena avec luy, & tient lesdits malfaiçteurs & crimineux ou grand partie d'iceux, jaçoit-ce qu'ils fussent ou soient coupables & conuaincus de crime de leze majesté, & pource bannis de nostre Royaume: lesquelles choses sont & ont esté faictes, commises & perpetrées par nostredit cousin de Bourgongne, ses alliez, adherans & complices contre nostre majesté royale, contre les ordonnances des accords & traictés de ladicte paix & en enfreignant icelles, contre le bien publicque, paix & trāquillité de noz subiects & de nostre Royaume. Et aussi contre noz inhibitions & deffences deuantdit, en desertation & destruction de nostre peuple & de nostre grande desplaissance. Et adonc encores plus grans inconueniens s'en pourroient ensuiuir, si en ces choses n'estoit mise promptement remede. Nous ausdits inconueniens & autres qui s'en pourroient ensuiuir vueillans obuier, & noz subiects remettre & reduire en nostre obeissance: & qui ne voulons plus souffrir, ne toller les voyes de fait & entreprises de nostredit cousin de Bourgongne, mais voulons de tout nostre pouuoir reprimer icelles & corriger à l'ayde de ceux de nostre sang & lignaige & de noz autres loyaux & bons



bons vassaulx & subiects, par telle maniere que ce soit exēple à tous autres: vous mandons & commandons, & destroictement enioignons, qu'incontinent ces presentes veües, vous faictes proclamer solennellement à haute voix & à son de trompe en vostredit bailliage nostre arriereban de par nous. En faisant commandement tant par proclamations en vostredit bailliage & és ressorts d'iceluy comme autrement: & par tant de fois, que nuls ne puissent ou vueillēt ignorer, à tous les nobles de vostredit bailliage qui ont accoustumé d'vser & ensuiuir les armes: & qui sont en estat de poursuiuir, & autres qui tiennent fiefs ou arrierefiefs venans ou vallans par an vingt liures tournois. Et outre aux bourgeois & habitans de toutes bonnes villes & ressorts de vostredit bailliage: c'est à sçauoir ausdits nobles qui ont accoustumé d'vser & ensuiuir armes, cōme dit est, sur la foy & loyauté & aussi le seruice qu'ils nous doiuent. Et sur la peine de cōfiscation de leurs biens, fiefs & arrierefiefs & tenement, ils viennent tantost en diligence & sans demeure à tout le plus grand nombre & puissance de gēs d'armes & de traict qu'ils pourront toutes excusations cessans, & autres essoynes quelsconques. Et ausdits bourgeois & habitans des bonnes villes qu'ils enuoyent le plustost qu'ils pourront des gens d'armes & de traict deuers nous en nostre ville de Paris, montez à cheual & armez souffisamment accompagnez. Et nous leur mandons & commandons qu'ainsi le facent à nous seruir és choses dessusdictes & ailleurs, là où nous les voudrons employer, en eux deffendant sur les peines dessusdictes, & for faire corps & biens, que deuers nostredit cousin de Bourgongne pour quelque mandement ou commandement de lettres, requestes, sommations ou promesses qu'il leur ayt fait ou face faire, n'enuoyer sous vmbre de nostre seruice ou du sien, n'autrement ils ne voient ou enuoyent, ne le seruent en quelque maniere. Et s'aucuns s'en alloient ou retournoient à eux en allant avec luy, qu'incontinent ils s'en reuiennent: & qu'ils ne luy donnent conseil, ayde, faueur ne consolation quelscōques qu'il soit ou puis estre. Et tous ceux que vous pourrez sçauoir estre en sa compaignie ou seruice, & estre fauorables en sadicte entreprinse prenez les, se vous les pouuez prédre: & se ce non, faictes les appeller à peine de ban: & prenez & faictes prendre & mettre reallement & de fait tous leurs biens meubles & non meubles, villes, chasteaux, seigneuries, fiefs, arrierefiefs, rentes, reuenues autres possessions quelsconques en nostre main & sous icelle gouverner. Et outre faictes faire commandement de par nous par proclamation solennelle (comme dessus) à tous Prelats, abbez, prieurs, chappellains & autres gens d'Eglise de vostredit bailliage, qui nous doiuent charrois, charrettes, sommiers & autres seruices à noz arrierebans, que seldits seruiteurs ils nous facēt: & que lesdits charrois, charrettes & sommiers, il nous enuoyent incontinent, ordonnez prests & appareillez, pour nous seruir ou fait dessusdit: en eux contraignant ou faire contraindre à ce par prinse de leur temporel, & par toutes autres voyes accoustumées & pertinentes en tel cas. Et avec ce faictes inhibition & deffence de par nous sur les peines qui ont esté dessusdictes que nuls laboureurs ou gens de mestier n'autres quelsconques, sinon les dessus nommez s'assemblent ne mettent ensemble par maniere d'armée, de communes ou de compaignie, ou autrement par maniere de brigans ainsi comme il a esté fait au temps & ans passez, mais entendent à faire leur mestier & labour: & s'aucuns d'iceux sont trouuez faisant le contraire, si



les emprisonnez, & faictes ou faictes faire d'iceux telle punition & iustice qu'au cas appartiendra, tellement que les autres y prennent exemple: Et en outre voulons & vous commandons & estroictement enioignons, que quelques gés d'armes de traict, en quelque nombre qu'ils soient, passans parmy vostredit bailliage & ressort d'iceluy de quelque nation ou païs qu'ils soient de nostredit Royaume, ou dehors venans deuers nous en nostredicte ville de Paris à nostre mandement pour nous seruir en ce que dit est, vous les faictes & laissez passer, aller & venir plainement & paisiblement par tous les lieux, portes, ponts & passages de vostredit bailliage & ressort d'iceluy, sans eux faire ou souffrir estre fait destourbier ou autre empeschement quelsconques sous vmbre de noz lettres d'inhibitions à vous enuoyées, de non souffrir aucuns passer s'ils n'estoient mandez à venir deuers nous par noz lettres patentes, octroyées en nostre grand conseil de date subsequente de noz lettres de deffences deuantdictes, ou autres quelsconques à ce contraires: mais leur baillez & faictes bailler & deliurer passage, conseil, ayde & faueur, & secours se mestier est, par gardes, pôts, ports, passaiges & destroits de vostredit bailliage, & autres quelsconques: ausquels nous mandons qu'ainsi facent sans aucun reffus ou contradiction. Car ainsi nous plaist il estre fait, & ainsi l'auons ordonné & ordonnons estre fait: nonobstant noz lettres & deffences, & quelsconques autres ordonnances, mandement, lettres & autres deffences à ce contraires, & de leurs receptiōs, & de ce que fait en auez, nous certifiez suffisamment ou à nostre feal Chancelier, affin qu'il appere mieux de vostre diligence. Et gardez bien sur peine de priuation de vostre office & sur les peines deuantdictes qu'en ce n'ait point de faute. Nous voulons outre, & vous mandons par ces presentes, que toutes les causes & querelles meües & à mouuoir, debtes, besongnes, possessions, & biens quelscōques de tous ceux de vostre bailliage qui sont venus & viendront deuers nous à nostredit mandement & seruice, vous le tenez & faictes tenir par tous preuosts, iuges, & autres officiers de vostre bailliage en estat, de iour du partement iusques à quinze iours apres leur retour, sans faire ou souffrir estre fait ce pendant eux estre contraints, molestez ou aucunement estre empeschez au contraire: mais l'aucune chose estoit faicte au contraire, que vous le reparez sans delay. Et de toutes les choses dessusdictes & chacune d'icelle, vous donnons & octroyons puissance, auctorité & mandement especial par ces presentes. Par lesquelles aussi nous mandons à tous noz autres iusticiers & subiects, qu'à vous & à voz commis & deputez en faisant ce que dit est, à vous obeissent & entendent diligemment, & vous prestent conseil, confort & ayde & prisons se mestier est, & de ce sont requis. Donné à Paris le huitiesme iour de Feurier l'an de grace mille quatre cēs & treize, & de nostre regne le trentetroisiesme. Ainsi signé à la relation de son grand conseil tenu par la Roïne où estoit le Duc d'Acquitaine & plusieurs autres. Jean du Chastel. Lesquelles lettres portées à Amiens furent là publiées: & adonc tous ceux qui tenoient le party, & auoient tenu du Duc de Bourgogne tant à Paris cōme ailleurs en la marche enuiron, furent & estoient fort oppressez & trauaillez. Et en y eut plusieurs prins & decapitez: & les autres emprisonnez, & leurs biens prins comme confisquez. Et de rechief par la deliberation du grand conseil royal fut fait & enuoyé vn mandement royal par toutes les parties du Royaume de France, par le Duc  
de



de Bourgongne, & fut priué de toutes les graces à luy autresfois faictes. Et avecques ce luy & ses fauorables bannis, & abandonnez, duquel mandement la copie f'ensuit.

CHARLES par la grace de Dieu Roy de France: A tous ceux qui ces presentes lettres verront salut. Comme apres le trescruel & damnable homicide n'augueres commis & perpetré du commandement & ordonnance de Iean nostre cousin de Bourgongne en la personne de bone memoire nostre treschier & tresaymé seul frere Loys Duc d'Orleans, à qui Dieu pardoint. Et depuis ledit homicide, ledit de Bourgongne fut venu en nostre bonne ville de Paris à tout grand quantité de gens d'armes & de traict, cōtre nostre gré & voulenté par dessus noz deffences à luy faictes: & qu'il se fut efforcé de luy cuider efforcer de soy iustifier dudit horrible & detestable homicide par le moyen d'aucunes choses notoirement faulses & non veritables, & par plusieurs erreurs & autres choses escandaliseuses & perilleuses pour nostre seigneurie, & pour toute la chose publique. Nous considerant les tresgrans maulx, inconueniens & dommaiges irreparables: lesquels par l'occasion dudit homicide estoient en aduenture d'aduenir à nous, à nostre peuple & à tous noz subiects, vueillās obuier de tout nostre pouoir aux perils & inconueniens, & garder nostredit peuple desdits dommaiges, eussions mandé & fait venir en nostre ville de Chartres nostre treschier & tresaymé fils & nostre nepueu le Duc d'Orleans, qui est à present, & nostre trescher & aymé nepueu le Comte de Vertus, son frere, enfans de nostredit frere, adonc mineurs d'ans: & là eussions fait certains traictez & appaisemens entre noz deuantdits nepueux d'une part, & le Duc de Bourgongne d'autre part. Et jaçoit-ce que ledit traicté fut moult dur à nosdits nepueux, & estrāge: neantmoins sy feussent condescenduz pour nous obeir & pour pitié qu'ils auoient des dommages, qui pour la guerre pouoient aduenir au peuple, & qu'ils ont aussi souffert pareillement: mais jaçoit-ce qu'iceluy traicté entre les autres choses ledit de Bourgongne eut iuré & promis en noz mains, de cy en auant il seroit bon, vray & loyal amy à noz nepueux, & de ceux qui les auoient soubstenuz & aydez. Toutesfois, ce nonobstant assez tost apres, il feit tout le contraire: car en venant contre son serment deuantdit, & promesse pour luy venger d'aucuns de noz seruiteurs: lesquels il sospeçonnoit nous auoir conseillé de faire iustice & raison de la mort de nostredit frere, & aussi pour pourueoir à la fin, à laquelle il tendoit tousiours venir, & pour laquelle il auoit fait faire ledit damnable & detestable homicide: c'est à sçauoir affin qu'il eut seul & pour le tout le gouernement de ce Royaume & de nostre personne, feit prendre plusieurs de noz & loyaux seruiteurs, dont il feit mourir les plusieurs: & des autres par voyes estranges & desraisonnables grandes & excessiues sommes de deniers exigea. Et pource noz nepueux d'Orleans deuantdits, voyans comment ledit Duc de Bourgongne par plusieurs manieres ledit traicté de Chartres auoit rompu, & riens n'en tenoit qu'il eut iuré & promis: nous requirent & supplierent humblement & par plusieurs fois que nous leur voulussions faire & administrer iustice de leur pere, sicomme nous estiōs tenus: mais ledit Duc de Bourgogne, qui nous auoit osté noz bōs & loyaux seruiteurs, & deuers nous auoit mis seruiteurs & officiers à sa poste, nous empescha affin que nous n'entendissions à faire ladicte iustice comme nous estions tenus. Et qui



pis est, pource qu'iceux noz nepueux veoient qu'ils ne pouoiēt auoir iustice pour l'empeschement que mettoit ledit Duc de Bourgongne, vouloient aucunement proceder contre luy par voye de fait, pour venger la mort de leurdit pere sicomme naturellement estoient tenus : ledit Duc de Bourgongne leur imposa & feit publier faulxement & contre toute verité, comme nous sommes plainement informez & acertenez, qu'eux & autres de nostre lignée estans en leur compaignie nous vouloient destituer de nostre estat & dignité royal, & faire nouuel Roy en France. Et sous vmbre desdictes mensonges & aduinemens contre toute verité, esmeut nostre peuple contre eux : & par ce voulant couvrir sa mauuaise & damnable querelle sur mensonge, dont tant de maux & inconueniens sont aduenuz, comme chacun sçait. Et sous vmbre de ladicte guerre, ledit Duc de Bourgongne a fait prendre & emprisonner en nostredit chastellet de Paris & ailleurs plusieurs notables gentils-hommes, cheualiers & escuyers & autres, pource qu'il maintenoit qu'ils estoient fauorables aux bien-vueillans de la partie de noz nepueux, ou de plusieurs autres de nostre sang & lignage, estans en leur compaignie : & desquels il feit plusieurs questionner & crueusement tourmenter, & puis apres mourir sous vmbre de iustice, sans cause & sans raison. Et les autres mourir de faim esdictes prisons, & à eux denier confession & autres sacremēs ecclesiastiques, eux iecter aux champs, aux chiens & aux oyseaux, & faire deuorer aux bestes sauuages sans vouloir souffrir qu'ils eussent sepulture ecclesiastique ou autrement, ne que leurs enfans nouuellement nez ne feussent baptisez, qui est expressement contre nostre foy. Et en ces choses feit faire horribles, cruelles & les plus grans inhumanitez qu'oncques feussent veües ne ouïes. Et outre plus sous vmbre de ladicte guerre, qui n'estoit pas nostre ne deuoit estre, mais estoit sienne & pour son fait particulier : iceluy de Bourgongne feit leuer & exiger & sur noz subiects moult excessiues & merueilleuses finances, tant par tailles, par emprunts, & par reformatiōs : comme en prenant ou tresor d'Eglises en noz cours de Parlement, chastellet & ailleurs mises en depos & autres sommes de deniers, qui estoient mises & consignées & déposées esdits lieux au profit des femmes vesues & d'enfans mineurs d'ans, pour cause de retraicte ou rachats de reuenues ou d'heritage ou autrement par plusieurs manieres. Feit outre ledit de Bourgongne en noz monnoyes grans debilitatiōs & vilipentions de valeur, dont il print, & par long temps cueilla moult grans profits, reuenues ou preiudice de nous, de nostre peuple & de la chose publicque. Et tāt que par icelles voyes frauduleuses & exhortations ledit de Bourgongne les print, & depuis deux ou trois ans en ça a applicqué à son singulier profit de noz finances, & de l'argent de noz subiects la valeur de dix cens mille florins d'or & plus : sicomme nous a esté clerement monstré par les comptes, & sans ce qu'aucune chose en ayt esté conuertie en nostre profit. Pour laquelle occasion, le fait de marchandise & autres affaires necessaires pour le biē de nous & de nostre Royaume ont cessé, & esté empeschez par aucun tēps : & les reuenues de nostre demaine & de noz aydes sont pour ceste cause moult outrageusemēt diminuez, sicōme tout ce est notoire. Et de ce non contēt, mais en intētion totallemēt de destruire noz nepueux deuātdits, & aussi nostre treschier & aymé oncle le Duc de Berry & plusieurs autres de nostre sang & lignaige, affin que le gouuernemēt de nostre Royaume demourast



mourast audit de Bourgogne seul & pour le tout: & nous fait mettre en armes & nostre trescher & trefaymé premier fils le Duc d'Acquitaine à tout tresgrād puissance de gēs d'armes, & de traict, en cōtraignāt à là venir plusieurs de nostre sang, barōs, cheualiers & autres sous couleur qu'il disoit la guerre estre nostre, dōt il n'estoit riens, cōme dit est: & nous mener hors de Paris pour aller enuahir, cōbattre & assembler contre noz oncles, nepueux & autres de nostre sang, cōme fils n'eussent tousiours esté noz bons, vrays & loyaux parens, subiects & obeissans. Et de fait nous fait mettre le siege deuant la ville de Bourges, où estoit nostre oncle deuantdit: & là nous fait tenir par l'espace de cinq sepmaines & plus à nostre grand desplaisir. Nous & aussi nostre fils en grand peril & dangier de nostre personne, tant pour les chaleurs qui couroient, comme pour les instances qui suruindrent en nostre exercite & autrement en moult de manieres: & tant qu'il conuint, que dudit lieu nous reuenissions en nostre ville d'Auxerre: auquel lieu nous feismes venir & assembler nosdits oncle, fils, nepueux & plusieurs autres de nostre sang & lignage. Et là par la grace & ayde de Dieu & du commandement & ordonnance de nous & de nostredit premier fils, furent faits certains accords, traictez & appaisemens entre nosdits oncle, fils, nepueux & cousins, & ceux de leurs alliez d'une part, & ledit Duc de Bourgogne d'autre, & ceux de son alliance. Lesquels traictez & accord toutes les deux parties iurerent & promeirent solennellement tenir, garder & entretenir sans enfreindre. Ce nonobstant assez tost apres que nous feismes reuenuz en nostre ville de Paris, ledit Duc de Bourgogne en venant contre sondit serment & sa promesse, pour vouloir briser & adnichiller ladicte paix par nous faicte & par luy iurée (comme dit est dessus) fait faire & ordonner certaines lettres parlans en nostre nom, lesquelles furent appliquées à edict. Par lesquelles il nous faisoit rappeler & mettre à neant grand partie de ce qui auoit esté par nous & nostredit fils promis & octroyé, en faisant le contraire de ladicte paix: c'est à sçauoir la restitution des terres & heritages, benefices & offices de ceux qui auoient tenu la partie de nostredit oncle, de noz fils & nepueux deuantdits, & autres de nostre sang & lignage, de leurs alliez & de ceux de leur costé. Et qui plus est a fait tenir de fait par longue espace de temps contre nostre plaisir & voulenté, & contre noz deliberations & lettres sut ce faictes, & contre son serment les chasteaux de Couchy & Pierrefons appartenans à nostredit fils d'Orleans & plusieurs autres chasteaux, terres, maisons & heritages appartenant à autres qui auoient tenu leur party, sans ce pour lettres quelsconques par nous octroyez, ne pour verification sur ce faicte par nostre Court de Parlement n'autrement nostre fils d'Orleans & plusieurs autres de ses bien-vueillans, pensant auoir restitution & deliurance de sesdictes forteresses & chasteaux, terres, maisons & autres biens dessusdits, en opprimant & en forçant iustice és choses dessusdictes, & en plusieurs autres: & mesmement celle de nostre souueraine Court de Parlement, qu'à peine estoit homme qui osast dire quelque chose contre les voulétez & entreprinſes dudit de Bourgogne & de ses complices: & outre pour tousiours detenir le gouuernement de nous, lequel il auoit emprins: & celui de nostre treschiere & trefaymée compaignie la Royne, & de nostre premier fils, & aussi de tout le fait de nostre Royaume. Et pour nous tenir en subiection, ledit de Bourgogne fait esleuer & dessus mettre en nostredict ville de



Paris gens populaires de petit estat & de bas : lesquels sous la confidence, & sous la puissance & auctorité de luy & de son enhort, entreprindrent à gouverner les personnes de nosdits compaignie & premier fils, & de tous les faits de nostre Royaume: lesquels souuentsfois sont venuz és conseils de nous & de nostre court de Parlement moult impetueusement & violement, & portant à noz bons conseilliers & officiers grans menaces, tellement que iustice n'y auoit point de lieu : & qu'il conuenoit que tout ce qu'il entreprenoit, fut fait & passé comment qu'il fut. Et en perseuerant en leurs maulx & en leurs damnables entreprises, vray est que le vendredy xxviii. iour du mois d'Auril dernier passé, pource que ledit de Bourgongne, lesdictes gēs de bas estat & ses complices & alliez sentirent & apperceurent, que plusieurs de nostre sang & lignage & autres tant des officiers de nostredicte compaignie & de nostre fils, comme de l'vniuersité, bons bourgeois & marchans de ladicte ville de Paris, estoient mal contens du gouvernement & auctorité que ledit de Bourgongne & sesdits complices auoient entrepris: doubans qu'ils ne les voulsissent expulser dudit gouvernement, & puis apres punir & corriger de leurs malfaits, firent faire vne grāde assemblée de gēs, dont la plus grand partie ne sçauoient la cause pourquoy ils les faisoient assembler. Et de fait sans auctorité de iustice, vindrent en armes par maniere d'ennemi à estandart desployé deuant l'hostel de nodredit fils, ouquel contre son gré & volenté & en son grād desplaisir, ils prindrent de fait nostre treschier & trefaymé cousin le Duc de Bar, & plusieurs autres des plus especiaux conseilliers & seruiteurs de nostredit fils, qui estoient escripts en vn roolle, lequel portoit le Duc de Bourgongne en sa main qui les fait mener en son hostel d'Arthois, & puis apres en diuerses prisons. Et à vn autre iour assez pres ensuiuant, reuindrent lesdictes gens de bas estat par l'enhort dudit Duc de Bourgongne par telle maniere que dit est. C'est à sçauoir à tout grand assemblée de gens d'armes à estandart desployé à nostre hostel de saint Pol, auquel par force & violence contre nostre gré & volenté, & aussi de nostredicte compaignie & premier fils, ils prindrent de fait nostre treschier & aymé frere Loys Duc en Bauiere, & certains autres officiers de nostredit premier fils, & aussi certaines dames & damoiselles estans en la compaignie & seruice de nostredicte compaignie la Royne. Lesquelles ils prindrent en sa chambre elle presente: lesquels tous ensemble ils emmenerent, & meirent en diuerses prisons: esquelles ils les ont treslonguement tenus en tresgrand peril de leurs personnes. Et avecques ce les gens de bas estat par le consentement, port & faueur & entreprise dudit de Bourgongne firent plusieurs autres excès, crimes & delits: sicomme de nuict & de iour prendre sans auctorité de iustice plusieurs officiers de nous, & autres habitans de nostredicte ville de Paris: & eux mis en prison plusieurs d'iceux assez tost apres occirent & tuerent, & les autres ieçterent en la riuere & les noyerent, & les autres furent rachetez & composez à grans sommes de deniers, sans ce que desdits extortions & excès on osast aucuns d'iceux reprendre ne corriger. Et tout par le port & faueur dudit Duc de Bourgongne, qui par ces moyēs nous a tenuz & nostre compaignie la Royne: & aussi nostredit fils en telle seruitude & dangier, que nous n'auions franchise ne liberré d'aucune chose faire à nostre plaisir: mais nous auoit baillé & bailla depuis lesdictes prinſes, tous officiers & seruiteurs à sa poste. Et

mesmement



mesmement de gens de petit estat, iusques adōc qu'il pleut à nostre seigneur que par bon moyen, prouision, & diligēce de nostre treschier & aymé coulin le Roy de Cecille, de nostre fils & nepueux d'Orleās, & de noz treschiers & ayez coufins le Duc de Bourgongne, le Comte d'Allençon, le Comte d'Eu & autres de nostre sang & lignaige & de plusieurs Prelats, barons & cheualiers, escuyers & de plusieurs de nostre court de Parlement, & plusieurs de nostre fille l'vniuersité & bons bourgeois & marchans de nostre ville de Paris. Nous nostredicte compaignie & fils feusmes remis en nostre frāchise & liberté, en tel estat que nous par raison deuions estre, & que ladicte paix par nous faicte audit lieu d'Auxerre, cōfermée & de nouuel iurée tant par ledit de Bourgongne comme par autres de nostre sang & lignaige, jaçoit-ce que ledit de Bourgongne deuāt la cheuauchée, que nostredit premier fils fait par la moyenne de la ville de Paris le vendredy iiij. iour du mois d'Aoust dernieremēt passé, fut efforcé de tout son pouoir de rompre & empescher ladicte paix, en faisant publier & dire en plusieurs hostels & en moult de places communes de nostredicte ville de Paris, qu'accorder & assentir à ladicte paix estoit toute destruction de bonnes gens de nostredicte ville de Paris, qui estoit vne tresfaulse & mauuaise induction, sicomme il est assez notoire. Et depuis ladicte paix ainsi renouuellée & reformée (cōme dit est) ledit de Bourgongne ayant grand desplaissance d'icelle: & de ce aussi que l'vne des parties desdictes gens de bas estat, troubleurs & violeurs de paix estoient absentez & renduz fugitifs de nostredicte ville de Paris, faignant qu'il s'en vouloit aller en Bourgongne: jaçoit-ce qu'il n'y allast pas, mais s'en allast en Flandres & ailleurs en ses païs, terres & seigneuries, recueilla & recepta lesdits crimineurs & violeurs de paix, & aussi autres faulx traistres & homicides: lesquels de son commandement & ordonnance occirent & tuerent nostredit frere de bōne memoire, comme dit est. Et jaçoit-ce que depuis le departement dudit Duc de Bourgongne, nous eussions enuoyé deuers luy noz solempnels messagiers: par lesquels entre les autres choses, nous luy feissions requerir & de par nous commāder, que lesdits malfaicteurs, lesquels il tenoit deuers luy: desquels plusieurs ont esté conuaincus de crime de leze majesté deuers nous, & pour ceste cause bānis perpetuellemēt de nostre Royaume: & les autres sont appelez au droit de nous, qu'il les nous vouldist enuoyer pour faire iustice selon leurs demerites: & aussi qu'il nous vouldist rendre, ou faire rendre & restituer plusieurs de noz chasteaux: lesquels il detenoit ou faisoit detenir pour luy & à son proffit contre nostre gré & vouldenté: c'est à sçauoir le chastel du Crotoy, de Laon, & de Chinon: Neantmoins de toutes ces choses a esté inobedient. Et qui pis est, sous vmbre d'aucunes faulses & menfongeables couleurs par luy exquises, fait le plus grand mandement qu'il peut de gens d'armes & de traict, tant de ses païs de Bourgongne, de Sauoye comme de Flandres, d'Arthois & d'ailleurs, affin de venir & approcher vers nostredicte ville de Paris, & pour auoir passage, port & faueur, escriuit & enuoya lettres closes à plusieurs de noz bonnes villes, à elles requerant confort & ayde sous couleur de ce qu'il disoit qu'il vouloit venir à Paris par mandement de nostredit premier fils pour nous deliurer, oster & mettre hors de seruaige & de prison, en quoy il disoit que nous estions detenus: laquelle estoit vne faulse & notoire menfonge: car nous ne feusmes oncques en plus grande liberté & franchise que nous som-



mes de present, & que nous auons esté depuis son departement de nous. Et aussi il n'est pas vray que sur ce il ait eu mādement de nous : mais est vray que par noz lettres patentes, nous & nostredit fils luy auions mādé & deffendu sur tout quāques il se pouoit meffaire enuers nous, qu'il ne fut si osé de venir deuers nous à cōpaignie n'à assemblée de gens d'armes, dont il ne luy a chalu & n'a tenu cōpte. Mais qui pis est, detint & detient vn des huissiers de nostre court de Parlement : lequel nous auions enuoyé deuers luy garny de noz lettres patētes à luy faire les deffences, lesquelles il luy à faictes bien & solennellement. Et en perseuerant de mal en pis, & continuant en son mauuais & damnable propos, en vilipendant & contemnant lesdits mandemens & deffences de nous qui sommes son souuerain seigneur, & en luy rendant rebelle & inobedient à nous de fait, iceluy de Bourgongne se meit en chemin contre nosdits mandemens & deffence, en venāt & approchant nostredicte ville de Paris à tout le plus grand effort & puissance de gens d'armes & de traict qu'il a peu procurer par maniere de guerre & hostilité, en troublant & rompant de fait, en tant que luy est possible ladicte paix tant solennellement iurée, comme dit est : en luy constituant & rendant ingrat, & indigne des biens & graces par nous à luy faictes au temps passé. Et tient en sa compaignie & amaine les faulx traistres & homicides violeurs de paix, criminieux & cōuaincus de crime de leze majesté & banis de nostre Royaume, pour s'efforcer d'esmouuoir nostre peuple & faire sedition en nostre bōne ville de Paris & ailleurs aussi. Et de fait s'est bouté en nostre ville de Compiengne contre certaines noz lettres de deffences par nous faictes aux manans & habitans de ladicte ville, qu'ils ne le souffrissent pas entrer dedans à puissance n'à compaignie de gens d'armes : & desquelles lettres de deffence il estoit aduisé & certifié, dont il n'a tenu cōpte. Mais qui pis est icelle nostre ville a fait tenir & occuper pour luy ayder encontre noz deffences, & pareillement a fait prendre & occuper nostre ville de Soissons par aucuns de ses gens. Nonobstant que lesdits habitans de ladicte ville eussent de par nous lettres de deffence (comme dit est) & dont les gens dudit Duc de Bourgongne ont esté adcertenez & aduisez. Et toutesfois tellemēt s'est approché ledit de Bourgongne, qu'il s'est bouté en nostre ville de S. Denys en France, & icelle detint & occupa contre nostre gré & plaisir & vouldenté, en faisant d'icelle bataille & frontiere contre nostre ville de Paris, & en demonstrāt par effect sa mauuaise & damnable vouldenté, vint à tout sa puissance de gens d'armes par maniere d'hostilité à tout sadicte puissance à estandart desployé, vint deuant nostredicte bonne ville de Paris, & là se tint en bataille par long temps : Et enuoya ses coureurs iusques aux portes d'icelle ville, cuidant faire en icelle sedition, & esmouuoir le peuple : en cuidant entrer en icelle par force & violence & contre nostre vouldenté, en faisant ce fait d'ennemy : & en commettant crime de leze majesté deuers nous, dont plusieurs complainctes & clameurs nous sont venues & viennent chacun iour incessamment. Sçauoir faisons que nous les choses dessusdictes considérées, & autres plusieurs à ce nous mouuant. Et mesmement ayans considerations aux manieres qu'il a tousiours tenues deuers nous, depuis la mort nostredit frere iusques à present : lequel en tous les faits a tousiours procedé par voye de fait, & par puissance & force d'armes, & qui par plusieurs fois n'a pas obeÿ à nous en pareil cas : c'est à sçauoir aux commandemens, lesquels luy ont



ont esté faits de non venir deuers nous n'en nostre bone ville de Paris à tout puissance d'armes, & ne voulut oncques obeïr à nous, n'à noz commandemens, si nō en ce qu'il luy pleut: pourquoy il est, & doit estre tenu pour ingrat & indigne, & priué de tous les biens & les graces que nous luy auons autresfois faictes. Et eüe sur ce tresgrand & meure deliberation de conseil avecques plusieurs de nostre conseil, & avecques plusieurs de nostre sang & lignaige à autres noz subiects & preud'hommes, tant de nostre grād conseil comme de la court de nostre Parlement, & de nostre fille l'Vniuersité, des bons bourgeois & marchans de nostre ville de Paris en tresgrand nombre: iceluy de Bourgongne & tous autres, qui cōtre nosdictes deffences & ordonnances se rendront avecques iceluy Duc, & qui luy donneront conseil & ayde apres la presentation de ces presentes: auons tenu & reputé, par ces presentes tenons & reputons, tenrons & reputerons pour rebelles & inobediens à nous pour violeurs de paix & fracteurs, & par consequent pour noz ennemis & aduersaires, & de tout le bien publicque de nostre Royaume. Et pour ces causes auons ordonné & deliberé de mander, & conuoquer deuers nous par forme d'arriereban & autremēt, le plustost que faire se pourra tous noz hommes vassaulx tenans de nous en fiefs ou arrieriefiefs, & aussi des gens des bonnes villes de nostre Royaume, qui ont accoustumé d'estre en armes & suiuir les guerres pour nous ayder, seruir & conforter à resister à la peruerse volenté & entreprinse dudit de Bourgongne, de sesdits complices. Et pour eux mettre & reduire en nostre subiection & obeïssance, comme ils doiuent estre. Et pour eux punir, corriger & chastier de leurs malfaits & entreprinse, tellement que l'honneur nous en demeure, & que ce soit à tous exemple. Si donnons en mandement par ces presentes à noz amez & feaulx conseilliers gens tenans nostre Parlement, au Preuost de Paris, au Baillif d'Amiens, à tous noz autres iusticiers, officiers ou à leurs lieutenans & à chacun d'eux, sicomme à luy appartiendra que ces presentes lettres publient ou facent publier en leurs sieges & auditoires, & hors en lieux publicques par toutes villes & lieux à faire proclamations accoustumées, affin qu'aucuns ne puissent pretendre ignorance, en faisant commandement de par nous à tous noz iusticiers, officiers & subiects autres qui ont accoustumé d'vser d'armes, qu'incontinent & le plustost que faire se pourra, ils viennent à tout la plus grand puissance de gens d'armes, qu'ils pourront faire pour nous seruir, en ce qu'és choses dessusdictes nous leur voudrons commander sur tout quanques ils pourront meffaire enuers nous, en eux contraignant à ce par prinse & expoliation de leurs biens par arrests & detention de leurs personnes se mestier est, & tous ceux qu'ils trouueront estre negligens ou en deffaute d'obeïr à noz commandemens & ordonnances deuantdictes. En tesinoing desquelles choses, nous auons fait mettre à ces presentes nostre seel. Donné à Paris le dixiesme iour de Feurier, l'an de grace mille quatre cens & treize. Et de nostre regne le xxxij. Ainsi signé par le Roy à la relation du grand conseil tenu par la Royne & monseigneur d'Acquitaine. Derion. Lequel mandement fut publié à Amiens, & puis apres és Preuostez & par tout le bailliage par la cōmission dudit Baillif.



*Comment les chaines de Paris furent ostées, & les Parisiens tenuz en grand subiection, & des mandemens Royaulx, qui de rechef furent publiez.*

## CHAP. CXVI.



Tem apres que le Duc de Bourgongne se fut retraict de France en ses pays ( comme dit est dessus) Taneguy du Chastel qui n'aguères auoit esté fait Preuost de Paris, auec luy Monnet de Guerre furent commis de par les Ducs de Berry & d'Orleans à faire oster & deschainer toutes les chaines des rues & quarrefourgs d'icelle ville de Paris, & les faire mener à la Bastille sainct Anthoine, & au chastel du Louure: & aussi prindrent & osterent toutes les armeures de tous les bourgeois & manans, & les feirent porter és forteresses dessusdictes, cheuauchans parmy Paris en armes tous les iours à grand compagnie: & auoient chars & charrettes, qui menoient lesdictes chaines & armeures és lieux dessusdits. Et n'y auoit en ce temps si hardy bourgeois, qui osast porter baston deffensable. Et auec ce faisoient lesdits gens d'armes le guect de nuict & de iour aux portes & murailles, aux despens desdits bourgeois & manans, sans qu'ils eussent de ce faire quelque audience, ne qu'on se fiasst de riens en eux. Pourquoy les dessusdits bourgeois furent moult troublez & ennuyez en cuer, quand ils veirent qu'on leur tenoit tels manieres contre eux: & en y auoit plusieurs qui se repentoient, dequoy ils festoient mis en la subiection des aduersaires du Duc de Bourgongne, mais semblant n'en osoient faire. A l'encontre duquel Duc furent de rechef enuoyez par tout le Royaume diuers mandemens, contenans ou en substance, comment ledit Duc de Bourgongne auoit & vouloit seduire le peuple contre le Roy: duquel mandement la teneur s'ensuit. Est à sçauoir de celuy qui adressa au Baillif d'Amiens.

CHARLES par la grace de Dieu Roy de France, au Baillif d'Amiens ou à son lieutenant salut, & dilection: comme autresfois pource qu'il est venu à nostre cognoissance, que Iean nostre cousin de Bourgongne nostre ennemy rebelle & inobedient, auoit escript & enuoyé par plusieurs fois lettres closes & patentes tant en nostre bonne ville de Paris, comme en plusieurs autres bonnes villes de nostre Royaume, à seduire & deceuoir nostre peuple: & pour conclurre sa mauuaise & damnable entreprinse, que n'aguères il à fait pour venir à puissance de gens d'armes en nostre ville de Paris. Nous par noz lettres luy eussions expressement mandé & commandé & deffendu, qu'il ne fut aucun de quelque estat qu'il fut, qui receust quelques lettres closes & patentes dudit de Bourgongne: & que si elles estoient receües, que ouuerture ne responce aucune en quelque maniere n'en fut faicte nullement: mais nous fussent enuoyées ou à nostre Chancellier & conseil, à en ordonner comme de raison. Et il soit ainsi, que ledit de Bourgongne en continuant en son damnable propos, n'aguères ayt enuoyées certaines lettres patentes, seellees de son grand seal de secret en nostre ville de Paris: & icelles fait affischer de nuict & secrettement aux portaulx de plusieurs Eglises & en autres lieux de ladicte ville, & aussi en plusieurs autres villes de nostre Royaume, ainsi que nous auons entendu. Par lesquelles est certiffié entre les autres choses, qu'il estoit venu deuers Paris pour nous & nostre trescher & tresamé fils le Duc d'Acquitaine mettre hors de danger & de seruaige, en quoy ledit de Bourgongne di-

soit



soit nous estre detenus par aucuns estans deuers nous, & que son intention estoit de iamais se departir desdictes entreprinſes & procurations, iusques adonc que iceux ayent remis nous & nostredit fils en nostre plaine domination & franche voulētē: lesquelles choses deuādictes ainsi & autres par ledit Duc de Bourgogne escriptes sont notoirement faulſes & contre toute veritē, pour lesquelles choses, graces à Dieu. rendons: car nous ne nostredit fils n'auons esté, ne sommes en aucun danger ne seruage, ne nostre honneur, ne nostre iustice, ne l'estat de nostre domination n'ont esté, ne sont de present bleſſez ne amoindris: mais iceux tousiours depuis que ledit de Bourgogne se partit de Paris, auons gouuerné & gouuernons paisiblement & franchement sans contradiction & sans empeschement: ce que faire n'auons peu depuis l'horrible & detestable homicide perpetré, & commis par ledit de Bourgogne en la personne de bonne memoire nostre trescher & tresamé seul frere germain Duc d'Orleans, auquel Dieu pardoint: & auons dominé depuis le partement dudit Duc de Bourgogne & dominons de nostre Royaume, ainsi que nous plaist & de droit appartient: & a esté obeÿ continuellement en toutes choses humblement, & diligemment par tous ceux de nostre sang & lignage, sicomme ils estoient tenus & ainsi que bons parens, vassaulx & loyaulx subiects deuoient faire à leur Roy & seigneur souuerain, excepté toutesfois ledit de Bourgogne, qui contre nostre voulentē & expresse deffence a assemblé grand quantité de gens d'armes & de traict: & par maniere d'aduersaire est venu deuant nostre ville de Paris, ayant en sa compagnie plusieurs faux & desloyaulx homicides, & autres plains de crisme contre la majestē royale. Et avec ce autres bannis pour ceste cause de nostre Royaume: par le moyen desquels & d'aucuns, ledit Duc de Bourgogne de sa mauuaise & obstinée voulentē cuida aussi entrer en nostredictē ville de Paris, pour prendre & vsurper tout ce qu'il escript au contraire de ces lettres: c'est à ſcauoir le regime de nous & de nostredit premier fils & Royaume, & d'icelle ville approprier les fināces, ainsi que depuis le treshorrible homicide il a longuement fait à la tresgrand desplaisance & dommage de nous & de nostre Royaume, dont ledit de Bourgogne & les siens ont eu & receu, lx: cens mille francs & plus: pour lesquelles choses & autres plus à plain en certaines noz lettres de ce faictes declarées, nous auons dit celuy estre rebelle, & à nous estre inobedient, briseur & violeur de paix, & par ainsi ennemy de nous & de nostredit Royaume: & pource qu'aucuns de noz vassaulx & subiects, qui paraduenture ont & peuuent auoir ignorance de la veritē des choses dessusdictes, pourroient aucunement foy adiouster, & en ce que ledit de Bourgogne par ses lettres a escript & diuulgüé ou pourroit escrire mensongeablement & contre veritē, & que plusieurs d'iceux noz vassaulx & subiects pourront par telles mensonges grandement estre fraudez & deceuz: & aussi que ce pourroit redonder & tourner en tresgrand preiudice & dommage de nous & de nostre domination & Royaume, & de noz bons & loyaulx vassaulx & subiects. Nous vueillans des choses dessusdictes à vn chacun la veritē estre ſceüe & cogneuē, & obuier à telles mauuaises & damnables mensonges, & aussi aux maulx & inconueniens qui seroient en voye d'executer: signifions & notiffions que des choses dessusdictes escriptes par ledit de Bourgogne, semées & diuulgüées par aucuns de ses parens adioincts & complices, n'en est riens n'a esté, & ne sont que



faulſes choſes & mauuaiſes menſonges, trouuées pour ſeduire noſtre dit peuple & paruenir à ſa treſmauuaife & deuantdicte damnable fin. Auquel de Bourgongne noſtre intention, à l'ayde de Dieu & de tout noſtre puiſſance eſt d'obuier & reſiſter, & le mettre, les ſiens adherans, aydans & confortans en telle ſubiection & obeïſſance, que par raiſon doiuent eſtre mis ſubiects & inobediens à leur ſouuerain ſeigneur. Et de ce eſt noſtre voulenté ne aucunement ne departirons. Si vous mandons & commandons ſur tout quanques vous pouez meffaire, que noz lettres vous faciez ſolennellement publier par tous les lieux en voſtre dit bailliage, eſquels il appartient à faire proclamations & publications, & és villes & reſſors dudit bailliage: tellement que nul ne puiſſe ignorer ne pretendre ignorance, en faiſant commandement de par nous à tous noz vaſſaulx, ſubiects de voſtre dit bailliage: & que nous leur faiſons auſſi commandement ſur la foy, loyauté & obedience qu'ils nous doiuent, & ſur peine d'eſtre reputez rebelles deuers nous & de forfaire corps & biens, que deſormais en auant ils ne receuent de par ledit Duc de Bourgongne, ne de ſesdits adherans & alliez aucunes lettres. Et ſ'aucunes eſtoient receües, nous leur commandons qu'ils n'en facent ouuerture, publications, ne lecture, ne reſponces quelsconques: mais toutes cloſes ou ouuertes ſans en outre proceder, les nous apportent ou à noſtre amé & feal Chancellier, à en ordôner ſicomme nous ſemblera d'eſtre à faire: Et auec ce nous leur deffendons & expreſſement enioignons ſur les peines deſſusdictes, qu'à iceluy de Bourgongne ne à ſesdits aydans, adherans ou confortans par quelque maniere ne donnent ayde & conſeil ne faueur. Affin qu'ils ſe demonſtrent touſiours eſtre vrais obediens & ſubiects, ſicomme ils doiuent eſtre, ou autrement ferons punir les delinquans, ſicomme rebelles & inobediens enuers nous, & tellement que ce ſera exemple à tous les autres. Donnée à Paris le xvij. iour de Feurier, l'an de grace mille cccc. & treize, & de noſtre regne le xxxiiij. Ainſi ſignées par le Roy à la relation de ſon grād conſeil, E. Mauregard. Et de rechef fut enuoyé encore vn autre mandement royal contre le Duc de Bourgongne par tout le Royaume, és lieux accouſtumez, dont la teneur ſ'enſuit.

CHARLES par la grace de Dieu Roy de France, au Baillif d'Amiens ou à ſon lieutenant ſalut: Comme il ſoit ſi notoire entre noz ſubiects, que nuls ne puiſſent pretendre à ignorance, que Iean noſtre couſin de Bourgongne n'aguères ſoit venu en noſtre ville de Paris auec treſgrand multitude & congregation de gens d'armes & de traict, ce qui eſt contre noſtre voulenté & plaïſir. Et outre noz mandemens, inhibitions & deffences de par nous ſolennellement tant par noz meſſages cōme par noz lettres à luy par pluſieurs fois faiçtes: & que de fait il ayt prins noſtre ville de ſainct Denys, & d'icelle ayt fait baſtille cōtre noſtre ville de Paris, & de fait eſt venu à eſtandard deſployé en bataille deuant icelle, & courut & fait courir iuſques aux portes d'icelle ville de Paris: & encores detient & fait occuper par force aucunes de noz villes, comme Compiengne & Soiſſons, & ſe tient en noſtre Royaume auec grand quantité & grand multitude de gens d'armes, qui en noſtre grand preiudice & deſplaïſir, & en treſgrand oppreſſion & charge de nous & de noſtre Royaume & ſubiects & de quelconque choſe, iceluy Duc de Bourgongne ayt dit ou eſcript ſon aduenement eſtre raiſonnable, nous voyons clerement que ſommes certains que toutes les cauſes, couleurs & raiſons qu'ice-  
luy



luy a escript, & dit de foudit aduenement interceptions, sont faulx mandemens & contre toute verité: & que son propos & intention est seulement pour veoir, fil pourroit entrer par violence ou force ou par aucunes mauuaises manieres & aguettemens mallicieux en nostredicte ville de Paris, pour faire son plaisir de nous, de nostre treschere & tresamée compagne la Royne, & de nostre trescher & tresamé fils le Duc d'Acquitaine, & d'autres de nostre sang & lignage & d'icelle nostre ville: & consequemment auoir du tout nostre Royaume, puissance & auctorité: & par maniere de tyrannie vsurper le regime de nostre domination, si comme notoirement autresfois il a esté prins & gouuerné, à la tresgrande & irreparable destruction, oppression & dommage de nous, des dessusdits de nostre lignée, de nostredicte ville de Paris, & de tout nostre Royaume & subiects: pour lesquelles causes, nous l'auons fait n'agueres denoncer rebelle & inobedient à nous, & nostredit aduersaire & ennemy, avec tous ses complices seruiteurs aydants, & faueur portans: de laquelle dicte ville de saint Denys il est de present issu, & ne sçauons quel chemin il veult tenir: & par aucunes autres lettres vous auons mandé & enioinct, que vous feissiez crier de par nous en vostredit bailliage, que nul ne fut si hardy sur peine de perdre corps & biens, d'aller le seruir & accompagner en ladicte armée par luy mise sus & assemblée: & que tous ceux de vostredit bailliage & des ressors, qui contre nosdictes deffences sont venus & viennent en sa compagnie, vous preinssiez ou feissiez prendre, saisir & mettre en nostre main leurs terres, heritages & possessions, & biens quelsconques estans és mettes de vostredit bailliage, & par icelle nostre main feissiez iceux cueillir & leuer. Neantmoins de ce faire vous auez esté reffusans, differans & retardans en tenant peu de compte de nostredit mandement & ordonnance, si comme nous auons entendu: pour laquelle chose fil est ainsi, il nous desplaist & non sans cause. Si vous mandons & de rechef enioignons destroictement sur peine d'estre priué de vostre office, & sur tout ce que vers nous pouez mesprendre, que incontinent ces lettres veües, vous faciez de par nous crier & publier à son de trompe par tous les lieux accoustumez à faire proclamations oudit bailliage, que nuls de quelque estat qu'il soit, ne voise seruir ledit de Bourgongne, sadicte armée & congregation par luy faicte. Et que tous ceux qui y sont allez, tantost & sans delay retournent en leurs maisons, sur peine de perdre & confisquer par deuers nous corps & biens. Et pource que plusieurs dudit bailliage notoirement sont en la compagnie dudit de Bourgongne, & aussi plusieurs sont oudit bailliage de ses adherans, confortans & fauorables qui contre nostre plaisir, voulenté & ordonnance murmurent & ont murmuré, & s'efforcent de seduire nostre peuple & subiects, donnent conseil, soulas & ayde en tant qu'ils peuuent audit de Bourgongne: & en la faueur d'iceluy si comme nous auons entendu, nous vous mandons & enioignons sur les peines deuantdictes, que tous les biens d'iceux, meubles & heritages & possessions en quelconques lieux qu'ils soient és mettes de vostredit bailliage: & generallyment de tous ceux qui contre nosdictes lettres sont, ou iront en sa compagnie. Et ceux qui luy bailleront ou donneront conseil, soulas & ayde, & autrement sont fauorables à sadicte mauuaise & damnable intention, vous le prenez incontinent ou faictes prendre, & mettre en nostre main reallement, que vous vous aydez de noz autres mandemens sur ce bail-



lez. Et neantmoins se vous pouez prendre aucuns desdits delinquans ou inobediens,prenez les ou faictes prendre en quelconque lieu qu'ils pourrôt estre trouuez hors lieux saincts : & iceux punissez des peines deuantdictes , ou autrement selon leurs demerites ainsi que raison sera. Et se iceux vous ne pouez prendre les faictes appeller à noz droits par proclamation publique & sur peine de bannissement & confiscation de leurs biens. Et avec ce commandez de par nous par solennelle publication, ainsi qu'il est de noz vassaulx & autres, qui ont accoustumé de porter armes, qu'incontinent ils viennent par deuers nous à la plus grand force & compagnie qu'ils pourront pour nous seruir , & resister à la mauuaise volonté & intention dudit de Bourgongne & de ses complices , & à eux mettre & r'amener en nostre subiection & obeissance , ainsi qu'ils doiuent estre : & iceux punir & corriger de leurs meffaits & offences, selon raison , & tout selon la forme de noz autres certaines lettres sur ce à vous n'agueres adressées : & faictes tant és choses deuantdictes & és dependences d'icelles , que nous n'ayons cause de proceder contre vous par deffaulte de non auoir obeï à nous. Donné à Paris le vingtiesme iour de Feurier , l'an de grace mille quatre cens & treize, & de nostre regne le trentetroisiesme. Ainsi signées par le Roy à la relation de son grand conseil tenu par la Royne & monseigneur le Duc d'Acquitaine. I. du Chastel. Et puis apres fut publié à Amiens par la commission du Baillif , & par la commission d'icelle ville. &c. De ce mesme an le derrain iour de Feurier & vn peu apres. &c. En apres furent enuoyées lettres patêtes de par le Roy aux nobles d'Arthois. Et d'autre part du bailliage d'Amiens & de Tournay, & aussi de Vermandois, qui par deuant estoient alliez deuers ledit Duc de Bourgongne deuant Paris, & en sa expedition l'auoient accompagné: & aux autres qui n'auoiēt point esté avec luy, furent enuoyées lettres closes seellees du petit rond seal. Les premieres deffendoient de par le Roy sur les peines dessusdictes, que desormais en auāt les dessusdits nobles avec ledit de Bourgogne, ne se teinsent ne accompagnassent , ne que à luy ne aux siens ne portassent ne donnassent conseil ne ayde : mais se preparassent en armes & cheuaulx à seruir le Roy contre ledit de Bourgongne, & contre ses aydans. Les secondes lettres faisoient mention que les dessusdits nobles se preparassent en armes, & en cheuaulx à la plus grand puissance qu'ils pourroient, & que tost veinsent à Paris audit Roy, ou en quelque lieu qui fut: & que par l'ayde d'iceux du tout en tout auoit intention d'impugner & d'humilier ledit Duc de Bourgongne, ses fauorables & compagnons. Et en apres les deux manieres de lettres dessusdictes furent enuoyées à Amiens par le Chancelier , & furent baillées au Baillif d'Amiens : & ledit Baillif les enuoya selon ce qu'on luy mandoit aux gardes des preuostez & bailliages: Affin qu'une chacune garde desdits preuostez & bailliages icelle baillast à ceux qui demourroient en leurs preuostez & bailliages, & lesdictes gardes receussent gardes fils pouoient, & que icelles enuoyassent à Paris: & aussi qu'iceux escriussent comment ils les auoient baillez: & si ne pouoient auoir lettres de recepissé, que aussi les rescriussent à Paris, affin que icelles lettres on sceust qu'elles fussent receües par ceux à qui le Roy les enuoyoit , & qu'ils ne peussent ignorer qu'ils ne les eussent receües. Ou quel temps l'Euesque de Paris à la requeste de ceux de l'Vniuersité enuoya deuers le Duc de Bourgogne, pour sçauoir s'il vouloit aduoüer maistre Jean Petit des articles , que autrefois



fois auoit proposez à sa requeste contre le Duc d'Orleans deffunct : lequel de Bourgogne respondit aux messagiers, que ledit maistre Iean ne vouloit aduoüer ne porter sinon en son bon droit. Apres laquelle responce iceux retournez à Paris deuers ledit Euesque & l'inquisiteur de la foy, fut ordonné que les articles deffusdits seroient condamnez à estre ars publicquement present le Clergé, & tous autres qui vcoir le voudroient & ainsi le fut fait. Et adonc fut renōmée que on iroit querir les os dudit maistre Iean Petit, qui estoit enterré & trespasé en la ville de Hesdin: mais en fin riens n'en fut fait, & vouloit on ardoir en la ville de Paris au lieu où lesdictes articles auoient esté ars.

*Comment le Duc de Bourgogne eut grand Parlement avec les nobles de ses païs à Arras, qui luy promeirent de le seruir contre tous ses aduersaires.*

CHAP. CXVIII.

**L**E Duc de Bourgogne qui chacun iour auoit nouuelles comment le Roy & le Duc d'Acquitaine estoient du tout tournez contre luy, par le moyen de ceux qui pour lors gouernoient, feit assembler en la ville d'Arras tous les nobles d'Arthois & de Picardie. Ausquels quand il y fut venu en la presence d'iceux, premierement s'excusa de ce qu'il auoit tant targé à venir, & leur dit qu'il estoit à Paris au mandement du Duc d'Acquitaine : & de rechef feit lire les lettres escriptes de la main dudit Duc. Outre dist qu'il auoit laissé ses gens és villes de Cōpiengne, & de Soissons à la requeste d'iceux pour le bien du Roy: lesquelles il scauoit veritablement que le Roy par l'induction de ses aduersaires faisoit grand assemblée de gens d'armes pour icelles reconquerre. Pourquoy requeroit aux nobles deffusdits, que sur ce luy voulussent bailler conseil & ayde. A quoy luy fut respondu par iceux, que volentiers le seruiroient contre tous ses aduersaires, reserué le Roy & ses enfans, & ainsi luy promeirent, excepté le seigneur de Ront, qui dit qu'il le seruiroit contre le Roy & tous autres. Et adonc regnoit par toutes les parties du Royaume de France & en diuers autres païs, vne maladie generalle, qui tenoit en la teste de laquelle moururent plusieurs personnes tant vieux que ieunes, & se nommoit icelle la Coqueluche.

*Comment le grand conseil du Roy se tint : & aussi comme le Duc de Bourgogne eut grand Parlement avec les nobles de ses païs d'Arras, qui luy promeirent le seruir contre tous ses aduersaires.*

CHAP. CXIX.

**L**E second iour de Mars en cest an furent assemblez en l'hostel de saint Pol en la presence de la Roïne & du Duc d'Acquitaine, pource que le Roy n'estoit point haictié, plusieurs Princes & Prelats avec le conseil royal. Ausquels par la bouche du Chancelier de France fut remonstré bien au long tout l'estat & gouuernement du Duc de Bourgogne, & comment il estoit conduict rigoureusement enuers le Roy & les seigneurs de son sang par plusieurs & diuerses fois depuis la mort du Duc Loÿs d'Orleans deffunct. Et mesmement comment dernièrement outre les deffences du Roy & du Duc de Acquitaine, il estoit venu à puissance de gens d'armes & à estandart desployé deuant la ville de Paris, en faisant plusieurs violences ou Royaume irreparables : & de fait auoit mis garnison de ses gens d'armes à Compiengne & à Soissons, les-



quels faisoient chacun iour guerre ouuerte aux païs & subiects du Roy, ainsi & par la maniere que pourroient faire ses anciens ennemis d'Angleterre. En enfraingnant du tout la paix dernièrement faicte à Auxerre, & depuis reconfermée à Ponthoise : requerant outre iceluy Chancelier à iceux bien instamment que sur la foy, serment & loyauté qu'ils auoient au Roy, ils voulussent declairer presentement ce que le Roy & le Duc d'Acquitaine auoient à faire sur ceste matiere contre ledit de Bourgongne. Lesquels Princes : c'est à sçauoir le Roy de Cecille, les Ducs de Berry, d'Orleans, de Bourbon, & de Bar, les Comtes d'Allençon, de Vertus, de Richemont, d'Eu, de Dampmartin, d'Armignac, de Vendosme, de Marle, & de Touraine, le seigneur d'Albreth Connestable de France, l'Archeuesque de Sens & plusieurs autres prelatz avecques grand nombre de notables Barons, Cheualiers & escuyers du grand conseil royal : apres ce qu'ils eurent bien au long & en grand deliberation debatue ladicte matiere, finalement conclurent & feirent responce par la bouche dudit Archeuesque, en disant que licitement & de raison le Roy pouoit & deuroit faire guerre audit Duc de Bourgongne, attendu (comme dit est) les manieres qu'il auoit tousiours tenu & encores tenoit à l'encontre de luy. Et à lors fut conclud que le Roy en sa personne se mettroit sus, avec toute sa puissance pour aller à l'encontre dudit Duc & ses fauorables, pour iceluy du tout subiuguer & le mettre avec tous ses païs en obeissance : & mesmement la Royne, le Duc d'Acquitaine son fils, tous les Princes là estans & ceux qui estoient audit conseil promeirent & iurerent solennellement par la foy & serment de leurs corps, que iamais n'entenderoient à quelque ambassade de lettres ou autres quelsconques choses qu'ils peussent venir de par iceluy Duc, iusques à tant qu'il feroit & tous les siens du tout destruits & desheritez, ou au moins humiliez & remis en l'obeissance du Roy & de son conseil. Apres lequel finé, furent mis clerks en œuures & lettres escriptes, & en diuers lieux & païs enuoyées ou Royaume de France : & tant que le Roy feit pour ceste fois plus grand mandement qu'il n'auoit fait durant son regne. Et pourtant, en assez brief terme, tant par les Princes dessusdits, comme par le mandement & commandement du Roy, s'assemblerent tresgrand multitude de gens de guerre autour de la ville de Paris, & es marches de l'Isle de France. Si furent enuoyez aucuns capitaines avec grand nombre de gens de guerre deuant la ville de Compiengne, où estoient les gens dudit Duc de Bourgongne, comme dit est ailleurs. C'est à sçauoir messire Charles d'Albreth Connestable de France, messire Hector Bastard de Bourbon, Remonnet de la Guerre, le seigneur de Gaucourt & plusieurs autres : lesquels au prendre le siege eurent de grandes & dures escarmouches contre ceux de la ville, qui tressouuent de iour & de nuict issoient contre eux aux plains champs & leur feirent de prime venue plusieurs dommages. Neantmoins ils estoient tressouuēt par les assiegeans reboutez assez rudement en ladicte ville : & en laquelle estoient principal de par le Duc messire Hue de Launay, le seigneur de saint Legier & son fils, messire Mauroy, Hector Philippe, & le Bon de Saueuses, le seigneur de Sorres cheualiers, Louuelet de Malinghen & plusieurs autres notables hommes roides & experts en armes, qui tres diligemment se meirent à resister contre leurs aduersaires : & affin qu'ils ne se peussent loger à leur ayse, ardirent & demolirent es faulxbourgs & à l'enuirō d'icelle ville plusieurs notables edifices, tant maisons  
comme



comme Eglises. Toutesfois assez brief ensuiuant les François assiegeans, feirent faire deux ponts par dessus la riuere d'Oise pour passer plus à leur aise à secourir l'un l'autre se besoing leur estoit : & commencerent à faire asseoir les gros engins du Roy cõtre les portes & murailles de ladicte ville en plusieurs lieux, qui moult les trauailla. En outre, le samedi de la sepmaine peneuse troisieme iour d'Auril le Roy issit de la ville de Paris à grand triumphe & à noble estat, & s'en alla en la ville de Senlis pour attendre ses gens. Auquel lieu il solennisa la feste de la Resurrection nostre Seigneur Iesus Christ: en laquelle armée on feit porter aux personnes du Roy & du Duc d'Acquitaine la bende & enseigne du Comte d'Armignac, en delaissant sa noble & gentille enseigne que luy & ses predecesseurs Roys de France auoient tousiours portée en armes. C'est à sçauoir la droicte Croix blanche, dont moult de notables Barons, Cheualiers & autres loyaux anciens seruiteurs d'iceluy, & aussi dudit Duc d'Acquitaine furent assez mal contents, disant que pas n'appartenoit à la tresexcellente & haulte majesté Royal, de porter l'enseigne de si poure seigneur comme estoit le Comte d'Armignac, veu encore que c'estoit en son Royaume & pour sa querelle. Et auec ce icelle bende dont on faisoit à present si grand ioye, auoit esté baillée au temps passé aux predecesseurs de iceluy Comte à la porter à tousiours luy & ses successeurs & hoirs, par la condamnation d'un Pape, en signe d'amédise d'un forfait que les deuantdits d'Armignac auoient commis contre l'Eglise ou temps dessusdit.

*Pour l'an mille cccc. & xiiij.*

*Comment le Duc d'Acquitaine partant de Paris alla à Senlis deuers le Roy, & de là allerent mettre le siege deuant la ville de Compiengne.* CHAP. CXX.



**A**V commencement de cest an : c'est à sçauoir le lundy de Pasques, le Duc d'Acquitaine premier fils du Roy partit de Paris à tresbelle compagnie, & alla à Senlis où estoit le Roy son pere : lequel Roy accompagné de plusieurs Princes, Prelats & grand cheualerie partant de Senlis, alla loger à Verbrie, & la Roïne auec elle la Duchesse d'Acquitaine de Paris, allerent demourer à Meaulx en Brie apres le partement du Roy dessusdit. Et le Duc de Berry seul & pour tout demoura capitaine de Paris & gouuerneur des marches à l'enuiro. Le Roy Loys s'en alla à Angiers & depuis retourna à Paris, & ne fut pas pource voyage en la cõpagnie du Roy de France. Lequel Roy de France, de Verbrie auec ses Princes s'en alla vers Compiengne : & quand il fut aupres enuoya vn de ses herault à la porte de la ville noncer à ceux de dedans, comment leur Roy venoit à belle compagnie, & qu'ils le meissent dedans ainsi que loyaux subiects doiuent faire à leur seigneur: lesquels de la ville feirent responce que tresvolentiers le receuroiēt luy & son fils Duc d'Acquitaine, auec tout leur estat & non autrement. Lesquelles parolles ledit herault r'apporta deuers le Roy son seigneur, qui se logea en la maison d'un bourgeois entre la ville & la forest: & le Duc d'Acquitaine se logea en l'abbaye de Royal-lieu : & les autres Princes & capitaines où ils peurent le mieulx, & tousiours continuoient les engins du Roy ietter contre la ville, où ils feirent de grans dommages, & entre-tēps se feirent plusieurs escarmouches des vns contre les autres. Entre lesquelles en y eut vne, dont il faut



faire aucune mention: c'est à sçauoir que le premier iour de May approchât, messire Hector Bastard de Bourbon, manda aux assiegez que le iour de May les iroit esmayer: & pourtant ledit iour de May monta à cheual & avec luy deux cens hommes d'armes roides & experts en fait de guerre, avec aucunes gens de pied, & tous ensemble chacū vn chapeau de May sur leurs testes par dessus leurs armeures, les mena aupres de la porte de Pierrefons pour porter vne branche de may à iceux assiegez comme mandé leur auoit: lesquels de toute leur puissance firent grand résistēce au dessusdit, & tant qu'à ceste besongne eut vn trespas & fort estour des vns contre les autres, dont les aucuns de chacune partie furent morts & naurez cruellement: & mesmement ledit Bastard de Bourbon eut son cheual tué sous luy, & fut en grand peril d'estre tué ou d'estre prisonnier de ses aduersaires. Durāt lequel tēps, ledit Duc de Bourgongne tint plusieurs parlemens avec ses Flamens, affin qu'ils luy voulussent ayder de certain nombre de gens pour leuer ledit siege de Compiēgne: mais de ce ne luy voulurēt riēs accorder, disāns que cōtre le Roy ils ne se vouloient pas armer: & pourtāt ledit Duc de Bourgongne à qui ses gens de la ville de Compiēgne auoient desia enuoyé sçauoir s'il leur bailleroit secours, fait responce à iceux qu'ils prenussent appoinctement avec le Roy, où le Duc de Aquitaine le plus courtoisement qu'ils pourroient: lesquels de ce aduertis, traitērent avec le Roy par cōdition, que toutes les gens dudit Duc de Bourgongne s'en iroient saufs leurs corps & leurs biēs, par si qu'ils promeirent ou leur capitaine pour eux de iamais tenir contre le Roy, & le Duc d'Aquitaine nulles de leurs villes. Semblablement le Roy pardonna aux bourgeois & habitans de ladicte ville leurs offences en iceux receuant à mercy, saufs leurs corps & leurs biēs. Ainsi & par icelle ordonnāce fut receüe la ville de Compiēgne le lundy viij. iour de May: en laquelle, apres que les gēs dudit Duc de Bourgongne furent partiz ayans saufs conduit du Roy & du Duc d'Aquitaine, entra ledit Roy & le Duc d'Aquitaine dedans la ville, où ils seiournerent aucune espace, & lesdits assiegez se retrahirent ou païs d'Arthois. Ouquel temps Vvalleran Comte de S. Pol, qui se disoit encores Connestable de France cheuauchant de la ville d'Amiens pour aller à S. Pol cheut de son cheual si roidement qu'il se rompit la iambe: & pour la grand douleur d'icelle, se fait porter en son chastel de S. Pol. Toutesfois il fut aucunement bruit qu'il faingnoit estre ainsi blecé, affin d'estre excusé d'aller au mandement du Roy, duquel par plusieurs fois auoit esté sommé & requis. Et par pareil cas du Duc de Bourgongne, lequel il veoit en grand tribulation l'un contre l'autre, dont moult luy desplaisoit: & pareillement messire Jaques de Chastillon chevalier seigneur de Dampierre soy disant Admiral de France, se tint tout celle saison en son chastel de Rolaincourt, faingnant estre malade de goutte, dont souuent estoit occupé: affin d'estre excusé ainsi que ledit Connestable, de seruir le Roy en son armée ou ledit Duc de Bourgongne, dont moult desiroit le salut. Toutesfois leurs gens qui auoient accoustumé d'aller en armes avec eux quand ils se mettoient sus, se meirent tous ou au moins là plus grand partie à seruir le Duc de Bourgongne contre le Roy & ses fauorifans. Durant ceste guerre ainsi, & par la maniere dessusdicte, estoient plusieurs seigneurs en grand soucy & ne sçauoient bonnement comment trouuer maniere à leur honneur à eux excuser enuers les seigneurs dessusdits.



*Comment le Roy & sa puissance alla de Compiengne à Soissons, & la feit assieger: & en fin prendre de force, & fut du tout pillée & robbée.* CHAP. CXXI.



R est verité qu'apres que le Roy eut remis en son obeissance la ville de Compiengne, comme dit est, le cinquiesme iour de May se partit d'icelle avec tout son exercite, & s'en alla pour assieger la cité de Soissons, auquel lieu estoit capitaine ce vaillant combattant Enguerran de Bournouille, noble vassal & tres renommé en armes: deuant laquelle ville estoient desia allé l'auantgarde du Roy, laquelle conduisoient le Duc de Bar, le Comte d'Armignac, Clugnet de Brabant soy disant Admiral de France, le Bastard de Bourbon & messire Aymé de Sallebrusse, avec plusieurs autres notables souldoyers du Roy. Et comme auoient fait parauant ceux de Compiengne feirent ceux de Soissons voyans qu'ils deuoient estre assiegez: c'est à sçauoir feirent ardoir, abbatre & demolir plusieurs Eglises, maisons & notables edifices. Mais nonobstant ce, le Roy & ses Princes là venuz furent iceux assiegez trespuissamment & de tres pres approchez des gens du Roy. Lequel Roy, & son conseil à son aduenement deuant Soissons fait notablement sommer ceux de ladicte ville, affin qu'ils luy feissent obeissance, ou se ce non, ils estoient en voye de perdition: mais nonobstant lesdictes remonstrations à eux faictes, conclurent d'eux deffendre & resister contre toute la puissance du Roy, esperans d'auoir secours par leur seigneur & maistre le Duc de Bourgongne, lequel leur auoit promis de les secourir en dedans certain iour par luy assigné. Or est ainsi que le Roy se logea dedans l'abbaye de S. Jean des Vignes de l'ordre de S. Augustin, & les Ducs d'Acquitaine & d'Orleans se logerent en l'abbaye S. Quentin, & les autres Princes & seigneurs en autres lieux par ordonnance au mieulx qu'ils peurent: dedans la ville, avec ledit Enguerran estoient messire Collart de Phiennes, Lamon de Launoy, messire Pierre Menau, Gille du Plessier, le viel seigneur de Menau remply d'aage & de richesse, Guyot le Bouteillier avec plusieurs autres gens de guerre des pays de Boullenois, Arthois & Picardie, & si auoit bien quarâte combattans Anglois: mais pour aucun discord, le commun & bourgeois de la ville ne furent pas bien d'accord avecques les gens dudit Enguerran, dont la force d'icelles parties fut moult affoiblie. Et entre-temps les gens du Roy de iour en iour mettoient grand peine, & faisoient diligence à greuer ladicte ville: c'est à sçauoir de grosses Bombardes, canons, brigolles & autres habillemens de guerre: lesquels souuentesfois de iour & de nuict iettoient contre les portes, tours murailles de ladicte ville: en laquelle besongne tant continuerent, que lesdits assiegez furent moult trauaillez par les engins dessusdits, & leurs murailles desrompues en plusieurs & diuers lieux. Finablement le xxj. iour de May fut icelle ville assaillie tres terriblement par les gens du Roy à tous costez. Auquel assaut furent faits nouueaux cheualiers Loys Duc en Bauiere, le Comte de Richemont & le Preuost de Paris, & plusieurs autres. Pareillement à l'autre costé de l'auantgarde du Roy où estoient le Duc de Bar & le Comte d'Armignac, Remonnet de la Guerre & plusieurs autres capitaines assaillirent tres vaillamment lesdits assiegez, & en autres lieux tout autour de la ville, les Princes chacun en son costé feirent hastier l'assaut & enforcer tel & si fort, que nonobstant la grand deffence & resistance d'iceux assiegez



entrèrent iceux assaillans iusques à vne grand rompure que auoient fait lesdits engins du Roy. Car là combattoient les vns contre les autres de lances, haches & espées à main. Et durant cest assault le capitaine des Anglois qui estoient dedans la ville avec ledit Enguerran de Bournouuille, lequel parauant auoit parlementé avec aucuns Anglois qui estoient en l'ost fait descoupper vne porte vers la riuere, par laquelle entrèrent premierement les gens du Comte d'Armignac, qui tantost meirent au plus hault de la tour la baniere & enseigne dudit Comte d'Armignac: & mesmes grand partie desdits Anglois se retournerent hastiement cōtre ceux de ladicte ville. Et assez tost apres iceux assaillans entrèrent par plusieurs costez à grand puissance, mettant tout à l'espée ceux qu'ils encontroiēt tant des gens d'armes comme du commun de la ville. Et en icelle derision, Enguerran qui cheua choit vigoureuſemēt en plusieurs parties autour de ladicte ville pour rehaſter ses gens & les mettre en ordonnāce, fut poursuiuy par vne petite rue où il passoit: En laquelle il y auoit chaine tendue, & des gens Remonnet de la Guerre: lesquels le haſterent par telle maniere qu'il fallut qu'il se retrahist, & par force cuida faire faillir son cheual par dessus la chaine deuantdicte: mais il demoura sur ladicte chaine sans pouoir passer outre, & tātost fut prins par vn des gens dudit Remonnet, lequel le mena à son maistre, qui en feit grand ioye: les autres gens de guerre voyans la prinſe de ladicte ville, se retrahirent en plusieurs & diuers lieux dedans les portes & es tours de la ville. Et là en parlementant à leurs ennemis se rēdoient, par ſi qu'ils leur promettoient de leur ſauuer leurs vies: les autres en deffendant leurs gardes furent occis & prins: & finablement tant des gens d'armes du Duc de Bourgongne comme des Bourgeois furent prins que morts en icelle iournée bien douze cens hommes. Tant qu'est à parler du deſroy que feirent les gens du Roy dedans ladicte ville de Soissons, n'est pas à eſtimer: car apres qu'ils eurent pillé & robbé tous les biens des bourgeois & habitans d'icelle, avec ce prindrent & robberent tous les biens des Eglises & monasteres: & meſme prindrent & robberent la plus grand partie des ſainctes relickes de plusieurs corps Saincts, qu'ils deueſtirent & deſchaſerent de toutes les pierres, or & argent qui estoit autour d'icelles, avecques plusieurs autres ioyaux & choses ſacrées, appartenans ausdictes Eglises. En outre n'est Chreſtien nul qui n'eust eu pitié de veoir la grand deſolation qui fut faicte en icelle ville, en violations des femmes mariées preſens leurs maris, ieunes pucelles preſens leurs peres & meres, nonnains ſacrées, gentils femmes de tous eſtats, dont il y en auoit grand quantité en ladicte ville: lesquelles ou la plus grand partie furent violemment contre leur vouldenté oppreſſées & cogneües charnellement de plusieurs & diuers nobles & autres: lesquels sans en auoir pitié apres qu'ils en auoient fait leur vouldenté, ils les liuroient à leurs ſeruiteurs: & n'est point de memoire qu'oncques de Chreſtiens fut fait ſi grand deſroy en tels beſongnes, attēdu la haulte ſeigneurie qui là estoit aſſemblée, lesquels ny meirent nul remede: & ſi auoit plusieurs ſeigneurs & gentils-hommes en l'armée du Roy, qui auoient leans de leurs parentez tant ſeculiers comme d'Eglise, mais pourtant riens n'en ceſſa. En outre durant ledit assault y eut plusieurs de ladicte ville voyans la deſolation & prinſe d'icelle, qui ſe cuiderent ſauuer: ſi faillirent par dessus la muraille vers l'eauie contendans de nager & passer outre pour ſauuer leurs vies. Mais grand partie en furent noyez, cōme depuis furent trouuez en



en diuers lieux sur la riuere:& en ceste tribulation y eut aucunes femmes d'estat, qui a l'ayde de leurs amis furent conduictes iusques au logis du Roy & du Duc d'Acquitaine, lesquelles furent gardées desdictes violations. En apres, pource principalement que ou pretendre le siege, messire Hector Bastard de Bourbon qui estoit prudent, vaillant & renommé en armes autant que nul autre de la partie du Roy, auoit esté nauré en parlementant à Enguerran de Bournouille d'une fleche ou visage si angoisseusement, qu'il en estoit mort:& auoit conceu le Duc de Bourbon qui moult aymoît son frere naturel, si grand hayne contre ledit Enguerran, & aucuns autres des assiegez, qu'il procura & feit deuers le Roy & ceux de son grand conseil, que la teste fut mise sur vne lance, & son corps pendu par les aisselles. Pour la mort duquel, nonobstant qu'à lors ils feussent leurs aduersaires, plusieurs Princes & grans seigneurs & capitaines n'en furent pas bien ioyeux, mais leur en despleut grandement & non pas sans cause: car par renommée, c'estoit la fleur de tous les capitaines de France alors regnans, avec lequel furent decapitez messire Pierre de Menau capitaine d'icelle: c'est à sçauoir du commun, maistre Auffiel Bassuel aduocat, & quatre autres gentils-hommes: desquels les testes furent mises sur lances, & les corps au gibet en la maniere accoustumée. Et maistre Iean Titet aduocat sage & renommé, à la volenté duquel parauant ce iour, toutes besongnes de la ville estoient ordonnées, fut mené avec aucuns autres à Laon & fut examiné, & apres decollé par les espaulles pendu au gibet. En outre en y eut cinquante & vn menez à Paris, qui furent mis en Chastellet: desquels plusieurs furent decapitez comme Gilles du Plessis cheualier & aucuns autres. En apres plusieurs tant de la ville archiers Anglois comme de la garnison, furent penduz au gibet dehors Soissons: les autres par finances se racheterent, comme l'ancien seigneur de Menau, messire Collart de Phiennes, Lamon de Lau-  
noy, Guyot le Bouteillier & plusieurs autres gentils-hommes & en y eut grand quantité: ausquels ceux qui les auoient prins donnerent congé sur leur foy, promettant de r'enuoyer leur finances à certain iour, affin que de la iustice du Roy ne feussent prins & executez. En apres, aucuns iours ensuiuant le Roy feit rendre & restituer par la main d'aucuns pillars les os de plusieurs corps saincts & reliques, lesquels desia estoient denuées & deuestues de pierres, or & argent où elles estoient enchassées. Et encores en tel estat en faillit plusieurs racheter de monnoye, & furent remises aux Eglises, dont on les auoit ostées. Ainsi & par ceste maniere fut ceste cité de Soissons grande en circuite, forte de lieu & de murs, munie de grosses & espesses tours tres plantureuse de tous biens, moult honorée solennellement de plusieurs Eglises & corps Saincts desolée, & mise à destruction par l'aduenement & armée du Roy Charles & des Princes qui estoient avec luy: toutesfois deuant son partement, ordonna à reedifier icelle ville, & y commist tous nouveaulx officiers pour la garde & entretenement d'icelle. Lesquels apres le departement des gens de guerre retrahirent selon ce que possible leur fut les citoyens d'icelle: ausquels fut baillé de par le Roy abolition generale, reserué ceux qui auoient esté principaulx consentans de mettre les Bourgonnons dedans.



*Comment apres la prinse de Soissons le Roy s'en alla à S. Quentin, & puis à Peronne pour entrer ou pais d'Arthois.* CHAP. CXXII.




Pres toutes les besongnes dessusdictes le Roy partant de Soissons, s'en alla en la ville de Laon où il fut grandement & ioyeusement receu du clergie, bourgeois & habitans de la ville: auquel lieu vint tantost deuers luy par saufconduit Philippe Comte de Neuers Baron de d'Osis de lignée royalle, frere germain du Duc de Bourgongne, & fut logé par les fourriers du Roy en l'abbaye de S. Martin de Premonstré: & auoit esté le dit de Neuers aduertie par aucuns de ses feables, que le Roy deuoit enuoyer en sa Comté de Rethel à toute puissance, pour par force d'armes le saisir & mettre en sa main. Et pource, luy venu à Laon, meit toutes les seigneuries qu'il auoit ou Royaume de France en la main du Roy, requerant mercy & pardon de toutes ses offences, promettant que desormais en auant en ceste querelle ne feroit à son frere Duc de Bourgongne ayde en appert n'en couuert cōtre le Roy son souverain seigneur: laquelle chose faicte bailla en ostage pour accomplir & entretenir les dessusdictes promesses le seigneur de Lor, & aucuns de ses autres hommes feodaux, & par ainsi s'en alla le dit de Neuers à Mazieres sur Meuze par la licence du Roy: en outre le Roy estant à Laon, refit publier nouveaux mandemens par tout son Royaume: affin d'auoir ayde de ses cheualiers & autres, qui ont accoustumé d'eux armer. Et le dixiesme iour de Iuing s'en alla en Terrace, & de là à Ribemont: & puis en la ville de S. Quentin: auquel lieu vint deuers luy la dame de Hainault sœur du Duc de Bourgongne à deux cens cheuaux à moult noble arroy, pour traicter enuers le Roy & le Duc d'Acquitaine de la paix dudit de Bourgongne. Mais finablement quād le Roy eut ouï son conseil, ladicte dame ne peut riens traicter de la paix de son frere. Pourquoy, apres ce qu'elle eut prins congié du Roy se partit de saint Quentin, & s'en alla par deuers le Duc de Bourbon & Charles d'Albreth Connestable de France conduiseur de l'arrieregarde, ausquels elle print congé, & tant cheuaucherent en sa compagnie quatre des cheualiers du Roy pour la conduire, qu'elle trouua les Bourgongnons, qui estoient enuiron deux cens bacinets venans au secours du Duc de Bourgongne: desquels estoient capitaines messire Gaultier de Ruppes, les seigneurs de Montagu & de Thoullongon, messire Guillaume de Cham-diuers, le Veau de Bar Baillif d'Auxois, & plusieurs qui estoient logez vers Marle en tyrāt vers Hainault: mais ce venu à la cognoissance desdits cheualers du Roy, tantost retournerent à leur ost pour signifier la venue desdits Bourgongnons, affin qu'ils feussent combattus: & incōtinent le Duc de Bourbon, le Connestable & plusieurs autres capitaines à tout bien quatre mille cōbattans, hastiuement cheuancherent vers Hainault par la Chapelle en Terrace, tant cōme cheuaux les pouuoient porter pour atteindre & combattre lesdits Bourgongnons: lesquels ils poursuiuirent iusques au pont de Merbries sur l'eau de Sambre assez pres de Beaumont, & là tuerent & prindrent aucuns Bourgongnons, qui conduisoient le charroy: entre lesquels fut prins le dessusdit Veau de Bar Baillif d'Auxois, & de là suiurent lesdictes gēs du Roy iusques vers nostre Dame de Hal desdits Bourgongnōs, lesquels s'en allerent loger es faulxbourgs de Bruxelles. Et iceux gēs du Roy voyās qu'ils ne pouoient



uoient atteindre, retournerent parmy le paÿs de Hainault, en prenant plusieurs biens & viures des bonnes gens du paÿs qui de ce riens ne se doubtoient, & vindrent iusques à Guise en Terrace: auquel lieu ils trouuerēt le Roy à tout son exercite, qui là estoit retourné pour combattre les dessusdits Bourgongnōs ses ennemis. De laquelle cheuauchée moult despleut'au Duc Guillaume Comte de Hainault, pourtant que son paÿs auoit esté ainsi fourragé & couru. Et tantost apres le Roy retourna à saint Quentin & les Bourgongnons par deuers Audegarde s'en allerent à Doüy où ils trouuerent ledit Duc de Bourgongne, duquel furent receuz auctenticquement comme fils eussent esté tous ses freres. Et vint ladicte dame de Hainault sa sœur (comme dit est) laquelle de toute sa force & pouoir sa paix enuers le Roy procuroit, mais encores n'y auoit peu trouuer aucun moyen. En outre le Roy, de la ville de saint Quentin avec ses Princes s'en alla à Peronne, & se logea en son chastel. Et la feste de S. Pierre & de saint Pol apostres solemnellement en l'Eglise de S. Quentin fort y sollemniza. Et le lendemain d'icelle feste, ladicte dame de Hainault & son frere le Duc de Brabant vindrent deuers le Roy audit lieu de Peronne pour la cause dessusdicte. Lesquels royalement & grandement furent receuz, & puis feirent au Roy la requeste pourquoy ils estoient venus. Le dimanche ensuiuant premier iour du mois de Iuliet feit le Duc de Guienne à ladicte dame & à son frere vn grand & noble dîner, ens ouquel temps les festoya tressollemnnellement. Semblablement estoient venus avecques ladicte dame & son frere, aucuns des plus notables bourgeois & des quatre mestiers de Flandres vers le Roy, pour les trois estats dudit paÿs de Flandres: lesquels à grand ioye furent receuz, & leur feit à leur departement le Roy donner par saige disposition cent marcs d'argent en vaisselle dorée, dont iceux furent moult esiouÿs: mais finablement, ladicte dame de Hainault & son frere le Duc de Brabant ne peurent pour ceste fois traicter deuers le Roy la paix de leur frere le Duc de Bourgongne: pourquoy tristes & dolés à Doüy vers luy s'en retournerent: & lors ledit Duc de Bourgongne conclud avec tous ses capitaines, de resister par toutes voyes & manieres contre ses ennemis. Excepté seulement la personne du Roy & son fils Duc d'Acquitaine. En apres iceluy Duc s'en retourna en son paÿs de Flandres.

*Comment le Duc de Bourgongne assiste ses garnisons en plusieurs lieux: & le Roy partant de Peronne avec son exercite, alla assieger Bappames.*

CHAP. CXXIII.

 R est ainsi que deuant le partement dudit Duc de Bourgongne de la ville de Doüy, grād partie de Bourgongnons de Bourgongne sous la conduicte de messire Gautier de Ruppes, & autres capitaines. Et en la ville d'Arras fut commis capitaine general messire Iean de Luxembourg, qui estoit lors ieune cheualier: avec lequel pour le cōduire estoient le seigneur de Ront, messire Guillaume Bouvier gouverneur d'Arras, le seigneur de Noyelle nommé le Blanc Cheualier, Allain de Vendosme & plusieurs autres vaillans hommes de guerre iusques au nombre de six cens hommes d'armes & autant d'archiers: & si estoient de Bourgongne, en chief le seigneur de Montagu, le Sire de Vienne, le Borgne de Thoullongon cheualier, messire Guillaume de



Champ-diuers, le Bastard de Granſſon & autres iuſques à ſix cens hommes d'armes: & de la communauté eſtoit capitaine le ſeigneur de Beaufort à la Barbe, & és autres villes eſtoient commis autres notables hommes ſelon la diſpoſition dudit Duc: leſquelles gens de guerre feirent pluſieurs courſes ſur aucunes des terres & ſeigneuries de ceux qui tenoiēt la partie d'Orleans: & meſmes meſſire Iean de Luxembourg, vn certain iour à tout grand nombre de combattans, vint à la ville de Ham ſur Somme, laquelle eſtoit au Duc d'Orleans, & tantost par iceux fut toute robbée & deueſtue de tous biēs par les deſſusdits: & avec ce furent ſuſtez aucuns villages à l'enuiron, pour & à la cauſe deuantdicte: pareillement Hector de Saueuſes, Philippes de Saueuſes ſon frere, Loÿs de Vvargis & pluſieurs autres capitaines paſſerent l'eaüe de Somme par Hauges d'empres Picquegny, & de là ſ'en allerent en la ville de Blangy d'empres Mouchiaux appartenant au Comte d'Eu, laquelle eſtoit fournie & plaine de tous biens: mais tantost fut toute robbée par iceux, prenans hommes & tous autres biens qu'ils pouoiēt atteindre, à tout leſquels ſ'en retournoient ou paÿs d'Arthois. Et ainſi ſouuentesfois les gens du Duc de Bourgogne faiſoient telles courſes, dont le pauvre peuple eſtoit moult trauaillé: & le neufieſme iour de Iuillet iſſit le Roy avec ſes Princes de la ville de Peronne, & ſ'en alla faire ſon pelerinage à noſtre Dāme de Cuerlu: & de là alla loger ſur vne petite riuieſe aſſez pres de Miraumont. Et le ieudy enſuiuant ſ'en alla deuant la ville de Bappames appartenāt au Duc de Bourgogne, deuant laquelle fut fait cheualier le Comte d'Auxoirre par la maniere du Duc de Bourbon, qui menoit l'auantgarde, & y eſtoit venu dès le poinct du iour. Auquel lieu le Roy feit cheualier de ſa propre main le Comte d'Alençon, & pluſieurs autres: & là eſtoient les ſeigneurs de Boiſſay & de Gaucourt, qui exerçoient les offices des deux Mareſchaulx de France: c'eſt à ſçauoir de Bouciquault ſires de Longny. Et adonc le Roy venu deuant icelle ville en moult belle ordonnance, ſe logea premierement dedans vne abbaye de Nonnains au dehors d'icelle, & tous ſes gens ſe logerent autour de la ville: & fut en brief terme du tout environnée treſpuiffamment. Laquelle ville eſt en hault lieu ſans y auoir fontaine ne ruiſſel courant, & ſi eſtoit la ſaiſon de l'Eſté moult ſeiche: pourquoy il fallut qu'iceux par pure neceſſité fuſſent cōtraints d'aller querre de l'eaüe en vne riuieſe qui court aupres dudit Miraumont en bouteilles, tōneaux & ſemblables vaiſſeaux portans à leur oſt à chars, charrettes & autrement le mieux qu'ils pouoiēt: & ainſi par la grand multitude de gens & cheuaux qui eſtoiēt en l'oſt, furent plus contraints de ſoiſ que de famine: pourquoy ils ſ'aduiferent, aucuns en y eut de cōmencer à en fouÿr nouueaux puÿs, & tant en l'euſe continuerent qu'en brief eurent plus de cinquante puÿs, où ils tiroient eaüe claire en ſi grand abondance, qu'en tout l'oſt on auoit vn cheual abreuué pour quatre deniers. Or aduint qu'un certain iour le Duc d'Acquitaine manda les capitaines eſtāns en ladicte ville, & chaſtel de Bappames: c'eſt à ſçauoir Ferry de Hangeſt, meſſire Iean de Ieumont & Adam d'Anetus. Leſquels venus deuers ledit Duc d'Acquitaine, leur demanda pourquoy ils ne faiſoient ouuerture au Roy leur ſouuerain ſeigneur de ladicte ville & chaſtel de Bappames: leſquels luy reſpōdirent treshumblement qu'ils le gardoient pour le Roy, & pour luy qui eſtoit ſils aiſné du Roy par le commandement du Duc de Bourgogne. Et requirent au Duc d'Acquitaine qu'on leur

donnaſt



donnast trefues iusques au mardy prochain ensuiuant, affin qu'entre-temps ils peussent enuoyer deuers ledit Duc de Bourgongne pour sçauoir quelle chose il voudroit faire & ordonner de ladicte ville & chastel : lesquelles trefues tantost leur furent octroyées, & confermées par le Roy. En dedans lequel iour enuoyèrent deuers ledit Duc remonstrier la grand puissance qui estoit deuât eux, & aussi la petite prouision qu'ils auoient de viures pour gés & cheuaux. Laquelle ouye dudit Duc conclud avec iceux & fut content qu'ils rendissent la ville & chastel au Roy & à son fils d'Acquitaine, sauf leurs corps & leurs biens : pourquoy eux retournez audit lieu de Bappames, rendirent ladicte ville & chastel au Roy & à son fils le Duc d'Acquitaine : & de là se partirent avec tous leurs biens & estoient enuiron cinq cens bacinets & trois cens archiers. Lesquels tous ensemble s'en allerent à l'Isle deuers leur maistre le Duc de Bourgongne : mais à leur departie furent detenuz le varlet Caboche, qui portoit son estandart & deux marchans de Paris : desquels l'un estoit nommé Martin de Coulommers, & furent tous trois decapitez. Et aussi Martellet du Mesnil & Galiffre de Iumelles furent arrestez, pourtant qu'ils auoient esté dedans Compiengne mais depuis furent deliurez.

En ces propres iours fut publié au son de la trompette, que tout homme de quelque estat qu'il fut, marchand où autre repairant en l'ost du Roy, portast la droicte croix ou la bende, sur peine de confisquer corps & biens. Esquels iours aussi furent enuoyez de par le Roy & son conseil, aucuns ambassadeurs en la ville de Cambray deuers le Duc de Brabant & la dame de Hainault : desquels ambassadeurs furent les principaux le seigneur d'Iury natif de Normãdie, le seigneur de Ligny natif de Hainault pour lors garde du seel du secret du Roy, & plusieurs cheualiers & autres iusques au nombre de deux cens bacinets. Lesquels venus à Cambray, eurent parlement avec iceux Duc de Brabant & dame de Hainault : mais nullement ne peurent estre d'accord, ne condescendre au traicté de paix. Et pourtant lesdits cheualiers retournerent à leur ost deuers le Roy, & le Duc de Brabant & la dame de Hainault r'allerent à l'Isle deuers le Duc de Bourgongne leur frere, luy signifier qu'ils n'auoient peu besongner deuers le Roy de France.

*Comment ceux de la ville d'Arras se fortifierent à grand puissance, & ardirent & demolirent plusieurs notables edifices autour de leur ville.*

CHAP. CXXIIII.

**U** Tem ceux de la ville d'Arras qui de iour en iour estoient attendans d'estre assiegez par toute la puissance du Roy de France, faisoient grâs preparations pour resister, & eux deffendre contre tous leurs aduersaires : c'est à sçauoir de faire bouleuers au dehors de toutes leurs tentes & grosses chesnes, plantées par grand maistrise, & aussi de barrières & fossez en plusieurs lieux, affin qu'on ne les peust approcher : dedans lesquels bouleuers, & sur les tours & murailles cōstituerent, & assirent tout autour de leurdicte ville & pareillement de la cité plusieurs gros canons veuglaires & autres habillemens de guerre à greuer leurs ennemis : dedans laquelle estoit (comme dit est dessus) messire Iean de Luxembourg capitaine general accōpagné de plusieurs capitaines & autres notables & vaillans hommes de guerre, dont dessus est faicte



mention: lesquels furent tousiours assez vniz & bien d'accord les vns avec les autres. Si se conclurent tous ensemble d'attendre & resister contre toute la puissance du Roy & des Princes estans avecques luy. Et pourtant apres icelles conclusions ledit de Luxembourg feit publier au son de la trompette, que tous bourgeois & habitans de la ville, & autres de quelque estat qu'ils feussent, qui auoient leurs femmes, enfans, filles & fils avec aucuns de leurs biens meubles, reserué viures, les menassent & conduisissent par tout où il leur plairoit és païs, villes & forteresses du Duc de Bourgongne. Et avec ce que tous les habitans & gens de guerre se pourueussent chacun de viures pour quatre mois, ou qu'ils vuidassent la ville. Apres lesquelles publications plusieurs desdits bourgeois & habitans d'icelle, menerent leurs femmes, enfans & aucuns de leurs biens és villes de Douay, l'Isle, Bethune, Aire & autres lieux où bon leur sembla. En outre lesdits capitaines feirēt abbatre & demolir plusieurs notables Eglises, maisons & edifices tout autour de leur ville, c'est à sçauoir l'Abbaye de Tieulloye, l'eglise des Cordeliers, celle des Iacobins & aucuns autres: & pareillement à l'autre costé vers la cité furent ars & demolis tous les faulsbourgs de Baudemont, où il y auoit tresgrande circuité & habitations de tresnotables edifices tant hostelleries comme autres lieux, qui tous furent ars & destruits à la confusion des habitans d'iceux faulsbourgs.

*Comment Charles Roy de France apres qu'il eut mis Bappames en son obeïssance, alla mettre le siege tout à l'enuiron de la ville d'Arras & de là cité à tout sa puissance.*

## CHAP. CXXV.

**E**N outre apres que le Roy Charles de France eut meis en son obeïssance la ville de Bappames (cōme dit est) le xix. iour de Iuillet se partit avec toute son armée, & s'en alla logger à vn village nommé Vécourt, seant sur vne petite riuere à deux lieües d'Arras: auquel lieu de Bappames laissa tous ses engins, & messire Gasselin du Bos avec souffisante garnison soubz luy. Auquel messire Gasselin capitaine d'icelle ville par le Roy feirent serment solemnel, le mineur & escheuins de Bappames avec toute la commune, de tenir loyauté au Roy & à son commis. En apres de Vencourt le Roy alla logger passant par deuant Arras en la ville de Vailly: auquel lieu & deuant les portes d'Arras, en tresgrandes escarmouches des gens du Roy contre ceux de la ville: lesquels en grand nombre saillirent hors de ladicte ville tous à cheual à l'encontre de leurs ennemis, desquels ils prindrent prisonniers ce iour par plusieurs fois bien soixante ou au dessus, lesquels emmenerent dedans leur ville avec grand quantité d'autres bagaiges. Avec le Roy estoient (comme dit est) son premier fils Loÿs Duc d'Acquitaine, les Ducs d'Orleãs, de Bourbon, de Bar & de Bauiere, le Côte de Vertus, le Comte d'Alençon, le Côte de Richemont, le Comte de Vendosme, le Comte d'Auxoirre, le Comte de la Marche, le Comte de la Marle, le Comte d'Eu, le Comte de Rouffy, l'Archeuesque de Sens, l'Euesque de Laon, le Comte d'Armignac. Et si y estoit Charles d'Albreth Connestable de France, & aucuns autres cheualiers & escuyers menans l'auantgarde: en laquelle y auoit bien trois mille hommes d'armes, sans les gens de traict: & tant qu'en l'ost du Roy estoient bien (comme on pouoit estimer) deux cēs mille personnes: toutes-  
fois



fois le Roy alla de Vailly loger à la maison du Temple vers le chemin de Bappames environ vn iect de canon pres de la ville, & son fils le Duc d'Acquitaine assez pres de luy. En apres le Duc de Bourbon & ceux qui conduisoient l'auantgarde, entrerent par vn matin dedans les faulxbourgs de Vaudemont: & là se logerent, nonobstant ladicte resistance de ceux de ladicte ville: mais ce ne fut pas qu'il n'y eut de grans estours entre les parties. Vn iour le Duc de Bar, le Comte de Marle, le Comte d'Armignac & ceux qui conduisoient l'arrieregarde, se logerēt à l'autre costé es faulxbourgs vers Belle-moëte: & par ainsi ladicte ville d'Arras & cité furent tellement enuironnées, qu'à grand peine en pouoit il saillir personne que tost ne fut prinse: cōbien que de iour en iour, durant ledit siege, iceux assiegez feirent plusieurs saillies vne fois de pied & l'autre de cheual. Et souuent aduenoit qu'ils sailloient dehors par deux portes ou par trois, toute en vne heure: ausquelles saillies souuentesfois gaignoient plus qu'ils ne perdoient, comme il fut sceu certainement: car deuant ledit siege, à plusieurs saillies qu'ils feirent de premier iusques en fin, emmenerent dedans la ville bien douze vingt prisonniers sans ceux qui demouroient morts sur les places, dont il y eut foison. Et par especial à vne escarmouche qui fut sur l'eauie entre Belle-moëte & la poterne d'Arras, y eut grand perte du costé desdits assiegeans: pourtant que ceux de l'auantgarde estoient passez à pied par dessus vne petite planche vn au coup, iusques à six ou à sept vingts pour venir deuers la petite poterne. Mais incontinent les assiegez partirent à l'encontre d'iceux pour les combattre: & de fait les rachasserēt iusques à ladicte planche. Et iceux voyans qu'ils ne pouoient passer sinon à dangier, rechargerent sur ceux de la ville & les remeirent iusques assez pres de ladicte poterne. Finablement par la vaillance & entreprinse d'un homme d'armes nommé Perceual le Grand, lequel conduisoit ceux de ladicte ville, iceux assiegeans remis iusques à l'eauie, & là furent tresfort combattus, tant qu'il en demoura sur la place prins & morts bien cinquante, sans ceux qui noyerent en ladicte riuere à saillir l'un sur l'autre pour passer outre, desquels on tira lendemain de quinze à vingt tous armez. Et desdits assiegez furent prins ou morts à icelles saillies durant ledit siege environ vingt hommes: entre lesquels furent prins gens de nom, Baugois de la Beuuriere, le bastard de Belle, le bastard Dembrine & aucuns gentils-hommes de Bourgongne: Mais grand partie de leurs meilleurs cheuaux furent tuez, en faisant lesdictes saillies sur leurs ennemis. En outre, le chastel de Belle-moëte seant assez pres d'Arras, durant ledit siege se tint assez tousiours de la partie dudit Duc de Bourgongne. Ouquel chastel fut commis pour le garder messire Fleurant d'Ancre & messire Symon de Behaignon, avecques lesquels estoit vn homme d'armes nommé Iean Rose, lequel fut soupçonné de vouloir vendre ledit chastel, & pour ceste cause fut detenu prisonnier & ses biens confisquez. Toutesfois, ledit siege durant, fut ladicte forteresse gardée par les deuantdits cheualiers tousiours en l'obeissance du Duc de Bourgongne, nonobstāt que les assiegeans meissent grand peine d'icelle conquerir. Et tant qu'est à parler des courses & cheuauchées, que feirēt les gēs du Roy ou païs d'Arthois, de Ternois & à l'environ ledit siege durāt, il seroit long à reciter chacū à par-soy. Mais entre les autres vn des bastards de Bourbon & aucūs autres capitaines, accompagnez de mille combattās ou environ allerent fourrager la Comté de S. Pol, en laquel-



le prindrent & rauirent biens sans nombre. C'est à sçauoir, paÿsans, cheuaux, iumens, vaches, brebis & plusieurs autres choses. Et mesmement furent autour de la ville de S. Pol, en laquelle estoïent le Comte Vvaleran soy disant encores Conestable de France, & sa femme la Comtesse sœur au Duc de Bar. Auquel Valleran iceux appellerent par plusieurs fois de moult de reproches, disant qu'il faingnoit estre malade affin qu'il n'allast seruir le Roy son souuerain seigneur. Et en luy remonstrant qu'il auoit grād affection au Duc de Bourgongne, attendu que pour le seruir il auoit enuoyé messire Iean de Luxembourg son nepueu, & la plus grand partie de ses gens. Neantmoins ledit Comte Vvalleran oyant ces paroles & plusieurs autres, ne voulut oncques souffrir que ses gens faillissent à l'encontre d'iceux, pour la doubte que le Roy & son conseil n'en feussent mal contents. Et pourtant ne laisserent pas qu'ils ne boutassent le feu & ardissent grand partie des faulxbourgs de ladicte ville de S. Pol : & apres s'en retournerent à toutes leurs proyes en l'ost du Roy deuāt Arras, & puis vn autre iour s'assemblerent bien douze cens combattans: Lesquels cheuaucherent par deuant Lucheu tout fustant paÿs iusques deuant la ville de Hesdin, où ils feirent moult de dommages. Mais de la garnison de la ville de Hesdin, & d'autres places tenans le party au Duc de Bourgongne, les poursuiuirent bien & roidement & rescouïrent aucuns prisonniers: Et aussi prindrent aucuns prisonniers. Ainsi, & par plusieurs fois feirent les gens du Roy plusieurs courses es paÿs du Duc de Bourgongne, dōt le pauvre peuple fut moult fort trauaillé & molesté. En outre les gēs d'iceluy Duc de Bourgongne estans en ses bōnes villes & forteresses. C'est à sçauoir à Douay, Lens, Hesdin, Maïserolles & plusieurs autres, issoient de iour en iour, en mettant aguets sur ceux de l'ost qui alloïent en fourrage. Et aussi sur ceux qui d'Amiens, de Corbie, de Peronne & autres lieux menoient viures à l'ost du Roy. Lesquels souuent ils destrouffoient, tuoient & prenoient prisonniers: Et par especial Hector de Saueuse lors trefrenommé en armes, assembla de deux à trois cens combattans dessoubs son estandart: lesquels par plusieurs fois, il mena secrettement en aucuns lieux contre les gens du Roy, dont il acquist renommée trefgrande. Et tant fait que son seigneur & maïstre le Duc de Bourgongne l'eut moult pour recommandé, avec lequel se tenoit Philippes, Loÿs de Vvargis, Lamon de Launoy & aucuns autres experts hommes d'armes. En apres le Duc de Bourgongne ayant voulenté & intention de donner secours à ceux de la ville d'Arras, manda tous ses capitaines: avec lesquels il conclud de les enuoyer vn certain iour entrer à puissance dedans le logis de Vaudemont, où estoit l'auantgarde du Roy sous la conduicte du Duc de Bourbon: à l'encontre desquels deuoient faillir grand quantité de ceux de la ville, qui de ce estoient aduertis: pourquoy iceux capitaines se meirent tous ensemble iusques à quatre mille combattans: desquels estoïent capitaines le seigneur de Croÿ, le seigneur de Fosseux, le seigneur de Iemmont, le seigneur de Challon, messire Gautier de Ruppes & plusieurs autres, qui tous ensemble cheuaucherent iusques à quatre lieües d'Arras ou enuiron, & adonc ordonnerent & meirent leurs coureurs deuant: desquels coureurs furent Actis & Iacques de Bruneur, frere Loÿs de Buffy & aucuns autres, qui tous ensemble furent prins des gēs du Roy & menez en l'ost: & pourtant les gēs du Duc de Bourgongne dessusdits, sachās la prinse de leursdits coureurs, & aussi esperans que par  
iceux



iceux leur entreprinse seroit accusée, furent moult troublez, & tant, que sans riens besongner s'en retournerent chacun en sa garnison, dont moult despleut au Duc de Bourgogne. Et est vray que pour le temps que le Roy vint deuant Arras, ses gens prindrent la forteresse d'Auennes le Comte, qui estoit audit Duc & celle de Villers le Chastel, qui estoit au seigneur de Gournay toutes deux à quatre lieües d'Arras: dedans lesquelles estoient tousiours grand nombre de gens du Roy, qui moult trauailloient le païs, & aussi faisoient sçauoir à leur ost toutes nouuelles & assemblées faictes par lesdits Bourgongnons. Durant lequel temps les assiegeans: c'est à sçauoir ceux de l'ost du Roy continuellement (comme dit est) s'efforçoient de iour en iour de greuer & combattre ceux de la ville par toutes voyes & manieres qu'ils pouoient tant de canons, veuglares, brigolles & autres engins: & par especial au lez vers Baudemont trauaillerent fort iceux assiegez des engins dessusdits: & avec ce par dessous les murs en diuers lieux firent plusieurs mines. Entre lesquelles en firent vne contre ledit lieu de Baudemont sur intention d'entrer secrettement dedans la cité, laquelle des assiegez fut apperceüe par vne contremine qu'ils auoient fait: si fut rompue, & y eut grans poulsis de lances les vns contre les autres. Entre lesquels le Comte d'Eu combattit cōtre messire Jean de Meschastel seigneur de Montagu assez vaillammēt, jaçoit-ce que lors il estoit ieune d'aage, & fut fait cheualier à ceste besongne par la main de son beau frere le Duc de Bourbon. Apres lesquelles armes les parties se departirent, & retournerent chacun à son costé. En outre durant ledit siege messire Loys Bourdon, & autres furent logez en l'abbaye du Mont-sainct-Eloy à deux lieües d'Arras, laquelle estoit close de bonne muraille tout autour, & y auoit de moult notables edifices, qui tous ou au moins la plus grand partie furent despouillees par les dessusdits de trailles, de fer, de plomb, cloches & autres choses portatiues: ainsi, & par ceste maniere fut pour ceste saison la Comté d'Arthois moult oppressée & trauaillée par les gens du Roy de France.

*Comment le Duc de Brabant & la Comtesse de Hainault vindrent deuers le Roy deuant Arras, & traicterent la paix de leur frere le Duc de Bourgogne & de ses païs.*

CHAP. CXXVII.

**L**Tem apres toutes ces besongnes, le lendemain de la decollatiō saint Iean Baptiste, vindrent le Duc de Brabant & la Comtesse de Hainault sa sœur deuers le Roy & le Duc d'Acquitaine, avecques eux aucuns deputez par les trois estats de Flandres, pour traicter deuers le Roy & son fils de la paix du Duc de Bourgogne leur frere. Lesquels là venus enuiron deux heures du matin furent ioyeusement receuz du Roy, dudit Duc d'Acquitaine & d'aucuns autres. En laquelle paix procurant furent données trefues entre les assiegeans & les assiegez, lesquelles durerēt iusques en la fin dudit traicté. Laquelle paix & concorde finablement faicte, fut publiée deuāt la tente du Roy au son de la trompette le mardy quatriesme iour de Septembre à huiet heures apres disner: & fait on commandement tres estroittement & sur grās peines, que chacun tres incontinent de l'un & de l'autre ostant ses bendes, comme ceux du lez du Roy: & les Bourgongnons leur croix S. Andrieu, laquelle chose tantost fut faicte. Apres laquelle paix faicte & publiée, se departirent de l'ost du Roy aucuns



seigneurs souffrās flux de vêtre: c'est à sçauoir Loys de Bauiere frere de la Royne, messire Charles d'Albreth Connestable de France & aucuns autres: de laquelle maladie estoit ja mort messire aymé de Sallebrusse, & autres infinies personnes. Pour laquelle maladie, le Roy, son conseil & ses Prins furent cōtraints & plus enclins de cōuenir au traicté de paix, afin de s'en retourner és parties de France. Par la conclusion dudit traicté, furent offertes au Roy de par le Duc de Brabant & dame de Hainault pour & ou nom dudit Duc de Bourgōgne les clefs de la ville d'Arras & de la cité: & aussi promettans de mettre en l'obeissance du Roy toutes les bonnes villes & fortereſſes dudit Duc de Bourgongne, appartenans par tous ses paÿs ou Royaume de France. Et adonc fut ordōné par le Roy & son conseil, d'enuoyer dedans lesdictes villes d'Arras & de la cité, les Comtes de Vendosme grand maistre d'hostel du Roy, pour en icelles prédre l'obeissance: lequel là venu fit mettre les bannieres du Roy sur les portes d'icelles villes. En apres receut les sermens des habitās, lesquels promeirēt d'estre desormais bōs & loyaux au Roy, & ce fait ledit maistre d'hostel laissa de par le Roy en icelle ville & cité capitaine le seignr de Quesnes Vicōte de Poix, sauf & reseruē du don du Roy, ne feurēt pas empeschées la iustice & reuenues accoustumées dudit Duc de Bourgōgne. Apres lequel traicté fut ordōné de par le Roy & son cōseil, au Duc de Brabant, dame de Hainault, trois estats & deputez, d'estre & comparoir à certain iour qui leur fut assigné à Senlis deuers le Roy & son conseil, pour du tout cōfermer ladicte paix & remplir les conuenances faictes par iceux ou nom du Duc de Bourgongne. En apres le mercredy v. iour de Septembre, par nuict enuiron xij. heures, aucun homme meu de mauuaise voulēté bouta le feu au logis du seigneur d'Alençon, lequel hastiuement fut si grād qu'à peine luy mesmes peust isir & fuÿr és têtes du Roy: & quād le Comte d'Armignac veit le feu esdits logis, fit sonner la trompette & armer tous ceux de l'arrieregarde, lesquels armez ensemble le Duc de Bar isirent en bel ordonnance de leurs logis: esquels à leur departemēt feirent bouter le feu, & apres par parties s'en allerent mettre en bataille: les vns deuant la porte S. Michel, les autres deuant la porte S. Nicolas, & aucuns deuāt la porte de Haisernes: afin qu'aucuns de leurs ennemis ne faillissent sur eux: car quelque traicté qu'il y eut, n'auoient ils pas grand fiance en eux: & tantost le feu saillant de logis en lobis, faillit & print au logis du Roy & és autres par tout l'ost: & tellement & si soubdainement les esprint, que dedans le quart d'une heure ensuiuant, il conuint que le Roy, son fils Duc d'Acquitaine & tous ses Princes desordonneement se partissent & laissassent plusieurs prisonniers, & aussi de leurs gens malades, lesquels furent ars, & avec ce y demoura plusieurs engins, tentes, habillemens de guerre & grand nombre de queües de vin, qui tous ou aumoins la plusgrād partie furent periz par le feu. Et le Duc de Bourbon faisant l'auantgarde se deslogea assez ordonneement & Baudemont. Ens ouquel iour tresmatin isirent de la ville plusieurs de la garnison gens de petit estat, lesquels prindrent & rauirent ce qu'ils peurent attāindre des biens qui estoïēt en l'ost: & avec ce plusieurs marchās & autres furent par eux destrouſſez, nonobstant la deffence deuātdicte: & par especial les Bourgongnons de Bourgongne se meirent hors en grand nombre, & destrouſſerent pour ce iour plusieurs gens du Roy. Ainsi & par ceste maniere Charles Roy de France, luy departāt de deuāt Arras par Bappames s'en alla à Peronne



ronne & de là à Noyon, à Compiègne, & puis à Senlis où il sejourna luy & ses Princes tout le mois de Septembre durât. Toutresfois icelle paix & traicté faicte deuât Arras par le moyen dudit Duc de Brabant, Dame de Hainault, trois estats & deputez de par ledit de Bourgongne fut parconcluz, par la volenté & faueur de Loÿs Duc d'Acquitaine premier fils du Roy : lequel, comme dit est, auoit espousé la fille du Duc de Bourgongne, & combien que parauant, auoient par ledit Duc de Bourgongne esté soubstenues aucunes mutations à Paris du temps que fut prins le Duc de Bar & aucuns seruiteurs dudit Duc d'Acquitaine outre sa volenté, pareillement aussi luy auoient fait ceux de la partie d'Orleans: c'est à sçauoir, luy auoient osté ses seruiteurs, & fait plusieurs choses contre sa volenté & plaisir: pourquoy, il estoit tres desirant, que toutes telles besongnes feussent mises ius, affin que le Roy & luy feussent seruis & obeiz en bonne vnion des Princes & seruiteurs de leur sang & lignaige: & nonobstant que par plusieurs fois luy furent dictes & remonstrées aucunes cōclusions, qui auoient esté faictes contre le Duc de Bourgongne à Paris deuant le parlement du Roy: si respondit franchemēt à iceux qu'il feroit finer la guerre & qu'il veoit biē que par le moyen d'icelle le Roy & son Royaume estoient en voye de perdition. Et pourtant, comme dit est, se conclud au bien de paix, de laquelle la teneur s'ensuit.

*Comment le traicté de la paix d'Arras qui estoit le cinquiesme, fut leu present le Duc d'Acquitaine & plusieurs autres Princes du sang du Roy, & des sermens qui s'en firent.*

CHAP. CXXVIII.

**C**E sont les choses que le Roy a ordonné, de ce qui est en l'humilité de la partie du Duc de Bourgongne traicté par le Duc de Brabant, la dame de Hainault & les deputez des trois estats de Flandres, comme ses procureurs ayans de luy puissance. Lesquelles choses furent leutes & ordonnées en la presence du Duc d'Acquitaine & du grand conseil du Roy. Premier pource qu'en temps passé sont aduenues plusieurs pertes & dommages ou Royaume de France contre le plaisir du Roy, & de son dit fils d'Acquitaine en toute humilité, humblement supplient les dessusdits de Brabant & dame de Hainault, & lesdits deputez ou nom dudit de Bourgogne, & comme ses procureurs de luy fondez souffisamment au Roy & à son dit fils, que toutes choses où ledit Duc de Bourgongne a deffailly depuis la paix faicte à Ponthoise, où le Roy & le Duc d'Acquitaine peuuent auoir prins desplaisir, ils luy vueillent pardonner & en leur bonne grace & amour le receuoir. En outre iceux traicteurs baillerōt ou feront bailler au Roy & au Duc d'Acquitaine ou à leurs cōmis, les clefs de la ville d'Arras & de la cité: & aussi de toutes bonnes villes & forteresses ou Royaume appartenās au Duc de Bourgongne: esquelles le Roy ou son fils mettroient bailiffs, capitaines & autres officiers tels que bō leur semblera, & si longuement sans pour ce enfreindre la paix. En apres fera ledit Duc de Bourgongne deliurer au Roy ou à ses commis le chastel du Crotoy, & de fait le remettra en sa main.

Item ledit Duc de Bourgongne sera tenu d'elongner & mettre hors aucuns de sa famille, lesquels sont en l'indignation du Roy & du Duc d'Acquitaine sans plus les soubstenir en nuls de ses paÿs: & luy seront iceux declairez & baillez par escrit en temps & en lieu. Item toutes terres mises & prinſes en la main du Roy, des vassaulx, subiects & bien vueillans, alliez & fauorifans dudit Duc de



Bourgongne de quelque estat qu'ils soiēt pour l'occasion de ceste guerre, seront mises & restituées à iceux. Et aussi tous bannissemens & appellations faits à la cause deuantdicte seront mis au neant: & pareillement se ledit Duc de Bourgongne a mis ou fait mettre aucunes terres, seigneuries ou biens quelsconques en la main des subiects fauorifans & bien-vueillans, où de ceux qui ont seruy le Roy en ceste presente année de quelque estat qu'ils soient, serōt mis à plaine deliurance. Item combien que lesdits traicteurs ayent affermé au Roy & au Duc d'Acquitaine, que le dessusdit Duc de Bourgongne n'a nulle confederation ou alliance aux Anglois: neantmoins pour euter toute souspeçon, les dessusdits nommez promettront pour ledit Duc de Bourgongne, que d'oresnauant ne procedera ne fera proceder par maniere d'alliance avecques lesdits Anglois, se ce n'est par congié & licence du Roy, & de son fils Duc d'Acquitaine. Item quand à la reparation de l'honneur dudit Duc de Bourgongne, pource que plusieurs lettres ont esté faictes & en plusieurs lieux de ce royaume & dehors enuoyées: Lesquelles ledit Duc de Bourgongne dit estre à sa charge & deshonneur: est ainsi qu'apres ceste paix faicte, & que le Roy sera à Paris, disposera aucuns de son conseil avecques aucunes gēs du Duc de Bourgongne tels qui luy plaira à commettre, & aduiseront ensemble: premier saufs l'hōneur du Roy telles lettres que faire se pourront, à la descharge & reparation de l'honneur dudit Duc de Bourgongne. Item promettra ledit Duc de Bourgongne, que iamais ne fera ne procurera par luy estre fait en appert n'en couuert aucun mal, destourbier ou empeschement aux vassaux, seruiteurs, bien-vueillans officiers, & subiects du Roy, qui en ceste querelle l'ont seruy, tant en personnes comme sous autres capitaines de leur compaignie, n'aussi bourgeois de Paris, ne aux autres habitans par voye de fait, ne par aucune maniere pour l'occasion dudit seruice, empeschement ne fera ne d'estre fait ne procurera. Item le Roy veult & ordonne pour tousiours tenir ses subiects en vraye obediēce, comme ils doiuent estre tenus, que le traicté de Chartres & autres traictez qui depuis ont esté faits, soient fermement & sans corruption gardez: & que l'aucune chose y a à parfaire & reparer, que de l'un & de l'autre lez soit fait & réparé. Item pour la seurté des choses dessusdictes estre fermement tenues & accōplies par le Duc de Bourgongne, ledit Duc de Brabant, la dame de Hainault & les dessusdits deputez iureront tant en leurs nōs & propres personnes, cōme eux faisant forts des Prelats & gens d'Eglise, des nobles & des bonnes villes & tous leurs païs: c'est à sçauoir ledit Duc de Brabant, la dame de Hainault, & les dessusdits deputez iureront ou nom dudit Duc de Bourgongne, pour tout le païs de Flandres, que ledit Duc de Bourgongne tiendra fermement & gardera perpetuellement ceste bōne paix, sans desormais faire venir ou procurer par luy ou par autrui aucune chose au contraire: & ou cas que ledit Duc de Bourgongne cōmenceroit aucune chose en appert ou en couuert contre la teneur & traicté de ceste bonne paix, iceux Duc & dame ne luy feroiēt ne donroiēt aucune ayde ne cōseil de corps ne de pecune, n'en quelque maniere: veu aussi que les seigneurs du sang du Roy & autres Prelats & nobles & bonnes villes de ce Royaume, feroiēt semblable serment. Et de ce les dessusdits baillerōt bonnes lettres & cōpetentes à l'ordonnance du Roy & de son conseil: & avec ce promettent les dessusdits Duc de Brabant, dame de Hainault & les dessusdits de-

putez,



putez, qu'ils feront loyaumēt leur pouoir à faire semblablement iurer & promettre par ceux d'Arras & par les nobles, & autres qui sont dedans à tenir les choses dessusdictes : & aussi ceux qui pour le present sont en la cōpaignie dudit Duc de Bourgōgne, & es garnisons de ses villes & chasteaux d'Arthois, de Bourgōgne & de Flādres quād ils en serōt requis de par le Roy . Apres lesquelles choses dessusdictes traictées & mises par escrit , affin q̄ mieux feussent entretenues & gardées, iurerent & feirent serment les parties à loyaument & fermemēt tenir & accomplir ledit traicté. Et premier iurerent ledit Duc de Brabant, la dame de Hainault , & deputez eux faisant fort pour ledit Duc de Bourgongne bien-vueillans, alliez (cōme dit est) en apres qu'iceux eurent fait le sermēt en la presence du Duc d'Acquitaine, & de plusieurs autres Princes & grand cōseil du Roy: lequel Duc d'Acquitaine presentemēt iura & fait serment solemnel d'entretenir la paix & traicté dessusdit: & puis appella Charles Duc d'Orleans son cousin germain , en luy requerant qu'il iurast la paix : lequel d'Orleans s'enclina bien bas , en disant au Duc d'Acquitaine: Mōseigneur ie ne suis pas tenu de faire sermēt, car ie suis venu seulement pour seruir monseigneur le Roy & vous, & lors le Duc d'Acquitaine luy dit: Beau cousin nous vous priōs que iurez la paix, & adonc ledit Duc d'Orleans dit encores vne fois: Monseigneur, ie n'ay pas rōpue la paix, & ne dois point faire sermēt, plaïse vous estre cōtent. Aufquelles parolles de rechief pour la troisieme fois luy requist le Duc d'Acquitaine de ce faire: & adōc ledit Duc d'Orleans par grand courroux luy dit: Monseignr ie n'ay pas rōpue la paix, ne ceux de mō conseil, ne mon costé. Faiçtes ceux venir qui l'ont rōpue present vous faire sermēt, & apres ie feray vostre plaisir: & lors l'Archeuesque de Rheims & aucūs autres voyans le Duc d'Acquitaine nō estre content de tant de paroles, dirent au Duc d'Orleans: Monseigneur faiçtes ce que monseigneur d'Acquitaine vous requiert: leq̄l apres toutes ces choses fait serment d'entretenir la paix, ainsi que cōtre sa voulēté, & luy sembloit que le Duc de Bourgongne & ses alliez auoient rōpu la paix dernièrement faiçte à Ponthoise. En apres fut appellé le Duc de Bourbon pour faire serment: lequel cōme auoit fait le Duc d'Orleans cuida faire attargeatiō de paroles: mais incontinent le Duc d'Acquitaine luy couppa court, disant: Beau cousin nous vous priōs que n'en parlez plus: & là fait le Duc de Bourbon sermēt, & tous les autres Princes ensuiuant le feirēt pareillement, sans y mettre cōtredit : & aussi les Prelats, reserué l'Archeuesque de Sens frere de Montaigu, qui dit quand il fut appellé audit Duc d'Acquitaine. Monseignr souuiēne vous du serment que vous feistes à nous tous au partir de la ville de Paris present la Royne: Et le Duc d'Acquitaine respōdit n'en parlez plus, nous voulōs que la paix se tiēne & que vous la iurez, & iceluy Archeuesque respondit. Mōseigneur puis que c'est vostre plaisir, ie le feray. Et n'y eut plus de toute la seigneurie estant avec le Roy, qui fait reffus de iurer ladicte paix que les trois dessusdits . Et aussi (comme dit est) feirent serment ceux de la ville d'Arras : c'est à sçauoir messire Iean de Luxembourg , tous les autres capitaines & les gouuerneurs de la communauté d'icelles villes : & furent toutes ces choses faiçtes & accomplies par auāt que le Roy & ses Princes se departissent de deuāt Arras. Apres lequel departement, & que le Roy fut retourné à Senlis, cōme dit est, moururent plusieurs nobles & autres qui auoiēt esté en son armée de flux de vêtre. Entre lesquels mourut Emeniō d'Albreth, & son frere



le seigneur de Hangiers, & aucuns autres de la grād peine & trauail qu'ils auoient souffert & enduré durant ledit chemin & voyage. Ouquel temps aussi ceux de Paris oyans les nouuelles du traicté fait par le Roy & ses Princes au Duc de Bourgogne, sans les conuocquer n'appeller, de ce non contens vindrent deuers le Duc de Berry leur capitaine & gouuerneur demander comment icelle paix auoit esté faicte, & qui auoit meu le Roy & son conseil de ce faire sans les appeller: disans qu'à eux appartenoit de la sçauoir, & conuenoit qu'en icelle fussent appelez & comprins, lequel Duc de Berry leur respondit. Ce ne vous touche en riens, ne entremettre ne vous deuez de nostre sire le Roy, ne de nous qui sommes de son sang & lignage: car nous nous courrouçons l'un à l'autre quand il nous plaist: & quand il nous plaist, la paix est faicte & accordée: & adonc ceux de Paris sans riens respondre, retournerent en leurs propres lieux. Or est vray que les dessusdits Duc de Brabant, la Dame de Hainault & les deputez n'allèrent pas à Senlis au iour qui leur estoit assigné, pour la confirmation de la paix du Duc de Bourgogne leur frere. Mais par conseil enuoyerent leurs heraulx & ambassadeurs. C'est à sçauoir le Doyen de l'Eglise cathedrale de Liege, Guillaume Blondel escuyer, & plusieurs autres à comparoir pour eux & en leurs noms deuant le Roy & son conseil, pour la cause dessusdicte au iour & au lieu dessus nommé: lesquels ambassadeurs ne peurent auoir responce du grand conseil du Roy sur leurs demandes & requestes, pource que le Roy estoit malade, & pourtant s'en retournerent deuers leurs seigneurs sans riens besongner.

*Comment Sagimont de Behaingne fut en cest an esleu Roy d'Allemagne, & receut les sermens de la plus grande partie des seigneurs du pais. CHAP. CXXIX.*

**E**N la fin du mois d'Octobre Sagimont de Behaingne Roy de Hongrie, de Croace, & de Dalmace vaillant homme en armes & catholicque, & la Royne sa femme fille du Comte Cylien en Esclaue, en moult grād appareil vindrent à Aquigranie: lequel Sagimont fut premierement esleu Roy d'Allemagne par ceux d'Allemagne ordonnez ad ce. Apres ce il fut promeu en Empereur Romain, & le huiëtiesme iour du mois de Nouembre cōsacré, & couronné par l'Archeuesque de Coulongne en l'Eglise de nostre Dame d'Aquigranie comme il est de coustume, & apres deuoit estre confermé par le Pape de Romme. Apres ce, luy & sadicte femme receurent pour la plus grand partie les hommages & sermens de ceux dudit Royaume, promettans d'aller au Concille general à Constance pour le bien de toute l'Eglise vniuerselle: lequel Concille deuoit estre tenu l'an mille quatre cens & douze ou mois d'Auril par le Pape Alexandre, ou son successeur: mais il a esté prolongé iusques à maintenant. Icelle cité de Constance est en la prouince de Mayence sur l'eaüe de Rhin, & est declairé que ledit Concille ainsi prolongé, sera tenu par le Pape Iean xxiiij. de ce nom successeur dudit Alexādre. S'ensuiuent les noms des Ducs, Prelats, Comtes, Barons & autres qui furent presens à Aquigranie à la coronation dudit Roy Sagimont audit huiëtiesme iour dudit mois de Nouembre l'an mille quatre cens & quatorze. Premierement le Duc Loÿs en Bauiere, le Comte Palatin du Rhin Esli-seur du Roy d'Allemagne à estre promeu en Empereur, le Duc de Saxonne pareillement esli-seur du Roy d'Allemagne, & le Mareschal de l'Empire Burgion  
de



de Noremberghe, qui feit l'office du Marquis de Brandebourg eslieur du Roy d'Allemaigne & autres Ducs : c'est à sçauoir de Lorraine, de Gueldres, de Iullers Vvalgast & Tede Duc de Roussie, & deux Archeuesques: c'est à sçauoir de Coulongne & de Trefues, finablement eslieurs du Roy d'Allemaigne à estre promu en Empereur. Item Iean Duc en Bauiere esleu de Liege Duc de Buillon & Comte de Los. Item le conseil du Roy de Behaigne eslieur d'Allemaigne & de l'Empire, le conseil de l'Archeuesque de Mayence aussi eslieur d'Allemaigne & de l'Empire, cinq Euesques : c'est à sçauoir Visebourg de Passot, de saint Prude d'Aylac en Hongrie de la Cure, & le grand maistre de l'hospital des freres des Allemans, c'est à sçauoir de Pruces, & le Comte de Cleues. Item Acutaire fils du Marquis de Montferrant, de Meurs & de Suassebourg, le seigneur de Haudeshon, & de Ranuen. Item de Dezaine & trois Comtes de Nanssau, le Comte de Cassuelbonne & son fils, les Comtes de Haulte Pierre & de Linguenhen, & deux autres Côtes avec luy, les Comtes de Raynech & Hanyberch, de Viectem, de Mestán & deux autres Comtes avec luy de Disly, de Villestam, & de Vvide, & de Blancquehem, de Samecte, & de Viestam, sire Iean Chaule Vicomte de Millan, & le seigneur de Brimor de Bestille, le seigneur de Bauonne. S'ensuyuent ceux de Hongrie. Premierement Charles Nicolaÿ grand Comte de Hongrie, Marcial Nicolaÿ son fils Comte de Tenuise, Vvart seigneur de Strebourg gouuerneur de sept chasteaux, deux Comtes ambassadeurs de Vallane du paÿs de Seruie, Verguesiam, Vaida Siandrias, Peduricolaus, Lasque, Iacobiadis de Vaida, Lasqudany son frere, le Comte Iean de Carnassie, le Comte George de Carnassie, Penyemericus, sire Laurés de Ront de Pasto, le seigneur Tarte Nicolaÿ, sire Chychy Nicolaÿ, sire Ianus Vaida grand maistre d'hostel du Roy Sagimont, sire Bauofil de Symon, Peron Emerich, Thomas Perisij, Resguoy Estevvan nostre pan, Syvvaida Desuo Charpietre Mareschal de Hongrie. Item les Barons de Behaingne qui furent presens à ladicte coronation audit iour & lieu : premierement sire Guillaume le Haze, sire Vincelan de Douÿ. i. sire Suit de Sida, & trois Barons de son lignage avec luy, sire Gaspard de Douÿ, le seigneur d'Illebourg, le seigneur de Bleutenenon, sire Andrieu Balesqui. S'ensuyuent les barons de la basse Allemaigne, le seigneur de Haulseberch, le Damoiseau d'Ercles, sire Iean de Namur, les seigneur de Hainault, de Lembourg, Vinstghen, de Belay, de Picquebat, & deux autres Barons avec luy de Berdecte, de Yussebourg, & deux autres Barons avec luy, de Berdecte, Hanrech, de Vvysebeche, de Toncle, sire Fulco de Honnestam, Bougraine, de Raynech, les seigneurs de Holloch, de Vestrebourg, de Cônebourg, & deux autres Barons avec luy, sire Florin du Bos, les seigneurs de Horne, & Derke, sire Fucho de Coulongne Mareschal d'Absectes, sire Othe de l'Abecque, le seigneur de Zenemberghe, le seigneur de Marc. S'ensuiuent les ambassadeurs presens à ladicte coronation enuoyez d'aucuns Princes & d'autres. Premierement les ambassadeurs du Roy de Behaingne, les ambassadeurs du Roy de Angleterre, les ambassadeurs de l'Archeuesque de Mayence, les ambassadeurs du Comte de Hainault, les ambassadeurs de Posti Romaine, les ambassadeurs du Comte de Sauoye, les ambassadeurs du Duc de Brabant, les ambassadeurs du Duc de Luxembourg, les ambassadeurs de l'Abbé Stabuleuse, les ambassadeurs de la cité de Cambray, les ambassadeurs de Coulongne, les ambassadeurs de Tul-



le, les ambassadeurs de Verdun. Item l'Abbé de saint Cornille de Compiègne fut présent à ladicte coronation.

*Comment le Roy Lancelot fina sa vie, & du Roy Loïs son aduersaire, qui enuoya le Marechal de France à Naples & autres besongnes.* CHAP. CXXX.

**E**N ces iours furent apportées nouvelles de par le Roy de France, que le Roy Lancelot aduersaire du Roy Loïs de Cecille estoit trespasé, ce qui estoit verité: & fut la maniere de la mort, dudit Lancelot telle qui s'ensuit: vray est qu'il fut amoureux de la fille d'un sien medecin, laquelle estoit moult belle: & pour accomplir en icelle sa volenté, feit parler à iceluy medecin qu'il se voulsist cōsentir, que icelle feit sa volenté: mais par plusieurs fois luy refusa, en mettant plusieurs raisons contraires à sa requeste dessusdicte. Et en fin comme contrainct & non pouant estre receu ausdictes excusations, bailla son consentement & faingnit qu'il en estoit content ce qu'il n'estoit pas verité, comme il apparut assez clerement: car luy mesmes en parlant à ladicte fille, luy donnant à entendre que ceste besongne luy estoit agreable, & qu'elle voulsist vser de son conseil, pour auoir l'amour du Roy à tousiours, luy bailla vne petite boëste plaine d'oignement: & luy enhorta que quand ce viendrait à l'heure que le Roy dessusdit viendrait en sa compagnie pour la congnoistre charnellement, elle oingnist son ventre par dessus la boutine dudit oignement, laquelle doctrine retint & accomplit l'intention dessusdicte. Et pource quand le Roy vint avec elle pour accomplir son desir, & qu'il eut habité avec elle, fut assez tost apres tout esprins de feu & la fille pareillement. Et en conclusion par le moyen de ce, finerent leurs iours assez brief ensuiuant tres piteusement & à grand douleur. Apres laquelle cruauté le dessusdit medecin deuant qu'on s'en peust percevoir, se rēdit fugitif & partit du païs: apres lesquelles nouvelles venues en France, comme dit est, le dessusdit Roy Loïs feit grand assemblée pour aller au royaume de Napples, & enuoya deuant le seigneur de Longny Marechal de France à grosse compagnie. En outre le Roy de France estant à Senlis (comme dit est) fut ordonné le Duc d'Acquitaine par le Roy & son grand conseil gouverneur & dispenseur de toutes les finances du royaume de France & dudit Roy, laquelle chose moult despleut au Duc de Berry. Et pource feit assembler le Preuost des marchans, les Escheuins & bourgeois de Paris, l'Vniuersité, les seigneurs des chambres de Parlement & des comptes, en un certain lieu à Paris, & feit proposer par l'Euesque de Chartres & par autres de ses gens deuant les dessusdits, la enfermeté du Roy & la grand ieunesse de sondit fils, & consequamment la inhabilité d'iceux à gouuerner: & comment pour la prochaineté du sang royal (car il estoit fils, frere & oncle des Roys) à luy de droit deuoir en tel cas appartenir la gouuerne dudit royaume, & non à autre. Pourquoy à iceux affectueusement requeroit qu'à luy en ce voulsissent estre fauorables & ayder: lesquels respondirent qu'il n'appartenoit pas à eux à parler de ceste besongne, mais au Roy nostre sire ou à son grand conseil, ausquels il appartient ordonner de ce: pourquoy de ce se excuserent vers ledit Duc. Et à l'entrée du mois de Septembre le Roy partant de Senlis, alla à saint Denys où il fut iusques au quatorziesme iour dudit mois. Ouquel il retourna à Paris à grand honneur en son hostel de saint Pol, & son fils le Duc d'Acquitaine



d'Acquitaine avec luy. Avec le Roy estoient les Ducs d'Orleans, de Bourbon, de Bar & Loÿs Duc en Bauiere, les Comtes de Vertus, d'Allençon, de Richemont, d'Eu, d'Armignac, de la Marche, de Vendosme, de Marle, de Dampmartin & aucuns Prelats, Barons, Cheualiers & autres sans nombre: à l'encontre duquel Roy vindrent de Paris le Duc de Berry, les gens des chambres de Parlement & des comptes, les Preuost de Paris & des marchans, les Escheuins & bourgeois de Paris & habitans sans nombre, criant Noël pour la ioye du retour du Roy en Paris, faifans grans feux par les rues & quarrefourgs de toute la cité ledit iour, & la nuit ensuiuant entendans à boire & à manger & criant l'un à l'autre. Viue le Roy, viue le Roy, viue le Roy & son fils le Duc d'Acquitaine.

*Comment le Duc de Bourgongne apres le partement du Roy de deuant Arras, alla à puissance en Bourgongne, & autres besongnes qui aduindrent en ce temps.*

CHAP. CXXXI.



Pres que le Roy & ses François furent partiz de deuant Arras, comme dit est, le Duc de Bourgongne fait aller loger ses Bourgongnons ou paÿs de Cambresis & de Terrace: & alla en personne en la cité de Cambray. Auquel lieu vint deuers luy son frere le Duc de Brabant, & apres que avec luy eut eu aucun Parlement sur ses affaires, & aussi qu'il eut ordonné sur toutes ses besongnes, print son chemin à aller en Bourgongne menant avec luy messire Robinet de Mailly, maistre Eustache de Laëtre n'agues Chancelier de France, Jean Legois, maistre Jean de Troyes surgien, Denisot de Chaumont & plusieurs autres qui autresfois auoient esté bannis du royaume, ensemble leurs femmes & enfans, & ses dessusdits Bourgongnons, qui tous ensemble avec aucuns autres tant de Picardie comme d'autres paÿs pouoient estre xx. mille cheuaux ou enuiron à aller en Bourgongne, & print son chemin en Terrace où il fut logé. En apres alla à Mazieres sur Meuse en la Côté de Retels avec tout son ost. Ouquel lieu il reposa luy & les siens par petit de temps avec le Comte Philippe son frere, puis alla loger deuant Chaallons, à l'encontre duquel ceux de ladicte ville cloïrent leurs portes par la vertu d'vnes lettres du Roy enuoyées contenant, qu'iceluy & ses gens ne meïssent ou receussent en leur ville: laquelle chose despleust audit Duc de Bourgongne, car il auoit disposé de passer l'eau de Marne par ladicte cité: pourquoy alla vers Vitry, dont il fut debouté par la vertu des lettres du Roy, comme il auoit esté de Chaallons. Et en la fin s'en alla loger vers saint Disier, où il passa l'eau. Et apres ce en la vigille de Toussaincts vint à Dijon, ouquel lieu il fut receu moult honnorablement & ioyeusement comme seigneur, de tous ses subiects. Ouquel temps regnoit ou paÿs de Picardie maladie de flux de ventre, dont plusieurs tant nobles personnes comme autres moururent. En outre ledit Duc de Bourgongne à son partement de Picardie auoit congié tous ses capitaines d'icelles marches, c'est à sçauoir messire Jean de Luxembourg, les seigneurs de Croÿ, de Beau-Vergier, de Fosseux, de Ieummont, de Ront, de Beaufort, de Noyelle, de Hymbertcourt, Hector & Philippe de Saueuses, Loÿs de Vvarigines & plusieurs autres meneurs de ses gens d'armes, qui demourerent pour la garde de ses paÿs. Et d'autre partie laissa à son departement à son seul fils Philippe Comte de Charrolois le gouvernement du paÿs de Flan-



dres, seul & pour le tout iusques à son retour. Et luy venu en Bourgongne (comme dit est) feit enuahir & prendre la ville & chastel de Tonnoirre: lesquels furent pillez & ledit chastel destruit & desolé par ses gens: duquel chastel s'en estoit fuij vn peu deuant le Comte de Tonnoirre & ses gens d'armes, non ofans attendre la venue des gens du Duc de Bourgongne. Desquels estoient conduiseurs & capitaines messire Elion de Iacqueuille, Fierebourg & aucuns autres. Et tantost apres enuoya ledit Duc de Bourgongne à Paris lettres deuers le Roy, pour luy faire sçauoir la voye, pour laquelle il estoit allé de Flandres en Bourgongne, & esquels lieux il paya ses despens, & ceux où il ne les paya pas & la cause pourquoy. Et aussi luy fait sçauoir la destruction du chastel de Tonnoirre, qu'il auoit fait faire, pource que ledit Comte son vassal festoit rebellé plusieurs fois contre luy & sans cause, en luy deffiant & entreprenant sur sa terre, icelle destruisant & emmenant les proyes. Non pas qu'il voulsist aucunement enfreindre la paix faicte n'aguères deuant Arras, mais la vouloit fermement tenir, garder & entretenir. En outre ledit Duc fait assieger le Chasteau-belin, situé & assis en la Comté de Bourgogne, appartenant audit Comte de Tonnoirre: lequel chastel (nonobstant qu'il fut moult puissant & fort) fut conquis par long siege: & le donna à son fils Comte de Charrolois, en desheritant ledit Comte de Tonnoirre: lequel du viuant du Duc son pere s'escriuoit Comte de Charrolois & seigneur de Chasteau-belin. Auquel an fut mis le Concille à Constance en Allemaigne de plusieurs Cardinaulx, Patriarches, Euesques, Archeuesques & autres Prelats & ambassadeurs de plusieurs Roys & Princes Chrestiens. Et estoient lors en tresgrand diuision en l'Eglise, par Pierre de la Lune nommé le Pape Benedic, & ne vouloit ceder: nonobstant que subtraction luy estoit faicte pour plusieurs causes, de la plus grand partie de Chrestienté, & n'auoit pas obeissance, qu'en Espagne & en Arragon: auquel royaume d'Arragon il se tenoit en vne forte ville sur la mer: & aussi en cest an auoit esté prins & mené en prison en la Duché de Bauiere le Cardinal de Boulongne nommé le Pape Iean, & le print le Roy des Romains Empereur en Allemaigne pour plusieurs crimes & articles, qu'on luy mettoit sus. Et pour mettre l'Eglise en bonne paix & vraye vnion, fait tant le Roy des Romains, que ledit Concille fut mis au lieu de Constance: en laquelle ville ledit Concille se tint continuellement par l'espace de deux ans, ainçois que ceux desdits royaumes d'Espagne & d'Arragon y venissent: lesquels y vindrent en l'an mille cccc. & seize au mois d'Aoust en tresnoble & belle compagnie de Prelats & de cheualiers: & tant qu'apres leur venue, on proceda à vraye election de Pape. Et en fin fut esleu & confirmé & pontiffié le Cardinal de la Coulombe de la nation de Romme, en l'an mille cccc. & xvij. Et fut nommé Pape Martin.

*Comment le Comte Vvaleran de saint Pol alla à tout enuiron six cens combattans en la Duché de Luxembourg, & du Duc d'Acquitaine qui alla à Melun.*

## CHAP. CXXXII.

**E**N ce temps Vvaleran Comte de saint Pol soy disant encores Cōnestable de France, se partit de sa Comté de saint Pol à tout enuiron six cēs combattans hommes d'armes & archers, desquels y auoit bien soixante Anglois. Et s'en alla par sa ville de Bohain à Laon, auquel lieu luy furent fermées



mées les portes, dont il fut mal content, & se logea au dessoubs d'icelle ville : & puis de là par Rheims & par Chaalon s'en alla à Ligny en Barrois sa ville : & tantost apres le suiuit la Comtesse sa femme seur au Duc de Bar, lesquels tous ensemble solenniferent la feste de Toussaincts. Et en brief temps apres delaissant ladicte femme en son chastel de Ligny, s'en alla à Luxembourg, à Tinouuille & en aucuns autres bonnes villes en sa Duché de Luxembourg. De laquelle Duché, iceluy Comte de saint Pol estoit gouuerneur, & de la Comté de Chigny estoit commis de par le Duc Anthoine de Brabant son beau fils : lequel de Brabant estoit pour ce temps seigneur de ladicte Duché de Luxebourg & Comte de Chigny, à cause de la Duchesse sa femme. Et apres que ledit Comte de saint Pol eut visité les bonnes villes & forteresses dudit païs, se prepara enuiron la saint Andrieu pour assieger la forteresse de Neufuille sur Meuse : en laquelle estoient aucuns Haulsaires de par Iean d'Authe seigneur d'Orchimont, qui continuellement couroient & faisoient guerre en ladicte Duché de Luxembourg & Comté de Chigny. Et pourtant furent assiegez par ledit Comte, lequel auoit en sa compagnie de notables gens de guerre. C'est à sçauoir Garnot de Bournouuille, messire Collart de Fiennes, Allain de Vaudonne & plusieurs autres, toutesfois non obstant qu'iceux assiegez furent tresfort combattus par les engins dudit Comte. Et de fait leur bouleuert qu'ils auoient assiz dehors leur porte, fut prins d'assault : si ne se voulurent pas rendre, & si y fut ledit Comte bien six sepmaines. Et apres pour les affaires qu'il auoit ailleurs, fait fortifier deuant ledit chastel vne Eglise qui estoit à vn trait d'arbalestre pres : dedans laquelle Eglise laissa certain nombre de combattans, sous la conduicte d'un gentil-homme du païs nommé Vartier Disque & avecques luy vn nommé Robinet Ogier : lesquels furēt leans bien six sepmaines de iour en iour combattans & escarmouchans leursdits ennemis : en la fin duquel temps iceux assiegez se meirent en l'obeissance d'iceluy Vvaleran Comte de saint Pol. Lequel Comte (comme dit est) luy partāt de deuant Neufuille, s'en alla à Dampuillier & de là à Yvrys, où il fut tout le Karesme ensuiuant. Et son nepueu messire Iean de Luxembourg qui vn peu parauant estoit venu deuers ledit Comte au siege deuantdit. Apres qu'il eut esté avec luy l'espace d'un mois ou enuiron, prenant congé à son oncle deuantdit, lequel il ne vit oncques puis, s'en alla en Aduignon, pour aorer & veoir saint Pierre de Luxembourg son oncle jadis Cardinal. Ouquel temps le Duc d'Acquitaine partant de Paris, alla par Melun & par Montargis en Berry : & vint à Bourges la nuit de Toussaincts, où il fut grandement & solennellement receu & festoyé par les bourgeois & habitans d'icelle ville au Palais d'iceluy Duc de Berry. Et le lendemain se partit sans le sceu desdits bourgeois & alla au chastel de Meun sur Yeure, lequel luy auoit donné le Duc de Berry à Paris : & fut la cause pourquoy il alla en Berry, lequel chastel luy pleut grandement. Et en iceluy demourant print la possession, & retourna à Paris enuiron la saint Nicolas, pource que ledit d'Acquitaine se partit luy huictiesme si soubdainement, que plusieurs furent moult esmerueillez. Toutesfois assez tost apres le suiuirent les Côtes de Vertus & de Richemont, lesquels l'accompagnerent tant en allant comme en reuenant.



*Comment le Comte de Varuich & autres Anglois allerent au Concille de Constances,  
& du seruice que feit le Roy pour son frere le Duc d'Orleans.*

CHAP. CXXXIII.


**E**N ces iours le Comte de Varuich, trois Euesques, quatre Abbez & plusieurs autres nobles cheualiers & clerics, docteurs en theologie & en decret iusques au nombre de huiet cens, vindrent à Calais par Flandres, allans au concille à Constāce de par le Roy d'Angleterre & son dit royaume, & de l'vniuersité d'Axonie en moult noble appareil: lesquels furent ioyeusement receuz du Pape & Concille & du nouuel Roy d'Allemagne & de Hongrie, tenans luy fermement comme aduocat de l'Eglise Romaine: à la coronation duquel (comme dessus est faicte mention) furent presens lesdits Comtes & Euesques ambassadeurs dudit Roy d'Angleterre. Et oultre pource que le iour approchoit que la Dame de Hainault, son frere le Duc de Brabant & les deputez de par les trois estats de Flandres, deuoient aller à Senlis pour accomplir le traité de la paix du Duc de Bourgongne leur frere avec le Roy: & pource que le conseil du Roy estoit encores moult empesché pour autres certaines besongnes souruenues, Loys Duc en Bauiere, messire Collart de Caluille & aucuns autres ambassadeurs du Roy, furent enuoyez pour prolonger ledit iour deuers ladicte dame & du Duc de Brabant. En apres le samedi veille des trois Roys prochain ensuiuant, le Roy dessusdit feit faire solennellement en grand multitude de cierges & de torches l'obsequ & office de deffunct Loys jadis Duc d'Orleans son frere, en l'Eglise cathedralle de nostre dame de Paris que encores n'auoit pas esté faicte, presens le Duc d'Orleans & le Comte de Vertus, les Ducs de Berry, d'Alençon, de Bourbon & Loys Duc de Bauiere, les Comtes de Richemont, de la Marche, d'Eu & plusieurs autres tous vestus de noirs habits, excepté le Duc d'Acquitaine le fils du Roy, qui estoit party le iour de deuant à aller veoir sa mere la Roine & sa sœur la Duchesse de Bretagne à Melun. Auquel seruice prescha le Chancelier de ladicte Eglise nostre dame de Paris, nommé maistre Jean Gerson docteur en theologie moult renommé, si hault & si puissamment parfond & hardiement, que plusieurs docteurs en theologie & autres s'en esmerueillerent, en recommandant iceluy Duc deffunct, & le gouuernement de ce royaume par luy administré en son viuant estre meilleur, que celuy qui à esté depuis: auquel sermon il sembloit qu'il voulsist plus esmouuoir la guerre que l'appaiser contre le Duc de Bourgongne, en disant que pas il ne enhortoit ne conseilloit la mort dudit Duc de Bourgongne ou sa destruction: mais iceluy deuoit estre humilié, affin qu'il recogneust son peché en faisant digne satisfaction, & par consequent la saluation de son ame. En outre, dit que l'execution au Karesme dernier passé, deuant la porte de ceste Eglise de la proposition jadis de maistre Jean Petit par luy proposée ou conseil de France pour ledit Duc de Bourgongne contre le Duc d'Orleans deffunct, comme mauuaise & fausse auoit esté bien faicte, & qu'encores n'auoit on pas fait tant qu'il appartenoit. Et comme il dit, il estoit prest & appareillé de ce soustenir tout par tout & contre tous. Adonc le Roy estoit en vn oratoire empres l'autre au droit lez, non vestu de noirs habits. Apres luy estoit le Duc d'Orleans deuant tous, pour la cause dessusdicte dudit seruice de son feu pere.



re. Puis le Duc de Berry, le Comte de Vertus & plusieurs autres Princes tous par ordonnance assez escoutans ledit prescheur: là estoient deux Cardinaulx, les Archeuesques, c'est à sçauoir de Rheims & de Pise, plusieurs Euesques, & si grand multitude de clergé, de cheualerie & du peuple qu'à peine que les pouoit comprendre ladicte Eglise: apres lequel sermon les Duc d'Orleans & de Berry, le Cōte de Vertus recommanderent au Roy, ledit prescheur. Et le lundy ensuiuant ledit Roy fait faire vn pareil seruice, pour ledit d'Orleans deffunct en la chappelle des Celestins à Paris, en laquelle il fut enterré presens les dessusdits nommez. Et prescha audit lieu maistre Iean Courbecuisse docteur en theologie, en ensuiuant le propos de maistre Iean Gerson. Pareillement ledit Roy fait faire encores vn pareil seruice cōme dessus de vigilles commédasses & messes pour ledit deffunct d'Orleans, au college de Nauarre à Paris en la chappelle dudit lieu, present ses parens dessus nommez avec le Roy.

*Comment le Roy & son grand conseil enuoyerent pour destrousser les gens du Duc de Bourgogne, & des autres plusieurs besongnes qui se firent.*

CHAP. CXXXIII.

 R est vray qu'apres la destruction du chastel de Tonnoirre dessus nommé, plusieurs hommes d'armes & gens de traict, qui auoient esté à la destruction, se tenoient ensemble par maniere de compagnie bien sept mille cheuaux, & en plusieurs lieux faisoient moult de maulx és païs du Roy, tant qu'en Auxerrois comme ailleurs: pourquoy fut ordonné de par le Roy & son conseil le seigneur de Gaucourt, messire Gasselin du Bois & plusieurs autres, pour iceux combattre & subiuguer: lesquels gens & maniere de compagnie, furent poursuiuis par les dessusdits vigoureuement. Et en la fin en y eut bien deux ou trois cens morts & prins: lesquels prins furent menez à Paris & mis en Chastellet, & depuis en y eut d'executez: mais parauant le Roy paya leur finance à ceux qui prins les auoient. Et estoient conduiseurs des dessusdites compagnies Iacqueuille, Fierebourg & aucuns autres: lesquels sçachans l'assemblée des gens du Roy venans sur eux, se retrahirent vers le païs de Bourgogne. En apres messire Ieninet de Pois nepueu de messire Iacques de Chastillon seigneur de Dampierre & Admiral de France, allant deuers le Duc de Bourgogne à tout deux cens combattans ou enuiron, fut rué ius & destroussé de tous points, que oncques de sa compagnie n'en eschappa qu'vn seul homme, lequel se nommoit Tambullam, & se sauua par fuitte, & tous les autres (comme dit est) furent morts & prins: de laquelle destroussé moult despleut au Duc de Bourgogne: & pareillement Hector de Saueuses, qui auoit fort guerroyé les gens du Roy deuant Arras fut prins en faisant le pelerinage de Liance par les gens du Roy & mené à Paris. Et de fait se n'eust esté par le pourchats & priere de la dame de Hainault, eust esté executé. Et aussi que Philippe de Saueuses son frere print prisonnier Henry de Boissy seigneur de Chaulle, & Eustace Dayne seigneur de Sarton: lesquels deux auoient de leurs prochains amis au conseil du Roy, qui firent grand diligence dudit Hector, affin que leurs amis dessusdits fussent deliurez, & par ces moyens fut iceluy Hector mis à plaine deliurance: pour lesquelles besongnes & plusieurs autres, nonobstant la paix de deuant Arras, si auoit il peu de seureté &



d'amour : car la partie d'Orleans se tenoit deuers le Roy & le Duc d'Acquitaine, pourquoy ceux de la partie de Bourgogne, & tous ses fauorisans n'auoient quelque accez ne gouuernement deuers le Roy, ainçois estoient traictez à rigueur de iustice tresdurement. Et en pareil cas ledit Duc de Bourgogne trefrigoureusement traictoit & souffroit estre traicté ceux de la partie d'Orleans, qui luy auoient esté contraires la guerre durant. Neantmoins tellement quellement fut la par-traictee paix : durant lequel temps la dame de Hainault à tout grand & noble compagnie par Vermandois, par Noyon & par Compiengne vint à Senlis: avec laquelle vindrent les deputez de trois estats de Flandres moult noblement. Et apres vindrent le Duc de Brabant, & le conseil du Duc de Bourgogne: c'est à sçauoir l'Euesque de Tournay le seigneur de Ront, messire Guillaume Bouuier gouuerneur d'Arras, maistre Thierry le Roy, & aucuns autres qui apres la requeste du conseil du Roy, allerent à Paris, pour plus conuenablement traicter, excepté ladiète dame de Hainault: à laquelle son seigneur & mary auoit deffendu & mandede par lettres, qu'elle & ses gés de son hostel n'allassent auant de Senlis: ouquel lieu elle fut honnorablement receüe par le Duc d'Acquitaine dessusdit accompagné du Duc de Berry, lesquels vindrent à Paris à l'encontre d'elle. Et apres fut visitée des autres Princes du sang royal. Et mesmement de la Duchesse de Bourbon, laquelle vint de Clermont à Senlis par l'accord de son mary, pour icelle festoyer: & demoura avecques luy tousiours iusques au retour d'icelle.

*Comment les ambassadeurs d'Angleterre vindrent à Paris, où le Roy tint grand feste, & de la paix qui fut lors parconfermée du tout.* CHAP. CXXXV.

**E**N ces propres iours vindrent à Paris le Comte d'Ourset, oncle du Roy d'Angleterre : & avec luy le Comte de Grez l'Admiral d'Angleterre, les Euesques du Dumelin & de Noruegue, & plusieurs autres iusques au nombre de six cens cheuaux ou enuiron tous ambassadeurs, pour traicter le mariage de la fille du Roy de France & dudit Roy d'Angleterre : lesquels ambassadeurs venus audit lieu de Paris, furent logez en l'hostel du Temple eux maintenant si pompeusement tant en cheuauchant par la ville, comme en tous leurs autres affaires, que les François & Parisiens en auoient grans merueilles. En apres le dixiesme iour de Feurier le Roy de France fait vne moult notable feste dedans Paris en boyres, mangers, ioustes, dances & autres esbatemens à laquelle furent lesdits ambassadeurs d'Angleterre. Et iousta le Roy ce iour contre le Duc d'Allençon, qui nouuellement auoit esté fait Duc par le Roy dessusdit. Et le Duc de Brabant iousta pareillement contre le Duc de Orleans moult cordialement, & dura ladiète feste par trois iours: en laquelle les seigneurs du sang royal se maintindrent l'un avec l'autre moult doucement, & honnorablement: ausquels ioustes estoient pour les regarder la Roynes de France, la Duchesse d'Acquitaine & plusieurs autres nobles dames & damoiselles. En outre le xxiiij. iour du mois de Feurier, apres que plusieurs parlemens eurent esté faits par le cōseil du Roy de France avec le Duc de Brabant, la dame de Hainault, & autres des gens du Duc de Bourgogne tant à Paris comme à Senlis. Finablement la paix fut conclue & criée dedans ladiète ville de Paris au son de la trompette, selon le contenu des lettres royaux, dont la teneur s'enfuit.

Charles



CHARLES par la grace de Dieu Roy de France à tous presens & aduenir. Comme plusieurs choses ayent esté faictes, & sont aduenues depuis la paix faicte à Ponthoise à la tresgrand desplaisance & dommage de nous & de nostre Royaume & subiects: pour lesquelles causes nous auions nostre trescher & tresamé cousin le Duc de Bourgongne en nostre indignation & malegrace, n'agueres nous transportasmes avec tresgrand compagnie & congregation de gens d'armes, & de traict deuant la ville d'Arras. Et à nous là estans, vindrent deuers nous noz treschers & tresaméz cousin & cousine le Duc de Brabant, & la Duchesse de Hainault. Et en leurs compagnies noz treschers & bien amez les deputez de par les trois estats du pays de Flandres: lesquels comme procureurs & ayans puissance de nostredit cousin de Bourgongne en grand reuerence & humilité, à nous feirent obeissance pour nostredit cousin de Bourgongne, telle que nous sommes de ce bien contens. Et en signe & demonstration d'icelle obeissance, ils nous feirent faire ouuerture de ladicte ville d'Arras, & sur les murs d'icelle furent mises noz bannieres: & aussi à nous feirent obeissance des autres villes & chasteaulx, que nostredit cousin tenoit & tient de nous, & d'abondance iceluy receusmes en nostre bonne grace & amour. Et en apres nosdits cousin & cousine & deputez dessus nommez, promeirent & accorderent pour nostredit cousin de Bourgongne à nous estre baillé & rendu, ou à nostre commis le chastel du Crotoy, & iceluy remettre ou faire remettre reallement & de fait en nostre main, & feroient leurs pouoirs loyalement que le chasteau de Chinon soit aussi remis en nostre main. Et avec ce pour le bien de paix plusieurs choses furent pourparlées & appointées. Par le moyen desquelles nous partismes, & feismes partir nostredit ost de deuant la dessusdicte ville d'Arras. Et depuis pour la perfection & accomplissement des choses promises, vindrent deuers nous nosdits cousins de Brabant & cousine de Hainault ambassadeurs de nostredit cousin de Bourgongne, & les deputez des trois estats de Flandres. Avec lesquels en la presence de nostre trescher & tresamé fils aîné le Duc d'Acquitaine Daulphin de Vienne, à ce faire de par nous commis, pour les choses estre mises à bonne fin, appointement fut fait. Nous faisons sçauoir que nous ayans pitié & compassion des grans oppressions, perditions & dommages, lesquels au temps passé a eu & soustenu nostre peuple, pour l'occasion des guerres & armes faictes en nostre royaume, vueillans releuer, garder & preseruer noz subiects d'icelle oppressions, & desirans de tout nostre cueur & ferme propos & volenté, faire cesser toutes voyes de fait, ce que dorefnauant bon accord & vnion soient entre nosdits subiects, tellement que iceux noz subiects se puissent retraire & seurement demourer chacun en son lieu & habitation, & viure soubs nous & nostre domination en bonne tranquillité soubs la confidence de bonne iustice, que les laboureurs puissent faire leurs labours, & tous marchans & autres gens puissent aller & mener leurs marchandises & autres biens, où il leur plaira par tout nostre Royaume, & dehors sans peril ou empeschement aucun: considerans le bien de paix, qui est inestimable, & les grans mauix qui s'en sont ensuiui par les guerres: comme n'agueres par experience, & de fait a esté assez veu & congneu & encores pourroient ensuiuir. Et affin que toutes creatures ayent & puissent auoir meilleur & plus ferme propos d'eux amender & retourner à nostre createur, de nostre certaine science,



plaine puissance & auctorité Royal, par l'aduis, conseil & meure deliberation de nostre ainzné fils, de plusieurs de nostre sang & lignage, de Prelats, Barons & cheualiers de nostre grand conseil; de nostre Court de Parlement, de nostre chambre des comptes & autres notables personnes en grand nombre. Nous auons voulu, auons fait, ordonné & commandé, voulons, faisons, ordonnons & commandons paix estre ferme & estable en nostredit Royaume entre noz subiects, & que cessent r'ancunes & maliuolences: deffendant à tous de quelque estat, auctorité ou condition qu'ils soient, sur tout ce qu'ils peuuent forfaire enuers nous, que doresnauant ils ne se mettent en armes ne procedent par voye de fait ou de guerre. Et à nourrir, entretenir ladicte paix, pour l'honneur & reuerence de Dieu, vueillans à rigueur de iustice preferer misericorde: auons fait, donné & octroyé & de nostre dessusdicte plaine puissance & auctorité Royale, faisons, donnons & octroyons abolition generale à tous tant de nostre dessusdicte Royaume & domination, comme aux estrangers de quelque estat, auctorité ou condition qu'ils soient, sur tout ce qu'ils peuuent auoir aydé, seruy & donné faueur à nostredit cousin de Bourgongne à nostre desplaisance & contre nostre volenté, & depuis la paix faicte à Ponthoise iusques auourd'huy. Excepté cinq cens personnes non nobles de nostredit Royaume, qui ne sont pas subiects vassalz ou seruiteurs de nostredit cousin de Bourgongne: desquelles cinq cens personnes les noms seront baillez par escrit à noz cousin de Brabant, & nostre cousine de Hainault dedans la feste de la Natiuité saint Iean Baptiste prochain venant. Excepté aussi iceux qui par nostre iustice ont esté nommément banniz, depuis ledit temps par proces deuement faiz, obserué & gardé les solemnitez en tels cas accoustumées. Lesquelles cinq cens personnes ne seront aucunement comprins en ladicte abolition. Et pour mieux tousiours garder ladicte paix & toutes les manieres des entreprinſes, débats, diuisions & seditions escheuer: Nous auons voulu & ordonné, voulons & ordonnons & nous plaist, que tous ceux depuis ladicte paix de Ponthoise, qui des hostels de nostre treschere & tresamée compaigne la Roynie & de nostredit fils eslongnez, ont esté de leursdits hostels & nostre ville de Paris iusques à deux ans prochains venans demoureront eslongnez: & que ceux qui ont esté eslongnez de nostredit ville de Paris & des autres, dont ils se sont absentez iusques au terme de deux ans. Et que aucuns d'iceux ne pourront approcher nostredit ville de Paris plus pres que de quatre à cinq lieües, reserué tousdis à nostre ordonnance & bonne grace sur ce Et neantmoins il nous plaist & voulós que lesdits eslongnez puissent aller, venir & conuerſer tout par tout où il leur plaira en nostredit Royaume les deux ans durans: toutesfois dehors nostredit ville de Paris & hors des autres lieux & villes, dont ils se sont & ont esté eslongnez, sans ce que pour ladicte occasion de ladicte eslongation aucun empeschement soit à eux ou puist estre aucunement fait en corps ou en biens. Et de rechef à tenir nosdits subiects en bonne paix, & obuier aux inconueniens qui par les débats des offices au temps passé sont aduenues, & encores pourroient aduenir. Nous auons voulu & ordonné, voulons & ordonnons, que toutes les offices par nous données depuis ladicte paix de Ponthoise demoureront en nostre plaine disposition & volenté, sans ce que pour la cause de ladicte abolition ceux qui ont esté despointez de leursdictes offices de-

puis



puis ledit temps, y puissent pretendre aucun droit ou proclamer. Et quant aux prisonniers nous leur ferons faire raison & iustice, & ne voulons pas qu'aucun seigneur, Baron, cheualier, escuyer ou autres quelsconques pour cause de seruice par eux non fait à nous ou par cause de seruice fait par eux à nostredit cousin de Bourgongne: ou ceux aussi qui sont comprins en ladicte abolition, pour l'occasion de ce que dit est, soient ou puissent estre aucunement greuez, molestez ou empeschez en corps ou en biens. Mais voulons que toutes dominations, terres, fiefs, possessions & heritages quelsconques des dessusdits autres, que desdits banniz: excepté celles qui pour les causes dessusdictes ont esté prinſes & mises en nostre main, leur soient rendues & mises à deliurance, & que tous les autres troubles & empeschemens que pource à iceux ont esté mis ou pourroient estre de ce, soient ostez hastiuement, & sans demeure au prouffit d'iceux & de chacun d'eux en tant qu'il nous touche. Et sur ce nous imposons & mettons à nostre Procureur silence, nonobstant que les cas ne soient pas cy exprimez. Et encores à oster toutes les matieres de discorde & debats, qui par proces ou autrement pourroient aduenir pour l'occasion des biens meubles d'une partie & d'autre, pris depuis la paix de Ponthoise par iustice, ou autrement pour l'occasion de la guerre, on ne pourra pas de ce faire demande ou prosecution d'une partie & de l'autre. En outre voulons, ordonnons & deffendons à nostredit cousin de Bourgongne, que deormais en auant ne face, ne procure estre fait par luy ne par autrui en secret, ou en appert par voye de fait ou autrement aucun mal, destourbier ou empeschement à mesdits loyaux vassaulx, officiers, subiects & bienvueillans, ne à aucuns de ses subiects loyaux, & vassaulx & des autres de nostre sang & lignage, qui ont seruy à nous contre luy, ne à aucun de seldits subiects loyaux & vassaux, qui ne l'ont pas seruy pour la cremeur de mesprendre ou forfaire, pour les inhibitions par nous sur ce faictes: ne aux habitans de nostredicte ville de Paris, ou autres quelsconques de nostre Royaume ou dehors en commun ou en particulier, ou autrement par quelque maniere que ce soit pour l'occasion du seruice à nous fait ou de seruice à luy non fait par lesdits siens vassaux ou subiects pour les causes dessusdictes. Et en tant que nostredit cousin de Bourgongne feroit, & s'en forceroit de faire ou faire faire à seldits vassaux & subiects le contraire, nous luy interdisons & deffendons toute auctorité, iurisdiction & cognoissance. Voulons aussi, ordonnons & deffendons à tous autres dessusdits de nostre sang & lignage, qu'ils ne facent ou procurēt estre fait par eux ne par autrui en secret, ou en appert aucun mal, destourbier ou empeschement à nosdits fiefuez, vassaulx, subiects & bienvueillās, ne à aucuns des officiers fiefuez, subiects vassaux de nostredit cousin de Bourgongne, aux habitās de nostredicte ville de Paris ne à autres villes quelsconques de nostredit Royaume, ou dehors en cōmun & particulier par voye de fait ou autremēt pour l'occasion du seruice dessusdit par eux fait à nostredit cousin de Bourgongne, ou du seruice à eux non fait par leursdits subiects, fiefuez & vassaux: & en tant que les dessusdits de nostre sang & lignage feroient ou de faire s'enforceroient, ou faire faire le contraire à leursdits fiefuez, vassaulx & subiects: nous leur entredisons & deffendons toute auctorité, iurisdiction & cognoissance. Et avec ce voulons, ordonnōs & cōmandons à nostredit cousin de Bourgongne, qu'il rende ou face rendre reallement & de fait aux seigneurs, Barons, cheualiers,



escuyers & autres tant de nostredit Royaume que dehors soient de noz subiects, fiefuez, vassaulx, ou des siens toutes leurs dominations, fiefs, possessions & heritages quelsconques, qu'il a prins ou mis, ou fait prendre & mettre en sa main, pour l'occasion dudit seruice à nous fait, ou de seruice à luy non fait, ou autrement pour l'occasion des choses dessusdictes : & de ce liéue ladicte main & face leuer à plain, oste ou face oster & leuer sans delay tous destourbiers ou empeschemens quelsconques à leur prouffit, à & chacun d'iceux en tant qu'il leur peut toucher. Voulons aussi, ordonnons & commandons aux autres dessusdits de nostre sang, qu'ils rendent ou facent rendre aux seigneurs, barons, cheualiers, escuyers & autres gens tant de nostredit Royaume comme dehors, soient de noz fiefuez & vassaulx ou des leurs leurs, toutes leurs dominations, terres, fiefs, possessions & heritages quelsconques, l'aucuns en ont prins & meis ou fait prendre & mettre en leurs mains, pour l'occasion du seruice fait à nostredit cousin de Bourgongne, ou autrement pour l'occasion des choses dessusdictes : & d'iceux lieuent & ostent ou facent oster & leuer à plain leursdictes mains, & ostent ou facent oster sans delay tous troubles & empeschemens quelsconques au profit d'iceux, & de chacun entant qu'il leur touche. Et affin que ladicte paix se perseuerer dorenavant perdurablement ferme & estable sans violer, & à pourueoir à ce qui pourroit estre cause de rompre ladicte paix outre les choses dessusdictes. Auons voulu & ordonné, voulons & ordonnons que tous les traictez de paix faits à Chartres, & les autres qui ont esté faits depuis soient tenuz & paraccomplis. Et avecques ce auons deffendu & deffendons à nostre cousin de Bourgongne & autres de nostre sang & lignaige, & à tous autres noz subiects, qu'ils ne facent aucunes alliances avecques les Anglois par quelconque maniere, ne aussi avecques autres quelsconques au preiudice de nous & de ladicte paix : & auons enioingt & enioignons à iceux, & bien expressement commandons que se dés maintenant aucunes en auoient faictes, ils les rendent & baillent à ceux, à qui ils les ont faits : & que chacun d'iceux nous baillent lettres telles qu'il appartiendra. En outre nous auons voulu & ordonné, voulons & ordonnons à plus grand seurte de la dessusdicté paix, que nostredit cousin de Brabât, les ambassadeurs de nostredit cousin de Bourgongne, les deputez des trois estats du païs de Flâdres dessus nommez, ou nom comme procureurs de nostredit cousin de Bourgongne, & en leur noms priuez : & iceux deputez ou nom, & eux faisans fors des gens des trois estats du païs de Flandres, & iceluy nostre cousin de Bourgongne en sa personne. Noz treschiers & trefaymez fils & cousins les Comtes de Charrolois & de Neuers, les gens des trois estats de la Duché de Bourgongne & Comtez de Flandres & d'Arthois, & chacun d'iceux iurent & promettét : c'est à sçauoir ceux qui cy sont presens en noz mains, & les absens és mains de noz cōmis & deputez, & ce par leur foy & sermēt, sur la croix & saintes euangiles de Dieu, que bien & loyalement ils tiendront & garderont sans violer, & seront tenuz de garder de tout leur pouuoir ladicte paix, & toutes les choses cy dessus declairées. Et ne feront faire par eux, ou par autres par voye directe ou oblique, appertement ou secrettement, par parolles ou escrits, ou autre par quelconque maniere que ce soit aucune chose contre ladicte paix au preiudice d'icelle, ou d'aucunes choses dessusdictes sur peine d'encourir en nostre indignation, & de tant qu'ils se peu-

uent



uent forfaire enuers nous . Et fil aduenoit ( que Dieu ne vueille ) qu'aucuns d'iceux, fut seigneur ou autres, se fait ou forfaitist de faire ou entreprendre, ou attempter aucune chose au contraire, ils ne luy donront ayde, conseil, soulas ou faueur de corps, finances de gens, ou autrement par quelque maniere : mais empeschent iceluy de tout leur pouuoir . Et lesdits sermens & promesses les dessusdits & chacun d'eux, qui sur ce de par nous seront requis sans dilation ou difficulté aucune, bailleront leurs lettres competentes & bonnes, sceellées de leurs seaux: lesquelles, affin de bonne memoire, seront mises & gardées en nostre tresor. Et semblables sermens & promesses, & sur lesdictes peines seront noz treschiers & tresaymez cousins, oncle, fils & nepueux, le Cardinal de Bar, le Roy de Cecille, les Ducs de Berry, de Tours, d'Orleans, de Bretagne, de Bourbon, d'Alençon, & de Bar, les Comtes de Vertus, d'Eu, de Richemont, de Dreux Connestable de France, de la Marche, de Vendosme grand maistre d'hostel de Marle, le Bouteillier de France, d'Armignac, de saint Pol, de Ponthievre & de Tancarville: & tous les autres de nostre sang & lignaige, & aussi les gens des trois estats de leurs pays. C'est à sçauoir les presens en noz mains, & les absens es mains de noz commis à ce, & de ce bailleront leurs lettres sous leurs seaux: lesquelles aussi seront mises en nostre tresor, affin de bonne memoire perdurable . Et avec ce feront les dessusdits sermens & promesses sur les peines dessusdictes deuant nosdits commis, & à ce deputez tous les prelates, cheualiers, barons, capitaines, baillifs, seneschaulx, preuosts & autres officiers tous noz fiefuez, vassaulx, bones villes & subiects pour moyen & sans moyen : & autres gens de tous estats tant nobles que non nobles, & tant d'Eglise cōme seculiers, & de ce bailleront leurs lettres sous leurs seaux: lesquelles semblablement seront mises & gardées en nostredit tresor. Et en outre bailleront iceux nostre cousin de Bourgogne, & tous autres dessus nommez de nostre sang, leurs lettres adressans à leurs subiects, fiefuez & vassaulx, pour faire les sermens par la maniere que dit est: & encores à plus grand seurté nosdits cousin de Brabant, dame de Hainault & les dessus nommez avec nous, feront tout leur loyal pouuoir, pareillement de faire promettre & iurer par noz treschiers & tresaymez cousins le Duc Guillaume de Bauiere Comte de Hainault, le Duc de Lorraine, le Comte de Sauoye, l'Euesque de Liege, le Comte de Namur & autres qui seront aduisez. Et en outre nous auons voulu & ordonné, voulons & ordonnons, que s'aucuns excès ou temptations estoient dorefnauant faits contre ladicte paix, que pour ce ladicte paix ne sera aucunement rompue: mais la partie blessée pourra demāder iustice de tout ce qu'on luy aura mesfait, & de tout ce reparation luy sera faicte par raison telle qu'il appartiendra . Si donnons en mandemēt à noz chiers & loyaux, au Connestable, au Chancelier, aux gens tenās, & qui tenront nostre Parlement, aux Mareschaulx, au maistre des arbalestriers, à l'Admiral, au Preuost de Paris, à tous noz seneschaulx, baillifs, preuosts, capitaines, majeurs, escheuins, & à tous noz autres officiers & subiects, ou à leurs lieutenans & à vn chacun d'eux cōme à iceux appartiendra, qu'ils gardent, facent garder, entretenir & paraccomplir les choses dessusdictes & chacune d'icelles sans faire ou souffrir, estre fait & attempté . Au contraire que s'aucun le faisoit ou s'efforçoit de le faire ou attempter de fait, d'escrit, ou de parolles ou autrement, qu'on sentist reprobation pour l'occasiō des choses passées, qu'iceux



griefuement sans deport comme perturbours de paix & crimineux de leze majesté punissent, tellement que ce soit exemple à tous les autres : & facent ces presentes publier és lieux publicques & accoustumez à faire publications en leurs pouuoir & iurisdiction, affin que nuls de ce vueille ou puisse pretendre ignorance, en enioignant & commandant à tous que s'ils sçauent aucun de quelque estat qu'il soit qui die ou profere parolles en public, ou autrement contre l'honneur des dessusdits de nostre sang & lignaige die ou face aucunes choses contre ladicte paix qu'ils denoncent à iustice, à faire deüe punition sur peine d'estre puniz, comme seroit ledit parleur ou principal faiseur : ou d'autre griefue peine selon l'exigence du cas, comme transgresseurs de noz ordonnances & cōmandemens. Et affin que ce soit ferme & estable pardurablement, nous auons fait mettre à ces presentes nostre seal. Donné à Paris ou mois de Feurier l'an de grace mille cccc. & xiiij. & de nostre regne le xxxv. Ainsi signées par le Roy & son grand conseil. Estienne Mauregard. Et comme icelle paix auoit esté criée en la ville de Paris, le fut pareillement en diuers lieux du Royaume de France.

*Comment trois Portugalois firent armes present le Roy de France contre trois François, Lesquels Portugalois furent vaincuz par leur aduersé partie.*

CHAP. CXXXVI.



Tem en ces iours fut fait à S. Audon l'hostel du Roy dehors Paris un champ de trois Portugalois: c'est à sçauoir le premier le seigneur d'Allenron: Le second messire Jean Coufaille cheualier, & le tiers messire Pierre Coufaille contre trois François: dont le premier estoit nommé messire François de Grignaulx, & le second Marigon, & le tiers le Rocque. Si furent amenez premier au champ les trois Portugalois, pource qu'ils estoient appellés de par le Comte d'Urfet oncle du Roy d'Angleterre, & les autres seigneurs Anglois: & les François amenerent messire Clugnet de Brabant Admiral & Jean frere au Duc de Bar, avec plusieurs autres. Et lors apres que les cris furent faits de par le Roy en la maniere accoustumée, vindrent ensemble & commencerent à combattre l'un contre l'autre moult asprement: mais en la fin iceux Portugalois se rendirent vaincuz aux François, pour doubte qu'ils ne fussent occis, dont les Anglois qui les auoient mis ou champ eurent grand indignation & desplaisance: & adonc iceux par l'ordonnance du Roy & de son conseil, furent les premiers mis hors du champ, & les dessusdits François apres furent remenez moult honorablement ayans grād ließe de leur victoire. En outre apres toutes ces besongnes la dame de Hainault, & toute sa cōpaignie se partit de Senlis, & retourna en son païs deuers son seigneur & mary le Duc Guillaume: & pareillement se partirent les Anglois apres qu'ils eurent esté grandement festoyez & honnorez du Roy & de ses Princes, & aussi qu'ils eurent receu plusieurs dons: toutefois ils ne besongnerent riens de ce, pourquoy ils estoient venus: c'est à sçauoir pour le mariage de leur Roy à la fille du Roy de France, pource qu'ils faisoient demādes trop excessiues: comme la Duché de Normandie, & la Comté de Ponthieu avec la Duché d'Aquitaine à en iouyr heritablement à tousiours: & leur fut respondu que le Roy enuoyeroit ses ambassadeurs en Angleterre deuers leur Roy, pour faire responce finalle sur les requestes qu'ils auoient faictes.

*Comment*



*Comment la paix d'Arras fut iurée solennellement en la presence du Roy: & depuis le fut pareillement en diuers autres lieux & pais.*

## CHAP. CXXXVII.

**L**E treiziesme iour de Mars ensuiuant le Duc de Brabant, l'Euesque de Tournay, le seigneur de Ront, sire Guillaume Bouuier cheualier gouverneur d'Arras conseiller & ambassadeur du Duc de Bourgongne, & les deputez par les trois estats du païs de Flandres procureurs, & ayans puissance en ceste partie dudit Duc de Bourgongne, iurerent tous ou nom dudit Duc, & pour luy, en la presence du Roy par leurs foy & serment de leurs corps, sur la vraye croix & saintes euangilles de Dieu, & pareillement ledit Duc de Brabant, lesdits ambassadeurs du deuantdit Duc de Bourgongne, les ambassadeurs de la dame de Hainault & les dessusdits deputez iurerent lesdits sermens en leurs noms priuez: & ainsi iurerent les Ducs de Berry, d'Orleans, d'Alençon, de Bourbon: Les Comtes d'Eu, de Vendosme grand maistre d'hostel, le seigneur de Prayaux, le Chancelier de France, les Archeuesques de Sens, de Bourges, de Rouen, les Euesques de Laon, de Lisieux, de Paris, de Chartres, le Chancelier d'Aquitaine, le Comte de Tancarville & plusieurs autres du grand conseil du Roy present. Et de Mauregard. En apres furent enuoyez de Paris les commissaires du Roy: c'est à sçauoir le maistre des arbalestriers de France, Sire de Rábures, & maistre Iean de Vailly President en Parlement, & vindrent à Tournay oudit mois de Mars. Auquel lieu vindrent pareillemēt lesdits Ducs de Brabant, & dame de Hainault, Philippe de Bourgongne Comte de Charrolois, les nobles prelatz avec ceux de Gand, & autres bonnes villes de la Comté de Flandres des appartenances & enclauemens. Et là apres la lecture & publicatiō desdictes lettres du Roy, iceux Comtes de Charrolois & tous les autres dessusdits dirent, & iurerent les sermens dessus nommez es mains desdits commissaires en la presence desdits Ducs de Brabant, & dame de Hainault: & promeirent à tenir ladicte paix, & contenu desdictes lettres royaux par la forme, qu'il a pleu au Roy à ordonner & commander entant qu'il leur touche. Semblablement iurerent le clergie & les nobles gens de Tournay & du païs en baillant tous leurs lettres comme auoient fait tous lesdits de Charrolois & de Flandres ausdits commissaires, à porter à maistre Estienne de Mauregard garde des chartres du Roy à Paris seellées de leurs seaulx. Apres en la sepmaine peneuse par ledit seigneur de Charrolois, furent conuocquez à Arras par lettres les prelatz, colleges, & les autres nobles & bonnes villes de toute la Comté d'Arthois, avec les ressors & enclauemens d'icelles: lesquels tous iurerent & baillerent leurs lettres ausdits commissaires, comme auoient les autres à Tournay: & depuis furent enuoyez de par le Roy en Bourgongne lesdits commissaires, pour receuoir lesdits sermens dudit Duc de Bourgongne & des trois estats de ladicte Duché, avecques les enclauemens & appartenances d'icelle: lesdits commissaires estoient le seigneur de Tynouuille, & maistre Symon de Nanterre President en Parlement: lesquels iurerent tous les sermens contenus esdictes lettres royaux, & promeirent à tenir cōme auoient promis les autres dessus nommez, en baillant leurs lettres & enuoyant audit garde chartres du Roy à Paris. Toutesfois ledit Duc de Bourgongne ne voulut



pas iurer, & dit qu'il parleroit au Roy & au Duc d'Acquitaine son fils, ainçois qu'il iurast ladicte paix pour certaines causes qui à ce les mouuoient.

*Pour l'an mille cccc. & xv.*

*Comment ceux de la communauté de la ville d'Amiens furent assemblez pour iurer & entretenir ladicte paix d'Arras : Et pareillement les gens d'Eglise.*

CHAP. CXXXVIII.

**A**V commencement de cest an ceux de la ville d'Amiens escrirent telles lettres. Le majeur, escheuins & communauté d'Amiens faisons sçauoir, que le dixhuiëtiesme iour du mois d'Auril l'an mille quatre cens & quinze par le commād de maistre Iean de Vailly President en Parlement, commissaire en ceste partie du Roy nostre sire, nous & tout le peuple d'icelle ville d'Amiens conuocquez & appelez d'hostel en hostel, & au son de la cloche à comparoir en la place du Marché de ladicte ville: & present nous & toute la communauté ou la plus grand & plus saine partie de la ville, iceluy President fait lire & publier certaines lettres royaux dōt la teneur estoit telle.

CHARLES par la grace de Dieu Roy de France, comme dessus: lesquelles leustes & publiées, nous & tout le peuple assemblez audit lieu: feismes, iurames & promeismes sur la croix & saintes euangilles de Dieu: & encores par ces presentes iurons & promettons les sermens contenuz & declairez és lettres dessus escrites, tenir & garder la paix & le contenu de ladicte ordonnance à nostre loyal pouuoir entant qu'il nous touche, tout ainsi par la forme & maniere que le Roy nostre sire par sesdictes lettres l'a voulu ordonner & commander, en tesmoing de ce nous auōs mis à ces presentes le seel de ladicte communauté de la ville d'Amiens. Donné l'an & iour dessusdit: & sur la substance desdictes lettres, furēt lettres faictes & par deux Notaires Apostolicques, qui certifierent ladicte ordonnance auoir esté publiée & les colleges auoir esté assemblez au chapitre nostre Dame d'Amiens, c'est à sçauoir tels & tels: & furent lettres seellées du seel de l'Euesque d'Amiens, du seel de chapitre, & des seaulx des autres chapitres & colleges: lesquelles lettres furent baillées au Baillif d'Amiens à porter à Paris à maistre Estienne de Mauregard garde des chartres du Roy dessus nommé: & avec ce le Baillif fait publier és mettes de son bailliage hors les terres du Duc de Bourgogne ladicte ordonnance: esquels lieux le mandement du Roy auoit esté publié, & executé: & fait sermens faire contenuz en ladicte ordonnance par les gens de tous estats en chacune chastellenie de fondit bailliage: & de ce fait faire lettres seellées du seel royal, & des seaulx des prelatz, colleges, nobles à banier ou cheualiers notables, & en icelles parolles iceluy mesmes Baillif. Et ainsi fut fait adonc par tous les bailliages, & seneschaulcées de tout ce royaume: & furent ladicte paix & ordonnāces proclamées en tous les lieux accoustumez à faire proclamations & publications: & apres ce par lesdits commissaires furent demandées lettres du clergié, nobles & bonnes villes, & portées à Paris comme dessus est declairé des autres.

*Comment*



*Comment Vvalleran Comte de saint Pol trespassa à Yvvis en la Comté de Chigny :  
des seigneurs du sang royal, & du Duc d'Acquitaine qui partit de Melun.*

## CHAP. CXXXIX.

**L**E neufiesme iour d'Auril en l'an dessusdit mille quatre cens & quinze Vvalleran Comte de S. Pol & de Ligny, soy disant encores Connestable de France, accoucha malade dedans le chastel d'Yvvis en la Comté de Chigny: & la cause de sa maladie comme il fut commune renommée, fut pource que son medecin luy bailla vn clistere trop fort: & environ douze iours apres finā sa vie, & fut enterré en la grande Eglise de ladicte ville d'Yvvis deuant le grand autel en grans pleurs & gemissemens de ses gens. Cōbien que par son ordonnance & testament fait moult notablement en son viuāt, il l'eüst & ordonné estre apporté & mis en l'abbaye de Cercamp: de laquelle ses predecesseurs Comtes de S. Pol estoient fondateurs, & dame bonne sa femme sœur au Duc de Bar: laquelle durant sa maladie manda pour venir deuers luy, ayant desir & regret de parler à elle, & la veoir en son dernier iour: mais icelle faisant grand diligence, & avec elle la niepce dudit Vvalleran sœur de messire Jean de Luxembourg, vindrent & arriuerent audit lieu d'Yvvis environ deux heures apres son trespas: nonobstant que pour elles plus haster à venir, cheuauchèrent engambées sur cheuaux trottans: lesquelles dames là venues oyans la mort d'iceluy, furent moult tristes & ennuyées en cuer. Et apres que ladicte Comtesse eust là seiourné environ huit heures & licencié les gens d'armes dudit Comte son mary, s'en retourna à Ligney en Barrois. Ouquel lieu elle feit celebrer en l'eglise collegialle vn seruice pour sondit seigneur & mary. En l'absence d'elle & par son procureur souffisamment fondé, renonça à toutes les debtes & biens quelsconques de sondit feu mary, excepté son doüaire, en mettant sur la representation de sondit seigneur & mary sa courroye & sa bourse, en demandant de ce aux tabellions publiques là estās presens par ladicte dame vn ou plusieurs instrumens. Duquel Comte furent heritiers les deux fils du Duc de Brabant & de la fille dudit deffunct sa premiere femme. Ouquel mois aussi les seigneurs du sang royal qui estoient à Paris, allerent à Melun au mandement de la Royne, & de son fils le Duc d'Acquitaine pour lors là estant. Et ainsi que lesdits seigneurs estoient embesongnez avec ladicte Royne de plusieurs choses, ledit Duc d'acquitaine accompagné de peu de gens se partit de là & alla à Paris: duquel lieu il feit sçauoir aux seigneurs dessusdits, que point ne retournaissent à Paris iusques à tant que le Roy ou luy les manderoit, & s'en allassent chacun d'eux en son pays visiter ses besongnes. En apres le dessusdit Duc d'Acquitaine sçachāt que la Royne sa mere auoit grand fināce és hostels de trois hommes dedans Paris: c'est à sçauoir Michault de l'Aillier, Guillaume Sāguin & Picquet de la Haye, entra soudainement esdictes maisons à tout ses gens. Et print ou feit prendre & emporter de fait toute icelle cheuance avec luy en son hostel: & apres feit euocquer les Preuosts de Paris & des marchans avec l'vniuersité & grand nombre de bourgeois à venir deuers luy au Loure. Et là feit par l'Euesque de Chartres son Chancelier exposer par articles de poinct en poinct toute la gouerne du Royaume, en commençant à la coronation du Roy son pere iusques à present:



comment le Duc d'Anjou auoit osté le tresor du Roy Charles iadis son taylor, porté & despendu avec luy en Italie, & conséquemment des Ducs de Berry & de Bourgongne trespassez. En apres le Duc d'Orleans trespaslé, & apres ce du Duc de Bourgongne, qui est presentement viuât, par lesquels toute la finance du Roy son pere & de son Royaume a esté traicte & exillée, en concludant que ledit Duc d'Acquitaine Dauphin de Vienne aîné fils du Roy, ne vouloit plus souffrir telles gouuernes de telles choses, ne si grand destruction de biens de ce Royaume, ne de sondit pere. Et pource, en conseillant à la chose publique & au bien de tout ce Royaume, en pouruoyant luy mesmes seul & fermement prenoit la gouuerne d'iceluy: & se notiffioit à eux & à tous autres à qui il appartient ou pouoit appartenir. Apres lesquelles choses lōguement & eloquemment exposées, tous retournerent en leurs lieux. Et les seigneurs du sang royal prenās congé à la Roynne, se separerent l'un de l'autre, & alla le Duc de Berry à Dourdan en sa Comté d'Estampes, le Duc d'Orleans à Orleans, & le Duc de Bourbon en sa Duché de Bourbon, & le Duc de Bourgongne estoit en Bourgongne cōme dit est: le Roy estoit malade en son hostel de S. Pol en Paris: & adonc ledit Duc d'Acquitaine accompaigné du Comte de Richemont estant au Louure, osta sa femme de la compaignie de la Roynne, & là fait mettre à S. Germain en l'Aye.

*Comment le Roy d'Angleterre assembla grand puissance pour venir en France: & des ambassadeurs qui furent enuoyez deuers ledit Roy, & la responce qu'ils eurent.*

## CHAP. CXL.

**E**N apres les ambassadeurs du Roy d'Angleterre qui auoient esté en France (comme dit est dessus) retournez vers luy, quand ils eurent fait la relation de la responce qu'ils auoient eüe du Roy de France, & de ceux de sa partie luy ne ses Princes n'en furent pas biens contens. Et pource assembla son grand conseil, pour sur icelle auoir aduiz & deliberation: en la fin duquel conseil fut conclud, qu'il assembleroit de tout son Royaume la plus grand puissance de gens de guerre que finer pourroit, sur intention d'entrer en France, & conquerre & trauailler à son pouuoir le Royaume, & tant faire, sil pouoit, qu'il en debouteroit le Roy de France & ses successeurs: & affin d'auoir nauire pour passer ses gens, enuoya ses commis en Hollande & Zellande, lesquels moyennant qu'ils asseuroient ceux à qui lesdictes nauires estoient d'estre bien payez, leur promeirent en liurer & bailler ce que besoing leur en feroit. Et avec ce ledit Roy d'Angleterre fait preparer toutes ses prouisions generallyment, qui pouoit competer & appartenir à faire guerre: & pour payer ses souldoyers, furent trouuez manieres de leuer finances par tous les moyens que faire se peurent, & tant qu'il assembla outre la somme de cinq cens mille nobles d'Angleterre ou monnoye & vaisselle à la valleur. Et finablement avec ses Princes & les gens des trois estats de son Royaume, conclud de venir en personne descendre en France au plus brief que faire le pourroit, & à tout la plus grand puissance qu'il pourroit, comme dit est dessus: lesquelles conclusions furent assez tost diuulgüées à Paris, & sceües en l'hostel du Roy: & pourtant le Duc d'Acquitaine qui auoit prins le gouuernement du Royaume pour l'occupation du Roy son pere, fait presentement assembler le grand conseil, & remanda à venir à Paris le

Duc



Duc de Berry son oncle, & aucuns autres seigneurs : avec lesquels & aucuns autres sages il tint plusieurs cōseils , pour sçauoir sur ceste matiere comment il fauroit à conduire & gouuerner, car le Roy estoit lors malade: si fut deliberé qu'on feroit preparer gens d'armes par toutes les parties du païs du Royaume de France, pour estre prests pour resister & aller à l'encontre dudit Roy d'Angleterre & les siens, tantost qu'on sçauoit sa venue . Et avec ce qu'on mettroit garnisons és villes & forteresses sur la mer, & aussi qu'on leueroit fināces tant par tailles comme autrement par tout le Royaume, en tout ce qu'il seroit possible. Et outre qu'on enuoyeroit deuers ledit Roy d'Angleterre vne solemnelle ambassade , pour luy faire aucunes offres raisonnables assez selō les requestes, qu'auoient fait ses derniers ambassadeurs. A laquelle faire furent commis le Comte de Vendosme , maistre Guillaume Bouratier Archeuesque de Bourges , l'Euesque de Lisieux nommé maistre Pierre Frennel, les seigneurs d'Yvry & de Bracquemōt, maistre Gaultier Col secretaire du Roy, & maistre Iean Andrieu avec aucuns autres du grand conseil: lesquels durant encores les trefues d'entre les deux Royaumes, partans de Paris allerent par Amiens, Monstreul & Boulongne à Calais: & de là passans la mer, allerent à Douures en Angleterre. Si estoient trois cens cinquāte cheuaucheurs. En apres allerent à Cantorbie, duquel lieu furent menez par les gens du Roy Anglois par Rocestre iusques à Londres, & en la fin vindrēt à Vincestre: auquel lieu deuant le Roy, les Ducs de Clarence , de Bethfort & Clocestre ses freres , les autres grans seigneurs & conseil dudit Roy, le clergie & grād cheualerie, & le peuple de la cité de Vincestre en la salle de l'Euesque , & par la bouche de l'Archeuesque de Bourges ils exposerent leur ambassade audit Roy : lequel Archeuesque exposa premierement en latin & apres en valec si eloquemment , & distinguement & sagement, que les Anglois & les François ses compaignons grandement s'en esmerueilloient : en la fin de ladicte proposition offriront audit Roy, terre & tresgrand somme de pecune avec la fille du Roy de France qu'il prendroit à femme: mais qu'il voulsist delaissier & congier son armée qu'il assembloit au port de Hantonne, & les autres ports voisins pour aller contre le Roy de France si qu'on disoit : & par ainsi on accorderoit & ordonneroit perdurablement avec luy & sondit Royaume vraye, entiere & parfaicte paix. Apres laquelle proposition finée, tous se partirent les François dessus nommez ambassadeurs, & furent grandement receuz au disner avec le Roy. Et apres ce ledit Roy en vn autre certain iour feit faire respōce ausdits ambassadeurs sur leurdicte proposition par l'Archeuesque de Cantorbie . Lequel replicquāt de poinct en poinct ce qu'auoit esté dit par ledit Archeuesque de Bourges . Toutesfois il adiousta aucunes choses & aucunes en delaissa. Lequel Archeuesque de Cantorbie fut assez durement repris par luy où il estoit besoing, en disant ie n'ay pas ainsi dit. Mais i'ay dit ainsi, & par telle maniere: en la fin de ladicte responce fut conclud, que se le Roy de France luy donoit avec sa fille à mariage, les Duchez d'Acquitaine, de Normandie, d'Anjou, de Tours, les Comtez de Poictou, du Mans & de Ponthieu & toutes les autres choses iadis appartenans heritablement aux Roys d'Angleterre ses predecesseurs , il ne se desisteroit pas de son voyage, entreprinse & armée : mais destruiroit du tout en tout à son pouuoir le Royaume & le Roy de France son aduersaire , & detenteur d'iceux iniustement . Et que par espée il conuiendrait



toutes ces choses, & luy osteroit la couronne dudit Royaume, mais qu'il peust. Le Roy de sa propre bouche aduoia ledit Archeuesque de Cantorbie, & dit qu'ainsi le feroit par la permission de Dieu. Et ainsi le promet ausdits ambassadeurs en parolles de Roy. Adoncques ledit Archeuesque de Bourges selon la coustume de France demanda congé de parler, & puis il dit: ô tu Roy avec honneur & reuerence que pense tu, vueillant ainsi debouter & adnichiller iniustement le treschrestien Roy des François nostre treschier & tresredoubté sire, le plus noble & le plus excellent de tous les Roys Chrestiens de la chaire & thronne de si grand & si puissant Royaume: ô tu Roy avec honneur & reuerence cuides tu qu'il ait offert ou fait offrir à toy donner sa terre & finance avecques sa propre fille en femme, pour la cremeur de toy, des Anglois, & bien-vueillans? nenny, mais en verité iceluy meu par pitié comme amour de paix, il a ce fait affin que le sang innocent ne fut pas espendu, & le peuple Chrestien par ces tourbillons de bataille ne fut pas destruit: & en appellant l'ayde de Dieu tout puissant, de la benoiste vierge Marie & de tous les saincts de droit & de raison par les armes de luy & de ses loyaux vassaulx, subiects, alliez & bien-vueillans, tu seras enchasse des regions de son Royaume & de toute sa domination, où tu seras prins ou tu y mourras, duquel Roy si graue pour sa reuerence, auquel nous sommes ambassadeurs & seruiteurs: nous te prions de par nous, que tu nous faces seurement & sans dommage conduire & mettre hors de tes regiōs, & de toute la domination, & oudit Roy nostre sire tu escriues entierement la responce qu'as faicte sur ton seel & sein manuel: laquelle chose ledit Roy feit, & leur octroya benignement: & en celle maniere lesdits ambassadeurs (apres ce qu'ils eurent receuz grans dons) retournerent à Douures & depuis à Calais: & apres ce qu'ils eurent retourné à Paris au Duc d'Acquitaine, en plain conseil du Roy deuant plusieurs cheualiers, le clergié & peuple, ils racompterent par escrit toute la responce & ordonnance de leur ambassade. Et par deuant ce, ledit Duc d'Acquitaine & grād conseil du Roy auoient receu lettres de responce final dudit Roy d'Angleterre, faictes à Vincerstre & enuoyées audit Roy d'Angleterre.

*Comment le Duc de Bourgogne enuoya deuers le Duc d'Acquitaine ses ambassadeurs.*

*La responce qu'ils eurent, & du serment qu'il feit.*

CHAP. CXLI.

**E**N ce temps le Duc de Bourgogne estoit moult sollicité par les complainctes, & clameurs des bannis dessus nommez de Paris & de tout le Royaume de France, lesquels il auoit receuz & receuoit (comme dit est par dessus) & moult enhortez à ce remedier. Et pour ceste cause enuoya deuers le Duc d'Acquitaine son beau fils, & grand conseil du Roy à Paris ses ambassadeurs: c'est à sçauoir sire Regnier Pot, & le seigneur d'Ancre cheualiers, l'Euesque de Tournay & vn aduocat d'empres Dijon, affin que lesdits bannis par l'auctorité du Roy feussent reuocquez, & que des cinq cēs personnes à estre bannies selon le contenu & accord de la paix faicte, nuls ne feussent bannis, mais toutes choses leur feussent pardonnées & abolies: & avec que sa femme fut & demourast avec luy à Paris, laquelle il faisoit demourer à S. Germain en Laye, & deboutast de sa compaignie vne sienne amie qu'il tenoit en lieu de sadicte femme. Et apres ces choses ainsi faictes, il iureroit & tiédroit ladicte paix sans la



la violer: autrement non. Pour lesquelles exposées ledit Duc d'Acquitaine fut tellement esmeu, que lesdits ambassadeurs ne peurent pas auoir plaisante responce. Et vn autre iour retournerent deuers ledit Duc d'Acquitaine, esperāt à auoir plus gracieuse responce: mais iceux non ayans n'impetrans ce qui leur auoit esté enioint de leur maistre & seigneur ledit Duc de Bourgogne, dirēt audit Duc d'Acquitaine. Tresredoubté Prince & tresnoble seigneur avec reuerence, sçachez que se vous n'accordez ce que nostredit seigneur vous requier, il ne iurera pas la paix faicte ne tiendra icelle: & se vous estiez trauaillé d'Anglois voz ennemis, il, ne ses vassaulx ne subiects ne s'armeront pas pour vous, ne vous seruira, ne vous deffendra: laquelle chose oyant ledit Duc fut de plus en plus esmeu en ire: & neantmoins en refraignant luy mesmes, dist, que sur toutes choses il auroit conseil, & manderoit dedans brief temps à leursdit maistre & seigneur sa vouldenté par ses loyaux. Et ainsi retournerent lesdits ambassadeurs au païs de Bourgogne. Et apres ce que ledit Duc d'Acquitaine eut deliberation du grand conseil du Roy sur la petition & requeste faicte audit Duc de Bourgogne. Auquel au païs de Bourgogne furent enuoyées de par le Roy sire Guichard Daulphin, le seigneur de Viel-pont cheualier & maistre Iean de Vailly president en Parlement ambassadeurs, lesquels le trouuerent à Dijon & avec luy tant traicterent, qu'il iura ladicte paix comme auoient iuré les autres dessus nommez, & de son sermēt apporterent lettres seellées de son scel: lesquelles furent baillées à maistre Estienne de Mauregard comme les autres. Toutesfois ledit Duc de Bourgogne tenoit grād multitude de gens d'armes & de traict en la Duché & Comté de Bourgogne & autres lieux voisins, qui mangeoient & gastoient moult de biens: & ce pour l'ayder, garder & deffendre s'il estoit besoing. Et le xxij. iour de Iuillet ces cinq cens personnes cōtenues és lettres du Roy faictes de la paix dudit de Bourgogne & autres du sang royal, furent bannis du Royaume de France au son de trompette, en la presence des ambassadeurs dudit Duc de Bourgogne pour lors estās à Paris.

*Comment Henry Roy d'Angleterre fait grans preparations en son Royaume pour venir en France: & des lettres qu'il enuoya à Paris deuers le Roy de France.*

CHAP. CXLII.

**Q**R conuient retourner à l'estat & gournemēt de Henry Roy d'Angleterre, lequel pour parfournir son entreprinse à venir en France, cōme dit est ailleurs, faisant grādes preparations tant de gens comme de habillemens de guerre, & tout faisoit tirer vers le passage de là la mer aupres de Hantonne: & apres le second iour d'Aoust que les trefues furent finées entre les deux Royaumes de France & d'Angleterre, les Anglois de Calais & autres lieux de la frontiere commēcerent à courir & degaster le païs de Boulenois en diuers lieux: pour ausquels resister furent enuoyez de par le Roy de France le seigneur de Rābures maistre des arbalestriers & le seigneur de Lonroy avec cinq cens combattans pour deffendre le païs susdit. Et briefs iours ensuiuās le dessusdit Roy Henry qui auoit ses besongnes assez prestes pour passer en France, enuoya vn sien herault nommé Cloestre à Paris deuers le Roy de France luy presenter vnes lettres desquelles la teneur s'ensuit. A tresnoble Prince Charles nostre cousin aduerfaire de France: Henry par la grace de Dieu Roy d'Angleterre



& de France. A bailler à vn chacū ce qui est sien est euure d'inspiration & de sage conseil, trefnoble Prince cousin, & nostre aduersaire iadis les nobles Royaumes d'Angleterre & de France estoient en vnion, maintenant ils sont diuisez. Et adonc ils auoient de coustume d'eux exaulcer en tout le mōde par leurs glorieuses victoires, & estoit à iceux vne seule vertu d'embellir & decorer la maison de Dieu, à laquelle appartient saincteté, & mettre paix és regions de l'Eglise: en mettant par leur bataille concordable heureusement les ennemis publiques à leur subiection. Mais, hélas, celle foy de lignaige a peruertie celle occasion fraternelle, & Loth persecute Abraham par impulsion humaine, la gloire d'amour fraternelle est morte, & la diffence d'humaine condition ancienne & mere d'ire est resuscitée de mort à vie. Mais nous cōtestons le souuerain iuge en pres science, qui n'est ployé & encliné par priere ou par dons, qu'à nostre pouoir par pure amour, nous auons procuré les moyens de paix. Se ce non aurios par l'espée & par conseil le iuste tiltre de nostre heritage & droits de nostre anciennableté: car nous ne sommes pas tenus par si grand anullement de petit courage que nous ne vueillōs combattre iusques à la mort pour iustice. Mais l'auctorité escrete ou liure Deuteronomie enseigne, qu'en quelque cité que ly homs viendra pour icelle impugner à combattre premierement il luy offre paix. Et jaçoit que violence rauissereisse de iustice a soubstraits & de long temps les noblesses de nostre couronne, & noz droits heritages: toutesfois charité de par nous entant qu'elle a peu, a fait pour le recouurer d'iceux à l'estat primerain. Et ainsi dōc par deffaute de iustice, nous pouons auoir retour aux armes: toutesfois affin que nostre guerre soit tesmoigne à nostre conscience, maintenant & par personnelle requeste en ce trespas de nostre chemin: auquel nous traict icelle deffaute de iustice, nous enhortons és entrailles de Iesus-Christ, ce qu'enhort la perfection de la doctrine euāgelique. Amy rends ce que tu doibs, & il nous soit fait par la voulenté de Dieu souuerain. Et afin que le sang humain ne soit point espendu, qui est créé selon Dieu l'heritage & deuie restitution des droits cruellement soubstraicte, ou au moins des choses que nous instamment, & tant de fois par noz ambassadeurs & messages demandons & desquelles nous seullement fait estre content la souueraine reuerence d'iceluy souuerain Dieu, & le bien de paix: & nous pour nostre party en cause de mariage estions enclinez de falquier & laisser cinquante mille escus d'or dernièrement à nous offers. Nous desirans plus la paix que l'auarice, auios preesleuz iceux noz droits de patrimoyne, que si grans nous ont laissez noz venerables antecessours avec nostre treschiere cousine Katherine vostre glorieuse fille, qu'avec la pecune d'iniquité multiplier mauuais tresors & desheriter par honte & mauuais conseils la couronne de nostre Royaume, que Dieu ne vueille. Donné soubz nostre seel priué en nostre chastel de Hantonne au riuage de la mer, le cinquiesme iour du mois d'Aoust. Lesquelles lettres dessusdictes apres que par ledit herault eurent esté présentées au Roy de France (comme dit est) luy fut dit par aucuns à ce commis, que le Roy & son conseil auoient veu les lettres, qu'il auoit apportées de son seigneur le Roy d'Angleterre: sur lesquelles on auroit aduis, & pouruoiroit le Roy sur le contenu en icelles en temps & en lieu comme bon luy sembleroit, & qu'il s'en allast quand luy plairoit deuers son dessusdit seigneur le Roy d'Angleterre.



*Comment le Roy Henry vint à Hautonne: de la conspiration faicte contre luy par ses gens: du siege qui fut meis à Harfleur & de la reddition d'icelle ville.*

## CHAP. CXLIII.

**U** Tem ledit Roy d'Angleterre venu au port de Hautonne avec tout son exercite, prest pour passer la mer & venir descendre en France, fut aduerty, qu'aucuns grans seigneurs de son hostel si auoient fait conspiration à l'encontre de luy, vueillans remettre le Comte de la Marche vray successeur & heritier de feu le Roy Richard en possession du Royaume d'Angleterre, ce qui estoit veritable: car le Comte de Cantorbry & autres auoient conclud de prendre le dessusdit Roy & ses freres, sur intention d'accomplir les besongnes dessusdictes: si s'en descouurirent au Comte de la Marche, lequel le reuela au Roy Henry, en luy disant, qu'il aduisast à son fait ou il seroit trahy, & luy nomma lesdits conspirateurs: lesquels le dessusdit Roy feit tantost prendre, & brief ensuiuant feit trêcher les testes à trois des principaux: c'est à sçauoir au Comte de Cātorbry frere au Duc d'Iorch, au seigneur de Seruppe: lequel couchoit toutes les nuicts avec le Roy & au seigneur de Grez. Et depuis en furēt aucuns executez. Apres lesquelles besongnes peu de iours ensuiuant, ledit Roy d'Angleterre & toute son armée monterent en mer, & en grād diligence: & la vigille de l'Assumption nostre Dame par nuict prindrent port à vn haure estant entre Harfleur & Hōnefleur où l'eaüe de Seine chet en la mer: & pouoient estre enuiron seize cens vaisseaux tous chargez de gens & habillemēs, & prindrēt terre sans effusion de sang. Et apres quē tous furent descēdus, le Roy se logea à Grauille en vne prioré: & les Ducs de Clarence & de Cloestre ses freres estoient assez pres de luy, le Duc d'Iorch & le Côte d'Vrset ses oncles, l'Euesque de Norvveghe les Comtes de Vvynesore, de Suffort Mareschal de Vvaruich & de Quin, les seigneurs de Camber, de Beaumont, de Villeby de Trompeton, de Cornouaille, de Molliflac & plusieurs autres se logerent où ils peurēt le mieux: & apres assiegerēt trespuissammēt la ville de Harfleur, qui estoit la clef sur la mer de toute Normādie. Et estoient en l'ost du Roy enuiron six mille bacinets, & xxiiij. mille archiers sans les canōniers & autres vsans de flondelles & engins, dōt ils auoiēt grād abondance. En laquelle ville de Harfleur estoient entrez avec ceux de la ville enuiron cccc. hōmes d'armes esleuz, pour garder & deffendre ladicte ville. Entre lesquels estoient les seigneurs d'Estouteuille capitaine de la ville de par le Roy, de Blainuille, de Bacqueuille, de Hermanuille, de Gaillart de Bos, de Cleré, de Bectou, de Adsanches, de Briauté, de Gaucourt, de l'Isle Adam & plusieurs vaillās cheualiers & escuyers iusques au nombre dessusdit, resistant moult fort aux Anglois descēdus à terre: mais riens n'y vallut pour la tresgrād multitude & puissance, & à peine peurent ils rentrer en leurdicte ville: & ainçois que lesdits Anglois descendissent à terre, iceux François osterent la chaulcée estant entre Monstieruilliers & ladicte ville pour empirer la voye ausdits Anglois, & meirent les pierres en leur ville: neantmoins lesdits Anglois vacguans par le païs prindrent & amenèrent plusieurs prisonniers & proyes, & asseirent leurs gros engins és lieux plus conuenables entour ladicte ville, & prestement icelle moult trauaillerent par grosses pierres, & dommageans les murs: d'autre part ceux de ladicte ville moult



fort se deffendoient d'engins & d'arbalestres occisans plusieurs desdits Anglois. Et sont à ladicte ville tant seullement deux portes : c'est à sçauoir la porte Caltinant, & la porte de Monstieruillier, par lesquelles ils faisoient souuent grans enuahies sur lesdits Anglois, & les Anglois fort se deffendoient. Icele ville estoit moult forte de murs & tours moult espesses, fermées de toutes parts, ayans grans & parfonds fossez. Adonc aduint ausdits assiegez malle aduanture, car le traict & pouldre de canons enuoyez à iceux par le Roy de France furent rencontrez & prins desdits assiegeans. Durant lequel temps furent enuoyez de par le Roy de France à Rouën & en la frontiere contre lesdits Anglois à tout grand nombre de gens d'armes, le Connestable, le Mareschal Bouciquault, le Seneschal de Hainault, le seigneur de Ligny, le seigneur de Hamede, messire Clugnet de Brabant & plusieurs autres capitaines. Lesquels à tous leurs gens trespiligemment garderent le païs, & tant qu'iceux Anglois en tant qu'ils estoient audit siege de Harfleur ne prindrent aucune ville ou forteresse sur leurs aduersaires : jaçoit ce qu'à ce faire meissent grand peine par plusieurs fois, & cheuauchioient tressouuent à grand puissance sur le plat païs, pour querir viures, & aussi pour rencontrer les François leurs ennemis : ouquel païs feirent de tresgrans dommages & ramenoient souuent à leur ost grans proyes. Toutesfois par le moyen de ce que lesdits François les gardoient de si pres, eurent assez de disettes de viures : car avecques ce ceux qu'ils auoient apporté de leur païs furent en la plus grand partie gastez de l'air de la mer. Et avecques ce se ferit entre eux maladie de cours de ventre, dont il en mourut bien deux mille ou plus : entre lesquels furent les principaulx le Comte d'Estaffort, l'Euesque de Norvvegue, les seigneurs de Beaumôt, de Trompanton, Morisse Brunel avec plusieurs autres nobles. Neantmoins ledit Roy d'Angleterre en grand diligence & labeurs perseuera tousiours en son siege, & fait faire trois mines par dessoubz la muraille, qui estoient prestes pour effondrer : & avec ce fait par ses engins confondre & abbatre grand partie des portes, tours & murs d'icelle ville : parquoy finablement les assiegez sçachans qu'ils estoient tous les iours en peril d'estre prins de force, se rendirent audit Roy Anglois : & se meirent en sa volenté, ou cas qu'ils n'auroient secours dedans trois iours ensuiuant : & sur ce baillerent leurs hostaiges, moyennant qu'ils auroient leurs vies sauues, & seroient quittes pour payer finances. Si enuoyerent tantost le seigneur de Bacqueuille & aucuns autres deuers le Roy de France & le Duc de Aquitaine, qui estoient à Vernon sur Seine à eux noncer leur estat & necessité, en suppliant qu'il leur vouldist bailler secours dedans trois iours dessusdits, ou autrement il perdrait sa ville & ceux qui estoient dedans : mais à brief dire, il leur fut respondu que la puissance du Roy n'estoit pas assemblée ne preste pour bailler ledit secours hastiuement : & sur ce s'en retourna ledit seigneur de Bacqueuille à Harfleur, laquelle fut mise en la main du Roy d'Angleterre le iour saint Maurice à la grand & piteuse desplaisance de tous les habitans & aussi des François : car ( comme dit est dessus ) c'estoit le souuerain port de toute la Duché de Normandie.



*Comment les Chanoyes de saint Gery à Cambray eurent grand discord aux habitans de la ville. Et de la guerre que leur feit le Duc de Bourgongne à ceste cause.*

## CHAP. CXLIII.

**E**N ce temps se meut vne grand dissention entre les bourgeois & habitans de la ville de Cambray d'une part, & les chanoyes du chapitre S. Gery en Cambray d'autre part : pourtant que lesdits bourgeois & habitans voyans la guerre de France approcher de leurdicte ville, cōclurent ensemble pour leur seurté & garde d'icelle ville, de reparer & eslargir les allées de leurs murailles par dedans leur ville : pourquoy tant de force comme autrement feirent demolir & abbatre plusieurs murs des iardins de leurs habitans à l'encontre de leurdicte muraille . Et par especial en feirent plusieurs demolir entre les iardins desdits chanoyes, entreprenant tresslargement sur les heritages d'iceux chanoyes, sans pour ce les vouloir de riens recompenser : & d'autre part lesdits habitans voulurent deffendre aux dessusdits à vendre vin à leur celier, nō obstant qu'iceux chanoyes long temps parauant auoient vendu, & de ce estoient en bonne possession . Pour lesquelles offences & oppressions lesdits chanoyes apres ce qu'ils eurent plusieurs fois sommé lesdits bourgeois & habitans, voyans que de ce ne leur seroit faicte aucune raison, se retrahirent deuers le Duc Iean de Bourgongne & son conseil, eux tresprieusement complaignant desdictes oppressions à eux faictes par iceux bourgeois & habitans : lequel Duc de Bourgongne à cause de sa Comté de Flandres & garde de toutes les Eglises de Cambray heritablement & à tousiours . Et pour ladicte garde, prend chacun an pardurablement certaine quantité de grains sur les terres & seigneuries desdictes Eglises ou pays de Cambresis : & se nomme icelle seigneurie appartenant audit Comte de Flandres le Gauene de Cambresis . Lequel Duc de ce non content enuoya ses messagiers solennels à Cambray deuers lesdits Bourgeois & habitans, eux signifier qu'ils reparassent les dommages & oppressions par eux faits aux dessusdits chanoyes, lesquels estoient en sa garde: ou ce sinon il y pouruoyeroit par telle maniere, que ce seroit exemple à tous autres: si n'eut pas surce responce à son plaisir, & pource qu'il estoit en son pays de Bourgongne, rescriuit à Philippe Comte de Charrolois son seul fils: lequel estoit en Flandres, que trefinistammēt il gardast & preseruast lesdits chanoyes de saint Gery de toutes oppressions & violences, en contraignant les dessusdits bourgeois & habitans d'iceux reparer de leurs dommages & interets . Lequel Comte de Charrolois sentant la volenté dudit Duc de Bourgongne son pere, fait sommer de rechef iceux bourgeois & habitans, qu'ils reparassent les dessusdits chanoyes: & pource qu'iceux ne luy feirent pas de rechef responce à son plaisir, il fait sçauoir secrettement ausdits chanoyes qu'ils vuidassent la ville & s'en allassent à l'Isle . Auquel lieu il leur bailleroit demeure souffisante : lesquels sçachans l'intention dudit de Charrolois, meirent grand partie de leurs biens à sauueté, & puis tout coyement sans estre apperceuz, se departirent & allerent là plus grand partie demourer à l'Isle: & assez tost apres ledit Comte de Charrolois fait deffier ladicte ville de Cambray & habitans par Hector de Saueuses : lequel Hector assembla bien trois cens combattans . Et le iour de l'exaltation sainte Croix soudainement entrerent en Cambresis, & vin-



drent assez pres des portes de la cité de Cambray: pource que le Marché y estoit, en pillant, occiant & n'aurant plusieurs de ladicte ville, en ce faisant & perpetrant cruellement moult d'autres maux: & tantost apres ledit Hector & ses gens sans faire longue demeure, se departirent à tout trefgrand despouille, & s'en allerent loger vers Bray sur Somme, disans que ce auoient ils fait au commandement du Comte de Charrolois. Pour laquelle enuahie lesdits citoyens de Cambray furent fort esmerueillez, & eurent grand doubte: pourquoy de plus en plus conceurent grand hayne à l'encontre desdits chanoines, en eux preparant de garder leur ville & prenans de iour en iour les biens desdits chanoynes: c'est à sçauoir, vins, bleds, bois & autres manieres de viures. Toutesfois apres qu'iceux citoyens eurent esté courus plusieurs fois, & euz de grans dommages, considerans qu'au long aller ladicte guerre estoit la destruction totale de leurdicte cité, se retrahirent deuers le Duc Guillaume Comte de Hainault, qui estoit gardien de par le Roy de France de ladicte cité de Cambray: auquel ils requirent qu'il voulsist traicter leur paix deuers le Comte de Charrolois son nepueu, & ils seroient prests de faire toute raison ausdits chanoynes, en eux reparant leurs pertes & interests. Pourquoy tant pour le moyen dudit Duc Guillaume, comme par autres, la diffence fut soubsmise sur Clercs de droit: & en la conclusion furent lesdits citoyens condamnez à faire reediffier tous les murs que auoient fait abbatre aux iardins desdits chanoines: & auecques ce s'obligerent à payer chacun an perpetuellement ausdits chanoynes cent francs monnoye royale, par cōdition qu'iceux chanoynes ne pourroient vendre vin à leurs celiers. Et aussi lesdit citoyens pourroient rachepter ladicte somme de cent francs pour certaine quantité de monnoye, toutes & quantesfois qu'ils auroient l'aisement & volenté de ce faire: & parainssi auec aucunes autres conditions furent icelles parties appaisées, & retournerent lesdits chanoynes à leur Eglise.

*Comment le Roy de France feit grand assemblée de gens d'armes par tout son Royaume, pour resister à l'encontre du Roy Henry, & des mandemens qu'il enuoya pour ce faire.*

CHAP. CXLV.



Tem apres qu'il fut venu à la cognoissance du Roy de France, de ses Princes & grand conseil, comment la ville de Harfleur estoit rendue en la main de son aduersaire le Roy d'Angleterre, doubtant que celuy Roy voulsist de rechef faire autres entreprinsses sur son Royaume, affin de resister, feit mander par tous ses pays la plus grand puissance de gens d'armes qu'il peut finer. Et pour ce faire, enuoya par tous ses baillifs & seneschaulx ses mandemens royaulx contenans entre les autres choses, comment il auoit enuoyé parauant ses ambassadeurs deuers ledit Roy d'Angleterre en son pays luy offrir sa fille en mariage auecques terres & grans finances pour venir à paix, laquelle il n'auoit peu trouuer: mais de fait l'estoit iceluy Roy d'Angleterre venu enuahir en son pays, assieger ladicte ville de Harfleur & la cōquerre, dont moult estoit desplaisant. Et pource requeroit bien instamment à tous ses vassaux & subiects, que sans delay le voulsissent aller seruir. Et mesmement manda en Picardie par ses lettres closes aux seigneurs de Croÿ, de Vvaurin, de Fosseux, de Crequi, de Heuchin, de Brimeu, de Mammez, de la Vieuille, de Beaufort, d'Inchy, de



de Noyelle, de Neufuille & autres nobles : que incontinent le veinssent seruir avec toute leur puissance, sur tant qu'ils doubtoient à encourir son indignation, & qu'ils allassent deuers le Duc d'Acquitaine son fils:lequel il auoit commis chef & capitaine general de tout son Royaume. Lesquels seigneurs de Picardie delayerent à y aller, pource que le Duc de Bourgongne leur auoit mandé & escrit, & à tous ses subiects qu'ils fussent prests pour aller avec luy, quand il les manderoit. Et n'allassent à quelque mandement d'autre seigneur de quelque estat qu'il fut. Et pource que les dessusdits gens d'armes ne se hastoient pas assez pour aller seruir le Roy, furent de rechef publiez nouveaulx mandemens, dont la teneur fensuit.

CHARLES par la grace de Dieu Roy de France au Baillif d'Amiens ou à son lieutenant salut : Comme par autres noz lettres nous vous eussions mandé faire commandement par proclamations & publications par tout vostre bailliage, à tous nobles & autres ayās puissance & coustumé d'eux armer. Et à tous autres gens de guerre & de traict demourans en vostre dit bailliage & és mettes d'iceluy, qu'ils fussent appareillez & venissent hastiuement deuers nous & nostre trefcher & trefaymé fils le Duc d'Acquitaine nostre lieutenant & capitaine general. Car ja pieça que nous partismes à aller contre nostre aduersaire d'Angleterre, qui adoncques estoit descendu en moult grand puissance de gens d'armes & de traict, & des habillemens de guerre en nostre pays de Normandie : ouquel apres ils se tindrent en siege deuant nostre ville de Harfleur, laquelle par negligence ou remanance ou retardemēt que vous & autres auez fait, d'executer nosdictes lettres: & par deffaulte de secours & ayde, il conuient que nobles noz bōs & loyaux subiects estans en icelle, nonobstant tresgrand & notable deffence que ils feirent, & que plus ne pouoient resister à l'oppression & à la force desdits noz ennemis, rendirent à iceux la ville par violence : & pource qu'il touche chacun de noz subiects la conseruation & deffence de nostre domination, nous qui auons deliberé & conclud du tout de l'auoir & recouurer par puissance nostredite ville, & combattre & debouter de nostre Royaume nostredit aduersaire & sa puissance à sa grand confusion à l'ayde de Dieu, & de la benoiste vierge Marie, & de noz bons vrais loyaux parens & subiects : desquels de present nous requerrons l'ayde & secours, vous mandons & le plus expressement que faire pouons: enioingnons & commandons, en commettant par ces presentes que sur la foy & loyauté que nous deuez, & sur tout ce que vous pouez forfaire enuers nous, que de rechef incontinent veües ces presentes vous faciez commandement à tous autres de vostre dit bailliage à leurs personnes, à leurs hostels & domicilles, & à toutes gens qui ont accoustumé d'eux armer & seruir guerres, & aux autres ayans puissance d'eux armer par proclamations solennelles és bonnes villes & autres lieux:esquels en vostre dit bailliage on a accoustumé de faire proclamations tant & si souuent qu'aucun ne puist pretendre ignorance, que sur peine d'estre reputé pour inobedient, & de forfaire corps & biens:iceux incontinent apres lesdictes proclamations, publications & commandemens viennent armez & souffisamment habillez. Et iceux qui ne pourroient venir pour trop grand vieillesse, debilité, enfermeté ou ieunesse, qu'ils enuoyent personnes souffisans armez & habillez chacun selon sa puissance deuers nous & nostredit fils : & à ce faire vous les



contraignez par la caption de leurs biens, en mettant à leurs maisons mangeurs à leurs despens: & par toutes autres voyes & manieres qu'en tel cas est accoustumé de faire, pour nous ayder à combattre nostredit aduersaire & sa puissance: & à debouter hors de nostredit royaume à sa grand confusion, cōme dit est. Et neant moins ces choses signifiées aux bourgeois & habitans des bonnes villes de vostre bailliage, en commandant à iceux & requerant de par nous, que tous les engins, canons & artilleries qu'ils ont & dont maintenant ils n'ont point besoing, ils sans delay enuoyent pour nous ayder en ce que dit est. Lesquels nous leur ferons rendre & restituer, & en ce vous procédez par si grand diligence que par vous plus nuls inconueniens n'en puissent ensuiuir, à nous, à nostre domination & subiects: sçachant que saucunes choses par vostre deffaute s'ensuiuoient (que Dieu ne vueille) nous de ce vous ferions si griefuement punir que ce seroit exemple à tous autres: mandons & commandons à tous noz iusticiers, officiers & subiects qu'à vous & à voz commis en ceste partie obeissent, & entendent diligemment: & de la reception de ces presentes r'enuoyez certification à noz ayez & loyaux les gens de noz comptes à Paris, pour valloir en temps & en lieu. Donné à Meulenc le vingtiesme iour du mois de Septembre l'an de grace mille quatre cens & quinze. Et de nostre regne le xxxvj. Ainsi signées par le Roy & son conseil. Apres lequel mandement publié à Paris, Amiens & autres lieux du royaume, le Roy enuoya deuers le Duc d'Orleans & de Bourgongne ses ambassadeurs, eux requerre bien acertes, que chacun d'eux luy voulsist enuoyer cinq cens bacinets, ledit Duc d'Orleans fut cōtent d'enuoyer, mais depuis y alla luy mesmes avec toute sa puissance: & le Duc de Bourgongne fait responce que point n'y enuoyeroit ses gens, mais iroit en propre personne avec tous ceux de ses païs seruir le Roy, neantmoins par aucune attargeation qui suruint entre eux n'y alla pas, mais grand partie de ses gens se meirent sus & y allerent.

*Comment le Roy d'Angleterre entra dedans Harfleur, des ordonnances qu'il y fit: du voyage qu'il entreprint à venir à Calais & du gouuernement des Francois.*

CHAP. CXLVI.

**U**R est vray qu'apres le traicté fait & conclud entre le Roy d'Angleterre & ceux de la ville de Harfleur ( comme dit est ) & que les portes furent ouuertes & ses commis entrez dedans, iceluy Roy à entrer en la porte descendit de dessus son cheual & se fait deschausser, & en tel estat s'en alla iusques à l'Eglise saint Martin parrochiale d'icelle ville: & là fait son oraison tresdeuotement, en regrant son createur de sa bonne fortune: & apres ce qu'il eut fait, fait mettre prisonniers tous les nobles & gens de guerre, qui estoient leans: & depuis brief ensuiuant les fait mettre hors de la ville grand partie vestus de leurs pourpoints tant seullement: moyennant qu'ils furent mis tous par noms & surnoms en escript, & iurerent sur leur foy d'eux rendre prisonniers en la ville de Calais dedans la saint Martin d'hyuer prochain ensuiuant, & sur ce se partirent: & pareillement furent mis prisonniers grand partie des bourgeois de la ville, & faillut qu'ils se racheplassent de grand finance: & avec ce furent boutez dehors, & furent congiez la plus grand partie des femmes avec leurs enfans: & leur bailloit on au partir à chacune cinq soubz, & vne partie de leurs vestemens. Si estoit

piteuse



piteuse chose de veoir les regrets, que faisoient iceux habitans, delaisians ainsi leur ville avec leurs biens: en outre furent licēciez tous les prestres, & gens d'Eglise: & quand est des biens qui là furent trouuez, il en y auoit sans nombre, lesquels demourerent audit Roy, & les fait departir selon son bon plaisir. Toutesfois deux tours qui estoient sur la mer moult fortes, se tindrent enuiron dix iours depuis la rendition de la ville. Et apres se rendirent comme les autres. En apres ledit Roy Anglois enuoya en Angleterre par Calais grand partie de son ost, menans par nauire grans despouilles de prisonniers & engins: en laquelle compagnie estoit principal capitaine son frere le Duc de Clarence, & le Comte de Varuich. Et ledit Roy fait reparer les murs & fossez de ladicte ville de Harfleur, & puis y meit garnison de ses Anglois cinq cens hommes d'armes & mille archers, desquels estoit capitaine sire Iean le Blond cheualier: & avecques ce y meit grand prouision de viures, & habillemens de guerre. Apres en la fin de xv. iours se partit ledit Roy de la ville de Harfleur vueillant aller à Calais accompagné de deux mille hommes d'armes & treize mille archers ou enuiron, avecques grand nombre d'autres gens s'en alla loger à Fauuille & es lieux voisins: apres en trespasant le pays de Caulx vint vers le Comté d'Eu, & fut vray que les coureurs desdits Anglois vindrent deuant la ville d'Eu: dedans laquelle estoient plusieurs François, qui saillirent à l'encontre d'eux: entre lesquels estoit vn tres-vaillant homme d'armes nommé Lancelot Pierres: lequel courant contre vn Anglois de fer de lance fut feru par entre deux lames trauers le ventre, dont en la fin en mourut: & depuis qu'il fut nauré à mort, tua ledit Anglois: pour laquelle mort du dessusdit Lancelot, furent le Comte d'Eu & plusieurs autres François trefennuyez: & de là iceluy Roy d'Angleterre trespasant le Vimeu auoit voulenté de passer la riuere de Somme à la Blanche-tache, où jadis passa son ayeul Edouart Roy d'Angleterre, quand il gaigna la bataille de Cressy contre le Roy Philippe de Vallois: mais pourtant que les François à grand puissance gardoient ledit passage, comme il fut aduertie par lesdits coureurs, reprint son chemin tirant vers Arrames embrazans & ardās plusieurs villes, prenans hommes & emmenans grans proyes: & le dimanche treiziesme iour d'Octobre, fut logé à Bailleul en Vimeu. Et de là passant pays, enuoya grand nombre de ses gens, pour gaigner le passage du pont de Remy: mais le seigneur de Vaucourt & du pont de Remy avec ses enfans & grand nombre de gens d'armes, deffendirent bien & roidement ledit passage contre iceux Anglois: pourquoy le Roy d'Angleterre non pouant passer s'en alla loger à Hāgest sur Somme & es villages à l'environ: & adonc estoient à Abbeuille messire Charles d'Albreth Connestable de France, le Marechal Bouciquault, le Comte de Vendosme grand maistre d'hostel du Roy, le seigneur de Dampierre soy disant Admiral de France, le Duc d'Alençon & le Comte de Richemont avec autre grand & notable cheualerie: lesquels oyans les nouuelles du chemin que tenoit le Roy d'Angleterre, se departirent & allerent à Corbie & de là à Peronne, tousiours leurs gens sur le pays assez pres d'eux, contendans garder tous les passages de l'eau de Somme contre lesdits Anglois: & ledit Roy d'Angleterre, de Hangeft s'en alla passer au Ponteau de Mer: & par deuant la ville d'Amiens, s'en alla loger à Bones: & apres a Herbonnieres, Vvauviller, Bainuillier, & tousiours lesdits François costoyoient par l'autre lez de la Somme: finablement le Roy de



Angleterre passa l'eau de Somme le lendemain de la saint Luc par le passage de Voyenne & Bethencourt: lesquels passages n'auoient pas esté rompue par ceux de S. Quentin comme il leur auoit esté enioinct de par le Roy de France: & alla ledit Roy d'Angleterre loger à Monchy-la-gache & vers la riuere de Miramont, & les seigneurs de France & tous les François se tirerent à Bappames & ou pays à l'environ.

*Comment le Roy de France & plusieurs de ses Princes estans avec luy à Roüen, conclurent en conseil que le Roy d'Angleterre seroit combattu.* CHAP. CXLVII.

**L**Tem durant le temps dessusdit le Roy de France & le Duc d'Aquitaine vindrent à Roüen: auquel lieu le xx. iour d'Octobre fut tenu conseil, pour sçauoir ce qui estoit à faire contre le Roy d'Angleterre: auquel lieu furent presens le Roy Loys, les Ducs de Berry, de Bretagne, le Comte de Pontieu-maininé fils du Roy, les Châcelliers de France & d'Aquitaine & plusieurs autres notables conseillers iusques au nōbre de xxxv. Lesquels apres que plusieurs choses en presence du Roy eurent esté pourparlées & debatues sur ceste matiere, fut en la fin conclud par trente conseillers du nombre dessusdit, que le Roy d'Angleterre & sa puissance seroient cōbattus: & les cinq pour plusieurs raisons conseilloyent pour le meilleur à leur aduis, qu'on ne les cōbatist pas au iour nommé: mais en la fin fut tenue l'opinion de la plus grand partie. Et incontinent le Roy manda destroitement à son Connestable par ses lettres, & à ses autres officiers que tantost se meissent tous ensemble avec toute la puissance qu'ils pourroient auoir, & cōbatissent ledit Roy d'Angleterre & les siens. Et lors apres ce fut hastiuement diuulgué par toute France que tous nobles hommes accoustumez de porter armes vueillans auoir hōneur, allassent nuit & iour deuers le Connestable où qu'il fut: & mesmement Loys Duc d'Aquitaine auoit grand desir d'y aller, nōobstant que par le Roy son pere luy eust esté deffendu: mais par le moyen du Roy Loys, & le Duc de Berry il fut attargé de non y aller. Et adonc tous seigneurs en grand diligence se tirerent tous ensemble deuers ledit Connestable: lequel approchans le pays d'Arthois enuoya deuers le Comte de Charrolois seul fils du Duc de Bourgogne, le seigneur de Montgauguier pour luy certifier la conclusion, qui estoit prinse de combattre les Anglois: en luy requerant bien affectueusement de par le Roy & ledit Connestable, qu'il voulüst estre à icelle iournée: lequel de Montgauguier le trouua à Arras, & fut de luy & de ses seigneurs treshonorablement receu. Et apres qu'il eut exposé la cause de sa venue audit Comte de Charrolois present son grand conseil, luy fut respondu par les seigneurs de Robais & de la Vieuille, qui estoient avec luy ses principaux gouuerneurs sur sa requeste, il feroit si bonne diligence qu'il appartiendroit, & sur ce se partit: toutesfois jaçoit ce que le dessusdit Côte de Charrolois desirast de tout son cueur d'estre à combattre lesdits Anglois, & aussi que lesdits gouuerneurs luy donnaissent à entendre qu'il y seroit. Neantmoins leur estoit deffendu expressement de par le Duc Iean de Bourgogne son pere, & sur tant qu'ils pouuoient mesprendre enuers luy qu'ils gardassent biē qu'il n'y allast pas. Et pour ceste cause afin de l'elongner le menerent de ladicte ville d'Arras à Aire. Auquel lieu furent de rechef enuoyez de par le Cōnestable aucuns seigneurs, & Montjoye Roy  
d'armes



d'armes du Roy de France pour faire pareilles requestes audit Comte de Charrolois cōme les deuantdits. Mais à brief dire fut la besongne toutesfois attargée par les dessusdits gouuerneurs. Et mesmement trouuerēt maniere de le tenir dedās le chastel d'Aire le plus coyemēt & secrettement qu'ils peurent faire: affin que pas il ne fut aduerty des nouuelles ne du iour de ladicte bataille. Et entre-tēps la plus grand partie des gēs de son hostel qui sçauoiēt bien les besongnes approchées, se partirēt coyement & secrettemēt sans son sceu, & s'en allerēt secrettemēt avec les François pour estre à ladicte iournée & cōbattre lesdits Anglois. Et demourerēt avec ledit Comte de Charrolois, le ieune seigneur d'Antoing & ses gouuerneurs dessusdits: lesquels en la fin pour l'appaiser luy declairerent la deffence de non le laisser aller à icelle besongne, ce qu'il ne print pas bien en gré. Et cōme ie suis informé pour la desplaissance qu'il en eut, se retrahit en sa chambre tresfort plorant. Or conuient retourner au Roy d'Angleterre lequel de Monchy-la-Gache où il estoit logé (cōme dit est dessus) se tira par deuers Encre, & alla loger en vn village nommé Forceuille, & ses gens se logerent à Cheu & és villes voisines. Et le lendemain qui estoit le mercredy cheuaucha par empres Lucheu, & alla loger à Bouuieres l'Escaillon, & le Duc d'Yorch son oncle menant l'auātgarde se logea à Frenench sur la riuere de Cauche: & est vray que pour ceste nuit lesdits Anglois furent logez bien en sept ou en huit villages en l'esparse. Toutesfois ils n'eurent nuls empeschemēs, car les François estoient allez pour estre au deuāt d'iceux Anglois vers S. Pol, & sur la riuere d'Aunun. Et le ieudy le dessusdit Roy d'Angleterre de Bouuieres se deslogea & puis cheuauchant en moult belle ordonnance, alla iusques à Blangy. Auquel lieu quand il eut passé l'eäue, & qu'il fut sur la montaigne, ses coureurs commencerent à veoir de toutes parts les François venans par grans compagnies de gens d'armes pour aller loger à Roussauuille & à Azincourt, affin d'estre au deuant desdits Anglois pour le lendemain les combattre. Et ce propre ieudy vers le vespre, à aucunes courses fut Philippe Comte de Neuers fait nouveau cheualier par la main de Bouciquault Marechal de France, & avecques luy plusieurs autres grans seigneurs. Et assez tost apres arriua ledit Conestable assez pres dudit Azincourt: auquel lieu, avec luy se r'assemblerent tous les François en vn seul ost, & là se logerent tout à plains champs chacun au plus pres de sa banierre: sinon aucunes gens de petit estat, qui se logerent és villages au plus pres de là. Et le Roy d'Angleterre avecques tous ses Anglois se logea en vn petit village nommé Maisongelles à trois traicts d'arc ou enuiron des François. Lesquels François avec tous les autres officiers royaulx, c'est à sçauoir le Conestable, le Marechal Bouciquault le seigneur de Dampierre, & messire Clugnet de Brabant tous deux eux nommans Admiraulx de France, le seigneur de Rambures maistre des arbalestriers & plusieurs Princes, Barons & cheualiers ficherent leurs bannieres en grand lieffe, avec la banniere royalle dudit Conestable au champ par eux aduise & situé en la Comté de saint Pol ou territoire d'Azincourt, par lequel le lendemain deuoient passer les Anglois pour aller à Calais: & feirent celle nuit moult grans feux chacun au plus pres de la banierre, sous laquelle ils deuoient lendemain combattre: & jaoit ce que les François fussent bien cent cinquante mille cheuaucheurs & grand nombre de chars & charrettes, canons, ribaudequins & autres habillemens de guerre: neantmoins si auoient ils peu d'instrumēs



de musique pour eux resiouyr, & à peine hanissoient nuls de leurs cheuaulx toute la nuit: dont plusieurs auoient grand merueilles disans que c'estoit signe des choses aduenir. Et lesdits Anglois en toute celle nuit sonnerent leurs trompettes & plusieurs manieres d'instrumens de musique, tellement que toute la terre entour eux retentissoit par leurs sons: nonobstât qu'ils fussent moult lassez & trauallez de faim, de froit & autres mesaises, faisans paix avecques Dieu, en confessant leurs pechez, en pleurs & prenans plusieurs d'iceux le corps nostre seigneur: car le lendemain sans faillir attendoient la mort, comme depuis il fut relaté par aucuns prisonniers. Et fut vray que le Duc d'Orleans en ceste nuit manda le Comte de Richemont, qui menoit les gens du Duc d'Acquitaine & les Bretons: & eux assemblez iusques à deux mille bacinets & gens de traict, allerent iusques assez pres du logis des Anglois. Lesquels doubans que les François ne voulsissent enuahir, se meirent tous en ordonnance dehors les hayes en bataille, & commencerent à traire l'un contre l'autre. Adoncques fut le Duc d'Orleans fait cheualier, & avec luy plusieurs autres: apres laquelle entreprinse lesdits François retournerent en leurs logis, & pour ceste nuit ne fut fait autre chose entre eux parties. Durant lequel temps le Duc de Bretagne vint de Roüen à Amiens à tout six mille combattans pour estre en l'ayde des François, fils eussent attendu iusques au samedy: & pareillement le seigneur de Longny Marechal de France venant en l'ayde desdits François à tout six cens hommes d'armes, coucha cedit iour à six lieües pres de l'ost: & le lendemain se partit tresmatin pour y cuider venir.

*Comment les Francois & Anglois s'assemblerent à batailler l'un contre l'autre apres d'Azincourt en la Comté de saint Pol, & obtindrent lesdits Anglois la iournée.*

CHAP. CXLVIII.

**E**N apres le lendemain qui fut le vendredy xxv. iour du mois d'Octobre mille quatre cens & quinze les François. C'est à sçauoir le Connestable & tous les autres officiers du Roy, les Ducs d'Orleans de Bourbon, de Bar & d'Allençon, les Comtes de Neuers, d'Eu, de Richemont, de Vendosme, de Marle, de Vaudemont, de Blaumont, de Salines, de grand Pré, de Rouffy, de Dampmartin, & generallyment tous les autres nobles & gens de guerre s'armerent & issirent hors de leurs logis. Et adonc par le conseil du Connestable & aucuns saiges du conseil du Roy de France, fut ordonné à faire trois batailles: c'est à sçauoir auantgarde, bataille & arrieregarde: en laquelle auantgarde furent mis enuiron huit mille bacinets cheualiers & escuyers, quatre mille archers, & quinze cens arbalestriers. Laquelle auantgarde conduisoit ledit Connestable. Et avec luy les Ducs d'Orleans & de Bourbon, les Comtes d'Eu & Richemont, le Marechal Bouciquault, le maistre des arbalestriers, le seigneur de Dampierre Admiral de France, messire Guichart Daulphin & aucuns autres capitaines & le Comte de Vendosme & aucuns autres officiers du Roy à tout xvj. cens hommes d'armes: & fut ordonné faire vne esle pour ferir lesdits Anglois de costé: & l'autre esle conduisoit messire Clugnet de Brabant Admiral de France, & messire Loÿs Bourdon à tout huit cens hommes d'armes de cheual gens esleuz de cheual: avec lesquels estoient pour rôpre le traict d'iceux Anglois messire



fite Guillaume de Saueufes, Hector & Philippe & ses freres, Ferry de Mailly, Aliaume de Gaspammes, Allain de Vendosme, Lamont de Launoy & plusieurs autres iusques au nōbre dessusdit: & en la bataille furent ordonnez autant de cheualiers & escuyers & gens de traict, cōme en l'auantgarde: desquels estoient conduiseurs les Ducs de Bar & d'Allençon, les Comtes de Neuers, de Vaudemont, de Blaumont, de Salines, de Grand-pré & de Rouffy. Et en l'arrieregarde tout le surplus de gens d'armes, lesquels conduisoient les Comtes de Marle, de Dâpmartin, de Fauquemberghe, le seigneur de Louroy capitaine d'Ardre, qui auoit amené ceux des frontieres de Boulenois. Et apres que toutes les batailles dessusdictes furent mises en ordonnance, comme dit est, estoit grand noblesse de les veoir. Et comme on pouoit estimer à la veüe du monde estoient bien en nombre six fois autant que les Anglois. Et lors que ce fut fait, lesdits François seoiēt par compagnie deuisees chacun au plus pres de sa baniere attédās la venue desdits Anglois, en eux repaisans & aussi faisant l'vn avec l'autre paix & vnion ensemble des haynes, noises & dissensions qu'ils pouoient auoir eu en temps passé les vns contre les autres. Et furent en ce point iusques entre neuf & dix heures du matin, tenans iceux François pour certain veu la grand multitude qu'ils estoient, que les Anglois ne pourroiet eschapper de leurs mains. Toutesfois y en auoit plusieurs des plus sages qui moult doubtoient & craingnoient à les combattre en bataille publique. Pareillement lesdits Anglois ce vendredy au matin voyans que les François ne les approchoient pas pour les enuahir beurent & mangerent. Et apres appellans la diuine ayde contre iceux François qui les despitoient, se deslogerent de ladicte ville de Maisoncelles, & allerent aucuns de leurs coureurs par derriere la ville d'Azincourt, où ils ne trouuerent nuls gens d'armes: & pour efroyer lesdits François ambraferent vne granche & maison de la prioré S. George de Hefdin. Et d'autre part enuoya ledit Roy Anglois enuiron deux cens archiers par derriere son ost, affin qu'ils ne fussent apperceuz desdits François. Et entrerent secretement à Tramecourt dedans vn pré assez pres de l'auantgarde d'iceux François. Et là se tindrent tout coyement iusques à tant qu'il fut temps de traire, & tous les autres Anglois demourerent avec leur Roy: lequel tantost fait ordonner sa bataille par vn cheualier Chanu de vieillesse nommé Thomas Epinhen, mettant les archiers au front deuant, & puis les gens d'armes. Et apres fait ainsi comme deux esles de gens d'armes & archiers, & les cheuaulx & bagages furēt mis derriere l'ost. Lesquels archiers ficherent deuāt eux chacun vn peuchon aguisé à deux bouts: iceluy Thomas enhorta à tous generallemēt de par ledit Roy d'Angleterre, qu'ils cōbatissent vigoureusement pour garantir leurs vies: & ainsi cheuauchant luy troisieme par deuant ladicte bataille, apres qu'il eut fait lesdictes ordonnances ietta en hault vn baston qu'il tenoit en sa main, en disant nestrocque, & descendit à pied comme estoit le Roy, tous les autres: & au ietter, ledit baston tous les Anglois soubdainement feirent vne tresgrand criée, dont grandement fesmervueillerent les François. Et quand lesdits Anglois veirent que les François ne les approchoient, ils allerent deuers eux tout bellement par ordōnāce: & de rechef feirent vn tresgrand cry en arrestant & reprenāt leur alaine. Et adōc les dessusdits archiers abscons audit pré, tirerēt vigoureušemēt sur les François, en esleuāt cōme les autres grād huée: & incōtinēt lesdits Anglois approchās



les François. Premièrement leurs archiers dont il y en auoit biē treize mille commencerent à tirer à la volée cōtre iceux François d'aussi loing qu'ils pouoiēt tirer de toute leur puissance, desquels archiers la plus grād partie estoient sans armeures en leurs pourpointeaux, leurs chausses auallées ayans haches pendues à leurs courroyes ou espées: & si en y auoit aucuns tous nuds pieds, & sans chapperon. Les Princes estans avec ledit Roy d'Angleterre estoient son frere le Duc de Glocestre, le Duc d'Iorch son oncle, les Comtes d'Vrset, d'Exinforde & de Suffort, le Comte Mareschal & le Comte de Quin, les seigneurs de Cāber, de Beaumont, de Villeby & de Cornoüaille & plusieurs autres notables barons & cheualiers d'Angleterre. En apres les François voyās iceux Anglois venir deuers eux se meirent en ordonnance chacun dessoubs sa baniere ayans le bacinet au chief: toutefois ils furent admonnestez par ledit Connestable & aucūs autres Princes à confesser leurs pechez en vraye contrition, & enhortez à bien & hardiement combattre comme auoient esté lesdits Anglois. Et là les Anglois sonnerent leurs trōpettes fort à l'approcher: & les François commencerent à encliner, affin que les traic̃ts n'entraissent en leurs visieres de leurs bacinets: & ainsi vn petit allerent à l'encontre d'eux, & les feirent vn peu reculler: mais auant qu'ils peussent aborder ensemble, il y eut moult de François empeschez & naurez par le traic̃t desdits archiers Anglois: & quand ils furent venus (comme dit est) iusques à eux ils estoient si bien & pres serrez l'vn de l'autre, qu'ils ne pouoient leuer leurs bras pour ferir sur leurs ennemis, sinon aucuns qui estoient au front: deuant lesquels les bouteurent de leurs lances qu'ils auoient couppées par le meillieu, affin qu'elles feussent plus fortes, & qu'ils peussent approcher de plus pres lesdits Anglois: & ceux qui deuoient rompre lesdits archiers, c'est à sçauoir messire Clugnet de Brabant & les autres avec luy, qui deuoient estre huiēt cens hommes d'armes ne furent que sept vingts qui s'efforassent de passer parmy lesdits Anglois: & fut vray que messire Guillaume de Saueuses qui estoit ordonné à cheual comme les autres, se desrangea tout seul d'avecques ses compaignons, cuidant qu'ils le deussent suiui, alla frapper dedans lesdits archiers, & là incontinent fut tiré ius de son cheual & mis à mort. Les autres en la plus grand partie à tout leurs cheuaux pour la force & doubte du traic̃t, redonderent parmy l'auantgarde desdits François: ausquels ils feirent de grans empeschemens, & les desrompirent en plusieurs lieux, & feirent reculler en terre nouuelle semée: car leurs cheuaux estoient tellement naurez du traic̃t des archiers Anglois, qu'ils ne les pouoient tenir ne gōuerner: & ainsi par iceux fut ladiēte aduantgarde desordonnée, & commencerent à cheoir hommes d'armes sans nombre, & les dessusdits de cheual pour paour de mort, se meirent à fuyr arriere de leurs ennemis: à l'exemple desquels se departirent & meirent en fuyte grand partie des dessusdits François. Et tantost apres voyans les dessusdits Anglois ceste diuision en l'auantgarde, tous ensemble entrèrent en eux & ietterent ius leurs arcs & saiettes, & prindrent leurs espées, haches, mailles, becs-de-faulcons & autres bastons frappant, à batant & occifant iceux François: tant qu'ils vindrent à la seconde bataille, qui estoit derriere ladiēte auantgardē: & apres lesdits archiers suiuiōēt moult ledit Roy Anglois & ses gens d'armes: & adonc Anthoine Duc de Brabant qui auoit esté mandé de par le Roy de France accōpagné à petit nombre, se bouta entre ladiēte auantgarde & bataille



le: & pour la grand haste qu'il auoit eue, auoit laissé ses gens derriere: mais sans delay il fut mis à mort desdits Anglois: lesquels conioinctement & vigoureusement enuahirent de plus en plus lesdits François, en desrompât les deux premieres batailles dessusdictes en plusieurs lieux, en abatant & occisant cruellement & sans mercy iceux, & entre-temps aucuns furent releuez par l'ayde de leurs varlets & menez hors de ladicte bataille: car lesdits Anglois sy estoient moult entencieux & occupez à combattre, occire & prendre prisonniers: pourquoy ils ne chassoient, ne poursuiuoient nully. Et lors toute l'arrieregarde estans encores à cheual voyans les deux premieres batailles dessusdictes auoir le pire se meirent à fuyr, excepté aucuns des chiefs & conducteurs d'icelle: c'est à sçauoir qu'entre-temps que ladicte bataille duroit, les Anglois qui ja estoient au dessus, auoient prins plusieurs prisonniers François. Et adonc vindrent nouvelles au Roy Anglois que les François les assailloient par derriere: & qu'ils auoient desia prins ses sommiers & autres bagues, laquelle chose estoit veritable: car Robinet de Bournouuille, Riffart de Clamasse, Ysambart d'Azincourt & aucuns autres hommes d'armes accompaignez de six cens paÿsans allerent ferir au bagaige dudit Roy d'Angleterre. Et prindrent lesdictes bagues & autres choses avec grand nombre de cheuaux desdits Anglois, entre-temps que les gardes d'iceux estoient occupez en la bataille. Pour laquelle destrouffe ledit Roy d'Angleterre fut fort troublé voyant avec ce deuant luy à plain champ les François qui s'en estoient fuyz eux recueilliez par compaignies, doubtons qu'ils ne voulsissent faire nouvelle bataille, fait crier à haute voix au son de la trompette, que chacun Anglois sur peine de la hart tuaist ses prisonniers, affin qu'ils ne feussent en ayde au besoing de leurs gens. Et adonc soubdainemēt fut faicte moult grand occision desdits François prisonniers: pour laquelle entreprinse les dessusdits Robinet de Bournouuille, & Ysambart d'Azincourt furent depuis punis & detenez prisonniers longue espace par le commandement du Duc Iean de Bourgongne, combien qu'ils eussent donné à Philippe Comte de Charrolois son fils vne moult precieuse espée aornée de riches pierres & autres ioyaux, laquelle estoit au Roy d'Angleterre. Et auoit esté trouuée & prinse avec ses autres bagues par iceux, affin que fils auoient aucune occupation pour le cas dessusdit, iceluy Comte les eut pour recomandez. En outre le Comte de Marle, le Comte de Fauquēbergue, les seignrs de Louroy & de Chin à tout six cens hōmes d'armes qu'ils auoient à grād peine retenuz, allerēt frapper tres vaillāment dedās lesdits Anglois, mais ce riēs n'y valut. Car tātost furent tous morts ou prins: & là en plusieurs lieux les François s'assemblerēt par petis hostiaux, Lesquels par iceux Anglois sans faire grād deffence, furēt assez brief abatus, occis ou prins. Et en la cōclusion ledit Roy d'Angleterre obtint la victoire contre ses aduersaires, & furēt morts sur la place de ses Anglois enuiron seize cens hōmes de tous estats: entre lesquels y mourut le Duc d'Iorch oncle du dessusdit Roy d'Angleterre. Et pour vray en ce propre iour deuāt qu'ils fassēblāssent à bataille, & la nuit de deuāt furēt faits de la partie des François bien cccc. cheualiers ou plus. En apres ledit Roy d'Angleterre quād il fut demouré victorien sur le chāp (cōme dit est) & tous les François, sinō ceux qui furent prins ou morts, se furēt departis fuyās en plusieurs & diuers lieux, il enuirona avec aucū de ses Princes le chāp dessusdit où la bataille auoit esté. Et entre-tēps q̄ ses gēs



estoyent occupez à desnuer & deuestir ceux qui estoient morts, il appella le hault du Roy de France Roy d'armes nommé Montioye, & avec luy plusieurs autres heraulx Anglois & François, & leur dit. Nous n'auons pas faicte ceste occision ains a esté Dieu tout puissant, comme nous croyons par les pechez des François. Et apres leur demanda auquel la bataille deuoit estre attribuée à luy ou au Roy de France. Et lors iceluy Montioye respōdit audit Roy d'Angleterre qu'à luy deuoit estre la victoire attribuée, & non au Roy de France. Apres iceluy Roy leur demāda le nom du chastel qui veoit assez pres de luy: & ils responderent qu'on le nommoit Azincourt. Et pourtant, ce dit-il, que toutes batailles doiuent porter le nom de la plus prochaine forteresse où elles sont faictes, ceste cy dès maintenant & perdurablement aura en nom la bataille d'Azincourt. Et apres que lesdits Anglois eurent esté grand espace sur le champ dessusdit, voyans qu'ils estoient deliurez de tous leurs ennemis, & aussi que la nuit approchoit s'en retournerent tous ensemble en la ville de Maisongelles, où ils auoient logé la nuit de deuant: & là se logerent portans avec eux plusieurs de leursdits Anglois naurez. Et apres leur departement par nuit aucuns François estans entre les morts naurez, se trainerent par nuit au mieux qu'ils peurent à vn bois qui estoit assez pres duit champ, & là en mourut plusieurs: les autres se tirerent à aucuns villages, & autres lieux où ils peurent le mieux: & le lendemain ledit Roy d'Angleterre & ses Anglois se deslogerent tresmatin de ladicte ville de Maisongelles, & à tout leurs prisonniers de rechief allerent sur le champ: & ce qu'ils trouuerent desdits François encores en vie les feirent prisonniers où ils les occirent. Et depuis là prenans leur chernin se departirent, & en y auoit bien les trois parts à pied: lesquels estoient moult trauaillez tant de ladicte bataille, comme de famine & autres mesaises: & par ceste maniere retourna le Roy d'Angleterre en la ville de Calais apres sa victoire sans trouuer aucun empeschement, & là laissa les François en grand douleur & tristesse pour la perte & destruction de leurs gens.

*Comment plusieurs Princes & autres notables seigneurs de diuers païs furent morts à ceste piteuse besongne, & aussi les aucuns faits prisonniers. CHAP. CXLIX.*

**S**'Ensuient les noms des seigneurs & gentils-hommes qui moururent à ladicte bataille de la partie des François. Premièrement les officiers du Roy: c'est à sçauoir messire Charles d'Albreth Cōestable du Roy de France, le Mareschal Bouciquault, qui fut mené au païs d'Angleterre & tenu prisonnier & là mourut, messire Iacques de Chastillon seigneur de Dampierre Admiral de France, le seigneur de Rambures maistre des arbalestriers, messire Guichard Daulphin maistre d'hostel du Roy. Les Princes, le Duc Anthoine de Brabant frere au Duc Iean de Bourgongne, le Duc Edouard de Bar, le Duc d'Alençon, le Comte de Neuers frere audit Duc de Bourgongne, messire Robert de Bar Comte de Marle, le Comte Vaudemont, Iean frere au Duc de Bar, le Comte de Blaumont, le Comte de Grand-pré, le Comte de Rouffy, le Côte de Fauquēbergue, messire Loys de Bourbon fils au seigneur de Preaux.

Autres grans seigneurs tant des marches de Picardie comme d'autres païs, le Vidame d'Amiens, le seigneur de Croÿ & son fils messire Iean de Croÿ, le seigneur de Helly, le seigneur d'Auxi, le seigneur de Brimeu, le seigneur de Poix, l'Estandart



standart seigneur de Crequy, le seigneur de Louroy, messire Vitart de Bours, messire Philippe d'Auxi seigneur de Dampierre baillif d'Amiens & son fils seigneur de Raineual, & son frere seigneur de Longueual, & son frere messire Alain, le seigneur de Mailly & son fils aîné, le seigneur d'Inchy, messire Guillaume de Saueuses, le seigneur de Neufuille & son fils le Chastellain de Lens, messire Jean de Moreul, messire Rogue de Poix, messire Jean de Bethune seigneur de Moreul en Brie, messire Symon de Craon seigneur de Clarfy, le seigneur de Rocheguyon & son frere le Vidame de Launois, le seigneur de Galigny, le seigneur d'Aliegre en Auvergne, le seigneur de Bauffremont en Champagne, messire Jacques de Heu, le seigneur de saint Bris, Philippe de Fosseux, messire Regnault de Crequy seigneur de Comtes & son fils messire Philippe, le seigneur de Mannes & son frere Lancelot, Mahieu & Jean de Humieres freres, messire Loys de Beau-fault, le seigneur de Ront, messire Raoul de Manne, messire Oudart de Renty & deux de ses freres, le seigneur d'Applincourt & son fils messire Jacques, messire Loys de Quistelle, le seigneur de Vaurin & son fils, le seigneur de Lidequerke, messire Jacques de Lescuelle, le seigneur de Hames, le seigneur de Houdescocte, le seigneur de Pulcres, messire Jean Baleul, messire Raoul de Flandres, messire Collart de Fosseux, le seigneur de Roissimbos & son frere Loys de Bouffy, le seigneur de Thiennes, le seigneur dudit lieu d'Azincourt & son fils, messire Hustin Kieret, le Begue de Caieu cheualier & son frere Payen, le seigneur de Varigines, le seigneur d'Auffemont & son fils, messire Raulequin, messire Raoul de Neelle, le seigneur de saint Crespin, le Vicomte de Quesnes, messire Pierre de Beauvoir Baillif de Vermendois, messire Jean de Lully & son frere messire Griffon, le seigneur de saint Symon & son frere Gallois, Collart de la Porte seigneur de Bel-lincourt, messire Yvain de Cramailles, le seigneur de Cerny en Laonnois, messire Drieu d'Argiers seigneur de Bethencourt, messire Gobert de la Bove seigneur de Sauois, le seigneur de Blainuille, le seigneur d'Yuery & son fils messire Charles, le seigneur de Becqueuille & son fils messire Jean Marthel, le seigneur du Treët, le Seneschal d'Eu, le seigneur de la Riuere de Tybouuille, le seigneur de Courcy, le seigneur de saint Beuve, le seigneur de Beau-mainnil, le seigneur de Combouches, le seigneur de la Heuse, le seigneur de Viesport, messire Bertrand Painel, le seigneur de Chambois, le seigneur de saint Cler, le seigneur de Moncheuerel, le seigneur d'Ouffreuille, messire Enguerran de Fontaines & son frere messire Charles, messire Almaury de Craon seigneur de Brolay, le seigneur de Montejan, le seigneur de la Haye, le seigneur de l'Isle Bouchart, messire Jean de Craon seigneur de Montbason, le seigneur de Bueil, le seigneur de l'Auemont sur Loyre, messire Anthoine de Craon seigneur de Beau-Vergier, le seigneur d'Assé, le seigneur de la Tour, le seigneur de l'Isle Gonnort, messire Jean Dreux, messire Germain de Dreux, le Vicomte de Tremblay, messire Robert de Bouuay, messire Robert de Challus, messire Jean de Bonnebault, le seigneur de Montanguier, messire Jean de Vallecourt, le seigneur de Sainteron, messire Ferry de Sardonne, messire Pierre d'Argie, messire Henry d'Ornay, le seigneur des Roches, messire Jean de Montenay, le seigneur de Bethencourt, le seigneur de Combourt, le Vicomte de la Belliere, le seigneur de la Tute, messire Bertrand de Montauban, Bertrand de saint Gille Seneschal de Hainault, le seigneur de la



Hamecte, le seigneur du Quesnoy, le seigneur de Môtigny, le seigneur de Quieruran, le seigneur de Jeummôt, le seigneur de Chin, messire Symon de Haurech, le seigneur de Poctes, messire Jean de Gres, messire Allemand d'Estausines, messire Philippes de Lens & messire Henry freres à l'Euesque de Cambray, messire Michel du Chastellier & son frere Guillaume de Vaudripôt, Ernoul de Vaudrigien, Pierre de Molin, Jean de Buait, George de Quieruran & Henry son frere, le seigneur de Saures, messire Briffault son frere, le Baudrain d'Aisne cheualier, messire Maillart d'Azouuilles, Palamedes des Marquais, le seigneur de Boufincourt, le seigneur de Fresencourt, le seigneur de Vallusant, le seigneur de Hectrus Guernier de Brusquent, le seigneur de Moÿ en Beauuoisis & son fils Gamot de Bournouuille & son frere, Bertrâd Louuelet de Malsinguehen & son frere, messire Collart de Phiennes, Allain de Vendosme, Lamont de Launoy, messire Colinet de sainct Py, le seigneur du Bos d'Anequin, Lancelot de Fremeusent, le seigneur d'Aumont, messire Robinet de Vaucourt, messire Raïsse de Moncaurel, messire Lâcelot de Clary, le seigneur de la Rachie, messire Guerard de Herbainnes, messire Guerard de Haucourt, messire Robert de Montigny, messire Charles de Môtigny, messire Charles de Chastillon, Philippe de Poictiers, le seigneur de Feuloles, le seigneur de sainct Pierre, Guillaume For-escu, Burel de Gueraumes, Robert de Potiaumes, le fils du Baillif de Roüen, le Preuost des Mareschaux de France, Bertrand de Belloy, Jaques de Han, le seigneur de Baïfir & Martel du Vahuon son frere, Jean de Maletraicts, Raoul de Ferieres, Raoul de Longeul cheualier, Henry de la Lende, messire Ernault de Corbie seigneur d'Aniel, Jean Descoïeuelle, messire Yvain de Biaual, messire Brunel Fretel, le Baudrain de Belloy cheualier, messire Regnault d'Azincourt, le gouuerneur de la Comté de Rethels, Ponce de Salus cheualier seigneur du Chastel-neuf, le seigneur de Marquectes, Symonnet de Moruillier, Foleuille le Bouteillier du Duc d'Acquitaine, Gallois de Fougieres, messire Lancelot de Reubempré, Lyonnet Torbis, le seigneur de Boissay, Anthoine d'Ambrine, messire Hector de Chartres le ieune, & ses deux freres, Tauppinet de la Nofuille, Thibault de Faÿ, le seigneur de Beauvoir sur Autie, Hue des Autels, le seigneur de Caucroy & son frere Eustasse d'Aubrunes, Lancelot de Couchy Jean de Launoy, messire Collart de Moubertant, messire Charles Boutry, messire Guy Gourle & Jean Gourle son frere, le Bon de Sains, Anthoine de Broly, Guillaume de Villers, Royssart de Rosselay, Aubert de Merbres, Regnault de Villers seigneur d'Vrendonne, Floridas du Souys, le seigneur de Regnauille, Baughois de la Beuuriere & Gamart son frere, le Ploutre de Guerboal, Pierre Aloyer, Perceual de Richebourg, le seigneur de Fiefes & son fils le Begue de Quenouilles, Gaudeffroy de sainct Marcq, le seigneur de Tencques, le seigneur de Herlin, Symon de Môchiaux, messire Maillet de Gournay & son frere Porus, Jean de Noyelle, Pierre de Noyelle & Lancelot de Noyelle, messire Cernel de Hangiers, Jean d'Authuille seigneur de Vaverans, Regnault de Guerbauual, Guillaume seigneur de Rin, Pierre Remy, Saussset d'Eusne, le seigneur de Haucourt en Câbrefis, messire Guichard d'Ausne, le seigneur de Raïsse, le seigneur d'Espaigny, le seigneur de Cheppon, Jean de Chaule seigneur de Bretigny, Jean de Blausel, Guillebert de Guerbauual, Haudin de Beleual, messire Guerrad de Haurefsis, messire Loÿs de Vertain, messire Estourdy d'Ongines & son



son frere Bertrand, messire Henry de Boissy seigneur de Caule, messire Artus de Moÿ, le Borgne de Noaille, messire Floridas de Moreul, messire Triltan de Moÿ, messire Bridoul de Puiseurs, le seigneur de Verneul, Langhois de Guerbauual, le Vicomte de Dommart, Ponchon de la Tour, Gaudeffroy de Prouuille. Finablement tant Princes, cheualiers, escuyers comme autres gens furent morts en ladicte iournée par la relation de plusieurs heraulx, & autres notables personnes dignes de foy dix mille hommes & au dessus : desquels grand partie furent emportez par leurs amis apres le departement desdits Anglois, pour enterrer où bon leur sembleroit : desquels dix mille, on esperoit y auoir enuiron seize cens varlets & tout le surplus gentils-hommes. Et fut trouué qu'à compter les Princes, y auoit mort de cent à six vingts banieres. Durant laquelle bataille le Duc d'Alençon dessus nommé à l'ayde de ses gens tresperça tres-vaillamment grand partie de la bataille desdits Anglois, & alla iusques assez pres du Roy d'Angleterre, en combattant moult puiffamment : & tant qu'il naura & abbatit le Duc d'Iorch : & adoncques ledit Roy voyant ce, approcha pour le releuer & finclina vn petit. Et lors ledit Duc d'Alençon le ferit de sa hache sur son bacinet, & luy abbatit vne partie de sa courōne. Et en ce faisant les gardes du corps du Roy enuironnerent tresfort iceluy : lequel apperceuant, qu'il ne pouuoit eschapper du peril de la mort, en esleuant sa main, dit au dessusdit Roy : Je suis le Duc d'Alençon, & me rends à vous : mais ainsi qu'iceluy Roy vouloit prendre sa foy, fut occis presentement par lesdictes gardes. Et en icelle mesme heure le seigneur de Longny Mareschal de France (dont dessus est faicte mention) venoit à tout six cens hommes d'armes des gens du Roy Loÿs pour estre à ladicte bataille, & desja estoit à vne lieüe pres, quand il rencontra plusieurs François naurez & autres qui s'en fuyoient. Lesquels luy dirent qu'il retournaist, & que les seigneurs de France estoient tous morts ou prins par les Anglois : lequel Longny ayant grieffement au cueur courroucé s'en retourna à Roüen deuers le Roy de France.

S'ensuiuent les seigneurs & gentils-hommes, qui furent prisonniers aux Anglois à ladicte iournée : lesquels on estimoit à quinze cens ou enuiron tous cheualiers & escuyers. Premierement Charles Duc d'Orleans, le Duc de Bourbon, le Comte d'Eu, le Comte de Vendosme, le Comte de Richemont, messire Iacques de Harcourt, messire Iean de Craon seigneur de Dommart, le seigneur de Fosseux, le seigneur de Humieres, le seigneur de Roye, le seigneur de Cany, messire Boors Quieret seigneur de Heuchin, messire Pierre Quieret seigneur de Hamécourt, le seigneur de Legne en Hainault, le seigneur de Noyelle nommé le Blanc Cheualier & Baudo son fils, le ieune seigneur d'Inchy, messire Iean de Vaucourt, messire Actis de Brimeu, messire Iennet de Poix, le fils aîné & heritier du seigneur de Ligne, messire Gilbert de Launoy, le seigneur d'Ancob en Ternois.

*Comment apres le partement du Roy d'Angleterre, plusieurs Francois vindrent sur le champ pour trouuer les amis du Comte de Charrolois, qu'il feist mettre en terre & autres matieres.*

CHAP. CL.

Pp iiii





Pres ce que le Roy d'Angleterre & ses Anglois se furent partis le samedi pour aller à Calais, comme dit est, plusieurs François vindrēt & retournerēt sur ledit champ: & ce que par plusieurs auoit esté remué, fut d'iceux de nouuel renuersé: les aucuns pour trouuer leurs maistres & seigneurs, affin de les emporter en leurs païs enterrer: les autres y vindrent pour piller ce que lesdits Anglois auoient laissé. Car ils n'auoient emporté fors, or, argent, vestemens precieux, haubers & aucunes choses de grād valeur, pourquoy la plus grand partie du harnois desdits François fut trouué ens ou champ: mais il ne demoura pas gramment qu'ils furent tous desnuez de leurs vestemens. Et mesmement à la plus grand partie furent ostez leurs linges, draps, brayes, chausses & tous autres habillemens par les païsans hommes & femmes des villages à l'enuiron. Et demourerent sur le champ tous desnuez, comme ils estoient quand ils issirent du ventre leur mere: & en cedit samedi, dimenche, lundy, mardy, mercredy, furēt leuez & bien lauez plusieurs seigneurs & Princes: c'est à sçauoir les Ducs de Brabant, de Bar & d'Alençon, les Comtes de Neuers, de Blaumont, de Vaudemōt, de Faulquemberghe, le seigneur de Dampierre Admiral, mesire Charles d'Albreth Seneschal de France, lequel fut enterré à Hefdin en l'Eglise des freres Mineurs: & les autres furent emportez par leurs seruiteurs, les vns en leurs païs, & les autres en diuerses Eglises: & quant à ceux du païs, tous ceux qui peurent estre cogneuz furent leuez & emportez pour mettre en terre és Eglises de leurs seigneuries. En apres Philippe Comte de Charrolois sçachant la dure & piteuse aduventure des François, de ce ayant au cueur grand tristesse, & par especial de ses deux oncles: c'est à sçauoir du Duc de Brabant & du Comte de Neuers, meu par pitié fait enterrer à ses despens tous les morts, qui estoient demourez mis sur le champ. Et à ce faire furent commis de par luy, l'abbé de Roussianuille & le Baillif d'Aire: lesquels feirent mesurer en quarrure xxv. verges de terres, en laquelle furent faits trois fossez de la largeur de deux hōmes: dedans lesquelles furent mis par compte fait cinq mille huit cens hommes, sans iceux qui auoient esté leuez par leurs amis: & ausi les autres naurez à mort qui allerēt mourir és bonnes villes, aux hospitaux & ailleurs tant aux villaiges comme par les bois, qui estoient au plus pres. Desquels y eut vn tresgrand nombre, comme dit est, ailleurs. Laquelle terre dessusdicte & fossez fut assez tost beneiste & faicte cymetiere par l'Euesque de Guines au commandement & comme procureur de Loys de Luxembourg Euesque de Theroüenne. Et apres furēt faictes tout au tour fortes hayes bien espinées par dessus, affin que les loups, chiens ou autres bestes, ne peussent entrer dedans ou deterrer & māger les dessusdits corps. Apres laquelle piteuse & douloureuse iournée, aucuns clerks du Royaume de France moult esmerueillez feirent les vers qui ensuiuent.

*Chief ensommé par piteuse aduventure,  
Prince regnant plain de sa volenté,  
Sang si diuis qui de l'autre n'a cure,  
Conseil suspect de partialité,  
Peuple destruiēt par prodigalité,  
Feront encores tant de gens mandier*

*Qu'à vn chacun faudra faire mestier.  
Noblesse fait encontre sa nature,  
Le clergie craint & cele verité,  
Humble commun obeïst & endure,  
Faulx protesteurs luy font aduersité,  
Mais trop souffrir induit neceßité:*

*Dont*



*Dont aduiendra que ia ueoir ie ne quier  
Qu'à vn chacun faudra faire mestier.  
Foible ennemy en grand desconfiture,  
Victorien & pou debilité  
Prouision verbal qui petit dure,*

*Dont nulle rien n'en est excuré  
Regne des siens mesme persecuté,  
Ta fin sera & ton estat dernier  
Qu'à vn chacun faudra faire mestier.*

*S'ensuiuent les noms des principaux qui à ladiète bataille ne  
furent ne morts ne prins.*

PREMIER le Comte de Dampmartin seigneur de la Riuiere, messire Clugnet de Brabant soy disant Admiral de France, messire Loÿs Bourdon, messire Galliot de Gaules, messire Jean d'Engennes.

*Comment le dessusdit Roy d'Angleterre alla par mer en Angleterre, où il fut ioyeusement receu pour sa bonne fortune: & du Comte de la Marche qui alla en Italie.*

## CHAP. CLI

**E** Tem le sixiesme iour de Nouembre apres ce que Henry Roy d'Angleterre eut refreschy ses gens en la ville de Calais: & ausi que les prisonniers qui auoient tenu Harfleur furent venus deuers luy, qui promeis l'auoient, monta sur la mer & alla arriuer à Douures en Angleterre. Mais en trespasant fut ladiète mer moult fort troublée, & tant que deux vaisseaux plains des gens du seigneur de Cornoüaille furent perils: & aucuns autres allerent arriuer vers Zellande au port de Serise: toutesfois ledit Roy d'Angleterre retourné en son paÿs pour sa victoire de sa bataille, & avec ce pour la conqueste qu'il auoit fait de si noble port comme Harfleur, fut tresgrandement loué & glorifié du clergie & peuple de son Royaume, & s'en alla à Londres menant tousiours avec luy les Princes de France qu'il auoit prisonniers: ouquel an vn petit par auant messire Iacques de Bourbon Comte de la Marche estoit allé en Italie grandemēt acompaigné de cheualiers & escuyers: & auoit prins à mariage la Royne Ieanne sœur au Roy Lācelot: & par ainsi fut tenu de ceux du paÿs pour Roy de Cecille & de Naples, & en possessa par aucun peu de temps assez paisiblement. Si feit son Connestable de messire Lourdin de Sailligny, & estoit vn de ses capitaines, messire Hue de Bruneul seigneur de Thiembronne.

*Comment le Roy de France & autres Princes eurent grand tristesse pour la perte de la iournée d'Azincourt: du Duc Iean de Bourgongne & autres besongnes.*

## CHAP. CLII.

**A** Pres ce que les nouvelles furēt portées à Roüen deuers le Roy de France de la douloureuse aduenture & perte de ses gés, ne faut pas doubter que luy & les autres Princes n'eussent au cueur grand tristesse: neantmoins dedans certains briefs iours ensuiuant en la presence du Roy Loÿs, des Ducs d'Acquitaine, de Berry & de Bretagne, du Comte de Ponthieu son aîné fils & plusieurs autres de son grand conseil, cōstitua & establit le Comte d'Armignac Connestable de France, & manda iceluy hastiement au paÿs de Languedoc à venir deuers luy: & entre-temps le Duc Iean estant en son paÿs de Bourgongne luy furēt portées nouvelles de la perte des François: Pourquoi pa-



reillement que les autres Princes il en fut trefdolent & desplaisant, par especial de ses deux freres : c'est à sçauoir le Duc de Brabant & le Comte de Neuers : Mais nonobstant ce, sans delay se prepara à venir vers Paris à tout grand puissance de gens d'armes. Et pourtant que les nouuelles en allerent iusques au Roy de France & à ses Princes, se hastèrent de retourner audit lieu de Paris . Et y vint le Roy & les dessusdits seigneurs trois iours deuant la S. Katherine . Si estoit en la compagnie dudit Duc de Bourgogne le Duc de Lorraine & dix mille cheuaucheurs. Pourquoy les Parisiens doubans ledit Duc de Bourgogne, enuoyerent leurs ambassadeurs solempnels à Melun deuers la Roynes de France , qui là estoit malade : laquelle de là se fait porter par plusieurs hommes de pied audit lieu de Paris . Et là se logea à l'hostel d'Orleans avec la Duchesse d'Acquitaine fille audit Duc de Bourgogne . Et est vray que iceux Parisiens & aucuns officiers du Roy, qui auoient esté fauorables à la partie d'Orleans contre ledit Duc de Bourgogne , comme dit est, le doubterent tresfort: pource qu'il auoit en sa compagnie plusieurs de ceux qui auoient esté bannis & enchassez hors de ladicte ville de Paris: C'est à sçauoir messire Elyon de Iacqueuille , messire Robinet de Mailly , maistre Eustace de Lactre , maistre Iean de Troyes , Caboche Denysot de Chaumont , Garnot de Sainction & plusieurs autres, & pourtāt traicterent vers le Roy & le Duc d'Acquitaine que messire Clugnet de Brabant , le Sire de Barbasan & le sire de Bocquiaux furent mandez à venir audit lieu de Paris à tout grand nombre de gens d'armes, pour la garde & resistance d'icelle: & aussi pour accompagner ledit Duc d'Acquitaine. Et avec ce fut mandé de rechief le Comte d'Armignac, qu'il venist à Paris le plus brief que faire se pouuoit à tout la plus grand puissance de gens d'armes qu'il pouoit finer : & le dessusdit Duc Iean venant de Bourgogne passa par Troyes & Prouins, & s'en vint à Meaulx en Brie : auquel lieu on luy reffusa l'entrées par le commandement du Duc d'Acquitaine & du conseil du Roy, qui leur auoit escrit que pas ne le meissent dedans , dont il ne fut pas bien content. Et pourtant s'en alla à Laigny sur Marne , & se logea dedans la ville & ses gens sur le plat païs qui de ce fut moult trauaillé . Et d'autre partie se meirent sus plusieurs capitaines à grand puissance ou païs de Picardie : c'est à sçauoir messire Martelet de Mesnil, Ferry de Mailly , Hector & Philippe de Saueuses freres, messire Mauroy de S. Legier, messire Payan de Beaufort, Loys de Varigines & plusieurs autres : lesquels en fort degastant païs allerent par le pont au Maire iusques audit lieu de Laigny deuers iceluy Duc de Bourgogne , qui mandé les auoit. Et tāt multiplia sa compagnie qu'ils furent bien vingt mille cheuaux ou plus . Durāt lequel temps le Roy Loys sçachant que pas n'estoit aimé dudit Duc de Bourgogne pour la cause du renuoy de sa fille, se partit de Paris tout malade & s'en alla à Angiers : mais par auant son partement se voulut soubsmettre de leur discord sur le Roy & son grand conseil, moyennant qu'il fut ouï en ses deffences. A quoy iceluy Duc de Bourgogne ne voulut aucunemēt entendre: mais fait responce à ceux qui pour ceste cause furent enuoyez deuers luy, que du tort & du blasme que ledit Roy Loys auoit fait à luy & à sa fille il l'amenderoit , en temps & en lieu quand il pourroit : lequel Duc de Bourgogne de Laigny sur Marne où il estoit, enuoya à Paris où il estoit deuers le Roy & son grand conseil messire Iean de Luxembourg, le seigneur de S. George & plusieurs autres



autres notables conseillers, qui exposèrent plainement au conseil du Roy la cause de sa venue, en faisant leur requeste qu'il peüst entrer en Paris avec toute sa puissance pour la seurté de sa personne : mais sur ce ils n'eurent aucune responce, si non que le Roy enuoyeroit deuers leur seigneur le Duc de Bourgongne bien brief luy faire responce. Lequel enuoya maistre Jean de Vailly president en Parlement, & aucuns ambassadeurs du conseil du Roy : mais en la fin apres plusieurs traictez & ambassades, il ne peut pas finer au conseil du Roy, n'aux Parisiens d'entrer à puissance dedans ladicte ville de Paris. Ains luy fut dit, que s'il y vouloit aller en son simple estat, le Roy & son conseil en estoient contens & non autrement : ce que le Duc de Bourgongne n'eut iamais fait, car bien scauoit que ceux qui gouuernoient le Roy estoient ses mortels ennemis, & ne s'y fut pour riens fié.

*Comment les Parisiens & ceux de l'vniuersité allerent deuers le Duc d'Acquitaine, & autres Princes proposer aucunes besongnes de la mort d'iceluy Duc & du Connestable.*  
CHAP. CLIII.



Rest ainsi que les Parisiens principallemēt ceux de l'vniuersité, voyās de iour en iour que plusieurs maux & derisions se multiplioient entre les seigneurs du sang royal, & de ceux de leur conseil l'un contre l'autre à la grand destruction du Royaume & du pauvre peuple, allerent vn certain iour en grand multitude deuers le Duc d'Acquitaine, où estoit present le Duc de Berry & le Comte de Ponthieu, avec plusieurs autres grans seigneurs & gens d'Eglise, demandant audience de parler : laquelle obtenue le premier president en Parlement commença le theume qui s'ensuit. *Domine salua nos perimus* : c'est à dire sire sauue nous, car nous perissons : & est escrit ou chapitre de S. Matthieu, lequel clerement il exposa, en touchāt sagement & eloquemment plusieurs cōclusions, & declairant plusieurs malfaiteurs du Royaume, troublans & opprimans le pauvre peuple. Apres la fin de laquelle proposition, ledit Duc d'Acquitaine promptement iura en parolle de fils de Roy, que dorenavant les malfaiteurs dudit Royaume de quelque estat qu'ils fussent seroient punis selon leurs demerites : & que iustice seroit réparée & gardée, le clergie & le peuple seroient tenus en paix. Apres laquelle responce, se partirent trescontens du Duc d'Acquitaine les dessusdits : mais à brief dire, sa parolle ne son intention ne peurent pas venir à effect : car assez brief ensuiuant il accoucha malade de fieures, dont il mourut le xvij. iour de Decembre en l'hostel de Bourbon : pour la mort duquel furent faits pleurs, & lamentations de plusieurs seigneurs & autres ses seruiteurs : & fut aucune renommée, qu'il auoit esté empoisonné. Si fut gardé en vn sercus de plomb oudit hostel par quatre iours. Et là vindrent tous les colleges de Paris prier pour luy & depuis fut porté à S. Denys & enterré assez pres des royaux : en apres huit iours ensuiuant, le Côte d'Armignac mādē de par le Roy entra à Paris à receuoir l'office de Connestable & l'espée de la main du Roy, en faisant le serment sollemnel comme il est de coustume : & le remercia humblement le Roy du grand honneur, qu'il luy faisoit : & estoit ledit Comte d'Armignac accompagné à compter ceux de Paris bien de six mille combattans : & tantost enuoya Raymonnet de la guerre avec quatre cens bacinets en la ville de S. Denys en garnison, pour resister contre les gens dudit Duc de Bourgongne : &



pareillement és autres lieux sur seine, & ailleurs fait rompre tous ponts & passages. Et adonc Iean de Corssay natif de Berry fut de par le Roy ordonné maistre des arbalestriers de France, & messire Thomas de Lersies Baillif de Vermanois, & le sire de Humbercourt Baillif d'Amiens, messire d'Aunay natif de la Rochelle baillif de Senlis, messire Mansart d'Asne Baillif de Vitry, messire Brunet de Bans Baillif de Tournay, & pareillement par le Roy dessusdit furent faits plusieurs nouveaux officiers.

*Comment le Duc de Bretagne vint à Paris : le partement du Duc de Bourgogne de Laigny sur Marne, la prinse messire Martelet du Mesnil, & Ferry de Mailly.*

## CHAP. CLIIII.

**E** Tem en ces propres iours Iean Duc de Bretagne alla à Paris pour traicter deuers le Roy, que le Duc de Bourgogne peust aller deuers luy à tout sa puissance, laquelle chose il ne peut impetrer. Et pourtant s'en retourna assez tost en Bretagne : mais deuant son partement se courrouça moult fort à messire Taneguy du Chastel Preuost de Paris, qui luy dit plusieurs iniures, pource qu'il auoit fait mettre en prison en chastelet le Ministre des Mathurins Docteurs en Theologie: lequel auoit fait deuât ledit Preuost & peuple de Paris vne proposition de par le Duc de Bourgogne. Et brief ensuiuant ledit Preuost le deliura franc & quicte. En outre ledit Duc de Bourgogne (apres qu'il eut esté bien dix sepmaines en la ville de Laigny sur Marne) voyant que par nul moyen ne pouoit impetrer deuers le Roy ne son conseil d'entrer dedans Paris, sinon à son simple estat, se partit de là allant à Dampmartin : & puis vers Rheims, & de là par Laonnois, Terrace, Cambresis : & vint en la ville de Douïay, & de là à l'Isle : & tousiours durant ce temps auoit tresgrand nombre de gens d'armes sur les champs, desquels le pauvre peuple estoit moult fort oppresé: toutesfois à son partement de Laigny par aucuns des souldoyers du Roy, lesquels vers le Pont à Vaire prindrent & occirent de ses gens, dont grandement fut mal content: & pour sa longue demeure dedans icelle ville de Laigny, les Parisiens & autres gouuerneurs du Roy le nommoient en commun langage, Iean de Laigny. Et apres quand il fut retourné (comme dit est) en la ville de l'Isle aucun peu de temps ensuiuant, s'en alla en Brabant visiter ses deux nepueux : c'est à sçauoir Iean & Philippe fils au Duc Anthoine de Brabant. Et lors print avec luy Philippe Maïne, duquel il gouerna toute la terre, & institua officiers : c'est à sçauoir és Comtez de Ligney, & de S. Pol, & toutes les autres appartenances qui furent iadis au Comte Vvaleran de S. Pol rayon des dessusdits enfans. Et de là retourna en Flandres, & ordōna au seigneur de Fosseux capitaine de Picardie à faire retraire tous ses capitaines, & leurs gens d'armes hors de ses païs d'Arthois & des mettes enuiron. Et pource que les aucuns trauailloient moult fort les païs du Roy, le vingt & quatriesme iour de Ianuier par nuict Remonnet de la Guerre, le Preuost de Compiengne & le seigneur de Bocquiaux gouuerneur de Valois par le commandement du Roy & son conseil, assemblerent secrettement grand nombre de gens d'armes, & ferirent au logis messire Martelet du Mesnil & Ferry de Mailly, qui estoient logez ou païs de Santres en aucuns villages à tout bien six cens hommes de plusieurs tires assemblez, faisans grans desfrisions sur



sur le plat païs:lesquels par les dessusdits furent tous morts, prins ou destrouffez, sinon ceux qui eschapperent par fuitte. Et furent leldits meisme Martelet & Ferry de Mailly prins prisonniers, & emmenez à Compiengne. Toutestois le iour de la Purification nostre Dame ledit meisme Martelet & quatre autres gentils-hommes:Après ce qu'ils eurent esté questionnez par les officiers du Roy,furent trainez & puis penduz au gibet de Compiengne:& depuis ledit Ferry de Mailly par le moyen d'aucuns de ses amis,fut mis à plaine deliurance.

*Comment l'Euesque d'Arras feit reuocquer la sentence autres fois donnée contre maistre Jean Petit: & la venue de l'Empereur d'Allemagne en la ville de Paris.*

CHAP. CLV.

**E**N cest an dessusdit par la diligence de l'Euesque d'Arras Docteur en Theologie nommé Martin Porée, & d'aucuns autres ambassadeurs au Duc de Bourgogne, ayans de luy procuration, il fut sentié au Concille à Constances, dont la copie s'ensuit. Par le conseil des clerks, le droit par icelle nostre sentence ordinaire, laquelle nous affermons en ces escrits. Nous prononçons & declairons les proces, sentences & condamnations,arsins,deffences,executions faictes par l'Euesque de Paris contre maistre Jean Petit,& toutes choses,que de ce se sont ensuiuies,estre de nulle valeur & les adnullons & cassons: la condamnation des despens faits legitimentement deuant nous en ceste cause, nous les laissons à tauxer pour cause. Ainsi moy Iourdain Euesque d'Abbaneñ, ainsi moy Anthoine Cardinal d'Aquille:ainsi moy François Cardinal de Floréce le prononçons:lequel procès fut condamné ou Concille de Constāces le xv.iour de Ianuier l'an mille cccc.& xv.ouquel tēps vindrent à Paris deux cheualiers des gens de Sagismōt Empereur & Roy d'Allemagne,pour preparer son hostel & pourueāces pource qu'il deuoit venir audit lieu de Paris: ausquels deux cheualiers fut baillé pour loger leurdit seigneur & maistre le chastel du Loure. Et le iour du gras dimēche ensuiuant vint ledit Empereur à Paris, accompagné de huiēt cens cheuaucheurs ou enuiron:à l'encontre duquel allerent le Duc de Berry, le Cardinal,le Comte d'Armignac Connestable de France, le Chancelier, les Preuosts de Paris des Marchans, les escheuins & bourgeois de ladiēte ville en moult noble estat: lequel Roy par iceux fut amené loger au Loure. Et aucuns iours apres feit exposer au Roy & à son conseil la cause de sa venue: c'est à sçauoir pour l'vnion de nostre mere sainte Eglise: & apres il l'offrit moult au Roy à faire ce qu'il pourroit pour luy, & pour son Royaume: & depuis y eut vn Docteur en Theologie nommé maistre Guerrard Machet, qui proposa deuant luy moult notablement de par le Roy de France, de laquelle chose il fut moult content. Et Charles Roy de France fut assez sentieux,& mangerent plusieurs fois ensemble: & le lendemain des Brandons vindrent dedans Paris, pour veoir ledit Roy d'Allemagne, Loys Roy de Cecille & son beau fils le Comte de Ponthieu:& entretemps que ledit Empereur fut audit lieu de Paris, luy fut de par le Roy & ses Princes faicte le plus grand honneur & compaignie, qu'on eut peu faire à vn Roy de tout le monde: & apres que plusieurs parlemens eurent apres esté faits sur l'estat de l'vniuerselle Eglise & autres besongnes, il s'en partit de ladiēte ville de Paris le mercredy deuant les Pasques Fleuries, &



le conuoya le Roy de France iusques à la chappelle entre Paris & saint Denys : auquel lieu à leur departement s'offrirent moult l'un à l'autre : & de là fut conuoyé iusques à saint Denys par le Roy Loÿs, le Duc de Berry, le Cardinal de Bar : lequel Roy d'Allemagne fut receu honorablement audit lieu par l'abbé d'icelle ville. Et de là cheuaucha à Beauuais, à l'encontre duquel vindrent l'Euesque de ladicte ville de Beauuais, & grand foison de bourgeois, qui luy feirent grand reuerence : & le mena ledit Euesque loger en son hostel, & là feit ses pasques accompagné du Duc de Millan oncle du Duc d'Orleans, de l'Archeuesque de Rheims & d'aucuns autres ambassadeurs du Roy de France par luy enuoyez vers le Roy d'Angleterre son aduersaire. Et apres ce, de Beauuais par le pont de Remy s'en alla à saint Riquier, pource que ceux d'Abbeuille ne voudrent mettre ses gens dedans, pource qu'avec luy y auoit des ambassadeurs Anglois à tout la rouge croix : & de saint Riquier s'en alla à saint Iosse en pelerinage, & vindrent à l'encontre de luy l'abbé & tout le conuent dudit lieu en procession, comme ils eussent fait pour la venue du Roy de France. Et quand il eut fait son oraison, il ne donna n'offrit riens au glorieux amy de Dieu saint Iosse. Et est vray qu'iceluy Empereur estoit armé & portoit à l'arçon de sa selle vn chapeau de Montauban, ayant sur ses armeures vne heucque : en laquelle estoit vne droicte croix deuant & derriere de couleur de cendre, sur laquelle auoit escript en latin : O que Dieu est misericors : & aussi estoient habillez & armez la plus grand partie de ses gens, montez sur bons & legiers cheuaux : & de là par Estaples s'en alla à Boulongne, mais ceux de la ville ne le laisserent pas entrer dedans, dont il eut grand indignatiō : & pource ne vult il pas recevoir les presens à luy enuoyez de par ladicte ville. Et quand il eut disné dedans la basse Boulongne, s'en alla au giste à Calais, & vint à l'encontre de luy le Comte de Varuich capitaine d'icelle ville, accompagné des gens d'armes & d'archiers, receuans iceluy & ses gens d'armes moult honorablement tout aux despens du Roy d'Angleterre, iusques au mardy ensuiuant qu'il se partit & s'en alla en Angleterre. Lequel Empereur durant le temps qu'il estoit en la ville de Paris (cōme dit est dessus) alla vn certain iour seoir en la chambre de Parlement, avecques les Presidens & autres conseilliers, qui tresgrand reuerence & honneur luy feirent. Et le feirent seoir au siege royal comme faire le deuoient. Et apres commencerent les aduocats à plaidoyer les causes d'entre les parties, ainsi qu'il est de coustume : entre lesquelles en y auoit vne d'un cheualier de Languedoc nommé Guillaume Segnot, & estoit pour auoir la seneschaulcée de Beauquaire : auquel vn chacun se disoit d'eux deux auoir droit par le don du Roy : mais ledit cheualier mettoit en ses deffences que nul ne pouuoit tenir ledit office ne deuoit, se premier il n'estoit cheualier. Et adoncques l'Empereur oyant le differant des parties, demanda à iceluy escuyer en latin fil vouloit estre cheualier, lequel respondit que ouÿ. Et lors ledit Empereur demanda vne espée, laquelle luy fut baillée : & en feit là presentement le dessusdit escuyer cheualier, auquel ledit office fut adiu-gé par les seigneurs de Parlement. Neantmoins quand le Roy & son grand conseil furent aduertis de ceste besongne n'en furent pas bien contens. Et par especial desdits seigneurs de Parlement, pour ce qu'ils luy auoient ainsi souffert : car il sembloit que ceste besongne se feit comme par auctorité & hauteur de le pou-  
uoir



uoir faire au Royaume de France, ce que par nulle riens on ne luy eut souffert. Toutesfois la chose se passa soub dissimulation, & n'en fut aucunement monstre aucun semblant au dessusdit Empereur.

*Comment vne grand taille fut mise sus par les gouverneurs du Roy, dont les Parisiens furent mal contens & autres besongnes qui sourdirent à ceste cause.*

CHAP. CLVI.

**D**Vrant lequel temps dessusdit, apres le partement de l'Empereur, fut mis sus grand taille par tout le Royaume de France de ceux qui gouvernoient le Roy: C'est à sçauoir la Royne, le Roy de Cecille, le Duc de Berry & aucus autres: pour laquelle le peuple, & par especial ceux de Paris, qui estoient fauorables au Duc de Bourgongne, furent fort troublez contre lesdits seigneurs: Car avec ledit Duc de Bourgongne auoit en icelle ville plusieurs de son alliance, qui chacun iour machinoient & traictoient secretement qu'il peut retourner deuers le Roy, & auoir le gouvernement du Royaume. Et affin d'accomplir leur intention, luy auoient fait assçauoir qu'il enuoyast couuertement aucuns de ses gentils-hommes dedans Paris bien instruits, & de grand prudence: ausquels ils se peussent r'allier & auoir conseil se besoing leur estoit: laquelle requeste il accomplit & enuoya messire Iennet de Poix, Iacques de Fosseux, le seigneur de saint Legier, Binet d'Auffeu: lesquels porterent plusieurs lettres de credence signées de la main dudit Duc, adressans à ceux qu'on sçauoit qui aymoient son party: & en conclusion ou contempt, & soub la couleur de la taille & hayne dessusdicte, feirent iceux Parisiens, conclurent & iurerent conspiration entre eux, & auoient intention que le iour du grand Vendredy apres disner, tous ensemble prendroient ceux à eux contraires. Et premierement le Preuost de Paris, & s'il n'estoit à eux consentant (comme iuge) l'occiroient: prendroient le Roy & le mettroient en chartre. Et apres il le mettroient à mort, la Royne, le Chancelier de France & autres sans nombre avecques la Royne de Cecille. En outre vestiroient de vieux & honteux habits le Roy de Cecille & le Duc de Berry, & leur feroient rere leurs chiefs, & mener par la ville de Paris sur deux ords bouueaux, & apres ce les feroient mourir: Toutesfois ce fut attargé à faire ceste fois à ce iour par aucuns d'iceux, disans que plusieurs adoncques pourroient eschapper estans en deuotion par dehors & dedans Paris, & plusieurs seroient és colleges à ce iour pour cause de confession, & autres seroient en pelerinage, & ainsi à ce iour on ne les pourroit tous trouuer à leurs maisons. Mais mieux vaudroit à ce faire le iour de Pasques apres disner: lesquels tous ensemble promeirent à ce faire sans faute le iour de Pasques. Mais ce fut reuelé par vne femme à Michel Laillier, lequel le fait sçauoir à Bureau de Dampmartin son treschier amy par lettres, en luy conseillant qu'il fuyst tantost hors de Paris comme il faisoit: & iceluy Bureau le fait sçauoir au Chancelier, ainsi cōme il deuoit disner: lequel prestement s'en fuyt au Loure mandant à la Royne & aux seigneurs du sang Royal, qu'ils se sauassent & affuissent audit Loure: laquelle chose ils feirent prestement excepté le Preuost de Paris, qui s'arma & les siens iusques au nombre de cinquante bacinets & saisit soubdainemēt



les halles, & print prestement aucuns des consentans encores non armez en leurs maisons, & les bouta en chastellet: dont furent esbahis lesdits conspirateurs, & tout leur intention fut corrompue. Toutesfois ledit Preuost garny tantost de gens d'armes, assaillit en tresgrand nombre plusieurs maisons, esquelles il trouua plusieurs hommes d'armes abscons, pour faire ladicte occision: entre lesquels fut prins sire Almeric d'Orgemont, l'Archediacre d'Amiens Doyen de Tours & Chanoine de Paris, l'un des Presidens en la chambre des Comptes & des maistres des requestes, Robert de Belloy tresriche drappier, le sire de l'hostel de l'Ours à la Porte Baudet, & plusieurs autres notables hommes: laquelle chose par le Chancellier manifestée fut par lettres aux Conestable & Marechal de France, estans à la frontiere de Harfleur, qui sans delay enuoya Remonnet de la Guerre accompagné de huit cens hommes aux seigneurs à Paris: & traicta trefues vn mois avecques les Anglois de Harfleur depuis le cinquiesme iour de May iusques au second iour de Iuing. Le samedi second iour de May furent amenez deuant les halles les dessus nommez prisonniers, où ils furent decollez comme traistres. Mais ledit Almeric d'Orgemont, comme homme d'Eglise, par l'ordonnance du grand conseil du Roy fut rendu par le Preuost de Paris au Doyen & chanoine de nostre Dame de Paris à faire son proces & condamnation, lesquels prestement feirent son proces, condamnant iceluy perdurablement au pain & à l'eau en la chartre. Et apres les trefues faictes, ledit Conestable vint à Paris accompagné de trois cens hommes d'armes. Et adonques luy accompagné d'hommes d'armes sans nombre & le Preuost de Paris, prindrent toutes les chaines de fer par Paris, & furent menées à la bastille saint Anthoine: Et pareillement osterent à ceux de Paris leurs armeures. Et adonques vint à Paris Loys Bourdon accompagné de deux cens hommes d'armes. Et apres vindrent Clugnet de Brabant & le seigneur de Bosquiaux gouverneur de Vallois en grand nombre. Si furent lors ceux qu'on sentoit fauorables au Duc de Bourgongne en grand perplexité en icelle ville de Paris, & par especial ceux qu'on trouua coupables de la conspiration dessusdicte furent punis sans misericorde, & en y eut plusieurs decapitez publiquement & les autres noyez en Seine. Toutesfois les nobles que ledit Duc de Bourgongne auoit enuoyez, s'en retournerent couuertement au mieux qu'ils peurent, & ne furent prins n'arrestez. Apres les besongnes dessusdictes gens d'armes se commencerent à mettre sus de toutes pars en France: c'est à sçauoir de par le Roy, & ceux qui auoient le gouvernement de par luy. Et pareillement en fait & souffrit à faire aux siens ledit Duc de Bourgongne. Et par ainsi le clergie & pauvre peuple furent pour ce temps en diuerses parties du Royaume moult oppressez: Si auoient peu qui les deffendissent. Et n'auoient autre recours, sinon de crier miserablement à Dieu leur createur vengeance pour les maux & griefs qu'on leur faisoit souffrir & endurer.

*Pour l'an mille cccc. & xvi.*

*Comment l'Empereur alla à Londres. Le frere du Roy de Cypre à Paris. La mort du Duc de Berry: & plusieurs ambassades qui se feirent entre France & Angleterre.*

CHAP. CLVII.

*Comment*



**A**V commencement de cest an l'Empereur & Roy d'Allemaigne arriua à Londres : Au deuant duquel alla le Roy d'Angleterre, ses freres & autres Princes accompagnez de grand nombre de nobles hommes, & aussi grand multitude de gens d'Eglise bourgeois & populaires: & luy fut faicte par le Roy & ses Princes tresgrand reuerence & honneur, & briefs iours ensuiuans y alla le Duc Guillaume Comte de Hainault à tout six cens cheuaucheurs, pour parler de la paix de France. Et lors allerent deuers iceluy Roy ambassadeurs de diuers païs, entre lesquels y en alla cent de par le Duc de Bourgongne. Esquels iours vint à Paris deuers le Roy de France le Comte des trois citez frere au Roy de Cypre: A l'encontre duquel allerent le Connestable de France, Charles fils au Duc de Bourbon, le Preuost de Paris, & plusieurs autres: par lesquels fut amené deuers le Roy & la Roïne, qui le receurent lyément & honnorablement. Et le sixiesme iour du mois de May ensuiuant à Amiens par vertu d'un mandement, furent bannis du royaume de France Iennet de Poix, Iaqués de Fosseux, le seigneur de saint Leger, Binet d'Auffieu, Hue de Saily, maistre Philippe de Moruiller, Guillaume Sanguin & aucuns autres des gens du Duc de Bourgongne. Et fut par la soupeon d'estre coupables de la conspiration faicte à Paris contre les royaulx, dont dessus est faicte mention. Esquels iours aussi Iean Duc de Berry moult ancien si s'accoucha malade à Paris en son hostel de Neelle, & fut grandement visité par le Roy son nepueu, qui lors estoit assez en santé, & par les autres seigneurs du sang royal. Mais toutesfois il trespassa le treiziesme iour du mois de Iuing sans delaisser hoir masse de sa chair, pourquoy la Duché de Berry & Comté de Poictou retournerent à la demaine du Roy: lequel les donna à Iean Duc de Touraine son aîné fils, & filleul dudit deffunct. Et fut son cueur enterré à saint Denys, & ses entrailles dedans l'Eglise saint Pierre des Degrez, & son corps fut porté à Bourges en Berry: & là enterré en l'Eglise cathedrale. Cestuy Duc de Berry auoit eu deux filles de sa femme, dont l'aînée estoit Comtesse d'Armignac, mere d'Amé Duc de Sauoye: la seconde estoit Duchesse de Bourbon. Et est vray que le Duc de Berry donna à Iean Duc de Bourgongne son nepueu, & filleul la Comté d'Estampes par certaines conditions: & apres la mort du dessusdit, le Roy de France donna à Charles son maîné fils la capitainerie de Paris, sous le gouuernemēt du Roy Loïs son beau pere: & avec ce, luy donna le Roy la Duché de Touraine: en oultre les ambassadeurs du Roy de France qui estoient allez avec le Roy d'Allemaigne en Angleterre: c'est à sçauoir l'Archeuesque de Reins, le seigneur de Gaucourt & aucuns autres retournerent en France deuers le Roy. Et à l'instance dudit Roy d'Allemaigne, vindrēt à Calais les ambassadeurs du Roy d'Angleterre, c'est à sçauoir l'Euesque de Noruegue & Thomas Espingan cheualier de grand renom, le grand maistre d'hostel du Roy accōpagné de lxx. cheuaucheurs: lesquels de Calais par saufconduit du Roy de France, allerent à Monstreul, & par Abbeuille à Beauuois: auquel lieu ils furent honorablement receuz par les gens du Roy qui là furēt traicter deuers eux les trefues pour certain tēps entre les deux Roys de Frāce & d'Angleterre. Et aussi des rançons d'aucuns prisonniers que tenoiēt lesdits Anglois, mais riens ne peurēt accorder, pourtāt que le Cōnestable de France auoit fait mettre le siege par mer deuāt la ville de Harfleur, leq̃l il ne vout pas faire departir. Et pource s'en retourne-



rent lesdits Anglois en Angleterre sans riens besongner : mais brief ensuiuant furent enuoyez de par le Roy Henry autres ambassadeurs deuers le Duc de Bourgogne à l'Isle : c'est à sçauoir, le Comte de Varuic & aucuns autres : lesquels traicterent tant deuers ledit Duc, qu'ils eurent trefues l'un avec l'autre depuis la S. Jean Baptiste de l'an dessusdit, iusques à la S. Michel l'an xvij. tant seullemēt pour les Comtez de Flandres, d'Arthois & les enclauemens. Si furent tantost publiez de par ledit Duc de Bourgogne es lieux accoustumez, dont moult de gens furent fort esmerueillez, pour icelles trefues ainsi faictes particuliers ou Royaume de France.

*Comment Iennet de Poix & autres allerent secretement à saint Denys de par le Duc de Bourgogne, & de plusieurs cheuauchées qui se firent sur le Royaume de France.*

CHAP. CLVIII.



Vdit mois de Iuing messire Iennet de Poix par l'accord du Duc de Bourgogne son seigneur accompagné de quatre cens hommes de pied, print chars & meit en tonneaux secretement leurs armeures, & par compagnies par diuers chemins allerent à la Franche feste, en guise de marchans. Et ainsi que le Roy estoit à saint Germain en l'aye, & le Connestable en la frontiere de Normandie, plusieurs d'iceux se muerent sur le chemin, & les autres entrerent en ladicte ville comme marchans : & là allerent principalement pour prendre le Chancelier & Tanneguy du Chastel Preuost de Paris. Mais tandis qu'ils beuuoient & mangeoient ledit Chancelier & Tanneguy passerent sans empeschement par ladicte ville, & retournerent à Paris. Et apres ce qu'ils sceurent qu'ils furent passez, ils retournerent en confusion en Picardie, amenans avec eux plusieurs prisonniers & despouilles des païs du Roy : dont le peuple ne fut pas bien content. Et d'autre part Ferry de Mailly accompagné de plusieurs hommes de guerre, alla à Santerres es villes du Quesnel Hangiers, où auoit esté prins messire Martelet & luy. Et là prindrent plusieurs prisonniers & autres biens sans nombre, lesquels ils emmenerent : & lesdits prisonniers apres qu'ils eurent esté piteusement questionnez, furent mis à grand finances. Et pareillement messire Mauroy de saint Legier passa l'eau de Seine, & s'en alla mettre en embusche assez pres du chastel de Chaule : & au matin, quand le pont fut auallé, soudainement à tout ses gens print ledit chastel, lequel grandement estoit remply de tous biens : mais assez tost apres les païsans de Lihons & autres villes qui auoient leurs biens dedans, allerent à puissance deuant ledit chastel : & en fin traicterent tant deuers ledit messire Mauroy que moyennant grand somme d'argent que luy & ses gens en eurent, se partit de là en rendant ledit chastel à la dame Douairiere d'iceluy.

*Comment Lihons en Santerres fut pillé de plusieurs capitaines, qui se meirent sus : la prise du Chastel de Beaumont : & l'assault & prise de Neelle, & autres matieres.*

CHAP. CLIX.

Item



**A**Ssez brief ensuiuant ledit messire Mauroy de sainct Legier, & Jean d'Aubigny allerent loger à Lihons en Santer: laquelle ville avec la prioré ils pillerent & rauirent tous les biens, & avec ce rançonnerent plusieurs hommes à grand finance: & ce fait à tout leurs proyes s'en retournerent en Arthois. Ainsi par ceste maniere commencerent à assembler plusieurs compagnies tant nobles comme non nobles, estans au Duc de Bourgogne dessoubz diuers estandars: desquels estoient les principaulx ledit messire Mauroy, messire Iennet de Poix, Dauiod son frere, le seigneur de Sores en Beauuoisis, Jean de Fosseux, Hector & Philippe de Sauueses, Ferry de Mailly, Loys de Varigines, messire Paien de Beaufort, messire Loys de Burnel, Jean de Donquerre, Guerard Bastard de Bruneu & autres sans nombre, qui tressouuent cheuauchioient à estandart desploié sur le païs du Roy: c'est à sçauoir sur les marches de la Comté d'Eu & d'Aumalle. Et aussi au pays de Santer & de Beauuoisis iusques sur la riuere d'Oise, par especial sur les terres de ceux qui autresfois auoient tenu la partie d'Orleans. Esquels païs iceux faisoient maulx sans nombre, prenans hommes prisonniers & autres proyes, comme il est de coustume de faire sur les ennemis: desquelles besongues, & rapines les dessusdits & leurs gens estoient grandement remplis. Et pareillement y auoit plusieurs autres capitaines par manieres de compagnies, qui se disoient aussi estre audit Duc de Bourgogne: desquels estoient conducteurs, messire Gastellumas chevalier Lombard, Jean de Gaingny, Jean du Clau, & Lamain du Clau Sauoiens, Jean d'Aubigny, le Bastard de Sallebrusse, Charles l'Abbé, le Bastard de Thian, Mathieu des Prez, Panchete, le Bastard Penart & aucuns autres qui estoient bien deux mille cheuaux, quand ils estoient ioincts ensemble: lesquels par longue espace tindrent les champs tant sur les païs du Roy comme sur ceux du Duc de Bourgogne, qui faisoient maulx inestimables. Et mesmement ledit messire Gastellin & ses gens print le chastel d'Oisy en Cambresis appartenant à la fille & heritiere de messire Robert de Bar, où il fut par longue espace: & fait d'iceluy & de toutes la terre, comme de son propre. En apres le dessusdit seigneur de Sores à tout six cens combattans, alla passer au Pont-Auaire, & de là se tira vers Paris: & au point du iour se meit en embusche entre la chappelle de sainct Laurens, iusques à tant que les portes furent ouuertes. Et tantost vint à eux vn homme cheuauchant vn blanc cheual, qui en brief parla audit de Sores, & apres retourna à Paris le chemin qu'il estoit venu. Et eux là estans prindrent plusieurs hommes & femmes là passans, pour doubte qu'ils ne fussent descouuers. Et apres voyans leurs entreprises estre rompues, en sonnant leurs trompettes se partirent de là, & tirerent bien en haste vers Beaumont sur Oise. Si estoient là allez pour prendre le Roy Loys à l'ayde d'aucuns Parisiens. Et quand ils vindrent aupres de Beaumont, enuoyerent quatorze de leurs gens à tout les droictes croix deuant, qui dirent aux portiers que le Roy les enuoyoit sur l'eau de Somme pour garder les passages contre les Bourgongnons. Et tant feirent que pour leurs enseignes & parolles ils entrerent en la ville. Tantost apres qu'ils veirent venir leurs gens, tuerent les portiers & faisirent la porte, & puis incontinent assaillirent le chastel, lequel ils prindrent & occirent le capitaine & son fils. Et apres qu'ils eurent prins, raui & fait grand occision par toute la ville & chastel sans bouter feu, ils se departirent em-



portant tous les biens & emmenant plusieurs prisonniers, & allerent à Moÿ vers Clermont tout pillant le paÿs. Et puis de là s'en allerent par deuers Montdidier, à Neelle en Vermandois appartenant au Comte de Dampmartin. Et se rassemblèrent là plusieurs desdits capitaines. Entre lesquels estoit messire Mauroy dessus nommé, lesquels en conclusion assaillirent icelle ville, & de fait la prindrent de force nonobstant la deffence des habitans qui grandement en feirēt leur deuoir: & y eut plusieurs hommes morts, & les autres naurez, & tresgrand foison de prisonniers. Desquels prisonniers fut principal le gouuerneur de la ville nommé messire Blanchet du Sollier. Si fut la ville du tout pillée, & y auoit des biens largement, car c'estoit la franche feste. Et apres ce qu'ils eurent là esté enuiron quinze iours pour vendre leur butin & attendre la raison de leurs prisonniers, se departirent en menant sur chars & charrettes biens sans nombre. Lesquelles besongnes venues à la cognoissance du Roy, de son Connestable & de son grand conseil, furent tresmal contens d'iceux capitaines, & aussi du Duc de Bourgogne auquel ils se disoient. Et pour y pourueoir furent enuoyez mandemens royaux à diuers officiers du royaume, desquels la teneur s'ensuit.

CHARLES par la gracs de Dieu Roy de France. A tous ceux qui ces presentes lettres verront salut. La preexcellente & haultesse royalle, à laquelle le treshault tout puissant, & le souuerain Roy des Roys nostre createur Iesus Christ par digne grace & clemence, nous à esleu & appellé en nous laissant & baillant le regime de ce tresrenommé & trefnoble Royaume de France, à quoy nous sommes tenus & obligez par le sceptre de la verge royalle, il appartient diligemment à la paix: & à ce entendre de iour & par toutes voyes & manieres possibles, par lesquelles nosdits subiects puissent obtenir paix & seurté en nostre temps, & les seditieux & troubleurs de paix estre separez des paisibles, & demourer soubz nostre regime en paix, & viure en bonne iustice: & cest ce à quoy nous de tout nostre cuer tousdis auons entendu & entendons. Et comme il est venu à nostre cognoissance par la relation des gens de nostre conseil, & des autres dignes de foy tant par complainctes miserables & clameurs douloureuses de plusieurs de nostredit royaume, que par la confession d'aucuns malfaiçteurs morts iustement & par iustice. Laquelle chose nous recordons dolentement en grand tristesse & amertume de nostre cuer: que Hector de Saueuses, Philippe son frere, Elyon de Iacqueuille, Pierre de Sorel, Gotrant sire de saint Leger & Mauroy de saint Leger son fils, Iaques de Fosseux, Caluin du Clau, Jean d'Aubigny, Fierebourg, Mathieu des Prez, Jean de Poix, Dauiod son frere, Camuset de Ligny, Gastelumais, Cormeri de l'ordre de l'ospital saint Jean de Ierusalem, le Commandeur de Sagesstre, Panchette, Henry de la Tour Pierçon Tube, Jean de Cauffour, Henry de Cauffour le Valois, Iaques de Caluray, Raymon Marcq, Denisot de Baugis, Guillaume le Glois, Martelet Testart, Iaques le Masson, Benoist de Bessin, Guillemot de la Planche de Douay, le Tor d'empres Douay, Jean Pallemargue, Robinet le Vicomte, la Barbe de Craon, Jean Iaully Picart, Robinet de Bray, le curé de Vaulx prestre, Jean Loÿs de Cumillers, Robin d'Ays, Guillaume Mignot de Brebiettes empres Compiengne, Thomas de plaissance, le grand Thomas Mignot, Iaquet de Clauin, Perrin de Cheurerieres, Henry de Hailly, Jean de Perissin, Jean Bertrand boucher de saint Denys, Guillaume de Cormeuille, Guillaume



me de Chify du Brunet, maistre Robert Trompette de nostre cousin de Bourgogne, Perrin Trôpette dudit Jean d'Aubigny, Iennet archers du corps nostredit cousin de Bourgogne, Jean de Vienon, Jean de Tournegney capitaine de Châplost, Puisseuin d'Aufforrois, Charles l'Abbé, le Bastard Cōgnart de l'Aufforrois, le Bastard de Launois Guynis, Rouffelet Batellier, Philippot Vezis de Sens, Estienne Guiart de Sens, Symon le Vigneron de Ioingny, Estienne de la Croix, le fils du petit Hostellier en Sens, Colin de l'hospital, le Bastard de Chaullay, le Bastard Guignart, trois freres du Moyne de Coulenges sur Yonne, Jean de Duilly, Charlot de Duilly, & vne compagnie de Fuzelaires qui se nōment les Begeaux accompagnez de plusieurs seditieux & partroubleurs de paix: desquels aucuns pour leurs pechez perpétrez furent bannis par bonne iustice de nostre royaume, accompagnez aussi de plusieurs autres de perdition: lesquels contre nostre voulenté ont assemblé gens de mauuaise voulenté, & de peruerse condition. Et s'assemblerent de iour en iour en tresgrand nombre, en courant & cheuauchant par nostredit royaume, enuahissans par force & de fait tant par assaulx & autres voyes subtiles plusieurs villes & chasteaux, appartenans tant à nous & à noz vassaulx nobles & gens d'Eglise de nostredit royaume, pillant de tout en tout iceux & icelles. Et que plus est, comme meurdriers accoustumez en leurs faux & peruers cueurs, esiouiffans d'effusion de sang ont meurdry & occisent, noyent & mettēt à mort de iour en iour les pources & simples gens, laboureurs, marchans, bourgeois & autres noz subiects demourans & habitans esdictes villes & chasteaux, qui n'y pensoient ne n'y pensent à nul mal. Et encores que plus est à esmerveiller, & que nous n'eussions pas creu: si nous n'eussions par experience veu le contraire: c'est à sçauoir qu'ils sont venus & approchez en cheuauchant plusieurs fois, empres & entour de nostre bonne ville de Paris & cité de nostredit royaume, en laquelle est nostre principal siege de la iustice d'iceluy, querans temps & opportunité d'entrer en icelle par fraude, affin de mettre icelle à pilleries, occisions & redemptions, & tout en la maniere que dit est: & especiallement en vne certaine nuit n'agueres passée par tresgrande & folle entreprinse. Et en continuant ces choses vindrent à grand force & puissance d'armes deuant les portes de nostredicte ville de Paris, sçachās que nous, nostre treschere compagne la Roynie & nostre fils le Duc de Touraine, & autres de nostre sang estions personnellement en icelle: cuidèrent & s'efforcèrent d'entrer larcinneusement en icelle, & tout à la fin & intention dessusdicte: dont se le cas fut aduenue (qui ne pleust pas à nostre createur) se fussent ensuiuiues larcins, occisions, corruptions d'Eglises, enforcemens de femmes & autres maux infiniz, & non reparables: dequoy vraiment se fut ensuiui adnullation & corruption de nostredicte ville, consequamment desolation & totale destructiō de nostredit royaume. Nous recognoissans iceux estre noz subiects à nous obliger naturellement, comme à leur vray & naturel seigneur & à la deffence de nostredit royaume, & non à la persecutiō & destruction d'iceluy: dont il est à tenir sans doute, que plus legerement & plus hardiment ils enuahiroient les autres bonnes villes & citez fermées & villes champestres, & chasteaux de nostredit royaume à prendre & piller icelles. Et qu'il soit ainsi apparust assez par euidence de fait, car quand ils veirent, qu'ils ne peurent entrer en nostredicte ville de Paris, comme tous forcenez pour leur faute, ils allerent droit en la ville de Beaumont sur



Oise, appartenant à nostre trescher & aymé fils & nepueu le Duc d'Orleans prisonnier en Angleterre. Et en allant à icelle ils prindrent cheuaux ahanans, depouillerent marchans & autres gens prisonniers. Apres ce ils prindrent par force & violence ladicte ville, le pont & le chastel, pillerent & occirent cruellement, noyerent plusieurs en eaües, & en grand quantité, & pareillement prindrent & pillerent la ville de Neelle en Vermandois : & ainsi auoient fait par auant en nostre ville Chablis, & au chastel de Neant appartenant aux religieux de la Charité sur Loyre, avec plusieurs villes chasteaulx & villes champestres: en outre prenans par force femmes mariées, pucelles, vefues & autres non mariées violant icelles, comme se c'estoient bestes mues, en prenant & pillant Eglises, monasteres & autres lieux sacrez, dont nous receuons de iour en iour, & auons receu plusieurs requestes & clameurs moult lamentables. Lesquels maux ne voudroient ne pourroient plus faire noz anciens ennemis les Anglois : iceux dessus nommez obstinez en pechez, font & commettent sans cesser les maux dessusdits, en rendant & demonstrent eux rebelles & inobediens à nous & à nostre domination, en despitant nous & nosdits commandemens, & commettant port d'armes crime de leze maiesté, & autres grans & detestables delicts, crimes & malfaits dignes de toute punition, possible & indignes de toutes graces & remissions : mesmement de ce qu'ils n'ont nostre souueraineté & domination en cremeur n'en reuerence. Sur lesquelles choses apres aucunes lamentables supplications & requestes, que nous font de iour en iour plusieurs de noz vassaulx & subiects, qui de ce font à nous complains & dolluz: & encores complaignent chacun iour, en requerant à Dieu nostre createur & à nous vengeance & punition de iuste sang & innocent si cruellement espendu. Nous qui par les faits & œuvres dessusdictes autre chose imaginer ne penser ne pouons, fors tant seullement la subuersion & destruction, & perdition de nostredit royaume & domination: à quoy comme nous croyons & tenons les dessus nommez ont contenu, auons fait assembler plusieurs de nostre sang, de nostre grand conseil & de nostre Parlement, que autres seigneurs, barons, nobles & autres de nostredit royaume: affin d'aduiser & deliberer les voyes & manieres comment nous és choses dessusdictes, pourrons pourueoir & remedier par aduis & deliberation. Desquelles apres plusieurs voyes & autres manieres en ce cas ouuertes & aduisées: nous qui plus ne pouons souffrir les cruauitez & autres maux dessusdits, ne trespasser sous dissimulation affin qu'au dernier iour du iugement diuin ne soit pas à nous recogneu le sang iuste cruellement espendu, & que de tout nostre cueur entre les autres cures, charges & sollicitudes que nous auons pour nostredit royaume & domination entretenir: toudis auons desiré & desirons bonne paix & tranquillité estre en nostredit royaume & nosdits subiects, avec leurs biens demourer en paix & tranquillité. Nous faisons scauoir à tous que vous tous dessus nommez avec leurs adherans, alliez, complices & recepteurs: nous auons declairé & par ces presentes nous declairons estre noz ennemis rebelles & inobediens, & comme tels nous les auons tenuz & reputez, & par ces presentes nous les tenons & reputons : & pource que de present nous viennēt grandes occupatiōs tous les iours pour l'occasion de la guerre, que nous auons contre noz aduersaires de nostredit royaume & ennemis d'Angleterre: en laquelle plusieurs nobles & autres de nostredit royaume sont occupez, nous  
ne



ne pouons entendre à bouter hors iceux de nostredit royaume. Nous iceux dessus nommez avec tous leurs alliez, adherans & complices, qui sont & seront trouuez avec eux & en leur compagnie, avec tous leurs biens quelsconques que ils soient, & là où on les pourra trouuer & sçauoir: auons abandonné, & par ces presentes abandonnons, donnons licence & auctorité à noz vrais subiects & obediens de quelque estat, condition ou auctorité qu'ils soient d'iceux enuahir par voye de fait: de prendre, de saisir & arrester tant par armes que sans armes avec tous leurs biens, & d'occire iceux s'ils se deffendent, sans ce que pour ceste cause ils soient prins, emprisonnez ou autrement arrestez ne mis en proces ordinaires, par quelsconques iusticiers ou officiers de nostredit royaume, & sans ce qu'il leur soit necessité d'auoir sur ce grace ou remission aucune. Si donnons en mandement au Baillif d'Amiens ou à son lieutenant par nostre presente ordonnance, qu'ils facent crier solennellement deux ou trois fois chacune sepmaine hault au son de la trompette, & publier en toutes les bonnes villes & ressors d'icelles en souffrant tous noz subiects & obediens enuahir les dessusdits par voye de fait, prendre, saisir & arrester avec tous leurs biens, & occire iceux se besoing est, sans faire destourbier ou empeschement en corps ou en biens: mais du contraire s'aucun destourbier ou empeschement estoit fait pour ceste cause en leurs personnes ou en leurs biens, qu'ils le facent mettre à plaine deliurance. Et que es choses dessusdictes & circonstances & dependences d'icelles ils entendent diligemment, tellement que par leur negligence aucuns inconueniens ne s'en puissent ensuiuir au preiudice de nous, & de nostredit royaume & domination. Ausquels aussi mandons qu'ils facent adiouster foy à la coppie & transcript de ces presentes es lieux, où elles ne peuuent estre portées: & ainsi le voulons comme à l'original foy estre adioustée. En tesmoing de ce nous auons mis en ces presentes nostre seal. Donné à Paris le xxx.iour d'Aoust l'an de grace mille quatre cens & seize, & de nostre regne le xxxvj. Ainsi signées par le Roy à la relation de son grand conseil. Ferron. Lesquelles lettres furent solennellement publiées en la ville d'Amiès environ le xij.iour de Septembre. Et puis furent enuoyées à tous les Preuosts du bailliage d'Amiens, à publier es lieux de leursdits Preuostez. Mais pour la doute & cremeur dudit Duc de Bourgogne lesdits Preuosts: c'est à sçauoir de Beauquesne, de Monstreul, de saint Requier & de Dourlens, ne l'oserent publier fors tant seullement vne fois en leurs plaids, où estoient peu de gens. Et tost apres Raymonnet de la Guerre fut enuoyé de par le Roy, & de par le Cōestable à Noyon & à Neelle, pour deffendre le pays avec messire Thomas de Lersies Baillif de Vermendois contre les gens du dessusdit Duc de Bourgogne: si commença lors la guerre à estre du tout ouuerte & esmeüe entre icelles parties sur les marches dessusdictes, & en diuers autres lieux au royaume de France. Et pour vray quand les gens du Roy pouoient prédre n'attaindre aucunes des gens d'iceluy Duc peu en eschappoient, fussent nobles ou autres qu'on ne les fait mourir par iustice: & par especial ceux qui cheoient es mains des officiers de Noyon & des gouuerneurs d'icelles estoient executez sans misericorde. Et tant qu'aucuns arbres assez pres d'icelle ville en estoient merueilleusement chargez & hourdez.



*Comment le Duc de Bourgongne multiplia ses gens d'armes : le mariage du seigneur de la Trimouille, & l'armée que feit le Duc de Clarence pour Harfleur.*

## CHAP. CLX.



R est vray que le Duc de Bourgongne sçachant la publication des mandemens dessusdits, estre grandement ou preiudice & deshonneur de luy & de ses gens, fut plus que parauant troublé & indigné à l'encontre de ceux qui gouuernoient le Roy: & pourtant de plus en plus accreut & multiplia ses gens d'armes, & leur consentit à manger ses propres pays: le Cambresis, Terrace, Vermendois, Santer & toute la terre estant deffoubs le Roy entour l'eaüe de Somme, iusques à la mer & vers le Crotoy & Monstreul: & pour lors iustice estoit petitement gardée, & soubstenue en icelles parties: les puissans nobles & autres traictoient cruellement les gens d'Eglise & le poure peuple: & quand aux Preuosts, sergens & autres officiers royaux, peu ou neant n'osoient executer leurs offices. Et au regard des marchans n'osoient mener leurs marchandises hors des bonnes villes & forteresses, sinon par tribut ou saufconduit, ou sur peine de perdre corps & biens. Ouquel temps la Duchesse de Berry doüairiere espousa le seigneur de la Trimouille, qui point n'estoit aymé du Duc de Bourgongne: & pourtant qu'icelle Duchesse estoit de son heritage Comtesse de Boulenois, enuoya iceluy Duc le seigneur de Fosseux lors gouuerneur d'Arthois en la ville de Boulongne, pour icelle saisir & mettre en sa main. Laquelle chose fut ainsi faicte: mais en icelle demoura capitaine commis de par le Roy le seigneur de Moreul, contre les Anglois: esquels iours le Duc de Clarence frere du Roy d'Angleterre se partit du port de Sanduich à tout trois cens vaisseaulx d'armée plains d'Anglois. Lesquels il feit mener & conduire au port de Harfleur en Normandie, & là par bataille, force & puissance destruit la nauire des François, qui long temps auoit esté assiegée deuant icelle ville de par le Connestable de France. Et furent morts grand partie de ceux qui estoient dedans ladicte nauire. Et apres qu'iceluy Duc eut regarny icelle de foison de viures & nouuelles gës, s'en retourna en Angleterre tresioyeux de sa bonne fortune.

*Comment les Roys d'Allemagne & d'Angleterre vindrent à Calais, auquel lieu alla le Duc Iean de Bourgongne vers eux: & des besongnes qui se feirent.*

## CHAP. CLXI.



N outre enuiron la saint Remy de cest an mille quatre cens & dix sept, vindrent d'Angleterre à Calais les Roys d'Allemagne & d'Angleterre accompagnez de grand seigneurie: auquel lieu de Calais alla deuers eux le Duc de Bourgongne, & fut d'iceux receu treshonorablement: & le Duc de Cloestre frere dudit Roy vint à saint Omer tenir hostage ou lieu du Duc de Bourgongne, & là par le Comte de Charrolois fut iceluy grandement receu, & aussi par autres grans seigneurs qui à ce estoient commis. Toutesfois ledit Comte de Charrolois alla le lendemain veoir ledit Duc de Cloestre à son hostel, pour luy complaire & faire compagnie, accompagné d'aucuns seigneurs de son conseil: mais quand il vint à la chambre dudit Duc iceluy ayant l'espaule tournée vers luy, parlant à aucuns de ses gens, point ne se prepa-



ra de faire reuerence à iceluy Comte comme il appartenoit: & encore ce qu'il en fait fut en brief, disant bien viennant foyez beau cousin sans venir à l'encontre de luy: ainçois parla grand espace aux dessusdits Anglois, si n'en fut ledit Comte de Charrolois (nonobstant sa ieunesse) pas bien content: combien que pour le present n'en monstra nul semblant, en apres ledit Duc de Bourgongne estant à Calais fut tresinstamment requis du Roy d'Angleterre, qu'il se voulsist deporter de estre en ayde au Roy de France à l'encontre: par condition qu'il partiroit à aucunes des conquestes qu'il feroit en France, & avecques ce ledit Roy d'Angleterre luy promettroit de riens entreprendre sur toutes ses seigneuries, ne de ses alliez & bien vueillans: laquelle requeste ne luy fut pas accordée par ledit Duc, mais les trefues que parauant auoient accordées entre eux, furent ralongées iusques à la saint Michel l'an mille cccc. & xix. Et avec ce (comme ie fuz informé) releua ledit Duc de Bourgongne & fait hommage de ses Comtez de Bourgongne & d'Alost audit Roy d'Allemagne. Et apres qu'il eut seiourné en ladicte ville de Calais par neuf iours, & besogné ce pourquoy il y estoit allé, prenant congé au dessusdit Roy s'en retourna à saint Omer: & pareillement s'en alla ledit Duc de Cloestre audit lieu de Calais: pour lequel voyage ainsi fait par le Duc de Bourgongne, fut le Roy de France & ceux qui le gouuernoient moult esmerueillez: & tenoient veritablement qu'iceluy Duc se fut du tout allié avec le Roy d'Angleterre ou preiudice dudit Roy de France & de sa seigneurie.

*Comment ledit Duc de Bourgongne alla à Valenciennes au mandement du Daulphin beau fils du Comte de Hainault, & les sermens qu'ils firent l'un à l'autre.*

CHAP. CLXII.

**L**Tem apres le retour du Duc de Bourgongne de la ville de Calais, le Duc Guillaume Comte de Hainault enuoya deuers luy ses ambassadeurs, luy réquerre qu'il voulsist aller deuers le Daulphin son beau fils: laquelle requeste il reffusa, pource que par plusieurs fois auoit enuoyé en Hollande deuers ledit Duc Guillaume son beau frere, en luy requérant qu'il amenaist ledit Daulphin par deça, ce que point n'auoit voulu faire à sa premiere requeste. Toutesfois ledit Daulphin renuoya deuers le Duc de Bourgongne lettres escriptes de sa main, par lesquelles luy mandoit qu'il allast deuers luy à Valenciennes: lequel Duc promest au messagier d'y aller, & y alla le douziesme iour de Nouembre, à l'encontre duquel alla le Duc Guillaume hors de Valenciennes l'espace d'une lieüe, amenant iceluy vers ledit Daulphin: & le lendemain furent faictes entre le Daulphin, le Duc de Bourgongne & le Duc Guillaume les choses cy apres declairées en la presence de la dame de Hainault, du Comte de Charrolois & du Comte de Conuersen, & de plusieurs autres notables cheualiers & escuyers & grand conseil des trois parties: c'est à sçauoir messire Iean de Luxembourg, messire Iagues de Harcourt, le Chancelier dudit Daulphin, Baudouin des Frasnes tresorier de Hainault, Robert de Vandegres, Iean Bastard de Blois, maistre Eustace de Laître, le seigneur d'Antoing, le Vidame de Amiens, le seigneur de Fosseux, le seigneur d'Ancre, le seigneur de Robais, le seigneur de Himbercourt, messire Hue de Launoy, messire Guillaume Bouvier gouuerneur d'Arras, messire Athis de Brimeu, messire Andrieu de Valines, mai-



stre Philippe de Moruilliers & plusieurs autres. Premierement ledit Duc de Bourgogne offrit luy & son seruice à iceluy Daulphin, iura & promet à seruir le Roy son pere & luy de tout son pouoir contre tous ses aduersaires: laquelle promesse ledit Daulphin receut agreablement, & avec ce pareillement iura & promeist audit Duc de Bourgogne luy ayder, porter & deffendre de tout son pouoir contre tous ses aduersaires & malvueillans à luy & à ses subiects. En apres ledit Daulphin requist tres affectueusement audit Duc de Bourgogne, qu'il aydast le Roy à garder & deffendre le royaume contre ses ennemis d'Angleterre, laquelle chose luy promeist & iura ledit Duc de Bourgogne. En outre requist ledit Daulphin audit Duc de Bourgogne, qu'il voulsist entretenir bonne paix audit royaume: à laquelle requeste respondit ledit Duc de Bourgogne que ce feroit il tresvoulentiers, & qu'il ne vouloit mal à quelque personne: mais vouloit tenir paix à grans & à petis, excepté le Roy Loys: de laquelle responce ledit Daulphin fut bien cōtent, & promeist audit Duc de Bourgogne, que s'il luy sembloit bon aucune chose estre à oster ou adiouster en la paix faicte dernièrement, que ce il feroit & feroit faire voulentiers tant au regard des choses passées deuant ladicte paix, comme depuis: apres lesdits seigneurs & dames de Hainault iurerent & promeirent au Duc de Bourgogne, que de ce faire ils feroient leur loyal pouoir: & avec ce promeirent & iurerent l'un à l'autre le Duc de Bourgogne & le Duc Guillaume en bonne & vraye fraternité, qu'ils mettroient peine & conseil à auoir bon gouuernement au royaume, & es personnes du Roy & du Daulphin dessusdit: & que eux deux s'entretiendroient & porteroient l'un l'autre en leurs honneurs sans aucunes diuisions, tant en absence comme en presence, en exposant leurs corps & biens à entretenir les choses dessusdictes: sauf que ledit Duc Guillaume dit qu'en tant que touchoit les guerres de France & d'Angleterre, ses predecesseurs ne s'en sont aucunement entremis: & pource n'auoit il pas intention d'en faire autrement, qu'ils auoient fait, pour la doute qu'il n'en venist aucun mal à ses pays: & en apres promeist ledit Duc Guillaume audit Duc de Bourgogne, qu'il ne mettroit pas ledit Daulphin en la puissance d'aucune personne, que tousiours n'en fut bien seur, pour pouoir entretenir lesdictes promesses: & avec ce promeist que dedans quinze iours qu'il feroit deuers la Roynie il manderoit ledit Duc de Bourgogne, pour auoir bon traicté & amitié avecques elle pour le bien du Roy & de tout son royaume: Apres toutes les promesses dessusdictes, le Duc de Bourgogne à tout ses gens s'en retourna à Douay.

*Comment le Comte de Hainault mena son beau fils dessusdit à saint Quentin, & de là à Compiengne où il mourut: & les manieres qui furent tenues ce voyage.*

CHAP. CLXIII.

**L**E quatorziesme iour de Nouembre le Duc Guillaume r'amena son beau fils le Daulphin à son chastel au Quesnoy: auquel lieu furent enuoyez plusieurs ambassadeurs de tous estats de par le Roy & la Roynie, affin qu'iceluy Daulphin allast à Paris deuers le Roy son pere: toutesfois ils demourerent audit lieu du Quesnoy iusques apres la natiuité Iesus Christ. Et apres ledit Duc Guillaume mena iceluy Daulphin à saint Quentin en Vermendois, où ils attendirēt la Roynie iusques apres les trois Roys. Et pour-  
tant



tant qu'elle ne voulut pas aller audit lieu de saint Quentin, ledit Daulphin fut mené par le Duc Guillaume en la ville de Compiengne, & là se logea en l'hostel du Roy son pere: auquel lieu tantost apres la dame de Hainault amena la Daulphine sa fille en grand compagnie. Et apres ce, la Roynes en grand estat vint de Paris à Senlis accompagnée du Duc de Touraine son fils & du Duc de Bretagne son beau fils, avec le grand conseil du Roy: esquels iours vint le ieune Duc d'Alençon & aucuns autres ieunes seigneurs à Compiengne deuers le Daulphin, & luy feirent tresgrand honneur: & adonc les seigneurs commencerēt à traicter en enuoyant ambassadeurs de Compiengne à Senlis. Et lors la dame de Hollande mena sa fille la Daulphine à Senlis vers la Roynes: & apres qu'elles eurent esté l'une avec l'autre en grand liesse, elles retournerent audit lieu de Compiengne, & la Roynes & sa compagnie retourna à Paris, & la traicterent le Duc Guillaume & le conseil du Daulphin, avec lesquels allerent les ambassadeurs du Duc de Bourgongne: & est vray qu'en ces iours le Daulphin enuoya ses lettres au Baillif de Vermendois, d'Amiens & autres lieux seellées de son grand seel, contenātes que ils feissent publier que tous gens de guerre cessassent de leurs rapines & se retrahissent, sur confiscation de corps & de biens. Lesquelles lettres peu profiterent au peuple: car pour ce ne laisserent pas iceux gens d'armes à tenir les champs. Et le mardy penultime iour de Mars le Duc Guillaume Comte de Hainault, estant à Paris dit en plaine audiēce du conseil du Roy, qu'il mettroit ensemble le Daulphin & le Duc de Bourgongne, où il r'ameneroit iceluy Daulphin en Hainault, fautrement n'estoit pourueu par le Roy & son conseil à la reparation & paix du royaume. Pourquoy fut conclud de ceux qui gouernoiet le Roy, que le dessusdit Duc Guillaume seroit arresté iusques à tant qu'il auroit mis le Daulphin & rendu au Roy son pere. Laquelle chose luy fut noncée secrettement par aucun sien amy, & pource le lendemain tresmatin il faingnit s'en vouloir aller à saint Mor des fosses en pelerinage, & retourner à Paris: mais il s'en alla hastiuement luy troisieme à Compiengne, où estoit le Daulphin son beau fils: lequel il trouua tresgriefuemēt malade, de laquelle maladie il trespassa le iour de Pasques Fleuries. Et auoit empres vne oreille vne apostume, laquelle se creua par dedans son col & l'estrangla: & apres sa mort fut mis en vn sarcueil de plomb & enterré à S. Cornille present le Duc Guillaume, sa femme & sa fille Daulphine, pour l'ame duquel ils donnerent pour Dieu tresgrand somme de Pecune: & apres retournerent en Hainault en tresgrand tristesse, & lors fut tresgrand renommée que ledit Daulphin auoit esté empoisonné par aucuns de ceux, qui à present gouernoiet le Roy, pourtant qu'iceluy estoit fort allié au Duc de Bourgongne comme son frere precedent.

*Comment ceux de Naples se rebellerent contre le Roy Iaques Comte de la Marche & luy feirent guerre. Et aussi prindrēt la Roynes, & ce qu'il en aduint. CHA. CLXIIII.*

**E**N cest an s'esmeurent & rebellerent ceux de Naples contre le Roy Iaques Comte de la Marche, & le cuiderent prendre & emprisonner, mais il en auoit aucunement esté aduertie. Si prindrent la Roynes sa femme en ladicte ville de Naples, & menerent grosse guerre audit Roy & à ceux qui tenoient son party: & fut prins son Connestable & le seigneur



de saint Maurice beau pere audit Connestable. Et pour estre mieux asseur, se feit ledit Roy mener par vn brigantin en mer au chastel de Lœuf, & laissa garnison de ses gēs au Chastel Neuf. Et dura ceste guerre iusques au xxvij. iour d'Octobre ensuiuant, que la paix se feit moyennant ce que tous les François estans audit royaume ayant estat ou offices en iceluy, s'en partiroient & s'en retournerent chacun en son païs. Excepté ceux qui seroient commis à seruir le corps dudit Roy en bien petit nombre. Et apres celle paix faicte retourna ledit Roy au Chastel-Neuf & la Royne aussi : auquel chastel luy fut de tous le serment renouuellé de le tenir pour Roy toute sa vie, sans ce qu'il d'eust auoir nul gouuernement dudit royaume : & luy fut son estat ordonné pour sa personne, de gens, de cheualx & d'autres gens & choses tout au plaisir d'iceux Neapolitains. En apres le iour que le Roy arriua audit Chastel-Neuf apres ladicte paix faicte, feirent ceux de Naples grand ioye parmy la ville, & allumerent feux & chandelles parmy les rues & sur les terrasses des maisons. Et le lendemain furent les dames & damoiselles dancer, & mener ioye audit chastel. Mais au tiers iour fut ledit Roy si court tenu que nul ne pouoit parler à luy, sinon en la presence de ceux qui l'auoient en gouuernement, & ne peurent les gentils-hommes de France prendre congé à luy. Et tantost apres meirent la Royne en ce party, pour doubte que eux deux ensemble ne fussent maistres desdits gouuerneurs. Et toutesfois pour leur serment, ils tindrent l'un & l'autre pour leur Roy & Royne : mais ils les gouuernoient eux & leur royaume de tout à leur voulenté, & fut le chef de tous ces rebelles & traicteurs vn ancien homme de la plus riche & puissant lignée de Naples nommé Hanequin Mournil, qui estoit celuy en qui le Roy auoit la plus grand fiance de tous les Italiens. Et fut iceluy Roy par grand espace detenu en ce point : en fin leur eschappa, & fut conduit par mer au païs de Tarente qui luy estoit donné, & puis se partit, & fut du tout debouté dudit royaume. Et y alla depuis luy & le Duc d'Anjou fils du Roy Loys : & fut receu en la cité d'Auerse : mais il n'y eut pas esté longuement quand il l'en conuint partir, & fut enchassé par le Roy d'Arragon, & du tout debouté d'icelle seigneurie : car avec la rebellion de ses subiects, la Royne qui estoit vieille & de diuerse condition, n'estoit pas bien contente de luy, pource qu'elle auoit esté aduertie qu'il estoit amoureux d'aucunes autres ieunes dames du païs plus qu'il n'estoit d'elle. Et aussi pour pareil cas, ils auoient aussi principalement haï les nobles qu'il auoit mené avec luy du royaume de France.

*Comment le Comte d'Vrset capitaine de Harfleur fait vne cheuauchée au païs de Caulx & fut combattu des François : & de l'Empereur qui fait le Comte de Sauoye Duc.*

CHAP. CLXV.

**E**N ce mesme temps le Comte d'Vrset qui se tenoit à Harfleur, se meit sus vn certain iour à tout bien trois mille combattans Anglois, & alla courir deuant Roüen : & de là alla enceindre le païs de Caulx, où il fut par trois iours, & y fait de tresgrans dommages par feu & par espée. Mais entre-temps s'assemblerent les garnisons & nobles du païs avec le seigneur de Villequier, & tant qu'ils furent trois mille comme estoient iceux Anglois, si se r'encontrerent assez pres de Valmont & promptement les Anglois leur



leur coururent sus, & les François aussi d'autre part tres-vaillamment: & en brief meirent iceux Anglois en desroy: si demoura en la place desdits Anglois bien huit cens, & les autres avec ledit Comte se retrahirent en vn iardin qui estoit enuironné de fortes hayes d'espines: & là se tindrent le surplus du iour que lesdits François ne les peurent auoir, jaçoit-ce qu'ils se meissent en peine. Et quand ce vint au soir se retrahirent pour rafraichir en vn village, qui estoit au plus pres: mais les dessusdits Comte d'Vrset doubtant la iournée du lendemain, se partit dudit iardin avec ses gens environ le poinct du iour, & se tira pour retourner à Harfleur: laquelle departie sceurent assez tost apres les François, qui de rechief les poursuiuirét & rataindirét sur les marests assez pres de Harfleur à deux lieues, si les assaillirent comme deuant: mais pource qu'iceux François n'estoient pas tous ensemble, furent desconfits & morts sur la place bien deux cens: entre lesquels fut le principal ledit seigneur de Villequier, & plusieurs autres nobles du païs avec luy: auquel an le Roy d'Allemagne au retour de son voyage de France & d'Angleterre, passa par Lyon sur le Rhosne, où il vouloit faire d'Aymé Comte de Sauoye vn Duc: mais les officiers du Roy là estans ne luy voulurent pas souffrir, & pource s'en partit tout indigné, & l'alla faire Duc en vn petit chastel de la riuere nommé Moulnet qui siet à l'Empire. Et est vray que quand il partit de son païs pour venir en France, il auoit tousiours tenu le party contraire au Duc de Bourgogne par le moyen & enhort du Duc Loÿs de Bauiere frere de la Royne de France & autres ambassadeurs tenans la partie d'Orleans: mais quand ledit Roy des Rommains fur retourné en son païs, il auoit volenté toute contraire, & aymoît mieux la partie de Bourgogne que celle de ses ennemis & aduersaires.

*Pour l'an mille cccc. & xvij.*

*Comment le Duc Guillaume Comte de Hainault mourut en son hostel de Bouhain & de la guerre que feit Iean de Bauiere à sa niepce fille dudit Duc Guillaume.*

CHAP. CLXVI.

**A**V commencement de cest an le Duc Guillaume Comte de Hainault & sa femme, apres leur retour de Compiengne vindrent à Doüay deuers le Duc de Bourgogne: auquel lieu eurent parlement sur les besongnes & responce qu'auoit eu ledit Duc Guillaume à Paris avec la Royne & le conseil du Roy. Apres lequel parlement finé iceluy Duc Guillaume retourna en son chastel à Bouhain: auquel lieu luy print vne maladie de laquelle il mourut briefs iours apres, & fut porté son corps à Valenciennes, & enterré en l'Eglise des freres Mineurs, & delaisa de luy & de sa femme vne seule fille nommée Iacqueline de Bauiere: laquelle fut sa vraye heritiere, & faist toutes les seigneuries que tenoit ledit Duc au iour de son trespas: toutesfois Iean de Bauiere son oncle de par son pere bailla plusieurs empeschemens sur la querelle qu'il disoit auoir esté mal party de sa succession de feu le Duc Aubert son pere: disant outre, que de droit ne pouuoit succeder au païs de Hollande ladicte Iacqueline: & de fait se bouta par le consentement des habitans en la ville de Doudrecht, & aussi en aucunes autres: lesquelles le tindrent à seigneur & depuis luy commen-



ça à faire guerre ouuerte : & apres peu de tēps remeit en la main de nostre sainct pere le Pape son Euesché de Liege : au lieu duquel il y fut commis l'Euesque de Regence, & feit ceste resination affin d'auoir meilleur droit cōtre ladicte niepce, & apres ce espousa la Duchesse de Luxembourg laquelle par auant auoit eu espousé le Duc Anthoine de Brabant frere au Duc Jean de Bourgongne.

*Comment le Duc de Bourgongne enuoya ses lettres à plusieurs bonnes villes du Royaume de France, contenans l'estat de ceux qui gouuernoient le Royaume.*

## CHAP. CLXVII.



En ces iours le Duc de Bourgongne enuoya ses lettres patentes avec ses lettres closes à plusieurs bonnes villes du Royaume de France: afin de les esmouuoir & attirer de son party, dont la teneur s'ensuit. Jean Duc de Bourgongne Comte de Flandres, d'Arthois, de Bourgongne Palatin, seigneur de Salins, & de Malines : A tous ceux qui ces presentes lettres verront salut & recommandation de bonne paix. Comme iadis par la grace de Dieu en ce Royaume & ailleurs nous feussions venus en recommandation & domination, & trouué la disposition de la chose publique de ce noble Royaume estre gouuernée par gens de petit estat & incogneuz de lignage, qui à autres choses n'ont attendu fors à ceux aller & attirer en secret & en appert par voyes innumerables, finances de la chose publique : & icelles appliquer à leur singulier prouffit, si outrageusement que monseigneur le Roy, sa noble generation, ses gens & officiers petitement estoient contens. Avec ce ils ne payoient pas ne souffroient estre payez les aumosnes & reparations des lieux & garnisons royales: fournissoient leurs marchandises & despens, & ils ne payoient point les autres choses necessaires & competans : mais ( comme dit est ) ladicte finance estoit perdue avec celle qui estoit leuée & cueillie par tailles par empruntemens & autres exactions. Nous à ce ayant regard, considerans la prochaineté du lignage dont nous actenons à mondit seigneur, comme dit est, d'estre son cousin germain: de luy tenāt la Duché de Bourgongne & Comtez de Flandres & d'Arthois, estant double pere & Doyen des peres de France: & aussi par autres voyes sommes obligez à luy & à sa couronne si grandement, que nul ne le pourroit ignorer: pour procurer de tout nostre pouuoir, que lesdits inconueniens cessent, & que bonne reparation fut mise en la chose publique. Nous auōs fait remontrer en la ville de Paris au Louure, en la presence du grand conseil de mondit seigneur: ouquel estoit president nostre tresredoubté seigneur & fils le Duc d'Acquitaine deffunct dont Dieu en ait l'ame. En requerant que par son bon aduis & acquict de conscience, ils voulsissent pourueoir au bien & conseruation d'ice-luy: à laquelle prosecution adonc s'adioinct avec nous l'vniuersité de Paris, & de ce nous bailla ses lettres : Lesquelles furent publicquement leutes à S. Geneuieue à Paris & en generale procession, & jaçoit-ce qu'il nous fut monstré semblāt de nous volentiers ouyr & de vouloir entendre à ce : Neantmoins leur intention estoit autre: car comme il est tout notoire nous n'auons trouué fors cautelles, deceptions, dissimulations & perseuerations de tous maulx, dont en ce Royaume grosses guerres se sont ensuiuies : & ce nonobstant continuellement nous auons poursuiuy ladicte reparation, tellement que par notables clerks tant de  
Parlement



Parlement que ladicte Vniuersité, par prudens cheualiers & autres saiges bourgeois, furent faictes ordonnances tendans à icelle publiée & iurée en la presence de mondit seigneur, seans ou lieu de iustice sans querir nouuelletez ou acceptiōs de personnes. Mais maintenant la chose est dolente & miserable à racompter, en ce que le contraire a esté fait: & est notoire que les dessusdits raiisseurs, ont trouué maniere de nous eslongner de mondit seigneur: & tantost apres feirent rompre lesdictes ordonnances & faire tailles sur tailles, & prests sur prests, reformatiōs, banissemens, decollations, trauaux & autres innumerables perditions, dont nostre trefredoubté seigneur deffunct dessusdit print trefgrand desplaisance ayant intention de pourueoir en ce de remede competant: pour lequel remede il nous manda qu'en armes & puissance allissions deuers luy, nonobstāt quelque mandement que nous fut fait au contraire: & de ce nous enuoya trois paires de lettres escrites & signées de sa main. Et pour obeÿr à luy nous allasmes à S. Denys & vers la dessusdicte ville: mais nous ne peusmes pas approcher à luy, car la besongne estoit ja venue à la cognoissance desdits raiisseurs: & de fait ils faisi-  
rent nostre trefredoubté seigneur & fils, en tenant le chastel du Louure leuant les ponts & tenans les portes closes par certaine espace de temps. Et feirent emprisonner vne trefgrand partie de ses seruiteurs, tellement qu'oncques puis ne peut estre en sa plaine franchise: & jaçoit-ce que par l'espace d'un an & plus ils peurēt auoir aduis, que les ennemis de ce Royaume estoient en intention avecques toute leur puissance de greuer ce Royaume: neantmoins par leur damnable auarice & concupiscence, ils ne feirent pas au contraire prouision & resistance. Dont aduint que mondit seigneur perdit vn port des plus notables de ce Royaume & clefs de tous paÿs, avec la destruction de la plus grand partie de sa cheualerie: & que nul ne pourroit sçauoir les grans perils & dommages, qui sont en aduenture d'aduenir, que Dieu ne vueille. Et qui plus est, pource qu'il nous cōuenoit acquieter en loyauté vers mondit seigneur, en faisant son seruice: nous (cōme loyal parent & vassal) nous auons mis en armes avec toute nostre puissance pour resister, soustenir & deffendre ce Royaume comme faire deuons. Et les dessusdits rappineurs & dissipeurs feirent deffence par citez & bonnes villes fermées, qu'en icelles on ne nous laissast pas entrer ne noz gens, ne viures ne nous fussent pas administrez comme se nous feussions propres ennemis de ce Royaume: toutesfois tous ceux de nostre compaignie mieux aymoient, & aiment mondit seigneur trefgrandement. Et en assemblāt maulx avec maulx, ils feirent emprisonner trefgrand nombre de preud'hommes par les villes & citez de ce Royaume: lesquels aymoient la conseruation & domination de mondit seigneur, & ce il prenoient desplaisance à veoir les inconueniens dessusdits. Et encores (que pis est) au temps que mon trefredoubté seigneur commençoit à cognoistre leursdictes malices, vueillans à ce obuier selon raison & pourueoir, ils le feirent mourir par poisons, comme il apparut par les manieres de sa mort: & ce feirent ils à augmenter leur auctorité. Et quand nous veismes leur fureur, affin d'escheuer selon nostre pou-  
voir toute matiere de diuision: Nous allasmes en noz paÿs de Flandres, d'Arthois & vers nostre trefchier & trefamé frere le Comte de Hainault, affin d'exposer à nostre trefchier & trefamé nepueu monseigneur le Daulphin n'agueres trespas-  
( dont Dieu ait l'ame ) nostre bonne intention, & les inconueniens &



mauuaïses matieres dessusdictes : laquelle exposition nous ne pensions pas faire si tost, pource que nostredit seigneur & nepueu estoit en Hollande : & ne peut pas si tost venir en Hainault pour le peril de la mer : toutesfois apres sa venue nous allasmes vers luy à Valenciennes, & luy exposames plusieurs choses, & la paix generale à tous, qui à nous la vouloient auoir, excepté le Roy Loÿs: contre lequel nous auons grans interests touchant & regardant grandement nostre honneur & l'estat de nostre personne, dont il fut tresbien content & aussi fut nostredit frere. Et pour la perfection de ladicte paix & autres grans besongnes de ce Royaume, ils se transporterēt à S. Quentin en Vermendois, & de là à Compiengne: mais les dessusdits rapineurs par leurs malicieuses fraudes ils attraÿrent nostredit frere iusques à Paris, qui en bonne foy procedoit en ladicte besongne, & qui du tout ne croyoit pas que pour si grād bien procurer aucun voulsist actenter à sa personne: laquelle chose eut esté faicte comme il est tout notoire sil n'eut à ce pourueu par son sens : car il se partit de Paris hastiuement à petite compaignié, & vint à Compiengne en ce mesme iour de haute heure, jaçoit-ce qu'il y ait de Paris à Compiengne vingt lieues, & que cest incōuenient ne fut pas tant seulement : car en ce iour au vespre nostre trefredoubté seigneur & nepueu fut si trefgriefuement malade, que tantost apres il trespassa tout enflé des iouies, par la langue & les leures, ayant les yeux esleuez & saillans hors tellement que c'estoit grand pitié à veoir, veu que celle forme de mourir est vne maniere dōt gens empoisonnez ont accoustumé de mourir. Les dessusdits rapineurs iceluy empoisonnerent comme nostredit trefredoubté seigneur & fils son frere: laquelle chose nous racomptons dolentement, tenans fermement que tous bons preud'hommes de ce Royaume en prendront desplaisance à ouÿr reciter la mort d'iceux. Ainsi & en cest estat demoura la chose que lesdits rapineurs & empoisonneurs ne voulurent entendre à ladicte paix, ne prendre pitié du pauvre peuple de France, qui est mis à destruction pour l'occasiō desdits debars. Vrayement la nature d'iceux est moult malheureuse qui ne veullēt fors mal, & qui ont rôpu & enfreint six traictez solēnellemēt iurez: c'est à sçauoir de Chartres, de Vincestre, d'Auxerre, de Ponthoise, de Paris & de Rouures en Bourgongne. Lesquels traictez & la maniere de rompre iceux presentement nous ne declairons point, pource qu'ils sont assez notoires, & que ce seroit trop long à racompter les choses dessusdictes. Nous vous signifions, affin que cognoissiez vrayement la mauuaïstie des faulx, traistres, seditieux, pariures, tirans, homicides & rapineurs, dissipateurs & empoisonneurs des choses dessusdictes qui sont sans foy, sans loyauté, remplis de toute trahison, cruauté & desloyauté. Et vous faisons sçauoir que jaçoit-ce que nous prenons patiemment, comme faire deuons les desplaisirs & persecutions, qui nous ont esté faictes touchāt nostre personne, ayant deuant noz yeux ce qui est trouué és anciennes histoires tant diuines qu'autres, que communémēt les amis de Dieu & de la chose publique furent merueilleusement persecutez pour leurs prosecutions vertueuses. Neantmoins nostre bōne intention & volonté est de poursuiuir de toute nostre puissance à l'ayde de nostre createur, & de noz bons parens & amis, vassaulx, alliez & bien-vueillans de la couronne de France, & de nous la bonne prosperité de mondit trefredoubté seigneur nostre souuerain seigneur : la destruction duquel seroit cause de la destruction des autres



tres de son Royaume . Et aussi de pourſuiuir iuſtice & punition de coupables des deux deſſusdits empoisonnemens & de leurs adherans, & confortans ſi longuement que Dieu luy preſtera la vie ou corps : avec ce pourſuiuons ladicte reparation de ce Royaume par nous commencée, comme dit eſt : le relieuement du pauvre peuple qui ſi griefuement eſt greué & oppreſſé par aydes, impositions, tailles & gabelles, diſmes, deſpouilles & autres exactions : nous auons conclud & fermé en noſtre couraige, de ſouſtenir tous preux à nous employer de tout noſtre pouuoir. Et pource vous prions & neantmoins ſommons ſur la foy & obedience que deuez à mondit ſeigneur & à la choſe publique de ſon Royaume, à eſcheuer crime de leze maieſté, que vous & chacun de vous vueillez ayder, conſeiller & conforter à faire punir les deſtruiseurs de la noble meſgnie de France & coupable des faulces trahiſons, homicides, tyrannies & empoisonnemens deſſusdits, comme vous eſtes tenus ſelon raiſon diuine, naturelle & ciuille: & en ce nous cognoiſtrons ſi charité, loyauté, vertu & cremeur de Dieu eſt en vous, à reprimer leur tyrannie, cruauté, deſloyauté, fureur, vanité & auarice : Et par ce ſera eſcheuée la deſtruction de France, mondit ſeigneur ſera obeï & honoré: laquelle choſe eſt que plus deſirons en ce monde, & que ſemblablement plus deuez deſirer. Et ainſi ſera le Royaume en paix, les Eglises ſeront deffendues, mauuaiſties punies, & iniures faiçtes au peuple ceſſeront . Certainement icelle choſe eſt digne & neceſſaire que vous en icelle vueillez occuper voz cueurs, & non querir la grace des faulx traistres & damnables gens deſſusdits, en villipendant la grace diuine . Et ne doubtez aucuns de vous que noſtre intention ſoit à prendre vengeance deſdits deſplaiſirs, qui nous ont eſté faits: car nous vous promettons ſur la foy & loyauté, que nous deuons à Dieu, à mondit ſeigneur, à la choſe publique de ſon Royaume, que toute noſtre intention & voulenté eſt d'empeschier de tout noſtre pouuoir, que mondit ſeigneur & ſon Royaume ne viennent pas à deſtruction : laquelle procurent notoirement les deſſusdits traistres, deſtruiseurs, rappineurs & empoisonneurs : & que raiſonnable punition ſoit faiçte de ceux qui par aduis de ceux qui à ce nous ayderont, conſeilleront & conforteront: & pour ceſte cauſe voulons, & par ces preſentes nous offrons paix à tous ceux qui là voudront tenir & auoir avec nous, excepté le Roy Loïs pour la proſecution de noſtre bonne intention, tendant au bien de mondit ſeigneur, & de ſon Royaume: ſçachans qu'en ceſte loyalle & neceſſaire proſecution, nous attendrons iuſques à la mort ſans autres attêtes, ou doulces voyes deuers les deſſusdits traistres deſtruiseurs & empoisonneurs: car ceſte beſongne a eüe trop longue dilation: & chacun peut aſſez conſiderer, qu'iceux ſont tous obſtinez à deſtruire la deſſusdicte noble meſgnie de France, toute la nobleſſe: & generallemēt tout le Royaume, & mettre iceluy en main eſtrange: nous auons ferme eſperance en Dieu, qui cognoiſt le ſecret des cueurs que nous viendrōs à la concluſion du bien deſſusdit par le moyen des bons & loyaux ſubieçts de ce Royaume : leſquels en ce cas nous ſouſtiendrons, maintiendrons & ferons avec eux pour les maintenir perdurablement en toutes leurs nobleſſes, franchiſes & libertez. Et ferons à noſtre pouuoir qu'ils ne payeront doreſnauant tailles, aydes, impositions, gabelles ne autres ſubſides quelsconques exactions, comme requiert le noble Royaume de France & contre ceux qui viendront au contraire, où qui diſſimu-



leront en ceste partie : nous procederons par voye ennemie de feu & de sang soient vniuersitez, communautéz, chapitres, colleges, nobles & tous autres de quelque estat ou condition qu'ils soient. En tesmoing de ce nous auons signé ces presentes de nostre main, & fait seeller de nostre seel secret en l'absence du grād. Donné en nostre chastel de Hesdin le vingtquatriesme iour d'Auril, l'an de grace mille quatre cens dixsept apres Pasques : lesquelles lettres dessusdictes furent enuoyées és villes de Monstreul, sainct Riquier, Abbeuille, Dourlens, Amiens, Corbie, sainct Quentin, Roye, Montdidier, Beauuais & plusieurs autres lieux : & par le moyen d'icelles y eut plusieurs bonnes villes & cōmunautéz, qui tresfort furent esmeües au contraire de ceux qui gouernoient le Roy.

*Comment messire Loïs Bourdon cheualier fut prins & executé. Et de la Royne de France qui fut enuoyée à Blois, & de là à Tours en Touraine pour demourer.*

## CHAP. CLXVIII.

**E**N ce mesme temps la Royne de France estant au Bois de Vincenne, où elle tenoit son estat, fut visitée par le Roy son seigneur & mary : & ainsi qu'il retournoit à Paris vers le vespre, il encontra messire Loïs Bourdon cheualier allant de Paris audit Bois de Vincenne : lequel en trespasant par assez pres du Roy s'enclina en cheuauchant, & passa outre assez legierement : mais tantost le Roy enuoya apres luy le Preuost de Paris, & luy commanda qu'il le print & le gardast bien, tant qu'il luy en sceut rendre bon compte : Lequel Preuost en accomplissant le commandement du dessusdit fait son deuoir, & print ledit cheualier : & apres le mena en chastellet audit lieu de Paris, où il fut par le cōmandement du Roy tresfort questionné & depuis noyé en Seine. En apres par aucun peu de iours ensuiuant par l'ordonance du Roy, du Daulphin & de ceux qui gouernoient à Paris, la Royne dessusdicte accompagnée de sa belle sœur Duchesse de Bauiere, fut enuoyée à Blois, & depuis à Tours en Touraine pour demourer à assez simple estat : & luy furēt baillez pour la conduire & gouverner maistre Guillaume Torel, maistre Iean Picard, & maistre Laurens du Puys : sans le consentement desquels elle n'osoit aucune chose besongner non pas escrire vnes lettres à quelque besongne que ce fut. Et là vesquit grand espace de temps en grand desplaisance, attendant de iour en iour d'encores pis auoir. Et avecques ce tresgrand finance qu'elle auoit en diuers lieux à Paris, furent ostées par son fils le Daulphin, & ceux qui le gouernoient. Lesquels trois gouverneurs de la Royne dessus nommée on y auoit mis tout à propos, affin qu'elle ne peut riens conduire ne traicter au preiudice de ceux qui gouernoient le Roy, & son fils le Daulphin dessusdit.

*Comment messire Raoul de Gaucourt Baillif de Roüen fut mis à mort par aucuns de la communauté. Le gouvernement d'iceux. Et la venue du Daulphin audit lieu de Roüen.*

## CHAP. CLXIX.

En ces



**E**N ces propres iours par l'exhortation d'aucuns qui estoient fauorables & aymoient le Duc de Bourgogne, se meirent sus par maniere de rebellion aucuns meschans gens & de petit estat en la ville de Roüen : desquels estoit le principal vn nommé Alain Blanchart, qui depuis fut capitaine du commun d'icelle ville. Et de fait allerent à la maison du Baillif Royal de ladicte ville de Roüen nommé messire Raoul de Gaucourt cheualier, & tous armez & embastonnez busquerent à son huys tresfort, disant à ceux de dedans: nous voulons cy entrer & parler à monseigneur le Baillif pour luy presenter vn traistre que nous auons maintenant prins en la ville, & pouuoit estre enuiron dix heures de nuict. Ausquels fut respondu par iceux seruiteurs, qu'ils meissent leur prisonnier seurement iusques au lendemain: neantmoins par leur importunité tant par force comme autrement ouuerture leur fut faicte. Et tantost ledit Baillif se leua, & affillé d'un grand mantel vint parler à eux: & lors aucuns de la compaignie qui auoient les faces mucées l'occirent cruellement. Et apres eux partans de là allerent en l'hostel de son lieutenant nommé Iean Leger & le meirent à mort, & de là en autres lieux en tuerent iusques à dix: mais aucuns des autres officiers, cōme le Vicomte & receueur, de ce aduertiz, s'en fouyrent au chastel où ils furent receuz par messire Iaques de Bourbon, qui en estoit capitaine. Et le lendemain au matin s'assemblerent ceux dudit commun en tresgrand nombre, & allerent en armes deuāt ledit chastel sur intention d'entrer dedans: lequel leur fut bien deffendu par ledit capitaine, qui auoit avecques luy cēt souldoyers de par le Roy pour le garder. Et en la fin (apres plusieurs parolles) fut traicté entre eux, qu'oudit chastel entreroit seize hommes des plus notables de la ville, pour parler audit capitaine sur aucuns affaires qui moult luy touchoient. Lesquels apres ce qu'ils y furent entrez s'excuserent moult de la mort dudit Baillif, & des autres: & aussi toute la communauté de la ville disant que moult seroient ioyeux, se les facteurs estoient cogneuz & puniz: car pour leur homicide moult cremoit le Roy & son fils le Daulphin, & pource luy requeroiēt qu'il leur baillast ledit chastel à garder, laquelle requeste leur fut reffusée: secondement requirent que la porte du chastel vers les champs fut condamnée, & pareillement leur fut reffusée. Tiercement dirent que se le Roy ou le Daulphin avec leur puissance vouloient entrer en leur ville, ils luy reffuseroiēt l'entrée: & apres luy prièrent treshumblement qu'il voulsist excuser luy & le commun deuers le Roy & le Daulphin son fils: ausquels ledit capitaine respondit, qu'il les excuseroit en temps & en lieu, apres leur conseil là qu'ils feissent ouuerture au Roy & à son fils y venoient. Apres lesquelles parolles les dessusdits bourgeois rentrerent en leur ville, & depuis lesdits iours ensuiuant ce qu'ils doubtoient aduint, car le fils du Roy partant de Paris à tout deux mille combattans, alla au Pont-de-l'Arche: duquel lieu il enuoya l'Archeuesque de Roüen son cousin, frere au Comte de Harcourt audit lieu de Roüen, pour enhorter iceux à obeyr au Daulphin: & quand il fut venu il trouua à la porte aucuns des chanoines de l'eglise cathedrale armez avecques les bourgeois, ausquels il exposa le mandement dudit Daulphin: & ils luy respondirent qu'ils auoient tous ensemble conclud, qu'en la ville pas il n'entreroit à toute sa puissance: mais s'il y vouloit aller à petite compaignie & payer ses despens, ils estoient contens & non autrement: & adonc



ledit Archeuesque voyant qu'il ne pouuoit riens besongner, retourna vers le Daulphin exposant ce qu'il auoit veu & ouï, & apres ledit Daulphin māda Pierre de Bourbon, & puis alla loger à saincte Katherine en la montaigne. En la fin dit audit de Bourbon, nostre cousin allez en vostre chastel & par la porte des champs, receuez deux cens hommes d'armes & autāt d'archiers, que nous vous enuoyerons: laquelle chose fut ainsi faicte: pourquoy ceux de la ville furēt remplis de grand fureur, toutesfois en dedans les trois iours ensuiuant iceluy Daulphin par traicté entra en la ville auecques toute sa puissance, & alla à cheual iusques à la plus grand Eglise faire son oraison & fut logé audit chastel. Et apres huiēt iours qu'il eut traicté auec ceux de Roüen en les confermant en obeïssance, & en pardonnant tous leurs forfaits excepté les occiseurs dudit Baillif: il se partit auecques tous ses gens payans leurs despens, & retourna à Paris où il ordonna nouuel Baillif de Roüen le seigneur de Gamaches: commandant à iceluy qu'il prenist punition de tous les homicides trouuez coupables par bonne information de la mort de son predecesseur, & ainsi en fut fait des aucuns: mais le dessusdit Allain Blanchart s'absenta certaine espace de temps, & depuis retourna en ladicte ville de Roüen où il eut grand auctorité & gouuernement, comme cy apres sera declairé.

*Comment le Roy Loïs trespassa: le gouuernement des gens de compaignies, la destrouffe de Raymonnet de la guerre, & la destruction de la ville d'Aumale.*

## CHAP. CLXX.

**E**N ces iours le Roy Loïs beau pere du Daulphin mourut, & delaisa trois fils: c'est à sçauoir le premier nommé Loïs qui fut Roy apres son pere: le second René qui depuis fut Duc de Bar, & le tiers Charles: & si auoit deux filles, dont l'une auoit espousé le Daulphin dessusdit, & la seconde nommée Yolland, n'auoit que deux ans. Pour la mort duquel iceluy Daulphin fut fort affoibly de conseil & d'ayde. Esquelles tribulations regnoit vn moult merueilleux gouuernement en plusieurs parties du Royaume de France, & n'estoit iustice obeïe en quelconque maniere que ce fut. Et aussi les estrangiers tenans la partie du Duc de Bourgongne: c'est à sçauoir Gastellimas Quigny & les autres deuant nommez, roboient & destrouffoient par tous les lieux & païs où ils repairoient tant sur les nobles comme sur les non nobles, & mesmement sur ceux tenans la partie dudit Duc de Bourgongne. Et finalement faisoient maux inestimables, dont le peuple estoit tresfort oppressé. Toutesfois iceux estrangiers allerent ou païs de Boullenois tendans à robber iceluy, comme ils auoient fait ailleurs. Mais aucuns Boulnoisiens s'assemblerent en la compaignie de Butor Bastard de Croÿ. Et tous ensemble par nuit allèrent assaillir le logis du lieutenant Iean du Clau nommé Laurens Rose: lequel Laurens fut par iceux mis à mort auecques aucuns de ses gens, & tous les autres furent destrouffez: pour laquelle enuahie le Bastard de Thian qui estoit l'un des capitaines de compaignies, print vn gentil-homme tres notable nommé Gadiffer de Collehault, lequel il feit pendre à vn arbre. Toutesfois iceux estrangiers voyans la forte guerre que leur faisoient iceux Boulnoisiens, tantost se tirerent hors du païs: & brief ensuiuant prindrent la ville & forteresse de Dauencourt,



court, appartenant aux hoirs du seigneur de Hangiers : laquelle ville & forteresse apres ce qu'ils eurent prins tous les biens, & bouterent le feu dedans & desolerent du tout, & de là allerent mettre le siege deuant le Neuf-Chastel sur Eufne : pour lequel siege leuer & aussi pour iceux estrangiers destrousser, fassemblerent messire Raymonnet de la Guerre, & messire Thomas de Lersies Baillif de Vermendois en tresgrand nombre de par le Roy. Et de fait allerent pour combattre iceux : lesquels scachant leur venue, vindrent à l'encontre d'eux & en conclusion les meirent en desroy, & en prindrent que tuerent bien huit vingts. Et les autres avecques ledit Raymonnet & messire Thomas de Lersies se sauuerent, en eux retrayant és bonnes villes du Roy, où ils peurent le mieux. Apres laquelle besongne dessusdicte ceux dudit Neuf-Chastel se rendirent à iceux estrangiers : lesquels apres ce qu'ils eurent tout robbé les biens, bouterent le feu dedans : & eux partans de là, s'en allerent en Cambresis où ils feirent plusieurs dommages. Et d'autre part en ce mesme temps Iean de Fosseux, Dauiod de Poix, Ferry de Mailly, messire Loys de Thiembronne, Loys de Varigiens, Guerrard Bastard de Brimeu & aucuns autres meneurs des gés du Duc de Bourgogne passerent l'eau de Somme par la Blanche-Tache bien douze cens combattans : & par Oisemont s'en allerent à Aumale appartenant au Comte de Harcourt, & là se logerent, & apres liurerent grand assaut au chastel : mais il fut bien deffendu par ceux qui l'auoient en garde, & tant que desdits assaillans y eut plusieurs qui furent naurez terriblement : apres lequel assaut en icelle nuit, iceux par meschief ou autrement bouterent le feu en la ville : laquelle avec l'Eglise du tout fut arse & desolée, dont ce fut grand pitié : car c'estoit vne ville tresnotable pour plusieurs marchandises. En outre ledit Iean de Fosseux & ses complices de là s'en allerent loger en la ville de Hornoy, & és villages à l'environ ou pays de Vimeu : lequel pays & villages en plusieurs parties fut pilliez & robez par les dessusdits : lesquels dedans trois iours ensuiuant à tout leurs prisonniers, vaches, brebis, chevaux pourceaux & autres proyes repasserent l'eau de Somme, par où ils auoient passé. Et en ce cas semblable se feirent plusieurs courses & cheuachées par les dessusdits sur les marches de Beauuoisis, Vermendois, Santres, Amiennois & autres pays de l'obeissance du Roy, dont iceux estoient merueilleusement trauaillez.

*Comment les gens du Roy qui estoient en garnison à Peronne, faisoient forte guerre aux pais du Duc de Bourgogne: & pareillement le chastel de Mennuyen, & autres matieres.*  
CHAP. CLXXI.



Quant est ainsi que durant le tēps dessusdit la ville de Peronne située sur la riuere de Somme, estoit tresfort garnie de gens de guerre, qu'y auoit enuoyé le Cōestable de France de par le Roy : entre lesquels y estoit comme chief messire Robert de Loyre à tout cent hommes d'armes, bien en point & cent arbalestriers de Gennes avec autres cent combattans : lesquels tressouuent couroient de iour & de nuit sur les pays & subiects du Duc de Bourgogne, & en ramenoient de grans proyes en leur garnison : & pareillement le chastel de Demmin appartenant à messire Collart de Caluille, faisoit



guerre ou nom du Roy à tous les bien-vueillans & qui tenoient le party dudit Duc. Et par especial les villes d'Amiens & Corbie: à ceste cause auoient de grans affaires tant d'un party comme d'autre: & mesmement à l'instance & mandemēt dudit Duc de Bourgogne, faillit que ceux de la ville d'Amiens deboutassent d'icelle ville messire Robert d'Eufne, qui en estoit Baillif de par le Roy, & Hue du Puys procureur avecques aucuns autres, à l'occasion de ce que trop rigoureusement s'estoient conduits contre les gens dudit Duc outre son plaisir: car il leur manda que c'estoit son intention de à eux faire guerre, ou cas que contre luy les voudroient soubstenir, & pource se partirent & allerent à Paris deuers le Roy. Auquel & à son conseil feirent de ceste besongne grand complaincte, dont en perseuerant de mal en pis, ils ne furent pas contens du dessusdit Duc de Bourgogne.

*Comment le Duc de Bourgogne enuoya ses ambassadeurs en plusieurs bonnes villes du Roy, pour auoir alliances avec eux, & les sermens qui s'en feirent.*

## CHAP. CLXXII.

**E**N apres ledit Duc de Bourgogne enuoya en plusieurs des bones villes du Roy dessusdit ses ambassadeurs: C'est à sçauoir les seigneurs de Fosseux & de Humbercourt, & maistre Philippe de Moruiller: lesquels portoient lettres patentes dudit Duc, adressans aux gouuerneurs & communautéz d'icelles bonnes villes. Et premierement allerent à Monstreul, laquelle ouurit aux autres la voye, & de là allerent à S. Riquier, Abbeuille, Amiens, & Dourlens: esquelles & en chacune d'icelles ils feirent lire tout en commun ledit mandemēt: apres laquelle lecture ledit maistre Philippe de Moruiller, proposa deuant iceux moult auctenticquement, en remonstrant la bonne prouision, que ledit Duc de Bourgogne auoit intention de mettre pour le bien du Royaume & de la chose publique: finablement tant feirent & procurerent lesdits ambassadeurs, que toutes icelles bonnes villes feirent alliances avec lesdits ambassadeurs iurées solemnellement, & de ce baillerent l'une partie à l'autre leurs lettres patentes, desquelles de celles de Dourlens la teneur s'ensuit. A tous ceux qui ces presentes lettres verront Iean de Fosseux seigneur de Fosseux & de Muelle, David de Brimeu, sire de Humbercourt cheualiers, & Philippe de Moruiller cōseilliers, ambassadeurs & procureurs en ceste partie de treshault & trespouissant Prince, & nostre trefredoubté seigneur monseigneur le Duc de Bourgogne d'une part, & le capitaine, Majeur & escheuins bourgeois manans & habitans de ladicte ville de Dourlens d'autre part salut: sçauoir faisons que nous auons fait traicté concorde, promis enconuenancez certains traictez & accords dont la teneur s'ensuit. Premierement que lesdits capitaines, escheuins, bourgeois, manans & habitans de Dourlens ayderont à mondit seigneur le Duc, pour mettre le Roy nostre sire en sa franchise & seigneurie, & le Royaume en franchise & iustice, & que marchandise y puisse auoir cours. Item qu'ils ayderont & conforteront mondit seigneur le Duc de leur pouuoir, à ce que le Roy & son Royaume soient bien gouuernez & deffenduz & gardez: le receurent luy & les siens en ladicte ville, en icelle demourant le plus fort: & luy bailleront pour leur argent viures & toutes autres choses, dont ils auront besoing, la ville demourant garnie:



garnie: & le deffendront & garderont comme eux mesmes, & souffriront que les marchans de ladicte ville & tous autres amennent viures, & toutes autres marchandises, apres mōdit seigneur le Duc & son ost & ils seront tenuz leurs. Item que mondit seigneur le Duc estāt en ladicte ville de Dourlens, il ne fera prendre ou empescher aucuns de ladicte ville de quelque estat ou condition qu'ils soient, sinon par iustice & information precedente. Et aussi faucuns des gens de mondit seigneur le Duc faisoient aucune iniure ou offence à aucuns de ladicte ville, il les punira ou fera punir de par ceux qu'il appartiēdra. Item que lesdits de Dourlens de quelque estat ou condition qu'ils soient, pourront aller, conuerser & reparer pour leurs marchandises & autres leurs affaires & besongnes, es pays de mondit seigneur: & les habitans & demourans en ladicte ville seurement & sauement, sans leur donner empeschement en corps & en biens. Item que mondit seigneur le Duc aydera, portera & soustenra les dessus nommez de Dourlens contre tous qui les voudroient empescher en quelque maniere que ce fut, pour auoir fait les choses dessusdictes en faueur du Roy & de mondit seigneur. Item que ce n'est point l'intētion de mondit seigneur le Duc de mettre garnison en ladicte ville de Dourlens, ne d'auoir ou pretendre aucune seigneurie en icelle ville: mais luy souffist qu'en & sous le Roy ladicte ville se gouerne, ainsi comme elle a accoustumē au bien du Roy, à honneur de ceux de ladicte ville & au profit de la chose publicque d'icelle: & pareillemēt que ceux de ladicte ville ne souffriront d'autre costē garnison estre mise en icelle. Item que s'en ladicte ville de Dourlens a aucuns, qui vray semblablement à leur pouuoir de fait, de parole ou autrement vouloient empescher le fait de mondit seigneur, & que de ce courust commune renommēe contre ceux par information precedente, ils les puniront & feront punir selon toute rigueur de iustice par eux, & ainsi qu'il appartiendra.

Item pource que ladicte ville est moult trauaillēe & oppressēe en sa labour, & par especial en la moisson de cest present Aoust, & les bestiaux souuent prins & emmenez par aucuns gens d'armes, qui se dient & aduoient estre sous monseigneur le Duc, dont le pauvre peuple & les marchans sont fort destourbez & en voye de desertation, se pourueu n'y est briefuemēt: lesdits de Dourlens supplient à vous noz seigneurs les ambassadeurs, que de vostre bonne & pourueue discretion vous plaise remonstrer audit mōseigneur le Duc: Affin que prouision y soit mise, ainsi que besoing est, & lesdits de Dourlens prieront pour vous. Item que pour la seurte des choses dessusdictes & chacune d'icelle, lesdits ambassadeurs & procureurs ou nom que dessus est dit. Et lesdits capitaines, escheuins, manans & habitans de Dourlens en bailleront leurs lettres seellēes de leurs seaux, & signēes par le clerc fermētē de l'escheuinage de ladicte ville. Laquelle chose noz ambassadeurs & procureurs dessusdits pour la vertu du pouoir à nous donné par mon tresredoubté seigneur & nous capitaine majeur, &c. Auons promis, iuré & enconuenancē: & par la teneur de ces presentes, promettons, iurons & encōuenançons tenir & entretenir & de poinct en poinct, par accomplir iceluy traictē, sans iamais aller au contraire sous l'obligation de tous noz biens, & es noms & qualitez que nous procedons & tout sans fraude & mal engin. En tesmoing de ce nous auons mis noz seaux à ces presentes, ce fut fait en la ville de Dourlens le vij. iour d'Aoust, l'an de grace mille cccc. & xvij.



*Comment Henry Roy d'Angleterre retourna en France à grand puissance & print plusieurs villes & forteresses: du Concille de Constance, où fut fait le Pape Martin.*

## CHAP. CLXXII.



En ce temps Henry Roy d'Angleterre accompagné des Ducs de Clarence & de Glocestre ses freres, avec plusieurs autres Princes & tresgrand nombre de combattans & habillemens de guerre, descendit au port de Toucque en Normandie, sur intention de conquerre & mettre en son obeïssance toute la Duché. Auquel lieu de Toucque y auoit fort chastel royal, qui tantost fut assiegé de toutes parts. Pourquoy messire Jean d'Engennes, qui en estoit capitaine le rendit en la fin de quatre iours ensuiuant, moyennant que luy & ses gens se partirent avec tous leurs biens: & peu de temps apres se rendirent au dessusdit Roy les villes & forteresses de Harcourt, Bephe-luin, Rogier de Beaumont & Eureux, & aucuns autres sans faire grand deffence: esquelles villes & forteresses il meit tresgrand garnison de gens d'armes: & avec ce se meit en composition à faire comme Roüen, & la ville de Louuiers: pour lesquelles redditions & conquestes, les autres plus puissans bonnes villes & forteresses d'iceluy pays se commencerent moult fort à esmerueiller: car avec ce auoient peu qui les deffendist, par ce que la plus grand partie des nobles estoient diuisez, & tenoient les vns la partie du Roy, & les autres la partie du Duc de Bourgongne, & par ainsi ne s'osoient fier l'un en l'autre: & d'autre part ledit Conestable auoit remandé la plus grand partie de ses gens d'armes, pour estre à Paris & aux autres bonnes villes en ceste marche contre la venue du Duc de Bourgongne que de iour en iour il attendoit: & par ainsi ne s'osoient fier l'un à l'autre que de iour en iour il attendoit à toute sa puissance. Auquel temps par l'ordonnance du saint Concille de Constance, quatre nations: c'est à sçauoir Italie, France, Angleterre, & Allemagne esleurent six notables hommes de chacune nation, qui entrerent avecques tous les Cardinaulx de la Court de Romme en Conclauue, pour eslire vn Pape la nuit de saint Martin d'hiver. Et eux estans là dedans les portes closes & fermées, Sagismont le Roy d'Allemagne, de Hongrie & aussi de Behaigne estoit dehors contre les portes seant en la chaire royalle, portant en son chef couronne, & en sa main ayant verge royalle, enuironné de plusieurs Princes cheualiers & autres gens d'armes: & par la grace du saint Esprit (sicomme on croit) de commun accord ils esleurent le Cardinal de la Coulonne natif de Romme Pape, ayant en ses armes vn escu de vermeil, au meillieu vne coulomme d'argent couronnée d'une couronne d'or. Si fut porté à l'Eglise cathedrale, & consacré par le Cardinal Hostienſe Doyen des Cardinaulx, & fut nommé Martin quint de ce nom. Laquelle chose fut tantost diuulguée par toutes les parties desdictes nations, dont tout le clergé & le peuple rendirent graces à Dieu, excepté la cité de Paris: car elle doubtoit qu'iceluy nouuel Pape & le Roy d'Allemagne ne fussent fauorables au Roy d'Angleterre, & au Duc de Bourgongne plus qu'au Roy de France & à son fils au Comte d'Armignac, & à tout le conseil royal.

*Comment*



*Comment le seigneur de Canny fut enuoyé de par le Roy en ambassade deuers le Duc de Bourgongne, qu'il trouua à Amiens, & de la responce qu'il eut dudit Duc de Bourgongne.*

CHAP. CLXXIII.

**A** Pres que le Duc de Bourgongne eut par treslong temps fait toutes ses preparacions, sur intention de mener son entreprinse à fin & que toutes ses gens d'armes & habillemens de guerre furent prests, se partirent au mois d'Aoust le iour saint Laurens de la ville d'Arras, & alla à Corbie pour passer outre & tirer vers Paris. Auquel lieu de Corbie la propre nuit qu'il y vint, mourut l'Abbé dudit lieu nommé Raoul de Roye: pour la mort duquel ledit Duc fut trescourroucé: & apres qu'il eut là esté aucun peu de iours, s'en alla à Amiens, là où il fut receu de tous ceux de la ville moult honnorablement tant des gouuerneurs d'icelle comme du commun, & crioyt on Noël par tous les quarrefourgs où il passoit, & se logea en l'hostel de maistre Robert le Jeune son conseilier. En laquelle deuant son departement, il ordonna nouueaulx officiers: c'est à sçauoir le seigneur du Belloy fut capitaine, le seigneur de Humbercourt Baillif, Andrieu Clauel procureur, & autres chacun en son degré les commeist selon son bon plaisir. Auquel lieu d'Amiens luy furent apportées lettres de par le Roy signées de sa main: lesquelles luy presenta messire Aubert seigneur de Canny & de Varennes. En luy disant, tresnoble Prince & redouté seigneur, cōme il appert par ces lettres du Roy nostre sire, il m'est enioinct & commandé que ie vous enioingnisse de par luy & commandasse destroitement en tant que pouoye, que vous laissez le voyage qu'avez encommencé en congiant vostre ost, & que retournez en vostre pays, & luy rescriuez pourquoy vous avez fait ceste assemblée outre son commandement. Auquel ledit Duc de Bourgongne respondit de sa bouche: vous, dit il, sire de Canny se vous voulez, ou si vous ne voulez pas vous estes de nostre lignage du costé de Flandres: mais neantmoins pour ceste legation par vous faicte, en verité à peu tient, que ie ne vous fais trencher la teste. Et adonc ledit sire de Canny moult esbahy pour icelles parolles, se meit à genoulx luy humblement excusant à son pouoir, disant comment il auoit esté contrainct de par le Roy à obeir en luy, monstrant les instructions à luy sur ce baillées de par le Roy & son conseil. Et avec ce fut grandement excusé des cheualiers estans au tour dudit Duc: pourquoy aucunement s'appaisa, & dit que par luy il ne manderait pas son intention, mais par vn autre il luy rescriroit. Et que riens il ne feroit pour le mandement & deffence du Roy, mais à toute sa puissance prestement il iroit deuers luy à Paris, & luy responderoit bouche à bouche de toutes les articles à luy enuoyez. Toutesfois ledit Duc feit respōdre par son conseil à toutes les articles de l'instruction à luy baillées de par le Roy, & se bailla par escript audit seigneur de Canny, & avec ce les noms des trahistres de son conseil & officiers iceluy vueillans destruire: & feit promettre audit sire de Canny, qu'il les bailleroit en la main du Roy & non d'autre. Et apres qu'il eust besongné se departit d'Amiens, & retourna à Paris deuers le Roy. S'ensuit l'instruction baillée à messire Aubert de Canny seigneur de Varennes de par le Roy & son conseil, de ce qu'il a à faire deuers le Duc de Bourgongne. Premièrement il parlera au Duc de Bourgongne en luy disant, que le Roy & monseigneur le



Daulphin sont moult esbahis des manieres qu'il a tenu & encores tient deuers le Roy & à sa seigneurie, veu qu'il est son parent tant prochain comme chacun scet, & à luy obligé par tant de manieres, comme luy mesmes a tousiours dit & confessé en toutes ses lettres & escripts. Item & luy remonstrera pour declairer ce que dit est, confiamment ses gens & les subiects de ses pays & autres qui sont & faduient de luy, font guerre ouuerte au Roy & à ses subiects, en prenant par assault & par siege les villes, chasteaux & fortresses du Roy : & font toutes les cruautéz & inhumanitez par feu, par sang & autrement que faire pourroient les ennemis d'Angleterre & encores pis. Item en outre luy remonstrera, cōment ses gens & officiers prennent serment des habitans és bonnes villes du Roy, d'estre obeissans au Duc de Bourgogne : & auec ce leur font deffence de par luy que doresnauant ils ne payent plus riens au Roy de ses aydes ou redeuances, que ils luy ont accoustumé de payer : laquelle chose est voye merueilleuse contre l'honneur, auctorité & seigneurie du Roy. Item il luy remonstrera en outre comment les choses dessusdictes, qui maintenant sont faictes par ledit Duc de Bourgogne : quand au point de la venue & descendue des Anglois, sont à croire & imaginer à plusieurs gens, qu'elles sont faictes au prouffit & aduantage d'iceux Anglois, comme pour oster la puissance du Roy & non resister aux mauuaises volentéz & efforcemens des Anglois, & que le Duc de Bourgogne soit leur allié & fermenté. Item & pour ces causes requerra ledit messire Aubert de Canny de par le Roy au Duc de Bourgogne, qu'il vueille cesser de tels enforcemens & choses dessusdictes : & especiallement d'assaillir les bonnes villes du Roy & de ses subiects, & de mettre siege deuant, & aussi de prendre sermens de luy obeir par les subiects du Roy demourans en ses bonnes villes. Et auecques ce luy requerra que toutes les gens d'armes qu'il a assemblez face departir, issir & retourner chacun en son lieu : car veu les manieres qu'il a tenu & tient iusques cy, le Roy croit fermement qu'il tient & fait assembler iceux gens d'armes pour donner secours, faueur & ayde aux Anglois, & pour greuer le Roy & sa seigneurie.

Item & pour induire le Duc de Bourgogne à ce, messire Aubert luy remonstrera le grand deshonneur qu'il a fait, la grand diffame & reproche qui sera à luy & à sa generation, s'il perseuere en tenant les manieres qu'il a commencé, en luy priant treshumblement & doucement, qu'il a à ce bien penser & aduiser, & que il ne face telle villennie à son bon pere qui tant fut vaillant & loyal. Et qui en sa mort luy commanda de tousiours obeir au Roy, & à ses commandemens.

Item messire Aubert remonstrera semblablement les choses dessusdictes à tous les seigneurs Barons, cheualiers, escuyers, & autres de la compagnie du Duc de Bourgogne : ausquels il pourra parler, en eux priant & requerant de par le Roy, que eux & leurs predecesseurs qui tousiours ont esté tant bons & loyaux deuers le Roy & sa seigneurie : maintenant ne s'en veuillent pas deffier ne eux deshonnorer ne diffamer par mauuais conseil, en faisant aucune chose, dont eux ne leurs successeurs puissent estre reputez au temps aduenir d'auoir esté desobeissans au Roy, & d'auoir donné faueur à ses ennemis. Item & en la fin en executant à la personne du Duc de Bourgogne, & à tous ceux de sa compagnie ce que le Roy a commandé audit messire Aubert, il fera le plus doucement & gracieusement qu'il pourra les commandemens & deffences contenues & declairées en lettres patentes



patentes sur ce baillées de par le Roy à messire Aubert, & de ce demandera response. Item & se le Duc de Bourgogne ou autre de sa compagnie disoient, que ceux qui gouvernent deuers le Roy, luy ont fait & font de iour en iour plusieurs grans duretez & choses qu'il ne peult ne doit endurer ne souffrir : encores respondra messire Aubert que faucuns de ceux, qui sont entour le Roy ont fait aucune chose au Duc de Bourgogne qui luy deust desplaire, si ne seroit-ce pas cause raisonnable, ne souffisant pour ainsi destruire le royaume comme il a fait destruire & encores fait chacun iour, ne que pour ce il eust deu fauoriser ne donner conseil, confort n'ayde aux Anglois ennemis du Roy à la charge de son honneur & de sa generation à tousioursmais, & qu'il peult bien proceder par autre maniere plus honnestes. Item dira en outre messire Aubert quant a ce point à la requeste de bonne memoire monseigneur de Hainault à qui Dieu pardoint, a autresfois voulu & octroyé pour le bien de la paix au Duc de Bourgogne, & à tous autres qui l'ont seruy moult en tresgrosses choses, & qui leur deuoient plaire : car elles estoient au bien & prouffit du Duc & de tous ceux qui l'ont seruy. Mais il ne les voulut pas accepter, & n'en fait compte dont le Roy n'en est pas bien content & à bon droit. Et neantmoins encores n'a il pas la main si close qu'il ne soit bien enclin de faire grans courtoisies & graces audit Duc de Bourgogne, & à tous autres qui ont esté à son seruice se mestier est, & ils font vers luy deuoir comme ils sont tenuz. Item à ceste fin seront baillées, se mestier est, à messire Aubert les responses par escript que le Roy a fait autresfois aux complainctes & doleances que faisoit ledit Duc de Bourgogne, des choses qu'il disoit à luy estre faictes & perpetrées contre luy en son preiudice, affin de monstrier telles responses aux Barons, Damoiseaux, cheualiers & autres nobles estans au seruice & en la compagnie du Duc de Bourgogne. Donné à Paris le second iour d'Aoust l'an de grace mille quatre cens & xvij. Ainsi signé par le Roy. Ferrement. S'ensuit la coppie des responses que fait ledit Duc de Bourgogne sur les articles à luy bail lées de par le Roy, par messire Aubert de Canny seigneur de Varennes.

Premierement en ce qu'il touche, que le Roy est moult esbahy des manieres que ledit Duc de Bourgogne a tenu & tient encores deuers le Roy & sa seigneurie, veu qu'il est son parent si prochain comme chacun scet, & qu'il est obligé à luy par moult de manieres. Respond le Duc de Bourgogne : que vray est qu'il est son parent & vassal & à luy obligé deuant tous & contre tous : & pour cause de ce, il a tenu les manieres de luy aymer & seruir, en contendant au temps passé que bon regime fut mis en son royaume, tant au regard de sa personne, de la Roynie & de ses enfans, comme sur la reparation de ses maisons, & places de bonne iustice & bonne administration des finances, comme il appert notoirement par les ordonnances royaux. Lesquelles choses à la poursuite dudit Duc, ont esté publiées & iurées en la presence du Roy tenant lieu de iustice : mais les manieres de ceux qui sont entour le Roy, qui seront cy apres nommez furent cause de tout rompre, de gaster & dissiper : non pas tant seulement la substance du Roy & de son royaume, mais generally de tous ses subiects & particuliers estans au royaume. Et mesmement du Duc de Bourgogne, & de tous ses bons amis & bienvueillans, en les destruisant de corps & de tenemens, ainsi comme ils les ont peu prendre & apprehender, & ont procuré tant en court spirituelle com-



me ailleurs son deshonneur & damnement de sa bonne memoire & renommée, & de sa posterité & generation : mais le Duc de Bourgongne au saint Concille de Constance obtint vne sentence pour soy, par laquelle il appert clerement du bon droit d'iceluy Duc & de la mauuaistié & hayne des autres. Item en tant qu'il touche & dit que les gens & subiects des païs de Bourgongne, & d'autres qui se aduoient audit Duc, font guerre ouuerte au Roy & à ses subiects: & prennent tant par assault comme par sieges les villes, chasteaux & fortereffes du Roy: & font toutes les cruautez & inhumanitez par feu, par sang & autrement que pourroient faire les ennemis d'Angleterre, & encores pis. Respons le Duc de Bourgogne que quād il veit que ceux qui sont entour le Roy, ont tousiours perseueré & perseuerent en leurs rigueurs, & qu'ils n'ont voulu entēdre à aucun bon regime & bien de paix: & qu'il estoit tousiours enuahy & aggressé & ses bons amis & de bonne volenté, par voye de feu & de sang, lors le Duc de Bourgongne fut contrainct de signifier par ses lettres patentes en plusieurs particulieres villes de ce royaume, les dures rigueurs commises & perpetrées par ceux qui sont entour le Roy & la volenté qu'il auoit, & pareillement les manieres qu'il tiendra pour y remedier: & pour cause de ce, fait il son mandement de gens d'armes & de traict. Et que grace à Dieu il a pour seruir le Roy & pour le bien de luy & de son royaume six mille cheualiers & escuyers, & iusques au nombre de trente mille combattans tous bienvueillans du Roy, & de son royaume & de ses bons subiects. Laquelle & les siens en tenant leur chemin, ont trouué & trouuent en plusieurs notables villes & citez bons bourgeois & autres cognoissans la bonne intention & volenté du Duc, à tout bien, qui luy ont fait ouuerture des bonnes villes & citez: & avec ce les gens du Duc ont fait qu'aucunes places qui estoient garnies de pillars, robeurs & autres malfaicteurs, luy ont esté rendues, baillées & deliurées, & les ont prins au nom du Roy, & laissées en la garde des nobles vail-lans hommes subiects de monseigneur le Roy, qui pour quelque chose du monde ne voudroient faire desloyauté deuers le Roy & le bien de ce royaume, & ce qui à esté fait au gré des bonnes villes, des citez & de tout le païs environ. Item & en tant qu'il touche, que les gens & officiers du Duc de Bourgongne prindrent les sermens des habitans és bonnes villes du Roy d'estre obeissans à iceluy Duc: & avec ce leur font deffence de par luy, que desormais en auant ils ne payent plus au Roy ses aydes debites, qu'ils luy ont accoustumé de payer. Respond le Duc de Bourgongne, que s'il prend les sermens desdits habitans, c'est affin qu'ils soiēt & perseuerent en bonne loyauté deuers le Roy & le bien de son royaume, à la confusion & reproche des empescheurs de paix & destruisers du royaume, qui sont entour le Roy. Et ceux qui se ioignent, & sont obeissans au Duc de Bourgongne: c'est pource qu'ils voyent & cognoissent qu'il a tant bonne volenté au bien du Roy & de son royaume, que plus ne pourroit & plus que nuls autres. Et n'est pas vray (sauue la reuerence du Roy) que la deffence soit faicte de non payer au Roy ses aydes & autres debites: mais bien pourroit estre qu'ils ont fait deffence, qu'on ne les baille pas aux faulx trahistres & empescheurs de paix, & qu'elles soient conseruées & gardées à employer au bien du Roy & de son royaume en tēps & en lieu, & ils ont bienfait: car tout l'argēt qui chet és mains desdits trahistres, qui monte vne tresgrand somme de deniers, a esté tousiours mauuaisement



ment & desloyaument emblé au Roy, & desparty entre eux à l'auantage des ennemis de France, & au tresgrand & innumerable dommage du Roy & de son royaume & de sa cheualerie, comme chacun scet : toutesfois l'intention du Duc de Bourgogne, est de procurer quand il sera deuers le Roy, que tels aydes plus n'ayent cours, & que les bons subiects du royaume soient tenus en leurs anciennes libertez & franchises, en pouruoyant aux affaires & necessitez du royaume par toutes bonnes voyes & manieres. Item & en tant que touche les choses cy dessus declairées, que maintenant sont faictes par le Duc de Bourgogne sur le point de la venue & descendue des Anglois, font à croire à plusieurs gens & imaginer, qu'elles sont faictes au prouffit & aduantage des Anglois: c'est à sçauoir pour oster la puissance du Roy, & non resister à la mauuaise volenté & enforcement des Anglois : & que le Duc de Bourgogne soit leur allié & sermenté. Respond le Duc de Bourgogne, que celle imagination ne peult ne doit cheoir en cuer de loyal homme, car autresfois on à veu la descendue des Anglois sans ce qu'on leur fait resistance : au contraire combien que les trahistres, qui pour lors gouuernoient & encores gouuernent, fussent tous saiges & aduisez de la descendue & venue, dont le Roy a eu telle perte de terre & cheualerie, que chacun scet: & doit on fermement tenir, que se les Anglois eurent lors l'auantaige sur le royaume par le faulx & mauuais regime des trahistres, ils veulent en ce perseuerer: & mesmement veu que par leurs damnables manieres, ils ont prins Harfleur, qui est vne des plus fortes deffences de Normandie. Et ceste chose doiuent bien fermement noter & afficher en leurs cueurs les nobles cheualiers, & escuyers de la compagnie du Duc de Bourgogne : ausquels les destourbeurs de paix veulent imposer telle trahison & desloyauté, comme d'empescher au resistentement de la mauuaise volenté des Anglois : & sauue la reuerence du Roy, tous ceux qui dient le Duc de Bourgogne estre sermenté & allié aux Anglois, ils mentent mauuaisement & faulcement. Item & en tant que touche la requeste, que le Duc de Bourgogne face issir tous ses gens d'armes qu'il a assemblez, & face retourner en leurs lieux & pays & autres choses. Respond ledit Duc, qu'on voit maintenant clerement la faulce & damnable volenté des trahistres : car tout le monde perçoit bien qu'ils n'ont nulle puissance de resister aux Anglois. Et que maintenant il est temps de faire assemblée des gens d'armes pour le Roy & pour son royaume: mesmement de bons & loyaux cheualiers, comme sont ceux de la compagnie dudit Duc de Bourgogne, & non pas d'eux donner congé & enuoyer chacun en sa maison: & est apparence clere & euidente, qu'ils le font en faueur des Anglois, & pour greuer le Roy & sa seigneurie. Et encores d'abondant doiuent noter les cheualiers & escuyers de la compagnie dudit Duc, que les trahistres les reputent ennemis du Roy & desloyaulx deuers luy & son royaume. Et pource respond ledit Duc de Bourgogne pour soy & pour tous ceux de sa compagnie tout absolument, qu'il n'en fera departir ses gens : mais poursuiura tousiours, comme par la teneur de ses lettres il a promis. Item & en tant qu'il touche que ledit messire Aubert de Canny demonstrest, que le Duc de Bourgogne fait deshonneur grand, & le grand blasme & reproche qui sera pour luy & sa generation s'il perseuere, en tenant les manieres qu'il a commencées, & qu'il ne face pas telle villennie à son bon pere, qui tant fut vaillant & loyal, & qui en sa



mort expressement luy commauda tousiours obeir au Roy & à ses commandemens. Respond le Duc de Bourgongne que son pere de bonne memoire, à qui Dieu pardoint, fut tousiours (comme dit est) bon & loyal deuers le Roy: & pource qu'il veoit & cognoissoit les iniquitez des mauuais regner en la Court de France au temps de son trespas, il commanda à son fils loyaument seruir au Roy & à la couronne de France, sans esparagner son corps ne sa cheuance: dont le Duc de Bourgongne a prins ces bonnes manieres tendant à la reparation & la bonne reformation de ce royaume, & à la conseruation d'iceluy. Et n'a pas ce fait soudainement, mais tousiours par tresgrand & meure deliberation de conseil. Et fil s'en departoit, il en seroit blasmé & reproché à sa grand charge, & de ceux qui de luy istront, & pource il ne s'en departira pas. Item & en tant qu'il touche que messire Aubert remonstrera pareillement les choses deuantdictes, & tous les seigneurs, barons, cheualiers, escuyers & autres notables gens estans en la compagnie dudit Duc de Bourgongne. Respond ledit Duc, que tousiours les manieres qu'il a tenu & entend à tenir, il a fait & fera au plaisir de Dieu par le conseil de ses barons, cheualiers & escuyers & autres gens notables: & pource il octroye plainement, que tout leur soit remonstré: car de tant qu'on leur parlera plus desdictes besongnes, de tant plus verront ils & cognoistront les iniquitez de ceux qui destourbent la paix, & la bonne intention dudit Duc. Item & en tant qu'il touche, que le Roy a commandé audit messire Aubert, qu'il face au Duc de Bourgongne & à tous ceux de sa compagnie le plus doucement & gracieusement que il pourra les commandemens & deffences contenues, & declairées és lettres patentes sur ce baillées & chargées de par le Roy à messire Aubert. Respond ledit Duc, ayât en memoire que pas ne luy fault faire telles deffences, & qu'il scet bien que ces choses ne viennent pas de la certaine volenté du Roy, & que le Roy l'ayme, & luy veult bien, & le desire, & le demande souuent de sa venue. Mais ces faulx & trahistres couuertement font ces instructions & deffences: & aussi veu que les ennemis de ce royaume y sont n'aguères descendus, il n'est pas maintenant heure d'obeir à telles deffences: mais ainçois tous les hommes loyaux se doivent employer à la deffention de cest royaume. Et supposé que les ennemis ja n'y descendissent, si ne voudroit pas souffrir le Duc de Bourgongne que les faux trahistres demourassent en telle gouerne. Item & en tant qu'il touche ce que le Duc de Bourgongne & autres de sa compagnie disoient, que ceux qui gouernent le Roy leur ont fait & font de iour en iour maintes grans durtez & choses, qu'il ne pourroit souffrir & autres choses: si n'estoit-ce pas chose raisonnable ne souffisante pour ainsi destruire le royaume, ne parquoy ledit Duc eust deu fauoriser ou donner confort ou aucüe ayde aux Anglois. Respond ledit de Bourgongne que ce qui est cy dessus & moult d'autres choses innumerables, qui seroient moult longues à reciter, est tout notoire que les gouuerneurs: c'est à sçauoir messire Henry de Marle, l'Euesque de Paris, messire Tanneguy du Chastel, messire Burel de Dampmartin, maistre Estienne de Mauregard, maistre Philippe de Corbie & plusieurs autres ont esté principaux promoteurs & conduiseurs desdictes iniquitez à la perturbation de paix, qui est en ce royaume & d'autres grans excez & crimes, qui cy apres seront declairez: & pourtant ledit Duc de Bourgongne s'est mis en armes non pas pour destruire le royaume, ou pour fauoriser les Anglois



glois: mais il est en armes pour enchasser & debouter lesdits gouuerneurs de tout leur gouuerne, & d'estre entour le Roy: & ne cessera tāt qu'il aura la vie ou corps, iusques à tant qu'il sera paruenü à sa bonne intention: car ils ne sont pas tels hommes, qu'ils doiuent auoir telle auctorité: ne pas ne leur est deu pour lignage, science, loyauté, experience ou autre bonté: mais est vne grand ordure & derision, que par gens de si petit fait & condition, la puissance des Anglois soit deboutée & enchassée. Et à ce doiuent bien auoir regard les seigneurs & les nobles de ce royaume, & tous autres preud'hommes de souffrir telle bestise & ordure, de se laisser ainsi destruire, suppediter & deshonnorer par tels gens qui riens ne scauent, & qui riens ne peuuent ne valent: car chacun communement voit qu'ils n'ont de puissance, d'auctorité & de seigneurie, fors ce qu'ils entreprennent de faire, & que ils se donnent de gloire, & ils conduisent, & ont conduit les choses dessusdictes par grans cruautéz, tyrannies & inhumanitez: lesquelles ils ont tousiours fait & font de iour en iour aux bons vrais & loyaux subiects du Roy, sous vmbre de faire & maintenir iustice. Item en tant qu'il touche que le Roy à la requeste du Comte de Hainault, à qui Dieu pardoint, a autresfois octroyé & pour le bien de paix au Duc de Bourgogne, & à tous ceux qui l'ont seruy moult de grosses choses, & qui bien luy doiuent plaire, mais que le Duc ne les voulut pas accepter, & n'en fait compte. Respond le Duc que pour le bien de paix & vnion de ce royaume, qu'il a tousiours désiré & desire de tout son cueur, il se transporta deuers monseigneur le Daulphin derrain trespasé, & mōseigneur de Hainault ausquels Dieu face bonne mercy. Et apres moult de parolles dictes sur le fait de la paix, le Duc de Bourgogne leur bailla vne cedulle contenant la vouldenté finale qu'il auoit sur icelle paix, en l'offrant à tous qui la vouldroient avec luy, excepté le Roy Loys n'aguères mort pour aucuns interests qu'il auoit contre luy, dont le Daulphin & le Comte de Hainault furent moult bien contens. Lesquels pour la perfection de ceste matiere de paix, se transporterent à Compiengne: & combien qu'en telles choses on doit proceder le plus hastiement & diligemment qu'on peult, affin de faire cesser tout inconuenient de guerre. Neantmoins les trahistres d'entour le Roy, qui mainent les besongnes par allées, venues & voyes frauduleuses par espace de trois mois ou enuiron sans de ce prendre aucune conclusion. Toutesfois il est bien vray, que finablement le Comte de Hainault alla à Paris, & moyennant la Royne procura deuers les trahistres sur ladicte besongne certain appoinctement, dont assez estoit content: mais ainçois que l'appoinctement fut entierement passé, il s'apperceut secrettement & reposément, qu'on deuoit prendre luy & la Royne & les emprisonner, affin qu'apres ils feissent du Daulphin leur vouldenté: pourquoy le Comte de Hainault print vn hastif conseil de partir couuertement de Paris, & retourna à Compiengne: ouquel lieu assez tost apres sa venue, le Daulphin trespassa par deffaute & par damnable maniere. Laquelle chose le Duc de Bourgogne declaira par ses lettres dessusdictes. Apres le decez duquel, le Comte de Hainault: se transporta en son pays de Hainault: ouquel lieu luy fut adressé la responce de ladicte paix, dont il fut tresmal content: Disant qu'apres le decès du Daulphin, les trahistres ont changé & mué ce que parauant auoit esté octroyé & passé: & enuoya icelle responce au Duc de Bourgogne, laquelle responce veüe par le Duc Iean à tresgrande & meure deliberation de conseil, il trou-



ua qu'elle estoit moult mal gracieuse, au regard du bien du Roy & de son royaume & du Duc de Bourgongne. Et pource le Duc ne fut pas bien content, & n'en fit compte: mais fut meü de faire & d'enuoyer en plusieurs lieux de ce royaume lesdictes lettres patentes, contenans la desolation du royaume & sa bonne volenté & intention: lesquelles lettres presenta en sa personne au Côte de Hainault iceluy Comte estât malade: de laquelle maladie il mourut, lequel en son bon sens & entendement ouyt la lecture des lettres, & les receut agreablement pour faire publier en son païs, & dit que le Duc de Bourgongne faisoit bien: car les trahistres d'entour le Roy estoient pires que nul ne pourroit dire n'imaginer, en offrant au Duc de Bourgongne son seruice de corps & de gens se Dieu luy donnoit grace de releuer de sa maladie. Et se son corps pour l'enfermeté demouroit empeché, il luy offrit ses subiects, amis & bienvueillans & sa finance. Et lors iura vn tresgrand serment, que s'il ne se fut l'autre iour hastiuement party de Paris, que les trahistres auoient conclud de prendre la Roïne & luy mesmes: comme tantost bien notoirement apparut en tant qu'il touche la Roïne: car ils prindrent & empoignerent & emporterent tous ses biens au deshonneur du Roy, d'elle & de toute leur generation. Il est vray aussi que quand le Duc de Bourgongne estoit à Laigny, le Duc de Bretaigne fut en grand perils à Paris. Et conuint qu'il s'en partist, pource qu'il procuroit la paix du royaume. En outre dit le Comte de Hainault (en iurant comme dessus) que certainement il tenoit, que se les Anglois estoient à vn lez des portes de Paris, & le Duc de Bourgongne fut à l'autre lez à vne des portes, ils lairroient ainçois entrer ens les Anglois, ains que le Duc de Bourgongne. Et toutes les choses dessusdictes dit le Comte de Hainault en la presence de madame de Hainault, monseigneur de Charrolois, monseigneur de saint Pol, le tresorier de Hainault, Iean Bastard, maistre Eustace de Lactre, monseigneur de Champ diuers & plusieurs autres. Aussi il y a bien apparü qu'il n'ont nulle volenté de bien faire, car nouuellement ils ont fait ardoir & bruyr les lettres patentes du Duc de Bourgongne ens ou Palais à Paris: par lesquelles le Duc de Bourgongne offroit paix à tous ceux qui avec luy la vouloiēt auoir, comme cy dessus est touché: laquelle chose leur fut & est vne pource vengeance, & grand foiblesse de cueur d'eux cuider venger d'ardoir vn peu de parchemin. Item & finablement affin que chacun sçache la volenté & intention du Duc de Bourgongne, il fait sçauoir à tous & signifie, qu'il perseuerera en son bon propos, & ne le laissera iusques à ce qu'il aura eu grand conseil avec le Roy: & luy aura fait demonstrier au long les iniquitez, tyrannies, cruautéz & inhumanitez cy dessus declairées, la desolation du royaume & les manieres qu'il conuient tenir pour la reparation d'icelles: tellement & tant que le Roy, & tous les bons loyaux preud'hommes de son royaume en deueront estre contens: & combien que le Duc de Bourgongne par ses lettres patentes ayt offert paix à tous (comme dit est) & que ceux d'entour le Roy ne l'ayent pas receu ad ce. Mais ayent perseueré en leur rigueur: neantmoins le Duc de Bourgongne vueillant en ceste partie laisser toute rigueur & vengeance pour le bien du royaume, qui tant a besoing de paix, de confort & d'ayde, il est prest & appareillé de vouloir paix à tous selon la teneur de ces lettres. Apres tous les articles dessusdits au Duc de Bourgongne de par le Roy par le seigneur de Canny, comme dit est, & qu'iceluy Duc eut respondu de sa personne,



sonne, & fait respondre par son conseil selon la teneur de chacun article (comme dessus est escript) ledit seigneur de Canny prenant congé audit Duc de Bourgogne s'en retourna à Paris deuers le Roy, portant par escript les dessusdictes responce.

*Comment le dessusdit seigneur de Canny retourna à Paris de son ambassade, & fut accusé par le conseil royal, & là prouision qui fut mise contre le Duc de Bourgogne.*

CHAP. CLXXV.

**L**Tem apres ce que ledit seigneur de Canny fut retourné à Paris deuers le Roy & son grand conseil, auoit esté baillé par son clerc à aucuns de ses amis la coppie des instructions & responce dessusdictes, & aussi de toute ambassade: laquelle chose fut par iceux publiée plus auât qu'il n'appartenoit, tant qu'aucuns du grand cōseil du Roy en eurent la cognoissance: pourquoy il aduint que quand ledit sire de Canny eut audience de par le Roy & deuers son grand conseil, pour faire la responce de ladicte ambassade, qu'en plain conseil luy fut dit. Sire de Canny vous vous demonstrez bien du conseil du Roy tel que vous estes, comme il appert par les instructions qui vous ont esté baillées de par le Roy: & aussi par la responce du Duc de Bourgogne, dont en voicy la coppie: lesquelles vous auez baillées non pas pour le bien du Roy en plusieurs lieux tant à Amiës, Paris cōme ailleurs à aucuns de voz cogneuz & amis, si soient veües de rechef lesdictes instructions & les responce du Duc de Bourgogne signées de sa main contre ceste coppie: lesquelles choses furent releustes sans riens oster n'adiouster. Et fut trouué veritable, dont le sire de Canny fut grandement confuz: mais en la fin il s'en excusa par son clerc, disant, que sans son congé il auoit baillé icelles coppies, lequel clerc se rendit fugitif. Toutesfois ledit sire de Canny pour ceste cause fut mené prisonnier en la bastille S. Anthoine: ouquel lieu fut par longue espace de tēps, iusques à la prinse de Paris: car iceux gouuerneurs du Roy estoient moult desplaisans de ce, que les responce dudit Duc de Bourgogne auoient esté veües en tant de lieux: & quelque semblant qu'ils montraissent, moult doutoient iceluy Duc & sa puissance, par ce pareillement que moult estoient aduertiz, que la plus grand partie des bonnes villes & du commun du royaume, luy estoient fauorables, & aussi plusieurs grans seigneurs & autres nobles. Et encores quand ils furent adcertenez par les responce dessusdictes, que pas ne desisteroit de son entreprinse: mais iroit à puissance vers Paris sur intention d'y entrer & aller deuers le Roy, furēt en plus grāde seureté que parauāt: car bien sçauoient que fil venoit à son entente, seroient tous deboutez de son gouuernement, & là plus grand partie puniz criminellement: neantmoins pour y obuier & ceux entretenir, feirent escrire lettres de par le Roy aux bonnes villes, que pas ne receussent ne baillassent obeissance audit Duc de Bourgogne ne à ses gens: & auec ce meirent garnison par tous les passages, & autres lieux necessaires. Et mesmement le Connestable remanda ses gens d'armes des frontieres de Normandie à venir deuers luy à Paris pour luy fortifier. Et par ainsi le Roy d'Angleterre, qui estoit descendu au paÿs (comme dit est) à grand puissance eut plus bel auantage à faire sa conqueste sans auoir quelque danger, & par le moyen des diuisions dessus declairées, peu trouua qui contre luy feit grand resistance.



*Comment le Duc de Bourgongne passa outre à tout sa puissance vers Paris . Et se meirent en son obeïssance plusieurs villes & forteresses, où il meit capitaines & gouverneurs.* CHAP. CLXXVI.



Pres que le Duc de Bourgongne eut par aucuns iours seiourné en la ville d'Amiens, & aussi commis au gouvernement de ses païs de Picardie, en y delaissant pour principal chef son seul fils le Comte de Charrolois, accompagné de notable conseil pour le conduire, se partit dudit lieu d'Amiens en retournant à Corbie, & de là s'en alla à Montdidier. Durant lequel tēps la dame du chastel de Mouy promeist que plus ne souffreroit, que ses gens feissent guerre aux païs dudit Duc. En la compagnie duquel allerent audit lieu de Montdidier le ieune Comte de saint Pol, messire Iean de Luxembourg, & plusieurs autres notables grans seigneurs. Et le seigneur de Fosseux, accompagné de ses trois freres : c'est à sçauoir messire Philippe, Iagues & Iean, messire Iennet de Poix, Hector Philippe & le bon de Saueuses, le seigneur de Rambures, messire Brunel, Loÿs de Varignes & plusieurs autres notables hommes, s'en alla à Beauuais : auquel lieu il fut receu par certains moyens, pour & ou non dudit Duc de Bourgongne, ainsi & par la maniere qu'auoient fait ceux d'Amiens : dedans laquelle ville ledit sire de Fosseux fait proposer present le Maire, escheuins & communauté d'icelle par maistre Robert le Ieune, aduocat & conseiller dudit Duc de Bourgongne bonne amour & vraye affection, que ledit Duc auoit tousiours eu au bien du Roy & à sa generation, & de la chose publique : en remonstrant aussi l'intention qu'il auoit en ce present voyage, affin de releuer le royaume & mettre hors des grans tribulations, où il estoit par le moyen d'aucunes gens de petit estat, qui gouuernoient le Roy. De laquelle proposition les dessusdits de Beauuais furent assez contens, & finablement se conclurent, & disposerent du tout à receuoir iceluy Duc de Bourgongne dedans leur ville à toute telle puissance qu'il luy plairoit à y mettre. Lequel Duc brief ensuiuant de la ville de Montdidier y alla, & y fut tresioyeusement receu de tous les bourgeois & habitans : à l'entrée duquel fut crié Noël par les quarrefourgs où il passoit. Et s'en alla loger à l'hostel de l'Euesque, & là seiourna par huit iours entiers. Si estoient les gens d'armes logez au païs à l'enuiron qui fort en fut traouillé, jaçoit ce que le païs fut tresabondamment pourueu de tous biens. Auquel lieu vindrent aucuns bourgeois de la ville de Gournay en Normandie, enuoyez de par les gouverneurs & habitans : lesquels se meirent en son obeïssance, promettans de tenir son party : & à ce les receut benignement, & leur fait faire serment d'estre bons & loyaux enuers le Roy & luy, ce qu'ils accorderent liberallement. Et par ainsi leur quitta gabelles, subsides & impositions, comme il fait és autres bonnes villes du Roy qui se meirent en son obeïssance. Et entretemps Hector & Philippe de Saueuses, messire Elyon de Iaqueuille & aucuns autres capitaines allerent courre deuant Beaumont sur Oise, cuidans gaigner le passage : mais il fut bien deffendu par les gens du Connestable, qui estoient dedans : pourquoy iceux s'en retournerent en la ville de Chambly le Haubergier : en laquelle tant és Eglises, comme ailleurs par la ville ils prindrent biens sans nombre. Et apres retournerent à Beauuais deuers le Duc leur seigneur, qui de rechef



rechef enuoya aucun peu de iours ensuiuant grand partie de ses gens loger audit lieu de Chambly, & és villages à l'environ. Et tost apres ledit Duc partant de Beauuais, les suiuit à tout sa puissance, qui estoit moult grande: & selon l'estimation des gens à ce cognoissans, quand toutes ses gens estoient assemblez, il pouuoit auoir bien soixante mille cheualx. Et lors par le moyen & pourchats d'un gentil-homme nommé Charles de Mouÿ, fut tant traicté que le seigneur de l'Isle-Adam se rendit du party du Duc de Bourgongne: & avec ce meist & bail-la sa ville & passaige en la main de Iean de Fosseux, Hector & Philippe de Saueuses: lesquels pour la garder y meirent certain nombre de leurs gens. Pour laquelle besongne quand ce vint à la cognoissance du Duc Iean de Bourgongne, en fut tresioyeux tant pour ledit passage comme pour iceluy seigneur qui festoit tourné de son party. Et d'autre part messire Iean de Luxembourg alla passer l'eaüe d'Oise à tout grand nombre de gens d'armes, qu'il auoit par Presy à aucuns petis bateaulx. Et feirent ses gens en la plus grand partie nagier leurs cheualx outre ladicte riuere, & se logea en un village assez prez. Et lendemain à tout vne partie de ses gens alla courre deuant la ville de Senlis, dedans laquelle estoit messire Robert d'Eusne commis de par le Roy Baillif d'icelle ville de Senlis à tout soixante combattans ou environ: lequel feit saillir ses gens tous de pied à l'encontre dudit de Luxembourg & de ses gens, & y eut grand escarmouche. Toutesfois la plus grand partie du commun de ladicte ville n'en estoit pas bien content, de ce que ledit messire Robert d'Eusne menoit guerre aux gens du Duc de Bourgongne: & pourtant la nuict ensuiuant, apres que messire Iean de Luxembourg fut retrait, ledit commun prindrent ledit messire Robert d'Eusne & toutes ses gens: & apres qu'ils en eurent tué huit ou dix le meirent en prison: mais par le moyen d'aucuns des plus notables, il fut mis hors de la ville avec tous ses gens & leurs bagues: duquel lieu s'en alla au Mont-Epilloy, & le lendemain tresmatin fut messire Iean de Luxembourg mandé de ceux de Senlis: lesquels pour & ou nom du Duc de Bourgongne luy baillerent obeissance, & entra dedans à son plaisir: & là receut le serment d'eux pour le Roy & le Duc de Bourgongne, promettans qu'ils seroient bons & loyaux, & avec ce fait Troullart de Maucreus nouuel Baillif de Senlis, & aucuns autres officiers tels que bon luy sembla. Apres lesquelles besongnes ledit de Luxembourg retourna deuers ledit Duc de Bourgongne.

*Comment le Duc de Bourgongne feit passer ses gens à l'Isle-Adam: assiegea & conquist Beaumont & Ponthoise, & de là alla loger à l'Arbre-secq & autres matieres.*

CHAP. CLXXVII.

**E**N apres le Duc de Bourgongne feit refaire le pont de l'Isle-Adam, par lequel passerent grand partie de ses gens, que conduisoient les seigneurs de Fosseux, de Vergy & de Salnoe: lesquels se logerent à plains champs, & sous les hayes & buissons à vne lieüe pres dudit passage: & le lendemain tresmatin se deslogerent, & puis tous en belle bataille cheuaucherent iusques à Beaumont sur Oise, & là se logerent dedans la ville & tout autour du chastel: nonobstant la deffence de ceux de dedans: & messire Iennet de Poix à tout quatre cens combattans sous son estandart, s'en alla loger en



vn village à vne lieüe pres, en tirant vers Paris : & là se fortiffia, & tint tant que tout l'ost se deslogea : & ledit Duc de Bourgongne par l'autre costé de l'eaüe se logea en ses tentes à plain champ : & tantost fait asseoir ses gros engins pour iecter audit chastel de Beaumont par dessus la riuiere d'Oyse : lesquels engins furent continuez tant & par telle maniere que ledit chastel fut grandement dommagé en plusieurs parties . Pourquoy les assiegez voyans qu'ils estoient en peril d'estre prins de force, se rendirent à la voulenté dudit Duc de Bourgongne : & furent trouuez dedans cinquantedeux personnes, desquels en y eut neuf qui eurent les testes couppées, & furent penduz à vn arbre par les aisselles, & les autres furent depuis deliurez par finances, au moins la plus grand partie : & le seigneur du Vergy, qui estoit Marechal de l'ost à cause de son office eut tout les biens qui furent trouuez dedans ledit chastel. Et apres le Duc de Bourgongne fait refournir ledit chastel de viures, & le bailla à vn gentil-homme de Bourgongne nommé Iean de Torfenay. Apres laquelle prinse iceluy Duc fit partir son auantgarde, qui estoit outre l'eaüe au costé vers Paris, & alla loger deuant Ponthoïse en l'abbaye de Maubuissons & autres lieux deuant icelle ville, & le Duc se logea à l'autre costé par deuers Beauuais : & par ainsi fut tantost du tout fort enuironnée, & faillirent de premiere venue ceux de dedans contre leursdits aduersaires, mais tantost furent reboutez dedans : & brief ensuiuant ledit Duc fit asseoir ses gros engins deuant les portes de Ponthoïse. Et avec ce fait cōmencer à faire plusieurs appaux pour iceux prédre & subiuguer : mais quand les assiegez apperceurent lesdits appaux, ils commencerent à parler. Et finablement en dedans les cinq iours ensuiuans rendirent ladicte ville en la main du Duc de Bourgongne, par condition qu'ils s'en allerent saufs leurs corps & leurs biens. Et si promirent qu'ils ne s'armeroient pas à l'encontre de luy iusques au iour de Noël ensuiuant : laquelle chose ils n'entretindrent pas, car eux venus & arriuez à Paris, ils commencerent à mener guerre comme deuant. Et estoient dedans ladicte ville trois capitaines ayans estandarts, c'est à sçauoir le Bastard de S. Terre, Tromagon, & Maurigon natifs du païs de Gasconne : lesquels (comme dit est) se partirent tous ensemble sous le saufconduit dudit Duc de Bourgongne, & s'en allerent par le pōt de Meulenc à Paris, & apres leur partemēt ledit Duc à priuée mesgnie entra dedans ladicte ville pour la visiter : dedās laquelle il fut receu par plusieurs bourgeois, lesquels l'aymoient long tēps par auant : & lors fit faire deffence par tout son ost, que nuls n'entrassent dedans ladicte ville, sinon ceux qui estoient à ce commis . Affin que les viures d'icelle ville ne feussent destruits & amoindriz : & là ordonna de par le Roy & de par luy capitaine de la ville le seigneur de l'Isle Adam. Et apres de là se partit prenant son chemin vers Meulenc : auquel lieu de Meulenc luy fut faicte ouuerture, car les gens d'armes qui estoient commis à le garder de par le Conestable, s'estoient partis & allez à Paris avec ceux de Ponthoïse, qui s'estoient passez par la . Toutesfois ledit Duc de Bourgongne entre Ponthoïse & Meulenc fit mettre toutes ses gens en bataille, pour les veoir tout à vne fois en ordonnance, comme s'ils eussent esté en la presence de leurs ennemis. Et estoient en vne belle plaine au dessous d'une montaigne, laquelle chose luy fut moult plaisant à veoir : car il auoit grand nombre de gens moult bien habillez, & desirans de le seruir contre tous ses ennemis : desquels c'est à sçauoir des  
principaux



principaux qui auoient charge de gens les noms s'ensuiuent. Premièrement Philippe Comte de S. Pol fils du Duc Anthoine de Brabant nepueu dudit Duc de Bourgongne, messire Jean de Luxembourg, le seigneur d'Antoing, le seigneur de Fosseux luy iij. de ses freres, le Vidame d'Amiès, Anthoine seigneur de Croÿ, le seigneur d'Auxi, messire Iennet de Poix, le seigneur d'Inchy, le seigneur de Humieres, messire Robinet de Mailly & deux de ses freres, le seigneur de Rambures, messire Jean de Vaucourt & Loÿs son frere, le Moisé de Réty, le seigneur de Varigines, le seigneur de Cohem, messire Alliames de Gappanes, messire Hue Burnel & son fils messire Loÿs, Robert le Roux, Robert de Bournouuille, messire Charles Disque, le seigneur de Fremeusent, le seigneur de Humbercourt Bailly d'Amiens, messire Charles de Lens, le seigneur de Noyelle, le seigneur de Longueual, messire Payen de Beaufort, messire Pierre Kieret seigneur de Ramecourt, George la Personne, messire Hue de Launoy & son frere messire Guillebert, le seigneur de Briauté, messire Dauid de Brimeu & Jacques son frere, le seigneur de saint Legier & son fils messire Mauroy, Dauid de Bourflers, messire Jean de Courcelles, Jean de Flauy, messire Elyon de Iacqueuille, le seigneur du Mesnil, Charlot de Dully, le Bastard de Namur, messire Gastellain Vas, Jean de Guigny, Jean d'Aubigny, le Bastard de Thian, Charles l'Abbe, Matthieu des Prez, le seigneur d'Iaucourt, Guerard Bastard de Brimeu, Emard de la Riuiere & Philippe son pere, Gadifer de Mazinghen & son frere Thierry. Et de la Comté de Flandres, le seigneur d'Estenu, le seigneur de Commynes, le seigneur de Gruthuse, le seigneur de Roubaiz, Robert & Victor Bastard de Flandres, messire Victor de Rabbecque, Robert de Mauuignes, Henry de Disquemude, messire Roland de Velereque, Hector de Venront, le Bastard de Colloquent & aucuns autres. Et de Bourgongne, le seigneur du Vergy Mareschal de Bourgongne, messire Anthoine de Vergy, Loÿs de Chaallon fils du Prince d'Orenge, le seigneur de Salines, messire Jean de la Trimouille seigneur de Iouuelle, messire Regnier Pot, le seigneur de Montagu, le seigneur de Neuf-Chastel, le seigneur de Chasteau-Villain, le seigneur de Chasteau Viez, le seigneur de Rochefort, le seigneur de Thy, messire Jean de Cotte-Brune, le seigneur d'Ancre, le seigneur de Thoulangeon, messire Guillaume de Champ-Diuers, le seigneur de Gastellus, messire Jean de Digonne, messire Anthoine de Thoulangeon & André son frere, le Veau de Bar Baillif d'Auxi, Henry de Champ-Diuers, messire Gautier de Ruppes, Andrieu de Salines, Regnault de Maucouuin, Anthoine de la Marche, messire Jacques de Courtiamble seigneur de saint Liebault, le seigneur de Ransse, Pierre de Digonne, messire Pierre de Beauffremont, Emard de Viene, Jean & Clauin du Clau & plusieurs autres nobles hommes de diuerses nations, qui en moult belle ordonnance avec tous leurs gens furent bien par l'espace de deux heures : durât lequel temps ledit Duc & aucuns de ses plus feables avec luy, alla tout au long des batailles pour les veoir en faisant à iceux tresgrans honneurs & inclinations, & aussi les remerciant du bon seruice qu'ils luy faisoient : & pour vray c'estoit belle chose de les veoir tant y auoit de notables hommes, & fleur de gens d'armes & bien habillez. Et apres ce qu'il les eut ainsi veuz, passa avec tout son ost la riuiere de Seine au pont de Meulenc, & adonc Jean de Fosseux & Hector de Saueuses à tout deux cens combattans allerent au Val de Galie, deuant vn chasteau



nommé Bayne, qui estoit à l'abbé de Fescamp : lequel estoit dedans, & leur feit obeïssance par le moyen d'un nommé Loys de saint Saulieu, qui estoit son parent : lequel estoit avec ledit Hector : & tant fut traicté qu'une partie de leurs gens demourerent leans pour garder ledit chastel, contre les autres gens du Duc de Bourgongne. Et moyennant certaine somme d'argent qu'ils en receurent, baillerent leurs scelez : mais depuis briefs iours ensuiuant par le consentement dudit Hector (comme il fut commune renommée) furent prins & emportez tous les biens d'iceluy par Philippe de Saueuses & aucuns autres en sa compaignie, & y fut fait tresgrand dommage. En apres ledit Duc de Bourgongne cheuaucha à tout son exercite, tant qu'il veint, & se logea sur le Môt-Rouge, & ses gens autour de luy : auquel lieu le pouuoient veoir tout à plain ceux de Paris. Et y auoit si grand nombre de tentes, que ce sembloit une grand bonne ville. Et lors par iceluy Duc fut enuoyé messire Jean de Luxembourg, avec toutes ses gens loger à la ville de saint Clou & deuant le pont. Auquel lieu fait assaillir une petite tour, qui estoit au bout du pont vers la ville : laquelle fut assez tost prinse, & mise en feu : & aussi les moulins qui estoient au dessoubz furent ars, & tantost apres on dressa grosses bombardes deuant ladicte tour de saint Clou, qui grandement la dommagerent en plusieurs lieux : mais pourtant elle ne fut pas prinse, car chacun iour venoient gens tous nouueaux de Paris pour les deffendre. Et apres que le Duc de Bourgongne eut esté huit iours logé sur le Mont-Rouge, il se departit à tout son ost, & alla loger plus auant une lieue en tirant vers Paris sur une montaigne, où il y auoit un arbre secq, sur lequel il fait mettre son estandart : & pour ce fut ce logis nommé l'arbre secq, & y fut ledit Duc bien huit iours, & plusieurs de ses gens estoient logez es villages assez pres de Paris, dont il aduenoit que chacun iour courroient deuant Paris & ceux de la ville : c'est à sçauoir de ceux de la garnison failloient souuent à l'encontre. Pourquoy il y auoit souuent de grans escarmouches entre icelles parties, combien que d'un costé & d'autre n'y eut pour ce temps gueres grand perte. Mais ceux de l'ost souuent, & en plusieurs parties courroient le plat pays iusques à sept ou huit lieues à l'environ : & là prenoient & ramenoient à leur ost, cheuaux, vaches, brebis, pourceaux & tous autres biens portatifs, dont le pauvre peuple & pays estoient fort trauaillez.

*Comment le dessusdit Duc de Bourgongne enuoya son herault à Paris deuers le Roy : la responce qu'il eut, & du siege de Montlehery, & autres besongnes.*

## CHAP. CLXXVIII.

**L**Tem durant le temps que ledit Duc de Bourgongne estoit logé à l'arbre secq sur le mont de Chastillon deuant ladicte ville de Paris, enuoya un sien herault nommé Palis qui depuis fut Roy d'armes de Flandres, à tout ses lettres vers le Roy & le Daulphin : mais quand il veint à la porte, fut mené deuers le Comte d'Armignac & le conseil du Roy : lesquels le firent parler audit Daulphin, qui estoit instruit par iceux de la responce qu'il deuoit faire à iceluy herault, qui luy bailla ses lettres, pource qu'il ne pouoit parler au Roy, & luy dit en brief la charge qu'il auoit de par son seigneur le Duc. Auquel respondit ledit Daulphin par grand courroux : herault contre la volenté de monseigneur le Roy & de nous ton seigneur de Bourgongne, ja pieça a degasté



gasté son Royaume en plusieurs lieux : en continuant iusques à maintenant de mal en pis, il monstre mal qu'il soit nostre bien-vueillant comme il nous escrit : & fil veut que monseigneur & nous le tenons pour nostre parent loyal vassal & subiect, il aille combatre & debouter le Roy d'Angleterre ancien ennemy de ce Royaume. Et apres retourne deuers monseigneur le Roy, & il fera receu : & ne die plus que monseigneur le Roy & nous soyons en seruage à Paris de nulle personne: car nous sommes tous deux en nostre plaine liberté & franchise:& garde que tu luy dies publicquement deuant ses gens ce que te disons. Apres lesquelles parolles ledit herault s'en retourna deuers son seigneur le Duc de Bourgongne, & luy racompta les parolles que luy auoit faictes le Daulphin:desquelles le Duc de Bourgongne ne fait pas grand semblant de courroux,considerant que c'estoit par l'induction de ceux qui gouuernoient le Roy. En apres ledit Duc voyant qu'il n'entreroit pas dedans Paris, & que ceux à luy fauorables ne pouoient acheuer ce qu'ils luy auoient mandé, se deslogea de l'Arbre secq,& s'en alla à tout son ost mettre le siege deuant le chastel de Montlehery:mais les assiegez sçachās la puissance dudit Duc de Bourgongne, pensans qu'ils n'auroient nul secours feirent traicté avec ledit Duc, par si qu'ils se partiroient & luy rendroient ladicte forteresse en dedans les huit iours ensuiuant,ou cas que le Roy ou le Connestable ne les secourroit : lequel traicté ils feirent sçauoir audit Connestable : mais ce riens n'y vallut, car ils n'eurent point de secours : pourquoy ils liurerent la forteresse audit Duc de Bourgongne comme promis l'auoient. Et pareillement se rendit en l'obeissance du Duc de Bourgongne le chasteau de Marcouffy, Dourdan, Palaiseau & aucunes autres forteresses à l'environ: & aussi ledit siege de Montlehery durant, fut enuoyé par ledit Duc de Bourgongne aucuns de ses gens deuant le chasteau Doursay : lesquels se logerent en la ville & deuant ledit chastel, auquel lieu ils affusterent aucuns canons pour icelle abbatre & subiuguer : mais les gens du Connestable en grand nombre vindrent vers le poinct du iour au logis d'iceux, desquels ils prindrent & occirent vne grand partie. Et les autres allerent au logis du Duc de Bourgongne tresfort criers à l'arme & disant, que les ennemis venoient en grand puissance : pourquoy iceluy Duc hastiuement se tira en plain champ,& là fait mettre ses gens en bataille prests comme fils eussent veu leurs ennemis. Et estoient les chiefs de ceux qui estoient deuant ladicte forteresse, le seigneur de Salurées & le seigneur de Thoulangeon, & aucuns autres du païs de Bourgongne : en laquelle escarmouche fut prins messire Geoffroy de Villiers cheualier de Rethelois, & autres iusques à cinquante gentils-hommes. Durant lequel temps le Duc de Bourgongne enuoya messire Elion de Iacqueuille, Iean de Guigny, Iean du Clau & autres capitaines à tout seize cens combattans deuers la ville de Chartres. Laquelle avec Estampes, Gallardon & autres villes & forteresses se rendirēt en l'obeissance du Duc de Bourgongne, & en demoura ledit Iacqueuille capitaine & gouuerneur. Et pareillemēt furent enuoyez messire Philippe de Fosseux & Robert le Roux à Auniau deuers la dame de la Riuere, laquelle promet que dedans ses forteresses d'Auniau & de Rochefort ne mettroit nulles gens, qui feissent guerre ne portassent dommage audit Duc de Bourgongne ne à ses bien-vueillans. En outre en ce temps se meirent diuerses villes,fortereffes,& aussi plusieurs nobles hommes en la subiection & soub



le gouvernement dudit Duc de Bourgogne, sur intention qu'il viendrait à son entente de son entreprise, & auroit le gouvernement du Royaume: auxquelles villes, c'est à sçavoir celles qui se mettoient en son obeïssance, ne souffroit payer aucune gabelle, imposition ne autres subsides, réservé le sel: & par ainsi acquist grandement la grace de plusieurs bonnes villes, & du peuple de plusieurs pays. Ouquel temps aussi iceluy Duc envoya ses lettres à plusieurs bonnes villes du Royaume, desquelles la teneur s'ensuit. Jean Duc de Bourgogne, Comte de Flandres, d'Arthois & de Bourgogne, Palatin, seigneur de Salins & de Malignes: treschiers & bons amys vous avez bien sceu par vraye experience le tresmauvais gouvernement qui de long temps a esté en ce Royaume, tant vers la personne de monseigneur le Roy & sa domination, comme en la chose publique: par ce que ceux qui ont prins le gouvernement de mondit seigneur & son Royaume, n'ont eu regard à l'honneur appartenant à la majesté royale: mais icelle du tout en tout ont mis en oubly, tellement que mondit seigneur est amoindry de tout son estat & de ses richesses: pour lesquelles il doit estre renommé devant tous les Roys Chrestiens: & sondit Royaume qui souloit estre renommé au regard de toutes dominations, & a esté jusques à cy maintenu, & gardé songneusement en iustice tant vers le petit come le grand, le pauvre come riche: les dessusdits gouverneurs l'ont gouverné à leur plaisir, tellement qu'il ne leur a chalu, encores ne fait fors d'estre riches & demorer en leurs estats & offices: tellement que leurs ambitions & couuoitise a esté cause de la perdition des dominations, que mondit seigneur a perdu & perd chacun iour, de la destruction des nobles morts & destruits par les anciens ennemis de ce Royaume: & avec ce des grans finances sans nombre levées par iceux gouverneurs en ce Royaume, dont tous les bons subiects de mondit seigneur, les nobles, le clergie, les bourgeois & le commun peuple de ce Royaume sont à peu pres tous desers & destruits: & pour obuier aux choses dessusdictes au bien de mondit seigneur, & de tout son Royaume: nous avons mis en armes avec toute nostre puissance, comme il est assez notoire à vous: & jaoit ce que par plusieurs fois nous ayons fait sçavoir sommer & requerre lesdits gouverneurs, qu'à ce ils aduissassent, que cessassent lesdits inconueniens: où autrement nous y pouruoirions au bien de mondit seigneur. Et à ce que l'estat de sa personne fut conuenablement maintenu, son Royaume bien gouverné & domination recourée. Et encores de rechief estans en costé de Paris, auôs envoyé par vn de noz heraulx à mondit seigneur noz lettres closes. Par lesquelles nous luy declairons les causes autresfois declairées, en luy suppliant que puissions approcher à sa personne, & en luy offrant seruite de corps, come à nostre seigneur souverain: lesquelles lettres les dessusdits gouverneurs ne voulurent pas souffrir estre baillées à mondit seigneur, & les nous renuoyerent. Et dirent à nostre herault que plus ne retournaist, & s'efforcent de continuer les dessusdits gouverneurs en leur mauuaise gouerne, pour tousdis plus destruire & anichiller les pauvres subiects de mondit seigneur: contre lesquels ja pieça ils ont conclud haine mortelle, pource qu'ils sçauent bien qu'il leur desplaist des mauuais gouuernemens: perditions & destructions par eux aduenues & qui aduiennent chacun iour en ce Royaume: & pource nostre intention est, de perseverer quelque chose qu'il nous puist aduenir. Affin que puissent cesser lesdits inconueniens,



& que marchandise puiſt auoir cours, & le Royaume ſoit gouuerné en iuſtice en tant que pourrons, & ce auons fermé en noſtre propos & intention pour acquiter noſtre loyauté. Meſmement qu'il eſt declairé par le ſainct college Romain, qu'à nous appartient à auoir recours es beſongnes de ce Royaume: & à auoir le gouuernement d'iceluy, veu l'empeschement de mondit ſeigneur & le ieune aage de mon trefredoubté ſeigneur monſeigneur le Daulphin, & non au Comte d'Armignac n'à ceux qui ſe dient eſtre du conſeil de mondit ſeigneur: pour les cauſes contenues en vne cedulle à nous apportée & baillée, par vn notable Docteur ambaffadeur du ſainct college, de laquelle vous enuoye la copie encloſes en ces preſentes. Si vous ſommons de par mondit ſeigneur, & de par nous vous prions & requérons, qu'ayez ſur les choſes deſſuſdictes & autres aduis, dōt auons à parler à vous & à prendre concluſions telle que ſoit honorable & profitable pour mondit ſeigneur, & conſeruacion de ſa generation & domination: & à ce que tous les ſubiects de mondit ſeigneur puiſſent viure en paix & en iuſtice, & que noſtre propos & le voſtre puiſt eſtre à la fin que deſirons. Que le xx. iour du mois d'Octobre prochain venāt en quelque lieu que nous ſoyons, vous enuoyez deux notables perſonnes du moins à nous: auſquels nous puiſſons auoir conſeil, & qu'ils ayent puiſſance de traicter & concorder ſur les choſes deſſuſdictes les circonſtances & dependences d'icelles, tout ce que pour vous & voſtre nom ſera traicté, paſſé & accordé par les prelates, chapitres, bonnes villes que nous auons mandé. Et gardez qu'en ce n'ait faute ſur tant qu'aymez le bien de mondit ſeigneur, de nous & de tout le Royaume: & ſe voulez choſes que puiſſons, mandez le nous & volentiers le ferons. Eſcrit à noſtre oſt à Montlehery le huiſtiesme iour d'Octobre. S'enſuit la teneur de la cedulle encloſe: Ie Lieuin Neuelin Docteur en Decret, ambaffadeur du ſainct college des Cardinaulx de Romme, enuoyé par iceux: à treshault & puiſſant Prince monſeigneur le Duc de Bourgogne ay preſenté de par ledit ſainct college lettres ſeellées de trois ſeaulx. C'eſt à ſçauoir du Doyen des Eueſques, du Doyen des Preſtres, & du Doyen des Diacres Cardinaulx: leſquelles lettres contenoient creance ſur moy: laquelle creance ay expoſé à mondit ſeigneur de Bourgogne, en luy offrant de par ledit ſainct college la parolle du ſainct Prophete Daud. *Domine refugium factus es nobis*: c'eſt à dire: ſire en ce temps du deluge nous venons à toy à reſſuge: & apres la deduction dudit theume, en comprenant ledit ſainct college audit Roy Daud pour pluſieurs cauſes, i'ay expoſé à mondit ſeigneur de Bourgogne l'eſtat du ſainct Concille de Conſtance, & les trauaux qu'ont eu les Cardinaulx à pourſuiuir l'vnion de ſaincte Eglise: apres luy diſ que toute Chreſtienté eſtoit vnice, excepté vn grain de bled en vn boiſcel: c'eſt à ſçauoir les Côtes de la Comté d'Armignac, qui ſont encores en l'obeiſſance de Pierre de la Lune: lequel eſt declairé ſchiſmaticque, hereticque & ſes adherans & fauoriſans ſuſpects de ſchiſme & d'heresie. Apres luy diſ commēt i'eſtoye enuoyé en France par ledit ſainct College, non pas à luy comme au Duc de Bourgogne ſeulement. Mais comme celuy qui repreſente le Royaume de France, & à qui appartient le gouuernement, pour luy faire certaines prieres & requestes dudit ſainct College: & la cauſe pourquoy i'eſtoye enuoyé deuers luy, & que ie n'eſtoye pas enuoyé deuers le Roy, monſeigneur le Daulphin, le Comte d'Armignac ou le conſeil du Roy.



Si estoit comme ledit saint College m'auoit fait dire, pource que monseigneur le Roy estoit occupé & detenu de maladie, monseigneur le Dauphin estoit en trop ieune aage, & le Comte d'Armignac estoit relu au schisme, & aucuns du conseil du Roy estoient adherens audit Comte, & par consequent suspects de schisme: bien est vray que ledit Comte d'Armignac n'est pas declairé schismaticque, mais à la session publicque, par laquelle fut debouté Pierre de la Lune & declairé estre schismaticque & hereticque, il fut accusé de par le Roy des Romains en propre personne & par le procureur fiscal dudit Concille, & fut relut au schisme, nonobstant excusations friuoles, que feit maistre Jean Iarson: & tantost de par le saint College, ie feis à mondit seigneur trois prieres & requestes: la premiere si fut, qu'il luy pleut auoir ledit saint College, le Pape, l'estat du saint Concille pour recommandé, en les gardant & aydant garder en leurs priuileges, franchises & libertez anciennes. La seconde que fil y auoit aucuns qui eussent escrit, ou escriroient en temps aduenir contre ledit saint College ou le Pape, qu'il n'y vouldist point adiouster de foy. La tierce que mondit seigneur vouldist auoir pour agreable ce que se feroit par ledit saint College, tant sur le fait d'election comme sur la reformatiō de sainte Eglise: au bout de laquelle cedula ledit Lieuin auoit mis son seing manuel.

*Comment iceluy Duc de Bourgongne alla loger deuant Corbueil, & depuis à Chartres, & à Touraine au mandement de la Royne de France, qui s'en vint avec luy.*

CHAP. CLXXIX.



Q R est ainsi apres que le Duc de Bourgongne eut receu l'obeissance du chastel de Montlehery, & le refourny de ses gens, il se departit à tout son ost, & alla mettre le siege deuant la ville de Corbueil: c'est à sçauoir vers le lez de Montlehery tant seullement, & là fait asseoir ses gros engins en plusieurs parties pour icelles dommager, mais ceux de la ville qui estoient fort garnis de gens d'armes, que le Connestable & le cōseil du Roy leur auoient enuoyez, deffendirent grandement & bien ladicte ville contre ledit Duc de Bourgongne & son armée: & par plusieurs fois luy occirent de ses gens, de traict, canons & autres habillemens de guerre, que continuellement ils iettoient en son ost: & chacun iour tant par terre comme par eaüe venoient dedans ladicte ville gens de par le Connestable à tout viures, habillemens de guerre & autres choses necessaires, pour icelle deffendre. Finablement apres que ledit Duc de Bourgogne eut esté trois sepmaines ou enuiron deuāt la ville de Corbueil, voyāt qu'il ne la pouoit subiuguer n'auoir, & aussi que ses gens estoient moult fort trauallez tant pour les grans pluyes qu'il faisoient chacun iour, comme pour la mortalité qui estoit prinse en son ost, se departit le xxviij. iour d'Octobre: & leua son siege de deuant Corbueil, prenant son chemin vers la ville de Chartres: auquel logis de Corbueil ledit Duc laissa aucuns de ses gros engins & autres habillemens de guerre, avec grans prouisions de viures que plusieurs marchans auoient amené en l'ost. Lesquelles choses tantost apres le departement deuantdit, furent mises dedans la ville par les assiegez: Lesquels grandement furent ioyeux quand ils se veirent deliurez de leurs ennemis. Auquel logis de deuant Corbueil messire Mauroy de saint Leger fut feru d'un vireton parmy la iambe si angouisseusement,



seusement, qu'il en fut affollé, & en clocha toute sa vie. Et la cause pourquoy ledit Duc se deslogea si hastiement, fut pource que la Royne de France qui estoit à Tours en Tourraine, luy auoit fait sçauoir secrettement par vn sien feable seruiteur, qu'il voulsist aller deuers elle pour la ramener avec luy, car moult estoit courte tenue & en grād dangier. Sur laquelle requeste iceluy Duc auoit enuoyé vn sien secretaire nommé maistre Jean de Drosay, pour sur ce prendre aduis & conclusion. Lequel traita tant avec ladicte Royne qu'elle promeist d'elle s'en venir avec ledit Duc, ou cas qu'il iroit deuers elle pour la querir. Et pour plus grand seurté, bailla audit secretaire vn sien signet d'or à porter à son maistre le Duc: Lequel signet il recogneut bien, car plusieurs fois il l'auoit veu. Et sur ce quand il fut venu à Chartres la nuict de la feste de Toussaincts à tout la plus grād partie de ses seigneurs & capitaines de sa compaignie, & aussi de ses gens d'armes les mieux montez & habillez, se partit soubdainement, & par Bonneual & Vendosme s'en alla hastiement deuers Tours. Et quand il vint à deux lieües pres, enuoya deuant les seigneurs de Fosseux & de Vergy à tout huiet cens combattans, qui se meirent en embusche à demie lieüe pres. Et de rechief enuoyerent vn certain message deuers la Royne, luy noncer la venue dudit Duc: pourquoy incontinent qu'elle ouyt les nouuelles, appella maistre Jean Torel, maistre Jean Petit & maistre Laurens du Puys, qui estoient ses principaux gouuerneurs. Ausquels elle dit, qu'elle vouloit aller ouyr la messe à vne Eglise dehors la ville nommée Meremoustier, & qu'ils se preparassent pour aller avec elle. Lesquels de ce faire luy desenhortèrent: neantmoins elle issit briefuement hors de Tours, & les mena avec elle à ladicte Eglise: & tost apres les dessusdits seigneurs allerent deuers icelle Eglise, & enuoyerent deuers la Royne Hector de Saueuses à tout soixante combattans. Et lors les dessusdits gouuerneurs vindrent tantost deuers elle, où elle oyoit la messe, & luy dirent: dame vecy grand compaignie de Bourgonngons ou Anglois. Et elle qui riens ne doubtoit leur dit, qu'ils se teinssent pres d'elle: & adonc ledit Hector de Saueuses entra, & la salua de par son seigneur le Duc de Bourgongne, laquelle demanda où il estoit, & il luy respondit qu'il venoit tantost vers elle: apres lesquelles parolles elle commanda audit Hector, que les dessusdits Torel, Picard & maistre Laurens du Puys estās empres elle feussent prins: lequel maistre Laurens elle auoit en grand hayne, car il parloit à elle irreueremment, sans mettre la main à son chapperon, & sans luy faire autre reuerce: & ne pouuoit ladicte Royne riēs besongner n'accorder que ce ne fut par le consentement du dessusdit maistre Laurens. Et pource qu'il veit que pas ne pouoit issir pour luy sauuer, il entra en vne petite nef par derriere l'Eglise pour passer l'eau: mais il se noya tant eut grand haste, & les autres furent prins. Et fut ceste assemblée enuiron neuf heures du matin: & ledit Duc de Bourgongne veint enuiron vnze heures deuers la Royne, à laquelle il feit grand reuerence comme il appartenoit, & elle à luy, disant: treschier cousin outre tous les hommes du Royaume vous doy aymer, quand à mon mandement auez tout laissé, & m'estes venu deliurer de prison: pourquoy mō treschier cousin, iamaïs ne vous fauldray: car bien voy que tousiours auez aymé mon seigneur, sa generation, son Royaume & la chose publique. Apres ils disnerēt ensemble en ladicte Eglise en grand ließe: & apres disner la Royne māda à ceux de Tours qu'elle & son cousin



le Duc de Bourgongne vouloient entrer dedans la ville: mais par l'enhort du capitaine d'icelle ceux de Tours tarderent vn petit, toutesfois en la fin ils accorderent ce qu'elle demandoit: & ledit capitaine se trahit dedans le chastel, & ladicte Royne & le Duc de Bourgongne à tout leurs gens entrèrent en la ville. Auquel lieu fut faicte grand chiere au Duc & grand hōneur. Et apres la Royne manda le capitaine par saufconduit: auquel elle requist, & cōmanda qu'il luy rendit la forteresse, laquelle chose il feit, mais tresenuis ce fut: & apres que le Duc eut seiourné trois iours avec la Royne, il commist capitaine de la ville & du chastel Charles l'abbé à tout deux cens combattans, lequel feit sermēt de la bien garder pour & ou nom dudit Duc de Bourgongne, lequel serment il ne teint ne garda: car dedans l'an ensuiuant il rendit ladicte ville & forteresse en l'obeissance du Dauphin, & en demoura luy mesmes capitaine, faisant à iceluy le serment: & la Royne & le Duc de Bourgongne feirent publier dedans la ville de Tours, que nul ne payast gabelles, impositions ne autres subsides sinon le sel: & apres tous ensemble de là se departirent & allerent à Vendosme, où ils feirent publier comme ils auoient fait à Tours, que nul ne payast nuls subsides: & de là par Bonneual allerent à Chartres où ils arriuerent le neufuiesme iour de Novembre. Et auoit la Royne en sa compaignie quatre chariots qui menoiēt vingt femmes. Et si auoit seullement avec elle vn cheualier nommé messire Robert le Cyne: duquel elle estoit trescontente pour sa preud'hommie.

*Comment ladicte Royne venue à Chartres escriuit à plusieurs bōnes villes du Royaume, & furent faictes aucunes nouvelles ordonnances pour le gouuernement dudit Royaume.*

CHAP. CLXXX.



Pres que la Royne de France fut venue en la ville de Chartres (comme dit est) fut ordonné & conclud qu'elle escriroit lettres en son nom à toutes les bonnes villes estans en l'obeissance du Duc de Bourgongne: desquelles la copie s'ensuit de celles qui vindrent à Amiens. Treschiers & bien amez vous sçauiez comment par coulpe & iniquité causée par la damnable couuoitise d'aucunes gens de petit estat, qui ont prins le gouuernement de la personne de monseigneur & de son Royaume, maulx innumerables & inconueniēs s'en sont ensuiuiz, tant de la molestation de ceux du sang de mondit seigneur & d'autres, comme de la perdition de la grand partie de sa domination. Et mesmement és Duchez d'Acquitaine & de Normandie, a duré & encores dure ledit gouuernement, sans ce que les dessusdits gouuerneurs vueillent entendre à quelconque bien & bonne gouerne à estre mise en ce Royaume: mais ont conclud mortelle hayne contre tous preux & loyaux, & rauissent leurs biēs, & plusieurs executent à mort. Et en continuant en leur mauuaitié, quand ils aperceurent que voulions entendre à labourer à la reparatiō & au bien de la paix de ce Royaume, comme à nous compete, qui par la grace de Dieu sommes cōpaigne & espouse de mondit seigneur, comme il auoit esté encommencé par nostre fils & cousin de Hainault, desquels Dieu ayt l'ame: ils trouuerent moyen d'eux eslongner de sa personne, affin que ne fut sceüe leur iniquité & demourassent en leurs estats & offices. Et par ce moyen ils ont applicqué & applicquent chacun iour à leur singulier proffit toutes les finances de mondit seigneur, sans  
ce que



ce qu'aucune chose en soit employé pour le bien de mondit seigneur ou de son dit Royaume, faulxement & desloyallement nous ont despouillée & desrobée: & ont tant fait que mondit seigneur nous & nostredit fils le Daulphin n'auons dequoy maintenir noz estats & payer noz despens: car, comme dit est, ils ont tenu & tiennent nostredit seigneur & nostre fils le Daulphin, tellement qu'il conuient qu'ils facent ce qu'ils veullent, & commandent à ce pourueoir, que la domination de mondit seigneur viennent és mains d'estranges que Dieu ne vueille: apres ce que nostre treschier & tresamé cousin de Bourgongne a fait cesser lesdits inconueniens, il veut & offre paix à tous ceux qui avecques luy la vouldroient auoir par ses lettres patêtes publiées en plusieurs lieux de ce Royaume: à laquelle les dessusdits non voulans entendre, iceluy nostre cousin se meit en armes à tresgrand compaignie de cheualiers & escuyers en intention d'oster iceluy mauuais gouuernemēt: auquel resister & qu'il n'eut pas approchement à la personne de mondit seigneur, lesdits gouuerneurs manderent & appellerent à Paris toutes leurs garnisons, & abandonnerent l'heritage de mondit seigneur aux Anglois anciens ennemis de ce Royaume. Et en ce faisant ils demonstrent leur mauuaise intention: mais la plus grand quantité des nobles de ce Royaume & aucune grand partie des Prelats & bonnes villes, sçachans ce que dit est, s'adioindirent avecques luy pour le bien de mondit seigneur, comme de raison, lequel est triste & dolent, en acquittant sa loyauté de l'escādalle & deshonneur, que lesdits gouuerneurs ont fait à mondit seigneur, à nous, à nostre generatiō & à la noble mesgnie de France. Et à ceux qui y ont affinité ou alliāce par mariage ou autrement, & non sans cause: car vrayement la chose luy touche grādement: car il laissa son siege deuant Corbueil, vint à nous à mettre nous en franchise & oster de la subiection desdits gouuerneurs. Et aussi à nous mettre à la compaignie de mondit seigneur, comme il est de raison, & veinmes à la ville de Chartres: & nostredit cousin avec nous alla aduiser & ordonner ce qui est à faire de necessité, pour la conseruation de la domination de mondit seigneur, & la recuperation d'iceluy, que briefuement entendons à faire nous & nostredit cousin par le conseil & aduis de bons preud'hommes, vassaulx & subiects de mondit seigneur sans plus dissimuler. Pourquoy treschiers & bons amis, nous, qui deuons auoir le gouuernement de ce Royaume és besongnes de mondit seigneur par le conseil de ceux de son sang, & de ce nous auons lettres patentes de luy irreuocables, passées par son grand conseil present tous les grans seigneurs de son sang, comme sont oncles, cousins germains & autres. Et nous qui auōs entiere & certaine cognoissance de voz bonnes & loyalles intentions au regard de la seigneurie de mondit seigneur, & mesmement par ce que pour le bien d'iceluy vous estes enclins avecques nostredit cousin à vous employer de corps & de pouuoir sans esparagner iusques à la mort, pour paruenir plus briefuement à la conclusion desirée & necessaire. Vous sommons, requerons & neātmoins de par mondit seigneur & de nous, expressement vous mandons que vous maintenez en sain propos à l'intention de nostredit cousin, sans aucunement obtéperer ou entendre à quelques lettres ou mandemens qu'ou nom de mondit seigneur & mon fils le Daulphin vous seroient enuoyez au contraire: & ne souffrez qu'iceux gouuerneurs doresnauant ayent de vous aucunes pecunes par quelque maniere ou couleur



que ce soit, & qui puist estre : & sur la loyauté & obeïssance que deuez à mondit seigneur, & sur toutes les choses que pourriez forfaire & estre notées de rebellion & inobeïssance enuers luy & nous. Car en ce faisant vous ferez vostre honneur & deuoir : & vous ayderons, secourons & deffendrons de tout nostre pouuoir contre tous, qui pour ceste cause & occasion s'efforceroient de vous nuire, greuer & dommager. Treschiers seigneurs & bien amez de vous soit garde nostre seigneur. Escrit audit lieu de Chartres le xij. iour de Nouëbre. Et apres ce, fut ordonné par le conseil de ladicte Royne & du Duc de Bourgongne, que maistre Philippe de Moruiller iroit en la ville d'Amiens accompagné d'aucuns notables clers declairez par ledit cōseil, avec vn greffier iuré. Et là feroiēt de par la Royne la souueraine court de iustice ou lieu de celle qui estoit en Parlement à Paris, affin que ne fut besoing d'aller à la chancellerie du Roy pour impetrer mandemens, ne pour quelque autre cause, qui peust aduenir és Bailliages d'Amiens, Vermendois, Tournay & seneschaucées de Ponthieu, avec ses ressors & enclauemens des dessusdits païs: auquel maistre Philippe fut baillé vn seel, où estoit gravé l'image de la Royne estant droicte, ayant les deux bras tendans vers terre: & au droit lez estoit vn escu des armes de France, & au fenestre auoit vn escu party des armes de France & de Bauiere, & si estoit escrit autour. C'est le seel des causes, souuerainetez & appellations pour le Roy. Et fut ordonné par iceluy conseil, que dudit seel on seelleroit de cire vermeille, & que les lettres & mandemens se feroient au nom de la Royne par la maniere qui s'ensuit.

Y S A B E L par la grace de Dieu Royne de France ayant, pour l'occupation de monseigneur le Roy, le gouuernement & administratiō de ce Royaume, par l'octroy irreuocable à nous sur ce fait par mondit seigneur & son conseil. Par le moyen duquel seel & mandement deuantdit, ledit maistre Philippe assembla grand nombre de pecunes. Et pareillement fut ordonné outre l'eauē de Seine pour les païs obeïssans à la Royne & au Duc de Bourgōgne vn autre Chācellier.

*Comment messire Elyon de Iacqueuille fut tiré hors de l'Eglise nostre Dame de Chartres par Hector de Saueuses, & ses complices qui le naurerent à mort.*

## CHAP. CLXXXI.

**E**N ces iours le Duc de Bourgongne estant dedans Chartres en son hostel derriere nostre Dame, se meut dissention entre messire Elyon de Iacqueuille cheualier & Hector de Saueuses, & tant qu'en la presence dudit Duc iceux dirēt l'un à l'autre plusieurs hautaines parolles. Pourquoy ledit Hector de ce non content, dedans briebs iours ensuiuant assembla aucuns de ses amys iusques à douze ou à seize hommes de fait. Entre lesquels estoient son cousin germain, c'est à sçauoir le seigneur de Creuecueur son frere, le bon de Saueuses, Hues de Bours & vn Haulsaire nommé Iean de Vaulx: par lequel & en la plus grand partie, les deux dessusdits estoient en hayne l'un contre l'autre: car par auant ledit Iacqueuille auoit destroussé iceluy Iean, lequel estoit parent audit Hector: & avecques eux aucuns autres iusques au nombre dessusdit qui tous ensemble vn certain iour vindrent de fait à pensē dedans l'Eglise nostre Dame de Chartres: auquel lieu ils rencontrerent & trouuerent ledit Iacqueuille, qui venoit de l'hostel dudit Duc de Bourgongne. Et incontinent  
par



par ledit Hector & ses gens, en disant : Iacqueuille tu m'as autresfois iniurié & fait desplaisir, dont tu seras puny: & sans delay fut prins par iceux & porté hors ou trainé de ladicte Eglise, & tres inhumainement fut battu & decouppé: jaçoit-ce qu'en ce faisant, priaist moult de fois & piteusement mercy audit Hector, en luy offrant grand somme de pecune. Mais ce riens n'y vallut, car ils le laisserent comme mort. Et sans delay se departirent de ladicte ville, & s'en allerent en vn village où les gens dudit Hector estoient logez à deux lieües de la ville de Chartres: & apres le departement d'iceluy Hector Iacqueuille en tel estat qu'il estoit se fait porter par ses gens deuant ledit Duc de Bourgongne, auquel il fait piteuse complaincte. Disant que pour bien & loyaumét seruir, il estoit mis en ce poinct: & adonques luy voyant ce, eut au cueur si grand tristesse que plus ne pouoit: pourquoy soubdainement s'arma & monta à cheual accompagné de ses gens en petit nombre, & cheuaucha par la ville, cuidant trouuer ledit Hector & ses complices: mais il fut tantost aduertý qu'ils estoient partis de la ville. Et aussi assez tost vindrent deuers ledit Duc plusieurs seigneurs, lesquels le r'appaierent au mieux qu'ils peurent: c'est à sçauoir messire Iean de Luxembourg, le sire de Fosseux, le Mareschal de Bourgongne & plusieurs autres: toutesfois il fait prendre & arrester aucunes bagues & cheuaux dudit Hector, & apres s'en retourna en son hostel: & là par notables medecins fait visiter ledit Iacqueuille, mais ce riens n'y valut, car dedans les trois iours ensuiuant il trespassa. Et comme plusieurs tenoient veritablement, se iceluy Hector eut esté trouué, ledit Duc l'eut fait mourir villainement: & en son viuant ne luy voulut oncques pardonner, ainçois par plusieurs fois dit qu'une fois luy & ses complices il destruiroit, combien que dedans briebs iours ensuiuans ledit Hector tellement quellement fut reconseillé avecques ledit Duc pour ses grans affaires, que de present il auoit de luy & de ses gens.

*Comment le Duc de Bourgogne alla à tout sa puissance vers Paris, pour y vouloir entrer: & depuis mena la Roïne à Troyes & autres matieres.* CHAP. CLXXXII.



Après toutes ces besongnes ledit Duc de Bourgongne avecques toute sa puissance, se partit de la ville de Chartres. Et par Montlehery s'en alla vers Paris en intention d'entrer dedás la ville par certains moyens qu'il auoit avec aucuns des Parisiens ses fauorifans. Et pour faire l'entreprise enuoya Hector de Saueuses, Philippe son frere, le sire de Sores, Loys de Varignes & plusieurs autres capitaines iusques au nombre de six mille combattans vers la porte de Louuel de Chastillon assez pres de saint Marcel: mais par auant leur venue la chose fut accusée au Connestable par vn pelletier de Paris: lequel Connestable tantost meit grand quantité de ses gens à ladicte porte & en plusieurs autres lieux dedans: pourquoy ledit Hector venu à la porte pour entrer dedans, fut tresdurement rebouté luy & ses gens. Et mesmement fut blecé en la teste d'un vireton: & adonques voyant que leur entreprise estoit accusée entrerent dedans saint Marcel, & là se logerent attendans le Duc de Bourgongne leur seigneur. Et adonques ledit Connestable fait saillir de trois à quatre cens de ses gens hors de Paris par la porte S. Marcel: lesquels vigoureusement enuahirent lesdits Bourgongnons, & prindrent & tuerent aucuns: mais sans



delay iceux crians à l'arme, s'assemblerent, & incontinent de grand courage allerent contre les dessusdits: & tellement les combatièrent que par force ils s'entrerent dedans leur ville, rescouyrent aucuns de leurs gens prins par iceux. A laquelle besongne Jean premier né du seigneur de Flauy se porta tresvaillamment à tout l'estandart dudit Hector de Saueuses, que luy mesmes print & porta assez pres de la porte de Paris, dont grandement fut par ledit Duc recommandé quand il vint à sa cognoissance: & eurent aucuns des fauorisans au Duc de Bourgongne les testes couppees dedans Paris: si estoit iceluy Duc en bataille à tout sa puissance à demie lieüe ou enuiron de Paris, attendant les nouuelles de ses gens. Et quand il fut aduertie que son entreprinse estoit apperceüe, tantost remanda ses gens de S. Marcel: à tout lesquels s'en retourua à Montlehery, tousiours en sa compagnie le ieune Comte de saint Pol son nepueu. Auquel lieu de Montlehery il congea tous ses gens Picards: c'est à sçauoir messire Jean de Luxembourg, le seigneur de Fosseux & tous les autres capitaines par auant nommez, & leur ordonna les frontieres es villes où ils se tiendroient l'hyuer durant. Premier fut à messire Jean de Luxembourg baillé en garde la ville de Mōt Didier & les marches à l'enuiron, & Hector & Philippe de Saueuses furent mis à tout leurs gens dedans Beauuais, le Bastard de Thian fut constitué capitaine de Senlis, & à Ponthoïse & Meulenc demourerent le sire de l'Isle-Adam, & le sire de Cohen, & aucuns autres s'en retournerent en leurs propres lieux en Picardie & autres marches. Et iceluy Duc de Bourgongne dudit lieu de Montlehery retourna à Chartres. Et apres ce qu'il eut ordonné capitaines & gouuerneurs en icelle ville & autres au païs à l'enuiron, se partit de là avec la Royne & ses Bourgongnons pour aller à Troyes en Champaigne, prenant leur chemin en tirant vers Ioinigny: sur lequel chemin furent poursuiuis par le Comte d'Armignac Connestable de France. Lequel à tout grād puissance de gens d'armes se meit sur les champs sur intention de combattre ledit Duc, si eust veu son aduantage. Et de fait quand la Royne & ledit Duc de Bourgongne furent logez dedans Ioinigny, aucuns des capitaines du Connestable à tout trois cens combattans ou enuiron allerent ferir au logis du seigneur de Vergy & des autres Bourgongnons, & là feirent grand effroy & esparpeil. Pourquoy tout l'ost dudit Duc fut esmeu, & incontinent à toute sa puissance se meist aux champs, & ordonna certain nombre de combattans à poursuiuir les dessusdits: lesquels les rechasserent trefroidement iusques assez pres de la bataille dudit Connestable, qui estoit enuiron vne lieüe pres dudit Ioinigny: & fut le seigneur de Chateau-Villain l'un des principaux à ce commis par ledit Duc, qui plus longuement les poursuiuit. Et apres le retour d'iceux, furent commis plusieurs hommes d'armes à faire bon guet: & quand ils eurent seiourné cinq iours dedans Ioinigny, ils s'en allerent audit lieu de Troyes, où ils furent grandement & honnorablement receuz par les habitans & officiers de ladicte ville: & fut la Royne logée dedans l'hostel du Roy son seigneur, à laquelle furent payées à la ville de Troyes toutes les rentes & subsides appartenans au Roy, & aussi es autres lieux estans en l'obeissance dudit Duc de Bourgongne: auquel lieu de Troyes fut mandé le Duc de Lorraine par le conseil & enhort dudit Duc de Bourgongne, lequel là venu fut par la Royne constitué & fait Connestable de France. Et pour ce faire, luy fut baillée vne espée en faisant le serment accoustumé. Et aussi en déposant & en



& en destituant le Comte d'Armignac. Et alors le Duc de Bourgongne congea plus grand partie des seigneurs de Bourgongne, & se tint dedās la ville de Troyes la plus grand partie de l'hyuer: & constitua sur les marches & frontieres de Chāpaigne Iean d'Aubigny, Iean du Clau & Clauin son frere, à tout grand quantité de gens d'armes:lesquels en plusieurs & diuers lieux feirent forte guerre aux gens du Connestable.

*Comment Iean de Bauiere fait guerre à la Duchesse sa niepce au pais de Hollande, & les conquestes que faisoit Henry Roy d'Angleterre en la Duché de Normandie.*

CHAP. CLXXXIII.

**L**Tem durant les tribulations dessusdictes Iean de Bauiere faisoit forte guerre à la Duchesse Iacqueline sa niepce, & prindrent ses gens en ce temps la ville de Gorcamp en Hollande:mais aucunes tours demourerent, & se tindrent en l'obeissance de ladicte Duchesse: laquelle oyant nouuelles de ladicte prinse,assembla tantost grand foison de gens d'armes: lesquels en la compagnie de la Comtesse de Hainault sa mere,les mena par nauire à ladicte ville de Gorcamp,qui siet sur la mer: & de fait par l'ayde de ses gens qui estoient és tours dessusdictes, se bouta dedans, & fait combatre les gens dudit Iean de Bauiere son oncle,qui en assez brief terme furent tournez à desconfiture,& morts que prins de cinq à six cens:entre lesquels de ceux qui furent prins, estoit le principal le Damoyseau Derke. Et de la partie d'icelle Duchesse y fut mort Videran de Brederode tant seullement:lequel estoit moult vaillant,& chef principal de toutes ses gens touchant le fait de ladicte guerre, dont eut moult grand desplaisance:& depuis fait trencher les testes à aucuns de ceux qui auoient esté prins prisonniers, pource qu'ils s'estoient desloyautez enuers elle. En apres pour appaiser le discord entre ces parties,Philippe Comte de Charrolois seul fils du Duc de Bourgongne alla ou pays de Hollande, où moult se trauailla à aller d'un costé & d'autre. C'est à sçauoir deuers son oncle & sa cousine germaine, mais pour diligence qu'il en fait ne les peut oncques concorder, & pourtant s'en retourna en Flandres.Ouquel temps aussi le Roy d'Angleterre qui estoit à grand puissance en la Duché de Normandie, conqueroit villes & forteresses & peu trouuoit qui contre luy se deffendist. Car les gens du Roy de France estoient retraits à Paris deuers le Connestable, & en autres lieux à l'environ, pour resister contre la puissance dudit Duc de Bourgongne(comme dit est ailleurs)si vint deuant la ville de Caen qui estoit moult puissante & bien peuplée: laquelle il assiegea,& fait assaillir par diuers assaulx, où moult perdit de ses gens: mais en la fin tant continua, que ladicte ville par force fut prinse, & furent morts bien six cens des deffendans: & depuis se tint la forteresse environ trois sepmaines, dedans laquelle estoit le seigneur de la Fayette, le seigneur de Montenay & messire Iean Bigot,qui la rendirent, moyennant qu'ils eurent seureté du Roy d'Angleterre de eux partir saufs leurs corps & leurs biens: apres laquelle conquete ledit Roy fait assieger par son frere le Duc de Cloestre la forte ville & chastel de Chierebourg, qui estoient les plus fortes places de toute la Duché de Normandie,& les mieux pourueues de viures & habillemens de guerre:& y fut le siege environ dix mois: en la fin duquel temps la rendit messire Iean d'Engennes qui en estoit capitaine,



moyennant qu'il en eut certaine somme d'argent au partir, & bon saufconduit pour aller où bon luy sembleroit: à tout lequel il alla depuis en la cité de Roüen, quand elle fut conquise par lesdits Anglois: & là seiourna tant que sondit saufconduit fut passé sur la fiance d'aucuns seigneurs Anglois, qui luy donnerent à entendre qu'ils luy feroient r'alonger: mais au derrain il en fut trompé & luy feit le Roy d'Angleterre trancher la teste, dont aucuns François furent assez ioyeux pour ce qu'il auoit rendu la place dessusdicte par couuoitise d'auoir argent au preiudice du Roy de France.

*Comment messire Iaques de Harcourt espousa la fille du Comte de Tancarville: la destrouffe Philippe de Saucuses, & du Connestable qui meist le siege à Senlis.*

CHA. CLXXXIIII.

**E**N ce temps messire Iaques de Harcourt espousa la seule fille du seigneur de Tancarville, duquel avec toutes ses seigneuries il eut le gouuernement & meist garnison de ses gens en toutes ses villes & fortresses contre les Anglois. Esquels iours Philippe de Saucuses estant en garnison avec Hector son frere en la ville de Beauuais, se partit vn certain iour à tout six vingts combattans ou enuiron pour aller courre vers le Comté de Clermont, comme il auoit accoustumé de faire par plusieurs fois. Et à son retour passa par deuant vn chastel nommé Brelle, dedans lequel estoient assemblez plusieurs des gens du Comte d'Armignac, qui soudainement faillirent à estandart desployé sur ledit Philippe & ses gens: lesquels voyans si grand puissance furent à desroy: & ne fut pas en la puissance de luy de les retenir, & finalement les chasserent iusques assez pres de Beauuais, & en prindrent la plus grand partie, & aussi en tuerent aucuns, pourquoy le dessusdit Philippe de Saucuses au cueur tresdolent, se retrahit audit lieu de Beauuais. Et dedans briefs iours apres qu'il eut vne partie de ses gens, il s'en alla à Gournay en Normandie, où il fut ordonné capitaine de la ville par le consentement des habitans d'icelle: & aussi ledit Hector eut dissention avec ledit commun de Beauuais, pourquoy il faillut qu'il s'en partist dedans briefs iours ensuiuant: & lors enuiron la Chandeleur ensuiuant le Roy Charles accompagné du Comte d'Armignac son Connestable & de grand nombre de gens de Paris, vint de Paris à Creil où il fut par plusieurs iours, & pource que ses gens passerēt assez pres de Senlis, la garnison qui y estoit de par ledit Duc de Bourgogne faillirent sur eux & en prindrent plusieurs & en tuerent: dont ledit Connestable fut grandement troublé. Et dedans briefs iours ensuiuant ledit Connestable assiegea de par le Roy ladicte ville de Senlis, & feit dresser contre les portes & murailles plusieurs gros engins, dont les assiegez furent moult trauaillez. Et lors ils enuoyerent deuers messire Iean de Luxembourg & le seigneur de Fosseux certains messages, eux requerans que pour le bien & entretenement du Duc de Bourgogne, ils voulussent faire secours audit lieu de Senlis. Lesquels seigneurs dessusdits par la deliberation de Philippe Comte de Charrolois seul fils du Duc de Bourgogne, & par les seigneurs de son conseil assemblerent en grand puissance & vindrent à Ponthoise: & de là cheuaucherent vers Senlis, ayant voulu de leuer ledit siege: mais ils furent aduertis que leurs ennemis estoient en trop grand nombre, pourquoy ils enuoyerent dedans ladicte ville cent combattans



tans ou enuiron, lesquels entrèrent par vne porte où il n'auoit logé nuls des gens du Conneftable: par lesquels fut mandé aufdits affiegez qu'ils feiffent bonne che-  
re, & que briefuement fans point de faute auroient bon fecours. Et lefdits de Lu-  
xembourg & de Fosseux à tout leurs gens d'armes par Ponthoife & Beauuais s'en  
retournerent en Picardie pour ceste fois, fans autre chose faire. Et d'autre partie  
messire Tanneguy du Chastel Preuost de Paris print la ville de Cheureuse, & des-  
ja auoit affiégué le chastel, quand hastiuement il fut mandé par le Roy & le Con-  
neftable pour venir audit siege de Senlis: pourquoy laiffant partie de ses gens en  
ladiète ville de Cheureuses, vint audit siege où il trouua le Roy & ledit Con-  
neftable.

*Comment le Roy de France enuoya ses ambassadeurs à Monstreau, où fault Yonne pour  
l'union de l'Eglise. Et comment ceux de Roïen se rendirent Bourgongnons.*

CHAP. CLXXXV.

**E**N apres le Roy Charles & son Conneftable enuoyerent leurs ambaf-  
sadeurs à Monstreau où fault Yonne: c'est à fçauoir l'Archeuefque  
de Reims, les Euefques de Paris & de Clermont en Auuergne, Jean de  
Harcourt Comte d'Aumalle, messire Mansart d'Esne & messire Re-  
gnault de Merquoiques cheualiers, maistre Guerard Marchet, le Iuge Maye, Jean  
de Loliue & autres iufques au nombre de feize notables personnes, pour estre &  
conuenir avec les ambassadeurs, affin de traicter paix entre eux parties: & furent  
enuoyez de par ladiète Royne à Bray fur Seine & le Duc de Bourgongne: c'est à  
fçauoir l'Archeuefque de Sens frere à messire Charles de Sauoify, les Euefques  
de Langres & d'Arras, messire Jean de la Trimouille feigneur de Iouuelle, le sei-  
gneur de Courcelles, messire Iaques de Courtiambe, Coppin de Viefuille, mai-  
stre Pierre Conchan depuis Euefque de Beauuais, Jean le Clerc depuis Chancel-  
lier de France, Gilles de Clamery, maistre Thierry le Roy, Jean le Mercier, Iac-  
ques Braulart & maistre Baudet de Bordes: lesquels ambassadeurs dessusdits a-  
uoient chacun de son aduerfe partie bon & seur faufconduit. Et eux venus aux  
villes dessusdictes, c'est à fçauoir Monstreau & Bray, aduiferent d'un comun  
accord de conuenir ensemble, & à certains iours nommez en vn village nommé  
la Tombe qui estoit emmy merque de deux villes. Auquel lieu fut ordonné pour  
la fcurté des deux parties ayant certain nombre de gens d'armes le feigneur de la  
Trimouille. Et dura ceste ambassade par l'espace de deux mois ou enuiron, sou-  
uent les deux parties ayant recours deuers leurs seigneurs, enuoyant les respon-  
ces de leur aduerfe partie chacun en droit soy sur l'esperance de mener la beson-  
gne à bonne conclusion. Et adonc en ce mefmes temps fut mise l'vnion par tou-  
te l'vniuerselle Eglise: car apres que Pape Martin fut pontifié, il feit mettre hors  
de prison le Pape Iean, lequel se meift du tout en fa mercy & obeiffance: & ledit  
Pape Martin le receut à ce benignement, & le feit Cardinal, mais il mourut de-  
dans briebs iours ensuiuant. En outre en ses propres iours les bourgeois & ci-  
toyens de la ville de Roïen, qui moult estoient fauorables au Duc de Bourgon-  
gne, manderent fecrettement aucuns capitaines tenans son party: lesquels avec  
foison de gens d'armes ils bouterent dedans leur ville, c'est à fçauoir messire Guy  
le Bouteillier, Lagnen Bastard d'Arly. Et quand ils furent dedans à l'ayde des des-



fusdits citoyens, allerent assaillir trespuissamment la forteresse que tenoient les gens du Roy contre ladicte ville : & en ce tant continuerent que ceux de dedans la rendirent, par ce qu'ils s'en allerent sauvement, & fut ledit messire Guy le Bou-teillier constitué capitaine : ouquel assaut se porta tresvaillamment iceluy Lagnen d'Arly, & tant qu'il en acquist la renommée & bienveillance de tous les bourgeois & manans d'icelle ville. Pour laquelle besongne ainsi acheuée, le Roy de France & ceux qui le gouuernoient furent tresmal contens. Et pour vray alors en la plus grand partie du royaume de France y auoit guerre & diuision. Et par ce moyen estoient les Eglises & le poure peuple moult desolez. Et aussi n'y estoit iustice aucunement obeïe.

*Pour l'an mille cccc. & xvij.*

*Comment le Duc de Bourgongne alla deuers l'Empereur Sagismont : les sermens que print le Comte de Charrolois, & du siege de Senlis, qui fut leué par les Picards.*

CHAP. CLXXXVI.

**A**V commencement de cest an Iean Duc de Bourgongne apres ce qu'il eut ordonné dedans Troyes l'estat de la Royne de France : & aussi qu'il eut cōmis plusieurs de ses capitaines, c'est à sçauoir Charlot de Dueilly, Iean de Clau, Iean d'Aubigny & plusieurs autres à tout deux mille combattans ou enuiron pour aller vers Senlis courre sur les gens du Connestable, prenant congé à la Royne se partit de la ville de Troyes & s'en alla à Dijon veoir sa femme & ses filles. Et apres qu'il eut là seiourné aucune espace, s'en alla à Mommeliart deuers l'Empereur Sagismont Roy d'Allemagne: auquel lieu ils eurent grād parlement ensemble, & depuis qu'ils eurent fait grand reuerence l'un à l'autre, se separerent, & retourna ledit Duc en son pays de Bourgongne. Durant lequel temps Philippe Comte de Charrolois vint à Arras, auquel lieu par le commandement de la Royne & de son pere le Duc, conuoqua tous les seigneurs cheualiers & escuyers, le clergé & ceux des bonnes villes des pays de Picardie & autres lieux de leur obeïssance, à estre à certain iour nommé audit lieu d'Arras: ausquels là venus il feit requerre par la bouche de maistre Philippe de Moruillier, qu'ils iurassent de seruir la Royne & le Duc son pere contre tous & enuers tous, sauf & reserué la personne du Roy: lesquels deuantdits le iurerent, c'est à sçauoir messire Iean de Luxembourg, messire Iaques de Harcourt, le Vidame d'Amiens, les seigneurs d'Antoing & de Fosseux, le seigneur d'Auxi, messire Emond de Lombers & plusieurs autres, qu'ils les seruiroient de corps & de biens tout leur viuant. Et adonc fut requis aux bonnes villes qu'ils aydassent de certaine somme de pecune. Et au surplus fut à tous les dessusdits assigné brief iour, pour estre en la ville d'Amiens à l'encontre dudit de Charrolois, affin d'auoir aduis & conseil ensemble pour secours à ceux de Senlis. Et fut ordonné à tous les capitaines chacun en son endroit, qu'ils assemblassent le plus de gens d'armes & de traict que finer pourroient à estre prests au iour dessusdit. Auquel lieu le Comte de Charrolois avec son conseil fut à Amiens au iour par luy ordonné: & là vindrent deuers luy tous les seigneurs deuantdits, & grand quantité de ceux des bonnes villes. Entre lesquels y vindrent aussi aucuns bourgeois de Roüen,  
enuoyez



enuoyez de par la ville deuers ledit Comte, pour luy requerre ayde & conseil ou lieu de son pere le Duc de Bourgogne : disant que de iour en iour attendoient d'estre assiegez de par Henry Roy d'Angleterre & sa puissance, remonstrant plusieurs fois comment ils auoient fait obeïssance audit Duc de Bourgogne, en delaissant le Roy, son fils le Daulphin, le Connestable & tous autres, & mis en luy principalement toute leur esperance : sçachans que s'ils failloit à leur secours, ils auoient failly à tous autres. Ausquels fut respondu par le conseil dudit de Charrolois & en sa presence aux dessusdits, que bien ils s'entretenissent en leur bon propos, & qu'au plaisir de Dieu ils auroient bonne & briefue ayde. Et avec ce leur furent baillées lettres adressans aux capitaines & gouuerneurs de ladicte ville de Roüen, à tout lesquelles ils s'en retournerent. Et apres le Comte de Charrolois pour tous les affaires deuantdits, fait proposer en la grand salle de l'Euesque par ledit maistre Philippe de Moruiller presens tous ceux qui estoient là venus, qu'il estoit necessaire & expedient que les bonnes villes chacune de leur franche voulenté feissent vne ayde de pecune & pareillement le clergé, aydast d'un demy dixiesme. Mais pourtant que la besongne ne peut pas estre si en haste expediee, entre-temps vint audit lieu d'Amiens certain messagier de la ville de Senlis, lequel apportoit lettres au Comte de Charrolois, contenant que s'ils n'estoient secouruz le xix. iour d'Auril ou dedans si puissamment que pour leuer le siege du Roy & du Connestable, il failloit qu'ils rendissent la place, & de ce auoient baillez leurs hostages : pourquoy le Comte de Charrolois & son conseil oyans les nouuelles, conclurent d'y pourueoir : & finalement jaçoit ce que ledit Comte eust grand desir d'y aller en sa personne, son conseil ne fut pas content : ainçois furent ordonnez les principaux conducteurs de ceste besongne messire Iean de Luxembourg & le seigneur de Fosseux, & au dessous d'eux tous les capitaines de Picardie & autres frontieres : lesquels deux cheuaucherent iusques à Ponthoïse, & y vindrent bien hastiuement le xvij. iour dudit mois d'Auril. Auquel lieu tous ensemble prindrent conclusion de partir le lendemain par nuict pour aller & cheuaucher vers la ville de Senlis, & pouoient estre en tout bien huit mille combattans : lesquels (comme dit est) se meirent aux champs tous ensemble. Et là ordonnerent certain nombre de cheuaucheurs, pour aller en aucuns lieux & places vers ladicte ville de Senlis, pour sçauoir aucunes nouuelles de leurs ennemis : avec lesquels messire Iean de Luxembourg & le seigneur de Fosseux estoient : c'est à sçauoir le Veau de Bar Baillif d'Auxi, le sire de l'Isle-Adam, messire Emond de Lombers, le seigneur d'Auxi, Hector & Philippe de Saucuses freres, Ferry de Mailly, Loÿs de Varignes, messire Philippe de Fosseux, Jaques & Iean de Fosseux, le sire de Cohen, messire Iennet de Poix, le seigneur de Longueval, le seigneur de Miraumont. Et generally la plus grand partie de tous les nobles & gentils-hommes de Picardie, lesquels tous ensemble en vne moult belle ordonnance ayant auantgarde, arrieregarde & bataille, cheuaucherent tant qu'ils vindrent & approcherent à vne lieüe pres de la ville de Senlis. Et adonc le Comte d'Armignac Connestable de France tenant son siege deuant ladicte ville de Senlis, ouÿt certaines nouuelles par ses gens qu'il auoit enuoyé sur les champs, que les seigneurs de Picardie par dessus nommez s'approchoient à grand puissance pour les combattre. Et pource sans delay fait armer toutes ses gens & mettre



en bataille aux plains champs, affin qu'il ne fut enuahy en son logis. Et adóc ceux de la ville voyant les assiegeans estre en effroy enuiron le point du iour, dont le lendemain deuoient liurer la ville s'ils n'auoient secours. En grand hardiesse & par ordonnance faillirent hors de ladicte ville, & bouterent le feu en plusieurs lieux es tentes & logis dudit Connestable: & avec ce prindrent & tuerent plusieurs malades, marchans & autres qu'ils trouuerent audit logis, à tout lesquels & foison de biens ils retournerēt sans perte dedans ladicte ville à la veüe de leurs ennemis: pour laquelle enuahie ledit Connestable apres ce, que tres matin les eut fait sommer de rendre ladicte ville comme promis l'auoient, & qu'ils eurent fait responce que encores n'estoit pas heure passée de la rendre, feit couper les testes à quatre des hostages, & puis les feit esquarterer & pendre au gibet. Desquels quatre y auoit deux gentils-hommes l'un nommé Guillaume Mauchelier & l'autre Boudart de Vingles: & si y auoit deux bourgeois l'un nommé Guillaume Escallot, & l'autre maistre Iean de Beaufort aduocat du Roy en ladicte cité: & les deux autres hostages, dont il en y auoit six, furent menez à Paris prisonniers, dont l'un estoit nommé sire Iean Durant Prestre, & l'autre estoit religieux de saint Vincent: pour la mort desquels ceux de ladicte cité de Senlis, feirent couper les testes à xlvj. des gens dudit Connestable, & si en y eut deux penduz & deux femmes noyées: & lors le Comte d'Armignac Connestable cheuaucha tout en bataille vers le Pas-de-larron entre Creil & Gouuieux, attendant ses ennemis: & enuoya aucuns de ses capitaines querir le Roy qui estoit à Creil, affin de le faire cheuaucher le chemin de Paris: & adonc les dessusdits messire Iean de Luxembourg & le seigneur de Fosseux à tout leurs gens auoient si fort cheuauché, qu'ils estoient aussi auant que le Roy: & là s'assemblerent en vn lieu nommé l'estoing, auquel deuoit passer le Roy & sa puissance. Et assez tost apres s'apparut l'auantgarde du Connestable, & prestement les coureurs tant d'un costé comme d'autre commencerent tresfort à escarmoucher l'un contre l'autre: & y eut plusieurs lances rompues, hommes d'armes portez par terre occis & naurez terriblement. Et incontinent le Roy & le Connestable enuoyerent deux heraulx deuers les seigneurs dessusdits sçauoir quels gens ils estoient, & qu'ils demandoient: ausquels fut faicte responce par ledit de Luxembourg, disant: ie suis Iean de Luxembourg & avec moy le sire de Fosseux & plusieurs autres seigneurs, qui sommes cy enuoyez de par ledit Duc, pour seruir le Roy & faire secours à la bonne cité de Senlis, à l'encontre du Comte d'Armignac, lequel nous sommes tous prests de combattre avec tous ses aydans s'il nous veult liurer place & non contre le Roy: car nous sommes prests de le seruir comme ses loyaux vassaux & subiects. Apres lesquelles responces ainsi faictes, lesdits heraulx s'en retournerent deuers le Roy & le Connestable, portans les responces deuantdictes. Et adonc ledit Connestable dit hault & cler: puis que pas n'est icy le Duc de Bourgongne ou son fils, nous ne pouons pas gramment gagner, ie conseille que nous nous retrayons: car ce sont compagnons qui ne demandent qu'à gagner, & ne sont pas grammēt riches: & aussi ledit Connestable auoit desia ouï nouuelles par aucuns de ses gens, que Charlot de Duilly deuant nommé & les autres capitaines estoiet en grand nombre vers Dampmartin en la Goelle: pourquoy sans attarger gramment, feit cheuaucher le Roy & tous ses autres gens en ordonnance vers Paris: &

meist



meist certain nombre de ses meilleurs combatans derriere pour soustenir & garder, que ses ennemis ne luy baillassent aucun empeschement: & ainsi sans arrester en nulle place ne autre chose faire, s'en retourna le Roy Charles & le Comte d'Armignac son Connestable dedans Paris, dont plusieurs Parisiens furent tresmal contens, & murmurèrent tresfort à l'encontre dudit Connestable: pareillement messire Jean de Luxembourg, le seigneur de Fosseux & leurs gens tresioyeux de ce qu'ils auoient acheué ce pourquoy ils y estoient venuz sans perte ne inconuenient, s'en retournerent à Ponthoise en grand ioye & lyesse. Tant qu'est à parler des escarmouches qui furēt faictes ledit iour, qui les fait n'entretint, il seroit trop long à racompter & escrire: mais pour vray tant d'un costé comme d'autre, en y eust plusieurs qui si gouvernerent vaillamment, & menoit le sire de Miraumont les archers Picards: lequel (comme il luy auoit esté enioingt & enchargé) les tint en bonne ordonnance, & apres que les dessusdits de Luxembourg & Fosseux furent refraischiz à Ponthoise, se departirent à tout leurs gens, & allerent chacun en son propre lieu. Pour lequel voyage tant du Duc de Bourgongne, du Comte de Charrolois, comme de tous autres tenans ceste partie, furent fort recommandez, & leur fut imputé à vaillance tresexcellente. Et en apres le Bastard de Thian general capitaine de Senlis, Troullart de Maucieux, messire Mauroy de S. Legier & aucuns autres gouuerneurs de ladicte ville, qui y auoient esté le siege durant dedans, la feirent tresfort reparer: c'est à sçauoir les tours, portes & murailles, que ledit Connestable auoit par ses engins fait abbatre: & depuis commencerent à mener plus forte guerre aux gens du Roy qu'ils n'auoient fait par auant.

*Comment les Cardinaulx d'Ursin & de saint Marc vindrent en France pour appaiser les seigneurs. Et de la paix qui fut traictée à Monstreau & non tenue.*

CHAP. CLXXXVII.

**E**N ces propres iours le Duc de Bourgongne estant en son païs de Bourgongne, vindrent deuers luy les Cardinaulx d'Ursin & de saint Marc, enuoyez de par nostre saint Pere le Pape en France, pour appaiser la dissention qui estoit entre le Roy son fils d'une part, & la Royne & le Duc de Bourgongne d'autre part: ausquels Cardinaulx ledit Duc fait grand reuerence, & les festoya grandement: & apres que ledit Duc leur eut dit & remonstré, qu'il estoit prest de faire paix à tous ceux qui là vouloient, & pour ceste cause il auoit enuoyé ses ambassadeurs à Bray sur Seine deuers les gés du Roy pour traicter de paix, ils se departirent du païs de Bourgongne, & par Troyes allerent audit lieu de Bray sur Seine, & de Monstreau: où ils furent des ambassadeurs tant d'un costé comme d'autre tresioyeusement receuz & honnorez, & de là le Cardinal de saint Marc alla à Paris: auquel lieu en la presence du Roy, de son conseil & du Connestable, il proposa l'estat de son ambassade, & le bien qui pouoit venir par le moyen de paix. Et apres qu'il eust esté dedans Paris grandement honoré par les seigneurs dessusdits, il s'en retourna audit lieu de Monstreau deuers lesdits ambassadeurs: auquel lieu il demoura luy & le Cardinal d'Ursin durant ladicte ambassade, & y alloient chacun iour avec lesdits ambassadeurs au monstier de la Tumble, où les parties conuenoient ensemble: & tant y continuerent qu'ils furent d'accord, & fut la paix faicte & iurée par lesdits am-



bassadeurs presens les deux Cardinaulx dessusdits, par condition que chacune des parties reporteroient par escript deuers leurs souuerains le traicté tel, comment ils l'auoient fait: & fil ne leur estoit agreable, chacune des parties demoureroit en tel estat comme deuant sans auoir paix ne trefues: & ainsi s'en retournerent les vns à Paris deuers le Roy & le Connestable, & les autres à Troyes deuers la Royne & le conseil du Duc de Bourgongne. Lequel traicté dessusdit monstre à elle & à son conseil, l'eut tresbien pour agreable: & tantost fut enuoyé en Bourgongne deuers ledit Duc pour le visiter, & sçauoir fil en estoit content: sur lequel en la presence de son conseil fait responce, qu'il le tenoit pour bon sans y riens excepter: & que volentiers il iureroit, & feroit iurer ceux de sa partie de l'entretenir: & pareillement les ambassadeurs du Roy & du Connestable retournez à Paris, monstrerent la coppie du traicté qu'ils auoient fait au Roy, au Daulphin & à aucuns notables de leur conseil & de ceux de la ville, lesquels apres qu'ils l'eurent veu & ouï, furent assez tost contens que le Roy le sceellast. Mais quand il fut monstre au Comte d'Armignac Connestable, au Chancelier, au Preuost de Paris, & à Remonnet de la guerre, ils l'eurent du tout pour desaggreable: & dirent tout plainement que ja ne seroient en lieu où le Roy l'accordast tel qu'il estoit: & mesmes dit le Chancelier que le Roy le sceellast s'il luy plaisoit, & que ja il ne le sceelleroit. Pour lesquelles responce l'Euesque de Paris, plusieurs notables bourgeois de la ville & autres du conseil du Roy & du Daulphin, ayans grand desir d'auoir paix, furent pour lesdictes responce moult esmerueillez: & pourtant conseillerent au Daulphin qu'il tenist au Louure vn conseil pour ladicte paix, lequel il tint: mais oncques ledit Connestable n'y voulut aller, & dit que ceux qui conseilloyent telle paix estoient trahistres: finalement par le moyen des contradictions dessusdictes, tout fut rompu, & demourerent les parties dessusdictes en tel estat comme deuant sans auoir trefues ne paix ensemble: pourquoy plusieurs Parisiens & autres du conseil du Roy conceurent grand haine contre iceluy Connestable. Neantmoins il enuoya ses gens deuant les forteresses de Montlehery, & de Marcouffy que tenoient les gens du Duc de Bourgongne, qui furent contraincts de les rendre & deliurer en la main dudit Connestable. Lequel y meit garnison de ses gens ou nom du Roy.

*Comment Henry Roy d'Angleterre conquist plusieurs villes en Normandie ceste saison.  
Et la prinse du Comte de Harcourt à d'Aumarle par son cousin messire Iaques de Harcourt.*

CHAP. CLXXXVIII.

**E**N ce mesmes temps Henry Roy d'Angleterre (comme dit est ailleurs) estoit à grand puissance ou païs de Normandie, & conqueroit villes & forteresses: car peu ou neant trouuoit qui feist resistance contre luy pour la diuision des François, & se meirent en ceste saison en son obeïssance les villes d'Eureux, Fallaise, Bayeux, Lisieux, Constances, Auranthes, S. Loth & plusieurs autres villes: pour la doute duquel Roy, le Côte de Harcourt s'estoit lors retraict à tout son estat dedans son chastel d'Aumarle. Auquel lieu vn certain iour vint deuers luy pour le veoir & luy faire reuerence (comme il monstroït semblant) son cousin messire Iaques de Harcourt, lequel auoit avec luy bien soixante combatans, & de fait à pensée vint descendre à la porte dudit chastel:



chastel : à laquelle quand on le recogneut luy fut ouuerte & fait par les officiers dudit Comte grand honneur. Et adonc à tout vne partie de ses gens entra dedans, & alla deuers ledit Comte : lequel luy feit tresioyuse chere, disant beau cousin vous soyez le bien venu: or auoit ledit messire Iaques ordonné aucuns de ses gens à venir dedans le chastel, apres ce qu'ils auroient logé leurs cheualx dedans la ville: lesquels venus dedans assez brief, ledit messire Iaques ( apres ce qu'il eust auec ledit Comte plusieurs deuises des guerres de France ) lors voyant son point, print ledit Comte de Harcourt par la main en luy disant : monseigneur ie vous fais prisonnier du Roy: & adonc ledit Comte moult esbahy, luy dist: beau cousin que dictes vous, ie suis au Roy comme vous sçauiez, & n'ay riens fait en son preiudice ne contre sa maiesté: toutesfois nonobstant excusations, lignage ou autre chose il fut detenu prisonnier, & mis par ledit messire Iaques en bonne & seure garde: & le lendemain apres que ledit messire Iaques eust prins tous les biens portatifs de ladicte forteresse, & qu'il eut commis gens de par luy pour la garder, il se partit & emmena ledit Comte de Harcourt prisonnier au chastel du Crottoy: duquel Comte il eut entre les autres choses vn moult bon cheual fauuain à courte queüe qui depuis fut renommé d'estre bon & excellent pour la guerre: & depuis ce iour en auant demoura ledit Comte prisonnier toute la vie durant dudit messire Iaques, mais il fut par plusieurs fois transporté de chastel en autre: & estoit commune renommée qu'il estoit ainsi detenu prisonnier par le consentement de Jean de Harcourt son fils le Cointe d'Aumale.

*Comment la ville de Paris fut prinse par les gens du Duc de Bourgongne, & se tournerent les Parisiens de cest costé: & ce qu'il en aduint à ceste cause.*

CHAP. CLXXXIX.

**V**Ous auez bien ouï cy dessus recorder, comment les Parisiens n'estoient pas bien contens du Comte d'Armignac Connestable de France ne des autres gouuerneurs du Roy: pource principalement qu'ils n'auoient pas voulu entretenir le traicté dernièrement fait avec le Duc de Bourgongne comme cy dessus est plus à plain declairé. Lequel Duc & sa puissance moult doutoient iceux Parisiens, & veoient bien que s'il n'estoit reconcilié avec le Roy & le Daulphin, ils demoureroient longuement en la tribulation où ils estoient: & aussi en y auoit grād partie qui fort l'aymoient, & desiroiēt qu'il eust le gouuernement, mais bonnemēt n'y sçauoient cōment pourueoir. Car moult estoient de pres gardez, & ne s'osoient ou pouoient mettre ensemble pour auoir cōmunication l'un avec l'autre, par ce que les gouuerneurs dessusdits estoient tousiours fors fourniz de gens d'armes, prests pour les punir tantost qu'ils les veroient faire aucune apparence de rebellion. Neantmoins y eust aucuns ieunes cōpagnons de moyen estat & de legeres voulētez, qui autresfois auoient esté puniz pour leurs demerites. Lesquels s'aduāturerēt d'aller parler secretemēt au seigneur de l'Isle-Adam, qui se tenoit à Ponthoise en garnison: desquels cōpagnons estoient les principaux vn nommé Perrinēt le Clerc fils de Jean le Clerc, Ferron, Jean Thiebert fils de Michel Thiebert Boucher, Perrin Bourdechon & aucuns autres iusques à six ou à sept. Et tant traicterent avec luy, qu'il leur promeist d'assembler gens de guerre au plus grād nōbre que faire le pourroit, & les mener le xxix. iour



de May ensuiuant deuant la porte S. Germain des prez, pour entrer dedans Paris. Laquelle porte ils luy promirent de liurer & ouurir, & sur ce se partirēt. Et ledit seigneur de l'Isle-Adam le plus secrettement qu'il peut, assembla iusques à huit cens cōbatans ou enuiron: entre lesquels estoient le veau de Bar Baillif d'Auxois, le seigneur de Chastellus, le seigneur de Cheureufes, Ferry de Mailly, Loys de Varigines, Lionnet de Bournouuille, Dauiod de Gouy iusques au nōbre dessusdit: lesquels il cōduist au iour & lieu dessusdit où ils trouuerēt ledit Perrinet le Clerc, lequel auoit emblé à son pere dessous son cheuet les clefs de ladicte porte S. Germain qu'il gardoit, & avec luy estoient les cōpagnons dessusdits. Si fut icelle porte ouuerte ainsi que promis l'auoient: & adonc issirent les aucuns dehors & parlerēt à iceluy seigneur de l'Isle-Adam, & aux autres, disant qu'ils entraissent seurement dedans, & qu'ils le conduiroient par toute la ville: lesquels seigneurs avec leurs gens tous armez (comme s'ils eussent entrer en bataille) sur le rapport des dessusdits, se bouterēt dedans tout à cheual moult doutablement, & pouoit estre enuiron deux heures apres minuiēt. Et lors iceluy Perrinet le clerc apres qu'ils furent ens, referma la porte à la clef, & apres voyans eux tous les iecta par dessus la muraille. Et puis cōmencerent à cheminer tout coyement à cheual iusques assez pres de chastelet: auquel lieu ils trouuerent enuiron cccc. cōbatans desdits Parisiens tous prests pour aller avec eux, & adonc conclurent d'un commun accord d'aller assaillir plusieurs hostels des gouuerneurs du Royaume: & ordonnerent deux parties, qui allerent par diuerses rues criant à haulte voix. Disant outre que ceux qui vouloient la paix allassent en armes avec eux, auquel cry furent tantost grand multitude de peuple: à tout lesquels s'en allerent, comme dit est, enuahir & assaillir plusieurs hostels par ordonnance, dont l'une des parties allerent à l'hostel du Roy à S. Pol où ils rompirent les portes & les huys: & feirent tant qu'ils parlerent au Roy, lequel fut content d'eux accorder tout ce qu'ils demādoient. Et tantost le feirent monter à cheual & le frere du Roy de Chipre avec luy, & cheuaucher avec eux parmy la ville de Paris: & les autres allerent à l'hostel du Conestable pour le prendre, mais il estoit ja aduerty & festoit sauué en habit descōgneu en la maison d'un pource homme assez pres de son hostel, aucuns autres à l'hostel du Chancelier & de Remonnet de la Guerre, lesquels furēt prins. Et adonc Tanneguy du Chastel Preuost de Paris oyant cest effroy, incontīnēt s'enfuit à l'hostel du Dauphin: lequel enuelpé d'un linceul tant seullement, il porta dedans la bastille S. Anthoine: avec lequel se retrahirent tantost plusieurs de leurs gens, qui ouyrent la criée parmy la ville de Paris. En outre toute celle nuit le premier & second iour, les seigneurs dessusdits avec leurs gens & infiny peuple de Paris avec eux fusterēt plusieurs maisons des gouuerneurs dessusdits, & de leurs fauorisans: lesquels ils deuestirent de tous biens & prindrent prisonniers sans nombre, & les menerēt au Palais, au Louure, en Chastelet & plusieurs autres lieux. Entre lesquels furent prins les Euesques de Senlis, de Bayeux, de Constances, messire Hector de Chartres, messire Enguerran de Marcoingnet & autres sans nōbre: le sire de l'Isle-Adam alla en ceste nuit à l'hostel de Bourbon où il trouua Charles de Bourbon aagé de xv. ans ou enuiron, auquel apres qu'il l'eust esueillé, luy demāda quel party il vouloit tenir: & il respondit, tel party que monseigneur le Roy. Et adonc ledit de l'Isle-Adam le feit leuer & puis le mena deuers le Roy, avec lequel il se tint: & ceste



& ceste tribulation durant, grand partie des gens d'armes dudit Conestable & de messire Tanneguy, comme dit est, se sauuerent en la bastille S. Anthoine & avec eux Jean Louuet president de Prouence, maistre Robert Masson & moult d'autres gens de grand estat. Pareillement furent prins les Cardinaux de Bar & de S. Marc, l'Archeuesque de Reims & tous leurs cheuaux: mais par la priere de l'Euesque de Paris, & pource qu'ils auoient conseillé la paix, ils furent mis au deliure. Et si leur fut rendu toutes leurs bagues: le lundy enuiron huiet heures fut de par le Roy au son de la trompette Tanneguy du Chastel demis de la Preuosté de Paris. Et en son lieu y fut constitué le Veau de Bar Baillif d'Auxois. Et à brief comprendre, tous les cōseilliers du Roy de la chambre de Parlement, des requestes & autres bourgeois de Paris de nom, tenans la partie du Côte d'Armignac furent pillez, prins ou occis cruellement. Et avec ce fut crié de par le Roy de quarrefourg en quarrefourg au son de la trompette sur confiscation de corps & de biens, que tout hōme & femme qui sçauoit aucuns tenans la partie du Comte d'Armignac mucez ou repeuz en aucun lieu, le nōceast au dessūdit Preuost de Paris ou aucū des capitaines: pourquoy assez tost apres, le pource homme en laquelle maison estoit le Comte d'Armignac, l'alla noncer audit Preuost: lequel sans delay y alla, & le trouua ainsi cōme il luy auoit dit: & le fait monter sur son propre cheual derriere luy, & le mena au Palais avecques les autres qui estoient prisonniers. En apres les choses dessusdictes messire Tanneguy du Chastel le plus hastiuement qu'il peust, enuoya par le pont de Charenton à Corbueil, à Melun & delà à Montargis Charles Duc de Touraine Daulphin: & tātost manda par tout son party gēs d'armes, qui venissent deuers luy à la bastille S. Anthoine à Paris. Et en cas pareil, le sire de l'Isle-Adā & les autres grans seigneurs manderent par tout le party du Duc de Bourgōgne iusques en Picardie gēs d'armes à venir sans delay à Paris, lesquels dedans briefs iours ensuiuant y vindrent en grand multitude. Or est ainsi que le mercredy ensuiuant ladicte prinse de Paris du matin, le mareschal de Rieux, le sire de Barbasan & Tanneguy du Chastel à tout seize cens combattans gens d'esslite, entrerent dedans Paris par la porte S. Anthoine, en intention de subiuguer & reconquerre ladicte ville de Paris: & l'vne des parties alla à l'hostel du Roy à S. Pol par derriere, le cuidant trouuer pour le prendre & l'emmener avecques eux. Mais le iour de deuāt on l'auoit mené & tout son estat demourer dedans le chastel du Louure: & les autres à estandart desployé cheuaucherent tresfort tous ensemble iusques deuant l'hostel à Lours criant hautement, viue le Roy & le Daulphin & le Conestable Côte d'Armignac: auquel cry soudainemēt s'assemblerēt les Parisiens en grād nōbre armez avec le nouuel Preuost de Paris, le sire de l'Isle-Adā & tous les autres gēs d'armes estans dedās Paris, & vindrent vigoureušemēt & de toutes pars cōbatre les dessusdits, auquel lieu y eut tresapre bataille: mais en la fin par la grād multitude desdits Parisiens qui venoient de toutes pars, il fallut que ledit Mareschal de Rieux & ses gens se retrahissent vers ladicte bastille non pas sans perte: car il en demoura de morts en la place de iij. à cccc. des ses meilleurs gens: & desdits Parisiens & de ceux de leur party y en mourut enuiron xl. hommes, entre lesquels y mourut vn gentil-homme nōmé Harpin de Gouy qui estoit au sire de l'Isle-Adā: en apres Barbasan & Tāneguy du Chastel, voyans leur perte de plus en plus multiplier meirēt certain nōbre de gens dedans ladicte bastille. Et apres s'en



allèrent les vns à Meaux en Brie, les autres à Corbueil, à Melun & és autres lieux à eux obeïssans. Le iedy ensuiuant Hector & Philippe de Saueuses à tout deux cens combattans arriuerent dedans Paris, dont les autres seigneurs furent moult ioyeux & les logerent aux Tournelles & autres hostels deuant la bastille S. Anthoine où estoient encores les gens du Comte d'Armignac le vendredy, samedy, dimenche, & huiet iours ensuiuant vindrent audit lieu de Paris la plus grand partie des capitaines de Picardie à tout leurs gēs d'armes: c'est à sçauoir messire Jean de Luxembourg, le sire de Fosseux & ses freres, messire Iennet de Poix, le sire de Cohen & moult d'autres, esperans qu'audit lieu de Paris trouueroient bon gainage: mais la plus grand partie trouuerent le contraire de ce qu'ils auoient empenfé, & fallut qu'ils payassent leurs despens. En outre les dessusdits morts de la partie dudit Connestable furent par le bourrel de Paris sur vne charrette menez hors de la ville & enfouïs aux champs, & les autres dudit party desdits Parisiens furent notablement enseueliz & mis en terre saincte. . Et adonc par toute la ville de Paris on portoit communement l'enseigne du Duc de Bourgongne: c'est à sçauoir la croix saint Andrieu, laquelle par grand espace auoit esté fort reboutée dedans ladicte ville. Le samedy ensuyuant ceux de la Bastille, voyans qu'ils perdoient leur temps de la tenir, feirent traicté au sire de l'Isle Adam & autres seigneurs estans à Paris, par si qu'ils s'en iroient saufs leurs corps & leurs biens en rendant ladicte Bastille. Et sur ce leur fut baillé saufconduit, & se departirent, comme dit est. A laquelle Bastille fut commis à estre capitaine de par le Roy & du Duc de Bourgongne le seigneur de Canny, qui tousiours auoit esté leans prisonnier depuis sa reuenue de l'ambassade par luy faicte à Amiens à la personne du Duc de Bourgongne, dont en autre lieu par auant est faicte mention.

*Comment apres ladicte prinse de Paris plusieurs villes & forteresses se rendirent en l'obeïssance du Duc de Bourgongne, & autres matieres.* CHAP. CXC.



En ces iours furent enuoyez à tout vn mandement du Roy Hector & Philippe de Saueuses, le seigneur de Creuecueur & leurs gens vers Compiègne & autres villes & forteresses sur les marches: lesquels venus audit lieu de Compiengne, feirent traicté avec ceux de la ville, par condition que tous ceux tenans la partie du Comte d'Armignac, s'en iroient saufs leurs bagues: & aussi que tous les habitans de ladicte ville & autres vueillans faire serment de tenir le party du Roy & du Duc de Bourgongne, demoureroient paisibles. Et apres qu'ils eurent promeis ce à entretenir, ils furent meis dedans. Et pareillement se rendirent à eux la ville & chastel de Creil, Pont sainte Maxence, Monchy, le Pereux, le Pont à Choisy & aucunes autres places: dedans lesquelles meirent de leurs gens pour les entretenir. Et aussi se rendit en l'obeïssance du Roy & du Duc de Bourgongne la ville de Noyon par le moyen du seigneur de Genly. Et pareillement le Plaissier, messire Jean de Roye & moult d'autres villes & forteresses, comme Laon, Corbueil, Soissons & Chauny sur Oise, Gisors & aucunes autres. En laquelle ville de Creil fut meis vn gentil-homme nommé le Beghe de Groches pour la garder. Et entra en icelle ville à tout huiet hommes tant seullement. Si estoient dedans la forteresse le Comte de Ventandour, le seigneur de Chasteau-morât, & messire Charles de saint Saulieu à tout certain



certain nombre de gens d'armes : lesquels tenoient le party du Comte d'Armignac, furent par le moyen du dessusdit Beghe de Groches & de la communauté d'icelle ville contrainsts à rendre ladicte forteresse, par condition qu'ils s'en allerent saufs leurs corps & leurs biens & en demoura iceluy Beghe capitaine certaine espace de temps. En outre quand est à parler de l'estat & gouvernement de Perrinet le Clerc & ses complices, qui auoient liuré la ville de Paris (comme vous auez ouï cy dessus) commencerent à leuer & tenir tresgrand estat: & eurent par aucun peu de temps grand auctorité, mais en la fin demourerent aussi pauures & meschans que par auant ils auoient esté. En apres ceux de la ville de Peronne qui auoient tousiours tenu & encores tenoient la partie du Roy, de son fils le Daulphin & du Comte d'Armignac, quand ils ouïrent les nouuelles de la prise de Paris & la rendition de plusieurs autres villes, furent fort esmerueillez & eurent grand doubte, attendu qu'ils estoient pres des pays & puissance du Duc de Bourgogne d'estre prins d'assault, ou du moins assiegez. Si se meirent ensemble, & conclurent d'enuoyer deuers le Comte de Charrolois & son conseil, affin qu'ils peussent estre receuz à eux mettre en l'obeïssance du Roy & du Duc de Bourgogne. Et sur ce enuoyerent leurs ambassadeurs deuers ledit Charrolois, jaçoit-ce que messire Thomas de Lersies Baillif de Vermendois les exhortast fort à tenir le party du Daulphin: lesquels ambassadeurs, c'est à sçauoir maistre Oudard Cuperel, vn chanoine de saint Fourcy, & aucuns autres traicterent tant deuers les dessusdits Comte de Charrolois & son conseil, qu'icelle ville se rendit en son obeïssance: & nonobstant que les gouuerneurs & habitans d'icelle ville eussent promis de non faire traicté au preiudice dudit messire Thomas, neantmoins il fut prins & mené à Laon & là decapité. Et pareillement furent executez Jean de Beruenucourt son lieutenant & Alard de Vercuigneul.

*Comment les communes de Paris se meirent sus en grand multitude, & occirent piteusement tous les prisonniers qui auoient esté prins audit lieu de Paris.*

CHAP. CXCI.

**E**T apres toutes les communes de Paris le douziesme iour de Iuing ensuiuant, s'assemblerent toutes gens de petit estat iusques à soixante mille ou plus, enuiron quatre heures apres midy: & tous armez doubtans (comme ils disoient) que les prisonniers qui estoient detenus ne feussent meis à deliurance, nonobstant le desenhortement du nouuel Preuost de Paris & plusieurs autres seigneurs, embastonnez de viels maillets, haches, coignées, massues & moult d'autres bastons dissoluz, en faisant grand bruit, criant Viue le Roy & le Duc de Bourgogne, s'en allerent à toutes les prisons de Paris: c'est à sçauoir au Palais, à saint Magloire, à saint Martin des Champs, en chastelet, au Temple & autres lieux où estoient les prisonniers, rompirent lesdictes prisons, tuerent Chepier & Chepiere & tous ceux qu'ils y trouuerent, iusques au nombre de seize cens ou enuiron: desquels furent les principaux le Comte d'Armignac Connestable de France, maistre Henry de Marle Chancelier du Roy, les Euesques de Constances, de Bayeux, d'Eureux, de Senlis, & de Xainctes, le Comte Grand-pré, Remonnet de la Guerre, l'Abbé de saint Cornille de Compiengne, messire Hector de Chartres, messire Enguerran de Marcoingnet, Char-



lot Poupart Argentier du Roy, les seigneurs de la chambre de Parlement, des requestes, du tresor, & generally tous ceux qui estoient esdictes prisons : desquels plusieurs y estoient pour debats ou pour debte, mesmement tenant la partie de Bourgongne. Et en celle fureur furent occises plusieurs femmes par la ville, & où elles furent mises à mort furent laissées : & dura celle cruelle occision iusques au lendemain dix heures deuant midy . Et pourtant que les prisonniers du grand chastellet estoient garnis d'armures & de traict, ils se deffendirent moult fort, naurerent & occirent plusieurs d'iceux communes : mais le lendemain par feu, fumée & autre assault furent prins, & en feirent les dessusdits saillir plusieurs du couplet de la tour aual, & les autres les receuoient sur leurs picques & sur leurs bastons, & là les machecloient sur leurs picques tres inhumainement . A ceste cruelle occision estoient presens le nouuel Preuost de Paris, messire Iean de Luxembourg, messire Iacques de Harcourt, le seigneur de Fosseux, le seigneur de l'Isle Adam, le Vidame d'Amiens, le seigneur de Cheureuses, le seigneur de Chastelluz, le seigneur de Cohen, messire Emond de Lomber, le seigneur d'Auxi, & plusieurs autres iusques au nombre de mille combattas ou au dessus tous armez sur leurs cheuaux pour les deffendre se besoing estoit : toutesfois moult estoient esmerueillez de veoir faire telle derrision, mais riens n'osoient dire fors, mes enfans vous faictes bié. Et les corps du Connestable, du Chancelier & de Remonnet de la guerre furent tous desnuez, liez ensemble d'une corde par trois iours, & là les trainoient de place en place les mauuais enfans de Paris. Et auoit ledit Connestable de trauers son corps en maniere de bende ostée de sa pel environ deux doigt de large par grand derrision, & furent en cest estat tous nuds sans riens en grand derrision sur eux (comme dit est) par trois iours à la veüe de chacun, & au quatriesme iour furent trainez sur vne cloye par vn cheual dehors Paris, & enterrez en vne fosse nommée la louuiere avec les autres. Et apres combien que les seigneurs dessusdits se meissent en peine de rappaiser ledit commun de Paris, en eux remonstrant qu'ils laissassent punir les malfaiçteurs par la iustice du Roy : neantmoins ne voulurent pas cesser, ainçois alloient par grans tourbes es maisons de ceux qui auoient tenu le party du Comte d'Armignac ou de ceux qu'eux mesmes hayoient, lesquels tuoient sans mercy & emportoient le leur : & qui alors à Paris hayoit vn homme de quelque estat qu'il fut Bourgongnon ou autre, il ne failloit que dire: veez là vn Armignac, & tantost estoit meis à mort sans en faire autre information.

*Comment les nouuelles de toutes les besongnes aduenues à Paris furent portées au Duc de Bourgongne, qui y mena la Royne & la mort Iean Bertrand.*

## CHAP. CXCII.

**D**Vrant les besongnes dessusdictes furent portées les nouuelles de la prinse de Paris : & aussi de la reduction des autres villes & forteresses au Duc de Bourgongne, qui estoit en sa ville de Dijon. Lequel de ce tres-ioyeux, hastiuement à tout ce qu'il peut finer de gés alla à Troyes deuers la Royne : auquel leu de Troyes il fut moult ioyeusement receu, & tantost fait preparer l'estat de ladicte Royne pour l'amener à Paris : & manda gens de toutes pars pour l'accompagner, & aussi messire Iean de Fosseux & messire Iean



Iean de Luxembourg & plusieurs autres capitaines de Picardie à tout mille combattans ou enuiron, allerent au deuant de luy iusques à Troyes. Auquel lieu de Troyes vindrēt nouuelles audit Duc de la mort du Comte d'Armignac & d'autres prisonniers morts à Paris, dont grandement fut courroucé: car par le moyen d'iceux, & par leur deliurance auoit empenfé de r'auoir le Daulphin & toutes les places que tenoient les gens dudit Comte d'Armignac: toutesfois le second iour du mois de Iuillet se partirent la Royne & le Duc de Bourgongne de Troyes, pour aller à Paris en moult grand ordonnance: Et faisoient messire Iean de Luxembourg & les Picards l'auantgarde. Et ledit Duc à toute sa bataille conduisoit la Royne, & allerent le chemin de Nogent sur Seine, & de Prouins. Finablement le xiiij. iour dudit mois de Iuillet ils entrerent dedans Paris en moult grād quantité tous armez, estandart desployé & par belle ordonnance. Et estoient allez au deuant de la Royne & du Duc bien six cens bourgeois de Paris, vestus de cottes bleües, ayans sus la croix saint Andrieu ou lieu de la bende qu'ils auoient porté par long temps. Et baillerent audit Duc de Bourgongne & à son nepueu le ieune Comte de S. Pol deux robes de bleu veloux: lesquelles ils vestirent, & entrerent par la porte saint Anthoine. A l'entrée desquels fut menée dedans Paris moult grand ioye pour la venue d'iceux, & crioit on, Noël par tous les quatre-fours à haute voix, & des hautes fenestres en plusieurs lieux on iettoit sur le chariot de la Royne & sur les seigneurs fleurs en grand abondance: & ainsi le Duc de Bourgongne mena la Royne iusques à l'hostel de saint Pol où estoit le Roy, qui à elle & audit Duc de Bourgongne feit ioyeuse reception. Et briefs iours ensuiuant furent en icelle ville tenus plusieurs grans conseils, tant par iceluy Duc comme par autres seigneurs sur le regime & autres affaires du Royaume. Apres en la fin desquels conseils, furent constituez en la faueur dudit Duc de Bourgongne plusieurs nouveaux officiers de par le Roy. C'est à sçauoir les seigneurs de l'Isle Adam & de Chastellus furent faits tous deux Mareschaux de France, messire Robinet de Mailly fut fait grand Panetier, & messire Charles de Lens fut commis Admiral de France, jaçoit-ce que par auant en eut eu le don du Roy messire Iennet de Poix, & se nomma Admiral certaine espace, maistre Eustace de Laëtre fut fait Chancelier de France, & maistre Philippe de Moruiller premier President en Parlement, & le Duc de Bourgongne fut capitaine de Paris, & y combeit son lieutenant messire Charles de Lens, & aussi (comme dit est) lors eut audit lieu de Paris plusieurs besongnes remuées tant des offices de France comme d'autres choses: desquelles le Roy estoit content & accordoit toutes requestes à luy faictes par ceux de qui il estoit administré. Esquels iours par le commandement de messire Iean de Luxembourg (comme il fut commune renommée) fut mis à mort à la Chappelle entre Paris & saint Denys vn nommé Iean Bertrand capitaine dudit S. Denys, lequel auoit esté vn des meneurs de cōpaignies avec messire Gastellin Vas, Iean de Guigny & Iean de Clau & estoit bouchier. Pour la mort duquel les Parisiens furent tresmal contens: & pour punir & trouuer ceux qui l'auoient mis à mort, faillirent hors de leur ville en grand nombre: mais ils ne furent pas trouuez, car hastiuement festoient meis à sauueté. Si en feirent grand plaincte au Duc de Bourgongne, lequel demanda au desusdit de Luxembourg s'il auoit fait faire ceste euure, & il respōdit que non: tou-



tesfois il demoura mort, & comme il fut informé, les principaux faâteurs de ceſte beſongne, furent Lyonnet de Vandoſme, le Baſtard de Robaiz & autres leurs complices iuſques au nombre de douze compaignons mauuais garçons.

*Comment le Concile de Conſtances fut tranſmué par le Pape Martin : la prinſe du Pont-de-l'Arche par le Roy d'Angleterre & autres matieres.*

## CHAP. CXCIII.

**E**N ce temps par l'approbation du ſainct Concile de Conſtances, Pape Martin ordonna ledit Concile general à eſtre conuocqué au cinquieſme an enſuiuant l'an mille cccc. & xxiiij. ou mois d'Auril en cité & lieu habille : auquel lieu ſera declairé par luy ou par ſon ſucceſſeur vn an deuant : & ainſi le Pape ſe partit hors de Conſtances, lequel fut emmené hors de la maiſon de l'Eueſque l'onzième iour de Iuing par Sagismond Roy d'Allemaigne & de Hongrie, eſtant à pied, & tenant le frain de ſa mulle : & ainſi le conduit hors de la ville aux champs, & là ſeit le Pape monter à cheual : & puis alla tenir ſa court à Geneue, où il fut enuiron trois mois : & en ces propres iours Henry Roy d'Angleterre vint à Louuiers en Normandie, qui ſ'eſtoit miſe en ſon obeïſſance : & de là alla loger à l'abbaye de Bompport de l'ordre de Cithiaux aſſez pres du Pont-de-l'Arche : de laquelle ville & chaſtel dudit Pont eſtoit capitaine de par le Roy de France meſſire Iean de Grauille, auquel fut enuoyé de par le Roy Henry le ſeigneur de Cornoüaille, pour luy ſignifier qu'il rendit ladiète ville en l'obeïſſance du deſſuſdit Roy Anglois : auquel Cornoüaille il fut reſpondu, que ce il ne feroit pas : & adonc ledit Cornoüaille luy dit : Grauille, ie vous afferme ſur ma foy, que demain maugré vous & voz aydās paſſeray l'eaüe de Seine : & ſe ie la paſſe, vous me donrez le meilleur courſier que vous ayez : & ſe ie ne la paſſe, ie vous donray mon chappel d'acier, lequel ie vous feray valloir cinq cens nobles : apres leſquelles parolles promiſes, ſe partirent aſſez contens l'un de l'autre. Et lors meſſire Iean de Grauille mādā gens haſtiuemēt de toutes parts pour garder leſdits paſſages : avec lequel ſ'aſſemblerent meſſire Iacques de Harcourt, qui pour ce temps ſe tenoit à Eſtampigny, & moult d'autres ſeigneurs & gentils-hōmes iuſques au nombre de huit cens combattans, & bien douze mille hommes du commun du païs : toutesfois le lendemain comme ledit Cornoüaille auoit promeis, vint pour paſſer Seine à tout huit petit nauiaux : dedans leſquels il ſe meit en l'eaüe acompaigné de ſon fils aagé de quinze ans, de ſoixante combattans & vn ſeul cheual avec petis canons & autres habillemens de guerre : ſi ſeit nager en vne petite iſle qui eſtoit au meillieu de l'eaüe, de laquelle ils pouuoient plainement traire ſur les François deſſuſdits, qui gardoient le riuage. Leſquels François eſtans au nombre que dit eſt deſſus, ſans faire aucune deſſence, ſe departirent en grand deſroy allans chacun où il pouuoit le mieux ſans tenir ordonnance : & ledit meſſire Iean de Grauille ſ'en retourna au Pont-de-l'Arche, meſſire Iacques de Harcourt à Eſtampigny, & les communes ſ'en fouyrent és bois : & adonc ledit Cornoüaille & ſes gens ce voyans de l'Iſle où ils eſtoient, paſſerent outre par les baſteaux deſſuſdits, & descendirent à terre. Si ſeit incontinent ſon fils cheualier, & toſt apres paſſerent par iceux baſteaux & autres qui furent amenez enuiron mille combattans : deſquels vne partie allerent eſcarmoucher avec

Cornoüaille



Cornoüaille deuant le Pont-de-l'Arche, & les autres courturent les paÿs : lequel Cornoüaille en parlant à messire Iean de Grauille luy dit, qu'il festoit mal acquité, & aussi les autres François d'ainsi l'auoir laissé passer à si petite compaignie, attendu la grand multitude qu'ils estoient: disoit outre & affermoit, que s'il eut esté en son lieu à tout ses soixante Anglois, il eut bien gardé le passage contre les puissances des Roys de France & d'Angleterre. En apres les Anglois dessusdits r'assemblez, se logerent en l'abbaye de Mortemer, en la forest de Lyons: pour lequel passage ainsi gagné, tout le paÿs de Caulx & autres marches à l'enuiron furent en grand effroy, non pas sans cause: & le lendemain le Roy d'Angleterre fait passer l'eäue de Seine à son frere le Duc de Clarence à tout quatre mille combattans, & fait assieger les deux costez de l'eäue, la ville & le chastel du Pont-de-l'Arche: & apres fait faire vn pont par dessus Seine au costé vers Roüen, pour passer à son aise quand bon luy sembleroit, lequel fut nommé le pont S. George, & se teint ledit siege enuiron trois sepmaines: au bout duquel terme, ledit messire Iean de Grauille dessus nommé rendit au Roy d'Angleterre icelle ville & forteresse du Pont-de-l'Arche, moyennant & par condition que luy & les siens se partirent sauüement avec tous leurs biens, & par ainsi le Roy d'Angleterre eut l'auctorité de passer la riuere du tout à son plaisir: & y meit tresgrand garnison de ses gens, pour la doubte desquels la plus grand partie des laboureurs du paÿs se rendirent fugitifs avec leurs biens.

*Comment le Duc de Touraine fait guerre: la prinse de la ville de Compiengne par le seigneur de Bocquiaux: le mariage du Duc de Brabant & autres matieres.*

CHAP. CXCIIII.



**O**R est verité qu'en ce temps messire Taneguy du Chastel, le Vicomte de Nerbonne, Iean Louuet President de Prouence, maistre Robert Masson & aucüs autres gouuerneurs du Duc de Touraine Daulphin de Viennois, qui festoient partis de Paris comme vous auez ouÿ, le commencerent de plus en plus à induire de faire guerre contre le Duc de Bourgogne & ses fauorisans: jaçoit-ce que par plusieurs fois le Daulphin eut esté sommé & requis de par le Roy son pere, la Royne & le Duc de Bourgogne de retourner avec eux, en luy offrant à luy faire tout honneur & obeïssance: neantmoins n'y voulut aucunement entendre, mais commença de toutes parts à faire guerre, & se nommoit regent du Royaume de France: esquels iours vindrét iusques à huit hommes tenant son party armez couuertement à la porte de Compiengne, au lez vers Pierrefons avec vn chareton menans bois dedans la ville. Et quand ils vindrent sur le pont, ils tuerent vn des cheuaux de la charrette, pourquoy on ne peut leuer le pont leuis: & tantost tuerent aucuns des gardes de la porte, & prestement à certaine enseigne qu'ils auoient ordonné, vint le seigneur de Bocquiaux à tout cinq cens combattans, qui estoit embusché en la forest: lesquels tantost sans trouuer quelque deffence, entrerent dedäs la ville, criant à haute voix, Viue le Roy, & le Daulphin. Et de premiere venue tuerent vn nommé Boutry, lequel y auoit laissé Hector de Saueuses pour gouuerner son hostel: & avec luy furent aucüs autres & aussi le seigneur de Creuecueur lors gouuerner de ladiëte ville de par ledit Hector, oyant cest effroy se retrahit dedans la tour



sainct Cornille, & avecques luy le seigneur de Chieures, Robinet Ogier & aucuns autres : mais ce riens ne leur vallut, car tantost les conuint rendre. Et apres les dessusdits Daulphinois sans delay fusterent toute la ville, prindrent & raverent tous ceux tenans la partie de Bourgongne avecques leurs biens : & mesme les habitans de la ville, qui aux dessusdits Bourgongnons auoient esté fauorisans, furent prins & leurs maisons pillées : ainsi & par ceste maniere recouura le seigneur de Bocquiaux & ses aydans la ville de Compiengne ou nom du Duc de Touraine Daulphin. Pour lequel il commença à mener tresforte guerre es païs à l'enuiron : & enuoya ledit seigneur de Creuecueur & de Chieures prisonniers dedans le chastel de Pierrefons, duquel chastel ils cuiderent eschapper par le moyen du frere dudit seigneur de Chieures, qui seruoit & auoit long temps seruy le seigneur de Bocquiaux, mais leur fait fut apperceu. Pourquoy ledit seigneur de Bocquiaux feit couper la teste au dessusdit frere du seigneur de Chieures : & depuis par certaine finance furent les deux dessusdits meis à deliure. Et adonc fut mise garnison dedans icelle ville de Compiengne, & y vint le seigneur de Gamaches : & par ainsi ceux qui tenoient la partie du Roy & du Duc de Bourgongne furent moult trauaillez par le moyen de ceux qui estoient en icelle ville de Compiengne. Durant lequel temps le Duc Iean de Brabant espousa Iacqueline de Bauiere sa cousine germaine Comtesse de Hainault, de Hollande, de Zellande & d'Ostrenans, & avecques ce estoit sa marraine : lequel mariage fut traicté par Marguerite de Bourgongne sa mere, avecques les trois estats des païs dessusdits à bonne intention, sur l'esperance que les païs dudit Duc & d'elle qui ioingnoient l'un à l'autre, eussent plus grand amitié & concordable amour ensemble : toutesfois jaçoit-ce qu'elle s'y consentit, neantmoins n'en estoit pas bient contente, car elle sçauoit iceluy Duc estre de petite & foible complexion & avecques ce de petit gouvernement, pour regir & gouverner ses païs & sa personne, qui estoit belle & bien formée de noble & haut entendement en plusieurs manieres. Apres lequel mariage paraccomply la guerre qui estoit entre ladicte Iacqueline & son oncle Iean de Bauiere, fut appaisée par certains moyens qui se meit entre eux. Et depuis le dessusdit Duc de Brabant & sa femme la Duchesse estans à Mons en Hainault, vn certain iour ainsi que le Duc estoit allé chasser & esbattre dehors la ville, vindrent en l'hostel de Nactre où residoit messire Eurard Bastard de Hainault frere à la Duchesse, & aucuns autres de fait à pensé, & tuerent le principal gouverneur dudit Duc nommé Guillaume le Beghe, lequel estoit couché tout malade sur vn lict. Et estoit present messire Guillaume de Sars lors Baillif de Hainault : auquel iceux deffendirent de fait, qu'il ne se bougeast & apres sans auoir aucun empeschement, se partirent de ladicte ville de Mons : pour la mort duquel iceluy quand il vint à sa cognoissance fut moult troublé : car sil l'aymoit par dessus tous ses autres seruiteurs : mais en la fin par la Duchesse sa femme fut aucunement rappaisé. Laquelle ( comme il fut commune renommée ) fut assez consentant du cas dessusdit.

*Comment*



*Comment plusieurs capitaines furent enuoyez de par le Roy & le Duc de Bourgogne en la ville de Roüen, & du regne qu'eut vn brigand nommé Tabary.*

## CHAP. CXC.V.

**E**N ce temps furent enuoyez de par le Roy de France & le Duc de Bourgogne plusieurs capitaines en la cité de Roüen, pour ayder les habitans d'icelle à deffendre leur ville contre le Roy d'Angleterre & sa puissance, duquel chacun iour ils attendoient d'estre assiegez. C'est à sçauoir le seigneur de Bappames, messire Jean de Neuf-Chastel seigneur de Montagu, messire Anthoine de Thoulongon, messire Andrieu de Roches, Henry de Chauffouour, le Bastard de Thian, le grand Iacques natif de Lombardie, Guerard Bastard de Brimeu & plusieurs autres preud'hômes & renommez en armes. Auecques lesquels y estoient par auant, messire Guy le Bouteillier natif du paÿs, capitaine general de tous ceux de la ville & Langnen Bastard d'Arly: lesquels capitaines dessusdits tous ensemble pouoient auoir quatre mille combattans ou au dessus, tous gens d'élite. Et si estoient les citoyens bien quinze mille hommes bien armez & habillez selon leur estat, prests & desirans d'eux deffendre contre tous ceux qui mal leur voudroient faire: lesquels auecques les gens d'armes dessusdits, d'un commun accord commencerent tresfort à preparer les portes, boulleuers, murailles, tours & fossez de ladicte ville tant dedans comme dehors, sur intention de resister contre leurs aduersaires. Et auecques ce feirent plusieurs ordonnances, en baillant à chacun desdits capitaines leur garde pour icelle fortifier. Et pareillement en feirent ausdits citoyens par connestablies, & si fut crié au son de trompette en plusieurs lieux par icelle ville, que toutes personnes de quelque estat qu'ils feussent, qui auoient voulu d'y demourer, feussent pourueuz de viures pour dix mois. Et ceux qui n'auoient puissance de ce faire, se partissent & allassent où bon leur sembleroit: apres laquelle crie se departirent tresgrand nombre de pauures gens, & aussi plusieurs dames, damoyelles, bourgeoisies, auecques aucunes gens d'Eglise, & autres hommes anciens & non aydables. Et adoncques ceux de ladicte garnison alloient tressouuent courre sur les Anglois, qui estoient assez pres d'eux: & aduenoit aucunesfois qu'ils en tuoient & prenoient prisonniers plusieurs, & par le contraire perdoient aussi de leurs gens. Ouquel temps regnoit sur les marches de Ponthoise, l'Isle Adam, Gisors & aussi sur les marches de Normandie vn capitaine de brigans nommé Tabary, qui tenoit la partie de Bourgogne, & estoit de petite estature boiteux: lequel souuent assembloit quarante ou cinquante paÿsans, vne fois plus, l'autre moins, armez & habillez de vieux haubergeons, iaques, vieilles haches, demies lances où il y auoit massues au bout, & autres habillemens de pauure estat: à tout lesquels sen alloient les vns sur meschans cheuaux & iumens & les autres à pied embuscher és bois, vers où se tenoient les Anglois. Et quand ils en pouoient aucuns prendre, ledit Tabary leur couppoit les gorges, & pareillement faisoit à ceux tenans la partie du Daulphin. Et ainsi en feit à plusieurs, dont grandement estoit hay des dessusdictes parties.



*Comment Henry Roy d'Angleterre avec plusieurs Yrlandois assiegea la ville de Roüen, où se firent maintes escarmouches.* CHAP. CXCVI.



Tem en ces propres iours Henry Roy d'Angleterre avec toute sa puissance & gens de guerre, & grande multitude d'engins & artilleries assiegea la trespuissante & noble ville de Roüen au mois de Iuing, deuant qu'iceux assiegez peussent estre pourueuz de nouveaux grains. Et veint son auantgarde à minuiet deuant ladicte ville, affin que ceux de dedans ne feissent enuahie sur eux, & se logea ledit Roy à la maison des Chartreux, & le Duc de Clocestre fut logé à la porte saint Hilaire, & le Duc de Clarence à la porte de Caulx, à la porte de Martinuille le Comte de Vvaruich, à la porte de Beauuais le Duc d'Exestre & le Comte d'Vrset. Et deuant la porte du chastel le Comte Mareschal, & le seigneur de Cornoüaille. Et à la porte du Pont du costé de là vers Normandie, furent meis le Comte de Hautidon, de Salbery, de Quin & le seigneur de Neufuille fils du Comte Mosambellan, & deuant sainte Katherine sur le mont furent meis aucuns autres barons d'Angleterre. Toutesfois deuant que lesdits assiegeans peussent estre fortifiez en leurs logis, furēt par plusieursfois enuahis desdits assiegez, & y eut de grosses escarmouches tant d'un costé comme d'autre. Mais lesdits Anglois au plus tost qu'ils peurent, firent grans fossez entre la ville & leurs loges: sur lesquels fossez firent fortes hayes d'espinnes: pourquoy desdits assiegez ne pouoient estre surprins ne trauaillez, sinon par canons ou traiet. Et apres firent en l'eaüe de Seine à un costé & à l'autre au iect d'un canon ou enuiron pres de la ville tendre chaines de fer: c'est à sçauoir l'une estoit pied & demy dedans l'eaüe, la seconde en l'egalité de l'eaüe, & la tierce estoit deux pieds dessus: & ce firent affin que par basteaux ne peussent auoir lesdits assiegez secours, aussi qu'ils ne peussent vuyder par les cours de l'eaüe: & avec ce feirēt lesdits Anglois en plusieurs & diuers lieux moult de fossez parsons en terre, pour aller de logis en autres sans pouuoir estre attains de traiet, canons & autres habillemens de guerre desdits assiegez. Ceux qui estoient dedans sainte Katherine, au bout du mois redirent le fort audit Roy d'Angleterre par faute de viures, & s'en allerent tant seullement sauues leurs vies sans emporter nuls de leurs biens. Et auoit avecques luy ledit Roy Anglois en sa compagnie grand quantité d'Yrlandois: dont la plus grand partie alloient de pied un de leurs pieds chaussé, & l'autre nud sans auoir brayes & pauurement habillez, ayans chacun une targette & petits iauelots, avec gros cousteaux d'estrange façon: & ceux qui alloient sur cheuaux, n'auoient nulles selles: & cheuauchioient treshabillement sur bons petits cheuaux de montaigne: & estoient sur peneaux, assez de pareille façon que portent les Blatiers du païs de France: toutesfois ils estoient de pauvre & petite deffence au regard des Anglois: & avecques ce n'auoient point habillemens, dont ils peussent grandement greuer les François quand d'iceux estoient rencontrez. Lesquels Yrlandois souuent durant ledit siege avecques les Anglois couroient le païs de Normandie, & faisoient maulx infiniz & inestimables, ramenant à leur ost grans proyes: & mesmement lesdits Yrlandois de pied prenoient petits enfans en bers, liets & autres bagues, à tout lesquels montoient sur vaches portans lesdits petits enfans & bagues deuant eux sur lesdictes



dictes vaches, & furent par plusieurs fois trouuez des François en tel estat : pour lesquelles courses tant desdits Anglois, Yrlandois, Bourgongnons & Daulphinois le païs de Normandie fut moult oppressé, & le pauvre peuple destruit. En outre ledit Roy d'Angleterre estant en son siege deuant Rouën, feit deuant les portes & murailles de ladicte ville iecter plusieurs grosses bombardes & d'autres engins, pour icelle confondre & abbatre. Et pareillement lesdits assiegez par toutes les voyes & manieres qu'ils pouuoient aduiser, greuoient leurs ennemis : c'est à sçauoir de bombardes, canons, engins vollans, arbalestres & autres instrumens de guerre, faisans aussi plusieurs faillies : lesquelles seroient trop longue à racompter chacune à par-luy, mais pour vray iceux assiegez se gouvernerent très vaillamment. Durant lequel siege Langnen bastard d'Arly, qui estoit l'un des capitaines de tous ceux de dedans, en qui ceux de la communauté auoient la plus grand fiance, & auoit la charge & garde de la porte de Caulx, deuant laquelle vint vn certain iour vn cheualier Anglois nommé messire Iean le Blanc, capitaine de Harfleur sous le Comte d'Urfet, qui requist audit Langnen à rompre trois lances contre luy, lequel luy accorda : & prestement apres qu'il fut armé, faillit dehors à tout enuiron trente compaignons de pied : & là deuant la barriere coururent de grand vouldenté l'un contre l'autre. Mais ainsi aduint que du premier coup, le cheualier Anglois fut trauersé parmy le corps & rué ius de son cheual, & avec ce fut trainé par force dedans la ville, où il mourut tantost : & eut iceluy Langnen quatre cés nobles pour rendre le corps, & avec ce fut generallyment de tous ceux qui estoient dedans icelle ville moult honoré & exaucé pour la vaillance, qui luy estoit aduenue.

*Comment la sentence autresfois donnée contre maistre Iean Petit fut rappelée: la prise de Laigny sur Marne, & la venue du Duc de Bretagne & autres matieres.*

CHAP. CXC VII.

**E**N ces iours fut faicte à Paris vne procession generale de toutes les Eglises de la ville : & fut la messe chantée en l'Eglise nostre Dame. Et en dementiers qu'on chantoit la messe en ladicte Eglise, fut fait vn sermon solemnel au paruis d'icelle par vn frere Mineur Docteur en Theologie : & là estoient les conseillers du Roy de France, comme le Chancelier & autres, & le Recteur & notables clerics de l'Vniuersité, plusieurs grans seigneurs preuost & autres notables bourgeois de Paris. Et si en y auoit auquel estoient les vicaires & autres officiers de l'Euesque de Paris : lesquels ayans sur ce puissance & commission generale & espirituelle dudit Euesque lors malade à S. Mor des fossez, r'appellerent ou nom dudit Euesque la sentece qu'iceluy Euesque & ses complices auoient donnée au temps passé contre l'honneur du Duc de Bourgogne : & la proposition par iceluy Duc aduoüée & faicte par feu maistre Iean Petit, ainsi que cy deuant est escrit, en reparant, quant à ce, l'honneur & loyauté du Duc comme vray champion de la couronne de France : & audit sermon le compara à l'eschallas, soubstenant la vigne, & monstrant, quant à ce, les lettres dudit Euesque & le pouuoir à eux sur ce donné, & excusant iceluy obstant ladicte maladie. Et tant dirent & feirent present le peuple illec assemblé & les seigneurs dessusdits, que le Duc de Bourgogne en fut content : & fut ladicte



reuocation faicte au meillieu dudit sermon: esquels iours vindrent nouuelles au Duc de Bourgongne estant à Paris, comme dit est: que les Daulphinois qui se tenoient à Meaulx en Brie, auoient prins la ville de Laigny sur Marne par faute de guet, ce qui estoit verité: & le propre iour qu'ils la prindrent, ils feirent moult de maulx. Mais aucuns de la garnison se sauuerent en forte tour, & tantost enuoyerent querir secours au Duc de Bourgongne. Lequel hastiuement y enuoya le seigneur de l'Isle Adam, qui par le moyen de ceux de la tour rentra assez tost dedās icelle, & meit à l'espée la plus grand partie desdits Daulphinois: & apres qu'il eut mis forte garnison leans, s'en retourna à Paris: & le lendemain partit le Duc de Bourgongne à grand puissance de gens d'armes de Paris, pour aller au pont de Charenton au deuant du Duc de Bretagne, qui venoit deuers luy pour traicter de la paix du Daulphin & du Duc: mais ils n'y peurent riens concorder, & pourtant s'en retourna ledit Duc de Bourgongne à Paris, & le Duc de Bretagne en son païs: & la cause pourquoy s'assemblerent au pont de Charenton: si fut, pour ce qu'on mourroit d'epidemie tres merueilleusement dedans ladicte ville de Paris: car cōme il fut trouué par les curez des parroisses, y mourut pour cest an outre le nombre de quatre xx. mille personnes: entre lesquels furent morts d'icelle pestillence des gens du Duc de Bourgongne, le Prince d'Orenge, le seigneur de Fosseux, messire Iennet de Poix, le seigneur d'Auxi & moult d'autres gentils-hōmes. Et brief ensuiuant reuindrent les Cardinaulx d'Vrsin & de S. Marc à S. Mor des Fossez, pour traicter la paix entre les seigneurs de France: auquel lieu furent enuoyez plusieurs notables ambassadeurs de par le Roy, la Royne & le Duc de Bourgongne: lesquels en fin feirent vn traicté avec les gens du Daulphin, qui y estoient par le moyen desdits Cardinaulx. Lequel sembloit estre bon & profitable pour toutes les parties, mais quand il fut reporté deuers ledit Daulphin & ceux de son conseil, n'en fut pas content. Et par ainsi se cōtinua la guerre par eux parties plus diuerse que par auant.

*Comment les Parisiens tuerent de rechief les prisonniers: du siege de Montlehery, & la prinse de Soissons faicte par le seigneur de Bocquiaux & les complices.*

## CHAP. CXCVIII.



Tem durant les tribulations dessusdictes, se r'assemblerent les communes gens de Paris en tresgrand nombre, comme ils auoient fait autresfois. Et soubdainement allerent à toutes les prisons de Paris: lesquelles ils rompirent, & tuerent bien trois cens prisonniers: dont les aucuns y auoient esté remis depuis la grād tuyson: entre lesquels ils furent morts, messire Iacques de Mommor, & messire Loys de Corail Chambellan du Roy, avec moult d'autres notables gentils-hommes & gens d'Eglise: en laquelle furent les dessusdits, & allerent à la basse court de la Bastille saint Anthoine, & demander qu'on leur liurast six prisonniers, qui estoient leans, ou sinō ils assauldroiēt la place. Et de fait commencerent à desmassonner la porte: pourquoy le Duc de Bourgongne qui estoit logé assez pres de ladicte bastille, trescourroucé au cueur de veoir faire à iceux telles derrisions pour pis escheuer, commanda que six prisonniers dessusdits leur fussent liurez, par si qu'aucuns de leurs capitaines promeirent de les mener és prisons de chastellet, & les laisseroient punir selon leurs demerites



demerites par la iustice du Roy: à tout lesquels (quand ils leur furent liurez pour entretenir vne partie de leur promesse) s'en allerent assez pres dudit chastellet, & là trescruellement les occirent & desnuerent: apres par grans compaignies allerent de rue en rue parmy Paris, en plusieurs maisons de ceux qui auoient tenu la partie du Comte d'Armignac, lesquels ils pilloient & occioient trescruellement & inhumainement, sans auoir pitié ne mercy d'eux, & comme autresfois auoient fait, s'ils encontroient aucun homme ou femme, qu'ils haïssent quelque partie qu'ils teinsent, tantost estoit mis à mort cruellement: desquels communes estoit vn des principaux capitaines Cappeluche Bourrel de la ville de Paris: pour lesquelles derrisions, ledit Duc de Bourgongne manda plusieurs notables bourgeois de la ville de Paris: ausquels il remonstra le grand desroy que faisoient icelles communes, dont lesdits bourgeois treshumblement s'excuserent enuers ledit Duc, disans que de ce estoient tresdolens: & que ceux qui faisoient lesdictes esmutations, estoient gens de petit estat contendant à piller les riches & notables bourgeois, requerans audit Duc de Bourgongne qu'il y voulsist pourueoir, & ils seroient à son ayde. Et lors fut dit à iceux communes & defendu de par le Roy sur peine de perdre la vie, par la bouche du Duc de Bourgongne, que dorefnauant se deportassent de plus piller & occire, & qu'ils se preparassent pour aller mettre le siege deuant Montlehery & Marcouffi, où estoient les ennemis du Roy: lesquelles communes respondirent que ce feroient ils volontiers, & qu'on leur baillast capitaine pour les conduire. Et dedans briefs iours ensuiuant pour escheuer les mutations dessusdictes, furent enuoyez bien six mille combattans desdictes communes de Paris à Montlehery: avec lesquels y alla pour les conduire, le seigneur de Cohen & autres cheualiers: c'est à sçauoir messire Gaultier de Ruppes & messire Gaultier Raillart, à tout certain nombre de gens d'armes & foison de canons, & instrumés de guerre cōpetans à mettre siege. Lesquels cheualiers les menerent & conduirent audit lieu de Montlehery: & commencerent tresfort à assaillir & combattre lesdits Daulphinois, qui estoient dedans la forteresse: mais apres le partement d'iceux, le Duc de Bourgongne feit prendre dedans Paris plusieurs de leurs complices, & des principaux esmouueurs du commun: ausquels il feit couper les testes & pendre au gibet, & les aucuns noyer en Seine: & mesmes le dessusdit cappeluche Bourrel de Paris leur capitaine, eut la teste couppée és halles. Pourquoi ceux dudit siege de Montlehery à qui ces parolles furent comptées, tantost retournerent audit lieu de Paris en intétion de r'esmouuoir le peuple: mais on leur ferma les portes au visage. Si s'en retournerent à leur siege: auquel lieu dedans briefs iours furent remandez, pource qu'entre les parties y auoit ambassadeurs, qui estoient ensemble en plus grād douceur. Et entre-temps le seigneur de Chasteau Villain vint audit lieu de Paris deuers le Duc de Bourgongne: & auoit vn fol deuāt luy, qui cheuauchoit vn peu deuant en entrant à la porte S. Anthoine, commença à crier hautement Viue Armignac: mais incontinent fut par les gardes de ladicte porte mis à mort, dont le seigneur de Chasteau Villain fut trescourroucé, mais il ne le peut auoir autre. En apres les Daulphinois: c'est à sçauoir le seigneur de Bocquiaux à tout trois cens combatā avec luy, prindrent d'emblée à vn poinct du iour la cité de Soissons sur le seigneur de Longueual, qui en estoit capitaine de par le Roy



& le Duc de Bourgongne : lequel de Longueual se sauua à grand peine tout à pied par dessus la muraille, & avec luy Robert de Saueuses & plusieurs autres : laquelle cité fut en la plus grand partie deuestue de tous biens.

*Comment la Daulphine fut r'enuoyée à son mary le Daulphin : le siege de Tours en Touraine, & du gouuernemēt qui lors se faisoit de par le Roy & le Duc de Bourgongne.*

## CHAP. CXCIX.

**E**N ce mesme temps par le consentemēt du Roy de France, de la Roynie & du Duc de Bourgongne, fut r'enuoyée honnorablement iusques en Anjou la femme du Daulphin, qui auoit esté trouuée à Paris à la prinse : & luy furent deliurées à son partement toutes ses bagues, affin que ledit Daulphin fut plus enclin de venir à paix & retourner avec le Roy son pere, mais ce riens n'y vallut : car ceux qui le gouuernoient ne l'eussent iamais souffert par ce qu'ils sçauoient que s'il y retournoit, seroient destituez de leur estats & gouuernement : & aussi vint adonc deuers luy le ieune Comte d'Armignac tresgrandement accompagné de plusieurs nobles hommes, lequel feit grād plainte de la cruelle mort de son pere Connestable de France, & des autres seigneurs qui n'aguères auoient esté mis à mort. Auquel Comte d'Armignac fut respondu par le Daulphin & son conseil, que de ceux qui les auoient occis on en feroit bonne & briefue iustice en temps & en lieu : & adonc iceluy Daulphin à tout grand puissance de gens d'armes, alla mettre le siege deuāt la ville de Tours en Touraine : de laquelle estoient capitaines, messire Guillaume de Rommenil cheualier, & Charles l'Abbé : lesquels dedans briebs iours rendirent la ville au Daulphin : & mesmement se tourna ledit Charles l'Abbé de son party, en faisant à luy serment : & les gens d'armes qui estoient avec luy non vueillans faire serment, eurent saufconduit pour aller où bon leur sembla : auquel lieu de Tours demoura ledit Daulphin & tout son estat par certaine espace de temps : & d'autre part le Duc de Bourgongne, qui auoit le Roy & la Roynie du tout en son gouuernement, se faisoient toutes besongnes es pays à eux obeïssans à son plaisir : & pourtant que par luy les aides que souloit payer le peuple auoient esté mises ius, il causa avec le conseil du Roy certains mandemens contenans qu'il failloit lesdictes aydes payer pour secourir la ville de Roüen, laquelle estoit moult trauaillée par le siege des Anglois : & de fait furent remises sus, & avec ce fut requis aux Parisiens de prester certaine somme de pecune pour le secours dessusdit : lesquels s'accorderent, & presterent cent mille francs, par condition que de chacune queüe de vin vendue en leur ville, ils auroient douze deniers, & le receuroient par leurs mains tant qu'ils seroient restituez de ladicte somme : & pareillement furent leuées grosses aydes par tous les autres pays de l'obeïssance du Roy : c'est à sçauoir en l'Euesché de Beauuais, & es bailliages d'Amiens, de Vermandois & d'ailleurs : ausquelles finances leuer & cueillir oudit bailliage d'Amiens, furent commis maistre Robert le ieune aduocat en Parlement, & vn des seigneurs de Parlement du Roy, & aucuns officiers pour contraindre les reffusans.

*Comment*



*Comment les messagiers furent enuoyez par les assiegez de Roüen deuers le Roy pour auoir secours: l'ambassade enuoyée deuers le Roy Henry, & plusieurs autres matieres.*

CHAP. CC.

**E**N ces propres iours fut enuoyé deuers le Roy & son conseil à Paris vn prestre assez aagé, de bon entendement par les assiegez de Roüen: lequel venu à Paris feit proposer par vn docteur Augustin nommé Eustace de Pauille deuant le Roy & son grand conseil l'estat & la tribulation desdits assiegez: & print iceluy proposant son theume en disant. *Domine quid faciemus.* Lequel il proposa moult sagement & auctenticquement. Et apres qu'il eut finée sadicte proposition, iceluy prestre dit au Roy. Tresexcellent Prince & seigneur, il m'est enioinct de par les habitâs de la ville de Roüen à crier contre vous, & aussi contre vous sire de Bourgongne qui auez le gouuernement du Roy & de son royaume le grand harou, lequel signifie l'oppression qu'ils ont des Anglois: & vous mandent & font sçauoir par moy, que se par faulte de vostre secours il conuient qu'ils soient subiects au Roy d'Angleterre, vous n'aurez en tout le monde pires ennemis d'eux, & fils peuent ils destruirent vous & vostre generation. Telles & semblables parolles remonstra moult bien ledit prestre au Roy & à son conseil. Et apres qu'on luy eut fait grand reception, & aussi que le Duc de Bourgongne luy eut promis d'y pourueoir au plus brief que faire le pourroit, il s'en retourna au mieux qu'il peut portant les nouuelles dessusdictes ausdits assiegez. Et brief ensuiuant le Roy de France & le Duc de Bourgongne enuoyerent leurs ambassadeurs au Pont-de-l'Arche, pour traicter au Roy d'Angleterre de la paix du Roy de France & de luy: & alla avec lesdits ambassadeurs pour moyenner le Cardinal d'Yrsin. En laquelle ambassade estoient pour le Roy de France l'Euesque de Beauuais, maistre Philippe de Moruillier premier President, maistre Regnault de Folleuille cheualier, messire Guillaume de Champdiuers, maistre Thierry le Roy & aucuns autres. A l'encontre desquels vindrent de par le Roy d'Angleterre audit lieu du Pont-de-l'Arche le Comte de Varuich, le Chancelier d'Angleterre, l'Archeuesque de Cantorbie & autres du conseil du Roy Anglois: & dura ceste ambassade enuiron xv. iours. Dedans lequel temps ledit Cardinal alla deuers le Roy d'Angleterre à son siege deuant Roüen: duquel & des autres Princes il fut treshonorablement receu. Et auoient porté lesdits ambassadeurs du Roy de France la figure de Catherine fille du Roy, laquelle fut présentée au Roy d'Angleterre, & luy pleut moult bien: toutesfois pource qu'il feit demandes extraordinaires: c'est à sçauoir qu'on luy donnast avec la fille du Roy dix cent mille escus d'or, la Duché de Normandie (dont il auoit conqueste vne partie) la Duché d'Aquitaine, la Comté de Ponthieu & autres seigneuries sans ressort tenir du Roy de France, & riens ne se peust concorder: & aussi les ambassadeurs dudit Roy Anglois feirent responce que le Roy de France n'estoit pas en estat, pourquoy on peust traicter avec eux. Car le Daulphin son fils n'estoit pas encores Roy, & au Duc de Bourgongne n'appartenoit pas de traicter des heritaiges du Roy de France. Apres lesquelles choses ouyes ledit Cardinal & lesdits ambassadeurs s'en retournerent deuers le Roy de France, la Royne & le Duc de Bourgongne, qui nouuellement de Paris estoient venus à Ponthoïse. Et leur



racomptèrent l'estat & la maniere de leurdicté ambassade, & dedans brief temps ensuiuant s'en retourna ledit Cardinal d'Ursin en Auignon deuers le Pape Martin : pource qu'il sentoit & apperceuoit assez bien, que riens ne pouoit faire ne concorder entre les trois parties dessusdictes. Et adonc ceux de la cité de Roüen qui scauoient assez bien la rompture & brisure de l'ambassade d'entre les deux Roys de France & d'Angleterre, voyans que le secours mettoit trop longuemēt à venir, prindrent ensemble conclusion de faillir dehors à puissance, & combattre vn des sieges du Roy d'Angleterre, & puis de là aller querir ledit secours. Si se trouuerent bien dix mille combatans & la ville bien gardée : & fut ordonné que chacun fut garny de viures pour deux iours. Et quand tout fut prest pour accomplir leur entreprinse & que desia en estoit failly bien deux mille sur les logis dudit Roy, où ils auoient fait grand dommage : & ainsi que les autres les deuoient suiui par la porte deuers le chastel, & commençoient à issir, il leur aduint que secrettemēt & par mauuaistié on auoit scié les estaches qui soustenoient le pont, pourquoy tantost qu'ils commencerent à monter sus, rompit & cheurent plusieurs es fosses : desquels vne partie furent morts & les autres blecez, dont ils furent esmerueillez : & tantost se retrahirent à vne autre porte, pour secourir & aider à leurs gens, si les feirent retraire & r'entrer dedans la ville, mais deuant qu'ils les peussent r'auoir perdirent de leurs gens plusieurs, & d'autre partie auoient fait grand dommage à leurs aduersaires. Apres laquelle besongne on commença fort à murmurer contre l'honneur de messire Guy le Bouteillier, & fut mescreu d'auoir fait scier le pont dessusdit. Et tantost apres ceste besongne trespassa Langnen Bastard d'Arly de maladie qui luy suruint : pour la mort duquel ceux de la communauté furent fort desconfortez, car (comme dit est ailleurs) ils se fioient plus en luy qu'en nul des autres capitaines. Ouquel temps messire Iean de Luxembourg print à mariage Iehanne de Bethune fille & heritiere du Vicomte de Meaux, laquelle parauant auoit eu espousé Robert de Bar Comte de Marle & de Soissons. Et auoit vne petite fille de l'aage de deux ans ou enuiron, heritiere des dessusdictes Comtez : lequel mariage fut traicté en partie en la faueur du Duc Iean de Bourgongne, & de son fils le Comte de Charrolois : & par ainsi le dessusdit de Luxembourg à ceste cause eut de grans seigneuries en gouuernement : & dedans vn an ensuiuant eut de la dame dessusdicté vn fils lequel fut mort ieune. Et aussi ledit Duc de Bourgongne luy rendit plusieurs seigneuries, c'est à scauoir Dunkerque, Varuescon & autres, lesquelles il tenoit en sa main comme confisquées, pource que ledit messire Robert de Bar en son viuant tenoit party contraire à luy.

*Comment on feit grand assemblée de gens d'armes pour leuer le siege de Roüen: de l'ambassade que feirent de rechef les assiegez, & la cheuauchée messire Iaques de Harcourt.*

CHAP. CCI.



Il conuient retourner à l'estat & gouuernement du Roy de France, & du Duc de Bourgongne : vray est que pour pourueoir à la deliurance de ceux de Roüen, manderent gens d'armes en plusieurs parties du Royaume où ils estoient, lesquels y vindrent en tresgrand nombre : & se faisoit iceluy mandement au nom du Roy à venir entour Beauuais : entre lesquels



quels y vindrent à grand puissance les seigneurs de Picardie & autres soubz eux, qui auoient accoustumé de porter armes: & en furent les païs où ils passerent & seiournerent, moult trauaillez. Et adonc le Roy, la Royne & le Duc de Bourgogne à tout leur estat, de Ponthoïse vindrent à Beauuais afin d'auoir viures plus abondamment: auquel lieu furent tenus plusieurs destroits conseils pour auoir aduis commēt on secourroit ceux de la ville de Roüen: mais on ne pouoit veoir maniere raisonnable que faire se peust, pour la diuision qui estoit entre le Dauphin & le Duc de Bourgogne: & avec ce que le Roy d'Angleterre estoit trop puissamment accompagné: & pourtant de plus en plus on manda gens d'armes & arbalestriers par les bonnes villes de l'obeïssance du Roy. Et entre-temps le Roy de France & le Duc de Bourgogne estans à Beauuais, vindrent deuers eux quatre gentils-hommes & quatre bourgeois de ladicte ville de Roüen enuoyez, pour signifier au Roy & à son conseil le miserable estat de ladicte ville: lesquels en la presence du Roy & du Duc de Bourgogne & de tout le conseil dirēt, comment plusieurs milliers de gens estoient ja morts de faim dedans ladicte ville. Et que des l'entrée d'Octobre estoient contrains de manger cheuaux, chiens, chats, soriz, rats & autres choses non appartenans à creature humaine: & avecques ce auoient desia bouté hors de leur ville bien douze mille pources gens, hommes, femmes & enfans, desquels la plus grand partie estoient morts dedans les fossez de la ville piteusement: & souuent failloit que les bonnes gens pitoyables tiraissent les petis enfans nouueaux nez des femmes ençaintes, qui estoient en leurs fossez en paniers & autres choses à mont, pour les faire baptiser, & apres les rendoient aux meres, & moult en mouroit sans estre chrestiennez: lesquelles choses estoient moult griefues & piteuses à ouïr racompter. Et adonc dirent: vous nostre sire le Roy, & à vous noble Duc de Bourgogne les bonnes gens de Roüen vous ont ja par plusieursfois signifié, & fait à sçauoir la grand necessité & destresse qu'ils souffrent pour vous, à quoy n'avez encores pourueu comme promis auiez: & pourtant celle derniere fois sommes enuoyez deuers vous pour vous noncer de par lesdits assiegez, que se dedans briebs iours ils ne sont secouruz, ils se rendront au Roy Anglois: & des maintenant se ce ne faictes, ils vous rendent la foy, serment, loyauté, seruice & obeïssance qu'ils ont à vous: ausquels par le Roy & le Duc de Bourgogne & le conseil fut respondu benignement, qu'encores n'estoit pas la puissance du Roy si grande que pour leuer ledit siege, dont moult leur desplaïoit: mais au plaisir de Dieu brief seroient secouruz, & ils demanderent dedans quel terme. A quoy ledit Duc feit responce que ce seroit en dedans le quatriesme iour apres Noël, & sur ce retournerent en ladicte ville de Roüen au mieux qu'ils peurent en grand peril pour le danger des assiegeans, & racompterent à leurs gens ce qu'ils auoient besongné. En outre iceux assiegez de mal en pis estoient en grand destresse, & n'est nul qui sceust racompter les grans miseres & pouretez que le menu peuple y souffrit de famine: car comme il fut sceu veritablement, il mourut durant ledit siege outre le nombre de cinquante mille personnes par ladicte famine: & mesmement les aucuns quand ils veoient porter viandes par les rues, comme tous desesperez, y couroient pour la tollir: & souuent en ce faisant, souffroient qu'on les batist & naurast trescruellement: car par l'espace de trois mois entiers ne furent vendus quelques viures dedans icelle



ville sur les marchés, ainçois les vendoit on à couuert: & ce que parauant le siege estoit vendu vn denier du Roy, on le vendoit lors vingt, trente ou quarante deniers: & encores pour nulle finance n'en pouoient recouurer le poure peuple: pourquoy (comme dit est) y eust durant ledit siege dedans icelle ville moult de tribulations, lesquels seroient trop longs à racompter: & pouoit estre quand les ambassadeurs, dont dessus est faicte mention, retournerent deuers le Roy & le Duc de Bourgogne enuiron my Decembre: durant lesquelles tempestes messire Iaques de Harcourt, & le seigneur de Moreul assemblerent deux mille combatans ou enuiron: lesquels ils menerent à deux lieues pres desdits Anglois & de leur siege, en intention de faire sur eux aucune destrouffe. Et se meirent en embusche en deux lieux à l'auantage assez pres l'un de l'autre, pour veoir leurs ennemis venir: & apres ordonnerent leurs coureurs bien six vingts hommes d'armes, lesquels allerēt ferir en vn village assez pres du siege où il y auoit aucuns Anglois, qui tantost par iceux furent morts & prins, sinon aucuns qui par bons cheuaux se sauuerent, & fuyrent à leur ost tresfort criant à l'arme, disant qu'ils auoient veu les François en grand nombre. Et adonc tout soudainement furent lesdits Anglois tous esmeuz & mis en armes. Et incontinent le Roy d'Angleterre cōmanda au seigneur de Cornoüaille qu'il montaſt à cheual à tout six cens combatans, & allaſt ſçauoir quels gens c'estoient: lequel de Cornoüaille ſans delay à tout les dessusdits ſ'en alla tres vigoureuſement menant avec luy aucuns de ceux, qui auoient apporté les nouuelles: & assez brief trouua lesdits François, lesquels voyans lesdits Anglois en trop grand nombre pour eux retournerent tantost, en tirant tresfort deuers leur embusche: ausquels ils dirent la venue des dessusdits Anglois, & ledit Cornoüaille par bonne ordonnance cheuaucha tres viſtement apres eux, & tant les approcha que tout plainement pouoient veoir les vns les autres. Et lors les François estans en embusche (comme dit est) se meirent les aucuns en ordonnance, pour aller vers leurs ennemis: & les autres à la plus grand partie tournerent le dos & se meirent à la fuitte: pourquoy les dessusdits Anglois ce voyans de grand courage, frapperent en eux: & finalement les meirent à desroy à tres petite perte de leurs gens & à la grand confusion desdits François: car ce iour furēt morts que prins bien douze vingts hommes d'armes, entre lesquels y fut prins le dessusdit seigneur de Moreul, Butor Bastard de Croÿ & moult d'autres gentils-hommes de noble estat: & ledit messire Iaques de Harcourt se sauua avec les autres par bon cheual. Pour laquelle victoire ledit Cornoüaille à tout ses prisonniers ſ'en retourna audit siege moult ioyeux.

*Comment le Roy de France eut plusieurs conseils pour leuer le siege de Roüen: la rendition d'icelle ville au Roy d'Angleterre & autres matieres.*

CHAP. CCII.

**E**N apres le Roy de France, la Royne sa femme & le Duc de Bourgogne estans à Beauuais (comme dit est dessus) & avec eux moult d'autres grans seigneurs tant d'Eglise comme ſeculiers tindrent plusieurs conseils, pour ſçauoir comment ne par quelle maniere on pourroit bailler ſecours à ceux de la cité de Roüen. Mais en la conſclusion fut aduiſé, que le Roy & le Duc de Bourgogne n'estoient pas de preſent assez puiſſans pour  
combate



combatre le Roy d'Angleterre ne leuer son siege, & pourtant on congea la plus grand partie des gens d'armes qu'on auoit allémblez, & ceux des bonnes villes excepté aucuns qui furent mis en garnison sur les frontieres, tant contre les Anglois comme aussi contre les Daulphinois. Apres lesquelles conclusions dessusdictes le Roy, la Royne & le Duc de Bourgogne accompagnez de Bourgonnons & autre grand nombre de gens d'armes de Beauuais, par Creel & Laigny sur Marne s'en allerent à Prouins. Pour laquelle departie moult de gens furent moult esmerueillez. Si furent icelles nouuelles noncées à ceux de la ville de Rouen. Et leur fut mandé secrettement par le Duc de Bourgogne, qu'ils traictassent pour leur saluation avec le Roy d'Angleterre au mieux qu'ils pourroient. Et adonc quand les nouuelles furent espendues & publiées en icelle ville, ne fault pas demander si y eust grand dueil fait: car pour vray tous les habitans d'icelle, generalmente en eurent si grand douleur & tristesse au cueur que plus ne pouoient. Et quant à la plus grand partie des gens d'armes ils estoient moult esmerueillez comment & par quelle maniere ils pourroient saillir du danger, où ils estoient. Neantmoins aucuns des capitaines & avecques eux des plus notables de la ville les reconforterent ce qu'ils peurent, & apres s'assemblerent en la maison de la ville pour auoir conseil, comme l'un avec l'autre ils feroient à conduire enuers le Roy d'Angleterre: & en la fin duquel conseil, fut conclud & aduisé (puis qu'ils auoient perdu l'esperance d'estre secouruz par le Roy de France & le Duc de Bourgogne, & avec ce qu'ils n'auoient plus quelques viures pour eux entretenir) conuenoit par necessité qu'ils traictassent avec leurs aduersaires: & lors enuoyerent vn herault deuers le Roy d'Angleterre, pour auoir vn saufcōduit pour six hommes aller deuers eux, lequel leur fut enuoyé. Si ordonnerent à faire ceste ambassade deux hommes d'Eglise, deux gentils-hommes & deux bourgeois: lesquels estoient saiges, prudens & bien emparlez, & allerent tout droit deuers la tente du Roy. Mais ils furent conduits par ses gens au logis de l'Archeuesque de Cātorbie, qui auoit la charge avec le Comte de Varuich de traicter: & apres que ils furent ensemble, y eut plusieurs matieres ouuertes à sçauoir à quelle fin ils pourroient venir: mais pour ceste fois ne peurent oncques obtenir ne auoir quelque traicté, sinon que tous les hommes d'icelle ville se meissent en la volenté du Roy d'Angleterre: & sur ce s'en retournerent sans autre chose faire iceux ambassadeurs en leur ville, & de rechef s'assemblerent grand nombre des plus notables avec plusieurs de la communauté presens, lesquels feirent leur relation qui leur sembla estre moult estrange. Et fut dit par tous ceux là estans, que mieux aymeroient à viure ou mourir tous ensemble en combatant leurs ennemis que eux mettre en la subiection & volenté d'iceluy Roy: si se departirent pour ce iour sans riens conclurre, & le lendemain reuindrent ensemble en tresgrand multitude: & apres plusieurs parlemens, furent tous d'opinion de mettre vn pan de mur sur estayes par deuers la ville: & apres eux armer & tous ensemble hommes, femmes & enfans, quand ils auroient premier bouté le feu en diuers lieux, abatroient le dessusdit pan de mur és fossez, & s'en iroient où Dieu les voudroit conduire. Si se departirent à intention de lendemain par nuict mettre à execution leur entreprinse: mais aduint que le Roy d'Angleterre fut de ce tout aduertý, & pourtant que tout son desir estoit d'auoir la dessusdicte ville entiere en son obeis-



sance, fait faintement remander lesdits ambassadeurs dont dessus est faicte mention par l'Archeuesque de Cantorbie: avec lequel & autres à ce commis fut tant traicté que les parties furent d'accord par la maniere cy apres declairée. Premièrement fut ordonné que ledit Roy d'Angleterre auroit de tous les bourgeois & habitans de ladicte ville de Roüen la somme de ccc. & lxxv. mille escus d'or du coing de France, & trois hommes à faire sa volenté: lesquels furēt denommez, c'est à sçauoir maistre Robert de Linet vicaire general de l'Archeuesque de Roüen: lequel durant ledit siege s'estoit gouuerné & conduit moult prudemment: le second fut vn bourgeois nommé Jean Iourdain, qui auoit eu le gouuernement des canonniers: le tiers fut nommé Alain Blanchart, qui estoit capitaine du menu commun & auoit esté le principal de ceux qui à l'autre fois auoient mis messire Raoul de Gaucourt Baillif de Roüen (duquel en autre lieu est faicte mention) & avec ce tous vniuersellement les habitans iureroient au dessusdit Roy & à ses successeurs à tenir foy, loyauté, seruice & toute obeissance, moyennant qu'il leur promettoit de les garder & deffendre à l'encontre de tous ceux qui force ou violence leur voudroient faire: & aussi les tiendrait en leurs priuileges, franchises & libertez, desquels ils possessoient du temps du Roy S. Loys. En outre fut ordonné que tous ceux qui se voudroient partir de ladicte ville, s'en iroient fraîche-ment vestus tant seulement d'aucuns de leurs habits, & le surplus demourroit confisqué au Roy. En apres fut aussi ordonné que tous les gens d'armes mettroient tous leurs biens generally en certains lieux declairez: & apres qu'ils auroient fait serment audit Roy d'eux point armer à l'encontre de luy vn an durant, il leur feroit bailler sauf conduit & les cōduire oultre ses destroits, vestuz chacun en ses habits accoustumez à pied le bastō au poing. Apres lesquels traictes accordez & paraccōplis, & que ledit Roy eut pleiges d'entretenir les choses dessusdictes, ceux de ladite ville en nombre competant allerent querir viures à leur plaisir à l'ost du Roy: desquels viures y auoit grande abondance, & n'y valloit la chair d'un mouton que six solz parisis. Lequel traicté fut du tout parfourny le xvj. iour de Ianuier de cest an, mille cccc. & xvij. Et le ieudy ensuyuant xix. iour dudit moys, entra ledit Roy d'Angleterre en grand triumphe & bobant dedans icelle ville de Rouen, accōpaigné des seigneurs de son sang & autres nobles en tresgrand nombre, & auoit vn page derriere luy sur vn moult beau coursier portant vne lance: à laquelle d'empres le fer auoit attaché vne queue de regnard en maniere de pennoncel, en quoy aucuns saiges notoient moult de choses. Et à son entrée qui fut enuiron deux heures apres midy, furent sonnées toutes les cloches de la ville: à l'encontre duquel allerent tous les gens d'Eglise, c'est à sçauoir les Abbez mittez & tous les autres vestuz de sacrez vestemens, portans plusieurs reliques: & en chantant menerent ledit Roy à la grand' Eglise cathedrale de nostre Dame, & là deuant le portail descendit à pied & le chef nud entra reueremment en l'Eglise, en laquelle à genoux il feist son oraison deuāt le grand autel, & apres s'en alla logger dedans le chastel, & les autres chacun où ils peurent le mieux: laquelle ville de Rouen ainsi conquise par iceluy Roy, & toute Normandie, auoit esté en l'obeissance des Roys de France depuis l'espace de deux cens & quinze ans, que le Roy Philippe le conquerant tapon de saint Loys l'auoit conquise sur le Roy Iehan d'Angleterre, comme confisquée par le iugement des pers de France, & le  
lendemain



lendemain ledit Roy d'Angleterre feist couper la teste à Allain Blanchart Capitaine du commun, & les deux autres qui estoient en sa volonté, furent depuis sauuez par force d'argent. Et apres feist issir la garnison par la porte du pont en costoyant Seine, & furent conduicts iusques au pont Saint George, par lequel on les feist repasser. Et là par les commis du Roy Anglois furent tasez & espeluchez tous, & leur fut osté or, argent, vaisselle, ioyaux, & autres bagues s'ils les auoient; & leur bailloit on tant seulement deux solz. Et mesmes aucuns gentils-hommes furent deuestus de bonnes robbes fourrées de Martres ou chargées d'orfauerie, & leur furent par iceux baillées autres de moindre pris: pourquoy aucuns d'iceux de ladicte garnison estans derriere, voyans (comme dict est) leurs compaignons estre ainsi destrouffez, ietterent plusieurs bources & trouffelez dedans Seine tout coyement: dedans lesquels auoit or, argent & autres ioyaux: & en y auoit aucuns qui parauant auoient faict ferrer leurs aguillettes de pieces d'or, pour les porter plus secrettement: & apres qu'ils furent passez le pont, saint George, s'en allerent tous ensemble iusques à Ponthoise: & là se departirent en plusieurs lieux, sinon les seigneurs qui allerent deuers le Roy de France & le Duc de Bourgogne à Prouins: & messire Guy le Bouteiller qui parauant estoit Capitaine de Rouen, se rendit Anglois, & feist serment au Roy d'Angleterre en delaissant son souuerain & naturel seigneur le Roy de France, dont moult fut blasme & reproché de plusieurs Francois, & pareillement des Anglois, avec plusieurs de ses gens: auquel messire Guy natif de Normandie luy fut rendue sa terre, & avec ce fut commis du lieutenant Duc de Glocestre: lequel par le Roy fut fait nouveau capitaine de Rouen, pour la rendition de laquelle ville fut la cremeur du Roy d'Angleterre si grande sur les marches de Normandie iusques à Ponthoise, Beauuais & Abbeuille, que la plus grand partie des bonnes villes & fortresses se rendirent à luy sans coup ferir ne batailler. C'est à sçauoir Caudebecq, Monstieruillier, Dieppe, Fescamp, Arques, Neuf-Chastel, Denicourt, Eu, Monchaulx, & à l'autre costé sur Seine & autres marches Vernon, Mantes, Gournay, Honnefleu, Pontiau-de-Mer, Chasteau Mollinaulx, le Treict, Tancarville, Abrechier, Mauleurier, Valemont, Neufuille, Bellaucombre, Fontaines, le Bourc Preaulx, Nougondouuille, Logempre, saint Germain sur Cailly, Baudemont, Bray, Villerterre, Charles Maisnil, les Boules Guillencourt, Ferifontaines, le Becq Crepin, Bacqueuille, & moult d'autres: dedans lesquelles ledit Roy d'Angleterre meit par tout garnison de ses gens: & portoient communement ceux du païs de ce iour la croix rouge, & en y eut plusieurs qui commencerent à eux armer avec les Anglois, non pas gens de grand auctorité: car peu fut sceu pour ce temps que nuls seigneurs ne autres nobles hommes se meissent ou tournassent du party desdits Anglois. Et quand aux habitans de la cité de Rouen feirent tous generallement le serment aux commis du Roy Anglois: c'est à sçauoir ceux qui voulurent demourer dedans la ville, & leur conuint bailler caution chacun en droit soy de payer, ce de quoy ils seroient assis, pour la somme de trois cens soixante & cinq mille escuz d'or, dont dessus est faicte mention. Et si furent contrains de non issir de leur ville, sans auoir chacun vne Bullette du Roy: & aussi les conuint auoir à tous autres du païs, qui estoient sous la domination du dessusdit Roy d'Angleterre: lesquelles bullettés coustoient chacune quatre sous monnoye de



France, à la cause desquelles subsides grans finances furent leuées au prouffit d'iceluy Roy, & de ses gouuerneurs.

*Comment le Chastel de Couchy fut prins par les prisonniers qui estoient dedans & le capitaine nommé Pierre de sainte Treille mort & autres besongnes.*

## CHAP. CCIII.

**E**Nuiron la Chandeleur l'an dessusdit, Pierre de sainte Treille qui estoit capitaine du chastel de Couchy de par le Duc d'Orléans prisonnier en Angleterre, fut trahy par aucuns de ses seruiteurs, c'est à sçauoir son fourrier & son mareschal : lesquels apres qu'ils eurent traicté avec aucuns des Bourgongnons qui estoient prisonniers leans en grand nombre, en meirent partie dehors, & allerent secrettement par nuict buquer à l'huis de la fenestre dudit capitaine, qui estoit couché en vne forte tour. Et adonc vint ouurir l'huis vn varlet qui couchoit en ladicte chambre, & demanda qu'ils vouloient : & ledit cousturier respondit qu'il auoit leans vne piece de la robbe de son maistre, que n'agueres il auoit taillée. Entre lesquelles parolles faillirēt dedās eux six bien embastonnez, & incontinent occirent ledit capitaine & son varlet dessusdit. Et de là allerent à vne autre tour où estoient enfermez prisonniers le seigneur de Maucourt en Santers, Lyonnet de Bournouuille & aucuns autres gentils-hommes. Lesquels apres que d'eux ils eurent certaines promesses, les meirēt dehors : & puis d'un commun accord prindrent & tuerent le guet, les portiers & autres non estās de leur partie, & cōmencerent à crier à haulte voix, Viue Bourgogne. Et adonc vn gentil-homme nommé Burtel de Humereulles & vn sien varlet, qui estoient prisonniers dedans la grosse tour, oyans le cry dessusdit, rompirent de force l'huis de la basse chambre où ils estoient enfermez, & vindrent iusques au pont de ladicte tour : durant lequel tēps la Hyre qui estoit en la ville avec foison de gens d'armes, ouyt les nouuelles de la prinse & effroy dessusdits par aucuns des gens du capitaine, qui s'estoient auallēz ius de la muraille : & aussi y auoit vne trompette faisant le guet en la haulte plommée, qui sonna tresfort à l'arme : si s'arma à toutes ses gens, & vindrent iusques au pont, pour assaillir & reconquerre ledit chastel : mais le dessusdit Burtel trouua maniere de monter amont sur la plommée, & commença bien & roidemēt à ietter pierre aual : & d'autre partie les autres se meirent fort en deffence, pourquoy la Hire & ceux qui estoient avec luy voyans qu'ils perdoient leur temps, se retrahirent dedans ladicte ville iusques à tant qu'il fut iour. Et adonc s'armerent & prindrēt toutes leurs bagues, & monterent à cheual. Et apres qu'ils eurent fait tuer piteusement soixante prisonniers qui estoient es prisons de la ville, se departirent de là & s'en allerent à Guyse : pour lequel partement ceux qui auoient prins le chastel furent tresioyeux, & cōmencerent fort à mettre les mains en œuures, & mettre les mains à visiter les biens d'iceluy, dont il y auoit tresgrand abondance. Et apres manderent messire Jean de Luxembourg à venir vers eux : lequel sans delay assembla ce qu'il peut finer de gens, & se meist à chemin pour y aller : mais entre-tēps ceux qui l'auoient, nō obstant qu'ils l'eussent mandé, prindrent ensemble conclusion de le non mettre dedans, sinon que premier leur promeist que tous les biens de dedans demourroient à leur prouffit : & sur ce enuoyerēt au deuāt de luy ledit seigneur de Maucourt, pour declairer leur intention :



intention : lequel ne luy osa bonnement descouvrir la besongne dessusdicte . Et pourtant quand ledit de Luxembourg fut venu à tout ses gens deuant ledit chastel, ne luy fut pas ouuert de plaine venue pour les causes dessusdictes, dont il fut grandement troublé : & feit presentement prendre ledit seigneur de Maucourt en luy reprochant, qu'il le vouloit trahir. Auquel fil eust eu Bourrel ou autre hōme, qu'il l'eust voulu executer, luy eust fait trencher la teste sans delay : & tost apres pour la cremeur de luy, ceux de dedans luy feirent ouuerture & s'excuserent de la tardation dessusdicte, si entra dedans & y meist garnison de par luy. Et quant aux biens il en eut la plus grand partie : & au regard de ceux qui les auoient conquis, en furent assez petitemēt enrichiz. Et apres ce mesme temps sur toutes les costieres de Normādie iusques à Ponthoife, Clermont, Beauuais, Montdidier, Bretueil, Amiens, Abbeuille & S. Vallery les Anglois gastoient tous les pays par feu & par espée : & souuent en faisant leurs courses, emmenerent proyes . Auec lesquels se bouterent en cest an grand foison de Normans portans la rouge croix, lesquels les conduisoient par tout où ils vouloient aller, & d'autre partie les Daulphinois faisoient le pareil. Et quant aux gens du Roy & du Duc de Bourgongne, ne se faignoient pas : & par ainsi ce tresnoble royaume de France estoit en diuers lieux moult trauaillé & oppressé par les trois parties dessusdictes : & n'auoient les gens d'Eglise & peuple comme nul deffendeur, ne autre recours que d'eux plaindre l'amentablement à Dieu leur createur, en tousiours attendant sa benigne grace, pitié & misericorde.

*Comment l'ambassade du Roy d'Angleterre alla deuers le Roy de France, & le Duc de Bourgongne à Prouins : & autres besongnes faictes en ce temps sur les frontieres.*

CHAP. CCIII.



Tem le Roy de France & le Duc de Bourgongne estans à Prouins alerent deuers eux en ambassade de par le Roy d'Angleterre, les Comtes de Vvaruich & de Quin : lesquels estoient conduits par aucuns des gens du Duc de Bourgongne, & en leur chemin furent assailliz assez pres de Chammes en Brie par Taneguy du Chastel & autres Daulphinois, qui au commencement prindrent & gagnerent vne partie des cheuaux & bagues desdits Anglois : mais en la conclusion les dessusdits Daulphinois furent desconfits, & en demoura en la place bien xl. hommes d'armes . Et les autres auec ledit Taneguy se retrahirent à Meaulx. Apres iceux Anglois s'en allerent à Prouins, où ils besongnerent auec le Duc de Bourgongne & conseil du Roy : & de là s'en retournerent à Roïen deuers le Roy d'Angleterre. Et lors pour donner consolation aux Parisiens, leur fut enuoyé Philippe Comte de S. Pol, nepueu du Duc de Bourgongne aagé de quinze ans ou enuiron, lequel audit lieu de Paris fut constitué lieutenant du Roy : & auec ce leur fut enuoyé le Chancellier de Frāce, c'est à sçauoir maistre Eustace de Laestre, pour en ladicte ville demourer & appoincter les besongnes illec souruenues tant en iustice cōme sur le fait de la guerre. Et lors fut fait Preuost de Paris messire Gilles de Clameffy, en destituant le veau de Bar Baillif d'Auxi : ouquel temps Hector de Saueuses feit vne grand assemblée de gens d'armes au pont de Remy, lesquels il mena courre deuāt le chastel de Monchaulx en la Côté d'Eu que tenoient les Anglois : lesquels faillirent vigoureusement contre ledit



Hector & ses gens, & y eut tresdure escarmouche : & en laquelle le capitaine de Mauleurier print prisonnier ledit Hector, & le mena grand espace : mais depuis fut rescoux par ses gens, qui tuerent environ douze desdits Anglois, & si fut prins vn gentil-homme d'armes nommé Iouancherum . Apres laquelle besongne s'en retournerent tous ensemble au pont de Remy. Et en pareil cas messire Loÿs Burnel, Guichart son frere, Gauvain & Jean de Hersellames, avec eux plusieurs gentils-hommes, qui se tenoient en la ville de Gamaches, faisoient tresforte guerre aux dessusdits Anglois : & souuent en tuoient, prenoient prisonniers & destroufoient plusieurs : & aussi faisoient moult de trauaux aux villes & paÿsans qui estoient rendues ausdits Anglois. Et de l'autre costé messire Jean de Luxembourg estoit fort embesongné sur les frontieres de la Comté de Guyse, pour resister aux entreprinſes que chacun iour faisoient la Hire, Poton de S. Treille & autres capitaines tenans la partie du Daulphin. Et aussi auoit la charge de garder vers Roÿe, Montdidier & autres forteresses contre ceux de Compiengne, pourquoy il failloit qu'il entreprint grand foison de gens d'armes sur iceux paÿs.

*Comment le Duc de Touraine faisoit forte guerre en plusieurs parties du royaume: l'entreprinſe Lyonnet de Bournouille & Dauiod de Gouy & autres matieres.*

## CHAP. CCV.

**E**N ce temps se tenoit le Duc de Touraine Daulphin en la ville de Tours: laquelle(côme dit est ailleurs)il auoit reconquise & menoient ses gens forte guerre à la ville de Chartres, & autres forteresses au paÿs tenans la partie du Duc de Bourgongne, & se rendit en son obeïſſance la ville de Bonneual & aucunes autres places audit paÿs de Chartrain. Durant laquelle tribulation Lyonnet de Bournouille beau frere du seigneur de l'Isle-Adam mareschal de France & Dauiod de Gouy, qui estoient tresexpers en armes, se tenoient à Gisors sur la frontiere des Anglois: ausquels par plusieurs fois feirēt de grans dommages, & par especial en la ville de Feriffontaine: vn certain iour estoient logez bien huit cens Yrlandois & deux cens Anglois ou environ, sur lesquels les dessusdits de Bournouille & de Gouy accompagnez tant seullement de trois cens combatans ou environ, allerent ferir par nuit dedans ledit logis, où ils les trouuerent en la plus grand partie dormās tous desarmez en plusieurs maisons, sans estre sur leur garde : & là tresuigoureusement les commencerent à tuer en plusieurs parties . Et les aucuns d'iceux oyans le cry se bouterent en aucunes loges & maisons, eux deffendans au mieux qu'ils pouoient, mais tantost les dessusdits bouterent les feux esdictes maisons . Et finalement tant d'ars comme de morts y en demoura sur la place bien quatre cens, & si en prindrēt environ cent : & les autres se sauuerent par les bois au mieux qu'ils peurent. A tout lesquels prisonniers & foison bagaige s'en retournerent audit lieu de Gisors tresioyeux de leur victoire. Apres environ la Pasque Fleurie, le Roy de France, la Roÿne & le Duc de Bourgongne avec tout leur estat, s'en allerent demourer en la ville de Troyes en Champaigne: auquel lieu par les habitās de la ville furent receuz treshonorablement, & y solemniserent la feste de Pasques . Et avec eux plusieurs seigneurs.



*Pour l'an mille cccc. & xix.**Comment messire Iean de Luxembourg à tout six cens combatans ou enuiron, alla en la Comté de Brienne deuers son frere : & la destrouffe Hector de Saueuses.*

## CHAP. CCVI.

**A**V commencement de cest an messire Iean de Luxembourg accompagné de Hector de Saueuses, & de six cens combatans ou enuiron, alla par Vermadois, Laonnois & Reims iusques à Brienne où estoit le Comte de Conuersen son frere, & eux deux ensemble feirēt grand guerre aux Daulphinois, qui parauant auoient degasté ledit Comté de Brienne, & ardirent les faulsbourgs de Vitry : & aussi coururent & degasterent grand partie du Barrois & de la Côté de Grand-pré. Apres lesquelles besongnes se departit ledit de Luxembourg, laissant vne partie de ses gēs avec son estandard au gouuernemēt dudit Hector, lequel dedans xv. iours ou enuiron ensuiuāt, se partit dudit païs par le congé dudit Comte de Conuersen à tout ccc. cōbatans, & ledit estandard, pour retourner en Arthois : mais en passant par la Champagne, fut enuahy des Daulphinois qui se tenoient à Montagu. Et nonobstāt qu'iceux Daulphinois ne fussent pas en si grand nombre qu'estoit iceluy Hector, si gaingnerent ils la besongne, & fut ledit estandard perdu, & avec ce y furent morts & prins bien cent hommes & grand quantité de bagues, que r'amenioient les dessusdits : & les autres en la plus grand partie, par especial les hōmes d'armes se sauuerēt par bon cheual avec ledit Hector, lequel moult triste s'en retourna en Arthois. Et lesdits Daulphinois à tout bien xl. prisonniers s'en allerent à Montagu, & en dedās vn mois ensuiuant soudainemēt dedans leurs prisons par aucune souspeçon tuerēt tous lesdits prisonniers, sinon aucuns qui s'estoient partis pour aller querir leur finance.

*Comment la Royne de France, dame Catherine sa fille & le Duc de Bourgongne conuindrent avec le Roy d'Angleterre : & la paix d'entre le Daulphin & le Duc de Bourgongne.*

## CHAP. CCVII.

**E**Nuiron la my-Auril, les ambassadeurs du Roy d'Angleterre qui nagueres auoient esté à Prouins, retournerent deuers le Roy de France & le Duc de Bourgongne en la ville de Troyes en Champagne : auquel lieu fut tant traicté entre les deux parties, qu'vnes trefues furent faictes entre les deux Roys certaine espace de temps, sur l'esperāce de plus auant besongner ensēble : & fut assigné iour pour cōuenir les vns avec les autres assez pres de Meulenc. Et apres ceste cōclusion lesdits ambassadeurs s'en retournerēt à Roüen deuers leur Roy, & brief ensuiuāt le dessusdit Roy de Frāce, la Royne & leur fille dame Catherine, & aussi le Duc de Bourgongne à tout grand puissance de gens d'armes allerent à Ponthoïse : & eux là venus (cōme il auoit esté ordōné parauant avec les dessusdits ambassadeurs) feirēt preparer vn grand parquage où se deuoit tenir la conuention : lequel fut tresbien clos de bonnes bailles & aisselles de chacun costé, & si estoit enuironné de bons fossez, & enioingnant d'vn costé assez pres de la riuere de Seine : & y auoit plusieurs entrées fermées à trois barrieres, & dedans furent tendus plusieurs tentes & pauillons pour reposer les seigneurs. Et apres feirent ordonner aucuns villages, où se deuoient loger les gens & cheuaux des dessusdits par ordonnance. Et lors estoit venu le Roy d'Angleterre de



Roüen à Mante. Et quand la iournée fut venue, qu'icelles parties deuoïent assembler en conseil: Pourtant que le Roy de France estoit mal disposé de santé, se partirent de Ponthoïse la Royne de France, dame Katherine sa fille, le Duc de Bourgogne & le Comte de saint Pol avec eux tout leur conseil & bien mille combattans: & allerent audit lieu ordonné d'empres Meulenc, & descédirent en leurs tentes au dessoubs du parquaige, & tost apres arriua le Roy d'Angleterre accompagné des Ducs de Clarence & de Glocestre ses freres, & son cōseil, & bien mille combattans: Et descendit en sa tente comme auoient fait les autres. Et apres que par leurs messaiges eurent prins cōclusion d'entrer en conseil, ladiète Royne à dextre & le Duc de Bourgogne & dame Katherine, le Comte de saint Pol & tout leur conseil, & aucunes dames & damoyelles entrerēt dedans ledit parc. Et pareillemēt le Roy d'Angleterre accompagné de ses deux freres & son conseil par vn autre entrée vint dedans le parc: auquel lieu en luy enclinant reuerement, salua la Royne & puis la baïsa & ainsi feit à dame Katherine. Et apres le Duc de Bourgogne salua ledit Roy en flechissant vn petit le genouil, & en inclinant son chief: lequel Roy le print par la main & le baïsa en luy faisant grand honneur. Et adonc d'vn consentement entrerent dedans la tente du conseil: & menoit ledit Roy la Royne de France, estant au dessus de luy, dedans lequel se tindrent treslonguement: & estoient leurs gens d'armes chacun par ordonnance selon les lices, & avec ce y auoit certaine gardes dedans ledit parc, affin que nul n'y entraist fil n'estoit à ce commis. Et apres qu'ils eurent esté au conseil grand espace, prenans congé l'vn à l'autre moult honnorablement & humblement, s'en retournerent les vns à Ponthoïse & les autres à Mante: & le lendemain & trois sepmaines ensuiuant retournerent, & conuindrent par plusieurs iournées en pareil estat qu'ils auoient esté la premiere fois, sauf que la dessusdictē Katherine qui y auoit esté menée, affin que ledit Roy d'Angleterre la veit: lequel estoit moult desirant de l'auoir en mariage, & y auoit bien cause: car elle estoit moult belle dame de hault lieu & de gracieuse maniere, n'y retourna pas depuis la premiere fois. Et là eux assemblez sur esperance de faire aucun bon traicté furent plusieurs matieres ouuertes, & souuent venoit l'vne des parties plus puissamment accompagnée que l'autre. Et vne autresfois celui qui estoit venu à plus grand puissance, venoit à mendre: & jaçoit-ce que les François & Anglois là estans, fussent tousiours (comme dit est) durant ce logez l'vn au plus pres de l'autre: oncques n'y eut rumeur ne debat entre lesdictes parties, & vendoient l'vn à l'autre plusieurs denrées: toutesfois ne peurent lesdictes parties en la fin riens concorder ne pacifier: pourtant que ledit Roy d'Angleterre faisoit demandes extraordinaires avec la fille du Roy, cōme autresfois auoit fait. Et aussi durant ledit parlement, & pour iceluy corrompre le Daulphin & son conseil enuoya deuers le Duc de Bourgogne Tanneguy du Chastel, pour luy signifier qu'il estoit prest de traicter avec luy, combien que par auant ledit Duc de Bourgogne l'eut par plusieurs fois de ce fait requerre. Finablement, comme dit est, apres que ledit parlement fut departy & du tout mis à neant durant les trefues, les tentes furent ostées & le parc deffait de l'accord des parties: & se retrahirent les vns à Ponthoïse, & les autres à Mante. Pour lequel parlement ainsi departy le Roy d'Angleterre fut trescourroucé & desplaisant, pource qu'il ne pouuoit venir à son intention, & print pour



pour ceste cause le Duc de Bourgongne en grand indignation: car il sçauoit que present estoit le principal, par qui les besongnes du Roy estoient conduictes. Et à la derraine iournée qu'ils furent ensemble, voyans que pas ne luy feroient accordées ses demandes avecques la fille du Roy de France, dit au Duc de Bourgongne: beau cousin, nous voulons que vous sachiez que nous aurons la fille, vostre Roy & tout ce qu'auons demandé avec elle, ou nous le debouterons, & vous aussi hors de son Royaume. Aufquelles parolles ledit Duc respondit. Sire vous dictes vostre plaisir: mais deuant qu'ayez debouté monseigneur & nous hors de son Royaume, vous serez bien lassé, & de ce ne faisons nulle doubte. Entre lesquelles parolles & plusieurs autres lesquelles seroient trop longues à escrire, se departirent prenant congé l'un à l'autre: & retournerent, comme dit est, es lieux dont ils estoient partis. Et brief iour ensuiuant vint audit lieu de Ponthoise messire Iean de Luxembourg à tout grand compaignie de gens d'armes, qu'il auoit assemblez es pays de Picardie par l'ordonnance du Duc de Bourgongne, pour luy accompagner à aller deuers Melun à l'encontre du Duc de Tourraine Daulphin: car desia les ambassadeurs des deux parties, c'est à sçauoir du Daulphin & du Duc de Bourgongne, auoient tant traicté ensemble, que pour les faire conuenir à certain iour en personne l'un avec l'autre, & mesmement auoient esleu lieu & place où ils se deuoient assembler: & pour icelle besongne accomplir, vint ledit Daulphin de Tours par Montargis, à Melun à tout grand puissance de gens d'armes. Et pareillemēt le Duc de Bourgongne accompagné du ieune Comte de S. Pol son nepueu, messire Iean de Luxembourg & de moult d'autres seigneurs avecques grand nombre de gens d'armes, se partit de Ponthoise, & alla à Corbueil la dame de Giac qui estoit en sa cōpaignie, qui auoit esté traictresse d'icelle assemblée: & le lendemain qui fut l'onzième iour de Iuillet, se meirent les dessusdits Princes sur les champs chacun à tout sa puissance: & encounterēt l'un l'autre enuiron à vne lieue pres de Melun empres Pouilly le Fort. Auquel lieu ils vindrent à deux traicts d'arc ou enuiron, & feirent arrester leurs batailles & partirent hors chacun à tout dix hommes de leur partie tels qu'ils les voudroient prendre: & allerent au meillieu desdictes batailles l'un contre l'autre, si descendirent à pied: & lors le Duc de Bourgongne approchant le Daulphin s'enclina moult humblement par plusieurs fois. Et ledit Daulphin en ce faisant print ledit Duc par la main, qui estoit à genoulx & le baïsa: & puis le voulut faire leuer, mais il ne voulut, & luy dit: monseigneur, ie sçay bien comment ie dois parler à vous: toutesfois en faisant les choses dessusdictes ledit Daulphin leua iceluy Duc, & luy pardonna toutes ses offences s'aucunes en auoit fait cōtre luy, & avecques ce luy dit: beau cousin se ou traicté fait entre vous & nous a aucune chose qui ne soit à vostre plaisir nous voulons que le corrigez, & desormais en auant voulons & voudrons ce que voulez & voudrez, de ce ne soiez en doubte: finablement apres plusieurs parolles les deux Princes dessusdits, & aucuns de leurs gens là estans, iurerent la paix à entretenir perdurablement l'un avecques l'autre: pourquoy s'assemblerent leurs gens tous ensemble criers Noël les aucuns, en monstrant grand signe d'estre ioyeux, maudissant tous ceux qui iamais porteroient armes pour si damnable querelle: & apres qu'ils eurent esté vne espace en cest estat, monstrans grand signe de liesse & d'amour l'un à l'autre, le Daulphin



monta à cheual, & le Duc luy tint l'estrier, nonobstant que moult de fois luy priaist, que de ce il se deportast: en outre le Duc de Bourgongne monta à cheual & tous les autres cheuauchât vn petit ensemble, & puis prenant congé reueramment l'vn à l'autre se departirent: & s'en alla le Duc de Tourraine à Melun, & le Duc de Bourgongne à Corbueil. S'ensuit la copie dudit traicté, Charles fils du Roy de France, Daulphin de Vienne, Duc de Berry & de Tours, Comte de Poictiers, & Jean Duc de Bourgongne, Comte de Flandres, d'Arthois & de Bourgongne, Palatin, seigneur de Salines & de Malignes. A tous ceux qui ces presentes lettres verront ou orront, salut: comme pour l'occasion des grans diuisions que depuis certain temps ont regné en ce Royaume, aucunes souspeçons soient engendrées en noz cueurs, & de plusieurs noz officiers, vassaulx & seruiteurs les vns contre les autres: pourquoy & pour aucunes imaginations, auons conclud d'entendre d'un commun accord aux grans faits & besongnes de nostre sire le Roy & de son Royaume, & resister aux damnables entreprinſes & enforcements des Anglois noz anciens ennemis, qui sous vmbre & par le moyen desdictes diuisions, se sont enhardiz d'eux bouter au meillieu de ce Royaume. Et de fait ont conquesté & occupent vne grand partie de la seigneurie du Roy nostre sire: & pourroient encores plus faire, se les choses estoient en telle ou semblable disposition. Nous faisons ſçauoir qu'attendans & considerans si grans maux & innumerables inconueniens, que pour le fait desdictes diuisions ſelles n'estoient appaisées: pourroient encores plus ensuiuir au tresgrand confondement & perdition de ceste seigneurie, qui redôderoit à vn chacun de nous à qui la chose plus touche qu'à nul autre à tresgrande charge & confusion, desirans cōme nous y sommes tenus de à ce remedier & pourueoir de tout nostre cueur & affection. Pourquoy apres aucuns traictez sur ce euz & pourparlez entre aucuns de nous d'une partie & d'autre, de rechief aujourd'huy nous sommes assemblez, & d'un commun accord & consentement pour l'honneur & reuerence de Dieu principalement, & aussi pour le bien de paix à qui chacun bon catholique est & doit estre enclin, & à releuer le pauvre peuple des dures & grās oppressions qu'à ceste cause ont souffert. Nous auōs promis & iuré en la main de reuerend pere en Dieu Allain Euesque de Leon en Bretaine enuoyé à nous du sainct ſiege Apostolicque, pour le faict de l'union & paix du Royaume sur la vraye croix & saintes euangiles, pource attouchez de noz mains par la foy & ferment de nostre corps faict l'un à l'autre sur nostre part de Paradis en parolle de Prince, & autrement en outre que faire se peut les choses qui ensuiuent. Et premierement nous Jean Duc de Bourgongne tant comme nous viurons en cest monde: Nous apres la personne du Roy nostredit seigneur, hōnorerons & seruirōs de tout nostre cueur & nostre pensée plus que nuls autres, & aymerōs la personne de nostredit seigneur le Daulphin, & comme à son estat appartient à luy obeyrons, & ne ferons ne souffrerons estre fait à nostre pouuoir aucune chose qui soit à son preiudice, & de tout nostre pouuoir luy ayderons à garder & maintenir son estat en toutes manieres, & luy serons tousiours vrays & loyaux parens. Procurerons son bien & honneur, & escheuerons son mal & son domage par toutes voyes à nous possibles, & de ce nous l'aduertirons. Et ſil aduenoit qu'aucun de quelque estat qu'il fut, luy voulsist faire guerre ou porter dōmage, nous

en



en ce cas le seruiron & ayderons de toute nostre puissance contre tous comme pour nostre propre fait. Et pareillement nous Charles Daulphin dessusdit si longuement qu'il plaira à Dieu, nous donner vie au corps à quelque estat, domination & puissance qu'au temps aduenir pourrions venir toutes choses faictes mises en oubly, de bonne foy nous aymerons nostre treschier & trefaymé cousin le Duc de Bourgongne dessusdit. Et en toutes ses affaires & besongnes le traicterons comme nostre prochain & loyal parent: voudrons & procurerons son bien, honneur & profit, & escheuerons son mal: le garderons & maintiendrons en son estat, & en tous ses affaires & besongnes le traicterons s'aucun de quelque estat qu'il fut le vouloit greuer d'aucune chose, nous le soustiendrons & porterons: & aussi tost que de ce nous requerra luy ayderons & deffendrons de toute nostre puissance contre tous, qui viure puist ou mourir. Et mesmes s'aucuns de nostre sang & lignaige ou quelconques autres, par la raison d'aucunes choses au temps passé en ce Royaume ou ailleurs, vouloit demander ou faire de nostredit cousin de Bourgongne ou de ses pays & subiects, nous & toute nostre puissance luy ayderons, soustiendrons & deffendrons contre tous ceux qu'il le voudroient greuer & dommager. Item que nous Charles Daulphin & Iean Duc de Bourgongne, entendrons doresnauant par bonne vnion chacun selon son estat à tous les grans affaires de ce Royaume, sans vouloir entreprendre ou auoir enuie l'un sur l'autre. Et si aucune relation nous estoit faicte par aucuns de noz officiers, ou par autres qui fut à la charge l'un de l'autre à engendrer aucune diuision nouvelle: Nous de ce aduertirons l'un l'autre en bonne foy & n'y adiousterons aucune foy. Et comme bon & loyal parent & prochain de nostre seigneur le Roy, & de la couronne de France: nous principalement sans aucune fiction, nous emploierons à debouter lesdits ennemis & autres à reparer la domination de cest Royaume. Et ne prendrons avec lesdits ennemis aucuns traictez ou alliances, fors du bon plaisir & consentement l'un de l'autre. Et qui plus est, en toutes alliances que ferons doresnauant, nous comprendrons l'un l'autre en bonne foy. Et s'aucunes alliances ou traictez auoient esté faits deuant la dacte de ces presentes avec les dessusdits ennemis anciës ou avec autres, preiudiciables l'un à l'autre de nous, doresnauant voulons icelles estre nulles: & toutes ces choses dessusdictes auons promeis & promettons (comme dit est) fermement & entierement à tenir, sans iamais aller ou faire aller au contraire. Et s'aucuns de nous de sa volenté ou autrement enfraignist ou fait enfreindre ledit traicté de ceste presente alliance, que Dieu ne vueille: Nous voulons & nous plaist & à vn chacun de nous, que les gens vassaulx, seruiteurs presens & aduenir de celuy qui enfreindra ladicte paix ne soient obligez apres ladicte infraction d'iceluy seruir, mais serviront l'autre desdictes parties. Et en ce cas serôt absouls & quictes en tous sermens de loyauté, & autres de toutes promesses & obligations de seruice: & lesquels oudit cas desmaintenant comme adonc, nous de ce les tenons quictes & absouls, sans ce qu'au tēps aduenir on leur peust imputer à charge ou reproche n'aucune chose demander: & en plus grand seurte & cōfirmation, à ce que n'ayons aucune imagination sur les seruiteurs & officiers l'un de l'autre: nous auons voulu & ordonné que noz principaux seruiteurs & officiers iurent. Et de fait en nostre presence és mains dudit Euesque Leon, iurerent tenir les choses dessusdictes de par eux, &



en tant qu'il leur pourra toucher . Et especiallement que de tout leur pouuoir ils nous entretiendront en bonne & vraye amour l'un avec l'autre , & ne feront aucune chose ne procureront, qui de ce nous doieue empescher . Mais l'aucun empeschement apperceuoient , de ce ils nous aduertiront de toutes les choses dessusdictes. Ils feront leur deuoir & bailleront sur ce leur feel . Et mesmement ont iuré sur les saintes Euangiles de par nous Daulphin , noz amez & loyaux seruiteurs , Sire Iacques de Bourbon seigneur de Curoy , maistre Robert le Masson nostre Chancelier , le Vicomte de Nerbonne & les seigneurs de Barbasan d'Espaignon, du Bosquaige, de Montenay, de Gamaches , sire Taneguy du Chastel , sire Iean Louuet President de Prouence , Guillaume de Margouin , Hues de Noyerries, Iean de Mefnil, Pierre Frotier, Guichard de Bourdon & Collart de la Vuigne . Et de par nous Duc de Bourgongne noz treschiers & amez le Comte de saint Pol , sire Iean de Luxembourg, sire Archambault de Saxe , le seigneur de Noüaille, le seigneur d'Autre, sire Thibault de Neuf-Chastel, le seigneur de Montagu, sire Iean de la Trimouille , Guillaume de Vienne , sire Pierre de Boffremont grand Prieur de France, sire Gaultier de Ruppes, sire Charles de Lens , Iean seigneur de Cocteburne Mareschal de Bourgogne, Iean seigneur de Thoulongon, Regnier Pot, Pierre seigneur de Giac, Anthoine de Thoulongon, Guillaume de Champ-Diuers, Philippe de Iossequin & Nicolle Raullin. Et en outre pour plus grand seurte des choses dessusdictes, voulons & consentons que les seigneurs du sang & lignaigne de nostredit seigneur pareillement iurent de tenir & garder ceste presente amitié , concorde & vnion ainsi faicte entre nous : & finalement les gens d'Eglise, les nobles & les bonnes villes de noz païs & seigneuries, & de nostre sire le Roy : & auecques ce nous & chacun de nous pour obseruer les choses dessusdictes & chacune d'icelles: Nous soubmettons à la correction de nostre mere sainte Eglise & de nostre saint pere le Pape, ou de leurs commis & deputez: par lesquelles voulons & consentons estre cōtraints & chacun de nous par voye de solemnelle excōmunication, d'aggreuances & reaggreuances d'entredits en nostre païs & terres par la sentence & iugement de l'Eglise plus en outre que faire se pourra . En tesmoing de toutes les choses dessusdictes , nous & chacun de nous auons escrit à ces presentes nostre nom & de noz propres mains : & auons fait mettre noz seaulx à ce donné au lieu de nostre assemblée & congregation sur le Ponchiell, qui est à vne lieüe pres de Melun assez pres de Poilly le-Fort, le mardy onzième iour de Iuillet, l'an de grace mille quatre cens & xix .

*Comment apres la paix entre ledit Daulphin & le Duc de Bourgongne , icelle fut publiée en diuers lieux du Royaume de France, & autres matieres suyuant .*

## CHAP. CCVIII.



Tem le lendemain de la paix dessusdit se departit le Duc de Touraine Daulphin, de Melun à tout sa puissance, & s'en alla par Tours en Touraine vers Partenay: laquelle il auoit fait assieger par auāt par le Comte de Vertus & autres ses capitaines , pource que le seigneur de Partenay auoit tout son temps tenu & encores tenoit le party du Duc de Bourgongne : lequel Comte & tous les autres fait departir ledit Daulphin & fait preparer



rer les gens à toute diligence pour mener guerre aux Anglois . Et pareillement ledit Duc de Bourgongne s'en retourna à Ponthoïse deuers le Roy & la Royne, auquel lieu fut faicte grand ioye pour la reconciliation des deux parties par dessus declairées. De laquelle ville de Ponthoïse iceluy Duc de Bourgongne mena le Roy, la Royne & tout leur estat demourer à S. Denys . Et laissa en icelle pour la garder contre les Anglois le sire de l'Isle Adam Marechal de France, auquel fut deliurée grand finance pour payer gens d'armes à mettre en icelle ville de Ponthoïse. En apres tantost apres que la paix fut publiée d'entre iceux Princes dessusdits : la plus grand partie des nobles , du clergié & du peuple eurent grand lieffe, esperans par le moyen de ce auoir grand consolation, & ledit Royaume estre réparé des griefs & persecutions que long temps auoit souffert par la guerre, qui si longuement auoit duré. Et commencerent les gens des deux parties à marchander, & repaier les vns avec les autres . Et avec ce en plusieurs bonnes villes & citez fut faicte ioye , en criant Noël, faisans les bourgeois grandes assemblées & grans feux par tous les quarrefourgs, & par especial dedans la ville de Paris . Et le vingtiesme iour dudit mois de Iuliet furēt portez audit lieu de Paris par l'Archeuesque de Sens les lettres de la paix, lesquelles furent présentées aux seigneurs de la court de Parlement, des Requestes du Palays & de la chambre des Comptes: presens lesquels furent leutes par maistre Nicolle Raullin : & si y estoient maistre Robert Mailliere & maistre Iean Champion, tous deux Secretaires dudit Daulphin . Et apres qu'elles furēt leutes, ledit Archeuesque presenta vn mandement du Roy, ouquel estoit contenu, que le Roy faisoit abolition generale de tous crimes & cas perpetrez en son Royaume, à l'occasion des diuisions par auant passées : & veut que chacun retourne à ses heritages, benefices & autres biens, reserué meubles : avec ce que le Duc de Bourgongne mette capitaine à Partenay, pour garder le païs de Poictiers, qui soit fauorable au Daulphin : & que toutes garnisons tant d'un costé comme d'autre soient mises hors, sinon sur la frontiere des Anglois. Apres furent présentées autres lettres du Daulphin, lesquelles estoient incorporées avec les lettres du Roy : & par icelles ledit Daulphin consentoit, accordoit & promettoit tenir le contenu des dessusdictes lettres Royaux, & pareillement ledit Raullin monstra lettres semblables de par le Duc de Bourgongne. Et apres q̄ par les dessusdits tout eut esté visité, la paix fut publiée en plusieurs lieux de Paris, & iurerēt lesdits seigneurs de Parlement tous les dessus nommez & autres gouuerneurs d'icelle cité à la tenir : & le lendemain fut faicte vne solempnelle procession à S. Martin des Champs pour ladicte paix.

*Comment le Roy Henry d'Angleterre ne fut pas bien content de la paix dessusdicte: de la prinse de Ponthoïse par les Anglois sur le seigneur de l'Isle Adam, & ce qu'il en aduint.*

CHAP. CCIX.



Q R conuient retourner à parler du Roy Henry d'Angleterre : lequel (quand il ouyt nouuelles de la paix & alliance, qu'auoient fait ensemble le Duc de Touraine Daulphin & le Duc de Bourgongne contre luy) ne fut pas de ce bien ioyeux, & non sans cause : car bien luy sembla, & c'estoit verité, que plus forts seroient à estre tous deux ensemble, que



quand ils estoient diuisez. Neantmoins il se conclud & delibera de mener à fin la querelle & entreprinse à l'encontre de tous ceux qui nuire le voudroient, & iecta son imagination & aduis, que trop bon & profitable seroit à luy la ville de Ponthoise s'il la pouuoit auoir. Et sur ce manda aucuns de ses plus feables capitaines, & aussi de ceux qui auoient esté dedans icelle ville durant les ambassades, dont dessus est faicte mention: si leur declaira sa voulenté, & ils feirent responce, qu'en toutes autres choses qu'il luy plairoit à eux commander, estoient prests d'eux employer sans espargner leur corps, quelque peril, peine & trauail qu'ils y deussent auoir. Et sur ce fut ordonné par le Roy ceux qui de ceste besongne auroient la charge. Et finalement vindrent le derrain iour de Iuillet entre le point du iour & soleil leuant à vne des portes de ladicte ville de Ponthoise: & pouoiēt estre enuiron trois mille combattans, laquelle porte n'estoit pas encore ouuerte: & tantost les aucuns par eschelles qu'ils auoient, commēcerent à monter amont sans estre apperceuz du guet: & de fait ouurirēt icelle porte, par laquelle incontinent entrèrent dedans à grand puissance, en criant hautement, saint George ville gagnée. Auquel cry fut tātost la ville toute esmeüe & le sire de l'Isle Adam esueillé: lequel sans delay tout armé avec aucuns de ses gens monta à cheual, & alla veoir où estoit ledit effroy avec aucuns de ses gens. Mais quand il apperceut lesdits Anglois dedans la ville en si grand nombre, s'en retourna hastiuement & fit prendre sa finance & ses bagues: à tout lesquelles esueillant plusieurs bourgeois, alla vers la porte de Paris, qui estoit encores fermée, & la fit rompre & ouurir: & puis en sa compagnie bien dix mille personnes de la ville tous desolés & desconfortez se partirent, allans vers Paris: desquels y auoit plusieurs emportans de leurs meilleurs biens, & par especial, or, argent, vaisselle & ioyaux: dont l'une des parties allans vers Beauuais, furent destrouffez, & leurs bagues ostées de Iean de Guigny & Iean du Clau. En outre lesdits Anglois sans trouuer quelque resistance prindrent & gaignerent ladicte ville, dedās laquelle ils feirent maux innumerables comme en ville conquise: & gaignerent grans finances, car elle estoit remplie de tous biens. Et fut le principal conduyseur des Anglois faisans ceste entreprinse le Captal de Bus, frere au Comte de Foix: pour laquelle ville ainsi prinse, le païs de France, & par especial vers Paris, furent moult desconfortez & se despeuplerent les villages d'autour dudit lieu de Paris, & en l'Isle de France tresfort: & quand les nouvelles en ce mesme iour vindrent à S. Denys, où estoit le Roy de France & le Duc de Bourgongne & tout leur estat, assez tost se departirent, & par Prouins s'en allerent à Troyes ensemble, la Roïne, dame Katherine & moult d'autres seigneurs, laissant à Paris pour icelle entretenir le Comte de S. Pol & maistre Eustace de Laître Chancelier de France, & ledit seigneur de l'Isle Adam Marechal de France: qui au plus brief qu'il peut rassembla certain nombre de gens d'armes, à tout lesquels il se meit en garnison dedans la ville de Beauuais, pour tenir frontiere & résister aux entreprinse, que faisoient chacun iour les Anglois dessusdits. Toutesfois iceluy seigneur de l'Isle Adam fut moult deparlé & blasmé, pource qu'ainsi negligemmēt par faute de guet il auoit laissé perdre ladicte ville de Ponthoise: & par especial les gouuerneurs du Dauphin en furent tres mal contens,



*Comment le Duc de Clarence assiegea Gisors & le conquist. Le siege de saint Martin le Gaillart, & autres besongnes faictes par les Francois & Anglois.*

## CHAP. CCX.

**E**tem assez brief ensuiuant le Roy d'Angleterre fait assieger puissamment la ville de Gisors par le Duc de Clarence son frere: dedans laquelle estoit capitaine Lyonnet de Bournouille, & dedans le chastel Dauiod de Gouy. Lesquels desdits Anglois furent tant approchez, qu'en la fin de trois sepmaines apres le siege meis, rendirent ladicte ville & forteresse en partie par faute de viures au Duc de Clarence, par si qu'ils s'en iroient à tout leurs gens saufs leurs corps & leurs biens: & les habitans de la ville demoureroient obeïssans audit Roy d'Angleterre, en faisant à luy serment de loyauté: & ainsi se departirent les dessusdits, & s'en allerent à Beauuais deuers le sire de l'Isle Adam. Et tost apres fut assise desdits Anglois la forteresse de saint Martin le Gaillart: dedans laquelle estoit Regnault de Fontaines, messire Karados de Quesnes avecques aucuns autres, qui auoient tousiours tenu la partie du Daulphin & du Duc d'Orleans: auquel lieu desdits assiegeans estoit capitaine vn vaillant homme nommé messire Philippe Lis: mais de ladicte forteresse (nonobstant le siege) se partit secrettemēt par nuict ledit messire Karados, & alla à Compiengne deuers le seigneur de Gamaches, qui pour ce temps en estoit capitaine. Auquel il requist tres instamment qu'il voulüst assembler gens pour leuer le siege dessusdit, lequel sire de Gamaches au plus brief qu'il peut, fait trefgrosse assemblée: & manda Anthoine & Hue de Beaufault freres, & moult d'autres gentils hommes tenās la partie du Daulphin, & aussi plusieurs tenans la partie de Bourgogne: tant qu'en tout assembla bien seize cens combattans ou enuiron, à tout lesquels il cheuaucha en tirant au lieu dessusdit, & vint vers soleil leuāt au dessus de ladicte forteresse: & là meit ses gens en ordonnance & commist quatre cens combattans pour aller deuāt gagner les barrieres, qu'auoient faictes lesdits Anglois. Aufquelles barrieres furent trouuez enuiron lx. Anglois gardās icelles, lesquels trefaprement se deffendirent, & garderent le pas: mais en fin ils furent desconfits & tous meis à mort, excepté aucuns qui se sauuerent par fuite. Et adonc ledit sire de Gamaches suiuant ses gens assez roidement, frapperent en la ville où lesdits Anglois estoient logez: mais la plus grand partie estoient desia retraits en vne grād Eglise, qui estoit en la ville à tout leurs cheuaux, & là tresfort se deffendirent: & en conclusion pource que les dessusdits Anglois pouuoient auoir brief secours de leurs gens qui estoient sur les marches, le dessusdit sire de Gamaches fait bouter le feu dedans la forteresse, & emmena sauueiment ceux qui estoient dedans. Et furent à ceste besongne fais nouueaux cheualiers Anthoine de Beaufault, Gilles de Rouuroy & aucuns autres. En apres dedans les huit iours ensuiuant, le Comte de Hautiton capitaine de Gournay en Normandie assembla enuiron deux mille combattans Anglois des frötieres de la marche: lesquels il conduict iusques à vn gros village nommé Poix, où ils se logerent, & y feirent plusieurs dommages: & de là allerent à Bretueil, & liurerent grand assault au fort de l'abbaye: & pourtant qu'ils y eurent de leurs gens morts, ardirent la ville qui estoit moult puissamment amassée, & puis se tirerēt vers Cleremont. Si prindrent



la tour de Vendueil, & bouterēt le feu dedans. Et apres en destruisant le païs par feu & par espée, à tout infinis biens & en grand nōbre de prisonniers s'en retournerent en leur garnison. Et de l'autre costé messire Philippe Lis, par dessus nommé, qui se tenoit à Eu & Monchaux, couroit tressouuent iusques à Abbeuille, au pont de Remy & par tout le Vimeu, dont le païs estoit tresgrandement desolé. Ausquelles courses & enuahies messire Iacques de Harcourt qui se tenoit au Crotoy, & Hector de Saueuses avec ceux de la garnison du Pont de Remy, bailloient tressouuent de grans empeschemens : & pareillement en faisoient messire Loys de Thiembronne, & ceux qui estoient avec luy en la ville de Gamaches.

*Comment le Roy d'Angleterre fait assieger les forteresses du Chasteau Gaillard & de la Roche-Guyon, qui en la fin furent conquises & autres matieres.*

## CHAP. CCXI.

**E**N ces mesmes iours le Roy Henry d'Angleterre fait assieger toutes les forteresses du Chasteau Gaillard, & de la Roche Guyon: lesquelles estoient deux des plus fortes places de la Duché de Normandie, & les tenoient les gens du Daulphin: mais au bout de deux mois la Roche Guyon fut rendue du consentement de la dame, qui estoit dedans audit Roy d'Angleterre: lequel presentement la donna à messire Guy Bouteillier, & avec ce luy voulut faire auoir ladicte dame en mariage. Mais oncques ne se voulut consentir, ainçois s'en alla avec ses gens hors du païs en delaisant ladicte forteresse. Et le Chasteau-Gaillard qui estoit au Roy de France, se tint seize mois: au bout duquel terme se rendit par faute de ce que les cordes, dōt ils tiroient l'eau leur estoient faillies: & en estoit capitaine messire Oliuier de Mauny, qui auoit avec luy six vingts gentils-hommes ou plus, & tenoient le siege les Comtes de Hautiton & de Quin. Et durāt les choses dessusdictes, auoit plusieurs Daulphinois & Bourgongnons qui auoient grand confidence & communication les vns avec les autres depuis le traicté de la paix, esperans qu'icelle deut estre perdurable: & s'assembloient tressouuent en plusieurs lieux d'un commun accord, pour faire guerre aux Anglois anciens ennemis du Royaume de France: mais la rouë de fortune y pourueut par telle maniere, que dedās briefs iours ensuiuant furent en plus grand tribulation & haine l'un contre l'autre que iamais n'auoient esté, comme cy apres sera declairé.

*Comment le Duc de Touraine vint à grand puissance à Monstreau où faut Yonne, où il manda le Duc de Bourgongne qui estoit à Troyes en Champaigne: lequel fut meis à mort piteusement.*

## CHAP. CCXII.

**I**L est verité qu'apres que Charles Duc de Touraine eut visité les Duches de Berry & de Tours, se tira à tout vingt mille cōbattans ou environ à Monstreau où faut Yonne. Et tost apres sa venue enuoya à Troyes en Champaigne messire Tāneguy du Chastel & autres de ses gens, à tout certaines lettres signées de sa main: par lesquelles il escriuoit tres affectueusement audit de Bourgongne, que pour cōclurre & aduiser à la reparation du Royaume, & aussi pour grans affaires qui grandement touchoient, il vouldist aller par deuers luy audit lieu de Monstreau: lequel Duc oyāt ceste requeste, dif-  
fera



fera par plusieurs iours d'y aller. Et contédoit que ledit Daulphin allast audit lieu de Troyes vers son pere le Roy & deuers la Roïne : & demonstra plusieurs fois audit Tanneguy, que plus conuenable & expedient seroit qu'il y allast qu'autrement, affin de tenir leur conseil ensemble. Et sur ce retourna ledit Tanneguy deuers le Daulphin pour luy rendre la responce qu'il auoit eüe: mais finalement le dessusdit Daulphin & tous ceux de son cōseil prindrent conclusion ensemble de demourer à Monstreau, & nō ailleurs. Et de rechief retourna iceluy messire Tanneguy à Troyes deuers ledit Duc: avec lequel il traicta tant qu'il vint à Bray sur Seine, & de là furent enuoyez plusieurs messages de l'vne partie à l'autre. Entre lesquels au derrain y enuoya le Daulphin l'Euesque de Vallée, qui estoit frere à l'Euesque de Langres: lequel de Lāgres estoit avec le Duc de Bourgongne, & vn de ses principaux cōseilliers, & estoit nōmé Charles de Poictiers : & quād iceluy Euesque fut audit lieu de Bray, parla par plusieurs fois audit Duc de Bourgōgne, & l'admōnesta & induit bien adcertes qu'il voulsist aller deuers ledit Daulphin, disant qu'il ne fut en nulle doubte ou souspeçon de quelque mauuaistié. Et pareillement en parla feablement à son frere dessusdit, en luy remōstrant que feablement il y pouuoit aller, & feroit mal de faire le cōtraire. Toutesfois iceluy Euesque pour vray ne sçauoit riens de ce qu'il aduint depuis, & traictoit de bōne foy les besongnes dessusdictes. Finalement tant par les remonstrances dessusdictes comme sur les parolles de messire Tanneguy du Chastel, ledit Duc de Bourgongne se conclud & disposa avec son conseil d'aller deuers le Daulphin en la compagnie d'iceluy Euesque: & se partit dudit lieu de Bray sur Seine le dimenche x. iour de Septembre mille cccc. & xix. Et auoit en sa cōpaignie enuiron cinq cens hommes d'armes, & deux cens archiers desquels estoiet capitaines messire Charles de Lens Admiral de France, & Iaques de la Bame maistre des arbalestriers: & si y estoient plusieurs seigneurs, c'est à sçauoir Charles fils aîné du Duc de Bourbon, le seigneur de Nouaille frere au Comte de Foix, Iean fils au Comte de Fribourg, le seigneur de S. George, messire Anthoine du Vergy, le seigneur de Ionuelle, le seigneur d'Ancre, le seigneur de Montagu, messire Guy de Pontaillier & plusieurs autres. A tout lesquels il cheuaucha ioyeusement iusques assez pres de Monstreau, & estoit enuiron trois heures apres midy: & lors vindrent à l'encontre de luy trois de ses gēs: c'est à sçauoir messire Anthoine de Thoulōgon, Iean d'Ermay & Saubretier. Lesquels luy dirent qu'ils venoient de la ville, où ils auoient veu sur le pont: auquel lieu se deuoiet assembler plusieurs fortes barrieres faictes de nouuel tres aduantageuses pour la partie du Daulphin, disant qu'il pensast à son fait: & que fil s'y boutoit, qu'il seroit au danger dudit Daulphin & de sa partie: sur lesquelles parolles ledit Duc tout à cheual assembla son conseil pour sçauoir sur ce, qu'il estoit bō de faire: & y eut diuerses opinions: car les aucuns doubtoiet moult ceste iournée, & les nouvelles & rapports de ce que d'heure à autre ils oyoient. Les autres qui ne pensoient que bien, conseilloyent pour mieux faire que laissez, qu'il allast deuers le dessusdit Daulphin. Et disoiet qu'ils ne sçauoiet pēser qu'un tel seigneur & Prince fils de Roy de France & successeur de la noble courōne, voulsist faire autre chose que loyauté. Et lors ledit Duc voyant & oyāt les diuerses opiniōs de son conseil, dit haut & cler en la presēce d'eux tous qu'il iroit, sur intention d'attendre telle aduenture qu'il plairoit à Dieu de luy en-



uoyer: disant outre que pour peril de sa personne ne luy feroit ja reprouué, que la paix & reparation du Royaume fut attargé: & que bien sçauoit fil failloit d'y aller, & que par aucune aduenture guerre ou dissention se reismouuoit entre eux, la charge & deshonneur en retourneroit sur luy. Et adonc s'en alla descendre dedans le chastel de Monstreau par la porte vers les champs: lequel chastel luy auoit esté deliuré pour luy loger par les conseilliers du Daulphin, affin qu'il fut moins en souspeçon, qu'on luy voulsist faire aucune mauuaistié: & fait descendre avec luy tous les grās seigneurs & cc. hommes d'armes, & cent archiers pour luy accompagner. Si estoit avecques luy la Dame de Giac, qui par auant (comme dit est) auoit esté par plusieurs fois deuers le Daulphin pour traicter les choses dessusdictes: & moult induisoit ledit Duc d'y aller, en luy admonnestant qu'il ne fut pas en doubte de nulle trahison: lequel Duc (comme il monstroient semblant) aymoient moult & croyoit de plusieurs choses icelle dame: & si l'auoit baillé en garde avecques partie de ses ioyaux à Philippe Iosquin, comme au plus feable de tous ses seruiteurs: & tost apres qu'il fut descendu, ordonna à Jacques de la Bame, qu'il se meit à tout ses gens d'armes à l'entrée de la porte vers la ville pour la seurte de sa personne, & aussi à garder la conuention. Et entre-temps messire Tāneguy du Chastel reuint deuers luy, & luy dit que le Daulphin estoit tout prest, & qu'il attendoit apres luy: & il respondit qu'il s'en alloit: & lors appella ceux qui estoient commis à aller avec luy: & deffendit que nuls n'y allasent, fors ceux qui à ce estoient ordonnez: lesquels estoient dix, dont les noms s'ensuiuent: c'est à sçauoir Charles de Bourbon, le seigneur de Noüaille, Jean de Fribourch, le seigneur de saint George, le seigneur de Montagu, messire Anthoine du Vergy, le seigneur d'Ancre, messire Guy de Pontailier, messire Charles de Lens, messire Pierre de Giac, & vn secretaire nommé maistre Pierre Seguinat. Avecques lesquels alla le dessusdit iusques au deuant la premiere barriere du pont: & de rechief vindrent à l'encontre de luy les gens dudit Daulphin, qui renouellerent les promesses & sermens par auant faits, & iurerent entre les parties: & ce fait dirent, venez deuers monseigneur il vous attend cy deuant le pont. Apres lesquelles parolles se retrahirent deuers leur maistre & seigneur: & adonc ledit Duc demanda à ses conseilliers dessusdits, fil leur sembloit qu'il peust aller seurement deuers ledit Daulphin, sur les seurtez qu'ils sçauoient entre eux deux. Lesquels ayans bonne intention, luy feirent responces, que seurement y pouuoit aller: attendu lesdictes promesses faictes par tant de notables personnes d'une partie & d'autre. Et dirent que bien oseroient prendre l'aduanture d'y aller avecques luy. Sur laquelle responce se meit à chemin, faisant aller vne partie de ses gens deuant luy: & entra en la premiere barriere où il trouua les gens du Daulphin, qui encores luy dirent: venez deuers monseigneur, il vous attend: & il dit, ie vois deuers luy: & passa outre la seconde barriere, laquelle fut tantost fermée à la clef, apres que luy & ses gens furent dedans par ceux qui à ce estoient commis: & en marchant auant, rencontra messire Tāneguy du Chastel, auquel par grand amour, il ferit de la main sur l'espaule, disant au seigneur de saint George & aux autres de ses gens: vecy en qui ie me fie. Et ainsi passa outre iusques assez pres dudit Daulphin, qui estoit tout armé l'espée ceinte, appuyé sur vne barriere: deuant lequel pour luy faire hōneur & reuerence, il se meit à vn genouil



nouil à terre, en le saluant tres humblement. A quoy le Daulphin respondit aucunement sans luy monstrier quelque semblant d'amour, en luy reprochant qu'il auoit mal tenu sa promesse, & n'auoit point fait cesser guerre, ne fait vuyder ses gens des garnisons ainsi que promeis auoit. Et entre-temps messire Robert de Loire le prinst par le bras dextre & luy dit: Leucz vous, vous n'estes que trop honorable. Et ledit Duc qui estoit à vn genouil (comme dit est) & auoit son espée ceinte: Laquelle estoit selon son vouloir trop demourée derriere luy, quand il fagenouilla: y meit la main pour la remettre plus deuant à son ayse. Et lors ledit messire Robert luy dist: mettez vous la main à vostre espée en la presence de monseigneur le Daulphin: entre lesquelles parolles s'approcha d'autre costé messire Taneguy du Chastel, qui feit vn signe, en disant, il est tēps: ferit ledit Duc d'une petite hache qu'il tenoit en sa main parmy le visage si roidement, qu'il cheut à genoulx, & luy abbatit le manton: & quand le Duc se sentit feru, meit la main à son espée pour la tirer, & se cuida leuer pour luy deffendre. Mais incōtinent tant dudit Taneguy comme d'aucuns autres, fut feru plusieurs coups & abbatu à terre comme mort. Et prestement vn nommé Oliuier Layet à l'ayde de Pierre Froitier luy bouta vne espée par deffoubs son haultbergeon tout dedans le ventre: & ainsi que ce se faisoit, le seigneur de Noüaille ce voyant tira son espée à moitié pour cuider deffendre ledit Duc: mais le Vicomte de Nerbonne tenoit vne dague en sa main, dont il le cuida ferir: & ledit de Noüaille vigoureusement se lança audit Vicomte, & luy arracha sa dague des poings: & en ce faisant, fut feru de vne hache par derriere en la teste si efforcément, qu'assez brief apres il mourut. Et entre-tēps que ce se faisoit, le dessusdit Daulphin qui estoit appuyé sur la barriere dessusdicte, voyant ceste merueille, se tira arriere d'icelle cōme tout effroyé: & incōtinent par Iean Louuet president de Prouence, & autres ses conseilliers fut remené à son hostel: & d'autre partie Iean de Fribourg tira son espée, mais tantost on luy feist perdre par force de coups. Finablement tous les dix avec le secretaire qui estoient allez avec ledit Duc, furent prins sans delay excepté le seigneur de Noüaille, qui demoura mort sur la place (comme dit est) & le seigneur de Montagu qui se sauua par dessus la barriere vers le chastel: & fut le seigneur de saint George nauré au costé de la poincte d'une hache, & le seigneur d'Ancre d'une taillade en la main. Lequel seigneur de Montagu quand il fut outre ladicte barriere, cria tresfort à l'arme. Et adonc messire Anthoine de Thoulougon, messire Symon Othelimer, Saubertier & Iean Dermay avec aucuns autres, s'approcherent de ladicte barriere & commencerent à lancer de leurs espées à ceux de dedans. Et en ce faisant ledit messire Symon fut nauré en la teste: car ceux de la ville & desdictes barrieres s'efforcerent de tous costez à tirer d'arbalestres sur les dessusdits: pourquoy non pouans entrer dedans icelle barriere, se retrahirent dedans ledit chastel. Ainsi & par ceste maniere fut ledit Duc de Bourgongne cruellement mis à mort sur la seurté du Duc de Touraine Daulphin de Viennois, & de ceux de son conseil. Laquelle besongne tant seullement à ouyr raconter, est si piteuse & lamentable que plus grāde ne peust estre. Et par especial tous cueurs de nobles hommes & autres preud'hommes natifs du royaume de France, doiuent auoir grand tristesse & vergongne voyans si noble sang comme des fleurs de lys, tant prochains de lignage eux mesmes destruire l'un l'autre. Et ledit royau-



me estre mis par le moyen des choses dessusdictes, & autres par auant faictes & passées en voye & peril de changer nouuel seigneur, & aller du tout à perdition. Si furent les principaulx faiseurs ceste conspiration contre ledit Duc de Bourgogne, Jean Louuet president de Prouence, le Vicomte de Nerbonne, messire Guillaume Batillier, messire Taneguy du Chastel, messire François de Grimaulx, messire Robert de Loire, Pierre Frotier, Oliuier Laiet, messire Ponchon de Namac Seneschal d'Auuergne & aucuns autres. Lesquels grand espace de temps parauant auoient conclud, promeis & iuré l'un à l'autre de mener à fin ceste besongne, comme ils feirent : & mesmement de la premiere assemblée qui fut faicte entre iceux Princes aupres de Pouilly le fort, quand la paix fut faicte entre eux, comme ie fus informé eurent voulenté & intention de l'acheuer. Mais lors fut delaisié, pource que ledit Duc de Bourgogne auoit trop grand puissance de gens d'armes. Et aussi que lesdictes parties estoient pres l'un de l'autre aux plains champs. Pourquoy eust conuenu qu'il y eust eu de trop grand meschef entre eux. En apres le seigneur de Iouelle & les autres qui estoient dedans le chasteau de Monstreau : & auxquels ledit Duc de Bourgogne l'auoit baillé en garde à son partement, furent moult esmerueillez & non pas sans cause, quand ils sceurent & veirent les manieres qu'on tenoit contre eux, tant pour la perfonne de leurdit seigneur & Prince, dont encores ne sçauoient pas la vraye verité de son estat, comme pour les autres seigneurs qui estoient avec luy : & aussi pour eux mesmes qui estoient là sans auoir quelque prouision de viures n'habillemens de guerre, sinon ce qu'ils auoient apporté qui n'estoit pas grand chose : car parauant leur venue on auoit ostée toute l'artillerie & les viures dudit chastel. Si eurent sur ce plusieurs imaginations, pour sçauoir s'ils se departiroient ou non : mais en la fin se conclurent l'un avec l'autre d'y demourer iusques à tant, qu'ils orroient plus veritables nouuelles de leur dessusdit seigneur, qu'encores n'auoient ouy. Et combien que ledit seigneur de Iouelle & le seigneur de Montagu priaissent moult de fois aux gés dudit Duc qui estoient venus avec luy, qu'ils voulsissent demourer avec eux dedans iceluy chastel. Neantmoins n'en voulurent riens faire : ains se departirent hastiuement, sans tenir ordonnance, & cheuaucherent au plus tost qu'ils peurent droit vers Bray sur Seine, dont ils estoient partis au matin. Mais les gens du Daulphin à grand puissance les poursuiuirent tresasprement, & en tuerent, prindrent & destroussèrent grand partie, sans trouuer quelque deffence : & iceux seigneurs de Iouelle & de Montagu demourerent, comme dit est, dedans le chastel & avec eux messire Robert de Marigny, messire Philippe de Seruoiles, messire Jean Murat, le seigneur de Rosmat, Jean d'Ernay, Jean de Caumaisnil Sabertier, Philippe de Montant, Regnault de Cheuilly, Regnault de Rethel, Guillaume de Bierre, la dame de Giac & ses femmes, Philippe Iosquin avec environ trente varlets que paiges de la famille dudit Duc de Bourgogne.

*Comment le Duc de Touraine Daulphin & ceux qui estoient avec luy se conduirēt apres la mort dudit Duc de Bourgogne, & des lettres qu'il feist enuoyer à plusieurs bonnes villes.*

CHAP. CCXIII.

En apres



**E**N apres le dessusdit Duc mis à mort, comme dit est, fut tantost par les gens du Daulphin desuestu de sa robbe, de son haulbergeon, de ses anneaulx, & de toutes autres choses, reserué son pourpoint & ses housseaulx : & demoura sur la place iusques à minuiet qu'on le portaist sur vne table dedans vn moulin assez pres du pont, & le lendemain au matin fut mis en terre en l'Eglise nostre dame deuât l'autel saint Loys à tout son dit pourpoint, & ses housseaulx, sa barrette tirée sur son vifaige, & luy feist on prestement dire douze messes. Si estoient à ceste heure avec le Daulphin plusieurs notables personnes, qui riens ne sçauoient du secret de ceste matiere. Et en y eust aucuns à qui en despleust grandement, considerans les tribulations, reproches & meschefs qui en pouoient soudre ou temps aduenir, tant ou royaume de France comme à la personne de leur seigneur & maistre le Duc de Touraine Daulphin: entre lesquels y estoient Iean de Harcourt Comte d'Aumalle, & le seigneur de Barbasan. Auquel de Barbasan fut moult desaggreable : & tant que par plusieurs fois reprocha à ceux qui ce auoient machiné le cas dessusdit, en disant qu'ils auoient destruit leur dessusdit maistre de cheuance & d'honneur : & dit que mieux vaudroit auoir esté mort que d'auoir esté à icelle iournée, jaçoit que riens n'en sceust. Toutesfois le Daulphin retourné en son hostel apres cest homicide, fut dit par ceux de son conseil, d'aller deux cens hommes d'armes deuant la forteresse pour faire rendre ceux qui estoient dedans. Ausquels là venuz, fut l'entrée deffendue. Et pourtant les dessusdits se retrahirent vne partie en la tour du pont, & l'autre en vne tour vers les faulxbourgs, & là demourerent ceste nuit. Et ceux qui estoient en ladicte ville murerent la porte vers la ville, & n'eurent autres nouuelles iusques au lendemain matin, qu'on leur comença tresfort à ietter canons contre ladicte porte. Et assez brief apres allerent quatre ou cinq cheualiers de par le Daulphin parler à iceux, & leur signifier que ils rendissent ladicte forteresse : & se ce ne faisoient il les feroit assaillir & couper les testes, s'ils estoient prins par force. Ausquels fut respondu par le dessusdit Louuelle & Montagu, que monseigneur de Bourgogne leur seigneur auquel le Daulphin l'auoit liuré, leur auoit baillé en garde, & qu'ils ne le renderoient pas s'ils n'auoient certaines enseignes de luy. Pourquoy les dessusdits ce oyans, retournerent en la ville: & tantost apres r'allerent deuers ladicte forteresse, & y menerent messire Anthoine de Vergy, lequel appella les deux seigneurs dessusdits, & ils respondirent en demandant, comment il luy estoit. Et sans faire à ce responce, il leur dit. Freres, monseigneur le Daulphin me fait dire que vous luy rendez ceste forteresse, & que se ce ne faictes, & il vous prend dedans par force, il vous fera trencher les testes: & se vous luy voulez rendre & tenir son party, il vous fera des biens, & vous departira des offices de ce royaume tres largement. Apres lesquelles paroles demanderent audit messire Anthoine, s'il sçauoit nouuelles de monseigneur le Duc. A quoy il ne respondit mot, & signa de son doy contre terre, & apres dit: ie vous conseille que vous rendez ladicte forteresse à monseigneur le Daulphin. Et comme deuant dirent que sans auoir nouuelles de monseigneur le Duc, qui la nous a baillée en garde, nous ne la rendrons pas. Et adoncques les cheualiers dudit Daulphin leur dirent. Mettez par escript tel traicté que voulez auoir, & on vous fera responce. Et surce se retrahirent lesdictes parties & feirent les dessusdits



mettre par escript ce qu'il leur pleut & l'enuoyerent deuers ledit Daulphin.

Premier requirent à mettre la forteresse en la main de monseigneur de Bourgongne leur seigneur, qui leur auoit baillée en garde, ou au moins auoir descharge de luy signée de sa main. Item que tous les prisonniers qu'il auoit deuers luy, lesquels auoient esté prins avec ledit Duc, il les rendist quittes sans payer finances. Item que tous les hommes & femmes de quelque estat qu'ils fussent estans dedans ladicte forteresse, avec tous les biens qui y auoient esté de leur party apportez, s'en peussent aller franchement où bon leur sembleroit. Item que ils eussent delay de quinze iours à demourer dedans ledit chastel, tant que leurs cheualx fussent venus. Item qu'ils eussent saufconduit pour deux cens hommes d'armes, qui les viendroient querir pour les conduire où bon leur sembleroit, & que ledit saufconduit durast quinze iours. Apres lesquels articles visitez par ledit Daulphin & son conseil, furent r'enuoyez deuant la forteresse les cheualiers dessusdits, qui par auant y auoient esté enuoyez: lesquels dirent à ceux de dedans que quand à la personne du Duc de Bourgongne, elle ne soit plus demandée: car on ne la peut auoir. Quant aux prisonniers qui ont esté prins avec luy, ils sont bien à monseigneur le Daulphin, & leur departira des biens & offices de ce Royaume & n'en soit requis plus auant. Quant aux biens qui sont dedans la forteresse appartenans au Duc de Bourgongne, ils demourront en la main de monseigneur le Daulphin, & les fera receuoir par inuentoire en baillant descharge à ceux qui les ont en garde. Et les autres qui sont leans emporteront tous leurs biens, lesquels ils ont apportez. Quant aux quinze iours que demandez de delay, riens ne fera: mais on vous fera conduire iusques à Bray sur Seine. Quant au saufconduit de cc. hommes d'armes, il n'est nul besoing de l'auoir puis qu'aurez conducteurs. Toutesfois apres plusieurs parolles, les dessusdits cheualiers de Ionuelle & de Montagu pour eux & pour leurs gens, feirēt traicté avec ledit Daulphin par si, qu'ils s'en iroient sauf leurs corps & leurs biens, en rendant ladicte forteresse: & à ce furent receuz, & tous les biens & ioyaulx qui estoient audit Duc de Bourgongne, demourerent leans: & avec ce demoura avecques le Daulphin la dame de Giac, laquelle (comme il fut commune renommée) fut consentant de ladicte homicide. Et pareillement y demoura Philippe Iosquin, & n'osa retourner deuers la Duchesse de Bourgongne ne deuers son fils Comte de Charrolois, pourtant qu'il n'estoit pas bien en leur grace: lequel Philippe Iosquin estoit natif de Dijon fils de l'armurier de feu le Duc Philippe de Bourgongne: & par long tēps auoit esté moult feable & aymé par dessus tous du dessusdit Duc de Bourgongne: c'est à sçauoir de ses seruiteurs: & mesmes luy faisoit porter son seel de secret, & signer lettres de sa main: comme se ledit Duc les eust signées, & y auoit peu de difference du signé que contrefaisoit le dessusdit Philippe Iosquin à l'encontre de celui que faisoit le Duc de sa propre main: pour lesquelles besongnes & grans auctoritez, il fut par plusieurs fois moult hay de plusieurs seigneurs repairans en la court d'iceluy Prince: mais neantmoins estant en l'estat dessusdit, il acquist de grans finances, & fit vne moult notable maison dedans la ville de Dijon: lesquelles cheuances à son departement il delaisa en plusieurs lieux: c'est à sçauoir en Bourgongne, en Flandres & ailleurs: lesquelles furent prinſes comme confisquées des officiers du Comte de Charrolois, & les donna à aucuns de



ses seruiteurs : & le dessusdit Philippe ainsi ( comme dit est ) s'en alla desnue de tous biens.

ITEM le lundy vnziesme iour de Septembre , apres ce que le Duc de Touraine Dauphin eut tenu dedans la ville de Monstreau grand conseil sur ses affaires : affin qu'il ne fut noté d'auoir rompu ladicte paix , & aussi qu'on ne le tenist pour pariure , feist escrire plusieurs lettres : lesquelles il enuoya à Paris, Reims, Chaalons & autres bonnes villes du Royaume: desquelles la copie de celles qui furent enuoyées à Paris s'ensuit. Chiers & bien ayez nous tenons qu'assez auez eu la cognoissance , comment n'agueres nous conueinsmes avec le Duc de Bourgongne au lieu de Pouilly, apres ce que nous luy eusmes accordé toutes les choses, qu'il nous requist en faueur du bien de la paix . Et pour escheuer la perdition de la seigneurie de monseigneur & de nous , & qu'entre les autres choses il nous promet par la foy & serment de son corps dedans vn mois faire guerre aux Anglois anciens ennemis de mondit seigneur & de nous , & en ce faisant il eut esté accordé par entre nous deux d'ensemble cōuenir de rechief à besongner, & pourueoir aux besongnes de cest Royaume & contre les ennemis dessusdits : pour laquelle cause nous veinsmes en ceste ville de Monstreau, & en icelle attendismes dixhuiet iours la venue dudit Duc de Bourgongne , auquel feismes bailler le chastel de ceste ville de Monstreau en nous deslogeant d'iceluy. Et apres ce que nous conuenismes avec luy en la maniere qu'il demanda , nous luy remonstrasmes amiablement , comment ( nonobstant ladicte paix & seldictes promesses ) il ne faisoit n'auoit fait aucune guerre ausdits Anglois , & avec ce n'auoit fait issir les garnisons qu'il tenoit , comme il auoit esté traicté & promis par ledit de Bourgongne, desquelles choses nous le requismes. Lequel de Bourgongne nous respondit plusieurs folles parolles, & chercha son espée à nous enuahir & villenner en nostre personne. Laquelle comme apres nous auons sceu, il contendoit à pretendre & mettre en la subiection: de laquelle chose par diuine pitié & par la bonté & ayde de noz loyaux seruiteurs , nous auons esté preseruez , & il par sa follie mourut en la place . Les choses dessusdictes nous vous signifions , comme à ceux qui en auront grand ioye comme nous sommes certains , qu'en telle maniere de tel peril nous auons esté preseruez . Et vous prions & neantmoins vous mandons sur toute bonne loyauté , que tousiours auez eu à mondit seigneur & à nous, que pour quelque chose qu'il aduiene, vous ne laissez que ne faciez bonne resistance ausdits ennemis de monseigneur & de nous, & vous preparez à faire toute guerre. Et soyez certains, que nous vous secourrons & ayderons & conforterons avec toute nostre puissance: laquelle par la grace de Dieu est bonne & grande. Et voulons que toutes choses aduenues soient pardonnées, & que pour icelles à nul ne soit fait dommage ou desplaisance : mais l'abolition faicte par mondit seigneur nous garderons de point en point, & ladicte paix . Et ce vous promettons en bonne foy & en parolles de fils de Roy. Et sur ce enuoyons noz lettres patentes au Preuost des marchans, des escheuins & bourgeois de Paris , à icelles signifier à vous & aux autres & à publier, où il appartiendra: & de ce donnerons telles seuretez comme il voudra: & entretiendrons au Duc de Bourgongne & à ses seruiteurs , & à tous autres qui ont tenu son party paix, comme elle fut concordée & publiée sans icelle enfaindre en aucune maniere , desirant tenir



tous les subiects de mondit seigneur & les nostres à resister en bonne paix ausdits ennemis. Et à ce est nostre intention à nous employer en nostre personne, & voulons que les choses dessusdictes faciez publier és villes & places autour de voz marches, & que semblablement icelles choses vous asseurez de par nous. Chers & bien aymez nostre seigneur vous ayt en sa sainte garde. Escript à Monstreau où fault Yonne l'vnziesme iour de Septembre. Ainsi signé Charles Champion, au dos estoit escript. A noz treschiers & bien aymez les bourgeois, clergé, manās & habitans de Paris. Ausquelles lettres par especiales villes qui tenoient le party du Roy & du Duc de Bourgongne, ne fut pas par eux rendue aucune responce. Et pareillement messire Clugnet de Brabant qui se tenoit à Vitry, escriuit à plusieurs bonnes villes pour les attraire du party du Daulphin : mais quand il veit qu'ils ne luy respondirent pas à son plaisir, il commença à leur faire tresforte guerre.

*Comment le seigneur de Montagu escriuit à plusieurs bonnes villes du Royaume. Et des Parisiens qui refirent serment nouuel apres la mort dudit Duc de Bourgongne.*

## CHAP. CCXIII.

**L**Tem le sire de Montagu apres ce qu'il fut retourné de Monstreau à Bray sur Seine le plus tost qu'il peut, fait escrire plusieurs lettres contenant que par ledit Duc de Touraine Daulphin, & son conseil auoit esté commis crime à la personne de son seigneur le Duc de Bourgongne : lesquelles lettres il enuoya à Troyes, Reims, Chaalons & autres bonnes villes, tenans le party du Roy & du Duc de Bourgongne. Esquelles lettres aussi leur prioit treshumblement qu'ils fussent bien sur leur garde, & que point n'obtemperassent aux parolles & mensonges de ceux tenans la partie du Daulphin. Disant par lesdictes lettres que bien estoit leur desloyauté descouuerte : mais se entretenissent tousiours en leurs bons propos de la partie du Roy, & du Comte de Charrolois successeur du Duc de Bourgongne : par lequel ils auroient bonne & briefue ayde au plaisir de Dieu. Lesquelles lettres aux bonnes villes dessusdictes furent benignement receuës, en remerciant moult de fois ledit sire de Montagu par son messaige, disans que moult fort estoient dolens de l'adventure dessusdicté. Et quand le xj. iour de Septembre vint à la cognoissance des Parisiens, que le Duc de Bourgongne estoit ainsi mort, furent tant dolens & confus, que plus ne pouoient. Et pourtant lendemain au plus matin qu'ils peurent, s'assemblerent le Comte de saint Pol, le lieutenant du Roy à Paris, le Chancelier de France, les Preuosts de Paris & des marchans : & generallyment tous les conseillers & officiers du Roy, & avec eux grād quantité des nobles & bourgeois de la ville, & grand multitude du peuple : lesquels apres ce qu'on leur eut fait remonstrer la mort du Duc de Bourgongne, & l'estat comment icelle auoit esté perpetrée & faicte, firent serment au dessusdit Comte de saint Pol de le seruir & obeir, & d'estre & entendre avec luy de toute leur puissance à la garde & deffence de ladicte ville de Paris & des habitans : & generallyment à la conseruation de tout le Royaume, à resister de corps & de biens à la damnable intention & enforcemens des crimineurs, seditieux, rompeurs de la paix & vnion de ce Royaume : & de ce poursuivre de tout leur pouoir vengeance & reparation contre les  
conspirateurs,



conspirateurs, coupables, & consentans de la mort & homicide dudit Duc de Bourgogne, denoncer & accuser deuers iustice tous ceux portans faueur ausdits conspirateurs. Promeirent aussi de non rendre la ville de Paris ne faire quelque traicté à part sans le sceu l'un de l'autre. Et semblablement leur feit serment ledit Comte de saint Pol, desquels sermens dessusdits furent faictes lettres seellées de leurs sceaux: lesquelles furent enuoyées à Senlis & autres villes, tenans leur party, affin de les induire à faire le serment pareil à leurs gouverneurs. Apres lesquelles besongnes accomplies, furent prins dedans ladicte ville de Paris & mis prisonniers plusieurs hommes & aussi aucunes femmes tenans, ou qui auoient tenu le party dudit Duc de Touraine Daulphin, tant de ceux qui estoient retournez depuis la paix comme autres, sur quoy on auoit soupçon: & en y eut aucuns executez par iustice briefuement ensuiuant.

*Comment le dessusdit Daulphin se partit de Monstreau: de la deliurance de ceux qui auoient esté en la compagnie du Duc de Bourgogne, & autres matieres suyuant.*

CHAP. CCXV.

**E**N ces propres iours apres que le dessusdit Daulphin eut constitué messire Pierre de Guitry capitaine de Monstreau: lequel de Guitry auoit esté present quand le Duc de Bourgogne fut mis à mort, se departit de là à tous ses gens, & enuoya tous les prisonniers dessusdits, la dame de Giac & Philippe Iossequin à Bourges en Berry: lesquels prisonniers feirent serment audit Daulphin de le seruir & tenir son party fors Charles de Bourbon, par dessus nommé & messire Pierre de Giac. Et quant aux autres jaçoit ce qu'ils fussent par plusieurs fois requis d'iceluy Daulphin, & de ceux de son conseil qu'ils voulsissent demourer avec luy & faire ledit serment, & que grans biens & honneurs leur feussent offerts à estre fais: neantmoins oncques ne s'y voulurent consentir, ainçois feirét respõce à toutes lesdictes requestes, que mieux aimoient de mourir en prison ou autrement comme il plairoit au Daulphin, que de faire chose qui à eux & à leurs successeurs peust estre reprouuée à mal. Et pourtant voyant leur volenté & que autre chose on n'en pouoit auoir, furent depuis tous mis à deliurance moyennant certaine grand somme de pecune qu'ils payerent pour leur rançon, excepté ledit messire Charles de Lens Admiral, qu'ils feirent mourir & ne retourna pas. En outre le dessusdit Daulphin venu en la ville de Bourges (comme dit est) manda gens d'armes de toutes parts à venir par deuers luy, à tout lesquels il alla en Anjou, & eut parlement avecques le Duc de Bretaigne: lequel consentit qu'une partie des nobles de son païs seruissent ledit Daulphin: & avecques ce luy vint grand ayde d'Escoçois, qu'il enuoya & feit conduire sur la riuere de Loyre, & de là alla à Poictiers: puis en Auvergne & en Languedoc par tout assembler gens, & faire alliance sur intention de resister contre tous ceux qui greuer ou nuyre luy voudroient. Et par toutes ses bonnes villes tenans son party, faisoit prononcer ce qu'il auoit fait contre le Duc de Bourgogne, estoit & auoit esté en bonne & iuste querelle, en remonstrant plusieurs tiltres qui à ce faire l'auoient meu pour sa iustification: lesquels seroient trop longs à racompter. Et entre-temps le Roy de France, la Royne & ceux de leur conseil qui auoient sceu les nouuelles de toutes les matieres dessusdictes, en estoient tref-



deplaisans. Et affin d'y pourueoir furent enuoyez mandemens royaulx en diuerses parties du Royaume, où le Roy dessusdit estoit obeÿ, contenant la mort du Duc de Bourgongne & là desloyauté des faicteurs : mandans & deffendans aux gouuerneurs d'icelles sur tant qu'ils pouoient meffaire, qu'au Daulphin n'à ceux tenant son party, ils ne baillassent conseil, confort & ayde ne faueur, mais se preparassent à toute diligence d'y resister : & à ce faire & pourfuiuir la reparation du Royaume, ils auroient bien brief bonne ayde.

*Comment Philippe Comte de Charrolois sceut la piteuse mort de son pere : le conseil qu'il tint sur ses affaires, & les trefues qu'il print aux Anglois & autres matieres.*

## CHAP. CCXVI.

**Q**R est vray que Philippe Comte de Charrolois seul fils & heritier du Duc Iean de Bourgongne, estant à Gand luy furent dictes les nouuelles de la piteuse mort de son pere. Pour lesquelles il eut au cuer si grand tristesse & desplaisir, qu'à grand peine par aucuns iours le pouoient ses gouuerneurs reconforter. Et quand madame Michelle de France sa femme, & seur du Duc de Touraine Daulphin le sceut, elle en fut moult troublée & en grand ennuy, doutant entre les autres choses, que son seigneur & mary ne l'eut pource moins agreable, & qu'elle ne fut esloignée de son amour plus que parauant n'auoit esté, ce que pas n'aduint : car en dedans brief terme ensuiuant par les exhortations & amiables remonstrations que luy feirent ses dessusdits gouuerneurs, il fut trescontent d'elle, & luy monstra aussi grand signe d'amour que parauant auoit fait. Et tost apres tint conseil avec ceux de Gand, de Bruges & d'Yppre : apres lequel sans le releuer print la possession de la Comté de Flandres, & puis s'en alla à Malines, où il eut parlement avec le Duc de Brabant son cousin Iean de Bauiere, son oncle & la Comtesse de Hainault sa tante sur plusieurs ses affaires : duquel lieu de Malines s'en retourna à l'Isle. Et de ce iour en auant se nomma Duc de Bourgongne en ses lettres, prenant tous les tiltres qu'auoit le Duc Iean son pere. Et là vindrent à luy plusieurs grans seigneurs pour luy offrir leur seruice : lesquels parauant auoient esté seruiteurs de son feu pere. Si en retint vne partie de son hostel, & aux autres promeist grans biens à faire. Vindrēt aussi de Paris vers luy maistre Philippe Moruillier premier President en Parlement, & plusieurs autres gens notables : avecques lesquels & ceux de son conseil, ledit Duc conclud d'escire aux bonnes villes qui tenoient le party du Roy & le sien certaines lettres : contenans, que comme ils auoient tenu le party de son pere, ils voulsissent tenir le sien. Mandant à iceux aussi qu'il leur feroit impetrer trefues aux Anglois bien brief. Et si leur feit sçauoir, qu'ils enuoyassent de leurs gens deuers luy à Arras le dixseptiesme iour d'Octobre : & que ceux qui y seroient enuoyez, eussent puissance d'accorder ce que par luy leur seroit requis. Et apres ledit Duc de Bourgongne enuoya ses ambassadeurs à Roüen deuers le Roy d'Angleterre, affin d'impetrer les trefues dessusdictes certaine espace de temps pour tous les pays, estans en l'obeissance du Roy & de luy : laquelle ambassade feirent l'Euesque d'Arras, le seigneur de Thoulougon, messire Guillaume de Champ-diuers, messire Guillebert de Launoy & aucuns autres : lesquels impetrerent & obtindrent les dessusdictes trefues, sur l'esperance de plus



plus auant proceder avec lesdits Anglois . Durant lequel temps les Daulphinois estans à Compiengne & sur les marches , où ceux tenans la partie de Bourgongne recommencerent comme deuant à mener tresforte guerre les vns aux autres . Et d'autre costé la Hire , & Pothon de sainte Treille , & autres en tresgrand nombre prindrent la ville de Crespy en Launois & le chastel de Clarcy . Par le moyen de laquelle prinse la ville de Laon , les paÿs de Launois & Vermandois furent tenus en grand subiection . Et entre-temps le dixseptiesme iour du mois d'Octobre venu , vindrent à Arras deuers le Duc de Bourgongne messire Iean de Luxembourg & plusieurs autres seigneurs & capitaines , avec les commis des bonnes villes , qui auoient esté mandez , comme dit est : lesquels tous ensemble furent requis par le Doyen du Liege au commandement dudit Duc tresaffectueusement : & par especial ausdits seigneurs & capitaines , que comme ils auoient seruy son pere , ils voulsissent seruir à luy en vne expedition , laquelle il contendoit à faire prochainement , pour le bien du Roy & de tout son Royaume . Et pareillement fut requis à ceux des bonnes villes qu'ils promeissent de tenir son party , & luy baillassent confort & ayde se besoing en estoit : lesquelles requestes tant desdits seigneurs & capitaines , comme de ceux desdictes bonnes villes , luy furent accordées .

*Comment le Duc Philippe de Bourgongne fait faire vn seruice à saint Vaas d'Arras pour feu le Duc Iean son pere, & autres plusieurs matieres suiuanes apres.*

CHAP. CCXVII.

**L**Tem le treiziesme iour dudit mois d'Octobre fait ledit Duc de Bourgongne faire vn seruice en l'Eglise saint Vaas d'Arras pour le salut de l'ame du Duc Iean son pere : auquel seruice furent les Euesques de Amiens , de Cambray , de Theroüenne , de Tournay & d'Arras , avec plusieurs Abbez de Flandres , d'Arthois & des paÿs à l'enuiron : & estoient en tout vingtquatre croces . Et faisoient le dueil avec ledit Duc messire Iean de Luxembourg & messire Iaques de Harcourt . Et dit la Messe l'Euesque d'Amiens , durant laquelle messe prescha frere Pierre Floure docteur en Theologie de l'ordre des freres prescheurs , inquisiteur de la foy en la Prouince de Reims : lequel prescheur en sondit preschement desenhortoït ledit Duc tant qu'il pouoit , qu'il ne prensist vengeance de la mort de son pere : en luy remonstrant qu'il requist à iustice reparation à luy estre faicte , disant que se iustice n'estoit assez forte , qu'il la deuoit ayder & non par sa puissance prendre vengeance , laquelle appartient à Dieu tant seullement . Pour lequel propos & desenhortement aucuns nobles là estans avec ledit Duc , ne furent pas bien contens dudit prescheur . Apres lequel seruice fait vindrent audit lieu d'Arras deuers iceluy Duc , sire Iean de Sens cheualier docteur en Loix & Chancelier de feu le Duc Iean , messire Andrieu de Valines , maistre Iean d'Orle aduocat en Parlement , Iean de Caumesnil & aucuns autres bourgeois tous ensemble enuoyez de par le Comte de saint Pol , & les Parisiens deuers ledit Philippe pour sçauoir ce qu'il auoit volenté de faire : ausquels apres que ioyeusement de luy & de ceux de son conseil eurent esté receuz , fut dit qu'en dedans briebs iours ledit Duc feroit traicté & alliâce avecques ledit Roy d'Angleterre , par le consentement du Roy de France . Et avecques ce



de toute sa puissance pourfuiroit vengeance & reparation de la cruelle mort de son pere. Apres lesquelles responces & autres conclusions prinſes avec eux, ſ'en retournerent à Paris pour reporter les nouuelles, & entretenir les Pariſiens & autres villes ſur les marches de l'Isle de France en bonne obeïſſance. Et ce fait ledit Duc de Bourgongne r'asſembla pluſieurs notables ſeigneurs des plus feables de ſes paÿs, tant d'Egliſe comme ſeculiers: avecques leſquels tint pluſieurs deſtroits conſeils, pour ſçauoir comment il ſ'auoit à conduire & gouuerner ſelon les grans affaires qui luy eſtoient ſuruenuz: & par eſpecial de la mort de ſon pere. Si furent diuers opinions. Mais finalement ſelon le conſeil de la plus grand partie fut conclud & deliberé, que pour le mieulx la licence, auctorité & congé du Roy de France, il falliaſt au Roy d'Angleterre, comme dit eſt deſſus. Et ſur ce furent brief enſuiuant enuoyez ſes ambaffadeurs de rechef à Roÿen deuers ledit Roy: c'eſt à ſçauoir l'Eueſque d'Arras, meſſire Actis de Brimeu, meſſire Roland d'Vniquerke & aucuns autres: leſquels là venus à tout la charge qu'ils auoient, furent benignement receuz par le Roy deſſusdit, & auſſi par ſes Princes. Car moult deſiroit d'auoir alliance avec ledit Duc de Bourgongne, pource qu'il ſçauoit que par ſes moyens pourroit auoir dame Catherine fille du Roy de France mieulx que par nul autre, laquelle luy eſtoit moult aggreable. Et pourtant quand leſdits ambaffadeurs eurent monſtré les cauſes & articles pourquoy ils eſtoient enuoyez, en fut iceluy en partie aſſez content: & leur feit reſponce que dedans brief temps il enuoyeroit ſes gens deuers leur ſeigneur & maïſtre, qui ſeroient chargez de ce qu'ils auroient intention de faire. Apres laquelle reſponce ſ'en retournerent les deſſusdits à Arras. Et enuiron la ſainct Andrieu enſuiuant vindrent les ambaffadeurs dudit Roy d'Angleterre deuers ledit Duc audit lieu d'Arras: c'eſt à ſçauoir l'Eueſque de Roceſtre, les Comtes de Vvaruich & de Quin, avecques pluſieurs autres cheualiers & eſcuyers: lequel Duc leur feit tres-honorable reception. Et apres ce monſtrerent aucuns articles de par le Roy, contenans les traictez tels qu'il les vouloit auoir, avecques Charles Roy de France & ledit Duc de Bourgongne: ſur leſquels furent baillez pareillement certains autres articles de par ledit Duc de Bourgongne, eſquels eſtoit contenu & declairé grand partie de ſa voulenté. Finalement tant enuoyerent leſdits Roy d'Angleterre & Duc de Bourgongne l'un deuers l'autre, qu'ils vindrent à concluſion d'auoir bon appoinctement enſemble, ou cas que le Roy de France & ſon conſeil en ſeroient contens. Lequel Roy de France & la Royne ſa femme, & dame Catherine leur fille pour lors eſtās à Troyes en Champaigne, eſtoient gouuernez & conduits de pluſieurs qui eſtoient à la poſte, & tenans la partie dudit Duc de Bourgongne. Sur leſquels traictez & appoinctemens ainſi encommencez, fut ordonné que les gens des deux parties ne feroient point guerre nullement l'un contre l'autre: c'eſt à ſçauoir les gens du Roy de France, & du Duc de Bourgongne aux Anglois, ne les Anglois auſſi à eux. Et furent les trefues de rechef reconfirmées, & ſi fut appoincté que ledit Roy d'Angleterre enuoyeroit ſes ambaffadeurs en la compagnie d'iceluy Duc de Bourgongne audit lieu de Troye en Champaigne deuers le Roy de France, pour au deſſus parcōclurre des deſſusdits appoinctemens, lequel Duc auoit intention d'y aller brief enſuiuant. Apres leſquelles beſongnes, & qu'iceux ambaffadeurs eurent eſté grandement feſtoyez & moult



moult honnorez dedans la ville d'Arras par le Duc de Bourgongne, & ceux de son conseil, s'en retournerent à Roüen deuers leur Roy : durant lesquels traictez & besongnes dessusdictes, messire Jaques de Harcourt se monstroït en toutes manieres bienvueillant de la partie du dessusdit Duc de Bourgongne: & estoit des premiers appellez à tous ses plus priuez conseils : & aussi luy faisoit ledit Duc grand honneur & reuerence, autant qu'à nul autre de sa court & l'aymoit moult cordialement : car depuis la mort du Duc Iean son pere auoit fait serment de le seruir en tous ses affaires. Lequel messire Jaques pour ce temps faisoit grandemēt reparer, fortiffier & pourueoir de viures, habillemens de guerre & autres choses necessaires à la ville & forteresse du Crotoy, dont il auoit le gouuernement de par le Roy de France.

*Comment messire Iean de Luxembourg feit grand assemblée de gens d'armes, qu'il mena deuant Roye, & autres besongnes qui se ferrent en ce temps.*

CHAP. CCXVIII.

**E** Tem ensuiuant les besongnes dessusdictes, & pour icelles commencer à mettre à execution, le Duc de Bourgongne feit grand assemblée de gens d'armes tant en Arthois, en Flandres comme es pays à l'environ : lesquels avec plusieurs capitaines il enuoya sous le gouuernement de messire Iean de Luxembourg vers Peronne, pour passer à monstres, & de là aller mettre le siege deuant le chasteau de Muyn, qui estoit fort garny des gens du Daulphin. Lesquels faisoient en la ville d'Amiens, à Corbie & es marches d'entour moult de tribulations: & là audit lieu de Peronne avecques le dessusdit de Luxembourg, s'assemblerent plusieurs seigneurs : c'est à sçauoir le seigneur de l'Isle-Adam mareschal de France, le Vidame d'Amiens, Anthoine seigneur de Croÿ, le Borgne de Fosseux cheualier & Iean de Fosseux son frere, le seigneur de Longueual, Hector & Philippe de Saueuses, le seigneur de Humbecourt, messire Iean de Luquerque, le seigneur de Cohen, & moult d'autres cheualiers & escuyers notables, qui tous ensemble de Peronne allerent loger à Lyhons en Santerres & es villages entour, esperans (comme dit est) aller mettre le siege deuant Muyn, mais en brief leur propos fut mué. Car estans en la ville de Lyhons le dimanche dixiesme iour de Decembre par nuict messire Karados de Quesnes, Charles de Flauy, le Bastard de Tournemine & vn nommé Harbonniers accompagnez de cinq cens combatans ou environ, tenās la partie du Daulphin issirent de Compiengne, & cheuaucherent iusques à la ville de Roye en Vermandois: la quelle par faute de guet ils assaillirēt, & entrerent vne grand partie dedans : & tantost s'assemblerent au marché, & commencerent à crier ville gaignée viue le Roy & le Daulphin : auquel cry s'esueillerent plusieurs des habitants, qui tantost voyans qu'ils ne pouoient à eux resister s'en fuyrent, & se sauuerent par dessus les murs : & vne partie des Daulphinois allerent ouurir la porte, & meirent tout le surplus de leurs gens avec leurs cheualx dedans la ville. Et lors Parceual le Grand qui estoit capitaine de ladicte ville de par le Duc de Bourgongne, fut dudit effroy esueillé : & comme aucuns autres (quand il apperceut qu'il ne pouoit resister à l'entreprinse dessusdictes) se sauua le mieulx qu'il peut, & issit de la ville, laissant derriere sa femme & ses enfans & grand partie de ses



biens : & au plus tost qu'il peut, s'en alla à Lyhons en SanTERS deuers messire Iean de Luxembourg son maistre, & tresdolent luy racompta les nouuelles dessusdictes. Pour lesquelles ledit messire Iean de Luxembourg feit tost sonner ses trompettes, & assembla tous ses gens d'armes : à tout lesquels par ordonnance il appella par deuers ladicte ville de Roye, & enuoya certain nombre de coureurs deuant la ville, sçauoir que c'estoit : lesquels coureurs trouuerent encores les eschelles dressées aux murs de la dessusdicté ville, par où lesdits Daulphinois l'auoient prinse : lesquels voyans lesdits coureurs & plusieurs gens d'armes sur les champs, se preparerent incontinent d'eux deffendre : & commencerent à tirer canons, d'arbalestres & arcs à main tresfort contre leurs ennemis. Toutefois nonobstant leurs deffences furent prins vns faulsbourgs sur eux, qu'ils cuidoient garder : à laquelle prinse tant d'un costé comme d'autre y eut plusieurs hommes naurez : entre lesquels y fut nauré en la partie de messire Iean de Luxembourg vn vaillant homme d'armes nommé Robinet de Rebretaignes, lequel à l'occasion d'icelle naureure, mourut en dedans certain temps ensuiuant. En apres messire Iean de Luxembourg feit loger grand nombre de ses gens tout autour de la ville en plusieurs faulsbourgs & autres maisons, qui y estoient : & il se logea à vn village enuiron à demie lieue de ladicte ville. Et apres enuoya le sire de Humbercourt Baillif d'Amiens à Amiens & à Corbie, requerre qu'on luy enuoyast des arbalestriers, canons & autres habillemens de guerre, pour combattre & subiuguer la ville de Roye : lesquels d'Amiens & de Corbie enuoyerent avec ledit de Humbercourt des Arbalestriers & habillemens dessusdits treslargement. Et pareillement furent mandez les arbalestriers de Douay, Arras, Peronne, saint Quentin, Montdidier, Noyon & autres de l'obeissance du Roy : auquel mandement furent enuoyez diligemment en grand nombre par les gouuerneurs dessusdictes villes. Et apres que les arbalestriers furent venus & aussi les habillemés de guerre : ledit de Luxembourg feit trespuissamment enuironner & combattre ladicte ville. Et feit asseoir plusieurs bombardes & gros engins contre les portes & murailles, dont les assiegez furent moult trauaillez. Neantmoins se defendirent vigoureusement, & feirent aucunes saillies sur les assiegeans, où ils profiterent bien peu. Finablement lesdits assiegez non ayans l'esperance d'estre secouruz, feirent traicté avec ledit de Luxembourg ou ses commis le dixhuitiesme iour de Ianuier, par condition qu'ils s'en iroient sauue leurs corps & leurs biens : & avec ce emporteroient aucune partie des biens qu'ils auoient gaignez en la ville. Apres lequel traicté fait & confirmé se partirent sous le saufconduit de messire Iean de Luxembourg chef de ceste armée, lequel avec ce pour les conduire leur bailla Hector de Sauueses. Et tous ensemble quand ils furent hors de la ville, prindrent leur chemin vers Compiengne, & cheuaucherent tresfort : mais assez tost apres leur partement, vindrent audit lieu de Roye enuiron deux mille Anglois, dont estoient capitaines le Comte de Hautiton & le seigneur de Cornouaille son beau pere : lesquels Anglois venoient en icelle place en l'ayde des gens du Duc de Bourgogne contre les Daulphinois : car, comme dit est, icelles parties auoient desia trefues l'un avec l'autre. Esperans auoir bien brief bonne paix ensemble, cōme ils eurent. Lesquels Anglois là venus sçachans la departie des Daulphinois, se meirent hastiuement sur le train, & les poursuiuirēt tant & si roidemēt, qu'ils



qu'ils les rataindirent enuiron à quatre lieües de Roye. Et tantost qu'ils les apperceurent sans barguigner, frapperent en eux: jaçoit ce qu'ils estoient en petit nombre, pourtant qu'ils auoient cheuauché si fort, que les trois parts de leurs gens estoient demourez en train derriere eux: & avec lesdits Anglois s'estoient boutez grand quantité de gens d'armes de messire Jean de Luxébourg: desquels estoient les principaulx Butor Bastard de Croÿ, Aubellet de Folleuille, le Baillif de Fockessole, le Bastard Dunon & moult d'autres gentils-hommes. Et finablement les dessusdits Daulphinois sans faire grand resistance ne deffence, furent mis tantost en grand desfroy, & par iceux prins, morts & destrouffez: sinon aucuns qui se sauuerent par fuite le mieux qu'ils peurent és bois & autres lieux. Et adonc ledit Hector ce voyant, print là messire Karados de Quesnes comme son prisonnier, afin de le sauuer & le r'enuoyer: mais ledit Cornouaille luy osta tantost en disant qu'il n'auoit cause de le prendre, attendu qu'ils auoient faufconduit de son capitaine. Et pource que ledit Hector ne voulut pas laisser aller aux premieres parolles, iceluy Cornouaille luy donna de son poing à tout son gantellet sur le bras & le repoulsa assez durement, dōt grandement fut troublé iceluy Hector: mais il n'en peut auoir autre raison parce que les Anglois estoient en plus grand nōbre. Toutesfoies ledit messire Karados, le sire de Flauy & là plus grand partie des hōmes d'armes qui y estoient, furent prisonniers desdits Anglois: & ceux qui furent prins des Picards, furent tous tuez par iceux: pourtant qu'ils ne les osoient ramener à leurs logis pour le faufconduit dessusdit, excepté Harbōniers qui fut prins d'Aubellet de Folleuille & mené à Noyon, où il eust la teste couppée: & apres ladicte destrouffise fen retournerent les dessusdits Anglois à tout leurs prisonniers à vn village à deux lieües de Roye, & là se logerēt. En outre le dessusdit Hector de Saueuses au plus tost qu'il peust, retourna deuers messire Jean de Luxembourg & luy racompta l'estat de la dessusdicte destrouffise, dont grandement fut troublé & ennuié de ce que son faufconduit auoit esté ainsi enfraint & rompu, & par especial de ceux qui estoient sous sa conduicte & de son armée. Pourquoy tout esmeu enuoya deuers Anthoine seigneur de Croÿ, luy signifier qu'il luy enuoyast Butor de Croÿ son frere & aucuns autres de ses gens, qui auoient rompu son faufconduit pour les punir: & en ce cas pareil manda au seigneur de Longueual, qu'il luy enuoyast le Bastard de Dunon frere de sa femme: mais les dessusdits de Croÿ & de Longueual ne voulurent pas à ce obeir: & pource leur fut mandé, que s'ils ne les bailloient, ledit de Luxébourg les iroit querre de force en leurs logis: & lors ledit de Longueual dit que s'il y alloit, & il n'estoit plus fort, il ne les emmeneroit pas, & que ainçois il conseileroit qu'on le tuaist: pour lesquelles parolles & aucunes autres touchant icelle besongne, s'engendra grand hayne entre ledit de Luxébourg, & les deux seigneurs dessusdits: laquelle hayne dura long temps apres, toutesfoies n'y eust pour le present faicte autre force, car les facteurs se partirent secrettement, & s'en allerēt où bon leur sembla. Et le lendemain messire Jean de Luxembourg accompagné d'une partie de ses gens, alla veoir le Comte de Hautiton & Cornouaille à leurs logis, ausquels il recommanda ledit messire Karados de Quesnes & autres prisonniers, qui auoient esté prins sous bon faufconduit: mais neantmoins demourerent prisonniers, & furent messire Karados & Charles de Flauy menez en Angleterre, où ils demourerent longue espace: & depuis fu-



rent mis à deliurance parmy payant grand finance: en outre apres que ledit de Luxembourg eut esté certaine espace au logis desdits Anglois, il s'en retourna à Roye. Et le lendemain licencia la plus grand partie de ses capitaines & gens d'armes dessusdits, & s'en alla avec luy Hector de Saueuses mettre garnison en ses forteresses sur la riuere de Sere, & sur les marches de Laonnois à l'encontre des Daulphinois, qui estoient en tresgrand nombre à Crespy en Laonnois: & fut lors ordonné ledit Hector à demourer à Nouuion le Comte, comme chief de toutes icelles frontieres: & de là retourna messire Jean de Luxembourg à son chastel de Beurevoir, veoir sa femme & faire ses aprests pour aller avec le Duc de Bourgongne au voyage qu'il deuoit faire brief ensuiuant.

*Comment les Francois & Bourgongnons commencerent à repaier avec les Anglois, & le siege de Fontaines-Lauagam. Et autres plusieurs matieres suiuanes.*

CHAP. CCXIX.

**D**Es lors en auant commencerent ceux tenans la partie du Roy & du Duc de Bourgongne à repaier, marchander & auoir tres grand acointance avec les Anglois sur les frontieres de Normandie, comme desia la paix eut esté publiée. Ouquel temps les dessusdits Comte de Hautiton & Cornoüaille meirent le siege à tout trois mille combattans deuant la forteresse de Fontaines-Lauagam: laquelle durant toute la guerre auoit tousiours tenu la partie d'Orleans, & pas n'auoit esté subiuguée: pourquoy le païs de Beauuoisis, les marches de Normandie, d'Amiennois & autres à l'environ par icelle auoient esté moult trauaillez, & par long temps. Toutesfois au bout de trois sepmaines ou environ apres le siege meis, se rendirent ceux qui estoient dedans la forteresse ausdits assiegeans, par si qu'ils s'en allerent sauue leurs corps & leurs biens: & apres qu'ils furēt partis fut ladicte forteresse desolée, & mise à ruine: & d'autre partie le xix. iour de Ianuier fut meis le chastel de Muyn en l'obeïssance du Vidame d'Amiens, par certains moyens qu'il eut: dedans lequel chastel comme celuy de Fontaines-Lauagam auoit tousiours tenu le party d'Orleans, & fait moult de trauail par longue espace aux villes d'Amiens, de Corbie, Montdidier & en tout le païs à l'environ: & fut prins dedans vn gentil-homme nommé Bigas de nation Normand, & la dame dudit lieu femme de messire Collart de Calleuille avec aucuns autres en grand nombre de biens: esquels iours le Duc de Bourgongne & toute sa puissance se preparoit pour aller deuers le Roy Charles à Troyes en Champaigne, mandant destroictement par tous ses païs, que tous ceux qui auoient accoustumé de porter armes, fussent prests pour l'accompagner ou voyage dessusdit: & de Gand (où il estoit) s'en vint à Arras & la Duchesse sa femme: auquel lieu il constitua à estre son Chancelier maistre Jean de Torfy Euesque de Tournay: & assembla par vertu desdits mandemens tresgrand nombre de gens d'armes, & aussi le samedy apres les trois Roys, furent criées les trefues entre les Roys de France & d'Angleterre par tout les païs de l'obeïssance du Roy de France & du Duc de Bourgongne, depuis Paris iusques à Boulongne sur la mer, & iusques à Troyes en Champaigne, durant iusques au my Mars ensuiuant sur forme d'auoir paix finale entre les deux Roys dessusdits. Durant lequel temps, les Anglois en grand puissance soubs la conduicte du Comte de Hautiton



ton & Cornoüaille, allerent deuant la ville & chastel de Cleremont: laquelle ville ils assaillirent tres puissamment, mais elle fut bien deffendue par ceux de dedans. Et pourtant que desdits Anglois y eut aucuns morts & naurez audit assaut, bouterent le feu & ardirent le bourg S. Andrieu, où il y auoit moult de belles maisons & de notables edifices: & apres coururent toute la Comté dudit Cleremont, & emmenerent grans proyes avec eux, à tout lesquelles s'en retournerent en la Duché de Normandie.

*Comment le Duc Philippe de Bourgongne partit d'Arras, & alla à grand puissance mettre le siege deuant Crespy en Laonnois: & de là à Troyes en Champaigne deuers le Roy.*  
CHAP. CCXX.

**Q**R est verité qu'apres que le Duc de Bourgongne eut celebré la feste de la Purification nostre Dame, delaisant illec la Duchesse sa femme, s'en alla à son chastel de Bappames, & puis à Oisy en Cambresis deuers sa tante la Comtesse de Hainault: avec laquelle eut parlement, & apres s'en alla à Peronne. Auquel lieu vindrent deuers luy la plus grand partie de ses seruiteurs & capitaines: à tout lesquels cheuaucha iusques à S. Quentin, & là seiourna certaine espace, attendant son exercite & armée: & vindrent deuers luy les ambassadeurs d'Angleterre en armes iusques au nombre de cinq cens combattans ou enuiron: Desquels estoient les principaux le Comte de Varuich & de Quin, & le seigneur de Ros Mareschal d'Angleterre, & messire Loys de Robessart natif de Hainault, qui tous ensemble cheuaucherēt avec ledit Duc à Troyes en Champaigne. En outre vindrent audit lieu de S. Quentin deuers le Duc de Bourgongne les ambassadeurs de la ville de Laon: lesquels avec ceux de la ville de S. Quentin requierent moult instamment le Duc de Bourgongne qu'il voulsist assieger la ville de Crespy en Laonnois, que tenoient les gens du Daulphin qui moult gastoient & destruisoient le pays d'enuiron: laquelle chose en faueur des dessusdits, fut par iceluy Duc accordée. En apres de saint Quentin alla iceluy Duc loger à Crespy sur Sere, & enuoya messire Iean de Luxembourg accompagné de Hector & Philippe de Saueuses, & aucuns autres capitaines logez en vn village assez pres de Crespy comme par maniere d'auantgarde. Et assez brief ensuiuant ledit Duc, de Crespy avec toute son armée alla assieger tout à l'enuiron ladicte ville de Crespy: dedans laquelle estoient bien cinq cens combattans tenans la partie du Duc de Touraine Daulphin: desquels estoient chiefs & capitaines la Hire, Pothon de sainte Treille, Dandonet & autres aduanturiers, qui tous ensemble vigoureuement & de grand courage deffendirent ladicte ville contre lesdits assiegeans. Neantmoins furent de trespres approchez, & plusieurs engins dressez contre les portes & murailles. Si estoient lors avec ledit Duc plusieurs capitaines, qui tout leur temps auoient seruy le Duc Iean son pere: c'est à sçauoir messire Iean de Luxembourg, les seigneurs de l'Isle Adam & de Chastellus tous deux Mareschaulx de France, messire Robinet de Mailly grand Panetier de France, le Veau de Bar Baillif d'Auxi, le Vidame d'Amiens, Anthoine seigneur de Croÿ, messire Philippe de Fosseux & Iean son frere, le seigneur de Longueual, Hector & Philippe de Saueuses, le seigneur de Humieres, qui conduisoient les gens du seigneur d'Antoing, le seigneur de Humbercourt, messire Mauroy de



sainct Leger, le seigneur d'Estenu souverain de Flandres, le sire de Commynes, le sire de Haluin, le bastard de Harcourt à tout les gens de messire Iacques de Harcourt son oncle & moult d'autres notables cheualiers & escuyers du païs dudit Duc: & estoient adonc de son plus priué conseil & ses plus feables gouuerneurs, messire Actis de Brimeu cheualier, & le seigneur de Robais avec l'Euesque de Tournay son Chancelier. Lequel Duc apres qu'il eut fait faire grans preparatiōs, pour assaillir iceux assiegez: en conclusion au bout de quinze iours ou enuiron apres ledit siege meis, fut traicté fait entre les parties, par condition que lesdits assiegez s'en iroient sauue leurs corps & leurs biens, en rendant la ville en la main dudit Duc, pource que c'estoit sa premiere armée, reserué aucuns qui estoient des villes de l'obeïssance du Roy, lesquels demourerēt prisonniers. Apres lequel traicté se departirent les dessusdits sous le sauscōduit dudit Duc de Bourgogne: nō obstant lequel à leur partement, en y eut plusieurs destrouffez: dont ledit Duc & ceux de son conseil furent tresmal contens, & feirent restituer ce qu'il en vint à leur cognoissance. Si s'en allerent iceux Daulphinois à Soissons qui tenoient leur party: laquelle ville de Crespy apres le departement dessusdit, fut pillée & desnée de tous biens portatifs qui y furent trouuez: & apres à la requeste de ceux de Laon, fut la fortification d'icelle ville abbatue & demollie, c'est à sçauoir les portes & murailles: pourquoy en poursuiuant de mal en pis, demourerēt les habitans d'icelle en grād tristesse & non sans cause: car par auant la guerre estoit ville plantureuse remplie de tous biens. Si estoit en la compagnie du Duc de Bourgogne durant ceste armée ( qui ne fait pas à oublier ) ce vaillant capitaine dont en autre lieu est faicte mention nommé Tabary à tout ses brigans: lequel ne fait en conclusion que demy voyage, & demourra en la poursuite comme vous orrez cy apres ensuiuant.

*Comment ledit Duc se conduit apres, en allant audit lieu de Troyes, & depuis qu'il y fut venu: & aussi des ambassadeurs d'Angleterre qui allerent avec luy.*

## CHAP. CCXXI.

**L**ors la ville de Crespy en Laonnois rendue ( comme dit est ) s'en alla le Duc de Bourgogne à Laon, où il fut des gouuerneurs & habitans de ladicte ville receu honnorablement: & de là à tout ses gens qui estoient mille combattans, s'en alla par Rheims à Chaallons en Champagne: ausquelles villes luy fut fait grand honneur & reception, & tousiours estoient en sa compagnie les ambassadeurs du Roy d'Angleterre: duquel lieu de Chaallons cheuaucha en grand ordonnance vers Troyes, & fait vn logis assez pres de Vitry en Partois: laquelle ville avecques aucunes autres forteresses ou païs tenoient les Daulphinois: & lors messire Jean de Luxembourg faisant l'auantgarde, passa parmy la ville audit païs nommée , où y auoit eaües & sources moult brayeuses: si cheuauchoit empres luy messire Robinet de Mailly cheualier grād panetier de France, lequel à tout son cheual se ferit & effondra en vne desdictes sources si auāt, qu'il y demoura: lequel cheual n'auoit point de crins à quoy ledit cheualier se peut tenir ne le retira point dehors, mais mourut là trespiteusement, & le cheual dessusdit se sauua: pour la mort duquel le Duc de Bourgogne & plusieurs autres seigneurs furent trespourrouceuz, & par especial  
ses



ses trois freres, qui estoient en ladicte compaignie en menerent grand dueil: c'est à sçauoir maistre Iean de Mailly, qui depuis fut Euesque de Noyon, Collard & Ferry: toutesfois il fut tiré hors & enterré assez pres de là. En apres le Duc de Bourgongne approchant Troyes, vindrent à l'encontre de luy en grand noblesse plusieurs de Bourgongne & autres notables bourgeois, qui luy feirent tresgrand honneur & reuerence. En la compaignie desquels & aussi des seigneurs qui estoient venuz auecques luy, entra en icelle ville de Troyes le vingt & vnielme iour de Mars, & fut conuoyé par iceux iusques à son hostel: & par tout où il passoit auoit grand multitude de peuple, qui pour sa venue crioit Noël: & tost apres alla deuers le Roy de France, la Royne & dame Catherine, qui le receurent benignement, & luy monstrerent tresgrand signe d'amour: & aucuns briebs iours ensuiuant, furent assemblez plusieurs conseils en la presence du Roy, de la Royne & dudit Duc de Bourgongne, pour auoir aduis sur la paix finale & alliance que vouloit auoir Henry Roy d'Angleterre auecques le dessusdit Roy de France. Pour lequel traicté dessusdit confermé, auoit enuoyé ses ambassadeurs ayans de luy puissance. Finablement apres plusieurs parlemens tenuz auecques lesdits ambassadeurs, fut conclud & accordé en faueur du Duc de Bourgongne & de ceux de son party, que Charles Roy de France dōroit à Henry Roy d'Angleterre Catherine sa fille maisnée en mariage, & auecques ce le feroit vray heritier & successeur apres sa mort de tout son Royaume luy & ses hoirs, en deboutant son propre fils & heritier Charles Duc de Touraine Daulphin: & aussi en adnullant la constitution iadis faicte par les Roys de France & les Pers en grand deliberation: c'est à sçauoir que le noble Royaume de France ne deuoit succeder à femme, n'appartenir: & mesmement fil aduenoit que ledit Roy Henry n'eust hoirs voyans du dessusdit mariage par le moyen d'iceluy traicté & accord, si demourroit il heritier de la couronne de France ou preiudice de tous les royaux & appartenans qui en temps aduenir y pouuoient & deuoient succeder de droicte ligne: & fut tout ce dessusdit accordé par le Roy Charles. Lequel en long temps par auant n'auoit esté en sa vraye memoire, comme dit est dessus. Et estoit content d'accorder & traicter en tous estats selon l'opinion de ceux qui estoient assistens, ou en sa presence tant en son preiudice comme autrement: lequel traicté fait en la forme cy apres declairée, s'en retournerēt les ambassadeurs du Roy d'Angleterre, escheuans les agaits des Daulphinois au mieux qu'ils peurent, deportans auec eux la copie dudit traicté: lequel grandement fut agreable au dessusdit Roy Henry, voyant que par iceluy viendroit à chief de la plus grand partie de son intention. Et pourtāt au plus brief qu'il peut prepara ses besongnes en Normandie, & assemblea ses gēs pour aller audit lieu de Troyes pour confermer iceluy traicté. Et lors estoit demouré de par iceluy Roy Henry à Troyes messire Loys de Robessart, pour accompagner & visiter dame Catherine fille du Roy de France, & femme à venir au dessusdit Roy Henry.

*Comment messire Iean de Luxembourg alla courre à tout sa puissance deuant Alibaudieres, & ce qu'il en aduint.*

CHAP. CCXXII.

BBb iij





Après les besongnes dessusdictes, environ dix iours deuant Pasques, fut enuoyé messire Iean de Luxembourg avec luy cinq cens combattans pour aduiser vne forteresse à six lieües de Troyes vers Vermendois nommée Alibaudieres: dedans laquelle estoient aucuns Daulphinois, qui tresfort dommageoient le païs de Champaigne. Et quand ledit de Luxembourg fut venu assez pres d'icelle, laissa la plus grand partie de ses gens en embusche, & alla avec aucuns autres courre deuant la barriere. A l'encontre duquel faillirent trespagement tout à pied ceux de ladicte forteresse: & commencerent roidement à traire, lancer & combattre ceux de ladicte forteresse contre leurs aduersaires: en laquelle besongne ledit de Luxembourg cheut ius de son cheual, par la cause de ce que sa selle se partit, mais tantost fut releué par ses gens: & incontinent de grand courage tout esmeu d'ire, alla sa lance en sa main de pied combattre tresvaillammét iceux Daulphinois. Et de fait jaçoit-ce que de present eut moins de gens qu'eux, leur feit clorre leur boulleuert, & se retrahirent en grand desfroy. Et presentement manda ses gens, qui estoient en l'embusche dessusdicté. Et feit hastiuement assaillir ledit boulleuert, qui en conclusion fut prins par ledit assault & mis en feu: mais à ce faire y eut plusieurs hommes blecez: & apres ledit messire Iean de Luxembourg s'en retourna à Troyes deuers le Duc Philippe de Bourgogne: auquel lieu on faisoit pour le temps grans preparations pour receuoir le Roy Henry d'Angleterre, qui dedans brief temps deuoit venir pour solemniser & faire la feste de son mariage. Et entre-temps le Duc de Touraine Daulphin, & ceux de son conseil qui estoient à Bourges en Berry ouÿrent certaines nouuelles des alliances, qui se faisoient contre luy: si fut pour ce en grand soulcy, comment il pourroit resister aux entreprinſes & enforcements des deux parties dessusdictes: c'est à ſçauoir du Roy d'Angleterre & du Duc de Bourgogne, ſaichant que par le moyen de la dessusdicté alliance, il estoit en peril de perdre ſa ſeigneurie & l'attente qu'il auoit à la couronne de France. Neantmoins il eut conseil de pourueoir à ſon fait, & luy deffendre au mieux qu'il pourroit. Si feit garnir de ſes gens plusieurs villes qui estoient ſur les frontieres de ſes aduersaires, & y constitua capitaines de ſes plus ſeables de ſon party. Entre lesquels meit à Melun le ſeigneur de Barbaſan grandement accompagné, à Monstreau le ſire de Guitry, messire Robert de Loire à Montargis, le baſtard de Vauru & Pierron de Luppel à Meaux en Brie, le ſeigneur de Gamaches à Compiengne, & en plusieurs autres lieux en feit pareillement. Et avec ce ſe pourueuſt de tresgrand nombre de gens d'armes pour eſtre touſiours aupres de ſa perſonne, en attendant les aduantures qui de iour en iour luy pouoient ſouruenir.

*Pour l'an mille cccc. & xx.*

*Comment le Comte de Conuerſan, messire Iean de Luxembourg ſon frere, le ſeigneur de Croÿ & autres capitaines meirent le ſiege deuant Alibaudieres, & ce qu'il en aduint.*

CHAP. CCXXIII.

Au





**A**V commencement de cest an enuoya le Duc de Bourgogne, Pierre de Luxembourg Comte de Conuersan & de Briaute, messire Jean de Luxembourg son frere & plusieurs de ses capitaines : comme le Mareschal de l'Isle Adam, le Vidame d'Amiens, Anthoine seigneur de Croÿ, Hector de Saueuses, messire Mauroy de S. Legier, le bastard de Thian & aucuns autres en grand nombre mettre le siege deuant le chastel d'Alibaudieres, dont par auant est faicte mention : lesquels dudit chastel auoient refortifié tresbien leur boulleuert, qui autresfois par ledit messire Jean de Luxembourg & ses gens auoit esté prins & mis en feu : & tant en ladicte fortification auoiēt continué, qu'il estoit plus deffensable que iamais n'auoit esté. Mais neantmoins ledit de Luxembourg venu deuant ladicte forteresse sans y faire lóg seiour, fait armer & habiller grand partie de ses gens, lesquels à tout eschelles & autres habillemēs de guerre il mena pour assaillir ledit boulleuert le cuidant prendre, comme autresfois auoit fait : & là tresaprement & par longue espace fut ledit assault continué, tant que les deux parties combattoient l'un contre l'autre tres vaillamment : & estoient contre iceluy dressées aucunes eschelles : sur lesquelles combattirent par grand espace & vigueur Hector de Saueuses, Henry de Chauffour & aucuns autres experts en armes : lequel Henry de Chauffour tresrenommé en armes, estant sur vne desdictes eschelles armé de plain harnois, fut feru d'un fer de lance au vvit de son harnois de iambes parmy son iaret : duquel coup il mourut dedans briefs iours ensuiuant, & là les deffendeurs combattoient par merueilleuse vertu en deffendant leur garde. Durant lequel assault messire Jean de Luxembourg qui estoit au plus pres dudit boulleuert, auoit leué sa visiere de son bacinet, & regardoit la contenance des dessusdits deffendeurs par entre deux chesnes : mais l'un d'iceux ce perceuant, le ferist assez pres de l'œil d'une lance ferrée ou non ferrée, ne sçay pas bien lequel : duquel coup il fut tresdurement nauré, & en perdit finalement la veüe d'iceluy œil, & lors aucuns de ses gens le ramenerent dedans sa tente pour luy reposer : & assez tost apres son estandart qui auoit esté porté audit assault, fut prins par le bout & couppé au plus pres de la lance où il tenoit : dont ledit de Luxembourg en poursuivant de courroux en autre fut tresiré : pour lesquels inconueniens & aussi pour la grand resistance des deffendeurs cessa pour ceste fois ledit assault, mais ce ne fut pas qu'il n'y eut plusieurs des assaillans morts & naurez. En outre le Comte de Conuersan & les autres capitaines se logerent tout à l'enuiron de ladicte forteresse. Et furent assis contre la porte, tours & murailles d'icelle plusieurs grosses bombardes, pour iceluy chastel confondre & abbatre : & ledit messire Jean de Luxembourg pour la grand douleur de sa bleseure assoulager, fut remené à Troyes en Champaigne, où il fut songneusement visité par notables medecins. Et son frere le Comte de Conuersan dessusdit demoura principal conducteur d'iceluy siege : & là par les engins dessusdits, fait tant continuer qu'icelle forteresse fut fort dommagée, & la porte & aucunes tours abbatues iusques à moitié ou enuiron : pourquoy les assiegez commencerent à eux esbahir, & requirent d'auoir parlement avec ledit Comte, lequel leurs fut accordé : mais pour ceste premiere fois ne peurent estre d'accord : parquoy incontinent que ceux qui estoient issus pour traicter furent rentrez, les assiegeans sans commandement de leur capitaine en plusieurs lieux, commence-



rent à eux armer & vigoureusement de grand courage à tout eschelles allerent pour assaillir ladicte forteresse. Et de pleine venue entrerent dedans deux tours bien soixante hommes d'armes, mais bonnement ne pouoient passer plus auant, pour la fortification qu'iceux assiegez auoient faicte. Toutesfois ledit assaut dura moult terrible, perilleux & dangereux par l'espace de cinq heures ou enuiron, & y eut tant desdits assaillans comme desdits deffendans plusieurs morts & natures: & pour mettre fin, ceux qui estoient entrez dedans lesdictes tours, furent chassiez & boutez dehors par la force & deffence d'iceux deffendeurs. Et mesmes tirerent dedans vne trompette, qui estoit armé en estat d'homme d'armes. Et le lendemain iceux assiegez doubans d'auoir nouuel assaut, requierent d'auoir traicté: & en conclusion furent d'accord par condition qu'ils s'en iroient sauue leur vie tant seulement, excepté aucuns qui emmenerent chacun vn petit cheual, & s'en allerent en tel estat à Moymes: & la forteresse dessusdicte fut du tout demolie, arse & abbatue, & les biens furent pilliez par l'enforcement des gens d'armes assiegeans: & en prinst chacun qui plus tost y peut aduenir en rompant les ordonnances des capitaines, lesquels brieves apres s'en retournerent à Troyes & es villages à l'enuiron.

*Comment grand partie des gens du Duc de Bourgongne retournerent en leur pais: & la cheuauchée que firent le seigneur de l'Isle Adam Mareschal de France & le seigneur de Croÿ.*

CHAP. CCXXIIII.



Tem apres que les Picards & autres gens d'armes furent retournez au siege d'Alibaudieres à Troyes (comme dit est) prindrent brief ensuiuant la plus grand partie congé au Duc de Bourgongne de retourner en leur pays: lequel leur fut accordé. Et se partirent enuiron trois mille cheuaux, desquels estoient les principaux le Vidame d'Amiens, le Borgne de Fosseux cheualier, Hector de Saueuses, le seigneur d'Estenu, le seigneur de Commines, & aucuns autres capitaines tant de Picardie comme de Flandres, qui tous ensemble cheuaucherent de Troyes en tirant vers Rethel. Et nonobstant que les Daulphinois fussent en grand nombre pour les ruer ius & destrouffier: neantmoins par leur diligence escheuerent leurs agaiz, & retournerent en leur pays sans auoir aucun empeschement. Apres lequel partement, ledit Duc de Bourgongne enuoya plusieurs des autres capitaines qui estoient demourez avecques luy ou pays d'Auxerrois, pour mettre en l'obeissance du Roy aucunes forteresses que tenoient les gés du Daulphin qui moult trauailloient le pays: c'est à sçauoir le Mareschal de l'Isle Adam, Anthoine seigneur de Croÿ, le seigneur de Longueual, messire Mouroy de saint Leger, Baudo de Noyelle, Robert de Saueuses, Robert de Brimeu, le Bastard de Thian, & aucuns autres à tout enuiron seize cens combattans: lesquels dudit lieu de Troyes cheuaucherent par plusieurs iournées, iusques à vne petite ville nommée Touffy qui tenoit le party du Daulphin, & y repairoit tressouuent le seigneur de la Trimouille: & pourtant lesdits capitaines à tout eschelles de guerre & autres habillemens, vindrent assez pres dudit lieu de Touffy entre le poinct du iour & soleil leué ou enuiron, ayans volenté & esperance d'icelle ville par soudain assaut prendre, raur, pillier, & du tout mettre à leur habandon. Et eux venus assez pres, se mei-

rent



rent en bataille, & s'assemblerent tous ensemble : & furent faits nouveaux chevaliers Anthoine seigneur de Croÿ, Butor son frere bastard, Baudo de Noyelle, Lyonnet de Bournouville & aucuns autres par la main du seigneur de l'Isle Adam Marechal de France : & assez tost apres d'un commun accord allerent assaillir ladicte ville en plusieurs lieux, & dresser eschelles contre les murs tout à leur aise, sans trouuer grand deffence : toutesfois jaçoit-ce que les habitans d'icelle ville fussent moult esbahis de premiere venue, si reprindrent ils cuer en eux, & commencerent à eux deffendre vigoureusement : & tant feirent que les assaillans dessusdits, se retrahirent hors de leurs fossez, & se logerent en plusieurs lieux autour de ladicte ville : auquel lieu furent par deux ou trois iours faisans faire nouvelles eschelles, crocs de fer & autres habillemens de guerre, pour de rechief faire nouvel assault : & au troiesme iour se rassemblerent à tout les habillemens dessusdits : & allerent comme deuant assaillir tres ardamment icelle ville, & dresser plusieurs eschelles contre les murs : mais les deffendeurs en grand hardiesse resisterent de grand couraige contre lesdits assaillans, & de plaine venue en tuèrent & naurerent plusieurs : entre lesquels y furent morts vn gentil-homme d'armes nommé Ogier de saint Vandrille, & le capitaine des brigans dessusdits nommé Tabary avecques aucuns autres : finablement iceux assaillans (comme par auant auoient esté) furent reboutez dehors les fossez en grand confusion, & se retrahirent tous en leurs logis : & mesmes demoura le dessusdit dedans les fossez, & puis fut par iceux deffendans porté dedans la ville à tout son harnois : & luy desnüé, fut mis en vn sarcus & enterré en vne eglise : en outre vindrent en ceste propre nuit nouvelles au seigneur de l'Isle Adam Marechal de France & aux autres capitaines, que leurs ennemis venoient en grand nombre pour les combattre & ruer ius : pourquoy hastiuement tous ensemble monterent à cheual, & cheuaucherent toute nuit pour iceux rencontrer : & lendemain ouÿrent nouvelles de leurs ennemis, qui estoient logez à deux lieux pres d'Auxerre dedans vn fort monstier nommé Estampes saint Germain, pourquoy les capitaines dessusdits saichans icelles nouvelles au plus tost qu'ils peurent, allerent iceux assieger dedans ledit monstier : & manderent secours de viures, arbalestriers & autres choses à eux duisables à Auxoirre, lequel secours leur fut enuoyé : & en conclusion apres que les parties eurent liuré l'un à l'autre plusieurs escarmouches, en la fin de dixhuit iours se rendirent iceux assiegez à iceux capitaines, par si qu'ils auroient leurs vies sauues & demoureroient prisonniers tant qu'ils auroient payé finances chacun selon son estat. Apres lequel traicté ainsi fait fut iceluy monstier, c'est à sçauoir la fortification desolée & abbatue : & apres lesdits capitaines retournerent à Troyes à tout leurs gens deuers le Duc Philippe de Bourgogne leur maistre & seigneur.

*Comment Henry Roy d'Angleterre à tout sa puissance vint à Troyes en Champaigne, pour luy marier & parconclurre la paix finale avec le Roy de France.*

CHAP. CCXXV.

En ce





En ce mesme temps Henry Roy d'Angleterre accôpaigné de ses deux freres : c'est à sçauoir des Ducs de Clarence & de Clocestre, & des Comtes de Hautiton & de Varuich, de Quin auecques plusieurs autres grans seigneurs d'Angleterre & seize cens combattans ou enuiron, dont il auoit la plus grand partie archiers: se partit de Rouën & vint à Ponthoïse, & de là à sainct Denys. Et apres au pont à Charenton, où il laissa de ses gens pour garder le passage. Et puis par Prouin s'en alla à Troyes: au deuant duquel (pour luy faire hōneur & reuerence) issirent le Duc de Bourgongne & plusieurs seigneurs, qui le conuoyerent iusques à son hostel dedans icelle ville, où il se logea & ses Princes auecques luy, & ses gens d'armes se logerent és villages à l'enuiron: & tost apres sa venue alla veoir le Roy, la Roïne, dame Catherine sa fille: si s'entrefeirent tresgrans honneurs l'un à l'autre: & apres furent assemblez de grans conseils entre-eux, pour parclorre la paix finale & alliance, dont par auant est faicte mention, & en fin furent d'accord. Et en ce que par auant auoit esté traicté & qui n'estoit agreable audit Roy d'Angleterre, fut lors corrigé grād partie à sa vouldenté: finalement apres ledit accord parfait selon la coustume de France, la dessusdicte dame Catherine fiança. Et lendemain du iour de la Trinité espousa iceluy Roy en l'Eglise paroissiale, dessus laquelle il estoit logé: si furent faites ce iour par luy & ses Princes Anglois grās pompes & bobans, comme se presentement deust estre Roy de tout le monde. Et là estoit de la partie du Roy de France le Duc Philippe de Bourgongne: par le moyen & à l'instance duquel, tous les traictez & alliances dessusdictes se faisoient: si estoient auecques luy Pierre de Luxembourg Comte de Luxembourg, & Conuersan, messire Jean de Luxébourg son frere, le Prince d'Orenge, le seigneur de Iouuel, le seigneur de Chasteau-Villain, le seigneur de Montagu, messire Regnier Pot, le seigneur de Chastellus, le Veau de Bar Baillif d'Auxi, messire Iacques de Courtiamble, messire Jean de Cocte-brune Mareschal de Bourgongne & de Picardie, le seigneur de Croÿ, le seigneur de Longueual, messire Actis de Brimeu, & messire Dauid son frere, le seigneur de Roubaix, le seigneur de Humbercourt Baillif d'Amiens, messire Hues de Launois & son frere messire Gilbert, & moult d'autres notables cheualiers des paÿs dudit Duc, auec aussi aucūs Prelats & gens d'eglise: entre lesquels y estoit des plus aduancez maistre Jean de Torſy Euesque de Tournay & Chancelier de Bourgongne, maistre Eustace de Lactre, maistre Jean de Mailly & aucuns autres qui tous ensemble, ou au moins la plus grand partie furent consentans & promeirent auec le dessusdit Duc de Bourgongne, d'entretenir perdurablement iceluy traicté duquel la copie s'ensuit.

CHARLES par la grace de Dieu Roy de France. A tous noz Baillifs, Preuosts, seneschaux ou autres chiefs de noz iustices, où à leurs lieutenāns salut. Cōme par accordance finale & paix perpetuelle, soient huy faictes & iurées en ceste nostre ville de Troyes par nous & nostre treschier & tresaymé fils Henry Roy d'Angleterre, heritier & Regent de France pour nous & luy les royallitez de France & d'Angleterre: tant par le moyen du mariage de luy, de nostre treschierre & amée fille Catherine, comme de plusieurs poincts & articles faits, passez & accordez par chacune partie pour le bien & vtilité de nous & de noz subiects: & pour la seurte d'iceux paÿs. Par le moyen de laquelle paix chacun de nosdits subiects



ieçts & ceux de nostredit fils pourront desormais conuerſer, marchander & beſongner les vns avec les autres tant de là la mer comme deçà. Item eſt accordé que nostredit fils le Roy Henry, doreſnauant nous honnorera comme ſon pere & noſtre cōpaigne la Roynie comme ſa mere: & avec ce ne nous empeschera noſtre vie durant que ne iouïſſons & poſſeſſons paiſiblement de noſtre Royaume.

Item que nostredit fils le Roy Henry ne nous troublera ou empeschera, comme deuant eſt dit, que nous ne tenons & poſſeſſons tant que nous viurons, ainſi que nous tenons & poſſeſſons de preſent la courōne & dignité royale de France & les reuenus, fruiçts & prouiſts d'iceux à la ſouſtenance de noſtre eſtat des charges du Royaume: & que noſtre dicte compaigne ne tienne tant qu'elle viura eſtat & dignité de Roynie, ſelon la couſtume du Royaume avec partie deſdictes rentes & reuenues à elle conuenables. Item eſt accordé que noſtre dicte fille Catherine aura & prendra au Royaume d'Angleterre doüaire, ainſi que les Roynes au temps paſſé ont accouſtumé d'auoir: c'eſt à ſçauoir pour chacun an la ſomme de ſoixante mille eſcus, deſquels les deux vallent touſiours vn noble d'Angleterre. Item eſt accordé q̄ nostredit fils le Roy Henry par toutes voyes moyens & maniere qu'il pourra, ſans trāſgreſſion ou offence du ſerment par luy fait d'oſeruer les loix, couſtumes & droits de ſondit Royaume d'Angleterre, labourera & pouruoirà que noſtre dicte fille Catherine ſa compaigne le plus toſt que faire ſe pourra, ſoit en tout entierement & plainement aſſeurée de perceuoir & auoir en ſon Royaume d'Angleterre du tēps de ſon trespas le doüaire deuant-dit de ſoixante mille eſcus ou mieux: deſquels les deux vallent touſiours vn noble d'Angleterre. Item eſt accordé que ſ'il aduenoit que noſtre dicte fille ſuruiuoit à nostredit fils le Roy Henry, elle perceuera & aura au Royaume de France tantost apres le trespas de noſtre dicte fille, doüaire de la ſomme de xl. mille francs chacun an de rente: & ſur les terres lieux & ſeigneuries que tint & eut en doüaire noſtre trefchiere dame de bonne memoire Blanche iadis femme de Philippe de bonne memoire, iadis Roy de France noſtre trefredoubté ſeigneur & grand ayeul. Item eſt accordé que tantost apres noſtre trespas & deſlors en auant, la couronne & Royaume de France avec tous leurs droits & appartenāces demourront & ſeront perpetuellement de nostredit fils le Roy Henry & de ſes hoirs. Item pource que nous ſommes tenus & empeschés le plus du temps par telle maniere, que nous ne pouons en noſtre perſonne entendre ou vacquer à la diſpoſition des beſongnes de noſtre Royaume, la faculté & l'exercite de gouverner, & ordonner la choſe publique dudit Royaume: ſeront & demourront noſtre vie durant à nostredit fils le Roy Henry, avec le conſeil des nobles & ſages dudit Royaume à nous obeïſſans, qui auront aymé l'honneur & prouiſt dudit Royaume, par ainſi que deſmaintenant & deſlors en auant ils puiſſent icelle regir & gouverner par luy meſmes & par autres, qui voudra de preſent avec ſon conſeil des nobles & ſages deſſuſdits à nous obeïſſans qui auront aymé le profit & honneur dudit Royaume: leſquels facultez & exercites de gouverner ainſi eſtās par deuers nostredit fils le Roy Henry, il laboura affectueuſement, diligēment & loyaument à ce qu'il puiſſe eſtre à l'honneur de Dieu, de nous & de noſtre dicte compaigne, & auſſi au bien dudit Royaume, à deffendre & trāquiler, appaiſer & gouverner iceluy Royaume ſelon l'exigence de iuſtice & equité, avec le conſeil



& ayde des grans seigneurs, barons & nobles dudit Royaume. Item que nostredit fils fera de son pouoir que la court de Parlemēt de France sera en tous & chacun lieux subiecte à nous, maintenāt, ou au temps aduenir, obseruée & gardée es auctoritez & souuerainetez d'elle, & à elle deüe en tous & chacun lieux à nous subiects maintenant au tēps aduenir. Item que nostredit fils de son pouoir defendra & conseruera tous & chacuns nobles, Pers, citez, villes & cōmunautēz & singuliers personnes à nous ou au tēps aduenir subiectes ou leurs droits accoustumez, priuileges, preeminences, libertez & frāchises à eux appartenans ou deuz en tous les lieux subiects à nous maintenant au temps aduenir. Item que nostredit fils diligēment & loyaument labourera & fera de son pouoir, que iustice sera administrée audit Royaume selō les loix accoustumée & droits dudit Royaume de France sans acception de personnes, & conseruera & tenra les subiects de nostredit Royaume en paix & tranquillité : & de son corps le gardera & deffendra de violence ou oppressions quelsconques. Item est accordé, que nostredit fils le Roy Henry pouruoirā & fera de son pouoir que les offices tāt de iustice de Parlemēt, que des bailliages, seneschaucées, preuostez & autres appartenātes au gouuernement de seigneurie. Et aussi à tous les autres offices dudit Royaume, seront prinſes personnes habilles, profitables & idoines pour le bon, iuste, paisible & tranquile regime dudit Royaume, & des administrations qui leur seront à commettre : & qu'ils soient tels qu'ils doiuent, deputez & prins selon les droits & loix du Royaume, & pour le profit de nous & de nostredit Royaume. Item que nostredit fils labourera de son pouoir & le plus tost que faire se pourra profitablement, à mettre en nostre obeïssance toutes & chacunes villes, citez, chasteaux, lieux, païs & personnes dedans nostre Royaume desobeïssans à nous & rebelles, tenans la partie ou estans de la partie vulgallēmēt appelée du Daulphin & d'Armignac. Item affin que nostredit fils puisse faire, exercer & accomplir les choses dessusdites plus profitablement, seurremēt & franchement, il est accordé que les grans seigneurs, barons & nobles & les estats dudit Royaume, tant es spirituels que temporels : & aussi les citez & notables communes, les citoyēs & bourgeois des villes dudit Royaume à nous obeïssans pour le temps feront les sermens qui sensuiuent. Premièrement à nostredit fils le Roy Henry ayant la faculté & exercite de disposer & gouuerner ladicte chose publique, & à ses commandemens & mandemens en toutes choses conseruant l'exercite dudit Royaume, & par toutes choses obeyront humblement & obeïssamment. Item que les choses qui sont & seront appoinctées ou accordées entre nous & nostredit compaignie la Roïne & nostredit fils le Roy Henry, auecques le conseil de ceux que nous & nostredit compaignie & nostredit fils auront à ce commis lesdits grās seigneurs, barons & estats de nostredit Royaume tant es spirituels comme temporels. Et aussi les citez notables, communautēz, les citoyens & bourgeois des villes dudit Royaume, en tant qu'à eux touche & pourra toucher en tout & par tout, bien & loyallēment garderont & feront de leur pouoir garder par tous autres quelsconques. Item que continuellement de nostre trespas & apres iceluy ils seront feaulx hommes & liges de nostredit fils & hoirs. Et iceluy nostre fils pour le seigneur souuerain & lige & vray Roy de France sans aucune opposition, contradiction ou difficulté le receueront & comme à tel obeiront.

Et



Et qu'après ces choses, iamaïs n'obeyront à autre comme à Roy ou Regent le Royaume de France, sinon que nostredit fils le Roy Henry perde vie ou membre, ou soit prins de mauuaïse prinse, ou qu'il seuffre dommage ou imminution en personne, estat, honneur ou biens. Mais fils sçauent qu'aucune chose soit contre luy machinée, ils l'empeschent de leur pouoir, & luy feront sçauoir le plus tost qu'ils pourront par les messâges ou lettres. Item est accordé que toutes & chacunes conquestes qui se feront par nostredit fils le Roy Henry hors la Duché de Normandie ou royaume de France sur les desobeïssans dessusdits, seront & se feront à nostre profit. Et que nostredit fils de son pouoir fera, que toutes & chacunes seigneuries estans és lieux qui sont ainsi à conquerir appartenans aux personnes à nous presentement obeïssans, qui iureront garder ceste presentes concorde, seront restituez ausdictes personnes à qui elles appartiennent. Item est accordé, que toutes & chacune personnes ecclesiastiques beneficiez en ladicte Duché, ou autres lieux quelsconques au royaume de France subiects à nous ou à nostredit fils obeïssans, & fauorisans la partie de nostredit treschier & trefaymé fils le Duc de Bourgongne, qui iureront garder ceste presente concorde, iouïrôt paisiblement de leurs benefices ecclesiastiques estans en ladicte Duché de Normandie ou lieux deuantdits. Item que semblablement toutes & chacunes personnes ecclesiastiques obeïssans à nostredit fils le Roy Héry, beneficiez ou royaume de France és lieux à nous subiects, iureront garder ceste presente cōcorde, iouïrôt paisiblement de leurs benefices ecclesiastiques estans és lieux deuantdits. Item que toutes & chacunes Eglises, vniuersitez, estudes generalles & aussi colleges ecclesiastiques, estans és lieux à nous subiects presentement, ou pour le temps aduenir en la Duché de Normãdie ou autres lieux du royaume de France subiects à nostredit fils le Roy Henry, iouïrôt de leurs droits & possessions, rentes & prerogatiues, libertez, franchises, preeminences à eux ou royaume de France comment que ce soit appartenant ou deües, sauues les droits de la couronne & de tous autres. Item & quand il aduiendra que nostredit fils le Roy Henry viendra à la couronne de France, la Duché de Normandie & aussi les autres & chacun lieu par luy conquis au royaume de France, seront sous la iurisdiction, obeïssance & monarchie de ladicte couronne de France. Item est accordé, que nostredit fils le Roy Henry de son pouoir se parforcera & fera qu'aux personnes à nous obeïssans & fauorisans la partie deuãtdicte qu'on dit & appelle Bourgongne: ausquels appartenoint seigneuries, terres, reuenues & possessions en ladicte Duché de Normandie & autres lieux au royaume de France par iceluy nostredit fils le Roy Henry conquises ja pieça par luy dōnées, sera faicte sans diminution de la couronne de France recompensation par nous és lieux & terres acquises ou acquerre en nostre nom sur les rebelles & desobeïssans à nous. Et s'en nostre vie ladicte recompensation n'est faicte au dessusdit nostre fils le Roy Henry, la fera esdictes terres & biens quand il sera venu à la couronne de France: mais se les terres, seigneuries, rentes ou possessions qui appartenoint ausdictes personnes esdictes Duchez, n'auoient esté dōnées par nostredit fils, lesdictes personnes seront restituées à icelles sans delay. Item & que durant nostre vie en tous les lieux à nous presentement ou pour le temps aduenir subiects, les terres concernées de iusteté de dōs d'offices, de benefices & d'autres dominations, par-



dons ou remissions & preuileges deueront estre escriptes & proceder soubs nostre non & seal: toutesfois pource qu'aucuns cas singuliers pourroient aduenir, que par l'humain engin ne peuuent pas tous estre venus: esquels pourra estre necessaire & conuenable, que nostredit fils le Roy Henry face escrire ses lettres: en tel cas faucuns en aduient, il sera loisible à nostre fils pour le bien & seurté de nous & du gouuernement à luy, comme dit est, appartenant. Et pour euitier les perils & dommages, qui autrement pourroient vray semblablement aduenir, escrire ses lettres à noz subiects: par lesquelles il mandera, deffendra & commandera de par nous & de par luy comme regent selon la qualité & nature de la besongne. Item que toute nostre vie durant, nostredit fils le Roy Henry ne se nommera ou escrira aucunement ou fera nommer ou escrire Roy de France: mais dudit nom de tous points s'abstiendra tant comme nous viurons. Item est accordé, que nous durant nostredicte vie, nommerons, escrirons & appellerons nostredit fils le Roy Henry en langaige & langue Françoisé par ceste maniere: nostre trescher fils Henry Roy d'Angleterre heritier de France. Et en langue Latine. *Noster precharissimus filius Henricus Rex Anglia, hares Francie.* Item que nostredit fils n'imposera, ou fera imposer aucunes impositions ou exactions à noz subiects, sans cause raisonnable & necessaire, ne autrement que pour le bien publicque dudit Royaume de France, & selon l'ordonnance & exigence des loix & coustumes raisonnables & approuuées dudit Royaume. Item affin que concorde, paix & tranquillité entre les Royaumes de France & d'Angleterre soient pour le temps aduenir perpetuellement obseruées. Et qu'on obuie aux obstacles & recommencemens, par lesquels entre lesdits Royaumes débats, dissensions ou discords, pourroient sourdre au temps aduenir que Dieu ne vueille. Il est accordé, que nostredit fils labourera par effort de son pouoir, que de l'aduis & consentement des trois estats desdits Royaumes (ostez les obstacles en ceste partie) soit ordonné & pourueu que du temps que nostredit fils sera venu à la couronne de France ou aucuns de ses hoirs: les deux couronnes de France & d'Angleterre à tousioursmais demourront ensemble, & seront en vne mesme personne. C'est à sçauoir à la personne de nostredit fils le Roy Henry tant qu'il viura: & de là en auant es personnes de ses hoirs, qui suceffiuent seront les vns apres les autres: & que les deux Royaumes seront gouuernez depuis ce temps que nostredit fils, ou aucuns de ses hoirs y viendra ou y viendront ausdits Royaumes, non diuiféement soubs diuers Roys pour vn mesme temps soubs vne mesme personne, qui sera pour le temps Roy & seigneur souuerain de l'un & de l'autre Royaume, comme dit est. Et gardant toutes loix en toutes autres choses à l'un & à l'autre Royaume ses droits, liberté, coustumes, vsaiges & loix non soubsmettāt en quelque maniere l'un d'esdits Royaumes à l'autre: ne les loix, droits, vsaiges & coustumes de l'autre. Item que desmaintenāt & à tout tēps perpetuellemēt se tairōt & appaiseront de tous points toutes diuisions, haynes, rancunes, iniquitez & guerres d'entre lesdits Royaumes de France & d'Angleterre, & les peuples d'iceux Royaumes adherans à ladicte concorde. Et entre les Royaumes dessusdits, sera & aura vigueur desmaintenant perpetuellement & à tousiours paix tranquillité, concorde & affection mutuelle contre tous & toutes personnes, & amitié ferme & estable: & sayderont lesdits deux Royaumes de leurs aydes, conseils & assistences



stences mutuelles contre tous & toutes personnes, qui à eux ou à l'un d'eux s'efforceroient de faire dommage. Et conuerferont & marchanderont ensemble les uns avec les autres franchement & seurement, en payant les coustumes & devoirs deuz & accoustumez. Item que tous les confederez & alliez de nous & dudit Royaume de France : & aussi les confederez de nostredit fils le Roy Henry & dudit Royaume d'Angleterre, qui dedans huit mois apres que ceste presente concorde de paix leur sera notifiée, auront declairé se vouloir fermement adherer à ladicte concorde, & estre comprins sous le traicté & concorde d'icelle paix soient comprins sous les amitez, concordances, confederations & seuretez d'icelle paix : sauf toutesfoies à l'une & à l'autre desdictes couronnes, & à nous & noz subiects, & aussi à nostre fils le Roy Henry & à ses subiects ses actions, droitz & remedes quelsconques conuenables en ceste partie, & competens en quelque maniere que ce soit enuers lesdits alliez & confederez. Item est accordé que nostredit fils le Roy Henry, avecques le conseil de nostre trescher fils Philippe de Bourgongne & des autres nobles du Royaume, qui conuenront & apporteront pour ce estre appelez, pouruoirra pour le gouuernement de nostre personne seurement, conuenablement & honnestement selon l'exigence de nostre estat & dignité royale, par telle maniere que ce sera l'honneur de Dieu & de nous, & aussi du Royaume de France & des subiects d'iceluy : & que toutes personnes tant nobles comme autres, qui seront entour nous pour nostre personne & domesticque seruice, non pas seulement en offices : mais en autres matieres seront tels qu'ils auront esté nez au Royaume de France, ou des lieux de langaige François bonnes personnes & saiges, loyaux & idoines audit seruice. Item que nous demourrons & residerons personnellement en lieu notable de nostre obeïssance & non ailleurs. Item considéré les horribles & enormes crimes & delits perpetrez oudit Royaume de France par Charles soy disant Dauphin de Viennois : il est accordé, que nous, nostredit fils le Roy & aussi nostre trescher fils Philippe Duc de Bourgongne, ne traicteront aucunement de paix ne de cōcorde avec ledit Charles : ne feront ou feront traicter, sinon du consentement & conseil de tous & chacun de nous trois, & des trois estats des deux Royaumes dessusdits.

Item est accordé, que nous sur les choses dessusdictes & chacune d'icelle, outre noz lettres patentes seellées de nostre grand seel, donnons & ferons donner & faire à nostredit fils le Roy Henry lettres patentes, approbations & confirmatoires de nostredict cōpaigne, de nostredit fils le Duc Philippe de Bourgongne & d'autres de nostre sang Royal, de grans seigneurs, barons, citez & villes à nous obeïssans : desquels en ceste partie nostredit fils le Roy Henry voudra auoir lettres de nous. Item que semblablement nostredit fils le Roy Henry pour sa partie, outre ses lettres patentes pour ces mesmes choses seellées de son grand seel : nous fera donner & faire lettres patentes approbatoires & confirmatoires de ses treschers freres, & autres de son sang royal des grans seigneurs, barons des citez & villes à luy obeïssans : desquels en ceste partie nous voudrons auoir lettres de nostredit fils le Roy Henry : toutes lesquelles & chacune des choses dessusdictes & escriptes : nous Charles Roy de France dessusdit, pour nous & noz hoirs en tāt que pourra toucher nous & nosdits hoirs sans dol, fraude & mal engin, auons promis & promettons iurer & iurons en parolle de Roy aux sainctes



euangiles de Dieu par nous corporellement touchées, faire accomplir & observer, & qu'iceluy ferons par noz subiects observer & accomplir: & aussi que nous & noz heritiers ne viendroient iamais au contraire des choses dessusdictes, ou aucunes d'icelles en quelque maniere en iugement ou dehors iugement, directement ou par oblique, ou par quelconque couleur exquise, afin que ces choses soient fermes & estables perpetuellement à tousiours. Nous auons fait mettre nostre seel à ces presentes lettres, données à Troyes le xxj. iour du mois de May l'an mille quatre cens & vingt. Et de nostre regne le xlv. seellées à Paris sous nostre seel ordonné en l'absence du grand. Ainsi signées par le Roy en son grand conseil. I. Millet.

*Comment les Roys de France & d'Angleterre, les Roynes leurs femmes & ledit Duc de Bourgogne partirent de Troyes, & des sieges de Sens & de Monstreau.*

CHAP. CCXXVI.

**U**Tem apres tous les traictez par dessus declairez accompliz d'entre les Roys de France & d'Angleterre: & aussi la solemnité des nopces parfaite, comme dit est, se partirent iceux Roys, les Roynes leurs femmes, & le Duc Philippe de Bourgogne avec toute leur puissance de la ville de Troyes en Champaigne & de la marche environ: si se tirerēt vers Sens en Bourgogne, que occupoient les gens du Dauphin: & eux là venuz assez pres, fut icelle ville assiegée tout autour: deuant laquelle furent environ xij. iours, au bout duquel terme par ce qu'ils n'auoient esperance nulle d'auoir secours, la rendirent en l'obeissance du Roy de France, par cōdition que les gens d'armes & ceux qui se vouloient partir, s'en iroient sauf leurs corps & leurs biens: reserué ceux qui seroient trouuez coupables de la mort du Duc Iean, s'aucuns en y auoit. Et les autres habitans seroient tenus de faire serment au Roy de France: mais grand partie des gens d'armes dessusdits, qui estoient leans firent serment aux Anglois, & prindrent la croix rouge par faintise: nonobstant lequel serment, retournerent brief deuers le Dauphin: en apres ladicte ville de Sens regarnie de nouvelles gens, se partirent de là les assiegeans pour aller vers Monstreau ou fault Yonne. Et lors mourut dedans ladicte ville maistre Eustache de Laestre Chancelier de France, qui par long temps auoit esté principal conseilier du Duc de Bourgogne: ou lieu duquel fut constitué vn nommé maistre Iean le Clerc president en Parlement. A l'entrée du mois de Iuing le Roy d'Angleterre & le Duc de Bourgogne meirent le siege tout à l'environ de la ville & Chastel de Monstreau, où ils furent par longue espace combatans icelle de gros engins, pour desrompre les portes & murailles: dedans laquelle ville estoit capitaine general pour le Dauphin messire Pierre de Guitry accompagné de quatre à cinq cens combatans, qui commencerent tresfort à eux deffendre contre lesdits assiegeans, & en tuerent & naurerent aucuns: entre lesquels y fut nauré à mort messire Butor Bastard de Croÿ, qui estoit tres vaillant cheualier & expert en fait de guerre, mais en fin ce leur prouffita peu: car le iour saint Iean Baptiste ensuiuant aucuns Anglois & Bourgongnons (sans commandement de Prince) s'esmeurent soudainement, & tous ensemble allerent assaillir en plusieurs lieux ladicte ville: & tant continuerent, qu'ils entrerent dedans en grand nombre, sans que lesdits assiegez fussent gramment



gramment empeschez: & eux venus dedans, allerent deuers le chastel, où estoient retraits la plus grand partie des Daulphinois: lesquels vigoureusement furent par lesdits assaillans reboutez dedans ledit chastel, non pas sans perte: car ils furent de si pres hastez, qu'il en cheut plusieurs an l'eau, lesquels furent noyez: & si en eut de prins seize ou vingt, dont il y auoit la plus grand partie de gentils-hommes. Par le moyen de laquelle prinse, lesdits assiegez plus que parauant furent en grand effroy. Et adonc le Roy d'Angleterre feist loger grand partie de ses gens dedans la ville, & deuant le pont dudit chastel. Et lors les gens du Duc de Bourgongne allerent par l'aduertissement d'aucunes femmes de la ville au lieu, où estoit enterré le Duc Iean de Bourgongne, & là presentement meirent sur la tombe vn drap d'Eglise, allumerent à chacun bout de ladicte tombe vn cierge: & le lendemain par le Duc de Bourgongne fils d'iceluy Duc trespassé, furent enuoyez plusieurs notables cheualiers & escuyers de son hostel, pour faire desterrer & recognoistre ledit Duc: lesquels venus là comme ordonné leur auoit esté, le firent mettre dehors. Mais pour vray c'estoit piteuse chose de le veoir: & auoit encores son pourpoint & ses hauseaux, & briefuement il n'estoit homme là estat, qui se peust abstenir de plorer: finalement en tel estat fut de nouuel remis en vn cercueil de plomb, plain de sel & despicces: & fut porté en Bourgongne enterrer en vne Eglise de Chartreux dehors Dijon, que iadis auoit fait fonder le Duc Philippe son pere: & là fut mis empres luy par l'ordonnance du Duc Philippe son fils. Durant ledit siege de Monstreau, Charles Roy de France & son conseil enuoyerent le traicté de la paix cy dessus escript à Paris, & par tous les bailliages & Seneschaucées, Preuostez & autres lieux de son royaume, estans en son obeissance: pour icelles prononcer & publier par tout où il estoit accoustumé de faire proclamations en tel cas. Et apres la prinse de Monstreau le Roy d'Angleterre & sa puissance, avec luy le Duc de Bourgongne se deslogerent, dont ils estoient: & par vn pont qui nouvellement estoit fait sur Seine, allerent loger entre deux riuieres, c'est à sçauoir Seine & Yonne: & de rechef firent de tous costez approcher de la forteresse plusieurs gros engins pour icelle confondre & abbatre. Et avec ce le Roy d'Angleterre enuoya en bonne seureté les dessusdits prisonniers, qui auoient esté prins en la ville parler sur les fossez du chastel à leur capitaine, affin qu'iceluy le voulsist rendre au Roy: & eux là venus s'agenouillèrent en priant piteusement à leur capitaine, qu'il feist la reddition dudit chastel, disant qu'en ce faisant leur saueroit les vies: & aussi qu'il pouoit bien veoir & sçauoir, qu'il ne la pouoit longuement tenir, attendu la grand puissance qui estoit dedans deuant luy: ausquels fut respondu par ledit capitaine, qu'ils feissent du mieux qu'ils pourroient, & qu'il ne la rendroit pas. Et adonc lesdits prisonniers non ayans esperance de leurs vies, requirerent les aucuns de parler à leurs femmes estans leans, les autres à leurs prochains & amis, lesquels on feist venir parler à eux: & lors en grans larmes & tristesse prirent congé l'un à l'autre, & apres furent remenez à l'ost: auquel lieu le Roy de Angleterre fait dresser vn gibet, où les dessusdits prisonniers furent tous penduz, voyans ceux dudit chastel: & avec eux feist le dessusdit Roy pendre son varlet de pied, qui chacun iour estoit pres de son frain quand il cheuauchoit & moult l'aymoit: mais la cause de sa mort fut, pource que le varlet par soudain debat auoit tué vn cheualier d'Angleterre, si en fut ainsi puny. Et apres les choses dessusdi-



Et ces ceux dudit chastel se tindrent enuiron huiet iours : au bout desquels feirent traicté avec le Roy d'Angleterre de luy rendre le chastel, par si qu'ils s'en iroient sauf leurs corps & leurs biens, sinon qu'il en y eut aucuns coupables de la mort du Duc Iean de Bourgongne, lesquels demourroient en la voulenté du Roy : & ainsi (comme dit est) se departirent sous bonne seurte : pour laquelle rendition le seigneur de Guitry leur capitaine fut fort blasme, tant de son party come d'autres, pourtant qu'il auoit laissé (ainsi que dit est dessus) mourir ses gés pour si peu luy tenir apres : & avec ce luy fut imposé qu'il estoit coupable de la mort du Duc Iean de Bourgongne : & sur ce offrit de cōbattre vn gentil-homme de l'hostel dudit Duc de Bourgongne nommé Guillaume de Biere : mais en conclusion ledit de Guitry s'excusa, & n'en fut plus auant procedé : & (comme dit est) emmena ses gens deuers le Daulphin. Et tantost le Roy Anglois garnit la ville & forteresse de Monstreau de viures & d'habillemens, & y meit grand garnison de ses Anglois : & puis fait preparer son ost pour brief ensuiuant mettre le siege deuant la ville de Melun : & entre-temps que ces choses se faisoient, le Roy de France & la Roynie sa femme, & la Roynie d'Angleterre se tenoient à Bray sur Seine à tout leur estat.

*Comment Ville-Neufue le Roy fut prinse d'eschelles : le siege du Pont S. Esprit : la croisée que feit faire nostre saint Pere le Pape, & autres plusieurs matieres.*

CHAP. CCXXVII.

**E**N ces iours fut prinse d'eschelles secrettement Ville-neufue-le-Roy, seant sur la riuere d'Yonne par aucuns des gens dudit Duc de Bourgongne : dedans laquelle furent morts & prins plusieurs des Daulphinois, qui la tenoient : & adonc vint deuers le Roy Henry d'Angleterre, le Duc de Bethfort son frere à tout huiet cens hommes d'armes & deux mille archiers. Si furent receuz dudit Roy & de ses autres freres en grand lyesse, & aussi du Duc de Bourgongne : pour la venue duquel la puissance dudit Roy Henry d'Angleterre fut grandement enforcée. Durant lequel temps Charles Duc de Touraine Daulphin de Viennois passa à grand puissance les parties de Languedoc, & alla mettre le siege deuant la ville du Pont-saint-Esprit sur le Rhosne : dedans laquelle estoient les gens du Prince d'Orange, tenans le party du Duc de Bourgongne : & là feist dresser plusieurs engins, & instrumens de guerre, que luy auoient enuoyé ceux de la cité d'Auignon & de Prouence pour icelle subiuguer : & tant continua ledit siege, que la ville luy fut rendue. Et pareillement se remeirent en son obeissance la plus grand partie des villes & forteresses du pays de Languedoc, qui aucune espace auoient tenu le party du Duc de Bourgongne par le moyen dudit Prince d'Orange : dedans lesquelles iceluy Daulphin meist souffisantes garnisons & gouuerneurs de par luy : & ce fait, retourna à Bourges en Berry, & assembla de toutes parts grand puissance de gens d'armes en intétion de resister contre les enforcemens du Roy Henry d'Angleterre, & du Duc de Bourgongne : lesquels il sçauoit estre prests, comme dessus est dit, pour conquerre & subiuguer les villes & pays qui se tenoient à luy. Ouquel temps fut par nostre saint Pere le Pape ordonné vne croisée sur les Pragois : de laquelle furent conducteurs l'Archeuesque de Coulongne, l'Euesque du Liege, l'Archeuesque de



Trefues, l'Euesque de Mayence, le Comte Loÿs du Rin, & plusieurs autres grans seigneurs de la haulte Allemagne & des marches à l'enuiron : si entrerent ou pays desdits Pragois, qui fut par eux moult exillé : & prindrent vn fort chastel nommé Nanfonne & la forte ville de Caldes, avec aucunes autres. Toutesfois aucuns de ceux qui estoient en ceste armée en assez grand nombre, se departirent & retournerent en leurs lieux, pource que les dessusdits capitaines, comme il leur sembloit, vsoient de trop grand couuoitise. En outre le Cardinal Duc de Bar & avec luy Regnier d'Anjou son nepueu, fils de sa seur & du Roy Loÿs derrain mort : lequel Regnier iceluy Cardinal auoit desia declairé son heritier de ladicte Duché, & luy auoit donnée à iouir presentement sa Marquisie, du Pont fait assieger puissamment la ville & chastel de Ligny en Barrois chief lieu d'icelle Comté. Pourtant que Jean de Luxembourg n'auoit pas fait les deuoirs de releuer pour son nepueu le ieune Comte de S. Pol, duquel il auoit le bail & gouuernement, ne pareillemēt le Duc Jean de Brabant frere dudit Comte : & estoient dedans ladicte ville de Ligny de long temps aymans, & fauorisans la partie de Bourgongne : & ledit Cardinal & tous ses pays estoient de partie opposite. Neantmoins en la fin apres que ledit siege eust duré certaine espace, feirent ceux de ladicte ville obeissance à iceluy Cardinal, lequel y meist gouuerneurs & officiers de par luy : mais brief ensuiuant par aucuns moyens faits entre les parties, le ieune Comte de saint Pol fut restitué en ladicte ville, forteresse & Comté, & y furent de rechef mis & establis gens de par luy.

*Comment le siege fut mis tout à l'enuiron de Melun : la prinse du Comte de Conuersan, & le partement du ieune Roy de Cecille pour aller à Romme.*

CHAP. CCXXVIII.



R fault reuenir à parler des Roys de France & d'Angleterre & du Duc Philippe de Bourgongne : lesquels apres qu'ils eurent conquis Monstreau, comme vous auez ouÿ, se partirent de là pour venir deuers Melun, que tenoient les gens du Dauphin : laquelle ville par ledit Duc de Bourgongne & le Roy d'Angleterre fut assiegée en grand puissance, & auironnée tout au tour. Et ledit Roy de France avec les deux Roynes dessusdictes, allerent tenir leur estat à Corbueil : & fut iceluy Roy Henry avec luy, ses freres, le Rouge Duc de Bauiere son serourge & ses autres Princes logez au costé vers Gastinois, & le Duc Philippe de Bourgongne à tout ses gens, le Comte de Hautidon avec aucuns autres capitaines Anglois, furent logez à l'autre costé vers la Brie. Si meirent iceux assiegeans toute leur intention & voulenté d'approcher & combattre leurs aduersaires, & pour les addommager feirent en plusieurs lieux asseoir leurs engins vollans, bombardes, canons & autres instrumens & habillemens de guerre, pour desrompre, confondre & abbatre les murs de la ville : dedans laquelle estoit principal capitaine le seigneur de Barbasan noble vassal expert, subtil & renommé en armes. Et avec ce le seigneur de Preaulx : c'est à sçauoir messire Pierre de Bourbon & vn nommé Bourgeois, qui auoient en leur compagnie de six à sept cens combatans : lesquels par grand vigueur monstrerent à leurs ennemis semblant de grand hardiesse en eux deffendant vaillamment contre les entreprinſes, & approchemens desdits assiegeans : toutesfois nonobstant les def-



fences dessusdictes furent en plusieurs lieux autour de leur ville approchez iusques à leurs fossez, tant par mines, tauldis, boulleuers, comme par autres habillemens de guerre : & tant fut par lesdits assiegeans continué que les murs de la ville furent fort domagez en plusieurs lieux : & d'autre part du costé où estoit le dit Duc de Bourgongne, fut par soudain assaut prins vn tresfort boulleuert, que auoient fait lesdits assiegez dehors leurs fossez, par lequel ils trauailloient fort ceux du siege : & depuis la prise dessusdicté, fut iceluy fortifié par ledit Duc de Bourgongne & tenu durât ledit siege, en faisant guet de nuit & de iour. En outre fut fait vn pont par dessus la riuere de Seine sur bastiaux, par lequel les deux osts pouoient aller l'vn avec l'autre plainement : & avec ce fait le Roy d'Angleterre clorre son ost tout au tour de bons fossez & de pieux, attachez sus, afin que de ses ennemis point ne fut surprins, delaisans en aucuns lieux necessaires entrées lesquelles se fermoient à bonnes barrieres, & y faisoit on guet de nuit & de iour. Et pareillement fut fait au costé où estoit logé le Duc de Bourgongne & les autres Anglois. Et en tel estat dura ledit siege l'espace de dixhuit semaines, durant lequel furent faictes aucunes escarmouches & faillies par les assiegez & non pas grandement. Toutesfois en icelles furent tuez par traict vn tresvaillant capitaine Anglois, nommé messire Philippe Lis, & vn notable gentil-homme du pays de Bourgongne nommé messire Euerard de Vienne avec plusieurs autres. Et comme lesdits assiegeans entendissent curieusement à greuer nuit & iour, & subiuguer leurs ennemis : en cas pareil, les assiegez se deffendoient par grand vigueur : & tantost que leurs murs estoient desrompus, par les engins de leurs aduersaires les refortifioient de queües plaines de terre, & de bois & d'autres besongnes à ce competentes. En apres du costé du Roy d'Angleterre fut faicte vne meine au dessous de la ville : laquelle fut percée iusques assez pres des murs. Mais les assiegez ce doutans, contreminerent à l'opposite d'icelle, & feirent si bonne diligence, qu'elle fut effondrée, & y eut des deux parties grans poulsys de lances. Et adonc du costé des Anglois fut faicte vne barriere dedans ladicte meine, en laquelle combatoient ensemble contre deux Daulphinois, le Roy d'Angleterre & le Duc de Bourgongne, en poussant de lances l'vn contre l'autre : & depuis en continuant, allerent plusieurs cheualiers & escuyers combatre à ladicte meine. Desquels y furent faits cheualiers de l'hostel dudit Duc de Bourgongne Iean de Hornes, le seigneur de Bauffignes, Robert de Manues & aucuns autres. Et entre-temps le dessusdit Roy d'Angleterre s'en alloit de fois à autre à Corbueil veoir sa femme la Roïne, avec laquelle estoit la Duchesse de Clarence & autres nobles dames du pays d'Angleterre. Et apres certaine espace que ledit siege fut refermé, comme dit est, y fut amené le Roy de France, afin que plus seurement on peust sommer lesdits assiegez qu'ils rendissent la ville de Melun au Roy de France leur naturel & vray seigneur. Mais à ce faire feirent responce que à son estat priué luy feroient ouuerture tres volentiers sans en rien contredire, disans qu'au Roy Anglois ancien ennemy mortel de France point n'obeïroient. Neantmoins le dessusdit Roy de France fut grand espace audit siege logé en ses tentes, sous le gouvernement de son beau fils le Roy Henry d'Angleterre : non pas en tel estat de compagnie & habillemens que autresfois auoit esté veu, car au regard du temps passé estoit peu de chose de le veoir à present. Et en ce mesme

siege



siege feist ledit Roy amener sa femme la Royne, grandement accompagnée de dames & de damoïselles : & y seiournerent environ vn mois estans logez en vne maison, que auoit fait faire ledit Roy d'Angleterre toute propice empres ses tentes, qui estoient loing de la ville, affin que des canons ne peussent estre trauaillées : & là deuant la tente dudit Roy, de nuict sonnoient moult melodieusement par l'espace d'une heure ou environ à iour failly, & au point du iour huict ou dix clairs d'Angleterre, & autres diuers instrumens. Et pour vray iceluy Roy de Angleterre estoit lors plus grandement accompagné à iceluy siege qu'il n'auoit esté en nul autre durant son regne : & avec ce de sa personne faisoit merueilleuse diligence, pour acheuer son entreprinse : & entre-temps que ces besongnes se faisoient, Pierre de Luxembourg Comte de Conuersan retournant dudit siege de Melun, pour aller en sa Comté de Brienne accompagné de soixante hommes ou environ, fut rencontré des Daulphinois qui se tenoient à Meaulx en Brie, c'est à sçauoir Pierron de Luppel & aucuns autres : lesquels pource qu'ils estoient en trop grand nombre au regard de luy : & avec ce toute sa gent le menerent audit lieu de Meaulx, où il fut longue espace, iusques à tant que le Roy d'Angleterre l'assiegea comme vous orrez cy apres. En apres en ces propres iours la Royne de Cecille, vefue du Roy Loys de bonne memoire donna congé à Loys son fils aîné non pas sans soupirer de cuer, d'aller à Romme : affin que de la main de nostre saint Pere le Pape il fut couronné à Roy, & le bailla aux Florentins & aux Geneuois sur leur loyauté. Lesquels estoient entrez à tout quinze galées d'armée au port de Marseilles, qui est de la terre de ladicte Royne. Mais elle retint deuers elle en hostage pour son fils viij. des plus nobles barons du royaume de Naples & de ses pays environ, qui l'estoient venu querir de par les citez & bonnes villes, & les plus grans seigneurs dudit royaume. Et ce feirent par la hayne qu'ils auoient à leur Royne femme de messire Iaques de Bourbon Comte de la Marche : laquelle tenoit sondit mary en prison pour discord, qu'elle auoit à luy & à ses gouverneurs : & ainsi ledit Loys nageât par mer & gallées dessusdictes, entra à Romme & receut solennellement sondit royaume par la main de nostre saint Pere le Pape, jaçoit que pour lors ne fut pas couronné. Et fut de ce iour en auant nommé Roy Loys comme auoit esté par auant son feu pere.

*Comment plusieurs forteresses environ Paris furent mises en la main du Roy Henry, où il meist capitaines : & les mandemens royaux qui furent enuoyez à sa requeste.*

CHAP. CCXXIX.

**L**Tem durant ledit siege de Melun furent mises en la main du Roy de Angleterre par le commandement du Roy de France, & par le consentement du Duc de Bourgogne & des Parisiens les forteresses cy apres declairées : c'est à sçauoir la Bastille saint Anthoine, le Louure, la maison de Neelle & le Bois-de-Vincennes : pour lesquels fut enuoyé dudit Roy d'Angleterre son frere le Duc de Clarence, lequel fut constitué capitaine de Paris. Et avec ce meist es forteresses dessusdictes garnison d'Anglois, en deboutant hors tous les François qui par auant les auoient eu en garde. Et fut aussi osté de ladicte capitainerie de Paris le Comte de saint Pol, qui tantost de par le Roy de France fut enuoyé comme ambassadeurs d'iceluy Roy es marches de Picar-



die, accompagné de maistre Pierre de Marigny & aucuns autres, pour receuoir les sermens des trois estats & bonnes villes d'iceluy païs: affin que la paix n'agueres faicte entre les deux Roys, voulsissent du tout entretenir & obseruer: & que dorefnauant obeissent liberallement au Roy d'Angleterre comme Regent & heritier de France, & que desdits sermens lesdits ambassadeurs prissent lettres seellées & signées des dessusdits trois estats & bonnes villes: desquelles lettres & pouoir d'iceux ambassadeurs à eux donné de par le Roy, la coppie s'ensuit.

CHARLES par la grace de Dieu Roy de France. A noz treschiers & ayez cousins le Comte de saint Pol, l'Euesque de Theroüenne & Jean de Luxembourg, & à noz treschers & bien ayez l'Euesque d'Arras, le Vidame d'Amiens, le seigneur de la Vieuille, les gouuerneurs d'Arras & de l'Isle, maistre Pierre de Marigny nostre aduocat en Parlement, & maistre George d'Ostende nostre secretaire salut & dilection. Comme n'agueres ayons fait paix finale & perpetuelle pour le tresgrand bien & euident prouffit de nous, & de la chose publique de nostre royaume: & par l'aduis & meure déliberation de nostre treschere compagne la Royne, & de nostre trescher & trefaymé fils le Duc Philippe de Bourgogne, des Prelats & autres gens d'Eglise, des nobles & communautéz dudit royaume entre nostre treschier fils le Roy Henry d'Angleterre Regent & heritier de France, pour nous & pour luy & pour les royaumes de France & d'Angleterre: & icelle paix: nous, nostredicte compagne, nostre fils de Bourgogne, les nobles Barons & communautéz dessusdits, ayons iuré solemnellement: & en outre auons conclud & ordonné que pour les Prelats, gens d'Eglise, Barons & les communautéz de nostredit royaume, qui ne l'ont iuré, le iureront semblablement. Et pourtant nous confians de voz loyauté, grand prudence & bonne diligence & de chacun de vous: vous mandons & commandons en commettant par ces presentes que vous vous transportez en toutes les citez, bonnes villes, forteresses & lieux notables des bailliages d'Amiens, Tournay, de l'Isle, Douay, d'Arras & en la Côté de Ponthieu ressors & enclauemēs d'iceux païs & enuiron: & là mandez ceux que desdits lieux bon vous semblera, & faictes venir deuāt vous pour & ou nom: c'est à sçauoir Prelats, Capitaines, Doyens & autres nobles d'Eglise, bourgeois & communautéz: & en leur presence faictes lire les lettres de ladicte paix & publier solemnellement, en eux faisant de par nous expres & especial commandement sur peine d'estre reputez rebelles & desobeissans à nous, qu'en vostre presence ils iurent sur les sainctes Euangelles de Dieu tenir fermement, & inuiolemment garder ladicte paix selon la forme contenue sur ce, de laquelle la teneur s'ensuit. Premièrement vous iurez qu'à treshault & trespuissant Prince Henry Roy d'Angleterre, comme à gouuerneur & Regent du royaume de France & de la chose publique dudit royaume, vous obeÿrez loyaument & diligement à ses commandemens, & mandemens en toutes choses conseruant & gardant le regime & gouuernement de la chose publique, maintenant subiecte à treshault & trespuissant Prince Charles Roy de France nostre souuerain seigneur.

Item & qu'incontinent apres le decez de nostre sire le Roy Charles, en ensuiuant le traicté de paix par luy fait & confirmé, vous serez loyaux hommes liges & vrais subiects au dessusdit treshault & puissant Prince Henry Roy d'Angleterre, & de ses hoirs: & le honnorez & receurez sans opposition, contredit ou difficulté



difficulté aucune comme vostre derrain seigneur & vray Roy de France, & obeïrez à luy comme tel : & promettez que desmaintenant iusques à iamais n'obeïrez à nul autre comme Roy de France, sinon à nostre derrain & souuerain seigneur le Roy Charles. Item que vous ne ferez en ayde, conseil ou accord pourquoy ledit Roy d'Angleterre perde vie ou membre, ou soit prins de malle prise, ou seuffre domage, ou diminution en sa personne, en son estat ou biès quelconques. Mais se vous sçauiez ou cognoissiez aucune semblable chose estre pensée ou machinée cōtre luy, vous le destourberez & garderez tant que vous pourrez, & luy ferez sçauoir par messages ou lettres. Et generallyment vous iurez que vous garderez & obseruerez sans fraude, deception ou mal engin tous les points dessusdits articles, contenus és lettres & appoinctement de ladicte paix finale, faicte & iurée entre le Roy Charles nostre sire & le dessusdit Roy Henry d'Angleterre : & n'irez en iugement à l'encontre ou hors iugement publicquement ou secrettement, par quelque couleur que ce soit ou puiſt aduenir : mais par toutes voyes & manieres quelconques possibles tant de fait comme de droit, resisterez à tous ceux qui viendront, actenteront ou s'efforceront venir ou actempter au contraire des articles dessusdits : lesquels sermens nous voulons & enioignons à tous noz vassaulx de quelconque estat, dignité ou auctorité qu'ils soient, iurent ladicte paix, la tiennent & gardent sans l'enfreindre. Et à vous & à voz commis & deputez baillent leurs lettres patentes desdits sermens qu'ils auront faits : lesquelles nous voulons par vous estre apportées vers nous & aussi voulons que vous baillez voz lettres de certification d'auoir receuz lesdits sermens à ceux, qui ainsi les auront faits se mestier est, & se vous en estes requis de ce faire : vous donnons pouoir, auctorité & mandement especial à vous dessusdits à neuf, à huit, à sept, à six, à cinq, à quatre, à trois de vous. Mandons & commandons à tous noz iusticiers, officiers & subiects qu'à vous & vosdits commis & deputez en ceste partie obeïssent, & entendent diligemment : vous prestant conseil, confort & ayde se mestier est, & se requis en sont. Et pource qu'il sera necessité de bailler & publier ces presentes en plusieurs lieux : nous voulons que plaine foy soit adioustée au vidimus d'icelles, faictes sous le seel royal comme à l'original. Donné en nostre siege deuant Melun le xxij. iour de Iuliet : l'an de grace mille cccc. & xx. Et de nostre regne le xlv. Ainsi signées Marc. Marc. A tout le quel mandement Philippe Comte de saint Pol, & les autres ambassadeurs & commissaires pour iceluy mettre à execution, se partirent de Paris, & allerent par aucuns iours à Amiens escheuans les aguects des Daulphinois. Auquel lieu d'Amiens furent receuz benignement : & apres qu'ils eurent monstré leur pouoir aux gouuerneurs & habitans d'icelle ville, prindrent d'eux les sermens. Et apres allerent de là à Abbeuille, saint Riquier, Monstreul, Boulongne, saint Omer & autres lieux, où ils furent par tout obeiz : & meirent à deüe execution la charge qu'ils auoient.

*Comment Philippe Comte de saint Pol alla à Bruxelles, & fit prendre les gens de son frere le Duc de Brabant, & autres diuerſes besongnes qui aduindrent en ce temps.*





Tem durant le temps dessusdit, Philippe Comte de saint Pol dessus nommé, fut hastiement mandé par grand partie des nobles & bonnes villes du pays de Brabant. Et aussi par sa tante Comtesse de Hainault femme de son frere le Duc Jean de Brabant. Auquel mandement (toutes autres choses mises arriere) il alla sans delay: & luy venu audit pays, fut tantost fait gouverneur de toute la Duché de Brabant par le consentement des dessusdits, au lieu de son frere le Duc: duquel bonnement plus souffrir ne pouoient le gouvernement, par ce qu'il se nieffaisoit par diuerses manieres. Si se tint iceluy Comte à tout son estat en la ville de Bruxelles, & commença à faire plusieurs nouvelles ordonnances, qui grandement despleurent à ceux, qui gouernoient le Duc de Brabant: lequel pour lors estoit absent d'icelle ville de Bruxelles, & pourtant iceux gouverneurs l'amenerent à tout grand puissance de gens d'armes en la dessusdicte ville de Bruxelles: laquelle de premiere venue ne luy fut pas ouuerte, iusques à tant qu'il eut promis à son frere le Comte de saint Pol, qu'il tiendrait ses gens & tous les habitans de la ville paisibles, & sur ce y entra: mais quand il fut dedans, ceux qui le gouernoient laissoient à grand peine & enuiz approcher de luy son frere dessusdit, & les autres nobles & notables gens de la ville, dont ils ne furent pas bien contens: & en fin se conclurent avec ledit Comte de saint Pol, d'y pourueoir. Et de fait se meirent ensemble en tresgrand nombre, prindrent & menerent prisonniers tous les gouverneurs dudit Duc de Brabant: entre lesquels estoit le principal le Damoyseau de Hainseberg. Desquels prisonniers grand partie furent decapitez: c'est à sçauoir messire Jean de Condemberch, Jean Sechocart, Edouart le Duc, Henry le Duc, messire Henry, Clautin, maistre Guillaume Clautin, messire Jean Clautin, messire Guillaume Pipempoux, messire Guillaume Moieuz, le Damoysele Guillaume Asche, Jean du Vert, messire Eurad Serclaulx, Jean Clautin Geollier, & avecques eux plusieurs autres: si fut mis ledit Duc au gouvernement des nobles du pays de Brabant par l'accord & consentement de son frere le Comte de saint Pol, & aussi des trois estats de sondit pays. Et apres furent eux deux ensemble assez vnis, & en bonne amour: esquels iours les Daulphinois qui se tenoient à Guyse en Terrasce, & en la Marche enuiron, s'assemblerent enuiron cinq cens combattans: à tout lesquels allerent soudainement en la ville de Beaurevoir appartenant à messire Jean de Luxembourg, & où il faisoit sa demeure. Et aussi en autres villages à l'enuiron: & la prindrent & rauirent plusieurs paysans & autres proyes: à tout lesquels retournerent hastiement, dont ils estoient venus. Pour laquelle enuahie ledit de Luxembourg grandement de ce troublé, assembla à venir deuers luy grand nombre de gens d'armes & de traict de plusieurs pays: lesquels il conduist, & mena en la Comté de Guyse pour luy venger du desplaisir que luy auoient fait les dessusdits: & là enuahissant ladicte Comté de toutes parts, prindrent & rauirent tout ce qu'ils trouuerent dehors les fortresses: c'est à sçauoir paysans, cheuaulx, iumens, vaches, brebis, moutons & pourceaulx avec plusieurs autres biens: lesquels ils ramenerent & departirent à leur plaisir, & apres se retrahirent chacun en leurs lieux. En apres durant les tribulations dessusdictes, trespassa en la ville de Blois Philippe Comte de Vertus second frere de Charles Duc d'Orleans prisonnier en Angleterre, & aussi du Comte d'Angoulême.



lesme . Lequel de Vertus gouuernoit en France toutes les seigneuries de ses freres dessusdits : pour le trespas duquel , le Duc de Touraine Daulphin fut moult affoibly d'ayde & de conseil . Et aussi ses deux freres , qui estoient prisonniers en eurent au cueur grand tristesse . Et le plorerent tendrement par long temps , tant pour l'amour fraternelle qu'ils auoient à luy , comme pource qu'en leur absence , il gouuernoit leallement & sagement leurs dominations , terres & seigneuries .

*Comment le seigneur de l'Isle-Adam mareschal de France fut enuoyé à Ioingny : & la rendition des villes & chastel faictes par les assiegez .*

CHAP. CCXXXI.



R conuient retourner à l'estat du siege de Melun , où estoient (comme vous auez ouï) les Roys de France & d'Angleterre & le Duc de Bourgogne : durant lequel , le seigneur de l'Isle-Adam qui encores estoit mareschal de France , fut enuoyé de par le Roy en garnison à Ioingny à tout foison de gens d'armes , pour tenir frontiere contre les Daulphinois , qui tresfort degastioient le païs . Et apres qu'ils eurent seiourné & assis ses gens audit lieu de Ioingny , peu de temps apres retourna audit siege de Melun , & auoit fait faire vne cotte de blanc gris : à tout laquelle alla deuers le Roy d'Angleterre , pour aucuns affaires touchant son office : & luy venu deuant luy (apres qu'il eust fait la reuerence comme il appartenoit , & dit aucunes parolles touchans iceux affaires) ledit Roy d'Angleterre luy demanda par maniere de gabois . Comment l'Isle-Adam , est-ce la robbe de mareschal de France ? A quoy il feist responce , en regardant iceluy Roy en la face . Sire , ie l'ay fait faire telle pour venir par eaüe dedans les bateaulx parmy la riuere de Seine . Et adonc le Roy luy dist de rechef : Comment osez vous regarder ainsi vn Prince au visaige , quand vous parlez à luy ? Et le sire de l'Isle-Adam respondit . Sire la coustume des François est telle , que si vn homme parle à vn autre de quelque estat ou auctorité , qu'il soit la veüe baissée , on dit que c'est vn mauuais homme , & qu'il n'est pas preud'hommes , puis qu'il n'ose regarder celuy à qui il parle en la chiere : & le Roy dist , ce n'est pas nostre guise . Apres lesquelles parolles & aucunes autres , print congé ledit sire de l'Isle-Adam à iceluy Roy , & se partit de sa presence . Si perceut assez bien à ceste fois , qu'il n'estoit pas bien en sa grace . Et assez brief ensuiuant luy fut ostée l'office de mareschal de France : & encores depuis luy aduint autre aduenture , car le Roy dessusdit le feist detenir prisonnier comme vous orrez cy apres . En outre iceluy siege durant , se ferit en l'ost du Roy d'Angleterre grand mortalité d'epidimie , pourquoy il perdit grand nōbre de ses gens . Et d'autre costé se partist de l'ost du Duc de Bourgogne le Prince d'Orenge & plusieurs autres : pour lequel partemēt , ledit Duc voyāt son ost affoibly , enuoya hastiuemēt deuers monseigneur de Luxembourg lors capitaine de Picardie de par le Roy de France , luy mādant que sans delay assemblast le plus grand nōbre de gēs d'armes & de traict qu'il pourroit finer : & qu'iceux il conduist & menast deuers luy audit siege de Melun . Leq̃l de Luxēbourg cōme luy auoit mandé ledit Duc , se prepara incontinent , & assembla de toutes parts gēs d'armes & gens de traict à venir autour de Peronne : & brief ensuiuāt à tout iceux gens d'armes , par le pont de sain-



Et Maxence, alla deuers Melun à tout ses gens d'armes dessusdits : mais quand il vint au dessus de Melun, ayans ses gés en bataille: les assiegez, ce voyans, cuyderēt auoir leur secours, & commencerent à faire sonner leurs cloches & monter sur la muraille, criant hautement à ceux de l'ost, qu'ils meissent leurs selles, & qu'ils seroient deslogez: neantmoins perceurent assez brief que c'estoiēt leurs ennemis: pourquoy les testes baissées (faïsāt cesser toute ioye) descēdirēt de leursdits murs, non ayans esperance de ce iour en auant de plus auoir secours du Daulphin leur seigneur. Et tantost apres messire Iean de Luxembourg à tout ses gens, fut enuoyé loger en la ville de Brie Comté Robert, & là se teint iusques à la rendition dudit Melun. Et entre-temps ledit Roy de France enuoya ses lettres en plusieurs bonnes villes du royaume de France: par lesquelles il mandoit expressement à chacune d'icelles, qu'ils enuoyassent certains commis de par eux à Paris deuers luy, pour estre le quatriesme iour de Ianuier, affin d'auoir conseil & deliberation avec les nobles & gens d'Eglise, sur la reparation & autres affaires du royaume de France. Et apres les dessusdits assiegez de Melun, voyans le grand dangier où ils estoient, non ayans esperāce (comme dit est) d'auoir quelque secours: car desja auoient plusieurs fois enuoyé deuers le Daulphin luy noncer la pestilence où ils estoient, comment passé long temps ils estoient contraints par force de famine de manger chiens, chats, cheuaux & autres viures non appartenans à creature humaine: en luy requerant qu'il les voulsist secourir & donner ayde, & les oster de ce dangier où ils estoient pour soubstenir sa querelle, comme promeis leur auoit. A quoy finablement auoit esté respondu par les gouuerneurs dudit Daulphin, que de present n'auoit point si grand puissance que pour les deliurer de la puissance du Roy d'Angleterre & du Duc de Bourgogne. Et qu'ils feissent & traictassent avec eux au mieux qu'ils pourroient: sur laquelle responce commencerent à parlementer & traicter avec les gens du dessusdit Roy Henry d'Angleterre, qui à ce furent commis: entre lesquels estoient le Comte de Vvaruich, le seigneur de Cornoüaille & autres qui en fin furent d'accord: apres ce que ledit siege eut par grans labeurs par les assiegeans, esté continué le temps & espace de dixhuit sepmaines, par les conditions cy apres declairées. Premièrement fut ordonné, que les dessusdits assiegez renderoient reallement & de fait aux Roys de France & d'Angleterre la ville & chastel de Melun, & se mettroient tous generallement tant hommes d'armes, bourgeois habitans comme toutes autres personnes estans en icelle ville & chastel en la grace desdits Roys. Item que les deux Roys dessusdit les receuront tous par telle maniere, que s'il en y a aucūns qui soient trouuez coupables ou consentans de la mort du Duc Iean de Bourgogne, on leur fera iustice & raison. Item que tous les autres, qui de ce ne seront pas trouuez coupables de quelque estat qu'ils soient, n'aurent garde de mort: mais ils demourront prisonniers iusques à tant qu'ils auront baillé bonne caution, de iamais eux armer avec les ennemis desdits Roys. Item que se les soupçonnez de la mort dudit Duc Iean ne sont trouuez coupables ou consentans, ils demourront soubz les conditions des dessusdits: & ceux qui seront nez & subiects de ce royaume, seront remeis à leurs terres: lesquelles ils tenoient quand le siege fut mis denant Melun, apres qu'ils auront baillé seureté idoine, comme dit est. Item tous les bourgeois & habitans demourrōt en la disposition des



des deux Roys. Item que tous les dessusdits tant bourgeois comme gens d'armes, mettront ou feront mettre toutes leurs armeures & habillemens de guerre dedans le chastel de Melun, en tel lieu qu'ils puissent venir à cōgnoissance, sans ce qu'ils les depiecent ou degastent, & pareillement ils y feront mettre tous leurs biens meubles. Item rendrōt ou ferōt rēdre toutes personnes qu'ils ont prisonniers à cause de la guerre, & leur quitterōt leurs fois: & aussi quitteront tous ceux qu'ils ont receuz sur leur foy, ou autrement deuāt le siege meis. Item pour la seurte des choses dessusdictes, bailleront en hostaige xij. nobles hōmes des plus notables apres les capitaines, & six bourgeois de la ville. Itē que messire Fortin Cheualier Anglois ou Escoçois & tous les Anglois & Escoçois demourrōt en la voutenté du Roy d'Angleterre: c'est traicté lors accordé & parfourny, lors (cōme dit est) entre les parties furēt tost ouuertes les portes desdictes villes & chastel, & mises en la puissance desdits Roys: & là furent commis pour receuoir & auoir l'administration des choses dessusdictes, les gens du Roy d'Angleterre & vn nommé Pierre le Verrault, lequel par les deux Roys y fut commis capitaine. Et apres l'accomplissemēt d'icelle besongne, tous les gens d'armes Daulphinois: desquels estoient les principaux messire Pierre de Bourbon seigneur de Preaux, & Barbaſan, avec de cinq à six cēs nobles hommes & gentils femmes, & grand partie des plus notables & plus puissans bourgeois de ladicte ville, furēt menez par le commandement du Roy d'Angleterre regent de France à force de gēs d'armes à Paris: & là emprisonnez en chastellet, en la maison du temple, en la bastille & ailleurs. Item fut deffendu de par les deux Roys, que nul n'entraſt dedans lesdictes villes & chastel sur peine d'estre decapitez, sinon ceux qui estoient à ce commis. Item entre les autres qui furent decapitez en ladicte ville, le furent deux Moynes de Ioÿ en Brie: c'est à ſçauoir le Celerier dudit lieu, & Damp-Symon iadis Moynes du Gart, avecques aucuns autres dessusdits. Et entre-temps que les traictez dessusdits se faisoient, y eut vn gentil-homme de l'hostel du Roy d'Angleterre nommé Bertrand de Chaumont, qui à la bataille d'Azincourt le propre iour estant François se rendit Anglois, pourtant qu'en Guyenne tenoit ſa terre dudit Roy d'Angleterre, & pour ſa vaillāce estoit de luy moult aymé: mais, comme dit est, durant le traicté de Melun, iceluy Bertrand comme mal conſeillé par couuoitiſe de pecune qu'il eut, ayda à ſauuer & ſouſtraire hors de ladicte ville Amerion du Lau, qui auoit eſté (cōme on diſoit) coupable de la mort du Duc Jean de Bourgogne: laquelle chose vint à clarté & à la cōgnoissance du Roy d'Angleterre, dont grandement il fut troublé: & pour ce meſme fait audit Bertrand fait coupper la teſte aſſez brief enſuiuant: nonobſtant que ſon frere le Duc de Clarence & le Duc de Bourgogne le priaſſent d'auoir pardon pour le dessusdit. Aufquels il fait reſponce que plus n'en parlaſſent, & que de ſon ſceu ne vouloit auoir nuls trahistres en ſon oſt. Et neātmoins qu'il fait ceſt iuſtice pour monſtrer exemple aux autres, ſi vouldroit il qu'il luy eut couſté cinquāte mille nobles, & ledit Bertrand n'eust oncques fait ceſte deſloyauté contre luy.



*Comment apres le siege de Melun deux Roys, les Roynes leurs femmes & plusieurs Princes & grans seigneurs allerent à Paris en noble appareil.*

CHAP. CCXXXII.



Tem apres les besongnes dessusdictes cōclues, comme dit est, le Roy d'Angleterre & le Duc de Bourgogne congierent premier aucuns de leurs gens: & se partirent à tout leur ost de deuant Melun, & prindrent leur chemin à Corbueil où estoit le Roy de France & les deux Roynes: c'est à sçauoir de France & d'Angleterre, qui tous ensemble allerent de la ville de Corbueil à Paris, c'est à sçauoir les deux Roys, & avec eux les Ducs de Clarence, de Bourgogne, de Bethfort & d'Ecestre, les Comtes de Vvauich, de Salsbery & plusieurs autres grans seigneurs: au deuât desquels Roys & Princes allerent à l'encontre les bourgeois de Paris en grād nombre, & en moult belle ordonnance. Et lors estoient les rues couuertes & parées parmy Paris en plusieurs lieux de draps de parement moult riches. A l'entrée desquels fut crié Noël du peuple de quarrefourg en quarrefourg par tout où ils passoient, & cheuauchoient les deux Roys moult noblement de frōt l'un d'empres l'autre, le Roy de France au dextre costé. Et apres eux estoient les Ducs de Clarence & de Bethfort freres du Roy d'Angleterre: & à l'autre costé de la rue à la main senestre cheuauchoit le Duc de Bourgogne vestu de noir. Et apres luy estoient les cheualiers & escuyers de son hostel. Et les autres Princes & cheualiers suiuiōient les deux Roys assez pres: & aussi cheuauchant parmy lesdictes rues, encontrerent les gens d'Eglise à pied en procession arrestez par les quarrefourgs où ils deuoient passer: & adonc fut présenté aux deux Roys à baiser les saintes reliques, que portoient iceux gēs d'Eglise: & premier au Roy de France, lequel se retourna deuers le Roy d'Angleterre en luy faisant signe qu'il baist premier: & ledit Roy d'Angleterre en mettant la main à son chaperon faisant reuerence au Roy de France, luy dit, qu'il baist: & ce faisant, baist ledit Roy de France. Et apres luy le Roy d'Angleterre, & fut celle maniere tenue par eux tout du long de la ville iusques à l'Eglise nostre Dame: en laquelle les deux Roys & les Princes dessusdits entrerent, & feirent leur oraison deuant le grand autel: & apres remonterent à cheual, & s'en allerent chacun en son logis: c'est à sçauoir le Roy de France, & avec luy le Duc de Bourgogne en son hostel de S. Pol: & de là ledit Duc de Bourgogne apres qu'il eut reconuoyé le Roy de France, alla loger en son hostel d'Arthois. Et le Roy d'Angleterre & ses deux freres si se logerent ou chastel du Loure & leurs gens en plusieurs lieux par la ville, sinon aucuns des gens d'armes qui se logerent es villages autour de Paris. Et le lendemain vindrent dedās Paris les deux Roynes de France & d'Angleterre: à l'encontre desquelles allerent les Ducs de Bourgogne & plusieurs seigneurs d'Angleterre, & aussi les bourgeois de Paris en pareil ordonnance, qu'ils auoient esté le iour deuant. Et fut de rechief faicte toute ioye dedans Paris à la venue desdictes Roynes: quant est à parler des dons & presens, qui furent faits dedans Paris aux dessusdits Roys: & par especial au Roy d'Angleterre & à sa femme la Roine, il seroit trop long à racompter chacun à par-luy. Et par especial tout ce iour & toute la nuit decouroit vin en aucuns quarrefourgs habondamment en robinets d'erain & autres conduits faits ingenieusement



ingenieusement, affin que chacun en prenüst plainement à sa voulté. En outre par toute la ville de Paris generallement fut faicte grand liesse pour la paix finale des deux Roys, plus que langue ne pourroit racompter. En apres les dessusdits Roys de France & d'Angleterre & leurs Princes venus audit lieu de Paris: aucüs peu de iour ensuiuant fut faicte grand plaincte & clameur par le Duc Philippe de Bourgongne, & le procureur de la Duchesse sa mere de la piteuse mort de feu le Duc Iean de Bourgongne. Et pour icelles complainctes feit le Roy de France comme iuge en son hostel de S. Pol en la basse salle: & là estoit assis sur le mesme banc où seoit le Roy de France Henry d'Angleterre: & aupres dudit Roy de France, seoit maistre Iean le Clerc Chancelier de France: & assez pres estoit maistre Philippe de Moruillier premier President en Parlement, & plusieurs autres nobles hommes du conseil du Roy Charles: & d'autre costé vers le meillieu de la salle, seoit sur vn banc le Duc de Bourgongne, & avec luy pour l'accompagner, les Ducs de Clarence & de Bethfort, les Euesques de Theroüenne, de Tournay, de Beauuais, & d'Amiens, messire Iean de Luxembourg & plusieurs autres cheualiers & escuyers de son conseil: & adonc messire Nicolas Rolin estant pour le Duc de Bourgongne & la Duchesse sa mere, demanda pour iceux audience aux deux Roys de parler, comme est accoustumé: & par iceux obtenue, proposa ledit Aduocat le felon homicide fait en la personne de Iean Duc de Bourgongne n'agueres occis, contre Charles soy disant Daulphin de Vienne, le Vicomte de Nerbonne, le sire de Barbasan, Tanneguy du Chastel, Guillaume Boutillier, Iean Louuet President de Prouence, messire Robert de Loyre, Olivier Layet, & tous les coupables desdits homicides: contre lesquels & chacun d'eux, ledit Aduocat conclud affin qu'ils fussent meis en tumbereaux, & menez par tous les quarefourgs de Paris, nues testes par trois iours de samedy ou de feste, & teint chacun vn cierge ardent en sa main, en disant à haute voix, qu'ils auoient occis, mauuaisement, faulsement, dampnablement & par enuie le Duc de Bourgongne sans cause raisonnable quelconque: & ce fait fussent menez où ils perpetrerent ledit homicide: c'est à sçauoir à Monstreau où faut Yonne, & là deissent & repetaissent lesdictes parolles. En outre ou lieu où ils l'occirent, fut faicte & ediffiée vne Eglise: & là fussent ordonnez douze chanoynes, six chappellains & six clerks, pour y perdurablement faire le diuin office. Et fussent pourueuz de tous ornemés sacrez, de tables, de liures, de calices, de nappes & de tous autres choses necessaires & requises. Et fussent les douze chanoynes fondez chacun de deux cës liures parisis, les chappellains de cent: & les clerks cinquäte monnoye dicte aux despens dudit Daulphin, & de ses complices: & aussi que la cause pourquoy seroit faicte ladicte Eglise, fut escrite de grosse lettre entaillée en pierre au portail d'icelle: & pareillement en chacune des villes qui l'ensuiuent: c'est à sçauoir à Paris, à Romme, à Gand, à Dijon, à S. Iacques de Compostelle, & en Hierusalem où nostre seigneur souffrit mort & passiõ. Apres laquelle proposition, fut proposé de rechief par maistre Pierre de Marigny Aduocat du Roy en Parlement, prenant conclusions criminelles contre les dessusdits homicides. En outre maistre Iean l'Archer Docteur en Theologie denommé de par le recteur de l'vniuersité de Paris, proposa aussi moult bien & auctenticquement deuant les deux Roys à Paris, en eux enhortant qu'ils feissent iustice & punissent



les coupables des crimes: & declaira moult de termes, auctoritez & dignité de iustice, en enhortant (comme dit est) en moult de manieres lesdits Roys, qu'ils ecoutassent benignement & entendissent aux requestes & prieres dudit Duc, & qu'icelles requestes voulsissent mettre à effect. Apres lesquelles propositions fut respondu de par le Roy de France par la bouche de son Chancelier, que de la mort du Duc de Bourgongne de ceux qui si cruellement l'auoient occis, & des requestes contre eux presentement faictes de par ledit Duc, il leur feroit par la grace de Dieu & la bonne ayde & aduis de son frere Henry Roy d'Angleterre regent de France & heritier, bon accomplissémēt de iustice toutes les choses dictes & proposées sans faillir. Et ce fait les deux Roys & tous les autres retournerent chacun en leurs hostels.

*Comment les Anglois furent destrouffez vers Mont-Epiloy: du mariage du Marquis du Pont à la fille de Lorraine, & ce que faisoit messire Iacques de Harcourt.*

## CHAP. CCXXXIII.

**E**N apres durant les besongnes dessusdictes les Anglois de Gournay en Normandie, de Neuf-Chastel, d'Anicourt & autres de la frontiere, avec eux messire Mauroy de saint Leger qui se tenoit à Creil, fasssemblerent enuiron cinq cens combattans, & allerent courre en Brie, en Vallois & autres lieux à l'enuiron, où ils prindrent plusieurs hommes & ramenerent grans proyes: mais à leur retour furent rencontrez du seigneur de Gamaches, qui se tenoit à Cōpiengne & autres Daulphinois des garnisons du pays. Lesquels leur rescoüyrent vers Mont-Epiloy tout ce qu'ils auoient chargé, & en tuerent bien soixante sans ceux qui furent prins: & les autres se sauuerēt par fuite: auquel rencōtre se conduisit tres vaillamment ledit seigneur de Gamaches. Et en ces propres iours fut fait le mariage de Regnier d'Anjou frere du Roy de Cécille Marquis du Pont, dont par le don du Cardinal de Bar son oncle & de la fille & heritiere du Duc de Lorraine, furent les nopces faictes reallement au chastel de Nanxi le Duc: par le moyen de laquelle alliance fut appaisée la grand discorde qui par long tēps auoit esté entre les deux Duchez: c'est à sçauoir de Bar & de Lorraine: car deslors & par auāt le dessusdit Cardinal de Bar auoit declairé iceluy Regnier d'Anjou son vray hoir & heritier de la Duché de Bar: laquelle chose moult desplaisoit au Duc des Mons, qui pareillement estoit nepueu audit Cardinal fils de sa sœur: mais autre ne le pouuoit auoir. Et d'autre partie messire Iacques de Harcourt qui encores faignoit tenir le party du Duc de Bourgongne, tenoit grosse garnison au Crottoy & faisoit forte guerre par mer & par terre, dōt le Roy d'Angleterre qui en estoit aduerty, n'estoit pas bien content: & estoient complices avec ledit messire Iacques le seigneur de Rambures, messire Loys de Thiembronne & son frere Guichard, messire Coquard de Cambronne, les deux freres de Herfellames, les enfans de Chaumont & autres plusieurs gentils-hommes & gens de guerre du pays.

*Comment plusieurs ambassadeurs, de par les trois estats du Royaume de France vindrent à Paris: des estats que tindrent les deux Roys & autres matieres.*

## CHAP. CCXXXIIII.

En ces



**E**N ces mesmes iours vindrent à Paris plusieurs ambassadeurs, & commis de par les trois estats du royaume de France par auant mandez, comme dit est dessus: avec lesquels & en leurs absences furent tenuz plusieurs conseils, touchans le gouuernement & bien publicque dudit royaume: en la fin desquels furent les gabelles, impositiōs, quatriesmes & autres subsidez remises sus, reserué les grains. En apres la feste de Noël venue, tindrent les deux Roys & les Roynes leurs femmes leurs estats dedans Paris, c'est à sçauoir le Roy de Frāce en son hostel de S. Pol, & le Roy d'Angleterre au Louure: lesquels estats furent bien differens l'un à l'autre: car le Roy de France estoit petitement & pauurement seruy, & accompagné au regard du noble & puissant estat qu'il souloit auoir: & à peu cedit iour fut visité n'accompagné, sinon d'aucuns vieux seruiteurs & des gens de petit estat: laquelle chose moult deuoit desplaire à tous les cueurs des vrayz François là estans, voyans ce noble royaume par fortune & tribulation de guerre d'eux mesmes estre meis & gouuerné, en & par la main de leurs anciens ennemis: dessus laquelle domination & gouuernement, il leur faillloit viure de present. Et quant est à parler de l'estat du Roy Henry d'Angleterre & de sa femme la Roynne, lequel il fut ce iour: nul ne sçauroit racompter les grans estats, pompes & bobans qui furent faits en son hostel, tant de luy comme de ses Princes: & de toutes parts venoient en grand humilité les subiects de ce noble royaume de France deuers luy, pour luy honorer & exaulcer: & des lors commença ledit Roy du tout à gouuernier & administrer les besongnes dudit royaume, & faire officiers à son plaisir: en demettant ceux que par le Roy & le Duc de Bourgongne mort, & iceluy de maintenāt y auoient esté meis de long temps. Et d'autre part constitua le Comte de Quin nommé où Freuille capitaine general de la ville de Melun à tout souffisante garnison de gens d'armes & de gēs de traict, & le Comte de Hautiton son cousin germain, fut fait capitaine du Bois de Vincenne: & à Paris fut ordonné à demourer avec le Roy Charles le Duc d'Excestre avec cinq cens combattans. Apres lesquelles ordonnances, & que la feste de la natiuité nostre seigneur fut passée, se partit de Paris le dessusdit Roy Henry, la Roynne sa femme, le Duc de Clarence & de Bethfort & autres de ses Princes & grās seigneurs, & s'en alla à Roüen où il teint de rechief plusieurs grans conseils sur le regime du royaume: & y seiourna certaine espace deuant qu'il retourna en Angleterre: & pareillement le Duc Philippe de Bourgongne partant dudit lieu de Paris, s'en alla à Beauuais à la feste & entrée de maître Pierre Cauchon Docteur en Theologie nouuel Euesque d'icelle ville de Beauuais, moult enclin & affecté à la partie de Bourgongne. Laquelle feste passée se partit ledit Duc de là & par Amiens & Dourlens s'en alla à l'Isle, & puis à Gand, où estoit sa femme la Duchesse Michelle: où il seiourna environ trois semaines & le rouge Duc en Bauiere, qui estoit venu seruir le Roy Hēry son beau frere, cōme vous auez oüy, à tout cccc. cōbattās ou enuiron s'en retourna hastiue-  
mēt par Cābray en son païs d'Allemaigne, pource qu'il auoit oüy nouuelles q̄ les Boëmiens instruits & enseignez par vn clerc de leur païs, qui estoit hereticque, festoient dressez & confusēmēt esmeuz du venin d'heresie, nō pas seullement cōtre nostre S. Foy Catholique: mais avec ce cōtre les Roys d'Allemaigne, de Hongrie & de Boëme en grād multitude leur faisoient guerre mortelle & trescruelle.



*Comment Henry Roy d'Angleterre alla de Roüen à Calais, avec luy la Royne sa femme & de là en Angleterre où il fut receu à tresgrande ioye de tous ceux du païs.*

CHAP. CCXXXV.



Après ce que Henry Roy d'Angleterre eut ordonné ses besongnes à Roüen: & commis en son lieu capitaine general de toute Normandie son frere le Duc de Clarence, qui estoit moult prudent & renommé en armes, il se partit de là, & passa parmy Caulx avec luy la Royne sa femme, son frere le Duc de Bethfort & bien six mille combattans, & vint par Poix à Amiens la vigille saint Vincet. Et fut logé en l'hostel de maistre Robert le Jeune, qui n'aguères auoit esté constitué nouuel Baillif d'Amiens ou lieu du seigneur de Humbercourt. Si fut moult honnorablement receu, & luy fait on & à sa femme la Royne plusieurs presens. Et de là par Dourlens, saint Pol & Theroüenne alla à Calais, où il seiourna aucuns iours. Et apres passa la mer, & alla en Angleterre, où il fut receu comme l'Ange de Dieu: & luy venu en sondit royaume d'Angleterre s'employa hastiuement par toutes manieres à couronner sa femme la Royne: laquelle coronation fut faicte en la cité royale de Londres chief & maistresse de tout le royaume. Et là fut faicte telle & si grand pompe & bobant & ioliueté, que depuis le temps que iadis le tresnoble combattant Artus Roy des Bretons & Anglois, commença à regner iusques à present, ne fut veüe en ladicte ville de Londres la pareille feste de nuls des Roys Anglois. Apres laquelle feste, ledit Roy alla en propre personne par les citez & bonnes villes de son royaume: & leur exposa & declaira comme homme discret & beau parleur, toutes les grans & bonnes aduenues qui par son labeur & peine par long temps & en moult de places luy estoient aduenues en France: & les besongnes qui restoient & demourroient encores à faire audit royaume: c'est à sçauoir subiuguer son aduersaire le Daulphin de Viëne seul fils du Roy Charles, & frere de sa femme Royne d'Angleterre, qui à luy contredisant se disoit Regent de France & heritier: tenoit, occupoit & possessoit en doubte la plus grande partie dudit royaume: disant que pour ce faire & parcôquerre, deux choses luy estoient moult necessaires, c'est à sçauoir finance & gës d'armes: lesquelles requestes par luy faictes, luy furent accordées & octroyées liberallement de tout son peuple des bonnes villes dudit royaume: & pour vray il assembla tantost si grand pecune en or, argent & ioyaux, qu'à peine les pourroit on nombrer: & ce fait il esleut en sondit royaume vne grand compaignie de toute la ieunesse du païs, les plus forts & les plus habilles à traire & combattre: & en brief en cueilla & fit vn ost, qu'il ioingnist avec ses Princes, cheualiers & escuyers: tant qu'en tout assembla bien trente mille combattans, pour de rechief les ramener en France & combattre & subiuguer son aduersaire le Daulphin: mais luy estant en sondit royaume d'Angleterre, & pour iceluy obtenir plus seur, print & donna trefues à ses ennemis de Galles & d'Escofe, & avec consentit la deliurance du Roy d'Escoçe, qui par treslong temps auoit esté prisonnier en Angleterre (comme dit est ailleurs) moyennant qu'il prinst à femme sa cousine germaine sœur du Comte de Sôbresset, & niepce du Cardinal de Vincestre: lequel fut principal enuers le Roy dessusdit de traicter iceluy mariage & deliurance.

*Comment*



*Comment il s'esmeut grand discord entre le Duc de Brabant & la Duchesse sa femme : laquelle se departit de luy, & sen alla par Calais en Angleterre.*

## CHAP. CCXXXVI.

**E**N ce mesmes temps fut moult grād discord entre le Duc Iean de Brabant & de la Duchesse Iacqueline de Bauiere sa femme d'autre : Et tāt qu'icelle Duchesse se departit de l'hostel de son dit mary: Pource principalement (cōme il fut commune renommée) qu'elle le veoit de petit gouvernement, & aussi qu'il se laissoit dominer & conduire par gens de trop petit estat selon sa puissance & seigneurie: pour lequel discord appaiser & remettre ensemble, s'en entremist & trauailla par plusieurs fois le Duc Philippe de Bourgogne, auquel les deux dessusdits estoient germains. Et pareillemēt y trauailla par moult de fois la Comtesse de Hainault mere de ladicte Duchesse: mais finablement oncques ne peurent tant faire ne trauailler vers elle qu'elle y vouldist retourner, ainçois se conclud & delibera du tout en elle mesmes, qu'elle trouueroit les manieres que la departie feroit faicte d'elle & de son dit mary : & qu'elle en peust auoir vn autre qui gouuernast sa personne & sa seigneurie, ainsi qu'il appartenoit à elle. Et pour lors estoit en fleur de son aage, belle & bien formée, aornée de bon entendement autāt que nulle autre dame pouoit estre. Et si veoit son temps passer & sa ieunesse en grand desplaisance, sans recouurer: & sur ce propos retourna en son hostel, & avec ladicte Comtesse de Hainault sa mere, qui en partie l'auoit marié audit Duc de Brabant contre sa volenté, auquel hostel elle fut certaine espace: & apres vindrent ensemble en la ville de Vallenciennes. Auquel lieu icelle Duchesse print congé à sa mere dessusdicte d'aller iouer en sa ville de Bouhain : mais quand elle y fut, se partit le lendemain assez matin, & trouua sur les champs le seigneur d'Escaillon natif de Hainault Anglois en cuer de toute ancienneté: avec lequel auoit eu grand conseil par auāt audit lieu de Vallenciennes, & luy auoit promis d'aller avec luy à Vallenciēnes en Angleterre deuers le Roy Henry: affin que de luy elle eut ayde pour faire la departie dessusdicte, c'est à sçauoir de son mary & d'elle : & pourtāt apres qu'elle eut trouué ledit seigneur d'Escaillon, comme dit est, qui auoit enuiron soixante combattans avec luy, se meit en chemin & sa compaignie pour aller droit vers Calais : & cheuaucherent ceste premiere iournée iusques à Houdam assez pres de saint Pol : & puis tira iusques à Calais, où elle fut par aucune espace: & puis passa en Angleterre & alla deuers le Roy, lequel sans faille la receut & traicta honnorablement. Et avec ce luy promet de l'ayder en tous ses affaires generallement.

*Comment le Duc de Bretagne fut prins prisonnier par le Comte de Ponthieure & detenu grand espace de temps : & la guerre qui s'esmeut à ceste cause.*

## CHAP. CCXXXVII.

**R**conuient parler d'une grande & merueilleuse aduanture, qui aduint en cest an en Bretagne: il est assez sceu & declairé en aucunes histoires, & par especial en celles de maistre Iean Froissart, comme les deuanriers de Iean de Montfort à present Duc de Bretagne, & ceux d'Oliuier de Bretagne Comte de Ponthieure: si eurent au temps passé de grans guerres &



diffentions l'un contre l'autre, pour auoir la Duché & seigneurie d'iceluy païs: à laquelle vn chacū d'eux se disoit auoir le plus grand droit, pour lesquels traicter & appaïser, furent faits plusieurs traictez entre lesdictes parties, en la fin desquels demoura icelle Duché franchement à ceux de Montfort, moyennant que la partie de Ponthieure eut aucunes recompensations: desquelles reciter à present ie me passe, pourtant que ce n'a pas esté du temps de mon liure, & en possederent paisiblement les dessusdits par long temps: Neantmoins jaçoit-ce que ledit Comte de Ponthieure monstraist audit Duc chacun iour semblant de grand amour à la veüe du monde, si n'estoit pas l'ancienne guerre (dont dessus est faicte mention) bien appaïsee, quant à luy comme vous orrez cy apres. Vray est que sur l'esperance en partie de retourner à la seigneurie de Bretagne, & par l'exhortation de la dame de Clifson sa mere fille de feu messire Oliuier iadis Connestable de France: le dessusdit Comte de Ponthieure, par certains moyens traicta tant deuers le Duc de Tourraine Daulphin, qu'il obtint de luy mandement seellé de son seel pour prendre & emprisonner ledit Duc de Bretagne: car nonobstant qu'iceluy Duc eut espousée la sœur du Daulphin, si n'estoit il pas content de luy, par ce qu'il ne se vouloit luy ne ses païs de tout plainemēt estre de sa partie, ne luy ayder à faire sa guerre contre les Anglois & Bourgongnons: apres lequel mandement obtenu, comme dit est, ledit Comte y pensa, & imagina comment ne par qu'elle maniere il pourroit mener son entreprinse à chief: & en fin ne sceut trouuer meilleur moyen pour parfournir son faict, que de prier le Duc de venir prendre son disner à Chantoceau: & comme il pensa, ainsi le feit: c'est à sçauoir alla vn certain iour deuers luy en la ville de Nantes. Et apres qu'ils eurent fait plusieurs deuises l'un avec l'autre, le Comte requist bien instamment au Duc qu'il luy pleust venir audit lieu de Chantoceau esbattre & prendre son disner: disant outre que ma dame sa mere, laquelle y estoit en seroit moult ioyeuse, & le receuroit à son pouuoir tres honorablement: laquelle requeste par ledit Duc luy fut accordée: car en riens ne se doubtoit qu'on luy voulüst faire ne traicter autre chose que bien: & fut le iour accepté le quatriesme iour de Feurier: lequel venu se partit le dessusdit Duc où il auoit geu, nommé le Lorrans Bocqteriaux, & print son chemin à aller à icelle ville de Chantoceau. Si allerent ses maistres d'hostels & fourriers deuant, pour appoincter les besongnes cōme il est de coustume: & quand ils furent là venus, le Comte monta à cheual, & alla à tout les gens de son hostel au deuant du Duc iusques aupres d'un pont nommé le pont à la Tuberde, qui siet sur vne petite riuere. Par lequel pont passa ledit Duc en sa compaignie Richard son frere & aucuns autres cheualiers & escuyers de son hostel, & les autres gens les suiuiroient de loing, & n'estoient en doute de nul mal engin: & quand il fut passé le pont, il y eut vn des gens dudit Comte qui contre-faisoit le fol: lequel descendit à pied, & bouta les plāches en l'eaüe d'iceluy pont, en faisant semblant de luy ioïer & faire sa follie: pourquoy les gens du Duc qui suiuiroient derriere, comme dit est, ne peurent passer. Et encores ne se doubtoit ledit Duc de nul mal, & rioit de la follie dessusdicte: mais entre-tēps Charles seigneur de l'Auaugourt frere du Comte, qui estoit en embusche à tout quarante hommes d'armes ou enuiron avecques luy, vint accourant deuers le Duc: lequel les voyant venir demanda audit Comte de Ponthieure, beau cousin quels gens  
font



font cecy, & il respondit: monseigneur ce sont mes gens. Je vous fais prisonnier de monseigneur le Daulphin, & meit la main à luy: ausquelles parolles le Duc respondit tout esmerueillé: ha beau cousin, vous faictes mal: ie suis venu sur vostre parolle & vostre requeste, & ne me deffiois en riens de vous ne des vostres. Toutesfois y eut aucuns de ses gens qui tirerent leurs espées: pour le cuyder deffendre: mais ils veirent assez tost qu'ils estoient trop foibles au regard de leur aduerse partie. Et entre-temps vindrent sur eux ceux de la dessusdicte embusche les espées traictes, & y eut deux gentils-hômes du Duc, dont l'un est à sçauoir Iean de Beau-manoir eut le poing coupé: & l'autre fut nauré en la main, qui se nommoit Thibault Buiffon. Et apres vn gentil-homme de l'hostel du Comte nommé Henry l'Alemand voulut frapper le Duc de son espée, mais le Comte le deffendit contre luy. Et commanda à ses gens qu'ils cessassent, disant qu'il meneroit le Duc deuers le Daulphin dessusdit. Et lors les gens du Duc qui estoient outre le pont, voyans leur seigneur en tel dangier estoient en grād destresse de ce qu'ils ne le pouuoient secourir, & ne sçauoient quel conseil prendre. Et tost apres le dessusdit Comte de Ponthieure, son frere & ses gens emmenerent ledit Duc & Richard son frere hastiuement vers Poitou à Bressuire, & de là fut mené par plusieurs fois à d'autres lieux, comme à Lizenan, à Bournouiau, à Chasteaumur & ailleurs: & fut prisonnier enuiron de six à sept mois sans estre meis en prison fermée, ne qu'aucune violence luy fut faicte à la personne: mais bien s'en tenoit on seur, & auoit pour le seruir tant seulement vn de ses varlets de chābre. Et fut son frere Richard par dessus nommé tousiours prisonnier cōme luy. En outre quand il fut venu à cognoissance de la Duchesse de Bretagne & des seigneurs du païs comment le Duc auoit esté prins, ne faut point demander s'ils furent fort troublez, & par especial ladicte Duchesse en feit si grand dueil qu'à grand peine la pouoit on rappaiser. Toutesfois incontinent & brief ensuiuant s'assemblerent les barons & grans seigneurs du païs avec ladicte Duchesse en la ville de Nantes. Et là tous ensemble conclurent & iurerent solennellement de poursuiuir la deliurance du Duc, & faire guerre audit Comte de Ponthieure, & à tous ses alliez & bien-vueillans: & d'un commun accord esleurent pour conduire l'armée d'icelle poursuite, le seigneur de Chateau Bruyant & le seigneur de Rieux, qui de fait à toute grosse puissance de gens d'armes allerent mettre le siege deuant Lamballes, appartenant audit Comte qui se tint enuiron quinze iours. Et apres se renderent ceux de dedans, & furent la ville & chastel qui estoient moult forts abbatuz & desolez: & de là allerent au chastel Andren, lequel fut abbatu: & pareillement feirent la Mote d'Ebron. En apres allerent assieger Chantoceau, où estoit la vieille Comtesse de Ponthieure: & en estoit capitaine le seigneur de Bierrieres, qui moult bien le deffendit: si y fut le siege bien trois mois, mais peu y feirent: car elle estoit moult bien garnie de viures & habillemens de guerre, & aussi de bonnes gens d'armes. Et entre-temps traicté se feit entre le Duc & le Comte, & promet iceluy Duc de le restituer de tous ses dommaiges, tant de ses fortelles abbatues cōme d'autres: & que iamais pour ceste besongne ne luy seroit fait par luy ne par les siens aucune chose, qui luy portast preiudice. Apres lequel traicté & les seurtez prinſes le Comte dessusdit renuoya le Duc par le seigneur de l'Esгле son frere: lequel Duc de prime face feit leuer le siege de Chantoceau: mais en



fin quand les barons & seigneurs de son païs avec les prelatz eurent deuers eux ledit Duc, ils ne voulurent pas entretenir les dessusdits traictez: & conuint que la dessusdicte Comtesse & se gens se partissent de là, & que la ville de Chantoceau fut mise en la main du Duc. Si fut print iour de parlement de rechief entre eux parties, pour veoir & aduiser s'ils pourroient estre d'accord. Auquel iour promet ledit Comte d'y comparoir en personne: & pour la seurte de ce, bailla son frere Guillaume en hostage: mais il n'y comparut point, pourtant qu'il fut certainement aduertie que s'il y alloit, iamaiz n'en retourneroit. Et pour vray s'il y fut allé, il eut esté executé par iustice, & auoit esté ainsi cōclud par les trois estats de la Duché: & qui plus est dirent audit Duc, que s'il vouloit entretenir le traicté qu'il auoit fait avec le Comte de Ponthieure, ils le debouteroient de sa seigneurie & n'obeyroient plus à luy, mais feroient de son fils aîné leur seigneur & maître: & par ainsi conuint qu'il s'accordast à leur voulenté. Lesquelles besongnes venues à la cognoissance du Comte fut en tresgrand soucy nompas sans cause, car il sçauoit toutes les seigneuries de Bretagne estre arrestées & mises en la main du Duc comme confiscuées & perdues: & son frere dessusdit demourer en hostage, qu'il ne pouuoit r'auoir: & d'autre part estoit mal du Daulphin, pource qu'il ne luy auoit voulu bailler ne liurer ledit Duc: & avec tout ce ne sçauoit bonement où estre assure de sa personne, car peu trouuoit qui le voulüst soubstenir. Pour lesquels inconueniens eslongner, se retrahit en la Vicomté de Limoges: & apres aucunes conclusions prinsez avec ses freres, il se partit de là & par le païs d'Auergne s'en alla à Lyon sur le Rhosne, & puis à Genesve & à Balle pour venir à sa terre d'Auesnes au païs de Hainault: mais ainsi qu'il faisoit son chemin sur la riuere du Rhin, il fut prins du Marquis de Bade pour mercq: pourtant qu'iceluy Marquis auoit autresfois eu de ses gens destrouffez audit païs de Hainault, si fut grand espace prisonnier: & en fin luy cousta bien trente mille escus d'or, & apres s'en retourna en sadicte terre d'Auesnes. Et depuis qu'il y fut, le Duc de Bretagne meit gens sus pour le cuider faire prendre, & luy mettre vn carcant au col: & pour ce faire furent enuoyez aucuns gentils-hommes dudit païs de Bretagne: c'est à sçauoir messire Roland de saint Pol, messire Iean de Lumon, Iacquet du Faulermine & aucuns autres qui se conduirent si mal secretement, que leur entreprinse fut accusée: & y eut les aucuns detenuz prisonniers, & les autres se sauuerent: mais il faillut que ledit Comte les rendit à la iustice de Mons, & n'en y eut nuls executez: lequel Comte ne retourna oncques puis en Bretagne, mais demoura oudit païs sa vie durant audit païs de Hainault, & print à mariage la fille & heritiere du seigneur de Quieurnain: de laquelle il laissa à son trespas aucuns enfans, qui point ne vesquirent iusques en aage competant: pourquoy ses terres & seigneuries retournerent à son frere le seigneur de l'Egle.

*Comment les Daulphinois prindrent de rechief Villeneufue le Roy & le seigneur de Chastillon: Chasteau Thierry où estoit la Hyre, & autres besongnes.*

CHAP. CCXXXVIII.

Ou





V mois de Feurier reprindrent les Daulphinois Villeneufue le Roy : mais assez brief ensuiuant se logerēt es villages à l'enuiron par maniere de siege le seigneur de l'Isle Adam & autres capitaines, tenans la partie du Duc de Bourgogne. Si y furent certaine espace, & en fin se deslogerent sans mettre ladicte ville en obeissance, pourquoy le païs refut par le moyen d'iceux en grand tribulation: & depuis fut traicté avec le capitaine dudit lieu qu'il laisseroit passer viures à aller à Paris parmy certains tributs qu'il en deuoit auoir pour sa part. Auquel temps fut liurée au seigneur de Chastillon la ville & forteresse de Chasteau Thierry, que tenoient les Daulphinois: & y entra par le moyen d'aucuns bourgeois & habitans de la ville à luy fauorables: si y fut prins la Hire & plusieurs de ses gens, qui depuis furent deliurez par finance. Et entre-temps les dessusdits Daulphinois qui se tenoient à Meaux en Brie, à Compiengne, à Pierrefons, & en la coste de Vallois, degastotent moult fort par leurs courses les païs à l'enuiron d'eux: & par especial Beauuoisis, Vermandois & Santers: & pareillement faisoient ceux de la Comté de Guyse au païs de Hainault & de Cambresis, & autres lieux pres de leurs marches. Durant lesquelles besongnes depuis l'an mille quatre cens & quinze iusques à ce present an mille quatre cens & vingt, les monnoyes de France estoient moult grandement affoiblies, & tant qu'en conclusion deuant le reestablisement d'icelles, vallut vn escu d'or de la forge du Roy de France la somme de xxix. sols monnoye courfable, jaçoit-ce qu'il n'eut esté forgé que pour dixhuit sols parisis: par le moyen duquel affoiblissement desdictes monnoyes, plusieurs seigneurs & autres gens à qui rentes d'argent estoient deües, furent fort interessez. Et à ceste cause s'en esmeurent plusieurs procès entre les parties: & lors de la monnoye dessusdicte, valloit vne cheuallée de blé sept ou huit francs.

*Comment le Duc de Touraine Daulphin fut appelé à la table de marbre: & de la prinse du seigneur de l'Isle Adam dedans Paris par le Duc d'Excestre.*

CHAP. CCXXXIX.



EN cest an Henry Roy d'Angleterre deuant qu'il partist de Paris pour repasser la mer, fait conuocquer & appeller Charles Duc de Touraine Daulphin à la table de marbre: & là fait en ce cas toutes les solemnitez accoustumées contre luy & ses complices pour le cas & crime fait en la personne du Duc Iean de Bourgogne: & pourtāt qu'ausdictes appellations n'alla n'enuoya, fut par le conseil & parlement banny & exillé du royaume, & iugé indigne de succeder à toutes seigneuries venues & aduenir: dont il appella à la poincte de son espée. Et mesmement de la succession & attente qu'il auoit à la couronne de France: nonobstāt que d'icelle fut vray heritier apres le trespas du Roy Charles son pere selon les coustumes anciennes de ce noble royaume: duquel deboutement & banissement plusieurs Parisiens furent tresioyeux, car moult le doubtoient. En apres le Duc d'Excestre qui estoit capitaine de Paris pour certaines causes qui à ce le meurēt, fait prendre en icelle ville le seigneur de l'Isle Adam par aucuns de ses Anglois: pour laquelle prinse s'assemblerēt iusques à mille homes ou plus du commun de Paris, pour le rescourre à ceux qui le menoiēt en la bastille S. Anthoine: mais tantost ledit Duc d'Excestre à tout fix



vingts combatans, dont il y auoit la plus grand partie archiers, alla frapper en eux & faire tirer les dessusdits archiers au trauers desdictes communes: pourquoy tant par la creueur dudit traict comme par le commandement qu'il leur fait de par le Roy, se retrahirent assez brief en leurs maisons: & ledit seigneur de l'Isle-Adam fut (comme dit est) mis prisonnier & y demoura durant la vie du Roy Henry d'Angleterre, lequel l'eust fait mourir ce n'eust esté la requeste du Duc de Bourgongne.

*Comment le Duc de Clarence fut desconfit empres Baugy par les Daulphinois: & y furent morts grand nombre de nobles & gentils-hommes des deux parties.*

## CHAP. CCXL.

**E**N la fin de cest an droit la nuit de Pasques, le Duc de Clarence qui estoit capitaine General de toute Normandie apres le partement du Roy Henry son frere, auoit mené son ost vers le païs d'Anjou où estoient assemblez en tresgrand nombre les Daulphinois: c'est à sçauoir le Comte de Bocquingen Cōestable du Daulphin & le seigneur de la Fayette, avec plusieurs autres capitaines pour iceux combatre & subiuguer. Aduint que cedit iour ledit Duc de Clarence ouyt certaines nouuelles que ses ennemis estoient assez pres de luy en vne ville, nommée Baugy en Anjou: & pourtant incontinent ledit Duc qui moult estoit renommé & preux en armes, print sans delay vne partie de ses gens, & par especial à peu pres tous ses capitaines: à tout lesquels moult asprement alla enuahir ses ennemis, & commencerent dure & aspre bataille & moult ensanglantée: & entre-temps la grand tourbe de son ost le suiuoit de loing à tresgrād peine & dangier pour les mauuais pas d'une riuere qu'ils auoient à passer. Et d'autre costé les Daulphinois dessusdits, qui estoient pourueuz & aduisez de la venue de leurs ennemis, commencerent à batailler tresvaillamment contre les dessusdits Anglois: & tant que des deux parties y eut tresdure, aspre & cruelle bataille, mais en cōclusion les Daulphinois obtindrent & eurent la victoire contre les Anglois. Et furent mort sur la place le dessusdit Duc de Clarence, le Comte de Quin, le seigneur de Ros mareschal d'Angleterre, & generallemēt la fleur de la cheuallerie & escuyerie dudit Duc avec de deux à trois mille desdits Anglois: & avec ce furent prins audit lieu le Comte de Sombresset, le Comte de Hautiton, le Comte du Perche, avec deux autres cens de leurs gens ou enuiron. Et de la partie du Daulphin y furent morts de mille à vnze cens hommes: entre lesquels mourut vn vaillant cheualier nommé Charles le Bou-teillier, & avec luy messire Iean Yuorin, Garin de Fontaines, messire Iean de Pasfauant, messire Iean de Brelle, messire Iean Totauant & plusieurs autres notables & vaillans hommes d'armes iusques au nombre dessusdit: & fut de ce iour en auant celle assemblée nommée la bataille de Baugy: pour la mort & desconfiture desquels Anglois tous les autres eurent au cueur tresgrand tristesse, par especial pour le Duc de Clarence: car moult estoit aymé entre eux pour sa prudence. Neantmoins iceux Anglois qui estoient sous le gouuernement du Comte de Salsebery reconquirent le corps dudit Duc, lequel depuis fut par Rouen mené & enterré à tresgrand solemnité en Angleterre.

*Pour*



*Pour l'an mille cccc.xxi.**Comment lesdits Daulphinois allerent deuant Allençon, où de rechef allerent les Anglois. Et du mariage du Duc d'Allençon & autres matieres.*

## CHAP. CCXLI.

**A**V commencement de cest an apres la mort du Duc de Clarence, les Daulphinois qui auoient eu victoire contre ledit Duc (comme dit est dessus) s'assemblerent en tresgrand nombre, & allerent pour aller assieger Alençon: & de fait se logerent assez pres d'icelle, en la combattant à leur pouoir: mais les Anglois qui en grand tristesse portoient le dommage qu'ils auoient eu, se meirent ensemble & assemblerent de rechef toutes leurs garnisons de Normandie, & sous la conduite du Comte de Salsbery allerent vers Alençon pour leuer le siege & iceux combattre. Et adonc les dessusdits Daulphinois pourueuz & aduisez, comme deuant de la venue de leurs ennemis, se meirent en ordonnance dehors leurs logis, & monstrent semblant de grand hardiesse. Et lors les dessusdits Anglois voyant iceux en plus grand nombre que ils n'estoient, se retrahirent à l'abbaye du Becq: toutesfois auant qu'ils y peussent estre, ils perdirent de deux à trois cens de leurs hommes tant prins comme morts par lesdits Daulphinois, & furent poursuiuis iusques à ladicte abbaye. Et pource qu'ils veirent que dedans icelle ne les pourroient auoir sans grand perte de leurs gens, se departirent dudit siege, & les laisserent du tout, & retournerent vers Dreux & vers Anjou. Et en ces propres iours fut traicté & parfait le mariage du Duc d'Alençon & de la seule fille du Duc d'Orleans prisonnier en Angleterre: & se feirent les nopces tant solennellement comme reallement en la ville de Blois: duquel mariage faire & traicter furent les principaulx Charles Duc de Touraine, à qui elle estoit niepce, & le Duc de Bretaigne oncle dudit Duc d'Alençon. Esquels iours aussi le Roy Henry qui encores estoit en Angleterre, ouyt les nouuelles de la mort de son frere le Duc de Clarence & de la perte & des autres Princes, dont grandement fut troublé: & pource plus que par auant se hastia & prepara son armée pour retourner en France, affin de prendre vengeance des Daulphinois qui ce dueil luy auoient mis au cuer.

*Comment messire Iaques de Harcourt commenca faire guerre aux gens & païs du Duc de Bourgongne: & des inconueniens qui sourdirent à ceste cause.*

## CHAP. CCXLII.

**E**N ce temps messire Iaques de Harcourt qui se tenoit au Crotoy, & faisoit guerre aux Anglois (comme dit est dessus) s'abstint fort d'auoir hantise ne communication avec le Duc de Bourgongne, ne à ceux à luy fauorables: & print au Haure d'Estapples vn vaisiel chargé de blé qui estoit à messire Hemon de Bóber, lequel tenoit le party dudit Duc de Bourgongne. Et pource qu'il ne le voulut pas rendre quand il en fut sommé & requis, s'esmeut soudainement grand guerre entre eux: laquelle en conclusion fut moult preiudiciable à tout le païs de Ponthieu, & à l'environ: car ledit messire Hemon pour venger son courroux, s'en alla complaindre au lieutenant de Calais, c'est à sçauoir messire Guillaume Balledo: lequel soudainemēt print tous ses soudoyers



Anglois de la Comté de Guynes & de Calais, & par nauires les mena & conduist empres le Crotoy : & là ardist & brusta toutes les nefes & vaisseaulx de mer qu'il y trouua, & apres se retrahit audit lieu de Calais. Pour laquelle entreprinse venger, ledit messire Iaques de Harcourt entra à main armée en aucunes des villes dudit messire Hemon, & les pillà tout au net en menant les proyes, & tous autres biens en ses garnisons de Noyelle & du Crotoy. Et brief ensuiuant ledit de Bomber en rendant le pareil, courut les villes dudit messire Iaques: & fut du tout entre eux la guerre esmeüe, non pas tant seullement à leur preiudice, mais de tout le païs : car ledit messire Iaques pour luy fortifier, attrahit à luy plusieurs hommes d'armes & gens de guerre de Compiengne & d'ailleurs: & aussi fallierent de rechef plusieurs nobles hommes du païs de Vimeu & Ponthieu avec le seigneur de Rambures, & les autres dont dessus est faicte mention: c'est à sçauoir Loys de Vaucourt, le bon de Saueuses, Parceual de Houdent, Pierre Quieret capitaine Derrames & moult d'autres: si furent brief ensuiuant mises en la main la ville de saint Riquier, & aupres d'icelle les fortresses de la Ferté & de Drugy, l'Isle & le chastel du Pont de Remy, & les fortresses d'Arames & Diaucourt & de Moreul: & à l'autre de saint Valery Rambures, Gamaches & aucunes autres: dedans lesquelles à la poursuite dudit messire Iaques, se bouterent plusieurs Daulphinois qui commencerent à faire guerre ouuerte aux païs du Duc de Bourgogne, & à ceux tenans son party: & par ainsi furent les païs à l'enuiron moult fort trauaillez: toutesfois ladicte ville de saint Riquier ne se meist pas en l'obeïssance dudit messire Iaques iusques à tant, que le Roy d'Angleterre fut repassé à aller en France comme vous orrez cy apres.

*Comment Henry Roy d'Angleterre retourna en France à grand puissance, pour aller contre le Daulphin qui auoit assiegé la ville de Chartres.*

CHAP. CCXLIII.



Tem apres que le dessusdit Roy d'Angleterre eust ordonné ses besongnes en son royaume, & que toute son armée fut preste autour de Cantorbie & iceux payez de leurs souldées pour huiet mois, s'en vindrent à Douures: & là & és autres ports voisins luy & toutes ses gens entrèrent en mer dedans leurs vaisseaulx au point du iour la vigille sainte Barbe: & en ce mesme iour entrèrent & arriuerent au Haure de Calais à deux heures apres midy. Et adonc le Roy issit de sa Hurque, & se logea en son chastel audit lieu de Calais: & semblablement tous les autres issans de leurs vaisseaulx, furent logez tant en la ville comme és lieux voisins, selon l'ordonnance dudit Roy & de ses fourriers. Et tantost apres que lesdits vaisseaulx furent deschargez, le Roy les renuoya en Angleterre: & comme il fut estimé par plusieurs notables hommes à ce cognoissans, il y descendit pource iour de trois à quatre mille hommes d'armes & bien xxiiij. mille archiers. Et le lendemain iour sainte Barbe feist ledit Roy partir le Comte d'Urfet & le seigneur de Clifford, pour aller à Paris conforter & ayder son oncle le Duc d'Excestre & les Parisiens, qui pour lors estoient moult court tenuz de viures par les garnisons des Daulphinois, qui estoient autour d'eux, & menerent les dessusdits douze cens combatans: à tout lesquels cheuaucherent hastiuement, escheuans les aguets de leurs ennemis iusques audit lieu de



de Paris, où ils furent moult ioyeusement receuz tant pour leur venue, comme pour les nouuelles qu'ils porterent de la descendue de leur Roy d'Angleterre: auquel les Parisiens auoient plusieurs fois transmis leurs messages en Angleterre: car le Duc de Touraine Daulphin pource temps auoit assemblé de plusieurs pays tresgrand puissance de gens d'armes, à tout lesquels se tira pour aller vers Chartres, & se rendirent à luy les villes de Bonneual & Galardon avec aucunes autres forteresses, lesquelles il garnit de ses gens: & puis s'en alla loger au plus pres de ladiète ville de Chartres, & l'assiegea de tous costez trespuissamment: mais elle fut fort deffendue par le Bastard de Thiam & autres capitaines, lesquels hastiement auoient esté enuoyez de Paris pour secourir ladiète cité: & comme il fut estimé par gens à ce cognoissans, pouoit auoir ledit Daulphin en sa compagnie de six à sept mille harnois de iambes, quatre mille arbalestriers & six mille archiers: & ainsi fut mandé au Roy d'Angleterre par ceux qui les auoient veuz: si commencerent iceux Daulphinois à dresser plusieurs engins contre les portes & murailles d'icelle ville, dont elle fut aucunement trauaillée: mais pourtant que ceux de dedans estoient assez acertenez qu'ils auroient brief secours par ledit Roy Henry d'Angleterre, n'estoient pas en si grand soucy pour les besongnes & approches dessusdictes.

*Comment le Roy d'Angleterre se tira de Calais par Abbeuille à Beauuais, & depuis à Mantes où alla deuers luy le Duc de Bourgongne. CHAP. CCXLIIII.*



Pres que le dessusdit Roy d'Angleterre eut par aucuns iours ordonnées ses besongnes à Calais, il se partit assez en haste, pource que de rechef les Parisiens & son oncle d'Excestre le hastoient, affin de secourir ladiète ville de Chartres: & print son chemin vers la mer, & alla à Monstreul loger en l'hostel de la Couronne, & ses gens en la plus grand partie se logerent sur le plat pays autour de ladiète ville: en laquelle estoit venu vn iour deuant Philippe Duc de Bourgongne, pour estre à l'encontre du Roy: & pourtāt qu'il estoit occuppé de maladie & fieures, ne monta il pas à cheual pour aller à l'encontre d'iceluy Roy: mais y enuoya messire Iean de Luxembourg & sa cheualerie, pour luy humblement excuser de non y estre allé. Et apres la venue du Roy, seiournerēt trois iours en icelle ville pour parler ensemble & auoir conseil sur leurs affaires. Et eux de là partans ensemble, c'est à sçauoir le Roy d'Angleterre & le Duc de Bourgongne, allerent loger à Douvast en Ponthieu. Et au passer parmy Montenay, feist le Roy Anglois ardoir la tour, maison & moulin de messire Iaques de Harcourt. Et pource que ledit Roy vouloit passer l'eau de Somme par la ville d'Abbeuille, se partit ledit Duc de Bourgongne, & alla audit lieu d'Abbeuille traicter & tant faire qu'iceluy Roy y peust passer: laquelle chose luy fut octroyée assez enuis, mais ledit Duc leur promeist que tous les despēs feroient payez planierement. Et entre-temps le Roy s'occupa à chasser avecques ses Princes en la forest de Crespy, & le iour ensuiuant alla loger à saint Riquier, empres laquelle ville estoit vne forte forteresse nommée la ferté, où il y auoit environ soixante combatans des gens de messire Iaques de Harcourt, de laquelle en estoit capitaine le Bastard de Bellay, qui par sommation à luy faicte suffisamment rendit ladiète forteresse: & y fut mis de par le Roy & le Duc de



Bourgongne vn gentil-homme du païs nommé Nycaise de Boufflers, lequel la rendit brief apres ensuiuant en la main des Daulphinois comme dessus. Et outre dudit lieu de saint Riquier cheuaucha le Roy Anglois à Abbeuille: & là fut receu honnorablement par le pourchats & diligence dudit Duc de Bourgongne, & luy furent fais en icelle ville de moult beaulx presens. Et auecques ce passerent paisiblement toutes ses gens auecques ses chars & charrettes & autres bagues, & le lendemain (apres que tous les despens furent payez) se meist ledit Roy au chemin auec tout son ost & congea le Duc de Bourgongne, par condition qu'il luy promeist de retourner vers luy assez brief à tout son armée: & cheuaucha par Beauuais, Gisors: & de là au bois de Vincenne où estoient le Roy de France & la Royne sa femme, lesquels il salua honnorablement, & pareillement fut d'eux receu à grand ioye, & là vindrent deuers luy son oncle le Duc d'Excestre & plusieurs autres des gouuerneurs & conseilliers du Roy de France, auec lesquels furent tenus plusieurs grans conseils sur les affaires du royaume. Entre lesquels fut ordonné que les florettes: c'est à sçauoir la monnoye du Roy qui auoit cours pour seize deniers, seroiēt mises & rabaisées à trois deniers. Si fut tantost ce publié par tout le royaume es bailliages & seneschaucées: pour lequel rabaissemēt le commun de Paris & d'autres lieux commencerent fort à murmurer contre lesdits gouuerneurs du royaume, mais autre ne le peurent auoir. Et encores qui leur tourna à plus grand desplaisir & dommage, furent brief ensuiuant remises de quatre à deux: & apres iceluy Roy d'Angleterre assembla grand puissance de gens d'armes au païs de France: à tout lesquels ceux qu'il auoit amenez d'Angleterre se tira à Mante pour aller combattre le Daulphin, qui ja auoit esté trois semaines deuant Chartres: & manda le Duc de Bourgongne qu'il allast deuers luy à tout ce qu'il pourroit finer de gens d'armes pour estre à la iournée: lequel Duc se prepara hastiuement d'y aller, & se tira à tout bien trois mille combatans en la ville d'Amiens, & au païs à l'enuiron: & de là par Beauuais à Gisors se tira vers ladicte ville de Mantes. Si laissa ses gens en vn gros village, & alla à priuée mesgnie audit lieu de Mantes deuers ledit Roy d'Angleterre, qui de sa venue & bonne diligence fut trescontent: mais entre-temps le dessusdit Daulphin & ceux qui estoient auec luy aduertis de sa puissance & assemblée dessusdicte, se partirent de deuant Chartres & se retrahirent vers Tours en Touraine: & pourtant apres ce que le Duc de Bourgongne eut aucun parlement auec ledit Roy, luy fut ordonné de retourner en Picardie pour subiuguer les Daulphinois, qui chacun iour s'enforçoient de faire plusieurs maux audit païs par le moyen de messire Iaques de Harcourt,

*Comment le seigneur d'Offemont entra dedans S. Riquier. L'aduanture du seigneur de Cohen capitaine d'Abbeuille, & autres besongnes faictes en ce temps,*

CHAP. CCXLV.

**E**N apres durant le voyage que feist le Duc de Bourgongne deuers le Roy d'Angleterre, comme vous auez ouï, assemblerent le seigneur d'Offemont & Pothon de sainte Treille enuiron douze cens cheualx, à tout lesquels par Vimeu allerent passer la riuere de Somme à la Blanche-tache: & de là auec messire Iaques de Harcourt qui vint au deuant d'eux



d'eux, allerent à saint Riquier : auquel lieu par le moyen dudit messire Jaques de Harcourt leur fut faicte ouuerture, & se logerent tous dedans ladicte ville. Et avec ce traicterent avec Nycaise de Boufflers qui estoit dedans la forteresse de la Ferté, par condition qu'elle leur fut rendue & deliurée : & pareillement obtindrent l'entrée du chastel de Drugy appartenant à l'Abbé de saint Riquier : & apres qu'ils furent logez (comme dit est) commencerent à courre & enuahir tout le pays à l'environ : & mesmes allerent sur l'eaue de Caucheen vn grand village nommé Conchy : auquel lieu ils embraserent & meirent en feu de fons en comble vne tresbelle Eglise, dedans laquelle festoient retraits avec aucuns de leurs biens, qui tous ou en la plus grand partie furent emmenez prisonniers comme chetifs, audit lieu de saint Riquier. Et d'autre costé fut rendue à Pothon de sainte Treille la forteresse de Dourier assise & située en tresfort lieu sur la riuere d'Authie. Pour laquelle prinse, la ville de Monstreul & les marches à l'environ furent moult troublez. En outre le Duc de Bourgongne retourné iusques en vne ville nommée Croissy à tout son armée, luy vindrent certaines nouuelles comment ledit seigneur d'Offemont & Pothon de sainte Treille estoient dedans S. Riquier & ce qu'ils auoient : surquoy assembla son conseil & delibera avec iceluy que sans delay manderoit gens d'armes de toutes parts en ses pays, & aussi arbalestriers és bonnes villes du Roy & és siennes, affin que de brief ensuiuant alast assieger ladicte ville de saint Riquier. Et sur ceste intétion s'en alla à Amiens, où il feist requeste d'auoir ayde de gēs d'armes, laquelle luy fut accordée. Et d'autre part enuoya plusieurs de ses gens à tout ses lettres & mandemens par diuerfes bonnes villes faire pareille requeste : lesquelles bonnes villes toutes ou en la plus grand partie promeirent liberallement de le seruir. En apres ledit Duc partant d'Amiens, alla par Dourlens loger à Auxi sur la riuere d'Authie à trois lieües de saint Riquier : auquel lieu retourna deuers luy messire Jean de Luxembourg, qui par auant à tout certain nombre de combatans estoit allé à Dōmart en Ponthieu & deuers ladicte ville de saint Riquier, pour enquerre & sçauoir la puissance & estat des Daulphinois. Si seiourna par trois iours le Duc en icelle ville d'Auxi, attendant ses gens qui là de plusieurs lieux venoient à luy. Et entre-temps que les besongnes dessusdictes se faisoient, le seigneur de Cohen qui estoit capitaine d'Abbeuille, vn certain iour ainsi qu'il alloit visiter son guet apres souper tout à cheual luy vj. ou environ, ayant deuant luy aucuns de ses gens portans torches ou fallots, fut assailly soudainement de trois ou quatre compagnons, qui là de fait appensé l'attendoient : & vigoureusement en disant aucunes parolles sur luy frapperent, & le naurerent tresfort au visaige : & aussi ferirent vn aduocat en la teste qui estoit avecques luy monté sur vn tresbon cheual, & auoit à nom maistre Jean de Queux qui du coup dessusdit fut si fort estourdy, qu'il ferit son cheual des esperons : & par grād desroy le porta ledit cheual parmy vne grosse chaine de fer tendue au trauers d'une rue, tenant à vne estache au meillieu de ladicte rue, comme audit cas est accoustumé : laquelle estache de la grand puissance dudit cheual, fut arrachée hors de terre : & adonc ledit maistre Jean cheut & fut de rechef tout derompu : parquoy brief ensuiuant il mourut. Et le dessusdit seigneur de Cohen, comme dit est, tout nauré avec aucuns de ses gens, fut remené en son hostel, & ne sceut pour lors dont ce luy estoit venu : toutesfois les dessusdits fa-



teurs estoient d'Abbeuille, & se partirent secrettement par le moyen de leurs amis : & allerent au Crotoy deuers messire Jaques de Harcourt, & luy racompterent ceste aduanture : lequel de ce tresioyeulx les retint avec luy. En fin apres aucuns ans passez furent prins, & pour ce meffait & autres furent executez.

*Comment le Duc Philippe de Bourgongne alla deuant le Pont-sainct-Remy & le conquist. Et les armes qui se feirent deuant S. Riquier où estoit le seigneur d'Offemont.*

## CHAP. CCXLVI.

**L** est verité que le Duc de Bourgongne partant de la ville d'Auxi à tout son exercite, alla loger en vn gros village nommé Viurens à vne lieüe de sainct Riquier. Et le lendemain passant iceluy Duc deuant icelle ville de sainct Riquier, s'en alla loger au Pont de Remy où estoient les Daulphinois, & fut la nuit de la feste de Marie Magdaleine. Si se logerent aucuns de ses gens deuant le pont dedans grandes maisons qui là estoient situées : mais brief apres les Daulphinois qui estoient dedans l'Isle & chastel du Pont de Remy, trahirent le feu par fusées dedans lesdictes maisons, lesquelles tantost de l'une à l'autre furent toutes embrasées : pourquoy il fallut que les gens dudit Duc se retrahissent & logeassent plus arriere. Et le second iour ensuiuant les arbalestriers d'Amiens & autres gens d'armes, qui les conduisoient dedans environ douze bateaulx auallerent par la riuere de Somme prests pour combattre ladicte ville & chastel : mais les dessusdits Daulphinois sçachans la venue desdits bateaulx tous espouentez, auallerent & troussèrent leurs bagues & s'en fuyrent incontinent aux chasteaulx d'Arraines, delaisant ledit Pont de Remy sans garde : & aucuns hommes & femmes assez brief apres qu'ils estoient en l'Isle, auallerent le pont au costé où estoit logé ledit Duc de Bourgongne. Et adonc y entrerent gens sans nombre de sa partie, lesquels rauirent & prindrent tout ce que les Daulphinois auoient laissé. Et ce mesmes iour par le commandement dudit Duc de Bourgongne, furent ars & embrasez ladicte isle & chastel où il y auoit moult belle habitation : & pareillement furent ars & desolez ce iour & lendemain les chasteaulx de Mariecil & d'Iaucourt, desquels festoient departis les Daulphinois pour la doubte & paour d'iceluy Duc. Et entre-temps qu'iceluy Duc de Bourgongne dessus nommé estoit logé audit lieu du Pont de Remy, alla messire Iean de Luxembourg deuant ladicte ville de sainct Riquier à tout cent hommes d'armes d'esslite sous la seureté du seigneur d'Offemont, & mena avec luy six hommes d'armes montez & habillez pour faire armes & rompre lances contre six Daulphinois des gens dudit d'Offemont. Lesquels parauant les deux parties auoient esté entreprinsees par leurs certains messages : desquels de la partie de Bourgongne estoient vn nommé Henry l'Allemant, le Bastard de Ro-baix, Lyonnet de Bournouuille & deux autres. Et de la partie du seigneur d'Offemont y estoient le seigneur de Verduysant, Guillaume d'Aubigny & quatre autres, dont ie ne sçay les noms : lesquelles deux parties venues l'une contre l'autre sous bonne seureté (comme dit est) commencerent à iouster & courre l'une contre l'autre : mais de premiere venue les deux Daulphinois premiers ioustans tuerent les deux cheuaulx de leur partie aduersé : & apres les autres ensuiuant tant d'un costé comme d'autre, rompirent aucunes lances tresgentillement. Et



en la fin par trop courte heure, en y eut deux de chacune partie qui ne coururent, pas l'un sur l'autre. Et finalement sans ce qu'il y eust oncques homme blecé de nulles desdictes parties, prindrent congé amiablement l'un à l'autre & se departirent, & retourna ledit de Luxembourg à tout ses gens au pont de Remy. Et le seigneur d'Offemont à tout les siens dedans saint Riquier. Toutesfois ledit messire Jean de Luxembourg auoit mené avecques luy pour la seureté de sa personne cent hommes d'armes, des plus experts & mieulx habillez de la compagnie du Duc de Bourgogne. Et avecques ce, auoit laissé en embusche dedans un bois environ trois cens combattans, pour auoir ayde se besoing estoit. Et à son parterment quand il eut tiré les cent hommes d'armes dessusdits dehors, & assis ladicte Embusche & qu'il fut mis à chemin, regarda aucunement derriere luy & veit que ceux qu'il auoit laissez au bois dessusdit se commençoient desia à defrayer & mener leurs cheualx paistre aux bleds à plains champs. Et lors de ce tout troublé, print vne lance & courut vigoureusement à eux pour les faire remettre au lieu où il les auoit laissez. Et adonc les dessusdits sans attendre l'un l'autre se retrahirent à poincte desperons, tant comme cheualx les pouoient porter: neantmoins il raconsuiuit un homme d'armes nommé Aloyer, auquel il perça la cuisse & le porta ius de son cheual, & à plusieurs autres donna de durs coups. Et apres qu'il eust remis en ordonnance & dit plusieurs iniures à ceux qui les deuoient conduire, s'en alla parfournir son entreprinse comme vous auez ouy cy deuant.

*Comment le Duc Philippe de Bourgogne alla deuant le Pont de Remy, & le conquist.  
Et les armes qui se feirent deuant S. Riquier où estoit le seigneur d'Offemont.*

CHAP. CCXLVII.



Tem apres les besongnes dessusdictes, & que le Pont de Remy fut conquis & du tout desolé (comme dit est dessus) se partit de là le Duc de Bourgogne & alla loger dedans Abbeuille, & partie de ses gens se logerent es faulxbourgs & autres lieux: & de là en la fin de Iuillet alla deuant saint Riquier, & se logea dedans le chastel de la Ferté: lequel par auant avecques le chastel de Drugy & les faulxbourgs & autres lieux auoient esté mis en feu, comme dit est dessus. Si se logerent ses gens es autres lieux: & fut messire Jean de Luxembourg logé à la porte saint Jean au lez vers Auxy, & le seigneur de Croÿ aucuns iours ensuiuans se logea aupres de la porte saint Nicolas vers Abbeuille: & à la porte du Heron hault vers le Crotoy n'y eut point de logis. Pourquoy ceux de dedans pouoient saillir chacun iour durant le siege assez à leur plaisir par là tant de cheual comme de pied. Et entre-temps ceux des bonnes villes, dont dessus est faicte mention, vindrent en grand nombre à l'ayde dudit Duc. Et apres que les logis furent prins, comme dit est, les assiegeans commencerent tresfort à faire leurs approches pour greuer leurs aduersaires. Si pouoit auoir le dessusdit Duc de Bourgogne en sa compagnie tant hommes d'armes comme archers & arbalestriers à compter ceux des bonnes villes de cinq à six mille combattans. Et d'autre partie lesdits Daulphinois sous la conduicte du seigneur d'Offemont, Poton de sainte Treille, Verduisant, Mengues & autres capitaines pouoient estre dedans icelle ville de douze à qua-



torze cens hommes : car avec ceux qu'ils auoient amenez , messire Iaques de Harcourt leur auoit baillé de ses meilleurs gens : si se meirent de tout leur cueur & puissance à deffendre, & resisterent à leur pouoir aux entreprinſes de leurs aduerſaires . Et au regard de parler des faillies qui furent faictes par leſdits Daulphinois durant le ſiege à les racompter chacun à parſoy , il ſeroit trop long & ennuyable . Mais à vray dire ils en feirent pluſieurs où ils gaignerent plus qu'ils ne perdirent : & entre les autres qui furent prins à icelles de la partie du Duc de Bourgongne , fault nommer aucuns des principaulx : c'eſt à ſçauoir messire Emond de Boubers , Henry l'Allemand, Iean de Courcelles, Iean de Creuecueur, vn nommé d'Ancelet & aucuns autres nobles hommes . Et entre-temps les engins que auoit fait dresser le Duc de Bourgongne contre ſes ennemis , rompirent & effondrerent en pluſieurs lieux les portes & murailles avec maiſons d'icelle ville . Et à l'opposite leſdits aſſiegez iectoient leurs engins parmy l'oſt dudit Duc , pourquoy tant d'un coſté comme d'autre y eut pluſieurs hommes occis & naurez durant ledit ſiege . Et auſſi messire Iaques de Harcourt enuoyoit ſouuent aucuns de ſes gens dedans la ville deuers le ſeigneur d'Offemont , pour luy & ſes gens enhorter qu'ils ſe teinſſent bien , & que brief ils auroient ſecours pour leuer ledit ſiege : car il auoit enuoyé ſes meſſages en pluſieurs & diuers lieux tant en Champaigne , Brye, Vallois comme à Compiengne & autres lieux à ceux qui tenoient le party du Daulphin : affin qu'ils ſ'aſſemblaffent où plus grand nombre que faire pourroient , pour venir vers luy à combattre le Duc de Bourgongne : à la requeſte & mandement duquel ſ'aſſemblerent les deſſuſdits Daulphinois en tresgrand nombre vers Compiengne , pour eux mettre au chemin : & durant ce temps le deſſuſdit Duc de Bourgongne avec ſes capitaines continuant ſon ſiege à grans labeurs deuant ladicte ville de ſainct Riquier, ouyt certaines nouuelles que ſes aduerſaires eſtoient aſſemblez , & venoient pour eux ioindre & aſſembler avec messire Iaques de Harcourt & ceux de ſainct Riquier , ſur intention de le venir combattre à ſon ſiege : leſquelles nouuelles ouyes aſſembla ſon conſeil haſtiuement pour auoir aduis & deliberation ſur ce qu'il auoit à faire . En la fin duquel fut conclud pour le mieulx , que ledit Duc leueroit ſon ſiege pour aller au deuant deſdits Daulphinois les combattre ainçois qu'ils veinſſent avec ledit messire Iaques de Harcourt & les autres . Et ce fait le vingt-neufieſme iour du mois d'Aouſt, & auſſi dudit ſiege feiſt partir ledit Duc de ſon oſt environ à iour failly Philippe de Saueuſes , & le ſeigneur de Creuecueur à tout ſix vingts combattans pour aller à Abbeuille paſſer la riuere de Somme: & de là en Vimeu enquerre diligemment l'eſtat & venue des deſſuſdits Daulphinois , & leur pria & commanda bien inſtamment qu'ils feiſſent bon deuoir de luy faire ſçauoir des nouuelles veritables d'iceux , diſant outre qu'à tout ſon oſt les ſuiueroit ſans delay . Leſquels de Saueuſes & de Creuecueur en accompliſſant la charge qu'ils auoient , cheuaucherent par nuit iuſques à Abbeuille , & repeurent leurs cheualx certaine eſpace . Et apres partant de là , allerent audit païs de Vimeu: et entre-temps le Duc de Bourgongne le plus ſecretement qu'il peult feiſt deſcendre , cueillir & trouſſer toutes les tentes de ſon ſiege enſemble avecques autres bagues , & atheller chars & charrettes : & puis tirer , apres qu'il eut fait bouter le feu par tous les logis, droit à Abbeuille. Et luy venu là qui vou-

lut



lut boire & manger faire le peut tout à cheual : car il ne voulut pas souffrir que ses gens se logeassent, pourtant que de heure à autre attendoit nouuelles de ses gens qu'il auoit enuoyez outre : lesquels cheuauchans vers Vimeu en tirant à Oysemont entre le poinct du iour & soleil leué, veirent & apperceurent iceux Daulphinois qui en belle ordonnance s'en alloient moult roidement, en tirant vers le passage de la Blanche-tacque: si en furent prins aucuns qui cheuauchoiert à l'espace par les gens du dessusdit Philippe de Saueuses & du seigneur de Creuecueur, parquoy la verité de leur intention fut du tout auerée & descouuerte. Et sur ce par iceux fut tantost & incontinent enuoyé deuers ledit Duc de Bourgogne, comme dit est, qui estoit à Abbeuille pour le haster affin qu'il peust trouuer ses ennemis, auant qu'ils feussent passez la riuiere : lequel Duc oyant lesdictes nouuelles, fut moult ioyeux : & feist diligemment tirer ses gens aux champs, & cheuaucherent apres iceux Daulphinois tresvigoureuement : & laissa tous ses arbalestriers & ceux des bonnes villes audit lieu d'Abbeuille. Lesquels Daulphinois auoient desia apperceu les gens du Duc de Bourgogne, qui encores les cheuauchoiert & poursuiuoient. Et pource le plus tost qu'ils peurent tirerent au passage de la Blanche-tacque pour passer & aller auecques messire Iaques de Harcourt, qui estoit à tout ses gens à l'autre costé de ladicte riuiere vers saint Riquier : durant lequel temps dudit Duc, r'enuoyerent de rechef plusieurs messages deuers luy pour le faire haster. Lequel Duc qui estoit moult desirant d'assembler auec iceux, cheuaucha à tout moult fort tant comme cheualx les pouoient porter pour les attaindre, & commençoient iceux Daulphinois à passer la riuiere : mais quand ils veirent venir apres eux ledit Duc & sa bataille, ordonnéement ils muerent leur propos & retournerent aux plains champs pour venir contre luy, cheuauchans en bonne ordonnance, monstrant semblant de venir combattre ledit Duc & sa puissance, jaçoit ce qu'ils feussent en petit nombre au regard de luy : & f'estoit Poton de sainte Treille bouté auec eux luy douziésme qui toute nuict estoit venu dudit lieu de saint Riquier pour estre à ceste besongne. Et lors lesdictes deux parties cheuauchans, comme dit est, l'un contre l'autre commencerent à veoir plainement chacun d'eux la puissance de son aduerse partie : & adonc pource que les gens dudit Duc cheuauchoiert en train, furent enuoyez plusieurs heraulx & poursuiuans pour le faire haster : & ainsi cheuaucherent les deux parties assez bonne espace tousiours, approchans les vns contre les autres : & messire Iaques de Harcourt qui estoit à l'autre costé de la riuiere à tout ses gens (comme dit est dessus) voyans icelles deux parties ainsi cheuaucher l'une contre l'autre, ne s'efforcea pas de passer pour ayder à ses gens que luy mesmes auoit mandez. Mais s'en retourna au Crotoy, dont il f'estoit party le matin.

*Comment les deux parties : c'est à scauoir le Duc de Bourgogne & les Daulphinois s'assemblerent en bataille le dernier iour d'Aoust, & ce qu'il en aduint.*

CHAP. CCXLVIII.





R est verité qu'en ce samedi dernier iour d'Aoust enuiron xj. heures du matin, les deux batailles dessusdictes cheuauchans l'une contre l'autre moult fierement, s'arrestèrent vn petit comme à trois traicts d'arc l'un de l'autre, & adonc furent faits moult en haste de chacune partie nouveaulx chevaliers : entre lesquels le fut fait ledit Duc par la main de messire Jean de Luxembourg: lequel Duc apres ce, feist cheuaucher Philippe de Saeuses & y furent faits de son costé Collart de Commines, Jean d'Estenu, Jean de Robais, Andrieu Villain & Jean Villain, Philebert Andrenet, Dauiod de Poix, Guerard d'Acties, le seigneur de Moyencourt, le Moyne de Renty, Colinet de Brimeu, Iaques Pot, Loÿs de saint Saulieu, Guillain de Haleuin, Derre, de Cauroy & aucuns autres: & de là partie des Daulphinois le furent faits pareillement Gilles de Gamaches, Regnault de Fontaines, Colinet de Villequier, le Marquis de Sere, Jean Rogan, Jean d'Espaigny, Corbeau de Rieu & Sarrazin de Beaufort. En apres fut enuoyé de la partie du Duc de Bourgongne l'estandart Philippe de Saeuses avec six vingts combattans que conduisoient messire Mauroy de saint Legier & le Bastard de Roussy loing à plains champs sur le costé pour ferir lesdits Daulphinois au trauers: & lors les deux parties qui estoient desirans d'assembler l'un contre l'autre s'approcherent tresfort, & par especial les Daulphinois en grand bruit & roideur se ferirent tant que cheuaulx les pouoient porter à plain cours dedans la bataille du Duc de Bourgongne, de laquelle ils furent tres bien receuz: & y eut à ceste premiere assemblée grans froissis de lances & hommes d'armes, & cheuaulx portez par terre moult terriblement d'un costé & d'autre. Et adonc de toutes parts commencerent à ferir l'un sur l'autre: & moult crueusement tuer, abbatre & naurer: mais durant ceste premiere assemblée, departirent de l'ost dudit Duc les deux parts de ses gens & moult en haste se prindrent à fuyr vers Abbeuille, où ils ne furent pas receuz: & pourtant allerent de là à Picquegny. Si estoit avec eux la baniere du Duc, laquelle pour la grand hastiueté n'auoit pas esté baillée en autre main que du varlet qui l'auoit accoustumée de porter, lequel en fuyant avec les autres la ietta à terre: mais elle fut releuée par vn gentil-homme nommé Jean de Rosimboos: & à icelle se rallierent & rassemblèrent plusieurs nobles hommes des dessusdits, desquels grand partie parauant ce iour estoient renommez d'estre vaillans en armes. Toutesfois ils laisserent ledit Duc de Bourgongne leur seigneur & leurs autres gens en ce dangier, pourquoy ils furent depuis grandement diffamez. Mais les aucuns se voulurent excuser pour la dessusdicté baniere, disant qu'ils pensoient que avec icelle fust ledit Duc. Et aussi de rechef leur fut certifié par le Roy d'Armes de Flandres, qu'iceluy Duc estoit mort ou prins, & qu'il le sçauoit veritablement: pourquoy en poursuiuant de mal en pis, furent plus effrayez que deuant: & sans retourner, s'en allerent (comme dit est) passer l'eau de Somme à Picquegny & de là en leurs propres lieux. Et entre-temps vne partie des Daulphinois qui le veirent partir de l'ost du Duc de Bourgongne, commencerent à courre apres: c'est à sçauoir Jean Raullet & Pierron de Luppel à tout enuiron six vingts combatans & en prindrent & tuerent aucuns, & entendoient à auoir gagné la iournée & que tout fut desconfit, mais leur pensée ne fut pas veritable: car ledit Duc & enuiron cinq cens combatans qui estoient demourez avec luy des

plus



plus nobles & experts en armes, se combattirent moult asprement & vaillamment contre lesdits Daulphinois : & tant feirent qu'en conclusion ils obtindrent la victoire & demourerent maistres en la place, & comme il fut relaté de toutes les deux parties, ledit Duc de sa personne se gouuerna moult prudemment : & fut en grand peril d'auoir occupation, par ce qu'il assembla des premiers, & fut enfermé de deux lances de premiere venue, dont luy perça sa selle de guerre tout outre l'arçon de deuant, & luy esquipa de costé son harnois : & avec ce fut prins à bras d'un puissant homme d'armes qui le cuida tirer ius : mais il estoit monté sur vn bon cheual coursier, qui à force le porta outre. Si soustint & aussi donna plusieurs coups à ses ennemis, & print de sa main deux hommes d'armes, & chassa lesdits Daulphinois treslonguement vers la riuere : & au plus pres de luy estoient le seigneur de Longueual, Guy d'Erly & autres en petit nombre qui bien l'accompagnerent. Si fut grand espace que ses gens ne sçauoient où il estoit : & apres Jean Raullet & Pierron de Luppel retournans de la chasse dessusdicte, vindrent au lieu où festoit faicte l'assemblée, & entendoient à trouuer leurs autres compagnons victoriens : mais quand ils apperceurent le contraire ils se meirent à fouyr, & avec eux le seigneur de Mouÿ vers saint Vallery, & les autres prindrent le chemin vers Arrames. Et adonc le Duc de Bourgongne qui estoit retourné sur le champ. fait r'assembler ses gens & leuer aucuns de son costé qui là auoient esté mis à mort, par especial le seigneur de la Vieuille. Et jaçoit ce que les nobles & grans seigneurs qui estoient demourez avec ledit Duc se portaissent celuy iour tresvaillamment : entre les autres fault parler de Jean Villain qui ce iour auoit esté fait cheualier, lequel estoit du paÿs de Flandres, bien noble homme, de haulte estature & tres puissant de corps monté sur vn bon cheual tenant vne forte hache à deux mains : à tout laquelle à assembler se buta en la plus grande presse de ses aduersaires, & auoit abandonné sa bride : si leur départoit de si grans coups que ceux qui en estoient attains, estoient portez ius sans recouurer : & en cest estat, le rencontra Poton de sainte Treille, le quel comme depuis il relata voyant ces merueilles que faisoit le dessusdit, se tira arriere le plus tost qu'il peut pour doute de sa hache dessusdicte. En outre apres que ledit Duc eut, comme dit est, fait r'assembler & ramasser ses gens & que premier les morts furent desuestuz, s'en retourna à Abbeuille là où il fut ioyeusement receu à tout grand partie des Daulphinois, qui auoient esté prins à ceste besongne : c'est à sçauoir le seigneur de Conflans, Loÿs d'Offemont, messire Gilles de Gamaches & son frere Loÿs, messire Loÿs de Thiembronne, Poton de sainte Treille, le Marquis de Sere & son frere Philippe de saint Sau lieu, messire Rigault de Fontaines, Sauuage de la riuere, Jean de Proisy gouuerneur de Guyse, messire Raoul de Gaucourt, messire Jean de Rogan, Bernard de S. Martin, Jean de Ioigny, le seigneur de Mommor, Jean de Verselles, le Bourg de la Hire, Yuon de Puys, Jean de Sômam, Herué Dourdis & aucuns autres iusques au nombre de cent à six xx. Et si furent morts sur la place tant d'une partie comme d'autre de quatre à cinq cens ou enuiron, dont on y esperoit auoir de la partie de Bourgongne tant seulement de xx. à xxx. hommes : desquels furent principaulx le dessusdit seigneur de la Vieuille, & Jean seigneur de Mailly. Et de la partie du Daulphin furent morts de gens de nom messire Pierre d'Argensy Baron



d'Ivry, messire Charles de saint Saulieu, Galhaut d'Arfy, Thibault de Gerincourt, messire Corbeau de Rieux, messire Sarrazin de Beaufort, Robinet de Verfeilles, Guillaume du Pont, le bastard de Moÿ & plusieurs autres gentils-hômes iusques au nombre dessusdit. Et pareillement furent emmenez prisonniers des gens dudit Duc, messire Collard de Commynes, messire Guillain de Haluin, le seigneur de Saily en Harnaise, Lamon de Launay & aucuns autres. A laquelle besongne messire Jean de Luxembourg par trop asprement assembler fut prins prisonnier d'un homme d'armes qui se nommoit le Moure, & emmené grand espace: mais depuis par aucuns des gens du Duc de Bourgongne & aussi des siens fut rescoux. Neantmoins il fut nauré moult villainement sur le visaige de trauers le nez. Et en cas pareil fut prins prisonnier & nauré le seigneur de Humbecourt & depuis rescoux, comme ledit de Luxembourg. En apres le dessusdit Duc de Bourgongne venu à Abbeuille, comme dit est, alla à l'église nostre Dame faire son oraison & remercier son createur de sa bonne fortune: & de là s'en alla loger à l'hostel de la couronne, & ses gens se logerent par la ville où ils peurent le mieux: desquels les plusieurs auoient esté naurés à ladicte iournée: & adonc sceut ledit Duc comment la plus grand partie de son ost l'auoient laissé, & s'en estoient fuyz à Picqueigny, dont il fut tresgrandement esmerueillé & d'eux tresmal content non pas sans cause, & tant que depuis ce iour ne voulut receuoir en son hostel aucuns de ses seruiteurs, qui auoient esté des fuyans dessusdits, mais les congia trestous: toutesfois peu en y eut de gens de nom de son hostel qui le laissassent. Et apres qu'il eut seiourné dedans ladicte ville d'Abbeuille par trois iours pour refreschir & aiser ses gens, & qu'il eut eu deliberation avec son conseil de non rassieger la ville de S. Riquier, tant pour l'occupation de ses gens qui estoient naurés comme pour autres causes se partit d'icelle ville: & par deuant S. Riquier s'en alla loger à Auxi à tout son ost, & portoit on avec luy messire Jean de Luxembourg en vne liçtiere pour la douleur de sa blessure. Et lendemain partant de ladicte ville d'Auxi s'en alla à Hesdin, auquel lieu il seiourna par aucuns iours, & ordonna à mettre garnison en plusieurs lieux contre les Daulphinois de ladicte ville de S. Riquier: & si donna congé à la plus grand partie de ses gens d'armes: & avec ce fait tant qu'il eut tous les capitaines Daulphinois, qui auoient esté prins par ses gens, moyennant qu'il les contenta de leurs finances, & les enuoya prisonnier en son chastel de l'Isle où ils furent certaine espace de tēps. Si fut de ce iour en auant la besongne dessusdicte nommée la rencōtre de Mons en Vimeu: & ne fut declairé à estre bataille pourçe que les parties récontrerent, comme vous auez ouÿ, l'une l'autre aduantureusement & n'y auoit comme nulles banieres desployées. Et au regard des principaux qui se departirēt de ceste iournée pour aller à Abbeuille, en fut le seigneur de Cohen qui estoit capitaine dudit lieu d'Abbeuille, & n'estoit pas encore bien guarÿ de la blessure qu'il auoit eue en icelle ville, dont dessus est faicte mention: pourquoy bonnement ne se pouoit armer de la teste, & luy auoit esté conseillé par ses gēs au partir d'Abbeuille, qu'il se deportast d'y aller pour la cause dessusdicte: si fut aucunement excusé à l'occasion d'icelle blessure: avec lequel s'en allerent de gēs de nom le dessusdit Jean de Rosimbos à tout la baniere du Duc, comme dit est dessus.



*Comment le dessusdit seigneur de Bourgongne estoit acompaigné de plusieurs nobles hommes qui demourerent avec luy, & pareillement estoient les Daulphinois.*

## CHAP. CCXLIX.

**E**nsuiuent les noms des seigneurs & capitaines qui estoit avecques le Duc de Bourgongne à la rencontre dessusdicte. C'est à sçauoir ceux qui demourerent avecques luy. Et premier messire Jean de Luxembourg, le seigneur d'Antoing, messire Jean de la Trimouille seigneur de Iouuelle, le seigneur de Croÿ, le seigneur de la Vieuille, le seigneur de Longueual, le seigneur de Genly, le seigneur de Robais & son fils, le seigneur d'Auxi, le seigneur de Saueuses, le seigneur de Creuecueur, le seigneur de Noyelle nommé le Blanc Cheualier, le seigneur de Humbercourt & ses deux fils, messire Pierre Kieret, Jean seigneur de Mailly, Jean de Fosseux, le Moyne de Renty, messire Dauid de Brimeu seigneur de Ligny, messire Andrieu de Vallines, le seigneur de saint Symon, le seigneur de Framensen, Regnault de Longueual, Aubellet de Folleuille, le Bastard de Couffy, messire Loÿs de saint Saulieu, qui ce iour fut fait cheualier & le lendemain se noya à Abbeuille en abbruuant vn cheual Daulphinois en la riuere de Somme, Jean de Flauay, Andrieu de Thoulougon, messire Pillebert Andrenet, messire Gauvain de la Vieuille, messire Florimont de Brimeu, messire Mauroy de saint Leger, messire Andrieu d'Azincourt, le seigneur de Commines & son frere messire Collard, messire Jean d'Estenu, messire Jean de Hornes, messire Roland du Querque & son fils, messire Jean, messire Guillain de Halvin, messire Jean & messire Andrieu Villain, messire Dauiod de Poix, le seigneur de Moyécourt & plusieurs autres notables cheualiers & escuyers de l'hostel dudit Duc & de ses paÿs: & d'autre partie y estoient du costé du Daulphin le seigneur de Conflans, le Baron d'Ivry, le seigneur de Moÿ, le seigneur d'Eschin, Loÿs d'Offemont, messire Gilles de Gamache & son frere Loÿs, Pothon de sainte Treille, messire Rigault de Fôtaines, messire Charles de saint Saulieu, Jean de Prosy gouuerneur de Guyse, le Marquis de Sere & son frere, Pierron de Luppel, Jean Raulet, messire Jean de Rogan, messire Raoul de Gaucour, messire Loÿs de Thiembronne, le seigneur de Mommor, Bernard de saint Martin, Thibault de Gerincourt, Galhan d'Aarsy, messire Sarrafin de Beaufort, Robinet de Verselles & son frere Jean de Ioingny, Yuon du Puys, Jean de Sommam, Herué & Jean de Dourdass & aucuns autres: avec lesquels estoit de cinq à six cens hommes d'armes ou enuiron, & de trois à cccc. archiers d'eslite & bien en poinct, qui s'estoient assemblez des garnisons, cōme dit est dessus.

*Comment les besongnes s'espendirent de ceste matiere en diuers lieux: la prise de Douurier, & le partement que feit le Duc de Bourgongne de la ville de Hesdin.*

## CHAP. CCL.

**L**e lendemain de la victoire du Duc de Bourgongne, furent les nouvelles portées en diuers lieux, dont ceux qui tenoient son party eurent grand liesse, & par especial à Monstreul & ou pays à l'enuiron: apres lesquelles ouÿes, messire Jean de Blondel qui n'agueres estoit retourné des prisons des Anglois, assembla aucuns gentils-hommes du paÿs: entre les-



quels estoit mesire Oliuier de Brimeu moult ancien cheualier, & aussi plusieurs compaignons tât de ladicte ville de Monstreul comme d'ailleurs: lesquels il mena deuant la forteresse de Douurier, que tenoient les gens de Pothon de S. Treille: ausquels il parlementa, & les seruit de si belles & subtiles parolles qu'ils furent contens de luy rendre ladicte forteresse, par condition qu'il les feroit conduire fauement iusques à sainct Riquier, & ainsi en fut fait: & apres il la regarnit de ses gens pour tenir frontiere comme les autres contre les Daulphinois. En apres ledit de Bourgongne quand il eut assis ses garnisons, comme dit est, contre ses aduersaires se partit de Hesdin & alla à l'Isle: & de là en pelerinage à nostre Dame de Hal, & puis retourna en Flandres où il seiourna assez bonne espace, pour entendre à ses besongnes d'iceluy pays.

*Comment le Roy d'Angleterre conquist Dreux & poursuivit le Daulphin. Et puis assiegea Meaulx en Brie & autres matieres.* CHAP. CCLI.

**O**R conuient parler de l'estat & gouuernement du Roy Henry d'Angleterre: lequel apres que le Roy d'Angleterre Duc de Bourgongne l'eut laissé à Mante, comme dit est par auant, se partit de là à toute sa puissance qui estoit grande: car chacun iour luy venoient gens nouueaux de Normandie, de Paris: & s'en alla deuant Dreux apres que le Daulphin eut leué son siege de Chartres: laquelle ville de Dreux il assiegea tout à l'enuiron, mais ceux de dedans brief ensuiuant feirent traicté avec luy, & luy promeirent de rendre ladicte ville le xx. iour d'Aoust, où cas qu'ils ne seroient combattus du Daulphin leur seigneur au iour dessusdit. Et sur ce baillerent bons hostages: & pourtant qu'iceluy Daulphin ne comparust point à icelle iournée, eut le dessusdit Roy l'obeissance de ladicte ville de Dreux, laquelle il garnit puissamment de ses Anglois. Apres que les Daulphinois furent partis de là bien huit cés à tout leurs bagues, & aussi qu'ils eurent fait serment d'eux point armer vn an entier contre luy ne ses alliez. Et ce fait & acheué se partit le dessusdit Roy de là, & s'en alla vers la riuiere de Loire pour poursuivre le Daulphin: lequel il auoit grand desir de trouuer avec sa puissance pour le combattre, & luy véger de la mort de son frere le Duc de Clarence, & autres de ses gens desconfits à Baugy. Et en son chemin meit à l'obeissance du Roy de France & de luy Baugensy sur Loire, & aucunes autres forteresses. Et apres voyant que ledit Daulphin ne l'attendroit pas à bataille, retourna par le pays de Beauisse: ouquel trouua en son chemin de cinquante à soixante hommes d'armes Daulphinois montez sur tres-aspres cheuaux, & auoient plusieurs fois costoyé & espié son ost: mais soudainement il les fait chasser par aucuns de ses gens tresbien montez: & iceux en fuyant se retrahirent en vn chastel en Beauisse nommé Rougemont: & là les fait le Roy dessusdit assaillir bien & roidement par ses gens, lesquels en assez brief terme prindrent ledit chastel & tous ceux qui estoient dedans sans perte de leurs gens, sinon d'un seul homme: pour lequel venger, le Roy les fait noyer en la riuiere de Loire. Et de là s'en alla mettre le siege deuant Ville-Neufue-le-Roy. Laquelle luy fut assez tost rendue par les Daulphinois, lesquels se departirent à tout leurs biens, & le Roy Henry y meit garnison de ses gens: & puis à l'issue du mois de Septembre vint loger de sa personne à Laigny sur Marne, & ses gens se logerent en la plus grād partie des villages



villages à l'enuiron : auquel lieu de Laigny feit iceluy Roy charpenter & habiller plusieurs engins, & instrumens necessaires à mettre siege pour mener à Meaux en Brie : & si enuoya le Duc d'Excestre son oncle à tout quatre mille combattans treshastiuement logerés faulxbourgs de ladicte ville de Meaulx, afin que ceux de dedans n'y boutassent les feux. Et apres que le Roy dessusdit eut appresté toutes ses besongnes en ladicte ville de Laigny, se partit de là à toute sa puissance, où il auoit bien vingt mille combattans : & le sixiesme iour d'Octobre se logea tout à l'enuiron de la ville & marché de Meaulx : & briefs iours ensuiuant fait fermer son ost de hayes & de fossez, afin que de ses ennemis ne peust estre surprins : & avec ce fait dresser plusieurs engins contre les portes & murailles de la ville pour l'abbatre & demolir, & en ce par grand diligence fait continuer : dedans laquelle ville & marché estoient pour le Daulphin le Bastard de Vaurus general capitaine de toute la place, Denys de Vaurus son frere, Pierron de Luppe, Guichard de Sisay, messire Phillippe Mallet, messire Loÿs Gast, le Borgne de Caucun, Jean d'Aunay, Tromagon, Bernard de Meureuille, Philippe de Gamaches & autres iusques à mille combattans gens esleuz & esprouuez en armes sans les bourgeois & communautez : si commencerent à resister tres vaillamment aux assaulx & entreprinse dudit Roy d'Angleterre, & en ce continuerent par longue espace de temps, comme vous orrez cy apres. Esquels iours aussi fut ordonné à Paris par le conseil royal, que les flourettes qui auoient cours pour quatre deniers, seroient remises à deux. Et l'escu d'or qui auoit couru pour dixneuf sols fut mis à xvij. sols parisis : pour lesquelles mutations en ensuiuant telles, dont dessus est faicte mention, furent moult de gens troublez voyans que leurs cheuances qu'ils auoient es monnoyes dessusdits, estoient diminuées la viij. partie : & pour auoir prouision d'autre monnoye nouuelle qui fut de valeur, furent forgez saluz d'or, qu'eurent cours pour xxv. sols tournois la piece : & y auoit en iceux deux escus, l'un de France, & l'autre d'Angleterre. Et au regard de la blanche monnoye, on forgea doubles qui eurent cours pour deux deniers tournois : & en fin en commun langaige furent nommez nicquetz, & furent en regne enuiron trois ans tant seullement.

*Comment le Duc de Bourgongne fait traicté avec ses prisonniers pour la reddition de saint Riquier, à quoy entendit le seigneur d'Offemont capitaine d'icelle ville.*

CHAP. CCLII.



**A**V mois de Nouembre le Duc de Bourgongne qui estoit moult desirant de bouter hors les Daulphinois de la ville de S. Riquier : lesquels moult destruisoient les pays à l'enuiron fait vn certain iour appeller aucuns de ses prisonniers, qui estoient au chastel de l'Isle : c'est à sçauoir des capitaines qui auoient esté prins à la journée de Mons en Vi-meu, sur leur rançon & appoinctement de la ville dessusdicte, non pas tant seullement vne fois, mais plusieurs. Finablement la matiere fut tant pourparlée, que les deux parties entendirent ouÿr traicté : lequel en conclusion fut fait entre le Duc de Bourgongne d'une part & le seigneur d'Offemont, & ses capitaines estés à saint Riquier d'autre part : par lequel traicté fut ordonné que ledit Duc mettroit à plaine deliurance tous les prisonniers, que luy & ses gens auoient prins



depuis qu'ils estoient venus à S.Riquier & acquiteroit de leurs finances. C'est à sçauoir messire Hemon de Bomber, messire Iean Blondel, Ferry de Mailly, Iean de Beaurevoir, Iean de Creuecueur & aucuns autres : & avec ce renderont en la main dudit Duc la dessusdicte ville de S.Riquier: apres lequel traicté ainsi fait & conclud, mourut brief ensuiuant audit lieu de S. Riquier de maladie langoureuse, messire Emond de Bomber : pour la mort duquel ledit Duc de Bourgongne fut tresmal content, & eut volenté de rompre ledit traicté, mais il fut appaisé par ses conseilliers. Et en fin enuoya ses prisonniers sous bonne garde de l'Isle à Hesdin : & de là par saufconduit allerent à S.Riquier deuers le dessusdit seigneur d'Offemont, qui deliura comme promeis l'auoit ses prisonniers qui tenoit, & redit la ville és mains des seigneurs de Roubaix & de Croÿ à ce commis de par ledit Duc de Bourgongne. Et le seigneur d'Offemont partant de S.Riquier à tout ses gens alla passer l'eau de Somme à la Blanche-tacque : & par Vimeu s'en retourna à Pierrefons, à Crespy en Vallois & autres fortereffes à luy obeissans. Et lesdits de Roubaix & de Croÿ apres qu'ils eurent visité ladicte ville & receu les sermens des habitas, ils y commeirent capitaine le Borgne de Fosseux cheualier, maistre Nicole de Mailly & son frere Ferry, Nicaise de Bouffleurs, Iean Doncuerre & aucuns autres chacun à tout leurs gés, pour tenir frontiere contre messire Iagues de Harcourt.

*Comment ledit Duc de Bourgongne fait grand assemblée de gens d'armes pour aller en Bourgongne : & autres plusieurs matieres aduenues en ce temps.*

## CHAP. CCLIII.

**E**N apres durant le temps dessusdit, tant par le mandement du Duc Philippe de Bourgongne, comme par l'ordonnance de la Duchesse sa mere douiaigiere, s'assemblerent en armes en tresgrand nombre les seigneurs de Bourgongne pour venir querir ledit Duc és paÿs de Picardie, & le mener deuers elle au paÿs de Bourgongne, où elle estoit pour auoir aduis & conclusion sur leurs affaires & besongnes qui estoient moult grans. Et eux assemblez iusques à six mille cheuaux, se meirent à chemin sous la conduite du Prince d'Orenge, des seigneurs de S.George & de Chasteau-Villain, de messire Iean Cocte-Brune Marechal de Bourgongne & autres seigneurs & capitaines : & s'en vindrent en trauerfant paÿs par la Champaigne iusques empres l'Isle en Flandres, où ils laisserent és villages leurs gens dessusdits : & allerent lesdits seigneurs deuers le Duc audit lieu de l'Isle, qui les receut ioyeusement. Et pource qu'il n'estoit pas encores prest, fut requis à aucuns des capitaines dessusdits par messire Iean de Luxembourg, qu'ils allassent avec luy pour combattre & assaillir le seigneur de Moÿ & de Chin : lesquels tenoient la partie du Daulphin, & trauailloient & degastioient moult fort le paÿs dudit de Luxembourg & de sa belle fille Comtesse de Marle : laquelle requeste par iceux leur fut accordée, & octroyée : & s'en allerent ensemble avec luy qui auoit assemblé enuiron huit cens combattans, & en fin se logerent vers S.Quentin en Vermendois, & là passerent outre. Mais quand ils vindrent assez pres de Moÿ où se tenoit le dessusdit cheualier par coustume, il leur fut rapporté qu'il festoit party de sondit chastel, & l'auoit laissé tresbien garny de gens de guerre, viures & habillemens, & auoit



ars & meis en flamme sa basse court & plusieurs autres maisons de sa ville : & adonc lesdits Bourgongnons doubtais que ledit chastel ne peust estre prins sinon par long siege & grand dommage de leurs gens, cōclurent l'un avec l'autre (non-obstant la priere dudit de Luxembourg) d'eux en retourner vers Douay & l'Isle en conduisant ledit Duc de Bourgogne : & en venant, seiournant & retournant feirent de tresgrans maulx & oppressions es pays où ils passerent, dont plusieurs plainctes & clameurs se feirent audit Duc tant par les gens d'Eglise cōme autres, & par especial du pays de Picardie : ausquels à toutes fois, il feit faire respōce que brief il les remandroit en leur pays de Bourgogne, & les deliureroit des oppressions dessusdictes : & messire Jean de Luxembourg triste & courroucé du retour des dessusdits, donna congé au dessusdit, & apres s'en retourna à son hostel de Beurevoir. En apres le seiziesme iour de Decembre le Duc de Bourgogne vint & la Duchesse sa femme en la ville d'Arras, le Comte Philippe de S. Pol avec eux & tresgrand cheualerie. Et brief ensuiuant y vint messire Jean de Luxembourg & les capitaines des dessusdits Bourgongnons : & au troiziesme iour alla ledit Duc à Douay, pour veoir sa tante la Comtesse de Hainault : laquelle il mena à tout son estat à Arras, où elle fut receüe treshonorablement par la Duchesse de Bourgogne & autres dames & damoiselles, & aussi de tous les seigneurs là estans & y seiourna trois ou quatre iours. Durāt lesquels fut faicte audit lieu d'Arras moult ioyeuse chere à ladicte Comtesse : & apres qu'elle eut eu parlement & cōclud avec ledit Duc de Bourgogne son nepueu, se partit de là & retourna en Hainault, au Quesnoy le Comte où estoit en sa principale demeure.

*Comment messire Jacques de Harcourt fut rencōtré des Anglois : la taille des marcs d'argent qui fut cueillie pour faire bonne monnoye es bonnes villes.*

CHAP. CCLIIII.

**E**Nuiron ce temps messire Jacques de Harcourt cheuauchant en Viemeu à tout six ou sept cens combattans, fut rencōtré des Anglois qui d'auenture s'estoient rassemblez de Harques, de Neuf-chastel & d'autres lieux voisins, pour aller querir leur aduenture sur les Daulphinois leurs ennemis, auquel rencontre y eut cruelle & aspre bataille. Toutesfois en conclusion les Anglois obtindrent la victoire : & y perdit ledit messire Jacques de deux à trois cens de ses hommes tant prins comme morts : mais luy de sa personne se sauua par son cheual, & avec luy grand partie des cheualiers & escuyers qui là estoient. Entre lesquels y fut prins desdits Daulphinois le seigneur de Verduifant, qui lors estoit pour le Daulphin vn des capitaines de saint Vallery. Et apres ceste besongne les Anglois elleesiez & ioyeux de leur bonne fortune retournerent à tout leurs prisonniers en leurs propres lieux. Ouquel temps fut leuée & cueillie en plusieurs parties du royaume de France, & par especial ou bailliage d'Amiens vne taille assez rigoureuse de marcs d'argent, octroyée & accordée par les trois estats du royaume à la requeste des Roys de France & d'Angleterre, pour forger bonne monnoye & faire courre oudit Royaume & le cueillir sur gens de tous estats, c'est à sçauoir sur gens d'Eglise, cheualiers, escuyers, dames & damoiselles, bourgeois & autres qui auoient puissance : & fut asis icelles par les commis des Rois dessusdits du tout à leur voulenté & discretion : & par



ainsi prindrent & leuerent tellement quellement outre le gré de ceux à qui ce cōpetoit tresgrans finances . Pour lesquelles leuer les commis dessusdits acquirent grand hayne contre plusieurs , à qui les dessusdits marcqs furent ostez : & entre les autres en fut fort haÿ le Baillif d'Amiës de ceux de son bailliage, pource qu'ils auoient suspition contre luy , que par son moyen ceste taille eut esté mise sus ou paÿs dessusdit .

*Comment le dessusdit Duc de Bourgongne se partit d'Arras le Comte de S. Pol en sa compaignie, & alla deuers les Roys de France & d'Angleterre, & autres matieres.*

## CHAP. CCLV.

**L**Tem apres que le Duc de Bourgongne eut solemnellement celebré la feste de la natiuité nostre Seigneur dedans Arras , & avec luy la Duchesse sa femme , ils se departirent l'un de l'autre aucuns iours ensuiuant non pas sans douleur de cueur & sans larmes , par especial de la partie de ladicte Duchesse: & aussi depuis ne reueirent l'un l'autre comme vous orrez cy apres . Si alla ledit Duc au chastel du Comte de S. Pol à Lucheu , où il se reposa vne nuit : & le lendemain ledit Comte en sa compaignie s'en alla à Amiens, & se logea à l'hostel du Baillif. Et ja par auant auoit enuoyé ses gës d'armes deuant, entre Amiens & Beauuais. Auquel lieu d'Amiens il geut vne nuit, & puis se partit à estandart desployée à tout grand nombre de gens d'armes en noble arroy , faisant auantgarde , bataille & arriegarde , & ainsi s'en alla logger au Franc-Chastel: & soy partât de là print son chemin à Beauuais, & de là par Beaumont alla à Paris : & la Duchesse sa femme dudit lieu d'Arras par l'Isle à tout son estat , retourna à Gand: auquel lieu de Paris entra ledit Duc de Bourgongne , le Comte de saint Pol & toute sa cheualerie avec luy , & fut receu des Parisiens tres solemnellement: & pour lors estoient le Roy de France & la Roïne au Bois de Vincenne, lesquels iceluy Duc alla veoir & visiter. Et depuis qu'il eut seiourné aucuns iours audit lieu de Paris , s'en alla par Laigny sur Marne deuers le Roy d'Angleterre , qui tenoit son siege deuant Meaulx en Brie : duquel il fut honorablement festoyé , & tindrent ensemble de grans conseils pour les besongnes & affaires du royaume. Mais par auant que ledit Duc y allast , festoit party de luy le Prince d'Orenge avec aucuns autres seigneurs & grand nombre de ses Bourgongnons : & fut la cause de son partement ( comme il fut commune renommée) qu'il ne vouloit pas aller deuers le Roy Henry avec ledit Duc: affin que par luy ne fut contrainct ou requis de à luy faire serment , ainsi qu'il l'auoit demandé estre fait au seigneur de S. George, qui vn petit deuant auoit esté deuers ledit Roy pour luy humblement requerre de la deliurance de son nepueu le seigneur de Chasteau-Villain : lequel, par le commandement d'iceluy Roy Henry, auoit esté lōgue espace detenu prisonnier en la ville de Paris : & depuis brief terme deliuré par la priere & requeste du dessusdit seigneur de saint George , & aucuns iours passez ledit Duc de Bourgongne retourna à Paris. Et partant de là, s'en alla par Troyes en son paÿs de Bourgongne veoir la Duchesse sa mere & ses sœurs , desquelles il fut receu à tresgrand ließe : & tost apres receut les sermens accoustumez de ceux de ses dessusdits paÿs de Bourgongne . Et apres qu'il eut acheué aucune partie de ses affaires, alla en Sauoye vers son bel oncle qui de sa venue fut moult



moult ioyeux : & y furent faictes ioustes & autres esbattemens pour la reuerence de sa personne . En la fin desquels retourna audit païs de Bourgogne , où il fut longue espace de temps.

*Comment messire Iean de Luxembourg alla deuers le Roy Henry pour la deliurance du Comte de Conuersan son frere & autres plusieurs matieres.*

CHAP. CCLVI.

**E**N ce temps alla messire Iean de Luxembourg à priuée mesgnie deuers le Roy Henry d'Angleterre à son siege de Meaulx , pour traicter de la deliurace du Comte de Conuersan son frere, lequel ja par long temps auoit esté prisonnier : & encores estoit dedans icelle ville à Pierron de Luppel : & luy là venu fait & traicta tant par l'ayde & moyen du dessusdit Roy Anglois , que son frere fut deliuré de prison, moyennant certaine grande somme de pecune, qui fut promise à deliurer & payer audit de Luppel à iour assigné par eux parties . Et depuis sa deliurance demoura iceluy Comte ou seruice d'iceluy Roy durant le siege de Meaulx, & messire Iean de Luxembourg retourna en Picardie dont il estoit capitaine general : & en sa compaignie messire Hue de Launoy, qui nouuellement auoit esté constitué maistre des arbalestriers de France de par les deux Roys de France & d'Angleterre. Ouquel an Katherine Royne d'Angleterre accoucha d'un fils audit Royaume: lequel par l'ordonnance du Roy son pere fut nommé Henry sur les fons : & avec les autres qui à ce estoient commis le leua Jaqueline de Bauiere Duchesse de Brabant , qui lors estoit oudit païs d'Angleterre: pour la natiuité duquel le dessusdit Roy Henry eut au cuer tresgrand ließe : & par tout sondit royaume d'Angleterre fut aussi menée grand ioye, plus que par auant n'auoit esté veüe par treslong temps de nuls autres enfans royaux : durant lequel temps les Daulphinois prindrēt d'emblée la ville d'Auranches que tenoient les Anglois: lesquels y furent morts que prins de deux à trois cens, dont moult despleut au Roy d'Angleterre , quand ce fut venu à sa cognoissance . Et y enuoya de son siege de Meaulx certain nombre en l'ayde du Comte de Salsebery, qui estoit gouuerneur de toute Normandie: lequel fait si bōne diligence qu'icelle ville fut reconquise, & plusieurs desdits Daulphinois morts & prins . En apres en ce mesmes temps retourna par certain traicté des prisons du Roy d'Angleterre Artus Comte de Richemont, frere au Duc de Bretagne en France: & apres sa deliurance vint à tout grand nōbre de gens d'armes audit siege de Meaulx seruir le dessusdit Roy d'Angleterre: ouquel seruice il demoura durant la vie d'iceluy Roy .

*Comment le seigneur d'Offemont alla pour entrer dedans Meaulx , & fut prins par les Anglois: & de la ville qui fut gaignée d'assault par les assiegeans.*

CHAP. CCLVII.

**E**N ces propres iours le seigneur d'Offemont assembla enuiron quarante combattans, des plus experts & renommez en fait de guerre qu'il peut finer : & les mena & conduit iusque assez pres de la ville de Meaulx où estoit deuāt le Roy d'Angleterre ( comme vous auez ouï ) sur intention d'entrer secretement dedās icelle ville, pour ayder & conforter les



assiegez qui par plusieurs fois l'auoient mandé pour estre leur capitaine: lesquels sachans sa venue estoient preparez de le receuoir: & auoient sur le soir mis vne eschelle dehors leurs murs par où il deuoit monter à tout ses gens: & lors au iour assigné par eux parties, s'approcha ledit seigneur d'Offemont pour fournir & accomplir son entreprinse: si rencontra aucuns de ceux du guet des Anglois, qui tantost furēt mis à mort: & apres alla iusques aux fossez de ladicte ville, & commencerent ses gens à monter dedans par l'eschelle dessusdicte, & de fait y en monta plusieurs: mais luy qui alloit tout derriere pour les bouter en auant, en passant sur vne vieille planche par dessus vn grand fossé cheut armé de plain harnois dedans ledit fossé, & ne peut de là estre tiré par ses gens. Nonobstāt qu'ils luy baillerent deux lances l'une apres l'autre, lesquelles luy demourerent es mains. Et entre-temps ceux de l'ost qui ouyrent le murmur & effroy, vindrent sur eux à grand puissance sans delay, & les prindrēt. Si fut ledit seigneur d'Offemont nauré cruellement au visaige, & pareillement plusieurs de ses gens: & en cest estat le menerent deuers le Roy d'Angleterre qui de sa prinse fut moult ioyeux, & l'examina sur plusieurs propos: & apres le feit mettre en bonne garde & bien penser de sa personne. Et le lendemain les assiegez tristes en cueur de ceste aduenture, doubans qu'au long aller ne peussent garder la ville & le marché, feirent retraire aucuns des biens de ladicte ville dedans ledit Marché: laquelle chose apperceüe par les gens Iean de Guigny Sauoyen qui estoit audit siege, fismeurent soubdainement & allerent assaillir ladicte ville: & d'autre costé commēça l'assault de toutes parts tel & si aspre, qu'en brief fut gagnée sans ce que les assiegez y feissent grand perte, & se retrahirent lesdits assiegez à tout partie de leurs biens dedans le Marché. Toutesfois il en y eut aucuns prins, & morts non pas grand nombre: dedans laquelle ville se logea le Roy Anglois en grand multitude de ses gens. Et brief ensuiuant gagna vne petite Isle assez pres du Marché, en laquelle il feit asseoir plusieurs grosses bōbardes qui moult terriblement greuerēt les maisons dudit Marché, & aussi les murailles d'icelle: & par ces moyens furēt lesdits assiegez fort cōtraints & mis en grand necessité: car avec ce ledit Roy d'Angleterre auoit fait dresser plusieurs engins, tauldis, boulleuers & autres habillemens pres de la muraille: & tant auoit ce continué qu'iceux assiegez estoient de iour en iour en peril d'estre prins d'assault, & si n'auoient nulle esperance d'estre secourus par ledit Daulphin leur seigneur, pource que les iours estoiet passez que ledit secours leur auoit esté promis à enuoyer: & de rechief en continuant de mal en pis par lesdits assiegez, furent prins par les Anglois le moulin dudit Marché, parquoy ils ne pouoient mouldre leurs bleds sinon en grand dangier.

*Comment messire Iean de Luxembourg conquist ceste saison les forteresses du Quesnoy, de Louroy, de Hericourt & autres diuerses matieres. CHAP. CCLVIII.*



**Q**R conuient parler d'une armée que feit en cest an messire Iean de Luxembourg de par les Roys de Frāce & d'Angleterre, & avecques luy plusieurs seigneurs de Picardie. C'est à sçauoir messire Hue de Lannoy lors maistre des arbalestriers de France, le Vidame d'Amiens, le seigneur de Longueual, le seigneur de Saueuses, le seigneur de Humbercourt & tresgrand nombre de cheualiers & escuyers. Vray est qu'ou mois de Mars au-  
tour



tour de la ville d'Encre furent passées les monstres : & quand ce fut fait peu en y auoit qui sceussent auquel costé il vouloit tourner: mais en la fin se tira en la ville d'Amiens, & de là deuant vn meschant chastel nommé le Quesnoy qui estoit à Jean d'Arly: dedans lequel festoient boutez enuiron quarante sacquemens tenans la partie du Daulphin, qui avec ceux d'Arames auoient moult trauaillé le pays de Vimeu, & sur la riuere de Somme depuis Amiens iusques à Abbeuille. Si estoient venus deuant iceluy vn iour par auant pour garder qu'ils ne s'en fussent, le Vidame d'Amiens & le seigneur de Saueuses à tout leurs gens. Et apres que ledit de Luxembourg fut arriué & logé deuant ladicte forteresse, fait dresser ses engins contre les murs d'icelles: lesquels en brief desrompirent les ioinctures des dessus-dits murs en plusieurs lieux, pourquoy ceux de dedans voyans que point ne pouoient faire longue resistance contre si grand puissance, requierent dedans briebs iours de traicter: & finalement furent d'accord avecques ledit seigneur de Saueuses, qui à ce estoit commis de par messire Jean de Luxembourg, par condition qu'ils rendroient la forteresse & tous les biens qui estoient dedans en la voulenté du Duc de Luxembourg, & aussi la plus grand partie des Sacquemens dessusdits demourroient en la voulenté: & Valleran de saint Germain leur capitaine qui à brief dire les trahit, & leur fait entendre qu'ils auroient leurs vies sauues, & fait son traicté par si qu'il s'en iroit & auroit bõ & seur saufconduit: apres lequel traicté rendirent la forteresse, & furent menez tous ensemble en vne maison de la ville: & tantost apres en furent penduz audit lieu du Quesnoy vne partie, & les autres furent enuoyez au Baillif d'Amiens, lequel les fait mettre au gibet: & entre les autres y fut mis vn gentil-homme nommé Lienard de Picquegny, qui se disoit vn peu prochain dudit Vidame d'Amiens: & ce fait ladicte forteresse fut desolée, & mise en feu de fons en comble: & apres ledit de Luxembourg s'en alla vers Gamaches à tout son ost, & là luy vindrèt de deux à trois cens combattans Anglois sous la conduicte de messire Raoul le Bouteillier: à tout lesquels il alla mettre en l'obeissance des Roys de France & d'Angleterre aucunes forteresses ou pays de Vimeu: c'est à sçauoir Louroy, Hericourt & aucunes autres. Ouquel temps aussi les gens du seigneur de Gamaches qui se tenoient à Compiengne prindrent d'emblée la forteresse de Mortemer vers Montdidier que tenoit Conherrard Bastard de Brimeu, qui lors estoit ou pays de Vimeu en l'armée & exercite de messire Jean de Luxembourg: dedans laquelle forteresse fut mise grand garnison de Daulphinois, qui fort trauaillerent le pays: & d'autre partie les dessusdits Daulphinois de Marcoussy enuiron deux cens combattans avec leur capitaine, qui se nommoit Minon, allerent par nuit secrettement prendre le pont de Meulene, & y feirèt moult de maux: & apres en intention de le tenir y meirent grãd garnison: mais le Roy d'Angleterre y enuoya hastiuement le Comte de Conuersan & autres de ses gens en grand nōbre, lesquels le rassiengerent: & brief ensuiuant leut fut rendue par si que les assiegez se partirent sauvement à tout leurs bagues.

*Comment l'Empereur d'Allemagne feit en cest an vne armée contre les Pragois. Et de ceux qui furent trouuez empres Doüy, & le siege d'Arames.*



**E**N cest an feist le Roy des Rommains Empereur d'Allemaigne vne moult grande assemblée de gés d'armes de plusieurs païs de la Chrestienté, pour combattre & résister aux entreprinſes des faulx & empullentez hereticques, qui se tenoient en la cité de Pragues & à l'environ bien deux ou trois iournées: auquel mandement allerent grand quantité de Princes, prelatz, cheualiers, escuyers & communes gens tant de cheual comme de pied des païs d'Allemaigne, de Liege, Hollande, Zellande, Hainault & autres lieux, & y arriua tant de gens qu'à peine se pouoient ils nombrer: mais les hereticques tindrent si fort ladicte cité de Pragues, qu'on ne la peut gueres endommager sinon en aucunes rencontres, qu'il en y eut plusieurs mis à mort, & estoient en si grand nombre & en si fort païs que par faute de viures conuint retourner les Chrestiens. Et iceux maudictes gens estoient si obstinez en leur erreur qu'ils ne craignoient nuls martyres, dôt on les peut faire mourir: & mesmement se deffendoient & armoient les femmes ainsi que diables plaines de toutes cruautéz: & en furent trouuées plusieurs mortes & oecises aux dessusdictes rencontres. Et d'autre part furent trouuez en l'an dessusdit plusieurs hommes & femmes tenans ladicte heresie, & faisans leur Concille en vn village empres Doüay nommé Sains: dedans lequel ils furent trouuez & menez prisonniers en la Court de l'Euesque d'Arras: desquels les aucuns se repentirent, & pareillement qui furent receuz à penitence & à mercy: & les autres apres qu'ils eurent esté preschez dudit Euesque & de l'Inquisiteur, furent ars & bruits audit lieu d'Arras, à Doüay & à Valenciennes. Et apres messire Iean de Luxembourg à tout ses capitaines & sa puissance retourna la nuit de Pasques communiaux deuât les deux chasteaux d'Arrames, & là de toutes parts les assiegea, & fait dresser contre les murs d'icelle plusieurs engins: lesquels brief ensuiuant dommagerēt tresfort & en plusieurs lieux. Et d'autre costé lesdits assiegez en grand diligence se deffendoient contre leurs ennemis: c'est à sçauoir de canons, arbalestres & autres traict, & avec ce firent aucunes faillies, ausquelles ne gagnerent pas gramment: mais pourtāt qu'ils estoient bien garnis de viures & habillemens, se tindrent grand espace. Et avec ce leur auoit esté promis par aucuns tenans la partie du Daulphin, qu'ils seroiēt secouruz si puissamment que pour les deliurer de leurs ennemis.

*Pour l'an mille cccc. xxij.*

*Comment les Daulphinois s'assemblerent pour leuer le siege d'Arrames dessusdit, & allerent les Bourgongnons & Anglois pour les rencontrer & combattre.*

CHAP. CCLX.

**A**V commencement de cest an s'assemblerent vers Compiengne plusieurs Daulphinois, en intention d'aller secourir ceux d'Arrames: de laquelle assemblée estoient capitaines de par le Daulphin, c'est à sçauoir le seigneur de Gamaches, le seigneur de Moÿ, Pothon de sainte Treille & aucuns autres, avecques environ de huiet cens à mille combattans: lesquels ils menerent tous ensemble à Pierrepont, qui est au Vidame d'Amiens. Et nonobstāt qu'icelle ville fut fortifiée de hayes & de fossez plains d'eau: toutesfois entrerent ils dedans, & si logerent tous ensemble, & apres liurerent vn  
assault



assault à la forteresse dudit lieu: mais elle fut bié deffendue par ceux qui l'auoient en garde: & entre-temps qu'ils estoient logez en ladicte ville de Pierrepont, furent les nouuelles portées de leur assemblée à messire Jean de Luxembourg, qui estoit à son siege deuant Arrames: lequel premier print conseil avecques les nobles de son armée, & fait partir aucuns de ses capitaines avecques mille combatans, pour aller au deuant desdits Daulphinois: desquels de la partie dudit de Luxembourg furent les principaux messire Hue de Launoy maistre des arbalestriers de France, messire Raoul le Bouteillier Anglois, le Borgne de Fosseux chevalier, le seigneur de Saueuses & plusieurs autres experts hommes d'armes. Lesquels allerent gesir à Coucy, & le lendemain tres matin cheuaucherēt à Moreul: auquel lieu ouyrent certaines nouuelles que les Daulphinois leurs ennemis estoient encores en la ville de Pierrepont: pourquoy cheuauchans en moult belle ordonnance se hasterent pour les trouuer, mais les dessusdits Daulphinois qui ja estoient aduertis de la venue de leurs ennemis, monterent à cheual: & tous ensemble apres qu'ils eurent bouté les feux en leurs logis, fallerent mettre en bataille dessus la ville vers Montdidier: & adoncques les Bourgongnons & Anglois au plus tost qu'ils peurent, passerent la ville pour suiuir leurs ennemis, nonobstant la chaleur du feu qui moult les empescha: & comme les autres se meirent en bataille contre les Daulphinois, & furent en ceste mesme place fais plusieurs nouveaux chevaliers de la partie de Bourgongne: c'est à sçauoir le Begue de Launoy, Anthoine de Reubempré, Jacques de Brimeu, Robert Fretel, Gille de Hardecourt, Matthieu de Landas, Philippe du Bos, Jean de Beauvoir, Vvaleran de Fieses, Tramet de la Tramerie & plusieurs autres. Et entre-temps y eut entre les deux parties plusieurs escarmouches & hommes d'armes d'un costé & d'autre portez à terre, & les aucuns terriblement naurez & occis: toutesfois (durant les choses dessusdictes les Bourgongnons & Anglois estans à pied, se departirent, les Daulphinois tout à cheual en bonne ordonnance mettant derriere eux de leurs meilleurs gens par maniere d'arrieregarde, & prindrēt leur chemin vers Compiengne. Et adoncques lesdits Bourgongnons & Anglois voyans leur parlement enuoyerent apres eux le seigneur de Saueuses à tout certain nombre de gens d'armes pour les poursuiuir & faire arrester, & les autres capitaines tous en bataille, les suiuiroient vigoureusement: nonobstant ce, s'en allerent lesdits Daulphinois attains de paour & escheuerent la bataille sans grand perte, sinon de sept à huiet de leurs gens ou enuiron, qui de premiere venue furent mis à mort: entre lesquels en fut vn vaillant homme d'armes nommé Brunet de Gamaches, & retournerēt à Cōpiengne. Et de la partie de Bourgongne y fut mort vn vieil hōme d'Auxoirre nōmé le Breton d'Ailly qui en treslong temps par auāt ne s'estoit entremis de guerre, & avec luy aucuns autres en petit nombre: apres lesquelles besongnes retournerēt les dessusdits Bourgongnons & Anglois loger à Moreul & autres villages, & de là au siege d'Arames deuers messire Jean de Luxembourg: & brief ensuiuāt les assiegez desdictes forteresses d'Arames qui ja estoient aduertis de leur secours, non ayans esperāce de plus en auoir, cōmencerent à parler pour traicter: & en la fin de chacune partie fut accordé par condition, qu'ils rendroiēt les deux forteresses en la main de messire Jean de Luxembourg, & s'en partiroiēt sauf leurs corps & leurs biés garniz de bon saufcōduit, pour aller à Cō-



piengne, au Crotoy, Gamaches, S. Vallery & autres lieux de leur obeïssance, depuis Seine iusques au Crotoy: & estoient enuiron cent hōmes d'armes & cent archiers, desquels estoient les principaulx messire Cocquart de Combronne & vn nōmé Iean Sarpe, qui ce cōclud rendirent les deux forteresses tresbien garnies de viures & habillemens de guerre audit de Luxembourg: lequel feist tantost abbatre l'vn desdits chasteaulx: c'est à sçauoir celui de la dame d'Arrames, & l'autre y pourueut de nouuelle garnison de ses gens, & en feit capitaine messire Iaquès de Lieuin: & apres que les dessusdits Daulphinois furent de là partis, ledit de Luxembourg à tout son ost retourna en son chasteau de Beaurevoir, puis donna congé à ses capitaines & à autres qui auoient esté avec luy. Et assez tost apres messire Iaquès de Harcourt & ses gens allerēt courre iusques à Auxy sur la riuere d'Authie & en plusieurs autres lieux & villes, desquelles ils remenerent au Crotoy plusieurs prisonniers & autres proyes.

*Comment Henry Roy d'Angleterre eut l'obeïssance du marché de Meaulx: & des executions qui furent faictes à ceux de dedans de par ledit Roy.*

## CHAP. CCLXI.

**E**N apres le Roy Henry d'Angleterre qui à grand labeur & diligence auoit continué son siege & encores continuoit deuant le marché, & abstrainct les assiegez par telle maniere que grād partie de leurs murs estoient tous crauantez & desrompus en diuers lieux: les feist vn certain iour sommer qu'ils se rendissent franchemēt en la vōlētē du Roy de France & de luy, ou se ce ne faisoient les feroit assaillir: à laquelle sommation ne voulurent pour ceste fois entendre aucunement: mais dirent qu'il n'estoit pas encores heure d'eux rendre, & pourtant le dessusdit Roy feist commencer l'assault trespuissamment, lequel dura de sept à huit heures moult cruel & ensanglanté: & y furent tant d'vn costé comme d'autre moult d'hommes naurez & occis, mais nonobstant que lesdits assiegez feussent fort trauaillez de resister à la puissance desdits Anglois qui moult estoit grande: neantmoins se deffendirent moult vaillamment, & combattirent tant qu'ils n'auoient dedans ledit marché de lances sinon en petit nombre, que toutes n'eussent esté rompues aux deffences dessusdictes. Mais au lieu desdictes lances combattirent par longue espace de hastiers de fer, & tant continuerent que pour ceste fois rebouterent iceux Anglois hors de leurs fossez, dont grandement furent resiouys. Et entre les autres desdits deffendeurs si porta moult prudemment Guichart Sisay, & tant que pour sa vaillance & prudence le Roy d'Angleterre apres la reddition d'icelle ville luy feit offrir grans biens s'il vouloit tenir son party & à luy faire serment, ce que point ne voulut consentir: mais demourra Daulphinois. Si furent faits à l'assault dessusdit plusieurs cheualiers nouveaulx de la partie des Anglois: entre lesquels le furent Iean Guigny Sauoisien, & le Bastard de Thiam qui autresfois (comme dit est en autre lieu) auoit esté grand capitaine avec les regens de compagnies sous le Duc Iean de Bourgogne: & d'autre partie estoient avec ledit Roy d'Angleterre à iceluy siege les seigneurs de Chastillon & de Genly avec plusieurs autres nobles hommes des marches de France. Et de premiere venue que le siege y fut mis iusques au derrain, que les assiegez n'eurent plus esperance d'auoir secours, tant de nuict  
comme



comme de iour dirent moult d'iniures & de parolles villaines ausdits assiegeans: & entre les autres choses meirent sur les murs de la ville vn asne, lequel par force de coups ils faisoient braire en eux mocquant desdits Anglois, en disant que c'estoit Henry leur Roy qu'ils l'allassent secourir: pourquoy le Roy Anglois avec autres choses fut moult indigné contre eux. Et aussi deuant icelle ville fut tué vn ieune cheualier fils du seigneur de Cornouaille, qui estoit cousin germain du desusdit Roy Henry, & fut tué d'un canon: la mort duquel luy vint à grand desplaisance & à tous les Princes d'Angleterre: car (nonobstant qu'il fût ieune d'age) si estoit il tressage & prudent. En outre apres toutes les besongnes & continuations dessusdictes, enuiron la fin d'Auril iceux assiegez qui plus n'auoient, comme dit est, quelque esperance d'auoir secours du Daulphin leur seigneur, sçachant que longuement ne se pourroient tenir ne deffendre contre la puissance du Roy d'Angleterre, commencerent à parlementer pour auoir traicté. Et y fut commis de par celuy Roy son oncle le Duc d'Excestre, les Comtes de Varuich & de Conuersan & messire Gaultier de Hongreafort. Et de la partie des assiegez messire Philippe Mallet, Pierron de Luppe, Iean d'Aunay, Sinador de Gerames, le Borgne de Cancun, Iean de l'Espinache & Guillaume du Fossé: lesquelles parties conuindrent ensemble par plusieurs iournées, & en fin vindrent à conclusion par la maniere cy apres declairée. Premièrement fut ordonné, que l'vnziesme iour de May le marché de Meaulx seroit rendu & deliuré par lesdits assiegez en la main des Roys de France & d'Angleterre. Item seront rendus & deliurez en la voulenté desdits Roys messire Loys de Gast, le Bastard de Vaurus, Iean de Romieres, Tromagon, Bernard de Meureuille vn qui auoit Businé du Cornet durant le siege nommé Oraches: & seront mis en iustice, laquelle leur sera faicte & administrée. Item Guichart de Sisay, Pierron de Luppe, maistre Robert de Gerames, Philippe de Gamaches & Iean d'Aunay demourôt en la voulenté desdits Roys, iusques à tant qu'ils auront rédues ou fait rendre toutes les forteresses, que eux ou leurs commis tiennēt en ce royaume: & apres qu'ils les auront rédues auront leurs vies sauues. Item tous estās dedans ledit marché: c'est à sçauoir Anglois, Gallois, Yrlandois, Escoçois & autres qui par auant auoient esté obeïssans au Roy d'Angleterre, demourront en la voulenté desdits Roys. Item tous les autres gens tant gens d'armes comme bourgeois & habitans, demourront en la voulenté desdits Roys sauue leurs vies. Item le Comte de Conuersan demourra quitte enuers Pierron de Luppe ou autres à qui ce peut toucher de sa finance: Et luy promettront de le tenir quitte à tousiours, sans cause, fraude ou malengin.

Item en dedans les huit iours que lesdits assiegez doiuent rendre la ville, mettront & feront mettre tous leurs biens generalmente en certains lieux, où ils puissent venir à cognoissance sans les degaster ou empirer: & bailleront par parties les inuentoires aux commis desdits Roys. Item mettront & feront mettre les reliques, ornemens & autres biens d'Eglise en certain lieu, comme dit est.

Item rendront quittes & deliures tous les prisonniers qu'ils tiennent, tant audit marché comme és forteresses ou autres lieux à eux obeïssans, & les acquitteront de leur foy. Item durant les iours dessusdits, ne souffriront homme de quelque estat qu'il soit se transporter hors dudit marché. Et pareillement n'y en laisseront nuls entrer sinon qu'ils y soient commis de par lesdits Roys. Item



pour entretenir & accomplir toutes les choses dessusdictes sans nulle enfreindre sur peine de non demourer en la grace desdits Roys, bailleront lesdits assiegez leurs lettres seellées de leurs seaulx ou signées de leurs mains iusques à cent des plus notables: desquels demourront en hostage deuers lesdits Roys vingt quatre tels qu'il plaira ausdits Roys à demourer. Item apres ledit traicté fineront & cesseront entre lesdits assiegeans & les assiegez, toutes guerres & voyes de fait.

Item apres tous les articles dessusdits accordez & accomplis par les deux parties demourerent en cest estat iusques au dixiesme iour du mois de Iuing, que les Daulphinois feirent ouuerture aux commis des Roys de France & d'Angleterre. Et leur deliurerent par la maniere qu'il auoit esté traicté ledit marché de Meaux: lesquels commis enuoyerent tantost tous les prisonniers sous bonne garde en la ville: & aucuns des plus principaulx furent menez à Roüen, & de là en Angleterre: & si en y eut vne partie menez à Paris & emprisonnez en plusieurs lieux, & pouoient estre tous gens de guerre emprisonnez de sept à huiet cens: desquels le Bastard de Vaurus leur general capitaine fut decollé par le commandement du Roy Henry, & son corps pendu à vn arbre au dehors de Meaulx nommé l'arbre Vaurus: auquel ledit Vaurus auoit en son temps fait pendre plusieurs Bourgonnons & Anglois, & pource estoit iceluy arbre ainsi nommé: & avec ce luy fut mise la teste sur le bout de l'estandart & attachée au dessus de luy à l'arbre dessusdit. Et apres fait decapiter à Paris messire Loys Gast, Denis de Vaurus, maistre Jean de Rouuieres, & celuy qui auoit sonné le cor durant le siege: & furent mises leurs testes sur lances es halles, & leurs corps pendus au gibet par les aissailles. Et tous les biens qui estoient audit marché en tresgrand nombre, furent distribuez du tout au plaisir & plaine volenté dudit Roy Henry: lequel glorieux de sa victoire entra en moult noble arroy dedans ledit marché: & y seiourna aucuns iours avec ses Princes, pour luy soulacier & reposer: & là ordonna en brief de reedifier les portes & murailles de la ville de Meaulx & du marché, qui par les gros engins auoient esté demollis & crauantez durant ledit siege.

*Comment apres la reddition dessusdicté, plusieurs villes & forteresses se rendirent à iceluy Roy d'Angleterre ausquelles il commeist gens de par luy.*

CHAP. CCLXII.

**A**pres la rendition du marché de Meaulx, furent mises en l'obeissance du Roy Henry plusieurs bonnes villes & forteresses, tant en la Comté de Vallois comme es pays à l'environ par le moyen du seigneur d'Offemont, dessous lequel elles estoient obeissans. Entre lesquelles y furent mises les villes de Crespy en Vallois, le chastel de Pierrepont, Merlau, Offemont & aucuns autres: toutesfois demourerent audit seigneur d'Offemont ses villes & forteresses: & avec ce fut mis à plaine deliurance de son corps, par condition qu'il iura la paix finale dernieremēt faicte à Troyes entre les Roys de France & d'Angleterre: & pource entretenir bailla pleiges souffisans, c'est à sçauoir l'Euesque de Noyon & seigneur de Caunay, lesquels pour seureté ils obligerent corps & biens. Et d'autre costé rendirent les prisonniers qui auoient esté prins dedans Meaulx (comme dit est dessus) plusieurs forteresses en l'obeissance des deux Roys dessusdits. En apres quand les capitaines tenans la partie du Daulphin



Daulphin és marches de Beauuoisis, veirent & ouyrent dire, comment ce Roy Henry leur aduerfaire prenoit vigoureusement & prudemment les villes, citez, forteresses de cest royaume qui estoient imprenables, eurent si grand doute que brief ensuiuant par ceste cremeur, enuoyerent deuers ledit Roy leurs ambassadeurs pour traicter avec luy, qu'ils se peussent departir sauement en dedans certain iour où cas que le Daulphin ne les secourroit au iour dessusdit, lequel ils luy feroient sçauoir: entre lesquels traicta le seigneur de Gamaches pour la ville de Compiengne, dont il estoit capitaine. Et aussi pour les forteresses de Remy, de Gournay sur Aronde, de Mortemer, de Neufuille en Hez, de Tressoufart & d'autres autres ou pays dessusdit. Et bailla hostaige de les rendre le xviii. iour du mois de Iuing ensuiuant és mains des Roys de France & d'Angleterre, ou de leurs commis & deputez. Et en cas pareil traicterent messire Loys de Thiembronne pour la ville de Gamaches, moyennant qu'ils s'en iroient où bon leur sembleroit sous bon saufconduit dudit Roy Henry à tout leurs biens, & ladiète ville avec les habitans demourroient paisibles, en faisant le serment de la paix finale. Et avec ce fut rendue par le pourchats de Pierron de Luppe en l'obeissance des deux Roys la forteresse de Montagu, qui tenoit grand pays en sa subiection par sa force, & auoit fait de grans dommages aux villes de Reims & de Laon & és pays à l'environ. Et d'autre partie ceux qui tenoient le chastel de Moÿ vers Launoys, sçachans les renditions des villes & forteresses dessusdictes, doutans que messire Jean de Luxembourg & les Anglois ne les allassent assieger soudainement, bouterent le feu dedans ledit chastel & s'en allerent à Guyse. Et pareillemēt ardirent & desolerent les chasteaulx de Montescourt & de Brissy.

*Comment la Royne d'Angleterre retourna en France grandement accompagnée, & des estats qui furent tenus dedans Paris & autres matieres.*

CHAP. CCLXIII.

**L**E vingt & vniesme iour de May de cest an mille cccc. & xxij. Catherine Royne d'Angleterre, qui long temps parauant estoit purifiée de son premier fils nommé Henry, comme son pere arriua au port de Harfieu en noble appareil & grand compagnie de nauires plains d'hommes d'armes & d'archers, desquels le Duc de Bethfort frere du Roy Henry estoit chief: & apres qu'ils eurent prins terre, allerent à Roüen, & de là au Bois de Vincenne deuers le Roy. Et cheuauchoit la Royne Catherine en estat royal tousiours ledit Duc avec elle à tresgrand puissance de gens d'armes: auquel lieu alla de Meaulx à l'encontre d'elle ledit Roy Henry son seigneur & mary avec ses Princes, duquel elle fut receüe ioyeusement comme l'ange de Dieu. Et des Roys & Royne de France fut faicte toute liesse audit lieu du Bois de Vincenne pour la venue de leur beau fils, & de leur fille la Royne: & le trentiesme iour de May preuigille de la Penthecouste, lesdits Roys de France & d'Angleterre & les Roynes leurs femmes partirent dudit Bois de Vincenne, & entrerent à Paris en moult noble estat: & se logea le Roy de France & la Royne en son hostel de saint Pol, & le Roy d'Angleterre & sa compaignie la Royne furent logez ou chastel du Louure: esquels lieux celebrerent chacun desdits Roys endroit soy reallement en leurs logis la solemnité de la Penthecouste qui lors estoit. Et à cedit iour fu-



rent ensemble ledit Roy d'Angleterre & sa femme tant glorieusement comme pompeusement à leur table à dîner, & couronnez de leurs precieux diademes. Là firent aussi en la salle où estoient le Roy & la Royne à table, où estoient gentement appoinctez, les Ducs & Princes gens d'Eglise, Gouffaniens & cheualiers de la gent Anglesche chacun comme à son estat appartenoit : & furent remplis de diuerfes viandes & de boyres precieulx. Et tindrent à cedit iour lesdits Roy & Royne noble court & large : & tous leurs Anglois qui estoient là venus à ceste feste, & là le peuple de Paris en grand nombre allerent audit chastel du Louure pour veoir lesdits Roy & Royne d'Angleterre seans ensemble, en portant couronne : mais ledit peuple sans estre administré de boyre ne de manger par nuls des maistres d'hostels de leans se partirent, contre leur coustume, dont ils murmurèrent ensemble : car au temps passé quand ils alloient en si haultes solemnitez à la court de leur seigneur le Roy de France, estoient administrez des gouuerneurs de boyre & manger à sa court, qui estoit à tous ouuerte : & là ceux qui se vouloient seoir estoient seruis treslargement par les seruiteurs du Roy des vins & viandes d'iceluy : mais à ce dont le Roy Charles auoit esté comme ses predecesseurs large & courtois, se feoit en son hostel à saint Pol avec luy la Royne sa compagne assez seuls, & ainsi que tous mis arriere & en oubly des grâs seigneurs de son royaume, & aussi des autres : & pour ce temps estoit issüe & eslongnée toute la puissance dudit royaume d'iceluy Roy Charles & entrée ou arrestée en son beau fils le Roy Henry : & pour lors le dessusdit Roy ne gouernoit pas sondit royaume : mais estoit gouerné & mis comme au neant au regard de sa noble & grand puissance, qu'il auoit eüe autresfois durant son regne : pour lesquelles choses plusieurs loyaux François auoient au cuer grand tristesse, & non pas sans cause : esquels iours iceluy Roy Henry estant audit lieu de Paris, feist en icelle ville cueillir la taille des marcqs d'argent, dont dessus est faicte mention, pour forger la nouvelle monnoye, ainsi & par la maniere qu'on l'auoit desia cueillie ailleurs : si s'en esmeurent plusieurs rumeurs, mais finalement pour la doute & cremeur dudit Roy Henry, les Parisiens n'oserent monstrier semblant de desobeissance ne rebellion aucunement.

*Comment les deux Roys allerent de Paris à Senlis : du siege de saint Vvalery : la reddition de Compiengne & l'ambassade faicte à messire Iaques de Harcourt.*

CHAP. CCLXIIII.

**L**E xxij. iour de Iuing les deux Roys de France & d'Angleterre, & les Roynes leurs femmes se partirent de Paris, & allerent à Senlis où ils seiournerent aucuns iours : & de là approchant le iour que la ville de Gamaches se deuoit rendre, y enuoya le Roy pour icelle receuoir le Comte de Varuich, à tout trois mille combatans en sa compagnie : lequel Comte (comme promis auoit esté) entra en ladicte ville le xvij. iour de Iuing, & re-stablit les hostages sains & haitez, lesquels il auoit menez avec luy : & apres receut les sermens de ceux de la ville ou nõ des deux Roys. Et avec ce y commeist capitaine messire Felton natif d'Angleterre avec certain nombre de gens d'armes, & archiers : & ces besongnes accomplies alla ledit Comte deuant S. Vvalery que tenoient les Daulphinois : & icelle approchant, enuoya ses coureurs deuant



uant la ville : de laquelle issirent à l'encontre d'eux environ cent hommes d'armes tres experts , montez sur cheuaulx roides & habilles , qui de plaine venue se ferirent esdits Anglois : & y eut d'une partie & d'autre de grans estours, hommes d'armes naurez terriblement & aucuns autres prins prisonniers de la partie des Anglois : mais en ce faisant ledit Comte pour secourir & ayder ses gens , se hastia moult fort à tout son ost . Pourquoy il fallut par contraincte les Daulphinois r'entrer dedans leur ville en grand haste . Et lors ledit Comte moult prudemment cheuauchoit en ses armes autour de la ville, pour fermer son ost & tenir ses gens en bonne ordonnance , dont la plus grand partie desdits Anglois se logerēt dedans l'abbaye & les autres le mieulx qu'ils peurent en tentes & en pavillons. Apres lequel logis prins par eux , commencerent à abbatre ladicte ville de leurs pierres & engins sans cesser iettans contre les murs d'icelle en les derompant en plusieurs lieux . Et au regard des saillies & enuahissemens que feirent les Daulphinois cheualereusemēt sur ceux du siege, se conuient taire pour cause de briefueté : & pourtant que du costé vers la mer n'y auoit point de siege par faulte de nauires que n'auoient pas lesdits assiegeans , issoient lesdits assiegez à leur plaisir par leurs nauires , pour aller querir viures abondamment & autres choses à eux necessaires tant au Crotoy comme ailleurs : laquelle chose moult desplaisoit au Comte de Vvaruich , & à ceux du siege . Pource enuoya iceluy Comte en plusieurs ports de Normandie querir nauires , lesquels vindrent en grand puissance & assiegerent par le costé de la mer, dont lesdits assiegez voyans que de tous costez auoient perdu l'issue de leur ville, furent moult troublez & assimpliz. Pourquoy au bout de trois sepmaines ou environ feirent traicté avec le dessusdit Comte de Vvaruich , par condition qu'ils se departiroient de ladicte ville sauue leurs corps , & leurs biens le quart iour du mois de Septembre ensuiuant, ou cas que le Duc de Touraine Daulphin ne seroit à ce iour puissant de combattre ses ennemis deuant ladicte ville . Et aussi durant le temps dessusdit lesdits assiegez se abstiendront de courir ne fourrager les païs : & sur ce deliurerent audit Comte pour plusgrand seureté bons hostages , lequel à tout ses Anglois retourna deuers le Roy Henry d'Angleterre apres l'accomplissement des choses dessusdictes. Et pareillement enuoya le Roy Henry d'Angleterre le Duc de Bethfort son frere & autres de ses Princes grandement accompagnez en la ville de Compiengne, pour icelle receuoir en la main du seigneur de Gamaches : lequel ( comme par auant auoit promis ) la rendre le dixhuiētiesme iour du mois de Iuing en la main dudit Duc de Bethfort. Et apres se departit à tout environ douze cens combatans : lesquels sous bon saufconduit du Roy Henry il emmena outre la riuieire de Seine, & de là vers le Daulphin. Et en cas pareil rendit le seigneur de Gamaches les forteresses que ses gens tenoient , dont dessus est faicte mention . Et par ainsi toutes les places que tenoient les Daulphinois depuis Paris iusques à Boulongne sur la mer, furent mises en l'obeissance des deux Roys de France & d'Angleterre reserué le Crotoy & la terre de Guyse . En outre apres que ledit Duc de Bethfort eut receu les sermens des bourgeois & habitans de Compiengne : & aussi qu'il y eut constitué capitaine messire Hue de Launoy, s'en retourna à Senlis deuers le Roy Henry son frere . Et en ce mesme temps furent enuoyez de par iceux Roys ambassadeurs au Crotoy deuers messire Iaques de Harcourt : c'est à



ſçauoir ſon frere l'Eueſque d'Amiens & avec luy l'Eueſque de Beauuais, meſſire Hue de Launoy maiftre des arbaleſtriers, & vn herault de par le Roy Henry, pour luy faire ſommaton de rendre la ville & chaſtel en la main des Roys deſſusdits : mais finalement pour diligence qu'ils peuſſent faire, ne peurent venir à quelque traicte, & pource ſ'en retournerent.

*Comment le Roy d'Angleterre alla de Senlis à Compiengne : la prinſe de ſainct Digier, & la rencontre des Daulphinois & Bourgongnons.* CHAP. CCLXV.

**E**N ce temps alla le Roy d'Angleterre de Senlis à Compiengne pour veoir la ville. Auquel lieu luy furent apportées nouuelles, qu'on auoit voulu prendre la ville de Paris par aucuns moyens de lettres apportées en ladicte ville par la femme de l'armurier du Roy de France : laquelle par vn certain iour bien matin fut apperceüe d'un preſtre, qui eſtoit allé en vn ſien iardin au dehors d'icelle ville : & la veit parler ſecrètement à aucuns gens d'armes en vne vallée au deſſous dudit iardin : & ſur ce tout effroyé retourna dedans la porte de Paris, & dit aux gardes qu'ils aduiſaſſent à ce qu'ils auoient à faire, & qu'il auoit veu gens armez & vne femme parler à eux. Et adonc leſdictes gardes de ce aduertis, prindrent ladicte femme & la meirent en priſon, laquelle tantost apres cogneut ſon fait : pour leſquelles nouuelles ledit Roy Henry retourna avec tous ſes gens d'armes à Paris, & feit noyer la deſſusdicte femme pour ſes demerites & avec elle aucuns de ſes complices, & puis retourna à Senlis deuers le Roy de France. Ouquel temps meſſire Iean du Vergy & meſſire Anthoine prindrent la ville de ſainct Digier en Partois, mais les Daulphinois qui eſtoient dedans ſe retrahirent au chaſtel : auquel lieu ils furent tantost aſſiegez. Et entre-temps la Hire & aucuns autres capitaines ſ'aſſemblerent en grand nombre, pour aller ſecourir ceux dudit chaſtel. De laquelle aſſemblée furent aduertis les deux ſeigneurs deſſusdits : & pour y reſiſter ſe meirent enſemble au plus grand nombre qu'ils peurent finer, & allerent au deuant de leurs aduerſaires : leſquels ils aſſaillirent treſvigoureuſement, & en fin les deſtrouſſerent : ſi en y eut de morts enuiron quarante, & les autres ſe ſauuerent par fuitte : apres laquelle beſongne retournerent audit lieu de ſainct Digier : & brief enſuiuant ſe rendit à eux ledit Chaſtel, lequel ils regarnirent de leurs gens.

*S'enſuit la complaincte du poure commun & des poures  
laboureurs de France.*

**E**las, helas, helas, helas  
Prelats, Princes & bons ſei-  
gneurs,  
Bourgeois, marchā et aduocats:  
Gens de meſtier grans & mineurs,  
Gens d'armes & les trois eſtats,  
Qui viuez ſur nous laboureurs,  
Confortez nous d'aucun bon ayde:  
Viure nous fault c'eſt le remede.

Viure ne pouons plus enſemble  
Longuement ſe Dieu n'y pouruoye:  
Mal fait qui l'autruy tolt ou emble.  
Par barad ou par faulſe voye.  
Perdu auons ſoulas & ioye  
L'en nous à preſques mis à fin,  
Car plus n'auons ne blé ne vin.  
Vin ne froment ne autre blé  
Pas ſeulement du pain d'auoyne

N'auons



N'auons nostre saoul la moitié  
Vne seule fois la sepmaine  
Les iours nous passons à grand peine  
Et ne scauons que deuenir  
Chacun s'en veult de nous fuyr.

Fuyr de nous ne deuez mie,  
Pensez y nous vous en prions.  
Et nous soustenez nostre vie:  
Car pour certain nous languissons.  
Allangouris nous nous mourous  
Et ne scauons remede en nous  
Seigneurs pour Dieu confortez nous.

Confortez nous vous ferez bien,  
Et certes vous ferez que sages:  
Qui n'a charité il n'a rien.  
Pour Dieu regardez noz visaiges,  
Qui sont si piteux & si palles,  
Et noz membres riens deuenir,  
Pou nous pouons plus soustenir.

Soustenir ne nous pouons plus  
En nulle maniere qui soit:  
Car quand nous allons d'huys en huys,  
Chacun nous dit Dieu vous pouruoye.  
Pain, viandes ne de rien qui soit  
Ne nous tendez n'emplus qu'aux chiens,  
Helas! nous sommes Chrestiens.

Chrestiens sommes nous voirement,  
Et en Dieu sommes tous voz freres,  
Si vous auez l'or & l'argent  
Ne scauez si durera gueres:  
Le temps vous aprestent les biens,  
Et si mourrez certainement,  
Et ne scauez quand ne comment.

Comment osez vous dire & pensez  
Plusieurs choses que de nous dictes,  
Que ce nous vient par noz pechez  
Et vous en voulez clamer quittes.  
Pour Dieu ia plus ne le dictes,  
Et autrement nous confortez  
Pource en pitié nous regardez.

Regardez nous & si pensez,  
Que sans labour ne pouez viure,  
Et que tous sur nous vous courez,  
(Long temps a que chacun nous pille)  
Ne nous laissez ne croix ne pille

Ne rien vaillant que vous puissiez  
De quelque estat que vous soyez.  
Soyez si vous plaist aduisez,  
Et que de cecy vous souuienne,  
Que nous ne trouuons que gaigner  
Ne nul qui nous mette en besongne.  
Chacun de vous de nous s'eslongne,  
Mais s'ainsi nous laissez aller  
Atard vous en repentirez.

Repentirez vous si acertes,  
Que si ainsi nous en allons,  
Vous cherrez les iambes retraictes,  
Et au plus pres de voz talons  
Sur vous tumberont les maisons,  
Voz chasteaulx & voz tenemens:  
Car nous sommes voz fondemens.

Voz fondemens sont enfondus,  
N'y a mais rien qui les soustienne,  
Les murs en sont tous pourfondus,  
N'y a piller qui les retiengne,  
N'y estat qui en rien se faigne  
De nous mener iusques au plus bas.  
Pource nous fault crier helas.

Helas Prelats & gens d'Eglise,  
Sur quoy nostre foy est assise,  
Chiefs estes de Chrestienté,  
Vous nous voyez nuds sans chemise  
Dt nostre face si eslize,  
Et tous languis de poureté.  
Pour l'amour Dieu en charité  
Aux riches gens ce remonstrez,  
Et que vous les admonnestez.  
Qu'ils ayent pitié d'entre nous autres,  
Qui pour eux auons labouré  
Tant que tout leur est demouré:  
De noz pouretez ils sont causes,  
Comme leur dirons cy en bas,  
Pource nous fault cryer helas.

Helas trespuissant Roy Francois,  
Nous pensons si bien rauisois  
Et tu feusse bien conseillé  
Qu'aucun pou nous espargnerois,  
Tu es le Roy de tous les Roys,  
Qui sont en la chrestienté,  
Dieu t'a ceste grand dignité



Baillée, pour raison deffendre,  
Et à diligemment entendre  
Aux complainctes qui vont vers toy:  
Et par ce garder nous pourras,  
De ainsi fort crier *helas*.

*Helas* tresnoble Roy de France  
Le pais de vostre obeissance  
Espargnez le: pour Dieu mercy  
Des laboureurs ayez souuenance,  
Tout auons prins en patience  
Et le prenons iusques à icy.  
Mais tenez vous assure, que si  
Vous n'y mettez aucun remede,  
Que vous n'aurez chasteau ne ville,  
Que tous seront mis à exille,  
Dont ia sommes plus de cent mille  
Qui tous voulons tourner la bride  
Et vous lairrons tout esgaré,  
Et pourrez cheoir en tel trespas  
Qu'il vous faudra crier *helas*.

*Helas* se feroit grand douleur  
Et grand pitié à regarder,  
Qu'un si tresexcellent seigneur  
Criast *helas*: or y pensez,  
Pas ne seriez le premier,  
Qui par deffaute de raison faire  
D'estre piteux & debonnaire  
Auroit esté mis en exil.  
Tenu estes de bon affaire,  
Mais que n'ayez point de contraire  
Dieu vous garde de ce peril,  
Et nous mettez si au deliure,  
Qu'en paix puissions dessus vous viure  
Des le plus hault iusques au bas,  
Tant que plus ne crions *helas*.

*Helas* comment ces tailles grans,  
Qu'avez fait passé à quinze ans  
Par chacun an trois fois ou deux  
Et des monnoyes les tumbemens,  
Et les griefs de voz sergens  
Ont bien noz vaches & noz bœufs  
Amoindris, & tous noz cheuaux,  
Tant qu'ils n'y treuuent plus que prendre:  
Mais par Iesus le Roy des Cieux  
Ne scay si vous en uallez mieux:

Pource vous prions à ioinctes mains,  
Que nous pardonnez noz complains  
Et qu'en hayne ne prenez pas  
Si nous crions ainsi *helas*.

*Helas* pour Dieu noz bons seigneurs,  
Qui estes les grans gouuerneurs  
Et gouuernez tout nostre Roy,  
Que nous vueillez donner secours:  
Au Roy presentez noz clamours,  
Et vous ioingnez de bonne foy  
A luy faire passer l'octroy,  
Que tant humblement requeron,  
En nostre humble supplication.  
Noz treschers seigneurs vous scauez  
Que la clef du royaume tenez,  
Et que trestout ne gist qu'en vous:  
Et pource vous plaise qu'ayez  
Regard à noz grans pouretes,  
Et qu'ayez mercy de nous  
Pour Dieu, seigneur, aduisez vous,  
Vous tous qui auez la puissance  
De donner bonne consequence,  
Aux lettres qu'enuoyons au Roy  
Et aux estats qui sont à foy,  
Et aussi pourrez en tel cas  
Nous garder de crier *helas*.

*Helas* Ducs, Marquis & Comtes  
Barons, Cheualiers & Vicomtes,  
Et nobles qui chasteaux auez  
Voz ayglantiers & voz ronces,  
Voz officiers avec leurs pompes  
Nous ont souuent fait espoucer,  
A voz murs nous faire garder  
La nuit à la pluye & au vent  
Trestout le corps de nous tremblant:  
Puis nous mettoient voz gens assure  
Qu'auions dormy dessus les murs,  
Et noz robbes nous despoilloient  
Par violence rudement,  
En nous mettant à grand rancons,  
Frappans sur nous de gros bastons,  
Puis que leur disions tout bas  
Mercy pour Dieu, *helas*, *helas*.

*Helas*, *helas* encor n'estiez  
Vous pas contents se plus n'auiez



De nous puis qu'estions batus:  
 Et que nous estions ranconnez,  
 Affin de venir aux escus  
 Que vous auez moult souuent eus,  
 Disant c'est nostre droit demaine.  
 Raison le voudroit à grand peine:  
 Là ne sont pas les fondemens  
 De voz terriens tenemens,  
 Ils sont bien autrement fondez  
 Si vous tresbien le scauiez:  
 Mais ie croy que n'y tendez pas,  
 Vous en pourrez bien dire helas.

Helas voulentiers nous teussions  
 De plus parler si nous peussions,  
 De vous ne de voz officiers.  
 Mangé ils ont noz goretons,  
 Et noz brebis, & noz moutons:  
 Et de noz bleds fait voz garniers,  
 Puis faut à leur sergens leur glene,  
 Au portier du bled pour sa peine:  
 Et puis faut pour chacun vaisseau  
 Qui est mis dedans le chasteau  
 Cinq sols pour vostre capitaine,  
 Et un ou deux boisseaux d'auoyne:  
 Dont il fait souuent grans amas,  
 Ne luy chault se crions helas.

Helas encores y a il plus  
 Qui moult souuent le cueur nous trouble,  
 Quand le Roy met une ayde sus:  
 Il conuient que le coup nous double,  
 Vous nous en mettés en grand trouble:  
 Car il conuient souuentesfois,  
 Que nous les payons par deux fois.  
 Et quand gens d'armes au pais viennent,  
 Qui de bien vous servir se peinent,  
 Pource que vous les soubstenés  
 Noz beufs, & noz vaches emmeinent,  
 Et les tuent & les detiennent:  
 Et s'il est que les engardés,  
 Il faut qu'ayés pour voz peines  
 Et de l'argent & des auoyne,  
 Et les mettent en un grans tas  
 Nous pouons bien crier helas.

Helas gens d'armes & de trait  
 Vous auez le forment deffaict,

Et mis en consommation,  
 Tourmentez nous auez de fait  
 Le complaindre peu nous vaudroit  
 Se plus auant en dision.  
 Chacun scait bien si nous menton,  
 Mais ie croy que vueillés ou non  
 Qu'auant que soit longue saison  
 Passée, dire ie vous os,  
 Que vous nous voirrés en repos.  
 O l'ayde de voz destinées,  
 Et de neiges, & de gelees  
 Qui ont esté en maints hyuers,  
 Maints en cherront trestous enuers  
 Trestous morts la gueulle bayee  
 Auant que l'annee soit passée  
 Se Dieu n'y employe sa grace,  
 Ainsi luy plaise qu'il le face  
 Comme il feit aux Egiptiens  
 La pieca en l'ancien temps  
 Quand il les repeut de la manne,  
 Qu'il leur feit du ciel descendre.  
 De Pharaon les deliura  
 Ainsi que de nous il fera  
 S'il luy plaist, ains Pasques Fleuries  
 Si vous ne menés meilleurs vies:  
 Et puis apres ne dirons pas,  
 Que nous faciés crier helas,

Helas aduocats emparlés  
 Maintesfois nous aués brouillés  
 Et maintenus en plaidoyer:  
 Dont bien garder vous nous pouiés  
 Se la voulenté en eussiés,  
 Mais ce n'estoit que voz enuies  
 Tant qu'eussiés les bources garnies  
 De nous mettre à nul accord  
 Aincois par voyes subtines  
 Par voz arts & par voz praticques  
 Nous faisiés du droit le tort:  
 Bien estes causes les plusieurs  
 De partie de noz douleurs,  
 De noz pertes & de noz gas  
 Bien en pourriés trier helas.

Helas bourgeois qui de noz rentes  
 De noz labours, & de noz plantes  
 Aués vescu au temps passé:



Vous voyés noz chieres dolentes,  
 Et les poux qui nous cheent des temples  
 De langueur, & de pauureté.  
 Mains iours nous aués abuzé  
 Et recueillis en vostre hostel,  
 Quand voz rentes vous doubloient :  
 Mais quand vous nous voyés en debte  
 Et que n'auons ne vin ne bled,  
 Plus ne faictes compte de nous,  
 Pource souuent nous faictes vous  
 Braire & crier haut & bas.  
 Que ferons nous chetifs belas.

Helas marchans vous nous aués  
 Par maintesfois reuistés  
 Et voz denrees suruendues:  
 Mais quand de nous acheptiés  
 Vous le nous mesprisiés:  
 Foy estoit bien en vous perdue,  
 Vous aués loyauté deceüe  
 En vous aués commis usure,  
 Larrecin, & pariurement:  
 Mais celuy qui rendra droicteure  
 A toute humaine creature,  
 Vous rendra vostre payement  
 Par son droicteurier iugement:  
 Et mauldirez tous ces amas  
 Quand crier vous faudra belas.

Helas vous autres de mestiers,  
 Mareschaulx & cordouenniers  
 Et les tanneaux de peaux velues,  
 Vous nous aués esté moult chiers:  
 Voz parolles nous ont deceües,  
 Pis nous aués fait que usuriers,  
 Car pour néant par chacun iour  
 Vous aués eu nostre labour:  
 Marchand auant la cueillette  
 Bien en pourré. auoir mal tour,  
 Si n'en faictes aucun retour  
 Auant que iugement s'y mette,  
 A lors saison ne sera pas  
 Que vous faulst crier belas.

Helas vous scauez tous comment  
 Nous perdîmes nostre froment,  
 Que entan nous semâmes és terres  
 Pour la gelée dure & grand,

Qui les meit à confondement:  
 Et puis vous scaués tous quels guerres,  
 Quels meschiefs & quelles rappines  
 Nous feirent toutes ses vermines,  
 Qui vindrent aux saisons nouuelles.  
 N'y demoura ne pois ne febues  
 Dont ne tataffent des premiers  
 Rats & souris & verminiers,  
 Et les espis en emportoient  
 Des bleds, qui demourés estoient:  
 Et par moult diuerses manieres  
 Ils les mettoient en leurs tesnieres  
 Et en feirent de grans amas,  
 Dont maints en ont crié belas.

Helas auons crié assés  
 Pour Dieu que vous nous pardonnés,  
 Et que vous pensés en vous, mesmes  
 Si nous vous disons verité:  
 Tout nostre fait veoir vous poués,  
 Ainsi que nous faisons nous mesmes,  
 Courroux, mal talent & attaines  
 Nous regardent tous chacun heure,  
 Beuf ne pourceau ne nous demeure  
 Ne brebis, ne noz pauvres vaches  
 Dequoy faisons noz laitages,  
 Qui nostre vie soubstenoit  
 Et de la faim nous guarissoit:  
 Mais la mort & le diuers temps  
 Les a fait demourer és champs,  
 Et mortes les trouuons par les telts:  
 C'est ce que bien souuentes fois  
 Quand voyons aduenir tels cas  
 Qui nous fait fort crier belas.

Helas sans plus vous dire belas  
 Comment peuuent penser creatures,  
 Qui bien aduisent noz figures  
 Et ont sens & entendement,  
 Et nous voyent nuds par les rues  
 Aux gelées & aux froidures  
 Nostre pauvre vie querant :  
 Car nous n'auons plus rien vaillant,  
 Comme aucuns vueillent langaigés  
 Ils s'en sont tresmal informés,  
 Car s'ils pensoient bien en Todigues  
 Et Escocois en leurs complices,



*Et és yuers qui sont passés  
Et autres voyes fort obliques,  
Dont tous estats nous sont relicques  
Comme chacun nous à plusmé:  
Ils seroient bien hereticques  
S'ils pensoient bien en leurs vices,  
Qu'il nous fut rien demouré:  
Tels langaiges ne sont que gas,  
Si nous taisons de dire hélas.*

*O tressaincte mere l'Eglise  
Et vous trefnoble Roy de France,  
Conseilliers qui à vostre guise  
Mettez tout le pais en ballance,  
Aduocats de belle loquence,  
Bourgeois, marchans gens de mestiers,  
Gens d'armes qui tout exillés  
Pour Dieu & pour sa douce mere  
A chacun de vous en droit soy,  
Vous plaise penser aucun poy  
En ceste complaincte amere.*

*Et si vous bien y aduisés  
Nous cuidons que apperceurés,  
Et que vous voirrés par voz yeux  
Le feu bien pres de voz hosteux.  
Qui les vous pourroit bien brusler,  
Si garde de pres n'y prenés.  
Deformais si nous nous taillons  
Autres lettres vous enuoyerons  
Closés, dedans veoir vous pourrés  
Noz faits & noz conclusions  
Et les fins à quoy nous tendons:  
S'il vous plaist vous les ouurirés,  
Noz requestes vous conclurés  
Et Dieu du tout ordonnera  
A la fin ou quand luy plaira:  
Mais Dieu vous y doint si bien faire  
Que acquerir vous puisés sa gloire,  
Et qu'en ce ayés tels regards  
Que plus ne vous crions hélas.  
Amen par sa grace.*

*Comment le Duc de Touraine Daulphin feist assieger Cone sur Loire: le voyage qui se  
feist à ceste cause de par le Duc de Bourgongne, & la mort du Roy d'Angleterre.*

## CHAP. CCLXVI.



R conuient parler du Duc de Touraine Daulphin, lequel en ce temps assembla en diuers pays environ vingt mille combatans: à tout lesquels il se tira à Sanxerre, auquel lieu se teint de sa personne assez longue espace. Durant lequel temps fut mise en son obeissance la Charité sur Loire, où il meist grand garnison de ses gens: & apres fait assieger la ville de Cone sur Loire, qui en la fin fut contraincte de traicter avec les commis d'iceluy Daulphin, par condition qu'ils luy renderoient ladicte ville le seiziesme iour du mois d'Aoust: ou cas que le Duc de Bourgongne ne les secourroit audit iour si puissamment, que pour les deliurer de la main de ses aduersaires. Et pource entretenir baillerent les assiegez hostages ausdits assiegeans: & avec ce promeirent les deux Ducs dessusdits, c'est à sçauoir de Bourgongne & de Touraine par la bouche de leurs heraulx à estre & comparoir chacun à tout sa puissance à ladicte journée pour combattre l'un contre l'autre. Et affin d'entretenir icelle, ledit Duc de Bourgongne qui parauât festoit conclud de retourner en son pays d'Arthois, demoura en Bourgongne, & manda gens de toutes parts tant en Flandres, en Picardie comme ailleurs à venir vers luy. Et si enuoya deuers le Roy d'Angleterre luy requerir bien instammét qu'il luy enuoyast certain nombre de ses gens pour estre avec luy à ladicte journée avec aucuns de ses Princes & chefs de guerre: lequel Roy feist responce à ceux que le Duc y auoit enuoyez que ce ne feroit pas, mais iroit en propre personne avec toute sa puissance: & entretemps messire Hue



de Launoy maistre des arbalestriers de France, assembla grand nombre de gens tant de la Comté de Flandres comme des marches vers l'Isle. Et pareillement le firent messire Jean de Luxembourg, le seigneur de Croÿ & plusieurs autres capitaines de Picardie, à tout lesquels vers l'issue du mois de Juillet se tirerent par diuers chemins autour de Paris, & de là par Troyes en Champaigne. Et d'autre partie le Roy d'Angleterre qui estoit en la ville de Senlis nompas bien Santieux de sa personne, feist partir son ost d'autour de Paris sous la conduicte du Duc de Bethfort son frere, du Comte de Varuich & autres de ses Princes & capitaines pour aller en Bourgogne: & luy mesmes assez aggraué de maladie partit dudit lieu de Senlis apres qu'il eut prins congé au Roy de France, à la Roïne & aussi à sa femme qui depuis ne le reut: & alla à Melun où il se feist mettre sur vne lictiere sur intention d'aller à la iournée dont dessus est faicte mention avec ses gens. Mais pourtant qu'il se sentit trop affoibly, & qu'il empiroit de iour en iour, retourna & se feist mener au Bois de Vincenne & là salitta du tout: & ledit Duc de Bethfort, ses Princes & tout son ost se tirerent par plusieurs iournées iusques au pays de Bourgogne, & ainsi le firent tous les seigneurs de Picardie & d'autres lieux: & tant cheminerent qu'ils vindrent en la ville de Vezelay où ils trouverent le Duc de Bourgogne, qui là les attendoit à tout grand puissance de gens d'armes qu'il auoit assemblez de plusieurs lieux: si les receut & festoya moult ioyeusement, & par especial quand il trouua ledit Duc de Bethfort & les autres Princes d'Angleterre, les remercia moult humblement du noble & puissant secours qu'ils luy faisoient à son besoing. En apres les Princes & capitaines dessusdits, ioincts ensemble (comme vous auez ouÿ) commencerent à cheuaucher à tout leurs gens qui estoient en tresgrand nombre en approchant ladicte ville de Cone: & auoient estably par ordonnance auantgarde, bataille & arrieregarde: & là chacune desdictes parties auoit certain nombre d'Anglois, Picards & Bourgonnons, affin qu'au iour qui estoit assigné n'y eut nulles enuies, & que nulles des trois parties ne peussent auoir honneur ou deshonneur l'une plus que l'autre. Et ainsi tenans ceste ordonnance cheuaucherent audit lieu de Cone: deuant laquelle ils se logerent la nuit, dont le lendemain deuoient estre combatus par les promesses cy dessus declairées: mais ledit Duc de Touraine Daulphin & ceux qui le gouernoient sçachans la puissance des Princes dessusdits, se retrahit à tout ses gens deuant Bourges en Berry, & ne comparut homme pour luy à ladicte iournée. Et par ainsi demoura icelle ville de Cone en l'obeissance dudit Duc de Bourgogne: & apres ceste iournée passée se meist tout l'ost à retourner deuers Troyes. Toutesfois durant iceluy voyage y eut grand necessité de viures, & par especial de pain: mais tantost qu'ils furent vers la dessusdicte ville de Troyes, se commencerent à mettre au large sur le plat pays: lequel tant pour leur venue comme pour leur retour fut moult trauaillé par tout où ils passerent. Auquel retour sur le chemin vindrent certaines nouuelles audit Duc de Bethfort, que son frere le Roy Henry estoit moult oppressé de la maladie dessusdicte & en grand peril de sa vie: & pource incontinent avec luy plusieurs de ses plus feables à priuée mesgnie cheuaucha moult en haste iusques au Bois de Vincenne, où il estoit, & là le trouua moult aggraué. Et en ce cas pareil vint à la cognoissance du Duc de Bourgogne, lequel y enuoya messire Hue de Launoy pour le visiter & sçauoir en



en quel point il estoit. Et adonc iceluy Roy sentant qu'il estoit moult trauaillé de maladie, feist venir autour de son frere le Duc de Bethfort, son oncle Comte de Varuich, messire Loÿs de Robessart & avec aucuns autres iusques à six ou à huiet de ceux, où il auoit la plus grande fiance de tous ses familiers : si leur dit & remonstra assez piteusement, comment il veoit bien que c'estoit le plaisir de son createur qu'il finast sa vie en delaisant ce monde cy. Et apres dit à son beau frere Iean beau frere, ie vous prie sur toute la loyauté & amour qu'avez eüe à moy, que soyiez tousiours bon & loyal à mon beau fils Henry vostre nepueu : & vous charge sur tant que vous pouez mesprendre, que tant que vous viurez ne souffrez à faire traicté avecques nostre aduersaire Charles de Vallois, ne autres pour chose qu'il aduienne, que la Duché de Normandie ne luy demeure franchement : & ou cas que le beau frere de Bourgongne voudra entreprendre le regime de ce royaume, ie vous cōseille que vous luy baillez. Mais fil le reffuse, si le prenez : & à vous bel oncle d'Excestre, ie vous laisse seul & pour le tout le regime du royaume de Angleterre, car ie sçay que moult bien le sçauiez gouverner : & vous prie que pour quelque affaire qu'il aduienne ne retournez plus en France. Et avec ce vous ordonné à estre du tout gouverneur du beau fils vostre nepueu. Et vous requiers sur tant que vous m'avez aymé, que le voyez & visitez tressouuent en vostre personne. Et vous beau cousin de Varuich, ie vueil que soyiez son maistre & que demourez tout quoy avec luy, pour le conduyre & apprendre selon l'estat qu'il appartient : car ie n'y sçauroye mieulx pourueoir. En apres ie vous prie tant comme ie puis à tous, que gardez sur tant que pouez mesprendre que n'ayez aucune dissention avec beau frere de Bourgongne, & ce deffendez expressement à beau frere Honffroy : car fil aduenoit ( que Dieu ne vueille ) qu'il y eust entre vous & luy aucunes malueillances, les besongnes de ce royaume qui sont moult aduancées de nostre party, en pourroient estre empirées : & si gardez que ne deliurez pas de prison beau cousin d'Orleans, le Comte d'Eu, le seigneur de Gaucourt ne Guychart de Sisay iusques à tant que beau fils aura son aage competant, & des autres faictes en comme bon vous semblera. Apres lesquelles parolles & aucunes autres pareilles, les seigneurs dessusdits là estans luy respondirent moult humblement chacun en droit soy ayant au cueur tresgrand tristesse, que tout ce qu'il leur ordonnoit & qu'ils sçauoient que seroit son plaisir à estre fait, ils accompliroiēt à leur pouoir sans en riens aller au contraire : & estoient tous moult ennuyez de ce qu'ils le veoient estre en si petit estat de santé. Et tost apres se departirent de ladicte chambre aucuns d'iceux, & messire Hue de Launoy qui auoit esté enuoyé deuers le Roy dessusdit (comme dit est dessus) de par ledit Duc de Bourgongne, apres qu'il eut bien & à point accomply sa legation & en aucunes parolles avecques iceluy Roy, retourna deuers ledit Duc : & brief le Roy dessusdit feit venir deuant luy ses medecins, & leur requist bien instamment qu'ils luy voulsissent dire selon ce qu'ils pouoiēt veoir de luy, quel terme de vie il pouoit encores bien auoir : à laquelle requeste ils delaisserent certaines espace de luy faire sçauoir, sinon de luy bailler esperance, en disant qu'il estoit bien en Dieu de le faire retourner en santé : si ne fut pas de ce content, & les requist comme deuât, qu'ils luy dissent la verité. Et adonc parlerent ensemble & apres par la bouche de l'un d'eux, qui se meist à genoulx deuant luy, luy fut dit : sire pensez à vostre ame : car il nous



semble se n'est la grace de Dieu qu'il est impossible que viuez plus de deux heures. Et lors manda son confesseur & aucuns autres de sa famille, & gens d'Eglise, & ordonna à dire les sept pseumes. Et quand vint à *Benigne fac domine*, où il y a *muri Hierusalem* : il les feist arrester, & dit tout hault, que sur la mort qu'il attendoit, il auoit intention qu'apres qu'il auroit mis le royaume de France en paix de aller conquerre Hierusalem, fil eust esté le plaisir de son createur de le laisser viure son aage : & apres qu'il eut ce dit les fait parfaire, & assez brief ensuiuant selon le terme que dit auoient les dessusdits medecins, rendit son esprit le derrain iour d'Aoust : pour la mort duquel le Duc de Bethfort son frere & tous les autres Princes, generalmente tous ceux du royaume d'Angleterre feirent grans lamentations & demourerent en grand tristesse. Et tost apres furent enterrées ses entrailles en l'Eglise & monastere de saint Mor des fossez : & son corps bien embalsmé fut mis en vn sarcus de plomb. Durant lequel temps le Duc de Bourgogne vint de Bray-Comte-Robert audit lieu du Bois de Vincenne. Et alla veoir & visiter le Duc de Bethfort frere du Roy dessusdit, & les autres Princes là estās. Avec lesquels eut aucun brief parlement, lequel finé se partit de là & alla à Paris loger en son hostel d'Arthois. Et le Roy dessusdit accompagné de ses Princes Anglois & de ceux de son hostel avec grand multitude d'autres gens, fut mené en grand triumphe à Paris & mis dedans l'Eglise nostre Dame, où il fut fait vn seruice solemnel : & de là fut mené grandement accōpagné en la cité de Roüen. Et y demoura assez longue espace de temps : & entre-temps s'assemblerent les Princes en cōseil audit lieu de Paris : c'est à sçauoir les Ducs de Bethfort, de Bourgogne & d'Excestre avec plusieurs autres grans seigneurs, affin d'auoir aduis & deliberation ensemble sur la gouerne & entretenement du royaume de France. Et là fut conclud & promis par eux de rechef, qu'en la forme & maniere qu'il auoit esté traicté autresfois entre les deux Roys à Troyes en Champaigne, s'entretenroit la paix finale qui iurée & promise auoit esté entre les parties. Et comme il fut assez veritablement sceu, la principale maladie dont ledit Roy alla de vie à mort, luy vint par feu qui luy print par dessous au fondement, assez semblable que l'on dit estre la maladie saint Anthoine. En outre apres que les Princes dessusdits eurent prins leurs conclusions sur le regime du royaume (comme vous auez ouï) dedans la ville de Paris : se partit brief ensuiuant de Paris le Duc de Bourgogne, & retourna à tout ses Picards en Arthois & en Flandres, & le Duc de Bethfort avec autres Princes Anglois s'en alla à Roüen, pour appoincter & ordonner des affaires de la Duché de Normandie : & là fut menée en noble appareil la Royne d'Angleterre, qui de la mort de son feu mary riens ne sçauoit : & apres que les seigneurs du sang royal l'eurent mis sur vn chariot que menaient quatre grans cheualx, & auoient fait sa semblance & representation de cuyr bouilly painct moult gentilleement, portant en son chief couronne d'or moult precieuse. Et tenoit en sa main dextre le sceptre ou verge royale, & en sa main senestre auoit vne pomme d'or, & gisoit en vn lict sur le chariot dessusdit le visage vers le ciel. Duquel lict le couuertoir estoit de drap de soye vermeil batu à or : & avec ce portoit on en hault à passer parmy les bonnes villes par dessus le chariot vn moult riche drap de soye, en la maniere qu'on là accoustumé de porter sur le corps Iesus Christ au iour du saint Sacrement : & ainsi allant moult grandemēt accompagné



accompagné de ses Princes & de sa cheuallerie de son hostel, fut mené le droit chemin de Roüen à Abbeuille, & mis en l'Eglise saint Offran: & si auoit moult de gens d'Eglise à la dextre & senestre partie du trespasé, qui nuit & iour les vns après les autres en cheuauchant, cheminant où arrestant chantoient sans cesser l'office des morts. Et celebroyent tous les iours pour luy depuis le point du iour és Eglises, où ils logeoient messes iusques à ce qu'il estoit nonne. Et apres d'Abbeuille à Hesdin, & de là à Monstreul, & puis par Boulongne allerent à Calais: & tousiours sur ledit chemin y auoit autour dudit chariot plusieurs hommes vestus de blanc, qui portoient en leurs mains torches allumées: & derriere estoient vestus de noir ceux de la famille de l'hostel dudit Roy: & apres suiuiot ceux de la lignée vestus de vestemens de pleurs & de plaincts. Et ensuiuant tout ce, alloit la Roïne en grand compagnie enuiron d'une lieüe loing apres sondit seigneur: lequel, comme dit est, fut mené à Calais: & de là nagerent par mer à Douures en Angleterre: & puis par Cantorbie & Rocestre allerent à Londres, où ils arriuerent là nuit de saint Martin d'hyuer. A l'encontre duquel Roy issirent de ladicte ville de Londres quinze Euesques vestus de chasubles pontificaulx, & plusieurs Abbez mittrez, & autres hommes d'Eglise en grand nombre avec grand multitude de bourgeois & autres communes: lesquels gens d'Eglise tous ensemble meirēt ledit Roy deffunct dedans ladicte ville en chantant l'office des morts: & le menerēt par le pont de Londres & par la rue des Lombars iusques à l'Eglise cathedrale de S. Pol: & au plus pres du chariot estoient plorans & lamentans les Princes de son lignage: & avec ce le premier cheual des quatre qui menoiēt ledit chariot, auq̃l le Roy estoit, auoit vn collier qui estoit painct des anciennes armes d'Angleterre. Ou collier du secōd cheual estoient painctes les armes de France & d'Angleterre esquartellées: lesquelles luy mesmes portoit en son viuant: ou collier du tiers cheual estoient painctes plainement sans difference nulle les armes de France. Et ou collier du quart cheual estoient painctes les armes, que portoit (quand il viuoit en ce monde) le noble Roy Artus que nul ne pouoit vaincre: lesquelles armes estoient vn escu d'azur à trois couronnes d'or. Et apres que le seruice dudit Roy eut esté fait royallement, ils le porterent enterrer en l'Eglise de Vastremontier empres ses predecesseurs Roys d'Angleterre. Auquel enterremēt fut fait en toutes choses generallement plus grand estat & bombant que depuis deux cens ans par auant n'auoit esté fait de nuls des autres Roys d'Angleterre. Et mesmement luy mort (comme dit est) & mis en sa sepulture, luy ont fait & font chacun iour aussi grand honneur & reuerence comme fils fussent acertenez qu'il fut ou soit saint en paradis. Ainsi & par ceste maniere fina iceluy Roy Henry en la fleur de son aage: car quand il alla de vie à mort, pouoit auoir enuiron quarante ans. Et estoit moult sage & expert en toutes besongnes, dont il se vouloit entremettre & de tres haultain vouloir. Et auoit sept ou huit ans que son regne dura en France fait en iceluy de tresgrans conquests, plus que nuls de ses predecesseurs n'auoient fait long temps par auant. Et pour vray il estoit si craint & douté de ses Princes & capitaines, qu'il n'en y auoit nul tant luy fut prochain & bien de luy, qui osast transgresser ses ordonnances, & par especial ceux de son royaume d'Angleterre. Et pareillement estoient à ce reduis tous ceux du royaume d'Angleterre & de France de quelque estat qu'ils fussent, qui estoient sous



son obeïssance & domination . Et la cause principale si estoit : car ceux qui faisoient le contraire & enfraignoient les dessusdictes ordonnances , il faisoit punir trescriminellement sans en auoir aucune misericorde . En apres toutes les besongnes dessusdictes accomplies , s'assemblerent les trois estats du royaume d'Angleterre en tresgrand nombre, pour auoir aduis & deliberation qu'il estoit bon à faire sur le regime dudit royaume : & en fin se conclurent & esleurent à Roy le seul fils d'iceluy Roy Henry deffunct, lequel n'auoit que seize mois d'aage ou enuiron, & se soubismeirent du tout en son obeïssance , nonobstant sa ieunesse . Et prestement luy baillerent estat royal, & conuindrent à le gouuerner & conduyre le Comte de Varuich & autres : durant lequel temps y eut vn noble cheualier de Picardie, qui dit à son poursuiuant vne ioyeuseté par maniere de gaberie touchât la mort du Roy d'Angleterre . Ce fut messire Sarrazin d'Arly oncle du Vidame d'Amiens, lequel pouoit lors bien auoir soixante ans d'aage, & demouroit en vn sien chastel qu'il auoit de par sa femme seur au seigneur d'Offemont , comme Acheu assez pres de Pas en Arthois , & là estoit tout malade de gouttes : neantmoins volentiers enqueroit & oyoit racompter des nouuelles : si retourna en ses iours sondit poursuiuant nommé Haurenas qu'il auoit enuoyé dehors , & estoit enuiron de l'aage de son maistre & l'auoit long temps seruy : & apres sa venue l'examina ledit messire Sarrazin , sçauoir fil sçauoit riens de la mort dudit Roy d'Angleterre : & dit, que ouÿ, & qu'il l'auoit veu à Abbeuille en l'Eglise de saint Offram, & luy racompta tout l'estat & comment il estoit habillé assez pareillement qu'il est declairé en ce present article . Et adonc messire Sarrazin luy demanda, par sa foy fil l'auoit bien aduisé . Et il respondit que ouÿ . Or me dis, par ton serment, fil auoit point ses housseaux chaufsez : à monseigneur , ce dit il, nenny par ma foy, ce dit messire Sarrazin . Haurenas, beaulx amis, iamaïs ne me croy, fil ne les a laissez en France : à ce mot tous ceux qui estoient presens commencerent à rire, & puis parlerent d'autre matiere.

*Comment la Duchesse de Bourgongne Michelle alla de vie à trespas en la ville de Gand : & comment le Duc de Bethfort fut fait Regent, & de plusieurs fortereffes abbatues.*

## CHAP. CCLXVII.

**L**Tem durant les assemblées qui se feirent pour le voyage de Cone, comme dit est, s'acoucha malade en la ville de Gand la Duchesse de Bourgongne Michelle fille au Roy de France, & seur du Duc de Touraine Daulphin : en laquelle maladie tant continua qu'en la fin alla de vie à trespas . Pour la mort de laquelle, tous ses seruiteurs & vniuersellement tous ceux de Gand & de la Comté de Flandres n'entendirent pas à ioye , mais à pleurs & profons gemissemens : car elle estoit moult aymée de tous les subiects, generalmente des paÿs du Duc Philippe son mary : & bien y auoit raison , pour ce principalement qu'elle estoit de haulte extraction, belle & bien formée, adornée de toutes bonnes conditions selon la relation de ceux qui d'elle auoient cognoissance . Si fut son corps mis en terre tres solemnellement en l'Eglise de la monasteré saint Bauon empres Gand . Toutesfois il fut lors assez commune renommée en icelle ville de Gand , que sa mort auoit esté aduancée . Et de fait en fut



fut fouspeçonnée vne sienne damoyfelle nommée Ourfe femme de Coppin de la Viefuille née d'Allemaigne, laquelle estoit à ladicte Duchesse moult familiere portant son fecl : & durant fa maladie l'auoit congiee de son hostel, & f'estoit retraicte en la ville d'Aire : auquel lieu enuoyerēt les Gantois iufques à six vingts hommes de leurs gens pour l'aller querir & ramener à Gand : mais quand ils furent venuz en ladicte ville d'Aire, trouuerent messire Gauuain de la Viefuille & aucuns autres gentils-hommes de l'appartenance & amitié du mary de ladicte damoyfelle Ourfe : lesquels proumeirent aux Gantois de la mener fans delay deuers le Duc de Bourgongne, pour en faire son plaisir : & ainsi que promis l'auoient le feirent : apres laquelle promesse retournerent les Gantois en la ville de Gand, & pource que pas ne l'auoient ramenée, furent en grand indignation de ceux de ladicte ville, & en y eut aucuns des principaulx mis prisonnier. Et aufsi furent tresmal contens du Maire, Escheuins & iurez de la dessusdicte ville d'Aire, pource que pas ne leur auoient enuoyé à leur mandement ladicte damoyfelle. Et d'autre partie, nonobstant que le seigneur de Roubaix fut & eust esté tousiours durant les besongnes dessusdictes au païs de Bourgongne en la compagnie dessusdicte dudit Duc : neantmoins le bannirent à ceste cause les dessusdits Gantois de leur ville, & de la Comté de Flandres : mais quand ledit Duc y fut retourné depuis, luy rendit ledit païs & luy feist fa paix certain temps apres à iceux Gantois : car il n'auoit quelque suspicion contre ledit seigneur de Roubaix pour le cas dessusdit, pource qu'il sçauoit auoir esté en fa compagnie entre-temps que ce estoit aduenue. Si se passa ainsi la besongne, & n'en fut procedé n'enquis plus auât. En apres en ce mesme temps fut par l'auctorité des Roys de France & d'Angleterre & de leur grand conseil le Duc de Bethfort constitué Regent du Royaume de France, pource que le Duc de Bourgongne ne l'auoit voulu entreprendre. Et adonc vn petit parauant auoient esté demollies, & abbatues de fons en comble par mandement royal les chasteaux de Muyn, Cressensac, Mortemer, Tilloy, Arrames, Hericourt, Louroy & plusieurs autres, dont moult despleut aux nobles hommes à qui lesdictes forteresses appartenoient : mais à ce ne peurent aucunement pourueoir.

*Comment Charles vi. Roy de France alla de vie à trespas en son hostel de saint Pol dedans Paris, & fut porté à saint Denys empres ses predecesseurs.*

CHAP. CCLXVIII.

**E**N ces propres iours s'accoucha malade en son liêt à l'hostel de saint Pol dedans Paris Charles Roy de France. Et le xxij. iour d'Octobre iour des vnze mille vierges rendit son esprit, & furent à son trespas tant feullement son Chancelier, son premier Chambellan, son confesseur & aumosnier avec aucuns de ses officiers & seruiteurs en petit nombre. Et brief apres l'allerent veoir en son liêt les seigneurs de son conseil, de la châtre de Parlement & des Comptes, l'vniuersité de Paris & plusieurs colleges, les escheuins, bourgeois & habitans d'icelle ville & aucuns autres. Et là par ses seruiteurs fut mis en vn cercueil de plomb & porté moult reueramment par cheualiers & escuyers en la chappelle de sondit hostel de saint Pol : en laquelle il fut vint



iours entiers iusques à ce que le Duc de Bethfort Regent fut retourné dedans Paris ou mois de Nouembre ensuiuant . Et durant les vingt iours dessusdits , furent chantées & celebrées les messes en icelle chappelle en la forme & maniere qu'on faisoit au viuât du Roy par ceux de sadiète chappelle: & en apres par iceux estoit fait le seruice des morts pour l'ame de luy , & allerent iournellement les quatre ordres des mandiens de Paris les vns apres les autres faire seruice pour luy. Et pareillement les chanoynes & colleges chacun en son tour . Et d'autre partie luy fut fait de par l'vniuersité vn moult noble seruice : & depuis les quatre nations de ladiète vniuersité luy en feirent vn particulierement . Et generallyment tous les colleges de Paris & toutes les parroisses luy feirent chacun vn seruice solemnel. Et le x.iour de Nouembre fut porté le corps dudit Roy en son hostel de saint Pol en l'Eglise de nostre Dame de Paris, les processions de toutes les Eglises allans au deuant dudit corps par ordre, & chacun en son degré, & puis les Prelats au dextre costé : c'est à sçauoir les Euesques de Paris, de Chartres & de The-roüenne, les Abbez de saint Magloire, de saint Germain des prez, de S. Mor & de sainte Geneuiefue . Et au fenestre costé alloient l'vniuersité, les Recteurs & Docteurs aussi pres du corps comme les Prelats: & portoient ledit corps ses cheuaucheurs & ceux de son escuyrie : & apres suiuiot les maistres d'hostels & escuyers d'escuyerie au costé dextre. Et au fenestre estoient les Preuosts de Paris & des marchans & les sergens d'armes entredeux, & au plus pres du corps estoit son premier varlet de chambre . Et ceux de la Court de Parlement portoient le drap par dessus le corps: & au plus pres du chief estoit son premier Chambellan, & les autres ensuiuant. Apres lesquels suiuiot les pages dudit Roy , & vn petit ensuiuant alloit le Duc de Bethfort Anglois, qui estoit Regent de France: & n'estoit iceluy corps accompagné de nuls des Princes de son sang sinon seulement dudit Duc de Bethfort . Laquelle chose estoit moult pitoyable à veoir , attendu la grand puissance & prosperité en quoy ce noble Roy auoit esté veu durant son regne. Et apres ledit Duc suiuiot le Chancelier de France, les maistres des Requestes, les seigneurs des Comptes, Secretaires, Notaires, bourgeois & le commun de Paris en grand multitude : & estoit le corps sur vne lictiere moult notablement : par dessus laquelle auoit vn pauillon de drap d'or à vn champ vermeil d'azur, semé de fleurs de lis d'or . Et par dessus le corps auoit vne pourtraicture faicte à la semblance du Roy , portant couronne d'or & de pierres precieuses moult riches, tenant en ses mains deux escus l'un d'or & l'autre d'argent : & auoit en ses mains gands blancs & anneaulx moult bié garniz de pierres: & estoit icelle figure vestue d'un drap d'or à vn champ vermeil à iustes manches . Et vn mantel pareil fourré d'ermes , & si auoit vnes chausses noyres & vns souliers de veluel d'azur semées de fleurs de lys d'or. Et en tel estat (côme dit est) fut porté en grand reuerence iusques dedans l'Eglise nostre Dame de Paris : dedans laquelle chanta la Messe pour ledit deffunct le Patriarche de Constantinoble . Apres laquelle & tout l'office acheué moult honorablement, fut ledit Roy porté à saint Denis. Et le porterent les gens de son escuyerie iusques à vne croix qui est emmy chemin de Paris & saint Denis: à laquelle Croix le chargerent les Mesureurs & porteurs de sel à Paris chacun vne fleur de lys à sa poitrine, & le porterent iusques à vne Croix empres saint Denys : iusques à laquelle vindrent à l'encontre de luy  
l'Abbé



l'Abbé dudit lieu de saint Denys & ses religieux, & tout le clergie de la ville en procession avec les bourgeois, & le peuple qui auoient grand foison de torches & luminaires. Et de là en chantant & recômandant son ame à Dieu, fut porté iusques à l'Eglise saint Denys. Et tousiours durant ceste allée, estoient leldits Ducs de Bethfort & les autres dessus nommez empres ledit corps. Et luy venu en icelle ville de saint Denys, fut de rechef le seruice fait par le dessusdit Patriarche : mais il y eut vne nuit entre les deux seruices, & ne furent nuls là estans qui allasent à l'offrande sinon le Duc de Bethfort. Et pour vray y eut bien aux deux seruices vingt mille liures de cire, & à l'aumosne seize mille personnes : lesquelles eurent chacun trois blans monnoye royalle. Et apres que le seruice fut fait & acheué en icelle Eglise de saint Denis, & que le Roy dessusdit fut mis en sa sepulture empres ses predecesseurs Roys de France : iceluy Patriarche feist la benediction comme il est de coustume, & adonc les huissiers d'armes de chez le Roy qui estoient là presens, rompirent leurs petites verges & les ieçterent dedans la fosse : & puis meirent leurs masses en bas ce dessous dessus : & lors le Roy d'armes de Berry accompagné de plusieurs heraulx & pouruiuans, cria dessus la fosse : Dieu vueille auoir pitié & mercy de l'ame de treshault & trefexcellent Prince Charles Roy de France vj. de ce nom nostre naturel & souuerain seigneur : & apres s'escria le dessusdit Roy d'armes, Dieu doint bonne vie à Henry par la grace de Dieu Roy de France & d'Angleterre nostre souuerain seigneur, & apres ce cria de rechef le dessusdit Roy d'armes : lequel cry accompli les sergens d'armes dessusdits redresserent leurs masses les fleurs de lys dessus, en criant tous à vne voix : Viue le Roy, viue le Roy. Et toutes ces besongnes ainsi faictes, tous les seigneurs retournerent dedans Paris : auquel lieu auoit esté ordonné pour la garde d'icelle à tout foison gens d'armes messire Guy le Bouteiller, & le Bastard de Thian chevalier. Et avec ce auoient commis plusieurs capitaines sur les champs à tout leurs gens, pour garder les passages contre les Daulphinois : affin qu'ils ne feissent nulles entreprinſes ou doinnages. En outre ledit Duc de Bethfort seul & pour le tout demoura Regent & gouuerneur du Royaume de France, pour & ou nom de son nepueu le ieune Roy Henry quant à ce qui estoit en son obeissance, ainsi & par ceste maniere fina sa vie ce trefnoble Roy Charles ou xlvj. an de son regne, lequel grand partie d'iceluy eut moult de grandes tribulations, par le moyen des diuisions qu'eurent l'un contre l'autre les plus prochains de son sang. Dieu par sa doulce pitié & misericorde vueille auoir mercy de son ame.

*Cy finist le premier volume d'Enguerran de Monstrelet, avecques les grandes Chroniques des Roys de France : des Papes regnans en leurs temps : & plusieurs autres nouvelles choses aduenues en Lombardie : és Itales & autres diuers païs, és temps du regne desdits Roys. Le tout fait & adiousté avecques la Chronique dudit de Monstrelet, acheué d'imprimer à Paris, par Iean le Blanc, l'an de grace mille cinq cens septante & un.*







TABLE EN LAQUELLE COMME PAR LIEVX  
COMMUNS LES MARIAGES ET MORTS DE  
personnes illustres, prinſes de villes, traictez de paix, & autres  
actions ſont miſes ſoubs le nom predicable où appellatif  
pluſtoſt que ſoubs le nom propre, pour la commodité  
de ceux qui veulent gaigner le temps en maniant  
ceſte eſpece d'auteurs.

A



*Buz & maluerſations des Treſoriers &  
financiers du temps du Roy Charles vi.*  
149.b.

*Accuſation contre le Duc de Bourgongne  
propoſée par ceux d'Orleans inſerée tout  
du long en ce linre.* 52.b.

*Alençon erigé en Duché.* 210.b.

*Alibaudiere forterefſe en Champaigne où les Daulphi-  
nois ſe retiroient contre les Bourgongnons.* 286.b.

*Alibaudiere prinſe & demolie ſur les Daulphinois.* 287.b.

*Ambaſſadeurs du Pape de la Lune mittrez & diffamez  
à Paris.* 51.b.

*Amé Comte de Sauoye au ſecours du Roy & de la part  
Bourgignonne avec cinq cens bacinets.* 101.b.

*Amiennois fauoriſans le Duc de Bourgongne chaffent de  
leur ville les officiers du Roy.* 241.b.

*Anjou Duc partiſant pour les Bourgongnons.* 132.a.

*Aquitaine Duché donnée par le Roy au Duc d'Orleans ſon  
frere.* 30.b.

*Armagnac Cōneſtable de France aymant mieux deffendre  
le Roy contre les Bourgignons que contre les Anglois,  
laiffe la Normandie en proye aux Anglois qui l'occuperēt  
ſans reſiſtance.* 247.a.

*Armagnac Conneſtable de France empêche la paix au  
dam du Roy & de luy.* 258.b.

*Armagnac Conneſtable de France maſſacré par la commu-  
ne de Paris.* 261.a.

*Aſſaſſinat commis en la perſonne du Duc Loys d'Orleans  
frere du Roy Charles vi.* 31.b.

*Aſſaſſinat entrepris contre la perſonne du Duc de Bourgon-  
gne.* 123.b.

*Alliance du Duc Philippes de Bourgongne avec les An-  
glois apres la mort de ſon pere.* 282.b.

B.

*Barrois & Lorrains en guerre l'un contre l'autre.*  
25.b.

*Beaujoulois pretendu deuoir hommage au Duc de Sauoye.*  
73.a.

*Berry Duc conſpire avec les Orleannois contre le Duc de  
Bourgongne.* 98.a.

*Boucicault Mareſchal de France chaffé par les Geneuois.*  
90.a.

*Bourdon executé à mort par le commandement du Roy  
Charles vi.* 239.b.

*Boulenois chaffent les Bourgignons de leur terroier.* 240.b.

*Bourbounois rauagé & couru par les Bourgignons.* 131.a.

*Bourgignons au ſecours de l'Eueſque du Liege contre les  
Liegeois.* 72.a.

*Bourgignons deſſauoriſez par le Duc d'Aquitaine.* 154.a.  
*Bourgignonne faction chaffée de Paris & deſſauoriſee en  
Court.* 169.a.

*Bourgignonne faction banie de Paris.* 174.a.

*Bourgignonne armée dedans S. Denys pres Paris.* 184.b.

*Bourgignons demandent la paix au Roy eſtant poſſédé par  
les Orleannois.* 201.a.

*Bourgignons deuant Paris.* 249.b.

*Borgne de la Heuze cheualier Normant fort renommé.*  
50.b.

*Bournouuille capitaine renommé de la part Bourgignonne  
pris & decapité à Soiffons.* 200.a.

*Bouteiller capitaine Bourgignon prend Reuën & les Cha-  
ſteaux.* 256.b.

*Brabant & des affaires d'iceluy païs.* 295.b.

*Braquemont cheualier Normant avec les Eſpaignols contre  
les Sarrazins.* 51.a.

*Bretons ſur le point d'entrer en guerre contre le Roy, &  
comme cela fut paciſié.* 89.b.

*Bulle du Pape Gregoire enuoyée au Roy de France ſur la di-  
uiſion de luy & du Pape de la Lune.* 29.b.

*Bulles du Pape de la Lune portans excommunications contre  
le Roy & le Royaume de France.* 47.b.

C.

*Cambray cité en diſcord avec les Chanoines de ſainct  
Gery & ce qui en aduint.* 219.a.

*Canny enuoyé en ambaffade par le Roy vers le Duc de Bour-  
gongne pour l'induire à concorde ſes inſtructions & la re-  
ſponſe qu'il eut.* 243.a.

*Canny retourné de ſon ambaffade eſt accuſé de trahiſon.*  
247.a.

*Canny de priſonnier qu'il eſtoit à la baſtille de Paris en de-  
uient capitaine.* 260.b.

*Carleſin aſſié & prins par le Conneſtable de France  
Charles d'Albret.* 19.a.

*Celeſtins de Marcouſſis fondez par le Sire de Montagu &  
les biens qu'il ſeit à noſtre Dame de Paris.* 146.b.

*Clameſſy Preuoſt de Paris par la deſtitution du ſeau de  
Bar.* 271.a.

*Clement Duc de Bauiere eleu Empereur au lieu du Roy de  
Boëſme.* 7.a.

*Clerc Preſident au Parlement de Paris ſuit Chancelier  
de France par la mort d'Euiſtache de Laſtre lors que les  
Anglois tenoient Paris.* 291.b.

*Cloceſtre Prince Anglois noté de ſuperbie.* 235.a.

*Clugnet de Brabant capitaine Orleannois court le païs d'Ar-  
thois.* 117.b.

*Clugnet de Brabant Admiral de France eſpouſe la Com-  
teſſe de Blois contre le gré des parens d'elle.* 15.b.

*Combat à outrance deuant le Comte de Hainault.* 20.a.

A



# TABLE DV PREMIER VOLUME

Combat en duel à Paris deuant le Roy.	83.a.
Concile de Pise & ce qui y fut fait décrit bien au long par lettres de l'Abbé de saint Maixans à l'Euesque de Poitiers inserées en ceste histoire.	84.b.
Concile de Constance se met en la protection du Duc de Bourgongne & le declare regent de France.	251.a.
Conclusions prises par la vesue & enfans du Duc d'Orleans contre le Duc de Bourgongne.	68.a.
Connestablie de France ostée à Charles d'Albret pour la donner au Comte de S. Pol.	129.a.
Connestablie de France ostée au Comte de S. Pol & restituée au seigneur d'Albret.	172.b.
Connestablie de France donnée au Comte d'Armagnac.	227.a.
Connestablie de France donnée par la Roynie au Duc Iean de Bourgongne.	254.b.
Croix cheualier de la maison du Duc de Bourgongne arresté par ceux d'Orleans qui fut l'une des occasions de renouveler la guerre.	105.a.
Conspiration de plusieurs Princes contre le Duc de Bourgongne.	95.b.
Courses & rauages de toutes parts sur les terres des seigneurs de la ligue Orleannoise.	137.a.
Courses & embusches des Bourguignons contre les Orleannois.	231.b.
Coquebuche maladie courant par le Royaume de France, l'an 1413.	197.a.
Croix prisonnier à Mont-lehery.	182.a.
Croix recouure son pere par la prise des enfans de Bourbon.	128.a.
Croix enade la prison de Mont-lehery.	187.a.
Crotoy & Beaurin mis en perpetuelle garde du Duc de Bourgongne.	94.b.

## D.

<b>D</b> Ecimes refusées au Pape Alexandre par le Clergé de France.	94.b.
Descente d'Anglois en Flandres & ce qui en aduint.	21.b.
Deffaite du Comte Valeran de saint Pol deuant Merq par les Anglois.	20.b.
Deffaite de François en Angleterre.	16.b.
Deffaite & prise du Comte de la Marche par les Orleannois.	131.b.
Deffaite d'Allemands par le Duc de Milan.	7.b.
Deffaite d'Orleannois au pais du Perche.	136.b.
Deffaite d'Irlandois par les François.	271.b.
Deffaictes de Bourgongnons par les Orleannois.	210.a.
Deffy du Comte de S. Pol contre le Roy d'Angleterre.	14.a.
Deffy du Roy d'Angleterre contre le Roy de France.	217.b.
Deffy enuoyé par les enfans d'Orleans contre le Duc de Bourgongne & la responce d'iceluy.	114.b.
Dissentions ouuertes entre Bourgongne & Orleans.	22.a.
Dissention entre Orleans & Bourgongne les causes & commencemens d'icelle.	20.a.
Dourlens se met en l'obeissance du Duc de Bourgongne & à quelles conditions.	242.a.

## E.

<b>E</b> mbralement des tentes Orleannoises deuant Arras & le dommage qui leur en aduint.	209.b.
Engennes rend par composition la ville de Chierbourg aux	

Anglois & ce qui luy en aduint.	255.b.
Entrée de l'Empereur Sigismond en Paris & l'occasion d'icelle.	229.a.
Entreueüe des Roy d'Angleterre, Roynie de France & du Duc de Bourgongne sur intention de traicter de paix & d'alliance.	272.b.
Entrée du Roy Henry d'Angleterre & de sa femme Catherine de France dans Paris comme heritiers de la couronne & les magnificences qui y furent faites.	297.b.
Espeueuse gentil-homme Picard mort par iustice est restitué honorablement.	147.b.
Essars Prenoist de Paris prisonnier, puis decapité au pourchaz de la faction Bourguignonne.	156.a.
Estampes Comté donnée par Iean Duc de Berry à Iean Duc de Bourgongne son nepueu & fileul.	231.a.
Escossois assailliz en guerre par les Anglois & la trefue qui s'en ensuiuit.	30.b.
Esquerre d'or donnée par le Duc de Bourgogne diuise a ceux de sa maison.	94.a.
Eureux & autres terres de Normandie delaisées par le Roy de Navarre moyennant Nemoux qui fut erigé en Duché & deux mille escuz.	17.b.
Excommunication du Roy & Royaume de France par le Pape de la Lune.	47.b.
Expedition du Duc d'Anjou pour conquerir Naples.	96.a.
Expedition du Duc de Bourgongne contre les Anglois rompue & reuouée par l'autorité du Duc d'Orleans.	25.b.

## F.

<b>F</b> ayete rend par composition Caën aux Anglois.	255.a.
Flamens abandonent le Duc de Bourgogne leur Prince.	121.a.
Flamens & plusieurs gentils-hommes s'excusent de seruir le Duc de Bourgongne contre la part Orleannoise par ce que le Roy asistoit à icelle.	198.b.
Forteresses de Paris & d'alentour mises es mains des Anglois par les Bourguignons.	294.a.

## G.

<b>G</b> allois ont secours du Roy pour faire guerre aux Anglois.	50.b.
Gamaches gouverneur de Compiengne pour le Dauphin deffaict des Anglois à Mont-épiloy.	292.b.
Garnisons Dauphinoises & où elles furent asises contre les François & Bourgongnons.	286.b.
Guarocheres & le seigneur de Croisy son pere tenans le pere pour Bourgongne, & le fils pour Orleans à la rencontre de S. Remy au Plain.	136.b.
Guiffart & autres Tresoriers prisonniers pour peculat.	154.a.

## H.

<b>H</b> arecourt espouse la fille seule heritiere du Comte de Tancarville.	255.b.
Harecourt prend son aîné le Comte de Harecourt.	258.b.
Harengue notable des deputez de la part Orleannoise au priue conseil du Roy.	163.b.
Henry Roy d'Angleterre salué Roy de France aux obseques du Roy Charles vi.	324. & final.
Henry de Lenclastre Roy d'Angleterre obtint la victoire contre ceux de Parsy.	7.b.



# D'ENGVERRAN DE MONSTRELET.

*Hic houd, ou Ich ouvth deuse en Flamen du Duc de Bourgongne signifiant en François ie le tiens.* 24.b.  
*Holandois en guerre ciuile pour le discord de Iean de Bauiere Euesque du Liege & Iaqueline de Bauiere sa niepce.* 255.a.  
*Hommage fait par le Duc de Bourgongne des Comtez de Bourgongne & d'Allost à l'Empereur.* 235.a.

## I.

**I***aqueline de Bauiere fille & heritiere du Comte de Hainault en guerre contre Iean de Bauiere Euesque du Liege son oncle.* 237.b.  
*Iaqueuille tiré de l'Eglise de Chartres & occis par Sauens.* 254.a.  
*Infraction de la paix de Bourges par les Bourgongnois.* 148.a.  
*Isle-Adam prend le party de Bourgongne & luy donne passage par sa ville.* 248.a.  
*Iean Pape premier auparavant nommé Baltazar Cardinal de Boulongne, ordre & ceremonies de sa creation descriptes.* 96.a.  
*Infraction de la premiere paix d'Arras d'entre les Bourgongnois & Orleannois.* 227.b.  
*Ioustes en court d'Arragon de trois François contre trois Arragonnois.* 15.b.

## L.

**L***anguen cheualier François tue un Anglois en dueil.* 265.a.  
*Largesse & liberalité du Duc de Bourgongne.* 94.a.  
*Lettres du Roy de Hongrie à l'Vniuersité de Paris.* 51.a.  
*Lettres du Duc d'Orleans au Roy plaintiues contre le Duc de Bourgongne.* 106.a.  
*Lettres secondes des enfans du Duc d'Orleans au Roy sur la mesme occasion.* 108.a.  
*Lettres du Duc de Bourgongne au Duc de Bourbon pour auoir ayde & donné confort contre ceux d'Orleans.* 115.a.  
*Lettres patentes du Roy contre les Orleannois.* 124.a.  
*Lettres de la ligue d'Orleans au Roy d'Angleterre surprises par les Bourguignons.* 133.b.  
*Lettres patentes du Roy sur la paix de Bourges.* 146.a.  
*Lettres du traité que firent ceux de la ligue d'Orleans avec les Anglois.* 155.a.  
*Lettres du Roy portans abolition des seditions aduenues en Paris.* 156.b.  
*Lettres patentes du Roy pour reprimer les troubles renaissans en son Royaume.* 156.b.  
*Lettres patentes du Roy sur la paix de Ponthoise.* 166.b.  
*Lettres patentes du Roy Charles vi. pour obuier aux troubles qui recommençoient.* 160.a.  
*Lettres patentes du Roy en faueur des Orleannois reuocatoires de celles qu'il auoit auparavant decernées contre eux.* 170.a.  
*Lettres du Roy prohibitiues de s'armer pour les factions.* 174.b.  
*Lettres du Duc de Bourgongne au Roy plaintiues du tort qu'on faisoit à ceux de son party.* 179.a.  
*Lettres du Duc de Bourgongne portans mandement de s'armer & le suivre pour la deliurance du Dauphin que tenoient les Orleannois.* 182.b.  
*Lettres du Dauphin pour reprimer les troubles.* 183.a.  
*Lettres escriptes de la propre main du Dauphin mandant*

*au Duc de Bourgongne qu'il vint par deuers luy pour le deliurer des Orleannois.* 185.a.  
*Lettres du Duc de Bourgongne pour se iustifier de l'armée qu'il auoit menée deuant Paris.* 186.b.  
*Lettres du Roy portans mandemens d'assembler gens pour aller contre le Duc de Bourgongne avec long discours de ce qui s'estoit auparavant passé entre les Orleannois & les Bourguignons.* 189.a.  
*Lettres du Duc de Bourgongne sur ce qu'il feist deuant Paris.* 187.b.  
*Lettres sur lettres du Roy portans diuers mandemens contre le Duc de Bourgongne.* 194.b.  
*Lettres patentes du Roy sur la cinquiesme paix faite à Arras, & la confirmation d'icelle.* 211.a.  
*Lettres du Roy Charles vi. sur le fait des troubles contenant les noms des perturbateurs & seditieux qu'il bannist de son royaume.* 232.b.  
*Lettres du Duc de Bourgongne aux estats de France, pour les attirer de son party.* 237.b.  
*Lettres du Duc de Bourgongne aux bonnes villes de France, luy estant deuant Paris.* 250.b.  
*Lettres patentes du Dauphin sur la paix de Poilly le fort.* 273.b.  
*Prinse de Ponthoise par les Anglois.* 275.b.  
*Lettres du Dauphin portans excuse de la mort du Duc Iean de Bourgongne.* 280.a.  
*Lettres du Roy Charles vi. sur le traité de la paix finale d'entre luy & les Anglois portans les articles d'icelle paix.* 288.b.  
*Lettres secondes du Roy Charles vi. sur la paix finale des Royaumes d'Angleterre & de France.* 294.b.  
*Lersies Baillif de Vermandois tenant la frontiere contre le Duc de Bourgongne.* 234.a.  
*Lersies Baillif de Vermandois & ses troupes defaites par les Bourgongnois. le pais de Vermandois & de Beauvoisis couru.* 241.a.  
*Lentées de deniers sur Paris & autres villes par le Duc de Bourgongne.* 266.b.  
*Ligny saisy par le Duc de Bar pour homaige non fait.* 293.a.  
*Liegeois reuoltez contre leur Euesque frere du Comte de Hainault, les causes de ce & les prinse de villes qui ensuiurent.* 28.b.  
*Liegeois en armes contre leur Euesque.* 50.b.  
*Liege pais gasté & bruslé par le Comte de Hainault.* 50.b.  
*Liegeois rompuz à HaZeban.* 73.a.  
*Lituaniens & Prussiens en guerre.* 97.b.  
*Lois de Bauiere chassé par la faction Bourguignonne hors de Paris.* 135.a.  
*Lorrains & Barrois en guerre.* 25.b.

## M.

**M***Arche & ses freres, Vandosme & Iean de Bourbon enuoyez au secours des Gallois & leurs aduentures.* 14.b.  
*Marche Comte nommé Iaques de Bourbon espouse la Reyne de Naples.* 127.a.  
*Mariages du Duc Iean de Touraine second fils du Roy avec Iaqueline de Bauiere heritiere de Hainault, & du fils aîné du Duc d'Orleans avec Isabel vefue du Roy d'Angleterre.* 22.b.  
*Mariage de Philippes de Bourgongne Comte de Nevers avec la damoiselle de Couffy fille du Cote de Soissons.* 82.b.



# TABLE DV PREMIER VOLUME

Mariage d'une fille du Roy d'Angleterre avec le Roy Dannemarch.	82.b.
Mariages du Duc de Brabant avec la fille du Roy de Boësmé, au fils de Montagu Grand maistre de France avec la fille du seigneur d'Albret, & de Charlotte de Bourbon seur du Comte de la Marche avec le Roy de Cypre faits en mesme temps.	89.a.
Mariage de Catherine fille du Duc de Bourgongne avec le fils du Duc d'Anjou.	95.b.
Mariage du Comte de Neuers à la seur du Comte d'Eu.	162.a.
Mariage du Duc de Brabant avec la Comtesse de Hainault.	263.b.
Mariage du seigneur de la Trimouille avec la Comtesse de Boulongne vesue du Duc Iean de Berry.	234.b.
Mariage du seigneur de Harecourt avec la fille seule heritiere du Comte de Tancarville.	255.b.
Massacre second fait par les Parisiens de ceux de la faction d'Armagnac.	265.b.
Mariage de Ieanne de Bethune Vicomtesse de Meaux avec Iean de Luxembourg.	267.
Mariage du Roy Henry d'Angleterre & de Catherine fille du Roy de France, à Troyes en Champagne.	288.b.
Mariage de René d'Anjou avec l'heritiere de Lorraine.	298.b.
Mariage de la fille du Duc d'Orleans (qui estoit prisonnier en Angleterre) avec le Comte d'Alençon.	303.a.
Meun sur Teuure donné au Dauphin Duc d'Aquitaine par le Duc de Berry.	109.a.
Mœurs & conditions du Roy Charles vi.	1.a.
Mecontentement des Ducs de Berry & Bourbon contre le Duc de Bourgongne pour lequel se departirēt de la court.	94.b.
Mine cauée sous les murs d'Arras par les Orleannois qui l'assiégerent: contreminée par les assiegez, le combat en icelle du Comte d'Eu contre le seigneur de Montagu Bourguignon.	109.a.
Montagu restitué apres sa mort & honorablement ensevely.	146.b.
Montagu Grand-maistre de France decapité pour crime de peculat.	91.a.
Mort de Iean de Montfort Duc de Bretagne, & comme ses enfans & pais furent mis en la garde & tutelle du Roy de France.	6.b.
Mort du Duc Philippes de Bourgongne premier de ce nom les mœurs & conditions.	18.a.
Mort de la Duchesse de Bourgongne fille de Loïs Comte de Flandres.	19.b.
Mort de Aubert de Bauiere Comte de Hainault & de Hollande.	31.b.
Mort du Duc d'Orleans par assassinat.	31.b.
Mort de Valentine de Milan Duchesse d'Orleans, les noms des enfans qu'elle laissa, leurs tiltres & seigneuries.	80.b.
Mort de la Roync d'Espaigne fille du Roy d'Anglet.	82.b.
Mort & massacre de l'Archeuesque de Reims au pais de Genes.	83.b.
Mort d'un Euesque de Paris M. Iean d'Orgemont.	88.b.
Mort d'Ysabel de France Duchesse d'Orleans.	90.a.
Mort de Loïs Duc de Bourbon oncle du Roy Charles vi. de par sa mere.	98.b.
Mort du Duc Henry de Bar.	107.b.
Mort du Duc Iean de Berry aduenue le 13.iour de Iuin 1416. sa race & genealogie.	131.a.

Mort du Roy d'Angleterre Henry de Lenclastre qui auoit usurpé la couronne sur Richard.	154.b.
Mort de plusieurs gentil-hommes pourchassés par les Parisiens mutinez.	162.a.
Mort de Lancelot Roy de Naples & l'entreprinse du Duc d'Anjou sur iceluy Royaume.	207.b.
Mort de Valeran Comte de S. Pol Connestable de France.	215.a.
Mort du Dauphin Loïs Duc d'Aquitaine & gendre du Duc de Bourgongne.	228.a.
Mort du Dauphin Iean gendre du Comte de Hainault.	235.b.
Mort du Comte Guillaume de Hainault.	237.a.
Mort du Roy Loïs de Cecille Duc d'Anjou.	240.b.
Mort & massacre inhumain du Comte d'Armagnac Connestable de France, & de plusieurs grans personages tenans son party, la fureur & cruauté auenglée du populace de Paris.	261.a.
Mort & massacre du Duc Iean à Montreau-fault-Tonne.	278.a.
Mort de Robinet de Mailly grand panetier de France.	285.b.
Mort du Roy Henry d'Angleterre heritier de France aduenue au Bois de Vincennes, ses ordonnances & dernieres voluntéz.	321.a.
Mort de Michelle de France femme du Duc de Bourgongne.	322.
Mort du Roy Charles vi. & ses obseques.	323.a.

## N.

Naples Royaumes & ce qui y entreprendrent les Florentins & Geneuois pour le Duc d'Anjou.	294.a.
Neelle pillée par les Bourguignons.	232.b.
Nemours erigé en Duché du temps de Charles vi.	17.b.
Neuers laisse le party du Duc de Bourgongne son frere pour ce que le Roy auoit pris le party Orleannois.	
Noms des Parisiens banniz pour la faction Bourguignonne.	231.a.
Noms des capitaines de l'armée Bourguignonne.	249.a.
Noms des seigneurs de la part d'Orleans demandez au supplice par les Parisiens.	156.a.
Normandie occupée la plus part par les Anglois.	242.b.
Normandie du tout conquise par les Anglois.	270.a.
Normans s'accommodent avec les Anglois vanicieux & portent la croix rouge.	271.

## O.

Obseques faictes au Duc Loïs d'Orleans long temps apres sa mort: & de l'oraison funebre qui y fut prononcée par Iean Gerson.	219.b.
Obseques faictes au Duc Iean de Bourgongne estant son corps trouué & deterré apres la prise de Montreau-fault-Tonne.	292.a.
Ors gentil-homme Arragonnois recerche les cheualiers Anglois de combat par honneur & plaisir.	2.a.
Orleans frere de Charles vi. appelé Henry de Lenclastre Roy d'Angleterre au combat, lettres de defiance sur ce & la responce d'iceluy Roy.	8.b.
Orleans occis voy mort.	
Orleannois defauorizez en court.	118.a.
Orleannoise armée contre les Bourguignons.	120.b.
Orleannois affligez & chassiez de toutes parts.	129.b.



# D'ENGVERRAN DE MONSTRELET.

Orleannois inhumainement traitez en prison, leurs corps  
morts demeurant sans sepulchre parce qu'ils estoient ge-  
neralement excommuniés. 130.b.  
Orleannois appellent les Anglois à leur ayde contre les  
Bourguignons & la surprise de leurs messagers. 133.a.  
Orleannoise armée mise sus pour la liberté du Roy & du Duc  
d'Acquitaine. 162.b.  
Orleannois treuvent ainsi le Daulphin en subiection comme  
auoient fait auparavant les Bourguignons. 182.a.  
Orleannoise armée dressée par le commandement du Roy le-  
quel y assista. 197.b.

## P.

**P**ardon de Jubilé à Rome l'an 1400. 6.b.  
Parisiens partiaux pour Bourgongne. 25.a.  
Parisiens mutinez pour le partement du Roy Charles vi.  
qu'on auoit amené à Tours appellant le Duc Iean de Bour-  
gongne. 80.a.  
Parisiens sont pour la part Bourgougnonne contre l'Orlean-  
noise. 116.b.  
Parisiens recourent leurs libertez & priuileges par le  
moyen du Duc de Bourgongne. 112.a.  
Parisiens proposent plusieurs demandes au Roy sur la police  
& estat de leur ville. 134.a.  
Parisiens mutinez par la menée du Duc de Bourgongne,  
font mourir plusieurs Orleannois. 156.a.b.  
Parisiens en armes pour garder les Orleannois de sortir de  
leur ville, forcent le Duc d'Acquitaine & les Princes à  
faire ce qu'ils veulent. 157.b.  
Parisiens tenez de fort court par les Orleannois. 194.b.  
Parisiens irrités de la mort du Duc Iean de Bourgongne  
conurent contre ceux qui l'auoient meurdry. 280.  
Partement secret du Duc de Bourgongne se sentant le plus  
foible en Paris. 169.b.  
Petit Docteur en Theologie condamné d'heresie pour la ha-  
renque qu'il feut deuant le Roy pour le Duc de Bourgou-  
gne. 181.a.  
Pieruels contendant à l'Euesché du Liege. 28.b.  
Polonois Hongres & Prusiens en guerre. 95.a.  
Pontieure pacifié avec le Duc de Bretagne. 98.b.  
Pontieure Comte Breton prend le Duc de Bretagne son sei-  
gneur. 300.a.  
Portugois gentils-hommes au nombre de trois vaincuz par  
trois François en combat de camp cloz. 212.b.  
Praguons guerroyez par le Pape & les Euesques d'Alle-  
magne. 292.a.  
Prandegrets cheualier Anglois accepte le combat contre  
Oris cheualier Arragonnois. 321.  
Prelats de France assemblez à Paris sur la diuision des deux  
Papes & ce qu'ils ordonnerent. 28.a.  
Prelats de France assemblez sur le fait du schisme contre  
Pierre de la Lune. 51.b.  
Preparatifs de guerre entre les Bourguignons & Orlean-  
nois. 98.b.  
Preparatifs des Anglois pour descendre en France & l'oc-  
casion de ce. 216.a.  
Preparatifs merueilleux de Bourguignons contre les Orlean-  
nois. 127.b.  
Preparatifs du Duc de Bourgongne pour soutenir la guerre  
contre les Orleannois qui auoient le Roy pour eux. 197.a.  
Prise d'Arames sur les François. 314.b.  
Prise de Beaumont sur Oyse par les Bourguignons. 248.b.

Prise du Duc de Bretagne par le Comte de Pontieure. 300.a.  
Prise de Caën par les Anglois. 255.a.  
Prise de Chierbourg sur les François. 255.b.  
Prise de Compiengne & autres villes sur les Armagnacs. 260.b.  
Prise de Compiengne sur les Bourguignons par le seigneur  
de Losqueaux. 263.b.  
Prise de Compiengne & autres villes sur les François par  
les Anglois. 316.b.  
Prise de Coucy par les Bourguignons sur les Orleannois &  
la demolition qu'ils y firent paroit encore aujourd'hui  
128.b.  
Prise de Crespy en Vallois sur les Daulphinois. 285.b.  
Prise de Dreux par les Anglois. 309.b.  
Prise du chasteau d'Estampes & de mess. Loïs Bourdon. 130.b.  
Prise de Chasteau-Gaillard & Roche-Guyon en Norman-  
die sur les François. 276.b.  
Prise de Gisors sur les François. 276.a.  
Prise & saccagement de Ham & les cruantez que les  
Flamans y exercerent. 119.b.  
Prise de Harfleur par les Anglois. 218.b.  
Prise du Comte de Harcourt. 259.a.  
Prise de Joigny par les Anglois sur les François. 296.a.  
Prise de Meaux par les Anglois & la grand perte qu'y  
feut le Daulphin. 314.  
Prise de Melun par les Anglois sur le Daulphin & la  
grand perte qu'il y feut. 297.a.  
Prise de Moyennes fort chasteau en Champaigne. 129.a.  
Prise de Monstreau-fault-Yonne sur les Daulphinois. 291.a.  
Prise de Muin & Fontaine Lauagan chasteaux fors en Pi-  
cardie sur les Daulphinois. 284.b.  
Prise de Paris par les Bourguignons sous la conduite du  
seigneur de l'Isle-Adam. 259.a.  
Prise du Pont S.Espirit par les Bourguignons sur les Daulphi-  
nois. 292.b.  
Prise de Ponthoise par les Bourguignons. 248.b.  
Prise de Ponthoise par les Anglois. 275.b.  
Prise de Roien par les Anglois. 269.b.  
Prise de Roze sur les Bourguignons & la briefue reprise d'i-  
celle. 283.a.  
Prise de S.Clou sur les Orleannois avec grand meurtre des  
leur. 126.a.  
Orleannois leuent le siege de deuant Paris. 127.  
Prise de Sens par les Bourguignons sur les Daulphinois. 291.b.  
Prise de Soissons par les Orleannois sur les Bourguignons &  
le piteux saccagement d'icelle. 199.a.  
Prise de Tours par le Daulphin sur les Bourguignons. 266.b.  
Prise de Veruins par les Orleannois. 138.b.  
Prise de Villeneufue le Roy par les Daulphinois sur les An-  
glois. 302.a.  
Procedures faictes contre le Duc de Bourgongne sur ces  
pour doubte de ses forces mesmes de la victoire qu'il auoit  
eüe contre les Liegeois. 79.b.  
Proces fait par contumace cõtre le Daulphin pour la mort  
du Duc de Bourgongne. 298.a. & 302.a.  
Prusiens & Lituanens en guerre. 97.b.

## R.



# TABLE DV PREMIER VOLUME

<b>R</b> aimonet de la guerre tenant la frontiere contre le Duc de Bourgogne.	234.a.
Recherche sur les officiers de France faite à la requeste des trois estats.	153.b.
Reformation des affaires du Roy faictes par le Prince.	91.a.
Regence de France refusée au Duc de Berry & donnée au Daulphin Duc d'Acquitaine fils du Roy par les estats.	207.b.
Regence du Royaume de France prise par le Daulphin Duc d'Acquitaine & ostée aux Princes.	215.a.
René Pot gouverneur de Daulphiné.	94.b.
Repudiation faite par le Duc d'Anjou de la fille du Duc de Bourgogne.	178.b.
Requeste du Duc de Bourgogne & de ses freres au Roy.	22.b.
Resolution du conseil de France de donner la bataille au Roy d'Angleterre.	221.
Retel Comté cedée au Duc de Nevers.	29.a.
Reuocation de la sentence donnée iadis contre Jean Petit.	229.a.
Reuocation des condamnations & censures de la proposition de maistre Jean Petit.	265.a.
Reuolte des Geneuois contre le Roy de France.	90.a.
Reuolte des Neapolitains contre leur Roy Iacques de Bourbon Comte de la Marche.	236.a.
Deffaite d'Anglois par les Francois à Valmont en Caux.	237.a.
Reuolte de la Roynie Ysabel de Bauiere femme du Roy Charles vi. contre le Daulphin son fils, comme elle print le party de Bourgogne & les occasions de ce.	252.a.
Rithme Francoise sur les calamitez du Royaume de France apres la bataille d'Azincourt.	226.b.
Rithme Francoise sur la plainte de pauvres laboureurs.	318.
Ront gentil-homme Bourguignon & l'offre qu'il fait au Duc.	197.a.
Roüen cité prend le party de Bourgogne.	240.a.
Gaucourt occis par ceux de Roüen s'esleuans pour la part Bourguignonne.	240.a.
Roupte des Liegeois à Hazeban.	73.a.
Roupte memorable des Francois à Azincourt.	223.a.
Roupte de Francois pres S. Riquier.	308.a.
Roye Archeuesque de Reims dissentent à l'Vniuersité de Paris, apelle de ce qu'elle auoit statué sur le fait du schisme.	70.b.

S.

<b>S</b> auoye Comté erigée en Duché.	237.a.
Sauueses mis en route & chassé par ceux de Beaunais.	255.b.
Sauueses occist Iacqueuille.	254.a.
Sauoyse & ce qui suruint entre luy & l'vniuersité de Paris.	15.a.
Saisie effectuelle des terres & seigneuries de ceux de la ligue Orleannoise.	128.a.
Secours enuoyé par le Roy de France en Galles contre les Anglois & ce qu'ils y firent.	17.a.
Secours du Duc de Bourgogne aux Parisiens assiegez par les Orleannois.	125.a.
Secours d'Anglois par les Orleannois.	137.b.
Secours d'Anglois arrive à la Hogue au pais de Constantin pour la part Orleannoise.	144.b.

Secours imploré par ceux de Roüen assiegez.	268.a.
Senlis cité prend le party de Bourgogne.	248.a.
Sermens prestez par les seigneurs, villes & communaulté du Royaume sur la paix d'Arras.	214.a.
Siege mis deuant Blaye & Bourg pour neant par le Duc d'Orleans.	25.a.
Siege de Paris par les Orleannois du costé de Gentilly & S. Marcel.	102.a.
Siege de Ham par le Duc de Bourgogne.	119.a.
Siege de Paris par les Orleannois du costé de saint Denys.	122.a.
Siege de Bourges par les Bourguignons, le Roy & le Daulphin estans avec eux.	140.b.
Siege de Compiengne par les Orleannois.	198.a.
Siege d'Arras sur les Bourguignons.	202.b.
Siege de Harfleur par les Anglois la descente qu'ils auoient faite auparauant.	218.a.
Siege pour neant mis par les Bourguignons deuant Corbeil.	251.b.
Siege mis deuant Senlis par les Armagnacs leué par les Bourguignons.	258.a.
Siege de Senlis leué par les Bourguignons.	255.b.
Siege assis deuant Mont-lehery par les Parisiens.	266.a.
Prinse de Soissons sur les Bourguignons.	266.a.
Siege de Roüen par les Anglois.	264.b.
Siege de Melun par les Anglois & Bourguignons le seigneur de Barbazan estant dedans pour le Daulphin.	293.a.
Siege de Chartres leué par le Daulphin.	304.a.
Sigismond couronné Empereur à Aix la chappelle: les noms de ceux qui s'y trouuerent ou enuoyerent.	206.b.
Sigismond Empereur vient visiter le Roy de France à Paris.	229.a.
Sigismond Empereur seant en Parlement à Paris decide sagement d'un differend d'entre deux cheualiers pour la Seneschauſſée de Beaucaire.	229.b.
Sigismond Empereur va en Angleterre.	229.b.
Simon de Montagu fait Euesque de Paris.	89.a.
Sommations faictes au Duc de Bourgogne par le Roy d'Esther en droit contre les accusations de la Duchesse d'Orleans.	71.b.
Supplice de mess. Manshart du Boz cheualier de la part Orleannoise.	130.b.
Supplice des factieux pour la part Bourguignonne dans Paris.	169.b.

T.

<b>T</b> abary brigand renommé.	264.a.
Tamberlan contre Bajazet.	17.b.
Tailles & impots decernez au conseil du Roy auxquelles se opposa le Duc de Bourgogne.	19.b.
Torsy ou Torsy petite ville en Auxerrois se deffend vaillamment contre les Bourguignons.	288.a.
Tonnerre Comte Bourguignon chassé de ses terres par le Duc de Bourgogne pour cause de felonnie.	208.b.
Tours cité reçoit les Bourguignons.	252.b.
Trahison contre le Roy d'Angleterre descouuerte & punie.	218.a.
Trahison de faction Bourguignonne en Paris descouuerte & punie.	230.a.
Traicté de paix premier entre Orleans & Bourgogne.	25.a.



*Traicté de paix fait à Chartres entre les Ducs de Bourgogne & d'Orleans, les ceremonies, formalitez qui y furent tenues.* 81.a.  
*Traicté de paix entre les Princes d'Orleans & de Bourgogne nommée la paix de Vicestre.* 102.b.  
*Traicté de paix de Bourges entre les Orleannois & Bourguignons qui fut depuis iuré à Auxerre.* 144.a.  
*Traicté de paix à Pontoise entre les Orleannois & Bourguignons.* 165.b.  
*Traicté de paix d'Arras entre les Orleannois & les Bourguignons.* 209.b.  
*Traicté de paix entre les Orleannois & Bourguignons à Poilly le fort.* 273.a.  
*Traicté & articles de la paix appellé finale par laquelle le Roy d'Angleterre est institué heritier de France.* 288.b.  
*Traict cité assaillie par le Duc de Lembourg frere du Duc de Bourgogne, où il fut à la fin receu pour seigneur.* 29.a.  
*Trefues particulieres des Bourguignons & Anglois en quoy les Bourguignons monstrent qu'ils le vouloient soustraire de l'obeissance du Roy.* 231.b.  
*Tresoriers prisonniers pour peculat.* 154.a.  
*Trimouille espouse la vefue du Duc Iean de Berry Comtesse de Boulongne.* 234.b.  
*Tripoly Comte frere du Roy de Ciprevient en France.* 231.a.

V.

**V**aleran Comte de S. Pol dresse vne armée de mer contre les Anglois. 18.b.  
*Verchin cheualier Hennuyer tenant ioustes à tous venans à Couffy en Picardie.* 8.a.  
*Vertu Comte eschappé de la ville de Paris & s'en fuit*

*vers le Duc d'Orleans son frere.* 160.a.  
*Victoire navalle des Bretons contre les Anglois.* 15.a.  
*Victoire des Bourguignons & Hennuyers à Hazeban contre les Ligeois.* 73.a.  
*Victoire des François contre les Anglois à Baugé en Anjou où fut tué le Duc de Clarence frere du Roy d'Angleterre.* 302.b.  
*Viry gentil-homme Sauoyssien desie le Duc de Bourbon & le guerroye, & ce qui en aduint.* 82.b.  
*Vniuersité de Paris s'entremet de la querelle de Bourgogne & d'Orleans.* 24.b.  
*Vniuersité de Paris poursuit la destitution de Pierre de la Lune & l'emprisonnement de plusieurs notables hommes qui tenoient son party.* 45.b.  
*Vniuersité de Paris escrit au Roy de Hongrie sur le fait du schisme.* 51.a.  
*Vniuersité de Paris s'oppose aux charges & impositions que le Pape vouloit faire sur l'Eglise Gallicane.* 104.a.  
*Vniuersité de Paris propose deuant le Roy plusieurs choses pour la reformation du Royaume.* 148.a.  
*Vniuersité de Paris desaduoue la mutinerie des Parisiens.* 156.b.  
*Vnion de l'Eglise Romaine pourchassée par le Roy de France, par la conduite du Duc d'Orleans son frere.* 19.a.

Y.

**Y**rlandois & de leurs façons de faire & de s'armer. 264.b.  
*Isabel vefue du Roy d'Angleterre demandée par les Anglois, refusée par le moyen du Duc d'Orleans qui la vouloit faire espouser à son fils aîné.* 25.b.

F I N.



ANNOTATIONS ET CORRECTIONS SVR  
LE PREMIER VOLUME D'ENGVERRAN DE  
MONSTRELET.

LE premier volume de cest auteur se trouue en la librairie Royale escrit à la main, & comme marque le scribe sur la fin, paraccomply de grossoyer l'an 1440: auquel an l'auteur acheuoit son second volume, descriuoit la reconciliation du Roy Charles vij. avec le Duc Philippe de Bourgongne, & y couchoit les articles comme ils furent accordez la mesme année à Arras. Nous eusmes par la permission de nosseurs qui ont charge de celle librairie, communication du liure, que nous estimames de grand foy veu qu'il estoit escrit du viuant de l'auteur. Neantmoins des trois parts la premiere y est faicte par maniere d'Epitome, le reste se continue suiuant le texte commun. Et par ce que quand le liure nous fut communiqué, les deux premieres parties de ce volume estoient desia imprimées, nous n'auons sceu plus faire, que d'acheuer le reste sur sa correction dressee à l'ayde d'iceluy liure, & de vous cotter en cest endroit les plus notables diuersitez de ce qui precede.

Feuillet 1. page 2. ligne 13. Conchy, les premiers imprimeurs ont laissé ceste faute, & nous apres eux en plusieurs lieux, par ce que aux vieux liures escrits à la main & en Picard il y auoit Couchy, & que les scribes s'abusant souuent en melant n pour u. C'estoit le seigneur de Coucy le chasteau en Picardie, leq̃l chasteau fut quelque temps apres acquis par le Duc Loïs d'Orleans, & depuis prins sur ses enfans, & à demy ruiné par les Bourguignons, comme on le voit aujourd'huy-ainsi qu'il est cy apres recité. Froissart narre autrement ceste aduventure.

f.6.p.2.l.13. Persy, lisez Parsy.

f.7.p.1.l.23. Speciales conuenances, l'auteur (qui panche un peu du costé de Bourgongne) n'ose dire que le Duc d'Orleans eust acquis ce Duché du Roy de Boëfme, ce que autres ont escrit, mesmes le seigneur de Langeyle ramentoit en ses memoires.

f.8.p.1.l.1. Vverehin, au liure du Roy il y a Vverchin, corrigez le aux autres endroits pareils, & en la 8 ligne ensuiuante Conchy pour Coucy, comme vous estes cy dessus aduertiz.

f.9.p.1.l.2. Nous deux nous trouuerös pour outre nostre iournée, au liure du Roy y a

en lieu d'outre outrer, qui est un mot fort elegant pour telle action.

f.9.p.2.l.9. Reparson, il y a Rampson.

f.9.p.2.l.16. ne par nous commencée, suit apres, mais puis que vous auez ainsi commencé &c.

f.10.p.1.l.20. De Londres ce cinquiesme, il y a quinziesme.

f.10.p.1.l.24. Blais, escriuez Blois.

f.10.p.1.l.28. Licelue, Leichestre, & Nort, il y a au liure du Roy Lincebuc, Leycestre & Norchambre.

f.11.p.2.l.16. & qu'elle auoit perdu son seigneur, il y a parson, en lieu de perdu, & en la 6 ligne ensuiuant, que vous que pour escheuer, se trouue que vous me dites pour escheuer, & en la ligne prochaine d'audessous, sang humain, vous estant venu de pardeca & moy à l'encötre.

f.13.p.1.l.20. resõdu vous auons par amour, il y a parauant, en lieu de paramour, & en la 9 ligne suiuiante y a vostre en lieu de nostre.

f.14.p.2.l.32. Comte de Reihel, il fault Rethel.

f.17.p.2.l.15. Linourgie, on dit que c'est Lincolnie.

f.21.p.2.l.15. Sauences, fault Sauenses, & Rubempré, & Hangeß.

f.21.p.2.l.32.



f.21.p.2.l.32. Preembroc, il y a Pennebrot.  
 f.22.p.1.l.2. Le Duc de Bar, Comte de Dā-  
 martin, metez le entre Bar & Comte, &  
 à deux lignes au deffoubs, Preaux en lieu  
 de Priaux.  
 f.24.p.2.l.37. Hic houd au liure escrit à la  
 main y a Ichhouue.  
 f.23.p.1.l.6. Sanoifon, peult estre fault Sa-  
 uoify.  
 f.28.p.2.l.2. Henon, pour Hainault, & à  
 la 4 ligne ensuiuant ce fut le fils du sei-  
 gneur de Pieruels.  
 f.37.p.1.l.9. ceux qui sont versez en la Bi-  
 ble, scauent qu'il fault Zainry pour  
 Zambry, par tout en ce fueillet, encores  
 qu'il soit ainsi au liure du Roy.  
 f.50.p.2.l.17. Martin Pouure, il y a grand  
 coniecture qu'il fault Porée, qui fut un  
 Theologien renommé de ce temps là, &  
 dont est faicte mention ailleurs en ceste  
 histoire.  
 f.75.p.2.l.33. Fosseur, il fault Fosseux ou  
 Fausseuse.  
 f.80.p.2.l.22. Clauchy & d'Ach, faudroit  
 il poinct Coucy, & d'Ast qui sont deux  
 seigneuries qui estoient des ce temps, en la  
 maison d'Orleans.  
 f.83.p.2.l.23. au tiltre de ce chapitre, fault,  
 Gregoire, en lieu de Benedict.  
 f.84.p.1.l.13. Caudie, cest peult estre Candie.  
 f.93.p.1.l.17. Fuzes, & Armagnac, fault  
 Foix & Armagnac.  
 f.93.p.2.l.15. Saudiuers, lisez Cham-diuers.  
 f.193.p.1.l.32. Toursy, il y a quatre lignes  
 au dessus Torisy si cest une mesme famil-  
 le, l'enquerir en seroit trop penible, le li-  
 ure du Roy qui est encores abbregeé en cest  
 endroit ne denombre ces cheualiers.  
 f.103.p.2.l.5. Ou se ioinct adonc le Duc & c.  
 ceste phrase est usitée à l'autheur, & ne  
 fault y mettre, & seiournoient.  
 f.120.p.1.l.31. Bourguignōs, lisez Bourgeois.  
 f.128.p.1.l.1. Messire Loïs de Bourbon, il  
 fault de Bourdon, qui estoit un capitaine  
 de la part Orleannoise, & à 25 lignes au

deffoubs Hangeft, pour Hangieres, cor-  
 riger le en autres endroits semblables, et  
 au 12 fueillet, ensuiuant ostez, de, de Loïs  
 Bordon, ce capitaine mourra cy apres  
 par le commandement du Roy Charles  
 vi. estant en ses intervalles plus sains.  
 f.141.p.2.l.29. S. Cesaire, encores qu'on le  
 doute qu'il faille Sacerre toutesfois alors  
 peult estre on le nommoit ainsi, sinon en  
 Francois, paraduventure en Latin, car  
 aucuns le nomment Sacrum Casaris. Il  
 s'aperçoit souuent en cest autheur, qu'on  
 luy enuoyoit des aduiz ou nouuelles en  
 Latin, qu'il traduisoit en Francois escor-  
 chant le Latin au noms propres, par ce  
 qu'il ignoroit l'apellation commune: com-  
 me quand il dit Blauie, pour Blaye, que  
 Ausonne le poëte qui en estoit voisin ap-  
 pelle Blauia Burgy, pour Bourg, Parcia-  
 que, pour Parsy & infinité de sēblables.  
 f.148.p.1.l.15. plus à plain déclaré. Et en a-  
 pres, il y a apparence de quelque ommis-  
 sion en cest endroit: toutesfois, au liure  
 du Roy il n'est poinct autrement.  
 f.149.p.1.l.38. Iacoit qu'au temps passé il  
 n'y eust pas grande somme, au manuscrit  
 la negatiue est ostée, & à la 5 ligne en-  
 suiuant en lieu de demoure, deuoré.  
 f.149.p.2.l.22. En la page suiuiante ligne  
 22. pour Caif, il y a Chauif, & en la ligne  
 d'empres, Brochier, pour Bouchier, en la  
 mesme ligne i'eusse pensé qu'en lieu d'inu-  
 tiles, il faillust inuēteurs: mais il est ainsi  
 au liure du Roy: c'estoit peult estre une  
 iniure de ce temps là que le vulguaire a-  
 uoit elongnée de son analogie.  
 f.171.p.1.l.19. Coutelier escorcheur de va-  
 ches, il y a en l'exemplaire du Roy Cabo-  
 che, entre les mots de Coutelier, & escor-  
 cheur.  
 f.201.p.1.l.33. ville de Douay, il y a apres  
 en l'exemplaire du Roy, il asist ses gar-  
 nisons en plusieurs villes & fortresses  
 de la Comté d'Arthois, & furent mis en  
 la ville de Douay grand partie & c.



f.203.p.1.l.4. *Vaudemont*, il y a *Baudimôt*, au liure susdit.

f.203.p.2.l.13. *Vvargis*, lisez *Vergy*, & en la 9 ligne d'empres *Ieumont*, pour *Iemmont*, & 5 lignes au dessoubs *Brimeu*, pour *Brumeur*.

f.206.p.2.l. finale. *Bourgion*, ie croy qu'il fault *Burgraaf*.

f.218.p.1.l.1. *Hautonne*, changez l'u en n.

f.232.p.1.l.11. *Bruneu*, lisez *Brimeu*.

f.232.p.2.l.23 apres paix, ostez le colon; & ces trois mots, & à ce, & apres, iour, metez, & de la nuict, en aduisant & imaginant par toutes voyes & manieres & possibles.

f.241.p.1.l.1. *Hangiers*, pour *Hangeft* & en la ligne finalle *Demmin*, pour de *Muin*.

f.249.p.1.l.27. *Iouuelle* changez le premier u en n.

f.256.p.2.l.21. *Mommeliart* la seconde m en b.

f.261.p.1.l.38. *Cepier* & *Cepiere* c'est à dire geolier & geoliere, prenant ce mot son origine de ceps qui est un trauail pour domter les prisonniers bagars.

f.284.p.2.l. fin. *Hautiton*, *Froissart* l'appelle *Hostidonne*.

f.271.p.1.l.27. *Fery Fontaine*, il y a ailleurs *Sery Fontaine*.

f.274.p.2.l.14. le seigneur d'Autre, lisez d'Ancre.

f.319.p.2.l. penult. *Todigues*, il fault *Rodigues*: il entend des *Castillans* qui venoient au secours des *Francois*, comme les *Escossois*. Et par ce qu'aux *Castillans* le nom de *Roderique* estoit frequent, il les appelle par soubriquet *Todigues*, ou *Rodigues*: aussi y auoit il au seruice du Roy *Charles vij.* un vaillant capitaine de ceste nation, nommé *Roderigue de Villandras*: toute ceste rithme n'est en l'exemple du Roy.

Av denombrement des morts, à la bataille d'*Azincourt*, y a quelques diuersitez, entre le liure du Roy & l'imprimé, que nous auons suiuy, lesquelles diuersitez, sont icy exactement cottées en l'honneur des morts à icelle malheureuse iournée, & en faueur de ceux qui sont extraits de leurs maisons. au fueillet 225 ligne 6 ostez seigneur, & metez *Iean*. 11 ligne, *Hem*, en lieu de *Heu*, la mesme, *Cristophle*, en lieu de *Philippe*. 16 *Quistelle*, lisez *Guistelle*. 18 *Iean Bailleul*, lisez *Iean de Bailleul*. 21 *Varigines*, *Vvarigines*. 27 *Boue seigneur*, escriuez *Boue*, le seigneur. 38. *Auemont sur Loire*, *Chaumont sur Loire*. 39 *Iean Dreux*, *Iean de Dreux*, en la mesme ligne, mesire *Germain*, de *Dreux*, il ne se trouue au liure du Roy. 44. *Valecourt*, *Valencourt*, *Montganguier*, *Montgaugnier*. 46 *Gille Seneschal de Hainault*, il y a *Gille* & par distinction, le *Seneschal* & c. Page seconde, ligne premiere, *Hamette*, *Hamede*. 3 *Potres*. 4 *Philippes*, *Cristophle*. 6 *Quieuran Quieurain*. 12 *Vendosne Vendosme*. 23 *Descouuelle d'Escouneuelle*. 31 *Montbertant*, *Mötbertault*. 31 ostez mesire. 32 *Villiers*, les trois gentil-hommes qui ensuiuent ne sont au liure du Roy. 35 *Perceual de Richebourg*, il y a *Perceual* qu'on dit de *Richebourg* en la mesme ligne & autres lieux pour *Gerbauual*, se trouue *Guerboual*. 39 *Vauerans*, *Vvaurins*. 40 *Pierre Remy*, *Pierre de Remy*. 41 d'Anne d'Aisne. 43 *Haudin*, *Baudin*, finale ligne *Haureßiz Hauures*, & *Ognies*, pour *Ogines*. fueil. ensuiuant page 1. lig. 1. *Caule*, *Chaule*. 2 *Tristan*, *Brissault*. 3 *Laugeois*, *Baujois*. 26 apres ayant oui ce & c. voila ce qui se trouue de diuersité en cest endroit au liure du Roy escrit, comme dit est, du viuant de l'auteur.







## EXTRAICT DV PRIVILEGE.

P A R grace & Priuilege du Roy, il est permis à Pierre l'Huillier & Guillaume Chaudiere, marchands libraires en l'vniuersité de Paris, d'imprimer ou faire imprimer vendre & distribuer vn liure intitulé, les *Chroniques d'Enguerran de Monstrelet* &c. Et deffenses à tous autres de quelque estat & qualité qu'ils soient d'imprimer ou faire imprimer, vendre ne distribuer ledit liure iusques à huiet ans sur peine de confiscation desdits liures & d'amende arbitraire, comme apert plus amplement és lettres de priuilege données à Paris le sixiesme de Novembre l'an de grace M. D. L X X I. & de nostre regne l'vnziesme.

Signé      GVILLAVDET.

Par le conseil,











95/41

7-4-63

20th

3

24  
2000



